

清
實
錄

高宗純皇帝實錄(六)

卷三八〇至卷四七九
乾隆十六年至十九年

清實錄

第一四冊

中華書局影印

清 實 錄

(第 一四 冊)

高 宗 實 錄 (六)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16·747/8 印張

1986 年 2 月第 1 版 1986 年 2 月北京第 1 次印刷

印數 0,001——1,500 冊

統一書號 11018·1355—14 定價: 55.00 元

清實錄第一四冊目錄

高宗純皇帝實錄(六)

卷三八〇	乾隆十六年正月上	一
卷三八一	乾隆十六年正月下	二
卷三八二	乾隆十六年二月上	三
卷三八三	乾隆十六年二月下	三
卷三八四	乾隆十六年三月上	四
卷三八五	乾隆十六年三月下	四
卷三八六	乾隆十六年四月上	五
卷三八七	乾隆十六年四月下	六
卷三八八	乾隆十六年五月上	七
卷三八九	乾隆十六年五月下	八
卷三九〇	乾隆十六年閏五月上	九
卷三九一	乾隆十六年閏五月下	一〇
卷三九二	乾隆十六年六月上	一一
卷三九三	乾隆十六年六月下	一二
卷三九四	乾隆十六年七月上	一三
卷三九五	乾隆十六年七月下	一四
卷三九六	乾隆十六年八月上	一五
卷三九七	乾隆十六年八月下	一六
卷三九八	乾隆十六年九月上	一七
卷三九九	乾隆十六年九月下	一八
卷四〇〇	乾隆十六年十月上	一九
卷四〇一	乾隆十六年十月下	二〇
卷四〇二	乾隆十六年十一月上	二一
卷四〇三	乾隆十六年十一月下	二二
卷四〇四	乾隆十六年十二月上	二三
卷四〇五	乾隆十六年十二月下	二四
卷四〇六	乾隆十七年正月上	二五
卷四〇七	乾隆十七年正月下	二六
卷四〇八	乾隆十七年二月上	二七
卷四〇九	乾隆十七年二月下	二八
卷四一〇	乾隆十七年三月上	二九
卷四一一	乾隆十七年三月下	三〇
卷四一二	乾隆十七年四月上	三一
卷四一三	乾隆十七年四月下	三二

卷四一四	乾隆十七年五月上	四二三
卷四一五	乾隆十七年五月下	四二六
卷四一六	乾隆十七年六月上	四四二
卷四一七	乾隆十七年六月下	四三七
卷四一八	乾隆十七年七月上	四七二
卷四一九	乾隆十七年七月下	四八五
卷四二〇	乾隆十七年八月上	四九七
卷四二一	乾隆十七年八月下	五〇七
卷四二二	乾隆十七年九月上	五一九
卷四二三	乾隆十七年九月下	五三〇
卷四二四	乾隆十七年十月上	五四五
卷四二五	乾隆十七年十月下	五六一
卷四二六	乾隆十七年十一月上	五七一
卷四二七	乾隆十七年十一月下	五八二
卷四二八	乾隆十七年十二月上	五九一
卷四二九	乾隆十七年十二月下	六〇一
卷四三〇	乾隆十八年正月上	六一八
卷四三一	乾隆十八年正月下	六二六
卷四三二	乾隆十八年二月上	六三九
卷四三三	乾隆十八年二月下	六四九
卷四三四	乾隆十八年三月上	六六一
卷四三五	乾隆十八年三月下	六七一
卷四三六	乾隆十八年四月上	六八五
卷四三七	乾隆十八年四月下	六九四
卷四三八	乾隆十八年五月上	七〇四
卷四三九	乾隆十八年五月下	七一二
卷四四〇	乾隆十八年六月上	七三二
卷四四一	乾隆十八年六月下	七三七
卷四四二	乾隆十八年七月上	七四八
卷四四三	乾隆十八年七月下	七六〇
卷四四四	乾隆十八年八月上	七七八
卷四四五	乾隆十八年八月下	七九〇
卷四四六	乾隆十八年九月上	八〇四
卷四四七	乾隆十八年九月下	八二二
卷四四八	乾隆十八年十月上	八三七
卷四四九	乾隆十八年十月下	八四三
卷四五〇	乾隆十八年十一月上	八五八
卷四五一	乾隆十八年十一月下	八七〇

卷四五一	乾隆十八年十二月上	八八六	卷四七一	乾隆十九年八月下	一〇九〇
卷四五三	乾隆十八年十二月下	九〇〇	卷四七二	乾隆十九年九月上	一一〇一
卷四五四	乾隆十九年正月上	九一五	卷四七三	乾隆十九年九月下	一一一二
卷四五五	乾隆十九年正月下	九二四	卷四七四	乾隆十九年十月上	一一二三
卷四五六	乾隆十九年二月上	九三五	卷四七五	乾隆十九年十月下	一一三三
卷四五七	乾隆十九年二月下	九四四	卷四七六	乾隆十九年十一月上	一一四七
卷四五八	乾隆十九年三月上	九五二	卷四七七	乾隆十九年十一月下	一一五六
卷四五九	乾隆十九年三月下	九六〇	卷四七八	乾隆十九年十二月上	一一七一
卷四六〇	乾隆十九年四月上	九七二	卷四七九	乾隆十九年十二月下	一一八〇
卷四六一	乾隆十九年四月下	九八四			
卷四六二	乾隆十九年閏四月上	九九四			
卷四六三	乾隆十九年閏四月下	一〇〇四			
卷四六四	乾隆十九年五月上	一〇一四			
卷四六五	乾隆十九年五月下	一〇二五			
卷四六六	乾隆十九年六月上	一〇三七			
卷四六七	乾隆十九年六月下	一〇四七			
卷四六八	乾隆十九年七月上	一〇五七			
卷四六九	乾隆十九年七月下	一〇六六			
卷四七〇	乾隆十九年八月上	一〇八〇			

大清高宗法天隆運至誠先覺體元立極敷文奮武孝慈神聖純皇帝實錄卷之三百八十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未春正月己亥朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○庚子

上詣

皇太后宮問安○諭朕奉

皇太后懿旨貴人巴林氏貴人陸氏俱晉封為

嬪欽此所有應行典禮該部察例具奏 又

諭朕奉

皇太后懿旨常在林氏封為貴人欽此著傳諭

內務府知之○又諭朕巡行江浙問俗省方

廣沛恩膏聿昭慶典更念東南貢賦甲於他

省其歷年積欠錢糧雖屢准地方大吏所請

分別緩帶以紓民力而每年新舊並徵小民

終未免拮据朕宵旰勤勞如傷在抱茲當翠

華親蒞倍深軫切用普均霑之澤以慰望幸

之忱著將乾隆元年至乾隆十三年江蘇積

欠地丁二百二十八萬餘兩安徽積欠地丁

三十萬五千餘兩悉行蠲免俾官無註誤民

鮮追呼共享昇平之福夫任土作貢歲有常

經自應年清年款江蘇積欠乃至二百二十

餘萬之多催科不力有司實不能辭其咎而

疲玩成習。豈民間風俗之澆漓。尚有未盡革歟。朕以初次南巡。故特加恩。格外嗣後該地方官。務宜諄切勸諭。加意整頓。其在小民。亦當湔除舊習。勉効輸將。勿謂曠典可希冀。屢邀而惟正之供。任其逋負也。其浙江一省。雖額賦畧少於江蘇。而節年以來。並無積欠。豈犬牙相錯之地。不齊乃至是歟。此具見浙省官民敬事急公之義。而江蘇官民所宜懷慚而效法者也。朕甚嘉焉。著將本年應徵地丁錢糧。蠲免三十萬兩。以示鼓勵。各該督撫。其仰體朕惠愛黎元之意。嚴飭所屬。實力奉行。使閭閻咸霑實惠。倘有不肖官吏。以完作欠。希圖侵蝕。察出即行糾參。從重治罪。並將此通行曉諭知之。○又諭。朕上年巡行嵩洛間。俗省方清蹕所經。已疊沛恩膏。彰行慶施。惠之典。但念該撫鄂容安不能體朕保赤殷懷。有捐輸辦差之舉。而該省紳民踴躍急公。就瞻恐後。其歡欣鼓舞之誠。不惟無怨而益肫

至今猶為繫念。所宜再沛恩施者也。其河南省乾隆十四年以前積欠。帶徵緩徵錢糧。三十五萬餘兩。著再加恩。槩行蠲免。俾該省小民。催科不擾。益宏樂利之休。該撫鄂容安。務董率有司。實力查辦。使閭閻均霑實惠。該部遵諭速行。○又諭。朕惠養黎元。哀矜庶獄。昨歲推恩中外。曠典特頒。已將五次。緩決罪犯。查明減等發落。咸予自新。顧念比年以來。獲罪之犯。尚有羈禁圜扉者。其情罪重大之案。數經讞鞫施行。其餘緩決之人。案情自屬稍輕。而淹繫經時。爰書日積。朕心惻焉。自昔行慶施惠。載在孟春。欽恤之仁。宜加推廣。所有直省朝審秋審各犯。緩決至三次以上者。即著該部查明。酌量案情。分別請旨減等發落。用宏肆赦之恩。以副協中之治。○諭軍機大臣等。朕前降旨。令準噶爾夷使。於朕起鑾前到京。原欲俾奏事後。即速回巢。今據鄂昌等奏報。一次後。並未再據奏報。看來夷使不但

十三日以前。不能到京。即朕起鑾後亦不能由陸路趕到。若令急行。轉致勞乏。殊非朕憐恤外夷之意。著寄信與鄂昌等。差妥員迎往。曉諭。著伊等仍帶貨物。緩行到京。時將貨物留京辦理。俟伊等來行在。瞻仰朕後。即回京料理起程。既無急行之苦。於事亦無遲誤。此朕體恤夷使。格外施恩至意。著一併明白曉諭。是日起。

上以孟春享

太廟齋戒三日。○辛丑。諭軍機大臣等。泗州知州陳慕楷。揭報盱眙縣知縣莊經畬貪贆不職一案。現在舒赫德黃廷桂會同詳悉查審。但思知州微員。敢於具揭直達部科者。或因撫臣主張刪款。意見齟齬。若不即行揭出。陳慕楷必且轉羅叅劾。是以勢不容已。激為此舉。乃至今並未見衛哲治有叅奏該知州之摺。究屬何因。著傳諭舒赫德黃廷桂就本案實在緣由。徹底訊明。亦不得豫存成見。有意

推求致失平允之道。尋奏陳慕楷款揭莊經畬經司審明。莊經畬並無大過。倉庫亦無虧缺。陳慕楷揭款多借事生波。因所揭不遂。恐自羅叅劾。遂駕砌謂撫臣衛哲治主張刪款。直揭部科。至衛哲治未經叅奏。緣江南府州習尚因循。此案即將本州叅處。恐各府州藉口。無益官常。且陳慕楷年壯。可望出力。又值大差。委管船務。莊經畬亦派往蘇州辦事。因各飭記過。再觀後效。報聞。○壬寅。諭據黃廷

桂摺奏上下兩江去年被水成災最重之宿州靈璧虹縣五河宿遷邳州睢寧海州沭陽等處。次重之鳳陽臨淮懷遠鳳臺壽州霍邱清河桃源安東等處。三冬已普霑存濟。而冬末春初。賑期已畢。青黃不接。民力猶恐難支。等語。著再加恩。將被災最重之州縣。極貧加賑三個月。次貧加賑兩個月。次重之州縣。無論極貧次貧。俱加賑兩個月。其貧生飢軍等隨所在地方。一體賑給。該督撫等董率有司

實力查辦務使災黎均霑實惠該部遵諭速行 癸卯享

太廟

上親詣行禮 詣

皇太后宮問安 遣官祭

太歲之神 諭嗣後每年年終王公等及歲之格格揀選額駙將在京舊家公侯伯之子弟一併揀選 諭軍機大臣等此次山海關贏餘銀兩已將一萬五千賞給高恒令將伊

父高斌未完銀一萬一千餘兩即於此內交完所餘銀兩雖伊兄高誠代伊接管但高恒現管鹽政養廉尚足敷用應令與高誠均分可即傳諭知之 又諭江蘇積欠錢糧朕已格外加恩槩與蠲免但該省賦額較之浙省所多無幾而浙江一無拖欠該省獨積至二百二十餘萬其壤地相錯民風亦相近彼則年清年款此則積欠纍纍豈非地方官辦理不善所致夫惟正之供豈可任其逋負從前

亦必因漸有拖延久而遂成積重之勢此次擴清之後若又聽其故智復行則頑戶將視為曠典可以常邀是蠲除之恩適以啟拖欠之端也大抵催徵之法醇頑在乎官吏官無玩愒之風吏無侵漏之弊民間斷不能任意抗延惟使知正賦必應全完無可拖延之事則相習既久即視為分所當然浙省其明驗也若稍有通融則竟若有例可循愈久愈深不惟國課有虧而民力轉多拮据亦受積欠之累是惟在立法之善可以屏除舊習而乘機振作正在此時可傳諭黃廷桂令其會同王師永寧將向來一切催徵舞弊之處加意釐剔盡行禁革務須立定章程使有司恪守規則不得稍有未清致滋復欠之弊則每年完納無虧閭閻亦永無新舊並徵之擾於國計民生均有裨益其悉心辦理毋忽 又諭河南通省積欠緩徵帶徵各項已降旨全行蠲免此項原因該地方偶有水旱偏災加恩

寬恤之項非頑戶抗欠可比中州風俗醇樸向無積欠此次加恩既將緩帶之款全數蠲除恐愚民無知轉以拖欠為可倖邀曠典則淳風或漸致澆漓亦不可不為慮及可傳諭鄂容安令其加意查辦務使年清年款不得任其拖欠以保至善之舊俗又諭晉省捐輸存庫一項已於查明勘不成災及被水偏災州縣折賑等項動撥過一萬二千餘兩今又據布政使朱一蜚奏請於十三州縣額徵地丁內各蠲免十分之一六萬四千餘兩已足示嘉惠伊等桑梓之意況該處連歲豐收無需辦理所有存貯餘銀著交明新任撫藩令其奏明請旨至該紳士劉衷等業邀議敘其戶下應蠲僅四百餘兩為數無多無庸予蠲著傳諭朱一蜚知之調湖廣提督齊大勇為固原提督以署固原提督哈攀龍署湖廣提督甲辰

上幸豐澤園大幄次賜蒙古王貝勒額駙台吉

等宴軍機大臣等議奏據兩廣總督陳大受奏稱粵東各營買馬向有節省價銀皆留充公用有實係公費不敷藉此支應者有將一切雜用於此開銷者且有視為餘存軍裝用度俱從優裕者應據實核減馬一匹減價三兩每年減二千七百六十三兩將公糧不敷營酌加數名每年計一千二百二十六兩有奇餘存司庫充餉至向來報價不實各員弁姑念相沿日久且在部定價內請旨免追應如所請惟廣西應否一體酌減並附近之福建等省營馬價有無節省令各該督撫一併查辦得旨原辦著免查追餘依議乙巳

世祖章皇帝忌辰遣官祭

孝陵

上至靜安莊

孝賢皇后梓宮前奠酒臨奠定安親王詣

雍和宮行禮臨和敬公主第丙午

上奉

皇太后幸重華宮侍宴○諭甘省節年民欠未完銀二十三萬七千餘兩未完糧一百萬四千餘石往往舊欠未及清償正額又成積欠每年徒有催徵之名而無輸將之實經朕傳諭該督撫令其詳悉查辦今據尹繼善鄂昌摺奏此內所有查出胥役侵蝕之項現在照例治罪勒追至民間積欠為數實屬繁多與其新舊並徵有名無實不若量請停緩設法清釐等語朕念甘肅邊土苦寒民力拮据自非腹地可比但逋欠日積陳陳相因伊於何底著加恩將該省積欠自乾隆十一年至十四年未完銀糧分作五年帶徵如有現准部文帶徵者仍照原限辦理其乾隆元年至十年舊欠銀糧槩與豁除該省士民倍應感朕格外之恩急公輸納該地方官亦須實力整頓使年清年款不得任其仍蹈故習希冀殊恩可以屢邀也○又諭曰湖北巡撫即著嚴瑞龍署理嚴瑞龍在布政使中歷任已久前

因安徽巡撫缺出朕已向軍機大臣等降旨令嚴瑞龍署理旋憶伊前此來京陛見時觀其人不過循謹奉職非出色之員且向日張廷玉曾在朕前屢次保薦恐伊未必即能勝任是以改用定長今觀唐綏祖貪婪敗檢該督永興令其密查皆能據實查明揭報永興來京後嚴瑞龍復具摺續奏且稱伊業經奏請陞見但該督既已前來伊若同時來京則唐綏祖為所欲為吏治將不可問是嚴瑞龍能以地方公事為重頗知大體甚屬可嘉若謂嚴瑞龍叅劾巡撫即用伊為巡撫此則不然唐綏祖之劣蹟永興已為先發其款據俱一一明確嚴瑞龍之秉公據實自可膺封疆之寄設令挾私傾陷則必不能逃朕洞鑒也若謂其為張廷玉所薦則張廷玉罪由自取至其所薦之人朕豈盡皆不用耶朕之辦理政務一出於大公至正全無成心即此可見並將此宣諭中外諸臣共勵亮工之誼自邀

鑒用之恩其所遺布政使員缺著朱一蜚調補廣東布政使員缺著石柱補授諭軍機大臣等嚴瑞龍署理湖北巡撫朕已明降諭旨宣布中外阿里衮新蒞楚任現與共事惟當一秉虛公不必因其曾劾巡撫稍存意見朕用伊為巡撫本不因其叅劾巡撫也朕之大公至正阿里衮自所深知至督撫同事一方稍有成意於地方公事甚為無益將此傳諭知之○丁未

上詣

大高殿

壽皇殿行禮○詣

皇太后宮問安○是日立春順天府進土牛春山寶座○以湖南布政使張若震西安布政使周人驥對調○戊申諭八旗另記檔案之人屢經稽查朕皆加恩定以仍留本任停其陞轉等例原以除該管旗員勒索並伊等徼倖鑽營之弊今查出之鑲黃旗蒙古另記檔

案之主事巴達克圖等員部議革職朕思八旗似此自行檢舉後或陞任或補用人數不少若不徹底清查只將現在查出者治罪未經查出者倖免固屬不合若盡查革致失生計朕心深為不忍著傳諭八旗滿洲蒙古漢軍令其將各旗另記檔案之人查奏造冊咨送吏戶兵三部此內現任文武官員俱著加恩免其革職各留本任其停止陞轉及伊等子孫不准考試為官仍准挑前鋒護軍馬甲之處俱著遵照原定之例行現議叅革之蒙古鑲黃旗主事巴達克圖等員即著照此辦理如另記檔案之文武官員內實有奮勉出色者著該處聲明請旨此朕法外之恩若仍不據實聲明妄思徼倖該管大臣含糊保薦者發覺一併從重治罪斷不寬貸安西提督永常等奏準噶爾入貢使臣額爾欽尼嗎已至哈密所帶人畜過多援定例責拒現俱愧懼認罪遵受節制之弱牲隻懇照上屆之

數挑變。刺者趕回不敢例外干求。並下次不以為例。得旨永常所奏自屬辦理正道。從來夷人貪利見小。乃其常技。我國家全盛之時。施恩字小。與前代和戎陋習迥殊。駕馭遠人。理應詞嚴義正。方為得體。前此夷使多帶貨物。每藉口於未諳定制。是以格外求寬。今尼瑪自上次入貢。已與申明約束。現在復來充使。更不得以未奉成約為詞。宜及此時辦定成規。以塞無厭之請。所有酌令按數變價。及餘數駁回之處。著即照摺內所請據理妥辦。不必因意在柔遠。過存遷就之見。致啟干請之漸也。尋陝甘總督尹繼善奏報上次辦理貿易夷目所帶皮張等項作價十八萬六千餘兩。兌給內地紬緞茶線等項作價十六萬七千餘兩。外給現銀一萬八千餘兩。並將酌定嗣後交易議單呈覽。諭軍機大臣等。尹繼善所奏準噶爾交易一事。朕從前以為銀數太多。未免繁費。不可不為樽節。蓋我大清國

勢強盛。許遠夷互市者。不過寓綏懷之畧而已。其權操之自我。非前代和親邊市可比。即示之裁制。亦屬當然。今詳覽尹繼善所奏。彼此原不過以貨物相準。所費銀亦有限。即令彼需受微利。感悅而去。亦足見天朝字小之恩。若照該督所定議單之數。未免過於裁減。如以為出自官商所定。彼固未必遵信奉行。即重以奏聞。請旨彼亦必具奏懇求。多費唇舌。再或堅執成議。令彼失所利賴。設或鋌而走險。攘竊邊儲牛馬。以激我興師。其能置之不問已乎。偏師一出。較之交易之費。何啻什倍。是交易雖有小費。所全實多。朕意該督所定實屬過嚴。難行。若定以此番交易為大局。令其不出範圍。或尚屬可行。俟彼使到日。朕自酌量降旨傳諭。再行傳諭該督。又朕觀準噶爾每次熬茶費至一二十萬金。似亦非仗此交易以濟其用。即尹繼善所奏亦未必如朕向所諭從國勢遠大起見。或慮及該省一

時難於售變耳。若然則何妨奏明折價以供賞恤。何惜此數萬皮張羊馬以安邊圉耶。是日起

上以祈穀於

上帝齋戒三日。○已酉諭此次南巡在京吏部事務著大學士來保暫行兼管。○又諭據直隸總督方觀承奏稱土默特貝子哈木噶巴牙斯呼郎圖不按原議年限驅逐種地民人及故縱屬人勒索科派各情節著貝勒羅卜藏侍郎劉綸侍讀學士麒麟保馳驛前往逐一查明具奏其理藩院議奏該旗貝子勒取山租禁止採取柴炭一摺著即一併查辦事竣之日羅卜藏即回該旗員外郎岱通現在任滿來京有應行詢問之處並著該侍郎等帶往詢問。○又諭曰兩淮鹽政吉慶數年以來辦理事務頗知黽勉著賞給奉宸院卿銜以示獎勵。庚戌

上詣

南郊齋宮齋宿。○戶部議准原任湖廣總督永

興奏稱蘆洲地畝濱臨江湖坍漲靡常定例五年遴選道員督州縣大丈一次但未定丈竣限期往往逾年始經題報無論應升應豁賠漏不均即業戶久稽亦妨民事請嗣後屆期令州縣於十月水涸後確查歲內冊報委道開印日督同履丈限四月內丈竣移司於六月內彙題達限分別叅處再查坍沒地畝印官竟有從未履丈即據報請豁委道亦祇按冊抽查恐有坍少豁多之弊應責令州縣官清查入冊仍前草率委道查叅扶同一併議處從之。○辛亥祈穀於

上帝

上親詣行禮。○奉

皇太后南巡車駕發京師。○詣

皇太后行宮問安。○賜扈從王公大臣並直隸大小官員等食。○諭軍機大臣等朕此次巡幸江浙聞士民父老念切近光其闡閭通衢

人烟輻輳之所。瞻仰者既足慰望幸之忱。而朕亦得因以見閭閻風俗之盛。誠恐地方有司。因慮道路擁擠。或致先期攔阻。用是特行申諭。如經過村巷。果屬湫隘難容。自應量為曉諭。令其散處路傍。毋致喧擾。若道途寬廣。清蹕所經。無虞擁塞。不得槩行禁止。以阻黎庶瞻就之誠。著即傳諭各督撫知之。又諭朕從前將已故額魯特王色卜騰旺布之子朋楚克車凌旺布之子丹拜等。俱加恩授為扎薩克貝子。公銜。扎薩克台吉。各於游牧地方為生。恐伊等未曾練達。不能約束屬下。故差公達什林沁。駐彼照應。今達什林沁在彼三年有餘。想伊等已皆曉事。達什林沁著回原處。○是日駐蹕黃新莊行宮。○壬子。

上詣

皇太后行幄問安。○是日駐蹕涿州北大營。○

癸丑。

上以上元節詣

皇太后行幄進宴。○賜扈從王公大臣並直隸大小官員等宴。○諭朕南巡江浙。經過畿輔。雖一應供頓。俱令動支公項。而安營除道。未免有需民力。朕心深為軫念。著將直屬所過州縣。本年應徵額賦。蠲免十分之三。交該督方觀承確查妥辦。務俾小民得霑實惠。○又諭直隸州縣內上年間有被災之處。當諭該督方觀承照例加意撫恤。復經降旨。將十二月內應止賑各戶。加恩展賑一月。貧民雖不致失所。但今東作方興。被災貧民。未免仍屬拮据。朕巡行畿甸。軫念維殷。著再加恩。將七八分災之極貧。九十分災之極次貧。各加賑兩個月。六分災之極貧。七八分災之次貧。各加賑一個月。令該督方觀承轉飭各屬。俾得均霑實惠。以資力作。該部遵諭速行。○又諭直屬上年偏災州縣。現在降旨加賑。有需用米石之處。著將河南本年運通粟米。截留十萬石。交總督方觀承酌量辦理。該部遵諭速

行。○順天府行鄉飲酒禮。○是日駐蹕五里屯大營。

大清高宗法天隆運至誠先覺體元立極敷文奮武孝慈神聖純皇帝實錄卷之三百八十

大清高宗法天隆運至誠先覺體元立極敷文奮武孝慈神聖純皇帝實錄卷之三百八十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆十六年辛未正月甲寅

上詣

皇太后行宮問安。○是日駐蹕趙北口行宮。○

乙卯

上詣

皇太后行幄問安。○是日駐蹕關張鋪大營。○

丙辰駐蹕太平莊大營。○丁巳駐蹕紅杏園

行宮。○戊午

上詣

皇太后行幄問安。○諭軍機大臣等據總督方

觀承奏稱奉天暫開海禁業蒙恩准臣遵即酌定米數咨商盛京將軍等已經咨覆准買十萬石在寧遠州釣魚臺海口糴運隨據商民呈請願赴錦縣採買應請聽其自往不必豫為申禁等語著照所請傳諭將軍阿蘭泰令其勿拘定釣魚臺一處海口如果錦縣易於赴買即聽其買運毋庸禁阻以從民便○又諭據廣東瓊州鎮總兵李有用奏稱伊母年已八十瓊州遠隔海洋不能迎養等語李

有用著調補福建漳州鎮總兵所遺廣東瓊州鎮總兵員缺即著馬負書調補○工部等部會議御史胡蛟齡奏稱淮徐海等屬州縣濱臨河湖居東省下流為衆水所歸頻遭水患宜倣江南圩田法多為溝洫容水其海州贛榆沭陽並接壤之宿遷桃源清河安東阜寧等縣乾隆十一年曾勸民修築之圩岸令督撫嚴飭有司實力奉行查圩岸之最大者莫如六塘沭山兩河駱馬金湖之水俱由兩

河分注入海乾隆八年以來屢經加築惟十三年水小淮徐海各屬有收水大仍漫民田是圩岸之制唯上游無異漲之水低窪偶遇霖潦可資防護海州贛榆沭陽宿遷桃源清河安東阜寧俱在黃河以北且浮沙平行不宜禾稻惟恃春麥夏秋東省水溢六沐交漲非圩岸所能為功至從前辦理海州等州縣圩岸情形海州東南鄉之莞瀆等鎮沭陽二十字橋錢家集並桑墟苗寨等鎮宿遷之河北等鎮安東之西溪東路大飛等鎮築圩挑溝俱經工竣贛榆之南鄉等鎮阜寧之埕頭丁溪等里亦經勘明建圩其不通水道及卑窪容水之地未議修築桃源清河並無水田逼近河湖之處水勢洶涌縱築圩岸亦難抵禦請嗣後除桃源清河無庸修築外其舊有河形及支河曲港令地方官農隙督民隨時挑挖以備霖潦海州贛榆沭陽宿遷安東阜寧前成圩岸仍督民歲修并多挑溝渠蓄洩

已勘未成者隨時次第舉行。○汴兩河舊圩歲督民夫修補得旨覽奏俱悉。○以福建鹽法道丁廷讓為廣東按察使。○是日駐蹕小店大營。○已未諭朕南巡江浙道出青齊該省去臘以來雪澤霑足麥秋豐稔有望雖一切安營除道俱由官辦而當茲春融土潤正當有事西疇朕省方問俗念切閭閻著將經過山東州縣本年額賦蠲除十分之三交與巡撫準泰詳悉查明照例辦理務俾得霑實惠該部遵諭速行。○又諭朕此次南巡所有經過直隸山東江南浙江地方各營汛兵丁有派辦差務者著查明賞給兩月錢糧以昭恩賚。○是日駐蹕吳家莊大營。○庚申

上詣

皇太后行幄問安。○諭朕翠華南幸所有直隸山東江南浙江等省承辦差務之文武官弁宜一體加恩著各該督撫查明咨部凡有罰俸降級之案俱准其開復其無此等參罰案

實錄卷三十三

四

一

件者各加一級。○是日駐蹕石家莊大營。○辛酉諭盜案承緝處分例載印捕官限一年緝拏若限滿不獲州縣等官降一級留任至三限不獲州縣印捕官再留任一年如再不獲降一級調用若未滿一年之限陞遷者照離任官例罰俸一年其遇告假丁憂等事離任亦俱照此辦理因而承緝各官於例應降調之先告請病假離任俱得按例僅以罰俸完結是明予以規避之路也緝盜乃地方官專責其例應處分自不得巧圖倖免如果係幹練循良之員該上司據實保題自屬可行若曲為瞻徇令得卸事自全處分不及盜案之塵積日多未必不由於此著該部將此例另行定議具奏尋奏州縣官承緝盜案未獲奉旨題補之缺遇無合例之人雖有參罰准其保題應陞應調之缺不准陞調其特旨陞調及迴避另補另案革職降調丁憂等事故離任者仍照舊例查辦告請病假并終養者

實錄卷三十三

五

一

初叅未獲。亦照舊例辦理。二叅三叅。例應降一級留任者。補官日降一級留任。三年無過開復。其四叅例。應降一級調用者。補官日降一級調用。武職一體辦理。再文武官任內。此外俱有承督未完事件。向例未經限滿離任者。統以罰俸一年完結。請嗣後叅限未滿。告請病假終養離任。例應住俸停陞降職降俸。及罰俸三月六月九月者。仍俱以罰俸一年完結。其餘處分。各照本例查議。不得概照離任官舊例。僅議罰俸從之。○諭軍機大臣等。地方官承緝盜案。有獲盜過半。照例開復之條。聞各省承緝官員。於將及獲半之時。暗使捕役賄囑別案拏獲盜犯。供認本案夥盜。或認盜首。以符過半之數。邀免處分。查定例雖載假借別案搪塞。照諱盜例議處。而印捕承緝之員。似此假借者不少。此等雖不必另設科條。果使該上司等嚴為查辦。自不致因循成習。朕既聞有此弊。不可不行傳諭。著於奏

事之便。令該上司等留心查察。務絕弊端。又諭曰。宮爾勸任滇年久。恣意貪婪。及一聞革職之信。輒將任所資財。暗行寄頓。狡詐已極。情甚可惡。觀其如此居心行事。其巧為隱匿之處必多。著傳諭該督碩色。令其嚴行查辦。務得實情。即加以刑訊。亦不足惜。如稍有寬縱。必於該督是問。○是日駐蹕崔家莊大營。○壬戌。

上詣

皇太后行幄問安。○四川總督策楞奏。途次乍了。接駐藏副都統班第咨會。已由西寧抵藏。即將首逆羅布藏扎什等。審明分別正法。具奏。查逆黨卓呢羅布藏扎什等。係奉旨命臣與兆惠。那木扎勒并班第四人會同審擬之犯。班第一人。到藏即急遽辦理。雖或未接前旨。究屬草率。此外尚有奉旨查辦珠爾默特那木扎勒妻孥家產。及安撫藏地一切事宜。倘班第又復竟辦。恐舛錯誤。事臣當將諭旨

會商一切緣由。飛咨班第。即自乍了酌帶官兵二百餘名。兼程趕月內抵藏。與班第先籌大概。俟兆惠那木扎勒到。會商妥辦。餘未帶官兵五百餘名。令副將楊剛帶領續進。得旨甚好。知道了。又批。雖屬草率。然既已辦理。亦祇可如此。另有諭旨。又批。誠然。班第尋常。乃一柔軟待人成事者。不知此番何又勇往果斷。如此想其知過自改耳。然此事實屬過猶不及。將此旨與彼看。汝二人共和衷商議一

切事宜可也。諭軍機大臣等。策楞所奏逆黨卓呢羅布藏扎什等。應會同確審之處。自屬得體。乃班第於到藏兩日後。不待該督及兆惠那木扎勒到齊。徑行分別正法。雖前後所降諭旨。未經接到。而辦理亦未免過急。但即使策楞等皆已抵藏。會同查訊。亦止可如此。辦理所可慮者。惟所獲逆黨二十二人。其真偽或有未可盡信。然皆以未親識面之人。究難辨別真偽。即使辨其非真。不更難於辦理。

乎朕以班第向來辦事過於柔軟。而此番獨能勇往果決。是以於批示策楞摺內之旨。令其閱看。蓋此事雖不免於急遽。亦尚未甚大舛錯。將來藏中事務所應辦者尚多。策楞等四人必宜和衷辦理。不可因有此奏。遂爾彼此各懷意見。以致不能推誠商酌。殊屬無益。此時策楞想已至藏。其有應行速辦之事。伊二人先行酌看情形。從長籌酌。其一應設立噶隆事宜。俟兆惠那木扎勒到藏之日。公同

遵照從前所降各諭旨。妥協辦理。可傳諭策楞班第。并令兆惠那木扎勒知之。○又諭潘思榘所奏臺灣縣武生李光顯爭壘結訟一案。甚屬糊塗。李光顯身恃武生。恣意占管民番田園。以致爭鬧毆差。更復聚集流棍藏蓄兵械。不法已極。李光顯實為罪魁。必當嚴拏。從重治罪。乃該撫摺內僅稱拏獲流棍六名。並未將李光顯拏究之處。奏聞殊為輕重倒置。且聚眾械鬪。最為閩省惡習。臺灣遠隔海

洋番民雜處尤當加意整飭以警光顧若將首犯寬縱致使漏網將來聚眾報復仇殺相尋刁風益熾其劉是奪犯毆差將李光顯鼻尖割去情罪亦屬可惡俱當從重究擬潘思渠辦理此案甚屬懦怯著傳旨嚴行申飭喀爾吉善現在接駕辦差何暇辦理此等事務著傳諭潘思渠將李光顯劉是及案內各犯從重究擬具奏如李光顯尚未拏獲務令嚴緝治罪并將辦理此案緣由速行奏聞若僅視為泛常案件姑息奸匪朕必於該撫是問尋奏李光顯等各犯已經該縣拏獲現飭催解省從重審擬得旨知道了從重處治以警刁風可也○又諭成元震不勝提督之任甘肅提督員缺著齊大勇調補固原提督員缺著豆斌調補廣西提督員缺著黃有才調補廣東提督員缺著林君陞補授臺灣總兵員缺仍著李有用調補馬負書仍留漳州鎮總兵之任瓊州鎮總兵員缺著胡貴調補潮州

鎮總兵員缺著成元震降補○是日駐蹕蔣家屯大營○癸亥諭向例鑾輿巡幸經過地方官員應行接駕由鴻臚寺具奏里數請旨臨時該寺帶領接駕至駐蹕後復奏聞帶領行禮朕入疆考績地方大吏隨營行走不時召見即州縣各官凡有承辦差務者業已於路傍隨便跪接此皆不在帶接行禮之列其帶接行禮者非散員即武弁教職充數之人此何為者而鴻臚寺官員先期傳示不無滋擾嗣後凡應行接駕人員祇令鴻臚寺在京奏請里數得旨行知其一切繁文及接駕後赴鴻臚寺投遞職名概著停止以示朕行簡務實之意○又諭上年江南安徽所屬之績溪等州縣衛江蘇所屬之江浦等州縣衛被水被旱致有偏災一應賑卹事宜已令該督等照例辦理並經降旨加給折賑銀兩第此內或地處深山或民當積歉今賑期已畢麥秋尚遠閭閻謀食維艱深堪憫惻著加恩將

被災最重之歙縣績溪廣德建平銅山沛縣六州縣極次貧民各加賑兩個月次重之銅陵壽州宿州靈璧虹縣邳州蕭縣宿遷睢寧九州縣極次貧民各加賑一個月貧生飢軍隨所在地方一體給賑俾災地窮黎得資接濟該督撫等董率有司實力查辦毋致遺濫該部遵諭速行○處州鎮總兵苗國琮丁憂以雲南督標中軍副將牛射方為處州鎮總兵官○是日駐蹕開山大營○甲子

上詣

皇太后行幄問安○

上行圍○諭朕清蹕南巡道由山左所有經過州縣既已特沛恩膏茲攬轡觀風知連歲有秋視戊辰東巡之時閭閻大有起色為之慶慰尚念該省有積年緩徵帶徵未完穀石皆因災出借之項雖疊遇有收而按年催比民力不無拮据著將被災借穀應於庚午年起分作五年帶徵及鄒平等屬帶徵未完穀共

九十七萬五千餘石概行蠲免以示格外優恤之至意○和碩莊親王允祿等奏報京師得雪情形得旨欣悅覽之途間亦得霑足瑞雪勾萌未動頗益田功至於清塵助景更上下所同樂也其諭在京羣工知之○軍機大臣會同工部議覆原任湖廣總督永興奏稱湖南鎮筵開修河道無益徒費應將草率興工之前督鄂彌達並會銜之陞任湖南巡撫蔣溥接任不詳查奏

停之巡撫楊錫紱及力請舉行之總兵官王廷極辰永道馬金門扶同給銀之陞任湖南布政使徐杞等按股分賠仍分別議處得旨鄂彌達等議處分賠之處俱著加恩寬免○是日駐蹕萬德大營○乙丑遣官祭

東嶽○遣官至曲阜祭

元聖周公

先師孔子○諭軍機大臣等從前珠爾默特

那木扎勒生事時。朕命總督策楞帶兵赴藏。會同侍郎兆惠。那木扎勒副都統銜班第與達賴喇嘛商辦一應事宜。並經傳諭達賴喇嘛。班第達等。班第未接此旨。先已赴藏。不待策楞。即將應辦數事具奏。朕以事屬可行。俱准其所請。但恐達賴喇嘛公班第達唐古特人等。不知情節。轉疑大臣等。可不遵旨行事。大有關係。著傳諭策楞等。明白曉諭達賴喇嘛。公班第達。及新放之噶隆等。再班第奏稱。

將逆匪羅布藏扎什等審明按律梟示。雖係

照內地懲奸之例辦理。但思藏內係闡揚黃

教清淨善地。伊等首級。不必懸示。並諭達賴喇嘛知之。○又諭曰。故公珠爾默特策布登之子珠爾默特旺扎勒。前因伊父無辜被害。賞給公爵。並以伊父曾鎮阿里克地方。仍令鎮守。今據班第奏。珠爾默特旺扎勒。為人平常。恐貽誤地方。可寄信總督策楞等。珠爾默特旺扎勒。但賞公爵。將珠爾默特那木扎

勒抄去伊父財產。查明賞還。令其駐藏。其阿里克地方。著策楞。班第等。會同達賴喇嘛。公班第達。及新放之噶隆等。於唐古特人內。揀選誠實諳練者。奏請鎮守。○又諭近有人奏。稱提督豆斌。性耽逸樂。雅慕清客。終日燒香作畫。玩弄古董。其於本分職守。必多曠廢。恐不免貽誤邊疆等語。提督控制全省。為鎮將之統帥。責任綦重。若戎務不至廢弛。偶於公暇。寄情清翫。亦無關緊要。但恐以時際昇

平偷安耽樂。啓因循怠玩之風。則大有關於

軍政巡撫舒輅。同事一方。必所深悉。可傳諭

詢問。令將豆斌在任時。如何耽情古翫。及有無曠廢營伍之處。秉公查明。據實具奏。毋得稍有瞻顧。尋奏豆斌性好丹青。慕清客而玩古董。然於營伍熟悉。人亦明白。察其提標五營。及左江鎮標營伍。俱各整齊。兵弁訓練。即豆斌每月。亦自騎射。報聞。○是日駐蹕泰安府東大營。○丙寅

上詣

皇太后行幄問安○是日駐蹕洪河大營○丁卯賜扈從王公大臣並山東大小官員等食○諭上年江安二省內有偏災之宿州鳳陽泗州長淮宿遷邳州大河海州等處各該撫業將本年應徵新舊漕糧題請分別蠲緩所有此項減船軍丁苫蓋食用之需未免拮据著加恩於例給折半月糧之外再賞給二分以恤丁力該部即遵諭行○是日駐蹕公家莊大營○戊辰

上詣

皇太后行幄問安○準噶爾部人鄂勒濟圖巴勒圖拜來降命賞給安插如例○是日駐蹕保家莊大營○是月直隸總督方觀承奏上年直屬偏災賑糶需米甚多奏撥通倉積年陳米五萬石奉旨令札商倉場侍郎查明奏辦據覆通倉現存惟乾隆十二三四等年之稷稂米俱係按年挨放並無積貯陳米查乾

隆九年直屬因災撥賑係於通倉稷稂二色內挨陳撥領此次請照例如數撥運得旨著照所請行○兩江總督黃廷桂江南河道總督高斌等會奏據工部咨開具奏江南河工建設木龍迄今十餘載添設非一估用木料銀二十餘萬兩河督雖聲明俟木龍通工告竣報數未有定期恐木植日多新舊牽混應令將工程情形及如何即可告竣所用錢糧木植作何清銷詳查奏辦奉旨令臣等查奏

查江南河工清口為黃淮交匯河防第一要區自乾隆五年試立木龍北岸停淤各壩埽工節省現今南岸舊壩沙灘淤數百丈北岸陶莊引河已成河身即不開挑黃水不致倒灌唯積土未經刷盡若木龍停止南岸漲灘難免刷動是以尚未竣工安東設木龍數年地已停淤埽工平穩但溜未南趨亦難停建王營烟墩孟誠庵等處大溜未遠移仍須相機辦理至所用木料年久日增自宜亟為清

理請自乾隆五年至十五年將舊木新木並淤沉折損木分年確數以上年存工存廠者為舊管以本年添購及別工撥用者為新收以折損沙淤及移撥別工者為開除以現存工存廠者為實在並將已銷已估併未題估之處聲明造冊送部查覈其已估未銷及尚未題估者統限半年內覈實銷估得旨著照所請行○兵部尚書舒赫德閩浙總督喀爾吉善等奏會看浙江海塘工程穩固中小疊暢行無滯江海安瀾民竈樂業現在情形可無親臨閱視且杭城候潮門外觀潮樓地臨江海上游潮汐往來塘工捍禦及沿江濱海情形皆可得大概若自杭省過海寧至尖山往返路長中途又無立大營處一切應豫備處未經舉行報聞○湖廣總督阿里衮奏報到任日期並遵旨將湖北叅撫唐綏祖革職看守任所資財搜查俟犯齊審擬得旨知道了速行嚴審定擬外省似此大員不無官官

相護之習汝宜不出於此俟定案時一面具摺奏聞一面將唐綏祖鎖拏差可信道府大員押送刑部此時不可豫露消息亦不可豫咨部也○調任護山西巡撫朱一蜚奏晉省鑄錢今已二十一卯除錢三銀七搭放太原駐防滿兵及撫標城守三營兵餉並易銀支放五臺差務外現存司庫錢三萬七千六百十三串有奇尚應續鑄十二卯省會現在錢價銀一兩易錢七百八十一文在晉不為甚昂但近省州縣較貴宜酌為流通請嗣後除搭放兵餉外省城市價庫平足紋一兩換錢七百五六十文至八九十文即將司庫存錢量發太原府傳商照市價易銀還庫許該商照市換扣收短串四文若奸牙積錢貴賣吏役家人勒索錢商者究懲該府失察並假手吏胥家人叅處市價平至八百文即停止得旨知道了妥酌為之○陝甘總督尹繼善奏準噶爾夷目來肅交易攜貨較多雖從寬挑

收已與寫立議單嗣後羊隻皮張不得過三萬馬牛共不得過一千交單帶回其挑存羊牛等項共作價銀十八萬六千二百餘兩兌給內地綢緞茶線等項作價銀十六萬七千三百餘兩給現銀一萬八千八百餘兩並言明此次多收貨物下次扣除業於去冬十一月事竣回巢收買各件按例勻發領銷查準夷交易向來彼此俱虛擡價值此次交易雖名為十八萬餘兩按實價并現銀共止十二

萬八千餘兩變價還項尚不虧折但現定議單雖交該夷持回恐仍復有奏請乞令料理夷使大臣明切曉諭得旨所奏是○又奏準夷交易情形此次雖在未畫界限之先而挑收貨物較往年已畧有節制所給現銀亦僅十分之一二但連兌與貨物總計實數已十二萬餘兩現與寫立議單交給帶回約虛數七八萬兩之間實數六萬兩得旨覽奏似前奏畧誤不然即是朕偶爾未曾看詳意謂現

銀一十八萬也若實銀不過一萬餘尚不為多費以數年不用兵所省計之則我猶為所得者多也但夷人得寸進寸亦當有以裁抑之卿所辦是也○又奏遵旨查奏甘肅提督成元震誠實有餘猷為不足難勝提督之任陝甘各鎮非才短即年老亦無可舉薦得旨所奏皆公論足見留心嘉悅覽之至成元震已有旨了

大清高宗法天隆運至誠先覺體元立極敷文奮武孝慈神聖純皇帝實錄卷之三百八十一

大清高宗法天隆運至誠先覺體元立極敷文奮武孝慈神聖純皇帝實錄卷之三百八十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書錄星滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

敕修

乾隆十六年辛未二月己巳朔諭朕問俗觀

風南巡江浙清蹕所至廣沛恩膏更念三吳

兩浙為人文所萃

皇祖聖祖仁皇帝屢經巡幸嘉惠膠庠試額頻

加覃敷教澤朕法

祖省方鑒輿斯莅式循茂典用示渥恩所有江

蘇安徽浙江三省本年歲試文童府學及州

縣大學著增取五名中學增取四名小學增

取三名舉行一次該部傳諭各該學政慎加

蒐擇拔取真才副朕育才造士至意○諭軍

機大臣等前據潘思榘新柱等覆奏武生王奠洲主謀鬧堂塞署一案已經批發隨令軍機大臣等詰問王廷諍並將原摺令其閱看據稱並不敢偏執已見但王奠洲買犯改供現有承審四縣及總督那蘇圖印批可據等語隨將原稟進呈披閱之下其賄囑改供衆證確鑿該督批詞及承審各官印信又豈可以捏造者是王廷諍當日辦理此案自非無因周學健既欲翻案所有一切原案自必盡行徹銷改換潘思榘等覆查但據現存審卷為憑耳此案久經完結王奠洲又已病故王廷諍已加處分此番錄用係出自朕起廢特恩與此事原不相涉因既有所聞欲知其實在情由著將王廷諍呈出印稟一併密交潘思榘新柱等令其再行確查據實具奏○軍機大臣等議准原任湖廣總督永興奏稱武昌關廠稅羨盈餘向因湖北公費養廉每年藩庫徵貯銀不敷支放議將此銀統入充公

項下。今查節年以來。藩庫積存充公耗羨等銀。至三十九萬餘兩。遇水旱之年。亦敷支放。此項盈餘。請自乾隆十五年始。於起解正稅時。一併解部。從之。○是日駐蹕黃梅崖大營。○庚午。

上詣

皇太后行幄問安。○福建布政使陶士儼患病解任。以福建按察使顧濟美為福建布政使。安西兵備道明德為福建按察使。○以山東登州鎮總兵什格馬蘭鎮總兵顧春對調。○是日駐蹕王家莊大營。○辛未。諭上年東省雖獲有秋。而蘭山等七州縣。偶被偏災。加恩賑恤。民食固不至缺乏。但農事方興。麥秋尚早。清蹕所經。見蘭山。郟城二縣。民氣似遜他處。深為軫念。著將蘭山。郟城二縣。極次貧民。俱加賑一月。其未經過之嶧縣。平度州。膠州。高密。昌邑。五處。被災稍輕。著將極貧之民。加賑一月。令該撫準奏。查明辦理。務使均霑實

惠。該部遵諭速行。○諭軍機大臣等。山東登州鎮總兵缺。甚屬緊要。朕已將顧春調補。若俟部文到日。顧春始赴新任。未免太遲。著傳諭總督方觀承。令顧春即日起程赴任。其馬蘭鎮總兵印務。該督於副將中。遴選一員署理。○是日駐蹕五里鋪大營。○壬申。

上詣

皇太后行幄問安。○遣官祭

金龍四大王廟。

河瀆。

淮瀆之神。並故河道總督靳輔。齊蘇勒。大學士嵇曾筠等祠。○賜扈從王公大臣。並江南大小官員等食。○鑲紅旗蒙古都統宏明奏。遵旨查明該旗另記檔案人員。得旨。朕前降旨查其記檔案者。並非祇查蒙古旗分。滿洲蒙古漢軍。二十四旗俱有。理合將該旗所查會同合一繕摺具奏。倘如此各旗單奏。則辦理甚煩。伊等所奏之事。既交部查辦。應交滿

洲蒙古漢軍二十四旗將各旗另記檔案人員查明會齊由當月旗彙題交部查辦○豁除福建邵武光澤二縣水衝沙壓民屯寺田地共二十七頃二十四畝有奇○是日駐蹕葉家莊大營○癸酉

上詣

皇太后行幄問安○諭朕車駕南巡乘時布澤蠲除積欠疊沛恩施更念江蘇之宿遷等州縣上年被水稍重雖經格外加賑可以接至麥秋該督撫等自督率地方官按期散給災黎均霑實惠而清蹕所經倍深軫恤著再加恩將經過之宿遷清河桃源三縣被災貧民上年借出籽種銀兩悉行免其徵還以紓民力該部遵諭速行○又諭朕愛養黎元惟恐一夫不獲時巡所至疊沛恩膏前已降旨將江省民賦積欠悉行豁免更念兩淮竈戶僻處海隅專以煎曬鹽勦為業其生計更窘於農民殊深軫切所有乾隆二年至十四年因

災停緩帶徵各未完折價共銀四萬二千餘兩著加恩照民戶例一體豁免俾斥鹵編氓咸霑惠澤該部遵諭速行○又諭此次巡幸看來沿途頗有倒斃疲乏駝馬蓋緣去歲自河南抵京餵養之日無幾臚未養足所致此項倒斃駝馬若令照例賠補情稍可憫著交兵部將起程以來倒斃官駝官馬查明數目施恩概行免其賠補此次從寬辦理係朕特恩現在約計回程之期尚有兩月其間餵養駝馬自應臚足伊等若謂此次未令賠補因不加意餵養仍致沿途倒斃務令賠償著通諭扈從各該處知之○諭軍機大臣等據西藏糧務通判常明等報軍機處文內稱阿里克地方與準噶爾接壤其原管轄之清特古斯與珠爾默特那木扎勒同日被誅所遺之缺公班第達選得集都鼐前往賞給卓里克圖台吉名號等語觀班第達派人往阿里克接管事務即賞給台吉名號是儼然以藏王

自居。今令以公爵管理噶隆事。又命多立數人以分其勢。彼已大失所望。恐因此生心。亦未可定。著傳諭策楞等。到藏時留心觀看。料伊此時斷未必敢顯有違抗。但其心稍不快足。將來又恐積疑成釁。外番詭譎多疑。竟須明切開導。以從前珠爾默特那木扎勒。因有藏王稱號。是以擁勢太重。釀成嫌隙。今之多立噶隆者。正可保全終始。令彼渙然疑釋。庶可永寧。亦不必豫設成見。遽事猜防。致伊又成一珠爾默特那木扎勒。轉於事理無益也。尋奏班第達恭順可信。所有賞給集都魯台吉名號。係達賴喇嘛因阿里克地方緊要。派往之人。必須重其名號。權宜賞給。臣等遵旨。曉諭班第達感激涕零。竭誠自矢。報聞。○是日駐蹕順河集大營。○甲戌。遣官祭先醫之神。○是日駐蹕王家莊大營。○乙亥。上詣皇太后行幄問安。○諭。此次隨朕南巡人等。雖

各有幫銀路費俸餉官馬。但內地不比邊外。諸物昂貴。著總理行營大臣等。將此次隨從大臣侍衛官員。拜唐阿及留在順河集等處人員。如何加恩賞給之處。分別定議具奏。其賞銀於兩淮鹽政庫貯內動用。尋奏隨從頭品以下。三品以上文武大臣等。賞半年俸銀。四品堂官侍衛鑾儀衛章京等。賞銀四十兩。五品堂官監察御史包衣護軍統領等官三十兩。六品以上文武官二十兩。七品以下及巡捕營守備十五兩。前鋒親軍校藍翎長驍騎校巡捕營千總把總庫使六兩。前鋒親軍護軍五兩。領催食四兩。錢糧等長。拜唐阿等四兩。食二兩。三兩。錢糧等長。拜唐阿等三兩。各項匠人二兩。總管太監二十兩。首領太監有頂帶太監等十五兩。太監四兩。留在順河集等處人員。減半賞給。得旨。傅恒著賞銀六百兩。扎拉豐阿。色布騰巴勒珠爾著賞銀四百兩。旺扎勒。哈達哈舒赫德。班第。努三。汪由

敦著賞給一年俸銀留在順河集等處人員亦照隨從人等賞給整分餘依議諭軍機大臣等據班第奏公班第達告稱有拉達克汗書來稱近日準噶爾人從葉爾羌城至伊處貿易詢問達賴喇嘛班禪額爾德尼安否并及廣興黃教之事等語近日準噶爾每遣使奏懇差人進藏朕俱不允前聞準噶爾進藏道路艱難若不往迎斷不能到今觀準噶爾常差人赴拉達克貿易則彼處自有通藏之路朕雖不准其進藏而伊倘由葉爾羌城差人進藏則所關甚要將此事寄知總督策楞等詢問達賴喇嘛與班第達凡準噶爾通藏道路應行防範之處詳議具奏尋奏詢稱準噶爾由葉爾羌城至阿里克地方中隔大山水草甚少難以行走每年貿易人赴拉達克皆有定數若大衆前來拉達克汗亦不許過即使前至阿里克地方自阿里克至藏尚有兩月路程亦不難備禦又葉爾羌城有路

可通魯都克地方亦須經戈壁行走月餘現在魯都克地方常設卡座至冬不撤各處卡座嚴密連絡自咱拉山以外至拉卜寨那穆自阿哈雅克以外至順圖古爾等處亦通準噶爾今請將卡座再行展放嚴加防範仍派諳練扎薩克台吉前往巡查報聞命親王德沁扎布為喀爾喀副將軍公策布登扎布為喀爾喀叅贊大臣是日駐蹕徐家渡大營○丙子

上詣

皇太后御舟問安○渡黃河至天妃閣閱下埽○諭軍機大臣等蔣溥因湖南龍陽一縣未報升科之地至三萬餘畝計直省似此者諒亦不少請飭各督撫將未報升科之地概准業戶自首以一年為限等語亦屬清釐糧賦應行之事俟各省督撫奏事之便將蔣溥原摺抄寄令其查辦○又諭曰梅穀成密奏二摺著交總理事務王大臣應如何辦理即行

秉公查辦完結具奏。梅穀成職任總憲。果有重大關係事件。自應密封入告。如無可論劾。不必舉細故。而飾以張大之詞。今其所奏。不過番役賭博。及地方生事之人。有司即可隨常辦理。遇便奏聞。何必列款持參。且搬取木榻。亦何至人人髮指。於輕重之間。殊未得體。王大臣等將此傳諭梅穀成知之。○戶部議准直隸總督方觀承疏稱。大興通州等州縣。自京至馬蘭峪。修築御道。占用民地共三項七十四畝。有奇。應照修築

泰陵御道例。分上中下給價。銀糧開除。又通州三河薊州等三州縣。占用各旗人地共十五項。有奇。應按數撥補。薊州占用大糧莊頭差地共四十五畝。有奇。內官園地三畝。有奇。照例補給私置民地四十一畝。有奇。給價除賦從之。○恩賞革職內閣學士劉師恕。侍讀學士銜。○以右贊善羅暹春檢討王太岳。充日講起居注官。○加賑長蘆西由場水災竈戶。

○是日御舟駐蹕直隸廠。翼日如之。○丁丑上詣

皇太后御舟問安。○祭

清河神威顯王廟。○閱高家堰隄。○諭朕稽古時巡。省方問俗。直隸屢經臨幸。地方供頓辦理。夙有章程。山左山右。曾准商捐。於閭閻並無擾累。茲當巡幸江南。地方官初次承辦大差。距

皇祖南巡已四十餘年。舊章難於稽考。深慮其

辦理拮据。或至有累民力。今兩淮商人踴躍急公。捐輸報効。地方官一應公務。俱於此取給。可信其無絲毫擾累閭閻。而辦理工程貧民更得資其利賴。於生計轉有裨益。甚屬可嘉。著加恩各按其本身職銜。加頂帶一級。以示朕恤商為民至意。○恩賞革職太僕寺卿熊學鵬原銜。左副都御史葉一棟。署江蘇巡撫。戶部左侍郎王璣。河南按察使繆孔昭。鴻臚寺卿銜。○戊寅。賜扈從王公大臣並江南

大小官員等食○諭上下兩江上年有被災稍重之處曾經加恩將極重之宿州靈璧虹縣五河宿遷邳州睢寧海州沭陽等處次重之鳳陽臨淮懷遠鳳臺壽州霍邱清河桃源安東等處分別加賑朕車駕南巡所有經過之宿遷桃源清河三縣見其民氣遠遜他處並將所借籽種銀兩全行豁免今聞該地方官展賑之事尚未開期朕省方問俗念切民依若地方官借辦差之名致窮黎嗷嗷待哺殊非仰體朕痼瘼在己之意著布政使永寧星速親往督率該府州縣等即日按戶開賑并傳諭黃廷桂飭令該州縣正印官不必辦差即回本任專心辦理散賑務俾均霑實惠朕回鑾時或尚有不能妥協之處惟永寧是問○又諭朕巡幸江浙經過地方各營汛兵丁有派令辦差者俱加恩賞給兩月錢糧今念河兵有挽繹諸務更屬勤勞著再加賞一月錢糧以示優恤○又諭曰熊學鵬前任太

僕寺卿時因請派堂官飾詞取巧經部議革職今朕已加恩賞給原銜更念該員年力尚強其從前議處之案尚非劣蹟重大者比著該部調取赴京仍以太僕寺卿等官補用○是日御舟駐蹕平橋已卯

孝康章皇后忌辰遣官祭

孝陵○諭據刑部將紀山由西寧等解前來嚴行監禁等因具奏著交在京總理事務王大臣會同該部審訊從前朕因紀山原係駐藏辦事之人令伊前往於事有益是以多方訓飭發往紀山到藏時一切事宜並不據實陳奏辦理轉將朕訓飭之言洩漏於珠爾默特那木扎勒且以珠爾默特那木扎勒聽信伊言感恩奮勉等因具奏不知紀山如何向伊盟誓致珠爾默特那木扎勒如此生事此等緣由逐一研訊至紀山所稱伊駐藏時珠爾默特那木扎勒曾餽送伊銀一千兩伊若不受反恐珠爾默特那木扎勒生疑是以權宜

存貯。而伊回京時此項銀兩作何辦理之處並未言及。俱著審明定議具奏。○是日御舟駐蹕劉家鋪。○庚辰遣官祭

江濱之神。並吳季札祠。宋臣宗澤祠。故大學士張玉書尚書趙申喬等祠。賜季札祠扁。曰清徽繩武。宗澤祠扁。曰丹忱貫日。○是日御舟駐蹕十八里鋪。○辛巳。

上詣

皇太后御舟問安。○諭曰。高斌。張師載。管理挽

絳河兵。一路隨從。諸事實心辦理。所屬河工人員。亦俱能黽勉出力。甚屬可嘉。高斌著加一級。張師載著加頂帶一級。作為從一品。其河工辦差人員。俱著各加一級。○工部議准江南河道總督高斌等疏稱。高堰汛內大壩裏壩等處石工。上年春夏之交。連日風雨。共倒卸四段。長七十三丈五尺。請動項興修。從之。○緩徵長蘆慶雲青縣衡水。興國富國豐財蘆臺嚴鎮等場水災竈戶額賦。並分別賑

恤飢民。○免山東嶧縣蘭山。郯城。平度。昌邑。膠州。高密等七州縣水災額賦有差。○是日御舟駐蹕小五臺。○壬午。

上詣

皇太后行宮問安。○賜扈從王公大臣並江南大小官員等食。○諭朕經過淮安。見城北一帶。內外皆水。雖有土隄為之防。而人烟湊集之區。設經異漲。其何以堪。甚覺怵然。亟應改建石工。以資保障。著總河高斌等會同總督黃廷桂。確勘詳估。及時建築。毋忽。○總督倉場侍郎鶴年等奏。京城內外各倉放米。年分參差不一。緣倉廩多寡既殊。復以南新舊太。海運富新興平。北新。六倉。輪貯山東。河南。運京黑豆。舊太海運二倉。廩尚九十餘座。餘皆八十餘座以下。每年運豆二十萬石。隨割隨放。廩易騰空。非米石久貯者比。而貯米倉廩如儲濟萬安等倉。多至百餘座。九十餘座不等。貯米多寡不齊。故放米新陳互異。請自本

年始將廩座最多之儲濟萬安舊太海運四倉派貯豆餘勻貯米從之。是日駐蹕高旻寺行宮。翼日如之。癸未。

上詣

皇太后行宮問安。賜扈從王公大臣並江南大小官員等食。諭京師米價較上年漸覺昂貴。向來八旗米廠原為平減市價而設。但照舊發糶恐尚不足以資調劑。從前曾因米貴添設廠局。派乾清門侍衛等分局監糶。今

雖不至如甚貴之年。但米價既昂。應酌量添設米局。自於民食有益。著在京總理事務王大臣速行定議。一面辦理。一面奏聞。尋奏京師現在米價。老米每石一兩六錢五分。稔米倉米每石一兩五錢五分。老米尚不甚貴。且買食者少。稔米倉米買食者多。時價稍貴。請照乾隆十三年例酌減定價。每石老米一兩四錢。稔米倉米一兩二錢。銀錢兼收。收錢易銀解部。再查京外各鄉并東南一帶接壤上

年被水州縣之處米價騰貴。民多赴京買食。致京師米價日昂。請照乾隆九年例於四路同知駐劄處分設四廠各發米二千石。令通永霸昌二道督率各該同知就近平糶。並派科道四員部司八員督察協辦。得旨甚好。知道了。又諭歸班進士現在挨次選用。並無壅滯。無庸輕議更張。朱若東乃奏請年五十以上者令以知縣即用。不思朝廷用人從無限年之例。且知縣員缺只有此數。若五十以上之人越次即用。轉於應選人員有礙。況歸班時未及五十。而候選已過五十。又將何以處之。朱若東此奏殊未知大體。或伊意中有年老未選之人。挾私冒昧陳奏。著嚴行申飭。○又諭曰。革職提督楊凱前來接駕。朕觀其年力未衰。從前叅案尚無實在劣蹟。且曾經歷練戎行。著加恩以總兵官補用。○又諭曰。進治河方畧之生員俞墉著賞緞一疋。貂皮二張。大荷包一對。進詩賦之吳楷顧于觀姜

掄元。王世球于堯臣著各賞緞一疋。大荷包一對。其餘王新銘等十五人著各賞大荷包一對。○刑部奏審明革職拏問之雲南巡撫圖爾炳阿。於已故永善縣知縣楊茂虧空銀米。不即叅追。轉令布政使宮爾勸驛鹽道郭振儀設法彌補。應照明知侵盜錢糧故縱律擬流。得旨。朕以圖爾炳阿身任巡撫兼署總督。其於通省吏治全不留心整飭。一任屬員恣意侵貪。如宮爾勸郭振儀等司道大員。侵蝕累累。皆毫無覺察。深負朕恩。是以革職拏交刑部治罪。其罪即在此。該部乃祇就楊茂一案草率問擬。以流罪完結。避重就輕。甚屬錯謬。豈謂朕省方遠出。駐蹕之次。於事機偶未經意。該部遂爾疎畧從事耶。著傳旨嚴行申飭。尋奏圖爾炳阿身任封疆。瞻徇欺隱。於屬縣虧空不叅。敢代彌補。且司道大員近在同城。侵蝕累累。毫無覺察。應比照監守自盜錢糧銀一千兩以上律擬斬監候。其侵虧銀

兩俟宮爾勸郭振儀等各案審結後著追得旨。圖爾炳阿依擬應斬。著監候秋後處決。餘依議。○恩賞革職內閣學士許王猷侍讀學士銜。

大清高宗法天隆運至誠先覺體元立極敷文奮武孝慈神聖純皇帝實錄卷之三百八十二

大清高宗法天隆運至誠先覺體元立極敷文奮武孝慈神聖純皇帝實錄卷之三百八十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未二月甲申

實錄卷三十三

上詣

皇太后行宮問安○諭朕省方所至廣沛恩膏前因兩淮商衆踴躍急公業已加恩優獎更念其運綱輸課接濟民食恤商斯足以惠民特行再布殊恩著將兩淮綱鹽食鹽於定額外每引賞加一十觔不在原定成本之內俾得永遠霑受實惠商人當仰體朕博愛敦本至意風俗雖不必驟更近一分返樸之心即遠一分極奢之念植息毋取其三倍減一分

售鹽之價即利一分食鹽之人其有昂值網利致累閭閻則深負加恩德意矣該鹽政其通示商衆知之○恩賞革職廣東巡撫王夔三品銜○是日駐蹕金山江天寺行宮○乙酉

上詣

皇太后御舟問安○幸焦山賜焦先祠扁曰山高水長○諭朕清蹕南巡行慶施惠所有駐防旗人亦應一體加恩著各督撫將軍等將

實錄卷三十三

江寧京口浙江等處駐防滿洲漢軍官兵年七十八十以上者查明分別賞賚○吏部等部議准湖北布政使嚴瑞龍奏稱文武大員緣事降革者原案向不行知本省中有邀恩可量才降補者遇部查奏時督撫接咨必通行各屬令本員自行開送輟轉稽遲嗣後應令吏兵二部凡文武降革大員奉旨後將案鈔行督撫並轉行地方官存案從之○戶部議准四川總督策楞疏稱梅子凹銅廠產銅

衰薄應封閉從之○禮部等部議准內閣學士前任山東學政李因培奏稱萊州府之靈山衛轄三十七屯一所每屯衛籍實僅數家應試文童最多二十餘人武童十餘人進額文武各八名未免太濫嗣後請各減三名取進五名其文生廩增額各二十名亦請各減八名將年淺者改作候廩候增新舊間補廩生一體挨貢裁減後文風果盛准該學政題復舊額又威靖二衛丁地俱在文登縣文武生員經撥歸文登縣學原額廩增各二十名亦歸文登為虛缺文登一學廩生現共六十名兩年一貢未免壅滯請自本年始照金復二衛歸併萊州府學例一年一貢三學輪出二衛廩生貢完後仍兩年一貢從之○工部議准奉天府府尹圖爾泰疏稱海城縣額貯米豆及莊頭窖穀等項糧數甚多倉廩朽壞除該縣前經捐貲粘補大倉六十三間外仍應修葺一百間請將舊百間拆卸併修五十

間從之○以鑲黃旗滿洲副都統伍齡安為正藍旗蒙古都統○是日御舟駐蹕方渡橋○丙戌諭曰衛哲治親老不能迎養奏對之際孝意可矜朕所嘉許著仍留安徽巡撫之任廣西巡撫員缺即著定長調補○又諭曰進詩之少詹事習窩編修葉長揚庶吉士韓孝基著各賞緞一疋貂皮二張○又諭曰于梓年已八十前來接駕著加恩給還知縣原銜並賞給緞疋○是日御舟駐蹕葉家村○

丁亥

上詣

皇太后御舟問安○祭

先師孔子遣大學士史貽直行禮○遣官祭周泰伯祠先賢言子祠宋臣范仲淹祠韓世忠祠並故巡撫湯斌張伯行總河陳鵬年等祠

御書泰伯祠扁曰三讓高蹤言子祠曰道啟東南范仲淹祠曰學醇業廣韓世忠祠曰中興

偉畧○是日御舟駐蹕迎龍橋○戊子祭大社。

大稷遣誠親王允祕恭代行禮○

上詣

皇太后御舟問安○奉

皇太后至寄暢園進膳○遣官祭

海神廟並吳越王錢鏐祠唐臣陸贄祠宋臣

岳飛祠明臣于謙祠故尚書徐潮墓賜錢鏐

祠扁曰忠順貽庥陸贄祠曰內相經綸岳飛

祠曰偉烈純忠于謙祠曰丹心抗節○諭曰

孫灝從前革職之案尚無實在劣蹟且年力

猶屬壯盛著加恩以少詹補用○又諭曰舉

人華希閔年踰八十著給與知縣職銜仍著

賞給緞疋○是日御舟駐蹕北望亭○己丑

御書紫陽書院扁曰白鹿遺規○吏部等部議

覆福建巡撫潘思渠奏文武委署人員文職

是否離籍五百里以內武職是否本籍向未

定迴避例請照補授官弁定例迴避查文職

委署曾經部咨與題補一體迴避無庸議委

署武職應如所請除水師人員外陸路候補

及世職等員概不委署本籍現委者令各該

督撫酌調從之○兵部議准原任湖廣總督

永興疏稱隨州之隨陽店等處各應設汛每

汛置兵四名於宜昌襄陽均房等鎮營兵內

抽撥將德安營千總移駐隨州隨州外委徹

回德安營從之○是日駐蹕蘇州府行宮翼

日如之○庚寅諭朕命駕時巡周覽風俗觀

民察吏惟日兢兢三吳尤素所厯念也粵自

我

皇祖聖祖仁皇帝巡幸東南先後六舉歷今四

十餘年盛典昭垂衢謠在耳頃者入境以來

白叟黃童扶攜恐後就瞻愛戴誠意可嘉朕

已疊沛恩膏廣敷渥澤惟念大江南北土沃

人稠重以百年休養戶口益增習尚所趨蓋

藏未裕紛華靡麗之意多而樸茂之風轉有

未逮夫去奢崇實固閭閻生計之常經而因

時訓俗以宣風而布化則官茲土者之責也其尚勵乃實心以行實政無忝教養斯民之任凡茲士庶更宜各敦本業力屏浮華以節儉留其有餘以勤勞補其不足時時思物力之艱難事事惟侈靡之是戒將見康阜之盛益臻父老子弟共享昇平之福朕清蹕所至有厚望焉○辛卯

上詣

皇太后行宮問安○諭軍機大臣等據駐藏副

都統班第奏稱珠爾默特那木扎勒立心叛逆勾通準夷寄書前去私立假號種種偕逆惡蹟顯露等語從前駐藏大臣傳清拉布敦奏珠爾默特那木扎勒有猖獗之心斷不可留請乘機擒剪朕尚意珠爾默特那木扎勒未必至於此極令伊等詳察確實再行辦理嗣後傳清拉布敦將珠爾默特那木扎勒誅戮朕猶以伊等雖為國除逆要是並無籌畫草率舉事以致捐軀今觀班第所奏則珠爾

默特那木扎勒逆蹟已露實屬時不可待而傳清拉布敦即乘機辦理可謂奮不顧身盡忠報國者矣前朕降旨以珠爾默特那木扎勒之子達爾扎策凌年幼令解送來京今珠爾默特那木扎勒偕逆之罪既已顯著應照叛逆之律辦理以為衆戒著將班第奏摺及珠爾默特那木扎勒與準噶爾私通書札一併寄與總督策楞等令其將朕此旨曉諭藏內之人將珠爾默特那木扎勒之妻子即在彼處誅戮以彰國法○又諭曰湖廣總督阿里衮奏署巡撫布政使嚴瑞龍狡詐貪劣各款著鈔寄河南巡撫鄂容安即行馳驛前赴楚省將所叅各款及摺內有名犯證會同該督逐一秉公確查研審定擬具奏至鄂容安接到此旨於何時起身於何時可以到楚速行奏聞以便臨期頒發明旨○又諭曰阿里衮奏嚴瑞龍一摺款跡昭彰阿里衮據實叅奏甚屬可嘉嚴瑞龍著革職看守已諭

令河南巡撫鄂容安前赴楚省會同該督秉公確審定擬具奏。嚴瑞龍任所貲財照唐綏祖之例即行查辦。不可少令其隱匿寄頓。其湖北巡撫印務即著阿里衮暫行兼管。至楚省吏治廢弛從前督撫屢經更易永興誠實有餘初莅外任又不甚諳漢文諸務未及整頓。阿里衮既洞悉其弊著督率屬員實心辦理務使玩愒因循觀望迎合種種陋習竭力剔除以崇實政。至德文本屬年輕未經歷練楚省臬司誠難勝任所奏甚當已將明德調補並諭該督知之。○又諭曰湖廣總督阿里衮奏嚴瑞龍貪詐各款原摺並朕所降諭旨俱著鈔寄永興閱看令其將嚴瑞龍平素居官如何所叅款跡曾否聞知之處據實覆奏尋奏嚴瑞龍久任藩司有練達名初見亦覺老成言論且以廉隅自勵後漸覺其遇事取巧即如叅巡撫唐綏祖劣蹟面詢時指款直陳迨令列款具稟則遲之又久稟覆後旋

即補叅巧詐可見至其貪劣各款未先察覺實屬愚闇報聞。○調福建按察使明德為湖北按察使山東按察使德舒為福建按察使。湖北按察使德文為山東按察使。○是日駐蹕靈巖山行宮翼日如之。○壬辰春分朝日於東郊遣恒親王弘晈行禮。○上閱兵。○諭朕聞常州府屬之武進陽湖二縣開抵役田租銀一項原係前明時虛田領價後因本戶逃亡株連親族各將已產開抵實非前明原置之田亦非當日領價之戶小民條糧役租力難並輸以致積年拖欠朕省方所至民隱勤求清問既周倍深軫念著將武進陽湖二縣開抵役田除應辦條漕仍照民田一例完納外其新舊租銀概予豁免以除民累凡爾百姓尚其永承樂利各相勉於孝弟力田以仰副朕格外加恩之意焉。○又諭江蘇之淮徐等屬上年秋禾被水已經加恩蠲賑所有餘剩應徵漕米麥豆等項緩至今冬帶徵但念

該地上年被水稍重即使今歲秋成豐稔而災歉之餘民氣正宜培養若令新舊並輸小民生計難免拮据著將淮安府屬之清河桃源安東大河衛徐州府屬之邳州宿遷睢寧直隸海州並所屬之沐陽等八州縣一衛本年應行帶完乾隆十五年災蠲餘剩漕項米麥豆石俱分作三年帶徵以紓民力該部即遵諭行○又諭江南揚州府屬之興化縣積淹荒廢田畝錢糧久經停緩後歸冬勘辦理

於乾隆九年起的按年勘報豁糧其元年至八年原緩未完銀米麥石仍應分別催輸荒戶殊屬拮据朕翠華南巡廣敷惠澤著將此項原緩未完銀米麥石一併查明加恩豁免以甦民困該部遵諭速行○戶部等部議覆署浙江巡撫永貴奏稱行銷浙鹽之浙屬溫台寧波等府並江南之松江府經前督李衛於雍正六年奏令文武官員收買餘鹽立法未周應更詳定章程○浙省辦銷帑鹽向聽各

鎮協營自赴道庫支領帑本給竈收鹽並無文員監察請嗣後溫台二處之黃巖鎮樂清協寧海營俱會同黃巖等各該縣具批由道詳准領帑貯庫俟收鹽給竈時營員會同各場大使移縣領發買賣餘鹽亦令會同該場大使較準官秤收發○黃巖鹽務向由鎮臣經理請嗣後委該鎮中軍辦理聽巡撫節制其各處司廩巡緝收鹽之弁令該副叅等詳明巡撫給發委牌一各處辦理帑鹽銀鹽向例歲底文武互盤結報恐有瞻徇請嗣後黃巖場協辦之黃巖鎮中營帑鹽長亭場協辦之寧海營帑鹽令台州府會同黃巖鎮盤報長林場協辦之樂清營帑鹽令溫州府會同溫州鎮盤報浙江提標中營所辦銀鹽令兩提督率同寧波府松江府盤報台溫二處令溫處道寧紹台道盤報崇明場令太倉州盤報仁和場令杭州府盤報青村下砂袁浦三場令松江府盤報那移虧空者將該文武及

盤查道府。分別參賠。一商竈鹽價。借欠未清。請嗣後每商領鹽。以四百引為率。先納課後領鹽。實在貧竈。先清前鹽。再領後帑。濫者參處。一黃巖鎮收發鹽觔。向無專責。請嗣後於大陳。石浦。石塘等處。令該鎮委弁專理。該撫於引鹽餘利內。酌給飯食公費。餘銀統歸帑鹽贏餘造報。一各處辦鹽地方。失察私鹽。應將副叅等。照兼轄官例議處。委辦之弁。照專汎官例議處。拏獲私鹽者。按所獲起數議敘。一各處經費。向聽各員自行收支。並不報部覈銷。請嗣後各府協營。據實開報。虛糜者查刪。均應如所請。惟清理經費一節。俟該撫等查酌刪定。咨部覈議從之。○加駐藏副都統班第都統銜。○補行直隸乾隆十二年軍政卓異官七員。不謹官一員。才力不及官二員。分別陞賞處分如例。○癸巳

上詣

皇太后行宮問安。○遣官祭

關帝廟。○準噶爾使臣額爾欽等入貢。覲於蘇州府行宮。○賜扈從王公大臣等暨準噶爾使臣額爾欽等食。○吏部議准。山東巡撫準泰咨稱。各省吏攢役滿。送院考試。向因無關銓選。凡丁憂事故。俱不造冊咨部。嗣經定例。兩考不到者除名。應飭各州縣。凡吏攢有丁憂患病等事故。均取印甘各結。申司造冊咨部。服闋病痊。日補考。冊咨查對從之。○調四川永寧道博齊喜來京引見。○是日駐蹕蘇州府行宮。○甲午

孝昭仁皇后忌辰。遣官祭

景陵。○以浙江嘉興協副將黃正綱。為江南松江鎮總兵官。○是日御舟駐蹕南斗圩。○乙未遣官祭歷代帝王廟。○

上閱兵。○賜扈從王公大臣。並浙江大小官員等食。○諭朕省方觀民。南巡江浙。羣黎士庶踴躍趨迎。就瞻恐後。紳士以文字獻頌者。載道接踵。愛戴之忱。有足嘉者。朕已疊沛恩膏。

隨時賞賚緬昔

皇祖聖祖仁皇帝時巡所至優獎士類一時碩學通才多蒙鑒拔方策所載稱盛事焉茲之于予而來皆棧樸作人久道所貽也夫膠庠之秀志切近光其積學有素文采穎異者加之甄錄良合於陳詩觀風育才造士之道顧工拙既殊真贋錯出理應試之無使魚目混珠得混珠玉其如何分別考試著大學士傅恒協辦大學士梁詩正侍郎汪由敦會同該

總督學政詳議具奏尋奏江蘇安徽進獻詩賦之士子經該學政取定者俱令赴江寧一體考試浙江進獻詩賦取定者令在杭城候試統俟駕臨杭州江寧酌期請旨派大臣監試屆期學政等恭請欽命試題收卷進呈並令各該督撫飭備士子茶飯從之○又諭曰協辦大學士梁詩正之父梁文瀛著賞給緞四疋貂皮六張進詩之原任太僕寺卿張映辰編修梁啟心著各賞給緞一疋貂皮二張

○以福建陸路提督吳進義浙江提督譚行義對調○是日御舟駐蹕嘉興府北教場○丙申

上詣

皇太后御舟問安○遣官祭昭忠祠○賜準噶爾台吉喇嘛達爾扎勒書詔曰據台吉奏請差人前往西藏喇嘛處遞贄見儀懇賜恩准等語曩者爾故台吉噶爾丹策零為父策妄阿喇布坦既歿奏請往藏熬茶策妄多爾濟那木扎勒為父噶爾丹策零既歿亦以熬茶奏請此皆欲追報先人是以俯從所請並加恩沿途賞給牲畜路費特派大臣官員照管彼時朕即降旨爾台吉因有此事朕方允行否則斷然不許所降諭旨甚明今爾並非有如此大事何恩之當報乃欲差人往藏耶不但無換一台吉即遣人赴藏一次之例即中國亦豈有屢派官兵照管之理耶爾所請遣人赴藏之事斷不可行至所奏喇嘛學經

一節。因爾舊台吉策妄多爾濟那木扎勒奏稱準噶爾地方所有西藏喇嘛大半物故。懇准少派數人。至藏學經。以廣黃教。朕念差人至藏學經。則事不可行。而爾地黃教就衰。亦殊可念。因為爾等計中國大廟內原有自藏選來高僧。是以許爾處將可以學經之聰慧喇嘛或十人或二十人送至京師習學數年。而回可以闡揚黃教。此朕念和好日久周詳曲體之特恩。初非勅令爾處夷人來為僧徒也。今乃謂爾處喇嘛未曾出痘。不能赴京學習。懇將精通經典喇嘛准請四五人到爾處教習。夫學習文藝有就學。無往教。爾處既稱無可赴京之喇嘛。應即行停止。今爾使臣額爾欽口奏。又謂台吉令伊等奏懇。自藏延請四五喇嘛教習數年。再令回籍等語。此又與爾奏書有異。朕今念爾護持黃教之意。准爾所請。令高等喇嘛前往教誨。但既命往之後。爾毋得藉稱命往之喇嘛平常捏詞再來瀆

奏。是以令爾使回巢後明白宣示。爾再遣來使請。並將不行此等伎倆之處。抒誠具奏。然後令喇嘛前往。此亦有關中華聲教。朕豈肯令漫無德行。不能訓導之人充數耶。爾固不必慮此。再交易一事。乃朕優恤遠方之大惠。前既定以年歲約以章程。即當永遠遵照。而近年來貿易者。貨物每次加增較前數倍。邊疆司事之臣。屢請駁回。朕念其攜貨遠來。若不准銷售。則虧損實多。姑准量為交易。而該使該商皆謂不知從前議定成數。又謂非能自作主張。歸當告知台吉。伊等果歸告與否。固未可知。然恃朕遷就加恩。因而屢增無厭。將來必至定數之外。一一駁令帶回。而後已。今特明切曉諭。嗣後肅州貿易。毋得過乾隆十三年貨物之數。使臣前來以尼瑪上次帶來貨物為準。如逾此數。即由邊境駁回。不准貿易。爾其曉諭使臣商人等。俾知敬謹遵行。朕亦勅諭疆吏。照此辦理。今後不得仍以不

知成例為辭也。○諭據總督策楞奏瀘州州同董恭辦理拉里糧務。上年即捏病規避。詳請更換。及藏內珠爾默特那木扎勒伏誅之後。又復畏蕙庸懦。以追捕叛黨之兵。輒疑為復讐之衆。妄行請兵。張皇虛謬。且扣剋軍餉。冒領名糧。放債漁利等情。董恭身在邊隅。職司糧務。乃臨時怯懦。即思托病規避。又復妄請發兵。訛言動衆。貽笑番邦。種種罪狀。莫此為甚。其扣剋漁利。尚其罪之小者。夫人臣食君之祿。無論職分大小。皆有致身之義。時當有事。即捐軀徇國。實分所當然。如傅清拉布敦之奮不顧身。為國家殄除惡逆。自足光耀倫常。標名青史。若董恭之狡詐退縮。視國事漠然。如不相涉。惟思便其身圖。其心實為可誅。豈以其身屬文員。輒思退避。竟可置君臣大義於弗論。非立置重典。無以示戒。董恭著即於藏中正法示衆。並宣諭中外知之。○是日御舟駐蹕石門鎮。○丁酉。諭軍機大臣

等準噶爾夷人交易一事。每歲加增。固屬無厭。而為數太少。亦屬難行。前見尹繼善所定交易之數。較之上次。未及其半。伊等歷年已加增至數倍。何能強之驟減。朕即料其未能奉行。昨召見夷使。果稱總督曾有字來。原非奉旨事理。未便遵行等語。觀此。則其不能遵奉可知。朕今諭該台吉。肅州交易。以十三年來數為準。來使交易。以尼瑪來數為準。不得出此範圍。可寄知尹繼善。令其遵照辦理。在此數內者。許其交易。多者駁令帶回。總在不離大數。貨物內此多彼少。許其折算相當。如此則伊等不至受苦。其心自平。而後來亦有節制矣。○又諭曰。福建巡撫潘思渠條奏承追虧空。請定章程。以杜隱匿。規避一摺。刑部定議覆奏。俱照該撫所請。嚴定條例。以重考成。此所謂似是而非。實不協於政體也。向來侵盜貪婪。限滿之後。不過永遠監追。希圖遇赦。久而終得倖免。以致貪吏公然視國帑為

私藏或任意花銷或暗侵肥橐其不肖之甚者竟有寧置身於圜扉潛為子孫之計此實官邪所必徼國法所難容若不加痛懲則人心壞而吏治黷於國是大有關係是以降旨宣示至再至三凡係侵貪之案限滿不能完贓者必抵於法乃辟以止辟之意也然嚴令已申分賠著追之例亦向有明文惟在執法者實力奉行則凡有人心者必知侵蝕不但不能肥己適足以殺其軀而并喪其所有愚

字樣卷三三

三

者之所不為即貪黷成性下愚不移寧以身徇此亦百中之一而明正其罪用肅刑章法如是足矣若又因此蔓延於衆亦但覺其繁苛耳即如從前律例所載何嘗不責令分賠而舊習相蒙侵那屢見可知法立而不能行雖嚴設科條何裨政體朕惟因時立制弊去太甚而令在必行初非以空文為治具倘更波及他人於奸貪之吏轉開脫却之端更屬無謂潘思渠此奏亦因朕近年辦理侵貪之

案不容寬假遂以此為揣摩該部自應持平酌議務崇政體乃有意迎合即為准行是不知朕之經理庶務寬嚴期於協中從不存畸輕畸重之成見揣摩迎合舉無所容也此摺無庸議著發還並諭中外知之○是日御舟駐蹕塘棲○是月江蘇布政使永寧奏報遵旨往督淮徐海三府州屬展賑情形並清河縣開賑日期得旨覽此非他處可比朕回鑾所目覩之處稍有未協惟汝是問且汝此次

字樣卷三三

三

大不如在直隸汝其慎之○又奏前赴桃源督該縣設廠散賑訖現至宿遷該縣地方遼濶災重口多應於適中之順河集等處分設七廠派員開放逐廠親查至邳州睢寧海州沐陽安東等州縣相距寫遠俱飛行該州縣等先行開賑俟宿遷賑務就緒親往覆查得旨知道了又批似此仍不過就回鑾朕所親見之處細加粉飾耳其窮鄉僻壤汝能保朕不差人往察乎若有向隅汝罪不貸慎之○

江西巡撫舒輅奏報到任情形得旨一切徐
徐實力為之。若因新到任即有一番整理是
尚非出於誠心。亦難保日久之不懈也。○湖
廣提督齊大勇奏謝調固原提督恩得旨覽。
固原為邊疆重地而且兵悍汝宜加之意但
不可欲速更張耳。○四川總督策楞奏到藏
詳看達賴喇嘛意甚感悅公班第達並各番
情形恭順現在實轉關一大機會隨與班第
酌議先令公班第達將振興黃教之處與老

平定卷一百三

三

噶隆衆卓呢爾東公擬開閱看再與達賴喇
嘛商辦其餘應查辦各事件仍與班第次第
料理俟兆惠等到後公酌妥辦務期達賴喇
嘛得以專主欽差有所操縱噶隆不致擅權
得旨覽奏俱悉又批甚是汝四人和衷從長
計議○又奏提督岳鍾琪前奉旨帶兵五百
駐打箭爐並命臣抵藏後量度情形移會徹
歸導察藏衆情形安靜寧帖無需駐兵聲援
隨飛咨該提督徹歸得旨好知道了○又奏

赴藏沿途各汛兵查多老弱緣向例缺出該
管官就地募報番地無餘丁失業商賈內地
流民甚至夫役并糧務之親戚長隨俱應募
濫充請嗣後近藏之拉里汛以西缺出報駐
藏大臣親驗補距藏較遠之拉里以東缺出
不准就地招募於下臺現兵內挨站遞補將
所遺糧缺趨至打箭爐底臺著落阜和營遊
擊於內地餘丁內選補仍報明駐藏大臣并
通報督提衙門查考所選非人指叅治罪又

平定卷一百三

三

大清高宗法天隆運至誠先覺體元立極敷文
奮武孝慈神聖純皇帝實錄卷之三百八十三

實錄卷之三百八十三

三十五

大清高宗法天隆運至誠先覺體元立極敷文
奮武孝慈神聖純皇帝實錄卷之三百八十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未三月戊戌朔

上詣

實錄卷之三百八十四

皇太后行宮問安 賜扈從王公大臣並浙江

大小官員等食 在籍翰林院侍講劉起振

年一百三歲自粵東來浙迎

駕賜

御製詩章并

御書扁曰詞垣耆瑞 頒賜江浙各書院殿板

經史諭經史學之根柢也 會城書院聚費庠

之秀而砥礪之尤宜示之正學朕時巡所至

有若江寧之鍾山書院、蘇州之紫陽書院、杭州之敷文書院、各賜武英殿新刊十三經、十二史一部、資髦士稽古之學。○禮部奏據暫管步軍統領協辦大學士尚書阿克敦奏稱、拏獲偽造五經博士仲氏關防禮生執照、誑騙銀兩之張書等犯、除交部定擬外、恐各省博士尚有借充補禮生名色、濫給執照之弊、應令各督撫飭查、無論真偽、概追銷燬、並飭五經博士嗣後不得擅給、違者叅處、從之。

○兵部議准直隸總督方觀承疏稱、喀喇沁公所轄之青石嶺、土默特貝子所管之五頂山、青溝湯頭溝等處、舊有十九礦洞、雖曾勘封、恐有偷創、請就近責成該扎薩克等帶蒙古官兵巡緝、不力者官叅處、兵懲治、從之。○予故青州將軍羅山祭葬如例、諡安愍。○以故貴州土推官楊再瀚子通明襲職。○貸黑龍江呼蘭地方蒙古圖七莊屯水災旗民、並豁免五座官莊壯丁本年額交官糧。○蠲緩

寧古塔吉林水災額賦有差、並豁免除水衝沙壓地七千四十三畝、免浙江淳安縣水災地畝漕項、並月糧改折銀兩。○是日駐蹕聖因寺行宮、至壬寅皆如之。○己亥

上詣

皇太后行宮進膳。○諭曰、安徽巡撫衛哲治現在丁憂、其員缺著張師載以原品級管安徽巡撫事、速赴新任、安慶與南河相距不甚遠、至伏秋大汛時、張師載仍應赴南河協同總

河高斌學習防護事宜、其巡撫印務即著隨帶、亦不至於地方有誤。○庚子

上幸敷文書院。○幸觀潮樓。○閱兵。○諭軍機大臣等、策楞奏班第達私住珠爾默特那木扎勒房屋、已經飭令不得擅行居住、定以初九日搬移、但現在辦事黽勉、原房甚屬窄狹、懇恩可否賞給居住等語、朕前降旨將從前駐藏大臣居住之通司岡為傳清拉布敦祠堂、其珠爾默特那木扎勒之叛產應追入官。

為駐藏大臣等辦事公所并官兵居住班第達自有舊居珠爾默特那木扎勒原係王爵其房屋體制非班第達所可居策楞等奏摺時尚未接到此旨故有此奏當知班第達不過噶隆中一人若將珠爾默特那木扎勒房屋令其居住將何以處派出同辦噶隆之人今他人皆未與賞獨賞班第達則無以服衆人之心適以長班第達驕縱之漸深有未便著傳諭策楞等仍遵前旨行○辛丑遣官祭

錢塘江神廟

御書扁曰雲依素練○遣官祭

南鎮之神並明臣王守仁祠賜王守仁祠扁曰名世真才○遣官祭賢良祠○諭曰福建水師提督張天駿著來京候旨其員缺著林君陞調補廣東提督員缺仍著黃有才補授廣西提督員缺著岳鍾璜陞補雲南昭通鎮總兵員缺著丁山調補河南河北鎮總兵員缺著楊凱補授○壬寅

上詣

皇太后行宮問安○諭朕向觀嚴瑞龍為人每事有心取巧是以未經陞用去冬因其叅奏唐綏祖貪婪各款不避嫌怨是能改除故習是以降旨褒嘉令其署理楚撫今據該督阿里衮列款叅奏不但取巧且有贓私則知其叅劾唐綏祖亦因永興交查自知平素迎合必將敗露乘此先發仍不出取巧故習嚴瑞龍著革職令河南巡撫鄂容安前赴楚省會同該督阿里衮確審定擬具奏嚴瑞龍能據實揭奏自為用所當用今劣蹟昭著自必罪所當罪惟其自取無容心焉朕之用人行政大公至正不設成見而罰在必行如此著傳諭中外知之○阿里衮摺并發○又諭據河南巡撫鄂容安叅奏稱歸德府紳衿中有倚勢抗糧惡習彭家屏李肖筠兩姓即欠至七千餘兩之多而彭家屏之弟彭家植致死佃戶諱匿不報李肖筠之父窩藏逃犯玩法抗拘

等語彭家屏李肖筠皆司道大員深受國恩
理應奉法急公型家表俗以為紳士之倡乃
逋員正供多至七十餘兩今春特恩寬免豫
省積欠本以蘇窮黎下戶之困若將官戶久
抗之糧一體豁免不特伊等視為得計使小
民效尤人思僥倖大為人心風俗之蠹不加
重懲無以示警彭家屏李肖筠著交部嚴加
議處所欠積年正供之數加罰十倍該撫勒
限嚴追其彭家植李熨應審之案仍著該撫
嚴審定擬具奏○又諭曰浙江布政使員缺
著葉存仁補授按察使員缺著德福補授所
遺杭嘉湖道員缺著山東按察使德文補授
其山東按察使員缺著和其衷補授○癸卯
上詣

皇太后御舟問安○祭錢塘江○奉

皇太后渡江○戶部議准原任湖北巡撫唐綏
祖疏稱湖北漕糧少而漕船多每船應得之
耗米水腳等項亦少運丁拮据經前撫彭樹

葵等題請裁船四十八隻即將裁船之幫費
增運之耗米添給存運各船經部覆准其原
給屯田作何歸著查例咨覆嗣經咨覆部議
令照江浙等省減船屯田例一體歸公查江
浙等省裁減漕船加裝米石俱另給負重銀
兩湖北無此項且程途較遠請仍照原題將
裁船屯田幫費銀加給現運各船從之○總
理行營大臣大學士公傅恒等奏粘竿拜唐
阿德克新在杭州強入民家酗酒滋事請旨
正法粘竿大臣等嚴加議處得旨依議粘竿
大臣阿岱著降一級授為副都統粘竿總管
七十廣華各降一級交該部院嚴加議處總
理行營大臣等係統轄之人非專管大臣可
比著免其議處○御史范廷楷奏四川民陳
昌妻趙氏因夫死絕嗣遂謀殺夫弟之子元
書元格嚇逼元書未成婚養媳劉氏執燈同
往手刃元書將殺元格劉氏熄燈扯止部議
將趙氏照謀殺卑幼律擬絞監候援赦寬免

劉氏照謀殺夫律凌遲處死。趙氏因已無子，遂欲并殺叔子，以絕先嗣。準情比律，明犯十惡不睦之條。且劉氏童年無知，趙氏陷以極刑。若將首惡趙氏援免，劉氏凌遲處死，殊未平允。得旨：御史范廷楷摺奏四川省趙氏謀殺夫弟之子陳元書一案，其所援引議論，雖覺支繞，但其案情若果如所奏，則刑部定擬實屬拘例而不順情，舛謬之極矣。著刑部堂官明白回奏。尋奏：趙氏係期親尊屬，故殺卑幼，並非十惡，與援赦例相符。劉氏年已十六，非無知識，雖不造意，實屬同行。況欲殺夫弟，則知熄燈扯止，致死伊夫，則竟持燈立視，情難曲宥。刑部執法定案，不敢移律就情。雖該督聲明情節，仍不夾簽得旨。趙氏謀殺夫弟之子陳元書一案，刑部明白回奏之處，輾轉辭費，終歸回護，究不出於前旨拘例而不順情之語。既有尚未成婚情節，即當據此聲明夾簽矣。此案御史范廷楷所奏為是。初不因

御史先入之言，稍有成見也。劉氏童年愚稚，尚未成婚，遽處以極刑，情屬可憫。然部中指其知救夫弟而不救夫，則朕亦不能法外貸其死矣。著改為立斬。趙氏情實慘毒，著依本律，不准援免。○以禮部左侍郎呂熾為會試知貢舉。刑部尚書劉統勳、工部尚書孫嘉淦為正考官。禮部侍郎介福、內閣學士董邦達為副考官。○恩賞革職總兵施有功遊擊銜。○是日，御舟駐蹕轉塘村。○甲辰，遣官祭黑龍潭。

昭靈沛澤龍王之神。○諭杭州駐防兵丁較少於江寧二千有餘，而額設副都統轉多一員。且漢軍兵丁止一千六百名，亦不必設兩副都統。著將杭州漢軍副都統裁去一員，現任副都統齊斌著調補福州副都統。其福州副都統范宜謙著回京另補。○是日，御舟駐蹕紹興府西翼，日如之。○乙巳

上親祭

禹陵，行三跪九叩禮。丙午

上奉

皇太后迴鑾渡錢塘江至杭州○諭軍機大臣等今歲恭逢

聖母皇太后六旬萬壽在京王大臣等奏請舉行慶賀盛典於萬壽山至京一路分段豫備公祝

聖壽已經允其所請其各省督撫似此奏請者自應一體准行但伊等於奏准之後祇應先期遣人進京照在京王大臣所辦及分派地方各按段落豫備經壇戲臺之類以展臣子祝嘏之誠而

玉輅經過亦可仰承

聖母歡心不必進獻古玩緞疋等物轉失朕准行之意可隨便寄信通知令其遵照辦理○又諭朕前用成元震為提督自應益加奮勉乃有人奏伊在任於邊疆要務不能留心整理後尹繼善亦如此奏聞在尹繼善向來持論公正所奏自是確實朕念其久歷營伍不

即加擯斥但降補總兵以觀後效如能從此奮勉諸事實力整頓自可承受恩澤若因降補而稍萌怠棄之念以致戎政廢弛朕斷不為姑貸至成元震此次奏摺其整理營伍處亦多粉飾之詞著一併傳諭知之○左都御史木和林等奏京師五城煮賑例自十月朔起次年三月二十日止今值閏年節候較遲請展賑十日得旨今歲京師米價昂貴又係閏年春寒未解若照常年之例停止煮賑誠恐窮民艱於餬口著加恩於限外再賑一月○是日駐蹕聖因寺行宮至己酉皆如之○丁未清明節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○

上詣

皇太后行宮問安○閱兵○賜扈從王公大臣
並浙江大小官員等食○予妣氏奉祀官諭
朕時巡至杭州

禹陵在望○緬惟平成之德萬世永賴

皇祖聖祖仁皇帝○曾親祀焉○爰東渡浙江○陟會稽式遵

皇祖舊典○躬薦馨於宇下○厥有妣氏子姓世居
陵側○應世予八品官奉祀○該督撫擇其有品
行者一人充之○昭崇德報功至意○戊申

孝賢皇后忌辰○遣官致祭○諭朕問俗省方○
翠華所至○黃耆台背○策杖懽迎○雖已於途
次各加恩賜而優卹高年推恩宜渥○著各
該督撫查明經過州縣內男婦年七十以
上者○照從前恩詔之例分別賞賚○又諭
前因高斌足疾不能行走○是以解退大學

士之職○令其辦理南河事務○任事以來○甚屬
黽勉宣力○茲由江省扈從來浙○其屬員無不
奮勉○足見高斌董率有方○深為可嘉○著仍以
大學士銜管河道總督事○以示優獎○又諭
此次考中之謝墉陳鴻寶王又曾○皆取其最
精者○且人數亦不多○著加恩特賜舉人授為
內閣中書○學習行走○與考取候補人員一體
補用○並仍准其會試○總理行營大臣大學
士公傅恒等○遵旨議准○山東巡撫準泰奏稱
隨駕之拜唐阿兵丁等○所騎官馬○留東餽養
收點後○即倒斃百餘匹○餘多瘡癰羸瘠○回鑾
在即○請將東省標營驛站馬匹通融共抽撥
馬四千五十五匹換補○將換存疲乏官馬抵
還各營驛○倒斃無抵者○按營驛均攤動支存
留馬價買補造報從之○己酉工部議准直
隸總督方觀承疏稱○永定河南北兩岸石景
山三角淀西淀等處○乾隆十五年秋冬二季
及十六年春季○兵餉例於霸州文安等州縣

十五年地糧銀內派解該州縣上年被水成災錢糧蠲緩所有應解兵餉請於十四年地糧銀內改撥開徵抵還從之○又議准河東河道總督顧琮疏稱山東汶上汎十里袁口二閘年久傾圮應拆修從之○以故四川印部宣撫司嶺天長子峻德襲職○庚戌

上詣

皇太后御舟問安○閱兵○諭朕省方觀民茂求上理前因浙省士庶誼切急公正供概無

宿逋頒諭嘉獎誕布特恩頃翠華蒞止周覽土風雖與三吳繡壤相錯而閭閻趨尚較吳稍樸但浮競之習舉所不免其蓋藏之未裕均也凡爾封疆大吏暨監司守令具有教養斯民之責當以移風易俗為己任詎惟簿書期會為克盡乃職其在小民則宜崇實去奢雍睦敦讓相勉於孝弟力田以臻仁壽之俗將見化行俗美有進而日上者茲當旋蹕用申訓諭其善承朕意毋怠○又諭此次杭州

駐防之滿洲官兵沿途坐臺隨營當差及瞭兵人等著俱加恩分別賞賚其城內之官兵人等亦各覲勉當差著加恩照依賞給瞭兵人等之數減半賞給○諭軍機大臣等據侍郎那木扎勒將至藏接受欽差大臣關防之處奏聞從前班第係副都統職銜那木扎勒係侍郎又兼護軍統領欽差關防理宜那木扎勒掌管嗣班第經朕加恩賞給都統職銜且較那木扎勒年長關防仍應著班第掌管爾等可寄信與班第那木扎勒並令其曉諭達賴喇嘛公班第達等再藏內之事關係甚大班第那木扎勒凡事宜同心妥商辦理不可瞻顧推諉○定邊左副將軍親王成衮扎布奏喀爾喀坐卡侍衛前鋒有私與準噶爾回人交易者甚或因賬啟爭曾請將該侍衛前鋒革審並請查明坐卡台吉內似此者一併革審奉旨著嚴審究治今查私相貿易相沿已十餘年喀爾喀各旗俱有不止一案請

一體查究得旨。前以私相交易一事。所關甚大。是以令成衮扎布究治。今覽此奏。則從前額駙策凌在時。已有此弊。且各旗俱有。並非僅此數人。如將伊等俱革退。台吉訊究。則獲罪者衆。朕心實有不忍。著祇將此次發覺之案訊治。餘皆從寬免究。仍徧諭喀爾喀之衆。扎薩克蒙古等。嗣後如再有違例出境交易。不獨將貿易之人治罪。并該扎薩克亦從重治罪。斷不輕貸。將此交與將軍叅贊大臣等。不時嚴查禁止。毋得怠忽。○是日御舟駐蹕塘棲。○辛亥祭。

先農之神。遣裕親王廣祿行禮。○諭戶部燒燬房屋。俟工部估計後。先動帑項建造。其撥用銀兩。著蔣溥嵇璜雅爾哈善一同分年彌補。○和碩莊親王允祿等奏。前因京師米貴。奏酌減價平糶。並於京外四鄉。分設四廠。各撥米二千石減糶。自二月二十七八等日。分廠開糶。赴買者日千計。市價漸減。四廠存米

有限。請每廠再撥米二千石接濟。得旨。王大臣等請於京外四廠。再撥米二千石接續出糶。雖據奏米價漸次平減。但較往年尚覺昂貴。著再加恩。每廠各撥四千石。以資接濟。○補行乾隆十五年軍政。廣東罷軟官一員。浮躁官二員。有疾官一員。廣西不謹官一員。有疾官一員。分別處分如例。○免江蘇江浦清河桃源安東銅山蕭縣邳州宿遷睢寧海州沭陽贛榆大河徐州等州縣衛水災額賦。有差。並緩徵清河桃源安東邳州宿遷睢寧海州沭陽大河等九州縣衛節年緩漕。○加賑山西太原應州二州縣水災飢民。並緩徵太原勘不成災村莊錢糧。○是日御舟駐蹕石門鎮。○壬子。

上詣

皇太后御舟問安。○諭軍機大臣等。據府尹顧汝修奏河南偃師縣民傳毓俊呈首張天重等。令其持簿赴宛平縣招人一摺。雖言詞極

其荒誕然不可不辯明虛實該撫鄂容安現在差赴楚省審理事件該布政使不能承辦此事若特遣大臣前往未免張皇已著副都御史胡寶瑤馳驛赴豫會同該布按查審其傅毓俊現在京師著在京總理王大臣會同阿克敦將傅毓俊密行提訊務得實情其原供原簿已令胡寶瑤帶往可向該府尹提取原底查辦仍令阿克敦密派番役查察黨羽應查拏者即行查拏更宜密速合宜即行摺奏亦勿致張大其事惑人聽聞如有挾仇情節亦據實審明奏聞可也是日御舟駐蹕南斗圩

聖訓卷三十八

一

大清高宗法天隆運至誠先覺體元立極敷文奮武孝慈神聖純皇帝實錄卷之三百八十四

實錄卷三十八

下

大清高宗法天隆運至誠先覺體元立極敷文奮武孝慈神聖純皇帝實錄卷之三百八十五

監修總裁官經筵講官太子太傅大學士沈德潛等

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹將

總裁官經筵講官太子太傅文華殿大學士沈德潛等稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣等謹將內大臣戶部尚書張謙滿洲都統軍功紀錄五次

尋常紀錄十四次臣等謹將經筵講官太子少保工部尚書紀祿六次臣等謹將等奉

敕修

乾隆十六年辛未三月癸丑

上詣

皇太后行宮問安○是日駐蹕蘇州府行宮○

甲寅戶部議准原任雲南巡撫圖爾炳阿疏

稱順寧楚雄恩樂雲南等四府縣額徵本色

每年除放兵米外存米有餘請自乾隆十五

年始屆四年折徵一次價每石銀一兩從之

○禮部等部議准奉天府府尹圖爾泰疏稱

鐵嶺縣向有忠孝節義二祠每年春秋致祭

乾隆十三年府尹蘇昌於查奏各項祭祀案

內因該縣率覆遺漏請仍照舊增立撥設祭銀從之○加賑廣東海康遂溪二縣水災飢民並蠲緩本年錢糧有差○是日駐蹕靈巖山行宮○乙卯

上詣

皇太后行宮問安○辛未臣范仲淹祠賜園名

曰高義并賜其後裔范宏興范聖宗范成章

范爾震范嶧等各緞一疋貂皮二張○遣官

祭晉臣卞壺祠宋臣曹彬廟明臣徐達墓常

遇春墓方孝孺等祠並故兩江總督于成龍

傅臘塔祠賜卞壺祠扁曰典午孤忠曹彬廟

曰仁者有勇徐達墓曰元勲偉畧常遇春墓

曰勇動風雲方孝孺等祠曰浩氣同扶○賜

扈從王公大臣並江南大小官員等食○是

日駐蹕蘇州府行宮○丙辰諭軍機大臣等

戶部司房失火一案原應在京該部堂官等

認修是以前於該部奏摺內即降諭旨令伊

等賠修原不因蔣溥之奏也今據嵇璜雅爾

哈善又奏稱曾向蔣溥面商而蔣溥先已奏請獨認等情節此係衙門公事蔣溥本應會商該侍郎等果其會商不從始行獨奏方為得體或該尚書心切急公大家偶爾提及未待商定遽請獨認此則情理所有若如該侍郎等所奏蔣溥當不至此其該侍郎等遇有此事若竟漠然置之朕亦意其未必至此朕之此論伊等應服朕之公明矣但同堂共事不可因此各有成心漸致水火并不可於衆前嘵嘵貽外人訾笑將此傳諭蔣溥嵇璜雅爾哈善等知之○是日御舟駐蹕北望亭○丁巳

上詣

皇太后御舟問安○遣官祭

先蠶之神○調鑲黃旗蒙古副都統赫赫為鑲黃旗滿洲副都統降正黃旗蒙古都統阿岱為鑲黃旗蒙古副都統○是日御舟駐蹕葉家村○戊午諭據湖

廣總督阿里衮奏稱本年三月初一日接到兵部加封軍機處日行六百里公文竟至逾限三日且有破損之處現在挨查有無沈攢私拆之弊并稱楚省郵政廢弛驛鹽道劉士銘才本平庸性復蒼猾遇事不肯振作惟工結納逢迎似此曠官尸位之員實不稱監司之任等語劉士銘著革職其湖北驛鹽道員缺著三寶補授所有遲延破損情節著即速查辦○諭軍機大臣等傳毓俊呈首之案已據總督方觀承訊明係劉克恭挾仇捏造將傳毓俊押解河南等語著將原摺供單鈔寄胡寶瑔令其會同該藩臬秉公查辦當此光天化日之下憑虛捏造大逆之言其心殊不可問且致傳播駭人聽聞關係不小如情節屬實不可僅照誣告人謀叛未成律定擬竟從重照誣告人謀叛已成即行傳旨於該處正法儆衆倘別有情由亦著虛公研訊據實奏聞請旨○又諭曰阿里衮前在山西巡撫

任內原與嚴瑞龍意見不協。其查審唐綏祖一案。雖係嚴瑞龍原奏。但既係特交。自必秉公查辦。即其叅嚴瑞龍。亦俱有實據。初非懷挾舊嫌。但今觀阿里衮所奏。唐綏祖叅案大半子虛。其咎全歸嚴瑞龍。此則恐有意見未能一一持平。既據該督奏請會同鄂容安查審。著如所請。唐綏祖一案。亦交鄂容安會同該督秉公確審具奏。○陝甘總督行川陝事尹繼善奏稱青海境外得卜特爾及伊克柴達木等處。路通準噶爾。節年派撥綠旗蒙古官兵分設臺站卡座巡哨。上年九月。準噶爾夷人至西寧口外投誠。恐無知逃竄者。乘機擾我邊界。添派遊擊守備各一員。千總外委各二員。綠旗兵一百十名。並令郡王索諾木丹津袞楚克達什帶領蒙古官兵三百六員名同駐得卜特爾。伊克柴達木兩處。今準夷新立台吉。入貢恭順。且時值春融。防冬已過。原卡足資防範。添設官兵應徹歸本汛從之。

○是日御舟駐蹕方渡橋。○己未上詣

皇太后行宮問安。○諭軍機大臣等。河南偃師縣傳毓俊誣首叛案。已據直督方觀承究出挾讐主使情節。將該犯解往河南副都御史胡寶瑤現在差往查辦。此案該犯解到正可令其就近質審。在京總理王大臣等不必因先有令伊等查訊之旨。又向該督提犯來京。如已行文。仍令將原文即速趕回可也。○和碩莊親王允祿等奏前因京師米貴。奏明分鄉設廠撥米減糶。嗣因不敷。復請添米。已於本月初九續糶。鄉民買者甚衆。京米價減一錢。現據監糶各員續報再撥米石。又將糶完麥秋尚遠。請每鄉更撥三千石接糶。仍嚴禁奸民買囤。得旨知道了。又批。是此弊應嚴查。不然無益於窮民矣。○補行乾隆十三年大計。江西卓異官四員。不謹官三員。年老官九員。有疾官三員。才力不及官一員。浮躁官一

員四川卓異官六員。不謹官二員。罷軟官一員。年老官六員。有疾官四員。才力不及官三員。分別陞賞處分如例。○以國子監祭酒夢麟為內閣學士兼禮部侍郎。○以編修汪師韓充日講起居注官。○予故正藍旗蒙古都統奉恩將軍塞貝。祭葬如例。謚敏僖。○是日駐蹕金山江天寺行宮。○庚申。諭軍機大臣等。京師三月十四日夜雷雨。十五日午間轉而為雪。經在京總理事務王大臣等具摺奏聞。但時屆春深。麥已長發。此番雨雪。於麥田有無妨礙。摺內未經奏明。殊為厯念。著即查明具奏。○又諭。河南偃師縣村民傅毓俊。呈首監生張天重等。妄謀不軌一案。觀其供詞。及冊內所開。雖荒謬不經。但既經發覺。不可不速行辦理。富勒赫接到方觀承密咨。如知其案情重大。即應自行嚴密查辦。或且靜候朕旨。不使稍有洩漏。方為妥協。今據所奏。乃委之開歸陝汝二道。率領該地方官密行訪

查。不獨此。非該二道所能辦理之事。即其輾轉訪查。亦斷不能不走漏消息。豈不令奸匪聞風遠颺。傳勒赫所辦。全不知事理輕重。此案已據方觀承。究明挾讐指使。誣首情節。現交副都御史胡寶瑤。就近在豫查辦。富勒赫著嚴飭行。○又諭。曰。致仕侍郎沈德潛。著加恩。照伊原官賞給本俸。○是日駐蹕龍潭行宮。○辛酉。

上詣

皇太后行宮問安。○諭軍機大臣等。雲南糧儲道員缺。據碩色。愛必達奏。請將雲南府知府徐鐸陞補。且稱其持躬廉謹。辦事實心。官聲頗好。朕已降旨。照該督等所請補授。但徐鐸為人。朕所深知。伊自為助教及翰林時。聞其托名理學。以博聲望。及其簡用外任。又有能吏之稱。恐其並非內外如一之人。但現在辦事既好。自應加以擢用。然人品之誠偽。為督撫者。則不可不知。可傳諭碩色。愛必達。令其

諸事留心體察勿為所愚○又諭曰魏文舉不勝總兵之任著以副將另補狼山鎮總兵員缺著河標左營副將保在補授○吏部議准江蘇巡撫王師等疏稱贛榆縣荻水司巡檢原駐汾水鎮荻水口嗣因山河流沙淤塞移駐青口鎮請改鑄青口鎮巡檢司印信給換從之○兵部議准署浙江巡撫永貴疏稱杭州前右二衛向係各分前後幫嗣右衛歸并前衛改為杭州衛應將原設杭州前後幫改為頭二幫杭州右衛前後幫改為杭州衛三四幫至嘉興所海寧衛原係統嘉海二屬衛所為一幫並未另行各設幫次嗣嘉興所歸併海寧衛遂改為嘉興衛應將嘉海衛所幫改為嘉興幫並按各衛名一體改給印信從之○以故四川林葱安撫司俄木林琴子工布達吉拈估寨土百戶阿邦子旺乍襲職○免江蘇通州水災額賦有差並貸貧民口糧是日駐蹕江寧府行宮至甲子皆如之○壬戌

上祭明太祖陵行三跪九叩禮

御書扁曰開基定制 奉

皇太后臨視織造機房 閱兵○諭朕省方問

俗巡幸江寧象山之麓明太祖陵在焉

皇祖聖祖仁皇帝南巡時念其為一代創業之

君

鑒興屢詣曠典光昭朕於駐蹕詰朝即命駕前

往躬申奠謁念本朝受命以來百有餘年勝

國故陵寢殿依然松楸無恙皆我

祖宗盛德保全之所致也可令該督撫飭地方

官加意保護其附近陵地毋許樵牧往來致

滋踐踏並曉諭各陵戶知之 又諭曰壽春

鎮總兵常岱身任總兵不能騎射何以表率

營伍著革去總兵在藍翎侍衛上行走 癸

亥諭陝省供應赴川及凱旋官兵雇用民馬

腳價等項應覈減銀三萬九千餘兩該部不

准報銷自屬按例查辦但念彼時軍行緊急

適值積歉之後該撫等惟恐貽誤期雇備

不得不量為加增。以致有逾定例者。加恩照原題准銷。免其覈減追賠。該部即遵諭行。○又諭京口將軍員缺久未補人。是以甚覺廢弛。著王進泰補授。速赴新任。加意整飭。所遺天津鎮總兵員缺。著范宜謙補授。范宜謙未到任之前。著長蘆鹽政高恒暫行署理。李繩武現署安西提督事務。著俟永常回任之後。來京陛見。另行錄用。○又諭曰。王儒正不勝副都統之任。著以協領補用。其京口副都統員缺。著吉慶補授。鎮江距揚州甚近。可以不時往來。所有兩淮鹽政事務。仍著吉慶管理。○又諭江蘇續進詩賦之魏近思等八名。并安徽進獻詩賦之周捷英等十二名。著各賞給緞一疋。荷包一對。其江蘇之嚴長明等二十五名。安徽之張宗邦等二十七名。著各賞給荷包一對。○調河南南陽鎮總兵改光宗為江南壽春鎮總兵官。以廣東南雄協副將

王文敏為河南南陽鎮總兵官。○恩賞革職總兵官雷澤遠叅將銜。○甲子。

上詣

皇太后行宮問安。○賜扈從王公大臣並江寧府大小官員等食。○乙丑。諭江寧駐防兵丁每年應支兵米例支本色四個月。折色八個月。其折色內惟二、三、五、六、八、九等月。每石折銀一兩二錢。至十一、十二兩月。及遇有閏月。每石則折銀七錢五分。多寡既未畫一。且偶值市價昂貴。兵丁未免拮据。嗣後江寧駐防兵丁十一、十二兩月並閏月折色俱著加恩照二、三等月之例。一槩給銀一兩二錢。該部即遵諭行。○又諭曰。紀山前歲駐藏怯懦無能。事事順從。殊爾默特那木扎勒任其恣意妄行。與之盟誓。以致逆謀益肆。此番西藏之事。紀山實為罪首。是以拏交刑部治罪。業照部議應斬監候。秋後處決。尚不意其悖謬妄亂。更有出於情理之外者。今據策楞兆惠班

第那木扎勒等奏稱紀山此番駐藏令兵丁演戲班名自樂時與珠爾默特那木扎勒宴會觀劇日在醉鄉並送珠爾默特那木扎勒八轎仍派轎夫前往教演番奴擡轎以肆其志等語伊在藏如此行為及傳清拉布敦至藏乃以體制裁正珠爾默特那木扎勒遂成嫌隙設令紀山早能持正珠爾默特那木扎勒亦必自知斂戢是傳清拉布敦之死皆紀山之喪心無恥曲意逢迎有以致之也紀山之心蓋希冀苟且度日過此二年得代回京而於國家大體藏地安危一切置之度外大臣如此存心尚可問乎大臣尚可倚任乎此案策楞等四人合奏證據明確實可髮指紀山之父陣亡賜恤朕所深知紀山即犯賊私重辟朕必原情曲宥至關係軍國重務朕不容屈法豈陣亡後裔遂可偷生附叛乎紀山本應即肆市曹仍念其先代陣亡姑從寬賜其自盡著在京總理王大臣傳諭刑部尚書

阿克敦內大臣嵩壽齋旨前往監看并示中外知之摺併發○又諭曰據策楞等奏稱頗羅鼐舊日分食錢糧之林青側並頗拉二處查係早年拉藏汗所賞除人地仍照舊歸達賴喇嘛管轄外兩處所交差賦值銀二千六百餘兩此係叛產照例入官令其按年交納欽差大臣以備獎賞之用等語此所辦非是內地辦理叛案定例妻子連坐財產入官珠爾默特那木扎勒躬為叛逆是以降旨將伊妻子正法所有財產雖係例應入官之項但西藏究非內地可比現今達木蒙古養贍伊等奏令於達賴喇嘛賞中動用何不即以此項添入達賴喇嘛賞中動用至駐藏大臣一切獎賞自有養廉公項可動無庸待給於此再聞班第達家道艱難今既委辦噶隆事務用度未免拮据並可於此內酌量賞給資其用度則不致苛派下屬矣可傳諭策楞兆惠那木扎勒班第等并曉諭藏衆知之○諭軍

機大臣等策楞等請將頗拉差賦五百餘兩賞給班第達之處已諭令酌量賞給。班第等宣布明旨後竟將頗拉差賦作伊等酌量賞給可也。再駐藏大臣一切獎賞之費在所必需。其養廉公費銀兩目今何數是否足敷用度若不敷用據實奏聞加給著策楞兆惠速為會同查辦。尋奏駐藏大臣如副都統等官自成都起程一切行裝折色向照豐裕例支給即以此項餘存為駐藏賞號差遣路費之用。去歲經部覈減照西寧例給僅敷辦理行裝雖到藏後每月仍前支領折色銀一百六十餘兩並無贏餘。遇獎賞番衆兵丁及差遣查汛費均無出請於西藏糧務軍需項下每年支銀五百兩半備賞需半為差遣路費得旨如所議行。○四川總督策楞等奏酌定西藏善後章程。一西藏辦事噶隆向例四人噶隆布隆簪失明被珠爾默特那木扎勒革退現存班第達策楞旺扎勒色裕特塞布騰三

人班第達奉特旨以公職辦噶隆事策楞旺扎勒色裕特塞布騰查無黨逆情形且係奉旨原放噶隆並賞有扎薩克頭等台吉職銜應仍留辦噶隆事布隆簪缺選放深於黃教喇嘛一人賞給扎隆大喇嘛名色一噶隆會辦事件舊於噶沙公所會辦自頗羅鼎後各噶隆俱辦事私宅舍官放之員不用添用私人嗣後應仍赴公所會辦私放之員裁革一各處喋巴等官有管理地方教養百姓之責珠爾默特那木扎勒各放私人其人又不親往差家奴赴辦擾害地方嗣後噶隆等應公同稟報達賴喇嘛并駐藏大臣補放家奴代辦者撤回人地不相宜者換補至各寺堪布喇嘛並照舊由達賴喇嘛選派一卓呢爾商卓特爾曾本隨本各官名色惟達賴喇嘛前有頗羅鼎封王後亦照添設應查革祇於公所設立卓呢爾二人兼領原設之仲意筆七格等辦公一噶隆向祇辦地方事兵馬卡隘

俱責成代奔。後藏地小。且設代奔三人。衛地大。僅代奔一人。遇差假。無人彈壓地方。護衛達賴喇嘛。應添設一員。與現有代奔。於補放時一體頒勅。全藏人民。向屬達賴喇嘛。按地方大小。人戶多寡。均定差徭。頗羅鼐等。任意侵占。或市私濫賞。甚至擅給免差文書。於所憎則加派。嗣後噶隆。代奔等。應公查舊檔。除因功勸賞。毋庸徹回。外。私賞濫免者。並查稟達賴喇嘛。徹繳。加派者減。達賴喇嘛差務。向由地方百姓供應。自頗羅鼐等任事後。凡噶隆。代奔等。差人往西寧打箭爐色爾喀馬阿里克等處交易。亦私出牌票。致烏拉派累百姓。嗣後應禁止。遇公事稟明達賴喇嘛。發給印票遵行。達賴喇嘛倉庫。向係倉諸巴專管。公事動用噶隆等稟明達賴喇嘛代。理。啟閉俱以達賴喇嘛印封為憑。頗羅鼐等始行擅取。嗣後應仍照舊辦理。哈拉烏蘇接壤青海。阿里克接壤準噶爾。應令達賴喇

嘛選員駐劄。並咨部奏給號紙。達木蒙古前經頗羅鼐奏由該王差遣珠爾默特那木扎勒被誅後。潛回達木。查該蒙古等皆無罪之人。既願歸達木候差。自宜妥為安頓。其現有頭目八人。名號或稱宰桑。或稱台吉。均係頗羅鼐等妄加。應改為固山達。所屬擇授佐領。驍騎校各八人。給頂戴歸駐藏大臣統轄。仍令每佐領各派十人。駐藏備差。至向駐藏地餬口之蒙古數十戶。查明存案。准其留藏。得旨。著照所定行。下部知之。諭軍機大臣等。策楞等所奏辦理藏地事宜。朕已批照所奏允行。但藏地關係最要者。尤在臺站。此乃往來樞紐所在。觀從前珠爾默特那木扎勒。不令塘站遞送文書。即至驛遞斷絕。及班第達傳令遞送。始復通行。皆由伊等主持。而駐藏大臣不能制其行止。操縱何以得其要領。此處最宜留心辦理。朕前亦諄諄降旨。何以策楞等此奏內。於此條反致未經議及。但此時

甫經定議。又因此條有所更張。反致藏中諸人啟疑。只可令班第那木扎勒留心。俟一二年後。再辦理請旨可矣。又現議內補放噤巴等官。有管理地方。教養百姓之責。以後補放其權。皆歸達賴喇嘛。駐藏大臣等語。此種噤巴頭目。所管何事。何處地方。其裏塘。巴塘。一帶塘站。是否亦係此等頭目所管。若即係此等頭目所管。則權已歸達賴喇嘛。駐藏大臣不致復有塘站阻隔之事。此旨所問。即不必

平定志卷之二十一

辦理。再兆惠由京中特遣前往。原為辦理藏地一切機宜。自應俟諸事奏定。准行接旨後。奏聞。即日回京。方是。乃甫經立議。不待批覽。一面具摺。即一面奏明起程。且有欲速之意。若云彼處情形。則早已悉知。不待兆惠面奏。始知京中有何事。迫不及待。若此耶。去時星速。是為志切。急公來復。遙行。則心存內顧耳。著傳旨申飭。○和碩莊親王允祿等奏京城米貴。自分鄉設廠。並節次撥米減糶。京米減

價錢許復。因雨多路濘。京外商販雜糧難到。米價仍增。查京城夏季甲米。經倉場侍郎鶴年等奏准。於四月十五開放。請挪前半月。再內務府八旗五城米局。向例每局糶完千石後。交清錢糧領運。計以錢易銀。交部覈算。由部行文倉場撥領。往返守候。恐遲接濟。請令一面易銀交部。一面赴倉領米。得旨。甚好。知道。○兵部奏前據調任戶部尚書舒赫德奏請。酌定各省往來文移。日行里數。編設排

平定志卷之二十一

單。挨站填覈。奉旨。允行。並行令各省查報。經各督撫彼此咨商。分別險易。酌覆到部。江蘇安徽。山東。陝甘。均按事緩急。照舊例。日行三百里。六百里。其餘緊要公文。直隸宣化府屬之長安。鵬鶚。赤城。雲州。並熱河道屬之喀喇河屯等處。浙江會江驛。至福建小關。並江西常山各驛。均日行三百里。山西至豫省之盤陀等驛。江西之德化等驛。湖北自東湖縣至成都。四川自成都至打箭爐。並至湖廣陝西

貴州各省會。均日行四百里。廣西日行二百里。自廣西至廣東水站日行三百里。廣東赴江入楚並至廣西省。均日行二百里。自省至福建日行二百四十里。雲貴日行四百八十里。福建日行二百四十里。湖南河南照舊例日行三百里。六百里。但湖南自祁陽至廣西路窄嶺峻。河南黃河阻隔。請俱展限一時。均應如所議。部頒排單式樣遵辦。惟內廷交發事件。仍按三百里六百里舊例發送。至古北張家喜峯殺虎獨石各口。界連外藩。文移絡繹。其管站郎中員外等。酌定日行里數。交理藩院覈定。咨部存案。東三省幅輳遼濶。將軍副都統等文移。亦應酌定日行里數。填單稽覈從之。○工部議准。兩江總督黃廷桂疏稱。沐陽縣後沐河隄工。原估間段幫築。今勘未築段。落或地當頂衝。或舊堰卑薄。應加築從之。○蠲緩浙江玉環永嘉樂清瑞安平陽臨海溫州等廳縣衛水災。本年漕項銀米有差。

○開除江西萍鄉縣乾隆十年報墾復被水衝民田七畝有奇。○旌表守正捐軀之江西石城縣民朱方秀妻鍾氏。○是日駐蹕龍潭行宮。○丙寅。

上至京口祭江。○奉

皇太后渡江。○諭軍機大臣等。據黑龍江將軍富爾丹等奏。稱去歲吉林地方雨水過多。河水漲溢。衝損田苗。米價昂貴。每一大石價至九兩之多。如青黃不接時。米價再長。窮民更覺艱難。請將黑龍江所屬呼蘭地方倉貯米石撥倉斛一萬石。由水路運至吉林。令彼處旗人照齊齊哈爾地方所定官價。倉斛三石五斗四升。糴價銀一兩二錢等語。此奏雖屬留心公事。但所奏倉斛三石五斗四升。糴價銀一兩二錢。較一大石之數。足與不足摺內並未聲明。如一大石與倉斛三石五斗四升之數相等。則吉林地方現已賣銀九兩。而倉斛三石五斗四升只作價一兩二錢。減價過

多恐不肖之徒從中取利賤買貴賣反于窮民無益夫平價一事當視現在價值以漸平減如一徑減價太過則多寡懸殊反生弊端但富爾丹等既稱現在吉林米價昂貴若俟查明請旨再行辦理現當青黃不接之時與窮民無益可寄信與富爾丹卓鼎等會同商酌惟期有益一面辦理一面奏聞○是日駐蹕金山江天寺行宮○丁卯

上詣

皇太后行宮問安○諭內閣時屆暮春朕回鑾所至青疇彌望二麥既已抽芒新秧亦將出水朕心深為欣慰但沿途耆民婦孺紛闐載道翠華一過則皆隨行恐後在民情之愛戴雖所嘉許而接隴連畦或致踐踏殊可惜也著傳諭該督曉諭百姓許其路旁跪接不必追隨遠行以致擁擠有損青苗但行勸諭不可令兵驅逐禁止俾知朕愛民重農之意○又諭曰大學士張允隨病故員缺一時未得

宜補授之人原任大學士陳世倌從前罷任尚無大咎上年已復予原銜此番於行在屢經召見雖年過七十精力尚健且係舊人仍著入閣辦事○又諭曰此次考中之蔣雍植錢大昕吳煥褚寅亮吳志鴻著照浙江之例特賜舉人授為內閣中書學習行走與考取候補人員一體補用其進士孫夢遠著授為中書遇缺補用○是日駐蹕高旻寺行宮○是月直隸總督方觀承奏直隸上年被水東西兩淀南北運河並白溝唐沙薊運等河先後泛漲又天津海河倒漾秋盡始退各處隄埝多衝刷殘缺須汎前修補本年二月親往履勘工可緩者暫停應題修者題修應民修者民修民值災後此次酌借口糧秋後免息還倉惟霸州沿淀六工雖係民埝而漫水未涸現飭河員指示次第令民分年帶修無庸議借口糧其上下六工之間聯成營田圍埝四面坍塌營田効力原任知州馮章宿捐修

東南二面。西北二面。動支營田生息書院膏火。餘存銀補築其餘災地工程。難用民力。又不應另案動帑者。照興工代賑例辦理得旨。著照所請行。○古北口提督布蘭泰奏。徵收斗稅。歲有贏餘。請將經理之員。紀錄一次得旨。此奏不當。未有因徵稅多而紀錄之制。汝量加優獎足矣。○署浙江巡撫永貴奏。杭城風雨過大。菜豆花時。間有搖落。麥苗甚為暢茂。蘭溪縣報有一二村莊。偶被小雹。餘俱雨暘時若得旨。若至成災。不可掩飾。○閩浙總督喀爾吉善等奏。閩省移駐縣丞共十四員。向以地方離縣寫遠。移駐彈壓。並分割都圖。徵糧理訟。任等知縣。題增養廉。茲查各移駐縣丞。事同一體。養廉懸殊。應稟多益寡。自本年夏季始。統以一百六十兩為率報聞。○山東巡撫準泰奏。東省命盜案多。臬司一缺。三載以來。正署十易。惟德舒到任十月。該員奮勉。事頗就緒。奉旨調補福建。再易生手。恐難

即收臂指之益。請以自湖北調補山東按察使德文。改調福建。德舒仍留山東得旨。汝但知東省。而不知閩省臬司為更要也。○陝西布政使張若震奏。謝調任恩。並稱邊關要地。當實心整飭。不敢稍懈。得旨。汝不過空言。而一切不實心。即汝在甘肅。一年有餘。所辦理整頓為何事耶。

大清高宗法天隆運至誠先覺體元立極敷文奮武孝慈神聖純皇帝實錄卷之三百八十五

大清高宗法天隆運至誠先覺體元立極敷文奮武孝慈神聖純皇帝實錄卷之三百八十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未夏四月戊辰朔享

太廟遣顯親王衍潢恭代行禮○禮部以繙譯會試中額請得旨這繙譯會試滿洲取中十六名蒙古取中二名又請文會試中額得旨這會試滿洲蒙古取中七名漢軍取中一名直隸取中二十名奉天取中一名山東取中十三名山西取中十七名河南取中十一名陝西取中十三名江南取中三十名浙江取中二十八名江西取中二十五名湖北取中十一名湖南取中五名福建取中十四名廣

東取中十五名廣西取中五名四川取中九名貴州取中七名雲南取中九名五經卷今年不必取中○實授高琦為浙江衢州鎮總兵官○豁除陝西吳堡縣坍塌地七畝額賦○旌表守正捐軀之山東單縣民張君輔女張氏福建惠安縣民王元妻陳氏○是日御舟駐蹕小五臺○已已

上詣

皇太后御舟問安○命侍講蔡新仍在尚書房行走○是日御舟駐蹕崇家莊○庚午諭軍機大臣等據顧春奏稱登州各屬營伍廢弛城守並堆鋪不但兵數單薄軍容亦屬不整海口礮臺坍塌戰船汎兵僅派五名向來惟知致力於出哨之時疎於防守種種未妥現在添派兵丁整飭各水師戰船停泊之處各添建堆鋪三間以資防護彈壓等語此皆係什格從前不能整飭

所致朕此次經由東省見什格人材平常。恐於登鎮不甚相宜。曾降旨詢問準泰。而伊稱什格尚堪勝任。並未據實奏明。今如顧春之言。則什格之廢弛已屬顯然。準泰身兼提督。所司何事。乃毫無覺察。一至於此。殊屬不合。所有估修礮臺及添建堆房銀兩。著於準泰什格名下分賠。以示懲警。可即傳諭準泰知之。○雲南巡撫愛必達奏滇省銅廠惟湯丹大水碌碌三處最旺。

實錄卷三八六

三

向係管理銅務糧儲道。在省遙制。僅委雜職一員。同該道幕友家人赴廠經理。諸弊叢生。致多厥欠。請嗣後各委現任同知通判。或試用丞倅等官往駐。辦理發銀收銅一切事務。月給養廉銀三十兩。報聞。○是日御舟駐蹕柳家鋪。○辛未。

上詣

皇太后御舟問安。○諭朕前經降旨。將王進泰補授京口將軍。但京口營伍亟須整頓。薩爾

哈岱在杭州任內操練兵弁。尚屬可觀。著將薩爾哈岱調補京口將軍。即由此速赴新任。杭州將軍員缺著卓鼐調補。卓鼐未到任之前著德新暫行署理。吉林烏拉將軍員缺著永興補授。王進泰著調補壽春鎮總兵。改光宗仍留南陽鎮總兵之任。王文敏仍留副將之任。俟有總兵缺出另行補用。○又諭直隸布政使員缺著王麟補授。按察使員缺著永寧調補。江蘇布政使員缺著郭一裕補授。兩淮鹽運使員缺著何煒補授。運使專司鹽務。非有地方之責。者可比河工防汛各事宜。仍著何煒兼管。聽大學士高斌調度。差委河庫道員缺著宿虹同知李宏補授。○諭軍機大臣等。朕回鑾之日。殿試已經屆期。所有應行辦理之處。著傳諭該衙門豫為辦理。勿致稽遲。俟朕到京。即請期殿試。○戶部議准兩廣總督陳大受疏稱。南寧等六府州屬行銷高廉二府場分熟鹽。請將江口運館事宜令南

實錄卷三八六

四

寧府同知管理給以軍鹽關防從之○豁免
甘肅皋蘭渭源固原州鹽茶廳靈州寧夏寧
朔西寧碾伯等九廳州縣乾隆十三年分被
災額賦有差○緩徵廣東海陽潮陽揭陽澄
海饒平惠來普寧豐順等八縣風災額賦兼
賑海陽飢民○是日御舟駐蹕直隸廠○壬
申

上詣

禹王廟拈香

御書扁曰平成永賴○是日御舟駐蹕高良
澗翌日如之○癸酉

上至蔣家壩閱視隄工○諭徐州府屬沛縣濱
湖地畝近年以來屢被水災所有應徵租銀
自乾隆十年起按年勘報蠲豁而九年以前
積欠未完租銀以不在勘豁之例仍須照數
輸納貧民未免拮据著將乾隆九年以前應
徵未完租銀三千一百餘兩一併加恩豁免
以示軫恤災黎之意該部即遵諭行○諭軍

機大臣等據總管內務府王大臣等奏本年
恭逢

皇太后六旬萬壽舉行慶賀一摺現在鹽政吉
慶高恒俱奏請豫備慶賀并稱伊等各有所
屬商人懇與慶祝伊二人自應令其同各省
督撫在萬壽山至西直門分段備辦至現在
江南督撫等豫備慶賀之處已令大學士公
傅恒尚書海望與伊等面商酌定其餘俱如
王大臣等所請敬謹豫備可也○又諭彭家

屏李肖筠抗欠錢糧一案因已降旨加罰示
懲所有部議革職之處姑從寬留任○軍機
大臣等議覆直隸總督方觀承奏稱先准總
理行營大臣奏准令直隸於營驛馬內酌挑
一千匹趕赴順河集抵補上駟院馬之用臣
當即會同臣標中軍於營馬內挑五百匹驛
馬內挑五百匹又另備餘馬一百匹於四月
初四五等日趕赴順河集應用等語查此項
馬俟到齊後查看可騎者挑出不敷者照數

補給。如有餘。抵換順河集留存拜唐阿兵丁
疲乏馬匹。至稱此項馬。似應開除另補。所撥
驛馬。於留二項下買補。營馬於朋扣項下買
補。餘馬照此辦理。至馬乾草豆。於出境日扣
除。在東江二省支項報銷。無庸直省還項。應
如所請。至該督於未奉文之先。豫備營馬一
千五百匹。今撥去六百匹。尚存九百匹。應令
先期趕赴德州。或景州。如上駟院及拜唐阿
有更換者。聽候更換。從之。○甲戌。

上詣

皇太后御舟問安。詣

禹王廟。

風神廟拈香。至黃河岸祭

河神渡河。○諭此次隨從人等。至順河集登
陸後。所用船隻。仍應各回生理。但恐開口擁
滯。多被攔阻。伊等窮苦船戶。回空既無雇值。
又致停泊久候。何以資生。著派侍郎雅爾圖
嵩壽。會同將軍錫爾璘。總漕瑚寶。來往順河

集清江浦一帶。將此項回空船隻。於二三日
內。令其盡行過閘。以示體卹。○吏部議准江
蘇巡撫王師等疏稱。江寧府司獄缺裁。歸併
檢校管理。大勝驛歸併龍江關大使管理。印
均更換。從之。○戶部議准貴州巡撫愛必達
疏稱。黔省水城通判所屬猓木底鉛廠已空。
應封閉。請於茨沖地方。就近煎燒。照例抽收。
每百觔以一兩五錢變價解庫。從之。○又議
准署浙江巡撫永貴疏稱。永嘉象山臨海黃
巖太平寧海天台仙居樂清瑞安平陽雲和
玉環杜瀆黃巖永嘉長林溫州等縣場衛。共
勘成災田地一千七百八十一頃七十八畝。
零戶口應加賑卹。從之。○兵部議准護貴州
巡撫布政使溫福疏稱。思州府屬偏刀水地
方。改併龍泉縣管轄。請撥石阡營外委一員。
兵二十名。設立臺汛分駐。內偏刀水汛外委
一員。兵十五名。大都巴塘兵三名。河地塘兵
二名。從之。○以正黃旗滿洲副都統玉保為

正黃旗蒙古都統○雲南臨安府納更山土
巡檢龍璽故以其子勝霄襲職○賑卹廣東
龍川長寧和平海陽饒平大埔澄海豐順嘉
應長樂平遠鎮平等十二州縣乾隆十五年
分被水災民○是日御舟駐蹕徐家渡○乙
亥諭軍機大臣等該督尹繼善所奏山西聞
喜縣知縣王瑞霖為伊子王里士賄囑朱荃
入學一案已經將王瑞霖題叅革職解川究
審并密咨山西撫臣先行摘印看守著該撫
阿思哈即將王瑞霖速行委員押解赴川該
督嚴審定擬具奏○又諭據松潘鎮總兵馬
良柱奏稱雜谷安撫司勒兒悟與臣標中營
所管七布義眉喜土千戶郎拓他讐殺爭競
一案已稟商督提二臣差員前往排解將次
完結等語此等讐殺之事雖屬夷地常有之
事如不過尋常小閥旋已解散自可置之不
問如其稍有情節僅差員排解恐夷性習為
故常必致釀成事端不可不為防範彈壓該

地方既有此事尹繼善岳鍾琪何以不行奏
聞其讐殺情形輕重并現在曾否完結之處
著尹繼善岳鍾琪即速查明具奏尋秦川省
地方番夷環處自來不能和睦其連界之處
稍有微嫌動輒報復臣等惟隨事斟酌妥辦
如果別有情節敢於抗肆自應另為料理若
尋常小閥旋即解散只須嚴行化導秉公剖
結不致番夷玩縱釀成事端今勒兒悟與七
布互相讐殺原因竊刼起釁並非別有情節
是以臣等會飭委員確查酌量剖結不敢以
此等事上瀆得旨雖然如此在能辦事之公
正大臣或可若非如此人將啟諱飾之端亦
非邊疆之利也以後有如此事不張皇滋事
可也將如何滋釁如何料理之處據實奏聞
為是○是日御舟駐蹕于家店○丙子諭軍
機大臣等據齊大勇奏盤獲張維捏稱大學
士史貽直胞姪原任兵部郎中史貽簡之子
史應暉投遞假書一案已經審明實係假冒

看來楚地居四達之衝宵小易於託蹟此等假冒撞騙之事往往有之該督阿里衮應嚴飭各屬實力稽查毋令流棍冒託貽害地方至此案既已移交該縣審擬招解著阿里衮從重辦理以懲一警百○戶部議准河南巡撫鄂容安疏稱乾隆十六年分德州倉應徵米石除祥符等州縣統徵本色永城等州縣改辦黑豆運通其臨清倉米石應令各州縣每石折銀八錢徵解支給從之○是日御舟駐蹕順河集○丁丑

上詣

皇太后行幄問安○籌定洪澤湖五壩水誌暢開清口諭曰洪澤湖上承清淮汝潁諸水匯為巨浸所恃以保障者惟高堰一隄天然壩乃其尾閭伏秋盛漲輒開此壩洩之而下游諸州縣胥被其患冬月清水勢弱不能刷黃往往濁流倒灌在下游居民深以開壩為懼而河臣轉藉為防險秘鑰二者恒相持朕南

巡親臨高堰循隄而南越三滾壩至蔣家閘周覽形勢乃知天然壩斷不可開夫設隄以衛民也隄設而民仍被其災設之何用若第為掣流緩漲自保上游搶險各工而隣國為壑田廬淹沒勿復顧惜此豈國家建立石隄保護生靈本意耶為河臣者固不當如此存心也天然壩當立石永禁開放以杜絕妄見近者河督大學士高斌副總河巡撫張師戴於開天然壩之說亦深以為非而請於三滾壩外增建石滾壩以資宣洩朕親臨閱視謂增三為五即以過水一二尺言之向過三尺者即為五尺向過六尺者增而至丈是與天然壩名其實同人必有議其巧避開壩之名而陰襲其用者是當為之限制上年滾壩過水三尺五寸天然壩仍未開放應即以是為準俾五壩石面高下維均以仁義禮智信為之次仁義禮三壩一如其舊智信二壩則於石面之上加封浮土必仁義禮三壩已過水

三尺五寸。猶不足以減盛漲。則啟智壩之土。仍不減。乃次及於信。斯為節宣有度。較之開天然壩之一往。莫禦者懸殊矣。再高堰石隄。至南滾壩以南。舊用土工石隄。有首無尾。形勢不稱。應自新建信壩北雁翅以北。一律改建石工。南雁翅以南。至蔣家閘。水勢益平。則石基輒斲。如此方首尾完固。屹如金湯。永為淮揚利賴。至洪湖束水。藉以刷黃。而上游宿虹。鳳。潁諸邑。歲被水患。議者謂洪湖盛漲。諸

邑先被其災。洩洪湖仍於上游無補。自朕觀之。漲減則上游之漫溢者亦減。此固在封疆大吏。於未被水時。先事綢繆。而司水土者。亦未可以閤閭休戚。非已職掌所在。而專以束水保隄為得計也。河工宿弊。不可枚舉。而無益之費尤多。或明知無用。而因循不廢。或陰以為利。而妄事興修。高斌張師載于此。雖能持正。如茆家圩頭二草壩。固已廢所當廢。而此外無益之費。即以朕巡視高堰一壩之內。

已不勝屈指數。然屬員已議其不發帑不興工矣。朕觀河臣堯領河漕。數千里民命所繫。視督撫綏輯一二省者為難。冒涉風雨。守護隄防。亦視督撫坐辦案牘者為勞。而督撫職在刑名錢穀。事有實據。是非難掩。河臣遵守章程。可以福命苟安。無事則其任較易。歷來河臣。不乏表表尸祝之輩。而糜帑養患。有罪無功。其識機宜。得關鍵。實著功效者。幾人哉。果使全不興工。則置民瘼於不問。河臣幾於

虛設。固無此政體。如其糜脂膏以擲虛北。則

蠹弊之最巨者。總之河不可不治。而無循其虛名。工不可不興。而必歸於實用。斯為至要。

昔我

皇祖聖祖仁皇帝。屢幸南河。躬親指示。平成睿畧。萬世永賴。朕何能仰企一

二。即經臨視。有所籌畫。亦不敢自信為必不可易。惟愛養黎元。揆理度務。崇實敦本。兢兢業業之衷。可共白耳。將此詳悉宣諭中外臣

民其庀材興工一切應行事宜河臣會同督臣按例確估具題○又諭乍浦水師滿兵自雍正七年設立於杭州江寧二處餘丁內挑選移駐原定加增每名月支餉銀二兩米一石伊等水陸操防差務繁多而移駐將及廿年家口漸增所需銀米不敷食用朕命駕省方清問所周無不廣敷渥澤自應一體加恩所有乍浦駐防水師新兵每月米石著照杭州駐防之例給與二石五斗其應支本色折色之處令該將軍督撫副都統酌量照例辦理○是日駐蹕葉家莊大營○戊寅諭軍機大臣等富明已補授陝西安西道著傳諭直督方觀承如富明現在途次辦差即令前來請訓由此赴任如在伊廣平任所著方觀承委員前往署事即令速赴新任不必前來請訓并傳諭該員從前因伊不實心任事是以降等補用知府今復加陞擢更不可不知勉力報効其所有承辦城工令伊留人辦理○

又諭前因珠爾默特那木札勒將西藏驛站禁止往來并稱如不早散必盡行誅戮遂致文書斷絕至伊被誅後班第達傳令臺站始通此事甚有關係屢經降旨何以策楞兆惠等並未查明具奏而即匆匆就道著傳諭策楞兆惠等將珠爾默特那木札勒斷絕站路之處始於何時所有沈攔文書曾否俱行查出逐一查明具奏如伊等未過察木多地方著沿途挨查如已過察木多仍著回程駐於察木多查訊明悉一面奏聞一面就道其應在藏地挨查之處著伊等行文班第那木札勒查明具奏伊等不必再往藏地再此事不過欲悉其情節不可又致生番衆之疑慮尋奏臣等挨塘查察自打箭爐至拉里奏摺公文均隨到隨接並無遺失惟逼近西藏之占達墨竹工卡烏蘇江堆達鹿馬嶺五塘係羅布藏扎什所管信字一到聲言不許漢人文書往來併欲戮汎兵以致塘兵回奔臺站斷

絕外委陳世庚處致有沈攔前項火票遞到公文等件。事定後俱送交糧務通判常明查收。至始於何時一節。查十月十三日。珠爾默特那木札勒被誅之後。羅布藏扎什與白隆沙格巴商圖報復。圍通司岡。令各喋巴阻往來文書。并戮塘兵嗣達賴喇嘛公班第達。差人傳示各番。不得驚擾漢人。斷絕站路。僅一兩日。因各塘遠近不一。故具報參差。臣等已行抵打箭爐地方。去察木多二千五百餘里。甫經到口。又復轉回。恐番性多疑。造言驚擾。請即駐爐地。委泰寧協副將前往察木多一帶挨查。并咨會班第等一體查察得旨。覽奏俱悉。○四川總督策楞奏。臣等奉旨。令將藏地噶隆多立數人。以分其勢。隨就本地方密加訪察。知舊例噶隆本屬四人。一係公班第達。餘係扎薩克台吉策凌旺扎勒色玉特色布騰。布隆贊。三人俱藏內大族。素為番衆所服。內布隆贊雙目失明。難以復加錄用。其策

凌旺扎勒色玉特色布騰皆老成明白可勝此任。應請仍放為噶隆。至布隆贊所遺之缺。據達賴喇嘛以番衆不能深曉黃教。保舉喇嘛尼瑪嘉木燦明白可信。臣等擬請給予扎薩克喇嘛職銜。放為噶隆。公同辦事。報可。諭噶隆公班第達。扎薩克台吉策凌旺扎勒色玉特色布騰。扎薩克喇嘛尼瑪嘉木燦等曰。西藏廣興黃教。為清淨善地。達賴喇嘛掌管西方佛教。廣演經法。從前供養喇嘛一切事務。原係噶隆四人。至珠爾默特那木札勒諸事專擅。不與衆噶隆商議。負恩任性。潛懷異圖。因此駐藏大臣將伊正法。今藏內已經平靜。噶隆事務不可一人專辦。特令總督策楞揀選賢能。仍照舊例分設噶隆四員。公同辦事。爾等當感戴朕恩。尊敬達賴喇嘛和衷協力。黽勉供職。勿存私意。致生猜疑。勿分彼此。互相瞻顧。遇有緊要事務。稟知達賴喇嘛與駐藏大臣。遵其指示而行。爾等其感恩宣力。

副朕興黃教安羣生之至意○是日駐蹕五里鋪大營○已卯

上詣

皇太后行幄問安○吏部奏西藏糧餉事務通判常明受傷身故請照陣亡有頂帶官員例授為雲騎尉照例襲替從之○兵部議准直隸總督方觀承疏稱直隸沿邊應用滿員副將係張家口三屯營二缺張家口路當塞北防守宜嚴三屯營雖營制廣濶較之張家口

稍簡請將三屯營副將改為部推張家口仍以滿員補用從之○又議准署山西提督印務太原鎮總兵額爾格圖疏稱新平助馬偏關河保參將四缺設在偏營地方廣濶最關緊要應請仍用滿員其稍簡之得勝東路靈邱北樓平魯寧武老營共七缺歸於部推從之○以直隸布政使恒文為湖北巡撫○免甘肅狄道河州靖遠平涼鎮原隆德固原靜寧靈臺鹽茶廳清水張掖永昌中衛寧夏寧

朔西寧平羅碾伯高臺等二十廳州縣乾隆十四年被水旱電霜災民額賦有差○是日駐蹕王家莊大營○庚辰諭軍機大臣等朕前過山東時見什格辦事甚屬平常登州總兵員缺緊要恐其不能勝任是以令與顧春對調及顧春到任後將登州各標營種種廢弛情形據實奏聞可見什格在登時一切並不留心整飭果不出朕之所料馬蘭口事務較之登州雖屬稍簡然

陵寢重地更宜加緊巡防今伊請赴良鄉接駕奏稱巡防事宜辦理漸次就緒恐伊之所謂就緒亦不過如在登州任內耳著傳旨申飭務宜諸事黽勉實力振刷以圖後効倘仍因循關革致營伍廢弛朕有所聞斷不寬貸○又諭據德文奏稱楚省正二月間雨水過多米價由一兩四五錢增至二兩不等向來楚省民食全賴川省商販近因川米稀少若麥秋有望即可接至秋成倘再陰雨連綿二麥

歉收米價自必倍加昂貴請勅下川督曉諭商販輓運來楚以平市價等語此在德文或因已經調任特為此奏見其留心民瘼以博去後之思亦未可定但果如所言則民食攸關自不可不為調劑著傳諭阿里衮令將地方現在情形速為據實查奏如有應行酌量辦理之處亦即一面速為辦理務俾民食不至拮据以慰軫念尋奏今歲湖北因上年稍歉故正二月間米價自一兩一二錢至五六錢不等雖未至二兩而民食已艱臣當即飭開倉平糶禁止囤積並勸諭富民出糶一面檄行宜昌荊州等府將四川湖南商船催赴漢口但商民因聞下游江浙西米價更昂米船到漢每多過而不留有米之家因復觀望臣復飭地方官勸諭到漢商民令其就近酌糶目今川江水長商帆接至下路米多價平上游去者自少且二麥指日登場接濟有資自不致有缺乏得旨覽奏俱悉吏部議

准兩廣總督陳大受等疏稱廣東通省向止設學政一員嗣因士習囂凌雍正七年添設肇高學政今士子仰沐教澤各知安分請照舊統設一員所有歸併學政關防俟擬定字樣再行具題得旨肇高學政著即歸併廣韶學政程巖考試○兵部議覆閩浙總督喀爾吉善疏稱定海鎮屬昌石汛一營自雍正七年守備改為都司千把外委仍照舊設汛防派撥往往不敷請於象協左右二營抽調把總二員改撥水師操防所添把總原為配船巡洋未便以陸路抽撥應請將象協所裁把總二員俟內地缺出頂補水師把總二員即於該營內挑拔從之○卹江西贛縣瑞金雩都廣昌宜春萬安泰和鉛山等八州縣乾隆十五年分被水災民○除廣西宣化縣乾隆九年分報墾水田五畝有奇科賦○是日駐蹕興隆莊大營○辛巳

上詣

皇太后行幄問安○諭前駐藏都統傅清左都御史拉布敦因珠爾默特那木扎勒逆謀顯著先事翦除奮不顧身忠誠卓越俱已加恩贈卹入賢良祠照忠祠祀典傅清並入伊家祠從祀不知者或訾二人冒險邀功且議朕為酬庸過厚也今據駐藏策楞班第等奏珠爾默特那木扎勒自立名號潛遣其心腹堅叅扎錫等通款準噶爾稱策旺多爾濟那木扎勒為汗且求其發兵至拉達克地方以為

平定蒙古

三

聲援幸值準夷內潰所遣使人回藏被獲得其逆書并饋獻諸物是其陰蓄異志勾結準夷罪不容誅設非二臣協力同心決計先發則其貽害藏地將不可言是二臣之心甚苦而有功於國家甚大應特建雙忠祠合祀二人春秋致祭丕昭勸忠令典傅清既有專祠著不必從祀家廟該部會同內務府查撥官房營度以聞尋奏於崇文門內立祠○是日駐蹕仁厚莊大營○壬午命陞任內閣學士

夢麟仍留河南學政○是日駐蹕蒙陰縣大營

平定蒙古

四

大清高宗法天隆運至誠先覺體元立極敷文奮武孝慈神聖純皇帝實錄卷之三百八十六

大清高宗法天隆運至誠先覺體元立極敷文奮武孝慈神聖純皇帝實錄卷之三百八十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲副都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務

世襲騎都尉軍功加九級隨帶加二級又加二級臣等謹將內大臣戶部尚書錢謙益滿洲副都統軍功紀錄五次

尋常紀錄十四次臣等謹將講官太子少保工部尚書紀昀六次臣曹振瀾等奉

敕修

乾隆十六年辛未四月癸未諭朕凡巡行所

實錄卷之三十七

至一切橋道營盤俱令動用官項上年河南巡撫鄂容安辦理不善竟據士民情願捐輸准充公用迨朕詰問旋經奏明當即降旨申飭令其給還該撫又以士民實屬樂輸未肯具領且恐奸胥從中舞弊難於辦理是以令其將辦工之處覈實報銷該撫旋將未完銀兩曉諭停止今據護撫富勒赫題叅安陽縣知縣李時憲將該縣輸工全完之項捏稱未完四千餘兩侵蝕入己則該地方官視此項

為可恣其侵用者早在朕洞鑒之中鄂容安不能仰體朕意致有此弊本應重治其罪但富勒赫乃係因鄂容安命司道據實查明始行叅奏者鄂容安姑從寬免其處分但恐尚不止此著該撫將各州縣有無似此侵捏舞弊之處徹底據實嚴查毋得稍有朦混李時憲情罪可惡非尋常婪贓者比著革職拏問該撫嚴審究擬從重治罪 又諭戶部所議銅鉛交局贏餘之處奏稱滇省辦運銅鉛每百觔給有餘銅三觔以備折耗添秤之用額銅交足外餘剩令其儘數交局餘鉛亦應照此令其儘數交局等語鉛觔昨於刑部摺內已降諭旨看來從前成例似是而非辦理亦有名無實解局銅鉛既有定額不足者責令賠補則贏餘者即當聽其售賣蓋贏餘已在正額之外即不得謂之官物如應儘解儘收則從前竟可不必定以額數矣足額已可完公又誰肯儘交餘數徒有儘交之名而餘銅

實錄卷之三十八

未嘗不留存私售朕辦理庶務惟期行實政而去虛名銅鉛交局一遵定額正額交足所有餘剩銅鉛應聽其售賣以濟京師民用未嘗不可但官解之餘而私售漏稅則不可行而且啟弊惟令據實納稅隱匿者治以漏稅之罪足矣此摺著發還另議尋議奏嗣後領運各員交局後將實存贏餘數目報明戶工二部行崇文門監督按照經過各關應交稅課通盤覈算照例納稅如以多報少即照漏稅律治罪再查銅鉛抵通抵灣即照漢口儀徵換船換簍之例限兩個月全數交局如遇陰雨泥濘或銅鉛并到車脚難覓令轉運之通州坐糧廳張灣巡檢據實報明逾限捏飾將解員及轉運之員一併議處從之

和碩莊親王允祿等奏自初一日開倉以來米價頓減恐甲米停後米價又增臣等酌議除四鄉米廠仍舊糶賣外其八旗內務府五城之米賣完暫停支領俟甲米放竣如須平糶令

管局大臣仍照原奏辦理再四鄉米廠俱與圓明園西山一帶較遠工所夫役買食維艱請於安河豐益倉內撥米一萬石令夫役就近糶買既省往返西北廠糶米人數亦可減少從之

吏部議准閩浙總督喀爾吉善等疏稱福建建安縣籌嶺巡檢移駐房村街甌寧縣縣丞移駐嵐下街南平縣縣丞移駐峽陽縣均改鑄印信關防從之

兵部議准兩廣總督陳大受疏稱上思營原設都司千總外委各一員兵丁一百五十三名分守營汛嗣因地廣兵單經左江鎮撥戰守兵四十四名分員帶領貼防但操演差防仍歸鎮標統屬於營制未宜請將此兵添入上思營聽該都司就近管理其外委一員亦准歸還原營以符定制從之

四川總督策楞等奏向例達賴喇嘛進貢正副使俱達賴喇嘛派遣自郡王頗羅鼐以來遂以正使為達賴喇嘛之貢使

副使為該郡王之貢使。今應照舊例。二使均歸達賴喇嘛派遣。其四噶隆等所進丹書克。即交該二使附奏報聞。又奏臣等奉旨藏內仍須駐兵五百。其沿途臺站亦應照數安設妥協。現將所帶進藏官兵內照數挑選駐藏。其臺站各官兵向係遊擊一員守備一員。千把總十員。兵一千名。查舊設塘汛視地之簡要。定兵之多寡。聲氣尚屬聯絡。惟兵半老弱。由向例三年之內遇有缺出。該管官就近

招募濫充所致。今酌議拉里以西離藏尚近。如有缺出。駐藏大臣將藏地可拔之餘丁驗補。其拉里以東距藏較遠。駐藏大臣不能挑驗。遇有缺出不准就近招募。即於下臺現兵內挨站遞行撥補。將所遺糧缺。趨至打箭爐。令阜和營遊擊於內地餘丁選拔從之。豁河南鄆陵。中牟。鄭州。鹿邑。延津。新野。汝陽。上蔡。新蔡。西平。遂平。淮寧。西華。商水。項城。沈邱等十六州縣。乾隆十四年分被水災民未完

帶徵銀兩。並緩應徵額賦。豁蘆屬興國富國。豐財。蘆臺。濟民。五場石碑。草蕩。越支。歸與。豐潤。縣管轄。並嚴鎮。乾隆十五年分被水。竈課應徵銀兩。并予緩徵。豁山東運屬乾隆十五年西由場被水。竈課。是日駐蹕公家莊大營。翌日如之。甲申。

孝端文皇后忌辰遣官祭

昭陵。諭軍機大臣等。唐綏祖嚴瑞龍兩叅案。

阿里衮鄂容安審理當有頭緒。看來嚴瑞龍

叅唐綏祖而阿里衮旋叅嚴瑞龍。又兼以素不相協形跡之間。原未免動人議論。近日又聞該督辦理唐綏祖審案。俱於內堂深夜。令家人帶進。獨加密訊。並不會同兩司。雖屬嚴密之意。但嚴密可也不示人以公。則不可也。既有此等議論。而朕付之不問。非朕以誠待臣下之意。今兩案既交二人會同審理。此乃大員重案。惟當一秉虛公。不可稍存成見。或虛或實。該督等自不敢不確加研訊。或有意

輕重其間。亦斷不能逃朕洞鑒。著傳諭阿里衮鄂容安知之。○乙酉

上詣

皇太后行幄問安。○諭據阿里衮鄂容安奏永興進京途次聞訃。嚴瑞龍私派各府州縣幫助盤費。代雇驛頭。又公湊銀兩送京。交永興收受。及提用道庫養廉。並未扣還歸補各款。永興由滿洲世臣久列近侍。優加擢用。畀以總督重任。乃不能潔已率屬。劣跡纍纍。其提用庫項。並不奏明。固屬不合。尚係向來所有。至收受派幫銀兩。則貪汙卑鄙。深負朕恩。著革職拏交刑部。俟嚴瑞龍案審明到日。將永興一併治罪。○諭軍機大臣等。據阿里衮鄂容安奏永興途次聞訃。嚴瑞龍派各府州縣幫助盤費銀兩。俱交永興家人楊三收受等語。著將原摺鈔寄在京總理王大臣等。將楊三鎖拏。凡係伊經手諸事。逐一嚴訊。永興現已革職拏交刑部。所有應行質訊之處。

一併質訊。○又諭唐綏祖嚴瑞龍兩案。昨因永興奏聞。業經傳諭。今據奏永興各款實出意想之外。觀此則其所奏心跡已屬顯然矣。其提用養廉未歸補清項。固屬有罪。然如阿里衮亦曾豫支養廉。但經奏明。永興則罪在不奏。此猶可恕。惟收受派幫銀兩。則罪無可逭。朕面詢永興。雖力辯其送京銀兩退還未收完屬一面之詞。已將永興革職拏交刑部。俟嚴瑞龍案審結。一併從重治罪。已令在京總理王大臣等將伊家人楊三嚴訊。自必水落石出。唐綏祖嚴瑞龍係巡撫大員。今又關涉總督案情。殊為重大。伊等各有所應得之罪。永興性本糊塗。其奏唐綏祖未必不因嚴瑞龍慫恿而成。但唐綏祖贓款果實。又不可因此而遽為輕釋也。阿里衮與嚴瑞龍尚有共事不協舊嫌。鄂容安則兩無交涉。身在局外。如伊等不能虛公研訊。各得其平。稍有偏私。不但現在不能逃朕洞鑒。即日後亦必

察出伊二人終無所辭咎其嚴瑞龍送京銀兩永興究屬收受抑或辭却果實亦令阿里衮鄂容安詳察據實奏聞○改鑄鎮守德州地方城守尉印信從青州將軍那延泰請也○是日駐蹕洪河大營○丙戌

上至泰安府

岱廟瞻禮○諭軍機大臣等永興家人楊三已傳諭在京總理王大臣等嚴加審訊其永興家中所有與屬員往來書札俱應詳細查檢方得實情此並非查其家產但書札不得遺漏隱匿並宜迅速不得令其聞風焚燬○是日駐蹕常家莊大營○丁亥

上詣

皇太后行幄問安○諭大學士等各省駐防協領等例應三年一次輪班來京引見原欲察看優劣酌量記名陞用以示激勸之意其城守尉總管等原定例時並未議及但思伊等俱係防守城池管教官兵之大員所關甚為

緊要即如朕巡幸所至留心察看其優者陞用示勸劣者降斥示懲若巡幸未至之處伊等賢否既未周知其中庸劣之員得以姑容曠廢不但於公事毫無裨益即有才優之員亦因不得顯其所長以致阻抑上進之心於一切事務未免草率辦理嗣後各省駐防城守尉總管等亦應照協領之例一體輪班其如何分定年限輪流引見之處著該部定議具奏尋議盛京所屬之開原興京金州鳳凰城岫巖遼陽復州義州青州所屬之德州天津所屬之滄州及開封太原鄭家莊保定等處城守尉八旗游牧察哈爾總管副管叅領吉林叅領皆三品大員應照協領之例三年任滿該管官出具考語送部引見其無大員統轄者於任滿之日報部調取引見至陵寢總管有按時上香行禮等事與駐防官不同毋庸輪班引見從之○諭軍機大臣等碩色所奏茂隆課長吳尚賢情願伴送緬甸貢

使來京一摺。緬夷入貢。固屬向化之忱。但自上年四月入邊。即住茂隆廠內。與吳尚賢親密。此番伴送來京。如不過因熟諳夷人情性。易於約束。不令生疑滋事。於公事有益。而此外別無情由。伴送未為不可。但恐緬使入貢。原因吳尚賢糾合而來。又借伴送之名。明示緬夷。以伊為天朝所信用。來京時。或希冀望外加恩賞銜嘉獎。將來回滇。更有聲勢。可以肆行其志。緬夷言語不通。其往來傳說。即任意編造。傳會其與緬夷成說。以為左驗。亦無從覺察。此等情節。均未可定。著傳諭碩色。愛必達。令其將吳尚賢近來辦理廠務。是否實在小心安靜。伴送來京後。課長事務。交何人辦理。此外有無熟於廠務。壓服衆丁。可以更代接管之人。抑或仍令吳尚賢管理。不必更換之處。該督等詳悉查明。據實速奏。戶部議准。陝甘總督行川陝事尹繼善疏稱。長壽縣新增水引四十六張。應徵稅銀。自乾隆十

五年為始。按年徵收。從之。○兵部議奏直隸總督方觀承題報。乾隆十五年。易州被水。看守

陵寢。值宿之官兵。謹守汛地。以致淹斃。分別賞卹。應將千總劉度瀛。減一等。照把總例。廕子弟一人。以把總補用。加贈一級。給署守備銜。減半給卹賞銀。外委把總李恒彪。潘世德。二員。馬兵汪璽等七名。守兵宛君亮等十五名。均各照陣亡例。減半給銀。從之。○除山西永濟縣。河灘荒蕪地二百二十七頃。有奇。額賦○是日駐蹕崗山大營。○戊子。

上詣

皇太后行幄問安。○諭。日食天變之大者。自古重之。顧僅以引咎求言。虛文從事。夫豈應天以實之義。乃者五月丁酉朔。日有食之。朕自惟宵旰憂勤。無時不深乾惕。寧待懸象著明。始知戒儆。然遇災而懼。罔敢不欽戒慎。修省惟崇實政。行在鑒儀衛。早晚鼓角。是日著停

止一日。以示儆懲。齋戒。我君臣當就常存之敬畏。倍加謹凜。益修實政。即如朕省方所至。戲臺彩棚。龍舟燈舫。俱可不必。朕向來巡幸。地方官惟修治道途。此外一無華飾。自乾隆十三年東巡。該撫等於省會城市。稍從觀美。後乃踵事增華。雖謂巷舞衢歌。輿情共樂。而以旬日經營。僅供途次一覽。實覺過於勞費。且耳目之娛。徒增喧聒。朕心深所不取。第先期業經豫備。今歲恭遇

皇太后萬壽。兆庶亦藉以申祝嘏之忱。是以俯順民情。至朕待督撫有司。惟因其能實心辦事。令地方日有起色。方加恩獎。予而不知朕心者。未必不以辦差華美。求工取悅為得計。將玩視民瘼。專務浮華。此風一開。於吏治民風所關者甚大。嗣後尋常行幸。槩不准行。違者以違制論。並諭中外知之。○又諭據巡視北城給事中鎖住。楊二酉等。奏泰拏獲賭犯李德等一案。內稱工部郎中劉灝先。因往陳

汝聰處道喜。隨便查估會館牆壁。見伊等頑錢。喝令歇手。其時戴雨纓帽。未綴頂子。遂一同被獲。帶來等語。劉灝先身係現任部員。無論有無同賭。即其帽不綴頂。竟至長隨賭博之地。同被拘拏。即已有玷官箴。劉灝先著革職。交刑部按律究其有無賭博之罪。至鎖住楊二酉等。有意迴護。多為開脫之辭。甚屬不合。俱著交部察議具奏。○命立傳清拉布敦祠於藏地通司崗。○以浙江處州鎮總兵李昆。貴州威寧鎮總兵牛射方對調。○是日。駐蹕蔣家屯大營。○己丑。常雩祀。

天於

園丘。遣履親王允禔恭代行禮。○刑部議覆雲貴總督碩色奏。交兵阮世魁誤殺土練矣。念擬絞監候。得旨。都童夷阮世魁。戕殺內地土練。自應按律擬抵。但詳閱案情。阮世魁追逐沙匪。並未敢入邊界。實因矣。念過河拾柴。與沙匪服色相同。以致誤殺。情尚可原。且安南

素稱恭順。土目黃文棋擒獻克。犯審明定擬。亦能恪守功令。阮世魁著從寬免死。交該土目自行處治。○是日駐蹕石家莊大營。○庚寅半祭葬如例。○是日駐蹕崔家莊大營。○庚寅上詣

皇太后行幄問安。○是日駐蹕石家莊大營。○辛卯定揀選人員特派大臣例。諭向來分發各省人員。由吏部堂官揀選引見。雖該部職掌所在。然未足以示慎重。嗣後除特旨交該部於次日即行引見者。仍由該堂官揀選外。其餘凡有揀選之處。該部將滿漢大學士九卿併該部堂官一同開列。候旨特派大臣揀選。交該部帶領引見。著為例。○又諭休致尚書魏廷珍之子魏錫麟。著加恩賞給一品廕生。○旌表勒嫁捐軀之安徽合肥縣民汪夢舟妻許氏。○是日駐蹕吳家莊大營。○壬辰上詣

皇太后行幄問安。○是日駐蹕小莊大營。○癸

己。諭開泰所奏安平縣兵丁鄭洪文等。因典史拏賭糾眾辭糧一案。署縣陳學文雖係暫委。但兵丁如此驕縱。該縣既不能曉諭禁約於前。又不能差役嚴拏於後。縱因恐長刁風。不便於本內附叅。亦不可僅令撤回。尚得另行補用。黔省苗疆重地。兵丁敢於糾眾辭糧。目無法紀。應從重嚴辦。該撫雖將首犯斬決。而大槩辦理仍屬萎靡。不足示警。俟題本到日。著該部從重另核擬外。該撫著飭行。○又

諭據在京總理事務王大臣審訊永興家人楊三供稱。本年二月內有嚴瑞龍曾姓家人同在京買賣人紀姓送來銀一千兩。原為幫助喪事。永興因喪事已畢並未收受。令伊帶回等語。曾姓既係嚴瑞龍家人。著傳諭阿里衮鄂容安就近將所送銀兩。永興果否未經收受之處。訊取確供。速行奏聞。尋奏訊據嚴瑞龍家人供。上年十二月嚴瑞龍差伊齎銀一千兩送與永興。投書後未經傳見。將銀寄

京而回。今年二月復差伊將前銀再送。即抵司道公幫之數。仍未收受。止作書回謝。遂將銀六百兩。分別寄當在京。攜銀四百回楚。詰問嚴瑞龍。供認送銀是實。臣等將訊取曾陞并嚴瑞龍各供。及永興回書四件。前已會摺陳奏。報聞。吏部奏大學士陳世倌應兼殿閣銜。得旨。陳世倌著照原銜。仍為文淵閣大學士。兼工部尚書。兵部尚書舒赫德等覆奏。查冰窖草壩。在永定河南岸上七工之尾。舊下口之傍。地勢本低。今年凌汛。續發。正河出口不暢。壩門過水勢猛。將以上河身吸刷。寬深全河。趨下。即由壩口掣溜七八等工。正河長五十餘里。半被泥淤。而下口尤甚。即復行挑濬。出口之路。斷難一律暢達。且通河水勢偏南。未便強之使北也。至現在水由冰窖草壩外舊河尾。接南坦坡埝。東西長八十餘里。南北寬四五里至十五里不等。地面比舊河身低七八尺及丈餘。若由坦坡埝之尾。東

北導入葉淀。去路地寬。則停淤益薄。且省兩隄夾束五十里之修防。較挖正河下游。事半功倍。將此處作為下口。可無疑義。至隄外各村。分隸霸州。永清等州縣。除近南埝高阜之董家韓家等八處外。應遷移者七村。築護埝者三村。不願築護埝者四村。其地皆具呈不願除糧。惟照河泊地。則交租守業。請將冰窖草壩以東之隄身開寬。作為河口。令向東南出水。自坦坡埝至龍尾。六十餘里。一律幫寬。作坦坡形。其外臨淀水處。約長二十里。再加高一尺。再於王慶坨南開引河。長二十二里。導渾流入葉淀。由鳳河入大清河。再查舊河五十餘里。若將兩頭淤墊。開挑作為減河。亦屬有益。應於歲修項下。從緩辦理。又康熙年間所立隄岸。至現在六工而止。雍正四年。接建七工八工。今下口改歸舊處。自應將七八等工名色裁去。統入六工。合計里數。分為上中下三汛。以原設及議裁之縣丞主簿六員。

駐劄經理均歸三角淀通判管轄。至兩岸原有之把總既無專司亦應與千總同聽調遣。再遷移各村應給房價銀一萬四千五百餘兩。就近於舊河身內丈撥移蓋。俾汛前早獲安居。其民地各色錢糧歲徵銀二千八百餘兩。酌照河灘淤地之例作為租額。分季交納。至旗地內如係當差地畝應於各縣存退餘絕并舊河身地內另籌撥補。如仍願守業不願撥補者亦聽其減糧徵除等章程俱於乾隆十六年為始從之。

○除山東金鄉濟寧蘭山蒙陰聊城茌平莘縣臨清高唐樂安臨朐掖縣平度昌邑膠州高密福山萊陽等十八州縣水衝沙壓地十一頃有奇科賦。○以故輔國將軍雙麟子恒興襲職。○是日駐蹕紅杏園行宮。甲午。

上詣

皇太后行幄問安。是日駐蹕太平莊大營。

乙未諭軍機大臣等從前山海關外糧石禁

入關門特為關係盛京等處人眾口糧所進過多彼處轉少故盛京將軍具奏禁止今聞副都統常壽於邊民稍有所攜一槩禁止此內或行人裹帶餽糧或山海關內居民關外耕獲所收糧米若不量加分別槩加禁止不免有礙關內民食著寄信常壽如商販載米者查明禁止其行人所帶路食及種地所收之糧仍許攜進不得禁止。○是日駐蹕關張鋪大營。○丙申諭明日日食地方官等所設

龍舟著不必豫備。○是日駐蹕趙北口行宮。○是月江西巡撫舒輅奏臣前在廣西所屬之南寧太平鎮安三府地方遼濶延袤二千餘里皆與安南接壤雖設三關百隘并子卡一百二十餘處然土民履險如夷磚石塌損柵木易壞每有潛度犯案之事去冬知粵西邊地產有筋竹實心堅勁外多棘刺民間不適於用前令該府等於滋擾處遍為栽種數年後排列成林儼如城障臣現已調任恐事

中止請勅新任撫臣即令栽種得旨是○又奏報上年七月贛江水發下游之豐城清江二縣土石圩隄多被衝塌亟須添建石隄又清江縣所屬之青龍潭隄墻衝決一百三十餘丈相度形勢另築月隄與老隄相接使水勢緩流庶免頂衝現俱民捐修竣應令各該縣查明捐數多寡分別獎勵至德化縣護城石礮亦被水衝先雖奏請設法民修嗣因歲修銀兩足敷工費應照例飭取實用咨部報銷得旨覽奏俱悉○閩浙總督喀爾吉善等奏浙省溫台二府上年被災而溫屬永嘉瑞安樂清平陽等縣被蟲尤甚現當賑務已畢糧價昂貴該處僻處海濱外江商販不通惟台處二府屬縣可資接濟台屬上年歉收米價亦貴該二府常平倉穀自應留備急需難以撥運惟杭嘉二府截留備糶漕米十萬石酌撥五萬石由乍浦海口運往溫郡接濟再浙省海禁甚嚴如遇水旱之年例得招商販

運今既需米甚殷應令溫台杭嘉寧等府督屬選募殷商給照前赴寧波嘉興等處購買米穀運往糶賣仍飭守口員弁嚴查驗放不致透漏滋弊早禾登場即行禁止得旨所奏甚是○又奏臣由浙赴閩節據稟報溫郡各邑自上年被災之後羣赴處屬購糶搬運幾空現在處府糧價頓昂民食拮据雖續發漕米由乍運往然海洋千餘里難以計日而待臣抵閩後與撫臣商酌福寧府與溫郡接壤儲積尚多動撥三萬石由海運往洋面甚近殊與甌民有濟運費暫於存公項內動支俟溫郡糶出穀價歸還原款再所撥倉穀係二百五十萬石總額之外應行糶價充餉之項亦毋庸發價買補得旨所辦甚妥○署理浙江巡撫永貴奏覆三月十五日大風各屬並無被災之處目下天氣晴和嘉湖寧近省各屬不特二麥暢茂即菜豆已徧結實米糧時價除溫台處三郡外皆與上月相仿惟浙東

節候較早。平陽永嘉等縣雨水過多。小麥間有黃萎。壽昌蘭溪二縣鄉村被雹。臣俱經飛飭確勘。如春熟有失。自應加意撫恤。得旨覽奏稍慰。○浙江提督吳進義奏。臣准撫臣移咨分撥溫台二郡漕米。由海運往。臣檄飭乍浦營叅將坐押管解。會同有司料理船隻。並移咨定黃溫三鎮暨臣標右營鎮海營揀選熟習水性之守備千把外委十餘員。兵丁百餘名。飭交乍浦營叅將調度。分幫坐押前往。得旨知道了。○福建臺灣總兵官李有用奏。覆水沙連地方逼近生番。久經定界。李朝龍恃買墾地混占。爭租李光顯復挾仇啟釁。招集流氓棍徒文武各員將首從人犯嚴拏監禁。研訊確情。從重定擬。其聚棍空蔡俱經焚毀解散。現在民番寧靜。並無驚擾情事。至該處開墾有年。所有無辜之佃民人等。若槩行驅逐。轉恐滋擾。請將大小二十四莊開成田園一千五百七十一甲。未墾荒地二百六十

餘甲一併入官。令該佃照例輸租。以杜爭競。其近番山界勘明立石定為禁地。不許復生覬覦。報聞。○陝西巡撫陳宏謀奏。陝省各屬社倉原議每穀一千石上下建倉一處。現在每社貯穀自一千石至二千石不等。或舊倉不敷盛貯。或村莊遠近計已估未建之新屬視社本多寡。村莊遠近計已估未建之新社二十餘處。請將各屬常平空廩酌留數間。以資贖賒。其傾圮無用者拆卸移建新社。如無應建新社者。變價解司撥給應建社倉之用。庶常平空廩不致朽棄。而添建社倉多分新社於鄉民借還更為近便。得旨如所奏行。○四川總督策楞等奏。西藏糧務臺員駐劄番地三年一次更換。自打箭爐至西藏共計六處。惟打箭爐與西藏糧務例係遴委同知通判其餘裏塘巴塘察木多拉里四處俱係於縣丞州同等祿職內派委。此輩出身微末。識見卑鄙。殊與公務無益。臣等查川省現任

同知通判共一十九員。除松潘敘永水利同知三員。均係緊要。未便差委外。其餘十五員。儘足委用。請嗣後臺員。即於同知通判內遴選。其謀職等官。槩不准派得旨。是○兩廣總督陳大受等奏。粵東濱臨海疆。軍火緊要。每年需硝二十餘萬觔。原借司庫銀委員赴廣西採辦。嗣廣西產硝無多。在本省增城陽山南海順德四縣。開煎土硝。現在陽山南海二縣。又稱採土維艱。額需有欠。前經督臣碩色

實錄卷三百八十七

三

咨詢豫省。有無餘硝可買。准河南撫臣咨覆。豫省每年可得餘硝十七萬觔。經臣飭藩司李錫泰議覆。以西省現於太平府屬等處試採。如果旺盛。自應暫緩赴豫採買。又據廣東藩司石柱詳稱。東省需硝孔亟。請照往例。逐年赴豫買運餘硝十四萬觔。將來西省應需若干。即解價赴東領運。倘無需則全歸東省得旨。下部知之○護理廣西巡撫布政使李錫泰奏。粵西省會地方。商賈輻輳。上年又值

文武鄉試。錢價漸增。隨於七月內飭臨桂縣設官局。將乾隆十四年搭放餘剩錢文并十五年鑄存發換錢文共三萬一千七百餘串。陸續運局發換。未及一載。錢價漸平。將來源發換。錢裕價平。而官錢酌增。總在成本之內。酌量辦理。報聞。

實錄卷三百八十七

三

大清高宗法天隆運至誠先覺體元立極敷文奮武孝慈神聖純皇帝實錄卷之三百八十七

大清高宗法天隆運至誠先覺體元立極敷文奮武孝慈神聖純皇帝實錄卷之三百八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄 次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三年事務

世襲騎都尉軍功加十九級隨帶加二級又加二級尋常加二級軍功紀錄內大臣戶部尚書錢謙益滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次 曹振鏞等奉

敦修

乾隆十六年辛未五月丁酉朔日食

上詣

皇太后行宮問安。○四川總督策楞等奏前酌議西藏一切章程奉旨允行。惟未將設立臺站並噶巴等官所管事務地方詳議。蒙旨指問查打箭爐至裏塘巴塘均內地所轄。巴塘所屬蟒里以西至江卡爾所屬石板溝皆西藏所轄。江卡爾設有噶巴管理。石板溝以西至巴貢係乍丫地方。巴貢以西至恩達係察木多地方。恩達以西至嘉玉橋係類烏齊地

方均各有呼圖克圖管理。受內地節制調遣。不歸西藏統轄。自嘉玉橋抵西藏共一千九百六十餘里。均係藏屬。按地方大小各設噶巴一二名不等。管理地方人民一切事務。與內地州縣同。內設臺站共二十五塘三汛。臺站官兵所需各項俱由各噶巴辦應。番地之操縱權在噶巴。噶巴去取議歸達賴喇嘛駐藏大臣主持。臺站一切無庸更辦。故未專款另議。然未聲明情節實屬疎忽。得旨非疎忽而何。○諭軍機大臣等策楞兆惠覆奏西藏臺站一摺。雖稱善後事宜摺內定有補放噶巴頭目等官。統以達賴喇嘛并駐藏大臣印信為憑。治罪革除亦稟請達賴喇嘛指示遵行。兩條臺站等事。毋庸辦理等語。臺站一事。於內地外番往來關鍵最為緊要。伊等所定善後事宜內。但云噶巴等官有管理地方教養百姓之責。並無一語關涉臺站。其巴塘蟒里等處臺站分屬內外及上年阻絕占達等

塘之處。亦於此番奉旨後。方得分晰查明。此等關係緊要情節。何以疎忽若此。今既查明。此時自可毋庸更張另辦。然遲一二年後。究應令駐藏大臣便中辦妥。為是。著將此傳諭策楞兆惠知之。軍機處俟一二年後。將此旨題奏。○是日駐蹕五里屯行宮。○戊戌。戶部議准。陝甘總督行川陝事。尹繼善疏稱。開縣新增茶引一百四十張。應徵稅銀。自乾隆十六年為始。從之。○是日駐蹕涿州行宮。○己

亥。

上詣

皇太后行宮問安。○

孝誠仁皇后忌辰。遣官祭

景陵。○工部議准。署浙江巡撫永貴疏稱。紹興府屬山陰縣宋家樓地方。舊有土塘。近年水性南趨。屢遭衝刷。宜改建石塘。加築坦水。從之。○以安徽按察使范時綬為湖北布政使。河南糧驛道崔應階為安徽按察使。○是日

駐蹕黃新莊行宮。○庚子。

上迴鑾奉

皇太后居暢春園。○詣

安佑宮行禮。○幸圓明園。○諭前因京師米價騰貴。朕經降旨。於京城及四鄉分設廠座減價平糶。今回鑾至京。聞市價仍復稍昂。目前麥收雖近。尚未登場。正資米石接濟。著再撥米十萬石。照前所辦平糶章程辦理。以裕民食。該部遵諭速行。○諭軍機大臣等。阿里衮鄂容安。會審唐綏祖等先後被參各案。前經降旨。令其據實秉公辦理。今據陝督尹繼善奏到。查明嚴瑞龍原籍家產一摺。為數無幾。且並無家屬在本邑居住。朕思此案。如係嚴瑞龍慫恿永興。有心駕詞構釁。抑或迎合永興之意。乘機傾陷。則唐綏祖贓款屬虛。伊從前所有查封貲產。自可加恩降旨給還。然使嚴瑞龍果因自知劣蹟多端。為此先發制人之舉。則伊外任有年。且於藩司任內。多方染

指何至產業寥寥。其中必有寄頓隱匿情弊。亦應嚴行根究。著傳諭阿里衮鄂容安將兩案實在情節。一一虛公研訊。務得確情。奏聞請旨。朕辦理政務。毫無成見。亦不容絲毫徇隱。伊等應所深悉。倘稍存回護偏袒之見。抑或有意吹求。則咎有所歸。亦斷難逃朕洞鑒也。○又諭。據尹繼善奏。捷為縣武生萬正芳。攻打新里應試童生。糾衆鬧關一摺。萬正芳身係武生。乃敢糾約多人。藉端肆鬧。抗官索犯。種種橫行。目無法紀。此風斷不可長。自應嚴加懲創。以警刁頑。恐尹繼善有不過欲歸罪罪魁。因而完事之意。著傳諭令其即速質訊明確。從重辦理。尋奏。刁惡棍徒。抗官鬧署。據報之日。臣惟恐該地方官辦理不妥。要犯遠颺。當即委知府二員。前往查拏。各犯至省。詳細質審。萬正芳實為通案渠魁。已照例先行正法。臬示李英同惡相濟。與首犯無別。亦擬斬決。俟部覆至日正法。其為從及被脅隨

同之犯。共有二十餘人。現已分別定擬。并將此案犯事治罪之處。遍示城鄉。報聞。○辛丑。上奉皇太后幸萬方安和侍膳。奉皇太后迴暢春園。○諭。今歲入春以來。京師米價稍昂。經朕疊頒諭旨。量發倉米。分局平糶。以濟民食。但當青黃不接之時。又值閏月八旗兵丁。未免艱於餬口。著加恩賞給一季三個月甲米。即於閏五月給放。俾窮兵饔飧優裕。不藉糴食貴米。市價自必平減。於閭閻生計。甚有裨益。該部遵諭速行。○諭。軍機大臣等。唐英因伊子庶吉士寅保。當散館之期。不能來京。奏請准於下科散館一摺。此所奏殊屬取巧。寅保幫辦關務。原因唐英年老特旨命往。自係奉公辦事。並非私事告假者可比。朕早念及屆散館之期。當按其甲第加恩一體賞給編檢職銜。今唐英意欲邀恩。又不據

實陳奏。轉似恐朕遺忘者。為此巧辭。殊非對君之體。寅保此次散館。不必加恩。著於下次授職。唐英著傳旨申飭。○又諭。頃準噶爾使臣額爾欽等。稱伊新台吉喇嘛達爾扎為王。自策妄阿喇布坦以來。皆稱台吉。並無稱王者。朕已降旨詰責。然觀其能使屬下稱奉如此。或尚係稍有才能之人。不可不備其窺伺。凡我疆界。益應嚴加防範。前玉保奏稱進藏熬茶之人。回游牧時。俱出西藏喀勒占庫車各卡。由阿哈雅克直入噶斯路而去。自喀勒占庫車至阿哈雅克。其間並無卡座。因於綏安里瑪爾地方。添設卡座四五處。至阿哈雅克地方寬廣。由噶斯路而來。直通西藏之喀喇烏蘇。又與玉舒那克舒番衆相近。此阿哈雅克既係準夷抵藏之路。似應添設數卡等語。將此寄知班第等。令其與達賴喇嘛及四噶隆酌量地勢。詳悉密議。以聞。尋奏。臣等與達賴喇嘛傳集噶隆班第達策凌旺扎勒色

玉特色卜騰尼瑪嘉木燦。公同商議。據稱本年各卡地方。俱已添派兵役。嚴固防範。自喀喇烏蘇及穆什哲爾根綏安里瑪爾阿哈雅克等要地。亦添兵駐劄。再阿哈雅克離藏遙遠。今照從前準噶爾前來之例。自喀喇烏蘇以往。至那克桑喀勒占庫車等處。連設八臺。現在備辦亦極堅固。可以無慮。仍嚴飭巡卡之扎薩克台吉等。不時留心巡察。俟大雪後徹回報聞。○壬寅。

上詣暢春園問

皇太后安。諭軍機大臣等。今歲恭逢

聖母皇太后萬壽。直省督撫等。奏請來京慶祝。朕均已酌量批示。並傳諭停止一切進獻。惟允其先期遣人赴京。於西直門至萬壽山一路。分認段落。敬謹豫備。但所指段落里數甚長。辦理未免多費。將來

安輿所經。凡道旁一應豫備。俱著取支內務府。不必伊等分辦。惟自西直門至西華門一帶

途次原准在京王公大臣分辨著各該督撫等即於此間公分段豫備計每段不過數丈許則辦理既易而誠敬之意亦伸所有分辦之處即令伊等遣人料理將此一併傳諭知之○又諭玉保奏稱西藏北邊有阿哈雅克地方距藏甚近由此直赴噶斯乃通準噶爾便路等語朕觀藏圖並無阿哈雅克地名或當日遺漏未畫抑所畫未全著將此圖寄與班第查明阿哈雅克地方與此圖所載何處相近并除阿哈雅克之外曾否尚有遺漏未畫要隘查明添入另畫全圖於奏事之便一併呈覽○癸卯賜工部尚書孫嘉淦官房一所○以故一等承恩公五格子德保襲爵○甲辰諭前因京師米價稍昂經朕屢降諭旨特撥倉米於鄉城分局平糶以濟民食但念京城內外既有八旗及五城平糶米局又經賞給兵丁甲米米糧充裕易於購覓惟四鄉地方所設米局僅各一處其村僻遠者

未免往返艱難當此青黃不接之候需米孔殷應照乾隆二年之例俾四鄉添設廩座得以就近糶買更為有益并派御前侍衛前往督察如有奸徒市儈乘機射利私販囤積者著順天府步軍統領衙門多派巡役嚴行查拏從重治罪其如何分撥米石添設米廩之處著軍機大臣速議具奏尋奏四鄉各一廩外再於適中之地各添一廩共為八廩每廩撥米一萬二千五百石仍照前例每撥一千石內老米二百石倉米稷米各四百石其監糶應令都察院再揀科道四員并請派御前侍衛四員前往督察得旨是其督查之侍衛著烏爾登努三、五福、安泰、安冲、阿鄂、實德山、哈清、阿去○又諭八旗兵丁餽養駝馬需用黑豆甚關緊要現今市價昂貴著將倉貯黑豆撥發八萬石交與八旗減價平糶以平市價該部遵諭速行○工部議准陝西巡撫陳宏謀疏稱鄜州石隄乾隆十四年被水衝塌

請於軟沙處下樁改建月隄所需工料令承辦之員在原估銀內通融辦理從之 乙巳以大學士來保史貽直協辦大學士尚書阿克敦內閣學士李因培吏部侍郎彭啟豐戶部侍郎嵇璜禮部侍郎嵩壽秦蕙田兵部侍郎汪由敦刑部侍郎錢陳羣副都御史梅穀成鴻臚寺卿吳應枚為殿試讀卷官 丙午上詣暢春園問皇太后安 詣

壽皇殿行禮○還宮○策試天下貢士周澧等二百四十三人於太和殿前制曰朕撫御鴻圖兢兢業業日慎一日嘉與海內臣民懋登上理深惟政治之易弛風俗之易奢士或荒於經術備或懈於邊陲保泰持盈其道曷以夫圖政本於立心非大公無以明其體亮工斯以熙績非純勤無以勵其用朕奉三無私以治天下自朝至於日中昃弗遑康寧羣工之靖共匪懈者安在偏私之習怠忽之端何

以防其漸蠲租賜復無追呼矣深耕易耨無荒萊矣而衣食之謀蓋藏之計恒鯁鯁焉厯不急之虞乃環顧閭閻小民服尚鮮華市陳技巧百用所需胥過其節則侈靡之俗蠹之也返樸還淳將非空言所能喻因而為之法制禁令不幾滋之擾歟孰為之啓迪而倡導之也膠庠之士樂化育而咏作人經術昌明無過今日第考之於古議大政斷大獄決大疑輒引經而折其衷此窮經之實用也今欲矯口耳之虛文以致實用其要安在幅員所暨漸被無垠若海疆若朔漠若蠻陬絕徼曷嘗不列斥堠置戍守而將嬉卒玩其中警於未然綢繆於先事者何若書曰有備無患安可以逶燧久銷而視備邊為文具也凡此皆關於制治保邦之要久安長治之道莫切於此多士其以素所蘊者剴切陳之母拘母諱朕親覽焉○工部議准直隸總督方觀承疏稱津軍子牙二廳所屬格淀大隄隔別清渾

以免淤塞。今因異漲殘缺。應加幫築。從之。
丁未。

上至靜安莊。

孝賢皇后梓宮前奠酒。○臨奠定安親王及駐防西藏原任都統傅清。左都御史拉布敦。○詣

雍和宮行禮。○戊申。

上御乾清門聽政。○諭曰。阿里衮鄂容安查審唐綏祖原叅各款。審無得贓分肥情事。惟任聽爐頭私買銅鉛添鑄。實屬違例。故縱。議以革職。嚴瑞龍餘罪皆輕。惟輕出重入一款。入已贓至四千八百兩。議以斬監候。若論按律問擬。亦祇可如此歸結。而殊未得此案辦理之正法也。蓋永興嚴瑞龍等。叅奏唐綏祖摺內。有婪索邱鑑賊銀數至鉅萬一款。情罪最為重大。乃係此案關鍵。朕以唐綏祖身為巡撫。如果婪取屬實。即使立行正法。亦所應得。今閱唐綏祖供詞。既稱毫無影響。而嚴瑞龍

亦供係唐綏祖授意陶士傑向邱鑑派捐。夫派捐與婪取。大相徑庭。是嚴瑞龍已與原叅矛盾。使初叅時。本無此種貪縱重情。朕亦豈有即將唐綏祖革職拏問。並查封家產之理。今既審無實據。則嚴瑞龍之慫恿永興。駕詞誣捏。永興之輕信嚴瑞龍。率入彈章之處。按律自應分別反坐。總因唐綏祖生平居心巧詐。器量不能容人。嚴瑞龍意恐為其所制。而適值永興之易被其愚。是以多方聳動。成此大案。至唐綏祖多支養廉之處。更無足深罪。即嚴瑞龍侵用餘平一項。亦係各省藩司。相沿陋習。況伊在任多年。所積數止於此。是其操持尚知謹慎。以此定其罪案。反使彼得以有辭。即永興於送京銀兩。既查明未經收受。其因家眷回京。收取司道銀兩。在永興係內廷行走之人。固不應有此。然因喪事而贖賻。外省亦所不免。朕惟懲狼藉。亦慮魚無著該部將旨內情節。分別定擬。永興嚴瑞龍罪狀。

奏聞。唐綏祖婪索屬虛。失察之罪本輕。所有原封家產。著查明給還。來京候旨。酌量加恩錄用。朕辦理庶務。一秉大公。有罪者法在必行。無罪者自當昭雪。從無絲毫成見於其間也。將此曉諭中外知之。○以翰林院侍讀學士陳兆崙。充日講起居注官。○己酉。

上幸瀛臺。○遣官祭

關帝廟。○以左副都御史廣成。為正黃旗滿洲副都統。○庚戌。

上御養心殿。召讀卷官入。親閱定進呈十卷甲第。○諭據直隸總督方觀承奏稱。霸州等處上年勘不成災。及歉收各村莊。所有借給籽種口糧。例應按期催還倉。但現在各處麥收。雖屬可期。而米穀無出。民力不無拮据等語。著照所請。將霸州。涿州。寶坻。薊州。豐潤。清苑。雄縣。完縣。祁州。容城。河間。肅寧。任邱。天津。青縣。靜海。定州。曲陽。宣化。懷安。萬全。蔚縣等二十二州縣內。從前借給各村莊米穀。無論

加息免息。俱緩至本年秋成後。照數完交。以抒民力。該部遵諭速行。○又諭曰。直隸總督方觀承摺奏。叅革永定河道英廉捏飾誤公一案。輾轉翻變。延挨日久。請特遣大臣查審完結等語。著尚書舒赫德。馳驛前往保定。會同該督方觀承。查審定擬具奏。其步軍統領事務。著哈達哈暫行兼管。○又諭據直隸總督方觀承摺奏。永定河道白鍾山之子白永淳。現在赴部候補州同。未得及時報効。請准其在直隸河工補額効力等語。白永淳從前既於南河河東二處。久經委用。著照所請。將白永淳發往直隸河工。於永定河道本屬之外。令該督酌量派委効力。○以鳳凰城城守尉達色。為盛京右翼副都統。○辛亥。

上御太和殿傳臚。賜一甲吳鴻。饒學曙。周澧。三人進士。及第二甲沈棻等七十人。進士出身。三甲印憲曾等一百七十人。同進士出身。○詣暢春園問。

皇太后安。○幸圓明園。

大清高宗法天隆運至誠先覺體元立極敷文奮武孝慈神聖純皇帝實錄卷之三百八十八

大清高宗法天隆運至誠先覺體元立極敷文奮武孝慈神聖純皇帝實錄卷之三百八十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅大學士文淵閣領閣事稽察欽奉
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆十六年辛未五月壬子旌表守正捐軀

平定縣志卷之二十

之湖南襄陽縣民王思昌妻晏氏。○癸丑諭軍機大臣等。據尹繼善奏稱。川省樂山縣老洞溝銅廠。自清釐之後。每年可獲銅六七十七萬觔等語。所辦甚為妥協。向來京外鼓鑄洋銅。而外惟仰給滇銅。艱於採運。誠令多得數處。旺廠廣資接濟。地方窮民。亦得藉以傭工。覓食於民生。大有裨益。若謂川省向有咽嚕子為地方之患。恐開採銅廠。或致滋事。不知此等匪徒。即不開廠。任其流蕩失業。尤易為

匪惟在經理有方善為彈壓不致生事滋擾
俾銅觔充裕鼓鑄有資將來錢價亦可漸平
此摺已交該部速議可傳諭尹繼善令其加
意經理將來策楞迴任亦告知之○豁除福
建閩縣侯官閩清并福清平潭縣丞地方建
寧府崇安縣乾隆十五年水衝沙壓地三十
四頃有奇額賦 甲寅吏部議覆御史恒光
奏稱從前設立國子監八旗官學覺羅學生
亦附於內本旗庫使缺出向俱考送每缺四
名吏部嚴試補放嗣因覺羅另立一學止將
八旗學生考送今請照舊例遇缺出令國子
監會同該管學大臣將覺羅學生仍行考送
等語查覺羅學生凡考試與滿洲無異庫使
一項自應准其考試但令國子監會考未免
紛繁再覺羅學生視八旗人數較少請嗣後
凡各部寺庫使缺出國子監三人宗人府二
人咨送臣部考試一體咨補從之○豁除福
建建安甌寧松溪三縣乾隆十五年水衝坍

陷寺田一十六頃有奇額賦○乙卯皇十子
生逾二年而薨未命名○

上詣暢春園問

皇太后安○幸靜宜園駐蹕翼日如之○閱健
銳營兵○諭浙江溫台等屬米價昂貴本地
存倉米穀不敷平糶之用民食未免拮据朕
心深為軫念著交與江浙二省督撫於浙省
及江省稍近州縣常平倉穀內動撥酌量應
需數目作速碾米運往溫台等屬接濟平糶
其常平所缺之額即於浙省冬間兌運漕糧
內照數截留撥補還倉該部遵諭速行○諭
軍機大臣等永貴所奏上年被災之黃巖永
嘉太平等縣男婦赴縣署請糶各情形該屬
被災米價昂貴去冬既未先事綢繆今春仍
不過照常辦理以致民情宣動迨聞信之後
派員查辦已經遲緩所有疎忽之處該撫無
所辭咎姑念春間承辦大差精神不及照料
加恩免其察議嗣後如仍前疎忽必從重加

以處分。至於此事。看來皆由地方守令。全不留心民瘼。辦理不善。以致於此。所派塔永寧。雖辦事尚屬勇往。但伊護理道員。恐一人亦未能獨任。永貴或應親自前往彈壓。否則再派一大員。協同綏輯。務令民情安帖。地方寧謐。可傳諭該撫知之。○又諭永貴所奏溫台二屬平糶亟需米石。現札商閩江二省通融辦理。倘有不敷。或動帑委員採買。或動撥鄰倉接濟等語。閩省處萬山之中。本地即已仰給外來客米。若再接濟鄰省。轉恐有妨本地。今據該撫潘思榘奏到。已撥穀二萬石。派委員弁運赴浙省。自可稍資接濟。而亦難望其再行撥運矣。至江省督撫。豈肯顧及浙屬之偏郡。此時溫台既需米孔殷。著於本省及江省稍近州縣。常平倉穀。碾米運往溫台接濟。平糶於浙省冬間。兌運漕糧內截留。照數撥還各倉。一轉移間。可濟急需。以裕民食。已降旨諭部。可傳諭喀爾吉善永貴知之。○丙辰

諭軍機大臣等。浙省黃巖永嘉太平等縣。因米價昂貴。民人赴縣請糶。喧鬧情形。雖由地方官辦理不善所致。但該處地屬黃巖溫州兩鎮。總兵大員。實有彈壓地方之責。乃施廷專等。僅以具摺奏聞了事。不知現在能否悉心彈壓。記在浙時。喀爾吉善曾奏兩鎮總兵俱遜於高琦。陳鳴夏。朕看來邱策普。從前在總兵中。似尚知黽勉。近在黃巖鎮。辦理此事。何如。施廷專於溫州鎮任內。尚能勝任與否。著傳諭該督喀爾吉善。令其一一據實奏聞。尋奏溫台兩府屬縣。於漕米糶完時。然後部署接糶。致黃巖永嘉等縣民人。求糶喧鬧。實屬辦理不善。至黃巖鎮臣邱策普。溫州鎮臣施廷專。當各縣民情紛擾之時。均已分派員弁。巡查彈壓。并親與地方官商酌接運。究其辦理實情。施廷專平日原未見所長。惟此番實竭力會同文員籌畫。并督弁兵彈壓擒拏。即臣有詢問地方情節。亦毫無隱諱。尚屬切

實。若事事皆能如此。洵堪勝任無誤。邱策普臣初見其老幹明白。似在諸鎮之上。自到黃巖後。竟不見整頓。三四月間。黃巖太平等縣。民情喧鬧滋事。伊雖稟委弁查拏。而太平縣。關開縣署一案。當時並無一人拏獲。且知縣劉居敬諱匿不報。守備潘有成通同隱諱。經臣與署撫臣永貴訪查嚴叅。始終未接邱策普稟報。實屬有乖職守。再近聞其飲食間。兩手發顫。暈船不能出洋。似難勝海疆重任。得旨。邱策普著來京候旨。黃巖鎮總兵印務。著苗國琮前往署理。俟伊服闋之日。該部請旨實授。○丁巳。

上自靜宜園幸靜明園。○詣暢春園。問。

皇太后安。○迴圓明園。○蠲免廣東海康遂溪文昌海陽潮陽揭陽澄海饒平惠來普寧豐順等十一州縣。乾隆十五年風災額賦。○予故大學士張允隨祭葬如例。謚文和。○戊午。諭。據尚書舒赫德會同總督方觀承查審叅。

革永定河道英廉等。捏飾誤公一案。英廉身任河道。隄工乃其專責。遇有衝決。實已無所辭咎。但其初報月隄漫口。而諱言大隄衝刷。或係希冀潛行堵修。以圖完局。該督既據稟明。即應一面詳查。一面具奏。乃方觀承上年五月初二日奏摺內。祇稱一應工程平穩。並不將月隄漫口之處。據稟入告。亦未必不思以無事為福。是以英廉得輾轉翻變。日久延挨。朕彼時早鑒及於此。即以報災不可存粉飾之意批示。方觀承亦應服朕之洞燭隱情。自知引咎矣。至摺內稱英廉未將淤溝先事豫防。以致大溜直注。此語殊未足以服英廉之心。伊到任未及兩月。淤溝即有疏忽。亦係僧保住任內之事。未可以此為英廉罪案。朕辦事一秉虛公。既確見情形如此。不可不明白宣示。然以督臣劾一道員。自叅自審。何難任意輕重。竟行入罪定案。乃懸案經年。未敢迴護。已見遽為審結。俟特遣大臣前往會同。

查辦是其心尚知所警畏亦朕辦理庶政務求至當不容稍存含混之明驗也英廉等已經革職所有糜費工程銀兩自應照例分賠還項原摺著交部議奏並將此旨詳悉曉諭中外知之○已未

孝恭仁皇后忌辰遣官祭

景陵○

上還宮○諭曰多羅貝勒允祁等參奏

景陵禮部員外郎關霖呈告郎中邁拉遜點用

殘蠟一案並無確據正在查問乃竟託病不出且於五月十九日單身騎馬不知去向追尋無蹤等語關霖託病潛逃殊屬乖張不職有玷官箴此皆該承辦事務員勒等平日漫無覺察鈴束不嚴所致著傳旨申飭關霖或私自回京或潛蹤他往著該旗即行文各處嚴拏到日交部嚴加議處摺并發○諭軍機大臣等山西巡撫阿思哈續叅朱一蜚護理撫篆時收受護太原府事之太谷縣知縣馮

浩人侵三觔將馮浩保陞保德州知州等語朱一蜚屢任藩司先經該撫叅奏求索部民勒派屬吏縱容親戚家人庫官吏役婪索分肥劣蹟累累深負擢用之意已降旨革職審擬其應賠庫項甚多著傳諭浙江巡撫永貴將伊原籍家產貲財迅速查明具奏無令稍有隱匿寄頓以備賠項○又諭方觀承奏請將宣化府屬所貯屯豆及時糶賣朕已據摺批示向來宣府歲有餘豆已積存七萬餘石例准隨時題請發糶此項既無別用即使用以平糶邊地或亦無須如此之多因思京師餽養馬匹需用豆石若以彼地之所餘儲侍京倉以備隨時糶賣亦屬酌盈劑虛之道但一時運送京師不免糜費腳價朕意宣化係八旗牧放馬匹經由之地若令於此項馬匹每年回京時酌量零星分帶儘足運送仍於馬匹無礙或有水路可通用舟楫輓運更為妥便著詢問方觀承可否如此辦理令伊詳

悉定議覆奏。如此項豆石。於本地僅足敷用。亦不必勉強。可併傳諭知之。尋奏。臣前奏續餘屯豆七萬石之數。係統計七州縣所存。若照九年運豆案內。除難以輓運之懷安等四縣。其保安。宣化。萬全。三處餘豆。實二萬一千四百五十餘石。今擬酌留一半。為本地平糶之用。一半俟八旗馬回京時。陸續帶運。其作何分撥。馱運。每馬馱豆若干。及進口何處。可以負載。已行口北道與管馬之副都統妥議。

到日另奏。所需口袋。八月後漕務已完。向通倉借用。得旨。覽奏俱悉。○又諭。方觀承奏稱。宣化府州縣。目下糧價昂貴。缸戶率皆圖利私燒。罔知撙節。現飭地方官。封禁缸房。暫免缸稅等語。開燒耗費糧石。遇價貴之年。量為節制。原屬應辦之事。至免稅封缸。槩行飭禁。則恐稅雖免。而缸終不封。徒使缸戶潛自開燒。居奇獲利。奸胥猾吏。更復乘機需索。以飽囊橐。而於民間食用。市肆糧價。實無裨益。即

如康熙年間之禁烟。免稅而烟迄不能禁。天下事有言之近理。而行之了無實際者。皆此類也。朕思向來缸戶。給領牙帖。本屬有數可稽。不但糧貴之年。即屢豐大有。亦應明定缸戶之數。不令日加。則蓋藏日裕矣。其偶遇歉收。於額定缸戶。每日所燒糧石。亦約以定數。此外不得任意糜耗。即就成法之中。自可寓稽察撙節之道矣。朕辦理庶務。惟求實濟。不事虛名。著傳諭方觀承。此事令其另行籌辦。

尋奏。宣化一府。每年額徵缸稅銀六百一十六兩。穀九石三斗二升零。舊例豐年按帖徵收。歉歲繳帖免稅。原有可稽之數。而不於平時嚴禁私開。誠恐徒滋弊竇。臣即密飭口北道。細查各屬所設燒缸。舊額若干。現給牙帖若干。有無私開缸戶。每日每缸酌需糧石若干。燒多燒少。以及開燒停止定期。逐一查明。到日另議具奏。得旨。是知道了。但此事恐非吳煒所能辦理。詳妥者。○刑部議覆。湖廣總

督阿里衮等奏稱嚴瑞龍身任藩司種種不法誣捏唐綏祖婪贓鉅萬愚弄永興慫恿叅奏應將嚴瑞龍比照誣告人死罪已決律擬斬監候秋後處決其應追銀兩均照追入官永興輕信嚴瑞龍將唐綏祖率入彈章應照嚴瑞龍死罪減一等杖一百流三千里係旗人折枷六十日鞭一百不准納贖其提用道庫及各屬幫助盤費雇驛價銀共六千四百七十兩零應令該旗著追至原任同知王雲翔合依監臨官吏借貸所部財物計贓准不枉法論律應杖一百流三千里但查其母老丁單已於上年十月告請終養應准存留養親得旨嚴瑞龍依擬應斬著監候秋後處決永興枷號鞭責之處著准其納贖王雲翔原擬杖流亦著令納贖准其存留養親餘依議○江南道御史楊勲奏成均造士責任綦重各省貢監肄業不下三百餘人每月考課釋奠并稽查教習考收學生其官不可一日或

曠本月十二日奉旨國子監司業著葉酉補授查葉酉現差湖南學政期滿始能來京新任滿祭酒雙慶雖仍留安徽學政之任尚有侍郎觀保兼管漢祭酒只有陸宗楷一人恐難周到請簡員署理再八旗教習向由該監考取諸生充補監中人品各殊不無鑽營之弊請嗣後欽派大臣至監會考以定去取得旨所奏是著該部照所請行○庚申諭紫禁城內地方理宜整齊清潔若有應行修理之處即行修理不得任其殘缺昨朕經過之處有不皆完整者乃無專管大臣故推諉如此嗣後應派總管內務府大臣管理一年一換查清交代若仍有似前不經意之處經朕看出惟該年大臣是問本年即派和親王海望二人管理俟年滿應換時開列總管內務府大臣職名奏派永以為例○大學士等議覆直隸總督方觀承奏稱永定河下口改由六工出水事宜一下口應遷之七村原議將七

八兩工舊河身內灘地撥作各戶房基據各村士民俱不願移懇請自擇高阜領價建房官為撥給莊基等語應行該督將各戶願遷之秉教村李家鋪等處查勘果係更無水患之處撥給至所稱現在查覈是旗是民或應給價或應撥補亦令該督速飭查明報部覈覆一應遷之武家莊等七村查實願遷即給與房價其不願者俱令出具甘結倘將來願遷仍准賞給房價等語應如所議行令該督將遷移各戶查明造冊并給過房價數目據實報銷其不願遷各戶亦即取結送部存案一南埝上接老隄頭乃郭家務之舊下口計二十里之員管理應即交南埝上汛之員兼管隄身柳株等項但南埝上汛原議駐唐二鋪應再移北五里駐劄牛眼地方庶於下口為近再永定河身下口以及壩岸稱名多有重複請將七工以下河身稱為舊河身南北兩岸稱為舊南岸舊北岸郭家務以下稱為

舊下口等語應如所奏交南埝上汛之汛員經管移駐牛眼地方亦准其將南埝舊下口二十里統令原派上汛東安縣經管移駐仍將永定河各工經管各員工段里數分別名目造具清冊送部存案一永定河隄高昂隄外地勢低下渾流湍激改變靡常不宜放淤奏明立案等語應如所奏行令立案久遠循行以杜後患得旨依議速行○兵部議准閩浙總督喀爾吉善等疏稱乍浦滿營額設戰船配撥舵工二十二名勞苦與眾不同請每名加給月糧銀一兩米三斗自本年為始在兵餉下剩銀內動支從之○辛酉諭上年浙省溫台等屬有偶被偏災之處業經照例分別蠲賑今春巡幸浙省因翠華所未至是以未及降旨加賑近聞該地米價昂貴亟令江浙二省督撫於稍近州縣常平倉穀內動撥碾米運往平糶以資接濟並截留漕糧還倉被災貧民諒不致失所但現已停賑而今歲

麥收分數亦屬平常。去秋收之時。為期尚遠。濱海窮黎。生計仍不無拮据。朕心深為軫念。著該撫永貴查明上年實在被災戶口。無論極貧次貧。俱著加賑兩月。以示加恩。撫卹之意。該撫務宜嚴率屬員。實力查辦。無濫無遺。俾得均霑實惠。該部遵諭速行。○諭軍機大臣等。朕今春南巡時。經清江浦一帶。雨水似覺過多。天氣尚寒。恐於麥秋有礙。時為厘念。乃迴鑒之後。該督撫等已屢次奏事請安。究未將該地方情形。詳悉奏聞。著傳諭詢問黃廷桂王師。令其將該處雨水情形。並現在麥秋如何。民情是否不至拮据之處。據實即速奏聞。倘收成歉薄。有應行加恩撫卹者。即為奏請辦理。不得稍有粉飾。尋奏清江浦一帶。正二月間。雨多天寒。但本年閏月節候頗遲。自三月中旬後。日漸晴融。春花曬曝得力。屢據該府縣稟稱。山陽桃源宿遷一帶。二麥收成。自七分至八分以上。各旱田地。稻秧秣豆。

栽種俱全。又於五月二十七八等日。連獲大雨。各色青苗滋長。糧價平減。輿情寧謐。似可毋庸撫卹。嗣後如果該處糧價增長。民食拮据。自當另議接濟。不敢粉飾得旨。覽。○大學士等議覆。直隸總督方觀承等奏稱。多倫諾爾地方。原設鋪司二十名。以供郵遞。嗣據尚書那延泰奏。鋪司民人占踞游牧。請行拆逐。臣等酌議。以蒙古游牧固當嚴禁侵擾。但鋪司相距各五六十里。俱在道旁。本非牧地者。均應照舊存留。其非設立鋪司之地。所有房屋。俱令拆逐。應如所請。准其分別存留從之。○壬戌。停州縣行取例。諭向例直省知縣三年行取一次。吏部按期奏請。康熙雍正年間。少舉多停。當朕臨御之初。臣工中有援行取成規入告者。朕以舊制可循。勅部議覆。旋經准行。由今觀之。此特相仍故套。而於吏治人才毫無裨益。所當永行停止。蓋此制始於前明。其時專重資格。按俸遷轉。不得不以部用。

一途疏通壅滯而亦銓部漁利之一途也。今則直省州縣定缺陞調其途甚廣。凡有才能傑出之員督撫無不保題擢用。常有要缺懸待一時不得合例之人而越格奏請者。在此時之州縣實無壅滯之歎。督撫於地方能員亦無不欲其駕輕就熟收臂指之助。遇有隔省陞調往往為之懇切奏留。未肯令其遽離原任。且繁劇之任叅罰必多。凡謂無事故合行取之例者大率庸流居中簡之缺尋常供職幸免處分者耳。即以銓補部曹多屬迂疎潦倒了無出色在該部又無出力之處。況縣令身膺民社百里之寄任既匪輕才亦可展使其果屬賢員方議令久於其任以責成效而部曹分局一司遇事簡之缺無所表見。長才處此轉覺用違其材。若謂司員當由邑令陞用深知民生利弊於部務有益此又不然。部務責成自有尚書侍郎夫尚書侍郎亦惟視其才識勝任否耳何必曾任邑令方知民

生利病豈非所謂學養子而後嫁者耶。若必待行取之人散歷多年方授以綜理部務之任此尤事勢所難行。試觀我朝九卿無論滿員即漢大臣中多有翰苑陞用者起家縣令者幾何人。外而督撫起家縣令者又幾何人。可指數而知其為拘墟之論矣。此實向來沿襲具文揆之當今之務亟須改弦無庸守轍所有直省知縣三年行取一次之處著永行停止再科道近列臺垣優絀尤為易見自可不時擢用而定例內陞外轉給事中則一年一次御史則一年兩次每逢奏請時自康熙雍正年間以至今日亦率降旨停止者多。每年徒增此題奏繁文於治理亦復無益。嗣後內陞外轉著三年舉行一次著為例。朕辦理庶政因時制宜不設成見於澄清吏治鼓勵人材之道洞燭原委一切應行應止務求實效屏斥虛文大小臣工其感悉朕意舉以實心行實政自無不集之事將此詳諭中外知

之○諭軍機大臣等。壽春總兵王進泰所奏壽州回人梅國雄與民人侯世錫糾合多人持械鬪毆一摺。此等聚眾逞兇惡習。為地方之累。該州知州陳韶既因差委未回。而存城之署鳳臺縣知縣為寶。又以民人非該縣所屬。並不出管。以至四月十九日至二十一等日。格鬪遂經三日。該督黃廷桂自應確有見聞。何以至今尚未見奏到。著傳諭該督。令其即行查明具奏。尋奏壽州地方回漢襍處各分門戶。每以角口細故。羣聚逞毆。本年四月十九日。壽鎮左營兵梅國雄身係回教。在典鋪質衣。適幼童係左營兵侯世錫之戚。因人多擁擠。遂挽國雄之衣。國雄掌擊其首。世錫不平。彼此爭攘。國雄遂邀回民毆打。世錫受傷。彼時知州陳韶護鎮王綏等俱辦差未回。而署縣為寶。以非該縣所屬。坐視不管。遊擊萬巍又以俱係左營兵。右營無涉。以致二十二十一連日。彼此聚集多人。尋毆報復。迨二

十二日。鳳陽府知府尤拔世飭該署縣將受傷人等驗明根究。出示嚴禁。方始帖然。此案兵民回漢互爭混毆。固屬不法。實由為寶萬巍等徇縱推諉釀成。臣一據稟報。當即委員查實。將遊擊萬巍署縣為寶題叅。請旨勅部嚴加議處。至不法回民人等。已飭該府縣逐一嚴拏。交廬鳳道許松估親往按律究擬。報聞。又諭。今歲自春入夏。雨澤霑足。目今晴久。漸覺炎亢。雖不似常年雨短時盼。望殷切。而京師情形亦於日內得雨為佳。未知直屬各州縣近來光景若何。聞玉田豐潤等處秋禾出土未齊。頗有望雨之意。該督可查明實在情形。即速具奏。再各鄉平糶米石。辦理若何。米價錢價較前是否稍平。亦著一一查明。速行詳悉奏聞。尋奏。直隸本年二三月雨水調勻。麥禾暢茂。五月以來。惟宣屬報稱雨足。餘皆雨少。臣留心體訪。僉稱地土溫潤。秋苗漸長。此時轉宜稍燥。名曰拏苗。且二麥將

收有雨恐復戀青。俟麥盡登場接種晚穀時亦不為遲。現今各屬二麥收成合算九分實屬豐稔。保定麥價每石已減三錢有餘。天津糧石減價三錢。河間正定大名等府屬漸減一二錢。餘處亦未增長。至玉田豐潤秋禾出土未齊。殊有望雨之意。臣查問京東一帶據稟永平豐潤各處秋苗已齊。惟玉田未全。聞係耨種稍遲之故。該處於本月初十日得雨後雖未續獲亦不至旱。再各鄉糶廠自本月十八九等日開糶以來赴買者常數千人。現檄霸昌道魯成龍通永道僧保住往來稽查彈壓。奸民囤販滋弊。至糶廠每銀一兩收錢八百二十文。俱係隨時兌換。民間錢文流通並未增長。得旨覽奏俱悉。○戶部議覆陝甘總督行川陝總督事尹繼善等疏稱陝省向因銅稀錢貴。領運川錢三萬一千二百餘串搭充兵餉。每串工本銀一兩零。若改撥川銅二十五萬觔運陝。加以鉛錫可鑄錢四萬八

千餘串。每串工本銀九錢零。較之協陝錢數多一萬六千餘串。請自乾隆壬申年正月川省停鑄陝錢改撥陝銅二十五萬觔。先於乾隆十六年飭令川省廠員備貯以待陝員赴領等語。事屬可行。應如所奏辦理。至陝省領運川銅由廠運嘉定由嘉定至陝省水陸腳費令川省布政使給發印簿據實登填運竣報銷。及員役往返盤費陝省添設鑪座配用鉛錫添搭兵餉各事宜應令該督會同陝撫作速妥議具題到日再議。得旨依議行。○是日起

上以夏至祭地於方澤。齋戒三日。○癸亥內閣翰林院帶領戊辰科散館修撰編修庶吉士引見。得旨清書庶吉士朱珪鍾蘭枝劉星煒吳綬詔錢汝誠范清沂勵宇謙俱著授為編修。溫如玉陳慶升俱著授為檢討。漢書修撰梁國治編修汪廷璣已經

授職莊存與仍著授為編修。庶吉士李中簡、張裕華、馮浩、楊方立、毛詠、陸鈞、毛輝、祖錢士、雲史、奕、劉宗、魏、陳科、捷、李宗、文、邵樹、本、陳大化、陳淦、晏、胡延齡、徐堂俱著授為編修。邊繼祖、宗室良誠、李英、圖塔布、傅靖俱著授為檢討。舒毓椿、王翊、福明、安舒、祿、邵齊然俱以部屬用。邵祖節、段廷機、葉世度、朱仕琇俱以知縣即用。荆如棠、王恒、金洪著歸進士原班銓選。林明倫著再教習三年。○諭軍機大

臣等前據奉天府府尹圖爾泰奏稱義州存倉黑豆除支給莊頭餵馬及撥補酌留豆石外尚餘黑豆一萬三千石有零。遞年積累霉變堪虞。請於義州及省城酌量減價平糶等語。當經就摺批發。但義州一倉餘豆既有一萬三千餘石。則所屬各倉諒必俱有多餘。關東為出產黑豆之地。各處市價似不致甚昂。即有偶需平糶之處尚屬充裕。京師官員兵丁餽養馬匹衆多。非他處可比。黑豆一項在

所必需。自應廣為儲積以備支糶。應於奉屬附近海口州縣內將此項徵收多餘豆石各按地方情形酌定數目。每歲派撥一二萬石。照乾隆四年海運之例由奉天海口運至通州交倉存貯。其現在議裁養息牧馬匹二十二羣所有每年應支黑豆亦著一併運通。如遇該省豆價平賤之年並可酌量動項採買。隨船搭運以備京師平糶之用。於官兵餽養馬匹實為有益。著傳諭該將軍府尹等令其詳確妥協定議具奏。尋奏奉天錦寧廣義四倉每年徵收退地支放餘剩豆一萬七千餘石。按年儘數運交。如遇豐收之年再照時價買貯一二萬石。隨船搭運。其民地項下黑豆各州縣額存自四千至六千石不等。仍存倉貯。錦寧二州縣除遞年糶借外餘豆二萬七百萬餘石全數起運。至本年秋收徵還豆石亦仍留倉備用。所有水陸運腳以及盤費等項俱照乾隆四年之例動給。至養息牧裁減馬

羣應支豆石一併運通之處另摺奏覆從之
○又諭京師官員兵丁餽養馬匹需用黑豆甚多豫東二省向為出產黑豆之地自雍正十年以來已於該二省漕糧粟米內節次改徵每年合計額解黑豆二十萬九千餘石以供支放八旗馬駝之用該省小民樂於輸將至今稱便但現在豫東二省額徵運通粟米尚有二十七萬餘石計支放官兵俸餉外每歲多有餘剩似可再為酌量改徵以裨實用
著傳諭鄂客安準泰等令其於額徵粟米內各按地方情形視其出產之多寡分別定數每省再為改徵黑豆一二萬石同從前改徵豆石一併兌運在二省多留此數萬石之粟米既有以資民間口食而京師豆石價值亦可不致昂貴倘加增改徵豆石於閭閻完納漕糧實有未便之處亦即據實查奏不必勉強從事○乙丑夏至祭

地於

方澤

上親詣行禮○詣暢春園問

皇太后安○幸圓明園○諭據湖南巡撫楊錫紱摺奏審結假官誑騙之壽掄元一案內稱壽掄元向曾往來衡州因其誑騙多事經地方官先後拏究遞回原籍復於上年潛至漢口捏稱河員奉委辦木誑騙客民干謁官長應照假冒職官例發邊衛充軍等語壽掄元撞騙滋事積案累累乃復不知悔改仍敢假官局騙恣意妄行似此稔惡匪徒情罪甚重僅予充軍不足蔽辜著改發吉林烏拉以示懲創○是月直隸總督方觀承等奏覆前據馬蘭口總兵什格奏請將黑峪關弁兵向駐曹家路城移歸黑峪關就近駐劄等語查黑峪關口窄隘不通行旅外與河屯之下板城汛相連北與熱河官兵聯絡是以設汛之初止派額外外委一員目兵五名防守其把總一員兵五十九名駐劄曹家路城與都司協

辦營伍分路巡查。今該鎮以該處既復增設千總加添兵丁。請將黑峪關原設弁兵仍歸該關駐劄。似屬慎重之意。但該弁所管不止一處。若欲移駐。則曹家路又須添兵。方無顧此失彼之虞。且遷建營署。在在需費。自以仍循舊制為便。報聞。○兩江總督黃廷桂奏報。二麥雨水栽種情形。得旨正為此厪念。覽奏稍慰。又聞淮上一帶麥收頗歉。究竟如何。速行據實奏聞。○江蘇巡撫王師奏報。長洲靖

江。儀徵三縣。本年四月初九日。雨中降雹。據勘長洲。儀徵二縣。雹輕無礙。惟靖江之東鄉斜橋鎮等處。二麥受傷。房屋亦多坍塌。當即酌借口糧。并借給籽種。查明房間。給恤其新舊錢糧。正在停忙。且係一隅偏災。仍可接種秋禾。無庸請蠲。得旨覽。被雹而至房屋坍塌。此必甚大之雹。成重災矣。若此之事。何不奏明詳查。明確奏來。江南河道總督高斌奏報江北各屬雨水調勻。麥收有望。惟儀徵雖

寧二縣被雹。麥苗有受傷之處。得旨覽。奏俱悉。有因雨水過多成災者乎。據實奏來。○署浙江巡撫永貴奏。五月十六日。據永嘉縣稟稱。該縣上年被災。今麥復歉收。貧民咸思仰給官倉。因前赴糴官米。俱給米牌。令其赴廠查認。本月初一日。有婦女數百。赴縣索牌。該縣赴鄉相驗。隨經該府同營員赴縣慰諭。查其中有民人數名。唆使。即行責懲。并將婦女各給小票而散。該縣旋署一面添廠開糴。一

面補給米牌一萬四千餘戶。臣查該縣平糴已久。此時何至補給。明係胥保欺朦。遺漏。容俟委員查覆到日。核實酌辦。又太平縣稟稱。原撥漕米。於三月十八日糴完。後連日局門考試。適當市集。鄉民赴縣請糴。無知童穉擁擠喧嘩。業於二十四日開倉碾糴。臣因所稟含糊。當即批駁。并飭兩司確查情形。將匿報故縱之地方官先行嚴參。至前奏黃巖瑞安平陽等縣鄉民混向富戶強借攫取各案。臣

委護嘉湖道塔永寧前往訪出為首地棍嚴拏重懲隨有自行還贓者亦有赴縣自首者雖皆無知窮民要係土棍流丐從中倡始每縣均已拏獲數名分別審究牙行米舖聞風每石即減價二三錢不等并據温州鎮札稱漕米均於本月十九二十等日陸續運到現在民情欣躍地方寧謐并無效尤滋事之處報聞○又奏前准督臣移知已撥閩穀二萬石赴溫接濟查咨文係二十日發行按日計程雖尚未接臣前札但閩省若有餘米自應多撥今二萬石之數實屬不敷臣現於省城動撥鹽義倉一萬二千石嘉屬倉米二萬石委員由乍運往仍於浙西沿海各屬再備倉米二萬石以待續撥再乍浦寧波關口紛紛雇船運米商民船隻因承運官米不如載貨利多俱已改收江閩各口若非設法招徠必致有米無船貽誤匪淺臣隨飭令凡承運商米船隻俱倍給水腳官米船隻准其自備資

本添買數十石在內地出售俾得賤買貴賣有利可獲米穀可免乏船裝載溫台需米之鄉亦可藉以流通轉販報聞○浙江提督吳進義奏撥往溫台漕米五萬石作十幫裝載用海船九十九隻各派弁兵押運於四月內自乍浦開行節據營員稟報撥赴台郡米四萬石於五月中旬到齊押運弁兵亦俱先後回營并稱二麥收成民情安帖米價較前已減得旨覽奏稍慰此等奏報須實不可存粉飾之念○湖廣總督阿里衮奏覆上年十一月鹽船失火燒燬引鹽一案查鹽船重大停泊外江聯幫密靠非若小船近岸易於移動深夜失火事起倉猝船戶水手各顧逃生既不及抽幫開避亦無暇搬搶鹽包且每船一隻費本二三千金計所免之課不及所燒船價三分之一委無商人船戶串通故燒船隻捏報失鹽之弊再四月初九日湖南長沙府省城居民邱長生家失火延燒民房七十五

間即行撲滅亦無傷斃人口及延燒倉庫衙署等項得旨知道了湖廣屢有回祿之災應將撲救之法留心可也○又奏報湖南各屬被水情形得旨知道了妥協撫恤令受實惠可也○山東巡撫準奏報麥收分數得旨欣悅覽之但沂州一帶頗覺民貧農廢今麥收有不及別府汝宜加之意何未一言奏及耶○又奏報掖縣平度昌邑壽光濰縣利津等六州縣海潮陡漲漫溢成災應行散給口

聖訓卷之三

三

糧及倒塌房屋淹斃人口分別撫恤其新舊錢糧暫行停緩能否補種秋糧俟確勘酌議蠲賑得旨覽奏俱悉督飭屬員實力妥協令需實惠可耳○廣西巡撫定長奏報起程赴粵西新任經由各省雨水情形得旨覽奏俱悉奏報年成不可稍存粉飾慰朕之心即有災而汝能賑卹得宜亦足慰朕若奏報不實朕心反不慰矣慎之○署廣西提督左江鎮總兵烏德納奏粵西標鎮協營兵定制每一

千名內以一百名操大礮兼習副刀六百名烏鎗內每一百名設過山鳥五桿二百名弓箭一百名藤牌臣署左江鎮總兵較閱兵技惟烏鎗過多當照定例操演今署提督閱看兵技又係刀礮手過多請嗣後廣西操兵務遵成例於驗補名糧時某項過多之缺即補某項過少之數一二年間通省兵技可臻畫一得旨覽但須實力為之

聖訓卷之三

三

大清高宗法天隆運至誠先覺體元立極敷文奮武孝慈神聖純皇帝實錄卷之三百八十九

大清高宗法天隆運至誠先覺體元立極敷文
奮武孝慈神聖純皇帝實錄卷之三百九十

監修總裁官經筵講官太子太傅太師閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅太師大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未閏五月丙寅朔兵部議覆

大學士公傅恒等奏稱江南提督武進陞原
係署都督僉事管福建陸路提督後降為狼
山鎮總兵應降一等以副將銜管總兵事今
復補授提督似與小銜總兵初次陞補提督
者有間自應復還原銜而兵部無此成例請
交部另議等語查提鎮大員降級復還原官
所有復還原銜之處向無成例但係特旨復
授者應稍變通請嗣後提鎮降調其兼銜仍
按所降之級降銜復授原官仍給還原銜庶

較之小銜總兵副將初次陞補提鎮有所區

別得旨依議武進陞著還原銜○授一甲一

名進士吳鴻為翰林院修撰一甲二名進士

饒學曙一甲三名進士周澧為翰林院編修

○除廣東東莞高要二縣乾隆六年分水衝

沙壓田一十五頃有奇科賦○丁卯諭朕前

因近京米價稍昂恐小民未免食貴之慮降

旨添撥米十萬石減價平糶以資接濟今據

蔣炳查看各局米廠回京面奏現在米價日

漸平減且麥收豐稔發糶米數似無需十萬

石之多等語朕軫念民間有加無已頻年蠲

賑常不惜數十萬帑金目下近畿麥屆登場

雖民間易於糴食而原發米石遽議酌減非

朕加惠閭閻之本意但所設各廠現在派員

經理如必俟秋田米豆成熟時始行停止未

免為期尚遙著將此項原發米石未經出糶

者即交與地方官循照各廠現定平糶章程

實力辦理所有原派侍衛科道司員即著回

京交辦之後。朕仍不時分遣原辦之侍衛等。前往查覈。該督該府尹等。加意董率。毋使吏胥罔戶。作奸射利。務令市價益平。僻遠貧民。均霑實惠。以副朕意。○又諭刑部查審永德。偽造印信。冒領庫銀一案。內有初次來文。不兼清漢。經戶部收文處自行駁還等語。此因鑾儀衛有向戶部冒領銀兩之案。該部始定章程。不兼清漢者。令收文之員。竟行駁回。而不通知該堂官。此處辦理。究屬疎漏。嗣後各該衙門支領文移。遇有不兼清漢。及一切應駁事件。俱令收文之員。即時回明堂官。移查本處。並將投文之人。留待咨覆。收文處不得隨收隨駁。無可稽考。如此則查覈尤為詳密。而作偽者。自無所容。將此永著為例。○吏部議覆甘肅巡撫鄂昌疏稱。張掖縣之撫彝地方。請移駐柳林湖通判管理。舊設驛丞應裁。原管柳林湖屯田事務。即歸鎮番縣兼理。無庸另設專員。應如所請。辦理。至稱柳林通判

與鎮番縣員缺。改簡歸繁。在外調補。與原議不符。應毋庸議。從之。○戊辰。諭曰。左都御史梅穀成。摺奏山東巡撫準泰。承審衝突儀仗之房鉉一案。不應擅引乾隆十三年諭旨。一面具題。一面正法。請通飭內外法司。嗣後不得假借牽引等語。朕前所降諭旨。原為聚眾抗官為首之重犯而言。尋常立決之案。自難比附援擬。至房鉉一犯。平日居鄉狂悖多事。又復造言誹謗。逆蹟昭著。深為地方人心風俗之害。較之首惡脅眾者。情罪尤重。其所犯本不在衝突儀仗。亦不在誣告官長。該撫準泰先經面奏。外間自無由知。即其摺內所奏。亦甚明悉。梅穀成未經詳閱。遽謂準泰忿其告官。故違成例。亟欲其死之處。實屬深文吹求。朕慎重刑章。即尋常案獄。皆不憚反覆推求。務期平允。督撫等孰敢以民命所關。竟行率意援引。潛移生殺之權者。此可信其必無準泰亦何敢出此。但梅穀成因事立言。恐開

挾私洩忿之端意在防微杜漸則所奏亦未可盡非耳將此曉諭中外知之○大學士等議覆管理兩淮鹽政吉慶等奏稱兩淮行運江廣引鹽價賤虧商貴則病民近定議貴賤兩價照年之豐歉請自辛未綱始酌定奏辦其丁卯戊辰己巳三綱概賣之貴價并免追繳以恤商力等語查該處並未報災而造報引鹽任聽該商昂價未便免追所有丁卯戊辰楚鹽多賣銀九十六萬餘兩己巳綱西鹽多賣銀十六萬兩應追報部諭曰兩淮運銷丁卯戊辰己巳三綱引鹽皆照貴價曾經部駁追繳今該鹽政吉慶等又復奏請免追該部仍照例議駁此雖部例但向來各省鹽引原聽其自相交易無官為限制之例長蘆河東至今尚然惟兩淮行運江楚鹽引適因崔紀沽名三保庇商兩持異議始將各商運楚成本分別定以賤價貴價然自定價以來商人總以貴價銷售至今夫恤民裕商本屬一

事若任其屢擡時價日引月增則於民食有關然勒令賤賣則該商等又以成本有虧不免紛紛籲請今計各商比年行銷價值於成本自可無虧將來即藉口年歲不齊料亦不過如今之所稱歉年而止耳嗣後淮商銷售引鹽即遇應貴之年亦不得於現在所銷價值外復議稍有加增庶可示以限制至於歲事豐稔鹽價可以酌量平減則令各該督撫會同鹽政等隨時籌畫妥辦部臣亦不必固執定例徒滋駁詰之繁庶於商民均為有益至部議已賣貴價令商人追繳之處事理亦屬難行若云買貴在民則仍應給還食鹽之戶於勢固有所不能否則以商入市值所餘而歸之官帑於政體尤有所不可總之民間物價本自不齊祇可隨時調劑不能概繩以官法即如人生日用最急者莫如食米一項今謂意在卹民而欲官為立制務使市價損之又損閭閻皆得賤食意則美矣欲其行之

於事能乎不能乎。國家休養生息百有餘年。戶口繁衍。自古希逢之盛會。人庶則用廣。用廣則價昂。此一定之理。經國者要在務持大體。而於事勢通變贏縮之間。為之補偏救弊。俾庶政皆得其平。即所以嘉惠元元者。不外是矣。因議鹽法。故推類及之。而因時立制之道。實亦不外此。將此詳諭中外知之。○諭軍機大臣等。前馬得勝來京。陛見時。朕詢以成元震居官如何。尹繼善何以將伊參奏。據奏成元震居官尚屬循分供職。惟叅揭遊擊海受一事。輿論以為不公等語。海受平日居官如何。其列入疲軟之處。有無屈抑。尹繼善奏成元震不勝提督之任。是否因此。著傳諭尹繼善。令其據實具奏。不得稍有迴護。尋奏成元震存心樸實。人亦謹飭。但限於才識。不能幹練。甘省接壤外夷。地方遼濶。恐其未能周到。是以奏請酌量委用。並非另有別情。至海受漢仗軟弱。弓馬生疎。去歲軍政。成元震與

臣會商叅揭。實無屈抑得旨。所奏甚公。如此居心。方稱封疆大臣之義。且成元震來京。朕觀其迴不如前。即卿之奏彼。彼亦甚服。是以潮州要鎮。尚恐其不能。又改用兗州也。○己已。

上詣暢春園。問

皇太后安。○諭。上年浙省溫台各屬。內有偶被偏災之處。業經照例蠲賑。其蠲剩漕項銀米。已令緩至本年麥熟後徵收。今該處春間雨水稍多。麥收歉薄。現在減糶加賑。以資接濟。所有此項蠲剩銀米。若仍照舊催徵。小民未免艱於輸納。著加恩緩至本年秋收。及壬申年麥熟後。分作兩年帶徵。以紓民力。該部遵諭速行。○諭軍機大臣等。我朝統一寰宇。凡屬內外苗夷。莫不輸誠向化。其衣冠狀貌。各有不同。今雖有數處圖像。尚未齊全。著將現有圖式數張。發交近邊各督撫。令其將所屬苗犛黎獐。以及外夷番衆。俱照此式樣。仿其

形貌衣飾。繪圖送軍機處彙齊呈覽。朕以幅員既廣。遐荒率服。俱在覆含之內。其各色圖樣。自應存備。以昭王會之盛。各該督撫等。或於接壤之處。俟其順便往來之時。或有人前往公幹。但須就便圖寫。不得特派專員。稍有聲張。以致或生疑畏。俟伊等奏事之便。傳諭知之。○吏部議覆山西巡撫阿思哈疏稱。布政使豐瞻庫大使一員。足資辦理。其副使無庸多設。應准裁汰。至雲南浙江二省事同一例。宜併裁從之。○五經博士周枚老病告替。以其子景濬承襲。○旌表守正捐軀之直隸清苑縣民李有妻韓氏。○庚午。

上御勤政殿聽政。○戶部議准。調任船廠將軍卓鼐等疏稱。太平倉四十間。請移於永寧高燥地方。改建六十間。從之。○以吏部左侍郎鄂彌達為鑲藍旗漢軍都統。○辛未。諭曰。御史孫宗溥奏請酌定經制。以節民用一摺。欲將民間婚喪宴享。酌立規條。於教化之中。寓

制防之限。似亦黜浮崇實之意。但天下之大。五方風氣不齊。唐魏之勤儉。吳會之華靡。自古已然。皆各隨其土性。以成習尚。是以山陝之民。富者知節嗇。江浙之民。貧者矜華腴。其風自難頓革。是惟力為漸摩。去其太甚。以漸至於返樸還淳耳。且地方有富民遇賓祭等事。即用度較豐。小民亦得資其餘瀝。以事生養。必令吳越之俗。迫之使效秦晉之風。無論一時難強。且使富者專利自封。則貧者益難餬口矣。若概恐其時絀舉贏。遂嚴立限制。抑而裁之。以示必從。不從即以法繩其後。此勢之所不能。徒使胥吏乘此需索訛詐。更為民累。即特頒禁令。亦不過託之文告。一經曉諭。便可置之不問。於閭閻有何裨益。在孫宗溥自謂但去其太甚。無事煩苛。滋擾亦明。知其事之難行矣。如果華侈太甚。地方有司。自應隨時教導。使之潛移默化。若惟是撝拾浮詞。而為此奏。則仍以虛文相尚。朕所不取。著傳

諭中外知之。又諭正藍旗議奏桂林府知府張永熹名下應追分賠原任臨桂縣知縣徐上達虧空挪移銀兩現無家產請交廣撫於分賠各員名下再為攤賠一摺向來屬員虧空本人力不能完責令上司分賠歸項所以懲失察而儆官邪原係從前舊有之例朕御極之初於虧空案內分賠代賠各項多從寬宥地方官不能體朕格外加恩之意因循故智近年來轉有簞簋不飭竟將國家帑項婪歸私橐者此等貪黷之風不可不力為整頓是以按照定律懲一儆百期於辟以止辟乃臣工等又不免意涉揣摩遂將屬員虧空之項概議上司分賠於政體未為允協蓋上官有察覈屬員之責地方官實係侵帑自肥及因事婪贓者上司平時漫無覺察自當按數分賠以昭懲創至於挪移霉爛之款既非侵貪重案可比亦尋常牧令所不能免之事將該員律擬覈追已足示懲儆若概令上司

分派賠補揆之情理殊失其平非禁戢貪婪之本意且此等案件經部臣行令分賠之後仍不免遷延日久終以絕產無追其結請豁是又有名無實徒增案牘之煩耳於事何益嗣後凡虧空案件到部應詳加察覈其有實在侵貪入己之劣員仍令該上司等分賠不得稍為寬貸其他如挪移款項與倉穀浥變等事祇將該員議罪著追不必概令上司分攤賠補致滋擾累朕經理庶務應寬應嚴惟準乎情理之正從無畸輕畸重之見存乎其間也將此詳諭中外知之此案著免其行令攤賠○壬申內閣翰林院帶領新進士引見得旨新科進士除一甲吳鴻饒學曙周澧已經授職外沈棫劉墉葉藩湯世昌湯先甲王應瑜盧明楷蔣櫟李承瑞狄咏麓戴天姚晉錫柯一騰戈濤路談王啟緒田樹李逢亨李綬史鳴臯周曰贊朱嵇蔣良騏梁兆榜張曾敞葉觀國羅典周於禮王紱秦百里黃元吉

穆丹吳為壩劉宗珙郭兆全魁艾茂李方泰
高辰孫昭黃鴻閣范思皇俱著改為庶吉士
吳肇元詹學海萬中道朱光發呂光亨潘從
龍何逢僖葉棠張孝泉葉自淵樂廷鈐何棟
覺羅巴彥學郭天祿劉位廷陳聖準譚尚忠
德瑛沈世晉雪格李天培俱著分部學習照
例試用王應元孫洙徐恕溫葆初王采珍柴
景高朱綬盛應謙朱山范朝綱潘思藻韓衍
桐張瑚成文俱著以知縣即用李儼顧惠懋

朱垣張慶長徐步蟾李元通董豐垣印憲曾
王元啟陳筠王熙載金汝梅何向宸褚天門
尹廷賓舒元煊張素張雲蒸譚有德鄔昇周
璵歐陽照陳公問嚴慶雲周白萬周隆謙朱
家濂胡廷槐李拔張繩武吳儒清胡圻俱著
分發各省以知縣用郭乙山任秉哲南宮鼎
徐玉書王成德卓道翼王彭會徐吉士胡楷
全宗魁陳榮榕黃丹書朱錦如王大嵩饒上
位梁堅校張鯁王以訓宋五仁王人麒俱著

以教職即用餘著歸班銓選○癸酉
上詣暢春園問

皇太后安○諭八旗所拴官駝向有八百餘隻
遇有遠行每用六七百餘隻不等雖有盈餘
為數甚少若再有行走之處仍需此駝無輪
流息養之暇故多瘠瘦官駝原為旗人拴養
今每佐領若增添一駝永遠長拴既有便於
旗人而各項當差之處亦屬從容此增添駝
隻或用太僕寺所管牧廠駝隻或應如何增
添之處著八旗都統會同該部議奏此次增
拴後若不加意餵養仍致瘠瘦惟該旗都統
是問尋議太僕寺所屬三圈駝每遇應差尚
不敷用所有八旗應添駝八百八十一隻請
在於歸化城多倫諾爾等處採買每駝作價
銀二十五兩共需銀二萬二千二十五兩於
戶部支領并請旨於八旗副都統內欽點二
員帶同通蒙古語之章京買足解回分給八
旗拴養從之○大學士等議覆黑龍江將軍

傅爾丹奏稱。船廠上年被災糧貴。請將呼蘭買貯糧內撥一萬石。水運至船廠。按時價稍減糶賣。查前任船廠將軍卓鼐奏請發船廠倉糧五千石。照時價酌減。每倉石八錢糶賣。今呼蘭撥運一萬石。除歸還船廠五千石外。該將軍等請照黑龍江所定每倉石四錢糶賣。但所撥糧雖係豐年收買。以四錢出糶。較原價固增。而視船廠時值每石一兩二錢。已減三分之二。現在若照八錢。未免少昂。四錢

又似太賤。臣等酌議。前項運到糧。交八旗協領佐領等。均分賣給旗人。自與市集糶賣者有間。應照時價折中。每倉石以六錢糶賣。至應用運船三十隻。令上緊趕辦。派員分三次撥運。工價事竣報銷。得旨依議速行。○卹山東壽光。掖縣。平度。昌邑。濰縣。利津等州縣。及官臺。西由。永阜等場。本年水災。緩徵新舊錢糧。并予貲修屋。借給籽種。○福建道御史李友棠奏。江浙地方詞訟繁難。州縣日約二三

百件。簡僻者亦不下百件。專心辦理。尚虞竭蹶。偶爾公出。恒多壅滯。今值辦差甫竣。收令中夙號才能者。方冀量錄辛勤。妄希擢用。庸懦者又以甫經勞勩。暫圖息肩。積久生玩。勢所不免。請勅諭江浙督撫。嚴飭所屬辦差州縣。一切新舊大小事件。分別定限。責令道府等官。不時督催。應審結者。審結。應省釋者。省釋。玩愒即行。參奏。得旨所奏是。著照所請行。○湖廣道御史王應綵奏。本年五月初七日。

刑部四川司送到石應選毆死小功服叔一案。內有救母情節。夾簽字樣。並不將夾簽送覈。又江西司送到馬鎔毆傷胞叔身死案內。有誤傷情節。將夾簽送覈。事同辦異。咨詢刑部。覆稱。去年議覆御史王荃奏稱。嗣後督撫題奏案件。有關服制一應罪名。臣部會同三法司。照律覈擬。其情可矜疑者。臣部於出本時。照例加簽。恭候欽定。其江西司送往會覈。係書吏錯誤等因。臣思院寺刑部。並稱法司。

若謂刑部得以獨斷。則刑部為專權。院寺為曠職矣。且刑分生死。向令院寺察覈。恐有書吏舞文之弊。如果無庸。此為更易舊章。自應奏明請旨。今查部臣議覆王荃原奏。並無此字樣。乃借出本為名。改易成憲。合無仰懇訓飭刑部。嗣後仍照定例。將夾簽移送院寺。公同覈擬得旨。所奏請院寺會覈。自屬集思廣益。著照所請行。至於深文吹求。謂該部為專權。此不過憤於不會覈。而游詞以加之罪耳。

言官惟應據事直陳。不宜簧鼓相攻。王應綏著飭行。再有似此者。必交部議處。○旌表守正捐軀之河南唐縣民間坤妻王氏。○甲戌諭庶吉士分習清書。例由翰林院掌院學士分派。惟量其年力。不拘省分。舊時清漢各半。自雍正年間以來。分習清書者漸少。每科尚有十四五員。十七八員不等。朕思邊省之人。選館本少。聲律亦素所未嫻。既習國書。自必專意殫精。惟清文是務。非天分優而學業勤

者。不能兼顧漢文。益致日就荒落。迨散館時。或以清書優等授職。而留館後。遇通行考試。往往絀於詩賦。列入下等。改令別用。究其所肄清文。自散館一試外。別無職分應用之處。微獨邊省。即北五省庶吉士類然。翰苑中江浙人員較多。而遠省或致竟無一人者。非所以均教育而廣儲才也。嗣後雲南貴州四川廣東廣西等省庶吉士。不必令習清書。直隸山東河南山西陝西等省。亦視其人數。若在三四員以上。酌派年力少壯者一二人。其江浙等省人數在五六員以上者。酌派二三人。率以三十歲以下者充之。每科通計在十人內外。寧缺無濫。循舉舊章。備國朝典制足矣。該衙門即遵諭行。○軍機大臣等議覆。河南巡撫鄂容安奏稱。豫省辦理工程差務。紳民樂輸。原議每正賦一兩。出夫三名。折銀二錢四分。除上年被災地畝。及軍屯不納外。通省應輸銀七十二萬八千九百餘兩。現未經交

納者二十四萬一千三百餘兩。除陸續繳還司庫及酌留修理甘露寺工程等項實存銀十九萬九千九百餘兩。前撫臣碩色奏明豫省城垣應修理者三十餘處。估銀二十餘萬兩。請將此項辦理城工等語。查該省城垣既經奏明自應隨時興修。若日久續有坍塌。原估勢必加增。應如所請辦理。但三十餘處似不必一時並修。且有續收銀兩將來亦可動用。請將餘存銀兩一半留豫省修城之用。一半解交直督查明直隸各處城垣有坍塌者確估動修。俾近京小民得以傭工餬口。於直豫二省城垣均為有益。從之。蠲免山西太原應州陽曲榆次徐溝文水祁縣黎城平遙天鎮山陰靈邱陵川臨晉永濟五臺保德河曲絳縣等十九州縣乾隆十五年冰雹雨災額賦有差。並緩蠲剩銀兩。○乙亥調鑲藍旗漢軍副都統尚顏保為正紅旗蒙古副都統。以丁憂總兵苗國琮為鑲藍旗漢軍副都統。

○丙子戶部議准雲南巡撫愛必達疏稱洪源新井二井原額煎鹽一百二十一萬六千九百九十四兩。因涵水短縮不敷原額祇煎鹽六十四萬四千四百九十六兩。并安豐白井代煎三十萬兩。共九十四萬四千四百九十六兩。較原額固屬減少。第各處行銷獲價銀七千九百四十一兩零。除完洪源新井抵課并發給官役養廉工食外餘銀四百二十九兩。鹽額雖減課款無缺。請自乾隆十五年為始照數供煎。餘銀造入盈餘冊內具題查核從之。

丁丑

上詣暢春園問

皇太后安。○諭軍機大臣等。阿里衮所奏唐綏祖任所貲財什物分別解交內府崇文門一摺。係五月二十六日封發。其五月十二日所降給還諭旨按期尚未奉到。但同日所奏接奉寄信諭旨中已有唐綏祖贓款屬虛。伊從前查封貲產自可加恩降旨給還之諭。阿里

袞承辦此案。業經審無實據。其為贓款屬虛。已無疑義。豈不知其應行給還。即未奉有明發諭旨。亦當留楚稍待。乃復委員解京。多此一番往返。辦理殊謬。已令軍機處傳諭委員。仍行帶回。可即查明給還。將此傳諭阿里袞知之。○又諭前經高斌摺奏。江北淮揚等屬二麥情形。朕慮其中或有雨水過多之處。批令據實具奏。今據奏稱淮北一帶二麥收成。實有六七分等語。東南麥收分數。至六七分以上。在尋常州縣。即不為甚歉。至桃源宿遷一路。積年屢被偏災。元氣未復。目前收成。如祇獲六七分。實不足以蘇民困。該督撫黃廷桂。王師何以未經詳悉奏聞。著將高斌原摺鈔寄該督等閱看。即今日武進陞所奏。地方晴雨情形。據稱松江地方五月十三等日。得霽時雨。則未雨以前。似不無稍旱。該督撫等亦應隨時入告。以慰朕懷。雖朕回鑾以後。該督撫等於地方事務。應辦者甚衆。然歲事豐

歉。為閭閻生計。攸關封疆之責。孰有急於此者。前月二十九日。該督黃廷桂。彙奏兩江裁插摺內。已將所聞淮上麥收頗歉之處。批令速奏。此時自應查辦。著一併傳諭黃廷桂。王師。令其即行詳查奏聞。如有應行借給口糧酌量撫綏之處。即著一面奏聞。一面辦理。尋奏淮北各屬麥收較上年畧減。民情尚不至拮据。桃源宿遷一路。雖積年被災。元氣未復。然今春於正賑外加賑數月。現又登穫未久。民間尚有蓋藏。惟淮上清江一帶。向藉資於豫省客米。近因豫商鮮至。米價漸貴。現令開廠平糶。并諭該府視市價平減。停止再松江一府。自五月十三等日。遍獲雨澤。芒種以前。尚不慮旱。得旨。覽奏俱悉。○又諭。今年東省麥收豐稔。惟沂州一帶。朕經臨時留心體察。覺彼處情形。南既不及江南一路。北亦不如泰安以上一路。昨據該撫奏報。通省麥收。沂州亦較他府為歉。已批諭民貧農廢。宜加之

意。今據高斌奏到淮北桃宿等縣麥收六七分不等。沂州與之接壤。鄰蘭等縣連年被災。頗重。麥收既在八分以下。則不足以蘇積困。朕心深為軫念。可傳諭該撫。令其詳悉查明。有應行借給口糧酌量撫綏之處。並著一面奏聞。一面即行辦理。○大學士等議覆。兩江總督黃廷桂奏稱。江寧水師營原設守備一員。把總二員。水手兵三百二十四名。沙船二十隻。與八旗駐防官兵配駕操演。近因弁兵裁汰。所有沙船請就近暫歸鎮江水師副將管轄差操。其沙船二十隻及存船礮位器械一并帶往。應如所奏從之。○工部議准。湖南巡撫楊錫紱疏稱。長沙府屬湘鄉安化二縣礮煤雜礦。自乾隆十二年開採以來。計發過公項銀四千四百八十九兩零。除所收礮變價外。尚餘六萬八千三百觔。可供數年之用。應暫封閉。俟銷售完日復開。從之。○戊寅諭陝甘自尹繼善赴川懸缺已久。黃廷桂著調

補陝甘總督。著即速赴新任。尹繼善著調補兩江總督。俟策楞回川之日。來京陛見。再赴江省。尹繼善未到之前。兩江總督印務著高斌暫行兼管。○又諭山東山西河南三省有歷年積餘耗羨銀兩。著將山東山西各撥十萬兩。河南撥五萬兩。解交直隸。以為修理城工之用。○諭軍機大臣等。黃廷桂調補陝甘總督。已降諭旨。伊在兩江總督之任。兩載有餘。朕詳加體察。伊於江省不甚相宜。蓋南人風氣柔弱。而黃廷桂性情剛躁。幾於水火之不相入。此番辦差諸事。該省吏民畏懼之心。勝而悅服之意少。黃廷桂喜怒之間。亦不得領要。受其呵斥者。固不能無怨。即為獎許者。亦不以為感。久之將何以行其威令。必令久於江省。未免用違其長。且如王師張師載二人在黃廷桂面對時。何嘗不奏稱王師尚肯實心相助。而王師等在朕前。頗露畏懼該督之意。督撫共事一方。設令外合中睽。地方亦

屬無益陝甘民情。本屬陽剛。於黃廷桂性情為宜。伊前任甘肅巡撫。深為稱職。是以調任陝甘。但伊待下褊急。往往聲色俱厲。亦屬過當。朕既體察及此。故明切訓諭。令其知改。人之性情。固不能無偏。但當自知所短。留心檢點。以平正率屬。方能諸事合宜。將來陝甘後。亦不可一往任性。失中正之道也。陝甘自尹繼善赴川。至今懸缺已久。黃廷桂不必來京請訓。朕面訓亦不過此。謹識。而力行之。惟該督是望。○吏部等部議准。奉天府府尹圖爾泰奏稱。寧遠州判一缺。雖係佐貳。凡戶婚田土等事。俱令審辦。請照奉天州縣之例。改設滿員。又奉省風俗。最為淳厚。充軍人犯。聚集習氣。不無漸染。請嗣後編發奉天者。改別省安置。從之。○己卯。諭軍機大臣等。潘思渠所奏。飄到琉球番船一摺。內稱該番是否實。係送來伊國。抑係販往別處。箱內均係何物。行令密查等語。外番船隻。如果係遭風飄泊。

到境。其情形蹤跡。不難立辨。自應照例安頓。遣回。以昭撫卹。何用輾轉飭查。失天朝懷柔遠人之義。且地方官辦事習套。所謂查察者。不過行一牌。具一稟。便塞責了事。而遠人己不免疑忌。此乃奉行陋習。有名無實。深所不取。如實見其中不無情偽。則該督撫等。又當實力嚴查。悉心籌辦。非可徒以文移往返。因循故套也。嗣後遇有此等番船。飄至內地。量其實係被風。即令宿頓驛館。乘便送歸。不必多方飭查。以滋外夷疑畏。著傳諭該督喀爾吉善。該撫潘思渠知之。○又諭。昨據高斌覆奏。淮北一帶。二麥收成。實有六七分等語。是雖不為甚歉。但桃源宿遷等縣。積年屢被偏災。元氣未復。麥收如祇六七分。恐不足以蘇民困。當即傳諭黃廷桂。王師令其詳查奏聞。酌量借給口糧。以示撫綏。今黃廷桂調任陝甘。兩江總督事務。已著高斌暫行兼管。若俟交代後接辦。未免稍遲。且桃源宿等縣。皆其巡

視河工不時往來之處。所有地方實在情形。知之必悉。可再傳諭高斌。令其就近速行確查。如有應行酌借口糧之處。即著一面辦理。一面奏聞。俾貧民得資接濟。可以待至秋成。以慰軫念。並將傳諭黃廷桂等諭旨鈔寄。尋奏臣查淮安府之山陽鹽城阜寧等縣。上年本未被災。今年麥收七分。以上毋庸酌借口糧。其桃源清河安東俱係被災地方。臣即就近傳諭。於二十二日起。動支府庫銀七千兩。分給三縣。并諭各該縣。如有實在無力貧民。即一面量行借給。一面報明。俟秋收還項。至淮北小民。多食大麥雜糧。現今大麥足資餬口。而高粱早豆。六月中旬。亦可收穫。其酌借口糧。俟六月下旬。再查情形。隨宜辦理。得旨。欣慰覽之。○庚辰。諭鑲黃旗滿洲將墨爾根副都統。默爾泰。呈請伊子隨任之處。具奏。各省駐防將軍副都統等旗員。非地方辦事文職。可比。嗣後伊等子弟。內及歲者。如情願隨

帶任其自便。該旗不必奏請。○吏部議覆御史歐陽瑾奏。稱列科庶吉士。多於既用之後。紛紛告假。俟散館將近。陸續而來。請自今科為始。該教習不得任其請假。再翰林編檢假歸者。於考差前。先冬而來。兩差既完。託故而去。請一併禁止等語。查庶吉士教習三年。與告假之年例。本不相符。或有因患病。及省親告假者。應令該教習大臣嚴查。毋任捏飾。濫給。至編檢告假告病。處分綦嚴。原無來去自由之事。但如該御史所稱。或未可定。嗣後應令該掌院嚴查。如有情弊。將該員議處。該堂官查議。又稱漢侍讀侍講及學士。少詹祭酒等缺。准由編檢出身之京堂科道郎中各官。按資開列。查漢編檢人數較多。應陞各缺。向由本處人員。開列簡放。若以別項人員。分缺間用。則編檢陞途壅滯。是以京堂科道等官。可由翰詹改補。而翰詹等缺。不准京堂改授。定例本屬平允。再編檢既改郎中。陞途亦異

未便復行陞轉翰詹等缺所奏應毋庸議從之○兵部議准直隸總督方觀承疏稱靜海縣唐官屯千總一缺向由部選迨屯糧歸入靜海滄州等州縣經理所轄僅三所隄工今隄工亦歸各州縣經管未便復名屯所千總請改於河工把總內揀補咨部請剴照例辦理從之○兵部侍郎兼管順天府事蔣炳等奏順天府四路添設米廠所糶錢文經御史李文駒奏准上屆四萬四千石之數易銀解部此番十萬石即將錢解部查各廠官員惟恐多貯致長錢價多方銷售不能仍存所糶之數請令各廠以現存之錢解部其已經易銀即將銀解部得旨知道了平糶錢文前據軍機處議覆御史李文駒條奏請解部搭放兵餉今該府尹等既奏稱不及十萬串為數無多且待至搭放兵餉轉不能即速流通著不必解部陸續交與八旗米局令其照市價稍為酌減以平市價俾錢文不致壅滯

實錄卷三百六

五

大清高宗法天隆運至誠先覺體元立極敷文奮武孝慈神聖純皇帝實錄卷之三百九十

實錄卷三百六

五

大清高宗法天隆運至誠先覺體元立極敷文奮武孝慈神聖純皇帝實錄卷之三百九十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣履桂

總辦官經筵講官太子太傅大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣重誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞尋奉

教修

乾隆十六年辛未閏五月辛巳諭朕前降旨

令九卿督撫薦舉潛心經學之士雖據大學士等覈覆調取來京候試現在到部者尚屬寥寥但觀此番內外諸臣保舉尚未能深悉朕意蓋經術為根柢之學原非徒以涉獵記誦為能朕所望於此選者務得經明行修淹洽醇正之士非徒占其工射策廣記問文藻詞章充翰林才華之選而已亦非欲授以政事責其當官之效如從前各保一人故事此朕下詔本意也在湛深經術之儒原不必拘

拘考試若如內外所舉既有四十餘人即云經術昌明安得如許績學未遇之宿儒其間流品自不無混淆豈可使國家求賢之盛典轉開倖進之捷徑勢不得不慎重考校以甄別之聞有素負通經之譽恐一經就試偶遇僻題必致重損夙望因而託詞不赴以藏拙為完名者苟如此用心已不可為醇儒矣其安所取之然此中亦實有年齒衰邁不能跋涉赴考者伏勝年九十餘使女孫口授遺經於鼂錯其年豈非篤老何害其為通儒此所舉內果有篤學碩彥為衆所真知灼見如伏生之流者即無庸調試朕亦何妨降旨問難經義或加恩授以官階示之獎勵乎著大學士九卿將現舉人員再行虛公覈實無拘人數務取名實相孚者確舉以聞如果衆所共信即可不必考試若仍迴護前舉及彼此瞻徇則尤重負尚經學求真才之意獨不畏天下讀書人訾議與後世公評耶○又諭據署

長蘆鹽政高恒摺奏東省永阜等場今年海潮漫溢灘鹽被淹。況值奏銷屆期。正雜課項均應催徵全完。實難措辦等語。著將山東乾隆十六年春夏二季正課。緩至壬申起分限二年帶徵。以紓商力。該部遵諭速行。○諭軍機大臣等。總督黃廷桂奏到江省近日情形。據稱蘇城米價。每石增銀三四錢。目今二麥甫登。民間猶可支持。將來六七等月。去秋登甚遠。貴食堪虞。正須設措等語。米價乃民食攸關。地方官宜刻刻留心體察。其作何補救。必須豫為籌畫。方於臨時有濟。蘇城米價既覺陡增。該督撫即應早奏。黃廷桂此奏已屬遲緩。王師並未奏聞。非所以體朕宵旰勤民之意也。且但謂正需設措。而作何設措。亦未聲明。轉瞬即屆六七月之期。若待奏報往返。豈不於臨期有誤。黃廷桂已調赴陝甘。著傳諭高斌。王師令將作何籌辦。方可不致米價日騰。其前因南巡截留漕米項內。如有餘剩。

自可通融接濟。一併作速查明。詳議奏聞。其奏報遲緩之處。並諭黃廷桂知之。尋高斌等奏。查目下蘇城上米次米。每石市價二兩一二錢不等。不致漸昂。其上年截漕米。係散派各州縣。即有餘剩。於青黃不接時平糶。無可通融。長元吳三縣餘剩截漕。將次糶完。現擬接糶倉穀。至蘇城富戶存米。每年六七月間始行出糶。現已上市。再聞江西湖廣早稻頗豐。六月望後。商販踵至。自可日漸平減。目前偶貴。可以無慮。得旨。覽奏稍慰。仍望秋成大。有始釋此懷耳。○又諭據黃廷桂奏。稱上元縣進典典舖被焚。地隣鄭三等。從中包攬。立局賠償。後因剋減錢文。致被典戶人等。將掌櫃之陳自申等。鞭打押禁。並拆毀鄭三等房屋一案。現飭該府縣。將為首各犯。逐一查拏。按律嚴審。究擬等語。此等案件。亦祇可如此辦理。但摺內止稱據江寧巡道周承勅所稟。高晉身為藩司。且兼江寧織造。乃屬通省大。

員該督既赴常會審。伊現駐劄省城。則地方一切事務。皆其專責。自應一面嚴飭府縣查拏。一面具摺奏聞。方是。乃止聽巡道一人具稟該督。而伊竟若置身事外者。殊不可解。或因有畏懼黃廷桂之意。以致遲迴觀望。亦未可定。可傳旨詢問高晉。令其據實覆奏。尋奏上元縣進興當舖一案。臣以上江藩司駐劄下江地方。江寧非所管轄。一切事件。地方官向不呈稟。嗣據巡役稟報。隨傳詢該府起釁之由。查拏首犯。適黃廷桂回省。當將此事口稟。經督臣奏明。不復重瀆。並非畏懼黃廷桂之意。得旨覽。○又諭。據署廣西提督烏德納摺奏。粵西提標。每年操兵。除陰雨公事外。實用火藥。不過八九千觔。乃營員泥定。每年操藥一萬五千餘觔之例。豫開公糧。遞年溢出。未買硝磺銀九百兩零。既有存餘。難免挪用。誠為不合。叅之不可勝叅等語。豆斌向任廣西提督。一切整頓營務。是其專責。操演火藥。

理應按年據實開報。何以一任營弁任意浮開。著傳諭豆斌。令其據實回奏。尋奏。本標定額。豫貯二年火藥八萬八千八百餘觔。每年給兵操演。出陳易新。臣離任時。查存火藥六萬八千七百餘觔。因廣西產硝甚微。各營俱有存價購買。前已飭營員亟為配製補足。且向來按期操演。每十日合操一次。一月演習大陣。每歲所需不止八九千觔。柳州營伍。皆係親標。稽察最易。豈敢坐視營員添減浮開。不為查叅之理。得旨。俟汝到京日。提奏。○授多羅順承恪郡王熙良女為郡主。壻傅珠禮為多羅額駙。○壬午。大學士等議。覆尚書舒赫德奏。各省標營增扣名糧。以充公費。據各直省督撫陸續奏到情形不一。臣等公議。應如所請。上下兩江。及江西。福建等省。無庸增扣。直隸除督提二標外。餘各分別標營。每百名內酌添一分。浙江及陝甘二省之各鎮協標營。并甘撫甘提各營。仍照舊例扣存三分。

四川省照舊於每名原扣步糧三分內改扣馬二戰一。山東於原扣二分外再添二分。山西太原大同等鎮。每兵百名。原扣未及二分。各營准其添扣足二分之數。雲貴二省。每兵百名。各增扣一名。廣東、廣西各營。舊習向以餘存馬價折充公用。今據該督奏請將廣東各營馬價數內。每匹二十一兩四錢。廣西各營馬價。每匹二十兩四錢。均節餘銀三兩。歸公解部交納。其實不敷公用。如春、汧、義、寧等協營。准添名糧一二分。至湖北、湖南二省。據稱現在各營。借墊扣抵兵丁不無拮据。若於原扣公糧二名外。增扣二名。定以期限。過後仍拔補足伍。一遇營中公用不敷。又須酌撥。辦理周章。應令該省各營。於原扣二名外。酌扣一名。其河南巡撫所請。蘭陽等十縣官地。租息撥歸營伍。查蘭陽等十縣官地一百餘頃。雍正十三年。經前撫臣奏請歸公。接濟民食。未便撥歸營伍。但現在河北九營。撫標二

營。地廣兵單。不便再行裁扣。而所有河灘地畝。及置買官地。收租添補。又實不敷營中公費。應交該撫另籌議奏。從之。○旌表守正捐軀之江蘇上海縣民郭和中女郭氏。○癸未吏部議准御史章有大奏稱。八品以下微員。凡應補應選者。向免赴部守候。吏部掣籤彙題後。將憑封發各省督撫驗看。給憑赴任。所以體卹微員。免其跋涉。若有就挑來京。仍將憑封發本省。該員往返。員缺久曠。請將此等人員。銓選得缺。附於月官之末。九卿驗看後。即由京給憑赴任。從之。○甲申。旌表守正捐軀之直隸吳橋縣民賈福恒妻張氏。○乙酉。諭軍機大臣等。阿思哈奏平陽府臨汾縣村莊被水一摺。不無粉飾之見。且奏報太遲。地方猝遇偏災。關係民瘼。最為緊要。理應刻即辦理。刻即奏報。督撫應辦之事。無重於此者。該省於閏五月初一日水發。阿思哈至十三日。方具摺奏聞。而附近之霍州等州縣。有無

被水尚未查到。再稱東西高河各村倒塌房屋三百餘間。而淹壓兵民男婦僅六七名口。恐州縣有以多報少情弊。阿思哈身任封疆。不應怠忽若此。念其新任巡撫。著傳旨嚴行申飭。嗣後當留心查辦。不得怠緩從事。河南為山右下游。水到較後。昨覽鄂容安奏摺。該撫聞山西丹沁兩河。初一日水漲。於初六日馳至河內。武陟親行查勘。如此方是。并諭阿思哈知之。俾知所愧勉。○丙戌。刑部議覆雲貴總督愛必達疏稱。叅革鹽道郭振儀。廢弛鹽務。虧欠成本。應行著追。按律發邊遠充軍。接任鹽道張惟寅。有意瞻徇。降三級調用。得旨。郭振儀應追銀兩。係挪抵腳戶虧欠鹽餉。此滇省向來相沿陋習。非侵蝕帑金入己者可比。既經查出。祇應嚴警將來。不必追究。其既往所議郭振儀按律發邊遠充軍之處。著加恩寬免。現在應追未完銀兩。免其追繳。張惟寅著該督撫出具考語。送部引見。其積餘

銀兩。歷任濫支濫給。應行著追之項。一併豁免。○丁亥。

上御勤政殿聽政。○諭督撫為通省表率。地方之事。皆其事。至如水旱震溢。災及閭閻。尤其最重而最急者。該督撫即應體朕痼瘼。乃身之意。無論偏州下邑。親往撫綏。或遇不法棍徒。聚眾鬧賑。最易滋生事端。亦應親往彈壓。此乃職分當然。而向來督撫率委屬員查勘。並不親行。名曰鎮靜。實則偷安。獨不念災黎之輾轉溝壑。呼號待拯。情狀耶。督撫每離治所。必須題報。此亦沿襲虛文。督撫一出。人所共知。何待題報。且督撫同城者居多。一人勘災。尚有一人居守。攜篆護篆。惟便。如慮隨從員役家人。不無騷擾。此自在該督撫之善於約束耳。又豈可因噎廢食。是皆歷來督撫養尊處優。耽於逸樂。罔卹民艱。遂成錮習。所謂為天子分憂者。固如是乎。近日如河南巡撫鄂容安。一聞山西丹沁兩河水發。漲入豫境。

即親至武陟。河內。察勘情形。如此方克稱封疆重寄。甚屬可嘉。山西巡撫阿思哈。於所屬之鳳臺。高平等縣。被水。委員查勘。奏報。又復稽遲。業已傳旨申飭。雲南總督碩色。巡撫愛必達。奏。劍川。鶴慶。麗江等處地震。傷壓甚重。僅委知府查明賑卹。提督雖非督撫可比。既在該地方。亦不當坐視。而事務更簡。可以身行駐劄。與被災之地較近。治大雄亦僅委之遊擊。又福建總督喀爾吉善。巡撫潘思榘。奏。

寧化。清流。山水驟發。入城深至丈餘。亦非常異漲。而委之知府同知以下等官。皆非慎重災傷。矜恤顛連之意。殊屬不合。著通行傳諭各省督撫。嗣後不得拘泥往例。凡遇災傷異常之地。務令親身前往查察。應行賑卹者。一面賑卹。一面奏聞。則閭閻受惠速而得實濟。即以禁奸暴而安善良。其勝委員數倍矣。朕恐民隱不能上聞。省方問俗。尚不憚數動屬車。督撫等顧可深居簡出。憚跋涉之勞耶。○

又諭閩浙總督喀爾吉善等。摺奏福建汀州府屬之寧化。清流。二縣地方。本年五月十二等日。大雨水發。衝激入城。深至丈餘。房舍俱多坍塌。人口亦有淹斃等語。該處積雨之後。山溪盛漲。漂及鄉城。民間棲止口糧。一時不免蕩析。非尋常偶被偏災者可比。朕心深為軫念。著該督撫等。將現在一切應行撫恤事宜。即速董率有司。不必拘泥賑卹常例。一面悉心辦理。一面具摺奏聞。俾災黎均霑實惠。

至所奏邵屬之建寧。汀屬之歸化。尚有應行確勘之處。著喀爾吉善等。一併速查妥辦。毋得稍有稽延。該部速行。○又諭據雲貴總督碩色等奏。本年五月初一日。雲南鶴慶屬之劍川州地震。城垣房屋。及人口牲畜。傾倒損傷者甚多。其同時被災者。鶴慶。浪穹。次之。鄧川。麗江。較輕。大理。賓川。微動無礙等語。滇南地處極邊。此番被災甚重。朕心深為憫惻。急應實力撫綏。著該督撫等。將被災各該處。所

有應行賑濟給價。及一切撫恤事宜。毋拘常例。即行董率有司。一面加意辦理。一面奏聞。務令災黎得所。以副軫念。該部速行。○又諭新柱所奏。稽查洋船出入。請頒諭旨。通飭沿海汛防。遵例查驗等語。從來辦理政務。惟在實力奉行。不在徒煩誡諭。洋船出入。關係海防。向來立法稽查。定例綦密。地方文武各官。果能悉心遵奉。何至有頂充偷渡之事。該將軍所引陳怡老等各案。正因該督撫平日狃

於因循懈弛。不能整頓之所致。其弊專在有令而不行。初非由於訓飭之不先也。倘伊等痼習不悛。而惟欲朕屢頒諭旨。朕即不厭諄詳。亦徒自覺其詞費耳。於事何益。可傳諭沿海各督撫。伊等既有海防之任。急廢職守。責有攸歸。嗣後有仍前不遵定例。實力稽查者。經朕察出。定行從重治罪。慎之。○諭軍機大臣等。開泰奏稱。威寧州屬媽姑鉛廠。楚民羅奇熊。因抗斷被廠員責處十板。回棚殞命。羅

姓房族。擁入官房。拴毆廠官一摺。羅奇熊越界造爐。本屬多事。抗官違斷。尤為強橫。即使因杖致斃。羅姓房族。亦不應藉命居奇。乃敢拴辱廠員。逼寫甘結。種種不法。唐。劉有如等。又復乘機逞兇。刃風斷不可長。且薄責十板。何至傷生。此中情節。正當深究。乃該撫止稱驗明杖傷本輕。委係如法決罰。而羅奇熊之如何身死。或係服毒。或係自盡。並未究明。殊屬含糊疎漏。著傳諭該撫。令其徹底嚴審。務得實情。詳悉具奏。○又諭據楊錫紱奏。請將沅州府知府黃岳牧。調補衡州府知府一摺。黃岳牧。前因不勝臬司之任。降用知府。此時或謂其因降等補用。自知竭蹶奮勉。悛改舊習。或謂其於方面大員。誠不勝任。而在知府中。尚屬庸中佼佼。是乃情理所有。若謂其廉明勤幹。才守兼優。則黃岳牧。朕所深知。其才幹頗短。人亦甚俗。何能當此過譽。楊錫紱之品題鑒賞如此。亦多見其闇昧無識矣。將

此傳諭楊錫紱。并諭阿里衮。令其留心試看。
○戊子。

上詣暢春園。問

皇太后安。○諭曰。碩色等奏到辦理宮爾勸一案。甚屬舛繆。前此傳諭。令其嚴行查辦者。因該督等奏宮爾勸。先於出署之日。暗行寄頓。夫藩臬大員。而懷狡詐。鬼域伎倆。則其侵欺屬實矣。是以有即加刑訊。亦不足惜之諭。並非謂無論實與不實。即當夾訊也。宮爾勸如果。在廠多收銅觔。婪索肥己。則有廠內歲入。可以徹底清查。而其囊篋亦必甚豐。如不過沿襲陋規。及家人私收加秤。則所漁利甚微。與郭振儀案等耳。今據供只收歸公養廉。路耗銅觔。俱已報解充公。而其任所原籍貲產。僅止此數。已大概可知。何用加之夾訊乎。且奏內稱嚴加刑訊。又稱刑訊再三。茹刑不承。徒辦成刻酷之形。意謂奉旨刑訊。無論虛實。不敢不加之三木。究之外省辦事。祇應虛名。

雖滿紙張皇。焉知非以套夾塞責。轉使無知之輩。謂將布政使用刑嚴訊。乃因追查家產。滋傳聞竊議之端。碩色等如此辦理。甚屬不知輕重。著嚴行申飭。此案宮爾勸究屬有無。入己。著再秉公詳晰分別。另行定擬具奏。○命永貴實授浙江巡撫。○己丑。諭曰。奉宸苑卿。向係總管內務府大臣兼管。但有河工等務。關係緊要。如有專管之人。於事更為有益。郎中四格著放為奉宸苑卿。專辦奉宸苑事務。倭赫不必兼理。其總管內務府大臣事務。著和親王兼管。○庚寅。旌表逼嫁捐軀之湖北江陵縣民曾映彩妻陳氏。○辛卯。諭。今歲恭逢
聖母皇太后六旬萬壽。
慈福霑被。海宇同之。敬稽
皇祖聖祖仁皇帝萬壽。特開鄉會恩科。廣作人雅化。蓋國家遇大慶。則必有殊常之恩。朕思以紹顓俊之鴻規。溥承

歡之渥澤。於壬申年舉行。

萬壽恩科。三月鄉試。八月會試。俾茲多士。共樂觀光。以昭盛典。該部即遵諭行。○又諭侍衛。乃武官之標準。騎射尤關緊要。去年因侍衛步射不堪。曾經降旨議處。誠飭。而今日引見之侍衛。步箭仍屬不堪。每發不赴的。多有貼地而去者。是誠何理。所有步箭不堪之哈祿等十四人。著交領侍衛內大臣。嚴加議處具奏。至領侍衛內大臣。教習侍衛。是其專責。乃平日並不善為演習。教導步箭。以致如此。殊屬怠忽。領侍衛內大臣等。俱著交部察議具奏。奇通阿。豐安。更有何事。並不用心演習。教導。尤屬錯繆。奇通阿。豐安。著嚴查議奏。○壬辰。

上詣暢春園。問

皇太后安。○諭保舉經學之陳祖范。吳鼎。梁錫璵。顧棟高。既據大學士九卿等。公同覆覈。衆論僉同。其平日研窮經義。必見之著述。朕將

親覽之。以覘實學。在京者。即交送內閣進呈。其人著該部帶領引見。在籍者。行文該督撫就取之。朕觀其著述。另降諭旨。或願赴部引見。或年老不能來京者。聽其著述不必另行繕錄。致需時日。啟勦襲粹辨。贗鼎混珠之弊。○諭軍機大臣等。王廷諍辦理王奠洲舊案。前經新柱。潘思榘等查到之日。面加詰詢。王廷諍以那蘇圖印批為據。隨交該撫再行密查。今據奏稱。此件會稟。乃嚴文謨欲誣王奠洲為首罪之捏稟。出於嚴文謨一人之手。王廷諍誤信嚴文謨為能員。復迴護汀漳道任內批詞。於離任時。抽去臬司衙門印稟。以作並非枉斷憑據。不知那蘇圖調任兩廣。八月十三日。交周學健署理督篆。此批係九月十六日。用印批發。交印接印。檔案可憑。豈得以周學健任內批稟。作為那蘇圖任內批發。冀却從前固執枉斷之咎等語。觀此則王廷諍始終迴護。抑且取巧矣。此案久經完結。王奠

洲又已病故。王廷諍業經處分。朕復加恩錄用。更不問前案之直曲。但使迴護取巧之習。不知悔改。在道員任內。仍復如此居心。則不但不能受恩。必且終致獲咎。著準泰傳諭王廷諍知之。○癸巳諭。今歲雨暘時若。入夏以來。田禾暢茂。西成可望。有秋近據直隸總督方觀承奏報。河間縣之西里門。及程各莊等處。有飛蝗自東而來。雖稱地方員弁。合力搜捕。已應時撲滅。但所在州縣。不可不豫為防範。杜絕。蓋蝗蝻最為田禾之害。當其始生。本不難於撲滅。捕蝗之令。亦再四申明。但農家恐其踐踏苗稼。往往各懷觀望。以致滋生繁衍。勢不可遏。雖愚民慮不及遠。護惜己之田禾。而不慮貽害他人。然先受向隅之苦。亦人情所必有。朕思計其所損苗稼。官為賞給以償之。且向有以米易蝗之法。若仿而行之。凡因捕蝗踐傷田禾。所在有司。查明所損之數。酌量分晰給與價值。則農民無所顧惜。盡力

搜捕。較之蝗災已成。始行撲滅者。難易殊矣。該部即速行知各督撫。令其通飭所屬州縣。實力奉行。永除災害。以永

天庥。○諭軍機大臣等。據直隸總督方觀承摺奏。本月十九日。河間縣之西里門。及程各莊等處。有飛蝗一片。自東而來。當經該地方官會同營汛員弁。合力搜捕。已應時撲滅。淨盡等語。直隸河間。天津。皆與山東接壤。蝗蝻所起。或由隣境萌生。或致蔓延隣境。均未可定。著傳諭準泰。令其即速詳查。與直隸毗連各州縣。及濱海之區。如有蝗蝻發生。嚴飭該地方官。立時撲滅。務期淨盡。仍令據實奏聞。不得稍有掩飾。尋奏。東省各境。上年冬雪。十分深透。今歲入夏以來。又值大雨連沛。蝗蝻實無萌發之機。凡屬毗連直隸之處。逐細搜查。並無蝗蝻萌動。報聞。○工部議准。調任陝甘總督行川陝事尹繼善。疏稱重慶鎮標守備帶兵分駐大菴。外委分駐木板凳。及豐和場。

通判移駐大溪口。應建衙署兵房。從之。○甲午。諭曰。管理嚮導處大臣班第奏稱。圍場西南兩邊。設立行圍馬甲之卡座。東北兩邊。設立扎薩克蒙古之卡座。與伊等水草之地相近。倘於各處巡查。不無瞻徇掣肘。請將喀喇沁。翁牛特。克什克騰。六哨。互相移易等語。朕思令蒙古等各離水草。另設卡座。則伊等不能照管牲畜。於生計無益。著加恩停其移易。仍令在原卡居住。并著圍場總管喀喇沁。翁牛特。克什克騰。之扎薩克。於住卡之蒙古等。將朕體恤之意。曉諭伊等。各將所住之卡。嚴行防守。察拏偷竊之人。如果奮勉。奏明鼓勵。倘仍有瞻徇等弊。不惟將伊等從重治罪。必照班第所奏辦理。○又諭。山東蘭山。郯城。一帶。上年被災頗重。今歲朕經臨時留心體察。地方情形。即不及他處。後經該撫奏報。麥收分數。亦稍遜於隣郡。雖從前屢加賑卹。而民力初蘇之際。即將緩徵之項。照例催輸。小民

未免竭蹶。著加恩將上年蘭山。郯城。二縣被災案內。緩至今年徵收之新舊錢糧米穀。及蠲剩各款。概緩於明春麥熟後起徵。以紓民力。該部即遵諭行。○又諭。京師玉泉。靈源。濬發。為德水之樞紐。畿甸衆流環匯。皆從此潑注。朕歷品名泉。實為天下第一。其澤流潤廣。惠濟者博而遠矣。泉上有龍神祠。已命所司鳩工崇飾。宜列之祀典。其品式一視黑龍潭。該部具儀以聞。尋議。春秋祭品禮儀。均與黑龍潭龍神祠同。從之。○乙未。上詣暢春園。問皇太后安。○是月。兩江總督黃廷桂奏。兩江近日以來。得雨栽插。米價漸減。惟是人稠地窄。食指不貲。全資客販。稍稽便需平糶。且上江鳳潁一帶。下江淮徐各屬。動遭漫淹。節年賑濟。倉貯大概不充。從前湖北湖南。曾經撥協倉穀。河南亦曾協濟雜糧。可否令楚豫二省督撫。酌量於湖南湖北。動撥穀石。分發兩江

存貯其河南則不拘粟麥動撥由河路分發淮徐等處得旨覽此或係因災豈有無事而資隣省之理此奏恐非誠將以博去後之思乎卿不宜出此○江蘇巡撫王師議覆御史陸秩條奏清釐積欠一摺查江蘇積欠錢糧弊竇多端清釐匪易如該御史所奏每圖設立一人持單催令糧戶自封投櫃今江南有名無實率皆圖書串通算房代納代投拖延挪移等語查包攬侵蝕未必盡係圖書而圖書為一圖之總作弊尤易揆厥由來俱不能力行自封投櫃之法應如所奏嚴飭地方官明白曉諭令糧戶自封投櫃毋得私相授受違者照例治罪又奏稱江南州縣徵比錢糧止論銀數不問姓名統計某圖共該若干若至八分九分圖書便可塞責至某戶有欠無欠官實不知欲除此弊必須按時將各圖花戶內摘內銷等語查江省徵比錢糧誠有此弊庸懦牧令止顧一時考成如地丁漕項等

款某項限急即先徵解或徵至多半計其處分甚輕即謂不妨寬至下年如此遞欠徒責之圖書何益至於內摘內銷實為切要應如所奏嚴飭各屬實力奉行違者以情徵叅治又奏稱管徵幕賓串通算房多少有無之中高下其手等語查徵比幕賓舞弊得賄雖未必盡人皆然亦所不免應如所奏自督撫以及州縣時時防察毋得疎懈得旨如所議行○又奏報麥收雨水情形得旨覽此時望雨孔迫矣目下得雨否民情若何速據實奏聞○江南河道總督高斌奏報黃運湖河伏前水長各工平穩情形得旨慎敬以防此時且不可為滿足之言也○又奏覆五月十八日前往徐屬勘工經過之清桃宿邳睢靈銅蕭碭等州縣目覩麥收四五六七八分數不等內七八分豐收者固少而四五分歉收者亦少計淮北一帶收成實有六七分均不致成災得旨覽奏稍慰然據朕所見桃源一帶景

象若祇獲六七分麥收則不足以蘇民困也。另有旨諭該督。○鎮海將軍薩爾哈岱奏。京口八旗額設馬兵二千名。除向例應拴馬匹外。又每兵五名。公拴馬一匹。并無官朋馬價。與餵養草料。南方卑濕。牧放無所。一交夏令。暑氣薰蒸。馬多倒斃。臣愚以為每兵應拴之馬。餵養尚難。若再扣其額設馬乾。以餵公馬。匪獨無益。更恐額馬反致疲瘦。請照杭州。江寧之例。將公拴馬四百匹。一體停止餵養。每馬令存銀十兩。作五十個月扣足四千兩。收存公庫。遇有用馬之時。將銀買補。得旨。著照所請行。○安徽巡撫張師戴奏。報各屬雨水情形。得旨。此時不可為滿足之言。而且所報亦畧遲。為督撫者。民瘼之外。更無別事。以後勿存諱飾之心。常切飢溺之懷。則善矣。勉之。○江西巡撫舒輅奏。據峽江縣具稟。該縣示期開糶。五月十五日。有劉賢士等。倡議平糶碾米。須用市斗。向管倉人告求。經監生袁太

衛勸阻。該犯等以袁太衛不恤人艱。即向其家分搶稻穀衣飾等物。經縣拏獲。又臨川縣具稟。五月十六日。有李近能。饒玉英。及隨同之王紹俚等十餘人。向監生余飛龍家持物當穀。余飛龍答以無穀可當。即各進室量穀。二三桶不等而散。又上頓渡地方。於五月十九日演戲。匪類洪褒俚。見有載糯船泊河干。輒稱米穀出境。倡言攔阻。隨率同萬佑俚等七八人上船。各搶米數斗而逸。其餘強買不合。輒行搶去各案。按律止於杖徒。然偶因糧貴藉端。此風斷不容長。內峽江縣一案較重。臣即提省親訊。當各重責枷號。並將律例詳悉開導曉諭。現俱寧帖畏服。得旨。甚好。執法辦理。以靖刁風。○閩浙總督喀爾吉善等奏。臺郡生番。與平埔漢民。不相浹洽。是以漢奸不敢入山。而向例於秋深水涸。嚴守要隘。以防焚殺。茲臺灣鎮道李有用。金溶。因北路屢有生番戕殺之案。遂於通事內。擇其熟識生

番社目之人令招撫各社土目到郡示以兵威加以厚賞。雖為寧謐邊界起見。然應於巡察之時料理。何必將番目多人引至郡治。將來漸與漢民熟。番聯絡大有不妥。再通事林秀俊張達京二人充北路通事數十年。田園房屋到處散佈。素與社番勾結。今復假以事權。更非寧邊良法。臣等隨一面示知鎮道。嗣後不宜如此冒昧。一面密訪林秀俊等勾結民番。盤剝致富實蹟。并此次聯絡生番土目有無假權愚弄之處。俟有確據。再當妥辦。得旨。覽奏俱悉。○河南河北鎮總兵楊凱奏報河南武陽二縣被水情形。得旨。覽奏俱悉。鄂容安辦理合宜否。民情若何。實奏莫飾。○山西巡撫阿思哈奏報各屬被雹被水情形。得旨。知道了。一切撫恤實力督察。令災民均受實惠。○陝甘總督行川陝事尹繼善奏報回陝日期。得旨。此一代理尚屬奮勉盡職。可嘉也。今又命卿為兩江總督。但此處係向來得

名之地。亦即失實之地。應如何奮勉。卿其自籌。餘俟面諭。○雲南布政使彭家屏奏覆臣調任雲南。留心查看滇省財賦之重。專歸銅鹽。而弊端之甚。亦全在銅鹽。數十年來。上司屬員連為一氣。政體官方半壞於此。所有歷年間款。臣現在徹底綜覈。分別銷追。呈督撫確覈具題。其餘一切。俟料理有緒。再行奏聞。得旨。一切酌中為之。作弊固不可。苛察亦不必。

大清高宗法天隆運至誠先覺體元立極敷文奮武孝慈神聖純皇帝實錄卷之三百九十一

大清高宗法天隆運至誠先覺體元立極敷文奮武孝慈神聖純皇帝實錄卷之三百九十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣重誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未六月丙申朔兵部議准河

軍機處奏

二

平定奏

三

南巡撫兼提督銜鄂容安奏稱嵯岬山平頭
垵等處西界南陽南通楚省而楊家店尤為
要區請於汝寧營撥馬兵二名守兵九名確
山遂平二汛各撥馬兵一名守兵二名合之
楊家店現有守兵三名已足二十名之數以
原設之外委千總帶馬兵二名守兵八名駐
劉楊家店其十名分駐嵯岬平頭二處從之
○丁酉旌表守正捐軀之河南襄城縣民郭
學古妻賈氏戊戌

上詣暢春園問

皇太后安○還宮○諭軍機大臣等據永貴奏

稱浙省五月下旬以來杭嘉湖等府正當栽

插晚禾之期雖經得雨猶未沾足遍及待澤

頗殷如數日內大沛甘霖尚可不致失時如

得雨過遲有誤栽種等語南方水田全賴雨

澤霑足以便及時栽種現在如已得有透雨

可速奏以慰朕懷如此時尚未得雨則晚禾

不能插蒔難望秋成閭閻生計必多拮据該

平定奏

三

撫身任封疆即當豫為籌畫以資接濟如有
應行辦理之處并即一面辦理一面奏聞可
即傳諭永貴知之○以健銳營翼領霍山為
右衛副都統○調山東兗州鎮總兵官王朝
輔為廣東潮州鎮總兵官○已亥諭曰張之
浚自簡任山西按察使於任內應奏之事未
有建白今甫具奏摺乃以所作治平綱目二
十四疏一冊進呈無非剿襲習見之陳言不
知為治之要惟在體以實心措之實政其研

求義理。莫備於聖賢之明訓。儒先之格言。苟不能見之躬行。雖日取六經性理之書而莊誦之。時時布之詔令。宣示臣民。其於實政何裨。況區區膚淺支離之贅說乎。此在詞苑諫垣。專以論思獻納為職者。敷陳已見。或可效觸目警心之一得。尚不許撫拾浮辭。至內而尚書侍郎。外而督撫藩臬。則政理各有專司。民生吏治。職有應為者。盡心力而為之。猶恐不給。苟徒以剽竊空言相尚。其貽誤官守。尚可問乎。千秋金鑑錄。歷代名臣奏疏等書。鈔之不可勝鈔。蹈成說而錯舉之。其即可謂之名臣乎。且伊身為臬司。所司者刑名也。粗舉其在憲言憲。而首以刑措為題。夫唐虞之書言刑者非一。所重在明允耳。措豈易言。至謂官吏遲延胥役擾累。訟師煽誘。此入仕者所共知。更何待言。而究其祛弊之道。了無實際。至請將人倫之理。欽定五章。令僧道刊之為經。喇嘛譯之為教。欲以通曉番苗。則舛謬更

出情理之外矣。他如謂樂律有關風俗。欲使士子鼓瑟吹笙。典樂教胄之法。不傳久矣。舍禮義之教。而冀感動以聲音。其可得乎。又謂御即馬射。今之書生。能馬射者幾人。亦何必使能馬射。其餘悖繆荒誕之語。不可勝舉。臬司統轄通省刑名。有整綱率屬之責。張之浚識見如此。何以勝任。念其尚非大過。著仍以道員用。其書著擲還。山西按察使員缺。著唐綏祖補授。該部知道。○又諭王荃奏京城內

理。母令填壅淤塞。○大學士等議覆京口將軍薩爾哈岱奏稱京口駐防兵米向於丹徒等縣漕米內充撥本色。雍正二年改給折色。每石銀一兩二錢。經前任江蘇巡撫雅爾哈善以連年米貴。奏請仍給本色。但部文自十六年冬季為始。於徒陽二邑漕糧各半截給。本年入夏米價尤昂。請即於秋季在徒陽二邑常平倉貯。各半給領。冬季漕米截扣歸補等語。查常平積貯攸關。若分撥倉米一萬六千六百餘石。倘有所需。恐不敷用。應將京口秋季兵米分撥一半本色。一半仍給折色。所動常平倉米仍於漕米截留之際照數歸補。從之。○庚子。

上御太和殿視朝。文武陞轉各官謝恩。○詣暢春園。問。

皇太后安。○幸圓明園。○工部議准大學士管江南河道總督高斌疏稱范公隄坐落海濱向由孔涵河運料到工。水程二百餘里。近河

道淤塞。七閘料物改由泰州遠越過壩。計程四百五六十里。盤運多費。造冊題報。委員趨辦。從之。○湖廣總督暫管湖北巡撫阿里衮疏稱武昌左衛民墾額內中則屯地八畝。三分於丙子年起科。從之。○辛丑。諭軍機大臣等。據方觀承奏稱。目前運河水長平槽。三岔河一帶並有海潮倒漾。大清河東注之勢不能迅暢。以致鳳河下口亦有屯阻等語。今年雨水調勻。各處河流順軌。三岔河一帶何以海潮尚有倒漾。是必海口為淤沙壅滯。不能深通暢流之所致。此處於河道大有關係。亟宜留心經理。蓋北河遷迤入海。挾沙而行。一路隨行隨積。與南河海口情形本自不同。況如去年秋冬之間沿河地方尚有未經涸出地畝。夫水過白露。何致尚未歸槽。可見下游入海之路不無淤墊。應行及時籌辦。著傳諭方觀承令其親身前往。悉心相度。有應行酌量辦理之處。即速詳查具奏。尋奏由海河至

大沽營水深勢湧無淤淺處惟自大沽至海口十里海近而水轉淺因詢沿海老民漁戶熟諳之汎弁僉稱海口外有橫沙一道極為堅硬謂之攔港沙潮生則驟高數丈潮落則沙上水餘數尺洋船乘潮始能出入平時出口之水自津達海地勢愈下原無大碍惟當夏秋之交橫沙內外海水滿盈不免阻遏白露後始能照常故向有白露前海不收水之說海港非內河可比出入憑潮無法疏濬實

屬人力難施因詳查沿海港口情形而知南北運減河之分塗歸海籌辦本有成法北運減河二道一在務關廳屬之王家務由七里海入薊運海河一在楊村廳屬之筐兒港入塌河淀南運減河二道一在滄州捷地汎入母豬港一在青縣興濟鎮亦入母豬港並以歧口海港為歸宿當日開濬之意既以除運河隄岸之險更欲其分流散沙使兩運入三岔口之水稍減庶大清子牙諸水得以寬然

東注於三岔口即去路稍緩而來水不加多三岔口已可容納鳳河諸下口亦不虞阻遏近年北運之王家務減河壩門不常過水筐兒港減河兩隄因上年水大漫溢殘缺臣於本年三月請旨動項興修南運之捷地興濟二減河障水易於淤淺隄岸亦多殘缺故捷地閘只令二洞過水興濟閘只令三洞過水向係如此辦理擬於運河水退之後將四處減河通勘應修應濬俾水可多洩於三岔口

衆流匯處似有釜底抽薪之益即夏秋水滿潮盈而上游勢分可期安流無患得旨汪由敦今年留京俟秋月令其前往同勘○壬寅諭軍機大臣等據黃廷桂摺奏江省需米浩繁請令楚豫二省酌量動撥穀石分發上下兩江以備緩急等語從來鄰省撥運協濟或因地方現需賑糶待用方殷不得不通融籌辦豈有本省無事概請借資鄰省之理朕已明切批示該督所奏實出無因自無庸動撥

或地方實在情形果否有另應先事綢繆之處著將原摺抄寄高斌閱看令其悉心詳查具奏尋奏臣查各屬平糶米價漸次平減早禾將登新糧亦將販到楚豫穀毋庸動撥至全省雨暘固有不齊謹就目下情形江蘇常鎮各屬雖則雨少大概近水圍田禾苗俱長發即山田微旱為數不多惟溧水宜興等數邑田多高阜缺雨種遲難期全稔邳州睢寧等處反因秋雨過多窪地不無淹浸其餘揚通淮海各屬雨澤勻調至雨水過多者惟宿州靈璧等數處缺雨小旱者惟休寧歙縣等數處其外無傷旱潦之田禾再經一月風雨調和俱可豐稔即旱潦微傷之州縣縱成偏災不為太重倘有必須賑恤常平本色不敷照例給銀代穀民以為便毋庸先事綢繆得旨覽奏俱悉○工部議覆直隸總督方觀承奏稱永定河工以北埧四十八里為下口保障坍塌甚多亟宜培修其改移下口案內應

辦各工尚有未報之處如米窖壩東隄身開寬五十丈作為河口應行攔築土埧南北各汛應建汛署四處堡房四十三間長安城等處草壩應於壩下背溜處改挑倒勾引河各汛河灘內節年衝刷水漲不免分溜刷隄汛過又復水渟為患應將河形寬處多築土隔窄處全行填築五工放淤舊溝三處須加寬厚南岸舊下東口隄為新下口外障汕刷太甚亟宜修補完整以上各工所需銀兩均請於節省項下動用至餘存銀一千一百二十餘兩除永清縣民願遷之秉教材所用地畝於舊河身內撥補外其武東二縣願遷之李家鋪董家鋪地畝按數給價共銀九百餘兩亦在此項內撥給餘入道庫存貯等語應如所奏從之○癸卯冊封

額嬪

慶嬪命協辦大學士尚書梁詩正為正使禮部侍郎嵩壽為副使持節冊封貴人巴林氏

為

穎嬪冊文曰朕惟協贊椒塗允賴柔嘉之質承流瑤殿宜昭寵錫之榮式昇龍章用光令典爾貴人巴林氏早侍中闈克襄內則矢恪勤而奉職圖史靡愆勵淑慎以持躬珩璜表度茲仰承

皇太后慈諭以金冊晉封爾為穎嬪爾其祇膺象服彌彰婉順之儀丕荷鴻施益懋溫恭之範欽哉命協辦大學士尚書阿克敦為正使內閣學士吳達善為副使持節冊封貴人陸氏為

慶嬪冊文曰朕惟璇闈翊化令儀丕著於珩璜象服分榮茂典式光於綸綍宜加位號用錫瑤章爾貴人陸氏恭慎無違恪勤有素侍深宮而匪懈夙嫻詩禮之規承壺掖以流徽克佐蘋蘩之職茲仰承

皇太后慈諭以金冊晉封爾為慶嬪爾其敬承顯命賁翟弟以增輝懋著謙沖迓鴻禧而勿

替欽哉諭軍機大臣等據定邊左副將軍成衮扎布等奏稱和託輝特貝勒青滾雜卜等九旗所屬欠準噶爾回子茶葉一萬三百餘塊將回衆所欠該旗人等牲畜相抵據回子云並無應抵之例堅執不允我朝人等與準噶爾回子交易甚屬不妥朕本欲究明重加治罪復思閱年已久人數較多是以加恩免究向使額駙在時朕必將伊治罪今成衮扎布接任未久即行查出於伊無涉但究屬非是即如因此交易私事若令出派侍衛台吉等按款查數甚屬冗雜而且有關政體若不辦理明係欠債無可推賴此次只可如此辦理倘後若不嚴行禁止豈惟不合體統亦被準噶爾人等輕視設復彼此爭鬪於邊境大有關係著寄信與軍營將軍大臣等曉示衆扎薩克令各將屬下之人嚴行約束凡毗連準噶爾地方人等不准交易并諭準噶爾頭目亦令將伊地方之人妥協管理俟準噶

爾使臣來時。朕亦諭此次如此辦理之故。嗣後該處仍有與準噶爾交易者。必從重治罪。其軍營將軍大臣等。亦必嚴加處分。斷不輕宥。○定邊左副將軍親王成袞扎布奏。和託輝特貝勒青滾雜卜。公額林沁等。所屬烏梁海。居卡內外者。原未禁其出入。是以近日有賒欠回人賬目等事。敗露如再不定例。日久恐有夾帶蒙古出界。往返貿易。賊盜潛生等弊。臣等公同酌議。每年遣往烏梁海徵差者。青滾雜卜旗人三十名。駝不得過五十。額林沁旗人十名。駝不得過三十。每人騎馬二匹。遣往時。將人數呈報烏里雅蘇台叅贊大臣。給與出卡文票。再遣人辦理詞訟盜賊等事。亦豫報請文。至卡內外居住之烏梁海。彼此往來。但稟卡上侍衛台吉。若忽給文憑。恐妄生猜疑。請照前准其出入。其在卡外之烏梁海等。前來謁見扎薩克。所帶牲畜等物。俱著卡上侍衛查報叅贊大臣。准其進卡。至歸時。

扎薩克賞伊等貨物。亦將數目移咨卡上侍衛查放。不許將人口帶出。至額魯特貝勒朋蘇克。公丹拜。所屬烏梁海。亦係青滾雜卜。額林沁之屬下。仍照前例。准其進卡謁見帶物。俱交卡上侍衛查報。得旨。軍機大臣議奏。尋議。應如所請。從之。○甲辰。上御勤政殿聽政。○大學士等議。覆雲南巡撫愛必達疏稱。滇省東尋兩路。共有逾折銅二十餘萬。現在勒限清交。請嗣後沿途逾折銅。每百觔以八兩為率。准照廠價六兩繳買。令本員運瀘岸收。如過此數。每百觔令繳銀九兩二錢。折給腳費等語。伏思定例。陸運每百觔。止准折耗八兩。此外稍加。即虧正額。若折至八兩。所虧正額實多。查解部京銅。定價每百觔九兩二錢。從前既有逾折銅。即應照依定價。按年追賠。何得積至二十餘萬。尚未追繳。且請遽更成例。殊屬未協。應令嗣後如有逾折銅。無論八兩內外。均以每百觔九兩二

錢之價賠繳無庸扣給脚費并將前欠亦照此例勒限報部從之○甘肅巡撫鄂昌題洮州土司楊冲霄原襲騎都尉已歷三世呈請繳銷勅書另換指揮僉事新勅下部知之○以協辦大學士阿克敦工部尚書孫嘉淦教習庶吉士○以原任太僕寺卿熊學鵬為光祿寺卿○乙巳

上詣暢春園問

皇太后安○諭曰吳鼎梁錫璵所著經學各書

著派翰林二十員中書二十員在武英殿各繕寫一部進呈原書給還本人所有紙札飯食皆給之於官著梁詩正劉統勳董理其事

○以綏遠城右翼副都統書常右衛副都統六格對調○丙午諭前經降旨今歲恭遇

聖母皇太后萬壽於壬申年特開恩科其直省鄉試因恐二月天寒是以照會試例於三月舉行但思三月鄉試必至四月初旬揭曉雲貴川廣等省去會試之期稍為匆迫外省鄉

試俱著於二月舉行京城二月天氣尚寒順天鄉試仍以三月○又諭曰巡撫馬雄鎮道陳奇太知府楊知祥同知高舉等雖先未經賞給世職但伊等為國盡忠全家遇難情節甚屬可憫俱著賞給伊等七品世職襲替○又諭吳鼎梁錫璵俱以國子監司業用葉酉現出學差遇有中允贊善缺出補授張九鑑不必署理司業其員缺即著吳鼎補授梁錫璵亦著授為司業一體食俸辦事不為定員

○丁未諭曰雲貴總督碩色奏報緬甸遣使入貢朕思緬甸越在荒裔自前明嘉靖後職貢不通我朝定鼎之初即能擒送朱由榔傾心効順茲復專遣陪貳齋表闕廷向化奉琛具昭忱悃向來蘇祿南掌等國入貢筵宴賞賚俱照各國王貢使之禮所有緬甸貢使到京一應接待事宜亦應照各國王貢使之例以示綏遠○諭軍機大臣等王師回秦松江府各屬得雨情形殊未明晰據稱自四月初

一等日得雨。入土數分。至二寸五分不等。等語。南省水鄉。於待雨之時。得雨僅及分寸。不得謂之調勻。王師如此陳奏。尚存粉飾之見。不知地方水旱。所關最鉅。而天時豐歉不齊。亦年歲所常有。惟在人事補救有方。此則地方有司專責耳。必能辦理妥協。黎庶得所。方克副如傷保赤之誠心。豈奏報輕減。遂足仰慰耶。江蘇財賦重地。近日雨澤若何。田畝光景若何。民情若何。深切履念。著據實詳悉。即速具奏。毋得稍有迴護粉飾。尋奏。現在江蘇松常各府州屬內。溧水宜興等縣。具報雨少。上元江寧高淳等縣。亦續報雨少。其餘各屬。自閏五月下旬以來。俱得透雨。禾苗秀發。至淮徐海三府州縣。自閏五月下旬以來。或暴雨時降。伏水漫灘。清河邳州銅山沛縣等處。低田積水。秋禾間浸。所有被水及缺雨之各州縣。臣現在飛飭查明。無力農民。酌借籽本。并確勘。如果成災。照例妥辦。得旨。覽奏俱悉。

○又諭軍機大臣等。據永貴奏浙西杭嘉湖三府小暑後仍未得雨。且燥烈亢旱。金衢嚴等八府得雨終未十分霑足。現在確查實在情形。議籌災賑事宜等語。永貴具摺。在閏五月二十三日。未知此後曾否得雨。可能霑足。如果得透雨。速行據實馳奏。所有賑恤事宜。著會同該督喀爾吉善。先事熟籌。悉心妥辦。以慰羣黎。皇皇待澤之情。如有查勘成災之處。即一面奏聞。一面實力撫綏。毋致失所。地方水旱不齊。全賴人事補救。此封疆大吏第一要務。上年溫台等處收成已屬歉薄。今附近各府雨澤尚未霑足。尤宜董率屬員。加意料理。不得稍存粉飾之見。將此詳悉傳諭永貴。并令喀爾吉善知之。○戊申。諭曰。策楞奏稱此番赴藏官兵人等。沿途所買口糧草料。雇用騎馱烏拉。俱自番地應付。所過地方踴躍從事。毫無遲誤等語。番眾等急公効順。甚屬可嘉。所有明正司裏塘巴塘三處。本年應

納夷賦著加恩優免一半。乍了察木多類烏齊三處呼圖克圖著各賞給緞八疋以示獎勵。○諭軍機大臣等近聞江西米價甚昂其最貴之處有每石需價三四兩者前據該撫於閏五月十七及本月初八等日摺奏因上年贛州吉安臨江等府晚禾稍歉米石不能運省出售湖廣上江米船到省亦少是以省城糧價稍昂但亦止稱二兩二三錢與所聞殊不相符此或係道路傳聞之過當抑係該撫前摺奏報稍減不無存粉飾之見著傳諭舒輅令其即速查明據實具奏至碾米平糶外作何設法籌辦以裕民食處該撫悉心酌議並近日雨暘若何民情若何詳查據實速行奏聞尋奏江西省城四月分糧價每倉石銀一兩六七錢至五月中旬長至二兩二三錢隨照常例開倉出糶復碾米設廠平糶旋減至二兩及一兩九錢不等餘各屬總在二兩之內惟廣信府屬之弋陽貴溪等縣至二

兩五六亦不出三兩之外至於四兩實係道路傳聞現在省城穀價因早禾登場已減至一兩五錢一石其各屬亦經漸減得旨覽奏俱悉○工部議准直隸總督方觀承疏稱喀喇河屯通判所屬灤河渡口設橋船十六隻渡船二隻已經十載船隻殘壞請照急工之例興修從之○賑雲南劍川等處地震災民○已酉改鑄永順縣王村巡檢司靖州縣里耶巡檢司會同縣洪江巡檢司靖州兼理猺務州判各印記從湖南巡撫楊錫綬請也○旌表守正捐軀之陝西定邊縣民李之民妻韓氏○庚戌上詣暢春園問皇太后安

大清高宗法天隆運至誠先覺體元立極敷文
奮武孝慈神聖純皇帝實錄卷之三百九十二

實錄卷三百九十二

三

大清高宗法天隆運至誠先覺體元立極敷文
奮武孝慈神聖純皇帝實錄卷之三百九十三

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未六月辛亥諭據浙江巡撫

平定人三十二

永貴奏稱浙省現資糶賑請於湖廣兩省中

撥穀碾米協濟若係額外溢穀即補浙省未

足之額若係額穀則將浙省現存糶價解還

楚省歸款等語著照永貴所請令楚省督撫

等酌量撥穀碾米二十萬石即著浙江委員

前至漢口接運赴浙以備糶賑之用該部遵

諭速行○壬子大學士等議准河南巡撫鄂

容安奏覆豫省地方粟豆兼產以賤價之豆

抵貴價之米樂於輸將改徵一二萬石民情

并無未便。應請自本年為始。於應徵粟米內。改徵黑豆二萬石。除永城等十九州縣相離水次。寫遠向係折徵。毋庸改派外。所有祥符等三十一州縣。均勻攤派。將額徵粟米照數除抵。仍通行曉示。不得以粟貴豆賤。多少滋弊。得旨。如所議行。又議。准山東巡撫準泰奏。覆東省閘內原改徵黑豆。後停泰安萊蕪等二十一州縣。就產豆多寡。區別定數。曉諭完漕五升以上之花戶。米豆兼輸。共改徵黑豆二萬石。以乾隆十六年為始。於閘內民情稱便。得旨。如所議行。賑江蘇靖江東鄉斜橋鎮等處。本年電災飢民。賑廣東英德長寧連平信宜等四州縣被水災民。癸丑諭山西澤州府屬之鳳臺高平二縣。五月中山水驟發。漂損田莊。該撫阿思哈。現經照例撫卹。水退業多補種。但秋成之期尚遠。被水窮黎。未免拮据。著加恩於常例撫卹一月外。再給一月口糧。以資接濟。該撫即督率該地方

官實力經理。務令窮民均霑實惠。該部即遵諭速行。甲寅諭朕此次木蘭行圍。著履親王。和親王。大學士。來保。史貽直。在京總理事務。其月選之文員內。通判。州縣等官。武員內。八旗護軍校。驍騎校。及外省送到之補放水手。官驍騎校等官。弁。并年滿千總。俱著王大。學士。照從前之例。驗看。可傳諭該部知之。又諭朕此次行圍。所有外省督撫。提鎮等奏摺。著照舊例。自起鑒之日為始。俱齎赴在京總理事務王大臣處。加封交內閣。隨本呈送。行在。候朕批示。隨本發回。仍於總理處。交付齎摺人。祇領。該部即通行傳諭知之。諭軍機大臣等。朕聞杭州兵丁。因角口細故。與民人。鬪毆。報復。搶奪。鋪戶。竟至罷市。雖經該撫。永貴。奏明。旗民挾嫌打架。數案。現在嚴飭究治。但此等毆搶。鬪鬧之案。於地方大有關係。且杭城省會重地。有將軍巡撫彈壓。何至兵民互毆。如果有罷市情形。則兵民中必有棍

徒為之渠魁。理應嚴加懲創。著傳諭永貴。令其據實查奏。實力整頓。不得稍存徇袒旗人之見。致失秉公辦理之道。又聞衢州府屬之常山縣。米價稍昂。富民囤積未糴。道員鄭基公言將來必致搶奪。奸民一聞此言。遂先搶奪一家。該道轉以為不出所料等語。前據永貴查奏。惟溫台處三府所屬。有因米價稍昂。以致搶奪數案。而衢屬常山。未經奏及。由此觀之。可見該省民風。不能安靜守法。一遇米貴。輒生事端。而地方監司大員。亦並不知彈壓禁戢之方矣。現已降旨楚省。撥米赴浙。自可陸續接濟。著傳諭永貴。務董率屬員。一切平糶事宜。實心經理。曉諭窮黎。毋得借端滋釁。如有恃眾不法。即行嚴查究懲。不可因循姑息。以長刁風。○大學士等議覆兩廣總督陳大受奏稱。海陽大埔羅定東安鎮平五州縣。鐵爐十座。應徵餉銀三百一十三兩。嗣因先後停歇。地方官設法撥抵。乾隆六年以後。

長寧龍門等州縣。續開爐座。除抵舊額。每年剩銀一二百兩不等。留司庫公用。請將現增之爐餉。按年報部。其無著餉銀。准予豁免等語。查粵東鐵爐餉銀。俱係按年完納。報部覈銷。今該督所奏。是向來撥抵無著。殊非實徵實報。應如所請。長寧等州縣。新增爐餉銀七百三十六兩。自乾隆十五年為始。按年造報。其停歇者。宜豁。但查戶部奏銷冊內。止載有潮州羅定東安嘉應一府二州一縣。又清遠增城從化龍門花縣翁源乳源曲江英德長寧永安歸善東安興寧十四州縣。每年各有應徵爐餉。其海陽大埔鎮平。並未開載。應令該督詳查。分晰另行咨部。准其豁除。從之。○免江蘇沛縣乾隆十五年分水沉民田額賦。○乙卯。上幸靜宜園。駐蹕翼日如之。旌表守正捐軀之廣東徐聞縣民李之木妹李氏。○丙辰。上幸寶珠洞。賞雲梯兵飯。免浙江永嘉樂清。

瑞安平陽臨海等五縣并玉環廳温州衛乾隆十五年額賦有差丁巳

上詣暢春園問

皇太后安○迴圓明園○諭福建汀州府屬之清流寧化二縣夏間溪河異漲漂及鄉城前據該督撫奏報曾降旨加意撫卹又令將應徵新舊錢糧暫停徵收其被災各戶分別極貧次貧酌量賑濟今思該二邑被災甚重此時去秋成尚遠若僅照常例賑卹不足以資接濟著再加恩將寧化清流二縣查明極貧人戶加賑三個月次貧加賑兩個月該督撫嚴飭屬員實力查辦務令災黎均霑實惠該部遵諭速行○大學士等議覆雲貴總督碩色等奏稱茂隆課長吳尚賢開獲旺廠為衆所服但非安分之人難任久居徼外當即選人更替而貧富皆處兩難令其自舉據稱夥伴唐啟虞等可助其子吳世榮管理復據稟緬使入貢不諳禮法情愿自備資斧伴同往

還臣等因夷性難馴吳尚賢情愿伴送既資照料兼可查試其子是以允其所請并令唐啟虞等幫同吳世榮辦理廠務倘能服衆即使接管或難勝任即於唐啟虞數人內選一人接管惟是吳尚賢回滇後既不可令赴廠亦難拘管伊係捐納通判俟其出京請旨發滇省以最簡之缺試用彼廁身仕籍不能潛往交通且行止有乖即加叅處并其子亦可著落提究再茂隆廠現在工丁聚至二三萬人似應酌籌漸次解散之法廠徒皆係內地民人稍有所獲亦常陸續回家臣等密飭各該處文武加謹稽查口隘許入不許出將來可以漸少等語查吳尚賢無藉細民交通夷衆斷不可令為課長若其子接辦是廠務竟成世業至唐啟虞等素受吳尚賢指使若令接管仍不免通同遙制查各省礦廠皆董於官應令該督於府佐貳內揀諳練之員前往總理并酌期更換課長之名竟裁或仍令唐

啟虞等幫助或另行委派臨時斟酌所請吳世榮唐啟虞更替之處應毋庸議至通判分倅一郡吳尚賢粗野無知豈能勝任若云視其行止有乖即嚴加叅處尤非政體應令該督撫於緬使回滇委員另送諭令吳尚賢居住省城安分守法倘或顯違約束即拘禁請旨辦理再所稱茂隆廠出入隘口密飭嚴查許入不許出以為漸次解散之法應如所請辦理得旨依議速行○兵部議准陝西巡撫陳宏謀奏稱督撫兩標馬廠向無定額是以兵民侵占互爭臣等遴委員弁按照各營馬數多寡廠地高下立界其未經承糧及開墾之地督標丈出三百七十九頃零撫標丈出二十五頃零按其科租共銀二千六百九十五兩請照八旗馬廠奏明事例畫一辦理從之 戊午遣官祭

火神廟 已未

上詣暢春園問

皇太后安○還宮○吏部議覆給事中朱若東條奏一新設府縣并所轄地方從前會典未載赴任官員領憑只按省分其距省遠近往往逾限致干叅處請將新設地方立定期限應如所奏行文直省將新設之各府州離京遠近之處詳查到日再議○八九品以下等官例由吏員銓選現選至康熙四十四年考取之人計其充役至今當已八九十歲各省不聞驗看駁查非督撫優容即必有頂冒請行文各省詳查如選者實係本身年壯方准給憑赴任未經銓選者調取來京覈具是否相符曾否衰邁假冒者治罪衰邁者給以頂帶臣等酌定嗣後考職人員應令該督撫接到部文詳加驗看如年力衰邁者給以頂帶註冊年力強壯堪以供職者造具實在履歷送部查覈一直隸州一缺非賢能不能稱職定例於各部主事及府屬知州內揀選保題雖近日多有補授知府然係特恩未敢援

以為例請將直隸州知州品級與府屬知州稍示優異應如所奏嗣後直隸州知州與同知一體較俸陞用知府不必與府屬知州較俸仍陞同知至品級仍可照舊一河工官員無論陞調先經委署果能稱職另請實授每有經吏部給咨引見回任後因工程緊要將該員調署他缺往返需時本任轉誤請嗣後已經調署平穩者即題明實授毋庸重複引見應如所奏由現任調署者一年後果能勝任即具題實授倘不勝任調回另委從之

兵部議准鎮海將軍薩爾哈岱疏稱江寧杭州二處駐防各設左右兩司請領關防具見成效惟京口未經設立應辦事件參差不一請照江寧杭州之例添設左右二司凡八旗營伍事宜皆令承辦并鑄給關防從之 庚申

上御太和殿受緬甸國使臣朝賀 幸圓明園戶部議覆御史歐陽正煥條奏漕運事宜

一糧船抵通向有定限惟是催漕弁丁借端巧索有時任其淹留亦有時不容暫泊迨浪急船傷催趲者無罪請飭總漕嚴加察訪如催趲不善以致折損立予重懲等語應如所奏嗣後漕船入汛總漕轉飭官弁不得意為緩急藉端需索倘有陽奉陰違立即叅究一領運千總於幫丁最為親切果得廉明之員必能遴選約束今各幫千總半屬衰庸宜加甄別等語應如所請令漕督飭行各屬於繁簡衛千總內嚴加甄別如有年邁不堪供職者即行查叅一旗丁運米到通例由倉場生派圓明園沙子營及新城薊易等處較京通各倉稍遠守候需時撥運抽幫奸胥射利請嗣後輪幫挨派應如所奏自後派運米石毋得任意先後并每年豫行報部查覈從之

辛酉諭曰江西巡撫舒輅奏請分晰江西省賑卹事宜一摺內稱江西省夏月溪澗水發為患例係有貸無賑乾隆七年以前地方官隨

時籌辦或動閒款。或自捐資。通報查覈。今則無論夏秋一遇水發。地方官即攜銀前往撫卹。在小民以為例當如是。望恩幸澤。無有饜時所費實多無益。亦於風俗有關。現擬分晰辦理等語。舒輅此奏。非是他方偶遇旱潦。雖屬偏災。而所關於民瘼者甚重。竭力補救。尚恐小民或有向隅。督撫身任封疆。正當隨時體察先事綢繆。豈得因愚民望澤無饜。豫存裁抑之見。況今當國家全盛之時。中外乂安。兵革不試。經朕輪免天下田賦一周。而大農歲積甚充。即間有興作。悉給自內府。並不動支正供。實可云庫有餘帑。倉有餘粟。何必以一方偶需賑卹。總總計較。且朕宵旰勤求。惻瘼在已。時切於懷。亦何忍以嗷嗷待哺之窮黎。撙節錙銖升斗之米。即慮時有冒濫。亦祇應嚴飭地方有司。辦理妥協。俾實惠及民。毋令中飽滋弊而已。至奸徒因事造端。逞強肆橫。自應盡法懲創。以儆刁風。督撫之盡心盡

職。正在於此。若云多費錢穀。則所損於國儲者無幾。而災黎之所全實多。豈得謂之無益。為督撫者苟如此居心。必致貧民失所。殊非朕委任司牧之意。舒輅著嚴行申飭。並將此通行各督撫知之。○又諭。據新任廣東按察使丁廷讓奏稱。伊母年逾七十。兩弟皆已病故。侍養無人。前於福建鹽道任內。曾詳明該督撫。該督因赴浙迎駕。擬俟回任奏聞。適奉新旨等語。其情殊屬可憫。丁廷讓著改補江西按察使。所遺廣東按察使員缺。即著徐以升補授。○諭軍機大臣等。上下江及江西米價較舊稍昂。該督撫等現在籌辦平糶。俱請於楚省溢額穀內撥給。近據楚督阿里衮奏請通融酌撥。但楚省雖有溢額穀石。未足應隣封三省之需。且本地亦資平糶。朕思接濟民食。莫善於截漕一法。況目今天儲充羨。歲積陳紅。正可因時酌盈補缺。著傳諭署督高斌巡撫王師張師戴舒輅通盤籌酌。應用穀

石數目若干速行奏聞於本年應徵漕米項內降旨截留存貯以資平糶。又諭溫福所奏雨水禾麥地方情形摺內有出郊賞農之語甚屬不合。國家以農事為重，勞農勸相，原地方官應行之事，從未有稱賞農者。若云賞賚之賞，則係伊自行獎賞，見之奏章，既屬非體。若云賞玩之賞，則以百姓之沾體塗足，僅供伊之游目騁懷，更為不知輕重矣。溫福不諳文義，全未檢點著軍機大臣傳旨申飭。

又諭據巡撫定長奏報廣西沿邊栽插筋竹一案，經護理左江鎮范榮太平府知府平治前後稟報，交夷拔去竹根，移簽內地田界，現在嚴飭查辦等語。朕已明切批示，以撫馭外夷務在寬嚴得中，相安無事，固不可示弱外夷，亦不可造端滋事。令該撫妥協籌辦，此事始自舒輅謂可謹飭邊防，遂一面奏聞，一面辦理，定長接任查明現辦情形，守邊員弁因有此報，或沿邊兵民乘機越占夷地，以致夷

衆不服，或伊等畏難苟安，不願栽竹，謾過夷衆，希圖中止，均未可定，而其不能相安無事，已可概見。安邊乃封疆要務，定長初任於此，事尚恐獨力難勝，若不於此時籌畫盡善，將來貽累地方，殊多未便。在舒輅當日原可不必辦理，至外夷不遵功令，則不可置之不問矣。該督陳大受莅粵兩載，未至西省，目下東省諸務就緒，或可乘暇親赴粵西，閱視邊隘，會同該撫從長面商，自可得久遠寧謐之道。如果未便前往之處，亦即據實奏聞，將此案實力籌辦，不事姑息，亦不涉張皇，處置合宜。綏輯邊圉，并現在情形，一一確查詳悉具奏。尋陳大受奏交夷素稱恭順，舒輅議種筋竹原為防閑偷越，起見雖非急圖，但已舉行，夷人輒敢拔去，并拆燬舊柵，簽標內地田畝，體制攸關，不便姑息。為今之計，種竹不宜中止，而界址不可不清。臣現在會商撫臣定長，擬俟司道等確勘到日，一面將照界種竹緣由

明白知會夷官。并飭令沿邊漢土州縣。照依原議。除高山峭壁不能栽種外。其餘照界栽種。不得絲毫侵越夷界。亦不可尺寸退讓。其憑祥州混種之土民。按律責懲。辦理不善之員。并分別叅處。仍照會安南國王。令即查出拔竹燬柵簽標之人。嚴行懲究。再此事原係內地土民。混插起釁。而夷人簽拔之後。并不敢滋事。則其心已知畏。臣若按臨其地。恐無知轉生疑慮。或歸怨土民。私相爭鬭。便涉重大臣原經奏明。今冬巡閱東省營伍。來歲赴西省閱兵。應俟彼時親臨各隘卡。巡查閱視。得旨所辦甚妥。禮部議覆國子監奏稱。壬申年三月舉行鄉試。為期已近。即行曉諭。未及周知。請如乾隆十二年鄉試。投有文結。戶十五年新捐之生。未起原籍文結者。均准取其同鄉印結收錄。送試等語。查乾隆十五年新捐之生。已越二年。雖邊遠省分。不難往取。惟十六年新捐之生。回籍取文。往返難及。宜

量為通融。不得為例。從之。○工部議准大學士管理江南河道總督高斌等疏稱。淮城地處低窪。逼近運河。雖有土隄防護。難堪異漲。本年二月奉旨改建石工。以資保障。茲委員確估。自漂母祠迤北至北角樓。應建石工長四百五十丈。俟秋汛後興修。次年伏汛前一律完固。從之。○免安慶壽州鳳臺宿州鳳陽臨淮懷遠定遠虹縣靈璧阜陽潁上霍邱亳州蒙城泗州盱眙五河滁州全椒和州含山太和鳳陽長淮滁州等二十五州縣衛。乾隆十五年水災額賦。並緩應徵漕項銀米。○壬戌諭乾隆十三年調赴川省之貴州餘丁三百三十二名。支領安家口糧銀米。該部照例不准報銷。朕念此項雖屬餘丁。但已至軍前。曾經効力。所有應追之安家銀兩口糧米石。俱加恩免其追繳。又諭據永貴摺奏杭嘉湖三府屬縣均得大雨霑濡。可冀有秋。惟浙東八府自前月下旬至今。尚未得透雨。浙東

各屬商販罕通民間日食急需接濟江南福建三省與溫台寧處四府接壤懇令彼此通商暫弛海禁等語前因該省溫台等屬需米平糶即令撥運閩穀數萬石並於江省稍近州縣常平倉穀碾米運往接濟續又以浙省現資平糶諭令楚省酌撥穀石碾米協濟以備賑糶之用今浙東府屬雨澤愆期該撫豫籌民食請弛海禁著照所請江閩二省運米商販赴浙屬之溫台寧處四府暫開海禁仍令該撫飭屬給予印票沿途實力稽查嚴禁奸商等借端偷買透漏其浙省各關口並著加恩免徵米稅以示招徠務俾商販流通米糧充裕該部遵諭速行 癸亥工部議准調任兩江總督黃廷桂疏稱桃源縣陸家壩隄工濱臨洪澤大湖自乾隆十一年以後汎水漲發日漸衝刷急需修築并於迎湖深窪頂衝之處估鑲防風以資捍禦從之 四川中羊崗郎塞土目竹壩笑故以其孫仲住襲職

甲子

上詣暢春園問

皇太后安 調福建水師提督林君陞為廣東提督以臺灣鎮總兵李有用為福建水師提督調金門鎮總兵陳謝勇為臺灣鎮總兵 準噶爾部人布圖遜布林特古斯來降命賞給安插如例 是月江南河道總督高斌奏報伏汛已過黃運湖河各工平穩情形得旨覽奏欣慰聞今年水頗大此際正宜加謹防護也 江南壽春鎮總兵王進泰奏報查閱營伍情形得旨覽奏俱悉如此實心奮勉方不負任使殊屬可嘉也 安徽巡撫張師載奏報各屬雨水情形并到工日期得旨欣慰覽之可謂實心任事甚可嘉也 江西布政使王興吾奏江西去年收成原不十分豐稔本年五月以後米價漸增詳准撥運豐城等七縣之穀合省城南新二縣倉穀碾米平糶

每日以五百石為度。目下早穀登場。價漸平減。人情安帖。得旨。此事所奏頗遲。看汝謹慎。自守則有餘。而察吏安民諸務。則未見奮勉也。慎之。○浙江巡撫永貴奏。本年閏五月內。有金華府刁民方自新等。於初五日。閹閹公堂挾制罷市一案。據該道府督同該縣陸續拏獲人犯二十餘名。內有生員四人。已據解到嚴審。又太平縣鄉民請糴閹閹一案。亦訪獲滋事刁徒吳阿宗十餘人。據府稟訊。係該

續錄卷三九三

二十

縣役明知故縱。屬實不日亦可解至省。又前月二十五日。風聞處州府遂昌縣亦有刁民閹閹塞署罷市之事。隨委員前往查拏。據稟緝獲葉和生等二十四名。內亦有生員二名。監生一名。究出起意聚眾之武生毛嚴一併拏獲。解省未到。又金華府湯溪縣衢州府江山縣皆有閹閹米廠之事。獲有刁民劉三元及武生鄭一元等十數名以上各案。雖情罪輕重不同。但開倉出糴。原為寧謐地方。如果

道府牧令實力奉行。何致劣衿奸棍。屢屢滋事。此等玩法刁徒。必應嚴懲。而辦理不善之地方官。亦未便以恐長民刁。稍存姑息。現在人犯將次解到。臣當督同兩司審明定擬。并將畏縮無能之文武各員。一并查叅。得旨。是應嚴處。以警刁風。○浙江定海鎮總兵陳鳴夏奏。報出汛并所屬被災各情形。得旨。覽。既成旱災。則安靜地方為要。一切汝宜勉之。○閩浙總督喀爾吉善等奏。浦城江山二縣為

續錄卷三九三

三

閩浙連界要地。江邑棚民常年口食。取給附近各村。本月初間。據楓嶺浦城二處文武稟報。漁梁九牧通衢村落。日有江邑棚民向富戶勒買米穀。兼索酒食。挑運而去。臣等查衢郡米貴已甚。江山縣地當孔道。往來商賈需食殷繁。以致各山場棚民無米可買。遠赴浦邑紛紛購糴。衢郡雖撥有省米一萬石。僅可在城市分廠接濟。廿八都一帶離縣寫遠。并無水路可通。若不設法調劑。恐異籍窮民因

而滋事。查浦城縣倉貯穀七萬餘石。現飭撥出一萬石。碾米平糶。以資各處棚民。并過往商賈人等需用。其糶出價銀。除運費并廠用外。餘解回浦邑。於秋後買補還倉。報聞。○又奏。閩省環山濱海。地窄人稠。本地所產米穀。每不敷民間日食。浙省所議通商採買二事。均屬難行。第溫台一帶。積歉之後。又值旱災。即弛禁招商。一時難望接濟。惟有一面於臺郡各廳縣備貯項下。陸續撥運。一面先於厦

實錄卷一百三十五

三十三

門廳倉。并隣近之興化。莆田。各倉。先撥四萬石。由厦門雇募商船。委員押赴溫台。其所撥臺穀。俟收買後。即就近歸還厦門。并興化莆田各倉。得旨。如所議行。○又奏。本年五月間。省城錢價。庫平銀每兩僅易錢八百一二十文。較常時短至三四十文。將節年積存局錢二萬二千餘串。內酌撥數千串。平價出易。照折中價值。每庫平一兩。換給局錢八百五十文。發給錢鋪。每兩准扣辛工錢十文。以八百

四十文出易。易銀歸入司庫錢本項。報聞。○河南巡撫鄂容安奏。丹沁永溢之地。河內武陟二邑。所坍房屋。各至一二千間。豫省從前之例。極貧每戶給銀一兩。次貧五錢。不論瓦房草屋間數。概以戶計。未免有名無實。且撫卹貧民。尤非查造戶口。定期散給者。比若憑鄉地呈報。不無混淆滋弊。是以臣帶同文武親勘。查所坍何項房間。不分極貧次貧。草房給銀五錢。瓦房一兩。至借給口糧籽種。俱按

實錄卷一百三十五

三十三

地畝戶口多寡定數。得旨。所奏辦理賑卹事宜。實足慰朕勉之。○山東巡撫準泰奏。報秋禾雨水情形。得旨。覽奏。被水之處頗多。而汝又視若無事。恐汝有諱飾之事也。○陝西巡撫陳宏謀奏。報各屬被水被雹情形。得旨。覽詳查妥辦。使霑實惠。○安西提督李繩武奏。駐防哈密兵。每年冬間。卡座減撤。屯田事竣。俱歸城堡操練。其技藝純熟兵。向於糧員收貯銀牌內。領取五錢至一錢重銀牌一千五

百面分別獎賞今前項銀牌賞竣可否仍照例領取旨照例賞給

實錄卷三百九十二

二十四

大清高宗法天隆運至誠先覺體元立極敷文奮武孝慈神聖純皇帝實錄卷之三百九十三

大清高宗法天隆運至誠先覺體元立極敷文奮武孝慈神聖純皇帝實錄卷之三百九十四

蘇德麟官經通講官太子太傅文淵閣大學士文淵閣閣學領侍衛內大臣稽察欽奉 上諭等處管理

吏部理藩院事務黃旗滿洲副都統世長騎都尉軍功加七級隨帶加一級尋常加一級軍功紀錄次臣慶廷

總督官經通講官太子太傅文華殿大學士文淵閣閣學領侍衛內大臣稽察欽奉 上諭等處管理刑部戶部庫事務

世襲騎都尉軍功加十九級隨帶加二級入加二級尋常加二級軍功紀錄五次

尋常紀錄四次臣德麟經通講官太子少保工部尚書紀錄六次臣曹振鏞等奉

敕修

乾隆十六年辛未秋七月乙丑朔享

實錄卷三百九十四

太廟遣誠親王允祕恭代行禮○禮部奏

祈穀壇扁額舊書

大饗殿字門名亦同謹按大饗之名禮經皆指

季秋報祀而言與孟春祈穀有異請別定尊

名以昭盛典得旨改

大饗殿為

祈年殿門為

祈年門 福建水師提督張天駿以年老解任

丙寅

上御勤政殿聽政。諭浙東溫處等郡米價昂貴。降旨加意撫綏。已據該督撫等前後奏准撥運鄰省倉穀陸續平糶。并招徠商販特免商稅。俾米石流通。民食充裕。但思窮黎待哺孔殷。外來商米雖已雲集。而山村僻壤市販未必盡敷。本地有穀之家。或能以任卹為心。共出所餘。照官價一體平糶。更足以助官糶之所不及。雖零星積聚。豈能如官倉足給衆人之求。然隨鄉分糶。於民食亦殊有濟。在富民推其贏羨。嘉惠桑梓。孰無此心。惟是刁悍乘機。或短予價值。或冒領告貸。甚或倡衆搶奪。種種不法。遂致富民聞風相戒。以為善不可為。茲特諭各該督撫。凡遇地方水旱米價騰涌。即應明切曉諭。以天時水旱不齊。偶值偏災。無不飛章入告。立即隨時籌畫。百姓惟當安分奉法。靜候施恩。若借端生事。轉罹罪愆。有負國家子惠德意。其能敦任卹而出糶平糶者。地方官為之主持。實力稽查。遇有強

橫滋事棍徒。速即嚴行懲處。務令奸匪斂跡。富民無所顧忌。源源出糶。則窮黎受惠多矣。所有平糶富民計其所糶之數。照樂善好施之例。優加議敘。以示獎勵。該部即遵諭行。○又諭曰。尚書孫嘉淦以所著詩經補註。間日進覽。於興觀羣怨之旨。頗有發明。朕亦時折其中。從此薈萃成編。足備葩經一解。孫嘉淦請開館纂修。朕以為無事更張。現在軍機大臣等逐日有進呈繙譯五經四書。其平定金川方畧。亦將次告竣。著就此館局。以傅恒來保。孫嘉淦。充正總裁官。舒赫德。納延泰。汪由敦。劉綸。充副總裁官。或需用纂修人員。令孫嘉淦舉素所知一二人。奏聞充補。則幾務之餘。可資佩文。而以次成書。亦可以詔來學。尋奏以贊善金甌。檢討陳兆崙充纂修官。○又諭朕此次行圍。在京吏部事務。著大學士來保兼管。戶部侍郎事務。著兵部侍郎汪由敦兼管。○丁卯。

上至靜安莊。

孝賢皇后梓宮前奠酒。○臨奠定安親王。○諭軍機大臣等據潘思渠奏報地方情形一摺。內稱前報被水之寧化。清流兩縣倉穀。值此異漲。無處攤曬。浸壞頗多。現在盤量等語。穀石雖經遭水。必無漂失。恐該縣平日原有霉爛及虧缺短少等弊。乘此水災。統歸之被水淹沒。無從詳悉查驗為辭。著傳諭該督撫令其加意稽察。委員實力盤量查驗。無得以浸壞頗多一語。託辭掩飾。現在各省。多因米價騰長。仰藉平糶。州縣倉儲所蓄。粒粒皆窮黎口中物。督撫宜時刻留心督察。先事綢繆。不可僅較簿籍之多寡。而不問斗石之虛實也。又奏稱福浙聯界之浦城。福鼎等縣。飭屬聽浙民赴買。碾米於交界處平糶。并安插就食男婦。俟收成資送回籍等語。辦理殊為合宜。惟飭所屬行之以實。則災黎受惠多矣。浙東憂旱孔亟。正在籌畫接濟。昨降旨勸富民出

穀平糶。閩中米貴之地。亦所當行。近日雨水若何得雨後。即速奏聞。尋奏現得雨霑足。田禾豐稔。寧化。清流倉穀。業委道府確盤。實係淹浸。兼有漂流。至勸富民出穀平糶。亦經飭屬聽民照時價發賣。毋依官倉減價。致殷戶未能踴躍。如有願照官倉減價者。并飭屬詳請嘉獎。其寧化。清流及續經被水之福安。壽寧等縣。業經遵旨加意賑卹。得旨覽奏稍慰。○戶部議覆甘肅布政使楊應琚奏稱哈密駐防官兵二千一百餘員名。歲需口糧麥五千餘石。該處倉儲止存一萬四千餘石。僅敷三年之用。前准督臣尹繼善請採買備用。所購無多。現柳溝沙州兩衛均有節年餘麥。請撥二萬五千石。以本年秋始。於每歲農隙時節次運交哈密。腳價照口外運糧之例。應如所請。准如數酌撥至腳價一項。從前口外運糧。係軍需急迫。現應酌減。飭督臣妥議具奏從之。○戊辰。

上詣暢春園問

皇太后安。○戶部議覆閩浙總督喀爾吉善浙江巡撫永貴奏稱浙省杭嘉湖三府收漕公費浩繁雍正六年原定每石收錢自八文至二十一文不等因州縣辦公不敷前請分別加耗二升三升以為修倉鋪墊人工飯食之用嗣部議以加耗過多且恐啟大升量收之弊不若照江蘇省每石加漕費錢四十八文至五十二文之例於原定錢數外量加今請

將前議仁和錢塘海寧富陽餘杭安吉歸安烏程長興德清武康等十一州縣每石加耗二升者改收錢二十文嘉興秀水嘉善海鹽平湖石門等六縣每石加耗三升者改收錢三十文桐鄉原定額錢二十一文者加收錢五十一文較江省尚屬有減無增官民亦得兩便應如所請令督撫飭屬示諭俾民間照數納錢不得額外浮收從之○己巳諭曰鑲黃旗蒙古都統叅奏公兼佐領蘇巴什禮擅

將伊佐領下十歲以上女子使用坐扣伊佐領下人錢糧又將六月應放錢糧全行坐扣等語蘇巴什禮補授公爵兼佐領并著在乾清門行走特因額駙策凌効力國家故施恩至此伊當奮勉圖報乃愚魯不堪素日既習於怠惰今又種種狂謬深負朕恩蘇巴什禮著革職派侍衛一員押送軍營交與將軍成衮扎布等嚴加管束不許出城伊之公爵係特恩賞賜本非世襲但朕思額駙策凌効力國家著將公爵佐領賞與伊弟吹濟多爾濟吹濟多爾濟現在年幼其佐領事務著侍郎玉保代辦俟伊長成管理再八旗似此賞給公主之佐領交與軍機大臣查明嗣後按例辦理原摺并發並著鈔寄成衮扎布知之○庚午諭此次升殿行禮時遇雨霑濕衣帽之大臣官員等著加恩各賞給本俸半年如有罰俸案件即准以此抵銷御前大臣侍衛乾清門侍衛亦著照此賞給○軍機大臣等議

奏臣等遵旨將民間禁用銅器一事與總督尹繼善悉心酌議竊思制錢日用所需欲錢法流通市價平減必先使銅無耗民間販銅有限用器無窮其出於私燬明甚今請銅器之現在民間者仍聽民用不必收買以致抑勒交官之弊惟此後毋許復造銅器舖及工匠等悉令改業已成器者定限變賣至未經成器及民間廢銅願繳者州縣設局就銅之高低定價之多寡隨到隨收第從前但禁黃銅奸匠將諸銅攪和染色制錢仍可銷燬且紅銅加以倭銅即成黃銅弊端未絕并請無論黃紅白銅概禁制器從之○又議覆大學士江南河道總督兼管兩江總督事務高斌奏外省米貴緣由請停躉買之令一摺據稱比年江西湖廣安徽產米之區米價較前加貴由官為採買數盈千萬以致市價驟昂轉病本地民食請將動項委員躉買一事長遠停止查發帑躉買誠不免市價漸增然必著

例停止恐緩急無以接濟應令督撫因時制宜如可稍緩不妨暫存庫項倘需米孔亟則擇米多價賤處委員照時價採買價長即停并禁牙儉借端居奇又稱常平倉定例每年存七糶三若遇偏災破例多糶或撥協鄰省鄰邑賑濟秋成後聽州縣分頭買補數少則易足地分則勢渙庶於大局市價無礙應如所請辦理又稱水旱賑卹可以照例折銀如須本折兼賑而常平倉穀不敷有漕省分仰懇量予截留倘該省災多熟少請照恩例折徵免輸本色留納官之米流通民間遠勝別籌查撫卹災黎自應確按情形辦理若路遠米少百姓得銀難購自當專賑本色如不過一隅則照例兼賑本折或專徵折色在百姓既可自行買食而留此倉儲可備別項接濟至截留折徵皆出格外殊恩如遇偏災援為定例積年計算通倉正額必虧有關國計甚鉅應無庸議從之○吏部議覆江西巡撫舒

輅奏稱。江西省佐雜四十缺。請以繁簡酌定。外補部選。如寧州吏目。玉山分駐楚盤要口。貴溪分駐江潯。餘千分駐瑞洪鎮等縣丞。南昌新建兩縣典史。寧州八疊嶺南昌三江。新昌大姑嶺清江縣清江鎮。上饒八房場玉山。太平橋廣豐洋口司。鉛山石佛寨浮梁姚村鎮。星子青山。渚溪二司都昌周溪司。興國衣錦司。定南下歷司等巡檢。以上二十缺。以要缺注冊。在外揀補。其寧州州同。分宜廣昌玉

山樂平寧都等縣典史。寧州排埠塘武寧高坪司。新昌黃岡洞萬載鐵山界蓮花廳黃陂司。吉水富田司。安福蘿塘司。廣昌白水鎮上饒鄭家坊。德興白沙司。萬年石頭街。德化大姑塘。城子鎮等巡檢。蓮花廳照磨。以上二十缺。以簡缺注冊。改歸部選。應如所請。從之。○以奉恩將軍弘昫。為鑲藍旗漢軍副都統。○命陝西固原提督豆斌。來京陛見。調甘肅提督齊大勇。為固原提督。江南京口將軍李繩

武。為甘肅提督。○予故鑲黃旗滿洲叅贊大臣副都統銜穆克登額祭葬如例。○豁免船廠所屬烏喇。伊爾捫等驛。及伊屯邊門。伊爾捫臺西爾哈臺等處。乾隆十五年。被水漂沒義倉穀二千一百石有奇。○辛未諭。今歲恭逢

聖母皇太后萬壽大慶。八旗及在京文武大臣官員內。所有官項。並罰俸應行坐扣者。俱著加恩展限一季。○定題留人員五年。予陞例。諭曰。江蘇巡撫王師奏稱。元和縣知縣王名標。籤陞貴州永寧州知州。該員操守謹飭。才具幹練。懇將王名標以陞銜暫留。元和縣任。遇有江省相當知州缺出。酌量題補等語。元和省會首邑。王名標人地相宜。以陞銜仍留原任。於理尚屬可行。但既留任。遇相當知州缺出。即行題補。又須離任。仍於該地方未有裨益。轉啟規避之端。朕思守令久於其任。可以勵官方而收實效。既准予陞銜。已合古增

秩進階之義。嗣後知縣籤陞。外省督撫奏留本任者。俟留任五年後。遇有相當之知州缺出題補。如首郡知府陞任道員。該督撫題留者。視此著為例。王名標即照此例行。○又諭前因浙江地方米價昂貴。現資接濟。已降旨令湖廣江西江南浙江各督撫通盤籌畫。今據王師奏。浙省來江借米。已就近於蘇松常太倉各府州內撥穀十萬石。碾米兌交浙省。撥缺之穀。前奉旨於浙省漕糧內截留補倉。可否即就江省截留補數等語。王師所據係五月內諭浙撫之旨。但江浙同屬有漕省分。自可各就本處截留補撥。何必又從浙省徵收。輾轉運交江省補數。如此拘泥辦理。實乃誤會朕旨矣。即其所撥倉穀。以截漕計之。僅數萬石。若一一降旨。無此政體。今既令江楚各該督撫會同商酌。著伊等彼此速行咨商辦理。俟奏到酌量降旨。漕糧所關綦重。亦不可因有此旨。截留過多。著一并傳諭知之。○

又諭前據巡撫定長奏報廣西沿邊栽插筍竹一案。朕已傳諭該督陳大受。令其乘暇親赴粵西閱視。會同該撫定長面商辦理。今陳大受亦經奏到。朕思向來磊石樹柵以資堵截。原有定界。此事本可無庸辦理。但既經舒輅奏明改種筍竹。若僅依舊界。亦無擾於交夷。何至夷人擅毀竹柵。此必沿邊兵民借種竹之名。乘機侵占。以致夷衆妄行。蓋馭夷之法。不可示弱。亦不可借事侵凌。俾滋事端。著再傳諭該督令其會同該撫務遵前旨。秉公查辦。不可存迴護內地兵民之見。轉不足以服夷衆之心。務使兵民勿越界侵占交夷。亦不至肆意妄為。永絕釁端。以安邊圉。○軍機大臣等奏前議覆雲貴總督碩色查明茂隆廠課長吳尚賢一摺。遵旨會同尹繼善再議。今據尹繼善議稱。設官則法在必行。法行或不盡便於夷境。不如仍選課長。但不得復用吳尚賢之羽翼。所奏自有所見。請飭該督碩

色該撫愛必達詳察情形具奏從之尋奏查茂隆廠遠在邊外自古不通聲教現葫蘆酋長雖稱臣納貢每年以廠課為貢款在廠徒衆有內地民人亦有本處夷類素未受制於官且該廠山場周六百餘里距內地十五站中隔南翁江既無官兵塘汛止委一二文員原難總理彈壓不如仍選課長董理為便前督臣張允隨所委課長雖止吳尚賢一人實則另有唐啟虞楊公亮王朝臣等各為課長

廠民信服今吳尚賢及其義子吳世榮已議徹退又不便遽易生手請於唐啟虞等三人中公舉誠實幹辦一人董理并飭永昌府密為查察報聞○戶部議覆山東巡撫準泰疏稱乾隆十三年

聖駕東巡經由御路御河里數前經題請蠲免錢糧奉旨著於藩庫照蠲免之數先行賞給即於十六年地丁額下照數扣除應如所奏令該撫將所蠲銀數示諭民間務俾咸霑實

惠從之○又議覆福建巡撫潘思榘疏報閩

省寧化縣泉上里蛟水陡發衝塌學宮衙署城垣道路淹浸田廬清流縣為寧化下游同時被災又歸化建寧被災畧同其無力窮民請照例撫卹查寧化清流業奉諭飭該督撫欽遵辦理其歸化建寧二縣災民應如所請賑卹口糧外酌借籽本補種晚禾如不能墾復者勘明題豁學宮衙署等項確查修理得旨依議速行○授和碩誠親王允祕女為郡

主壻敕漢多羅額駙德莫楚克之子彌扎特多爾濟為郡主額駙○授

禹陵奉祀裔孫姒恒甸八品世職○壬申

上以秋獮木蘭奉

皇太后自圓明園啟鑒○詣

皇太后行宮問安○諭軍機大臣等朕今日經過清河地方見道旁秋禾有前經被雹損傷至今殘莖零落田間並未另行補種者被雹尚在夏月正可乘時補種收麥雜糧即云貧

民無力。亦可照例借給籽種。何至遂成棄地。此必係地方官辦理不善。著傳諭蔣炳等。令其將被電田禾。不行補種緣由。及此等被電人戶。有無賑卹。現在曾否辦理之處。查明據實奏聞。並將此傳諭方觀承。令其查奏。尋方觀承奏。本年六月。太宛昌平。三州縣被電。當即飭地方官酌動倉穀。借給籽種。俾民補種。菽麥秋蔬。嗣據該州縣覆稱。有力之家。無藉補種雜糧。待白露後種麥。至實係貧戶。分別輕重。按畝借穀。無不踴躍補種。其高粱被損。未經犂種者。詢之農民。皆云。內有抽發新苗。可望秀實。又或佃種旗地。希圖蠲免。遂爾補種不力。但地方官於出借後。聽民自便。勸諭不力。查察不周。致未盡行補種。辦理不善。咎實難辭。再。應行賑卹之處。查本年夏麥豐收。并設廠平糶。糧價未昂。俟秋收後。確勘成災。與否分別辦理。得旨。究係汝等辦理不妥。另有旨諭。○是日。駐蹕南石槽行宮。癸酉。

上詣

皇太后行宮問安。○諭。朕此次巡幸木蘭。經過州縣地方。目覩秋禾茂盛。或或芄芄。雖經嚴飭隨從人等。不許踐踏。猶恐不無蹂躪。著加恩。將經過州縣。本年應徵地丁錢糧。蠲免十分之三。其有夏月被電。偶成偏災者。蠲免十分之五。該督方觀承。查明照例妥協辦理。該部即遵諭行。○是日。駐蹕密雲縣行宮。甲戌。

孝懿仁皇后忌辰。遣官祭

景陵。○

上詣

皇太后行宮問安。○是日。駐蹕要亭行宮。○乙亥。

上詣

皇太后行宮問安。○是日。駐蹕兩間房行宮。○

丙子

上詣

皇太后行宮問安。○諭軍機大臣等據楊錫紱摺奏湖南備貯穀三十萬石。部議無庸買補。但湖南產米之鄉。各省每資接濟如本省或有賑濟及額穀價昂。均可於此內動支撥給。請於各屬買補平糶額穀外。再行酌買備貯等語。該撫此奏亦先事籌畫之道。前因浙東天時亢旱。安徽米價亦昂。降旨令楚省酌量撥米十五萬石運至浙江。五萬石運至安徽。以資調劑。今湖南各屬雨澤多未霑足。將來自有需用之處。即浙省現在藉資楚米接濟之處。自應豫為籌辦。俾不至臨時拮据。朕已經降旨川督策楞豫備米數十萬石分運南北二省。復令流通商販。源源相接。亦恐該處接濟鄰省稍多。轉致有缺乏之虞也。但從前降旨停買溢額穀石。蓋因官買過多。市價不無騰涌。今該省既需採買。務宜於穀賤之地從容買補。不得一任屬員。但圖近便。或於價貴處所。按數躉買。使米價頓昂。轉失調劑之

道。著傳諭該撫令其酌量情形。妥協辦理。至所請令安省解還運往平糶價值之處。已傳諭張師載矣。一并諭令知之。○又諭曰。葉存仁奏到彙陳浙屬被旱情形一摺。已在該督撫等屢經奏報之後。且所奏酌籌民食事宜。亦不過督撫現辦之事。未見另有籌畫於民生亦復何裨。藩司職在承宣。於所屬被災尤當早籌補救。與督撫相助為理。乃克勝方面之任。葉存仁本非勇往任事之人。自擢用布政使以來。不過斤斤自守。今閱所奏於地方民事。並不能盡心奮勉。著傳諭申飭。使知痛自省改。毋蹈前轍。○軍機大臣等議奏前據原任湖廣總督永興奏稱。荊州水師營額設沙船十隻。戰船二十隻。巡船四隻。宜昌鎮標前後二營。乾隆九年裁存戰船四十隻。二處均船多兵少。停泊無用。請於荊州營撥出戰船五隻。宜昌鎮標二營各撥出戰船五隻。在荊州駐防滿兵內撥兵四百名。改習水操。嗣

議滿洲兵現習烏鎗騎射。若改習水師。未免用違其長。二處船既多。應交督臣阿里衮。確按情形量減。茲據該督奏稱。宜昌鎮標現存船四十隻。每船配兵二十四五名。並非船多兵少。未便再裁。荊州營戰船二十隻。巡船四隻。分防水汛。亦未空閒。至沙船一項。荊州係水陸交衝。八旗官兵駐劄重地。荊江濤浪。以巨艦為宜。緩急實資利用。亦未便輕裁。均應如所請存留。并令荊營叅將。於春秋二季。督率水師官兵。酌配陸營鎗礮。一體操演。報聞。

○是日駐蹕常山峪行宮。○丁丑。諭軍機大臣等。清河地方被雹田禾。未行補種者。經朕目覩情形。傳諭詢問該督。方觀承。今據查明覆奏。並稱地方官勸諭不力。查察不周。亦所不免。俟秋收後。將被災村莊。照例確勘等語。此等被雹處所。朕已降旨加恩蠲免錢糧十分之五。該督惟應遵照諭旨。妥協辦理。嗣後所屬地方。如遇此等偏災。事關民瘼。最為緊

要。該督即應嚴飭所屬。詳悉查明。實力辦理。俾乘時速即補種。無任地方有司草率朦混。俾貧民或致失所。再天津至武清一帶。往來大路。向來常有積水。旋即消涸。今聞該處百里之內。積水滉漾。無分隄岸。今年雨水。亦與常年相等。何至久未疏洩。或因運河漫口。抑係海河倒漾所致。於民田有無妨礙。其實在情形若何。現在如何辦理。一并傳諭方觀承。令其詳查據實具奏。尋奏清河被雹地方。奉旨蠲免錢糧十分之五。自當督率屬員。實力妥辦。至武清大路積水之處。查今年南運河挾漳衛之水。奔流浩瀾。在在平槽。自靜海獨流鎮。至天津楊柳青。此四十里西岸無隄。往年如遇淀漲。則令東洩入運。運漲則令西洩入淀。今南運河水大。俱於楊柳青入淀。仍由大清河歸西沽。一時宣洩不及。即從韓家樹小埧北。漫於北運河西岸之後。加以武清龐家莊西北滙水。俱積於運河隄後。是以高出

桃花口一帶疊道。而武清楊村驛大路皆有積水也。當即設法疏消。並勘被水村莊。成災與否。茲奉諭旨。復委員確勘積水遠近。及河淀近日水勢何如。其應行籌畫處。再行具奏得旨。詳悉繪圖面奏。○諭據駐藏都統銜班第等奏。稱將刦害商民高士玉之七羅特。汪結三犯。依律擬斬立決。俟命下之日。遵旨辦理等語。西藏地處極邊。往返遙遠。該犯刦害屬實。自應即時正法。候朕旨辦理。甚屬拘泥遲延。嗣後西藏地方。若有此等應行正法之案。不必候旨。汝等一面辦理。遇奏事之便。奏聞。其拏獲匪犯之人。亦應量予獎賞。將此傳諭班第等知之。○浙江巡撫永貴遵旨覆奏。杭嘉湖三府。閏五月內。望雨甚殷。今於前月下旬得雨。雖覺稍遲。尚無大礙。惟浙東八府。被旱頗重。臣於閏五月望前。即令開倉平糶。勸富招商。豫行各屬。儘動常平糶價。前赴外江採買。小暑尚不得雨。秧多生節。已有成災

之象。又於閏五月初。奏請借撥楚穀。并動帑三十餘萬。委員分赴江楚採買。迨交六月。尚未得透雨。早禾失收。中禾亦槁。實非偏災可比。先於浙西撥穀數萬。運往接濟。暫弛寧波海禁。奏令溫台寧處四府。與江閩二省通商。并委員赴蘇借米。赴閩告糶。近省各府。臣就近提調。其稍遠者。仍於浙西道府中。遴委委員。會同地方官。先賑一月。俟各屬報齊後。奏請加賑。此臣於浙東大暑前後。未得透雨。斟酌辦理之事也。目下已過立秋。嚴紹二府。現在數縣報雨。金衢等六府。雖報得雨。未稱需足。若再不能透足。則晚禾成災。秋收無望。臣自當親往查災。一面發賑。一面奏聞。得旨。覽奏俱悉。據喀爾吉善奏。稱來浙辦賑。汝等正可和衷相濟。鎮靜地方也。○是日。駐蹕喀喇河屯行宮。○戊寅。

上詣

皇太后行宮問安。○遣官祭黑龍潭。

昭靈沛澤龍王之神。諭曰。羅卜藏等查審土默特種地民人案內。有巡檢孫際澄立約賄求銀兩一款。雖係按律應追入官之項。但念微員完納維艱。且尚無派歛民財情事。著加恩免其追繳。○吏部議覆御史范廷楷奏稱。蝻子萌生。十八日生翼。又十八日然後能飛。方其初生。不難即時撲滅。但地方官慮搜捕未盡。有干吏議。並不詳請公費。止撥民夫坐致羣飛蔽野。乃稱來自鄰封。希圖卸責。不可不申嚴此弊。現河間縣西里門等處。飛蝗為害。該督奏稱地方員弁。合力搜捕。如果即時撲滅。應照例議敘。至云蝗自東來。則從前滋長何地。繁衍幾時。該管官何不速行撲滅。亦應查明題叅。應如所請。飭直督確實查奏。到日照例議敘處分。從之。○禮部刑部議奏陝西南鄭縣民李國柱。扎傷童養未婚妻蘭氏身死一案。查蘭氏因未婚本夫欲與苟合。守禮不從。被戕殞命。除李國柱按律擬絞。

外。請照例給銀建坊。以表貞烈。從之。○是日。駐蹕避暑山莊。翌日如之。○己卯中元節。遣官祭。

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭。

端慧皇太子園寢。○諭浙東各府。雨澤未徧。禾稼歉收。經該撫永貴彙疏題報者五十餘州縣。衛前已降旨。令該撫一切撫綏。無令失所。但該省今年被災較重。若但照夏月被災之例。賑給籽本。恐不足以資接濟。著加恩將各屬勘實成災之地。概照秋災定例。分別極貧次貧。就其成災分數。均予按月加賑口糧。

所有應徵各項銀米亦照定例分別蠲緩以紓民力該撫董率屬員悉心查勘一面辦理一面奏聞務使貧民得霑實惠○又諭據河東河道總督顧琮奏稱豫省北河陽武縣汛十三堡大隄因今年漫灘匯聚浸泡日久兼之六月二十七八等日大雨如注河水增長數尺隄身蟄裂遂於二十九日漫溢並請飭部嚴加議處以警疎忽等語河隄捍衛居民最關緊要現在衝刷處所著即督率屬員上

聖鑒事

等

緊堵閉其附近村莊廬舍有被水淹浸者著該撫鄂容安悉心查勘照例撫卹毋致失所至顧琮總理河務一應調度防範是其專責乃不能先事防維以致猝被漫溢疎忽之處咎實難辭著交部嚴加議處○又諭軍機大臣等永貴所奏籌補常平穀石一摺內稱浙省從前題准捐監之例原就豐歲常價核定今米價昂貴若仍照定例報捐終恐有名無實請就地方情形酌為核減外省俊秀亦准

赴浙報捐本省之人暫停赴部捐納折色有情願捐米者即照一米二穀之例收納等語浙省今年被災較重現在多方賑卹需米孔殷所有貯備接濟事宜該撫自不得不亟為籌畫前此借穀協濟採買截漕朕已屢經降旨令其悉心妥辦至開捐事例以其非可常行雖經明切傳諭但閱該撫摺奏欲請設法變通似待用孔亟意甚拮据該省此時實在情形若何是否必需通融辦理全在督撫等

聖鑒事

等

揆時度勢斟酌合宜期於民食有裨喀爾吉善現請馳赴浙省此時亦將次抵浙著傳諭該撫永貴將此會商該督無拘成見一切和衷共濟通盤籌算將該處情形實在應如何辦理之處詳悉奏聞請旨至永貴奏請免徵米豆稅銀前已明降諭旨該撫此時想已陸續奉到矣○又諭據鄂容安奏開歸陳等屬被水親往查勘及辦理情形一摺豫省今年被水之處較多該撫環歷郡邑周查戶口勤

加撫卹防杜弊端。朕閱其先後奏報俱甚明晰。但此摺內又稱高粱穎實。秋禾茂盛。可望豐收等語。該處既經被水。則收成不無減少。若云開歸等屬。雖經被水。而其餘各處仍可望豐收。其實被水之處。與豐稔之處孰多。合該省各屬而統計之。大概今歲秋成光景。比往年究竟若何。可傳諭鄂容安。令其詳悉確查。據實速行奏聞。不得稍有迴護粉飾之意。又朕聞丹沁二水異漲。於本年六月二十七日。

高宗實錄卷三九五

奏

日。武陟縣大虹橋地方。衝漫民隄百餘丈。該撫摺內所奏沁河復漲。委員勘辦。是否即係此處。該撫於查明覆奏時。亦著一并具奏。尋奏開歸各屬。有被水成災者。有被水未成災者。現俱分別辦理。合全省計之。豐稔者十之八九。被水者十之一二。雖收成較遜往年。然被水之地。高粱亦屬有收。早禾早豆並未全損。再臣前奏沁河水漲。係六月十六二十等日。河內武陟濟源三縣。雨後水溢而言。嗣是

二十七日。丹沁異漲。河內武陟又復被水。頗重。業將勘明成災情形具奏。得旨。覽奏欣慰。然其成災者。則已苦矣。善為撫卹之。○戶部議覆御史歐堪善奏。稱浙省偶遇偏災。米價昂貴。前奉旨准撫臣暫弛海禁之請。但聞通年來外洋米價較內地倍昂。沿海地方。時有商販偷運。關隘弁役得賄私放。江楚閩越米價之貴。未必不由乎此。今海禁一弛。倘防範不周。徒飽欲壑。於民食仍無裨益。請飭江閩文武大吏酌量地方出海情形。以杜偷漏。應如所請。令該督撫嚴飭守口員弁。於出口時驗明關照。如無夾帶等弊。加戳掛號放行。并知照浙撫。於入口時查驗印票相符。即令前往溫台等處發賣。如領票裝載遲久不到。及商船到口。並無米石。即按律治罪。并令各該督撫將給過印票及赴浙船隻米數。先行報部。一俟到浙日。浙撫亦將船米實數報部查核。倘守口員弁不能察出透漏等弊。以致出

高宗實錄卷三九五

奏

口印票船多。到浙船少。即將該地方文武大吏。一并題叅。並飭直隸。山東。江南。閩。廣等省。一體嚴查防範。至該御史奏稱。一路派員押運。派兵護送。但官兵各有責任。勢難兼顧。且恐不肖弁役。或從中滋擾。通同作弊。轉多未便。應毋庸議。得旨。依議速行。

大清高宗法天隆運至誠先覺體元立極敷文奮武孝慈神聖純皇帝實錄卷之三百九十四

大清高宗法天隆運至誠先覺體元立極敷文奮武孝慈神聖純皇帝實錄卷之三百九十五

監修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處掌理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領事稽察欽奉 上諭事件處掌理刑部戶部三庫事務

世襲副都統軍功加十九級隨帶加二級又加二級臣重誥內大臣戶部尚書錢謙益滿洲都統軍功紀錄五次

尋常紀錄十四次臣德琳經筵講官太子少保工部尚書紀鑑六次臣曹振鏞等奉

敕修

乾隆十六年辛未七月庚辰

實錄卷之三百九十五

上奉

皇太后自避暑山莊啟鑾幸木蘭。○詣

皇太后行宮問安。○諭軍機大臣等朕覽碩色

所奏屬員賢否摺內其所稱勝任而多加獎

許者多係旗員其所稱不稱職者多係漢人

伊身係滿洲未免先存成見非虛公察吏之

道朕用人行政鑒空衡平滿漢從無歧視蓋

人才原不擇地而生但當隨材器使俾人人

得盡其長苟意見稍涉偏私將何以服人心

而昭懲勸。碩色前在兩廣任內。專意信用旗員。竟為明福所愚。以致不能覺察。伊去任未幾。明福即以貪婪被劾。伊尚不知覺寤乎。督撫統轄羣僚。一應舉劾。關係綦重。著傳諭碩色。令其肅除舊習。力圖改弦。再。碩色摺內。所稱昭通府知府漆啓銑。尚須試看之處。知府為一郡表率。漆啓銑甫經陞任。自應留心察看。如果不能勝任。即著該督據實奏聞。請旨不得稍有姑容。○又諭據舒輅奏稱豐城縣

實錄卷三九五

三

一

隄岸不時坍塌。似有水族作祟。隨調龍虎山提點設法鎮治。迄今多日。並未坍塌等語。該縣逼近大河。易致水患。但須嚴飭地方官。慎固隄防。實力保護。以衛民生。今乃指稱魚孽。延致道流。焚符念咒。此在隨民所願。即尋常僚屬。亦不應作此怪誕之舉。況封疆大吏。以此為辦理之道。成何政體。且使無知愚民。遠近傳播。豈所以鎮靜地方耶。至該處隄工。據稱現在並未坍塌。究竟此時情形若何。果能

保其永不坍塌與否。仍著該撫據實具奏。倘因此稍涉迴護。亦斷不能逃朕洞鑒。今歲江右間有被災州縣。米價偶昂。看來舒輅辦理甚屬周章。即如伊覆奏糧價雨暘情形及籌辦玉山等縣。早收歉薄二摺。朕詳閱前後情節。多屬含糊。業云糧價昂貴。又云並非今年獨昂。蓋伊既恐以壅蔽獲咎。又未免存粉飾之見。是以輾轉支離。不能據實陳奏。地方遇有災祲。全在督撫悉心籌畫。董率有方。若似

實錄卷三九五

三

一

此茫無頭緒。恐於率屬安民。均無裨益。舒輅在廣西任內。諸事尚能勉力。今自調任以來。一切事務。胸無成見。竟有不能辦理之勢。將何以克副委任。著傳旨申飭。尋奏豐城原坍塌。隄應即補築。前以坍塌未定。椿埽難施。奏請秋後酌定議修。今水勢平定。正應及時施工。以防來春泛漲。報聞。○是日駐蹕中關行宮。辛巳。諭曰。張坦熊前於道員任內。經李衛薦舉。朕加恩用為按察使。後聞其屬鑽營

而得者。然欲觀其後效。乃伊自蒞任滇省以來。已歷多年。不過碌碌庸庸。並未見其實心供職。且亦從未據實奏聞一事。今據總督碩色摺奏。其才本平庸。遇事不振。似此庸劣不職之員。若僅令休致家居。則伊平時既旅進旅退。及至年老頹廢。自度久歷外任。囊橐已豐。未必不轉以去位優游為得計。況藩臬大員。朕多由道員不次陞用。使皆如張坦熊之因循玩愒。而仍不失竊位榮身之樂。其何以

肅官方而飭吏治耶。張坦熊著革職發往軍臺効力。以為負恩溺職者之戒。其雲南按察使員缺。著周琬補授。○和碩履親王允禔等奏。本月十三四連日陰雨。京城內外米價日長。查本年秋季官俸甲米。例於八月開倉支放。為期已近。請早放數日。俾官兵不與民間爭購。轉瞬秋成。雜糧上市。亦得源源接濟。得旨甚好。知道了。然必有鋪戶居奇之弊。亦應節制。又近日情形若何。速行奏聞。尋奏自有

開倉支放之信。米價頓減。至鋪戶居奇。當市價驟昂時。即飭步軍統領及順天府實力稽察。倘有此弊。自當嚴行懲治。得旨。欣悅覽之。○吏部議准。河南巡撫鄂容安疏稱。陳州府及新鄉。南陽二縣。均係大學。准各添設訓導一員。淮寧。南召二縣。各添設教諭一員。河陰。汜水。涉縣。淇縣。鞏縣。渾池。桐柏。浙川。確山。正陽。寶豐。伊陽。盧氏等十三縣。訓導俱裁。至新設教諭二缺。訓導三缺。均歸部銓選。從之。○

兵部議覆漕運總督瑚寶疏稱。各省裁并衛所。守備千總。奉部議。凡存留衛所。俱令專司屯軍漕運。其餘案件。歸就近州縣辦理。其相離州縣遠者。查明後奏。請照舊管理。今查江安各衛。一切案件。俱可歸并就近州縣。無庸仍照舊例。應如所議。其裁汰各員。俱給咨赴部另補。或係掣發漕標者。聽該督委用。再稱。衛缺裁并。幫名亦應更改。原鳳中衛。常州二幫三幫。改為鳳陽衛。鳳中。常州二幫三幫。

原宿州衛頭幫二幫改為長淮衛宿州頭幫二幫原儀徵衛幫改為揚州衛儀徵幫原安慶衛前後幫改為安慶衛幫原建陽衛寧國太平二幫改為建陽衛寧太幫原揚州衛四幫改為揚州衛三幫亦應如所議至原議鎮江衛中幫并入前後二幫其應改幫名處未經議及俟該督聲明再議從之○又議准兩廣總督陳大受奏稱廣西鎮安府歸順州界聯交趾前因交匪竄入滋事先後撥兵三百五十名貼防并添設子隘子卡百餘處嗣邊疆寧謐陸續全撤但邊防不可不慎前奉密諭查議現詳加體察除無甚緊要應徹外請存十五隘十五卡及各塘并怕懷子隘坡利卡等處地俱扼要應抽撥內汛兵丁防守其餘裁徹之隘卡仍飭修固即令存留各隘卡之兵就近巡哨從之○是日駐蹕波羅河屯行宮○壬午

上詣

皇太后行宮問安○賜蒙古王公額駙台吉等宴○是日駐蹕張三營行宮○癸未

上詣

皇太后行幄問安○諭軍機大臣等據永貴奏江浙交界之莊上地方擒獲積盜李阿貴等一案此等兇頑之徒歷年盤踞肆惡大為地方之害且其地毗連震澤易於出沒潛蹤不可不力行搜捕務盡根株此時浙省雖已敗露而濱湖各處餘黨必多竄伏著傳諭該督尹繼善該撫王師該提督武進陞既稱積匪則盤踞已非一日何以不早行緝拏著尹繼善詳查情節奏聞並令其嚴密躡緝毋任滋蔓容奸致匪人得以漏網其浙省有移提質訊之犯即遵遣幹員慎密拏解毋得稍有延誤○又諭據永貴摺奏捕獲莊上地方積盜李阿貴等七十九名於擒拏之時尚敢持械拒捕兇橫已極自應嚴行根究按律從重治罪以申憲典毋得稍存姑息之見但思此等

積匪盤踞有年。從前肆行竊劫。陳案累疊。地方大吏。應早有見聞。且朕今春南巡江浙。所有濱湖容奸之地。早應先期蹤跡。搜緝肅清。何以至今始行就獲。是否因別案聚衆等事。牽連敗露。抑或向來地方官。因循不行。摘發以致釀成大案。若論浙省目前急務。當一意以辦理災賑為先。似此緝匪之舉。反為不急之務矣。該督喀爾吉善。現赴浙省。並諭令會同該撫。將前此未經發覺緣由。一一查明具

平定本三十七十五

奏。至界連江省地方。恐尚有餘黨潛藏。已傳諭該省督撫提臣等。密行躡緝矣。尋永貴奏。浙省嘉湖與江南接壤。而太湖通連江浙數郡。向有漁匪為患。時加躡緝。未得根株。恐兩省有司互諉。因密令湖州協副將嘉湖道悉心查緝。當即拏獲李阿貴等。并據勘明該處實江省所轄。隨飭提嚴訊。究拏餘黨。嗣即赴浙東辦災。並無別案牽連之事。伏思匪類聯結。至數十人。其竊劫豈止供出各案。且必有

捕役賄縱等情。現飭臬司悉心推鞠。至江省餘黨。已據該督撫提臣咨稱。亦陸續捕獲多人。俟兩省審明。後在江在浙各歸各案具奏報聞。○又諭。據準泰摺奏。濟南東昌武定及兗曹青萊等府所屬州縣。因本年六月內驟雨頻仍。沿河及低窪地畝。續有被淹。現在委員確勘。照例撫卹。又稱各屬黍稷高粱次第登場。甚屬豐稔。晚禾亦皆茂盛。等語。所奏殊未明晰。該省各屬既已被水。則收成不無減

平定本三十七十五

少。今既云被淹。復稱豐稔。是否一州縣內有淹浸者。亦有豐收者。抑各府屬內有此處數州縣被淹。而彼處數州縣仍屬豐稔者。究竟被水之處。與豐收之處。相較孰多。合該省各屬通計之。今歲田禾收成光景。比往年究竟若何。可傳諭準泰。令其詳悉查明。據實奏聞。尋奏。臣初奏。係莘縣等八州縣沿河窪地被水。情形續奏。係長清等二十一州縣。衛被水情形。至云此外各屬。甚屬豐稔。晚禾亦茂盛。

者。指未經被水處而言。嗣七月以來大雨頻仍。兼之運河缺口漫溢。前之被水較輕者。茲已加重。前之未經被水者。漸次被淹。據報共五十三州縣衛所一場。而此內情形又輕重不一。究係收多歉少。至晚禾分數。此時未定。大約比之連歲以來。今歲秋成。殊為不及。報聞。○又諭曰。準泰奏運河道稟報東平州頭道隄工於六月二十八日有奸民決隄放水。以致南來汶河諸水於南頭灌進。迤北諸水亦倒漾進口。現在委員星赴該工堵築。並親身前往查勘情形。是否奸民偷決。抑係河員疎防等語。準泰此奏未免先存成見。有卸責河員為地方有司諉過之意。運河隄岸關係漕運民生。最為緊要。如果奸民偷決。目無法紀。自應嚴拏重處。以儆頑橫。其地方有司亦有失察之咎。至河員疎防。總有應得處分。準泰務須秉公確勘。不可稍存回護之見。其附近村莊田禾有無淹浸。亦著查明。應撫卹者。

即一面辦理。一面奏聞。並將實在情形據實速行具奏。尋奏奸民盜挖官隄。現嚴行查治。其印河各官本屬一體。何敢稍存成見。卸責河員。為有司諉過。俟定案後。將應參官員具奏。至田禾被淹共計三十六村莊。其早禾業經收穫。惟晚禾及豆皆被淹損。已照例先行撫卹得旨。另有旨諭。○是日駐蹕阿貴圖大營。○甲申。上行圍。○諭軍機大臣等。據辦理青海夷情事務副都統舒明奏。摺郭羅克賊人搶劫班禪額爾德尼使人。致有殺傷。後詢知頒發勅諭。並賞賜達賴喇嘛物件。隨經給還等語。是郭羅克尚知畏憚天朝威德。其心尚屬可原。但該處係進藏要路。常有信使往來。豈可使中途頻有搶劫之事。著將原摺鈔寄策楞岳鍾琪閱看。令其酌量情形。妥協辦理。務期明白開導。俾知輸誠帖服。既足以申國家之憲典。而亦不致操之太急。激成釁端。方合駕馭遠。

人之道將此詳悉傳諭知之○是日駐蹕坡
賚昂阿大營○乙酉

上詣

皇太后行幄問安○

上行圍○戶部議覆直隸總督方觀承疏稱昌
平順義懷柔密雲宛平大興通州三河薊州
熱河同知四旗通判喀喇河屯通判等十二
州縣廳恭逢

聖駕巡幸木蘭經由御道兩旁界內旗民地四

百五十四頃二十畝有奇奉旨蠲免錢糧十
分之三其熱河同知所轄應蠲錢糧業據該
戶全完在前奉蠲在後請於十五年舊欠數
內扣除補蠲應如所請從之○又議准綏遠
城將軍富昌疏報清水河所屬和時里三眼
井等村夏秋以來田禾被雹成災該處耕農
皆內地無業貧民秋後即回原籍且口外早
寒立秋後難以補種無庸借給籽種口糧現
確查被災地畝分別蠲緩外其帶徵舊欠銀

米亦請寬限一年至來春東作時仍令該將
軍查明無力耕種之人量借籽糧從之○又
議覆貴州巡撫開泰奏稱黔省威寧州屬勻
录地方產有銅礦業經查明並無妨礙田園
請募民間採應如所請照例九一抽課餘銅
每百觔給價八兩收買其辦事人役工食即
於銅課項下支給從之○兵部議覆直隸總
督方觀承奏稱北運河工千總三缺原議三
年俸滿如果著有勞績咨部陞用雖有此例
從未舉行良以直隸河工緊要無逾永定而
永定河千總仍照六年俸滿且南運河工與
北運等而南運河千總亦無三年即陞之例
請嗣後北運河千總一例六年俸滿應如所
請再奏稱北運河千總如熟習椿埽實心出
力者俸滿留任候陞其行走尚好者離任効
力月給步糧二分如辦事平常即飭離任再
直隸河工守備止永定一缺遇缺出即於本
工千總及候補守備內拔補其南北運河千

總並無陞用之路請定議於何項班次酌予陞途查千總俸滿俱令離任考驗從無留任候陞例如果熟習樁埭准其留工効如遇守備缺出題補其平常之員即令開缺咨部另補再河營千總皆由河兵挑拔是以各省河營守備缺出俱由該督於本工人員內題補並無別項推陞班次如有人材出衆諳練營伍者該督酌量人地相宜通融題補無庸另議陞途從之○豁免奉天寧遠州乾隆七八年分民欠口糧米四千二百石有奇八九年分民欠籽種穀八百四十石有奇○豁免甘肅高臺縣平川毛目雙樹等屯旱災籽種穀二百二十石有奇○浙江巡撫永貴疏報開墾象山太平遂昌雲和等縣田地山塘共一十三頃九十畝有奇定海龍游江山等縣田地塗山共五頃有奇龍泉縣田地五十六畝有奇○是日駐蹕烏蘭哈達大營○丙戌上行圍○諭據黃廷桂等奏稱朝邑縣於六月

十四五等日因河水驟漲淹及民居輕重不等現在查勘分別賑卹等語朝邑逼近黃河地本窪下此次河水漲溢被災貧民雖經該督撫等照例撫卹其中有房屋家具糧食盡被淹沒者家室漂搖更可憫惻著該督撫查明此等被災較重之戶於常例之外加恩賞給一月口糧俾得餬口有資不致失所該部遵諭速行○又諭軍機大臣等會同刑部查明府尹顧汝修摺奏辦理運米車輛短發腳價各款朕詳加披閱該府尹之懷私瀆奏情節益屬顯然如原摺內各倉監督串通作弊一節今據監督供稱曾將找發腳價封送大興縣轉給後順天府以車戶已散無從轉給移覆則非監督之利於自行散給希圖剋扣明矣順天府已經移文而猶得諉為不知曉曉置喙耶至該府尹代蔣炳請寬處分一節尤為黨同徇庇之尤者凡上司於屬員內有應行免議之案代為聲明尚屬情理可行若

分屬同官。彼此得以申辨。以及身係屬員。得為上司回護。剖白此端。一開將人人挾詐欺公。於政體官方。為害甚大。此風斷不可長。從前大名道陳法。為白鍾山。巧詞引咎。冀追上官之責。經朕勅部議處。無論為伊分所應得。即使庸愚無知之流。或疑稍有過當。朕亦惟有立法示懲。防微杜漸。豈肯置政體官方於不問耶。所有顧汝修懷私瀆奏之處。著交部嚴加議處。至知縣陳世倅。先經辦理不善。至事後始稱俟傳齊車戶。補散腳價。此不過苟且完事。以為侵蝕之計耳。著一并交部察議。○又諭曰。梅穀成奏請。八旗外省出糶官米。悉照常平原法。只比原價畧增。不必計時價低昂一摺。所見甚屬紕謬。而亦全不知事理。開倉減糶。以時價為權衡。原慮販戶奸民。利於價值過賤。多方囤積。居奇轉使小民。不無食貴之累。經九卿定議。遵行已久。何得遽云張渠作俑。罪不容誅。且八旗米局。出自官倉。

並非糶自民間。若以漕運所費計之。將視今價增倍蓰矣。常平買補官價。亦已隨時遞增。今年之原價。非復昔年之所謂原價也。又果能援以為定例乎。梅穀成自擢用左都御史以來。所有章奏。多係瑣碎迂謬之見。並未見有事關體要。剴切敷陳。克副專司風紀之任者。即如近日所奏。順天府屬衙役辦理車價一事。在伊不無懷挾私心。難逃朕之洞鑒。今又為此沽名釣譽之摺。妄冀無識者之稱頌。表率臺垣者。居心若此。使科道官尤而效之。所謂整綱飭紀者。尚可問耶。梅穀成本應從重加以處分。但念伊於皇祖時。曾經供職內廷。恭養日久。此次姑免深究。著傳旨申飭。令其力圖省改。如尚不知覺。悟將來仍蹈前轍。朕亦不能屢為曲宥也。○又諭。朕閱舒輅題報。江西各屬。早禾被旱。情形本內。僅上饒等七州縣。其有即應賑貸之處。雖宜詳悉妥辦。但被災地方無多。其情形

尚不甚至拮据。乃伊前次奏到玉山等縣早收歛薄。籌畫事宜一摺。詞意甚屬周章。辦理亦多竭蹶。竟似不知所措者。豈伊前次摺奏。故為張大之詞。抑係此次題報。轉多粉飾之意。督撫表率全省。民望攸繫。今以七州縣偏災。而舒輅籌辦。已張皇至此。何以克副委任之意。著傳旨申飭。其上饒等七州縣早未被旱。實在情形若何。仍著該撫詳悉查明具奏。尋奏。前因廣信府屬之上饒。玉山。廣豐。弋陽。貴溪等五縣。并撫州府屬之東鄉。饒州府屬之鄱陽二縣。閏五月雨水愆期。糧價昂貴。且廣屬與浙省衢州連壤。恐聞彼處情形。民易滋釁。是以平糶時。委員彈壓。嗣得透雨。補種晚禾。民情亦遂安帖。節次奏報。係就當日情形。未能詳審大局。以致辦理周章。非敢故為張大。有意粉飾得旨。總之汝器小易盈。心無定見。所以諸事乖張耳。又諭。據原任提督豆斌奏。稱固原提標。向有備戰駝五百餘隻。

嗣經裁汰變價。現在甘肅寧夏等鎮。均有駝隻。請俯准設立。以備緩急等語。前經降旨。密令該提督等。酌籌防範。準夷事宜。原屬先事綢繆。慎重邊圉之意。其一應備戰馬。駝等項。但須漸次籌辦。以戒不虞。固原腹地。本非邊徼。可比。若因馱載礮位需用。必應酌量籌備。事亦尚在可緩。況以久經裁汰之駝隻。驟然設立。未免迹涉張皇。使遠人聞風驚疑。轉失靜鎮之道。但豆斌既有此奏。亦屬籌備之一策。著將原摺鈔寄該督黃廷桂。該提督齊大勇。將此項駝隻。從前何以議裁。現在是否應行復設。如果必須設立。又應作何辦理。該督等遵照此旨。酌量情形。密行熟籌妥辦。不得稍有張皇。尋奏。前督臣慶復奏。准甘涼寧肅駝隻裁半。固原河州盡裁。因餽養虛費起見。查固原駝隻雖裁。而額設馬原寬。儘可應調。至該處配礮駝六十隻。雖屬無多。但此項關繫通省。非止固原一處。并查每礮一位。配駝

三隻每駝二隻折馬五匹更番調撥足備任
載誠如諭旨事在可緩報聞○是日駐蹕僧
機圖昂阿大營○丁亥

上行圍○戶部奏旗員遇有白事所借俸銀下
季扣除若未扣之先緣事革職者賠補病故
者除世襲官員將襲職之人扣抵外餘俱免
賠至紅事借俸其物故應否免追未經定議
今據正黃旗滿洲都統將病故叅領巴延泰
未完借支紅事銀兩咨部辦理伏思旗員紅
事借俸未經扣除病故又無世職承襲其窘
迫與白事等仰懇免追并載入則例通行八
旗遵照從之○是日駐蹕僧機圖伯勒齊爾
大營○戊子

上詣

皇太后行幄問安○

上行圍○是日駐蹕齊爾伯庫昂阿大營○已

丑

上詣

皇太后行幄問安

上行圍 諭曰御史范廷楷奏浙江巡撫永
貴徇庇知府金洪銓一摺所奏屬是金洪銓
玩賑誤公非尋常闕冗之員可比該撫僅請
休致實屬瞻徇是以朕見喀爾吉善之奏即
將該知府革職留省効力而傳諭切責永貴
者不啻至再至三矣且永貴辦理未協之處
不獨金洪銓一事其籌畫災賑諸務種種張
皇竭蹶第以封疆重任一時難得其人且浙
省現多被災之處驟易生手反於辦理賑卹
之事無益若循例議以降罰使該撫因此與
該督各存意見轉無補於救災濟民是以姑
從寬貸惟於其果能實力妥協辦賑與否以
定永貴之去留耳范廷楷豈能見及此因有
是奏故明示朕意○吏部議覆貴州布政使
溫福條奏黔省應行更復各事宜一貴西道
請移駐威寧州與威寧鎮同城方能控扼數
州并加兵備銜都司以下聽其節制查設官

分職未便懸擬。應飭該督撫妥議具題。一採買硝磺。向有定處。前撫臣孫紹武奏准。聽各標營自行採熬。營員不能身親其事。致開偷採之弊。不若照舊辦理為妥。應如所請。一苗地偏立社學。並擇內地社師訓教。無知愚苗。開其智巧。將必奸詐百出。請密飭地方官。將新疆各社學之社師。已滿三年者。徐行裁汰。未滿三年者。亦以訓迪無成。漸次停撤。則從學苗童。自不禁而止。並請歲科兩試。仍准苗童一體應考。但不必另設額數。則苗童自難入彀。亦可不禁而退。亦應如所請。從之。○賑卹山東平度州掖縣及官臺。西由二場被水成災。竈地貧戶。并暫豁贖廢地畝額徵。○福建金門鎮總兵陳謝勇故。調漳州鎮總兵馬負書為金門鎮總兵。以廣東南雄協副將王文敏為漳州鎮總兵。○是日駐蹕綽諾果勒大營。○庚寅。

上詣

皇太后行幄問安。

上行圍。○諭據鄂容安摺奏。總兵楊凱居心行事。詭詐虛浮。一摺。楊凱前經獲罪罷斥。朕今歲南巡。見其年力尚堪驅策。是以棄瑕錄用。復畀以總兵之任。自應感激奮勉。力洗舊習。以圖報効。今乃種種乖張浮詐。至於如此。可見從前被叅之處。並無寬抑。而怙過不悛。其情益難寬貸。楊凱著革職。以為廢員加恩起用。溺職怙終者之戒。○又諭軍機大臣等。據巡撫舒輅摺奏。安仁縣民聚眾阻運倉穀一案。辦理又甚錯謬。劉丹聞該縣撥運倉穀。即邀鋪兵陳念章。寫給匿名傳單。率先起意滋釁。實乃此案渠魁。其因自係紳衿。藏匿不出。尤為狡獪可惡。今該撫以劉丹始終並未出場。僅照光棍為從例。擬以絞候。復援匿名文書之例加等。一人而有二罪。亦無此讞獄之體。至彭信托一犯。若因其糾眾趕船。兇橫尤甚。僅照為從例。不足蔽辜。即聲明該犯情重。

緣由與劉丹同科一并從重定擬有何不可
今乃以罪首歸之彭信托而使造謀肇釁之
劉丹得從輕比則案情顛倒處置失宜該撫
遇此等刑名重案不能詳察讞牘歸於允當
將何以勝封疆之任此案俟該撫題到日即
著刑部改正舒輅著傳旨申飭○是日駐蹕
額墨勒昂阿大營○辛卯

上行圍諭軍機大臣等永貴所奏請令急公
人員出貲捐賑分別錄用一摺原為籌辦該
省賑災起見但開捐本係權宜補救之策非
可援例常行從前如江賑東賑事例特因該
省連年被災需費浩繁是以暫行開設旋即
停止至尋常水旱不齊亦歲所時有倘地方
一遇偏災即議請開捐例於政體殊為未協
況國家賑貸兼施不惜帑金巨萬取給於捐
項者幾何如遇災祲甚重勢出於無可如何
時或一開事例浙省現在情形尚不至於此
所請不必行其本省紳士等有願出已貲嘉

惠桑梓如樂善好施舊例者該撫出示曉諭
勸導果其尚義急公酌量咨部議敘以示風
勵尚可隨宜舉行再該省現在被災已及數
府一切籌辦事宜自當竭力從事不容刻緩
但該撫為通省表率大小屬員以及幕賓胥
役皆視以為標準諸凡務當鎮靜若稍涉張
皇則人情恟懼訛言易布棍徒從而煽惑鬧
賑搶奪諸事乘之而起此最當留意措置妥
協方為得宜將此一并傳諭永貴知之○是
日駐蹕巴彥圖庫木大營○壬辰

上詣

皇太后行幄問安○

上行圍諭滇省各營騎操馬匹定例三年以
外准報倒十分之三其額外溢倒之馬從前
該督提等俱於朋扣等項內通融買補並未
著賠嗣據該督碩色查明奏聞仍請從寬免
其賠椿經軍機大臣等議令照例按數賠補
但念邊方水土餽養馬匹與他處情形不同

歷來通融籌辦。相沿已久。今若復令賠補。兵力未免拮据。嗣後滇省馬匹。除額定十分倒三。按例分別年限著賠外。其溢額倒斃馬匹。著加恩免其賠補椿銀。仍照從前通融辦理。以示軫恤。兵艱之意。若兵弁等。因有此旨。或致餽養失宜。溢倒過多者。該督提等嚴行叅處。該部即遵諭行。○又諭據正白旗滿洲都統等奏稱。健銳營前鋒衛德脫逃等語。健銳營兵丁。係朕特恩優卹。非別營可比。除操演外。並無別項差遣。理應感戴朕恩。安常循分。此等脫逃之人。必須從重治罪。且營兵脫逃。乃由該旗陳奏。該管大臣舒赫德德保並未覺察。奏聞。觀此知平日殊不以為事矣。著傳諭舒赫德德保。令其明白回奏。○戶部議覆山西巡撫阿思哈疏稱。晉省本年夏麥秋禾。被水被雹。其祁縣平遙陽城沁水絳州保德臨汾等州縣。被水較輕。無庸議賑。外至鳳臺高平文水靈邱馬邑永濟臨晉榮河稷山等

縣。田禾淹浸。人口傷損。現查明成災分數。請將本年錢糧。及春借倉穀。暫緩催徵。其借給籽種口糧。均請秋後免息還倉。應如所請。其被災較輕處。仍令該撫俟秋穫後。查勘分數。量行撫卹。得旨。依議速行。○兵部議覆雲貴總督碩色奏稱。滇省各標鎮協營。設有管隊頭目。於本身名糧外。多食步守糧半分。名曰伙糧。并有占食全分者。原額一千九十八名。經前督臣尹繼善查出。將此項空糧。改養餘丁三千二百三名。每名每月給餉米銀五錢。維時復以隊目當差需費。仍給餘丁糧一分。即其子弟。年未及歲。亦准充補。迨日久弊生。即八九歲之幼稚。亦得濫充。不能執械差操。請悉裁汰。照清出伙糧原額一千九十八名。按數招補。查營伍養一兵。應收一兵之實用。滇省餘丁一項。或為隊長百總分食。或以幼稚充當。有名無實。應如所請。將現在餘丁悉裁。照伙糧原額。招補正兵。此次改補後糧餉

既增該督應嚴飭各營挑補強壯如不實力奉行即據實叅處從之○予故正黃旗滿洲右衛副都統三等男蘇呼濟祭葬如例○是日駐蹕永安拜伯勒齊爾大營○癸巳

上詣

皇太后行幄問安○

上行圍○諭軍機大臣等浙省今年被災較重賑糶諸務需米孔殷現在多方籌畫令隣省商販米船運浙售賣以資接濟但思此等船隻多由江省蘇州等處取道赴浙若因本省現今亦需米石或於沿途採買則運往浙省者必致寥寥今雖兩江亦間被偏災較之浙東究屬輕減該省即有需用亦應通融少待先濟隣封之急督撫為封疆大臣凡民生緩急理宜視同一體著傳諭該督尹繼善該撫王師遇有隣省赴浙商船毋任地方官取便多買并為浙省協力助理務令催趲即速前進不得存此疆彼界之心致乖拯災恤隣之

公義○戶部議覆閩浙總督喀爾吉善奏稱浙省通商事宜一摺一乾隆十三年奉諭地方偶有偏災即將該處關口應徵米豆稅加恩寬免商舶雲集市價自平現浙省被災請凡商民遠赴楚省漢口及蘇州等處購運者官給印票米穀數目相符即免稅查浙省關口免徵米稅原係格外加恩商人圖利自必聞風販往若各省關口皆然則商販不見赴浙之利誰肯踴躍遠來米穀轉虞缺少應令該督將商販之經由浙省關口者免稅各省不得概免一商販自備貲本遠赴各省轉運自當權其子母不至虧折毋得照平糶官米之價以致畏阻不前應如所請聽其酌照市價公平糶賣仍將檯價病民及囤積居奇等弊嚴禁一急公商人請就輓運之難易定議敘之章程其願照市價減糶惠民者亦懇加恩議敘查商人貿易向無議敘但地方乏食量予議敘俾踴躍販運亦屬權宜應如所請

溫台航海最遠。金衢雖由內江。然逆流而上。輸輓亦艱。如有運至萬石以上者。分別優加議敘。內河各郡。運至二萬石以上者。一體議敘。其不及前數者。酌加獎勵。至願照市價減糶者。計減值一千兩以上。不論何郡。均准議敘。其不及千兩者。酌加獎勵。得旨。依議速行。

○兵部議覆雲南曲尋鎮總兵莽阿納奏稱。滇省馬匹。實因水草惡劣。難養易倒。所有額外溢倒者。兵丁窮乏。懇免賠椿。查業奉諭旨。軫恤兵艱。准其照舊通融籌辦。加恩免賠。再稱曲尋一鎮。至陽林驛往返一十三站。凡有上司路過。據上下傳文。應付馬匹。路遠差煩。往往報倒等語。查營馬以操防為重。豈容擅動。以致疲瘦倒斃一鎮如此。他處可知。請飭該督撫提等嚴行禁止。如有經過官員及上司人役。擅動營馬。並營員徇情濫應者。即據實查叅從之。是日駐蹕阿魯布拉克大營。是月直隸總督方觀承奏直屬自入夏後。

雨水雖覺稍多。而隨雨隨晴。田禾易長。各種雜糧。亦皆暢茂結實。雖間有被水被雹數處。亦不過一州縣中之一隅。撫卹易辦。合通省計之。較上年秋成。可望豐稔有加。得旨。覽奏稍慰。所云有加。能加幾倍乎。尋奏。查上年秋收。合計高阜窪地。約有八分。惟久雨之中。田禾雖盛。而穀粟多秕。未若今年秋禾暢茂。兼得堅實。詢之農民。俱云。可加上年十之三四。得旨。覽奏俱悉。關外更覺秋成豐稔。日益欣慰也。

○江蘇巡撫王師條奏。江蘇錢糧之弊。一。江省錢糧。有地丁漕項。河工驛站俸工等款。州縣每以某款限期急迫。先儘徵解。或徵至八九分者。處分較輕。遂致寬緩。名曰尾欠。積年漸多。請定全完與否。議敘處分。徵比幕賓。間有串通經承。得賄捺攔。應飭州縣時時查察。一。州縣催糧。皆先摘大戶。次及中戶。而小戶每不及摘催。遂有奸頑大戶。將本身額賦。花分數十戶者。戶愈碎。則徵愈難。請開

忙後將小戶另造一冊限歲內全完勿任積欠。一都圖戶名櫃書或無心錯寫或舞弊誤填銷照與徵冊不符不能註完名曰宕票每致重摘日久或遺印照鄉愚隱忍重完為吏胥侵蝕請將該戶都圖銀數隨時示諭一經胥包納愚民每被侵吞請飭州縣明切曉諭令糧戶自封投櫃一頑戶希圖延欠賄囑經承終年不摘請飭州縣將徵冊存內署行內摘內銷之法不得假手胥役。一胥蠹侵隱由覈造冊籍官不稽查任其增損請飭州縣將每戶應完銀數之易知單與上屆原冊逐一查對他如紳衿恃有護符兵丁恃非州縣管轄書役恃在衙門應差任意頑抗一體嚴催再開徵停忙總視該處收成早晚毋任民間隨手花銷其坍沒版荒公占絕塚之糧隨時請豁得旨有治人無治法惟在汝不姑息好名示惟正之供即化民之義而已若夫科條催督乃其末耳且朕有所不曉矣○福建巡

撫潘思渠奏福州城東三十里鼓山巔湧泉寺前因無賴居民入山伐木恐生事端經前撫周學健請派福州城守營千總一員兵二十名添蓋營房駐劄寺旁看守現親勘情形山木已蕩然無存營房風雨摧毀徒費歲修請將舊派弁兵撥歸其鼓山寺責成山下魁岐肚頭鼓岐君竹等汛照管報聞○又奏閩省遠控外番南洋諸國商販時相往來近聞呂宋噶喇叭等處彼此構釁恐沿海一帶聲息相聞貿易者或乘外夷多事客艘夾帶違禁物件并奸徒混雜進口尤宜密為防範現因六月初旬福州福寧所屬颶風大雨人民間有淹沒乘此察勘之便即與水陸提臣閱視海外情形將一切海防事宜密商辦理得旨好知道了至外番構釁乃蠻觸常事不過慎我邊防而已○河南巡撫鄂容安奏報豫省各縣被水處所以通邑地畝計之夏邑約十分之四商邱約十分之三鹿邑虞城永城

約十分之二。例應普賑一月口糧。目下麥熟未幾。高粱早稻俱得收成。民間尚不乏食。請俟十月放賑。以資寒冬接濟。至河內武陟濟源三縣。迭經丹沁水溢成災。現經親履查辦。其餘各屬。可望有秋。伏思辦理災傷。州縣類皆先差衙役里保往查。繼則責之書吏。取結造冊。再委佐雜踏勘。印官則安居衙署。積旬逾月。始往抽查。而詳稟又率兩可其詞。窺探上司意指。以致貧民不能久待。多有流亡。迨

高宗實錄卷三九六

三

散賑時。戶口已經入冊。仍借給賑之名。將銀穀悉入奸胥之手。州縣不肖者。亦恐不免暗中分肥。若州縣果辦理迅速。胥役雖善舞弊。而猝不及備。災黎得即邀恩。今外省積習動稱夏災不出六月。秋災不出九月。不知定例所云指題報不得逾期。非百姓報災不必即辦。可坐延時日也。今被水各邑。臣親勘後。嚴切督查。務俾積弊盡除。民受實惠。得旨。諸凡足慰朕懷。實力爲之可也。○山西巡撫阿思

哈奏。州縣承審命盜等事。例由該知府直隸州覆審解司。直隸州本任之案。由該巡道查覈。如有不符。即行駁飭。山西巡道四員除歸綏道專管沿邊各同知通判糧餉刑名外。其冀寧河東雁平三道。分轄各府州縣。各有責成。嗣因雁平道辦理軍需。移駐朔平。河東道亦屢奉差遠出。遂將所轄州縣案件。徑自解司。惟冀寧道駐劄省城。照舊辦理。今雁平河東久無別差。若該州仍徑行解司。一經司駁。

高宗實錄卷三九六

三

往返尤為拖累。請將雁平屬之忻州代州保德河東屬之解州絳州命盜等案。照舊由各該道督催審轉。至河東屬之吉陽二州。距道治遼遠。山路崎嶇。徑行解司。較為直捷。得旨。如所議行。○安西提督永常奏。前臣陞見時。面奉諭旨。準夷新換台吉。其所陳請。概未允准。夷情狡詐。今歲不可不更為加緊防範。汝回任路過。備戰各營。當密為告述。俾今歲防冬。務將一切備戰事宜。及馬駝等項。俱留心

密籌妥備。斷不可張皇。使人猜疑。臣敬謹遵奉。於回任時。凡路過之陝甘各營。晤見該將軍督撫提鎮。即詳述諭旨。未經由之各鎮。亦皆密行札致。俾一體凜遵。至臣屬一切防守機宜。面飭各副參將領。照前定章程。益加周備。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之三百九十五

大清高宗法天隆運至誠先覺體元立極敷文奮武孝慈神聖純皇帝實錄卷之三百九十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣等謹將內大臣戶部尚書錄藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

教修

乾隆十六年。辛未八月甲午朔。賜扈從王公

大臣等宴。○是日駐蹕烏藍哈拉哈大營。○

乙未。

上詣

皇太后行幄問安。○

上行圍。○戶部議覆雲貴總督碩色奏稱滇省

駐防木欺古二十一寨弁兵業經部議以不

由此路運銅。准全數撤回。其原存木欺古汛

米三百石有奇。請借給巧家等寨農民。秋成

還款。再弁兵既撤。其二十一寨夷民並無專

員彈壓請就近歸巧家營經歷專管會澤縣兼管東川營府統轄仍令每寨各舉素所信服者一人立為頭目管束夷衆如有外境夷獮滋擾即令各頭目協力堵禦一切案件經歷就近驗明移縣辦理各寨年納條銀折折亦令頭目赴經歷衙門完納再官兵既徹漢人未便仍留夷地請責成經歷嚴查如有疎縱叅處其附近之阿都等處土司俱係川省會理西昌等州縣所轄務飭夷民各安本業不得越境啟釁均應如所請從之 賑貸浙江海寧富陽餘杭臨安昌化安吉烏程長興鄞縣慈谿奉化鎮海象山定海蕭山諸暨餘姚上虞嵊縣臨海黃巖太平寧海天台仙居金華東陽蘭谿義烏永康武義浦江湯溪西安龍游江山常山開化建德淳安遂安壽昌桐廬分水永嘉樂清平陽瑞安麗水縉雲青田松陽遂昌雲和龍泉慶元宣平五十七州縣及玉環一廳杭台二衛湖嚴衢三所大嵩

清泉等場旱災民竈并緩徵本年地丁場課新舊漕糧○賑卹江西上饒玉山弋陽貴溪廣豐東鄉鄱陽等七縣旱災民戶○賑貸湖北天門縣被旱貧民口糧籽種并緩徵本年額賦○浙江巡撫永貴疏報開墾歸安孝豐定海上虞太平等縣山蕩沙塗三十四頃四十畝有奇昌化寧海二縣額外田地沙塗九十四頃八十畝有奇○廣西鎮安司土巡檢岑金佩故無子以其叔父光綏承襲○準噶爾部人濟爾噶勒來降命賞給安插如例○是日駐蹕明安阿巴圖大營○丙申上行圍○諭據王師摺奏保舉經學之陳祖范顧棟高年力老邁不能來京等語陳祖范顧棟高俱著給與國子監司業職銜以為績學之勸所有著述留覽○又諭據阿里衮等奏請將湖南賑運浙省米十萬石懇於長蘆岳澧四府州歲運漕糧內截留補額等語湖南上年秋收本不甚豐此項撥運米石若俟浙

省解還價值之後買補未免遲緩著即於長衡岳澧四府州歲運漕糧內截留十萬石以補倉儲該部即遵諭行○又諭據兩廣總督陳大受巡撫蘇昌摺奏粵東司府兩監毋庸移建一案乃乾隆七年原任臬司潘思渠條奏經朕批交該省督撫酌量奏聞之事何以至今始行覆奏足見粵東諸務廢弛已極皆由從前歷任督撫不能董率屬員實力整頓玩忽因循所致所有乾隆七年以後曾任廣東各該督撫俱著自行明白回奏○又諭據江西巡撫舒輅摺奏調任按察使徐以升於任內一切命盜等件不能整理甚至舉案訊問茫無一對實於臬司不能勝任等語徐以升由御史擢用屢膺臬司之任理應感激朕恩加意奮勉况伊向為科道曾任法司刑名案件應素所究心非初任可比乃闖茸尸祿實屬負恩溺職徐以升著革職其廣東按察使員缺著汪德馨補授○又諭前因浙省辦

賑需人業經揀發道府州縣等員以備差遣今又據永貴摺請將丁憂數員留浙酌量差撥因災而開奪情之例甚不可者但既不敷委用著在京總理王大臣等於候補選州縣佐雜內再行揀選十員一面奏聞一面即行驗看發往○又諭軍機大臣等據陳大受定長奏稱雲南廣南府移解夷人阮玉漢等四名經督臣碩色批令押回交趾安插旋據歸順州查訊黃父案凡刁係屬雲南土富州人其阮玉漢几嫩雖供係交夷但迹涉可疑應解回滇省查訊等語所奏殊未明晰該夷等由廣南移解到粵如實係土富州人則滇省地方官難辭推諉之咎但外夷土目與內地民人本屬易於識辨既經一一查訊而摺內何以尚稱迹涉疑似語持兩端可見該督撫等但據屬員稟詳並不留心確查以致輾轉移解互相諉卸外省相沿陋習往往如此著傳諭陳大受碩色愛必達定長等各行詳

查明確將是夷是民及兩省究屬何人推諉之處據實具奏不得稍存回護之見○是日駐蹕哈里雅爾昂阿大營○丁酉

上詣

皇太后行幄問安○

上行圍○祭

先師孔子遣大學士史貽直行禮○兵部侍郎兼管順天府府尹事蔣炳府尹顧汝修奏來歲壬申舉行

皇太后萬壽恩科應試士子由國子監順天學政錄送定例場期十日前送冊五日前納卷嗣每任意逾期況來歲鄉試外省於二月舉行順天於三月舉行不特山東山西河南貢監於本省出場後可以趕赴京闈即江南江西浙江陝西等省亦得兼程進京重疊應試請飭監臣學臣務於場期前月二十七日以前彙送冊卷并飭國子監示諭江浙等省士子務於二月二十日前到監錄科得旨允行

是日駐蹕噶拜伯爾齊爾大營 戊戌秋分夕

月於西郊遣履親王允禩恭代行禮 祭

太社

大稷遣恒親王弘晈恭代行禮

上詣

皇太后行幄問安○

上哨鹿行圍○諭浙東數府今年被災較重朕

多方籌畫一切協濟採買免稅弛禁已飭該

督撫悉心經理但念該省現在賑濟平糶需

米孔殷非尋常偏災可比著將浙江應運漕

糧內特行截留五十萬石以資振濟之用漕

糧乃天庾正供向來各省截留至多不過以

數萬計該督撫當念此次格外優卹董率屬

員實力妥辦並曉諭百姓循分待賑以承朕

軫災正俗之恩○又諭今歲浙省被旱成災

米糧昂貴朕念該省綠旗兵丁差操巡防別

無生業所得月餉不敷買食之用生計未免

拮据著加恩將浙省被災各標協營兵丁每

名借給米二石。俟各省協濟米石運到及截有漕米之日令該督撫分次借給於壬申癸酉兩年內扣餉歸款俾窮兵得資接濟以示軫卹。該部即遵諭行。○又諭據雲貴總督碩色等奏請將雲南劍川等州縣地震被災較重之戶地丁暫行緩徵并請將被災兵丁再借餉銀一月等語。兵民當地震之後雖已得邀撫卹但恐甫經被災元氣未能驟復著將劍川鶴慶浪穹麗江等四州縣被災較重之戶所有本年應徵地丁銀米緩作兩年帶徵以甦民困其被災兵丁亦著再借給餉銀一月分作四季扣還以卹兵艱。該部即遵諭行。○又諭據高斌等奏稱安省各屬倉儲現有賑缺米穀尚未議補並民借籽種未還雖今秋成一時不能買足且豫備來歲平糶需用甚多等語著於安徽歲運漕糧內截留六萬石存貯該省俾倉儲充裕緩急有資。該部遵諭速行。○又諭據喀爾吉善永貴奏稱金衢

嚴道鄭基因循不振辦理災務一無就緒但該道操守尚屬謹飭請照例降用間曹等語。鄭基身為監司大員於災賑事務既不能先事籌辦又不能臨時彈壓以致地方釀成搶奪之案種種不職此等溺職劣員尚有何間曹為伊降補之地耶所奏非是。鄭基著革職以為玩視民瘼者之戒。○又諭軍機大臣等據雲貴總督碩色摺奏本年七月初一日接古州鎮總兵宋愛密稟內稱六月二十二日據駐安順府提塘吳士周呈稟內另有密稟一紙詞殊不經查係本月初八日有赴滇過普之客人鈔錄傳播現即著落提塘吳士周根追閱密稟所鈔傳播之詞竟係假托廷臣名目膽肆訛謗甚至捏造誅批種種妄誕不一而足顯係大惡逆徒逞其狂悖不法已極等語著傳諭步軍統領舒赫德直隸總督方觀承河南巡撫鄂容安山東巡撫準泰山西巡撫阿思哈湖北巡撫恒文湖南巡撫楊錫

紱。貴州巡撫開泰令其選派賢員密加緝訪。一有蹤跡。即行嚴拏。奏聞請旨。勿令黨羽得有漏網。務須密之又密。不可稍有張揚洩漏。○又諭據鶴年等奏稱。本年浙江紹興前後兩幫金衢所糧船一百八十餘隻。回空之後。因天雨水長。守候多日。食用無資。艱於南下。稟懇借給盤費。請照乾隆十四年之例。每船支借銀十二兩等語。漕船抵津。不獨浙江一省。何以別省俱未聞有懇借盤費之事。明係該兵丁等。知本省現在荒歉。藉詞請借情節顯然。果有此情。何妨明為奏達。而該侍郎等全不知此。為其所愚。抑或草率朦混。此風斷不可長。但該旗丁等。本處被災。食用自不免拮据。著加恩酌量賞借一半。並將此傳諭該侍郎等知之。○是日。駐蹕巴彥陀羅海大營。

○己亥。遣官祭

關帝廟。○盛京錦州副都統烏正額奏。牧

正額始行接任。即將偷換隱匿馬匹之人查奏。甚屬可嘉。其前任牧羣總管。疎忽不行稽察。可見著交盛京兵部。照例議處。仍令上駟院。太僕寺。將所屬馬羣。有無此等偷換隱匿之弊。查明具奏。○戶部議覆。湖南巡撫楊錫紱疏稱。湖南長沙。善化。湘陰。益陽。湘潭。寧鄉。瀏陽等七縣。五月雨澤愆期。早禾被旱。嗣於六月中得雨。晚禾可望有收。無庸急賑。查長沙等縣。業經被旱在前。恐有貧乏農民無力餬口。缺少籽種。仍飭該撫在各縣常平倉穀內。酌量借給。以資耕作。其錢糧應否蠲緩。災民應否賑卹。確查分數具奏。得旨依議。速行。○是日。駐蹕波羅哈達大營。○庚子。

上詣

皇太后行幄問安。○是日。駐蹕翟桑牛泉村前大營。○辛丑。諭據高斌王師摺奏。江蘇省原貯倉穀。頻歲動撥。暨本年協濟浙省。缺額甚多。且現在江常鎮徐等屬間有水旱被災。亦

需賑借。來歲青黃不接。亦宜豫備平糶等語。著於該省額徵漕糧內。截留三十五萬石。分貯各屬。以實倉儲。一應截留撥補事宜。該督撫酌量妥協辦理。該部即遵諭行。○又諭據準泰奏稱。山東濟南等府二十九州縣屬。自七月以來。淋雨頻仍。豫省黃河漫溢之水。分流東趨。所有禹城等州縣。前此未經淹及者。多有被淹等語。該州縣屬。猝被水災。大田失望。民居淹浸。朕心深為軫惻。著該撫即速查明被災人口。加意撫綏。所有賑卹事宜。即著一面辦理。一面奏聞。務須董率屬員。實力妥辦。毋令災民或致失所。該部遵諭速行。○又諭軍機大臣等。準泰覆奏東平州奸民偷決隄工一案。內稱不能指出奸民姓名。及挖隄確據等語。是準泰於此案情節。尚屬茫然。而顧琮同日具奏之摺。則稱細加查訪。東平汛隄口。係西岸王姓監生。出錢雇人偷挖。現被民人出首等語。奸民偷決河隄。事關重大。巡

撫統轄全省。且在所屬隣近。自應早得實情。何以顧琮在豫省工次。已經確查具奏。而準泰反一無聞見。朕前閱該撫原奏。即謂伊先存成見。有卸責河員。為地方有司諉過之意。今覽此奏。是果不出朕所料矣。河隄原以衛民。地方百姓。擅敢偷挖。已屬目無法紀。況又出自監生。是尤為豪猾之甚者。此種刁風。斷不可長。著傳諭準泰。務須嚴行究出偷挖之人。審訊明確。按律治罪。其失察地方有司。亦須嚴行查叅。不可稍涉徇徇。倘嗣後遇有此等案件。仍敢因循舊習。有絲毫回護容隱之處。斷不能逃朕洞鑒。其此次未經查明原由。并著據實奏聞。○是日駐蹕波羅河屯行宮。

○壬寅

太宗文皇帝忌辰。遣官祭昭陵。○諭上年天津府屬。偶被水災。所有存倉穀石。動撥甚多。今歲直隸各屬。收成豐稔。天津一府。雖獲有秋。較之他處。尚為稍薄。若因

倉儲亟須買補。即於該處購覓。轉恐市價漸昂。殊於民食無益。現在奉天所屬豐收。又與天津一水可通。著該督方觀承。酌動帑項。委員前往買米十萬石。由海運津。查明缺額。各州縣分撥存貯。以實倉儲。該部即行文盛京將軍府尹等知之。○是日駐蹕中關行宮。○癸卯。

上詣

皇太后行宮問安。○浙江巡撫永貴奏浙東旱災數府賑項實屬不貲。商之督臣及司道等無不欲以開捐為請。勢處無可如何。不得不再為陳奏。得旨覽奏。另有旨諭。諭今歲浙東數府禾稼歉收。所有加賑協濟免稅截漕諸事。雖次第處分。然尚慮米穀或不敷用。因思捐監一項。向來或係赴部投捐。或在本省輸納。本屬因時之制。今浙省常平缺額。亟需籌補。所有各屬俊秀。情願報捐者。應令專於本省收捐本色。以補倉儲。至附近之江南一省。

士子應試者多。且於浙省一水可通。亦准令其赴浙捐輸本色。并著該督撫等度量現在情形。比向例稍為酌減。俾生俊踴躍從事。則士子等既可就近急公。而倉貯寬餘。民食亦得以資接濟。其兩省在部投捐之例。著暫行停止。俟將來該省米糧充裕之日。再復舊制。該部遵諭速行。○諭軍機大臣等。朕閱潘思渠摺。內稱本年六月內。收入厦口洋船二十隻。帶回米五千三百餘石。又暹羅商船一隻。買回食米四千石等語。閩浙各處現在需米孔殷。外洋產米處所。商人既可隨便帶回。若使官為辦理。多多益善。轉運流通。豈不於民食更有裨益。但慮官辦。或致外夷多疑。即乘勢居奇。多方措勒。必致價值日益昂貴。并使商船來往。亦不能隨便攜帶。轉不若仍聽商人自行買運。尚可資其緩急。著傳諭喀爾吉善。潘思渠令其會同酌量。就閩省情形。若無此慮。可即於暹羅等國產米之處。官為購運。

或先行試買。看其嗣後可以源源接運。不致啟番人捐勒之弊。抑或應仍聽商人陸續運帶之處。一一詳籌妥協。速行奏聞。尋奏臣等體察情形。番邦幅員甚狹。米價雖賤。餘米無多。且番情趨利如鶩。聞中國遣官採買。必致居奇昂價。似應欽遵諭旨。仍聽商人自行買運。至夷商運至內地。糶賣者。乾隆八年已蒙恩旨。酌免貨稅。於懷柔招徠之典。已屬周詳。其內地商人。如有運米至二千石以上者。隨時酌獎報聞。○兵部議覆盛京將軍阿蘭泰疏。請改鑄奉天將軍衙門左右兩司關防。二十八旗滿洲蒙古漢軍協領圖記。十一為盛京字樣。其協領圖記。請照錦州熊岳協領及廣寧防守尉一體改給。關防再牛莊蓋州掌印章京業改為防守尉。亦請改給防守尉關防。應如所請。從之。○是日駐蹕避暑山莊。至戊申。皆如之。○甲辰

太祖高皇帝忌辰遣官祭

福陵○諭今年長蘆竈地既有被災之處。著將長蘆十五年分帶徵課稅所有本年應交一半之項。著加恩分作三年。自明年為始。次第徵收。以紓商力。○乙巳賜扈從王公大臣等宴。○丙午

萬壽節遣官祭

太廟後殿遣官祭

福陵

昭陵

昭西陵

孝陵

孝東陵

景陵

泰陵遣官祭

顯佑宮

東嶽廟

城隍廟

上詣

皇太后行宮行禮○御澹泊敬誠殿。扈從王公大臣官員及蒙古王公台吉等行慶賀禮○奉

皇太后御勤政殿侍宴○賜扈從王公大臣等宴○命以熱河裁汰州同署賜誠親王允祕○丁未

上詣

皇太后行宮問安○奉

皇太后御勤政殿侍宴○賜扈從王公大臣等

宴○諭浙東被災各屬所有應行借給撫卹之處經該督撫等籌畫每米一石折銀一兩二錢每穀一石折銀六錢此雖係按照折價成例辦理但念該省今年亢旱非尋常偏災可比當此米價昂貴之時若仍按常例折給恐災黎不足以資餬口著加恩每米一石折銀二兩每穀一石折銀一兩二錢此次該省凡有應行折賑之處俱照此給發俾閭閻易

於糴食副朕軫卹民艱至意該部遵諭速行○又諭軍機大臣等浙省今年被災較重非尋常偏隅水旱可比閱喀爾吉善所奏查辦情形一摺朕心深切軫念所有協濟採買及免稅截漕諸事宜該督到浙時自應會同該撫實力妥辦其前後奉到傳諭之旨亦應悉心籌酌妥議奏聞但摺內所稱前因遠在閩省未接撫臣知會亦未接司道稟詳奏到諸條不無重複又稱目擊災祲已成不得不各抒所見等語情詞之間未免有先存成見之意該督統轄兩省職任綦重赴浙籌辦賑務倍應實力擔荷即永貴成見稍有未化該督亦應善體朕屢次傳諭之旨一切務去偏私和衷共濟期於有裨公事倘亦介然於此其何以上慰朕懷下籌民瘼耶又摺內稱沿山有泉源灌注地畝田禾暢茂近溪可以車戽者尚屬有秋等語此等地方雖收成數稍薄米穀尚可購覓有應賑卹之處可以酌量

折價令其自行糴食現在該督所奏折賑米穀已諭部每石增給價值該督可即查明各地方遵照新增之價一體辦理務使災黎得霑實惠○又諭據高斌王師奏稱金家角地方拏獲金魁等匪竊數十名例應分別軍流杖徒完結其莊上村界連兩省已據浙撫咨稱拏獲匪犯應聽浙省審結等語該處逼近太湖向係奸匪竄伏之所前據永貴摺奏擒獲莊上李阿貴等一案稱該犯等盤踞多年

且臨時持械拒捕其為積匪巨猾無疑今王師則稱行竊賊犯欲以軍流等輕罪完結與永貴所奏不符看來該撫因浙省先經捕獲之案在江省所屬境內而該處地方漫無覺察意在迴護處分故欲將此案從輕辦理若係案情果輕而永貴前此所為不無張大其事則當於摺內據實聲明何必含糊牽混該撫身任封疆戢盜安民是其專責不當存此等意見著傳諭尹繼善令其會同該撫將此

案嚴審確訊從重歸結不得水懦長奸致匪徒或有漏網至摺內所稱震澤令朱洽昏庸不職之處著一并交與尹繼善查辦尋尹繼善奏查江省震澤縣莊上地方與浙省烏程相接地近太湖居民捕魚為業類多潛出為匪前撫臣王師既已訪聞乃以事屬浙省不即查拏實為遲誤各犯業經解浙其有無刦奪大案現委員赴浙會審定案後照例辦理至震澤令朱洽在任二年全不覺察革職不

足示懲應令出資懸賞留於該處協緝再王師奏獲金家角匪犯金魁等地屬長洲另為一案乃未經審明豫擬軍流等罪輕結亦屬錯誤俟審明定擬決不稍有寬縱報聞○戶部議覆湖廣總督阿里衮奏稱通山當陽二縣漕糧向例每石連耗共徵折色一兩二錢五分但近年楚北米價較昂即屬豐年總未能平至一兩二三錢之下折徵採買實有未敷本省蘆溪一縣向依時價折徵請嗣後照

例畫一辦理。每年開徵時。司道確訪附近水次地方米價。即按該二縣應完米數。先動庫項。及時採買。仍將時價確數。與應徵銀兩。出示諭民完納。一切雜費。仍照通省定例。每米一石。徵耗米一斗。水腳銀一錢五分。同正額一律徵收。如有節省。詳報充公。查通山當陽二縣僻處山陬。不通舟楫。民折官辦。與蘆溪事屬相符。應如所請。從之。○又議覆浙江巡撫永貴奏稱。乍浦滿洲水師營舊兵。每名每月關支餉米二石五斗。每石。向例一兩二錢折給。新兵每名支米一石。本年四月奉旨。恩加米一石五斗。請除每月支給米一石外。其加添餉米。照舊兵例。每石一兩二錢折給。以奉旨日為始。在司庫地丁項下動支。應如所請。從之。○大學士江南河道總督兼管兩江總督高斌。協辦河務。安徽巡撫張師戴奏。奉諭辦理浙省賑卹之需。臣等悉心籌畫。凡一切支放。均當移緩就急。查杭嘉湖三府屬。編

徵河工銀共一萬五百餘兩。又兩浙運司羨餘銀一萬兩。每年例於三四月間解交江南。河臣處存貯辦工。今該省數郡被災。民間錢糧既難依期完納。此項不妨暫停解送。留濟本處急需。俟來歲秋成豐稔。照數補解。得旨。該部知道。○戊申。

上詣

皇太后行宮問安。○奉

皇太后御勤政殿侍宴。○賜扈從王公大臣等

宴。

大清高宗法天隆運至誠先覺體元立極敷文
奮武孝慈神聖純皇帝實錄卷之三百九十六

大清高宗法天隆運至誠先覺體元立極敷文
奮武孝慈神聖純皇帝實錄卷之三百九十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件總管理

吏部理藩院事務高糧滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文學殿大學士文淵閣領閣事稽察欽奉 上諭事件總管理刑部戶部工部事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄四次臣等謹將經筵講官太子少保工部尚書紀錄六次臣等謹將等奉

敕修

乾隆十六年辛未八月己酉

上奉

皇太后自避暑山莊迴鑾○諭今歲浙東被旱
成災經朕多方籌畫降旨截留該省漕糧五
十萬石以備賑糶之用更念此次被災較重
所有本省漕糧內即有應行緩徵帶徵之項
尚應多為籌備以資接濟著加恩將江蘇省
應運漕糧再行截留三十萬石運往浙省交
該督撫以為酌量動撥賑糶之用其各州縣
屬倉儲有應行酌補者於本省截留五十萬

石內從容通融撥補。朕軫念民艱。不惜屢施格外之恩。該督撫等務期董率屬員。實力妥辦。副朕加惠災黎之意。該部遵諭速行。○是日。駐蹕喀喇河屯行宮。○庚戌。

上詣

皇太后行宮問安。○兵部議奏署正紅旗滿洲都統等叅奏騎都尉唐凱等從牧廠私自回京。應照例革職治罪。得旨。著照所奏行。唐凱等潛回京城。皆由牧廠副都統等不行約束。

聖祖仁皇帝

三

所致。伊等若果於波羅河屯交馬事畢。即將隨來官兵查明帶領行走。唐凱等焉敢私回。況此事已據該旗叅奏。而派出牧廠之副都統等。竟若罔聞。殊屬不合。再此次補給木蘭圍上隨來人等。自廠趕來馬匹。皆甚疲瘦。該副都統等猶以回自江南。出廠日淺。未能臚足為辭。朕自江南回鑾後。隨往人等騎回之馬。數止四千匹。其從前留京馬匹內出廠者。有八千匹。今計波羅河屯補給馬匹。僅需六

千。此項趕來馬匹。自應在京城出廠八千匹內。揀選臚好者趕來。豈有反將江南騎回。最後出廠馬匹趕來之理。明係借端取巧。甚屬不堪。著將派出牧廠之副都統等。交部嚴察議奏。○是日。駐蹕常山峪行宮。○辛亥。諭金朝陵寢。近在房山。歲久榛蕪。未經修葺。朕惟金太祖。金世宗功德載在史書。景仰傳之奕禩。我

世祖章皇帝

聖祖仁皇帝

三

聖祖仁皇帝。隆禮有加。並御製碑文。勒石建亭。以垂不朽。顧念國家祀典。光昭。雖以時遣官將事。而一切享殿繚垣。儀制所存。觀瞻宜備。其令直隸總督方觀承前往相度。應增修除治者。即行奏聞。率屬鳩工。庀事工竣之後。朕將躬親展奠。以昭敬禮。前朝之意。○又諭。朕於九月十三日。恭謁泰陵。著各該管官。照例豫備。王等不必前往。仍令此次扈從大臣等隨去。至拜唐阿兵丁等。

亦於此次扈從內酌派著加恩各賞給一月錢糧。○又諭前因八旗生齒日繁命大臣等詳悉籌畫其有情願前往屯莊務農之人給予官田並置立牛具房屋銀兩俾得勤習農務以為生計。今據直隸總督方觀承奏稱遣赴屯莊之人力田謀生者甚少並有冒領官地官銀任意花銷逃回京城者當日舉行此事原為裨益旗人起見今行之數年不特無益轉開不肖匪徒冒領銀地之弊實屬有負朕恩著八旗大臣等將逃回之人嚴行治罪外嗣後應否仍遣務農及如何調度之處并著軍機大臣等會同八旗大臣等議奏尋奏屯田旗人共派一千二百六十四戶內未往者九十九戶據報惟鑲黃旗漢軍高紀潛逃餘或脫逃在外或係本佐領隱匿不報現飭八旗行查如由該督查出將該佐領治罪逃人家屬發遣拉林耕種至未經前往者業給安插之資令限期遣往嗣請無庸再派其

贖回民典旗地應行徵租處另議請旨從之。○是日駐蹕兩間房行宮。壬子

上詣

皇太后行宮問安。○諭軍機大臣等前因浙省辦災該撫過於張皇已屢經傳諭訓示今閱喀爾吉善奏摺既稱從前應賑戶口原冊率混開報無所紀極而永貴摺內亦稱已照前開戶口刪去力能自贍之家十之四五可見永貴張大其事無怪官吏紳民等聞風效尤多方冒濫必至於此果不出朕之先見矣至該省所需賑卹米石前既協濟隣封後復採買免稅並照樂善好施之例勸諭富戶出糶近經降旨截留漕糧至八十萬石自可通融濟用又該督撫所奏續經得雨之後晚禾雜糧皆已可望有收目下米價每石二兩以外在被災地方亦不為甚昂所請開捐一事本非辦災正理豈得以一省夏收被旱即行援例興舉况揆之該省情形籌備之策現已次

第經理所請亦不必行。若如永貴所奏三百萬石米糧為必不可少之項。又欲撥奉天山東之雜糧以充食用。是全不思該處民人已經被災而欲統計其失收之數。盡行仰給於官。且隔數省之地為之絡繹轉運。自古荒政多端。有如此辦理者乎。所有籌辦事宜。前後頒到諭旨。不啻至再至三。惟在該督撫等董率屬員。實心實力。一切遵照妥辦。朕勤求民瘼。宵旰焦勞。於凡各省議蠲議賑。寧使失之

實錄卷三九七

過厚。此中外臣民所共知者。今以該督撫等張皇失措。致朕屢念訓飭。轉似為之節制者。然其實準情酌理。事在必不可行。若不示之節制。是又過猶不及。且各省水旱不齊。設有似此者。何以處此。現因該省災黎時刻屢念。吳進義以武臣身在地方。尚將得雨之後。民情寧帖各情形詳悉入告。以慰朕懷。該督撫豈轉計不及此耶。著將原摺鈔寄閱看。前覽該督撫奏摺彼此不無各存意見。是以諄切

開導。今既奏稱現在和衷辦理。自是封疆大臣奉公敬事之道。然此特其一端耳。該督撫不能慰朕者多矣。此諭到著將目前情形速行合奏以聞。尋奏浙省本年旱災。仰蒙逾格之恩。籌畫備至。災黎無不鼓舞歡欣。秋來各屬得雨。後晚禾雜糧俱見暢茂。自撥運招商市價較夏大減。從前節次所奏。臣永貴因災地甚廣。積儲空虛。是以冒昧入告。今通盤籌算。所有賑卹口糧。雖尚需米一百三十餘萬

實錄卷三九七

石。而照例一半折色。可酌留餘米。以備平糶兵糧之用。報聞。○又諭曰。阿思哈所奏流寓介休王肇基呈獻詩聯。毀謗聖賢。狂妄悖逆之處。著傳諭該撫。令其速行嚴密訊鞫。務得確情。按律問擬。毋得稍有漏網。至摺內所稱總督碩色。前奏赴滇過普之客人一案。王肇基迹涉可疑等語。該犯果否知情。該撫尤應悉心根究。如實係彼案黨羽。証據確鑿。即徹底密行嚴辦。不得希圖速結。遂立時杖斃。致

情罪重大之惡犯。不得明正典刑。若與彼案實無關涉。則王肇基自有應得之罪。亦不必先存成見。勉強牽連。惟在該撫嚴審速辦。期於無枉無縱。一有實在情節。即行奏聞。再其所獻詩聯等單。亦應進呈朕覽。著該撫即由驛遞具奏。毋俟進摺之便。以致稽延。尋奏。臣親提嚴訊。據供。獻詩祝頌。止求朝廷用我。其詩聯字句。雖俚鄙不堪。尚有頌揚之意。至續後所敘。妄議時事。毀謗聖賢。悖謬已極。似屬

軍機處存案

瘋癲。再四盤詰。與滇省傳播不經之詞一案。並無關涉。謹將詩聯字冊。由驛進呈。得旨。知道了。竟是瘋人而已。○調福建金門鎮總兵馬員書為臺灣鎮總兵。廣東碣石鎮總兵張接天為金門鎮總兵。以廣東香山協副將林朝翼為碣石鎮總兵。○是日。駐蹕要亭行宮。○癸丑。兵部議覆安西提督永常奏稱營伍演習技藝。如矛子一項。馬上尚可施用。其餘藤牌。挑刀。擡手。不獨馬上難施。即步兵亦無

實用。請停操演。俾專習弓箭鎗礮。再甘省各提鎮營戰兵。原以豫防哈密調遣之用。其藤牌等技。亦屬無用。請概停操。查藤牌挑刀等項。軍營步兵。向例演習。實以踴躍超距。能令筋力強壯。未為無益。但安西係邊隘要地。既稱此等器械。於該處不甚相宜。應如所請。停操。俾專習弓箭鎗礮。以收實用。至甘省各營情形。與安西未必盡同。兵丁操演已久。未便概停。從之。○又議覆雲南曲尋鎮總兵莽阿納奏。稱武職分設標營。各有應辦事件。如遇陞遷事故。委員署理。滇省地方遼遠。接任新員。必閱一年半年始到。請嗣後缺出。於本營屬員內。就近護理。如有分發候補之員。即照員缺相當者。委署。應如所請。飭雲南督撫提鎮遵照。從之。○以貴州大定協副將米世泰為河南河北鎮總兵。○是日。駐蹕密雲縣行宮。○甲寅。戶部議覆雲貴總督碩色奏。稱滇省每年辦解京銅六百三十三萬一千四百

餘觔向來尋甸東川兩路分運。東川府應運三百十六萬五千七百餘觔。由東川陸運至昭通。計馬程五站半。需腳價銀二萬二千餘兩。雇募民馬二萬餘駄。實屬艱難。既慮遲延。復多賠累。不若安設牛站為便。并改由東川魯租硝廠河馬鹿溝大布夏以抵昭通。計程二百九十里。馬行止四站半。但須於牛欄江建大橋一。硝廠河腊溪河各建小橋一。沿途修平道路。車可通行。並節省一站腳費。應以

四十里設一站。共分七站。每站安牛八十隻。車八十輛。約計十個月半。可運銅三百十五萬觔。較前腳價每年節省五千六百餘兩。應如所請。其節省銀貯庫為辦銅工本。修路建橋。買牛製車。銀一萬三百餘兩。先以舊設腳價墊發。工竣即以每年所省歸補。從之。又議准。湖南巡撫楊錫紱奏稱。宜章縣東門外。及上堡市白沙等處。向因銅鉛必經之路。是以添設卡役巡查。今查柳桂二廠山口。及大

路僻徑。俱令商人設卡分巡。又撥官役協同稽察。立法已密。請將該處三卡無庸設立。從之。○是日駐蹕南石槽行宮。○乙卯

上詣

皇太后行宮問安。○諭軍機大臣等。提塘吳士周稟出赴滇過普客人。鈔寫捏造奏章。硃批。一事經總督碩色於七月初二初六等日兩次奏聞。乃時逾二旬。始據開泰繕摺具奏。甚屬遲緩。此等惡逆狂悖之詞。凡為臣子者。驚聞之下。無不痛心切齒。願得食肉寢皮。開泰既接總兵宋愛知會。自應憤恨交迫。急不待時。即由驛遞星馳奏報。今遲遲不發。仍循例俟齋摺家人入奏。獨何心耶。豈伊自負曾經讀書。而轉以此事為天壤間可有之事耶。開泰著嚴行申飭。至摺內所有守備彭朝貴。身列職官。為營伍之長。乃目覩大逆之語。猶信以為奏過本章。居然彼此傳看。雖平民下愚。亦不應出此。似此劣弁。即應革職嚴究。何以

尚爾姑容。看來此種逆詞。輾轉鈔錄。其中必有克惡渠魁。利於處處發覺。轉得逞其狂吠之私。然國法所關。豈得謂一一根究。惟恐株連者多。遂不徹底查拏。使逆黨稍有漏網。取已降旨附近各督撫。令其實力蹤跡。盡法痛懲。著并傳諭開泰。務須密訪嚴搜。一有端緒。即速驛遞奏聞。倘再不知奮激。或與尋常承緝之案同一辦理。不過日久歸之子虛。則自取罪戾。將不可追。慎之慎之。○戶部議覆直

隸總督方觀承奏稱。前奉諭旨。奉天支剩黑豆。運交通倉。豐收再行購買。隨船搭運。歲以為常。所有運豆船。多用天津商艘。請編字號。以三十船為一起。給票按起發運。水腳諸費。無論海道內河。均在直省司庫撥給。即令奉天運員。徑至通倉交卸。均應如所請。從之。○貴州巡撫開泰遵旨覆奏。前據威寧州面稟。廠員龔憲臣。將越界開爐之羅奇熊。責處十板。旋即身死。伊族羅應先等。藉端控辱。廠員

肆行不法一案。當飭該州嚴拏刁棍。并查廠員是否決罰如法。有無別情外。並令該府司道究辦。嗣據稟稱。羅奇熊當日聞廠員查勘。由陡坡山路奔馳而來。年老力衰。被責後。氣逆殞命。臣復親行研訊。實無別項情弊。現將首從各犯。分別定擬。另奏得旨。此事究屬不明。今於匿名一案。看汝如何根究。盡心以贖前愆耳。勉之。○予故總管內務府大臣丁皂保。辦喪銀一千兩。命散秩大臣一員。帶領侍衛。往奠茶酒。下部議奏卹典。○是日。駐蹕湯泉行宮。翌日如之。○丙辰。

世宗憲皇帝忌辰。遣官祭泰陵。○諭軍機大臣等。方觀承奏到查訊各犯一摺。已經閱看。無可批示。看來古北口外一帶。所有傳寫稿底。皆由關永寧自素。強縣吳茂處攜至。實為此案一大關鍵。素強與保定相距不遠。該縣既有應行根究之犯。該督或竟可取道赴保。就近查辦。較為妥便。抑或口

外此時尚有應行留駐查辦之處。著方觀承酌量定奪。至案內輾轉傳看各犯。雖其中情罪自有輕重。但事干不法。且供証未明。難為定案。將來分別首從株連。或施恩量加減宥。朕自親加裁定。現在一切人犯。均應加意看守。未便遽行釋放。該督一并酌量。或就便暫交提督衙門。及同知衙門。量為分別拘禁。將此即行傳諭知之。○禮部議覆御史章有大奏稱。前奉諭旨。因浙東歉收。令生俊捐收本色。江南省亦准赴浙輸捐。伏思明年二月。即屆場期。請此次在浙報捐者。准以實收應南北鄉試。應如所請。江浙兩省在浙報捐生俊。應本省鄉試者。將實收呈該學政查驗。應順天鄉試者。呈國子監查驗。均准一體入場。再江西亦與浙江隣近。並請令生俊一體在浙報捐。亦應如所請。得旨。依議速行。○丁巳。

上詣

安佑宮行禮。○詣暢春園。問。

皇太后安。○幸圓明園。○諭軍機大臣等。前據總督碩色摺奏。古州鎮總兵宋愛。接據提塘吳士周呈稟。赴滇過普客人。鈔錄訛謗之詞。竟係假托廷臣奏章。捏造誅批種種狂悖。當即傳諭直隸。河南。山東。山西。湖廣。貴州。等省各該督撫。令其密行訪緝嚴拏。今據開泰摺奏。吳士周供出往滇賣黃連之四川客人譚永福。所鈔等語。逆詞既係川省客人鈔出。恐此案黨羽。在該省潛蹤傳播者尚多。不可不嚴行根究。著傳諭策楞。令其遴委幹員。實力搜緝。一有蹤跡。即行嚴密查拏。具摺速奏。看來此案。必有悖逆渠魁。暗中散布。希冀處處發覺。得以逞其狂吠之私。但國法攸關。不得謂一一株連。惟恐轉墮其術。遂不徹底根究。致逆徒稍有漏網也。策楞尚非好名姑息之流。毋庸多諭。○戊午。

上詣暢春園。問。

皇太后安。○軍機大臣等議覆山海關監督高

誠奏稱前經奉天將軍阿蘭泰奏准自法庫門起至明水塘十邊地方照威遠堡等六邊之例一應商販出入俱由該地方給發印票邊關官兵驗票放行但清河門九官臺各地方產雜糧煙葉羊皮瓜子等貨蒙古客商貿易隨到隨行進口車輛盈千累萬必一一驗票放行行旅壅滯內地商販亦必畏難不前請照舊例免其驗票查慎重邊防全在該管弁兵留心稽察如稽察不嚴即驗票放行難保一無偷漏徒使兵役借端滋擾應如所請十邊地方凡商販蒙古人等載貨出入無庸驗票仍令該將軍實力督察巡防從之○己未諭朕今歲南巡浙江見蕭山會稽一帶河道甚為淺窄後聞夏旱之時河流淤涸舟楫難行又別無旱路可通以致米價頓昂較他處更甚朕思疏濬河道本以便民若乘此時以工代賑開通深廣足垂永久之利該督撫即行相度估計奏聞辦理此就朕所經臨親

見者為之籌畫外此或有當疏濬興工之處該督撫次第酌量修舉俾貧民得資餬口亦屬荒政應行之一事○賑河南商邱永城鹿邑虞城夏邑陽武封邱祥符延津滑縣河內武陟原武中年等十四縣河漲被淹成災貧民○陝西興漢鎮總兵杜愷以病解任調福建金門鎮總兵張接天為興漢鎮總兵以湖廣洞庭協水師副將馮滙為金門鎮總兵○庚申遣官祭

歷代帝王廟○遣官祭

都城隍之神○諭據雲南總督碩色摺奏滇省傳播偽撰孫嘉淦奏本逆犯因交各省緝拏茲據山東按察使和其衷摺奏本年四月間訪聞省中傳鈔偽造孫嘉淦本稿一紙肆行誣謗隨加根究來歷得自江南水利廢員當即稟明該撫準奏請一面奏聞一面咨明江南督撫嚴加查緝乃準奏以無庸深求亦不必具奏將原稟勾抹發還改為拾自途中

擬杖完結。近奉旨緝拏滇省傳播偽造孫嘉淦奏本逆犯準泰並不將鈔寄原底發看。且諭令不必牽涉前案等語。是此案四月間在山東發覺。即應根究。且無論廢員。即現任之員。苟犯不道誹謗之罪。亦應嚴拏治罪而已。準泰身任巡撫。平日一味取巧因循。已不能稱職。及見此誣謗悖逆之詞。竟至忍心隱匿。實出朕意料之外。及至蔓延滇省。奉旨查拏逆犯。尚論該按察使不必牽涉前案。明係因從前逆犯房鉉一案。曾經梅穀成奏。今此案與房鉉之誣謗。如出一轍。恐由伊根究得實。又招庸愚無識者之訾議。則是惟知自顧已私。遂置君臣之義於不問。且此等夢囂譸張之詞。即朕寬大。不令深究。獨不思為風俗人心之大害乎。封疆大吏。居心若此。國法實不可容。已著侍郎兆惠馳驛前往。將準泰革職拏問。所有摺內情節。逐一徹底確查。山東巡撫員缺。著鄂容安調補。速行赴任。鄂容安

未到之前。著兆惠暫行署理。鄂容安接印後。兆惠即將準泰押解來京。○又諭河南巡撫鄂容安。已調任山東。所遺員缺。著舒輅調補。陳宏謀現在來京。陛見。河南路所必經。舒輅未到之先。河南巡撫事務。即著陳宏謀就便暫行署理。俟舒輅到豫。再行來京。江西巡撫員缺。著鄂昌調補。舒輅俟鄂昌到任後。再行前赴河南。甘肅巡撫員缺。著楊應琚補授。○又諭河南陽武漫口。尚未合龍。現在加工堵築。巡撫鄂容安。已調任山東。顧琮一人力難勝任。南河秋汛已過。大學士高斌現請來京。著速行前赴河南。相度堵築。俟工竣。再行來京。陛見。○又諭軍機大臣等。據山東按察使和其衷奏摺。本年四月二十日。沂州府蘭山縣鋪戶章邱縣民人李僕。至濟南府。帶有訛傳工部尚書孫嘉淦奏稿一紙。被省中人鈔寫傳播。見其言詞甚屬狂悖。輾轉根究。云借自原在江南水利効力州同官貴震。仍交帶

回官貴震現居江南江寧府上元縣花牌樓地方等語著傳諭該督尹繼善即速將官貴震密拏就近嚴加究訊徹底查辦務得確實來歷毋稍有洩漏致聞風漏網若根究至現任之員即當拏問如存隱匿草率了結之見必於該督是問尹繼善之果能遵朕訓諭改向來好名之習與否將於是案觀之○又諭據顧琮奏豫省陽武漫口現在水深二丈十六堡大壩水深四丈雖稱刻期趨辦但黃河水性湍急深至四丈豈易即望合龍鄂容安已調任山東在工惟顧琮一人力難勝任總河大學士高斌著速行前赴陽武工次相度堵築朕披覽原圖似應於十六堡大壩之東另開引河以分水勢但未悉確實情形若何高斌深諳水性其可否開挖引河之處親行詳悉必有成算著一面辦理一面奏聞亦不必因有此旨故為遷就其硃筆畫出原圖一併發交閱看○又諭前因浙省需米孔殷曾

經傳諭尹繼善王師遇有隣省赴浙米船毋任地方官取便多買并令催趨前進今據江蘇布政使郭一裕奏報江省雖間有水旱不齊之處不過一隅偏災其餘各屬早稻晚禾可稱豐稔目下米價每石自一兩八錢至二兩不等是該省情形較之兩浙大為懸殊封疆大吏雖守土攸分自朕視之均屬一體該督撫自應仰體朕心不得稍存此疆彼界之見其間凡有可為浙省協力助理者亟宜留心籌畫所有赴浙米船自應遵照前旨作速催趨前進至地方米價平減之時屬員取便多買勢所必至尤應加意撙節使隣封藉以接濟現在江省本地既獲豐收又與江廣產米之鄉相去甚近自可轉輸接濟民間米糧想不因此有增長之患也著再傳諭該督撫知之○辛酉

上詣暢春園問

皇太后安○還宮○諭軍機大臣等滇省傳播

偽撰孫嘉淦奏稿逆犯前經傳諭直隸等省督撫密行嚴拏該督撫等奉到諭旨有將現在查辦情形奏聞者亦有尚未具奏者此案將來辦理自當分別輕重所有首先誣捏撰寫分散傳播之犯自屬首惡渠魁其輾轉傳鈔雖均非我國家生養編氓之所應有然其中情罪亦異如見此技癢鈔錄傳寫流播人口藉以煽惑衆心或為之注釋及仿效詞句私自記載者均當從重辦理至得之傳播實係愚懵無知一時私鈔未經轉示他人者又屬有間該督撫等辦理此案當量其情罪知所區別恐各督撫各出意見輕重反不合宜是用先為明白宣示辦理梗概至此等醉生夢死不知天高地厚一以幸災樂禍為心實乃害稼之蠱賊其貽害於風俗人心者甚鉅不可不亟為翦除倘該督撫等姑息養奸惟恐株累多人思欲苟且了事不實心查辦則有準泰之前車在將此通行傳諭知之○又

諭湖北巡撫恒文奏到查拏偽造孫嘉淦奏稿逆犯已將滇省咨查之陳俊臣等拏獲到案并飛咨江西撫臣舒輅密拏江錦章等語此等悖逆誣謗之詞肆行傳播實為風俗人心之大害既經犯出不可不痛絕根株該撫查辦此案迅速嚴密深屬可嘉至案內搜出逆書之金汝政一犯其罪又不僅在傳鈔偽奏蓋此案捏造首犯固為罪魁其輾轉傳鈔罔識天高地厚已非我國家養黎民之所應有但其罪較之造謀誣謗首犯自屬有間若借此煽惑愚民別有情節又當從重辦理至金汝政鈔藏妖妄逆書顯係幸災樂禍不逞兇徒更當以謀逆首惡入罪而不宜入於傳鈔偽奏為從之犯而論也將此傳諭恒文知之○又諭據湖北巡撫恒文摺奏查拏滇省傳鈔偽撰孫嘉淦奏稿逆犯逐一根究云係江西天一堂舖內江錦章所寄已用日行六百里公文咨江西撫臣舒輅密拏江錦章

到案究出捏造首惡等語。恒文辦理此案迅速嚴密。甚屬留心。其移咨舒輅。自早已接到。著速行傳諭舒輅。看其如何辦理。倘謂不由江西發覺。置之膜外。或因已調任豫撫。稍存諉卸之見。則有準泰之炯鑒。在其自審度之。○江蘇巡撫王師故。以戶部侍郎江蘇學政莊有恭。為江蘇巡撫。調浙江學政通政使雷鏐。提督江蘇學政。以吏部侍郎彭啓豐。提督浙江學政。○壬戌。

上幸瀛臺。○諭本年六月廿五日御殿。因行禮之大臣官員等。朝服遇雨露濕。加恩賞給正俸之半。今據通政使傅森奏。該衙門參議福登額。雙鼎揚如松。但經投遞職名。並未到班行禮。輒行冒領恩賞。殊屬無恥。視朝大典。因遇雨而託故不到。已非敬爾在公之義。至領賞造冊之時。即應據實扣除。乃復覲顏冒領。毫不知愧。身列班聯者。豈宜出此。通政使既已查出。恐其餘冒領者。未必止此三人。著

都察院會同禮部鴻臚寺。按冊通行查覈。領賞人員內。有但交職名。實未到班行禮。而領賞者。即行指名具奏。○又諭軍機大臣等。江蘇巡撫員缺。已降旨令莊有恭補授。江蘇為封疆最繁之缺。莊有恭由朕特達之知。迭加超擢。又因伊兩任該省學政。士習民風。諒所諳曉。是以特行委任。伊當倍加感奮。實心實力。以副任使之意。下江俗尚浮華。其人文而少實。此朕南巡時得之親見者。莊有恭到任後。宜悉心振刷。挽回。毋令趨於澆薄。至積欠一項。王師尚肯任事。所辦已有端緒。莊有恭應力為擔荷。接辦妥協。不得稍涉因循。瞻顧紳士。蹈沽名邀譽之陋習。朕於該撫有厚望焉。○又諭原任江蘇巡撫王師著加恩給與伊祖父母父母封典。○戶部遵旨議覆。四川總督策楞奏。稱滇黔辦運銅鉛。川江水急。灘險。大船轉運不靈。向用夾舢。舢尾中船。恐滿載太重。每船約載七八萬觔。以八分為度。若

改用小船所載不及此數而船多雇覓維艱必致達限不如照舊為便應如所議仍用夾舡禿尾中船運員不得減少船隻額外裝載并私帶貨物經過地方有司實力稽查從之○又覆西安布政使張若震奏稱陝省商販鮮通米糧從無外至乃小民不知務本貴粟將膏腴地畝廣種烟草以圖微利耗廢農業請嗣後除城堡內閒曠之地及城外奇零菜圃仍聽種烟外其四鄉平原沃壤宜五穀者如有種烟一畝至三畝以上分別輕重治罪有司失於稽察每案罰俸一年查雍正五年世宗憲皇帝諭旨惟飭有司勤加勸諭而不遽繩之以法者誠以愚民僅顧目前不知久遠欲驟挽圖利之習必滋紛擾况地方遼濶查勘難周不肖鄉保借端需索所奏立法治罪議處實於公事無益無庸議從之○兵部議覆湖廣總督阿里衮奏稱湖南洞庭一協以水師營分兼應陸路差務戰少守多請於通

省營伍中戰糧數多者照戰三守七之例撥換業咨商提臣於步戰較多之常德漢陽荊州岳州水師四營內共裁步兵五十六名改撥洞庭協應如所請將洞庭守兵五十六名改為步兵於常德等四營各裁步兵十四名改為守兵所餘之餉撥給洞庭協改步之餉從之○癸亥

上辛瀛臺○諭八旗米局原因鋪戶乘賤收買居奇擡價有妨民食起見但現設二十四局不能盡得妥協之人經理其事以致辦理多有未善或任聽奸民赴局私買囤積漁利轉滋弊竇應將現在米局酌量裁并或八旗共立八局分為左右二翼特派大臣總理其在局辦事人員亦俱慎為遴選所有一切收支數目俱由該處自行銷算於年終奏明交部查覈責成既專自可隨時調劑以平市價於京師民食似為有益其應如何裁并之處著八旗大臣詳議具奏尋議奏京師地廣民繁

官局米需多貯一局地窄收貯無幾且糴米人衆擁擠恐奸商混雜私販從前辦理不善原因每局分隸一旗經管多員責成未專所致今分為左右二翼特派大臣總理其舊設之局仍存惟按該局坐落地方需米多少不必拘定原額其八旗總理大臣請旨簡用一切糴糶平價及歲底銷算令其酌辦至管理人員亦候旨簡派令專司米局不必更兼旗務三年期滿分別議敘處分現存米石舊管

大臣出糴將原價一併交代從之○又諭前因浙省辦理賑務需米孔殷曾經降旨令本省捐輸生俊及附近之江南江西赴浙報捐者俱交納本色以資賑卹之用第念該省現在歉收生俊因上捐一時爭先購買恐米價益致昂貴於災地轉屬無益應量為通融調劑所有浙江士子在本省援例者准其照在部報捐之數收納本色其江南江西赴捐生俊有情願交納本色者照該督撫現在議減

之數報捐但應於各該本省自行備穀運往不得就浙省購買其願捐折色者亦照戶部定數交納該部遵諭速行○又諭軍機大臣等覽山西巡撫阿思哈所進王肇基書一本顛狂悖謬竟是瘋人所為與滇省偽造奏稿一案並無關涉但此等匪徒無知妄作毀謗聖賢編捏時事病廢之時尚復如此行為其平昔之不安本分作奸犯科已可概見豈可復容於化日光天之下著傳諭該撫阿思哈

將該犯立斃杖下俾愚衆知所炯戒其母妻現在晉省亦著該撫嚴加訊問是否知情如果不知情飭令押解直隸原籍交地方官安插至滇省偽造奏稿逆犯該撫應仍遵照前旨速行密飭嚴查不得稍有疎縱○戶部兵部議覆漕運總督瑚寶條奏○江省起運白糧船向例五年調換查漕船抽選運白時雖止經二三運迨加運白五年已至七八運丁即殷實而船不盡堅固請照漕船三年抽調

例。定以運白三年。即行另選。應如所請。於通省漕幫內。挑選丁殷船固。及未經運過白糧者。三年抽換兌運。一領運千總。幫缺繁簡有分。陞用自應區別。請嗣後將繁缺千總。推用二人後。再將簡缺應陞者。推用一人。查銓選若區缺分繁簡。則將來衛守備缺。多歸繁缺千總陞用。而簡缺千總。益致陞用無幾。應毋庸議。一隨幫武舉。於掣定幫次後。如有捏病回籍調理者。病痊後。仍令守候原缺。不得改掣別幫。查隨幫捏病之弊。皆緣向無坐補原缺例。致開趨避之端。應如所請。毋許另掣幫分從之。一以兵部右侍郎汪由敦為戶部右侍郎。詹事府詹事裘曰修為兵部右侍郎。一以陝西按察使吳士端為甘肅布政使。河東鹽運使武忱為陝西按察使。○豁免甘肅平涼涇州。安化西寧肅州。五州縣。乾隆十五年。被雹被旱成災地畝。額徵地丁銀四百八十兩有奇。起存糧九百七十石有奇。草五千七

百束有奇。○是月。兩江總督尹繼善奏報。江南下江之銅山。邳州。宿遷。睢寧。豐縣。沛縣。蕭縣。碭山。八州縣。徐州一衛。或因雨水過多。或因湖河盛漲。田禾被淹。其上元。江寧。六合。江浦。高淳。溧水。金壇。溧陽。宜興。荆溪。等十縣。及上江之績溪。歙縣。宣城。南陵。涇縣。寧國。旌德。太平。貴池。青陽。銅陵。壽州。廣德。建平。當塗。合肥。和州。十七州縣。并宣州。新安。建陽。鳳陽。四衛。俱被旱災。宿州。靈璧。虹縣。并宿州一衛。又被水災。第傷於澇者。惟極窪積水之區。而高阜並無妨礙。傷於旱者。惟依山傍麓。無水可庠之田。而平原禾稼。均係暢茂。其餘各屬。雨暘適均。一律豐稔。現賑卹事宜。按被災輕重。飭屬實力辦理。得旨。是其有成災者。善為撫卹。毋致失所。○湖廣總督阿里衮奏。據鄖陽副將詳稱。該協原領生息本銀二千兩。歲獲息銀三百五十兩。每年賞兵需四百餘兩。其不敷者。於道庫領餘息添補。鄖陽離省頗遠。

與其赴道請領不若酌撥餘息添作本銀營運俾兵隨時濟用查舊例各營餘息存貯司庫不准復行作本生息然聽其不敷賞給赴道請領恐不能隨時濟用并有未領本銀之各營赴道請領者今議得未經領本之蘄州安陸道士洑荊水師四營安陸附近德安荊水師與荊城守營同城該二營即於德安荊城守營餘息內支領其蘄州道士洑二營俱黃州協所屬即於該協支領均不必遠赴道庫但黃州協餘息添撥二營恐致不敷應再撥本銀一千兩鄖陽協亦添撥本銀六百兩即於督撫二標穀城一鎮餘息稍充處撥出得旨如所議行○湖南巡撫楊錫紱奏報本省七月中旬連日大雨水漲長沙府屬之茶陵州衡州府屬之酃縣郴州屬之永興興寧二縣及該州之西鳳永豐二鄉間有塌房損禾之處被災尚非深重業經動支公項賑卹得所得旨覽其應行撫卹者妥協為之○陝

甘總督黃廷桂議奏陝省生息銀兩如督撫二標固提所屬及興漢各營現俱交商領運以一分五釐取息惟延綏鎮本息銀二萬二千一百餘兩該鎮地處極邊商賈罕至承領之人又不便令營中自行開當致啓官兵私借及以賤質貴等弊查西安省會商賈駢集請將延綏本息銀撥給西安屬之咸寧長安咸陽富平涇陽三原等縣募商領運以一分二釐取息按季解司以備兵丁賞需得旨如所議行○調任陝西巡撫陳宏謀奏陝省水利如富平縣之大水峪古渠鄠縣之呂公渠鄠縣之斜峪關渠寶雞縣之利民渠蒲城縣之漫泉渠興安州之萬工塋現皆諭民興修疏濬淤塞并酌定民間分水日期以杜訟端期於利垂經久得旨此皆利民之事最宜行之然要於不擾民而得實惠則善矣○四川總督策楞奏前接部咨凡川滇陝甘等省前往西藏貿易商賈概停如有由打箭爐出口

者。官給印照。准其前往查各省民人在打箭爐以外貿易者。不止西藏一帶。如類烏齊察木多。乍。及裏塘巴塘。明正土司所屬地方。在在都有現赴西藏貿易者。業由布政使給照。都統等查明造冊。其藏外各處。仍易混冒。亦請飭文武臺員。會同土司。概造姓名年貌清冊。齎送駐藏大臣備案。並給印照。於進口時驗放。如無照者。即跟究何地私越。將失察官叅處報聞。○貴州巡撫開泰奏黔省舊例。

字未三十一

一

馬販赴川黔夥伴不得過十人。官給印照。買齊後。該地方官鈐印。方許趕回。第日久廢弛。若不量為分別。難免滋擾。今議得都勻黎平南籠三府。長寨郎岱八寨台拱松桃古州歸化丹江都江清江水城十一廳。定番獨山永豐三州。荔波永從二縣。及都勻屬之都勻縣。黎平屬之開泰縣。均苗疆要區。禁止馬販。其餘各屬。仍准赴買。豫報該地方官責成鄉保。於場集購買。不得私入苗寨買足。即呈明回。

籍違者重懲。得旨。知道了。此恐為有名無實之舉。○又奏。各省軍流等犯。發遣貴州者。前經部議。俱解巡撫衙門。就地方情形。派撥安插。原為慎重苗疆起見。今查各屬中。竟有轉發土司者。伏思此等人犯。狡悍者多。守分者少。即安插內地。尚須時加約束。若令與苗夷雜處。難免教誘為匪。現飭各屬。嗣有軍流等犯。概不得轉發土司。得旨。此見是。

字未三十一

三十一

大清高宗法天隆運至誠先覺體元立極敷文奮武孝慈神聖純皇帝實錄卷之三百九十七

大清高宗法天隆運至誠先覺體元立極敷文奮武孝慈神聖純皇帝實錄卷之三百九十八

監修總裁官經筵講官太子太傅文淵閣大學士文淵閣領事內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三事事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未九月甲子朔諭曰碩色摺

奏貴州出師金川故兵家口前照部定之例不論有無子嗣俱月給養贍半餉續經題定此內並無子嗣者改為月給米折合計浮支銀兩按數繳還等語兵丁等効命戎行所遺眷屬自應優加體卹若再按數追繳未免生計艱難情殊可憫所有該省故兵家口本年夏季以前應追浮支半餉銀兩著即加恩豁免又諭朕因浙省寧紹等屬被旱歉收米價昂貴綠旗兵丁所得月餉不敷買食曾經

降旨將被災各標協營兵丁俱令借給米石以資接濟但念該省今年旱災稍重各屬米糧一例昂貴轉瞬隆冬窮兵衣食未免多屬拮据著再加恩將浙江通省兵丁每名借給一季餉銀該撫於司庫內動項借給俟明年夏季後分作四季扣還歸款以示朕格外體卹之意并傳諭該督提等嚴飭營弁毋致絲毫侵剋俾得均霑實惠又諭曰兩廣總督陳大受奏稱滇省委員永北府知事張彥珩來粵買兌鹽觔起運於上年八月本年三月連報遭風漂沒至五月內又於百色城外捏報被燒當即查驗並無鹽觔被燒蹤跡隨盤詰船戶據供燒係空船鹽觔已同運官沿途賣去應聽滇省題參究擬等語各省委員運辦鹽觔銅鉛等項皆公事所需上關帑項其間中途盜賣種種弊竇皆所不免向來各省督撫因非本省屬員無糾參之責而委員亦自恃隔屬上司不行稽查遂肆行侵盜捏飾

即如張彥珩之任意私賣。屢次捏報。希圖侵混。若必俟移咨滇省題參。則此等貪狡劣員。益無忌憚。督撫雖有分地。其運官既已入境。即伊境內之事。如果有盜賣捏報情弊。一經查明確實。無論隔屬隣省員弁。即應嚴叅究審。其如何立定章程。嚴密稽查之處。該部定議具奏。尋議委員採辦鹽銅鉛。領解日。將鹽包銅鉛觔數。一面申報原委督撫。一面申報沿途督撫。入某境。即報地方官查驗出境時。該地方官具印結申報該管上司。并知會接境一體查驗。如在境盜賣。及捏報遭風失火。該地方官申報本省督撫叅究。不得諉之原委督撫。其經過地方員弁。俱照糧船謊報漂失。汎地文武各官。不親確勘例。革職。再地方官申報。而督撫不叅奏者。照不揭報劣員例。降級調用。倘地方官借端勒措。致出境稽遲。督撫亦應查辦。該管上司照例處分。從之。○戶部議覆。雲南巡撫愛必達奏稱滇省各屬。

徵收糧米。有定例折徵。及四年一大折者。有徵本存倉。及徵本撥運者。有米改條銀。及條銀改米者。俱有章程。即遇平糶所需本邑萬難買補。應於隣邑折徵處。改本撥補。通融辦理。亦宜於開徵之先。詳請咨明。題銷之時。據實申報。不得但圖便易。徵本徵折。私自更改。致與定例不符。所有贏餘。亦不得任意支銷。再滇省距京遼遠。必俟秋成後。確查豐歉。籌酌更改。再候部覆。往返半載。致誤徵期。請於本年會計兵糧之時。將通融辦理緣由。即行咨部。應如所請。從之。○乙丑諭。明歲二月。萬壽恩科鄉試。所有各省正副考官。著將應行開列人員。通行考試。以備簡用。該部即遵諭行。○又諭。軍機大臣等。原任江蘇巡撫王師應。交直隸城工銀兩內。尚未完三限四限銀一萬一千八百餘兩。此項前因其在藩司任內。有辦理未善之處。是以薄罰示懲。今既已身故。所有三限四限銀兩。著加恩免其交納。

將此寄知方觀承并令該督轉諭伊家屬知之○丙寅

上御勤政殿聽政○諭今年秋審情實各犯著停其勾決○又諭軍機大臣等昨據方觀承查訊傳寫捏造奏章各犯赴京提拏孟蘭到省覆訊一節孟蘭現住京城原可就近緝獲究審無庸輾轉移解今既差員押赴保陽可即傳諭該督將該犯速行質訊如供出牽連待質人犯尚多在棗強一帶仍著該督一面

節次根究一面即行奏聞若果如原供所稱此稿得自京城則京城內必有應行蹤跡之犯著奏明交步軍統領嚴拏根究并將孟蘭一犯連供解京就近質對審理○又諭東省所屬州縣前據準泰先後奏報被水者七十餘處其間成災不成災尚須分別確勘而為地甚廣看來今歲外省偏災浙江最重其次即係山左該省積歉之餘上年秋成稍豐而元氣未復今復被潦亟宜加意撫綏準泰摺

奏請留秋撥案内存庫地丁銀兩以備賑卹第民食所需米糧為急如使升斗維艱即得現銀何從告糴但今歲各省漕糧截留已多東省賑務著鄂容安盡心籌畫亦不必拘泥其商販可通易於購買之州縣自可給予米折其艱於購買之區或應向隣省採買或應動撥倉儲均令通盤計算妥協辦理務俾災黎得所再運河一帶隄工并東平決口疎防實在情形據實嚴查秉公究擬速行奏聞○

吏部議准兩廣總督陳大受疏請廣東省裁汰肇高學政歸并廣韶學政考試關防應改鑄提督廣東學政字樣其原頒肇高廣韶兩關防咨部查銷從之○戶部議覆雲南巡撫愛必達奏稱滇省地丁一槩以銀徵解而奏銷時又以銀七錢三捏報請嗣後一以銀數造冊再一錢以下之小戶及大戶一錢以下之尾欠並折欠短封請照放餉例每銀一分收錢十二文其五釐以下者每銀一釐收錢

一文易銀支解。如情願完銀者聽。倘地方官以該省錢價之賤。勒收銀兩。及重踐浮收。即行叅處。應如所請。從之。○兵部議准。船廠將軍傅森疏。請船廠水手營四品官及太平永寧兩倉監督各關防。伊屯佐領及巡檢教官各鈐記。舊鑄寧古塔字樣。應照將軍印信四司。八旗協領。同知等關防。一例改鑄。船廠字樣。從之。○福建漳州鎮總兵王文敏。以病解任。調湖廣宜昌鎮總兵馬大用。為漳州鎮總兵。以原任陝西固原提督豆斌。以提督銜。管理宜昌鎮總兵印務。○以戶部侍郎書山。為正黃旗滿洲副都統。通政使富森。為正白旗滿洲副都統。太常寺卿德通。為正白旗蒙古副都統。大理寺卿卞塔海。為鑲藍旗漢軍副都統。○丁卯。

上詣暢春園。問

皇太后安。○幸靜宜園。駐蹕至己巳。皆如之。○遣官祭昭忠祠。○諭從前滿洲舊俗。凡遇一

切差役。無不抒誠勇往。至於出兵行圍。尤各爭奮。以不得與為憾。今派往馬廠官兵出差。不過數月。有何迫切之事。竟自波羅河屯私逃回京者。多至百有餘人。該副都統如果豫行曉諭。約束兵丁。何敢潛回。此該副都統等之罪。著將圖拉。子宗文。佐領和爾屯。輕車都尉伊思泰。革職。拏交刑部治罪。但兵丁等如此任意逃回。亦甚不知法紀。如該副都統豫行曉諭。而伊等如此倖之而去。必將置之重

辟。今因該副都統不行豫先曉諭。以致官員內尚有私自回京者。何況無知兵丁乎。著加恩免其從重治罪。交與內大臣班第。尚書舒赫德。一一詳細查出。傳至都統衙門。會同該都統。嚴行鞭責。三年之內。停其一應陞轉。此次係朕施恩。從寬辦理。嗣後伊等如自行知罪。奮勉効力。則已。如尚不知改悔。再有似此者。必從重治罪。斷不姑恕。○又諭近年八旗發往馬廠之馬。每多疲瘦。而今年為尤甚。此

俱因馬廠大臣官員等不行稽察所致相沿既久。將至旗人不諳牧放之法。若不即今整飭。則馬不得實用矣。蒙古人嫻於牧放。且無別項差役。嗣後八旗官馬發往時。著察哈爾總管將一半派蒙古人牧放。即令其詳悉指示旗人。至馬匹如何護往及牧馬之蒙古應賞盤費之處。著軍機大臣會同八旗大臣妥議。尋奏。牧場叅領請仍由京派往。其餘官兵擬定額數。一半派自各旗。令由京解馬起程。一半派蒙古兵丁。並將出口日期及齊集何處。知會察哈爾總管。豫行遣往守候。其彈壓管束。於察哈爾左右兩翼各派副總管叅領二員。每年再派散秩大臣一員。額魯特侍衛二三員。協同管理。總管酌定班次。輪番効力。辦理妥協。奏聞鼓勵。如不加意牧放。仍致疲瘦。官兵一并議處。其盤費銀散秩大臣。照副都統。副總管。叅領。侍衛等。照京城叅領。察哈爾官兵。照京城官兵一體支給。再蒙古遠近

不一。請由察哈爾起程日始暨解馬來京。回到本處日止。按照支領旗員正月派定。行裝需費。臨期給予外。其春季俸暫免坐扣。借項從之。○又諭。今歲豫省河內等州縣河漲被淹。雖據該撫照例撫卹。但念該州縣屬猝遭異漲。被災稍重。窮民生計。尚多拮据。著將被水之河內。武陟。陽武。封邱。祥符。延津。滑縣。所有漕項銀米。加恩緩至明年秋成徵收。其中年儀。封。鄭州。滎澤。溫縣。陳留。陽武。封邱。蘭陽。虞城。河內。武陟。原武。等十三州縣灘地糧銀亦著緩至明年麥熟徵收。以紓民力。該撫董率屬員實力妥辦。務令窮黎均受實惠。該部遵諭速行。○又諭。軍機大臣等。鄂容安奏。酌辦豫省被災州縣情形一摺。所有一應賑借蠲緩事宜。業經辦有章程。但鄂容安已調東撫。現令速行赴任。自不能復辦豫省災務。著傳諭該撫。將現在如何分別籌辦原委。速行詳悉。知會陳宏謀。如陳宏謀已經到豫。仍著

覲面再為交明。陳宏謀係暫行署篆。俟舒輅抵任之日。再著陳宏謀一一告知。庶查辦得有端緒。不至彼此歧誤。再東省民情。與豫省迥別。中州俗尚淳樸。而山左則人多好勇鬪狠。又自負畧能識字。遂至玩法逞奸。無所不為。非痛加禁革。則向來敝俗。勢難望其改弦。著再傳諭該撫。令其留心體察。加意整頓。但積習沉痾之餘。若一時驟加禁遏。或致操之已蹙。轉恐於事無益。務須徐徐剴切化導。俾愚頑漸知覺寤。則一二年內。即不能盡革澆風。亦必大有起色。總之牖民正俗之道。既不可姑息養奸。亦不可失之欲速。該撫身任封疆。其遵照諭旨。實力奉行。毋忽。○以翰林院侍讀學士蔡新。為內閣學士。兼禮部侍郎。○順天府府尹顧汝修。緣事革職。以翰林院侍讀學士廣西學政羅源漢補授。仍留學政任。命兵部侍郎蔣炳。管理府尹事務。○予故琉球國貢使毛元烈祭一次。○戊辰。諭軍機大

臣等兆惠摺奏。訊問準泰供詞。尚多支飾。兆惠未加詰問。不足以服準泰之心。即如供稱和其衷面稟。先將訛傳之人發落。和其衷自稱意見相同。似和其衷原不欲徹底根究。但在當時。即果有此情節。而其衷之面商。無憑。準泰之塗抹發還。確有實據。即當詰其塗抹何心。發還何意。且和其衷係同辦此案之人。並非從未見此稿。恐其張揚。彼既於發覺之初。即將偽稿呈明。則準泰亦應於奉到廷寄之日。將原稿發看。立將前案供明之官貴震咨提嚴訊。則無著者即可有著。乃和其衷一接準泰札寄密諭。即自知前案辦理之謬。據實奏聞。而準泰仍令不得牽涉前案。並不封發原稿。始終含糊希圖苟且了事。又屬何意。此皆案內緊要情節。何以不行詰訊。著傳諭兆惠。將指出之處。逐一研問。如已押解來京。一面即於途次。將此旨傳諭準泰。問其是否心服。○戶部議覆。調任陝西巡撫陳宏謀

疏報大荔縣被水衝塌民房請動項修葺朝邑縣秋水被淹沿河貧戶請賑一月口糧應如所請并飭將前報被水之蒲城澄城盤屋興平長安隴州畧陽寧羌武功等九州縣確勘是否成災應行賑卹蠲緩事宜具奏再華陰涇陽安塞三縣衝損渠隄石湃等工程亦飭確勘辦理得旨依議速行○已已諭軍機大臣等陝甘等處餽養駝隻每年需用草料銀兩原定價值浮多前經西寧總兵張世偉安西提督永常奏明歷歲多有節省因交尹繼善酌定價值據尹繼善奏請將西寧草料每歲減去銀二千兩安西等處每歲減去銀三千兩並稱張世偉任內節省之處實因撒買草豆減料餽養駝隻多有疲瘦難以為例等語已交軍機大臣俟劉順來京將實在情形詢明定議現在該處餽養駝隻是否仍照張世偉任內每歲節省銀五千兩辦理抑或已照尹繼善所奏數目辦理若所減二三千

兩而能餽養臆壯雖節省無多尚於駝隻實有裨益倘所養駝隻仍不免於疲瘦與張世偉任內相同則雖稱稍為節省究屬虛糜帑項有名無實著傳諭黃廷桂將作何稽查辦理之處令其詳悉查明具奏尋奏奉諭即札行各提鎮查覈據覆西寧甘涼寧肅等處自乾隆十四年冬後均照尹繼善減定數目辦理現俱餽養臆壯細訪亦無浮冒但設法稽查事無專責難免弁役暗中剋減嗣請拴槽時專派叅遊責成經管該提鎮仍不時親查每季底加委道員公同查驗再據陞任提臣永常咨稱安西戰駝八百餘隻於乾隆十三年奏准一半長川牧放一半於冬春二季收槽飼養每隻酌減原數領銀十八兩為草料之價現在遵辦其查驗亦請照西寧之議報聞○戶部議覆閩浙總督喀爾吉善奏稱福建延平府屬南平縣縣丞移駐峽陽建寧府屬甌寧縣縣丞移駐嵐下街所有離縣遠遠

附近峽陽之壽巖吉田塘源建興梅北安福等里額徵米銀及附近嵐下之梅歧等十六圖漁課請歸該縣丞徵嗣後田畝買賣推收長遠分隸命盜事件仍由縣審轉戶婚田土等項責成縣丞審理再該縣丞既分理刑名所有原設養廉四十兩外請加增一百二十兩即於分徵耗羨內支給應如所請其添建衙署該督另疏具題從之○庚午上詣暢春園問

皇太后安○迴圓明園○戶部議覆四川總督策楞奏稱川省乾隆十五年分大小官員共捐倉穀四百七十石有奇查常平額儲部議以一百三萬三千八百餘石為準如將此項捐穀收入常平統於溢穀數內糶賣殊非勸輸本意請改歸社倉收貯同社穀一例奏報應如所請從之○辛未刑部議覆兩淮鹽政吉慶奏稱兩淮運鹽船戶偷賣商鹽并有將船鑿漏捏報淹銷等弊倘比照費用受寄財

物律未免情重法輕嗣請依船戶行竊商民例分別首從計贓照常人科斷外枷號兩月追贓給主如無可追將船變抵再鹽船開行商人遣人押運名曰商廝倘有起意通同船戶盜賣請依奴僕勾引外人同盜家長財物計贓加竊盜一等治罪若非起意止於通同分贓者依盜家長財物同竊盜計贓治罪追贓給主再埠代明知船戶不良希圖牙用朦混裝載并任意剋扣水腳致船戶沿途乏用盜賣商鹽請照寫船保載恃強代攬勒索使用擾累客商例治罪外枷號一月令補船戶變賠不足之贓再請通飭文武衙門遇具報淹銷火燬之案倘勘訊不實別經發覺依不行查明給結罰俸一年例處分其實係遭風失水而指索餽遺及通同受餽而捏結者亦照定例查叅均應如所請令該鹽政咨明本省督撫及准鹽應行各省分一體遵照載入律例從之○壬申工部侍郎劉綸子父憂予

辦喪銀三百兩。以禮部侍郎順天學政張泰開調補。仍留學政之任。○予故廣東提督黃有才。祭葬如例。謚恪慎。○豁除甘肅寧夏府屬靈州水衝鰥廢田地額徵二千二百九十畝有奇。○癸酉。遣官祭賢良祠。○諭軍機大臣等。據阿思哈奏稱。滇省偽造奏稿一案。臣自當凜遵前旨。密訪嚴拏。實力偵緝。斷不敢稍有洩漏。畧存將就之見。以致疎縱等語。此不過敷衍搪塞之詞。誰不能作此語。足見其並未實心辦理。此案從前雖由滇省發覺。近來如山東。湖廣等省。俱有拏獲傳抄偽稿重犯。至直隸古北口緝獲各犯內。即有晉省出外生理之人。因所託名者。係晉省之大臣。其鄉人喜談樂道。則山西尤非他省可比。必有傳抄樂禍之人。如果實力訪查。自可不至漏網。乃該撫自接奉密諭後。不過以空言虛應故事。阿思哈秉性柔懦。平日遇事不能勇往。但如此等事。非可苟且塞責。獨不見準泰之

前車。可為炯戒乎。阿思哈著傳諭申飭。如不實心查辦。不能為該撫貸也。○又諭據恒文所奏。覆訊傳播偽撰孫嘉淦奏稿各犯供情一案。辦理甚屬可嘉。但摺內此等悖理逆倫之輩。已越於天覆地載之中。即使立正典刑。亦無足惜等語。則未免失之太過。此案抄寫傳播各犯情節種種不同。應分別輕重發落。前已將辦理梗槩宣示各督撫。即如楚省查出之金汝政一犯。藏匿犯禁之書。又抄錄偽造孫嘉淦奏稿。居心悖逆。情罪固為重大。自當從重辦理。其餘各犯。如有抄寫布散。傳寄他處者。即重枷永遠示衆。亦足以蔽其辜。不必緊置典刑也。至得之傳播。或係愚情無知。誤信為實。有此奏。一時私抄者。即予枷責示懲。已足令愚民知所儆戒。朕辦理諸事。輕重務得其平。固不可稍有寬縱。以長刁風。亦不可槩律以大逆。置之重典。惟按其應得之罪。區別處分。庶幾刑協于中。可傳諭該撫知之。

○緩徵山東鄒平長清新城長山東平霑化海豐樂陵曲阜寧陽濟寧壽張陽穀觀城聊城濮州范縣聊城茌平莘縣冠縣館陶臨清東昌二衛樂安壽光博興高苑即墨禹城泰安東阿平陰萊蕪肥城陽信利津濱州青城滋陽魚臺汶上嘉祥金鄉荷澤曹縣定陶鉅野夏津清平高密濟寧等五十二州縣衛水災新舊錢糧并賑一月口糧○甲戌

上詣暢春園問

皇太后安○諭今歲山東被水州縣前據奏報即降旨加意賑卹撫綏所有本年應徵漕項定例不准停緩但恐該省被災情形與豫省相同且從前積歉之餘元氣未復朕心深為軫念特行格外加恩著該撫鄂容安詳查被災最重州縣若閭閻有拮据情形其如何緩徵之處速行奏聞請旨該部即遵諭行○諭軍機大臣等楊錫紱摺奏查辦傳播偽造奏稿一案遴委縣丞巡檢等員改裝更名先於

衝衢大路市鎮寺院潛行密查如得有蹤跡再委大員馳往辦理等語所辦甚拙而謬此案發自滇黔移咨湖北查拏當經查獲傳抄之犯甚衆湖南居三省之中入黔路所必經豈獨於該省轉無傳播之人若能如恒文之迅速查辦逆徒自無漏網乃拙於布置似乎慎密從事而不知多派微員必且因而洩漏逆徒必且聞風遠竄况朕已明降諭旨人所共知又何必改裝更名作此虛詐之狀果使實心辦事必不出此楊錫紱著傳旨申飭如不實力加緊緝辦則縱奸之咎斷不能為楊錫紱寬也○戶部議覆廣東巡撫蘇昌奏稱粵東濱臨大海漲出沙灘無礙水道者向例聽民報墾至水口要津支河港汊有關水利之區倘攔築為田則水道阻塞急宜禁止現南海番禺順德海陽饒平澄海各縣所有民間園築椿壩沙灘除於水道無礙及不能挑濬者聽民照舊耕種此外無論已未成田並

新漲浮沙。有妨宣洩處。應飭地方官曉諭嚴禁。毋得報壅升科。應如所請從之。○豁除甘肅靈州之羊馬湖灘沙磧。贖廢地。額徵三千六百八十畝有奇。○乙亥。諭各館進呈之書。皆經總裁閱定。況國史傳信萬世。更非纂輯詞章之比。乃一經披覽。開卷即有大謬之處。初非文義深奧。難於檢點。亦非朕過為吹求。但使該總裁等稍一留心。何至於此。著將總裁官傅恒等。交部察議具奏。

皇考時。因大學士鄂爾泰張廷玉。辦理幾務殷繁。遇有處分。免其交部。朕則以為居一職。即當盡心一職。如大學士傅恒。求保日在軍機處行走。朕交辦之事雖多。亦不得因事繁自諉。此正朕教誨成全之意。諸大臣皆朕倚任辦事之人。若謂即加處分。亦不過罰數月之俸。所損幾何。苟存此心。朕益為諸臣愧之。○大學士江南河道總督高斌。河東河道總督顧琮。奏陽武漫口。前奉諭旨。指示諄切。今察

該處河形。雖係倒灌。然水已入袖外灘河。胥漫水。雖寬三百餘丈。而兩頭深處。不過數尺。此處堵築。施工頗易。隨晝夜趲辦。兩頭並進。已就築工一百三十餘丈。臣等築壩處正當硃筆畫出圖中。挑引處。現工已將半。九月內可望合龍。不必另挑引河。得旨嘉獎。○以兵部侍郎裘曰修。為知武舉內閣學士兼禮部侍郎。李因培。為武會試正考官。翰林院侍講學士于敏中。為副考官。○丙子。

上奉

皇太后詔

泰陵自圓明園啟鑾。○詣

皇太后行宮問安。○是日。駐蹕黃新莊行宮。○丁丑。諭據巡撫潘思榘。摺奏福州等府屬。於七月內。颶風大雨。沿溪發水。惟福安壽寧等邑。為甚等語。該處猝被風災。山水驟漲。民居田禾。多被淹浸。朕心深為憫惻。現據該撫照例賑卹。但念被災貧民。蓋藏無存。轉瞬徂冬。

生計尚多拮据。所有被災最重之福安壽寧二縣。著加恩將極貧人戶。加賑兩個月。次貧加賑一個月。俾得接濟口食。以示軫恤。該撫董率屬員。實力查辦。務令無遺。使貧民得需實惠。再該二縣本年地丁錢糧。並著加恩緩徵。以紓民力。該部遵諭速行。○又諭江西協濟浙省米三十萬石。調任巡撫舒輅。已委員督運前往。浙東諸郡所需賑糶。及撥補倉儲。為數浩繁。鄰省運到米石。多多益善。但江西秋成雖屬豐稔。而一時買補。恐市價因之轉昂。著於本年應徵漕糧內。截留十五萬石。以為撥補之用。令該撫通融籌酌。妥協辦理。該部即遵諭行。○又諭軍機大臣等。水貴前因浙東諸郡旱象已成。請撥江楚米石接濟。朕以江西米價。現在昂貴。准令楚省撥運。而舒輅接到永貴札商之咨。旋已碾米三十萬石。運赴浙省。此項本可無需碾運。但業經在途。即迅速降旨。亦已無及。若使接旨運回。更多

往返盤運之費。是以聽其運浙。在災地自屬得濟。第江西米穀撥運既多。不可不亟為籌補。前據舒輅奏請截漕十五萬石。朕以漕糧所關綦重。該省年歲並未失收。舒輅奏報張皇。遽以截漕為請。降旨申飭。又於未接諭旨之先。請再截留合三十萬石之數。益屬不知緩急。但現已碾米三十萬石運浙。則倉儲之應補者更多。與其一時採買。使市價益昂。有妨民食。寧施恩格外。准予截留。已諭部令截漕十五萬石。著傳諭新撫鄂昌。令其通融撥補。妥協籌辦。並諭永貴知之。令其留心撙節。勿因運到米石寬裕。一任屬員冒濫開銷。○又諭據福建巡撫潘思渠奏稱。琉球國使臣毛如苞等。進貢二號船隻。在洋遭風。業經收回本島。該國王將原船修葺完固。并將閩縣遭風船戶蔣長興等。常熟縣商民瞿張順等。留養三年。給予口糧。隨船護送來閩等語。中山王尚敬素稱恭順。今進貢船隻。在洋遭風。

堪為軫念。又將內地遭風商民。留養三年。附送至閩。甚屬可嘉。著於進貢常例之外。賞賜該國王蟒緞二疋。閃緞二疋。錦二疋。綵緞四疋。素緞四疋。以示優獎。其在船之官伴水梢人等。著該督撫分別賞賚。該部仍行文該國王知之。○是日。駐蹕半壁店行宮。○戊寅上詣

皇太后行宮問安。○諭軍機大臣等。前因永貴奏報浙省被旱成災。請隣省接濟。經傳諭江楚各督撫。通融籌辦。昨舒輅奏稱。運米三十萬石赴浙。今據阿里衮奏。將先運川米十萬石。儘數運浙。并咨商川省。再為酌運數萬石來楚。俟浙省再有需用。即可撥濟等語。今歲浙省旱災雖甚。自金衢而外。尚有薄收。第因一時頓乏。市價翔踊。永貴倉皇入告。朕以拯焚拯溺為心。即行傳諭產米省分督撫籌辦。永貴因有此諭。遂四出告糴不已。但以目今浙省情形而論。則商販流通。米價不過二兩

有餘。在儉歲已為平減。即外省中價往往有似此者。永貴欲令災地與豐年同價。如隣封何。江楚督撫一體籌辦。卹隣道固應爾。但浙省已屢被恩膏。截漕賑卹為數已多。兼有江閩協濟。外省實無需多撥。江西距浙較近。舒輅業經派員撥運。降旨恐已無及。且慮膠柱鼓瑟。將至浙境者。仍復追還。則往返益滋紛擾。姑允其撥濟。至楚省動撥川米。似尚可及止。著傳諭該督撫。如運浙之米。尚未出楚境。則此項原係撥補湖北之用。著即於湖北收貯。無庸運交浙省矣。喀爾吉善等在浙言浙不暇計及其他。朕則天下一家。何分彼此。往復調劑。幾費苦心。該督撫等當亦未能深悉也。著一併傳諭知之。○又諭各省辦理賑務。向無一定章程。多有冒濫中飽之弊。而實在貧民。轉多遺漏。不能均叨賑卹之恩。蓋地方災賑。全在清查戶口。以杜遺濫。封疆大吏。統馭全省。既難躬親其事。即被災之州縣。其應

辦事務實繁。如止一隅偏災。尚可自行查辦。若災地稍濶。必不能分身兼顧。而本處一二佐雜教職。亦難徧歷村莊。勢不能不假手於書役鄉地。所以易滋弊混。近詢之直隸總督方觀承。據稱該省向來。俱另委廳印帶同佐雜等官分查。視災地之大小。以定派員之多寡。其巡查登籍。散票給賑諸法。甚屬妥協周詳。浙省今年被旱成災。應賑之州縣甚多。若辦理稍有未善。既恐遺漏滋弊。且恐總理大員。見戶口過多。率意裁減。益致向隅。而胥吏之冒濫作奸。仍復不免。災黎何由得霑實惠。可將方觀承所開說帖。抄寄喀爾吉善永貴等。令其仿照辦理。於賑務實為有益。其各省州縣中。有被災應賑者。遇奏事之便。一併抄寄。令該督撫等。酌現在辦賑尚有未協之處。可擇善而從。若已定有章程。大意相同。而果能信其實無弊混。亦不必因有此旨。遂復行從頭另辦。轉致更張滋擾。直隸總督方觀承

陳奏辦賑事宜說帖。查向來直隸辦理災賑。俱係另委廳印帶同佐雜等官分查。視地方之大小。定派員之多寡。廳印或一員。或二員。佐雜並能辦事之教官。或三四員。或五六員。各給號記一。其廳官之才幹者。或一員兼管兩州縣。派員既定。令總理賑務之道員。照議定查戶規條。帶領各廳印清查一二日。俾皆領會。廳印又帶同派隨之佐雜教官。清查一二日。俾皆領會。然後各照派定村莊。四出分查。庶可畫一。委員等各帶賑票多張。上用本州縣印信。加用委員號記。庶見票即知為某委員所查。委員於清查時。將票上填明極次貧戶。大小口數。隨查即按戶散給。另用帳簿一。將一日所查村莊。成災幾分。某戶極貧。某戶次貧。大口若干。小口若干。逐日登記。又按一日所查共若干戶口。總記於後。用本人印信戳記鈐蓋。查完日。通計一州縣應賑確數。一面申報上司查覈。一面送被災之本州縣。

照簿計口驗票給賑該管道府仍於巡歷之次按簿抽查如有濫遺惟承辦之員是問至本處書吏衙役惟按各委員派給一名以供繕寫使令不許干與查戶之事如此則戶口無從朦混而貧民均霑實惠矣○是日駐蹕秋瀾村行宮

實錄卷之三百九十八

六

大清高宗法天隆運至誠先覺體元立極敷文奮武孝慈神聖純皇帝實錄卷之三百九十八

大清高宗法天隆運至誠先覺體元立極敷文奮武孝慈神聖純皇帝實錄卷之三百九十九

監修總纂官經筵講官太子太傅文淵閣大學士大臣劉世明等奉 上諭事件處管理

吏部理藩院事序正黃旗滿洲都統世華等部計軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣閣學劉世明等奉 上諭事件處管理刑部戶部工部事務

世宗憲皇帝計軍功加十九級隨帶加二級又加二級臣重臨內大臣戶部尚書劉世明等奉 上諭事件處管理

尋常紀錄十四次臣德麟經筵講官太子少保工部尚書紀昀六次臣曹振鏞等奉

較修

乾隆十六年辛未九月己卯兵部議覆福州

將軍兼管閩海關事務新柱奏稱閩省駐防官兵內有緣事革退者因外省向無復准挑補甲缺之例終身淪棄無計資生請援在京八旗例無論官兵凡罪犯軍流以下其有家計窘迫願補披甲缺者驗看年力強壯弓馬嫻熟俱准挑補應如所請通行各省駐防處一體遵照從之 山東巡撫鄂容安奏東省今歲被災頗重更有造播逆詞盜決隄工等案亟須辦理而署撫陳宏謀未能即日到豫

是以將豫撫印務暫交藩司富勒赫護理一切災賑事宜。令其詳告陳宏謀接辦。臣已蒞新任。東省民風狡悍。自當仰承前諭推誠化導。若刁頑尤甚之地。不妨暫時從嚴。其善良率教者。即宜加意保護。務俾平日不致驚疑。遇事先知畏懼。得旨。所見甚屬可嘉。勉力為之可也。○又奏。東省被水州縣。前任撫臣準泰先後奏報。成災者四十八處。不成災者二十五處。統計成災額地八萬餘頃。於通省額地九十九萬餘頃中。止十分之一。其被災之民。若目下日食無缺。則賑項可待冬間。但應先給賑票。以安衆心。至貧乏者。自當隨查隨給。庶餬口有資。不至流移四出。再水涸處。種麥為急。借助籽種。尤不可緩。現親行查勘。其勘不成災處。亦當量加撫卹。所有應須銀穀兼賑及專賑穀銀代穀處。俟詳查定議。報聞。○鑄給四川督標中軍都司關防。從總督策楞請也。○是日。駐蹕梁格莊行宮。○庚辰。

上奉

皇太后謁

泰陵。未至碑亭。即降輿。慟哭。步入

隆恩門。詣

寶城前行禮。躬奠哀慟。王以下文武大臣官員。

隨行禮。○詣

皇太后行宮問安。○是日。駐蹕秋瀾村行宮。○

辛巳。

上詣

皇太后行宮問安。○諭。山東濟南等屬。今年夏秋被水成災。該撫現在籌辦賑卹。但查東省折賑之例。每穀一石。給銀五錢。該省當積歉之後。雖連獲豐稔。而民間元氣。究未大復。今又值此偏災。米價自屬昂貴。若照常例折賑。恐其不敷購買。著加恩。每穀一石。折銀六錢。俾被災窮黎。得資餬口。以示軫卹。該部遵諭速行。○又諭。山東濟南府等屬。今歲夏秋被水成災。業經加恩賑卹。更念該處被災之後。

糧價漸昂。所有各州縣存倉穀石。未必盡皆充裕。其沿海之登青萊等府。地屬僻隅。轉粟為難。尤當亟籌接濟。以裕民食。奉天與該處一水可通。著照乾隆十三年之例。暫弛海禁。令招商前往購糴。運東糴賣。俾濱海窮黎。無虞艱食。其商船出入口岸。仍令該地方官。照例給予印票。實力稽查。毋致透漏滋弊。該部遵諭速行。○軍機大臣等議覆。山東巡撫原任河南巡撫鄂容安覆奏。尚書舒赫德條陳。各省標營。增扣名糧。以充公費一款。查豫省除南陽鎮。向有官地租息。可敷公費外。其河北鎮屬九營。及撫標左右二營。公費尚多不足。前請以蘭陽等十縣官莊地畝一百餘頃租息。分撥各營。以濟公用。部議以此項租息。經前督臣王士俊奏請歸公。接濟民食。未便撥歸營伍。但豫省地廣兵單。既難再行增扣。又無別項可籌。且官地租息無多。民食原不藉此接濟。若歸營伍。稍添公費。實於民無損。

於兵有益。應如所請。令撫鎮按各營額兵多寡。事務繁簡。分撥其收支查核。酌定章程。妥協辦理。從之。○是日。駐蹕半壁店行宮。○壬午。諭曰。庶吉士寅保。前因隨伊父唐英在粵海關任內。未經散館。著加恩賞給編修。○兩江總督尹繼善奏。前奉諭旨。密拏傳播偽稿。官貴震並搜伊家書札。得捏造孫嘉淦本稿一紙。又有山東按察使和其衷幕友劉宏謀密寄官貴震之親戚鄭鶴年札。內稱據沂州府稟。獲訛傳偽稿之犯劉恒發。究明鈔得自官貴震。請咨江省解審。當即詭詞向東家云。官貴震係我至親。求與撫軍商酌。將劉恒發供詞改為拾自途間。無從根究。得以從輕歸結等語。是官貴震之稿底。流播東省。先有劉恒發一案敗露。從輕寢息。非止和其衷所奏。李僕一案也。按劉宏謨札內情形。偽稿出官貴震之手無疑。現親行嚴訊。堅不承認。并牽涉多人。因密札山東撫臣。令和其衷交出劉

宏謨押解江省質訊定擬另奏伏思此案早據沂州府獲犯供明鈔得自官貴震乃和其衷準泰通同瞻徇刪改供詞草率完結實為溺職負恩而和其衷聞各省傳播恐事敗露始將李僕供出官貴震情由奏聞希圖掩飾更為巧詐一并據實參奏得旨有旨諭部諭曰兩江總督尹繼善參奏和其衷先於劉恒發傳鈔偽稿一案聽從幕友劉宏謨密屬刪改供詞從輕完結等語東省此案朕初意準泰先有成見希圖苟且了事和其衷雖隱飾於前尚據實陳明於後雖有心取巧或實屈於外官院司體統不得不然情理尚在可恕是以準泰案內未將和其衷治罪今據尹繼善所奏則和其衷已先受幕友密屬適準泰以無從根究相商正合其意遂從輕完結轉向幕友市恩而準泰之塗抹發還實墮其術而不知迨事不可掩則專却過於準泰設準泰當即欲根究入告和其衷必且代為求寬

矣其居心陰險譎詐一至於此罪更浮於準泰著該撫鄂容安即將和其衷革職拏問解交刑部一并嚴審定擬具奏○軍機大臣等遵旨議覆通融籌辦餵養官馬一事查八旗官馬二萬七百七十三匹每匹月給馬乾銀三兩近因豆草價值日昂不敷購買現今京外各處草料雖貴賤不一較之京師究屬懸殊請酌撥一萬匹派出餵養在京師減馬萬匹草料自可平減而各處兵丁所領馬乾銀亦屬寬裕熱河分撥一千匹近京各莊頭分撥二千匹此外七千匹交總督方觀承派督提二標及宣化等五鎮各營餵養其草料銀兩熱河及莊頭由戶部給發直隸各標營就藩庫動支於本年十月派出至明年三月下廠前趕回如減剋草料以致馬匹疲瘦該管官議處兵丁莊頭治罪從之○兵部以武會試中額請得旨這考試漢軍取中五名直隸取中十二名陝西取中十二名廣東取中八

名。河南取中五名。山東取中四名。江南取中三名。山西取中六名。湖北取中二名。湖南取中二名。四川取中二名。廣西取中二名。福建取中七名。浙江取中七名。江西取中五名。雲南取中三名。貴州取中二名。○是日。駐蹕黃新莊行宮。○癸未。

上迴鑾奉

皇太后居暢春園。問

皇太后安。○幸圓明園。○諭軍機大臣等。前據

恒文覆奏。傳播偽稿案內。有江舜五供。今年正月初七八間。在伊叔江華章參鋪內。見江逢鐔手持奏稿。說是江西天一堂寄來等語。偽稿一案。流傳數省。其傳鈔月日。先後不同。江舜五所供。正月初七八之語。是否確有憑據。抑或記憶不清。隨口供認。該犯等現在楚省。著傳諭恒文。令其再加研訊。務得實在傳鈔月日。據實奏聞。○甲申。

上詣暢春園。問

皇太后安。○諭曰。尚書舒赫德。著馳驛前往江

南。會同總督尹繼善查辦事件。步軍統領事務。著尚書哈達哈。暫行兼管。鑲紅旗漢軍都統印務。著李元亮暫行署理。○大學士江南河道總督高斌。河東河道總督顧琮。奏陽武漫口。自河脣築壩。業將工次奏聞。嗣後大河溜勢變遷。徑趨東壩。水深溜急。難以施工。隨移下一百五十餘丈。另起壩臺。兩邊鑲埽。但恐入袖合龍。溜勢太急。未免衝刷為患。欽遵前諭指示。於河脣內兜水處。另挑引河一道。分殺水勢。報聞。○乙酉。諭軍機大臣等。阿思哈奏到。拏獲傳鈔偽稿之張聯義等一摺。此案各省俱已傳播。該督撫稍知大義者。即經實力嚴查。阿思哈直至接准廷寄。始行查出數犯。其前此之苟且塞責。並不留心。可知。況在晉省傳鈔之犯。一查即得。又何必派員易服改裝。如此拙辦。至所獲人犯。不過鄉愚。無知誤信。別無情節。則枷責已足蔽辜。前此即

將辦理大概傳諭該撫自可遵照辦理何用分別監禁淹繫囹圄又屬太過阿思哈身任封疆不應種種舛謬若此著傳旨嚴行申飭○又諭曰蘇昌奏到思陵土州阿那何村被夷人推去土牆占去糧田六十二片等語從前憑祥州一案原因土民越占夷界起釁該督撫等已委道員親臨查勘辦理今思陵土州又有推牆爭占之事如果因內地土民侵越所致自應懲治土民以服外夷之心不可

長刁風而生邊釁若果係夷人乘機闖入內境侵占糧田而該督撫等轉因恐滋事端將就完結示弱外夷則不特體統攸關亦非鄭重邊防之道惟在該督撫等秉公酌理據實妥辦務令遠疆寧謐再此案定長何以不行奏聞著一并傳諭詢問尋定長奏思陵土州被夷人毀牆拔竹一案維時因該道府將至憑祥查勘毀柵之事即令就近先赴思陵查驗明確是以未遽奏聞嗣據覆係該土州頭

人串同監目希冀侵占捏誣妄報當即秉公質訊釐清界址俾土夷人等還守舊業其扶同妄稟之土知州韋日昱吏目李仰高有無聽屬受賄等弊亦經會同督臣蘇昌題叅究審報聞○丙戌以山東兗沂曹道阿爾泰為山東按察使○命直隸口北道吳燾來京以京堂用在尚書房行走○豁免山東壽光掖縣平度昌邑濰縣等五州縣被水成災應免起存銀四千三百七十兩有奇○丁亥

上御勤政殿聽政○諭軍機大臣等據定邊左副將軍親王成衮扎布奏稱準噶爾回人阿克珠勒等帶領四百人馬匹牲口四萬餘至伊都克邊卡求告貿易因使侍衛傳永等將禁止貿易之故曉諭又遣頭等台吉策卜登與効力行走索拜帶蒙古兵前往禁止貿易等語所奏甚是準噶爾詭詐難信禁止貿易之事伊等非不聞知今復攜貨求售若以其遠來辛苦恩准貿易伊等又習為固然嗣後

更多帶貨物。何所底止。且日久或致別生事端。必當速為嚴禁。可寄知成衮扎布。令其轉諭額默根。明白曉諭回人阿克珠勒等。云準噶爾與我大國和好以來。議定祇在肅州與京城兩處貿易。後又歸於肅州一處。並未有在喀爾喀貿易之例。爾等何得私帶貨物前來。雖稱貿易已十餘年。此皆下人私事。亦從無數萬牲畜之多。所有從前與爾等私相貿易之人。已經查出治罪。所欠之項。亦已追出給還。爾等豈得佯為不知。自今以後。不許再來貿易。若因雪大難行。暫准卡外過冬。貿易則斷乎不可。如此明白曉諭。只作成衮扎布之意。不必告以諭旨。再準噶爾之人。詭詐多計。觀其能帶大隊牲口前來。豈不能令大隊人衆行走乎。成衮扎布又一摺奏稱。準噶爾烏梁海八十餘戶。在邊卡附近游牧過冬。請照例許其過冬回去等語。由此觀之。準噶爾之人。明係習慣漸進。今雖無事。若任其如此。

日久恐致生事。伊等漸次向內地游牧。或窺探喀爾喀等游牧。此等處。不可不嚴緊防守。先期豫備。各處邊卡。時加稽察。可傳諭成衮扎布知之。○以內閣侍讀學士麒麟保。為太僕寺卿。○以編修秦鏞。充日講起居注官。○戊子。諭曰。兵部侍郎兼管順天府府尹事。蔣炳奏稱。

皇太后六旬萬壽。數天同慶。府屬紳士。共建經壇。祝

釐伸悃等語。今歲恭逢

大慶。海宇同懽。輦轂近光。抒忱尤切。宜特沛恩施。以廣慶澤。其中如原任詹事黃叔琳。以康熙辛未探花。年躋大耋。重遇臚傳歲紀。洵稱熙朝人瑞。著從優加給侍郎銜。其原任侍郎王景曾等。休致者。著照原品各加一級。革職者。復還原銜。用昭行慶施惠至意。○又諭曰。山西布政使多綸。奏請暫寬科舉之額。所見極為舛謬。科舉分別省分。計取中之額。以為

額其數已寬。學臣照額錄送。尚恐未必無倖。邀備數之輩。若更加濫取。徒啟荒陋者。倖進之念。轉使砥玉雜滄。耗主司目力。而眩裁鑑於遴選真才。培養實學之道。實無裨益。前者鄂敏曾為此奏。朕以其沽名博士子。稱頌嚴切批示。但或出於一己之見。是以未經傳諭中外。今多論亦為此言。當由聽幕賓慇懃。抑或士子有此妄想。故相傳播。以致聽採入告。均未可定。以科舉而論。中額有定。千人應試。與萬人應試。所中止有此數。有何加損。何惜令其一體入闈。但試問其一體入闈者。為名乎。為實乎。違道干譽。棄實務名之事。朕所不為。況今特開恩科。士子羣叨格外盛典。乃欲因此更思濫冒。則得隴望蜀。其不知足亦已甚矣。此所關於風俗人心者。甚大。不可不為明切曉諭。令天下士子知之。○又諭曰。山西布政使多倫奏請。酌更外省壇廟主祭之官。以肅祀典一摺。似有所見。布政使雖地方正

印。究係督撫屬員。況督撫正封疆大員。安得謂非地方官。至道員駐劄之地。以州縣印官主祭。其品秩相懸。為之踧踖不安。何以嚴對越而重祀典。乾隆二年所定之例。過於拘泥。著該部另行定議具奏。尋議嗣後壇廟春秋祭祀。省會令督撫主祭。布政使以下陪祀。其有道員駐劄之府州縣地方。亦令道員主祭。府州縣等官陪祀。揆諸各省丁祭。督撫主祭之例。亦歸畫一。再督撫道員。倘遇出巡時。仍令布政使及該地方正印官攝祭。至將軍都統提鎮等。均係武職。仍照舊例陪祀。從之。○戶部議准。直隸總督方觀承奏。稱直屬各州縣民壯。部議有無虛充名數。應令裁汰之處。查額設民壯共六千一百八十七名。均係督理河工。專司驛務。照數設立。尚慮差遣不敷。未便更議裁減。從之。○兵部議覆貴州巡撫開泰奏。稱黔省烈當一驛。原係安南縣所屬地方。該縣兼顧甚易。請將驛丞缺裁。所有夫

馬錢糧俱歸縣管理。其康俸工食一體裁撤。原設民壯十名。照舊留存。以資該縣差遣。應如所請。從之。○恤予廣東海安營因公浮海遇風飄歿。弁兵祭葬銀兩。○己丑諭。今日刑部查奏秋朝審內。侵盜錢糧官犯。陸開江等各案。將著落該上司分賠情由。敘入殊屬錯誤。朕於侵盜劣員。定以重辟。嚴申限期者。原以警貪邪而肅法紀。初不為錢糧起見。前經屢降諭旨。其定例上司分賠。不過因其瞻徇屬員。不早為覺察。以致屬員恣行侵盜耳。若謂帑項有著。可即將本犯擬入緩決。則平日視官帑如已貲。肆意糜費。至定罪之後。恃有上司代為完項。藉以遷延歲月。俸逃刑戮。劣員更無所畏懼。且使各省轉滋分賠。著追之案。益覺紛繁。是國家以錢糧為重。人命為輕矣。殊未喻朕辟以止辟本意。且帑項之有著無著。自屬農部職掌。法司讞決案內。只應於本犯限內完否。定其罪名。無容牽涉。辦理刑

名大臣等。其悉朕意。尋議侵盜錢糧與貪婪事同一例。均以二年限滿。有無完贓為斷。上司分賠。仍與本犯無涉。不在完贓之例。其畏罪完項者。例得邀恩。若限滿不完。應由緩決改入情實。但侵盜各案。情罪輕重不同。嗣請每年秋審內。仍照例按限定擬。如情罪有與陸開江等相類者。雖限內亦擬情實。特將未經限滿處。聲明請旨。並令直省督撫。於所屬侵盜各案。初入秋審時。即將限期。扣算起止。詳細開明。以便臨審。公同查核。報聞。○庚寅。孝慈高皇后忌辰。遣官祭

福陵。

上詣暢春園。問

皇太后安。○諭。乾隆十三年。截留江省起運漕糧六十萬石。分貯山東備賑。所有給過各幫旗丁行月耗贈銀兩。例應按其程途。照數追繳。經部行文。於應領新項內。全行扣還。但各旗丁現年所領錢糧。僅供一運之用。若一時

全扣所剩無幾。窮丁辦運。必多竭蹶。著加恩將滁蘇等十四幫。應追銀三萬一千餘兩。寬至壬申年為始。分作三年扣完。其江興等十三幫。並無屯田贍運。及什軍幫貼。情形更屬拮据。應追銀七萬四千餘兩。亦自壬申年為始。分作八年扣完。俾軍力舒展。該部即遵諭行。○兵部議覆直隸總督方觀承疏稱。滄州至磚河。水陸衰延。易藏奸宄。請於適中之地。添置塘汛墩臺一處。設兵五名。於滄州汛。照舊派撥三名。磚河汛。添撥二名。內挑馬兵一名。守兵四名。駐劄巡緝。應如所請。從之。○命大學士陳世倌。管理禮部事務。○兩廣總督陳大受。故調湖廣總督阿里衮。為兩廣總督。以安西提督永常。為湖廣總督。調甘肅提督李繩武。為安西提督。以原任陝西固原提督署湖廣宜昌鎮總兵豆斌。為甘肅提督。○以故翰林院五經博士關朝泰。子濤。承襲。○辛卯。以加尊

皇太后徽號。敕諭禮部曰。朕惟合九州以致養。非徒問視之常儀。統列服以尊親。曷罄顯揚之至願。矧宮庭集慶。忻盛典之宏昭。而海宇騰歡。思鴻聲之通晉。式稽茂禮。允洽徽章。欽惟

聖母崇慶慈宣康惠敦和皇太后。德懋安敦。功符厚載。恩垂教育。勗一人宵旰之勤。化啟修和。錫兆庶昇平之福。懿徽允著。廣敷及物之仁。第履常綏。彌篤受天之祐。茲以一陽之月。

恭逢

萬壽之期。值花甲之初週。際芳辰之正永。前者親扶玉輅。見東南父老。共效嵩呼。今則慶溢璇宮。與中外臣民。同登壽域。河清海晏。幸際昌時。卷舞衢歌。悉惟慈福。用伸誠款。恭晉隆稱。敬加上

聖母皇太后徽號曰。

崇慶慈宣康惠敦和裕壽皇太后。蘭殿稱觴。奉天顏之有喜。萱幃迓祉。祝

聖壽以無疆。奉鈔冊而騰輝。合四海之歡心。共戴映金甌。而藹瑞與萬年之景祚。俱長其應行典禮。爾部敬謹詳議具奏。○諭軍機大臣等。開泰奏普安縣紅藤箐地方。奸徒私鑄錢文一摺。看來私鑄必由私銷。而私銷治罪例嚴。私鑄尚得秋後處決。地方官查獲奸徒。往往以私鑄定案。而私銷之由。即不復深究。乃向來積弊。此案務將私銷實情。徹底嚴究。不可草率。況在深山密箐之中。聚集多人。且賄

分卷之三

三

賈里長地棍。通同庇護。種種不法。其情罪重大。於地方實有關係。開泰已起身赴京。著即飭交該護撫從嚴辦理。○又諭涇州生員朱紹愷等。赴都察院首告平涼縣人甘普妖言聚眾。假號仙會。謀為大逆等情。已經交軍機大臣審訊。其所供詞。並無確據。而案內人犯俱在甘省。一時無憑質對。現交步軍統領衙門。選派司員。押同朱紹愷前赴甘省。著該督即選派賢能道府一員。俟司員到西安。即令

一同速往嚴查審訊。如甘普果有妖言聚眾情形。即行密速拏究。務盡根株。不得稍有寬縱。若係朱紹愷等挾仇誣首。審出實情。即宜按律問擬。以警刁風。該督辦理此案。務宜迅速嚴密。不可絲毫洩漏。致奸徒聞風遠颺。可將此傳諭黃廷桂知之。○又諭曰。恒文覆奏傳播偽稿。案內江舜五原供。江西天一堂寄來。確係正月初七八日。驗查本年正月帳簿。開載收銀日期。甚明。與該犯所供相同等語。

實錄卷三百九十九

五

天一堂傳寄偽稿。年月既確。而萬仁湯供出之羅紹文。游國禮。又俱物故。惟有李德貞。羅雲輝可質。并傳萬長留稿未取之語。自當轉研究。看來天一堂查取根由。於此案情節尚近。而官貴震等轉屬枝葉。此偽造之人。貽累幾許。無知陷於縲絏。揆之天道。豈容漏網耶。恒文摺著鈔寄舒赫德。尹繼善閱看。尋奉諭。即密咨山東撫臣。將傳萬長解江質訊。嗣據東撫咨稱。傳萬長又係得自張二。現將

張二留東省追究。至羅紹文游國禮。雖已物故。而萬仁湯供出與羅紹文同行之李德貞。羅雲輝等。不可不嚴行究詰。是以移咨江西撫臣。將萬仁湯、李德貞等解江根究。則天一堂偽稿。是否係已故之羅紹文等鈔傳。自可得其確實。報聞。○又諭滇省傳播偽稿一案。原從提塘吳士周稟出。則吳士周實首發其奸。如果見此稿詞語悖逆。有憤恨之情。即為首出。則其人深屬可嘉。宜加獎賞。或恐他省發覺。追究牽連。急為舉首。因此根查得實。亦屬有功無過。著該督等。以現將吳士周作何辦理之處。奏聞。尋奏。臣會同撫臣提訊吳士周。據供前見此稿。誤認為奏過本章。是以鈔稟鎮營。不過討好之意。並不知係訛傳等語。是吳士周非因情詞悖逆。憤恨舉首。亦非畏懼牽連。豫為稟出身充外委。提塘見此逆詞。不即首報。有司緝究。鈔送各營。以為討好之具。情屬可惡。應即革職。報聞。○又諭兩廣總

實錄卷三九九

三

實錄卷三九九

三

督陳大受。才品優長。精明勤慎。數歷中外。倚任方殷。前因患病。奏明暫交督篆。隨經降旨。令其在署調理。以冀速痊。忽聞溘逝。朕心深為軫惻。著入祀賢良祠。以獎賢勞。其應得卹典。著察例具奏。○戶部議覆閩浙總督喀爾吉善疏稱。浙省被旱成災。前奉諭旨。浙江、江南、江西三省生俊。准照在部收捐之數稍減。在浙報捐備賑。請按現在糧價。每穀一石。作銀一兩。俊秀捐穀一百八石。庫增附及武生。青衣生。悉按部捐折色銀數計算。如情願捐米者。以一米作二穀。第米不及穀耐久。請准收加一耗。以敷盤量銷耗之用。其江南、江西兩省士子。請令隨地報捐。均應如所請。令士子於各該本省備穀運往。毋得就浙購買。轉致米價高昂。并飭督撫。不時稽察。以杜官吏藉端侵那。留難勒捐等弊。俟米糧充裕後。奏請照舊辦理。得旨。依議速行。○賑貸河南上蔡、潁縣、信陽州水災。羅山縣旱災。飢民口糧

籽種。是日起。

上以孟冬享

太廟。齋戒三日。○壬辰

孝敬憲皇后忌辰。遣官祭

泰陵。○鑄給福建福州府屬之屏南。福寧府屬

之霞浦。福鼎等三縣。新設訓導。鈐記。從巡撫

潘思渠請也。○癸巳。諭軍機大臣等。蘇昌定

長等奏到。委員查勘廣西思陵土州沿邊地

方。被安南夷人拔竹占地一摺。粵西與安南

平錄卷三十九

三

接壤。自來邊境相安。上年舒輅奏稱沿邊栽種筋竹。以杜私越。一面奏明。即交地方官辦理。其辦理之道。未經詳悉籌畫。並未飭交承辦各員。妥協清查。因有憑祥。思陵土目頭人乘機侵占交地。以致夷人不甘。而土目仍以拔竹毀牆。捏詞稟報。轉坐藩國。以梗化不遵約束之罪。現據該道府等查明。分別完結。此皆由舒輅輕率舉行於前。辦理不善於後。致滋事端。邊疆督撫。應慎重周詳。以圖久遠。寧

謚。豈可任意妄有舉動。舒輅著交部察議具

奏。○又諭兩廣總督陳大受。患病溢逝。已經

降旨入祀賢良祠。著再加恩。照伊品級。給與

應得三代封典。伊子陳輝祖。並著賞給一品

廕生。○策試天下中式武舉。詹文正等八十

五人。於太和殿前。○賑卹福建霞浦。福安。壽

寧。福鼎等四縣風潮飢民。○以湖南永綏協

副將馮哲。為湖廣宜昌鎮總兵。○是月。江蘇

巡撫莊有恭。謝恩。并奏蒙恩簡任學政。四載

平錄卷三十九

三

以來。體察士習。民風。畧知梗概。誠如諭旨云。俗尚浮華。文而少實。嗣後。惟正已率屬。廣布德心。提其固有之天良。策以尊親之大義。其頑劣不悛者。則國法具在。斷不敢姑息。長奸至積欠一項。前在學政任內。凡有衿士抗欠。從未姑縱。況今身任封疆。何敢稍有瞻徇。得旨。所言是矣。勉力行之。至隨時隨事。無不訓誨。與凡臣工。皆然而況汝乎。○江蘇學政雷鏐。謝恩。并奏。臣莅浙一年。未有涓埃之益。蒙

恩調補江蘇。惟有恪遵諭旨。操守以廉介為先。衡文以清真為尚。得旨。覽江蘇更繁要於浙省。汝其勉之。又今年浙省被災頗重。雖非汝司文者之責。然既周行數郡。災黎之是否得所賑卹之是否普被。汝何無一言奏及。此大非汝平時留心正學之本意矣。○浙江處州鎮總兵李琨。謝調補恩。并奏抵浙面傳諭旨。以地方偶被偏災。所辦諸事。全在督撫和衷妥協辦理。即各文武亦應同寅協恭。始於

高宗實錄卷三九九

三十九

地方有益。督臣撫臣。敬謹遵循。所過嘉湖各屬。晚稻陸續刈穫。詢之農民。僉云有七八分收成不等。現米價大減。民情甚屬寧謐。得旨。一切據實入告。毋為飾辭。○福建水師提督李有用奏。巡查南路營汛緣由。并謝陞授恩。得旨。覽奏俱悉。福建水師提督。為海疆第一要缺。一切汝宜勉之。○山東巡撫原任河南巡撫鄂容安。覆奏豫省每年額徵漕糧二十二萬石。自雍正十年。乾隆九年。兩次改徵黑

豆九萬九千三百餘石。本年閏五月。遵旨體察情形。又改徵豆二萬石。嗣接部咨。除此次改徵外。尚餘漕米十萬餘石。或全行改徵。或再酌分數改徵之處。議奏。查續改豆石。為數較前已多。雖粟價昂於豆價。以豆抵穀。民所樂從。但各屬情形不一。產豆究不若產粟之多。收穫亦遲。若再改徵豆石。不惟恐誤漕限。且致價值昂貴。請如前議辦理。較為妥便。下部知之。○甘肅巡撫楊應琚。謝陞任恩。得旨。

高宗實錄卷三九九

三十九

汝在甘肅。可謂駕輕就熟。一切實心奮勉。為之。毋庸多論。至準噶爾貿易一事。乃汝專責。當思國體久長之計。不可遷就示弱外夷也。○雲南開化鎮總兵張凌霞奏。營伍名糧。不得虛冒。開化書識。除本身名糧外。竟有分食空糧至二十餘分之多者。名曰伙糧。伏思書識多一伙糧。即營中少一實卒。現飭所屬。盡行裁革。再兵丁每遇糧缺。動經屢月始補。將截存銀米。留充公用。仍以隨缺隨補咨報。現

有缺即行頂補。再直省兵丁原設馬步戰守等次。開化止分馬步。不分戰守。將每月應得餉銀一兩五錢之戰兵九百四十名。與一兩之守兵一千一百七十餘名均攤。每名每月給餉一兩二錢。仍分戰守捏報。以致優劣不分。同歸玩愒。現隨時挑選。由守升戰。再開化兵餉。按季支放。為時既久。銀數自多。兵丁入手。任意花銷。迨日食不繼。每致犯法潛逃。且有外籍入伍者。關銀到手。即行遠颺。現酌改按月支放。以符定例。再開化設有生息當舖二處。因原定以錢一千一百文作銀一兩。出入之數。與市價高低不一。恐有虧折。概不當錢。兵民不樂赴當。遂至生息不敷。現搭換制錢二千餘串。銀出銀入。錢當錢贖。原本無礙。賞賚亦敷。再總兵衙門所需食物。相沿陋例。令夷民上納。名雖給鹽兌換。實有勒派之弊。現刊示曉諭。一概禁革。報聞。

實錄卷三百九十九

七

大清高宗法天隆運至誠先覺體元立極敷文奮武孝慈神聖純皇帝實錄卷之三百九十九

實錄卷三百九十九

七

大清高宗法天隆運至誠先覺體元立極敷文奮武孝慈神聖純皇帝實錄卷之四百

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣謹跪內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未冬十月甲午朔享

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

端慧皇太子園寢御紫光閣閱中式武舉

騎射頒乾隆十七年時憲書順天府行

鄉飲酒禮諭軍機大臣等蘇昌等查覆憑

祥思陵土目越占交地捏報交人拔竹毀牆

一案此事原因舒輅喜事造端又當調任之

時草率交辦遂致土民乘機侵越占奪夷田

而屬藩並無梗化已據該道府等查明應速

行完結此等土目土人原界在內地外藩之

間往往藉端起釁所有起意圖占夷業之土

人若從輕發落仍令復歸本處必挾仇尋鬧

報復不已邊境轉益多事著傳諭該督撫等

秉公嚴審其有強橫不法狡詐生事之人即

行正法以示懲儆或另行安插使離其故土

方不至貽害地方再舒輅原奏交該地方文

武員弁查辦曾否派員總理及分員承辦今

該督等僅將吏目題參此等微員本不能稽

查彈壓亦應詳悉查明指參封疆大吏必當

經畫久遠。不宜以一己之見。輕舉妄動。其遇有交關事宜。則惟秉公以服遠人。盡法以杜奸匪。方得綏輯邊圉之道。○乙未。

上御紫光閣。閱中式武舉技勇。○諭軍機大臣等。楊錫紱所奏查辦駕船誘賭奸棍一摺。稱匪船與捕役交通。每年餽送銀錢。許其據實自首。若始終庇縱。一經訪拏。從重究擬。該管有司一併嚴叅等語。捕役不能緝奸。而轉庇奸。法無可逭。或因年久人衆。以自首完結。已出於無可如何。至統率捕役之印捕各官。督捕緝奸。是其專責。乃平日既漫無稽查。犯賊並置之不問。職守安在。楊錫紱但於捕役之始終庇縱者。始將該管有司查叅。即從前縱捕各有司。並不置議。殊屬不知輕重。著傳旨申飭。令其查叅再所奏查拏傳鈔偽稿棍徒一摺。僅據恒文移咨指名人犯拏獲。而該省傳鈔者並未嚴緝。以靖根株。楊錫紱本庸懦自守之人。尋常錢糧刑名循途

守轍保祿充位。僅能敷衍。稍涉紛繁。一無措置。即如此等情罪重大人犯。全不能實力緝拏。地方何由整飭。著一併嚴行申飭。貴州學政刑部主事周漢故。以御史歐堪善提督貴州學政。廣東巡撫蘇昌疏報乾隆十五年開墾南高雷瓊四府屬荒田一十三頃二畝零。廣惠潮肇瓊羅嘉七府州屬額外荒田并嘉應州仰天湖地共七十頃二十三畝零。廣寧縣荒田七十一畝零。○丙申諭軍機大臣等。西寧奏稱河東池鹽。因今年歉收。場價倍增。據闔場運商具呈。懇將乾隆十六年餘課暫行緩徵。以紓商力。因帑項所關。未敢冒昧具奏等語。西寧已經更換來京。著傳諭阿思哈。令其將河東池鹽近來是否較前倍價。該商輸課是否較前拮据。詳悉確查。如果歉收。倍價完納。維艱。或酌量加恩緩徵一半。以紓商力。若不過尋常價值。偶爾低昂。即可不必著查明據實奏聞。請旨。又諭曰。碩色等

所奏茂隆厥務於該處熟諳開採之楊公亮唐啟虞王朝臣三人內令公舉一人董理倘有營私滋弊漸行吳尚賢故智立即徹回究處等語茂隆厥遠在邊外既未便委員辦理楊公亮等久經辦課且非吳尚賢黨羽自可委令接管但不立以更換限期則盤踞日久勢必又成一吳尚賢矣此次應於楊公亮等三人內揀選一人管理厥務以三年為期期滿即行徹回內地其餘依次充當承管每逢更換之時於內地另行揀選殷實幹練之人出厥協同辦課令其漸次熟練按期接管如此則地方官易於稽查該商等不得久踞夷疆營私漁利邊陲可無滋事之虞碩色等所奏辦理之處尚未周到其吳尚賢應作何辦理該督撫摺內何以竟未奏及一併傳諭詢問尋奏王朝臣已經病廢今令楊公亮充課長唐啟虞協同辦課三年更換再選內地殷實幹練之人按期接管至吳尚賢前充課長

圖財不法并勒斃二命伊係捐納通判應查封家產革職嚴審報聞下部知之○大學士等議覆兵部侍郎管順天府府尹事蔣炳奏稱近日京師大車漸少遇有公務艱於雇覓請酌借帑金令各州縣車戶添置大車過差調集平時聽其攬載營生等語查八旗官車前經雍正初年停止未便復設而民間車少似應暫准所請借給帑銀二萬四千兩置備大車三百輛既於差務有裨地方官自不得藉名封拏致滋擾累從之○以故一等子根敦姪隆保襲爵○丁酉上御紫光閣覆閱中式武舉騎射○諭刑部進呈湖廣秋審本內斬犯滕有伯該撫原擬情實具題九卿會覈以其救母情切改入緩決殊失輕重滕有伯棍格致斃大功服兄從前三法司按律覈覆擬斬立決經朕降旨改為擬斬監候免其即行正法是該犯救母情切之處已邀格外寬典矣若於秋審之時復擬緩決僅虛予以重辟

罪名。久且入於矜減之列。是乃輕視倫紀。豈明刑弼教之意。此端一開。將使挾仇干犯者。轉以父母為起釁之由。得肆其毒手。愚民益無畏懼。且各省督撫。以九卿既經改擬。凡屬此等案件。必有以緩決為請者。九卿因其情節稍重。又必有改為情實者。而言官復援前案相較。益致聚訟紛紜。非所以明法紀而崇簡要也。嗣後由立決改為監候。人犯俱應入於情實。勾到時。即或原罪免勾。下次亦應仍入情實。或情節果輕。免勾數次之後。遇特旨寬減。則可耳。法司惟應執律問擬。此所關於人倫國憲者甚鉅。將此諭問刑衙門知之。

戊戌

上御太和殿傳臚。賜中式武舉一甲張大經。卜永泰安廷。召三人武進士及第二甲田國俊等八人。武進士出身三甲張景烈等七十六人。同武進士出身。○詣暢春園問。

皇太后安。○幸圓明園。湖南巡撫楊錫紱。丁

憂。以湖北布政使范時綬署理湖南巡撫。○己亥。諭曰。山東巡撫鄂容安。查審東平州運河隄工決口一案。據稱楊福全之挾嫌誣首。已直認不諱。監生王心公。並無糾眾盜掘情事。皆由河員商準殷世棟。教令捏報。通判陳思義。添改情節。該道史奕昂。河務是其專責。乃兵夫趙貴。年逾七旬。聽其濫充。迨隄工潰決。茫無覺察。又不秉公研究等語。陳思義著革職。該撫提齊商準。殷世棟。質審定擬。史奕昂著交部嚴察議奏。餘著該部覈擬具奏。○又諭曰。鄂敏著更名鄂樂舜。湖北布政使員缺。即著鄂樂舜補授。所遺四川按察使員缺。著宋壽圖補授。○諭軍機大臣等。鄂容安奏傳播逆詞一案。審據周尚智供出。官貴震告以與妻舅鄭岐山同做。現將周尚智委員解江質審等語。既有周尚智為證。則此稿之出自官貴震與否。面質即得實情。著將鄂容安摺鈔寄舒赫德。尹繼善。令其閱看。再鄭岐山

是否即係鄭鶴年抑另有鄭岐山其人曾否拏獲質對即行奏聞○又諭鄂容安奏請將東省被災之東平等州縣應徵漕糧漕項分別緩徵一摺已交軍機大臣會同該部速議具奏但前經鄂容安在河南巡撫任內曾因被水州縣奏請將漕項停緩降旨允從及見東省被災地方稍廣與豫省相同是以令將有漕州縣應徵漕項酌量如何緩徵以示體恤詢據該部漕糧係應徵米石而漕項則係隨漕輕齋蓆片銀米等項今該撫將本年漕米漕項一併奏請緩徵與諭部原旨不符除俟該部議到日朕再酌量降旨外著即傳諭鄂容安是否該撫偶爾誤會朕旨抑該省被災情形反重於豫省必應如此辦理之處速行據實奏聞以慰軫念○又諭曰顧琮今日具摺謝恩其陽武堵築工程情形未經奏及著傳諭詢問目今已過潦收澤涸之候更遲即屆冰堅施工更不可緩朕深為軫念大學

士高斌等前奏九月中旬可以合龍現在河流形勢若何工程約及幾分引河是否有益著即速詳悉奏聞尋奏九月中旬後汎水加長引河溜勢未順東西兩壩頻有蟄動今續作壩工三十餘丈口門寬二十餘丈期於本月二十四二十六等日合龍得旨知道了冬令合龍之工恐及凍不固宜留心也○庚子廣東巡撫蘇昌疏報乾隆十五年開墾高雷二府屬額內遷移民田二頃八十八畝零廣惠潮瓊嘉五府州屬額外水田五十頃六十六畝零廣潮二府額外沙坦田七十九頃七畝香山縣遷移屯田六十六畝零○旌表守正捐軀之山西崞縣民陳榮女陳氏○辛丑諭曰大學士高斌等奏到河南陽武縣決口現在加緊趕築等語目今已屆冬令水落之候正可施工但上流既未合龍則東省運河漫口益難堵禦山東河道吏妄昂現經顧琮鄂容安前後奏交部嚴加議處論其處分

止於革職史奕昂乃大學士史貽直之子即令革職亦不至於困阨徒使優游坐廢無自新之路且道缺更易生手於一切挑濬築壩備料諸務恐未能及時辦集於運道甚有關係顧琮更無暇分身籌辦史奕昂平日尚屬黽勉可望成就著從寬革職留任効力令其治罪○吏部議准大學士江南河道總督署兩江總督高斌等疏稱宿州州同請改為河缺兼任修防仍司稽查彈壓事宜從之○禮部先期奏冬至慶賀禮儀得旨奉

皇太后懿旨今年冬至著停止行禮○壬寅

上詣暢春園問

皇太后安○以編修張若需左贊善金銓充日講起居注官○賑長蘆屬富國興國蘆臺豐財濟民嚴鎮海豐等七場本年水災竈民○賑山東王家岡永阜富國等三場本年水災竈民○甲辰諭江南安徽屬績溪等二十餘

州縣衛江蘇屬江浦等十餘州縣衛偏災應賑口糧該督撫等現在分別查辦但定例每米一石折銀一兩較之時價稍有不敷窮黎艱於購食著將上下江折賑米石加恩每石加給銀二錢以資買糴該部即遵諭行○又諭曰兩江總督尹繼善奏查辦傳鈔偽撰奏稿一案奏稱拏獲傳鈔人犯內有遊擊魏吉幕友連守禮河庫道李宏長隨張東海王玉管工人楊琦署內居住顧營等請將李宏魏

吉革職與案內人犯一併嚴審等語但據稱李宏辦差公出魏吉現往河南堵築漫口李宏魏吉均著解任質審如果實不知情仍准其開復○又諭曰四川總督策楞奏川省開採礦廠須大員專理請將川北道周琬與建昌道倉德對調周琬已陞授雲南按察使現據該員以母老獨子呈請仍留道任懇以陞銜調建昌道加銅政銜專司廠務等語四川按察使鄂樂舜陞任員缺已有旨令宋壽圖

補授宋壽圖尚在滇省。著即補授雲南按察使。周琬著調補四川按察使兼理廠務。諭軍機大臣等尹繼善奏查辦官貴震傳播偽稿一摺。究出傳鈔來歷。輾轉多人。並將河庫道李宏遊擊魏吉叅奏革職嚴審。據稱李宏辦差公出。實不知情。魏吉現在河南堵築漫口。已諭該部均免革職。李宏著解任質審。魏吉著行文訊取確供。如審明實係幕友。長隨管工人等。私相鈔寫。而李宏魏吉實未寓目。

平定六十二

十一

即仍准開復。再此案由東省究出官貴震一犯。劉宏謨周尚智供證歷歷。竟似出官貴震捏撰。今復蔓延他省。提犯需時。舒赫德豈能久停坐待。但周尚智原供與鄭岐山同做及攜帶多張并劉宏謨拆字等供。俱須詳悉研究。官貴震雖不可坐以捏撰之罪。完結此案。而以廢員不獲用。即懷怨望。見此逆詞得意。傳播其情節。亦屬可惡。著傳諭舒赫德尹繼善令其悉心體察。如根究已有端緒。實犯確

平定六十三

五

據一兩月內可得舒赫德即暫留同辦。若尚懸宕無著。舒赫德即先將官貴震押解來京。其咨提追究各犯。聽尹繼善自行辦理。再續奏到。初七日審訊官貴震劉宏謨等供。仍與前供無異。著遵照前旨辦理。至遊國祥供萬仁湯指出之遊國禮羅紹文俱已身故等語。萬仁湯所指要犯何以俱係已故之人。其是否物故及將已故之人混行搪塞之處。俱應留心研查。無令朦混。四川提督岳鍾琪奏直省督撫提鎮向有行圍之例。請照例舉行。得旨。此奏是有旨諭各提鎮。諭曰。四川提督岳鍾琪奏稱向來直省督撫提鎮均有行圍之例。擬於冬三月內農事已畢之時。查照往例。於成都附郭不近田園之地。帶領官兵前往圍獵。往返數日。親加訓練等語。直省營伍操演武藝。不過拘泥成法。於安營住宿之道。馳騁奔走之勞。無從肄習。於行陣未有實濟。惟行圍可使將弁士卒練習勤勞。岳鍾琪所

奏甚為有益著通行各省陸路提鎮仍照舊例每歲冬季輪派標兵親身督率實力舉行務使嫻熟嚴整以裨實用但既令出圍若仍復按期操演兵丁未免過累著於行圍之時酌量停止操演日期以示體恤并嚴加約束不得蹂踐田園占宿廬舍致滋騷擾并不可日久復致廢格該部即遵諭行○軍機大臣等議覆直隸總督方觀承等奏籌辦圓明園水操船隻事宜一每年入塢苦蓋出塢油艙

平水

五

請照海船舊例應如所請其銀用司庫存公耗羨按年解交內務府會同健銳營大臣經理至船塢擬於鳳凰墩西南山灣處挑河一道并於近岸建庫房七間收貯蓬桅等項小房三間令隨船弁兵居住看守一船在平水修造年分似無庸拘海船成例查新船雖在平水每年操演

上親臨校閱宜堅固以供駕駛應仍照成例一風蓬二年更換繩索簾纜等件按年添補查

船在湖中非海洋風蓬可比現議建庫房不致損壞應定三年更換至繩索等隨時添修難拘年分統令健銳營查明移咨天津水師營採買南料應用一新船八隻需把總銜兼正舵四員正舵工四名副舵工正縶手正縶手正阿板正舢板各八名係由水師營分撥應令把總銜四員分管舵工人等統歸健銳營約束就近支領錢糧及操演火藥伊等均

平水

五

二間於附近處酌建均應如所請從之○又議覆陝甘總督黃廷桂等遵旨酌議調任陝甘總督尹繼善所陳防範準夷各條及籌畫未盡事宜一酌派甘提標戰兵二千一百名肅鎮標二千名涼鎮標一千九百名為首援應用馬駝請照原定一兵二馬四兵一駝之數撥給再派甘提兵六百名肅鎮四百名涼鎮一千名有馬則以馬摘撥無則折駝以備二起出口甘肅二標馬駝足用涼鎮少駝一

百隻酌於甘標駝羔內揀補少馬二千匹將寧夏餘馬協濟一千餘匹外不敷之數請將涼州駐防馬摘調再寧夏駐防馬駝別無動用應請摘馬二千匹駝二百八十隻分解涼甘二標則涼甘二標又可各派兵五百名同二起出口至籌補甘涼肅三標不敷馬駝并西寧固原河州已裁駝應於安西提標積年採買餘駝及孳生駝羔共一千五百餘隻內撥補一固原戰兵二千名需馬四千匹并折駝馬一千四百匹現不敷馬七百一十六匹河鎮戰兵一千名原派馬六步四需馬二千匹并折駝馬六百八十八匹現不敷馬一千一百一十八匹固原戰兵依次出口與首先援剿之師有間應每兵給騎馬一二兵合給馱馬三并馱礮馬一百五十共需五千一百五十四除該提馬儘數撥給外僅少四百六十六匹臨時雇覓駝騾不致遲誤河鎮亦應如固原將所有馬儘戰兵六百名撥用其步

兵四百名為數無多請停調派查善後原議酌留甘標兵一千河鎮兵一千交甘提備用今此項步兵停派河鎮兵不敷一千之數應令甘提於各標戰兵量撥足額一天山西北之烏克克嶺正北之東大坂及東北之河源小堡等處均經挖溝築柵其塔勒納沁距哈密二百餘里形勢頗低北山一帶由上摩垓可遠至哈密城由坡子泉金鈎峽可直抵橋灣瞻望難及現亦各設防卡仍應密派幹弁確探一青海蒙古逼近西寧設有緩急應照原議派西寧兵或二千或三千赴援西寧距青海百餘里遇調輕裝前往毋庸多給馬駝應按現存馬三千八百三匹駝五百隻通融豫備一青海之額色勒津及伊克柴達木得卜特爾等處汎地遼濶原派駐卡官兵不敷偵探應於冬防派西寧鎮標守備千把四員帶兵百名前往巡防均應如所請從之調任安西提督永常奏哈密防兵勤苦防員無

幾經年不得一缺本營缺出又以遠在駐防不能擢補請照直隸官兵派往北路軍臺例分別等第與在營官兵間用下部議行○以編修鈕汝騏為雲南鄉試正考官司業溫敏為副考官侍講良誠為貴州鄉試正考官御史王顯緒為副考官乙巳諭直省秋審案內調姦未成致本婦羞忿自盡各犯雖非有心致死人命而風化所關法難寬宥前經降旨甚明設經一次免勾下年即准改為緩決此

丁未冬四丁

七

亦寬嚴允協矣內外問刑衙門自應一體遵照今奉天省之絞犯二達色湖廣省之絞犯石紹于山東省之絞犯張振欽三犯該撫等又即擬以緩決具題豈朕所降諭旨皆未之見乎九卿會覈改擬情實固屬允協但在督撫等辦理此等重案非一時錯誤偶失輕重可比九卿等應於改擬之後即將該撫等附疏題叅方足以昭慎重若止照常辦理將來必有仍以緩決請者九卿又復議改則亦徒

煩案牘殊非國家明罰敕法訓俗型方之意著傳諭九卿等知之鐘音等著嚴行申飭○巡視北城御史鎖柱等奏天津鹽商差人押護應交內務府銀到京令銀號傾銷各錢鋪紛紛借取恐致虧欠請敕下該鹽政高恒飭役速交并請嗣後一應起解正雜課銀俱由各該處傾鎔足色按限投交得旨允行○丙午諭曰勵宗萬未完城工應需辦理著加恩於直隸藩庫內賞給銀四千兩不必扣還○

丁未冬四丁

三

丁未

上詣暢春園問

皇太后安○戊申諭今日陞等藍翎侍衛德寧箭射旁樹身係侍衛而不能射信手撒放甚屬不堪德寧著革退藍翎侍衛賞給上虞備用處拜唐阿長班効力從前朕因侍衛等騎射平常屢經降旨訓飭領侍衛內大臣等理宜仰體朕心不時令侍衛等加意操演乃平日既不盡心管教而於陞等之時又將不能

射之人揀選引見甚屬不合。領侍衛內大臣等著著交該部嚴察議奏。又諭據鄂容安奏稱陞任泰安府知府宋諤查辦災務每多遺濫。即地方保甲水利平日亦全未經心。請仍留泰安府之任令其加意整理。以贖前愆等語。鄂容安此奏甚屬可嘉。宋諤不過論俸陞授河東鹽運使。然似此陞任之員。督撫等率謂已去之人。未免姑息含容者多。似鄂容安之不避嫌怨。據實奏留者實少。著照所請。宋

實錄卷四〇一

五

諤仍留泰安府之任。令其勉効力。如尚不知奮勵。著該撫叅究治罪。諭軍機大臣等鄂容安奏查勘張秋戴廟一帶隄工。現將所見情形詳細札商河臣顧琮。漕臣瑚寶另行請旨等語。東省河隄於運道民生關係甚屬重大。顧琮現在堵築陽武漫口。尚未就緒。更何能兼顧運河。鄂容安身任巡撫。此事竟須仔細專辦。若待往覆札商。轉恐歧誤。朕前降旨留史奕昂河道之任。亦正欲專其責成耳。

著傳諭鄂容安令其督率史奕昂上緊加工。妥協籌辦。以期及時告竣。兵部議准船廠將軍傅森等奏稱收獲於綏芬。他特庫三處遞送寧古塔人夫間有逃逸。請添置臺站除押送信票官兵安設四臺外。更添五臺派官五員兵一百名稽查。俟創復人等進完撤回從之。

實錄卷四〇一

五

大清高宗法天隆運至誠先覺體元立極敷文奮武孝慈神聖純皇帝實錄卷之四百

大清高宗法天隆運至誠先覺體元立極敷文奮武孝慈神聖純皇帝實錄卷之四百一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲部統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲部統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未十月己酉月食兵部議

准四川總督策楞等奏稱成都府屬灌縣三江口寨子坪一帶地方前經瓦寺土司侵占今始退出招復漢民應設防汛查白河汛去灌縣城十里原設把總一員兵二十名留三名駐渡口足資盤詰應令帶兵十七名移駐寨子坪再撥給提標中營兵二十三名巡查又簡州屬龍泉驛距州城甚遠中有龍泉大山奸匪竊劫頻聞原設兵三名不敷巡緝應添外委一員撥給提標中營兵二十七名從

之 庚戌諭軍機大臣等策楞奏到查辦傳鈔偽稿一摺所有究出夏起鳳龔三二犯分散流傳固屬幸災樂禍情罪可惡正應從此二人跟究其所由來且添註批語更他省所未有其夏起鳳鈔得原稿有無批語一訊即得如原無批語至何人傳鈔方有亦無難究明其夏起鳳龔三一係湖廣人一係江西人如有供出之湖廣江西人犯即應迅速行文該地方官就近提拏徹底嚴究庶首犯不致漏網並非歸此二犯即可了結策楞辦理此案即據所奏已多未協著傳諭令知所慎吏部議准四川總督策楞疏稱南路打箭爐出口至西藏所設裏塘巴塘察木多拉里等四處臺員例用同知通判管理糧務軍需三年更換該員非專管鹽茶緝捕即分駐彈壓地方三年內俱借用別員印不足昭信守請鑄給關防從之 辛亥

上詣暢春園問

皇太后安。諭臺灣鎮為水師總兵最要缺。馬負書未免非其所長。著調補狼山鎮總兵。保在著來京。有總兵缺出。即行補用。陳林每係水師內出衆之員。今服滿候補。未免可惜。著即補授臺灣總兵。馬負書俟陳林每到臺交代後。再赴狼山鎮任保。在亦俟馬負書到任後起程來京。旌表守正捐軀之河南永城縣民魏恒福女魏氏。壬子。

上御勤政殿聽政。吏部議失察私鑄之前任江蘇按察使。今補河南汝光水利道翁藻。降一級調用。照例送部引見。得旨。降調人員。有令該督撫出具考語。送部引見之例。原為外任庶僚。或未深悉其人。因以觀其能否。分別去留耳。翁藻歷經簡用。司道素所深知。何必援例送部引見。著照部議。帶所降之級。從寬留任。工部議准直隸總督方觀承疏稱。南運河額設兵六百名。已經酌裁。應留三百名。其撥防于牙河大隄之兵四十名。請定為額。

設缺出。令津軍子牙二廳就近招募從之。○緩徵山西山陰虞鄉二縣本年水災田畝。應徵錢糧。并春借倉穀賑卹。虞鄉縣貧民。○癸丑。山東巡撫鄂容安覆奏。臣前在豫時。因河內等七縣漫水災重。將漕糧漕項一并奏請停緩。及查東省水災。同於豫省。是以照豫擬辦。前奉諭旨。止有漕項。臣籠統誤看。故未分晰陳請。至濮州范縣荷澤壽張東平東阿濟寧等七州縣。被災尤重。積水未涸之地。秋麥不能播種。請於來春分別加賑。得旨。有旨諭部。諭今歲豫東二省被災地方。稍為廣濶。曾經降旨。將豫省之河內等州縣應徵漕項。加恩緩徵。其東省被災州縣應徵漕項。并令該撫酌量查辦。今據該撫鄂容安請將災重之東平等州縣漕糧漕項。一併分別緩徵。漕糧關係天庾正供。自不便與漕項銀米概准停緩。但念被災窮民。辦漕未免拮据。且該處收成歉薄。若留此米石。俾其流通於民間市。

價自可不致昂貴。於閭閻口食甚屬有益。著再加恩將東省之東平等二十州縣及豫省之河內等七州縣本年應徵漕糧一併緩至來年秋成徵收。以紓民力。至東省之濮州等七州縣被災既屬較重。雖經照例給賑。而明春青黃不接之時。亦宜豫籌接濟。著該撫鄂容安查明極次貧戶。屆期酌量分別加賑。以示朕軫恤災黎之意。該部遵諭速行。工部議准。大學士管江南河道總督高斌等疏稱。清口原設木龍護盤五架。除改紮三架外。請於三壩灘添建一架。從之。予故江蘇巡撫王師祭葬如例。甲寅諭曰。廣東巡撫蘇昌摺奏粵東承辦欽工楠木案內。應追各員核減長領正價運腳銀兩。先經奏明。勒限半年追繳。如不能完。著各上司分賠。查應分賠人員內。有另案治罪無從著追者。應均派攤賠。其應賠上司名下。有無力完繳。追不足數者。亦照此再行均攤代賠等語。蘇昌此奏。非是。

分賠之例。原專為侵貪之員。虧蝕正帑。上司不早為覺察。是以責令分賠。以專其責。成耳。覈減長支。已非侵貪可比。即謂其不能實力稽查。及估報不行。覈實亦應令賠所應賠本分而止。若又將同賠案內他人應賠之分。均攤代賠。於情理殊未允協。且既有他人攤賠。將併應賠之員。俱稱無力完繳。徒使案牘紛繁。輾轉攤派。徒失政體。而亦毫無裨益。前因粵西張永燾一案。曾經明晰曉諭。今蘇昌仍有此奏。或他省尚有似此辦理者。著通行傳諭知之。直隸總督方觀承覆奏各屬積水漸次消涸。天津西南由城南閘口並賀家口鹹水沽等閘。導入海河。天津東北水歸海河。淀運均消。十之六七。靜海縣西北鄉子牙河漫水停積。現將正河支河分流之楊家口堵閉。即可消涸。東鄉一帶。停潦較深。今勸諭居民在蘆北口引河之旁。借開沽道。引流入海。青縣邢家莊挑濬舊溝五道。引漫水歸南運。

滄州境內停潦各莊將舊有溝渠開通導入宣惠右碑等河。捷地減河隄外積瀝由子來屯閻家莊涵洞洩入減河。並酌於呂家橋添挖涵洞一座。興濟減河南隄外積水由青縣之涵洞洩入減河。鹽山縣西南瀝水由宣惠河洩入老黃河。武清縣楊村西岸之水導入鳳河東岸之水導入葉淀。寶坻縣屬於霍家莊等處開通沽道分洩袖針薊運等河。玉田縣屬於芝麻窪等處開沽六道洩入薊運河。各處積水均已消減十之八九。至東光縣屬之鹽場南皮縣屬之畢家窪等處各引水歸宣惠河。吳橋縣屬由沙河王莽河分疏以達宣惠。寧津縣屬由常家窪曹家溝導水入鬲津河。交河縣屬由李家亭子等河導入漳河。故道於鮑家嘴歸運河。薊州運河漫溢之水於兩岸開沽七道均已全消。九月內涸出地畝已種秋麥。十月後涸出者不誤春耕。至未能全涸處俟開春凍解後查辦得旨覽奏俱

悉。賑貸安徽歙縣績溪宣城南陵涇縣寧國旌德太平貴池青陽銅陵壽州和州廣德建平平等十五州縣。宣州建陽鳳陽歸併原鳳中等三衛。本年旱災。宿州虹縣靈璧等三州縣長淮歸併原宿州衛。本年水災。貧民并緩應徵新舊錢糧及借欠籽種口糧。乙卯

上詣

安佑宮行禮。諭軍機大臣等喀爾吉善等查覆卓鼐原奏。乍浦兵丁加增月糧折色銀兩。該管協領等官及書辦人役指稱部費侵扣分肥一案。訊據書役余俊供稱送過將軍額爾登銀一千五百兩等語。額爾登身為將軍乃通省統轄旗兵第一大員。營弁作弊不能查禁。已負職守。乃至扣剋兵餉。侵肥入己。尤可髮指。據供收取家人俱有姓名可質。實出情理之外。已降旨革職拏問。著舒赫德就近赴浙會同喀爾吉善永貴將案內有名人犯一併嚴審定擬具奏。據稱額爾登在乍之時

久有成議如此事係額爾登起意侵肥固應即行正法即係聽信人言而婪贓入己其罪亦無可逭至書役人等原係慣行作弊之人若由本官起意伊不過聽從指使尚可依本罪發落若由伊等網利營私教誘該管各官分肥而伊等從中取利不顧該管大員之陷於重辟有此情節實為可惡即不當以為從論令得以輕罪苟全性命著傳諭舒赫德體會此意并不可稍有透露如令額爾登探知或致意外先行自盡惟舒赫德是問再舒赫德現審官貴震一案如已有端緒將次完結令於完結之日起浙如尚不過輟轉查拏即將查拏之處聽尹繼善辦理江浙接壤可時相聞問舒赫德浙案審完時如江省所辦之案已有頭緒即仍赴江寧若不過往來查拏不易完結則無庸會同即由浙回京併諭尹繼善知之工部議准大學士管江南河道總督高斌等疏稱黃河南岸孟誠菴地方原

設木龍護盤二架除改紮外應添建一架從之調江南京口將軍薩爾哈岱為杭州將軍以安徽壽春鎮總兵王進泰為京口將軍調河南南陽鎮總兵改光宗為壽春鎮總兵浙江黃巖鎮總兵邱策普為南陽鎮總兵賑貸江蘇銅山豐縣沛縣蕭縣碭山邳州宿遷睢寧徐州等九州縣衛本年水災貧民并緩應徵漕糧漕項及十三年以前舊欠十七年錢糧旌表守正捐軀之山西榆次縣民張貴生妻殷氏丙辰諭朕前降旨將甘省乾隆元年至十年舊欠錢糧概予豁免復令將乾隆十一年至十四年未完錢糧分作五年帶徵俾得從容輸納以恤邊氓惟是甘省各屬舊欠錢糧之外尚有額徵草束一項不在蠲緩之例歷年既久積欠已多若令其按年一併完納未免拮据著將甘省乾隆元年至十四年未完草一千五百萬餘束分作十年帶徵以紓民力該部即遵諭行調陝西

巡撫陳宏謀為河南巡撫江西巡撫舒輅為陝西巡撫○丁巳

上詣暢春園問

皇太后安○詣

大高殿

壽皇殿行禮○還宮○諭今歲恭遇

聖母皇太后六旬萬壽海宇臣民願效祝釐者甚衆現在輻輳京師各城米價或致少昂著於京倉撥米二萬石分給五城減價平糶令

尚書蔣溥伍齡安李元亮劉統勲孫嘉淦督率該巡城御史等實力稽查妥協辦理該部即遵諭行○諭軍機大臣等新柱所奏豫籌調劑民食一摺已經批示訓飭地方水旱不齊惟在封疆大吏董率所屬因時酌量實心籌辦自與災黎有益今新柱欲令豫先查明通省出產米糧多少水次遠近以及田畝戶口切實情形逐一造冊既屬瑣屑難行至刁民聚衆之案從重辦理久經通行原屬鋤暴

安良之意若必刊刻科條各處懸掛是以抗官鬬賑為閭閻時有之事而惟恐其不知誤犯亦大非政體矣看來新柱之為此奏多因誤採人言並不詳察事理遽行入告以見其能留心政務但似此摭拾浮詞希圖塞責他人尚不應爾伊係內廷行走之人且屢任封疆受恩最重豈宜出此耶著傳旨申飭又諭曰喀爾吉善永貴摺奏查拏偽稿一案內稱鄧縣知縣伍鉞於閏五月間巡檢鄭承基曾持偽奏一紙付閱係得之千總雷堽迨諭令查訪始行稟首請將伍鉞等革職嚴審并聲明係奉旨密辦之事未敢用本具題等語此事屢經明降諭旨並將拏獲傳鈔人犯分別辦理梗概傳諭各該督撫遵照今該令等俱係現任職官目睹大逆不經之詞輒彼此私相傳觀有意隱匿及至飭查始行稟出按其情罪較之無知愚民妄行鈔錄傳播者自屬較重理應一面具疏題叅一面即行拏問

嚴鞠實情。乃該督等所奏轉似委曲遷就者。然豈此等劣員。尚不當立見彈劾乎。該督等如此辦理。甚屬舛謬。著傳旨申飭。再朕覽吳進義摺奏。浙省米價。統在二兩之間。等語。從前永貴籌辦災務。張皇失措。喀爾吉善到浙後。亦多係隨同辦理。今該處米價。若不過二兩之間。在他省已為中價。災地得此情形。自屬舒展。吳進義以武職大員。尚能留心入告。該督撫身任封疆。獨不應將現在米糧平減之處。隨時奏聞。慰朕軫念耶。喀爾吉善等究何以不行奏及著將吳進義原摺鈔寄。令其閱看。若係該提督有意粉飾。並非據實之詞。即著該督等具摺參奏。一併傳諭知之。尋奏伍鈺等犯現已提拏。鞠訊俟審明另奏。至浙省晚禾收穫。米價漸平。提臣吳進義所奏。並無粉飾得旨。吳進義雖不粉飾。而汝等恐不無粉飾之念。轉令朕懸念災區矣。欽差兵部尚書舒赫德。兩江總督尹繼善。奏審訊劉

宏謨等。供官貴震與鄭岐山撰造偽稿一案。據供前在東省。因刑逼誣供。並無確據。鄭岐山係捏造之名。實非鄭鶴年。今遵旨將官貴震等解京備質報聞。又奏官貴震案內傳鈔各犯。請分別審辦。其鈔帶傳播者。應枷責交官管束。或任人鈔傳。或看後給還。亦有不合。應各杖責。若僅止一見。或聞人傳說。或因本官親戚迫寫情。尚可原應。同案內無干人。犯概行釋放。凡微員生監。已經革斥。審明無干者。咨部開復。此後傳鈔人犯。若與此案情節相同。應照此辦理。下部知之。賑山東齊東德州衛惠民蒲臺平度寧海文登等七州縣。衛本年水災。榮城縣電災飢民。并緩徵新舊錢糧。戊午諭軍機大臣等。鄂樂舜前奏量加科舉一摺。以其聽幕賓慫恿。博士子稱譽。意在好名。批示使知所改。後多綸亦為此奏。因一併宣示。今鄂樂舜接到硃批。旋具摺陳辯。且稱年老孤寒。僕僕省會錄科見遺。無

不曉曉呼籲思欲推廣皇仁此語甚謬省試之中額有定而求中之人無窮得者之喜不敵不得者之怨為政之體惟論掄才之當否若憫其見遺且欲慰其呼籲將必來者盡令入彀而後可有是理乎朕訓示臣工隨事教導無非成全之意為臣子者有則改之無則加勉惟自問諸心可耳鄂樂舜乃欲借此表明心蹟殊屬取巧若如此存心將不能承受恩典矣著嚴行申飭○又諭傳鈔偽造孫嘉淦奏稿一案今據楊應琚奏到甘肅俱有查出人犯蔓延各省傳播之廣如此其首先捏造之犯實乃罪不容誅此等譸張誣妄之詞貽害於人心風俗者甚大當此國家全盛之時正應溯流窮源尋枝批根以正人心而息邪說況此等傳鈔之犯亦不得概謂之愚民無知如果無知雖示以偽稿將茫然不知為何物何論傳鈔凡屬傳鈔皆幸災喜事不安分之輩今並不治以重辟即行正法不過量

予枷責使知儆畏向後倘遇妄言邪說不為所惑則小懲大誡所全實多若恐株連人衆姑息從事將養奸釀患無所底止但督撫奏摺中又有以傳鈔之犯為覆載不容不共戴天者亦未免矯枉過正張大其辭矣蓋此等人犯其罪止於傳鈔即枷責已足蔽辜若竟目以大逆設更有甚於此者又將何以處之是皆未按其情罪之輕重徒於陳奏內為此張大激烈之詞而其意中未必不以此案為可不必如此辦理希圖草率完結又何能實力跟追使真正惡逆之徒及早就獲各省督撫辦理不一恐其輕重失宜今復再行傳諭俾知辦理之道惟務得捏造首惡渠魁明正其罪至外省辦理重案往往遷就懸擱乃其相沿陋習今此案若彼此跟尋仍歸之原發覺處始終無著不得正犯或委之已故之人苟且完結則係何省督撫所辦朕必於其人是問○又諭據定邊左副將軍成衮扎布等

奏查拏瑪底濟爾噶勒誤將名字相似之滿都濟爾噶朗送部審訊應仍發回其查拏之處請無庸議等語前令查拏瑪底濟爾噶勒原為內地之人潛寄烏梁海地方於邊務有妨如有其人即應奏聞查辦無則亦應奏明乃並未究晰率將發往烏梁海應差之滿都濟爾噶朗解送及復令查拏終未將其人之有無具奏實屬糊塗本應查議但念伊係蒙古未諳內地則例且任事未久姑加恩免議

至巴爾品身為叅贊大臣所司何事並不向將軍詳酌苟且了事甚屬無知應嚴加議處但成衮扎布朕既加恩巴爾品亦著寬免嗣後斷不可仍此冒昧著傳旨嚴加申飭又諭據定邊左副將軍成衮扎布等奏公青滾雜卜旗屬有喇嘛扎木產逃往烏梁海居住現交公青滾雜卜令其設法緝獲等語喇嘛扎木產原因私同準噶爾夷人貿易欠債逃居烏梁海地方該將軍等雖行令公青滾雜

卜緝拏恐烏梁海人等不能出力弋獲且準噶爾夷人逃入內地甚夥並未聞追取若內地逃人累次差往追緝轉恐使彼生疑可傳諭成衮扎布不必查拏只應嚴飭衆扎薩克等慎守邊卡毋令再有逃逸○命戶部尚書

蔣溥工部尚書孫嘉淦充會典館正總裁官已未山西巡撫阿思哈覆奏今年五六月間雨水稍多池鹽歉收運鹽之例二百四十觔為一引百二十引為一名今每名場價較

乾隆十三年增至二十餘兩運商竭蹶請將本年餘課緩徵一半下軍機大臣議行雲南巡撫愛必達奏採集番字鎮遠府之雙夷普洱府之車里東川府之猓羅順寧府之猛甸猛麻永昌府之耿馬鎮康潞江芒市猛卯遮放干崖南甸蓋達隴川孟連灣甸猛猛等一十八種內遮放與猛卯蓋達隴川與南甸猛猛與灣甸字體相同分彙成書一十四本進呈下部知之○湖北巡撫恒文疏報恩施

縣乾隆十五年開墾額內下則民田一項二十六畝。賑貸直隸武清寶坻薊州寧河昌平大城東安永清宛平豐潤玉田灤州昌黎樂亭東光天津青縣靜海滄州南皮鹽山慶雲任縣長垣東明開州等二十六州縣本年水雹成災飢民并旗戶竈戶。○庚申兵部議覆直隸總督方觀承疏稱泰寧鎮左右兩營於乾隆十五年被水衝失軍器名糧公費不敷修製請動用朋扣銀兩等語似應暫准所請此項銀兩原為買補倒馬之用嗣後修補軍裝不得援以為例從之。○辛酉諭軍機大臣等定長因裁插筋竹一事接到傳諭之旨奏請於十二月初間親歷關隘緊要地方查勘等語此行殊可不必安南素稱恭順經今百有餘歲内外界址本自畫然何必插棘編籬多方紛擾裁竹一事本不應辦若以撫臣親勘邊防藩國風聞不無驚恐即內地土司亦不免疑懼不若相安於無事為得其宜況

定長此奏亦因傳諭教導勉強從事並非出於心之誠然定長所見甚小著諭令知所擴充。○貸湖北荊門州本年旱災貧民並緩應徵錢糧。○壬戌諭軍機大臣等碩色奏署鎮遠鎮總兵官唐開中於六月二十三日接見逆詞竟不即時密報追究遲及一月直至密查札到之日始行稟復請將唐開中交部嚴加議處等語唐開中接見逆詞不即稟報追究來歷自有應得之罪但各省文武員弁中接見傳鈔置之不論或私自銷燬者恐不但唐開中一人若該督撫等查出奏聞逐案交部未免紛繁且唐開中本屬武弁尚非準泰之身為巡撫應行查辦者可比應俟究出首惡全案完結之日該部分別請旨朕辦理庶務準情酌理務得其中如準泰之自顧已私有心隱匿者嚴加治罪而李宏之全未寓目犯由家人幕賓者即准予開復總無絲毫成見將此傳諭各省督撫知之。○戶部議准雲

南巡撫愛必達奏稱滇省運銅水腳銀抵漢口儀徵支用向由他省解滇往返滋費請令協撥銅本各省將水腳銀自漢口至儀徵一萬四百三十四兩撥湖北武昌司庫自儀徵至通州一萬六千二百六兩撥江南儀徵縣庫運員到彼支領從之○予故總管內務府大臣丁阜保祭葬如例謚溫愍○癸亥

上詣

壽皇殿行禮○諭軍機大臣等駐藏大臣班第

平定奏

三

等奏後藏章羅晉巴所遺戴絳員缺達賴喇嘛欲將章羅晉巴之子索諾木敦多布補授請俟年壯再令襲職等語戴絳係後藏要缺不便久懸章羅晉巴前因失睦於珠爾墨特那木扎勒求入內地本屬可嘉茲又據達賴喇嘛申請伊子已年及十七著照所請索諾木敦多布補授後藏戴絳仍交達賴喇嘛飭令該噶隆等善為教育○諭據吉慶奏稱兩淮各場煎丁本屬窮民專以前曬鹽觔為業

每因鹽觔不能接濟向各竈戶重利借貸以

資日用生計甚為拮据等語著該鹽政酌量

於公項內動銀數萬兩准其赴官借領每年

春借冬還不必加息務須妥協經理俾濱海

窮民咸沾實惠○免山東官臺西由二場平

度州掖縣民佃竈地本年潮災應徵錢糧○

是月直隸總督方觀承奏保定雄縣駐防官

兵明歲餉米此時例應採買但米稍昂貴例

價不敷且恐有妨民食查本年八月內遵旨

平定奏

三

委員赴奉天買米十萬石明春到齊請即由
淀河運充兵餉今暫於保定府倉內借穀碾
米應用俟奉天米到歸還得旨嘉獎○江蘇
巡撫莊有恭奏本年提鎮漕河各標營不敷
兵米八千石遵旨採買此時米價昂貴恐與
民爭購更易騰踴請借支附近州縣常平倉
米俟截漕米到歸補得旨嘉獎○江西布政
使王興吾奏本年春夏米貴倉穀糶借兼行
共四十三萬石來春尚需接濟及此新穀登

場飭州縣採買。各府十日一報。約十一月初旬可以買足。并密令各府查禁短發浮收等弊。得旨嘉獎。○漳州鎮總兵馬大用奏謝調任恩。得旨覽。漳州民戢健關。最為海疆要地。汝宜勉力以副任使。○山東巡撫鄂容安奏。運河自臺莊至德州。隄多殘缺。以漕船行則施犁。泊則施楸。遇雨浸灌。易至潰塌。而按年挑濬。時積土不遠。旋復傾卸。工費徒繁。今詳籌修濬。務期功歸實際。得旨所見甚是。勉力

實錄卷四十一

十一

妥為之。○陝甘總督黃廷桂議奏。布政使張若震奏。墩臺營房。應仿照上下兩江之例。酌定歲修銀數。交兵丁自行修補。汛弁查勘。不固者懲革賠修等語。查向例係地方文武員弁查修。事無專責。日久弊生。或兵丁作踐拆毀。武弁觀望推卸。不能及時整理。似應如所請。俾弁兵視為己責。不敢率忽。至歲需修費。應定正營房每間銀三錢。廂房一錢五分。墩臺并戍樓三錢。牌坊烟墩三錢。令各州縣於

額設公費內。按二八月移交汛弁。轉給兵丁修理。得旨如所議行。○陝西固原提督齊大勇奏。營兵強弱勤惰不一。驟難責其名。名精練。惟擇純熟者優加賞拔。生疎者寬期學習。嚴飭各員弁實心訓練。可漸底精良。再查固原兵悍。寬則玩法。嚴則缺望。惟以公正發其天良。愛猶子弟。臨若嚴師。雖有冥頑。久當自化。得旨所見是實。力為之。○安西提督李繩武奏。謝調任恩。得旨覽。此乃駕輕就熟之地。

實錄卷四十一

三十四

有何別論。但目今情形。自又與昔不同。一切應機制宜。慎固邊守之處。勉為之。○四川北鎮總兵普慶奏。通巴四面環山。崇巒密菁。最易藏奸。營兵五十餘名。不敷防禦。擬將親標存城兵。撥歸通巴營一百名。現因各兵俱有家室。未便遽撥。請嗣後親標三營遇戰守兵缺出。暫停考拔。令通巴營陸續召募足數。若日久不足。將三營隻身兵丁挑往。得旨好。所見是勉為之。○廣西提督岳鍾璜奏。粵西

水土瘠薄。兼多濕熱。弓力稍軟。今飭各營訓練。以五力為率。逐漸加增。有能用七八力至十力以上者。重加獎拔。其騎射生疎。弓不及五力者。勒限學習。違者降革。至火藥硝磺粗澁。易致惹潮。今加工配製收貯。得旨。是實力為之。○貴州古州鎮總兵宋愛奏。陸協營馬步盜甲。鈔舊亟宜修補。司庫無款可動。營中又苦公糧不敷。擬扣存減半隨糧。并於恩加公費糧餉。樽節製造。得旨。知道了。營伍以訓練為要。至於軍裝。非所急也。

實錄卷四百一

三十一

大清高宗法天隆運至誠先覺體元立極敷文奮武孝慈神聖純皇帝實錄卷之四百一

實錄卷四百一

三十一

大清高宗法天隆運至誠先覺體元立極敷文奮武孝慈神聖純皇帝實錄卷之四百二

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理
吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣
總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣等謹將內大臣戶部尚書領侍衛內大臣副都統軍功紀錄五次
尋常紀錄十四次臣等謹將經筵講官太子太傅工部尚書紀錄六次臣等謹將尋常
敕修

乾隆十六年辛未十一月甲子朔遣官祭

平定本四十二

先醫之神 署兩廣總督廣東巡撫蘇昌等
奏照會安南國王接領夷人阮玉漢等該夷
官回文認領附稱有莫氏餘孽聚徒為匪捕
獲渠首莫成陳供稱伊祖父等現僑內地泗
城請為查訪查莫氏後裔於乾隆六年在泗
城滋事移安徽省安插今恐泗城尚有遺種
越界構釁應密行查明奏入諭軍機大臣等
蘇昌定長等奏安南夷官請查莫氏人口一
摺意欲即為查辦所見非是莫氏既居泗城

即屬內地百姓前此據伊來文辦理已屬一
之為甚今又據夷官來文為之查辦此端一
開竟成常例設或輾轉移查將沿邊州縣日
為屬藩查拏人犯既於天朝體制未協且恐
從此漸開邊釁應明白曉諭以乾隆六年將
莫氏後裔遷徙安插此乃撫字小邦格外恩
典現在邊圉寧謐該國陪臣惟應安靜自保
不得借莫氏遺裔為詞屢向內地查訪啟恃
恩滋事之漸如此則明白正大自足折服其
心至嚴飭邊防不令內地匪徒偷越構釁自
是封疆大吏分內所應辦又不當因有屬國
文移始行整頓也將此諭令蘇昌定長知之
大學士等議覆各省鄉試官卷中額乾隆
十五年准禮部議民卷二十五名取中官卷
一名江蘇應取中二名安徽一名浙江江西
福建各三名其官生約在六七十人及三四
十人以上而直隸官卷僅十三四人應取中
三名多寡參差今以官卷多少酌定中額滿

平定本四十二

洲蒙古官生約五十人原定取中六名較滿洲蒙古民卷十餘卷中一名不過畧優漢軍官生約十餘人原定取中一名較漢軍民卷二十卷中一名不過加倍應無庸再議惟官生衆多各省中額應加擴充今擬順天貝字號江蘇福建各四名浙江六名江西五名河南山東山西各三名南四安徽湖南湖北各二名至廣東四川陝西雲南原定各二名北四廣西貴州各一名官生數少無庸加增再文員內吏禮二部司員已不列官卷其八旗武職應自副都統以上方准編列得旨所議是依議○欽差兵部尚書舒赫德兩江總督尹繼善奏現在江省查辦傳鈔偽稿各犯東省究出之官貴震輾轉追至江南宿遷清河揚州江寧復至黔楚等省移咨密拏供出之施楠未獲游國禮一案由江西天一堂究至江寧因萬仁湯在江西所供羅紹文等要犯實係物故咨提萬仁湯等尚未到江其傳萬

長已經山東解到層層究至李純仁又往湖北漢口咨該撫查拏未獲揆各案情形似難剋期完結請將在省各犯審明發落臣舒赫德即赴浙會審報聞 乙丑是日起上以冬至祀

天於

園丘齋戒三日 大學士等議覆安西提督永常奏拏獲北路喀爾喀打牲蒙古達麻林等四名應令北路將軍查明係何部落之人交

回嚴辦并轉飭該蒙古約束所管人衆勿許越境打牲倘有違犯被獲從重治罪并將該管王貝勒等叅處從之 丁卯

上詣

南郊齋宮齋宿 戊辰冬至祀

天於

園丘

上親詣行禮 遣官祭

永陵

福陵

昭陵

昭西陵

孝陵

孝東陵

景陵

泰陵（遣官祭）

端慧皇太子園寢（詣暢春園問）

皇太后安（幸圓明園）旌表守正捐軀之直

隸龍門縣民郝全女郝氏（己巳大學士高

斌等奏十月二十八日陽武漫口壩工衝動

未能合龍得旨知道了此亦無可如何之事

但竭力堵築以期合龍即速馳奏以慰朕懷

予故兩廣總督吏部尚書陳大受葬如例

加祭一次謚文肅（庚午大學士等議覆署

兩廣總督廣東巡撫蘇昌奏稱憑祥土知州

李璋年幼伊叔父滋坤協理州務不能約束

土民任土目張尚忠等越界栽竹以致夷民

拔竹毀柵擬將李滋坤張尚忠枷責隘目頭人及土兵營兵等分別杖責并畫清夷界禁土民占種其擅行拔竹之夷人照會該國王查究等語查此案雖較思陵土目捏造推牆侵占夷地者情罪稍輕但李滋坤張尚忠二人率妄起釁該督所擬不足蔽辜此等土目性終頑梗若仍留原處必圖報復滋事應將二犯於距邊稍遠州縣安插餘應如所奏至安南素稱恭順沿邊畫界相安已久不藉種竹以固藩籬應即停從之（戶部議准雲南巡撫愛必達疏稱古學廠礦砂已盡請即封閉移鑪罩安南兀庫二處就近開採從之（兩江總督尹繼善奏上下江節年偏災賑貸平糶動用不貲統計缺額米上江五十萬餘石下江一百萬餘石時屆秋成自宜買補但米價昂貴且浙省災重商販雲集未便爭購今飭各州縣採買以一半為率其已足額數之半者暫行停緩如買不及半而市價驟增

亦即停止得旨覽奏俱悉○緩湖北天門縣
本年旱災田畝應徵錢糧○辛未

上詣暢春園問

皇太后安○還宮○壬申

上御乾清門聽政○諭西直門一路豫備

皇太后萬壽絲棚特派步兵晝夜看守時屆隆
冬巡邏達旦又因虞及火燭不令熾炭深可
軫念著將內務府制就棉敝衣各賞給一領
以禦嚴寒○癸酉諭四川雅州府從前撥運

小關子地方米石有積存軍米准給天全州
蘆山縣二處里民豫借定限兩年內還繳米
價以歸帑項今歲蘆山縣收成稍薄若於正
賦之外照天全州之例一體並徵閭閻未免
拮据著將蘆山縣未完餘欠米價加恩緩至
明年徵收以紓民力該部即遵諭行○諭軍
機大臣等據喀爾吉善永貴奏拏獲傳鈔偽
稿之盧順陽供稱自直帶回已傳給福建人
張秉仁又福建人戴岳萬曾經傳鈔已回福

建等語此案發自滇南即僻遠如甘肅四川
一經查拏傳鈔之犯不一而足閩省與江浙
接壤何得獨無而潘思渠從未奏及昨召見
布政使顧濟美奏稱伊在閩時尚未發覺並
未聞有此事布政使之言如此巡撫之意可
知試問各省見此悖逆偽詞無不髮指實力
查辦而閩省獨欲掩覆消弭潘思渠於心安
乎現據該督從浙江查出閩省人犯札交潘
思渠提辦如稍不實心則有準泰之前車在將
此傳諭潘思渠知之○以檢討陳慶升為四川
鄉試正考官御史楊勲為副考官侍讀陳大嘯
為廣東鄉試正考官編修李宗文為副考官修
撰吳鴻為廣西鄉試正考官檢討傳靖為副考
官御史李師中為福建鄉試正考官檢討王世
仕為副考官編修汪廷璵為湖南鄉試正考官
中書毛永燮為副考官○甲戌諭今歲豫省黃
沁等河異漲成災業已緩徵加賑民食有資今
據布政使富勒赫奏稱祥符等五縣被淹村莊

尚積水四五尺及一二尺等語。念茲天寒水凍。犁鍤難施。迨至開正。賑期已滿。佈種無資。災黎生計。未免拮据。甚為憫惻。著將祥符。陽武。封邱。延津。滑縣等五縣被淹村莊。無論極次貧戶。於加賑之外。明春再加賑兩月。以資接濟。該撫督率屬員。妥協查辦。俾窮黎得需實惠。該部即遵諭行。○諭軍機大臣等。傳鈔偽造孫嘉淦奏摺一案。各省查拏根究。得之湖廣江西者為多。今據策楞在川省獲犯二百八十餘人。亦謂各犯供出。非傳自湖北之荊州漢口。即攜從江西之景德鎮。從此追訊。或可得其來歷。而現在江西巡撫舒輅。非能辦理此事之人。即鄂昌到江。亦係新任。著傳諭尹繼善。江西原屬該督疆境。應於道員內。如錢度者。委赴江西。專查此事。妥協辦理。務得根源。方足以懲奸偽。而正人心。或即派錢度前往亦可。又據莊有恭奏。稱蘇州郡城根究傳鈔之睦日培。施文達。供稱得自張東海。

查江寧搜獲官貴震逆稿案內。亦係得自張東海。飛飭將睦日培。施文達等。解赴江寧。同張東海一體質究等語。是兩處跟尋。仍歸之張東海。而張東海又有得自顧營倪心傳之供。似此循環往復。益不能得其端緒。將來倘使終無著落。渠魁漏網。殊於大清國體。統顏面有關。將此諭該督知之。○大學士等議。覆皇太后萬壽聖節。恩賞八旗年老男婦。緞疋銀兩。應令各該旗按名分賞。其能接

駕之老婦。應於

皇太后駕過時。賞給緞銀。得旨。是。○刑部議。覆直隸總督方觀承奏。請嚴禁引送偷越關口一摺。查私渡罪犯。例有明文。導引奸徒。亦應懲儆。其僅圖微利。無別情者。應照違禁例。枷責。分別交官管束。若明知別有奸謀。婪索多贓。應照把守之人。知情故縱。較本犯減一等例治罪。從之。○直隸總督方觀承疏。題天津王慶坨營僻處一隅。設兵一百四十餘名。未

免過多。所轄靜海縣汛係水陸通衢。差務絡繹。兼有城池倉庫之責。把總一員馬守兵四十名。實不敷用。又靜海獨流鎮汛在淀漕兩河之中。亦係水陸衝地。前請於存坨兵內撥給靜海縣獨流鎮二汛各十名。奉部覆准在案。但防守究嫌稍單。應請令王慶坨營都司帶本營馬守兵五十八名。移駐靜海汛。同靜海汛原設并續撥兵共一百零八名。統歸管轄。即將舊設靜海汛把總移駐獨流鎮。撥給存坨兵二十五名。王慶坨仍留駐千總一員。兵四十名。足資巡防。其改移之兵。願往者應令移駐。若不足額。俟存坨兵糧缺出。令靜海獨流二汛就近招募。下部議行。○乙亥諭直隸長垣東明開州三州縣。今歲夏秋之間。黃水淹浸地畝。業已加恩賑恤。但現在積潦未退。秋麥已逾播種之期。貧民生計維艱。朕心深為軫念。著將從前極貧次貧之戶。例應加賑兩月一月者。俱再加賑一月。令該督方觀

承分別辦理。務使貧民均霑實惠。該部遵諭速行。○駐藏都統班第侍郎那木扎勒奏。準噶爾遣使通問。拉達克汗探聽土伯特信息。又求代請喇嘛數人。拉達克汗致書問達賴喇嘛。可否給與達賴喇嘛告知臣等。並稱已答回書云。我受

大皇帝重恩。養育土伯特地方人衆。今準噶爾欲請喇嘛。若不奏明。斷不可遣往。近奉諭旨。揀選藏內喇嘛進京。甚衆。汝等果誠心奏懇。

必蒙賞給等語。準噶爾台吉喇嘛達爾扎。或因聞珠爾默特那木扎勒受戮。藉端探聽動靜。拉達克部落弱小。處於其間。為之通信。亦其常事。但恐為準噶爾所愚。現已令邊界各卡嚴加防範。又令達賴喇嘛與噶隆等曉諭拉達克汗。將諸凡見聞。報知藏內。並賞給緞疋。以示獎勵。報聞。丙子

聖祖仁皇帝忌辰。遣官祭景陵。○

上詣

奉先殿。

壽皇殿行禮。○諭曰。湖北巡撫恒文奏稱該省老民老婦來京叩祝

皇太后萬壽。俱已陸續起程等語。此等閭閻耆耄遠赴祝釐。出自伊等至誠。而當此嚴寒長途跋涉。朕心深為軫念。其已至京師者。該部著加賞賚。未至京者。所至地方官從優資送回籍。其他省有似此者。俱著照此辦理。概不必令其赴京。以仰副

平衆文四十一

二

一

聖母慈仁保惠至意。○又諭。今歲浙江湖南等省前後降旨截留漕糧。共一百四十六萬石。又因江浙河南山東等省。均被偏災。復將被災州縣。新舊漕糧。分別蠲緩。其應減幫船甚多。念該旗丁等所有苦益日用之費。若照例給與一半月糧。恐有不敷。其災減軍丁情形。自更拮据。著將各該省截留蠲緩減船各丁。於例給折半之外。再加恩賞給二分。以恤丁

力。該部即遵諭行。○戶部議准。甘肅巡撫楊應琚疏稱。狄道。河州。渭源。靖遠。會寧。平涼。靜寧。永昌。平番。寧夏。朔靈州。西寧。碾伯。等十四州縣。本年水雹成災。飢民已行賑卹。其勘不成災之皋蘭。狄道。渭源。金縣。隴西。會寧。安定。岷州。伏羌。通渭。漳縣。平涼。靜寧。莊浪。華亭。隆德。鹽茶廳。寧州。合水。環縣。寧夏。靈州。平羅。擺羊。戎廳。西寧。碾伯。大通。衛。歸德。所禮縣。階州。成縣。等三十一廳州縣。衛所村莊飢民。應貸給籽種口糧。得旨。依議即行。○丁丑。諭軍機大臣等。據恒文奏。傳鈔偽稿案內。有貢生龍韜在土官黃之錦家。見這稿有批語。就將此語添寫稿內等語。龍韜身列成均。乃既傳鈔偽稿。又添錄批語。其為幸災樂禍。心懷悖逆。情罪較重。自當從重辦理。其黃之錦既屬土官。亦膺一命。與無知鄉愚不同。且此等逆惡之詞。竟傳入土司境內。其流播之廣。一至於此。將來提拏到案。應嚴行根究。傳稿來歷

平衆文四十二

三

並批語係何人之筆。俱當徹底究明。不可草率了事。將此傳諭恒文知之。○戊寅

上御太和殿視朝。文武陞轉各官謝恩。○禮部議覆兩江總督尹繼善奏稱。江省文闈鄉試。五經卷多。請咨明考官。憑文酌取等語。查五經定額。十五卷。取中一卷。不得額外加取。若人多文佳。應照舊例。於五經中額外酌取。副榜三四名。從之。

清實錄

卷四百二

大清高宗法天隆運至誠先覺體元立極敷文奮武孝慈神聖純皇帝實錄卷之四百二

清實錄 乾隆十六年十一月下

大清高宗法天隆運至誠先覺體元立極敷文奮武孝慈神聖純皇帝實錄卷之四百三

乾隆十六年辛未十一月己卯。戶部議覆調任陝西巡撫陳宏謀議奏添鑪鼓鑄採買川銅各事宜一。由川省樂山縣老洞溝廠買銅二十五萬。勦價銀二萬二千五百兩。應照領運川錢例。委官一員。跟役六名。運辦其口食及腳費。並於地丁銀內動支。俟鑄錢易銀歸款。一。增鑪十座。應添書辦巡役各二名。并增給外巡官口食一新。舊鑪共二十座。每年銷銅鉛點錫七十七萬一千五百八十勦。鑄錢九萬三千六百一十八串三百零除支銷口

清實錄

卷四百三

二九一

食雜費外存錢八萬六十六串三百零。前經奏准舊鑪所鑄於錢貴時出售平價。新鑪所鑄搭放在城八旗九營兵餉。但核算尚不足一成之數。請將新舊鑪錢通融搭放。向因各兵歲暮費繁。豫支來年正月之餉。今請於正月增支一成。合計放錢六萬八千一百六十九串四百文。餘照市價減售。一。新鑪十座。應添建鑪房錢庫。製備器具。所需銀於司庫借給。本年十月朔。加鑪開鑄。於應領工料內分

四季扣還。均應如所請。從之。○庚辰。諭本年恭逢

聖母皇太后六旬萬壽。普天同慶。所有在京及各省在籍人員等。懇請設立經壇。以申慶祝。經禮部具奏。請旨。共一百八十五員。念該員等俱非現任職官。且有由本籍遠赴京師者。應行特沛恩施。此內來京候旨解任休致及候補降調。現有職銜之員。俱著加一級。其草職人員。五品以上者。均降二等。賞給職銜。七

品者。復還原銜。以昭錫類。推恩特典。○又諭據高斌等奏報。陽武漫口。加緊搶築。於本月十五日。已經合龍等語。該處隄工漫溢之時。朕即降旨。傳諭高斌。令其率領幹練人員前往。會同顧琮。協力辦理。高斌未奉此旨。先行奏聞。即日赴豫。協搶漫口。急公任事。甚得大臣之體。伊自到豫後。親駐河隄。督率搶修。兩月有餘。合龍完竣。甚屬勤勞。高斌著交部從優議叙。其自南河帶往幫辦人員。亦著交部議叙。至陳宏謀。由陝赴京。途經豫省。因鄂容安已調東撫。令其暫行署理。適當壩工緊要之際。能實心趕辦。深屬可嘉。陳宏謀亦著交部議叙。至於顧琮。原係河東總督。陽武隄工。既不能防護於前。及漫溢之後。加緊堵築。乃分所當然。况伊從前草職之案。經朕加恩寬宥。此次不應復邀議叙。即該工承辦人員。身司厥事。職守應為。均可毋庸議叙。其由他處工所。派撥幫辦之員。著顧琮。陳宏謀。查明報

部一併議叙○實授唐開中為鎮遠鎮總兵

○辛巳

上詣暢春園問

皇太后安○幸圓明園○壬午

上詣暢春園奉

皇太后幸萬壽山還暢春園○癸未以上

崇慶慈宣康惠敦和皇太后徽號遣官告祭

天○

地○

太廟○

大社○

大稷○

上奉

皇太后詣萬壽寺瞻禮○奉

皇太后還壽康宮○

上還宮○諭直隸及湖廣來京叩祝

聖母皇太后萬壽已到京之老民老婦俱已加

恩賞賚念伊等年躋耄耄跋涉遠來茲於道

左跪迎已得瞻仰

慈光各申慶祝之悃際此隆冬應令早就歸途
著該地方官護送還鄉共樂昇平頤養天年
以仰副

聖母慈惠深仁○又諭直省年老休致大臣魏
廷珍等因恭逢

聖母皇太后六旬萬壽赴京叩祝向來在京休
致老臣遇有慶典曾降旨令於乾清門行禮
茲值朕躬奉

皇太后安輦還宮伊等俱跪迎道左瞻仰

慈光已得各申忱悃若仍俟萬壽之日趨朝叩
祝恐年逾耄耄際此隆冬不勝寒冷轉非體
恤之意著即傳諭令早就歸途際此不必俟屆

期行禮俾得回籍頤養共樂天和以仰副

聖母慈恩嘉惠老臣至意○諭軍機大臣等據

定邊左副將軍成袞扎布等奏準噶爾前來
貿易夷人因時值大雪不能回程只應嚴守
邊卡不必勒回等語此次夷使違禁逾卡私

行貿易已屬難以允行。即因阻雪不能歸。亦應呈明該將軍。方可允准。今未經呈請。托故逗遛。殊屬非是。可寄信成衮扎布。令將難准貿易之處。曉諭額魯特人等。即令遄返。果因雪阻難行。應令暫居卡外。俟逾年春暖遣歸。○定邊左副將軍親王成衮扎布奏。據派出禁止貿易之驍騎校齊克慎等密報。十月十四日。有額魯特庫本等六十人來。縛去貿易回衆。及額魯特人等五十餘人。詢據回人巴起稱。台吉喇嘛達爾扎。夏間遣人往額爾齊斯地方。喚達瓦齊。達瓦齊不敢往。與台吉達什策凌烏巴什議。於九月十二日。投奔大皇帝。達什等密告喇嘛達爾扎。至期集兵五千。將達瓦齊屬下三千人。擒獲一半。並此處貿易之達瓦齊屬下人。縛去等語。又詢貿易來之額魯特錫喇卜。據稱。今年秋間。喇嘛達爾扎。差宰桑博和勒岱。往喚達瓦齊議事。達瓦齊不奉命。喇嘛達爾扎遂遣博和勒岱。鄂

勒哲依二人。帶兵一萬往擒。達瓦齊知之。議於九月二十六日前來投誠。後聞博和勒岱等兵將到。遂於二十二日。帶兵五千。行至和通哈爾坡地方。策凌烏巴什領兵追戰。既敗。猶帶殘兵尾追。而博和勒岱等兵萬餘。在納林布魯爾河阿爾台山梁邊截。此時未知如何等語。臣等已密諭各卡。加意防範。如有投誠來者。酌量情形辦理。奏入。諭軍機大臣等。達瓦齊乃準噶爾大策零敦多卜之孫。在彼處衆台吉中。較為強大。今與伊台吉喇嘛達爾扎不合。前來投誠。若論與準噶爾和好。自不應收受。然議定疆界時。並無彼此不留逃人之條。且自康熙年間以來。收來此等之準噶爾人。不知凡幾。今若不收。達瓦齊等。是絕伊歸路矣。著寄信成衮扎布等。達瓦齊若投入我邊卡。實係力窮。懇求收養。可加恩給與口糧。及騎馱牲口。量為接濟。照去年薩喇爾等投來之例。將達瓦齊及屬下緊要頭目。揀

選數人先行馳驛送赴京師。其餘人衆照例妥辦候旨。倘未入我邊卡之先。豫使人來懇求接濟。則斷不可應副。恐墮準噶爾詭計。再此際達瓦齊實係率衆投誠與否。一得實信。即行具摺奏聞。○甲申。恭上皇太后奏書。

上禮服於中和殿恭閱奏書後。

上升輿。由右翼門至永康左門。降輿。大學士捧奏書。由中路前行。至慈寧門下。

上由東階升。至門下東旁立。

皇太后禮服。升慈寧宮座。儀駕全設。中和韶樂作。

上詣正中拜位。跪。大學士捧奏書。在左旁跪進。上受奏書。恭獻。授右旁大學士跪接。置正中黃案上。宣讀官捧起。跪宣奏書訖。

上九拜。禮成。奏書曰。臣聞有大德以得諸福。既得壽必兼得名。本孺慕以隆所親。惟隆稱斯協隆禮。欽惟

聖母崇慶慈宣康惠敦和皇太后。安貞體順。茂育含章。厚澤延禧。景福綿而升恒。並久至仁敷化。春暉煦而民物咸和。仰承教育之恩。勅時幾於罔懈。用啟昇平之治。溥慶惠於無疆。茲逢六甲之初周。愛日偕慈雲並麗。適際一陽之來復。海籌與綵線齊添。八紘之仁壽同登。萬宇之嘉祥備至。稱觴蘭殿。介祉長綏。奉冊萱幃。崇稱宜煥。微忱曷罄。茂典斯昭。伏冀聖恩俯垂俞允。不勝拳拳之至。謹奏。奉

皇太后幸壽安宮侍宴。至壬辰。皆如之。○諭曰。河道總督大學士高斌。巡撫陳宏謀。來京召見時。面奏堵築陽武漫口。辦理物料。計動帑金三十萬餘兩。初於附近州縣採辦。旋因工鉅費多。漸及次近。最後搶築。乃至赴遠地辦覓。民情俱為踴躍。及時輸運來工。得以告竣等語。中州民風素稱淳樸。當此緊急大工。辦料殷繁。其應副儲備。不無浮於動帑購採之數。乃民情毫無勉強。且能尅期畢赴。効用爭先。甚

屬可嘉。應行獎勵。以為急公趨事之勸。其如何酌量加恩之處。軍機大臣會同高斌陳宏謀。速議具奏。尋議。查此項辦運工料。俱按地畝分購。應仍於地畝錢糧內酌蠲從之。○乙酉。恭上

皇太后徽號

冊

寶

上禮服於太和殿恭閱

冊

寶奉安綵亭上前行

上升輿隨後。由右翼門至永康左門

上升輿行。至慈寧門外東旁立

冊

寶仍設正中黃案上

皇太后禮服升慈寧宮座。儀駕全設中和韶樂作

上詣正中拜位。跪左旁大學士捧

冊

寶依次跪進

上受恭獻。授右旁大學士跪接。置正中黃案上。宣冊官宣寶官跪宣

冊

寶訖

上九拜禮成

冊文曰

鴻慈式訓。一人承啟迪之隆。厚德凝祥。八表效

尊親之戴。歡騰中壺。慶溢寰區。欽惟

聖母崇慶。慈宣康惠。敦和皇太后陛下。地道同符。坤元合撰。化孚宮掖。敦禮教而範著璇闈。

治洽邦家。沛仁施而惠周瀛海。

恩深鞠育。仰蒙顧復之勤。念切瞻依。宜備欽崇之典。荷春暉之普照。序啟陽和。欣壽域之宏

開。律諧長至。六旬初度。恰六花獻瑞之辰。萬福攸同。正萬國來朝之候。捧霞觴而跪進。並申嵩岳之呼。侍翠輦以扶趨。齊上瑤池之祝。

合九州而致養永戴

慈雲總百祿以承

歡薄霑愷澤敬稽經禮虔展悃忱謹告

天

地

宗廟

社

稷率諸王貝勒文武羣臣恭奉

冊

寶加上徽號曰

崇慶慈宣康惠敦和裕壽皇太后伏願純禧茂

集嘉祉駢臻遐齡綿有道之長寶冊偕日星

並煥篤祐迓無疆之祚徽章與高厚常昭臣

誠歡誠忭稽首頓首謹言○諭本月二十日

恭奉

聖母皇太后御大安輦還宮所有奉輦之校尉

俱極恭敬舉步整齊

慈體康豫朕心深為嘉悅著加恩賞賚交該堂

官查明辦理○又諭曰兩廣總督阿里衮著

即馳驛赴任○丙戌諭曰大學士高斌侍郎

汪由敦著馳驛前往會同總督方觀承查看

天津一帶河工○諭軍機大臣等傳鈔偽稿

一案輾轉跟究俱屬枝葉首惡之犯久未就

獲據各省傳播多得自木商木筏由湖南浮

江而下即至漢口故漢口傳布特衆湖南入

滇其途亦便故滇省得稿居先昔年造作訛

謗逆詞天地所不容如曾靜張熙皆產自湖

南由此推求或幸災樂禍之餘黨尚未殄絕

首惡即在湖南亦未可定楊錫紱本非能辦

此事之人今現已回籍屬員查辦自必更為

懈弛著傳諭范時綬密為留心詳悉訪查務

究實在逆徒得其確據明正典刑亦不可因

有此旨張揚其事轉令渠魁漏網○戊子

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮○

御製

慈聖萬壽九如頌九章書屏恭進

皇太后序曰恭惟

聖母崇慶慈宣康惠敦和裕壽皇太后陛下德

駕二南徽儀四表凝符滿汭位祿名以壽彌

昌衍慶岐山元亨利惟貞益固蓋綜百度於

慈訓爰綏六宮而內和從提抱以來

深恩鞠育暨涖臨之後懿範遵循鞏我不基均由

聖哲皇哉夏恢啟母允矣革翼湯孫漢明德之

儉約難方宋宣仁之憂勤亦遜六旬週甲萬

歲添籌

御殿含飴方物敷天之養奉觴上壽家人主鬯

之歡光

玉冊以鴻稱播金聲於盛典約六經之吉語達

萬國之虔悃敬頌九如載申百拜其一章曰

至哉坤元於萬斯年歛時五福而百化興焉

福履綏之照臨下土肅肅雍雍禮義以為紀

威莊而安孝慈而敬以予小子正家而天下

定矣其二章曰顯顯令德德音是茂遂布於

三宮以和長幼以親九族九族既睦謙尊而

光穆穆皇皇言而履之禮也行而樂之樂也

福祿來崇中心得也其三章曰元年春即命

曰天子親載耒耜汝其敬率作興事維九年

春日載陽又曰后妃齋戒親東鄉躬桑以為

黼黻文章冬祁寒夏暑雨求民之莫以穀我

士女其四章曰學于古訓憲章文武教之誨

之是謂承天之祜敬哉因吉土以饗

帝於郊敬哉有事於

太廟大蒐巡侯甸世德作求元子哉我日斯邁

而月斯征翕受敷施然後能使人以三十年

之通制國用百度惟貞多文以為富脩辭立

其誠視乃

列祖明德惟馨其五章曰天作高山繼序思不

忘承天而時行。續女維莘。維十有三年春。至于岱宗。敬祀事。丕惟曰。品物咸亨。予惟不可不監。命有司。發倉廩。賜貧窮。山川出雲。亦右文母。秋大有。厥篚絜絲。以介眉壽。其六章曰。萬邦惟懷。我不敢知。曰。厥惟艱哉。我出我車。自彼氏羌。至誠感神。

聖謨洋洋。命之曰中和之紀。曰仁與義。義以正之。天之所助者順也。仁以愛之。人之所助者信也。七旬有苗格。實受其福。天地之大德曰生。以綏後祿。其七章曰。崧高維嶽。如岱禮南。國是式。淮海惟揚州。駕蒼龍。檜楫松舟。三江既入。昀昀原隰。何蓂何筮。南山有臺。北山有萊。桃始華。天降時雨。楊柳依依。有鶯其羽。酌言獻之。維筍及蒲。黻衣繡裳。其惟

聖人乎。思媚周姜。太姒嗣徽音。以光大也。垂裕後昆。其八章曰。脩身及家。均平天下。其旋元吉。俾緝熙于純嘏。甲子。復自今。以始。百年曰期。惟曰。欲至于萬年。頤頤貞吉。子子孫孫。子

孫千億。其九章曰。十有六年冬。十有一月。律中黃鍾。

萬壽無疆。式燕且喜。畢獻方物。小大稽首。維予小子。拜手稽首。曰。如山如阜。如岡如陵。如川之方至。如月之恒。如日之升。如南山之壽。如松柏之茂。以加上。

崇慶慈宣康惠敦和裕壽皇太后徽號禮成。頒詔天下。詔曰。帝王寅紹丕圖。首隆尊養。恭承泰運。洽慶家邦。鴻名彰至德之符。上壽錫敷天之福。際昇平於六宇。祝純嘏於重闡。所以宣播徽猷。敦崇愛敬。必儀文之大備。庶典禮之聿昭。欽惟

聖母崇慶慈宣康惠敦和皇太后陛下。運啟升恒。化符悠遠。贊軒圖而立極。翊舜日以重光。荷

教育之恩勤。慈仁懋著。勅幾康於密勿。保治彌隆。厚澤洽於羣生。祺祥光於九有。頤頤長樂。苞元氣之彌綸。介祉承

歡布太和之洋溢茲值辛未仲冬之月恭逢六旬

聖壽之期福自天申躬膺

慈眷集鴻禧之美備廣運難名順率土之尊崇

徽稱通駿祇告

天

地

宗廟

社

稷於乾隆十六年十一月二十二日率諸王貝

勒文武羣臣恭奉

冊

寶加上

崇慶慈宣康惠敦和皇太后徽號曰

崇慶慈宣康惠敦和裕壽皇太后福履優游彌

衍淳熙之緒泰符昌熾式敦敦錫之源盛典

特隆湛恩用溥所有應行事宜開列於後一

歷代帝王陵寢先師孔子闕里應遣官致祭

著察例舉行一五嶽四瀆等祀應遣官致祭

著照舊例舉行一王妃以下奉恩將軍之妻

以上俱加恩賜一公主以下鄉君以上俱加

恩賜一滿漢大臣命婦年六十以上者俱加

恩賜一外藩王妃以下公妻以上俱加恩賜

一在京滿漢文武大小官員俱各加一級一

內外大小各官除各以現在品級已得封贈

外凡陞級及改任者著照新銜封贈一內外

官員有因公註誤革職留任者該部查明奏

請開復一凡試職各官俱准實授一在京八

旗兵丁及太監等俱著賞給一月錢糧一滿

洲兵丁原係披甲効力行間因疾病年老閒

住者著察加恩賜一八旗滿洲蒙古漢軍兵

丁及內扎薩克喀爾喀等蒙古年七十八十

九十以上者分別賞賚至百歲者題明給與

建坊銀兩一軍民年七十以上者許一丁侍

養免其雜派差役八十以上者給與絹一疋

棉一觔米一石肉十觔九十以上者倍之至

百歲者題明給與建坊銀兩一滿漢孝子順孫義夫節婦該管官細加諮訪確具事實奏聞禮部覈實以憑旌表一各省儒學以正貢作恩貢次貢作歲貢一國子監監生免坐監一月一凡嶽鎮海濱廟宇有傾頽者該地方官估計價值具奏修葺以昭誠敬一歷代帝王陵寢有毀壞者該督撫察明具奏修葺一各省道路橋梁間有損壞者著地方官查明修理以利行旅於戲播

徽音而錫類萬年樂有道之長綿景祚以凝庥四海沛無疆之澤布告天下咸使聞知 巳

丑

上幸瀛臺諭曰鐵景佑不勝總兵之任著來京以副將用所遺河州鎮總兵員缺著楊大立補授 庚寅

上御乾清門聽政吏部議准直隸總督方觀承疏稱正定府屬營田水利工程地方有司事繁不能兼顧請歸鹽捕同知管理并鑄給

關防從之戶部議覆河東鹽政西寧奏稱近年商力拮据鹽引壅滯請酌量裁減等語查河東餘引自雍正三年至乾隆六年續增至二十四萬道今既壅積難銷應如所請暫減四萬道從之以天津鎮總兵范宜謙為京口副都統長蘆鹽政吉慶為天津鎮總兵仍兼管長蘆鹽政事務 辛卯

上幸瀛臺諭豫省黃河兩岸大隄之外舊有古隄此善制也歷年久遠未免殘缺今秋陽武漫口黃流灌入致直屬之長垣東明皆被波及亟宜補築所有武陟獲嘉新鄉延津等縣隄工著該撫即動項修理被災貧民亦可藉工作以資餬口其直隸長垣等處隄工有無殘缺並令總督方觀承查明具奏尋奏長垣東明二縣向有太行隄長一百八里南有防黃月隄長五里餘太行隄在東明境者尚皆完整在長垣境者康熙六十年黃水衝決王家隄因築內月隄乾隆四年月隄與甄家

莊之西老隄。又為瀝水衝開。因於老隄外圍築外月隄。本年陽武漫溢。外月隄刷坍三處。約三百餘丈。今水勢雖退。近隄泥淖數里。難以施工。請俟明春興築報聞。諭軍機大臣等。陳宏謀奏夏邑彭李三姓抗糧加罰一案。彭家屏名下已照數清完。李肖筠本名下所欠原屬無多。族內士紳倚勢抗欠。今止追李肖筠一人。伊等反得置身事外。將來益肆抗欠。應按欠十倍罰追等語。此案前經鄂容安奏。因彭家屏李肖筠係藩臬大員。乃妄行逋賦。累累是以令其加罰十倍。勒限催追。今彭家屏已經全完。而李肖筠族內有殷實紳士。不肯完納。以致積欠如此之多。在該紳士等倚藉族中大員聲勢。抗欠錢糧。大干法紀。若因代完有人。轉得脫然事外。刁風尤不可長。自應嚴加懲治。但族衆倚勢抗糧。究與身為大員不能整躬率物。妄行逋賦者終屬有間。若一例加罰十倍。未免太重。著傳諭陳宏

謀。所有李肖筠本名下應追銀兩。仍照前旨催追。至其族中紳士。查明實在逋欠數目。加罰一倍。勒限催繳。如此方為情法之平。倘李肖筠名下。并伊族衆應完之數。仍各抗延不納。不能即速清完。該撫一并嚴叅治罪。○戶部議准。四川總督策楞奏。稱樂山威遠南部西充簡州綿州仁壽等七州縣。竈民開洵鹽井一百七十四。請增陸引五百六十五張。於本年發川餘引內動給。自本年始。照例納課從之。○壬辰直隸總督方觀承奏。天津武清等州縣。本年偏災。蒙恩給賑。來春賑貸平糶。需米尚多。查遵化薊州豐潤三州縣。每年供應。○
陵糶係東豫二省漕米輪流撥運。遇二漕轉撥採買八溝米供用。茲聞八溝米賤。請買供陵糶。截留豫省漕米五萬一千石。貯天津北倉。備各縣借糶得旨。如所議行。○吏部議准。雲南巡撫愛必達疏。稱布政司濟用庫原設大

使副使二員。滇省錢糧大使一員。足資彈兌。請裁副使一缺。從之。是月。直隸總督方觀承覆奏察哈爾湯河圍場四百有六里。現有村舖六十八所。住旗民二百五十八戶。其地畝已墾成熟者一百八十七頃。未墾荒田約計可得百餘頃。現令民墾種。俟成熟後履畝確勘。照例升科。其新舊旗民各戶。應令獨石四旗二廳編排保甲。設立鄉地。以約束地方。催收糧賦。報聞。江蘇巡撫莊有恭奏。今歲

可錄各官三

言

浙省歉收。遵旨廣開海禁。又准浙撫臣永貴咨。浙商販米數十石及數百石者。在蘇州採買。均有浙省藩司及溫處台寧四府印照。查蘇城兩月之間。賣米二十三萬九千零有照者。僅十之一。恐此數十萬石米。或藉名浙販。透漏營私。於江浙兩省民食有妨。今咨明浙省督撫。嗣後各府商販來蘇。均照溫處台寧之例。憑印照驗放。江蘇客商買米赴浙者。亦如之。俟海運停止後。亦停給照。得旨。甚是。知

道了。署湖南巡撫范時綬奏。益陽縣差役潛入苗寨需索滋事。拏獲嚴究。其失察各官查明詳參。并飭各屬文武員弁。督兵役查盤。每月出具保結。不得視為具文。得旨。是苗疆雖云無事。而嚴禁騷擾苗寨。尤應不時留心者也。山東巡撫鄂容安奏。地方諸務均須整頓。事不敢過急。心不容稍懈。得旨。二語得要。勉之。四川按察使周琬奏。謝恩。請訓。得旨。一切設誠於內。而力行之。川省雖事簡。然

可錄各官三

言

亦有職分。當為之事也。署兩廣總督廣東巡撫蘇昌奏。粵東省內外重城。城上礮房四百四五十間。皆用細杉木作柱。雨淋蟲蛀。常需修葺。今秋復遭颶風。坍塌過半。請將內城礮房。改用磚柱。及堅實木材。其依山瀕海險要之所。應酌量增修。帖近民居處。減修一百餘間。共增建修造二百四十九間。在外城者。建造年淺。仍照舊修一百五間。城上馬道。并應填築高厚。得旨。著照所請行。但期工歸實

用可也

實錄卷四三

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百三

大清高宗法天隆運至誠先覺體元立極敷文
奮武孝慈神聖純皇帝實錄卷之四百四

藍翎總管經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總管官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未十二月癸巳朔定輪派值

年旗諭近來八旗都統辦事遲誤雖有值月

大臣率皆意存推諉苟且了事並不實力經
理殊屬無益嗣後八旗大臣等停止值月著
將都統副都統等職名由部開列進呈候朕
簡派數人一年輪流一次並各帶能事之章
京承辦事件年終繕摺奏聞○又諭據顧琮
摺奏山東河營守備嵇璜因疎防東平汎決
口部議革職一時實無熟習之員堪以題補
請將嵇璜革職暫留本任戴罪修防俟工程

平穩之日循例請旨開復等語。嵇璜係河營守備。一切巡防是其專責。乃於緊要工程不能嚴加防範。以致東平汛口被決。與尋常疎防不同。議以革職。本無可道。該督即以揀選乏人。奏請留工効力。豈得僅援常格一例開復。顧琮著飭行。其革職守備嵇璜該督既稱一時不得其人。姑從寬仍留本任。戴罪修防。如果工程平穩。於常例開復之限加倍扣期。倘再玩忽。從事該督即行據實參奏。又諭。

據定邊左副將軍成衮扎布等奏。參贊大臣保德患病。驟難痊愈。著護軍統領烏爾登馳驛前往更換。并賞銀五百兩。以備行裝。江西巡撫舒輅疏報德安縣深思湖姚家洲等處草地一十二頃一十七畝。零應徵草課。照例升科。改鑄德昌迷易鹽中三所。並漳臘營參將赤水靖遠二營守備各關防。從四川總督策楞請也。甲午諭軍機大臣等。蘇昌摺奏查拏傳鈔偽稿之潘潮等。犯據稱潘潮

現往梧州。伊兄潘文元供潘潮於本年四月內在廣東佛山地方得自舟中江西賣布人王姓。現在密拏潘潮訊究等語。此案發覺已久。凡僻遠省分俱經拏獲多人。廣東接壤之處甚多。豈有獨無之理。蘇昌初奏但稱從前並未奉有諭旨嚴拏。現在加意確訪等語。地方有似此悖逆之犯。身任封疆。自應留心訪拏。乃直待奉旨後方轉飭辦理。即此次亦因聞有廣西之案始行查辦。其實西省傳播當

由於東省。現據該犯供出。亦得自廣東地方。勢難掩飾。不得不據實奏聞。其不實力查辦。可知著傳旨嚴行申飭。令其加緊嚴緝。根究如稍不實力。則縱奸之咎。有準泰之前車可鑒。斷不稍為寬貸也。乙未。

上詣

皇太后宮問安。幸瀛臺。諭據雲貴總督碩色奏。接稟逆詞。未即呈報之李朝英等。請議處一摺。朕思伊等皆微愚武弁。非封疆大

員及文職識字義者比若概付吏議獲譴多
人人材未免可惜如總兵宋愛一見逆詞即
行稟究固屬知大義而總兵唐開中聞稟不
無遲疑然朕念其在金川軍營奮不顧身曾
帶有重傷即此一節不但不忍治罪且加恩
擢矣從前河庫道李宏遊擊魏吉有長隨幕
賓等在傳鈔案內因其實未與聞亦即與開
復朕於諸臣功過無不準情度理李朝英等
著從寬免其議處 諭軍機大臣等據護理

貴州巡撫布政使溫福所奏黔省先後查辦
傳鈔偽稿各犯一摺內稱署石屏縣知縣倪
知本稟報在河干船內查獲偽稿一紙訊據
船戶段文秀供係在湖南時有辰州府淑浦
縣童生父芳齡并同伴十人雇船赴府考試
帶入船內觀看臨行遺失在船等語父芳齡
等既讀書應試乃將此等偽稿帶入船內互
相觀看已非安靜之人且臨行之時何以獨
將此稿遺失其形跡更有可疑或即係此十

人之中生事捏撰有意遺於舟中以圖各處
傳播亦未可定不獨如溫福所奏傳鈔者恐
不止父芳齡一人而父芳齡又得自何人均
宜逐層根究而已既經移咨湖南巡撫就近
拘訊著傳諭范時綬令其將父芳齡并同船
應試之人逐一密提隔別研究務得根株毋
致奸宄漏網又玉屏縣僧人萬衡民人黃宗
文所鈔偽稿皆得之于景白而干景白供係
湖南麻陽縣貢生龍乾惕所給看來此案或
即係湖南曾靜餘孽所為亦未可定且龍乾
惕於五月間至思州又將此稿傳鈔於黃之
鑾等五人伊姓龍而名乾惕取義乾卦罔知
忌諱已自不能無罪而伊身為貢生幸災樂
禍將悖逆之語四處流傳究屬何意亦宜就
此根究如龍乾惕此時已經拘至黔省即著
開泰詳細究訊若尚未就獲范時綬接到此
旨即行密拏秉公嚴審必得首惡明正典刑
以彰國憲不可草率了事 禮部奏十七年

元旦慶賀

皇太后筵宴儀注得旨是照例行禮奉

皇太后懿旨停止筵宴改鑄山東東昌府管

理上河通判關防從河東河道總督顧琮請

也調雲南楚姚鎮總兵呂九如為普洱鎮

總兵以湖南沅州協副將王無黨為楚姚鎮

總兵丙申禮部奏朝儀最宜嚴肅日久懈

忽請加整頓一大朝前期二日令各衙門具

上朝人數冊送臣部都察院謝恩官冊送鴻

臚寺至期於東西掖門外收職名覈對不到

者題叅一常朝坐班部院寺堂官遇本署奏

事日亦應留一人率屬就列至坐班向無定

時今擬春夏定以卯正秋冬定以辰正後至

者劾叅一頒朔定制親王以下滿漢文武官

齊集跪領若有遣官代領或託故不至應令

糾儀御史叅處從之丁酉

上詣

雍和宮行禮欽差大學士管江南河道總督

高斌等奏查勘直隸河工永定河為要其水

以水窖為下口勢漸渙散迤東五十四丈紆

迴奔注坍灣應於口門內河身西折處挑引

河一百六十丈直接坍灣并於王慶坨南引

河分疏數支注西北窪處其循南埝龍尾東

入鳳河應加草壩鳳河東堤應培高二三尺

南埝中汎下游水滙亦應加培得旨如所議

行戊戌

孝惠章皇后忌辰遣官祭

孝東陵

上至靜安莊

孝賢皇后梓宮前奠酒臨和敬公主和婉公

主第河南巡撫陳宏謀疏報祥符中牟陽

武封邱商邱永城鹿邑虞城夏邑延津滑縣

河內武陟原武等十四州縣本年水災貧戶

應行加賑并貸口糧至祥符縣本年錢糧已

邀蠲免其中牟等十三州縣并勘不成災之

濟源修武溫縣等三縣本年錢糧并請緩徵

得旨依議速行。湖北巡撫恒文疏報鶴峯縣乾隆十五年開墾下田一十九頃六畝零。○貸船廠琿春地方本年水災旗戶旌表守正捐軀之江蘇江寧縣民周成章妻王氏。○已亥諭軍機大臣等總兵張凌霞奏滇省營伍廢弛及提督治大雄不能正己率屬等情各摺其事俱所應有開化既處極邊而前任總兵田玉年老昏庸怠玩成習以致營務事事廢弛朕因其哀憊不堪是以諭令休致。今張凌霞所奏如此則其曠廢積習全未滌除可知至提督治大雄人本近於蒼猾摺內情節在外省尋常武職此等習氣諒所不免但提督為通省武員表率若果似此不知自檢亦非所宜著將各摺鈔寄總督碩色令其詳悉查明據實具奏再張凌霞現在整飭營伍固屬奮勉但觀其勇於任事似乎過銳於邊方是否相宜著該督留心體察一併奏聞。○戶部議覆雲南巡撫愛必達疏稱滇黔二

省運京銅鉛路經川江險隘遇風覆溺請照川督所奏限一年撈獲如不在險隘限滿不獲令正運員賠三分之一協運賠三分之一按已完未完分別叅處若實係遇險并無私帶打撈不能足數應令該地方官確查出結該督撫題豁應如所請但京局鼓鑄銅鉛不容缺額豁免之項仍令該撫照數補解從之。○刑部議覆船廠將軍傅森等疏稱鄂倫綽地方居住之伊木牙毆斃烏爾達哈村民傅楊五請准照伊等土俗給禮完結等語查乾隆七年寧古塔伊忒夏帑連殺四命擬抵今伊木牙等地處極邊不知禮法又情罪稍輕應如所請完結從之。○庚子

上詣

大高殿行禮。○緩徵山西文水朔州馬邑永濟等四州縣本年水雹災貧民春借倉穀并朔州馬邑縣舊欠本色米豆加賑文水縣貧民加賑山東鄒平長山新城長清禹城泰安

肥城萊蕪東平東阿平陰及收併濟南衛青城陽信海豐樂陵濱州利津霑化滋陽曲阜寧陽金鄉魚臺濟寧嘉祥汶上陽穀壽張濟寧衛東平所荷澤曹縣定陶鉅野濮州范縣觀城聊城茌平莘縣朝城冠縣館陶夏津東昌衛臨清衛博興高苑樂安壽光高密即墨及收併大嵩浮山二衛所等五十五州縣衛所本年水災貧民并貸麥本牧費 辛丑上詣

皇太后宮問安 以內閣學士李因培為浙江鄉試正考官編修秦鏞為副考官內閣學士蔡新為江西鄉試正考官贊善金銓為副考官侍讀寶光龔為湖北鄉試正考官編修莊存與為副考官貸呼蘭城溫德亨山八座官莊水災旗戶並蠲免本年欠納糧石 壬寅諭浙省今年春旱成災本重巡撫永貴竟至張皇失措茫無定見於附近之江南江西福建湖廣山東等省既四出告糴不已甚至欲委員遠赴奉

天採買米糧且稱賑糶所需必得三百萬石之數方足以資接濟從來辦理賑務斷無因一省中數府被災遂欲竭數省之力以供其用者故朕降旨訓飭乃近聞永貴在浙竟至有心諱飾將來於賑糶諸務必欲多所撙節則是該撫從前並非為民總屬為己其意不過欲多得米石遂可有恃無恐縱事不允行亦得藉以謝災黎且以杜朕責防人彈封疆大臣豈宜如此存心耶然朕猶以為為百姓起見不妨姑留以觀後效是以御史范廷楷以徇庇劣守金洪銓奏朕亦止降旨飭行以辦賑之妥協與否定其去留今乃一變而有諱災之意是其辦賑不妥矣則徇庇之罪亦應并論且朕子惠元元痼瘕在抱一切政務雖寬嚴時酌其中至於賑卹災黎每不惜加恩格外則十六年如一日此天下臣民所共知者若以永貴一人之辦理不善竟至災民失所大非朕勤求民瘼本懷矣且使各省

督撫聞風效尤。漸啟諱災之習。所關於民生休戚者甚鉅。實難再為姑容。永貴著革職。來京候旨。其浙江巡撫員缺著雅爾哈善補授。現在該省尚有應辦災務。著即馳驛前往妥協經理。○又諭曰。陳邦彥奏所欠阿爾賽案內寄頓銀兩不能完項一摺。陳邦彥所欠係雍正年間之案。若在當時。自必早已完納。因朕辦理虧空等案。從寬者多。是以延緩至今耳。然此項乃開欠。與本身侵貪實屬有間。尚屬可免。但陳邦彥以廢棄之員。受朕重加錄用。深恩官至侍郎。從前尚欠捐輸銀兩一項。已格外加恩寬免。且伊係世宦大族。若實心措辦。亦非不能完繳。今復行陳奏。其希恩之意。懇乞無厭。甚屬無恥。且衰憊昏庸。毫無實力供職之處。有何裨於政務。著革職。令其回籍。所欠銀兩從寬免其交納。○諭軍機大臣等。各省辦理傳鈔偽稿之案。朕已屢降諭旨。令其酌量情罪。分別輕重完結。若僅係彼此

傳看。無可待質之人。即應當時發落。今各省查辦此案。有明知該犯本無重情。恐後有牽引。寧為羈候。久繫圜扉。或取保持質。殊非妥協。著再傳諭各督撫。如情節較重。可從以根究首惡。渠魁者。自應拘禁候質。若不過傳看傳鈔等犯。已問明無須再詰。著即行隨時發落。釋放。亦不必保候。倘故為淹禁羈留。以致牽累多人。朕惟該督撫是問。○戶部議准。湖廣總督阿里衮疏稱。湖北橫嶺漢洋二處鐵礦砂炭已盡。應即封閉。從之。○以故貴州永寧州屬盤江土巡檢李本子世德襲職。○緩浙江海寧富陽餘姚臨安昌化安吉烏程長興等八州縣。本年旱災。應徵糧銀并分別蠲緩漕項米折等銀及未完舊欠。○旌表守正捐軀之廣東歸善縣民宋木生妻盧氏。○癸卯欽差大學士管江南河道總督高斌等奏。畿輔河淀諸流。晉豫大川由直境者。皆委輸三岔口入海。當伏秋汛漲。來水既多。海門潮

沙日至壅積為患。惟分洩以減其勢。可保兩運隄工。且於三岔口有釜底抽薪之益。北運王家務減河。長一百四十里。壩門舊有土梗橫塞。應除去。令與灘平。河身應挑者二十處。均寬八丈。深二三四尺不等。其南隄自閘口至八道沽以上。尚屬完整。北隄自大白莊至積魚淀莊。卑薄殘缺。應加寬二三尺至三四丈。培高一二尺不等。筐兒港減河。長五十里。現俱深通。其北隄自閘口至梅廠以上。均尚

平家大口口

日

完整。南隄自張王莊至倉道口。殘缺多有。應加寬一丈。至五六尺。培高七八尺不等。王家務八道沽以下之南隄。筐兒港梅廠以下之北隄。相距三四十里。均處下游。每秋水盛漲。隄內外浸水。不能存立。無庸加修。徒費計兩隄內一百七十二村莊。歲被淹溺。惟以魚葦為利。按水草例徵銀。又間有官監馬廠等賦額地。每遇報災。礙難區別。應均減照水草科則。南運滄州捷地汎減河。長一百八里。均應

挑濬。面寬九丈。底五丈。深八九尺不等。挑出之土。加培兩隄。於緊要工段。量加夯礮。其隄盡處。自崔家莊迤東至保家莊。長二千二百四十丈。河身紆折三處。不克暢注。應取直改挑一千四百八十丈。挑出之土。添築北隄。又石壩內兩隄相距僅二十丈。奔流衝刷。隄址日削。應展寬十餘丈。並於出水石雁翅下接鑲草工。以資捍禦。石壩南壩臺石縫滲漏。亦應拆修。青縣興濟鎮減河。長九十六里。應通

平家大口口

主

身挑濬。寬深夯築。照捷地減河辦理。舊涵洞二座。歲久坍塌。應加修理。捷地減河近隄窪處。亦應添涵洞五座。并改建近河村莊木橋七座。得旨。依議。速行。湖北巡撫恒文疏報。荊州府屬荊州左衛。乾隆十四年。開墾額外下則屯田十畝零。免陝西大荔澄城朝邑華陰四縣水災地畝。本年應徵穀銀。緩徵蠲剩錢糧。并借欠常社糧。加賑大荔澄城朝邑等三縣貧民。并豁免蒲城長安興平盤屋武

功等五縣水衝陵地租銀。甲辰諭曰：大學士高斌等會勘南北兩運減河，據奏酌籌修濬事。著依議速行，但摺內所稱修濬河隄橋壩各工，據各該道屬河工成規約需銀十二萬一千餘兩。今請於停賑之時，照興工代賑舊例給價。共約估需銀九萬一千餘兩。俾小民得以力作鋤口等語。四處減河在武清寶坻寧河天津青縣滄州諸境，今歲皆值偏災，寓賑於工，自於小民有益。惟是以工代賑向例較之河工成規，給價轉少。朕思地方既有偏災，即不用其力，尚且多方撫卹，乃因寓賑於工，轉致減價給發。於理未協。即該地方已經給賑而赴工之人，未必即係領賑之人，亦無從區別。蓋所謂興工代賑者，其工原屬不必興者。第為災黎起見，既受賑之後，因以修舉廢墜，俾得藉以餬口，自應循照往例。若實係緊要工程，亟應興作，又當照原價給與。此項減河修濬工程，所有土方工價銀兩，著照

河工成規全行支給，以副朕子惠黎元至意。其嗣後各省以工代賑之處，俱令分別工程緩急，照此辦理。該地方官務須督率稽查，俾工歸實用。毋令浮冒濫銷，斯可矣。該部遵諭速行。又諭道府等官於請訓赴任時，有面奏暫假回籍，經允准者，俱於次日具呈吏部覆奏。此雖向例，而人容有不知者。文員告假之事，有何關係？此不過陞見之時，以為奏對塞責耳。嗣後各省道府等官，俱不得於請訓時自行乞假，但令赴部呈明，其應否准行之處，即由該部酌定，給以假期，仍按月彙奏，以昭畫一。命副都統多爾濟往代班第駐藏辦事。以故雲南景東府土知事姜啟武子繼申襲職。乙巳，以故四川革布什咱土司札什諾爾布子納旺寒盼塞土千戶增巴笑子按蚌轄幔寨土百戶額旺子折論札舍下作革寨土百戶阿弄子郎加笑等各襲職。

丙午

上御乾清門聽政。○詣

皇太后宮問安。○定拔貢朝考選用例。諭各省選拔貢生。經朕降旨。以十二年舉行一次。計至癸酉年。即屆選拔之期。惟是來京朝考。揀選引見。劄監讀書。或以知縣等官試用。或以教職即用。或以教職歸班序選。條例屢經更定。朕思選拔於每學數十百人中。拔取一二。人且不糊名易書。可以驗其人才。覈其素行。自當精擇以充其選。應令該學政於試列前

實錄卷四十四

八

茅之士。舉其文行兼優才品出眾者。會同該督撫秉公掄採。以杜濫觴。至庠序為陶育人才根本。今教職率多昏耄。龍鍾濫竽。戀棧雖定以六年甄別。而上官以閒曹多方寬假。非國家設官敷教本意。應分以年限。詳加澄汰。所遺員缺。即以應授教職之選拔充補。於士風當有裨益。所有選拔貢生。赴部驗到。作何定限。及朝考錄用一切規條。俱應詳悉酌定。永著為令。大學士九卿集議以聞。尋議各選

拔赴部。應以該年十月起限。雲南貴州四川

廣西廣東甘肅限次年五月到部。湖南福建江西浙江湖北陝西限次年三月。江南河南山東山西奉天直隸限次年正月。其有患病事故者。許呈明咨部。朝考之法。除前項選拔補考人少。仍照向例在禮部考試外。其新選拔應照擬定期限。分為三次。由禮部奏請欽點大臣。於午門內考試。擬定等第進呈。卷分三等。不入等者。本生斥革。發回原學。該學政

實錄卷四十四

二十九

及督撫府尹。一併議處。再向例朝考後。禮部會同九卿揀選引見。有奉旨以知縣及知縣以下等官試用者。餘劄監肄業。三年期滿。以教職選用。其考取景山等處教習。期滿引見。候旨分選知縣教職。歸本籍肄業者。遇考職之年。准考取州同州判縣丞。有願就佐貳及教職者。以直隸州州判復設教諭選用。乾隆二年議停。今請照舊揀選一二等引見。候旨簡用。從之。○諭軍機大臣等。湖南布政使周

人驥奏稱苗疆額兵有以苗人充補者殊非防微杜漸之道應設法漸次開除不得再將苗人冒充等語苗疆設兵防汛原資其控馭彈壓乃即用苗民充伍殊非本意或因內地召募乏人而熟苗言語衣服與民無異是以因循成習若一旦概行革除亦未免過急著傳諭苗疆督撫令其通行密飭各營伍嗣後召募名糧不得仍將苗人充補亦勿張揚形迹有失綏靖之宜○又諭曰布政使溫福奏

實錄卷四百四

三

漢奸龍世瑾教唆夷人誣報重情計圖得賄一案從來綏靖苗疆之道首在杜絕漢奸龍世瑾捏造無影之詞架空唆訟在內地亦係匪棍訟師乃至潛入苗疆設謀播弄不加嚴懲無以示儆現據碩色奏到已飭司道將該犯從重究擬著再傳諭碩色開泰等通飭苗疆文武員弁嗣後務宜嚴行稽察無令漢奸潛留苗地致滋事端○又諭曰提督李繩武奏夷使到境日期一摺內稱今次所帶人畜

數目雖據報稱大率不越欽定之例可謂恭順然往往以多報少其間違例索求之處是其故智現在查察等語準噶爾夷人交易一事前因其所帶人口牲畜貨物每歲加增貪得無厭經尹繼善等奏請限以數目未免過於減少朕酌量加恩傳諭該台吉等嗣後肅州交易以十三年來數為準貢使交易以呢瑪來數為準如在此數之內許其交易餘者駁令帶回今夷使所帶人畜貨物據報雖在

實錄卷四百四

三

定例之內但夷情狡詐或有以多報少至臨時又復再三懇求以圖例外多售殊未可定自傳諭定例之後此係初次交易不可稍有遷就著傳諭李繩武即行查明夷使等所帶人畜貨物數目如在定例之內准其交易若或稍有浮多一面先令貢使進京一面查明多帶之數稟行駁回其在呢瑪所帶數目之內仍許帶進貿易務宜妥協辦理使將來該夷人知所遵循不致妄生希冀○以盛京刑

部侍郎鐘音為戶部右侍郎。內閣學士董邦達為禮部右侍郎。○以侍讀張九鑑為陝西鄉試正考官。編修楊述曾為副考官。吏部侍郎裘曰修為江南鄉試正考官。編修邵樹本為副考官。○山西巡撫阿思哈疏報。豐鎮廳乾隆十五年。開墾額外荒旱地一項。○丁未。諭據福建巡撫潘思渠奏稱。臺灣右營把總陳亦等在藩庫請領冬季餉銀。由澎湖放洋。忽遇颶風。飄至廣東惠州府海豐縣鮎門港地方。餉銀及在船弁兵幸無損失。所有在粵借支盤費口糧等項。共銀五百餘兩。循例於本營各兵名下扣還等語。該弁兵等管押餉船。在洋遭遇颶風。備歷艱險。其不至覆溺者幸耳。且於餉銀並無損失。所有在粵借支盤費口糧等項銀兩。著加恩免其扣還。以示優卹。○四川總督策楞疏報。南坪營屬雜入等九寨苗民。乾隆十二年。認納稞糧三石。乾隆十五年升科。照例徵收。

實錄卷四百四

三

大清高宗法天隆運至誠先覺體元立極敷文奮武孝慈神聖純皇帝實錄卷之四百四

實錄卷四百四

三

大清高宗法天隆運至誠先覺體元立極敷文奮武孝慈神聖純皇帝實錄卷之四百五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十六年辛未十二月戊申

上詣

皇太后宮問安。○諭軍機大臣等據兵部彙奏各省繳過生息銀兩原本一摺。此內惟貴州一省原本俱已歸足其餘所繳不過十分之三四。黔省地屬邊徼非若水陸通衢商賈輳集可以多方營運者比。然且如數歸繳可見各省不即清交者並非因所獲餘利不敷賞用。不過一任屬員因循從事未嘗實力經理耳。著傳諭各省督撫轉行各提鎮等即飭所

屬標營將此項原本銀兩據實查明善為料理俾得漸次歸足不得藉端延緩。將來各省繳還歸款之後朕另有降旨辦理之處著一併傳諭知之。以健銳營右翼翼長德爾蘇為正白旗滿洲副都統內閣學士雅爾呼達為鑲紅旗蒙古副都統仍兼太常寺卿已酉諭今歲直隸長垣東明開州三州縣因豫省黃河漫溢被災較重業經降旨加恩賑恤現今水漸消退地多肥澤若將涸出地畝廣種春麥則明年四五月間災地民食可資接濟著總督方觀承轉飭該州縣等查明被災七分以上實在無力貧戶按其所種麥地酌借麥種銀兩俾得及時購備播種齊全以期麥秋有望該部遵諭速行。又諭長白山等處遣赫赫致祭暨巫閭山遣馬璘致祭東嶽泰山等處遣朱蘭泰致祭西嶽華山等處遣周長發致祭中嶽嵩山等處遣朱璣致祭南嶽衡山等處遣文保致祭北嶽恒山等處遣

徐以烜致祭。南鎮會稽山。遣胡寶琮致祭。南海。遣孫灝致祭。太昊伏羲氏等陵。遣卞塔海致祭。炎帝神農氏等陵。遣李世倬致祭。女媧氏等陵。遣金德瑛致祭。黃帝軒轅氏等陵。遣涂逢震致祭。少昊金天氏等陵。孔子闕里。遣儲麟趾致祭。顓頊高陽氏等陵。遣圖山致祭。夏禹王等陵。遣陳浩致祭。遼太祖陵。遣德昌致祭。○河南巡撫陳宏謀疏報。內鄉縣乾隆十五年開墾旱田三頃九十四畝零。○陝西

帝東本四十一

五

一

巡撫黃廷桂疏報。咸寧縣屋三水。澄城。邵陽。綏德州等六州縣。乾隆十四年開墾旱田二十四頃一十四畝零。興平縣本年開墾旱田六頃四十二畝六分零。○以故三等子佛保子金剛保襲爵。○以故甘肅碾伯縣土司指揮僉事朱永泰子孫林貴州楊義司土官金玉子光宸等各襲職。○庚戌。

上詣

皇太后宮問安。○諭軍機大臣等。阿里衮在京

時請將倉德帶往廣東。朕深知倉德不過一

老實謹慎之人。並非有肆應才具。可勝繁劇

之任。朕本不欲准行。因阿里衮再三懇求。是

以降旨。將伊調補肇羅。專衝簡缺。且與該督

同城。可以就近董率。或可收指臂之助。倉德

數年以來。並未陞見。昨伊陞見。請訓。則衰邁

龍鍾。比朕向所記憶。又大不如矣。看來恐於

地方無益。不能整頓。可傳諭阿里衮。令其留

心酌量。如倉德蒞任後。尚能勉強振作。或可

留之以策後效。如精力衰憊。不能辦事。則不

妨據實奏聞。封疆大吏。察吏是其專責。若因

係其奏請帶往之人。一切優容姑息。不獨地

方諸事。恐有貽誤。且非公正率屬之道。甚非

所望於阿里衮也。○旌表守正捐軀之河南

汝陽縣民石東聘妻孫氏。○辛亥。安西提督

李繩武奏。準噶爾來使所帶人畜。俱在前次

呢瑪數內。惟駱駝浮多二十隻。此多彼少。折

算相當。並擦掌乏弱牲畜。應俱准其變售。奏

入諭軍機大臣等據李繩武所奏。是該夷等已知恪遵朕諭。不敢越例多帶矣。其浮多駱駝。既合之少帶之數。折算相當。自應准其交易。至擦掌之弱牲畜。即留之口外餵養。俟其回巢時帶歸。亦未為不可。何必定在哈密變售。但為數無多。需銀不過二千餘兩。此次該提鎮等既循往例。代為售變。亦姑照所奏辦理。然究屬不在額數之內者。總之夷性狡詐。不足深信。或因此次定例之初。故為恭順。以相嘗試。將來又復逐次增添。亦未可定。向來綠營習氣。多圖遷就了事。此次夷人交易。必應明白曉諭。示以節制。俾其懷德畏威。方為妥協。若一味委曲周旋。致夷人不但不知感激。且窺測該提鎮等有畏彼之心。則大不可矣。著一併傳諭知之。戶部議准。黑龍江將軍富爾丹等疏稱。呼蘭城溫德亨山八座官莊地畝。疊被水災。不堪耕種。請移於巴延穆敦郭爾敏穆敦地方從之。又議准雲南巡

撫愛必達疏稱。通省存倉米石。足供制兵三年之餉。蓄積過多。霉變堪虞。應照改折例。將道庫收存乾隆十五年以前改折平糶等項價銀。移交司庫充餉。從之。緩徵安徽壽州宿州虹縣靈璧銅陵廣德建平歙縣績溪等九州縣本年水旱災。應徵漕糧漕項銀米。以通政使富森為盛京刑部侍郎翰林院侍讀學士錢維城為內閣學士兼禮部侍郎。以編修錢汝誠為河南鄉試正考官。刑部員外郎許道基為副考官。御史胡蛟齡為山東鄉試正考官。編修徐堂為副考官。編修劉宗魏為山西鄉試正考官。刑部主事張拜賡為副考官。賑貸浙江鄞縣慈谿奉化鎮海象山定海蕭山諸暨餘姚上虞嵊縣臨海黃巖太平寧海天台仙居金華蘭谿東陽義烏永康武義浦江湯溪西安龍游江山常山開化建德淳安遂安壽昌桐廬分水永嘉樂清瑞安平陽麗水縉雲青田松陽遂昌宣平等四十六州縣。玉環

一廳台州一衛衢嚴二所大嵩青泉穿長龍頭玉泉杜瀆黃巖長亭等八場本年旱蟲災民竈○士子士申年立春順天府進土牛春山寶座○癸丑

上詣

皇太后宮問安○幸瀛臺○諭曰總督策楞奏西藏案內陣亡駐防馬步兵丁遺有老親寡妻及子弟幼小不能充伍者共三十八名等語既據查明實係窮獨無依甚屬可憫著加

平定六年十月

恩照瞻對金川之例分別給與半餉月米俾其養贍有資以示優卹○甲寅軍機大臣等議覆宗人府襲封舊例除親王郡王世職不降外其貝勒以下遞降至入八分輔國公及不入八分遞降至奉恩將軍均世襲罔替如本身襲封奉國將軍嫡子降奉恩將軍餘子亦封奉恩將軍其奉恩將軍之嫡子嫡孫例得襲封此外皆為閑散宗室今按會典一等二等三等奉國將軍適子仍襲封父爵餘子

均封奉恩將軍在應襲奉國將軍之嫡子不過較向例增一等而餘子之應封奉恩將軍者世世加增揆之親親之殺義覺未協再查不入八分鎮國公嫡子例降不入八分輔國公不入八分輔國公應降三等鎮國將軍今會典載不入八分公嫡子仍襲父爵嫡子世世襲封餘子亦世世加增並三等輔國將軍子孫應襲之爵日遠日多似過於從優茲於封爵新表內并將舊例貼簽呈進得旨著照

平定六年十月

舊改寫進呈尋奏發會典館遵辦報聞○乙卯加賑河南武陟縣本年水災貧民○丙辰大學士等議覆御史范宏賓奏稱八旗印務叅領章京及俸餉房五個甲喇叅領等每年給紀錄一次佐領驍騎校領催等五年給紀錄一次如一佐領而兼數任又各得紀錄一年內給與二三次殊屬過優應請裁減等語查乾隆四年八旗大臣等議旗員應辦事件無逾限遺漏分別給與紀錄其一人兼數任

者未示節制嗣後如叅領兼印務叅領又兼佐領者一年之內承辦事件無誤應給與叅領本職紀錄一次其印務叅領任內不准重給所兼佐領三年期滿亦不准再邀優叙佐領兼印房章京者但准給印房章京紀錄佐領任內不准重給部院各官兼管佐領者仍照佐領之例餘俱照此辦理從之○丁巳孝莊文皇后忌辰遣官祭

昭西陵○

上詣

皇太后宮問安○諭東省今歲偶被偏災所有應行賑恤事宜已加恩分別辦理此內之濮州東平東阿壽張荷澤范縣濟寧鉅野金鄉平陰等十州縣收成較為歉薄小民辦賦維艱著將本年應徵額賦銀三萬餘兩帶徵節年舊欠銀二萬三千餘兩一體緩至明年麥熟後完納以紓民力該部即遵諭行○戊午是日起

上以歲暮祫祭

太廟齋戒三日○己未諭軍機大臣等暫署兩廣總督新柱密陳江西米價昂貴及浙省赴江請糴情形一摺皆據泉州府知府曾曰瑛所稟入告該員莅任閩省雖因汀郡民食起見而其於鄰省收成米價逐一詳細採訪朕披覽之初頗以為能留心民瘼轉思該員當係籍隸江西者考其履歷果然則曾曰瑛所稟或出於桑梓之私情而非盡屬公論矣江

實錄卷四〇五

西上饒等七州縣今歲雖被偏災調任巡撫舒輅於一切賑卹事務辦理亦多未協但如所稟浙省赴江請糴按戶派買減給官價賄閭閻賠累之苦或未免過甚其詞然亦未必盡屬無因著將新柱此奏密行抄寄鄂昌令將江西本年收成實在分數米糧價值并浙省赴江請糴有無派累滋擾確切情形密行察訪據實奏聞如有應行設法調劑者亦即一面妥協辦理一面奏聞毋得稍涉隱諱尋

奏廣饒二府得雨甚遲收成六分米價自一兩七錢至二兩六錢其餘各屬收成皆八分以上米價自一兩七錢至二兩不等至浙省並無請糴派累之事現已檄各屬勸民興賑并鹽商等願出銀一萬兩赴川廣販米又先動司庫糴貯溢額穀價銀二萬兩委員赴湖廣採買再南安贛州二府屬現有存倉溢額穀已令酌撥協濟得旨覽奏俱悉庚申以歲暮禋祭遣官祭

太廟中殿

後殿諭軍機大臣等浙省今年被旱成災經朕降旨多方撫卹并令本地有穀之家出穀平糴計其所糴之數照樂善好施之例優加議叙以示獎勵所有捐輸人等該督撫尚未題報今據李琨摺奏金華府屬富戶羣各踴躍輸將捐貲賑糴等語一府如此他府之慕義樂輸者想不一而足其睦嫻任卹之意甚屬可嘉應予從優獎叙從來救荒無奇策富

戶能出資賑糴足以助官賑之所不及於閭閻殊有裨益但先為定例計其多寡分別錄用則與開捐無異自非政體所宜如其循照向來好善樂施之例議叙又不過給銜加級亦非鼓勵急公之道著傳諭哈爾吉善雅爾哈善令其查察通省情形約畧現在各富戶等已輸之數酌量予以進身之階較向例稍優以為好義急公者勸詳悉定議奏聞○辛酉禋祭

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○遣官祭

太歲之神○

上詣

皇太后宮問安○壬戌

上詣

皇太后宮問安○御保和殿筵宴朝正外藩左翼

科爾沁和碩親王阿喇布坦多羅郡王阿旺扎

布齊默特多爾濟喇特那扎木素固山貝子

實錄卷四〇五

達勒瑪達都固倫額駙色布騰巴勒珠爾和碩

額駙喇錫那木扎多羅額駙色旺諾爾布鎮國

公拉瑪扎布輔國公喇錫色旺一等台吉綽立

扎布阿喇布坦班珠爾二等台吉賽圖三等台

吉扎木素阿巴噶多羅郡王策靈旺布敦漢多

羅貝勒羅布藏和碩額駙朋蘇克喇錫密雅特

多爾濟固山額駙羅布藏錫喇布二等台吉根

敦扎勒扎魯特多羅貝勒阿第沙二等台吉朋

蘇克喀喇沁固山貝子扎拉豐阿杜爾伯特固

山貝子丹珠爾翁牛特固山貝子巴勒丹一等

台吉鄂齊爾額魯特鎮國公達爾瑪靈第克什

克騰扎薩克一等台吉齊巴克扎布巴林多羅

額駙丹津右翼烏珠穆沁和碩親王朋蘇克喇

布坦巴林多羅郡王琳沁固山貝子齊林端多

克敦漢多羅郡王喇錫喇布坦固山額駙旺扎

勒喀爾喀多羅郡王桑扎克多爾濟多羅貝勒

旺沁拉旺多爾濟固山貝子阿喇布坦和碩額

駙根扎布多爾濟鎮國公恭格喇布坦輔國公

實錄卷四〇五

三都克策木伯勒一等台吉策旺端多布桑圖

克多爾濟海都市二等台吉精扎布額魯特多

羅貝勒羅布藏多爾濟土默特多羅貝勒羅布

藏達爾濟鄂爾多斯固山貝子齊旺班珠爾

科爾沁和碩額駙那木扎布二等台吉旺扎

勒三等台吉策旺扎布郭爾羅斯固山額駙

素瑪第輔國公額勒登額奈曼固山額駙端

多布二等台吉那木忠喀喇沁鎮國公瑚圖

靈阿輔國公敏珠爾喇布坦三等台吉格勒

克薩木噶布蘇尼特輔國公羅壘阿巴噶輔國公旺沁扎布等及大學士領侍衛內大臣等各科爾沁和碩親王阿喇布坦多羅郡王齊默特多爾濟喇特那扎木素敷漢多羅貝勒羅布藏科爾沁固倫額駙色布騰巴勒珠爾固山貝子達勒瑪達都喀喇沁固山貝子扎拉豐阿烏珠穆沁和碩親王朋蘇克喇布坦敷漢多羅郡王喇錫喇布坦喀爾喀多羅貝勒拉旺多爾濟額魯特多羅貝勒羅布藏多爾濟喀喇沁

一
平年未四日五

五

鎮國公瑚圖靈阿輔國公敏珠爾喇布坦至

御座前賜酒成禮。是月江蘇巡撫莊有恭奏蘇城向例歲底煮賑一月。歉則加賑今歲雖豐稔因浙省偏災轉運者多米價昂加以糧艘減運水手游食更繁本地貧民明春謀食維艱請加賑一月得旨好如所議行。江南壽春鎮總兵改光宗調任請訓得旨向曾訓汝惟在實力奉行若因到一新任即請一訓是不過奉行故事非誠

心矣戒之。江西巡撫兼管提督鄂昌奏各

營官兵逐加巡查訓練務期各底精良得旨江西武備為各省之殿宜加整飭恐非一二年即有起色者也。福建水師提督李有用奏浯嶼一汛為水陸要隘原設守備一員兵一百名又礮臺兵八十三名戰船一隻不敷巡防應添把總一員戰船一隻撥浯嶼礮臺汛兵各五十名分配二船南山邊之東島美汛原設兵一十三名其西則有深塢水汛由

一
平年未四日五

五

深塢而上有港尾陸營該地山海交錯最易藏奸擬於港尾之港口安設中營船一隻配撥厦汛兵二十名深塢澳亦安中營船一隻派配該營外委一員兵一十五名礮船一隻配兵十名俱歸浯嶼守備管轄與浯嶼把總分班值巡又厦門斜右之嵩嶼通水路販運係提標前營轄地應令該營撥船一隻配外委一員兵二十名在彼稽查得旨撥巡係爾職分之事但須為之以實而妥可耳

○署湖廣總督湖北巡撫恒文奏省城西南保安門外有金沙洲洲之左偏曰收麥灣舊築月隄以衛居民河流頂衝日見坍塌請築石隄二百四五十丈并挑水壩數座得旨著照所請行○河南巡撫陳宏謀奏歸德地處窪下溝河壅積數被水災夏邑豐樂河商邱響河永城巴溝河均應挑濬商邱南門外古宋河東西附城處應各開引河設板橋三座并加築永城縣護城隄一道得旨如所議行

實錄卷四百五

三

妥酌為之務期帑歸實用民獲實效可耳○山東巡撫鄂容安奏查勘張秋一帶西坡來水絲長七百餘里無所歸宿遂由漫口迤北東昌減水閘壩三座戴灣閘以上閘壩涵洞四座分洩入徒駭馬頰二河漫口迤南挑濬三空五空二橋引水入鹽河歸海日漸消涸河中淤灘先後挑竣本月初四日合龍報聞○陝甘總督黃廷桂奏咸陽興平寶雞長武高陵武功褒城隴州等州縣每年於額徵地

丁外並收米豆餘糧自五六十石至一百餘石貯倉候文撥餉今二三十年從未撥及積數既多紅朽堪虞且恐不肖有司視為無用致滋虧那請於來春出糶價銀解司庫報部撥餉得旨如所議行○又奏西安冬月煮賑或撥閒項或出公捐米無定款查糧道倉每年收糧十四萬餘石支駐防兵餉贏餘三四百石請以此項充粥廠之用報聞○廣東巡撫蘇昌奏前辦欽工楠木一案令長支各官

實錄卷四百三

六

均攤代賠實屬舛謬今奉訓諭遵辦得旨事俱待朕訓汝所司者何事總之凡事不可有心迎合揣摩不但無益而且有損○是年追予西藏出師陣亡傷亡之主事策塔爾等五員金川出師陣亡傷亡之遊擊孟臣等十二員祭葬贈卹如例西藏外委馬步兵等四十九員名金川外委馬步兵等一千二百三員名卹賞俱入昭忠祠○旌表孝子直隸等省張裔慎等七名孝婦杜氏一口守節合

例。八旗滿洲。佛保等妻章佳氏等二百十口。
蒙古。三達色等妻呂氏等二十四口。漢軍。于
介等妻王氏等十一口。奉天等省。駐防那木
圖里等妻孟氏等五十八口。直隸等省。張定
一等妻梁氏等六百四十二口。未婚守志。直
隸等省。胡喬年等聘妻柴氏等十九口。夫亡
殉節。江蘇等省。夏士英等妻方氏等十九口。
百歲壽民。婦直隸等省。李玘等四十四名口。
各給銀建坊如例。○一產三男。直隸等省。馬
思遠等八家。○會計天下民穀數大小
男婦一萬八千一百八十一萬一千三百五
十九名口。存倉米穀二千七百三十四萬一
千二百七十五石七斗七升四合三勺

實錄卷四十五

七

大清高宗法天隆運至誠先覺體元立極敷文
奮武孝慈神聖純皇帝實錄卷之四百五

實錄卷四十五

七

大清高宗法天隆運至誠先覺體元立極敷文奮武孝慈神聖純皇帝實錄卷之四百六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申春正月癸亥朔

正月癸亥朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○甲子

上詣

皇太后宮問安○御乾清宮賜大學士尚書等

宴○諭上年因京師米價未平多方籌

畫屢撥倉貯米石減價平糶並賞給八旗兵

丁甲米茲當春令首和歲功伊始閭閻日給

為時正長應豫籌接濟使近利者不得居奇

著於京倉撥米四萬石分給左右翼米局交

該管王大臣等仿照時價酌減平糶務須妥

協經理以副朕惠養兵民之意○又諭上年

平糶奏四十六

浙省被旱成災所有一應蠲緩賑貸事宜業

經屢降諭旨加恩撫卹以期災黎不致失所

但念時當春令東作方興例賑既停青黃不

接小民餬口維艱難資力作深可軫念著該

督喀爾吉善該撫雅爾哈善將金衢等府災

重之區酌量情形有應行展賑者一面奏聞

一面辦理務須詳悉查明妥協籌辦俾窮黎

均霑實惠以待麥秋該部即遵諭行尋奏浙

省被旱成災蒙恩蠲賑並施又復截漕撥運

以工代賑。次第舉行。臣等奉宣德意。確察民情。不特杭嘉湖三府屬。不致失所。即金衢等八府屬。被災較重者。秋成後。晚禾雜糧。均有收成。兼給籽賑糧。冬間接濟。足資度歲。其尚應加賑月分。按其被災之輕重。災重者自今年正月為始。按月遞散。至三月賑畢。災輕者。正二等月。間月散給。至二月賑畢。至八府災地民情。均屬安靜。臣雅爾哈善。巡歷寧紹金衢嚴五府。所屬十七縣。察看情形。與訪詢無異。惟二三月賑畢後。災重各邑。小民餬口維艱。難資力作。查金衢等八府屬。或災五十一廳縣內。如寧屬之鄞縣。奉化。紹屬之山陰。會稽。蕭山。上虞。溫屬之永嘉。瑞安。平陽。處屬之遂昌。宣平。此十一縣。在八府屬內。被災分數原輕。其金屬之蘭谿。義烏。永康。湯溪。衢屬之西安。龍游。江山。常山。開化。嚴屬之建德。淳安。壽昌。寧屬之鎮海。象山。定海。紹屬之諸暨。餘姚。嵊縣。台屬之天台。溫屬之玉環。處屬之麗

水。青田。此二十二廳縣。最輕。金屬之金華。東陽。武義。浦江。嚴屬之遂安。桐廬。分水。寧屬之慈谿。紹屬之新昌。台屬之臨海。黃巖。太平。寧海。仙居。溫屬之樂清。泰順。處屬之縉雲。松陽。此一十八縣。次重。臣等就地熟籌。極貧戶口。雖更覺拮据。然賑糧按月散給。至四月方停。次貧雖屬稍有資藉之戶。然三月已經停賑。東作方殷。必得稍資接濟。方可無誤農時。應請無分極次。均展賑一月。口糧則三四月間。青黃不接。又得餬口。延至五月內。豆麥屆收。即有接濟。其衛所屯戶。鹽場。竈丁。有坐落此四十廳縣境內者。亦請按原報災戶一體加賑。得旨。如所請。行。有旨諭部。○丙寅。

上奉

皇太后御重華宮侍宴。○丁卯。

上詣

皇太后宮問安○命庶子覺羅奉寬司業梁錫嶼在尚書房行走○戊辰享

太廟遣識親王允祕恭代行禮○遣官祭

太歲之神○諭軍機大臣等范時綬覆奏拏究攜帶偽稿遺失船內之艾芳齡及拏獲麻陽縣貢生龍乾惕嚴加根究一案據稱艾芳齡鈔稿得自段為尊為尊已供認不諱等語艾芳齡之稿既得自段為尊即應將段為尊嚴加詢問逐層追究即可得其來歷乃祇云

根究至十二三人咸供遞相傳鈔似無遁情所奏甚不明晰至龍乾惕所供情詞尤為閃爍支吾殊多疑竇龍乾惕雖年已八十但伊身為貢生即應明曉大義竟將悖逆之語四處傳播其幸災樂禍較之他犯實屬情罪重大非尋常案件可援照老弱不加刑之例若因其年老姑從寬典假使此稿果出自伊手將亦因其年老置之不問乎該撫辦理此案殊未得其肯綮著傳諭范時綬令其詳細研

究務得實情不可草率了事尋奏艾芳齡一案先經集犯研審據艾芳齡供鈔自段為尊拏訊段為尊供稱得自鄧尼傳由鄧尼傳逐層根追之各犯俱質訊明白遞相傳鈔是實嗣貴州撫臣開泰到楚復會同詳細審究與前供無異其龍乾惕一犯供稱得自龍老晚由龍老晚逐層根追之各犯質明遞相傳鈔是實黔省現亦究明干景白之稿非龍乾惕所給但該犯身為貢生罔知大義膽敢鈔傳逆稿加以圈點情罪可惡實難援老弱不加刑之例稍有寬縱得旨覽○是日起

上以祈穀於

上帝齋戒三日○己巳

世祖章皇帝忌辰遣官祭

孝陵

上詣

奉先殿行禮○庚午

上詣

南郊齋宮齋宿。○諭宗室達麟圖所學平常。人殊可厭。著革去侍講。在宗人府章京上行走。

○辛未。祈穀於

上帝。

上親詣行禮。○詣

皇太后宮問安。○詣

大高殿。

壽皇殿行禮。○壬申。召大學士內廷翰林等茶宴。以雪獅聯句。○諭軍機大臣等。各省積欠

錢糧。前經降旨。令各督撫於每年歲底。將該省已未完各數。分晰查奏。但各省每年一應錢糧。必待次年奏銷之期。方足定其完欠實數。今於歲底查奏。其有續行完納者。均不入所奏之內。於本年實在完欠若干。轉非確數。此從前定議時。失於檢點之處。嗣後各省每年完欠錢糧。俱著隨奏銷時。分晰查明核實摺奏。不必仍循歲底奏聞之例。可於各該督撫奏事之便。傳諭知之。○癸酉

上奉

皇太后居長春仙館。詣

安佑宮行禮。○辛酉。明園。乙亥。

上御山高水長幄次。賜準噶爾使臣圖卜濟爾哈朗等宴。○準噶爾台吉喇嘛達爾扎奏。前遣使臣額爾欽。尼瑪將前往西藏。聘請喇嘛之事。具奏。仰蒙恩准。於再遣使臣入貢時。延請有德行喇嘛四五人。前來教誨。眾喇嘛聞命之下。不勝感激。今遣使臣圖卜濟爾哈朗進貢。虔申頂戴。下忱。並延請喇嘛。懇於呼圖克圖三人內。恭請一人。前來教誨。眾喇嘛於推廣黃教。實有裨益。並祈仍照前奏。許令我處遣人輕騎減從。前往西藏。為我先人設懺進供。所有沿途派撥官員兵丁照看等事。雖覺繁瑣。但已蒙恩和好。而遣往之今為數無幾。尚屬易行。使遠近聞知。無不仰慕盛德。其貿易之事。令使臣口奏。奏入。賜喇嘛達爾扎勅書曰。據台吉奏。懇准於呼圖克圖三人內。延

請一人前往爾處推行黃教。並懇准爾處遣人至藏進供等語。去年爾使額爾欽尼瑪來以延請喇嘛之事具奏。朕已明降諭旨。我中國呼圖克圖三人及有德行喇嘛俱有教習學藝之事。不可遣往。但朕不忍令爾處黃教滅絕。故特許於西藏揀選有德行喇嘛到京。俟爾再遣使來。准令請往。是時降旨後。朕即令達賴喇嘛揀選精於經咒。可以推行黃教之喇嘛十人。送至京師。今爾不遵朕旨。反以

實錄卷四十六

斷不可遣往之呼圖克圖為請。是爾並非真心推行黃教可知。況西藏選來之喇嘛。爾來使亦曾會面。以未奉爾命。不敢延請。朕自去年即挑藏內喇嘛至京。以待爾之延請。今爾使既至。又不請往。是爾原無請喇嘛之意。今並此喇嘛十人。亦不遣往矣。至爾奏遣人至藏一事。去年爾使臣額爾欽尼瑪來時。以爾襲位為辭。朕既降旨。必無換一台吉。即差人進藏一次之理。今來使又以追報爾父噶爾

實錄卷四十七

丹策零為辭。果爾則從前策旺多爾濟那木扎勒已經為爾父熬茶一次。安得今又差人前往。設有子十人。將十次差人進藏乎。來使又奏使臣來往。請不限人數。肅州貿易牲畜。內不好者。准其售賣等語。從前我大臣與爾使臣哈柳定議。有事差人不攜買賣。後因每次遣來使臣。俱託言豫備口糧。攜帶貨物。漸加增本。應不准貿易。勒令帶回。朕因和好。是以施恩。來使令照尼瑪所帶貨物為準。其人數若不限定。日久亦難遵行。故亦令以五十人為準。至肅州貿易。復加恩准照乾隆十三年最多之數。貿易一節。原係小人謀利之事。爾等攜來不堪之物。慮我中國之人不用。若我中國之人。將不堪之物給爾等。爾等肯受乎。此事瑣屑。朕所不問。即我封疆大臣。亦不屑辦理。爾何必以此瀆奏。來使又以逃走之薩喇爾賜回為請。薩喇爾雖來自爾處。實因懼禍逃生。朕為天下大皇帝。以生成衆生

為本。豈肯轉置之死地。况我中國逃至爾處。如羅卜藏丹津者甚多。若一一索取。不可勝計。朕並不索取一人。即爾送至。朕亦不受。朕以為既往之事。不忍深究。爾反求給回。甚屬錯誤。爾若念爾父恭順和好。年年遣使請安。受朕恩典。事屬可行。若以此等斷不可行之事。漬奏。究屬無益。是以特降勅旨。令爾使圖卜濟爾哈朗齋歸。諭爾知之。○丙子。

上御奉三無私殿。賜皇子諸王等宴。○丁丑。

實錄卷四十六

上詣

安佑宮行禮。○奉

皇太后幸同樂園。又幸山高水長。○御正大光明殿。賜朝正外藩及大學士內大臣等宴。召科爾沁和碩土謝圖親王阿拉布坦。多羅郡王齊默特多爾濟。教漢多羅貝勒固山額駙羅卜藏。科爾沁固山貝子和碩額駙達勒瑪達都喀喇沁固山貝子多羅額駙扎拉豐阿。科爾沁固倫額駙色布騰巴勒珠

爾杜爾伯特固山貝子丹珠爾。科爾沁鎮國公拉木扎布。巴林和碩額駙德勒克喀喇沁輔國公敏珠爾拉布坦。烏珠穆沁和碩車臣親王朋蘇克拉布坦。巴林多羅和碩齊郡王琳沁。喀爾喀多羅郡王多羅額駙桑齋多爾濟。巴林固山貝子策靈敦多克。喀爾喀頭等台吉三都克策木伯勒。喀爾喀和碩額駙根扎布多爾濟。克什克騰扎薩克頭等台吉齊巴克扎布。喀爾喀頭等台吉策旺敦多布。至

實錄卷四十六

御座前賜酒成禮。○賜準噶爾使臣圖卜濟

爾哈朗等宴。○諭軍機大臣等。上年山東登青萊等屬。偶遇偏災。曾經降旨。照乾隆十三年之例。暫弛海禁。令招商前往奉天購糴。運東糴賣。以資民食。原屬權衡贏絀。酌盈濟虛之道。但奉省前歲收成已覺歉薄。而上年各屬亦間有被水之處。商販便於海運。赴買日多。若任其購糴。不加節制。則本地糧價。勢必轉致昂貴。著傳諭鄂容安。令其酌定赴奉買

運米石數目。俾嗣後商人依數運販。不得過多。庶於東省民食。既可以資接濟。而奉屬閭閻。亦不致有食貴之虞矣。尋復奏。招商海運。本係一時權宜。為接濟濱海窮黎之計。但恐商販藉詞多運。官役隱混需索。或別有透漏。更關緊要。當經行司詳定規條。令該道印鈐票照。加意稽察。並於原奏聲明。俟麥熟。奏請停止。倘奉屬米糧不便多運。聽該將軍具奏酌辦。今海疆米價頗昂。急待商運接濟。因米船守凍。尚未來東。令臣酌定數目。隨札司速行該道府。將應需數目。豫為酌定。飭商依數販運。并查各州縣。已給過商民票照若干。向後或應再給。或可早停。俟覆到核實。另奏得旨。覽。順天府行鄉飲酒禮。

實錄卷四百六

十三

大清高宗法天隆運至誠先覺體元立極敷文奮武孝慈神聖純皇帝實錄卷之四百六

實錄卷

十四

大清高宗法天隆運至誠先覺體元立極敷文奮武孝慈神聖純皇帝實錄卷之四百七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申正月戊寅

上御正大光明殿賜大學士尚書等宴○己卯諭曰巡城御史以糾察為職兵馬司其所專轄乃漫無查察一任該員肆行侵蝕並至冒領米石毫無顧忌經步軍統領衙門發覺始行叅奏朱章阿等所司何事殊屬昏憤朱章阿馮元欽俱著交部嚴加議處其張哀虧空之案並案內有名人犯該部一併究擬具奏尋議朱章阿馮元欽俱革職從之○盛京禮部侍郎德齡以父老奏請終養報允○

庚辰設盛京總管內務府大臣諭曰盛京包衣三旗佐領等官皆係職分相等之員並無統領辦事之人難保無互相推諉及掣肘遺誤之處盛京地方最為緊要應行設一總管內務府大臣專轄將此永著為令現應增設之缺著將軍阿蘭泰兼管○壬午諭軍機大臣等恒文所奏逆犯楊烟昭一案其字迹卦圖悖誕荒唐語極不道却與傳鈔偽稿一案無涉從前山西有王肇基一案謗毀聖賢肆行狂悖經該撫審明杖斃此案大畧相似既經該撫嚴加審究如果無主使之入及逆徒黨羽則係瘋癲喪心亦毋庸再行根究即照例杖斃亦足使猖狂好怪之流知所儆惕但傳鈔偽稿之犯各省查辦至今未得主名此則所當留心辦理者耳將此傳諭知之○諭曰原任江蘇織造圖拉於委任之事尚能謹慎奮勉今忽溘逝朕心深為惻然著加恩追賞武備院卿職銜○癸未諭朕於二月二十

二日前往

東陵行禮。回鑾到盤山。一切應行豫備等項。著各該處照例豫備。又諭。據江西巡撫鄂昌。奏。廣饒九南道施廷翰之子施奕度。傳鈔偽稿。該道是否知情。非加確訊。不能得實。請解任審究等語。從前河庫道李宏係長隨管工人等私相傳鈔。經該督奏。是以降旨解任質審。及訊明並不知情。即予開復。今施廷翰身為巡道。稽查是其專責。乃伊子施奕度。將此等逆稿。輾轉傳播。失察之咎。實所難辭。且亦斷無不知情之理。非李宏一案所可並論。施廷翰著革職。交與該撫一併審究具奏。○又諭。軍機大臣等。漕運總督瑚寶。奏。報銅船入汛出汛日期一摺。內稱雲南委員黃有德。沈良遇。領解乾隆十六年正耗銅九十四萬餘觔。行至歸州叱灘雷門洞。宜昌府黃額洞等處。損船二隻。共沈溺銅十五萬一千餘觔等語。向來各省委解銅船。中途沈溺。有實

係遇險遭風者。亦有不肖劣員。沿途盜賣。捏報者。此次黃有德等沈溺銅觔至十五萬餘之多。其中似不無情弊。著傳諭碩色。令其嚴行確查。毋任該委員等任意侵盜。以飽私橐。至沿途各督撫。雖係隔省。但船隻既在境內。即與有查察之責。前經該部定議通飭在案。嗣後務宜實力稽查。以杜積弊。不得但據委員稟報之詞入奏。視為奉行故事而已。著各督撫奏事之便。一併傳諭知之。○甲申。諭。數年以來。北路軍營。軍容器械。俱派參贊大臣等查看。並未特派大臣。軍營關係甚屬緊要。當特派大臣。著尚書舒赫德。侍郎王保。馳驛前往。查看軍容器械。諭。軍機大臣等。從前曾降旨。傳諭各省督撫等。凡陳奏內應行交部事件。俱不必將寄諭之旨敘入。今新柱定長。會奏審擬思陵土目羅文立等。越界圖占夷田。捏報夷人拔竹毀牆一案。既據聲明。例應繕疏具題。因封印在即。不及繕本。是以恭

摺具奏等語。是此奏即應交部覈擬者。乃摺內仍將寄信諭旨裝敘殊屬不合。已命軍機大臣節去鈔發。著傳諭新柱定長知之。又諭曰：新柱等所奏查拏偽稿已獲未獲各犯。並現在咨提究追緣由二摺殊未明晰。此案傳看傳鈔之犯前已屢將辦理梗概傳諭各督撫。並令隨時發落。毋致淹繫多人。今該省查辦現獲各犯。但當尋其端緒所在。嚴密根追。俾不至日久無著。自可窮源竟委。冀得真正渠魁。至於傳看傳鈔無可待質之人。一經訊明。即當遵照前旨酌量情罪重輕。隨時發落釋放。何必概行拘留質訊。該督等所辦殊未得其肯綮。著再傳諭新柱、蘇昌知之。又諭曰：總督碩色奏黔省續獲傳鈔偽稿各犯查辦緣由一摺。內稱玉屏縣干景白等案皆得自龍乾惕。應將龍乾惕解黔質明之後。仍將該犯解楚審結等語。前據湖南巡撫范時綬奏到審訊龍乾惕一案。其供詞閃爍殊多。

疑竇當經傳諭該撫詳悉研究。不得因其年老姑從寬典。今黔省干景白等案雖有應行質訊之處。但該犯現在楚省。交該撫嚴行根究。著傳諭碩色、范時綬等令其取具確供。彼此咨會酌量何省案情緊要。即於該省審結。不必輾轉提解以致羈延。又諭曰：溫福所奏辦理黔省傳鈔偽稿各犯一摺。將鈔錄之休致土司黃卷現任土司黃之鉞一併提訊。此案所重在首先捏造之人。其傳鈔各犯雖情罪各有重輕。而所以層層追究者。惟冀得其來歷耳。至土司夷目原非內地士民可比。儘可不必查辦。該護撫等既經拘提到案。與現獲傳鈔各犯一併審訊。自又難以竟置不問矣。但黃卷等世襲土職。若參革治罪之後。仍令居住本處。轉恐其別生事端。可傳諭該督撫等令於內地酌量安插。俾其遠離故土。方為妥協。至龍乾惕身為貢生。並非愚頑無知。乃將偽稿隨身攜帶。其干景白、陳英璋各

案無不有該犯在內。顯係幸災樂禍之徒。且在湖南審訊時。情詞閃爍。疑實甚多。正宜從此追究。不得以鈔自伊姪龍老晚一語。輕為脫却。昨曾傳諭碩色范時綬。令將龍乾惕一犯酌量何省案情緊要。即於何省審結。不必輾轉提解。今黔省各犯既經分別審擬發落。可再傳諭范時綬知之。○定邊左副將軍成家扎布奏。據防卡驍騎校齊克慎報稱。準噶爾宰桑瑪木特等遣人前來告稱。本處台吉達瓦齊作亂。在納林布魯爾地方。被我兵殺敗。達瓦齊與阿睦爾撒納等十二人逃出。不知去向。是以我台吉令阿爾台等處游牧宰桑三人帶兵往烏蘭大坂努克穆隆都什托羅海華碩羅圖。洪郭爾鄂隆舒魯克圖得樓等七處隘口駐劄。以防達瓦齊與阿睦爾撒納遠遁。恐各卡疑我無故動兵。特來告知等語。又據蒙古管旗章京莫尼扎卜前往烏梁海確訪信息。有準噶爾人至烏梁海探親。告

稱達瓦齊於去年九月內與台吉喇嘛達爾扎有隙。私與台吉達什阿睦爾撒納班珠爾策凌沙克都爾等商議投順。

大皇帝其後達什沙克都爾反將商議之事告知喇嘛達爾扎。即帶兵追趕。與達瓦齊戰敗而回。達瓦齊又與阿睦爾撒納班珠爾等商議。若投中國。恐阿爾台地方有兵堵截。地狹難過。因向額爾齊斯前赴哈薩克等語。奏入。諭軍機大臣等。準噶爾向多詭詐。伊等如果慮達瓦齊逃竄。不過派兵防守足矣。今反遣人來告。殊屬可疑。此或伊等恐我處生疑。故為安慰。却暗行誦計。猝然闖入我境。亦未可知。聞喀爾喀游牧多有距卡座甚近者。今若不豫籌防範。恐賊人一旦竊發。不暇向內收移。將反令其得利。所有附近卡座之喀爾喀游牧應早令收入腹地。方妥。然此時遽使移徙。又不免起衆人驚疑。且或賊人聞知。轉以我為畏懼。此中宜緩宜急。應如何熟計妥辦。

甚關緊要。今派尚書舒赫德侍郎玉保前往軍營查看軍容器械。著傳諭成衮扎布俟伊等到時會商密議。務期籌畫盡善。定議具奏。丙戌諭。現在北路軍營參贊大臣乏人。著護軍統領阿巴齊副都統達清阿為參贊大臣。前往軍營暫理事務。○諭軍機大臣等。豫省黃河兩岸。大隄之外。舊有太行隄一道。由直隸連接山東。歷年久遠。未免殘缺。其直隸境內。已令方觀承查明動項修補。至東省界內。所有太行隄有無汕刷殘缺之處。必須及時修築。以期鞏固。著傳諭鄂容安即行詳悉查明。動項修理完整。俾民生足資捍衛。貧黎藉工餬口。於上年被災之地。亦有裨益。丁亥諭。上年江南安徽所屬之績溪等州縣。衛江蘇所屬之江浦等州縣。衛被水被旱。致有偏災。一應賑卹事宜。已令該督撫等照例辦理。並經降旨。加給折賑銀兩。第此內或地處深山。或民當積歉。今賑期已畢。麥秋尚遠。閭

閭謀食維艱。深堪憫惻。著加恩將被災最重之歙縣。績溪。廣德。建平。銅山。沛縣。六州縣極次貧民。各加賑兩個月。次重之銅陵。壽州。宿州。靈璧。虹縣。邳州。蕭縣。宿遷。睢寧。九州縣極次貧民。各加賑一個月。貧生飢軍。隨所在地。一體給賑。俾災地窮黎得資接濟。該督撫等董率有司。實力查辦。毋致遺濫。該部遵諭速行。又諭。據湖北巡撫恒文奏稱。上年十二月三十日夜。漢口江岸。有江西客民網子船失火。時西南風大作。順風延燒。蘄州衛頭幫糧船七隻。雲南貴州運京運楚銅鉛等船三十五隻。又大小鹽船十一隻。所有被燒糧船。例應按出廠年分著落旗丁賠造買補。運員打撈銅鉛。需用銀兩。應據各該員呈請之數。暫行挪借。移咨滇黔二省。解楚還項。失防各官。另行查明報參等語。糧運銅鉛。於運次延燒沈溺。或因有心舞弊。或因疎忽失事。是以定有分別著賠參處之例。以重典守。此次

船隻既經該撫目擊。實因風烈致燬。非特搶救不及。亦且退避不能。是非尋常失火所可並論。所有被燒糧船。著即官為修造。免其賠補。至各運員借項。著該撫即於楚省耗羨項下。賞給報銷。免其還項。但須查明動用確數。覈實支給。毋致轉有冒濫。其被燒逃救人口。已據該撫查明。酌量撫恤安插。其失防各官。仍照例查參。○又諭。前因和其衷於傳鈔偽稿一案。聽從幕賓劉洪謨干請。遂復隨同隱匿。居心巧詐。是以革職拏問。交部定擬。今既據官貴震等到案。審明劉洪謨原係妄供。和其衷並未聽其干請。則和其衷之前。隱匿尚屬屈於上司。其罪與準泰有間。和其衷著加恩從寬釋放。○又諭。軍營參贊大臣過多。恐辦理事務。反相掣肘。俟阿巴齊達清阿到日。著將巴爾品革去參贊大臣。再原任巡撫永貴。亦著前赴北路軍營。同巴靈阿等。自備資斧。効力贖罪。○以公哈達哈。暫署步軍統

領事務。○以戶部左侍郎兆惠。禮部右侍郎嵩壽。充經筵講官。○改鑄山西吳王寨巡檢印。從巡撫阿思哈請也。○改鑄陝西潼關廳儒學鈐記。從總督黃廷桂請也。○戊子。諭軍機大臣等。可寄信班第。那穆扎勒。此次準噶爾台吉喇麻達爾扎。遣使奏請於呼圖克圖。蘇爾巴噶勒丹薩拉圖。三人內。准其延請一人。并少遣人至藏。再將逃來之薩拉爾賜回等語。經朕諭知。我處呼圖克圖三人。皆有造辦經卷。教習學藝之責。斷難遣往。其遣人赴藏之事。去歲額爾欽來云。為新襲爵事。此次又云。為伊父噶爾丹策凌。建作好事。從前策旺多爾濟等。已作好事。不能換一新人。作一次好事。至薩拉爾。乃係逃生求救之人。亦無遣回害伊之理。況我中國逃往彼處。如羅卜藏丹津者。儘有。朕並未逐一索取。薩拉爾著不必給還。再由藏選來之喇嘛十名。亦曾與伊會面。朕已明諭準噶爾使臣。此次汝等既

云延請喇嘛。即行請去。若汝台吉並未令汝延請。即再遣使來。亦不遣往矣。看來喇嘛達爾扎。並非為推行黃教。其意以為不准延請呼圖克圖。或准其遣人至藏耳。況準噶爾去歲曾由拉達克懇求達賴喇嘛。遣一有德行喇嘛前去。達賴喇嘛未准。并云汝等欲請喇嘛。須奏明天朝等語。此次所請三事。朕俱未准行。恐伊又向達賴喇嘛延請喇嘛。著告明達賴喇嘛。使知此等情由。俾得臨時回答。再準噶爾原甚奸猾。或因此次不遂所願。伊若云天朝如以我等赴藏。派兵護送為煩。請以已力前往。則伊且將偕端圖謀藏地。妄生事端。班第熟諳藏內情形。事雖未形。亦當豫籌防範。其由準噶爾通藏道路。何處近易。何處險遠。倘有用兵之事。應如何添設卡座。遣兵堵禦。著班第。那穆扎勒。妥商定議。俟多爾濟到時。明白交付。以便遵行。從前達賴喇嘛曾移駐泰寧。倘準夷來犯。藏內之人。或不能支。

應將達賴喇嘛如何復住泰寧之處。亦須豫籌方妥。再班禪額爾德尼所住扎什倫布地方。距前藏幾許。準夷若來。有無干礙。務須留心。朕如此豫為籌畫者。亦特因藏地關係緊要。而土伯特素性怯懦。若不妥協。豫備萬一有誤。彼必至於驚潰。汝等知此。當留意籌萬全。此等豫為防範機宜。不可使屬下聞知。即達賴喇嘛移住泰寧一事。亦不可稍有洩漏。慎之密之。尋班第等奏。已傳諭達賴喇嘛。令其豫備回覆之言。至準噶爾通藏之路。有四惟那克桑一路稍近。現已放卡。倘有賊蹤。即速報信。一面派兵抵截。一面移徙游牧。不致使賊得利。又拉達克至阿里克之路亦近。但拉達克與準噶爾往來貿易。人數無多。大兵恐不能入境。如不由拉達克地方。從葉爾羌城亦可通阿里克。但中有大山障隔。自阿里克至藏。尚有兩月路程。一得賊信。可以備禦。惟騰格里諾爾阿哈雅克兩路較為廣濶。

今俱放卡。晝夜瞭望不致疎懈。臣等與噶隆等商議。據稱各卡俱極嚴固。無庸添設。土伯特人雖怯懦。自頗羅鼐以來。操練熟習。現在馬兵萬餘。步兵一萬五千。若準夷從阿哈雅克。騰格里諾爾而來。則令策凌旺扎爾。領蒙古唐古忒兵抵截。調功布達克布等處兵接應。從那克桑。阿里克而來。則令色玉特色卜騰領附近兵抵截。調阿里克等處兵接應。班第達及尼瑪嘉木燦留藏保護達賴喇嘛。至班禪額爾德尼所住扎什倫布。去前藏七百余里。自阿里克至前藏。亦沿扎什倫布之邊而行。若用兵。則令移至前藏。與達賴喇嘛同住。可以無虞。萬一準夷傾部而來。土伯特有不能抵禦之勢。臨期相機而行。一面將達賴喇嘛。班禪額爾德尼。護送至泰寧。一面令駐藏官兵。協同唐古忒等兵。併力守住山險。以待川兵入藏應援。亦可無慮。奏入。報聞。○己丑。諭曰。齊齊哈爾副都統遐圖員缺。著盛京

副都統達色調補。達色所遺員缺。著原任將軍額爾登補授。○又諭曰。達色現已調補齊齊哈爾副都統。著傳諭速赴新任。即密告將軍傅爾丹。今準噶爾台吉喇嘛達爾扎。以達瓦齊逃走。派兵駐我邊外。又本年來使奏請諸事。朕俱未准行。恐不無藉端生事。擾亂喀爾喀游牧。朕特派大臣往北路軍營稽查卡倫。此時雖並無形迹。萬一有事。朕欲調發黑龍江之兵二三千名。傅爾丹宜密籌豫備。令五日内即可起身方妥。然此特為萬一有事。是以先期備辦。並非立即用兵也。切不可聲張。轉致擾惑衆心。尋奏齊齊哈爾。黑龍江。墨爾根。呼倫貝爾等處。本有額設兵七千餘名。可挑選二千。再打牲索倫達呼爾等處。丁壯七千餘名。亦可挑選一千。官兵俱有器械。其無器械之打牲索倫等。查有從前調往金川時所給兵仗。撤兵後俱繳回收貯。可以給發。所需銀兩口糧。於現貯倉庫內支給。臨期可

以速發無誤奏入報聞○諭軍機大臣等據開泰范時綬所奏龍乾惕傳鈔偽稿並伊家中搜出各字迹等項龍乾惕既供出原名九三而即字乾惕取義周易乾卦已非人臣所可當且至鈔存捏造詔書尤為悖誕喪心已極實係大逆不道之徒前經傳諭該撫不可因其年老稍為姑息著再行傳諭范時綬必當從重辦理再其往來蹤跡在黔屬之思州而偽稿內以張廣泗為有功張廣泗乃貴州總督或從此嚴加根究追出來歷亦未可定其餘傳鈔各犯應省釋者照例省釋應追詢者嚴加查訊務得實在首先捏造渠魁明正重典以昭國憲不可稍為寬假看來范時綬查辦尚屬盡心並將此傳諭知之○以故奉國將軍時通子齊福降襲奉恩將軍○以故奉恩將軍德爾弼子珠凌阿色貝子賽冲阿額爾奇子富禮赫俱襲職○以雲南迤西道沈嘉徵為雲南按察使○庚寅

上奉

皇太后居暢春園○禮部題朝鮮國王李昫遣使表賀

萬壽冬至元旦三大節及進歲貢方物賞賚筵宴如例○以編修陸嘉穎充日講起居注官○奉恩將軍德敏老病乞休以其子順泰襲職○辛卯上詣暢春園問

皇太后安○還宮○諭曰寧夏鎮總兵那爾泰著來京另有簡用之處其員缺著史宏蘊補

授○又諭曰烏德納不勝總兵之任著來京候旨其左江鎮總兵員缺著保在補授○諭軍機大臣等編造偽稿一案現今各省雖皆查辦至今未得其人朕思此等生事之由皆起於讀書未成不肖之徒即如從前原任翰林阮學濬緣考列末等經朕將伊革職令其回籍伊回籍並不安靜於挑唆蘊著糾叅吉慶案內又經擬徒發遣應於此等人內留心詳細訪查蓋伊原非守分之人既經革

職又擬徒罪。恐伊懷怨。編造妄言。亦未可定。著尹繼善將阮學濬及再有似伊革職治罪之人。皆應詳察。有無情弊之處。查明具奏。或可於此輩中得之也。查訪時。切不可輕為洩漏。是月。直隸總督方觀承奏。豫省漕米。請沿途截留。就近之天津以南。南皮。滄州。青縣。靜海。鹽山。慶雲等六州縣。即照所截之數。於奉天米內扣還北倉。以供各屬平糶。於事為便。運費亦多節省。得旨嘉獎。又奏請將京東之盧龍。臨榆。撫寧。灤州。遵化等五州縣。應修城工需費。在豫東協耗項下動撥。各處興修。報部覈銷。奏入。報聞。又奏。永定河改移下口之後。八工一帶。蘆葦頻增數倍。請令河兵自行收割。用冰床拉運南北兩岸。工捻分貯。四汛備不時之需。亦可節省腳費。雖葦價較秫稍貴。而堅實耐久。則遠勝之。應覈明扣抵。奏入。報聞。又奏。永定下口之鳳河東隄。障束全河之水。以入大清河及西沽。疊道

工程。皆關緊要。遵旨照河工成規。分別方價。全行支給。及時興工。奏入。報聞。又奏。從前八溝買米之案。乃因廣籌積貯。以備內地撥運。今次專為買抵陵糶。而以截留漕米。為內地州縣借糶之用。價雖較貴。而合之糶價。仍屬有盈無絀。應仍令採買足數。實於民食大有裨益。奏入。報聞。江蘇巡撫莊有恭奏。許墅關務。委妥員協查。請定為半年一換。得旨。是如所議行。又奏。京口八旗駐防兵糧。十七年缺少。秋冬季半兵米。請於本年分。徒陽。壇三縣漕糧內。豫截備支。得旨。該部知道。雲貴總督碩色議奏。開化鎮總兵張凌霄。具奏營伍情形。酌議更革二摺。一稱。開化鎮各營書識。占食步糧二。十八九分之多。雖因邊地夷多。漢少。難得通曉文義之人入伍。兼營中公費不敷。以致私給伙糧。實屬違例。查滇省公費名糧。向係每兵百名。扣存名糧二分。上年已奉文加給一

分公費。何得又私給伙糧。今該鎮既將營中菜地清出招租。以租銀為書識工食。毋須動支公費。更與營伍有裨。現已批令照議辦理。一稱開化鎮兵丁糧缺。動經屢月。始行招補。今徹底清查。遇有糧缺。即以頂補。又該鎮兵餉。向係按季全放。間有截存銀米。為數無多。或留修理衙署。亦非私扣肥己。查向來招補遲延。皆由季首放餉。其銀米已豫為事故兵丁支領所致。今止須將兵餉按月散放。則兵

書卷之四十一

五

缺可隨出隨補。不至截曠存留。一切捏報私扣之弊。自可永杜。一稱生息銀兩。開化設有當舖二處。因原定以錢作銀。與市價高低不一。恐有虧折。遂概不當錢。致兵民俱不願赴當。查設當生息。例應銀錢兼當。以便兵民。今該鎮改令銀錢兼當。事屬應行。已批令照議辦理。一稱總兵衙門。所需柴炭草料。及土產食物。竟令各夷民上納。名雖給鹽兌換。實有勒索壓派之弊。今一概禁革。查邊地夷獮自

應撫恤。宜容派擾。緣開化原係土司地方。自康熙六年始改土歸流。其時各衙門日用薪蔬。盡係夷人供應。後雖革除。因開化鹽飭俱係官運官銷。夷獮艱於得鹽。願將柴炭蔬豆等項換易。以致相沿成習。近年開化行銷粵鹽。鹽廣價賤。夷民以物易鹽者漸少。而陋習尚未盡除。且官民交易。亦屬非體。該鎮查明禁革。事屬應行。一另摺內稱開化兵馬無多。而技勇純熟。實少。且汛兵有名無實。甲械歲損不齊。兵丁原無營房。員弁衙署竟有典賣者。外委名糧。牽混頂冒。種種弊端。現將兵丁逐加考驗。軍火器械。次第修補。錢糧逐一清查。汎卡量移高爽。其外委馬兵糧餉牽混之處。亦詳請咨部改正。查操練兵丁。嚴立賞罰。以及清理錢糧。移建汎卡等項。皆屬應辦之事。軍火器械。自應動支營中公費。隨時修理。開化向有總兵。遊擊守備。千把。衙門二十五所。因年久傾圮。無力自修。營中原有缺官隨

書卷之四十一

五

糧截半銀兩。留為修葺衙署之用。該鎮既查有殘缺。應照例動支截半銀兩。次第修補。至所稱典賣衙署一節。並未指明何員。俟飭查究處。又所稱外委馬兵糧餉牽混。業經行司飭查。俟覆到咨部改正。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之四百七

大清高宗法天隆運至誠先覺體元立極敷文奮武孝慈神聖純皇帝實錄卷之四百八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂
總裁官經筵講官太子太傅大學士文淵閣領閣事稽察欽奉 上諭事件處管理刑部戶部二庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆十七年壬申二月癸巳朔

上詣

大高殿行禮。○諭十五年賞借盛京所屬遼陽等七城旗人倉糧。若與應納糧石。令其同時盡行交納。不無稍有拮据。著施恩將十五年借給旗人米石。於今年起展限三年陸續交還。該部即遵諭行。○諭軍機大臣等。黃廷桂所奏夷人留肅交易情形一摺。內有從優經理。委婉告知等語。所見甚屬非是。夷人交易一事。貪得無厭。逐歲增添。是以立定章程。以

示節制。所帶貨物。在定數之內。准其交易。若踰此數。即行駁回。伊等本應恪遵前諭。有何可從優鼓勵之處。乃該督摺內。一則曰從優。再則曰委婉。看來沿邊節鎮。俱不免懷畏懼之情。幸保無事。此非所以壯遠猷而馭荒裔也。該督等膺邊疆重寄。固不可因有此旨。遂加凌慢。致起釁端。亦不可過於柔靡。令夷人得以窺測。方為妥協。再另摺奏稱喇嘛達爾扎。甫經襲位。不能固結衆心。必希天朝賜好。

以壯聲勢。觀伊近今倍加恭順之心。即可見其自固藩籬之意等語。朕意亦殊不謂然。蓋夷性狡詐貪殘。難以情理相度。彼如無心生變。蒙業相安。或未必過為恭順。如心存巨測。反外示謙弱。以行其狡黠之私。況彼地當此內亂疊興。人懷攜貳。伊恐無以邀結衆志。或縱其侵掠。各得少利。冀將來惟其所使。或藉以逞強於番部。均未可定。不可因來使之倍加恭順。遂相信之過深也。國家之於準夷。並

非有意兼并。以示遠畧。若謂伊等方有內難。遂不敢擾我邊疆。似亦未為確見。現在北路各卡。有夷人藉詞帶兵駐牧之事。故命尚書舒赫德等。前往查勘。並飭該副將軍嚴密隄防。毋致稍有疎懈。其西路之哈密一帶。為準夷扼要之區。尤宜加意防範。不可忽視。可一併傳諭黃廷桂等知之。○甲午。遣官祭

先醫之神。○諭朕從前降旨。各省駐防兵丁內。京中遇有應襲世職缺出。應列擬正擬陪者。咨取來京。其止應列名者。該旗行文查問。願來者准其來京。不願來者毋庸咨取。本日閱看鑲黃旗漢軍。奏遞黃成功之應襲恩騎尉。印軸內所開。俱係駐防西安。此內惟將應列正陪二人咨送來京外。其餘應列名之十餘人。該將軍都賚皆咨稱患病。閱之殊覺可惡。伊等顯因身止列名。畏此往返徒勞。故為捏報。而該旗並不循例行文查問。甚屬非是。著將該都統等交部察議具奏。該將軍並不據

實咨報亦殊不合。著申飭。○察哈爾總管達什林沁等奏請裁減出牧之京城官員兵丁等。得旨是。著照所請行。但各旗兵弁。今既裁減。牧放馬匹。蒙古兵丁。更屬勞瘁。且伊等自備馬匹乘騎。著施恩。每年牧廠蒙古兵丁。每人賞銀五兩。以示鼓勵。○乙未。陝西巡撫舒輅故。以戶部侍郎鐘音為陝西巡撫。調工部侍郎三和為戶部侍郎。以內閣學士德保為工部侍郎。○是日起。

上以祭

社稷壇齋戒三日。○諭軍機大臣等。雲南巡撫愛必達奏。江西省傳鈔偽稿案內。余有道供稱。丁得升帶稿到店看過。仍係丁得升帶去。又據丁得升胞弟丁廷選供稱。丁得升赴雲南省城貿易。密咨查拏。而丁得升堅供並無偽稿。現在咨解江西質審完結等語。愛必達乃據江西來咨辦理。余有道。丁得升。均屬一面之辭。非面質無由得實。但此案余有道乃

原供之犯。而丁得升之虛實尚在未定。應將余有道解往雲南。不應將丁得升解回江西。蓋隔省咨提。道路遼遠。如原供或係挾仇誣捏。即據供咨提。則被扳者無論虛實。先受長途押解之苦。而原供之犯。轉得安坐羈所。遷延數月。此狡犯妄供。株連被累。流弊之所由滋也。嗣後如有此等供扳他往人犯。一面密咨拘查候質。俟本案情節逐一審明。即將原供之犯解往彼處質對。則狡供者自知遠解之可畏。不敢肆其仇扳拖累之奸謀。方合折獄之道。將此通行傳諭各督撫知之。○丙申。以內閣學士吳達善為盛京禮部侍郎。○以洗馬國柱充日講起居注官。○丁酉。春分朝。日於東郊。遣恒親王弘暉恭代行禮。○祭先師孔子。遣誠親王允祕行禮。○戊戌。祭大社。大稷。上親詣行禮。○諭據派查通州三倉大臣旺札

勒等奏稱。現在盤量中西二倉。米數短少。顯有情弊。請將監督七十四索承約靈德李掖垣革職。交部審明辦理。南倉米數無虧。惟贏餘米石不歸本廩。殊屬違例。請將監督舒敏張敬業。交部查議。倉場侍郎一任屬員隨意收放。且於實在虧空情形。漫無覺察。請交部嚴加議處等語。倉場侍郎職司出納。乃因循草率。不能董察屬員。實心經理。該監督等典守天庾。虧缺米石。厥罪均無可逭。即行交部治罪追賠。洵不為過。但據查倉大臣等盤驗者。已得實數。而丈量往往與盤驗未符。今盤驗者二十六廩。而丈量者一百五十餘廩。若即以丈量短少之數定罪。尚未為確實。著加恩將倉場侍郎及該監督等俱革職。暫行留任。勒定限期。令其自將未盤驗各廩逐一過斛盤量實數。俟實數定後。仍令派出之大臣侍衛前往抽盤。照實在短少之數。分別定擬著追。方為允協。伊等現在盤量之時。著尚書

哈達哈劉統勲往來督率稽查。至定例五年一次查倉。實賴派出之王大臣剔除弊竇。盤驗贏絀。今甫一年。即虧缺如許。可知伊等並未實心。不過奉行故事。甚負任使之義。其罪尚浮於倉場侍郎之庸懦失察也。所有上屆派出之王大臣等。即著交部嚴察議奏。尋吏部議上。得旨。前派和親王弘晝等查驗通州三倉。原以王大臣為朕信任之人。自無欺隱也。查而不實。則如勿查。弊之不釐。查於何有。使王大臣等彼時盤出短少。則應著落該倉場侍郎賠補。今於王大臣盤驗後。未逾數月。而短少如許。是其咎不在倉場侍郎。而在王大臣也。其倉場侍郎應賠之米。著加恩寬免。令和親王於伊俸米中如數扣抵。宗人府所議停止弘晝親王俸之處。著加恩寬免。達勒當阿劉統勲俱著革職。從寬留任。彭維新從寬免其革去職銜。餘依議。○又諭。故禮部尚書韓奕種學績文湛深經術。其所撰制義。清

真雅正。實開風氣之先。足為藝林楷則。從前未邀易名之典。著加恩追謚。用示褒榮。大學士等具擬以聞。尋賜謚文懿。○山東巡撫鄂容安奏黃河北岸太行一隄。遙為捍衛。前人建築。甚有深意。上年陽武漫水。即穿越此隄缺口而東。臣在豫查勘。已檄司飭辦。調任未及辦理。嗣知奉命動帑修築。此隄在東境者。屬曹單二縣地方。計二百三十餘里。亦多殘損。經臣與河臣顧琮先後委員勘估。據稟隄工大小殘缺不等。總計三千四十餘處。并加幫卑薄。建築缺口。長三百三十餘丈。所繪草圖。隄南有河一道。本以宣洩坡水。因河身淤塞。水發淹及田廬。須大加疏濬。使水循河東注。不致泛溢。隄乃鞏固。查隄工務宜詳慎。至興修上游水利。尤應先計下游。此河直達江南豐沛。彼地有無阻碍。能否容納。必須詳詢妥議。臣遵諭先將前估修隄工數實邊員修築。仍親往督察。一面將東境隄面河道就舊

有淤淺處量加疏濬。俾資容納。其可否大加寬深以防異漲。不致為患下游之處。現咨江南督撫河臣侯覆到。即行酌辦。諭軍機大臣等。巡撫鄂容安因查勘黃河北岸遙隄。奏稱隄南有河一道。本以宣洩坡水。今河身淤塞。應量加疏濬。現在咨詢下游之江南督撫河臣等語。太行一隄。豫東三省黃河資其捍禦。自應增修鞏固。至隄旁有河。若逼近隄身。恐日致汕刷。轉為引寇入室。非所以保護隄工。宜加詳慎。著將此傳諭鄂容安知之。尋奏太行隄在黃河北岸大隄之北。兩隄相去數十里。中間有河一道。寬者十餘丈。窄者四五丈。距太行隄遠近不等。多有間隔村莊者。並非直循隄根。本以宣洩夾隄以內坡水。順流而東。直達江南豐沛二縣。入微山湖。因河身年久。間段淤塞。是以隄內田廬向多淹沒。雍正年間。曹縣里民請於太行隄建立涵洞。使隄南之水穿隄北行。經定陶城武單縣魚臺等

邑入昭陽湖而歸微山湖嗣後涵洞旋築旋衝其旁並有缺口定陶等邑多受水患是此涵洞必應堵塞庶太行隄仍復舊制完固以為黃河保障而隄北數邑水患亦得永除但兩隄夾束中間之水並無去路若不開通舊河使之順流東注不但隄內田廬被淹而每年夏秋雨水漫漫隄工仍不能經久至河防關係重大所議疏濬之河雖與黃河遠不相涉但是否有礙下游江南河湖必當詳慎查辦現委兗沂曹道張潮等前往督查就其舊有形勢逐段勘估臣於科場事畢前往查隄之便親加相度並俟江省督撫河臣覆到後酌議請旨遵行奏入報聞○以禮部右侍郎嵩壽為繙譯鄉試監臨官刑部左侍郎勒爾森為滿洲繙譯正考官太常寺卿德通為副考官太僕寺卿麒麟保為蒙古繙譯鄉試考官○己亥以舉行仲春經筵遣官告祭

奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官伍齡安蔣溥進講論語君子之於天下也無適也無莫也義之與比一章講畢

上宣御論曰聖人勉人以順應天下之理故先示人以大公無我之心蓋人必有所不為而后足以有為然此以言其立志而非謂其於制天下之事也於制天下之事而豫存一必為必不為之心則非大公無我之道失義之宜矣如衡如石不定物以數物之懸者輕重自見如水如鏡不示物以形物之鑑者妍媸畢露內聖外王之學莫不以是為要而有臨民之責者舍此更無以為出治之本此執中之傳所以為千古帝王之師範也講官暨侍班官跪聆畢興直講官兆惠嵇璜進講書經知人則哲能官人安民則惠黎民懷之四句

講畢。

上宣御論曰。人君亦孰不欲知人而安民哉。然知人固不易。人亦不易知。天下之人衆矣。人君則惟一人。以衆人之心。而欲斷一人之知。而一人持此一心。以應天下衆人之心。且欲知之無遺焉。此不待智者而後知其難矣。然禹必曰。惟帝其難之者何哉。蓋自是者。見人之非。而不見己之非。自易者。見人之難。而不見己之難。惟帝欽若之衷。常見己之非常。見己之難。是以知人本難。而堯能官人。則不難矣。能官人。斯能安民。若夫黎民之懷。必其深仁厚澤。實有以淪肌浹髓。使百姓尊親。出於自不容己。有非驩虞之政。所能勉強而致之者矣。講官暨侍班官跪聆畢。大學士傅恒。更貽直奏曰。

皇上符廣運於乾行。秉當陽之離德。神應故妙。時措之而咸宜。誠精則明。物來焉而畢照。固已出乎震行乎巽。協剛柔正直之施。仁如天。

智如神。備位育中和之極。臣等幸侍

講筵。親承

聖訓。不勝欽服。奏畢。諸臣出就拜位。行二跪六叩禮。禮成。

上還宮。賜講官及侍班官等宴於協和門。諭曰。準泰之罪業經寬赦。即著釋放。湖北巡撫恒文奏。辦理傳鈔偽稿。請勅下各省督撫。凡傳鈔人犯。係於何省發覺。因而咨查別省者。即令發覺之省分。不時查案咨催。審究明確。或應解回本省完結。或應於別省完結。總歸發覺省分之督撫。始終查辦完結。不致彼此推諉。而各歸各案。可免沈擱遺漏。報聞。諭軍機大臣等。據恒文奏。辦理傳鈔偽稿章程。一摺。其所稱令發覺省分。始終稽察。節次查案咨催。完結時。奏明銷案之處。似屬責成之一法。所見亦是。著於各督撫奏事之便。將原摺鈔寄閱看。皇十一子永理生。庚子。諭朕此次恭謁。

祖陵著莊親王和親王大學士來保史貽直在京總理事務。○又諭巡視通州漕務向例止派科道一員專司督催漕運而倉場事務則概不與聞。但倉場積弊甚多。現在派委大臣盤驗著赫慶瞻柱宮煥文范廷楷前往巡視漕務。所有一應收兌新漕支放米石俱著該給事中等就近稽察。至在京各倉雖經派有專員亦著一體留心查察。務期諸弊肅清以副委任。○吏部議覆山西巡撫阿思哈奏請蒙古內地交涉事件限期仍照原定展限及應得分限查辦。至內地命盜等案歸綏道審轉照司扣限其餘限期應行裁汰從之。 辛丑。

上御乾清門聽政 遣官祭

闕帝廟。○諭朕因上年浙省被災較重曾經降旨令該督撫等查明災重州縣有應行展賑之處酌量奏聞辦理。今據該督撫等分別查奏著照所請將被災較重之蘭谿等二十

二廳縣與次重之金華等十八縣極次貧戶均展賑一月口糧再浙東之鄞縣等十一縣與浙西之仁和等十三州縣雖被災分數較輕而當青黃不接之時情形自屬拮据亦著加恩展賑一月庶窮黎餬口有資得以從容力作至各該廳州縣境內衛所屯戶鹽場竈丁並按原報災口一體展賑該督撫董率有司妥協經理務令均沾實惠以副朕軫卹災氓之意該部遵諭速行。○又諭恩科場期在邇國子監現有錄科等事滿堂官俱經奉差他往觀保到署辦事以前著侍郎嵩壽暫行兼管。○又諭曰尹繼善莊有恭高斌等會奏請以署寶應縣知縣沈錫鼎陞署宿虹同知海州州同蔣堯年署理寶應縣知縣沈錫鼎有降革之案與例不符今以難得其人具摺請署自可准其署理但稱試看一年果能勝任再行題請實授所奏非是沈錫鼎任內部議降級革職革任先後四次既俱從寬留任

自應將降革之案帶於署任。俟應開復之日。方請實授。若以降革人員。照尋常題署之例。一體實授。則既轉新階。並消舊案。不惟破格。且啟倖門。此端必不可開。尹繼善莊有恭。高斌俱著飭行。各省有似此者。著該部查奏。○又諭通倉收兌漕糧。積弊甚多。現已特派給事中御史等駐通稽查。其水次盜賣攬和等弊。向所不免。淮安濟寧天津巡察官。職所專司。各有分地。將來抵通交收。倘有短少。定當根究於何處盜賣以治其罪。並將分地巡察該員嚴加議處。總漕瑚寶親行督率。統轄全漕。尤應實力查察。一切弊端。惟該督是問。沿途營弁一體統飭知之。又諭前因欽差大臣等盤驗通倉廩座有短少之處。請照數將該管之倉場侍郎及監督等治罪著賠。已降旨令該侍郎等通行盤量。因思通倉廩座甚多。逐一斛量。仍行封貯。人工時日俱屬虛費。著將王公滿漢大臣官員俸米。除本年二月

應行支領外。並秋季及明年一年俸米。豫行借給。再將其餘倉糧逐廩盤驗。自可得實在數目。經此一番辦理。向後倉務自能肅清。而王公大臣等家有餘糧。不與閭閻爭購。米價亦必漸次平減。於京師民食似為有益。此次所領俸米。俱就現在品級支給。將來即有事故。亦不必追繳。陞任者亦毋庸補給。則該部辦理俸冊。並不致案牘滋繁。至所有豫領米石。務宜撙節食用。不得任鋪戶乘機興販出境。及囤積居奇。並應嚴禁燒鍋糜費。其如何設法稽查。及作何挨次支放。不致擁擠滋生弊端之處。著戶部會同倉場侍郎。步軍統領順天府尹。速行妥議具奏。尋會奏查舊例五城通州平糶米。米商販往他處者。步軍統領五城御史順天府尹。嚴行查禁。富商巨賈肆躡米麴。大開燒鍋者。杖一百。枷號兩月。失察地方官。每案降一級留任。三案降三級調用。官吏賄縱。照枉法計贓論罪。此次豫給米

糧出自特恩。應令直隸總督順天府府尹、五城御史嚴飭所屬實力緝拏。每月結報該上司。三月一次奏聞。並令步軍統領嚴查。一年內該地方如有前項弊端。將地方官照溺職例革職。該上司交部嚴議。一年後仍照舊例行。至挨次支放。不致擁擠生弊之處。查通州西、中南三倉除已盤過。厥停放外。其丈量未盤各厰共米一百二十餘萬石。向係西倉開放四旗。中南二倉共放四旗。今年春俸俱在西倉尅期開放。其本年秋季并明年春秋二季將鑲黃、正黃、正白三旗為第一起。鑲白、鑲藍二旗及在京漢俸為第二起。正紅、鑲紅、正藍為第三起。總限五月內按倉米多寡酌量分派。督令放完。此次俸米既多。若不多募車輜勢必延挨時日。除將民車令地方官設法招募。諭令公平雇覓外。其順天府額設官車坐糧廳所轄車戶亦飭令照市價拉運。并令倉場侍郎將放過餘存之米造冊報部遵旨。

逐一盤量。以便原派大臣抽驗。此次所借俸米現任之員業已支領。將來雖有陞任應遵旨無庸補給。其本年明年新選新補以及特授各員既未豫借。則伊等應領俸米應仍照到任月日按季冊報戶部。劄倉給發。至領過此次俸米後即請假回籍。與他有事故者不同。應於補官日照數扣除。從之。又諭曰。定邊左副將軍成衮扎布奏伊弟公策卜登扎布於額爾德尼昭等處曾經報効。且公台吉等亦有陞為扎薩克者。懇將策卜登扎布所屬另編佐領賞給印信等語。著照所請。策卜登扎布擢為扎薩克。賞給印信。諭軍機大臣等。河南巡撫陳宏謀奏請查拏私鑄奸徒摺內請將民間行使私錢一體問罪。私錢官為收買鎔化可充官局鼓鑄之用等語。朕思私鑄固當嚴禁。而私銷之罪浮於私鑄。乃地方官惟事查獲私鑄以邀議叙。而拏獲私銷者甚屬寥寥。前經通行傳諭。惟在該督撫等

督率所屬實力奉行耳。至因嚴私鑄而並重行使私錢之罪。則因愚懵不辨而罹咎者衆。既虞其滋擾。若官為收買。則將鎔鉛圖售。私鑄者不更多乎。此奏所謂知其一不知其二。不可見之施行者。惟私銷之弊。究未能得其肯綮。著於伊等奏事之便。再行傳諭知之。又諭曰。吳進義歷任提督。從無出力之處。且年已衰老。著解任候旨。浙江提督員缺。著史宏蘊補授。那爾泰著仍留寧夏鎮總兵之任。又諭曰。喀爾吉善等所奏傳鈔偽稿案內。提督衙門書吏包琳。供係從前提督內衙傳出。提臣吳進義始終隱匿。今既詢出實情。必須向吳進義根問內衙原稿來歷。方可從此逐層根究等語。吳進義身為大臣。乃任家人胥役。傳播偽稿。仍復有心隱諱。殊屬負恩。已降旨解任。所有應行質詢之處。著該督撫等嚴行根究。據實奏聞。又諭曰。阿思哈奏穆納山存積木植。請免變價一摺。甚屬非是。木

植存積年久。雖不無朽腐。然以二十七萬餘千之多。豈無因其材料。堪供改削者。該道廳等希圖省事。草率具詳。該撫即據詳奏請。其於實在情形。究未經目覩。不過懸虛指說。外省辦理諸事。往往如此。且穆納山木植。現有商人赴內務府具呈。情願承辦。若果危崖絕壁。挽運維艱。則商人等亦復何所利而為之。已交內務府大臣等酌議。著傳諭阿思哈。令其親身前往。詳查確勘。即將此項木植。交與商人等一併承辦。毋許該道廳等稍存回護之見。故意留難。如內務府委派官員。及商人等。因承辦官木。或致滋生事端。亦不可稍有姑容。至所辦新木。除辦運官用外。其商販木植。應作何給與該扎薩克等山價之處。著阿思哈酌量定議辦理。再綏遠城有空閒房屋。前據阿里衮奏請。交商拆變。現今曾否盡行拆毀。並令阿思哈就便速赴該處。會同該將軍。逐一查明。如已經拆毀。則毋庸置議。若尚

有未拆房間即著停其拆毀一併隨摺奏聞。軍機大臣會同查倉大臣等議覆戶部侍郎兆惠奏倉儲收發事宜一摺。一京通數倉每屆收發多在一時耳目難周請每倉各派值年御史二員年終更替收發時公同驗看有違例出入者查叅治罪該御史徇庇至五年查倉時王大臣查出叅處再現任監督所放之米多係前任監督所收交代時未經丈盤即行出結雖大虧空亦無由知查倉御史應於新舊交代時抽厰丈驗濫結者指叅等語查本年現有奉派御史四員稽查支放應俟明年為始京通各倉每倉各派御史一員年終更替併將一年內並無短收多放攬越厰座之處據實奏明交部存案不實查出將該御史交部議處至監督新舊交代原有徹底盤驗之例嗣後京通各倉收漕整厰倉場侍郎標封封固查倉御史加封其鑰匙交倉場衙門收貯於點厰放米時發倉支放其封

固整厰每於夏冬兩季驗看一次重加新封交代時整厰驗封零厰抽盤如有攬雜短少即揭報倉場及御史等公驗虧缺治罪勒賠其監督更替限兩個月出結結後經倉場及御史等盤查虧缺即將新監督指叅至監督例應二年期滿然甫諳倉務即應更換請改為三年一現今各倉整厰氣頭未動而丈量盤驗有短至一千及七八百石不等者顯係書役任意兌收以致短少請令查倉御史會同監督抽掣驗兌如有賄屬濫收將監督叅處書役治罪等語查定例船糧到壩即應嚴禁倉役車戶經紀人等刁勒索而書攢倉役斗甲諸人即與旗丁勾通舞弊如量米輕鬆斛面窪淺每斛所差不過升合而以每厰額貯正米萬石計之則一厰所少即不下數百石況支放之際又與米局舖戶關通得錢撞斛滿量一出入所虧實多應如所奏令查倉御史眼同監督驗兌并令步軍統領多

派幹役嚴訪。如有前弊。拏究治罪。一定例倉。厥挨年遞放。不許撓越。乃不論年分新舊。隨意開放。以致實貯之數不符。問其故。則託言此厥之米。寄貯別厥。又王公領俸。有揀擇厥座者。是以不能挨年遞放。嗣後務令照例挨年。即板下之米。亦應篩去沙土。搭同支放。放完一厥。再放一厥等語。查挨陳開放。及不許王公屬下人揀厥霸占。奉有康熙六十一年諭旨。甚明。復蒙

世宗憲皇帝欽定。領米官揀厥支領。監督不給好米。議處綦嚴。應如所奏。支放一切米石。務令挨陳開放。報部查覈。如王公屬下人揀厥。許監督稟報倉場及御史等指叅。監督如違例支放。一併查叅。一通州設立官局。原為平減市價。裨益旗民。旗人願賣。自宜拉運出倉。乃希省腳費。圖簡便。賣給官局。則官局於各旗領完後。再行赴倉支領。賣給民局。則大票中分出小票。自行支領。其故不過串通書役。

花戶斗甲人等。揀米滿斛。遂致日積月久。倉儲有缺。責成監督嚴查等語。應令倉場侍郎飭各倉監督。務照總票數目。令該旗全數拉運出倉。自行售賣。倘領催及領米人。仍前舞弊。該御史指叅治罪。如經步軍統領衙門查出。將賣米人。無論王公大臣官員。指名題叅。其倉役及買米人等。照偷盜例嚴究。米全數留倉。再查定例。每厥貯米以正米一萬石為額。無許多少。又新糧不得攙入舊米厥內。是以進米時。務令倉場派定厥口。一面將陳厥封固。俟進完日。倉場及御史親自赴倉丈算。覈明收過米數。并驗收監督。經管書攢姓名。及收貯年月。標置厥門。封固註籍報部。凡遇進米放米。俱係倉場指派厥口。不許任意開支堆貯。從之。○以禮部侍郎介福。兼管內閣學士。陞大理寺卿。卞塔海。內閣侍讀學士。蘇章阿。並為內閣學士。兼禮部侍郎。○以太僕寺卿麒麟保。為通政使司通政使。壬寅。

皇后千秋令節。停止行禮筵宴。○軍機大臣等議覆。山西巡撫阿思哈奏。穆納山存木實係朽爛。請免變價。但其中豈無尚可改削者。現在京工需用。商人武璉等具呈。往穆納山採運。其價比圓明園定例。節省十分之二。俟各工應用之餘。聽其市賣。以歸商本。應交工部發票。內務府派司官同往該撫委員。指山採木。倘前項存木有可用者。即改削載運。新木除官用外。照例給還山價。得旨依議。又諭。此事若專令岱文帶同商人前往。伊係內務府微末之員。恐其偏向承辦商人。且亦不能彈壓。著派通政使麒麟保前往。會同巡撫阿思哈妥協查辦。該將軍富昌亦著就近協同辦理。其應如何給與蒙古山價之處。一併酌量定議奏聞。○癸卯。

孝康章皇后忌辰遣官祭

孝陵。○諭據工部回奏。盛京領取廣錫運價多。於錫價之處。事雖瑣而實不當於理。鐵錫乃

日用必需。奉屬旗民家有其物。斷無如此浮費之理。此不過據咨支放草率。因循任其浮費。或且故留有餘。以為支銷之地。工部積習。亦非僅此一事也。著將該堂官交部察議。至各衙門赴該部咨取物件。類此者甚多。著軍機大臣會同通行查覈。立定章程。以昭節慎。○又諭。朕明日赴圓明園。王大臣等毋庸恭送。嗣後赴園進宮之日。若有鹵簿。王大臣等照常迎送。若無鹵簿。毋庸迎送。○諭軍機大臣等。御史歐陽正煥所奏。寧波府屬之南田。澳請召民開墾。以工代賑。一摺。著鈔寄喀爾吉善。雅爾哈善等。令其詳悉查明。如或可行。自屬與民有益。若實在有難於辦理之處。亦即據實奏聞。○實授馬良柱為四川松潘鎮總兵。甲辰。

上詣暢春園。問

皇太后安。○幸圓明園。遣官祭黑龍潭。

昭靈沛澤龍王之神。玉泉山。

惠濟慈佑龍王之神。○諭向例各省鄉試巡

撫入闡監臨而藩臬二司則充提調監試之任後以藩臬為通省錢穀刑名總匯改用道員而巡撫之監臨如故所以重試典也但巡撫膺封疆之寄職守綦重其督撫同城者尚有總督可以綜理若專係巡撫駐劄省分及雖與總督同城而該督因事他出則止巡撫一人在省循例入闡於地方不足以示彈壓嗣後此等省分應於藩臬二司內酌委一員入闡監臨巡撫於三場點名時仍督同藩臬搜查則賓興大典既為嚴密而封疆專寄亦昭慎重矣○諭軍機大臣等潘思渠所奏臺灣彰化縣生番騷擾村莊殺死兵民一摺稱鎮臣馬負書正由該處巡查已經回郡作何料理未據札聞等語生番性與人殊實同禽獸戕殺亦所常有況因熟番占地起釁尚非無端騷動但應隨宜辦理申明法律示以國威令嗣後熟番不敢滋事生番不致逞兇方為得體馬負書既在該處巡查乃置若罔聞

遽行回郡將使民番謂大員尚且如此退縮畏避必致肆無忌憚恣行仇殺其所為巡查者何事著傳諭喀爾吉善潘思渠令其將作何妥協辦理留心彈壓之處速行議奏其馬負書是否有臨事退縮情形抑或因已調狼山急思離鎮希圖草率了事俱著喀爾吉善等秉公詳悉查明據實具奏尋奏細察此次兇番殘殺兵民其為因奸民占種番地熟番逞兇焚殺已無疑義乃該郡文武稟報猶以事出生番為言與提臣查覆情形迥異始終欲以生番焚殺掩其致釁之由且聽信通事張達京詭言嫁禍粉飾欺朦叅請嚴辦以重海疆得旨甚得辦理機宜○又諭據潘思渠所奏查辦傳鈔偽稿之僧人亦蕃等一案雖屬遵照傳諭梗概分別辦理但此等傳鈔傳看之人情罪各有重輕而所以必加根究者重在務得首先捏造之人恐其漏網耳既經質明不過傳鈔傳看自應隨時完結何必悉

行羈候。必待開印後。始予發落耶。嗣後務遵
屢次傳諭之旨。凡有拏獲傳鈔人犯。但經質
對明白。即按其情罪發落釋放。不必概行拘
繫。更不可輾轉周折。歸於無著。其傳諭潘思
渠知之。○又諭曰。阿思哈奏。晉省鼓鑄停鑪。
緣由一摺。雖據稱現在所鑄錢文。可敷三四
年搭放兵餉接濟之用。不致一時缺乏等語。
但錢文為民間日用必需。晉省現在開鑪鼓
鑄。雖劉光晟捐辦銅觔。已經用完。自宜即行
設法採辦。源源接鑄。以資民用。若遽將鑪座
停歇。工匠散。不獨錢價漸昂。於閭閻生計
無益。即如阿思哈所奏。現在商酌復鑄。將來
設局開鑪。未免又多一番糜費。晉省殷實之
戶。多於他省。或動官項。俾其領價承辦。陸續
運局應用。則所鑄錢文充裕。兵餉得以應期
搭放。市價自必日就平減。其應如何定以官
價遴選殷實之人。具領承辦之處。著傳諭阿
思哈。令其速行辦理。○乙巳。

上詣暢春園問

皇太后安。○遣官祭

歷代帝王廟。○諭朕聞外祖母溘逝。深為軫
悼。著四阿哥前往致奠。加恩賞銀五千兩。辦
理喪事。東四旗大臣。俱令往弔。發引之日。亦
著往送。○諭軍機大臣等。永春州孫奮等。扶
讐豎旗一案。前據喀爾吉善奏報。係於正月
初十日在浙拜發。潘思渠近在閩省。得信甚
早。即有應行確查之處。何以直至正月十七
日始行繕摺具奏。其到京日期。較之喀爾吉
善所奏。竟遲半月有餘。且其奏內。雖稱查辦
情由。亦不過與喀爾吉善所奏相同。督撫奏
報地方事務。豈可如此遲延。殊非留心辦事
之道。再所奏海關稅課二摺。一係十五年分
盈餘數目。遵照部駁聲明奏報。一係十六年
盈餘比較數目。而語多牽混。其於分別年分
之處。亦殊未明晰。著一併傳旨申飭。禮部
奏教職俸滿保題。仍照六年舊例。其年力就

衰者。定為三年澄汰。又拔貢本求得人無取備數。若不得才品兼優之士。不必盡求足額。庶得真才。從之。查倉科道赫慶等奏。查祿米等五倉。官廳與米廩相距里許。請將監督二員內。派撥一員在廩口親監支放。又京倉向設都統御史專司稽察。除有旗務城差不能常川赴倉外。輪流查察。以期周密。又殘廢易滋侵盜。請由都統等封識放米時驗封。然後啟鑰得旨。允行。丙午。

上詣暢春園問

皇太后安。遣官祭昭忠祠。諭官兵步射平常。經朕誠諭數次。今日前鋒統領護軍統領帶領引見人內。竟有射不及的半塗落地者。該管大臣何竟漫不為事。殊屬非是。著將前鋒統領嵩椿護軍統領清保舒靈阿。搭拉瑪善努三。恒祿。交該部察議。吏部議准。雲南巡撫愛必達奏稱嚴寄籍之例。請敕直隸督臣及順天府尹嚴飭大宛二縣及近京州縣。

無論正印佐雜如非實係土著。並無房產親族可憑。即屬詭寄混冒之人。應令改正的實籍貫。不得濫行結送。庶詭冒可除。遇應追之案原籍不致以並無其人諉謝。從之。兵部議准湖北巡撫恒文奏。請湖北陝西福建雲南江南等省。考試武舉外場。若督撫均係漢員。仍遵定例。咨調提鎮公同較閱。倘提鎮駐劄路遠。或因公他出。即派委副將一員代辦。從之。

大清高宗法天隆運至誠先覺體元立極敷文奮武孝慈神聖純皇帝實錄卷之四百八

大清高宗法天隆運至誠先覺體元立極敷文奮武孝慈神聖純皇帝實錄卷之四百九

監修總裁官經筵講官太子太傅文淵閣大學士文淵閣領閣事領侍衛內大臣稽察欽本 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽本 上諭事件處管理刑部戶部庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十七年壬申二月戊申

上詣暢春園問

皇太后安。○諭曰。將軍阿蘭泰疏稱副都統雅圖。上年合圍一月。止獲生鹿一隻。此次前往數日內。即獲八十餘隻。是前次雅圖及隨往營總等官。草草合圍。不力可知。官員等查明另叅外。請將雅圖交部議處等語。去年雅圖於祭祀生鹿。止得一隻。朕曾降旨切責。令伊再往。數日內。即得八十餘隻。尚屬知過奮勉。雅圖交部察議。其官員等另行叅奏之處。著

施恩寬免。○軍機大臣等奏。臣等面奉諭旨。向來八旗甲米。俱按四季支放。放完後。去下屆放米尚遠。舖戶乘機囤積。米價漸昂。若將甲米陸續支放。俾源源接濟。殊有裨益。但就一季中。再分次支放。未免紛繁。其應如何指定旗色。按月輪放之處。著妥議具奏。欽此。臣等伏思八旗支放甲米。向有定期。開倉日米多。市價平減。奸商乘機囤積。放完後米少。擡價居奇。以致日長。今蒙諭按月輪放。俾源源

接濟。糧價自無時落時長之虞。囤積不禁自止。臣等酌議甲米既按月輪給。自應分別旗分。查鑲黃正黃正白三旗並上三旗包衣。應領米數較下五旗為多。請將鑲黃正黃二旗於正月四月七月十月支放。正白正紅鑲白三旗於二月五月八月十一月支放。鑲紅正藍鑲藍三旗於三月六月九月十二月支放。辦理不繁。而接濟兵民食用。實有裨益。現在夏季應領米。於四月起。即照現議按月輪放。

得旨允行。○鑄給雲南順寧、鶴慶、麗江、永北等府知事印。從雲南巡撫愛必達請也。已酉諭。據四川總督策楞摺奏。老硐溝銅廠採買餘銅。自乾隆十四年以後。請仍照從前題定十兩之價給發等語。該處銅廠自乾隆十三年以前。採買餘銅。原定價值九兩。續經該督查明。工本實有不敷。題請增給。部議令仍照建昌之例。畫一給價。原係照例辦理。但念該廠讓銅既已革除。工費不無拮据。著照該督所請。乾隆十四年以後。抽買餘銅。准以十兩之價給發。其從前已領價銀。免其追繳。以示恤商之意。○諭軍機大臣等。策楞岳鍾琪所奏辦理郭羅克番賊情形一摺。據稱該鎮馬良柱。以土目丹增自知畏罪。托故不到。非用兵不足以示威戒等語。郭羅克近在松潘口外。馬良柱身為總兵。不得不以用兵為請。且以嘗試總督之意。未必實有見於兵之不可不用。而為是請也。番人越在遠徼。不能如

內地州縣。繩以國法。原屬人性不通之類。第該處乃通藏要路。不可聽其恣行剽掠。是以應化誨約。束使知畏服。庶以儆其將來耳。用兵一事。談何容易。必當權其輕重。值與不值。彼並非騷擾邊境。自無須輕用兵威。馴至不可收拾。亦非謂此時封疆寧謐。習於恬熙。以偃武為了事也。著傳諭該督提。令其妥酌籌辦。○又諭曰。西寧副都統舒明奏查郭羅克番子搶奪班禪額爾德尼之使臣所領賞物等項。有未交還者。移咨督臣嚴查具奏。今據策楞奏稱。查明即令交還。並將已毀鍛足銀銀等物追出。其從前偷竊牲畜別案。尚未呈報等語。此等番子與內地民人不同。原係無知之輩。但既居西藏大路。焉有任其搶奪之理。須化導使知法律。已降旨策楞、郭羅克番子雖係四川所屬。離省寫遠。而與西寧尚近。故令舒明善為留心。此後無論過往差務。及赴藏使臣。俱由舒明處酌派青海蒙古、西寧

番子沿途護衛期於無失不可託言非其所屬以致疎懈○庚戌諭曰哈達哈現在患病其步軍統領事務著雅爾圖暫行署理以工部侍郎德保為正藍旗漢軍副都統兵部議准四川總督策楞奏請將南坪營守備改都司通巴營都司改守備俸薪例馬互易毋庸加添其南坪營兵將綏寧營額兵八百名撥給馬一步九兵百名從之○辛亥

上詣暢春園問

皇太后安○壬子清明節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢

上御勤政殿聽政詣

安佑宮行禮○以大理寺少卿齊達色為大理

寺卿○以兵科給事中赫慶為太僕寺卿

旌表守正捐軀之直隸南宮縣民譚宗孟妻

郭氏○癸丑

上詣暢春園問

皇太后安還宮○遣官祭賢良祠甲寅

上啟鑒謁

東陵○諭兵部奏將違例私行典與民人地畝

坐臺侍衛佛保革職留任可否前往軍營効

力等語佛保乃有罪之人非尋常派往軍營

者可比當俟期滿多留軍營數年効力贖罪

今所議但於年滿之時由該將軍出具考語

帶領引見殊屬非是著將佛保留於軍營俟

三年期滿再留三年嗣後似此等案件俱照

此例辦理○又諭祭祀需用生鹿不必在太

常寺餽養著交盛京將軍阿蘭泰每年合圍

生鹿必獲五六十隻。交內務府送靜宜園餵養。遇祭祀需用若干。數日前由該衙門行文內務府取用。○諭軍機大臣等。前因喀爾吉善等奏到。浙省查辦傳鈔偽稿案內。有由提督內衙傳出之語。已降旨將吳進義解任。今據吳進義奏到。包琳一犯。又經自縊斃命。著將原摺鈔寄喀爾吉善雅爾哈善。令將該犯是否自縊。抑圖滅口了事之處。秉公確查。務得實在情形。詳悉奏聞。尋覆奏。吳進義以偽稿由伊內衙傳出。曾囑令包琳不可供明來歷。及解省質對。包琳勢難抵賴。遂直供實情。又慮獲罪。遂情極自縊。實無滅口了事之處。得旨報聞。○是日。駐蹕烟郊行宮。○乙卯。駐蹕白澗行宮。○丙辰。諭從前盛京因無總管內務府大臣。故佐領等曾許用總理盛京內務府關防。今既設總管大臣。著照例鑄佐領圖記換給。○諭軍機大臣等。據班第等奏稱。布魯克巴之額爾德尼第巴博羅特色勒都

卜。聞朕加恩於達賴喇嘛。撫定土伯特衆生。抒誠內向。進貢方物等語。布魯克巴。乃遐荒部落。聞朕安撫西藏衆生。傾心悅服。奏請朕安。甚屬可嘉。著施恩賞賚。以示褒獎。○是日。駐蹕隆福寺行宮。○丁巳。

上謂

昭西陵。

孝陵。

孝東陵。

景陵。俱未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員隨行禮。○諭軍機大臣等。上年因秋審案內原擬立決斬犯滕有伯。經九卿改為緩決。殊失輕重。且無辦理一定章程。必致紛紜聚訟。是以特頒諭旨。凡由立決改入監候之犯。俱應入於情實。乃指嗣後而言。諭旨甚為明晰。今阿思哈奏稱。關係倫常服制。入審擬緩決。

未過五次之犯。雖係奉旨以前舊案。今年秋審亦應改入情實等語。此乃自生葛藤。若將各省舊案逐一重翻。豈不更為紛擾乎。在阿思哈之意。亦未必謂理當如是。直因胃中茫無定見。以奏請為塞責之地。觀望朕之批示耳。著傳諭申飭。又諭。浙省傳鈔偽稿案內仇英供係提督內衙傳出。應將吳進義家人究明來歷。今據吳進義前後具摺奏辯。以承審官逼令畫供。已成冤獄。請特派大臣審訊等語。偽撰逆稿。本出情理之外。在吳進義身受厚恩。若謂此稿竟出伊手。朕可保其必無是事。但伊本屬武人。年已衰老。文移案件。豈能一一過目。或由提塘以新聞稟報。吳進義不加檢點。自有應得之咎。若併此俱欲洗刷淨盡。轉非實在情形。若謂喀爾吉善與之不協。亦何必藉此大案。授意問官。株連文致。且平日亦未見其有不協之處。何值特派大臣赴審。駭人聽聞。朕看來吳進義不過如此。是

以從前降旨。祇以年老解任。不因關涉偽稿。即行革職治罪也。著喀爾吉善將此旨傳諭吳進義知之。若有別情。亦令喀爾吉善據實直奏。不可回護。○是日駐蹕桃花寺行宮。戊午。孝昭仁皇后忌辰。遣官祭景陵。○是日駐蹕盤山行宮。至癸亥。皆如之。○已未。賑卹山西山陰虞鄉二縣災民。併分別蠲緩。○庚申。和碩莊親王允祿等議覆太僕寺卿赫慶等奏請。勒限支放通倉俸米一摺。查領米人以早得為便。或因車價昂貴。遲回觀望。或因米色稍陳。希得新廩。應飭趕領。除本年春季米業交宗人府吏兵二部傳催。仍令倉場衙門將各官領米先後日期摺報。如有遲逾。聽軍機大臣查奏。其本年秋季及明年春秋二季俸米。應仍令戶部按其送到俸冊。隨到隨覈。即劄倉支放。并令八旗及各衙門。將應領俸冊轉送吏兵二部查覈。倘有錯誤。即將承辦之員交部察議。至拉運車輛除飭地方官招雇

外其順天府額設官車四百輛應令平價雇運並交內務府諭各莊頭等車輛悉行趕赴豫備屆期請旨派都統副都統二三員前往督催從之辛酉諭京城米價既已平減不必平糶著傳諭兩翼管理米局事務之王大臣等令將從前賞發米局出糶米四萬石及由八旗米局內所糶未糶餘米一併暫行止糶收貯米局○又諭出牧京兵業經裁去大半又有達什林沁薩拉爾在彼並不需用多人嗣後牧羣每翼派副都統一員乾清門侍衛一員本年管理牧羣著派副都統烏彌泰明福乾清門侍衛白衣保安崇阿前往○是月直隸總督方觀承奏准戶部咨王公等本年俸米及豫借明年米毋任鋪戶興販出境囤積居奇並嚴禁燒鍋查原議內未指定何處地方臣細繹原議專為在京官員豫領俸米而設此項米祇有近京地面並水路可通處須防透漏餘均商販所不及即如保定省

城購老米絕不可得京南一帶更可知京北宣化一府除燒鍋已酌定缸數給帖納稅例不禁外其商賈販運有關溝之限斷難飛越至京東永平各屬近拏獲燒鍋十數案俱係本地商糧亦從無以京通倉米販運彼處者此次新定章程惟京城及順天各屬通行飭遵庶不失因時立制之本意得旨甚是依議速行又奏遵旨相度金陵在房山縣北崇山之內金太祖陵前地基稍寬應增修享殿一繚以圍牆立正門其原有之祭臺甬路階砌等項並加修治金世宗陵前地隘應增修享殿一並祭臺圍牆甬路等項不能立正門今就碑亭接建柵欄立兩角門足符體制並將自房山北門至金陵山路二十里一并修治奏入報聞兩江總督尹繼善奏春初連得雨雪麥田可望豐收現在米價雖較去冬畧昂而市糧並不缺乏其上年被災地方商販罕通糧價最貴之處麥收以來必須接濟

者隨時體察民情先行減價平糶近因米貴地方如江寧通州等處有向富戶強借扒搶者已飭嚴拏重處以遏刁風得旨去歲江南雖有偏災較浙省若何而亦有扒搶之事此必奸民鼓惑衆聽應嚴處以靖閭閻覽奏似有將就了事之意甚不可也何以重處據實奏聞江蘇巡撫莊有恭奏自蘇赴江寧監臨文闡經常鎮一帶春雨淋漓潮汛亦長運通漕糧運浙楚米俱可通行現在江寧糧價亦昂與蘇相等民食維艱但倉儲須留備緩急此時距麥秋尚遠不敢遽言平糶向來地方有司每恐米穀遇夏霉黧易於朽耗急於出脫前經該司詳明俟督撫批後方准發糶原為慎重搏節起見但今歲情形較常年不同偏災與無災處所淮北與淮南地方因地因時不能膠執故與督臣面商令各府留心察看實在緩急情形星馳通稟無論督撫衙門就近一處批准即督令該縣發糶妥辦既

可杜先時出脫之弊亦無緩不及事之慮得旨甚是福建巡撫潘思渠奏患病力不能支暫委布政使顧濟美代辦監臨事務得旨已據顧濟美奏聞但期速痊以慰懸注亦不必勉強支持理事也山東巡撫鄂容安奏東省連歲歉收民情憚於力作如兗屬向不以五穀為重膏腴之地槩種烟草登萊青武一帶濱海民田或因土性瘠薄或值沙壓水衝不加修培率皆廢棄濟東曹泰等屬多別謀生計不肯盡力田畝所屬民俗輕去其鄉不論豐歉攜孥就食他方村隣輪年外出視同貿易大抵通省風氣力田者少游惰者多今合計額地九十九萬餘頃如果比戶力田每畝多收一二斗歲可增穀一二千萬石臣與司道等熟計務俾閭閻敦本重農而農功尤賴水利如溝洫不浚積水難消河渠不通貫注無路下游不治上游壅淤已令該道府履勘經理並勸栽雜樹以收地利嚴緝捕以

弭盜風得旨好所見甚是勉力為之東省實
覺廢弛應整頓也陝甘總督黃廷桂奏常
平倉糧存七以重積儲出三以裕民食其出
三數內各省原係借糶兼行如遇歉年糧貴
並准通融多糶惟陝省向俱出借於民每至
春時查明農民有地畝者方准借給其工商
士庶及無業貧民皆不得與臣思西民之中
農僅居一凡無業貧民每遇青黃不接待糶
以炊臣與藩司酌擬於出三數內借糶兼行
通融辦理俾各州縣擇農以借可免拖欠而
杜濫觴乘時以糶堪濟貧民而平市價嗣後
如有糧少價昂之處更可於存七數內酌量
多糶一二成總俟秋成後責令經糶之員買
補還倉奏入報聞

晉書卷四十一

二十一

晉書卷四十一

二十一

大清高宗法天隆運至誠先覺體元立極敷文
奮武孝慈神聖純皇帝實錄卷之四百九

大清高宗法天隆運至誠先覺體元立極敷文奮武孝慈神聖純皇帝實錄卷之四百十

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事務總管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次並受法

總管官經筵講官太子太傅文華殿大學士文淵閣領侍衛內大臣稽察欽奉 上諭事務總管理刑部戶部工部事務

世襲騎都尉軍功加十九級隨帶加二級又加二級並受法內大臣戶部尚書錄監旗滿洲都統軍功紀錄五次

尋常紀錄十四次並受法經筵講官太子少保工部尚書紀錄六次並受法稽察欽奉

秋修

乾隆十七年壬申三月壬戌朔諭軍機大臣

等據潘思渠奏接准江西巡撫鄂昌咨查長沙人羅潤珍在學政轎前遞呈並供在福建上杭縣見有李開花一案現飭道府等密加訪緝等語此事雖據原咨內稱該犯供情恍惚似有瘋疾但鄂昌既已移咨閩省查辦何以不行具摺奏聞著傳諭詢問尋覆奏實因羅潤珍瘋狂情詞恍惚無據故不敢冒昧具奏得旨看汝近來辦事惟尚外省推諉觀望習氣觀之井井有條按之則泛泛無實非所

望於汝也慎之 吏部議准給事中朱若東條奏湖北雲南陝西福建廣西等省新設之府州官員憑限請酌加增減載入新修會典從之 兵部奏查各省綠旗營武職員弁應領咨赴部有遲數月及半年以上者員缺久懸有曠職守應通行各省飭令作速起程依限赴部違者叅處從之 癸亥諭軍機大臣等

陵寢樹株關係緊要朕此次恭謁

祖陵周行展視四圍樹木稍覺稀疏不似從前該鎮什格駐劄於此稽察是其專責伊上年於炭戶何成等瑣瑣陳奏而此等職任內緊要事件竟未留心查察殊非實心任事之道著傳諭什格令其嗣後敬謹巡防加意保護並不時親行查看毋得仍前泄視倘有疎懈一經察出惟伊是問 甲子諭軍機大臣等漕糧重運現在陸續過淮稽查盤驗最關緊要向來漕艘北上該運官等不能彈壓查察

以致各幫丁私行盜賣種種滋弊。今朕一經降旨。即有韓大遠盜賣之案。經倉場侍郎等叅出。則前此之漫無覺察可知。瑚寶總理漕務。是其專責。著傳諭瑚寶。令其會同巡漕御史。傳參等實力稽查。嚴行督察。如尚有此種弊端。別經發覺。惟瑚寶是問。○是日駐蹕蟠龍山行宮。○乙丑。諭曰。廣東巡撫蘇昌。叅奏按察使汪德馨。勒派屬員供應。收受書役規禮。船戶賄賂。違例貪營等款。汪德馨著革職。交該督。並案內有名人犯。一併嚴審定擬具奏。○諭軍機大臣等。準夷卡兵撤回。目前雖覺無事。然保無外示和好。來去報明。使我不疑。至秋又借堵截逃人之名。駐兵邊上。妄生窺伺。成衮扎布等不可因其微兵。遂致疎懈。倘今秋又來駐牧。即大有可疑。當一面備所當備。一面遣人諭以原定之約。決意逐回。著傳諭舒赫德。王保成。衮扎布等。將伊等復來駐兵。應如何逐回。萬一有事。應如何備禦。使

喀爾喀不致被累之處。悉心密議具奏。尋奏喀爾喀扎薩克圖汗賽音諾顏。二部落游牧正當西境。準夷來路。請自六月起。於卡內。以一千五百里計。將錫喇烏蘇取中。東至齊特爾布克。隨喀喇塔勒之啓里穆圖。西至麻喇勒圖。拜達里克。伊克鄂拉等處以內。令其游牧。內卡共十六處。每卡駐兵二十戶。至秋時。每卡祇留十人。家眷牲畜。俱令移於烏里雅蘇台軍營附近游牧。俟阿爾台山梁雪降後。再回。至此二部落所豫備之兵三千名。秋間應令叅贊達青阿帶領。與喀爾喀副將軍德親扎布。叅贊額林沁。同赴錫喇烏蘇駐劄。為烏里雅蘇台援兵。兼可壯塔密爾大營之聲勢。其鄂爾坤駐防兵一千。應與防秋兵二千合一處。臣成衮扎布。與叅贊阿巴齊得寧帶領。在形勝近地駐劄。至土謝圖汗部落豫備兵三千。今秋令在鄂爾坤駐劄。又哲卜尊丹巴呼圖克圖所駐庫倫地方。關係甚要。應將

車臣汗部落豫備兵四千。令副都統巴爾品帶領。在巴顏烏蘭駐劄。既可接軍營之力。而距庫倫甚近。又可保護呼圖克圖。萬一有事。一面移至多倫諾爾。一面帶兵前赴軍營。以備調遣。倘秋間準夷復來卡外居住。臣成衮扎布。即遣曉事識路之章京莫尼扎卜。與副都統敦多克前往明白曉諭。責以原定之約。不准居住。務必逐回。一面由烏里雅蘇台駐劄兵內。挑選二三百名。委員帶至接界。護守卡座。有事即收回。會同烏爾登量勢進戰。倘賊人衆力強。驟難抵禦。而喀爾喀已移入不慮侵掠。當令烏爾登等將賊引至錫喇烏蘇。合達青阿兵相機剿殺。賊至此已行二三千。里人乏馬疲。我以逸待勞。又有塔密爾鄂爾坤之兵接應。賊自不得利。總之賊敢深入我境者。必恃擄掠游牧。以接其力。今我既行清野之法。又厚集堅兵。以待之自居必勝之勢。奏入報聞。又諭曰。科爾沁之達爾汗親王。

羅布藏衮布人甚謹慎。自幼在內廷行走。於一切事務。實心奮勉。身染痰疾。猶欲勉強來京。陛見意甚誠篤。可憫。雖經在此醫治。稍愈。不意回歸游牧。中途舊病復發。忽聞溘逝。朕心深為憫惻。伊若在京師。朕必親臨賜奠。今遣皇三子往弔。著加恩賞銀一萬兩。辦理喪務。先遣乾清門頭等侍衛德山往奠茶酒。其致祭等項。該部察例具奏。○又諭曰。達爾汗親王羅布藏衮布病故。公主理宜速往與伊舅成服。所有應行辦理事件。著交該處迅速備辦。旌表守正捐軀之廣東潮陽縣民孫阿妹妻陳氏。是日駐蹕衛家新莊。○丙寅

上詣暢春園問
皇太后安。幸圓明園。丁卯諭賓興大典務得真才。惟在衡鑒精詳。庶不致有遺珠之歎。從前發榜日期太速。後經按省分之大小。分別展限。原因士子寒牕攻苦。決得失於風簷。

寸晷之中。俾秉文衡者從容研覈。去取詳審。不為魚目所混。近來監臨。因有經理地方之事。如山西省。即於二月二十八日。揭曉為期。迫促未免草率。竣事前。經降旨。令各省酌委藩臬。監臨於巡撫。辦理諸務。並無妨礙。嗣後主試務。按照定限。寬期閱卷。加意精覈。不得匆促趨辦。以副籲俊。旁求鑒拔。真才大典。又諭工部。滿堂官現在辦事需員。著內閣學士。赫赫暫署工部侍郎事。俟尚書哈達哈病痊之日。赫赫不必署理。諭軍機大臣等。據阿思哈奏。報山西鄉試。於二月二十八日。揭曉。辦理殊屬草率。各省鄉試。發榜日期。久有定限。此次鄉試。山西省分應在三月初十。以內揭曉。庶試官得以盡心校閱。遴拔真才。不負士子三年攻苦。前阿思哈以有查勘。務納山之事。奏明趕辦場務。惟應將士子入場一切弊竇。詳細釐剔。查辦清楚。於三場事竣後。派委司道大員。入闈監臨。至於內場典試各

官。仍聽其詳晰校閱。按期揭曉。方為妥協。乃將內場諸務。一並催促。剋期發榜。止圖草率完竣。甚屬錯誤。從前看阿思哈。尚望其能奮勉辦事。近來所辦。不過浮淺搪塞。全無實際。著傳旨申飭。令知所悛。順天鄉試。以兵部侍郎兼管順天府尹。蔣炳為監臨。工部尚書孫嘉淦為正考官。禮部右侍郎介福為副考官。

戊辰

上詣暢春園問

皇太后安。諭浙東各府上年被災特重。業經多方籌辦。冀無失所。近聞飢民四出覓食。流入省城者甚眾。以致杭城居民。薄暮即扃戶自保。人有戒心。未知果否有此情形。或係傳聞過甚之詞。亦未可定。喀爾吉善已回閩省。著雅爾哈善將實在情形。即速查明。馳奏。看來浙省荒旱之餘。經冬河道淺阻。米船不至市價久昂。比復雨雪凝寒。春花凍損。民何以堪。南望注懷。情殷飢渴。該督撫等目擊艱難。

自應亟為豫籌接濟喀爾吉善回閩之時不知曾否議及前經降旨將災重各州縣分別展賑將來設或春收歉薄仍應酌量加賑毋令流移其外出覓食飢民所至作何安插及如何設法資送還鄉借給籽糧乘時力作以待秋成一切應行料理之處著該督撫等詳悉區畫一面奏聞一面督率有司實力妥辦以副軫念尋奏上年浙東災重蠲賑頻施正二月間陰雨稍多米價亦昂貧民往來覓食勢所不免二月初曾有無賴乞丐數人向米舖求乞驅之不去各給米半升而散已查拏嚴禁自此不敢效尤並無居民薄暮扃戶情事兼之省城士商捐銀二萬餘兩在城外分廠煮賑貧民就食者數千人每日領粥後或肩挑背負或手藝營生近天暖不便煮賑已於三月底停止其外來貧民按名給與八九日食米令趁農務方興各歸工作此即覓食民人稍多之故自三月初晴暖二麥菜豆暢

茂近普展賑一月足資接濟督臣赴閩之先曾三次進聞與臣商確現今乘時散給籽種其有聞賑歸來之戶一體補賑並勸諭殷商富戶源源販運其浙東八府各縣輿情踴躍皆有捐資煮賑而領粥貧民亦多令道府等小心稽查並於麥收前後分別散米安頓至外出飢民咨查隣省如有親族可依與傭工餬口者隨宜安插或係老弱婦女酌量資送回籍收養一切應辦之法俱實力辦理以慰勤求民隱之至意得旨覽奏稍慰諭軍機大臣等上年十二月內據開化鎮總兵張凌霞密陳提督治大雄不能正己率屬一摺看來似非憑空結撰者而張凌霞履任未久亦未免有躐進喜事之意是以傳諭總督碩色令其詳查體察今據碩色覆到是張凌霞所奏並不盡實而治大雄亦確有不自檢束之處碩色自屬據實查奏但於張凌霞似不無意見而所稱張凌霞欲速見效逞才為能等

語則頗切中張凌霞之病亦屬公論在提督乃通省武員表率乃治大雄於婚嫁交接之際沿習陋俗致人訾議殊為失體念係武職大員不因此將伊治罪治大雄亦當深自悛改至開化一鎮地處邊徼營伍固宜整飭尤必以安靜為主若一有欲速逞才之見則甚非所宜著傳諭治大雄張凌霞二人伊等同事一省嗣後務宜各加省察和衷共濟以副委任若因有此一番指摘遂爾各懷嫌隙互相抵牾必不能逃朕之洞鑒總督碩色統轄二省提鎮皆所節制諸事惟宜秉公持正亦不可因張凌霞曾經叅奏提臣遂稍存意見一併傳諭知之又諭自設立健銳營官兵以來操演技藝甚多今又演習水操應加獎勵著施恩添賞養育兵缺一百於伊等子孫內揀選挑取以資生計又諭健銳營演習水操兵丁等亦照圓明園兵丁例賞給飯食銀兩以湖南鹽驛道沈偉業為廣東按察

使○己巳遣官祭

先蠶之神○諭曰哈達哈所署步軍統領事務著侍郎兆惠暫行管理 庚午

上詣暢春園問

皇太后安○還宮 旌表守正捐軀之直隸平山縣民任興妻谷氏○辛未諭前將查倉未能盡心之王大臣等議處今據宗人府奏稱將和親王或革退都統或罰都統俸餉之處兩議請旨夫查倉並非都統專任因派出王等有兼轄都統者方可革退都統若派無兼轄之王亦將伊之王爵革退乎如果係兼轄任內之事自應視其所管之職議處查倉並非都統專任伊等若云不知亦應即議革退都統何又兩議請旨宗人府王公等明知事例故意嘗試甚屬取巧伊等若照例定議朕或施恩亦未可定今如此瞻徇豈受其請託耶抑借以傾陷耶大凡施恩治罪朕自有定見誰敢任意輕重從前

皇考時。似此嚴論議處之事。該王公等未有如此兩議請旨者。將視朕為何如主。敢如此嘗試耶。著將宗人府王公等交該部嚴加議處具奏。壬申。

上至靜安莊

孝賢皇后梓宮前奠酒。臨奠定安親王。

詣

雍和宮行禮。○諭管理歸化城都統衆佛保多病一時不能速痊。著解任來京調理。所遺員

缺。著莫爾歡補授。○旌表守正捐軀之江西

德安縣民李繁明妻徐氏。○癸酉。

上幸豐澤園演耕。○諭兵部辦事堂官較少。通州

監放米石。著派奇通阿將李元亮換回。○甲

戌。諭軍機大臣等。臺灣彰化縣兇番戕殺兵

民一案。前已傳諭該督撫等查明確實情形。

今據李有用奏據差弁劉聰千總馬猶龍等

稟。則係彰化縣擡轎熟番。而該縣相驗時謂

係生番。與熟番無干。又鎮協所報係汎兵遊

巡途遇被殺。差弁所訪。係兇番擁入營盤。焚屋殺兵。種種互異。據此。則官役弁兵。各有成見。文武大相齟齬。於海外巖疆。殊非所宜。如果係熟番構釁仇殺。至放火逞兇。連斃數十人。而諉之生番。謂為化外兇頑。無可致詰。希圖諱飾了事。其貽患更大。著將李有用原摺抄寄喀爾吉善閱看。總督統轄全省。文武皆其所屬。伊等既各執一詞。該督務必秉公確查。究察實在情形。不可稍存偏向之見。尤不可令該員隱諱朦混。草率完事。以長刁風。○又諭巡臺御史立柱。錢琦。臺灣彰化縣兇番戕殺兵民一案。據提督李有用奏據弁兵稟報。稱彰化縣相驗時。弔責本莊業戶簡耕等占墾番界。以致生番殺人。時有被傷走脫老人。認係該縣擡轎熟番。而該縣謂係生番。與熟番無干。以致鄉民不平。又柳樹浦汎兇番焚殺營盤。殺傷兵民。亦係熟番作歹。又搜獲奸民勾通番社。並查出通事張達京巧卸生

番希圖了事等語。御史為耳目之官。事無遠近。俱應據實入告。該地方既有此等情節。即當備細陳明。今該提督一一奏聞。而該御史等並無摺奏。此豈設立巡察本意耶。況此係地方官承辦之案。該御史雖非道府有司。可比而身處其地。耳目易周。當日之情形。與現在之輿論。稟報之真偽。辦理之當否。俱可逐一究訪。得其確實。著即明晰奏聞。以贖前愆。若與地方有司通同隱諱。以苟且了事為心。

宣統元年十一月

十一

必將該御史等從重治罪。○以大理寺少卿張映辰充續文獻通考館副總裁官。○乙亥。上耕耤詣

先農壇行禮。更服至耤田所。

躬耕三推。復加一推。

御觀耕臺。命莊親王允祿。怡親王弘曉。和親王弘晝。各五推。吏部尚書達勒當阿。戶部尚書蔣溥。禮部尚書伍齡安。兵部尚書李元亮。刑部尚書劉統勳。工部左侍郎何國宗。左副都

御史胡寶瑒。通政使多德。大理寺卿齊達色。各九推畢。順天府府尹率農夫終畝賞資者。老農夫如例。○諭曰。蘊著著施恩寬免。釋放交伊族長留心管束。毋使滋事。丙子。

上御太和殿視朝。文武陞轉各官謝恩。諭現在工部事務。總理需人。著莊親王暫行管理。俟大學士史貽直病愈後。莊親王不必管理。○鄉試考官孫嘉淦。介福。奏前經禮部覆准。御史歐陽瑾條奏。內簾刻字。刷字工匠俱於十六日放出貢院。查同考官分經。概不許外簾與聞。以杜弊竇。令工匠刻刷各房薦條。已知某人閱看某經。且三場題目。不無知覺。若將此項人役放出。彼此傳播。必致招搖影射。大滋弊端。請仍照舊例。俟揭曉日一同放出。從之。

宣統元年十一月

十一

大清高宗法天隆運至誠先覺體元立極敷文
奮武孝慈神聖純皇帝實錄卷之四百十

實錄卷之四百十

一

大清高宗法天隆運至誠先覺體元立極敷文
奮武孝慈神聖純皇帝實錄卷之四百十一

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申三月丁丑。

實錄卷之四百十一

上詣暢春園問

皇太后安。○幸圓明園。○戊寅。

上御勤政殿聽政。○諭曰。潘思榘簡任巡撫實
心黽勉。今患病溘逝。深為軫惜。著照江蘇巡
撫徐士林之例。入京師賢良祠。以示優恤。其
遺摺內所請封典。賙贈之處。著加恩賞給一
品封典。所有應得恤典。亦著加恩照一品之
例賞給。尋賜諡敏惠。○諭軍機大臣等。福建
巡撫員缺。已降旨將陳宏謀調補。瀕海巖疆。

地方緊要。著傳諭陳宏謀令其速赴福建巡撫之任。不必候新撫交代。亦不必來京陛見。以速至閩省為要。陝西布政使張若震奏請定原籍呈報丁憂之例。凡現任官之父母在籍病故者。令家屬呈報及地方官詳撫咨部。俱以五日為限。庶該員不得遲隱。而應題應選之缺。亦無稽滯。得旨。此奏似有所見。該部議奏。尋議應如所奏。嗣後除現任各官父母在任所病故者。仍照舊辦理外。其在籍病故者。該家屬取具親族里鄰甘結。於五日內呈報本籍州縣。該州縣確查具結。五日徑詳督撫。該督撫等即移咨任所。其任所督撫不拘部文及原籍之咨。以先到者即知照。該員離任。仍將日期咨明臣部。扣算年限起復。其在京各官。父母在原籍病故者。向無督撫具題之例。應令原籍督撫遵照定限。取具印甘各結。移咨臣部。照例分別題咨開缺。至京外各官。有本員聞訃日期在先。各督撫移咨在

後者。仍以本員聞訃日期咨部查辦。再外任官員因公出差。父母在任所病故者。令該家屬依限呈報。由任所督撫分別題咨臣部。查照開缺。仍令該督撫一面行文出差處所及原籍地方。查取印甘各結。聞訃日期咨部。查覈八旗外任官員。父母在本旗病故者。令該家屬依限呈報。該旗照例取結咨部。查明府道以上。具題開缺。同知以下。分別照例開缺。一面行文該員任所督撫。知照該員離任。仍將該員聞訃日期咨部察覈。再治喪人員。本生父母在籍病故者。照此辦理。從之。己卯上詣安佑宮行禮。○諭曰。都察院此所議宗人府王公處分。又屬觀望。全不實心。前因宗人府議處和親王弘晝。以兩請具奏。瞻徇取巧。是以特命都察院嚴察議處。夫議者議其罪也。且八議之義全焉。王公等非干大故。從無革去王爵降為庶人之理。都察院果以此議為當

乎。否乎。亦不過云如此議上。必不依議另定處分而已。即云比較臣工犯瞻徇取巧之例。應革職。則王等本由宗令宗正任內議事獲罪。亦應議革。宗令宗正之職。於革去親王何有。是明知朕必不革去兩親王兩郡王而故如此立議。以為可以立身無過。而於朝廷之體制。事理之當然。概不之論。是豈大臣實心敬事之道。朕辦理庶政。務協厥中。從寬從嚴。毫無成見。乃諸臣議事。一不衷之於理。非以

嘗試取巧。則以從重而思出自上為自全之術。無以實心為國家任事者。朕將奚望亦甚自慚。此案亦不必再交另議。裕親王廣祿履親王允禩慎郡王允禧順承郡王泰斐英阿俱著罰王俸一年足矣。其都察院官交該部嚴加議處具奏。尋吏部議上。得旨。梅穀成積德廣成。胡寶琮。舒敏戴。章甫。常海。王應綵。俱著革職從寬留任。陳惠華著從寬免其革任。仍注冊。○庚辰。諭向例部院衙門行文宗人

府俱用咨呈。所以敬禮天潢。異於臺省。列署於體制為宜。但此指尋常來往文移耳。若因奉到諭旨。行文宗人府。亦復循用舊例。是以朕諭旨咨呈該王公矣。有是理乎。如昨都察院本內稱奉到議處宗人府王公諭旨。欽遵。即於某日咨呈宗人府。文義甚為不順。此亦向來習而不察。漫不留心之一端。嗣後特交諭旨。專行宗人府。而該衙門並未置議者。行文時俱著改正。不用咨呈。○辛巳。

上詣暢春園問

皇太后安。立

訓守冠服騎射碑。諭朕恭閱

太宗文皇帝實錄。內載崇德元年十一月癸丑日。

上御翔鳳樓。集諸親王。郡王。貝勒。固山額真。都察院官。命宏文院大臣讀大金世宗本紀。

上諭眾曰。爾等審聽之。世宗者。蒙古漢人諸國。聲名顯著之賢君也。故當時後世咸稱為小

堯舜。朕披覽此書。悉其梗概。殊覺心往神馳。耳目倍加明快。不勝歎賞。朕思金太祖太宗。法度詳明。可垂久遠。至熙宗合喇及完顏亮之世。盡廢之。耽於酒色。盤樂無度。效漢人之陋習。世宗即位。奮圖法祖。勤求治理。惟恐子孫仍效漢俗。豫為禁約。屢以無忘祖宗為訓。衣服語言。悉遵舊制。時時練習騎射。以備武功。雖垂訓如此。後世之君。漸至懈廢。忘其騎射。至於哀宗。社稷傾危。國遂滅亡。乃知凡為君者。耽於酒色。未有不亡者也。先時儒臣巴克什達海庫爾纏。屢勸朕改滿洲衣冠。效漢人服飾制度。朕不從。輒以為朕不納諫。朕試設為比喻。如我等於此聚集。寬衣大袖。左佩矢。右挾弓。忽遇碩翁科羅巴圖魯勞薩。挺身突入。我等能禦之乎。若廢騎射。寬衣大袖。待他人割肉而後食。與尚左手之人。何以異耶。朕發此言。實為子孫萬世之計也。在朕身豈有更變之理。恐日後子孫。忘舊制。廢騎射。以

效漢俗。故常切此慮耳。我國士卒初有幾何。因嫻於騎射。所以野戰則克。攻城則取。天下咸稱我兵曰。立則不動。搖進則不回。顧威名震懾。莫與爭鋒。此番往征燕兵。出邊我之軍。威竟為爾八大臣所累矣。故諭爾等其謹識。朕言欽此。朕每敬讀。

聖謨。不勝欽凜感慕。深惟國家開創之時。我祖宗躬親勞瘁。勤求治理。矩矱相傳。罔敢逾越。以立萬世之丕基。至於今。咸受無疆之福者。皆仰遵。

明訓所致也。我朝滿洲先正遺風。自當永遠遵循。守而勿替。是以朕常躬率八旗臣僕。行圍較獵。時時以學習國語。熟練騎射。操演技勇。諄切訓誨。無非率由舊章。期以傳之奕禩。永綿福祚。惟是我。

皇祖太宗聖訓所垂載在。實錄。若非刊刻宣示。則累朝相傳之家法。外庭臣僕。何由共悉。且自古顯謨令典。多泐之金。

石曉諭羣工我

皇祖太宗之睿聖。特申誥誡。昭示來茲。益當敬勒貞珉。永垂法守。著於紫禁箭亭。御園引見樓。及侍衛教場。八旗教場。各立碑刊刻。以昭朕紹述推廣至意。俾我後世子孫臣庶咸知滿洲舊制。敬謹遵循。學習騎射。嫻熟國語。敦崇淳樸。屏去浮華。毋或稍有怠惰。式克欽承。昇訓。冀億萬世子孫共享無疆之祚焉。○又諭曰。據雲南提督治大雄。奏伊子藍翎侍衛治繼鈞。前在滇省。向回民馬穎等輾轉借貸。是否確實。無憑詰問。請將伊子發回。交該督撫飭審等語。看來情節。似不僅止於此。顯有含糊取巧之意。治繼鈞著革職。發往滇省。交與該督撫等。秉公查訊具奏。如有別項情節。即將治大雄一併嚴參治罪。若係伊子實止借貸生事。治大雄不過失察之咎。亦照例議處。諭軍機大臣等。治大雄參奏伊子治繼鈞。向雲南客民百姓借銀五百兩。無從措還。

又向回民馬穎等輾轉借貸。有無別故。現密札按察使沈嘉徵查明等語。治繼鈞已革去藍翎侍衛。交該督撫審明具奏。看來此事必有別故。治大雄見事不可掩。故先行參奏。以為取巧之術。碩色愛必達。自必有所聞見。何以不行奏聞。著明白回奏。前交該督查明。張凌霞參奏治大雄摺內各款。該督顯有回護治大雄之意。經朕批示。此案務當秉公據實查辦。該督撫等試思此時尚有人能偏向迴護自行已私者乎。有稍涉偏徇。能逃朕洞鑒者乎。果屬秉公。原於該督撫毫無干涉。一有偏徇。是將自罹其咎矣。又安能庇人耶。思之慎之。○又諭瀛臺內至有醉人擅入。持刀傷人。應惟該管太監是問。若挑取此等人。正奉宸苑大臣官員應辦之事。與太監等何涉。伊等挑選時。漫不留心。今失察民人陳四冒入。並不自行請罪。竟似太監等亦有挑選之權。所奏殊屬非是。奉宸苑大臣官員。著交內務

府大臣察議。此案亦交內務府審擬具奏。○壬午。諭曰。兩江總督尹繼善奏稱。江寧駐防旗兵餉米。每年正四七十等月。關支本色。其餘八個月。概給折色。江省上年秋成。雖大概有收。而川廣米船多搬運赴浙。兼之省城戶口殷繁。入春以來。糧價漸增。兵丁不敷買食。請於節年支存米石內。賞借一月本色。自本年十月起。在於冬季應得本色內。分作八個月扣還等語。著照所請。即交與該督酌量於五六月間。青黃不接之時。將江寧駐防兵米。借支一月本色。以資接濟。○又諭據江西巡撫鄂昌奏稱。南康九江廣信饒州四府屬。上年收成既歉。經冬及春。雨雪嚴寒。糧價益貴。無業窮民。傭工無地。覓食無方等語。朕心深為軫念。著交與該撫鄂昌。速行妥協籌畫。或就近動撥倉糧。大為減價平糶。以資接濟。或即賜以一月賑卹。總不必拘定勘不成災。常例。務俾窮黎得續饔飧。不致失所。以副朕病

瘼一體之意。○諭軍機大臣等。傳鈔偽稿一案。辦理許久。未見端緒。前據尹繼善奏。有江西省城鈔報房章錦等犯。似為近可根尋。冀該督撫等悉心研究。完此重案。如尚有咨提追訊人犯。俱應隨時附奏。今日尹繼善鄂昌俱有奏摺。竟不奏及此案。看來伊等全然不以為事。如果不應辦理。何妨將不可查辦之處。據實奏聞。否則應將現在如何辦理。詳晰具奏。豈可置之度外。顛預了事。全非實心任事之道。著傳旨申飭。其現在查辦情節。即速據實具奏。尋奏。鈔報房章錦等一案。於二月中旬。拏獲章錦。供出之顧章周等。嚴加究訊。該犯因質証無人。肆口狡賴。當即奏解江西。與章錦質審。於三月十六日。據江西按察使丁廷讓。江南鹽驛道周承勅。稟報。訊據顧章周供出得稿。於江寧之周麻子。朱老三等。臣於鳳泗查河途次。飛行江安糧道錢度。江寧知府朱奎揚密拏訊究。於二十四日途間。接

據該道府稟報拏獲各犯俱堅不承認再三刑訊始據供出曾於錢恒處見稿等情隨於二十八日回署親提審訊將所審情節現已另摺奏聞並非敢於遲滯自蹈怠玩誤公之重咎得旨若追至此而欲彌縫將就歸於終無頭緒以博人之稱頌則恐非怠玩誤公四字所能了事者矣此事將大有關係慎之勉之。又諭前因新柱奏江西廣信饒州等處有採運米石科派累民之處諭令該撫等查明實在情形今鄂昌覆奏甚屬含糊上年廣饒二府初報旱災復稱晚禾成熟恐未切實時厯朕懷春初新柱適有此奏益深軫念但所奏原據汀州府知府曾曰瑛之稟而曾曰瑛本籍江西或因市惠桑梓過甚其辭非出公論是以諭令查明如果採運累民該撫為所朦蔽而隣省已有傳聞其辦理不善亦前撫舒輅任內之事鄂昌自當切實查明據實入告而乃閃爍其詞稱另摺奏聞至另摺中

又稱親身前往查勘俟回署奏聞俱為不了之語雖地方果有其事亦不敢以其言為信耶似此懷疑觀望殊不實心著傳旨嚴行申飭其地方應行撫卹之處另有旨諭如仍不督率有司實力奉行致窮黎稍不得所惟鄂昌是問。又諭前因喀爾吉善奏浙省傳鈔偽稿案內有闕涉吳進義內衙之處令該督等秉公查審吳進義兩次奏辯俱經傳諭今吳進義又奏地方米價情形其時係二月二十九日當在已見解任邱鈔之後其意殆欲使督撫聞知其差人進摺為足以聳動觀聽又屬取巧之術耳偽稿一案該督撫等查辦惟當一秉虛公若謂此稿出自吳進義之手自屬理所必無或如前諭所云提塘鈔送吳進義失於檢點一併發出庶乎近之朕亦並無成見喀爾吉善現已回閩可傳諭雅爾哈善令其秉公辦理據實奏聞。甲申上詣暢春園問

皇太后安。○兵部議准直隸總督方觀承疏請涿州新城趙北口等處行宮添設弁兵建給營房從之。○以大理寺卿李世倬為都察院左副都御史。○乙酉諭乾隆十六年浙海關徵收盈餘數目部議駁令確查覆奏。浙省該年被旱不能豐盛亦必有因著免其駁查。然既較雍正十三年分短少至一萬二千餘兩明係該撫因已報旱災可以藉詞推卸一任官役舞弊冀邀格外之恩且永貴去年諸凡有負任使取巧處亦當示以懲罰此項短少之處即著於永貴名下按數追賠。諭軍機大臣等今歲恩科鄉試各省奏報士子入闈搜檢之處據稱並無懷挾者居多惟四川總督策楞搜出夾帶十九名照例發落此非蜀士之犯科者獨多而他省士子概能奉法自愛也察弊之道實心行之其弊自見應以虛文則見猶弗見耳策楞辦理一切政務於察弊頗能實心即此可見其不輕放過他省或

未免姑息從事取悅士子以博寬大之名不知場屋求得真才容一幸獲即屈抑一正士惟嚴則偽不能亂真此正愛才之實用豈得以祛除敗類為過刻耶事雖已往宜慎將來可於奏事之便諭各督撫知之。○又諭曰策楞所奏金川案內未完覈減銀兩之王靖安紹祖倪世樞等三員請免其革任監追再予寬限一摺王靖等俱係微員所欠銀兩為數無多毋庸特頒諭旨著該督將奏明量予展限之處咨明該部查覈朕已於摺內批示可再傳諭知之再今日策楞所奏各摺俱屬尋常事件前此岳鍾琪奏刁民尹道德姚景安等借提督衙門名色招搖撞騙二案據稱俱係移咨督臣飭審策楞何以並未奏及此地方應行嚴查辦理之事著傳諭策楞令將現在如何查辦之處據實奏聞尋奏尹道德撞騙尼僧立扁銀兩屬實並無提督家人衙役串通各情弊例應發邊衛充軍其王有貴誣

騙蠻民一案曾浼姚景安寫詞。景安以賣姦自應查禁。不肯代寫。王有貴應枷號發遣。報聞。旌表守正捐軀之河南舞陽縣民左繩文聘媳閻氏。丙午諭軍機大臣等。揚關由閘兩處乾隆十六年分徵收盈餘短少之數。已准部議。交該督等確行查覆。據云。春季船隻辦差商旅稀少。則賈客先期販運。上年秋冬之間。稅務應加豐裕。而十五年分所徵盈餘已較上屆短少。或係董權文等辦差往來。

計數八四十二

不能在關督察。以致員役乘機弊混。亦未可定。但外省督撫承辦此等事件。多不據實清查。一惟循照該關原奏短少緣由。不過以委員訪察。並驗明經徵底簿。委無徵多報少情弊等語。加結題報而已。如此。則名為查覆。與不查何異。著傳諭該督尹繼善。該撫莊有恭。務將實在情形。詳悉查明。據實具奏。不得以具文草率了事。浙江巡撫雅爾哈善。奏遵旨傳提吳進義到案。檢齊原供。並各犯嚴究。

衆供一詞。俱稱偽稿。係吳進義內衙傳出。即伊幕友家人亦俱供認。於上年四月二十二日誤發。而傳鈔聚看各犯。並取供後。自縊之包琳均係該衙門書辦。吳進義於事敗後。逐犯傳囑。用言慰嚇。令勿供傳。自內衙意欲諉卸。於史善墨一犯。請將吳進義革職。以便嚴行根究。得旨。吳進義已經解任。不必另降諭旨。發部即著照所請。行汝咨部知之。旌表守正捐軀之直隸東鹿縣民莫璽妻郭氏。

計數八四十二

氏 戊子

上詣暢春園問

皇太后安。旌表守正捐軀之直隸完縣民楊得旺妻龐氏。四川富順縣民楊泰璉妻田氏。

己丑

上御勤政殿聽政。以禮部右侍郎介福為正

紅旗蒙古副都統 庚寅

上詣黑龍潭行禮。以鑲紅旗印務叅領法起

為歸化城右翼副都統 辛卯

上詣暢春園問

皇太后安。諭軍機大臣等。直隸總督方觀承所奏馬成龍賄買兵部假票冒領車價一案。其供出之兵部貼寫厲芳千。董談九。書辦朱君謀。已令步軍統領嚴拏。解交刑部。不必發往保定。該督現獲人犯一併解部審明治罪。其厲芳千現經在逃。並著該督飛飭所屬於直隸一帶嚴行躡緝。務期弋獲。毋致遠颺。並

實錄卷四十二

一八

該犯等冒領車價。已逾四站。其良鄉等州縣雖亦疑有假冒。趕追稟究。而當下即能盤詰得實者。則係清苑縣知縣周元理。該令自屬留心辦事之員。已交軍機大臣記名著。該督將伊平日居官如何之處。據實奏聞。尋奏。周元理誠實端謹。於首邑事務。辦理俱能妥協。前經保薦卓異。且在直有年。倘蒙擢用。乞俯念直隸需材。俾其駕輕就熟。奏入報聞。是月。福建將軍暫署巡撫新柱奏。兇番焚殺兵

民一事。文職則稱生番。武職則稱熟番。彼此互異。顯有捏飾情弊。已有風聞。現飭查辦。得旨。當詳查嚴辦。不可諉罪生番。亦有旨諭喀爾吉善矣。福建水師提督李有。用奏。請移建軍裝庫火藥局於厦城內。以免蒸濕。以防火患。奏入報聞。山東巡撫鄂容安。奏。登萊青等郡海運奉天米石。遵旨酌定數目。茲招商買運四萬五千餘石。擬再准運五萬四千餘石。數足即停。得旨。如所議行。陝甘總督

實錄卷四十二

十九

黃廷桂奏。哈密孤懸絕塞。與準夷為隣。設兵防守。原非聚集游民之所。查近年客民多至二千餘人。除挾資貿易外。有無業游民。招引兵丁。開場賭博。間有索欠爭鬧之事。現飭清查。陸續遷移內地。仍令安西道廳不時訪拏賭博打降等事。嚴辦遞回本籍安插。得旨。所辦是。又奏。闕中書院經費無多。請將督撫二標馬廐清出餘地。租銀添撥。以充公費。奏入報聞。陝西固原提督齊大勇。奏。慶陽等

一十六協營額兵缺出向例俱儘本標新兵撥補無以鼓勵合營兵丁應請每出五缺一缺令該營兵拔補以四缺仍令新兵撥補得旨允行

實錄卷四百十一

二

大清高宗法天隆運至誠先覺體元立極敷文奮武孝慈神聖純皇帝實錄卷之四百十一

清 實 錄 乾隆十七年四月上

大清高宗法天隆運至誠先覺體元立極敷文奮武孝慈神聖純皇帝實錄卷之四百十二

乾隆十七年壬申夏四月壬辰朔享太廟遣怡親王弘曉恭代行禮諭軍機大臣等江西羅潤珍在學政轎前遞呈并供在福建上杭縣見有李開花一案前以鄂昌移咨閩省查辦並未奏聞曾經降旨詢問今據署福建巡撫新柱奏據知府曾曰瑛等稟覆在於上杭及交界各縣通行蹤跡並無李開花聚眾情事且弔驗長汀水陸馬頭客店日逐所記簿籍上年秋冬亦並無過客羅潤珍其人事屬虛誕等語著傳諭鄂昌令再研訊羅

敕修

乾隆十七年壬申夏四月壬辰朔享

實錄卷四百十二

太廟遣怡親王弘曉恭代行禮諭軍機大臣

等江西羅潤珍在學政轎前遞呈并供在福

建上杭縣見有李開花一案前以鄂昌移咨

閩省查辦並未奏聞曾經降旨詢問今據署

福建巡撫新柱奏據知府曾曰瑛等稟覆在

於上杭及交界各縣通行蹤跡並無李開花

聚眾情事且弔驗長汀水陸馬頭客店日逐

所記簿籍上年秋冬亦並無過客羅潤珍其

人事屬虛誕等語著傳諭鄂昌令再研訊羅

三八七

潤珍何以有此妄供據實奏聞看來此事原屬荒唐但既經咨查辦理亦不可不究其虛實耳尋奏親提羅潤珍研訊該犯心迷語亂既供曾見李開花及詰其實於何處見過忽又稱並未曾見不但情詞恍惚形貌竟屬瘋癲報聞○刑部議覆給事中朱若東奏請定盜賣漕米分別治罪遞加處分一摺臣等會同兵部議得運丁盜賣米石係正項漕糧自有監守自盜治罪本條至盜賣盜買不計米數多寡舊例概枷號一月未免無別應如所奏零星盜賣盜買行月糧米者仍照舊例枷號一月如一人盜買及一幫盜賣至百石以上者將盜買及盜賣為首之人枷號兩月責放失察運弁自數石至數百石同一處分亦無區別應如所奏旗丁盜賣漕糧不及五十石者將運弁捆打四五十石以上者降一級調用一百石以上者降二級調用二百石以上者革職至捆打若照舊例回南發落不

無規避倖免亦應如所奏即交倉場衙門責處從之○蠲免山東齊東德州衛惠民蒲臺平度寧海文登榮成濮州范縣聊城東昌衛乾隆十六年水災額賦有差○甲午

上詣暢春園問

皇太后安○還宮○乙未諭曰工部侍郎德保

著回京供職其提督山東學政著金德瑛去

○是日起

上以常雩祀

天於

圓丘齋戒三日○丙申諭曰宗人府所奏王公

等朝期摺內康親王屢次註寫患病康親王

年近八旬步履艱難亦係實情著加恩免其

入朝嗣後王公內有年至七旬者即照此例

○丁酉

上詣

南郊齋宮齋宿○戊戌常雩祀

天於

圖丘

上親詣行禮○諭曰宗人府王公等平日辦事草率毫不盡心今失火焚燬

玉牒伊等之怠玩可知

玉牒非尋常檔案可比著將該衙門王公等交部嚴察議奏○已亥

上詣暢春園問

皇太后安○幸圓明園○諭軍機大臣等四川

總督策楞等摺奏辦理郭羅克賊番搶劫喇

嘛物件一案堪布所開失物或前無後有或

前少後多種種先後懸殊誠有得隴望蜀之

意但此等劫掠之案祇在查得真盜真贓以

申法紀得其大概足矣非必將所失財物全

數追出也即內地辦理盜案亦豈能起獲全

贓一一清出耶在喇嘛等或不知辦理本意

將從前所失全行開報該督等若照開報之

數逐一向郭羅克查追殊非辦理之道今該

督又復咨查駐藏大臣恐喇嘛等謂屢次行

查即應地方官照數賠出而駐藏大臣又復

偏護喇嘛則更不成體制矣著傳諭策楞等

將此意行文駐藏大臣等知之○庚子吏部

議准湖北巡撫恆文疏稱漢陽為附郭首邑

政務殷繁請將大冶縣縣丞移駐漢陽從之

○辛酉諭曰瑪世岱不勝總兵之任著來京

以護軍參領用所遺泰寧鎮總兵員缺著那

爾泰調補寧夏鎮總兵員缺著韓錡補授

兵部議准原署兩廣總督新柱等疏稱粵西

汛弁向例分年更換今酌議如一汛內有千

把駐防外委協防屆更替之期或先換外委

仍留千把駐防則次年更換千把仍留外委

協防若一汛只有千把或外委一員專防應

於更替兩月前先令接防之弁前往該汛向

專防汛弁學習設有疎防惟舊弁是問交卸

後責成新弁從之又議准山東巡撫鄂容

安疏稱寧陽縣為南北通衢請酌撥肥城泰

安聊城等縣額設夫十四名馬二十八匹於

夏張設立腰站其抽撥夫馬統歸泰安管理從之。開採廣西思恩縣屬幹崗山白鉛廠從巡撫定長請也。壬寅諭軍機大臣等喀爾吉善奏到溫台屬縣奸民強搶米石現委道府究明為首之人用大枷枷號遍遊城鄉兩月滿日仍行收禁按律從重定擬等語此等強搶為首之犯鼓惑鄉愚肆行不法最為地方之害必當示以重懲方足禁遏刁風即其罪不至死亦不可拘泥常例僅予枷號兩月應令永遠枷號俟一二年後酌量省釋奸民庶知儆惕大凡搶奪之案多由富民居奇閉糶而起地方官遇有災傷即當先期一面勸諭富民出所有餘通融平糶一面密為彈壓保護使兩得其平則奸民無可乘之機地方自必寧靜迨搶奪已行執法而繩其後富者被劫貧者受刑所傷實多已無及矣至事後辦理過嚴則以求生迫急之災黎罹於刑憲實可憫惻過寬則強梁縱肆之徒一呼百

應更慮釀成事端該督撫辦災時當一一豫向司道明示此意使董率屬員善為體悉方合機宜現在青黃不接之時尤當時時留心將此諭喀爾吉善知之。○吏部議准盛京將軍阿蘭泰等疏稱廣寧所屬地方相距程途不一該協領知縣等如遇要務公出橋梁道路有亟需修理之處必俟伊等查驗未免稽延請將前屯衛巡檢移駐白旗堡從之。○禮部議覆廣西學政羅源漢疏稱永寧州學出貢之期雖改而廩缺未裁欲疏通將來之貢當權裁現在之廩請將額廩三十名裁半查各省小縣廩缺尚係二十名若州學止十五名殊未允協酌議裁去十缺俟人文興起時仍照各省州學廩額復三年兩貢之例從之。○科爾沁扎薩克和碩達爾漢親王額駙羅布藏故遣官致祭如例。○癸卯

上詣暢春園問

皇太后安。○諭軍機大臣等黃廷桂所奏查出

假冒火票棍徒張子文現飭該州縣各選幹捕赴京躡緝並移咨山西直隸督撫一體查辦等語此事已在直隸發覺其張子文一犯業經清苑縣盤獲現在解部嚴審矣該犯自上年至今往返數次該督之訪聞查辦於地方事務尚屬留心但其摺內所稱訪聞者或據屬員稟報抑係家人查訪可傳諭該督令其據實奏聞此與本案辦理之處並無關涉不過悉其實在情節耳尋奏前因寧夏道楊灝差稟於固原州聞有人持兵部印票折支寧夏旗員赴任車輛口糧一事恐係假冒即飭咸長二縣確查稟稱持票折支屬實并將該犯姓名隨責令有驛州縣一路躡緝報聞

○軍機大臣等議奏麒麟保富昌阿思哈等議奏穆納山辦運木植事宜一摺據稱蒙古山價除京工用木無庸議給外挑剩給商餘木每料給銀一錢由內務府移理藩院轉給該扎薩克具領現在指定山溝五處劃清界

址擇八寸以上之木委員督採其七寸以上者不許砍伐約可取十萬料令商人乘時砍採限九月內完竣再山中八九寸至尺餘成料應俟京工行文飭知需木若干如數運足即請封禁其該商等砍得木植全數運京候挑餘者給商變價沿途稽察催趲如有偷漏拏究木植到京挑選官用外查明給商數目照各關額稅銀數於內務府應給價內扣留移交戶部歸各關木稅項下銷算仍先令各關監督於運木過關時登驗確數報內務府并移知巡撫將軍核對至運道黃河風水難以剋期原議五月內運到未免急促今勒限六月內頭運到京所有從前朽爛者委員督商挑選改削按數定價咨部交商承變如有成料之木仍運赴京工再沿河蹬口有節年拏獲私砍偷運木植板片共一萬餘件飭商承領選適用者先行解運其零雜給商變價以償運腳統以十分之七解京三分給商無

庸交價內務府亦無庸發銀其各關口亦不必再納關稅酌令先解六千限五月運到等語查所奏給山價劃界址扣關稅勒定限并將存貯朽木來便改削及入官木料先行運工自屬確按情形應如是辦理者但現據商人武璉等具呈以山價照北口外之例每株給銀五分小木妨礙坡道或貼近大樹者必須砍伐五溝之木辦運需時請寬限二年挑剩給商之木懇於就近水次市賣以濟運價應徵關稅隨過隨納改削舊木碎小者一例聽令市賣否則不敢承辦等語臣等復傳詢岱文據稱山木徑一尺七寸者亦有徑一尺五六寸者甚多該處距黃河水次甚近運京雖屬路遠而該商等意圖重利今經定議不能任意沿途發賣獲利有限是以不能承辦等語臣等查該商惟利是圖若如麒麟保等所議勉令承辦將來僅有貽誤轉得以具呈在前藉口且現據該撫摺內查明武璉陳廷

植等本非殷實可無庸令辦惟山中木植甚多京工現在需用既不令該商辦運未便以封禁虛名任聽偷砍臣等酌議麒麟保所奏自於該商辦公之餘尚有益應請即文與該撫阿思哈等或就近於晉省召募殷商辦運或委員官為辦理總期依限運京至陳廷植等現辦零積舊木六千餘件據稱已經起運約六月內到京所有挑給三成之木已經朽爛未敢領變俟官用者到京時據實開明運腳任憑賞給等語應俟運到時仍照臣等原議交該工查明量給價值報聞貴州提督丁士傑奏黔省營馬緣接壤滇省水草惡劣易致倒斃一年所領馬價不足買補查滇省各營馬匹定例三年外准倒十分之三額外溢倒俱於朋扣等項內通融買補並未著賠上年督臣碩色查奏仍請免賠椿雖經軍機大臣議駁蒙恩軫念滇省兵力拮据俯允所請黔滇無異請照此例除十分倒三分別

年限著賠外其溢額倒斃者准通融買補免賠下軍機大臣議行○蠲免直隸大興南樂熱河四旗薊州東安永清萬全等八州縣廳乾隆十六年分災賦有差被災較重者并分別賑卹○甲辰諭上年浙東被災特重賑卹多方本省倉儲俱經動撥江西湖廣上年亦有偏災兼之協濟鄰省撥用倉穀為數亦多俱應於今秋後買補朕思各該省今春米價俱昂即西成豐稔一經採買市價仍恐不能平減京通各倉儲積陳陳相因現在盤驗本欲少進南漕使新舊不致交錯以滋弊竇應將浙江江西湖廣三省今歲應徵漕糧酌留本省各該省萬一水旱不齊恃以無慮即遇豐稔則以本地所出留為撥補倉儲之用無藉採買新糧於民食自為有益著軍機大臣會同該部速議具奏尋奏各省偶遇災荒撥動常平倉穀定例秋收買補但產米止有此數一經採買市價必昂酌議將浙省額徵漕

糧七十六萬餘石內截留四十萬石江西額徵漕糧七十六萬餘石內截留二十萬石湖廣額徵漕糧二十六萬餘石內截留十萬石該督撫等查現需買補各倉分別按額撥給得旨依議速行○諭軍機大臣等江西巡撫鄂昌所奏查辦廣饒等府災民一摺內稱分別等次賑粥賑米五日之後漸可聊生十日情形大定半月以來皆各欣然果腹統計用米二萬一千餘石等語此又不無言過其實若果兩郡各屬窮黎嗷嗷待哺豈二萬餘石之米遂能使欣然果腹者不過因伊奏請親往查辦故為此奏以見其料理具有成效而從前之民食匱乏悉皆舒輟玩視之咎與已無與焉然究之所用米石僅止此數若非撫卹尚有未周則必所奏言過其實即所稱欣然果腹之語亦不可信矣此等處必不能逃朕洞鑒一經指出其更何辭以對封疆大吏與小民同其休戚此而不實心誰當實心者

鄂昌所辦與其所奏俱有外省習氣著即傳旨申飭至廣饒等府乏食貧民前經明降諭旨令該撫妥協籌畫毋致失所此時情形是否實係調劑得宜仍令據實查辦毋再粉飾滋咎又諭近因令德保回部辦事所遺學政員缺已派金德瑛去今日偶閱向年奏摺內尹繼善前任江督時有江西學政金德瑛聲名平常現在確查之語其後未經覆奏不知其所指聲名平常者何事已傳諭詢問尹繼善朕思金德瑛果有納賄營私大弊當已敗露未必姑容至今朕觀其人不過小局面因係狀元於衡文當可勝任是以又有山東學政之命甫經降旨豈因偶閱舊摺即行徹回况經今數年或伊亦自知加謹但尹繼善從前既有此奏不可不令鄂容安知之該撫亦不必因此多方吹求則又非朕意耳尋尹繼善奏臣前任兩江總督時訪聞江西學政金德瑛考試衡文輿論不甚帖服故有是奏

及細加察訪江西文尚奇僻金德瑛所取未免平熟一路是以不滿人口實無別項情弊且臣旋即調任故未覆奏報聞○乙巳諭據浙江巡撫雅爾哈善奏稱金華蘭谿等州縣所屬村莊間有一兩處被雹查明麥菜有被傷者即借給口糧籽種俾其補種晚禾等語浙東金衢等屬上年被災較重全賴春花接濟今金華蘭谿等縣又間有被雹之處麥菜受傷災餘窮黎生計愈滋拮据所有借給口糧籽種即著加恩賞給免其照例徵還以示軫恤該部即遵諭行○戶部奏借給八旗滿洲蒙古漢軍并上三旗包衣兵丁等庫銀除交過本銀并寬免病故及移往外省坐扣外實存利銀二十八萬七千九百九十九兩零得旨八旗隨圍兵丁借過幫銀未完十萬二千餘兩著加恩即於存庫利銀內抵補免其坐扣交還蠲免直隸武清寶坻薊州宛平永清四旗廳東光天津靜海滄州鹽山慶雲津軍

廳長垣東明開州宣化懷來萬全懷安張家口豐潤玉田等二十三廳州縣乾隆十六年分災賦有差丙午諭軍機大臣等浙省傳鈔偽稿案內仇英供係提督內衙傳出之處屢經諭令該督撫等秉公查辦今據雅爾哈善奏稱將諭旨備悉傳知吳進義透切開導令其據實說出傳送偽稿之人堅稱不知且云年老有病惟求轉奏等語如此則吳進義竟係全然不知恩典之人矣但雅爾哈善係將原供錄奏仍作不了之語究竟此稿實在來歷是從何處得來此案應作何歸結之處並未奏及殊屬含糊著傳諭雅爾哈善令其遵照前後所奉諭旨秉公辦理核實具奏

閩浙總督喀爾吉善等議覆御史歐陽正煥請開南田墾田畝一摺此墾孤懸大海直接外洋距寧波府屬之象山縣并台州府屬之寧海縣洋面自五六十里至數百里不等內有三十餘墾外有平沙總名南田元季流民

曾耕鑿其間後為洋匪剽劫又因地近日本至明初即行封禁迄今四百餘年民人屢請開墾歷任督撫委勘利少害多是以未允臣等細加查訪實有應禁而不應開者緣塗墾可墾之地統計不及七十餘頃而山徑磽田必須築塘蓄水懸海坦沙又須砌礮禦鹹霖雨有沙壓水衝之患晴霽有旱乾之虞即雨暘時若而風潮之激盪鹹氣之薰蒸收穫難必且外洋招墾多係無藉之徒千百成羣難保不為盜匪若安營防守不特官廨營房餉糈雜費該地賦稅不敷十之一二抑且門戶錯雜沙塗平坦設險尤難並非舟山玉環等處有山谿之限者可比況既經招墾則日用米糧硝磺鹽鐵即應聽其販運守口員弁無從分別更難保奸宄之徒必無出洋濟匪之事下軍機大臣議并傳歐陽正煥閱詢尋奏喀爾吉善等議覆一摺交該御史閱看並詢其是否確有所見據稱乾隆十五年因奉差

至浙詢及地方人稠田少情形得聞南田墾可墾之土甚多因復細訪南田現屬象山初不等海外棄地國家承平海疆寧靖一經開墾則居民所在更成土著至於築塘蓄水本農功所不廢安營設汛又國制之自然苟慮法所難稽則現在非無防守且道塗平坦即召民耕種亦不至聚集為奸竊以玉環舟山等處前督臣李衛奏請開墾在雍正六七年間其未墾以前固猶今之南田墾耳惟地方官以身任事自於民生有裨今該督撫亦稱宜禁而不宜開則原非無阡陌之利可知正煥雖係得之傳聞亦經再三細訪初未敢冒昧陳奏然實未身履其地等語查該御史雖似有所見而實未身履其地方今生齒日繁地無遺利況南田近在內洋與海疆無關自可聽民開墾然自明初封禁至今已閱四百餘年即前督臣李衛奏請開墾玉環舟山二處而此獨未經講求者亦必確有不便之處

今喀爾吉善等既稱細察形勢不應開墾臣等愚見似毋庸再行查辦報聞○吏部議准雲貴總督碩色等疏稱永順鎮現駐之猛賴汛宜移駐舊乃新關原設兵五名亦應徹歸此處再撥把總一員添兵五十名防守從之○兵部議奏降調內河水師遊擊蔣飛鵬應補內河水師守備無例可沿查內河水師守備題缺江南十二廣東三臣等酌議嗣後遇有降調守備到部請照外海水師例請旨發往江南廣東二省交該督等與應補人員一體題補至降調都司之員亦無班可歸查此項題缺江省四浙江一如遇降補都司赴部者並請照守備例辦理從之

大清高宗法天隆運至誠先覺體元立極敷文
奮武孝慈神聖純皇帝實錄卷之四百十二

實錄卷之四百十二

三十九

大清高宗法天隆運至誠先覺體元立極敷文
奮武孝慈神聖純皇帝實錄卷之四百十三

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 諭旨事務處管理

吏部理藩院事務正黃旗滿洲副都統世襲騎都尉副都統加七級隨帶加二級尋常加二級軍功紀錄一次並履歷

翰林院掌院學士太子太傅大學士文淵閣領閣事領侍衛內大臣稽察欽奉 諭旨事務處管理吏部理藩院事務

世襲騎都尉副都統加七級隨帶加二級尋常加二級軍功紀錄一次並履歷內大臣戶部尚書鑲黃旗滿洲副都統軍功紀錄五次

尋常紀錄十四次並履歷經筵講官太子太傅工部尚書紀錄六次尋常紀錄等奉

敕修

乾隆十七年壬申四月丁未諭軍機大臣等

實錄卷之四百十三

一

據尹繼善奏稱江西偽稿案內顧章周供出
之朱老五所見偽稿係由民人饒玉文張履
安得自滿城撥什庫佛祐披甲鍾善等七犯
從僧人友蘭民人邢紹文處輾轉傳鈔將佛
祐等分別從重加倍枷責以示懲儆等語此
殊不足以蔽其辜伊等皆係滿洲奴僕乃見
此悖逆之語敢於互相鈔看其情罪不止比
民人較重而已且此等敗類亦豈可留於駐
防復加養養已令該將軍錫爾琿將佛祐等

七犯委弁鎖解來京發往拉林阿勒楚喀矣著諭尹繼善一體遵照辦理再另摺所奏顧章周偽稿供稱周麻子從凌祖耀處攜來轉給章錦及訊周麻子等俱矢口不承現飭該道周承勅將章錦顧章周二犯帶回江寧詳悉審究等語此案追及報房線索較近周麻子既不承認則顧章周所傳偽稿究係得自何人從此嚴加質訊自可究其來歷總之此事既有端倪正宜上緊追求冀得首逆以彰國憲慎勿稍存將就了事之意著一併傳諭知之○兵部議准盛京將軍阿蘭泰疏稱養息牧哈岱郭洛地方向設牧羣三十除裁汰外現止八羣若仍前補放翼長二員未免浮冗請將翼長富勒赫革職員缺毋庸補放即以現在六品翼長改授副總管嗣後六品副總管缺出照翼長缺出例揀選保送從之○戊申

孝端文皇后忌辰遣官祭

昭陵○諭軍機大臣等據湖南巡撫范時綬摺奏寶慶府鈔傳偽稿之陳可望案內有江南人法堯文供係得自江南人周孝修今准江蘇撫臣咨覆周孝修供未傳稿現將法堯文解赴江南質究定擬等語偽稿來歷是否周孝修傳攜非得法堯文到案質訊未必即肯據實供吐該督從前接准范時綬移咨審究周孝修如何不肯供認作何咨覆之處未經奏聞今該撫現將法堯文一犯解赴江南自可將周孝修究明實情是否鈔傳抑係法堯文供吐不實故意妄扳尹繼善即宜研審明確據實奏聞○又諭外省辦理偽稿一案逐線追尋忽此忽彼似近復遠迄無究竟固似出於詳慎而細察情形頗有推諉之意當由究出正犯則該地方官有失察之咎案情既重處分必嚴先有畏避處分之心惟幸其輾轉扳連懸案不結正犯一日不出則失察一日不叅藉是為苟延計即在地方鄰保雖有

所知亦因從前未經舉首恐治其容隱藏匿之罪愈加閉匿官民相蒙是以牢不可破耳不知此等逆徒詭秘叵測父兄亦所難保地方官雖失察於前果能認真辦理弋獲於後則前愆尚為可贖若因此故為延緩則欲避罪而更自重其罪矣尹繼善辦理此案即應向地方官明示此意令勿以失察為慮破其愚惑推避隱情并曉諭鄉鄰確知偽造的犯首告者亦不問其從前之隱匿則地方官自必實心查辦首告亦無所顧忌正犯庶幾可得該督撫等早應如此辦理斷不可互相掩飾終歸懸宕將來咎有攸歸慎之思之○已酉諭軍機大臣等據巡漕御史張湄奏稱南漕北上之候每多欽工木簾從中紛擾至一開口輒與漕船搶先奪路請飭下部議嗣後每年運京木植在二月望前抵臺莊間者准其先漕船前進如漕船已入臺莊間不論何路木簾只許隨漕尾上違者將運員定以處

分等語皇木運京原非每歲常有之事現在各省並無採辦木植惟萬年吉地需用之木或有辦運未完者非如他木料所可相提並論至近有交高斌辦運一項自非急需想高斌亦斷不至不知輕重使有礙漕運也若復交部定議成何政體該御史未悉端委所以如是率爾陳奏但木簾每在途次爭先奪路略無顧忌甚至專恃鬪毆滋生事端亦不可不加之約束著辦理皇木及沿途經過地方督撫等善為酌劑俾先後遞行勿致擁擠并諭解官嚴禁夫役勿令鬪狠滋事將此傳諭各該督撫等知之○兩江總督尹繼善奏准湖廣督臣永常咨開據蘄州知州李必稟稱訪得江南之英山霍山與湖廣羅田連界之深山內有奸匪馬朝柱等借開山燒炭為由立名天堂寨聚眾糾夥謀為不法除行總統武漢黃德道黃州協查捕密咨江省協捕嗣又准永常咨稱拏獲要犯供出匪黨散布英

山之石頭嘴大凹溝五顯廟及桐城太湖等處又馬朝柱等緣楚省搜拏潛匿英山天馬寨等因隨飛飭安徽道王勅及安慶營副將馬乾宜調六安一帶兵丁協力搜捕并令各委員拏獲要犯即行嚴訊務究根株旋據壽春鎮總兵改光宗呈報亦領將弁赴英山勦捕如果有負固抗拒等情臣即親往調度不使要犯一名漏網得旨是看來起於楚省而歸結於江南正宜卿勉力辦理以靖地方者也另有旨諭諭曰尹繼善奏到准湖督永常咨拏奸匪馬朝柱等聚眾英霍山寨一案據稱已委安徽道王勅副將馬乾宜帶兵勦捕現在辦理情形若何其指名咨拏人犯曾否俱各就獲速行詳悉具奏此等奸匪之徒心術叵測與捏造偽稿幸災樂禍之心正同得非即偽稿正犯無地可容藏匿深山鋌而走險耶此亦不可不為慮及偽稿之案辦理已久果如此則亦天道不容然不可存此歸結

之念耳可傳諭尹繼善等上緊查辦改光宗不待檄飭先帶弁兵親赴搜查如此方無忝方鎮之任該督可傳諭嘉獎令其嚴密搜拏以迅速為主速則當時撲滅少遲則竄匿難圖矣○又諭曰湖廣羅田縣奸匪馬朝柱聚眾江南英霍等山寨一案今據尹繼善奏到又蔣炳亦奏稱湖督咨拏奸匪馬朝柱看此則永常在楚已四出密咨甚得查辦之道其未經奏聞者當俟辦有頭緒方詳悉具奏所見亦是據尹繼善奏稱楚省已獲馬朝佐此雖非正犯之兄其如何被獲之處速行詳悉奏聞現在辦理若何要犯曾否全獲可即行馳奏再此案發覺由蘄州知州李璠親點煙戶訪聞稟報李璠前任鐵嶺縣知縣推陞引見時即曾記其人去得今觀其於地方事務能如此留心信為實心任事之人著永常傳諭嘉獎令其上緊緝拏餘犯將來此案完結應陞用以示鼓勵一併諭令永常速行辦理

頻頻奏聞○又諭曰蔣炳奏到准湖督永常咨拏奸匪馬朝柱一犯此等聚眾為匪之犯雖發自鄰封必當無分彼此立行查辦以靖地方宜密宜速速則當時撲滅少緩則竄匿轉徙久益難圖該省與江廣壤境連屬俱應密為留心其查拏曾否弋獲之處即行奏聞○又諭據河南學政夢麟奏上年十二月內有寧陵縣教諭邢元福庇衿縱賭賄囑營私與撫臣陳宏謀會商叅審陳宏謀以俟司詳到日會叅乃陳宏謀於正月間業經咨叅並未會稿亦無知會等語學政有考覈教官之責如經咨題叅革或先期會稿或事後知會若竟不令與聞則置學政於何地固不慮教官有蔑視學政之心但於體制自不應如此不知陳宏謀當日何以獨行咨叅令其明白回奏至陳宏謀已調撫福建該省土風非豫省可比凡事宜與學政彼此和衷商酌不可稍有參差以致各懷意見可將此傳諭知之

尋奏寧陵教諭一事臣以本年開印日即往懷慶查勘隄工嗣於途次匆匆第據藩司詳咨叅奏未及會同學臣一時疏忽實非有意至聞中士習尤須整飭惟有恪遵諭旨與學臣和衷籌辦得旨汝無別過惟尚氣爭先實所不免以後改之○庚戌

上詣暢春園問

皇太后安○諭軍機大臣等羅田縣奸匪馬朝柱勾眾為匪一案昨據尹繼善奏到隨已傳諭永常今批覽永常四月初三初八兩次奏摺備悉情形且經親赴羅田督辦甚合機宜深屬可嘉想已應時搜捕不致遠颺滋蔓其最先訪聞之知州李斌昨已令該督傳旨嘉獎典史沈學周拏獲馬朝柱母妻子姪亦屬急公但以大逆之犯既顯有抗拒情狀則其家口豈不豫先保護藏匿乃以典史微員何以遂能掩捕一無漏網著將情節查明據實陳奏此等奸匪雖無足論然星星之火可以

燎原正當竭力查辦其知縣馮孫龍希圖粉飾了事此正貽害地方賊良民之甚者俟此案辦理完結必當置之重辟以申國法俟案犯獲齊即降諭旨此時令永常密之不可洩漏使知勇往從事發伏於未行安良保境即當加恩顯擢即使其身為奸匪所戕國家亦必加之優卹延及子孫而保全身命畏蒞避事養奸貽患之人懼禍適足以招禍自不致奸匪潛滋為人心世道之害矣將此諭永常知之○湖廣總督永常奏羅田縣奸民馬朝柱等勾眾為匪經臣撥兵搜緝匪黨即潛居江省英山縣之天馬寨當即兼程親赴交界恐各處居民不免驚擾因揭示徧發羅田蘄州廣濟黃梅等州縣並諭被誘入夥者許首出自新能擒首從要犯從重獎賞嗣據蘄廣羅英各處稟報獲犯已一百餘名單提要犯與馬朝柱之母妻子姪研訊據供尚有頭目張錫玉朱元成吳承雲李永爵即李開化等

在四川峨嵋山西洋寨餘黨散布江南桐城太湖亳州河南汴梁等處查馬朝柱假捏神符勾結匪黨散劉招軍積糧製械種種悖逆罪不容誅幸及早敗露現已多半就獲臣嚴飭所屬分路窮搜務期速竣并咨四川江南河南各督撫嚴密訪拏無使滋蔓即日前赴天掌天馬二寨相度善後之計得旨覽奏甚屬可嘉但正犯尚未就擒卿宜盡心搜捕尹繼善亦奏稱前往汝二人若得會面將兩省交界藏奸之處悉心詳議以杜後患更為周備也又諭曰永常奏到羅田縣奸匪馬朝柱勾眾為逆一案已將該犯家口拏獲且經親赴羅田縣督辦等語江南搜山兵役曾否捕獲匪黨并所稱山寨情狀若何改光宗親至其地必有確見此案發覺由蘄州知州李珣已傳旨嘉獎其羅田縣知縣馮孫龍乃謂馬朝柱等開荒燒炭獲利近居好事之徒捏稱伊等聚眾垂涎爭占冀以此消弭重案免地

方失察之咎。此等奸匪。雖不足道。而星星之火。可以燎原。若不於未發之先。急為查辦。迨其後有所舉動。則貽害地方。良民之受荼毒者。必多矣。州縣中於所屬地方。稽查奸宄。發於未行。保境安良。即當加恩顯擢。其畏蒞避事。粉飾養奸。實足貽害地方。必當置之重典。不可姑容。為上司者。樂聞恬熙無事之言。未有不為所愚惑者。將此傳諭尹繼善。令其督率該地方官。竭力速行辦理。但此時尚宜密之。不可洩漏。○禮部議准。奉差祭告太常寺少卿涂逢震。疏稱陝西蒲城縣唐憲宗陵前碑石。阻塞神路。應量為移置。從之。○蠲緩浙江乾隆十六年分原報續報旱災之海寧富陽。餘杭。臨安。昌化。安吉。烏程。長興。鄞縣。慈谿。奉化。鎮海。象山。定海。蕭山。諸暨。餘姚。上虞。嵊縣。臨海。黃巖。太平。海寧。天台。仙居。金華。蘭谿。東陽。義烏。永康。武義。浦江。湯谿。西安。龍游。江山。常山。開化。建德。淳安。遂安。壽昌。桐廬。分水。

永嘉樂清瑞安平陽麗水縉雲青田松陽遂昌雲和龍泉慶元宣平仁和錢塘海鹽歸安孝豐山陰會稽新昌奉順等六十六州縣玉環一廳杭嘉台三衛湖衢嚴三所大嵩龍頭穿長清泉玉泉杜瀆黃巖長亭仁和鮑郎錢清永嘉雙穗等場額賦有差。○辛亥上御勤政殿聽政。○以順天府府尹羅源漢為大理寺卿。○予故齊齊哈爾副都統赫雅圖祭葬如例。○壬子

上詣暢春園問

皇太后安。○幸靜宜園駐蹕。至甲寅皆如之。○諭軍機大臣等。陳林每所奏緝拏北路兇番。并調兵防範一摺。殊未明晰。此案起釁。根由及兵民被傷情形。雖經該督撫等節次具奏。皆據該守令稟報。尚未查察明確。陳林每既已身履其地。與督撫之遙制者不同。豈有莅任匝月。竟不詳細訪察。其實在情節者。況此係前任馬負書任內之事。伊更無可瞻顧。乃

但稱嚴飭緝拏調兵防範而於上年兇番戕殺實在情節并如何設法緝拏俾無漏網及現在民番是否久經安堵之處並未奏明海疆重鎮於此等處不一留心詳悉陳奏甚非實心任事之道著傳旨申飭并諭哈爾吉善知之○又諭曰碩色等所奏審擬漢奸龍世瑾一案殊未允協龍世瑾以己革書役潛入苗寨架空教唆捏寫頭人等姓名誣告重情計圖陷害安永志藉以索詐銀兩此其播弄生事擾害番民豈尋常隱匿姓名文書告言人罪者所可並論自應立置重典僅擬絞候何足蔽辜且使邊境愚氓罔知炯戒亦非慎重苗疆之道已交刑部俟題本到日從重改擬著傳諭碩色開奏知之○甲寅諭軍機大臣等據永常所奏搜獲羅田縣逆匪情形一摺此等匪徒賦性頑逆原非人類所宜有方今海隅嚮化諒亦不致被其煽惑但不及早擒獲將來妄行劫掠附近良民必多受其

擾害永常此番辦理甚屬妥協可嘉但馬朝柱一犯乃此案渠魁尚未就獲終恐滋事查胡南山供詞內有約往貴州逃生之語而今日尹繼善所奏又稱逃往川省總之伊等同屬逆黨形迹詭秘是否實供殊不可信尤應確加研究務得實在下落一面星飛追捕一面奏聞不可令其免脫再永常奏稱移咨江省將現獲各犯解楚審結等語尹繼善已於四月十八日前往英山著傳諭永常伊二人可即就近會同勘問不必輟轉提解以致疎虞其逆書內所稱張錫玉方珍等犯亦即逐一追究務得其人毋使漏網又偽稿一事雖與此案無涉但恐即係伊等偽撰或亦曾經傳鈔并宜就此推求或因之得其原委亦未可定惟不可草率附會併案了事耳至羅田英山事涉兩省尹繼善摺內朕已明切批示令其和衷商辦矣永常亦不可稍存此疆彼界之意所有天堂天馬等寨地處險隘易於

藏奸應作何設法稽查以杜後患之處伊二人亦即就便定議具奏并將此傳諭尹繼善知之○兩江總督尹繼善奏據湖督永常咨稱奸匪馬朝柱因楚省搜拏潛匿江南英山縣天馬寨當即飭鎮道等員相機勦捕茲據六安州稟稱英山知縣陳步青率同兵役鄉勇直入天馬寨擒獲匪黨數人餘犯由山谷四散潛竄臣已多派弁兵分頭搜緝又以駐劄江寧相離遙遠恐誤事機現親往英山太湖一帶相機調度務使首從要犯剋日掃除得旨甚是是不可存姑息之念此案顯係謀叛當重處毋留餘孽不可以謀叛未行曲為開脫并將此旨咨會永常爾等和衷妥辦期安輯閭閻慰朕懸念可耳○吏部議准直隸總督方觀承疏稱熱河土城子等處巡檢二十缺應以要缺揀選調補其禮賢司磁家務西沽葛沽鄭家口龍華鎮北魏村呂家橋舊縣鎮羊二莊尚碑村洪子店黃莊司西黃村等

巡檢十四缺改歸部選古北口多倫諾爾二缺以要缺註冊東明縣杜勝集附近之朱綱寺等十四處就近撥歸杜勝集巡檢管轄從之○豁除福建福安壽寧三縣乾隆十六年水災額賦有差○以兵部左侍郎觀保為順天武鄉試正考官檢討陳兆崙為副考官○青海扎薩克固山貝子丹巴喀爾哈扎薩克鎮國公旺扎勒故並遣官致祭如例○乙卯上還宮○戶部議准四川總督策楞疏稱大寧榮縣威遠等三縣新添權課增引請於發川餘引內照數給發從之○丙辰上御太和殿視朝文武陞轉各官謝恩○皇十二子永璉生○雲南永順鎮總兵劉問政患病解任調臨元鎮總兵劉應蓮為永順鎮總兵直隸宣化鎮總兵李如柏為雲南臨元鎮總兵以直隸督標副將吳士勝為宣化鎮總兵○丁巳戶部議覆盛京將軍阿蘭泰條奏奉天海運通倉豆石章程一募船裝運應定

限期上年運通豆石至津河凍難行嗣後錦屬州縣請於開印後十日內將應行起運數目註明海口造冊移咨直督以文到日一月內募船出口奉屬於船到日一月內裝運出口並將各日期呈報咨會稽查遲延照漕運例處分無誤量加議敘應如所請至處分議敘之處運通豆石不若漕運繁多無庸辦理一押運官兵盤費請照乾隆十二年運東例官弁每員日給飯食銀一錢兵役每名日給五分陸路同奉日給車腳銀一兩查乾隆十二年東省偏災急於運米接濟是以議給飯食車腳銀今運通豆石歲以為常若照東例未免過多且回奉車腳一項作何分別給與官兵之處應令該將軍再行妥議一海船鹹水浸潤最易發潮請照運東例每豆百石准用席六領秫秸二十束為墊艙之具應如所請事竣報銷一沿途稽查奉屬委員俱係佐雜且係隔省請責成直屬文武官弁一體嚴

查以杜船戶水手攪雜沙土偷竊變賣諸弊亦應如所請令直督轉飭沿途地方官協同奉屬運員嚴查得旨依議行○旌表守正捐軀之直隸鉅鹿縣烈女韓氏○蠲緩直隸永利富國永阜王家岡四場乾隆十六年水災額賦有差○蠲免山西山陰虞鄉二縣乾隆十六年水災額賦有差○戊午

上詣暢春園問

皇太后安○幸圓明園○己未豁除廣東文昌縣乾隆十六年風災額賦○庚申諭軍機大臣等恆文今日奏到天堂寨奸民為匪一案謂解楚人犯不下數百人現在秋審重囚叢集加以叛案監犯恐人心惶惑請特降諭旨除首犯俟審結正法外其脅從煽惑人眾先行發落等語所見甚為劣弱張皇已降旨嚴行申飭著鈔寄尹繼善永常令其觀看但該督等身歷山境已可得要害一切事宜諒已就局即應指授屬員遵照辦理何必久駐荒

山遠近傳聞益滋惶惑。取所有首犯若已就擒，固易辦理。即尚在緝捕，亦可將現獲人犯先行定案。情罪重者，即於彼地正法，不必因待獲首犯懸案久羈也。連日未得奏報，不知辦理若何。兩督曾否面會，或尚有不可即各回省者，著即據實具奏，並將前後所奉諭旨及查辦情形，即速詳悉奏聞。尋尹繼善奏：臣於四月十九日起程赴英霍一帶督率嚴拏，嗣據各員稟報，雖獲多人，而首犯未獲。且即所獲之犯，因各員四出搜查，有未及訊者，有既訊而所供未晰者，抵霍後正在嚴訊，并懸賞偵緝。奉諭令臣就近會同湖督審勘，不必輾轉移解。查江楚獲犯不下數百，英山難容羈禁，且楚省各犯已解省城，未便轉解英羅交界。而湖督永常於未奉諭旨之先，已回武昌，不及面會。隨彼此札商於適中之黃州府城會審。即日由英山前赴和衷商辦，將已獲人犯先行定案，至偽稿一案，悉心推求，尚無

端緒。報聞又批：竟無查出者，想與此案無涉。○又諭曰：恆文所奏天堂寨奸民為匪一案，恐牽連人衆，監犯叢集，請頒諭旨分別先行發落等語。恆文所見殊屬怯懦。張皇此等奸民潛行勾結，直欲謀反，使非早為發覺，其貽害地方何可勝言。封疆大吏遇此等事，當如捕蝗搏虎，不容稍縱。而辦理尤當鎮靜處之，不可稍涉張皇。何致因人衆而恐激成事端，特降諭旨耶。且使奸民謂有司畏其滋事，益將無所忌憚，是更示之以怯耳。其何以警衆。且如恆文所奏古稱脅從罔治者，不過因人衆勢強，不能了事。即造謀為首者，尚有招安之事。今國家全盛之時，么麼小醜，何能當此。且其造謀起於乾隆十五年，恆文身任巡撫，不能覺察。至永常莅楚後，始行發露。現在勇往辦理，恆文當知惶悚，竭力相助，自贖前咎。毘勉鎮靜為是。乃率意妄奏，甚屬不合。著嚴行申飭，其監犯人衆，應留心防範，添撥兵弁

看守乃該撫職所應辦毋得稍有疏懈亦不得過於張皇致駭觀聽○雲南巡撫愛必達奏滇省督撫學政藩臬糧鹽及迤西道各衙署因地處邊隅山高風烈不時修葺工費實繁自乾隆十三年經前督撫議按衙署之大小定修費之多寡督撫衙門每年支銀八百兩藩六百兩臬四百兩糧鹽二道各二百四十兩迤西道及學政各二百兩迤東道向無衙署照迤西道例年給二百兩業經部准列入章程查乾隆十三年未定例以前官經數任事關多年支銷冊案無存請免造冊勅部准銷其已定例後准於公項動給諭軍機大臣等愛必達所奏滇省督撫學政司道每年修理衙署一摺殊非據實辦理之道從來一切衙署小有滲漏不過隨時黏補亦斷無每年必須修葺之理其修葺工費亦必或多或少自當核實動給乃著為成例按年支給此在當時章程未定視公件為餘資隨意開銷

今已定有章程該撫仍請按年動給殊屬未協除在乾隆十三年以前章程未定不無隨意開銷但官經數任事歷多年姑照所請免其造冊報部至已定章程之後者務令據實核查報銷毋庸按年支領庶足以杜冒銷而崇實政已經飭交該部酌議行令遵照辦理將此傳諭愛必達知之○直隸總督方觀承奏永定河金門開迤下引河一道分減汛漲南趨固安之畢家莊分東西二股並以霸州之中亭河為歸宿今查引河上段漸淤而旁通之道溝窪下近接牯牛河并與白溝河相連將來伏秋汛內金門開減淺之水恐其迤西就下闌入牯牛請於引河西連道溝之處橫築攔水壩一道約長四十餘丈高七八尺以遏西趨之路自引河頭起至畢家莊止將河身一律挑深其下東西二引河祇須將東引河首尾及中亭河淤淺處挑挖深通即可暢行查引河經由宛平良鄉涿州固安霸州

新城六州縣凡淤淺應挑濬者例勸民力仰懇於各州縣存倉米內每人日借給米一升秋成免息還倉得旨所挑淤土即以築攔水壩乎抑別有措置乎具圖速奏來此工若不可緩一面辦理不必待奏覆也○是月大學士管江南河道總督高斌兩江總督尹繼善江蘇巡撫莊有恭安徽巡撫張師載等奏前奉諭旨令直隸山東動項興修太行隄工查此隄上自河南下至江南徐州屬之豐沛二縣與山東界聯東省既已興修江省自應並舉臣等委員勘估據稱江南境內太行隄工自山東單縣起至沛縣止其間殘缺甚多隄南舊淺水河一道直達微山湖中多淤淺再黃河北岸遙隄一道自山東單縣起至銅山縣止亦關緊要均應挑濬修整以上各工須於大汛前報竣現檄蘇藩動撥庫項飭地方官分段修築並使上年災民傭工餬口報聞○大學士管江南河道總督高斌兩江總督

尹繼善安徽巡撫張師載等奏會勘上江河道情形及疏濬各事宜查江省宿州靈璧虹縣泗州一帶為豫省下游歸德各縣之水悉由江省濉淮等河達於洪澤湖每當盛漲宣洩不及兩岸田多淹沒臣等親勘節年被災處悉心相度惟有疏濬來源挑通淤塞宣洩去路以為補救勘得宿州之濉河與河南交界處舊有砂礮一段河南來水阻滯經臣高斌題請挑濬現將告竣其砂礮迤東至黃疇橋下即濉河與洪湖交會處口門內外皆有淤淺霸王城上下之范家灘邢家灘三汊口胡家宅等處係濉河正身為諸水下注五湖之路又宿州之彭家溝淤阻大山頭來水入濉之路旁溢為患均應挑濬又泗州之謝家溝在濉河五湖下游由小河灣東南達汴河而入洪湖向經開濬未甚寬深今上游豫省河道疏通水勢較前必盛河湖尾閭亟須大加挑濬又汴河上游即在虹縣境內年久淤

塞亦應挑濬分洩五湖旁溢之水其宿州之符離橋南北大路靈璧之新馬橋上下土壩應添建橋梁改砌碑石砂礮河尾之黃疇橋應改建五孔石橋現分別緩急如黃疇橋迤下濉河及謝家溝等工最為緊要業動江省公項委員分段趨挑至各處橋工猶可緩至秋後得旨如所議行○大學士管江南河道總督高斌奏下江淮揚徐海等屬四月以來天氣晴和又得時雨霪霖二麥秋實愈見堅好大概均得豐收現米價無增民情寧謐得旨欣慰覽之北省今春及入夏雨暘時若二麥可定豐收又皇后已生皇子一切順適吉祥卿其同此喜也○調任福建巡撫陳宏謀奏臣由豫赴閩經過安省之宿州鳳陽臨淮定遠靈璧江寧之滁州六合等處夏麥結實秋禾亦已播種惟宿州靈璧地勢極窪常被水患現疏河道為洩水之計民情甚為喜慰其餘常鎮蘇杭金衢嚴等府二麥俱得豐收

得旨覽奏誠慰又批疏濬河道豫民則喜矣淮民何喜耶○福州將軍新柱奏臣前摺奏臺番焚殺兵民一案奉旨當詳查嚴辦不可諉罪生番亦有旨諭喀爾吉善矣當即會同督臣委員往臺查辦茲據稟稱搜獲內山哆咯咽社及福骨社殺害民兵頭顱但因何事起釁及係何社番行兇尚未明晰伏思熟番散處界內若果逞兇仇殺斷難任其諉罪生番但番性愚戇倘非詳查妥辦亦恐致生事端現一面飭員嚴查一面知會新撫陳宏謀籌酌臣亦不敢以己交撫篆稍有歧視疎忽報聞○湖廣總督永常奏臣自駐羅田督率搜拏天堂天馬二寨匪黨後復從羅田至多雲鎮九子河該處皆係深山峻嶺又東六十里至天堂寨實為羅田與六安英霍往來要徑峯巒險僻履勘匪巢崎嶇凸凹並無可耕蓄衆之地不過憑臨險與人跡不至可以施其虛誕影射之談其搭蓋草蓬盡經燒燬自

天堂山復越層巖東至梭子坪即入英山界之爛柴溝石頭嘴茅草畝再過大四溝至天堂寨與羅田之天堂地隔百里山不相連祇因馬朝柱等分布逆黨於江楚交界巧指天堂天馬大寨名色彼此煽惑如地方官力行保甲互相稽查必早為發覺現議舉行以杜後患先將羅英二界煙戶連環具保如有藏奸十家連坐臣總覽江楚交界形勢羅田多雲鎮險僻易藏奸匪應加汛豫防英山茅草畝等處山勢稍平而路徑分歧亦應防範其兩省設防善後之處會同撫臣及江省督撫酌辦外并根究逃逆務期全獲至會勦官兵現酌撤歸伍得旨正犯尚應設法嚴緝為是至汝此番頗屬勤勇可嘉然早得馬朝柱則盡善矣勉之○河南巡撫蔣炳奏豫省上年陽武河工漫溢成災其黃水經過沙壓之地春麥已經失種急需酌借籽本查陽武封邱延津祥符四縣覈計無力之民未種地畝約

需借銀一萬六千兩請動藩庫平餘銀借給秋後免息歸還得旨允行○山東巡撫鄂容安奏州縣倉庫錢穀攸關自蒞任東省留心體訪各屬庫項多有不清究其原委總以辦差墊用為辭因飭藩司作速覈實報銷不使別有虧挪藉端朦混至常平社倉穀積年糶借未經歸補尚多查借穀一事弊端不一有州縣恐倉糧微變不問民間緩急強為散派者有希圖染指不暇詳察為無業之人領去不能催追者有四鄉離城寫遠百姓領納維艱為胥役冒領本戶尚不知情者有因社穀並無倉廩散交鄉保任其濫用虛報以致虧缺者有因積欠驟難催補恐干處分捏報新借以掩舊欠者誠恐操之過嚴徒有追呼之擾究無完補之益現責成各府查辦暫寬其期以求有濟臣仍不時體察勿使怠玩瞻徇得旨具見實心○又奏東省風俗未醇欲振民風先端士習各屬生監頗多不守卧碑

今隨時曉諭有犯必懲並責成有司教職化導約束而學臣實為提綱挈領之人前奉旨以金德瑛提督學政俟其莅任臣惟有自盡所知協恭共濟得旨山東士習頗不佳蓋其曉文在北省中為最而加以北省剛狠之氣此大應留心而非一日所能頓革亦非僅一學臣之加用汝於山東正為此也勉之○又奏東省自春入夏雨澤頻霑現麥已秀實就各屬所報情形頗稱豐稔查向來州縣報收成分數每多不實意圖粉飾則以少為多如有催徵買補等事欲自留地步又以多為少事關民食須得實情以便通盤籌畫現豫行通飭務令據實開報得旨覽奏俱悉又批此二項尚出於有心明白之州縣大約因循糊塗取結鄉民不察查者居多耳

大清高宗法天隆運至誠先覺體元立極敷文奮武孝慈神聖純皇帝實錄卷之四百十三

大清高宗法天隆運至誠先覺體元立極敷文
奮武孝慈神聖純皇帝實錄卷之四百十四

監修總裁官總纂官李全德文淵閣大學士劉世明領侍衛內大臣稽察欽奉 上諭事件處管理吏部理

藩院事務正黃旗滿洲副都統兼領侍衛內大臣副都統加級等常加二級軍功紀錄及戶部杜經世欽定

講官于天津文華殿大學士劉世明領侍衛內大臣稽察欽奉 上諭事件處管理刑部戶部三庫事務世長阿

都尉軍功九級隨帶加二級又加二級戶部尚書錢謙益滿洲副都統軍功紀錄及戶部等常紀錄

十四次臣德興經筵講官太子少保工部尚書紀保六次臣曹振鏞等奉

敕修

乾隆十七年壬申五月辛酉朔諭軍機大臣

等前據永常奏到天堂寨奸民為匪一案羅
田縣知縣馮孫龍稟稱馬朝柱等均屬勤苦
農民逐加驗看並無可疑形跡等情當經傳
諭永常俟此案辦理完結必當致之重辟以
申國法將來案犯獲齊即降諭旨今據巡撫
恆文奏稱馮孫龍於此案發覺之初並不親
身赴寨確查迨至蘄州稟報該縣往捕又不
到寨查搜致令首犯遠颺等語馮孫龍身為
縣令致匪犯自乾隆十五年盤踞縣境結黨

聚眾不但加覺察乃於已經敗露之時仍
不親身赴寨確查并不親往搜捕玩縱養奸
莫此為甚此等么麼小醜雖無能為而軍器
硝磺逆詞書跡黨羽往來種種情形並非架
空所能捏造國家賞罰必不可不公當嚴明
使畏縮容奸者知勇往認真未必即為賊所
殺而惜命縱惡必不為國法所容者著傳諭
永常即差員將馮孫龍拏至該處宣明此旨
即行正法不必俟接部文今得遷延或致自
盡日內即降諭旨宣布始末交部曉諭其首
犯馬朝柱嚴緝務獲該督永常以軍功議敘
在事員弁及從前失察各員一一查明分別
議敘議處完結此案尋永常奏請停止軍功
議敘得旨不必辭朕之賞罰至公於此可見
又諭蔣炳奏到楚省咨拏匪犯馬朝柱一
案既將商城縣張德遠緝獲到案即當嚴行
根究確訊下落乃據張德遠一面之詞即信
為讐扳從輕了結蔣炳辦理之處殊屬疎縱

馬朝柱等雖不過好孽初萌而悖叛情形逆書軍器證據確鑿幸而及早敗露該督永常辦理迅速是以不動聲色若視為無足措意致使潛滋暗長於山澤之間其貽害地方將不可言非僅止捏造狂言幸災樂禍者可比必當嚴密辦理此等匪犯自知負罪重大豈肯到案即吐實情未據馬朝柱對質何可信為警扳且逆黨甚多張德遠既到山寨安知非入黨有名人犯而遽欲寘之不問耶蔣炳辦理非是著傳諭知之○江西巡撫鄂昌疏報乾隆十五年分寧州分宜萬安泰和樂平安仁星子德安南康安遠等十州縣勸墾荒地及額外新生田塘共二十三頃二十二畝有奇○士戍

上詣暢春園問

皇太后安○諭朕於七月十九日起鑾巡幸木蘭所有應行豫備事宜著交各該處備辦○戶部議准江西巡撫鄂昌疏稱南昌新建萍

鄉清江萬安玉山廣豐南康雩都等九縣墾地一十頃九十七畝零銀米應照例徵解惟新建所墾有礙水道不便升科呈請豁免從之○癸亥

孝誠仁皇后忌辰遣官祭

景陵○諭據湖廣總督永常巡撫恒文摺奏黃州府屬之羅田縣與江南英霍三邑山谷毗連有奸民馬朝柱等藉名開山燒炭住居深嶺假捏神符勾連匪黨製械積糧陰圖不軌該督等密飭文武員弁前往查拏并咨行江省於所屬山境派撥弁兵協同搜捕永常尹繼善俱親往該處督率辦理先後拏獲奸匪家屬及羽黨人等起出軍械硝磺等物永常勇往辦理甚合機宜得封疆大臣之體尹繼善同心協力深屬可嘉方今國家全盛之時海隅日出咸樂享昇平此等匪民潛謀叛逆貽禍良善身任地方之責者一有所聞即應迅速查辦務絕根株庶不致蔓延滋事儻有

畏難姑息之見俾得煽誘鄉愚恣行屯聚即不難用以兵力盡舉而殲旃而閭閻之受其擾累者已不可言矣羅田縣知縣馮孫龍初奉該督撫檄飭查勘意在粉飾了事輒以開山獲利均屬勞苦農民并無可疑形跡等情草率稟覆夫馬朝柱等自乾隆十五年潛住該境結黨聚衆伊既漫無覺察及上司訪聞檄飭竟不親身赴寨確查轉以誑稟掩飾至已經敗露之際又不親往搜捕以致首逆遠颺縱惡養奸莫此為甚朝廷賞罰必在嚴明此等劣員若不立置重辟將來守土之吏亦何以責其捍災禦患而為百姓除害乎且設使更有大於此案者其貽禍尚可問乎馮孫龍著拏交該處即行正法并宣諭守令各官使果能身任其事勇往勦除未必即至為賊戕害縱或身膺賊鋒奉職而死國家酬庸之典必且加之優卹延及子孫而畏葸避事之徒思欲保全軀命終為法所不容凡有地方

之責者均當以此為戒總督永常著交部以軍功議敘總督尹繼善著交部議敘兩省在事文武員弁交各該督查明分別等次報部議敘其從前失察各員均著查明議處馬朝柱等著各該地方嚴緝務獲已獲逆黨人犯除應俟逆首質訊定擬者仍牢固監禁外餘即研訊確實分別情罪重輕按例定擬應正法者即行正法應發落者即予發落完結至該二省毗連山嶺險僻路徑錯雜處所應如何設法查禁防範即著永常尹繼善會商速行定議奏聞事已就緒永常尹繼善亦不必久駐邊縣著回省尋永常尹繼善奏查楚北之羅田縣由天堂寨天馬寨至江南之英霍二縣相隔三百餘里山重嶺峻最易藏奸舊設文武員弁稽查勢難遍及酌議於楚省多雲鎮迤北五里僧塔寺添設千總一員步守兵五十名江省英山之茅草畝添設千總一員步守兵三十名霍山縣迤南百四十里之

包家河亦應添設外委一員步守兵二十名
汎隘既設必須酌增塘汎楚省羅邑東二十
里之大河岸又東六十五里之跨馬墩應各
添一塘又四十五里即僧塔寺汎由僧塔寺
北二十五里至土地嶺與豫省商城接界西
北十五里至甕門關與江省霍山接界東南
五十里至梭子橋與江省英山接界此三處
俱應各設一塘每塘安兵五名於僧塔寺汎
兵內撥給江省英山之爛柴溝西通羅田之
天堂寨逼近天馬寨南通太湖縣界應各設
一塘安兵五名其分地巡防之處各由本省
酌核咨部至巡查之法各塘五日遊巡一次
於適中之地會哨兩汎千總上半年與羅英
霍把總於適中之地會哨下半年同巡檢於
兩省交界會哨三縣知縣每逢季底前赴查
點保甲一次每歲秋冬之交兩省文武大員
各帶兵役會巡春季楚省令武漢黃德道或
黃州府知府安省令鳳廬道或六安州知州

酌帶人役會巡秋季楚省令黃州協副將安
省令六安營參將酌帶兵丁會巡起程回署
均報明兩省督撫提鎮查考至新添塘汎係
零星抽撥之兵五方雖處殊未妥協應就近
將該管黃州協六安營官兵撥往俟別營撥
到即補該協營原額得旨允行 湖北巡撫
晏斯盛遺疏聞并請貤封三代得旨晏斯盛
患病溘逝知道了應得卹典該部察例具奏
所請貤封之處著加恩賞給三代 甲子諭
軍機大臣等據總漕瑚寶奏稱江西省收買
旗丁耗贈等米應豫行咨會以便於漕船到
淮時查核等語此項耗贈米石係給與該旗
丁以為盤剝折耗並沿途日食之需原不許
在次折乾而旗丁中之拮据者將米易銀以
資盤費亦勢所難禁鄂昌因該省米價昂貴
循照陳宏謀所辦舊例官為收買備糶接濟
自是因時調劑在上年歉收之後尚屬可行
但恐竟視為常例則窮丁利於多得銀兩不

復儲備而漕船北上盤剝拋撒以及長途日食或致轉有不敷該地方官或因此而私收本色仍復在次折給以圖省便均未可定可傳諭該撫嗣後如遇應行官為收買年分自可隨時酌辦不必因噎廢食但亦須定以限制毋任旗丁儘數多賣以致中途匱乏則濟軍惠民兩有裨益至地方官折收折給之事亦不可不加意稽察勿令滋弊可耳其應如何咨會漕督以便查核之處並令該撫酌量

辦理 戶部議覆雲南巡撫愛必達奏稱滇省歲需官兵俸餉銀九十萬餘兩除支本省地丁商稅外尚少二三十萬而存貯銀不過五十萬餘每俟他省撥協查本省產銅旺盛積年所存供京省鼓鑄外尚有一千八百萬觔鉛錫亦皆土產現湯丹大水碌碌等廠地一屆開課之期錢價頓貴廠民受虧請於附近各廠之東川府除舊鑪二十座外添設五十座每年需工本銀十萬六千八百兩零

共鑄出本息錢二十二萬四千餘串除去物料工食之費餘錢搭放銅鉛價腳等用每銀一兩照兵餉例給錢一千二百文除還工本外每年可獲息銀四萬三千餘兩所需工本於積存銅錫銀內借動約二年半歸還嗣後以息作本應如所請增鑄錢文搭放易銀以資備貯從之 禮部議覆四川學政葛峻起奏請增眉州彭水青神三州縣學額酌加眉州文武童各三名彭青文武童各二名其廩增額數各量加三名眉州十七彭青兩縣各十一俟歲科兩試後准以新加之額頂補並照各學之例一體輪貢從之 乙丑諭軍機大臣等喀爾吉善新柱奏到辦理福鼎霞浦二縣奸民扒搶強買等案首惡之陳士樂業經杖斃其餘案犯分別杖徒枷責發落等語此等刁悍不法之徒藉端肇釁號召鄉愚逞強肆橫漸至聞風效尤良民被其擾累最為地方之害況閩省民俗囂競瀕海雜棚易於

煽惑其敢於勒借強買者類出於強有力之輩並不為覓食求生起見非嚴懲無以儆衆應摘其案大而情重者永遠枷號示衆俟二三年後酌量加恩寬宥庶受刑者知所悔而旁觀者知所懼正所謂報虐以威不可稍存姑息之見也將此諭喀爾吉善等知之 琉球國中山王尚敬遣使臣阮為標表進方物賞賚筵宴如例 丙寅

上詣暢春園問

皇太后安○還宮 諭曰廣東提督林君陞山西按察使唐綏祖各奏請將本身及妻室應得封典貤贈高祖父母殊屬不合夫臣子封贈之典以三代為限此即古者大夫三廟之義其貤封之例蓋專為二三品官不能封贈其曾祖父母四品以下不能封贈其祖父母推廣錫類之恩以曲成其報本之意也若已得三代封典而又請貤贈高祖父母是四代矣綸綍之錫上及三世臣子之分已為極榮

更等而上之抑將何所限制乎向來文武一品大臣從無以此陳請者誠知定分之不可踰也林君陞本係武臣不知國體率意陳奏尚無足責唐綏祖久歷中外曾任封疆何亦昧昧若是本應交部以違例議處但念其希恩之請雖則非分而追遠之念尚屬可原著傳旨申飭 丁卯諭軍機大臣等據雅爾哈善覆奏蕭山會稽一帶河道因輓運賑糶米石必由此經行若逐段築壩撈濬有需時日且此時水甚充足應俟今歲晚禾收穫之後河水消減再為興工等語山會一帶河道狹窄上年因該督撫奏稱天旱水淺舟楫難行以致商船不通米糧昂貴是以降旨令該督撫等相度估計若乘時開通深廣則商販通行糧價可冀平減且以工代賑貧民得資餬口自屬因時籌辦之道今該處河道水既充足可知上年水淺實由旱乾非關淤塞即運河尚不免膠澀何況支港乎現在官商米石

悉由此經行既不便於熬壩興工有礙輓運而麥收豐稔米糧平減亦無需以工代賑所有山會河道疏濬之處著傳諭雅爾哈善竟可無庸估計至該省各屬工程應否興修者仍照常辦可也 兩江總督尹繼善奏前奏拏獲奸民馬朝柱夥黨一摺奉諭令速行嚴密搜拏其楚省咨拏人犯曾否俱各就獲詳悉具奏現據各員稟報楚省咨拏及本省自行捕獲者已百有餘人餘犯再行嚴緝并據壽春鎮咨稱所獲馬朝柱之兄馬朝士供欲逃往四川等情因於九江關總要之處并沿江一路訪緝得旨覽奏俱悉竭力搜捕正犯毋致免脫也 是日起

上以夏至祭

地於

方澤齋戒三日 戊辰湖廣總督永常湖北巡撫恆文奏根訊馬朝柱匪黨胡南山及所供與霍山縣僧正修平日往來得旨應竭力緝

拏不然又成一李開花矣 已已

上詣

北郊齋宮齋宿 諭軍機大臣等永常奏到拏獲逆犯王朝瑞供出偽詔偽檄及逆首馬朝柱序表各逆詞狂悖惡逆得罪

祖宗我大清百餘年深仁厚澤不意尚有此等覆載不容之梟獍虺蜮懷耽潛毒一至於此審鞠之時當令備極嚴刑存其命取供足矣若不過照例夾訊不足盡之即寸磔亦未蔽其辜也首惡之馬朝柱必當嚴緝早令弋獲寘之極典以伸國法供內馬朝柱薙去鬚髮髻面毀齒一節殊不足信馬朝柱聞拏即已遠颺該犯何由聽聞此信當由本相易於蹤跡故謬其詞以惑亂查拏者之觀聽不可據以為實所稱西洋當即前供四川峨嵋山之西洋寨而非海外國土已傳諭策楞令其迅速查拏矣再細閱逆詞其文氣心思頗與偽稿文法相類雲南發覺即謂從漢口傳鈔地

亦相近或即羣逆所為竟未可定宜加意嚴訊此等匪逆別具肺腸總非常情所能料及將此諭永常知之 又諭曰湖廣羅田縣匪犯馬朝柱等勾黨謀逆一案竟有偽詔偽檄種種逆詞狂悖惡逆覆載不容其供詞中有四川峨嵋山西洋寨之語已據湖督永常奏稱飛咨川省現在首犯馬朝柱尚未弋獲著傳諭策楞或即逃匿川省亦未可知令其悉心嚴緝並將峨嵋山是否有西洋寨有無匪黨竄匿藏伏悉心查訪無令漏網并將如何設法嚴查之處即由驛限六百里速行奏聞尋奏據湖廣督臣永常密咨查拏西洋寨張錫玉等犯隨飭道員躡訪據稟訪之老民按之圖志並無西洋寨之名凡與峨嵋山連界之樂山洪雅清溪等縣并峨嵋縣屬之山村廟宇逐一挨查並無蹤影至通緝馬朝柱現飭文武各官派親信之人到處偵訪不得以一查出結了事自干重譴又夔州府屬之巫

山縣係川楚接壤水陸總隘於此嚴查則未來者不能飛越已至者亦難遁跡因責成該管總兵道員查緝期無漏網報聞 庚午夏至祭地於方澤上親詣行禮 詣暢春園問皇太后安 幸圓明園 辛未諭軍機大臣等據總督方觀承奏到各屬蝻子萌生一摺已批令竭力督緝毋留餘孽今據侍郎兼府尹胡寶琛奏稱親赴武清所屬村鎮見新蝗翅牙已茁其地甚廣有寬至數十百畝者草叢中攢簇跳躍在在皆然順屬已報有四五州縣惟武邑最多最盛今撲滅已七八分所餘零星可以漸盡等語觀此則蝗蝻萌動其勢頗熾若於初萌之時即上緊撲打何至長翅生牙可見初報生發已屬長成雖稱打撲仍未淨盡從來外官以文移稟報為辦事上司

則稱立定章程懸示賞格下屬則稱實力奉行加緊撲滅按之實際殊不其然蝗蝻貽害田畝最烈所爭祇在旦夕之間尤非可以虛文從事此等奉行不力之員必當重加處分以示懲儆胡寶瑤原摺著鈔寄方觀承閱看所有奉行不力各州縣著即速查叅議處方觀承胡寶瑤俱著傳旨申飭又諭前據直隸總督方觀承奏各屬蝗蝻萌生內鹽山慶雲滄州與東省接壤業經東省咨會并飭各該地方員弁無分疆界一體加緊捕除等語現在順天近屬該府尹親往查看尚在攢簇跳躍勢甚廣闊據此則捕蝗之事不可不親臨查看非可專委之地方官以稟報了事而已前於奏摺內已批實應留心但觀直屬如此則東省連接之區所稱隨時撲滅者恐尚未盡實近日由東省經過之員亦曾有以此為奏者此旨到日著鄂容安即速親往查明督率地方員弁上緊撲滅務令淨盡毋俾遺

種萌動壬申諭軍機大臣等臺灣彰化縣兇番戕殺兵民一案前因提督李有用奏到曾經傳諭該御史令其究訪確實明晰奏聞今據給事中立柱御史錢琦所奏情詞尚屬糊塗不過據地方稟報苟且了事御史為朝廷耳目之官平日於各省案件及地方官辦理不能妥協之處苟有訪聞俱當據實陳奏況立柱錢琦身任該處巡察親履其地職司其官於當日之情節起釁之來由文武稟報孰虛孰實何難確查乃為此扶同徇隱之辭朝廷之差委者何意伊等之職守者安在耶況此案在上年十二月該御史等遲至數月始行具奏又不據實甚屬不合著傳旨申飭仍著訪查確切詳悉奏聞若與地方有司通同諱飾必將該御史等從重治罪安西提督李繩武奏準夷交易一事據駐哈鎮臣呂瀚咨稱夷目額連瑚里等所報牲畜貨物較十三年肅州貿易之數少有浮多自當以定

例責拒但其遠道來至哈密牲畜不無乏弱如不准在哈密變售又非憫恤外夷之意應俟該夷到日如果苦苦哀求飭鎮臣察其情實再為咨報酌辦斷不敢曲為遷就致啟無厭之心亦不敢過為抑勒有失柔遠之道得旨另有旨諭又批彼何嘗有苦苦哀求之事不過爾等綠旗習氣恐致生事多方將就而又為此美談以上奏耳被外夷竊笑者不知其凡幾矣諭軍機大臣等此次準噶爾夷目額連瑚里等所報貿易之牲畜貨物合算較十三年之數不無浮多再每次夷人到哈密必有擦掌之弱牲畜求售應俟該夷到哈密後查明確數以理責問如果恭順懇求再行照例辦理等語此番交易係初次定例必當示之以信不可稍有遷就在該夷貪狡無厭不過得尺進尺得寸進寸向來承辦員弁惟恐生事一味委曲周旋將就了事如何哀求如何苦訴究其實何嘗有是徒粉飾以美觀

聽耳朝廷體制尊嚴邊疆奏事有不能盡實而外藩小國其上下之情轉相聯貫交易一事未必不早為窺破一次踰例後次又復加增厚利所在彼何樂而不為也今該夷內亂之餘又與哈薩克構釁其交易較前所增有限已可得其情形此正辦理機會總當悉遵前旨定數內者許其截長補短通融折算逾數者雖少亦概駁回至奏報來信言語情形務須一一據實儻稍有粉飾將來查出惟該提督是問將此傳諭黃廷桂李繩武知之○又諭曰李繩武所奏看來竟似毫無主見而姑為游移兩可之詞以俟朕之批示如所稱該夷等似覺失望又不敢違背章程其詞色深為作難是以止求轉奏等語又將夷人伴送北山暫住牧放是已明示以據情實奏矣貿易一事既經定有章程自當永遠遵行若因其恭順畏懼而曲為遷就將來勢必逐漸加增何所底止至疲弱馬駝如果

實在難行。自可留哈密牧放。從前准其變售原屬辦理錯誤。今既立定限制。何得尚復因循故轍。視為常例乎。李繩武具摺奏請。夷人必無不知之理。茲反不必游移遷就。致令夷人窺笑其底裏也。著即將入奏奉旨之處。明白宣諭。以哈密貿易原屬非例。今既新定規條。當即按照十三年肅州貿易之例。永遠遵守。其疲乏牲畜。不妨在哈密留人牧放。回巢日攜回。此事必須如此辦理。方可以杜無厭之請。在李繩武本非辦事果斷之才。但身為提督。於此等重務。一味周章觀望。將何以承受恩典。著嚴行申飭。卹巡洋漂沒之廣東海安營兵丁如例。○癸酉

上詣暢春園問

皇太后安。○遣官祭

關帝廟。○諭軍機大臣等。直隸總督方觀承具題審擬邢臺縣劣監王方平等聚眾抗官塞署一案。此等匪人目無法紀。聚眾抗官。最

為風俗人心之害。王方平審係首惡。自應照例一面將該犯押赴邢臺先行正法。一面具題俾頑梗之徒知國法嚴明。有逞兇者必立寘重典。庶足挽回頹俗。乃該督仍循例具題欲俟法司議覆再行辦理。殊屬周章顧慮。且車志遠身為貢生。罔知禮法。當王方平起初糾人借糧時。不行喝阻。乃復代寫傳單。為之煽誘鄉愚。迫脅官長。自應按律治罪。豈得以年逾七旬一例收贖。夫收贖之條。乃謂青災肆赦出於失誤。尚可無庸的決。耳若恃老而有心干犯。其情罪更為可惡。不當拘以常制。倘該犯情罪更有重於代寫傳單者。亦將謂其年老而不申國法乎。至王方平所犯實為亂民之首。其家貲饒裕。不應任其留貽享用。當按數查出為修葺學宮及該縣地方充公之用。庶為允協。看來方觀承近來辦理諸務。不似從前實力勇往。頗有和同邀譽之意。即如蝗蝻一事。並不飭屬早行搜捕。淨盡意在

朦朧了事此案辦理更為姑息方觀承非他人可比著傳旨申飭令知實心改悔方是倘仍循故習何以受朕恩典乎此本已交該部改辦王方平著即行解赴刑臺正法不必遲待其餘犯仍俟部文發落一併傳諭知之

又諭曰天堂寨奸民為匪一案據永常尹繼善各奏到於適中之黃州府會審和衷商辦此案馬朝柱實為渠魁今江楚兩省所獲逆匪不下數百人而首犯馬朝柱尚在脫逃已

於摺內批示必當嚴行查拏不可令其遠颺各犯所取供詞尚多疎漏即如胡南山供出馬朝柱與僧正修相好正修到案亦有馬朝柱於二十日到菴宿過一夜之供至其次日去向何處並未追詰既於初六日逃散至二十日已經半月仍復到菴其未能遠遁可知正可由正修根究馬朝柱藏匿蹤跡而竟未訊及至難去鬚子及道袍等供或轉係惑亂觀聽之詞亦未可定且有刊刻之龍邊偽詰

其刻自何人刷印必非此一紙散布必非此一處俱當逐一研究此案固發自楚省而南省從逆實繁永常身入山寨遍行搜捕甚屬勇往至鞠訊取供研究蹤跡則尹繼善久歷封疆自當更為熟練亦義無可辭豈有於喪心背逆之匪犯尚存姑息邀名之見者倘有疎漏必於尹繼善是問此案叛逆顯然幸而早散該督等斷不可存從寬了事之念不可照尋常聚眾之例但將一二人為首者正法須視其情重者多行誅戮數人庶奸民知所畏懼所全於後者多矣除應凌遲犯內或有與馬朝柱應行質對者暫行牢固監禁其餘應決正法即應於訊明之日用王命旗牌將該犯等即行正法不必久繫囹圄將此傳諭尹繼善永常知之又諭喀爾吉善等摺奏查辦臺灣彰化縣兇番戕殺兵民一案稱該道府等膠執成見不便仍令辦理已遴委糧驛道沱穆齊圖速往會同巡察臺鎮嚴查妥

辦等語喀爾吉善等所辦未合機宜臺灣現
有道員既已膠執成見挖穆齊圖雖經該督
派委專辦此事亦同一道員耳及至彼地若
與該道會商則仍不能究出實在根由相機
妥辦若自行查辦各懷意見必致齟齬於諸
事更多掣肘其該道金溶於臺灣郡地方既
不相宜該督應奏明掣回另補如其膠執成
見辦理舛謬則應查叅議處即將挖穆齊圖
調補臺灣道缺俾其身任地方事權畫一庶
得嚴查妥協方為允協至諸羅縣查拏白旗
草簿一節或係奸民挾讐傾陷或另有別情
一并交與挖穆齊圖密查究訪毋枉毋縱以
靖海疆可也 禮部議覆江蘇學政雷鉉奏
請定考試經解之期酌議於學政按臨之前
飭提調官將正試生童卷同願試經解卷一
併先期投納呈送學政學政印考經解卷坐
號即將該生童正試卷一樣印定臨點唱經
解卷給發留正試卷於內即可查照取錄從

之○甲戌兵部侍郎兼管順天府府尹胡寶
瑑奏直屬捕蝻不力不能豫為查察奉旨申
飭咎實難辭至各州縣之虛實勤惰形跡昭
然斷難容隱應俟總督方觀承查叅議處得
旨此事因汝奏而申飭方觀承恐汝二人此
後或致不和故并汝申飭至汝尚為任勞無
過也勉之○乙亥諭軍機大臣等湖廣羅田
縣奸民馬朝柱於江南英山霍山連界之天
堂寨聚眾為匪一案已據湖廣總督永常親
往搜捕黨羽就擒居民寧謐惟首犯馬朝柱
尚在脫逃江楚兩省督撫俱經密咨鄰壤通
行緝捕向來要犯一入通緝地方官率以虛
文了事並不實力查拏懸案任其久稽惟於
歲終出具境內並無該犯蹤跡印結而已此
案非尋常可比馬朝柱乃係為首倡逆聚眾
謀叛要犯幸而及早敗露未致騷動地方假
使稍遲雖萬無能為而煽惑益眾無知愚民
受其陷害附近村眾罹其荼毒將不可言矣

知今年何以不致誤課抑高恒原係過甚之詞耶否則近日各商應益難辦理矣此處皆朕所以用吉慶代高恒之本意亦曾屢次面諭而伊均未奏及看來吉慶自調任天津頗不如在兩淮時之勇往任事伊係內府世僕隨地皆可出力報効若稍存意見甚屬卑鄙非所以承受朕恩也可傳諭吉慶知之嗣後諸事務宜留心經理並將長蘆近日實在情形逐一詳悉奏聞尋奏蒙恩調任以來見長

蘆鹽法廢弛商力窮困竈戶艱難無日不以整飭為念如課運以場竈為本現緊督曬煎毋誤商運秤則照部頒更置緝私為疏引要務嚴定賞罰鼓勵兵丁大夥梟販法有必懲情罪輕者酌定章程俾有司得所遵守至商力既乏凡可節省雖絲粟之微亦必嚴禁其長蘆歲課五十餘萬現設法督勸尚未全完大約本年奏限可以無誤嗣應作何調劑已飭運司查案籌奏得旨恐汝仍屬口是而心

非有則改之無則加勉以觀後效○直隸總督方觀承奏四月底東光武清等二十九州縣蝻孽情形業經奏聞外自五月初旬以來續報者又有通州固安新城安肅望都博野清豐成安衡水等九州縣或現在撲捕或撲盡復生查武清縣知縣沈守敬當蝻子初生時既不早報以致長生翅牙又不緊撲淨盡實屬奉行不力昏憤無能現與府尹胡寶瑑會叅示儆外並加意察查不稍徇庇得旨似

此必俟朕訓而後查叅則總督所司何事究之怨歸於朕而感則在督撫然督撫用此計而得益者正不多見也慎之戒之在汝不當出此又諭軍機大臣等順天等處捕蝗一事前經申飭方觀承胡寶瑑等今據方觀承奏稱武清縣知縣沈守敬奉行不力昏憤無能等語意欲以沈守敬一人塞責仍不免存心姑息方觀承近來此等處頗不如前已於摺內批示仍著傳旨申飭○諭曰胡寶瑑親赴

武清等處捕蝻本無可申飭因降旨申飭方觀承恐該督以相形致隙是以一併寫入已於摺內批示但今所奏州縣勤惰應俟該督查明參奏則所見未是直隸州縣不在順天屬者應聽該督查參至順天所轄州縣則府尹自應會參且該府尹現已身歷其境所見尤為親切不當專聽之督臣也捕撲所至不無踐躪於麥收將無少損乎麥秋據稱豐稔其所入足補所損否乎即行據實奏聞尋奏查生蝻多係廠甸不耕之土其出麥田者捕法以帚微闢驅埋壕內俱嚴飭不許傷稼間有一二圍搜多處僅折少許不可以分數計若論豐收所入何啻數倍現因文安霸州永清固安等處又報萌動尚須數日竣事回京得旨不必以回京為急勉力查捕務以淨盡為要今命方觀承往大名一帶查勘天河一帶雖非汝所屬然汝為侍郎今特旨命汝兼督汝其勉之○又諭據順天等處捕蝗一事

前經傳旨申飭方觀承胡寶瑤等今據方觀承奏稱武清縣知縣沈守敬奉行不力昏憤無能等語意欲以沈守敬一人塞責仍不免存心姑息方觀承近來此等處頗不如前已於摺內批示仍著傳旨申飭蝗蟲本屬濕生化生之類濱河沮洳最易萌生再直屬大名等處上年曾遭黃河泛漲該督前奏內有大名東明南樂長垣等處蝻子當下搜捕等語該處離京離省俱屬遼遠該督尤當加意嚴查不可疎忽所有各屬捕蝗情形著即速查明詳悉具奏○又諭近據直隸總督方觀承奏到各屬蝗蝻萌動現經胡寶瑤親赴武清等處撲捕而與山東連界之鹽慶等處均有蝻子大抵蝗蝻本屬濕生化生之物水濱沮洳魚鰕微卵入土即皆變蝗上年豫省黃河泛溢瀕河州縣均被漫漫深恐水族遺卵變蝗且毗近豫省之東明長垣等處俱稱有蝻而豫省並未奏及著傳詢蔣炳曾否切實詳

查伊前在順天府尹內曾令親赴所屬撲捕是所身歷者如州縣有心諱飾而蔣炳但據詳報草率了事將來或致有損田禾別經查出惟蔣炳是問尋奏臣抵豫後接見屬員即囑留心稽察一有蝗蝻生發及早撲除勿因循諱飾致干叅處四月中據衛輝屬之汲縣彰德屬之濬滑內黃等縣報蝻子萌生隨飭員弁即時撲滅茲於本月據內黃具報有蝗蝻生發伏思彰衛貼近直屬時方盛夏餘孽易萌即星馳直豫交界處不分疆域親自督捕并查從前生蝻各縣果否撲除淨盡如草率了事即行嚴叅得旨大凡離京遠一分之省即多一分粉飾但汝不應出此其有捕蝗不力之州縣必應叅處不可姑息取名何不忍於一二無能為之劣員而忍於數千萬之百姓耶○丁丑

上御勤政殿聽政○諭軍機大臣等江南江西兩省辦理傳鈔偽稿各案已追出報房章錦

等犯似為近可根尋前據該督奏稱顧章周偽稿供係周麻子從凌祖耀處攜來轉給章錦及訊周麻子等俱矢口不承現飭詳悉審究等語當經傳諭該督以周麻子既不承認則顧章周所傳偽稿究係得自何人從此嚴加質訊自可得其來歷今經匝月並未奏到在該督因查辦羅田逆匪一案或不暇兼顧及此而該道周承勅係派出專辦偽稿之員且人犯現在江省自應詳細根求迅速稟明

該督覆奏試思此案既經如此辦理豈可竟置高閣耶著傳旨尹繼善速飭該道上緊研究務得首逆以彰憲典不可因日久怠玩終無歸著其現在查辦曾否得有端緒即速據實奏聞尋奏據江寧驛鹽道周承勅等先在江西逐層究出郭庚為管大任張三施奕度彭祖立袁尚志章錦顧章周周麻子朱老三等犯逐一研訊不惟周麻子朱老三堅稱誣扳即顧章周章錦袁尚志彭祖立俱稱前係

畏刑妄認請將施奕度等解至江寧對質現已飛檄江西臬司丁廷讓將施奕度等解來江省臣即日回任先提現在江省各犯嚴鞫解到後再行對質或施奕度另有來由或顧章周等茹刑狡展務於此數人中追出下落至周承勅丁廷讓等審理歧誤處俟審明後叅奏得旨覽看來此案已近當竭力為之又批今且不必問其歧誤當鼓舞屬員以得真犯為要事未明而叅處問官將來更難了局

矣○又諭江楚兩省查辦羅田縣逆匪一案據永常奏稱准江督咨開六安州知州金宏勳訊據夥犯甯以能供稱送馬朝柱到南岳半山廟道士宗會處躲過半個月再往別處等語前尹繼善雖奏稱分路追拏究竟下落何在其道士宗會曾否拏到馬朝柱為此案渠魁必當捕獲而掩捕必當迅速稍遲終致遠颺不可不勉力嚴緝再甯以能又供馬朝柱要找吳方曙救他如今吳方曙往湖廣省

城小南門岳宗儒飯店去了等語吳方曙係夥犯中最要之犯得吳方曙即可知馬朝柱去向而吳方曙亦在逃未獲可傳諭尹繼善永常再行研究甯以能其所稱小南門或係俗稱究竟何處務得確供飛行追捕計此時尹繼善永常自己到黃州府即令會同根究勿任狡供支飾以致要犯免脫尋尹繼善永常奏委員往南岳廟搜查並無馬朝柱蹤跡亦無道士宗會其人及覆訊甯以能又稱前畏刑誣扳至查緝吳方曙一犯而湖廣省城亦並無小南門及岳宗儒名姓再據匪黨供馬朝柱並不識字其偽檄等出自胡濟修而刊刻則係已故之孫林萬臣等抵黃後逐日鞫訊究其原委皆僧正修設謀於始胡濟修助惡於繼實為此案最重之犯俟研訊明確導旨即行正法得旨覽奏俱悉要犯尚未就獲須實力督緝以右庶子程巖為順天府府尹仍留廣東學政戊寅

上詣暢春園問

皇太后安 諭前因治大雄參奏伊子治繼鈞
向雲南客民白姓借銀又向回民馬穎輾轉
借貸即令革去藍翎侍衛交該督撫審明且
傳諭該督撫以此奏必別有隱情治大雄見
事不可掩先行參奏以為取巧之術今據碩
色愛必達查明所借果係吳尚賢之子吳世
榮銀兩其為巧詐顯然矣治大雄辦理營伍
尚屬可觀是以擢任提督但其為人習尚浮
華操守不飭前經總兵張凌霞奏其嫁女宴
會等事款蹟累累俱經質詢得實今查明參
奏伊子之處又復巧詐營私居心卑鄙提督
重任為全省武弁表率豈宜居此姑念其著
有勞績熟諳營伍著革職以哈密總兵効力
行走速行赴任如不奮勉定行重治其罪雲
南提督員缺著呂瀚補授俟治大雄到哈密
後再赴雲南之任所有現在雲南提督印務
著王無黨暫行署理 又諭李繩武奏到巡

查哈密情形一摺所謂知其一不知其二防
邊飭備固屬保境之常經但應於平時整飭
日今正值貿易夷人到哈彼惟利是圖此時
斷不敢冒險無可防範况從前夷商來哈從
未見提臣親臨其地今面見李繩武已不免
驚疑又聞築牆添柵防範加嚴彼不以為巡
邊常事必且多方猜疑况提臣甫回督臣又
往不審天朝意欲何為回巢傳播易致生心
或更繕兵設警啟彼此相疑之端甚非所以
安夷心而靖邊圉也著速行傳諭李繩武所
籌辦築牆添柵等事此時竟可不必辦理如
必須添設亦俟交易事竣夷商回巢後緩圖
之但恐既向沿邊營弁區畫安排又復傳令
中止並此意亦為夷使所窺也益復不能釋
然須行所無事使彼不覺方為妥協向來綠
旗習氣必不能據實此事殊有關係不可稍
有粉飾可將現在情形詳悉奏聞黃廷桂已
另有旨諭並諭李繩武知之尋李繩武奏臣

因今歲準夷貿易一事。新定章程。恐在哈防員。辦理不實。是以從上莫艾回至哈密。就近查辦。至築牆安柵。前提臣永常。於舊歲巡查哈密各卡。即有應行修添者。今於夷人未至之先。已令速修告竣。其塔獸溝應修木柵。塔爾納沁應補城牆。本擬與督臣酌定後辦。並未興修。報聞。黃廷桂奏邊營形勢。臣未經親歷。故於三月杪。奏明由甘涼肅直抵安西。遵例巡查。嗣於途次。始悟貿易夷商。必自哈赴肅。若與臣遇。恐致驚疑。是以甘涼肅三處。不過委查馬駝。檢點軍械。一宿即行。俟安西歸途。再閱兵丁技藝。及抵安時。夷商尚在境外。甚遠。隨於閱兵竣事後。擬即回肅。緣提臣李繩武云。夷人多帶牲畜。應否在哈變售。候諭旨到日酌辦。然後起程。至哈密各處卡座。經累任提臣佈置。按圖查考。亦已周密。其添防事宜。本不便急遽辦理。得旨覽奏俱悉。○直隸總督方觀承覆奏。直屬先後詳報生蝻者。

四十三州縣。今已報撲淨者。通州武清香河。寶坻固安東安安肅新城博野望都蠡縣阜城交河寧津景州東光靜海南皮慶雲成安。衡水等二十一州縣。現將捕竣者。永清祁州。獻縣深州清苑等五州縣。撲盡續生者。霸州寧河吳橋天津鹽場滄州青縣鹽山定州元城大名南樂魏縣清豐東明開州長垣等十六州縣。甫經生發。現正撲捕者。雄縣一縣。至大名一府八州縣。俱報生蝻。撲後復萌。實因上年黃水漫及之故。該處地方遼闊。誠如諭旨。離京離省遙遠。查察難周。所委道府丞倅。恐有顧此失彼之慮。已於臣標並正定鎮標。多派員弁。分頭協辦。報聞。○兩江總督尹繼善奏。羅田首犯馬朝柱。尚未緝獲。請敕部停止議敘。得旨不必謬辭。至此番奮勉。固可嘉然。未必非因永常而然也。○己卯諭軍機大臣等。阿里衮奏請於旗員內。揀選副將。叅將。遊擊。十餘員。來粵。遇有陸路相當缺出。題補。

一摺此所見非是朕從前降旨沿邊及直隸地方營協參用八旗滿洲人員原因邊方畿輔營缺既屬緊要而滿員人材健銳習於勞苦人地正復相宜是以飭部議令分缺補用此亦因地制宜隨材器使之道初非於滿洲綠旗稍有歧視也地方營伍固不可不加意整頓亦祇可就其人才而鼓勵之不可先存成見今以滿洲總督特請揀發旗員未免隳綠營之志氣謂有意厚薄其間於營伍豈能實有裨益况東南風土軟弱旗員久居其地亦必耽於安逸不得展其所長更非所以愛之也若為旗員生計起見則所見更小外任雖有馬乾隨糧足資養贍而體制相臨不能不過於卑屈試思藍翎侍衛雖於領侍衛內大臣品級懸殊亦從不以屈膝為敬一用參遊則曲跪乃為常禮若誘以厚實動其歆羨之心使甘於卑辱於滿洲風氣亦大有關係該督皆未見及此徒謂滿洲爽健敏捷情性

相投易供驅策而不知其斷不可行朕辦理庶政一秉大公至正總督為文武表率不可存此意見著傳旨申飭○庚辰諭軍機大臣等前據胡寶琮奏稱二十前後可以回京今尚未見來京想捕蝻事尚未竣如果尚須加緊捕撲不妨多留數日俟完竣妥協永無後患更佳其現在情景若何是否漸次稍減或較前稍減不別有萌生之處速行據實馳奏尋奏蝗蝻生發惟當極力驅除鄉民無知雖懸賞不肯即報推求其故恐派夫蹂躪徒事煩擾惟信劉猛將軍之神祈禳可免愚說實不足憑前奏由武清回京及抵永清而蝗頗熾霸州文安又復踵報隨委員督辦永清親赴霸州文安查看已將祛淨再回永清而霸昌道魯成龍極力圍撲并以錢買之鄉民趨利每買一次即得三四斛現已去其八九其竄入高粱豆根者照方觀承曉示踐傷田穀每畝給米一石現順屬十一州縣淨盡者六

處其寧河霸州文安永清固安亦將竣事擬於一二日回京得旨所見甚正然民情亦當順之彼祀神固不害我之捕蝗也若不盡力捕蝗而惟恃祀神則不可耳○又諭前因直隸各屬捕蝗不力諭令方觀承查明叅處方觀承祇就胡寶琮查出之武清縣知縣沈守敬題叅意在以此一人塞責而其餘州縣中不力者即可概置不問殊非據實查辦之道是以傳旨申飭今方觀承又奏稱沈守敬漏報三處近復漏報一處允宜立掛彈章等語此則誤之又誤矣朕初次傳諭本謂通查捕蝗不力之州縣而非查漏報之州縣今方觀承覆奏乃以漏報惟該叅員一人陳辯是因回護以一人塞責之非而不自覺其詞之遁也朕前旨何嘗令查漏報耶且該督初報摺中合屬有蝻州縣共三十餘處至今尚有現在撲捕者有撲後復生者非奉行不力而何該督從前尚能不憚馳驅况捕蝗實可勝以

人如大名等處上年黃水經過之地理應親歷巡查分別叅處顧以空言輾轉迴護此等取巧之術能行之朕前乎方觀承著傳旨申飭今年幸荷

上天慈祐雨暘時若倘因蝗蝻稍致侵損豈不深為可惜旨到日著方觀承即速親往大名東明一路查勘有無餘蝻督率屬員實力撲滅據實馳奏其近京一帶仍會同胡寶琮將不行實力之州縣分別查叅若再姑息取巧咎有攸歸○以甘肅金塔寺營副將永柱為江南狼山鎮總兵○辛巳諭前據總督方觀承奏稱直隸各屬間有蝗蝻生發之處現在嚴飭州縣官撲捕等語捕蝗專事人力不可稍有怠緩今歲雨暘時若二麥告登秋穀正當長發設令捕蝻不力以致蔓延滋害是急人事而不克仰承

天庥也念之殊為悚惕大名一路上年黃水所經關係尤為緊要已諭方觀承親往督率員

弁盡力撲除其天津河間瀕海各縣蝗蝻亦易滋生該督不能兼顧侍郎胡寶瑑現在順屬文安等處捕蝗天津河間雖非府尹所屬而胡寶瑑身係侍郎即以欽差就近前往各該處督率地方員弁實力撲除務期淨盡事竣之日奏明回京地方官倘有奉行不力者許即叅處○以故四川峨眉喜寨土千戶狼柘他子狼忠麥維蛇灣寨土千戶安布笑子阿問湖北龍潭司土弁田貴龍子朝舉各襲職○賑卹河南祥符中牟陽武封邱商邱永城鹿邑虞城夏邑延津滑縣河內武陟原武等十四縣乾隆十六年水災飢民並先後蠲緩有差○癸未

孝恭仁皇后忌辰遣官祭

景陵○甲申

上詣暢春園問

皇太后安○還宮○蠲緩湖南善化湘陰益陽等三縣乾隆十六年分水災額賦有差○乙

酉

上御太和殿視朝文武陞轉各官謝恩○諭軍機大臣等據恆文所奏拏獲逆犯朱明揚一摺閱其供詞殊屬閃爍前據康禮書到案初供是朱明揚乃係助逆要犯今其供內不但稱伊處並無夥伴器械且云康禮書亦係初會而馬朝柱則並未識面等語則康禮書之初供豈竟全屬誣捏耶况該犯又稱心裏害怕聞拏逃避是其附逆之跡已屬顯然可傳諭尹繼善永常令其嚴行追訊務得實情不可據其狡供之詞遂爾輕為開脫也○兵部議覆雲貴總督碩色欽奉雍正五年諭旨議定滇黔蜀粵分界設汛派撥弁兵各事宜一滇省大關現於梅子溝官田壩清平牛心兩站各安塘汛所有筠連水潦塘請於敘馬營撥兵二名合原設五名宜賓小壩岩亦於敘馬營撥兵一名合原設三名駐防一粵省古障汛地應裁塘房一所兵十一名徹一名入

營差操餘仍歸古障一滇省寶寧縣屬土富
州與粵之土田州接壤粵屬邏村之民越耕
滇田查係滇地應仍歸富州民耕種酌給粵
民工本另為安插一滇粵接壤地方宜分界
管理請將滇省寶寧縣東南屬之上野等寨
歸滇其粵北屬之剝頭者賴等寨仍舊歸粵
一粵之隴仰寨與滇之木腊寨相連兩寨土
田同一水源粵土目鄧祚蕃既願劃歸滇省
應以水溝為界將隴仰寨歸滇管轄一滇粵

土田錯處勢難劃截請將坐落界外者查明
戶口畝數印照發給業戶分管一剝頭者賴
等寨田地民人既歸粵管理滇省廣南府年
徵銀糧請以三分歸滇飭寶寧縣入冊徵收
其歸粵七分米於天保縣催徵一滇省原設
者賴汛應更名者賓所屬之郎喊塘距者賓
不遠已移駐普梅應更正並於滇之寶寧縣
上野添一塘安兵五名粵之下野設一塘撥
兵三名寶寧縣那達添一塘安隊目一名兵

四名粵之剝頭設一塘撥管隊一名兵四名
寶寧縣蔴莞添一塘安兵五名粵之坡厚設
一塘撥兵三名其滇粵添設各塘兵丁即於
者賓汛鎮安協小鎮安右營內抽撥一滇粵
兩省互爭威沁那崗之田均在戛郎山以威
沁塘箐口內外分界所墾田畝聽滇民承買
取贖至寄居滇界之民仍令照舊耕種毋許
滇民阻截均應如所請辦理此案遲至二十
餘年始行題覆雖該督等聲明出師其中委
勘各員有無任意稽延之處俟確查到日再
議從之○丙戌

上詣暢春園問

皇太后安○幸圓明園○丁亥諭軍機大臣等
碩色開泰所奏查辦傳鈔偽稿一案將攜帶
偽稿之江西客民李象武枷責發落亦屬遵
照章程辦理但稿內原有偽批一語則殊未
明晰此稿既係李象武自江省攜來雖非李
象武所批而究出自何人之手亦當移咨江

省就此逐層嚴究方足以為愚頑好事之儆何得止以一查塞責看來該督撫等竟全不以此為事可傳諭碩色開泰令其再行嚴究如果偽批係由羅鎮杭處所得并非李象武添入其羅鎮杭一犯現經江省拏獲到案即行咨會鄂昌確加根訊務得其人加等治罪不可與尋常傳鈔之犯一概從輕發落也將此并諭鄂昌知之 貴州按察使嚴有禧患病解任以湖北上荆南道屠嘉正為貴州按察使 戊子諭軍機大臣等巡漕給事中瞻柱等所奏淮安衛屯民陳燦壁在通首告旗丁李還書等捏報坍荒濫請豁除糧額一案已交該督撫審明具奏矣田地是否坍荒履畝即可得其確據非能憑空捏造可傳諭尹繼善莊有恭等令其秉公查辦如係陳燦壁誣捏越控自有應得之罪若李還書等實有捏報欺隱之弊必宜徹底嚴查以清屯務此係乾隆十四年之事該督等本無所瞻顧之

處苛求與迴護均所不必也○工部議准調任河南巡撫陳宏謀疏稱豫省武陟獲嘉新鄉延津滑縣等五縣古隄年久殘缺去秋陽武漫口黃流灌入致直屬被災請發帑興修從之 命副都統舒泰往代那木扎勒駐藏辦事 己丑

上詣暢春園問

皇太后安 直隸總督方觀承奏前往大名東明一路查勘蝗蝻即日兼程前進並順道親查順德府屬之唐山南和任縣鉅鹿平鄉等縣大約一二日內俱可撲盡再聞廣平現在捕蝗隨紆道馳赴察看該處螞蚱與蝗蝻間雜飛跳不越數丈其為本地生發日久長翅可知乃該縣莊純慕報自隣境飛來明係駕詞諉卸再大名魏縣濱臨彰衛蝻孽易萌每多潛伏麥內該縣只就可見處撲捕及刈麥而蝻已生翅能飛今限三日務令捕淨而二縣奉行不力其罪難辭現俱另行參奏其餘

元城開州東明長垣南樂清豐等處詢之道
府據稱多已撲盡報聞又批此係通病若非
朕旨令汝前去並此亦不查叅屬員何以知
警耶○賑卹甘肅狄道渭源靖遠會寧平涼
靜寧莊浪永昌平番寧夏寧朔靈州西寧碾
伯等十四州縣乾隆十六年水災飢民○以
故四川鐵布下撒路竹弄寨土百戶迫帶子
萬拜襲職○是月河南巡撫蔣炳奏奉諭通
緝羅田縣奸民馬朝柱現嚴飭所屬文武不
遺餘力上緊搜捕再前獲商城縣張德遠張
懷遠二犯解楚後即接江楚兩省咨會該犯
係從逆夥黨務獲解究等語現復飭員將該
犯家口產業嚴查看守以俟楚省審結辦理
得旨如汝前所辦差乎否乎再如此則不容
矣深戒之俗所謂上和和睦兩面見好之習
恐汝不能免此在朕治汝之罪何難但少一
能事之人朕所深惜非樂於督責出於不得
已也○直隸總督方觀承奏奉到諭旨將挑

濬金門開引河及中亭河淤淺處具圖奏聞
查引河西連道溝處現築攔河壩并於東面
迎溜處加幫埽廂所有引河頭挑起淤土在
十丈內者即以填築壩工其下至畢家莊及
東引河至中亭河綿亘六州縣之地岸旁俱
係民田向年挑土即於民田外積為河脅不
加夯築現仍舊辦理得旨河中挑淤最易朦
混宜詳悉查察毋致不久復淤也○又奏永
定河南北兩岸各工內有河勢兜灣溜逼埽
根頂衝險要處所均應裁灣取直俾溜歸中
泓臣沿河查看定十三段為要工豫派人夫
一俟河水斷流趕辦嗣於四月二十七八等
日一律挑竣適宣化上游得雨河水隨至溜
歸中泓暢行無阻金門開因溜趨東北並未
過水中泓寬深大溜循軌直注兩岸頂衝埽
工完固實收化險為平之效得旨覽奏俱悉
此法既收實效以後每年行之但所設趕挑
者究屬幾處所費幾許再行詳悉繪圖奏來

○大學士管江南河道總督高斌奏淮徐海等屬入夏以來雨暘時若現二麥俱已刈獲米價漸平惟宿遷縣有被雹傷麥處已酌借籽種俾及時補種秋禾近日聞有蝻子萌生俱報隨時撲滅得旨欣慰覽之又批竭力督捕毋事具文○江蘇巡撫莊有恭奏蘇屬常熟縣之福山塘河太屬鎮洋縣之劉河乃常熟昭文太倉鎮洋崑山新陽嘉定寶山八州縣水利攸關歲久不修二河堙塞旱澇無備今據紳士里民請於附河兩岸沾及水利各區按畝酌捐興舉工已告竣得旨嘉獎○又奏江省上元江浦銅山豐縣碭山句容泰州鹽城桃源阜寧蕭縣邳州十二州縣據報蘆灘窪地間有蝻子萌生幸初生如蠅如蟻未成片段撲捕猶易現已淨盡此外沿江沿河沙洲及濱海場窰雖未生蝻亦飭該管道府率屬搜查一有生發刻期撲滅毋致傷穀得旨捕蝗一事實可以人力勝但不可姑息並

不可掩飾如直隸今年實為罕有豐登之象而蝻生頗多故屢飭方觀承令其盡力江蘇澤國而去京稍遠恐汝不肯實力若蔓延為害至終不可掩則汝亦不能辭其責也○山東巡撫鄂容安奏東省倉穀民借未還賑糶未補者甚多今年麥已有收民間還補倉項賣麥買穀輾轉受虧查從前徵麥曾有一麥抵二穀之例請照此通行各屬有願以麥抵穀還倉者聽餘則秋後徵穀民力亦得寬舒再於司庫糶存穀價內發價平州縣買麥十萬石抵穀二十萬貯倉此外尚應買補者若秋後一時買足誠恐市價驟昂請量為分別數在一萬石內者本年買足其一萬石外者分作二年價昂即暫停再賑濟動用之穀照定例每石五錢發買近年穀貴實多不敷惟有上年勸捐穀石除動用賑卹外尚存七十餘萬石用以添補今年買價之不足則士民急公所出仍充本地倉儲亦屬以公濟公得

旨允行○又奏據新城寧陽莒州日照聊城等五州縣并德州一衛首報已墾未升科地共三千九百餘畝俟詳送冊結題奏查東省從前原有老荒地畝經前督臣王士俊清查後節年詳報升科不下十萬畝除山頭地角下則地土不及一畝者例免升科餘俱隨墾隨報但民間不勤農功不特憚於墾荒即成熟之地偶值歉收輒行廢棄且慣輕去其鄉現責成府州縣因地制宜逐漸勸墾得旨是東省實有此習去年經過沂州所目覩曾降旨申飭準泰想彼亦未辦理汝宜留心者○又奏二麥收成據各屬稟報統計八分惟濟東泰武兗曹萊青沂各府生發螞蚱蝻子業經嚴飭捕除并調州縣中諧於捕蝗之員分頭協辦即已撲滅者仍令詳細搜捕無留遺孽現麥秋幸獲中豐蝻子亦未成害而防維籌畫未敢稍疎惟有督責屬員實心辦理勿諱飾而忽視民瘼勿張皇而致驕民氣得旨

覽捕蝗一事東省頗稱不力汝宜親往督率捕緝務盡餘孽毋使滋蔓若再因循惟汝是問又批若無蝗蝻則麥收豈止此哉看來此事皆汝未實力之故非夙所望於汝者且恐驕民者謂本無災耳若實有災而為此談民其何告慎之戒之○又奏東省蝗蝻生發遵旨親往督辦并飭道員緊捕聞有續生並加覆勘務期遺孽淨盡幸未傷及田穀現麥已全登秋穀亦俱暢茂得旨覽奏稍慰竭力勉為蝗蝻實可以人力勝聽其蔓延為害遂不可救矣○又奏親行督捕蝗蝻之泰兗曹東四府屬俱已撲除淨盡並據各道府稟報青萊武三府亦已告竣其續報處藩臬分往督查亦俱報稱事竣回省伏思蟲孽現雖盡絕而此後秋成均須防範自當嚴飭查捕或有生發務即撲滅勿使蔓延得旨果如此實能慰朕懷矣今年穀稼可望豐收若令失於垂成豈不幸此

天恩所以當盡力也勉之○又奏接江省密咨嚴緝湖廣奸民馬朝柱即密札鎮臣并飭江南接壤營汛扼要緝查得旨似此通緝之案外省頗膜視之此犯不比其他汝宜竭力若獲之東省於汝為有功若曾經東省而於他處獲之於汝為有罪勉之○河南巡撫蔣炳奏豫省河工上年黃沁水發衝刷陽武縣之第五堡遂流注十二三等堡又有玉皇廟迴流灌至十三堡大隄致成漫口經大學士高斌等堵塞後復添築民堰縷隄今詳看情形玉皇廟大壩外漸次受淤且河勢趨南似可無慮惟第五堡民堰外前因曹家莊支河掣溜直注大隄遂致漫溢現飭河員將支河五道共五百餘丈募夫堵築再南北兩岸上年水發後水退沙停臨水灘地積高三五尺不等河底亦因之受淤向無疏濬河底之法惟將兩岸隄壩增高培厚益以子堰於伏汛前完工得旨此雖無法然兩隄益高束水壩

上之策未有不債事者仍應悉心講求取直去灣俾自行刷汕之法為庶幾耳○河南學政夢麟奏臣按試南陽告竣日風聞湖廣逆案馬朝柱即馬老三現窩藏商城縣生員江姓家雖確否未定但事關逆案急須查辦即日自南陽星夜兼程赴商嚴緝有無窩藏情事另奏得旨好可嘉學政肯如此實心者不多見也勉之○署湖南巡撫范時綬奏本省四月內雨水過多長沙府屬之益陽常德府屬之沅江桃源寶慶府屬之新化澧州屬之石門慈利等縣濱湖窪地溪漲漫入隄垸間有衝沒田廬淹斃人口委員確勘俱未成災現酌借籽糧及時補種得旨雖云不致成災亦應安頓得所

大清高宗法天隆運至誠先覺體元立極敷文
奮武孝慈神聖純皇帝實錄卷之四百十五

實錄卷之四百十五

一

大清高宗法天隆運至誠先覺體元立極敷文
奮武孝慈神聖純皇帝實錄卷之四百十六

監修總纂官太子太傅文淵閣學士文淵閣領事領侍衛內大臣稽察欽奉 上諭事件處管理
吏部理藩院事務兼管稽察滿洲都統世襲騎都尉軍功七級隨帶加一級尋常加二級軍功紀錄一次臣履桂
總纂官經筵講官太子太傅文憲殿大學士文淵閣領事稽察欽奉 上諭事件處管理刑部戶部三庫事務
世襲騎都尉軍功九級隨帶加二級又加二級臣董誥內大臣戶部尚書領侍衛內大臣滿洲都統軍功紀錄一次
尋常紀錄四次臣德瑛經筵講官太子少保工部尚書紀錄六次臣曹振鏞等奉
敕修

乾隆十七年壬申六月庚寅朔停京察自陳

實錄卷之四百十六

一

例諭京察之年部院大臣各省督撫循例自
陳求斥罷候旨照舊供職此雖三載考績之
義但卿貳職贊機務督撫任寄封疆朕量材
簡擢日復於懷其有不副委任或克稱簡畀
者率已隨時黜陟斷無遼待三年之理凡可
俟至京察解退者不過閒曹冷署年力衰昏
而又非有大過介於可去可留之間者耳且
身列大臣謬以斥罷為辭是相率為偽誠無
謂也嗣自今內而部院司員外而道府京察

大計之例。仍舉行以昭激勸。其自陳繁文著
停止。以示崇實。武職五年軍政視此。○又諭
據巡撫鄂容安奏。東省各屬拋荒地畝。現飭
召民墾復。而沂州一府。勸課尤為緊要。新授
知府李堂遠在雲南。赴任尚須時日。候補同
知劉元錫為人歷練。現在委署沂郡。將來李
堂莅任後。仍令劉元錫協同辦理等語。劉元
錫歷任東省有年。熟悉情形。即著以同知銜
署理沂州府知府事務。俟三年之後。如果實

力勸課著有成效。該撫奏聞請旨。李堂著調
補浙江湖州府知府。該部即行文沿途督撫
令該員速赴新任。以免往返稽延。○長蘆鹽
政天津總兵吉慶奏。津河二屬。蝓孽滋生。侍
郎胡寶瑤由靜海滄州一帶督捕。始赴河間
津屬續有飛蝗四起。甚熾。胡寶瑤難於兼顧。
臣請親赴津屬州縣督令有司撲捕得旨。正
應如此。所奏尚屬遲矣。竭力督捕。以贖前愆。
此奏未必非見安泰前往。然後拜發也。○辛

卯諭軍機大臣等。天津縣知縣侯珏。方觀承
題請陞補景州知州。朕已照請錄用。但今日
引見之次。觀其人似小有才。而無實際。未可
保其勝任無誤。著傳諭方觀承。令其留心察
看。如不實心供職。不得以曾經保舉之員。有
心回護。亦不必因有此旨。刻意吹求。○又諭
提督林君陞。陳奏操練水師摺內。請以三板
腳船另添桅舵布蓬。令目兵更番學習。並增
扣名糧。甚屬舛謬。三板小船。即添設桅蓬於
操演洋面。有何裨益。殊為有名無實。且欲添
扣名糧。借此開銷費用。尤屬不合。兵部議駁
甚是。前因林君陞來京時。見其人才尚屬可
用。且水師員弁出色者少。是以將伊擢用。臺
灣總兵要缺。復加恩優陞提督。伊應知感恩
益加奮勉。乃自簡用以來。全不實心整飭營
伍。凡所陳奏。俱輕率任意瑣屑。不知大體。即
如前請貤贈高祖封典。乃定例所無之事。中
外大臣。從未有以此奏請者。伊竟越例陳請。

明係恃恩冒濫今復以不可施行之事率意妄奏著傳旨嚴行申飭令其痛加悔改如仍不知奮勉不能仰副委任之意定行從重加以處分○兵部侍郎兼管順天府尹事胡寶琮奏查勘天津河一帶蝗孽現天津靜海等縣俱已撲除查今歲之蝗滄州最盛知州朱邃全不盡心辦理因即馳至該州訪之鄉人云數日前蝗蝻滿野知州束手無策該府熊繹祖親督人夫擒撲已盡而青縣又經續報隨

赴該邑查辦大抵天津近海洲汊人跡罕到最易生蝻無從窮究惟有俟其下集力為滌除今為日已久各處都已撲滅雖有遺孽不至為害知州朱邃庸劣無能另摺參奏得旨似此則蝗蝻尚未捕盡汝其勉力督撲究之年成光景如何未稼致傷否○壬辰諭朕此次巡幸木蘭著履親王裕親王大學士來保史貽直在京總理事務其月選之文員內通判州縣等官武官內八旗護軍校驍騎校及

外省送到之補放水手官驍騎校等官并年滿千總俱著王大學士照從前之例驗看可傳諭該部知之又諭蝗蟲害稼最烈

皇考曾特降旨地方官不即時撲滅者著革職拏問督撫嚴加處分載在令甲誠以捕蝗必用民力人力勝則蝗不成災故明示之禁使知所從事比者督撫養尊自逸且畏處分如方觀承蔣炳者非朕旨督責幾令捕蝗不力之劣員幸免矣夫忘人事而損田功上辜

天貽奈何庇一二不肖劣員而貽數萬戶生靈之戚昔人所謂一家哭何如一路哭者寧未之聞耶牧令或委之業戶未報不思官以知為名則所治之一州一邑事無大小皆所當知必待受害者呼號始覺已不稱其名而鰥厥官矣彼即不報爾何不知察耶即恐致蹂踐且幸其飛食他境匿不具報愚民或有此情則償其所損又有成例如果明切開導家喻戶曉民即至愚豈不計及蝗蝻初生甚微

撲捕不過躡及溝畎隴隙無難補種且所失得償亦何憚而不報耶平日不講求禦害之方臨時又不身先督率徒事粉飾徇隱民飢罪歲咎孰大焉特用申明禁令各該督撫其嚴飭所屬敢有怠於奉行徇縱殃民者必重治其罪○又諭侍郎錢陳羣因患病未痊奏請解任調理著准其解任派劉裕鐸前往診視俟秋涼起程回籍調理病痊後奏聞赴闕伊子編修錢汝誠著隨侍伊父抵家再行來

京供職刑部侍郎員缺著王淳補授仍兼管副都統○諭軍機大臣等近日督撫辦事有所謂上和下睦兩面見好之秘鑰貌為勇往任事以求取信而陰市私惠謂有旋乾轉坤之力使屬員心感尹繼善慣用此術方觀承及巡撫中一二能事者趨而效之惟策楞喀爾吉善黃廷桂尚存本色阿里衮亦不至此碩色更復不能諸臣心術才具日熟復於朕胸中任術取巧者皆洞見肺腑其何益之有

大臣中有以取巧得利益者乎今日批示蔣炳奏摺切中時弊著因便鈔寄各督撫閱看○又諭前侍郎胡寶琮奏稱天津一帶蝗處所業經撲除畧盡可以無虞今日吉慶奏稱欽差過後忽有飛蝗四起往來靡定苟不急為撲滅將來為害滋甚等語津屬既稱撲除畧盡何以又有飛蝗四起果何所從來耶胡寶琮現往河間於津屬已鞭長莫及著將河屬有蝗州縣督率撲捕務令竭力查搜以盡根株勿留餘孽如河間一帶撲捕完竣仍由天津一路詳細查勘必使淨盡再行回京尋奏臣赴青縣捕蝗將竣又見蝗集滄州正在往來督捕而河屬之河間交河任邱景州一時俱報飛蝗入境因令知府熊繹祖辦理滄州臣赴交河一帶督捕伏查直東三省沿海洲汊葦蕩莫可窮究實不解蝗自何來惟於飛集時乘其未傷禾稼實力搜捕不畏難不推諉自不至前功盡棄致損秋成現俟河

間事竣覆查天津順天各屬務必盡除得旨
好竭力為之○又諭據江南提督武進陞奏
稱上年八月間崇明鎮奇營遊擊今陞參將
孫鼎元由松江謁見口稱有孫嘉淦條奏一
事令其鈔稿來看未曾入告數月以來輾轉
思維寢食不安今又據吳進義供出由松江
提塘陳公壽傳報請交部嚴加治罪武進陞
已有旨諭令休致但孫鼎元係參將大員公
然傳鈔偽稿武進陞閱看已經數月直至浙
省咨拏提塘事不可掩始行入告該督撫現
在查辦偽稿豈毫無聞見乃並不據實奏聞
此非尹繼善之取巧而何看來近來大臣辦
事有所謂上和下睦兩面見好秘鑰貌為勇
往幹辦實心任事以求取信而陰市私恩取
名譽以為力能旋乾轉坤此尹繼善慣用之
長技而近日如方觀承蔣炳一二能事之員
皆趨效之朕已於蔣炳摺內批示著鈔寄各
督撫閱看試思此等伎倆能逃朕洞鑒乎督

撫用此術而得利益者何人乎莊有恭既將
提塘陳公壽拏獲亦不據實陳奏伊非他人
可比若亦趨取巧一路何以承受朕恩典耶
尹繼善莊有恭俱著傳旨申飭江省辦理偽
稿之案前經降旨詢問尹繼善亦未覆奏著
再行傳諭令其據實查奏尋奏五月十四日
准浙撫雅爾哈善密咨拏松江提塘陳公壽
臣深幸此線一得江甯提塘之凌祖耀江西
提塘之章錦等俱可互勘得實親提嚴鞠矢
口不承臣恐其因無質証姑刑狡供即將該
犯解浙質審據浙撫咨稱陳公壽供出偽摺
得自盤門外普濟堂之董事張世倫飭屬往
查並無其人因浙撫咨內未詳敘陳公壽全
供復專差守錄至今尚未覆到不敢妄奏得
旨人孰無過能改即無過矣勉之○又諭安
泰回京奏稱據吉慶稱二十九日有飛蝗二
起自西南來不知落於何處已派員帶領兵
役前往搜捕等語吉慶非他人可比且係總

兵既目擊飛蝗即應親身前往撲捕務盡根株豈得以曾經派員即可塞責了事今年直屬豐稔蝗蝻落生現在欽派大臣上緊撲滅吉慶親見飛蝗情形何容膜視著傳旨申飭○癸巳諭臺灣彰化縣兇番戕殺兵民一案督提所奏據該地方文武稟報互異俱未得實情立柱錢琦現差巡察久之未奏因傳旨詢問並令察訪確情今立柱錢琦覆奏仍屬支吾未得實情言官為朝廷耳目況身處其地無難審察情偽乃僅據地方官稟報敷衍其詞並未親往察勘且稱初札商督撫會銜入告經駁回專摺具奏似此則巡察竟成冗贅於設官本意失之遠矣立柱錢琦著交部議處原摺并發看來臺灣文有道府武有鎮營足資彈壓巡察三年更替徒擁虛名事權則不如督撫切近又不如守令介在其間在有志向上者或以多事致敗而循分供職者多致志氣墮頹或且歎為擯斥外出也於公

事殊無裨益所有巡察臺灣御史著三年一次命往事竣即回不必留駐候代著為例以故青海扎薩克固山貝子丹巴子沙克度爾扎布襲爵○甲午

上詣暢春園問

皇太后安○準噶爾部人呢雅斯來降賞給安插如例○蠲緩河南濬縣上蔡羅山等三縣乾隆十六年水災額賦有差○乙未長蘆鹽政天津總兵吉慶奏六月初二日天津縣西南楊五莊飛蝗叢集隨募民捕蝗一斗給錢百文一日捕滅淨盡巡視蝗集處下子者已十分之三凡地中有小孔者即是據土人云此種遺孽伏暑時十八日而生又十八日而長翅再下之子天涼或不復出便成來年之害伏思按孔挖掘固易第恐傷田禾因通飭文武計日守捕毋使滋長現在靜海週厯巡視一有蟲孽立即撲除得旨是極力督捕此正宜盡心者若少不竭力致遺孽復生則惟

汝是問○調廣東碣石鎮總兵林朝翼為瓊州鎮總兵以虎頭門副將楊啟忠為碣石鎮總兵○丙申

上御勤政殿聽政○諭軍機大臣等直隸督標餽養官馬已屆送京之期但此時天氣炎熱距起鑾日期尚有月餘沿途趕送來京難免虧臆分交各旗徒多輾轉儻八旗拴養兵丁不能加意餽養如有疲瘦反滋藉口將此明白曉諭布政使王麟令其將各處送京馬匹內未經起程者行令暫緩送京已經起程者即令趕回仍歸原處加意餽養統於七月十三四兩日至京會同派出放馬大臣等分撥隨圍官兵甚屬省便○又諭雅爾哈善等稱桐鄉縣賊犯陳世昌買食崇明海糧現已咨江南督撫提臣委員速赴崇明查拏等語此等匪犯任意捏詞煽惑蚩蚩愚民往往為所誑誘此案如果別無隱情則不過內地奸民設法誑騙錢文未必實係海洋散票領餉試

思費錢數百文即可得二十四金理所必無非至愚其執信之其荒誕無稽出情理之外若辦理過於張皇則遠近傳播又成一駭人聽聞之事矣著將此傳諭雅爾哈善知之尋奏已據江南拏獲李二等犯解浙質訊其捏詞騙錢屬實前辦此案俱係密咨不敢張皇滋擾以防匪人藉端誣害善良報聞○又諭方觀承奏稱直隸開州為上年黃水經由之地蝻子生發較多俱已節次撲淨現仍搜捕餘孽等語蝗蝻本由濕化而生即開州一處觀之則豫省瀕河上年黃流漫漫州縣更不問可知前經降旨詢問蔣炳令其切實詳查何以至今尚未覆到著再傳諭該撫即將黃河南北兩岸各州縣有無蝗蝻生發現在作何督率捕撲禾稼有無傷損逐一據實奏聞今歲雨暘時若秋禾豐稔可期若因撲蝗不力以至有減分數實為可惜該撫等其奚所辭咎戒之慎之尋奏上年河水經過北岸各

邑惟滑縣蝻孽萌生該令郭錦春偷安不職業經參奏外其陽武原武封邱祥符等處俱未生蝻至南岸之延津儀封考城間有一二處當即撲滅豫省民情傳呼即至且於蝗蝻初生時用布牆圍撻法甚便捷是以不至羈延至與直省接壤之處間有飛至隨時捕除勿使滋蔓現秋禾暢茂毫無損傷得旨覽奏稍慰○蠲免江蘇沛縣乾隆十六年水災額賦○丁酉

上詣暢春園問

皇太后安○以翰林院侍讀學士周長發充日講起居注官○戊戌諭軍機大臣等據侍郎胡寶琮奏稱河間任邱景州等處一時俱報有飛蝗入境臣即至交河一帶督辦等語此所報州縣俱密邇東境若於蝻子萌生時早為撲滅何至盤空飛颺前經傳諭鄂容安令其親行督率查辦不知近日辦理情形若何何以尚未奏覆蝗既成羣豈有飛而不食之

理自必有損禾稼愚民憚於撲捕蹂躪或以為螞蚱非蝗或以為遠飛他境不至成災皆無足信惟有竭力撲除務歸淨盡毋得遺種并即速據實奏聞否則今歲

天和時若何以仰副耶尋奏河間所屬州縣多與東省濟東二屬接壤現陵德恩武等處蟲孽已於五月內撲淨仍飭道府周流防範臣身任封疆無論本境捕蝗是所專責即隣省亦不敢歧視凡飛越入境者既飭屬撲捕復必親往周查並令各州縣於本境內逐日搜查五日一報所撥人夫即告竣毋許即散屬員頗議為過嚴民情亦以為勞苦然不敢暫博虛譽致貽後患現剋日淨盡大勢可保豐收得旨所見是勉力為之又批此皆必有之事而必不可顧忌姑息者○軍機大臣等議覆鎮海將軍王進泰疏稱沿江各汛分設員弁有巡防稽察之責未便以官署坍塌遂仍歸將備標下應嚴飭各弁移駐本汛並查驗

坍塌官署委員修葺其原無官署者酌量於營房內各給住所至水師營官兵自應練習水戰查京口左右二營陸地技藝宜嫻水戰尤當熟習應於每年春秋二季依八旗水操例駕駛沙唬船隻分班在該汛演習仍定期於適中之韓橋地方合操四次並責成水師副將等輪年考閱又查圖山地方扼要所設礮位防護應嚴請將須江汛協防外委一員移駐圖山均應如所奏從之○己亥兵部議准兩廣總督阿里衮疏稱廣東清遠縣屬之鰲塔應添一汛安兵六名於清遠縣存城內兵抽撥大坪角應添一汛安兵五名梨塘口改為水汛除原有塘兵二名應添三名俱於英清營分防大塢底白廟等九汛額兵內抽撥曲江縣屬之石灰坪應添一汛安兵六名於右翼鎮中營龍眼崗汛額兵內抽撥白沙老濛濠新濛濠及英德縣屬之鳳田清溪高陂朗畧太平坑菜州等處均應各添一汛安

兵六名於右翼鎮右營分防界灘烏石及高橋等汛額兵內抽撥三丫塘攬坑口應各添一汛其小樟黃土坑二塘改為水汛除原有額兵二名應添三名於英清營分防大塢底等汛抽撥從之○庚子諭軍機大臣等申祺奏稱該撫等現在查審嘉興賊犯陳世昌買食海糧一案若僅據發覺之犯供出陸續拘提究治恐需時日請密諭近海各省督撫提鎮一面曉諭令其出首賊黨并許自首庶賊黨不致漏網等語此事不應如此辦理崇明本屬江蘇內地一葦可杭所供望海山及李老子李二其地其人具有証據立即委員查辦無難直發根株何必如此輟轉根求尋枝數葉前據雅爾哈善奏稱密咨江南督撫自必已經查辦著並傳諭尹繼善莊有恭令其迅速辦理看來此案不過捏詞誣騙愚民錢財未必實有海洋散餉之事雖不可置之不問但與羅田叛案有間若辦理過於張皇徒

足駭人聽聞出示招首未免挾仇滋事總在得其確實要領隨宜妥辦勿徒張大其詞也將此傳諭知之尋莊有恭奏前准浙撫雅爾哈善咨拏要犯業於六月初查獲李大李二等據供起意誑騙並無李老子其人沿海州縣亦無買伊糧票者隨一面解浙一面飭蘇松太三府曉諭被誘之人許令自首以淨根株恐僻壤愚民未能曉然於此事之烏有也奉到諭旨惟有悉心體會勿致辦理張皇報

聞○又諭據巡漕給事中范廷楷奏稱查看江西鉛山幫頭船旗丁桌上有南漕使用陋規賬簿隨搜其筭獲有上年陋規賬簿又檢出贛州吉安等幫新舊賬簿並浙江寧波幫沿途需索賬簿合計簿中自領運起至抵通之日銀兩土儀每幫費至五百金納賄之地受賄之人俱有冊可據有款可稽請飭令該督撫河漕提鎮嚴參治罪等因一摺已交與各該督撫等查參治罪矣近來各省督撫等

皆奏一切弊竇俱已剔釐今即漕船一幫所費陋規如此之多其餘各幫未經查出者何可究詰該督撫等平日所謂弊絕風清者何在所謂剔釐漕弊者何事外省辦理諸務全不實心即此可見其有漕各省及沿途經過督撫等俱著傳旨申飭○辛丑

上詣暢春園問

皇太后安○壬寅諭軍機大臣等夷人貿易一事前據李繩武奏到已交軍機大臣定議並降旨傳諭令其遵守章程不必曲為遷就疲乏牲畜概不准在哈變售聽其留人牧放於回巢日起回其李繩武周章觀望之處並經傳旨申飭今據黃廷桂所奏係五月十六日在肅州封發仍有敬候諭旨至日欽遵之語可見李繩武自具奏之後竟全未辦理惟專候朕之批示矣是明令夷使在哈密候旨而行前於摺內批示之旨實為洞中其情李繩武身為提督專閫邊陲遠駐數千里外若毫

無擔當事必待馳奏候旨而行何能迅合機宜幸此不過夷人貿易小事設或事關緊要豈不貽誤地方其罪亦非李繩武所能當也看此則李繩武遇事全無實心從前不過庸常自保幸而藏拙今偶值夷使求易小事則如此張皇觀望若有意外軍情其何以副此重任耶著再傳旨嚴行申飭其貿易一事仍遵從前定數及所降諭旨妥協辦理並將如何辦理情形據實速奏尋奏遵即會同督臣黃廷桂札知鎮臣呂瀚委員前赴哈密明白宣示夷人恪遵乾隆十三年赴肅交易之例分起前往其浮多畜貨或駁令趕回或留人牧放已經竣事報聞○癸卯諭朕此次行圍所有外省督撫提鎮等奏摺著照舊例自起鑒之日為始俱齎赴在京總理事務王大臣處加封交內閣隨本呈送行在候朕批示隨本發回仍於總理處交付齎摺人祇領該部即通行傳諭知之○又諭曰李繩武前任

固原不過循分供職並無出衆之處及調任福建即託病遷延後甘省提督缺出因其曾任邊疆復加委用至永常陞任一時未得其人念伊係熟手又復調往安西自應勉力報效今觀其辦理夷情毫無定見一味推諉取巧種種未協深負任使且亦年老有病著革職來京候旨所遺安西提督員缺著綽爾多補授涼州將軍員缺著七十五補授○又諭騎射為滿洲要務朕前屢降諭旨令滿洲大臣官員等勤習此次木蘭行圍閱御前大臣及侍衛等所射雖尚嫻熟並無中三箭之人永謙雖中三箭全無儀容準則至侍讀學士希貴副都統祥泰正卿五柱非脫扣即不到把著罰俸一年副都統四十六人平常而箭亦不佳著革退副都統侍郎觀保箭尚可觀即補授四十六所遺員缺仍兼侍郎以示獎勵李世倬之箭更不堪寓目著革退副都統在原任上行走仍罰俸二年散秩大臣等除

進班外有何應辦事件而箭亦生疎總由平日好逸偷安未經演習所致日久廢弛必至漸棄滿洲舊業不可不嚴切曉諭嗣後八旗各部院滿洲大臣官員等如不留心騎射必以家法治之勿謂言之不早也將此通諭知之○諭軍機大臣等緯爾多著即速前赴提督之任夷商貿易諸事伊尚未辦理著黃廷桂一一告知務遵前降諭旨悉照乾隆十三年之數通融計算示以節制至哈密貿易斷不可行不可因其再四糾纏稍有遷就力除綠旗苟且了事陋習○又諭前因李繩武於夷人貿易一事周章觀望毫無擔當是以降旨革職令緯爾多往代其任緯爾多到時自當遵照新定章程不容稍有遷就但亦不可因李繩武以此獲咎遂爾矯枉過正使該夷等至於難堪向來綠營習氣惟是因循及一經嚴飭往往又過於苛急皆非酌中辦事之道總之駕馭外夷當使之知畏亦當使之知

感可傳諭緯爾多知之○工部議准河東河道總督顧琮疏稱東省運河南自臺莊北至德州隄工雨淋浪擊必須加鑲其頂衝受險并卑薄殘缺各工均請動項興修從之○直隸總督方觀承奏據近日所報唐山趙州甯晉隆平新河武邑棗強等處蝗蝻撲除將盡查趙冀三屬南連順德北入正定境壤交錯互有飛越恐致滋延臣現駐趙州分員四出搜捕其正定屬之平山獲鹿井陘靈壽正定元氏行唐新樂等處或撲除已盡或既撲復萌並飭加緊巡查速就殄滅再保定屬之清苑安肅安州容城新安高陽完縣蠡縣唐縣等處亦據報將次告竣細察近日情形大率皆係草上螞蚱雖有翅能飛然亦不過於數里中乍起乍落非若飛蝗之漫空遠颺是以一經趕撲就地立盡田禾幸皆無損得旨今年蝗蝻雖幸不為害若非朕督責將不知何底止矣此時雖云撲除然向前正宜謹防慎

之○予故正紅旗蒙古副都統塞爾圖祭葬如例○卹巡洋被風飄沒之福建烽火營把總吳光卿如例○甲辰諭軍機大臣等今日巡漕給事中朱若東復命召見奏稱天津一帶蝗蝻甚多皆因二三月間蝻子初生時該州縣正印官因派往挑修減河等工無暇查察早為撲捕以致滋長飛颺等語除蝻於初生之時力省而易盡地方印官雖兼有河工之責而蝗蝻害稼最甚尤當及早搜捕豈得視為不急之務聽其長成翅翼在愚民無知護惜新苗惟恐蹂踐非地方官為之督率必致生翅羣飛雖竭力撲捕一時不能盡淨於禾稼亦不能無損非所以重民事而保田功也嗣後天津所屬地本沮洳易於生蝗州縣於春間即行實力稽查撲捕無令孽種滋萌以致貽害田畝至河道工程固屬緊要自有專設之道員及丞倅等可以委任佐雜千把可供差遣州縣官當專理民事不必派以工

程令其僕僕河干致地方諸事轉有貽誤且得藉口推諉可將此一併傳諭該督方觀承知之○湖廣總督永常會同兩江總督尹繼善奏訊明羅田縣逆案首逆馬朝柱即馬太朝籍隸蘄州移居江南霍山與白雲菴奸僧正修往來朝柱以貧難度日設法騙銀乾隆十二年四月內商諸正修遂造言朝柱十六歲時夢神告知伊師在護國寺醒後尋至霍山縣火星堂見廟內像與夢中所見無異詢之廟僧知此廟原名護國寺廟僧以朝柱非凡指赴金山見楊五和尚肉身又與夢中所見無異年二十復夢神告知桐城萬山九龍洞有兵書寶劍往取得之又言朝柱於乾隆十二十三等年在霍山鐵鑪地方得法劍一鎮天先兆喜兆恩兆發令展魂旗六并謂西洋出有幼主名朱洪錦係明後裔有大學士張錫玉大將吳乘雲係吳三桂子孫李榮爵即李開化等統兵三萬七千為輔朝柱改名

太朝係其軍師正修復以詭言彙成一書串通張朝選宋魁元等傳播即有李懷仁李太凡等各出銀二三兩不等上名入夥正修又代編逆示朝柱於十四年二月內移居英山之大坳溝復商同正修製銅劍一鐫太朝軍令四字欲圖占曾通姦李文先妻吳氏并謀娶張上元未婚妻夏氏令正修於劍上鐫前世吳氏今世夏氏並鐫張氏孫氏韓氏展魄魂靈字樣買包頭一副并劍藏於樓子石山洞內詭言約期往取隨集楊秉成夏恒三並該犯之兄朝仕弟朝貴朝羣等於十四年十月十五日夜赴山取出謬稱金劍羅帕衆信之各出銀上名遂指劍上所刻將吳氏夏氏為己妻旋朝柱移居羅田縣天堂寨開山燒炭誘人入夥製銅鎗一銅笏一鎗上仍鐫太朝軍令並金鎗等字笏上鐫紅羅記三字背鐫丹鳳朝陽又旗二銅鏡一先藏於鐵櫃溝山洞於乾隆十五年十一月二十六日夜約

衆游觀朝柱入洞取之宣言金鏡旗笏乃戰具鏡能照耀天下見人三世復有遮天繖撐天扇能行雲霧中三時可抵西洋並稱西洋不日起事興復明朝索衆出銀入夥各歛血吞符結盟上名收買以能為心腹一時被誘上名者遂衆乾隆十六年五月內朝柱兄朝佐又引行醫之胡濟修入夥倚為謀士一切偽捏情事悉主之作敬神國糧等文又為朝柱稱揚作讚作檄文一篇捏稱西洋大都督吳乘雲所頒是年秋冬間令劉廷佐等在羅田之僧塔寺英山之大坳溝茅草畝石頭過路灘五顯廟等處開店招人以髮辮外圍蓄髮為記有道士王朝瑞入夥濟修即將所作偽檄偽令讚表等文令其鈔錄傳揚朝柱族弟馬邦念之妹實高景從未婚妻朝柱誘騙上山偽為西洋朱洪錦聘妻呼娘娘令人叩頭旋暗製蟒袍補褂頂帽託言西洋頒賜衆見蟒袍係戲班行頭補褂頂帽是本朝服色

疑之因與濟修密商乃作偽詔一道交孫林萬私刊宣言西洋從雲霧中頒詔來楚應到黃鶴樓迎接十一月二十五日令濟修赴黃鶴樓見林萬將偽詔百張取回對衆閱讀衆果不疑乾隆十七年正月內朝柱將偽詔作劄先後散給胡南山王朝瑞吳方美吳方曙熊得勝等每張索銀一二十兩至百二十兩不等濟修又譔擬印文描寫統掌山河普安社稷既受天命福祿永昌十六字鐵匠王廷賜徐文畧為造兵器孫繼舜購買硝磺以致流言四起參革正法之羅田縣知縣馮孫龍風聞差查乃僅以挖山燒炭勤苦農民稟報臣永常暨撫臣恆文據稟嚴查經蘄州知州李璵訪悉前情於三月二十四日親赴王廷賜家起獲刀片白布復據州民吳兆丹首告吳梁氏等被誘上名訊明差拏詎吳方遠李仁宗情急拒捕當將李仁宗拏獲南山知事發欲將朝柱拏首濟修詭言無妨已令朱連

芳前往湖南景陵縣請兵於四月十六日午時準抵武昌令南山親往接應朝柱又令許萬兒刻太朝軍令四字印旗傳人并寫傳單多張分路糾合嗣經蘄州英山等州縣會同查拏朝柱情急於四月初三日同馬朝仕馬朝貴攜馬氏夏氏偕脅附近居民男女共一百餘人齊登天馬寨山令黃國臣執旗糾黨意在抗拒四月初五初六等日被脅上山者漸散朝柱窮促即棄馬氏夏氏並背劍之皮文遠等逃遁江楚兩省文武各官先後拏獲馬氏夏氏胡濟修僧正修從逆黨羽及被脅各犯共二百餘名口搜獲逆書偽詔至詰其西洋究係何地朱洪錦張錫玉等果否在彼屯軍湖南景陵縣確在何處並有無軍馬在彼據供均係捏造查首犯馬朝柱逆蹟顯著將來緝獲法應寸磔其已獲之妻子發功臣家為奴其餘各犯現已分別凌遲處斬即行正法應加責者發落完結應發遣者俟部覆

到日辦理奏報聞。

平集表白百十六

三十

大清高宗法天隆運至誠先覺體元立極敷文
奮武孝慈神聖純皇帝實錄卷之四百十六

清 實 錄 乾隆十七年六月下

大清高宗法天隆運至誠先覺體元立極敷文
奮武孝慈神聖純皇帝實錄卷之四百十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 奏請事 件處管理

吏部理藩院掌印給事中兵部尚書都察院御史內閣學士翰林院掌院學士詹事府詹事府掌印給事中

總纂官經筵講官太子太傅大學士文淵閣領閣事稽察欽奉 奏請事 件處管理刑部戶部工部吏部

世襲騎都尉等四十九級隨帶加二級人加二級且量給向大日戶部尚書經筵講官滿洲部統軍功紀錄五次

尋常紀錄十四次且 德珩經筵講官太子少保工部尚書紀錄六次且曹振鏞等奉

敕修

乾隆十七年壬申六月乙巳

平集表白百十七

上詣暢春園問

皇太后安○諭天津河間兩郡蝗蝻撲捕已淨
侍郎胡寶瑤往來督率甚著勤勞從前所有
處分之案著加恩開復其協力撲捕實心勇
往之員如天津道董承勳知府熊繹祖等著
該侍郎會同該督查明據實奏聞○諭軍機
大臣等據蔣炳奏稱南陽府盤獲奸僧慧照
供出曾經投見馬朝柱令其出外訪人等語
其情詞閃爍或即係馬朝柱易名妄供亦未

四五七

可定現在無人質證到案焉肯即吐實情自應歸案質審著傳諭該撫即多派強幹員弁將該犯解往楚省嚴行訊究沿途務宜小心防範毋致疎虞至該府莊有信盤獲奸僧具見實心任事其在南陽任內所辦諸事頗勇往出力著傳旨嘉獎○又諭蔣炳參奏滑縣知縣郭錦春捕蝗不力已降旨革職其知府王祖晉身為郡守職在督率屬員乃於捕蝗緊要之時因中暑小疾即回署調治觀此則非能實心勇往任事之員可知著傳旨申飭并諭該撫留心試看嗣後如仍不甞勉即行據實查參○又諭蔣炳所奏查訊光州武生江鏐一摺辦理殊未妥協馬朝柱係逆案要犯必宜嚴行根緝不可稍有疎縱夢麟一有風聞即親行密辦是以傳旨嘉獎然於案內牽連之人亦宜確加詳察果其形迹可疑或顯有證據究問不承然後加以刑訊今張士英所供江姓武生並無主名且搜查江鏐家

中既無馬朝柱蹤跡亦無逆書止應詳悉研究徐察其素行何必即用重刑疊夾即謂該州江姓生員止此一人假令更有數人亦將盡行夾訊乎此不過因案情重大謂非嚴刑不足塞責而不顧事理之當否豈實心辦事之道蔣炳夢麟俱著傳旨申飭○長蘆鹽政天津總兵吉慶奏靜海青縣滄州等處飛蝗落過之地早禾間有被傷雖合計通邑不及百分之一然此一二處秋成無望即有一夫失所之虞詢之農民云立秋前尚可補種且收麥一項所需籽種工本每畝不過一錢五分因商之該府即將買捕蝗蝻銀按戶散給得旨甚好即用鹽庫項下隨正報銷○丙午諭蝗蝻貽害農田捕之宜及早用力皇考曾特降諭旨朕申明禁令已不啻再三今歲直隸河南山東皆有蝗蝻萌動經朕嚴飭該督撫等督捕始得淨盡昨據高斌奏稱江南豐沛交界處所及銅山蕭碭等州縣亦俱

有飛蝗來往。夫捕蝗如捕盜。禁於未發。則用力省而種類不至蕃滋。既至。傳翼羣飛。則所生之地未早為實力撲捕。可知此固地方官急緩從事。而督率不先。董戒不力。則該督撫之過也。著將江南督撫交部議處。直隸蝗蝻若非朕申諭嚴切。必且有妨秋稼。不幾上負雨暘時若之嘉貺耶。身為司牧。其奚忍坐視以貽民害。著再通行傳諭各督撫。嚴飭所屬實力奉行。如再有怠於撲捕。以至飛往他境者。一經奏聞。必當根究。生蝗處所。將該地方官從重治罪。○諭軍機大臣等。據顧琮蔣炳堯奏查辦陽武善後工程於五堡三壩處所估築格隄。并繪圖進呈一摺。所奏殊屬糊塗。築隄本以禦河。摺內雖稱三壩後戩築格隄。東接新斜隄。西接二壩。工其黃河與新築之隄相去幾何。隄在河之何岸。摺內既未聲明。圖中亦未簽貼。殊不明晰。著將原圖發還。令其另行詳細聲明。繪圖貼說具奏。其原圖仍

令一併隨摺進呈。其不可緩之工。著即一面辦理。○又諭據永常尹繼善摺奏審結逆匪馬朝柱案內同夥逆犯僧正修胡濟修及馬朝佐等。先行正法。分別傳旨梟示。此等助逆匪犯。既經研審確實。自應即正典刑。孫林萬雖已病故。其刻板藏匿處所。必應查究。追起不可含混。了結。再據河南巡撫蔣炳堯獲僧人慧照。俗名左國太。審係馬朝柱同夥逆犯。前經在山教習演鎗等語。已令該撫將左國太解赴楚省審結。但前奏楚省原審各犯供詞並無左國太其人。或係慧照捏名。或查審尚有遺漏之犯。俱未可定。又或慧照即係馬朝柱故意捏造詭名。但不可因此即將犯僧抵塞。轉致要犯漏網。總之此等極惡重犯。狡猾性成。其供吐必有不實不盡之處。著傳諭永常等一併詳悉研究。○又諭據蔣炳堯奏稱據南陽府知府莊有信盤訊奸僧左國太供出馬朝柱等在羅山信陽交界之靈山寺藏

臣即於十三日起程馳赴該處督率各官緝拏等語馬朝柱係逆案首犯必不可容其漏網如經拏獲著於該處選派強幹員弁將該犯等嚴密防範星夜解楚以憑質訊毋致疎虞○丁未

上考試翰詹諸臣於正大光明殿○諭軍機大臣等據侍郎管府尹事胡寶琮奏稱霸州堂二鋪地方於本月初六日未時永定河渾水漲發從西北兩面漫溢進村深三四尺田禾盡淹房屋浸塌現於河西之王家場等處搭蓋窩鋪等語昨據永寧奏稱南北兩岸隄堰開壩俱各穩固則霸州堂二鋪之水從何而來或即金門關各草壩所過之水抑或係河身衝漫之水永寧既經抵工代該督防汛凡有被水村莊無分大小俱應一一查明奏報何以未經奏聞著即傳旨詢問令其即速回奏尋奏臣自六月初七日准督臣委赴永定河防汛十一日到工履勘南北兩岸隄壩俱

屬穩固當即奏聞其初六日堂二鋪等村被淹未據詳報是以未經具奏伏查堂二鋪大小佛城疙疸黃家王家大小韓家大小崔家董家胡家各鋪并郎城一十二村往年水大時村民移居高阜水落仍入村居總因圖淤獲利不願遷移現河水浸村實係河灘漫衍之水並非河隄衝漫亦非金門關暨各草壩過水為患且所種俱係一水一麥灘地每歲被淹現據該州搭蓋窩鋪棲身並查無力之家借給口糧民情安堵得旨覽奏稍慰其應行撫卹者妥查辦理總屬民瘼攸關何必分彼此職司耶○戊申諭軍機大臣等傳鈔偽稿一案各省辦理未見端緒而傳自報房則在江西似於此案根株為近該省現在查究人犯亦屬甚多朕屢經降旨令該撫將如何辦理之處奏聞該撫自應隨時附奏乃鄂昌今日奏摺內竟未奏及殊非實心辦理之道著傳旨申飭令將該省現在查拏各犯如何

辦理并作何窮原竟委之處。即速詳晰具奏。
○直隸總督方觀承奏通計直屬正順廣太
四府趙冀二州先後生發蝗蝻蝻共三十
七州縣遵旨督同鎮道府州分路緊辦俱以
次清理今籌善後事宜首在搜剷遺子惟是
遺子有先後生發即有遲早其早者此時又
將萌動須乘其初生如蠅蟻時殄除甚易若
稍延數日又至長大為患現通飭文武屬員
多派兵役分管村莊嚴立賞罰往復搜尋即
有一二續生之處皆係草上螞蚱撲捕易盡
並不為患得旨今歲蝗蝻實多若非如此竭
力捕除為患可勝言哉此後仍宜留心○緩
徵山東東平荷澤范縣平陰利津濟寧等六
州縣乾隆十六年水災額賦有差○己酉
上詣暢春園問
皇太后安○辛靜宜圍駐蹕至辛亥皆如之○
諭軍機大臣等前據侍郎胡寶瑒奏霸州堂
二鋪等村被水淹浸田禾坍塌房屋隨經傳

詢永寧據覆奏堂二鋪等村俱稱不願遷移
並不願築塼查往年水大時村民移居高阜
水退仍復入村居住等語已批令將應行撫
卹之處查辦但此等塼內村莊前曾降旨諭
令遷徙蓋因南北二遙隄之內原皆河地任
其蕩漾之區水至必不能無漫衍之害自當
遷移遠避不可與水爭地愚民貪目前小利
不思後患安土重遷固其常情當辦理塼內
村莊之初見村多民衆就其情願與否稍為
區分不過一時權宜而非經久之道年年水
發即年年被淹年年賑卹其何利之有其河
內尚未被水者或可姑待其已被水者當乘
此明切曉諭塼內村莊俱照例給價令其就
便遷移與其築舊塼之舍何如別求妥善之
居毋得瞻顧依違安危利藪因小失大仍應
嚴禁私築房舍墾種者著傳諭該督方觀承
令其即速委員履勘實力查明妥協辦理○
辛亥長蘆鹽政天津總兵吉慶奏查捕滄州

及迤南之鹽山慶雲南皮等處蝗蝻現時序將秋遺孽大率已絕擬回至青縣靜海天津再加巡視務期搜捕淨盡得旨覽汝始則膜外視之經朕督責頗知勉力如此能改過方不負任使以後更不可懈怠矣○以護軍參領那邁為莊浪副都統○壬子

上詣暢春園問

皇太后安○迴圓明園○遣官祭

火神廟○兵部議准閩浙總督喀爾吉善疏

稱建寧鎮標三營差操需馬甚多現在馬餉缺少請於督標每營抽撥四名提標每營抽撥二名漳州鎮標每營抽撥二名福寧鎮標每營抽撥四名汀州鎮標每營抽撥五名所撥馬餉即以建鎮三營步戰兵改補其抽撥各營仍拔補步戰兵充額從之○湖北巡撫恆文疏報宣恩縣乾隆十年墾旱地七畝七分有奇十二年墾五畝七分有奇○癸丑諭昨於正大光明殿考試翰林詹事等官朕親

加詳閱按其文字優劣分為四等一等汪廷璣竇光鼎楊述曾三員二等陳兆崙朱珪梁國治劉星煒于敏中莊存與陳大晦積善錢汝誠金鉉奉寬秦鏞十二員三等馮浩張九鑑張若需李宗文周玉章劉宗魏張裕榮國柱楊方立宋弼鄭虎文邊繼祖陳科捷良誠史貽謨溫如玉陳桂洲陳浩諸錦夏之蓉田志勤錢士雲二十二員四等陳大化毛詠孫人龍邵齊燾陳淦王太岳羅暹春徐堂許集李英張若澄胡廷齡范清沂鍾蘭枝周資陳史奕簪圖轄布邵樹本李龍官傅靖勵守謙毛輝祖陳顧聯朱基隆鈞路斯道陸嘉穎佟保鈕汝騏李實黃晏紹陳慶升三十二員汪廷璣著陞授侍講學士張泰開現出學差工部侍郎員缺著蔡新補授竇光鼎著補授內閣學士兼禮部侍郎楊述曾著陞授侍讀陳兆崙陳大晦俱著陞授侍讀學士朱珪莊存與俱著陞授侍講金鉉著陞授庶子積善著

陞授中允張若需著陞授贊善其侍讀學士陳浩著降補侍讀侍讀羅暹春佟保侍講張若澄俱降為編修侍講學士朱璣降為檢討編修徐堂陸鈞俱著以知縣用庶子周資陳侍講田志勤編修毛詠邵齊燾胡延齡李龍官陸嘉穎檢討夏之蓉王太岳李實賁俱著休致其餘考列四等之員俱著照例罰俸一年考試不到之勵宗萬著降二級調用其侍講學士員缺著張九鑑補授所遺侍讀員缺

著李宗文補授檢討王世仕著以知縣用○又諭昨考試滿洲由別衙門陞用翰詹諸臣既閱其文理又驗其人才分別等次一等德爾泰一員二等馨泰洙蘭泰武極理達椿四員三等德昌圖敏勝保書昌四員四等文元一員德爾泰著陞授詹事府少詹事書昌著降補中允洙馬文元著以七品筆帖式用侍讀學士洙蘭泰侍讀馨泰俱著休致考試不到之侍講學士運泰侍講星德贊善僊保俱

著降二級調用○又諭據福建巡撫陳宏謀奏稱同安縣船戶林順泰商船於上年十一月內在洋遭風失去篷桅飄至琉球國宇天港地方該番目遵依國王之令代為修葺船隻資給口糧俾得回棹並稱已報知國王俟進貢時自有文書聲說等語琉球遠隔重洋該國王等素稱恭順今番目遵伊王令將內地遭風商船代為修葺並資送回籍誠款可嘉著賞賜該國王蟒緞二疋閃緞二疋錦二

疋絳緞四疋素緞四疋以示嘉獎其宇天港番目等亦著該督撫優加賞賚交與該國王查明頒給俱俟貢使回國之便帶往該部先行文該國王知之○命內閣學士竇光鼎侍講莊存與編修錢汝誠在南書房行走○巴林固山貝子策凌端多克故遣官致祭如例○以故納克書達格魯克族百戶索諾木批爾弟索諾木綢襲職○甲寅諭前據給事中范廷楷查出江西鉛山等幫沿途使用陋規

具摺參奏已降旨交各該督撫河漕提鎮逐一查參治罪今漕運總督瑚寶來京朕命將南漕舊規分別應裁應給各款數目與軍機大臣等會議將各省漕船陋例詳查分別裁革立定章程通行曉諭遵守夫因事餽遺借端勒索均干禁令况漕船事關天庾豈容不肖弁役恣行婪賄但據該總漕酌定規例章程之內即有必不可盡革之處則從前各弁役雖借此侵漁而按其情罪究係相沿陋規與營私納賄者有間所有從前令該督撫河漕提鎮查參治罪之處著加恩寬免朕辦理諸務輕重自有權衡裁制全無成見既經查出弊竇自應禁革而經管承辦必不可已之費亦當酌定條款俾知法守嗣後著各該管上司官員不時嚴行稽查如有不肖弁役或將已裁陋規私自婪收或於定數之外多行勒索即據實嚴參將與者受者一併治罪該管官員不行揭報及上司徇隱不即查參別

經發覺定將失察之該督撫提鎮等從重治罪該部即通行傳諭知之○諭軍機大臣等尹繼善奏到傳鈔偽稿案內周麻子等頓翻前供已飛檄江西按察使丁廷讓將施奕度張三管大任郭庾為等押解來寧或係施奕度之稿另有來由或係彭祖立等茹刑狡展此數人中務必追出下落等語看來此案根源已近尹繼善能上緊辦理自可得其端緒應即著落該督務將此案徹底審明完結其施奕度等自應解寧就近辦理如有供出人犯亦當迅速提至江寧面質嚴審不可任其狡卸或不過一二語牽及應查明者即行文該撫訊明招報總以迅速為主愈久愈多翻覆再一支開則愈尋愈遠終不可得其實在來歷矣該督承辦許久若仍以不了懸擱各將奚辭至周承勅等訊供歧誤此時且不必問批示甚明不可因此分營且多瞻顧轉致要犯無著也速行傳諭該督知之○乙卯諭

軍機大臣等各省生息銀兩原為兵丁紅白賞恤而設前因各標營所領原本未歸繳令其善為料理漸次歸足原恐該將弁等經理失宜藉端延緩耳今總兵丁大業乃欲於兵丁賞恤銀兩內減省原定條款以歸足原本甚屬謬誤已據巡撫定長咨駁並傳旨申飭矣但恐各省中或有似此錯會者亦未可定著於奏事之便傳諭知之○丙辰

上詣暢春園問

皇太后安○諭河南陽武封邱祥符延津滑縣等五縣上年河水漫溢秋禾成災業經節次加恩賑卹所有未完乾隆十六年錢糧均應於本年徵收除祥符一縣前次特恩全行蠲免外所有陽封延滑四縣上年錢糧著加恩緩至本年秋收後開徵其陽封延三縣被災較重所有應徵本年錢糧亦著加恩緩至次年麥收後開徵以紓民力該部遵諭速行○又諭甘肅巡撫楊應琚丁憂員缺著鄂樂舜

補授所遺湖北布政使員缺著德福補授浙江按察使員缺著同德補授○諭軍機大臣等甘肅巡撫楊應琚丁憂員缺已有旨將鄂樂舜補授此時甘省現有夷商交易之事巡撫印務不可照常令布政使護理黃廷桂現在巡查甘省著即速傳諭該督令其暫行兼署甘肅巡撫印務俟新任巡撫到肅之日黃廷桂再回西安即已過甘肅亦令仍往甘省暫署○又諭曰莊有恭摺奏拏獲浙江造賣

海票匪犯一案內稱飭行蘇松太三府州縣出示曉諭凡有被誘買受海票者許令據實自首以淨根株等語此事當雅爾哈善奏到時朕即謂不過愚民誑騙錢財非羅田叛黨及傳鈔偽稿之比今李大等既經拏獲押赴浙省質訊按律治罪足矣若復出示曉諭概令買票者據實自首無論被誘之人必不甘心自首且輾轉搜求未免張皇駭聽不應如此辦理凡自首之條俱屬有名無實不過完

案時以為餘波耳何足淨盡根株耶前經申
祺奏及朕明切曉諭令不必行將此并傳諭
莊有恭知之○又諭據莊有恭摺奏辦理傳
鈔偽稿一案本年五月間准浙撫咨拏松江
提塘陳公壽因將該犯及代寫報人史祖賢
拏獲飭司嚴訊不承隨解赴浙省質對復於
六月間准浙撫咨稱訊據陳公壽供出偽稿
得自盤門外女普濟堂董事張世倫等因隨
飭屬飛往查拏並無張世倫其人只乾隆七
年曾有張子倫到堂久經身故因即專札浙
撫囑其詳敘陳公壽全供冀可得間推求而
至今尚未覆到等語雅爾哈善查審吳進義
偽稿來歷遲久未有頭緒今因吳進義案內
供出松江提塘陳公壽密咨該省提犯質訊
雅爾哈善何以俱未奏聞且伊接准蘇撫回
咨欲其詳敘全供何以久未備覆可傳諭雅
爾哈善令其即將現在辦理情形詳悉具奏
尋奏准江蘇撫臣莊有恭將陳公壽並寫報

文之史祖賢解浙質審陳公壽初供得自普
濟堂董事張世倫及咨提張世倫據覆久已
物故臣因陳公壽狡獪異常恐其妄扳無辜
希圖掩飾復將二犯隔別研鞫據史祖賢供
出陳公壽之本生父仰裕天曾給陳公壽新
聞一封再提公壽質審該犯知供出伊父始
實供得自江南之包恆山封送吳進義衙門
是吳進義得自陳公壽之傳鈔已確鑿無疑
隨將陳公壽史祖賢解回江省就近根究仰
裕天包恆山等於六月十六日咨覆在案報
聞○又諭日蔣炳奏據署光州知州謝鏗在
商城縣蘇全市地方拏獲吳承雲到案吳承
雲係逆黨要犯該知州謝鏗能實力緝獲辦
事甚屬勇往著該撫傳旨嘉獎○丁巳
上御勤政殿聽政○諭軍機大臣等前因蔣炳
查看黃河隄工情形奏稱河底受淤向無疏
濬之法惟有將兩岸隄壩加修高厚等語朕
批示此雖無法然兩岸益高束水牆上之策

未有不債事者。仍應悉心講求。取直去灣。俾自行刷汕之法。為庶幾耳。究之蔣炳所奏。原非目下有亟應辦理之河工。不過因親勘河工。為此常談之論。而朕之所批。亦不過統論治河之道。加高培厚。不若取直去灣。庶後此遇有應作工處。俾知所遵守。非令其於此時別開取直去灣之引河也。今顧琮、蔣炳乃會奏於祥符汛十九堡對岸。看得引河一千七百餘丈。蘭陽汛耿家寨對岸。看得引河一千三百餘丈。均應開挖。請於霜降後。遴員分段僱挑等語。則是因朕批而生新工矣。黃河水勢無常。所謂取直去灣。不過因勢利導耳。若欲於河底開挖引河。以待來年汛水開放。夫引河有幾許寬深。遂能容受全河盛汛乎。汛過即淤。工費徒為虛擲。此理甚明。人所易曉。從來河員樂於工作。可圖領帑開銷。不講則已。講則非濬即築。必有當興之工。有如醫者有疾無疾。診必有方。幸而不為大害。否則削

正引邪。往往竟成痼疾。河工似此無益之費。不知凡幾。高斌近年經朕指示。南河稍知裁制。然如前此奏請改運口。謂可永無黃水倒漾之患。而今歲伏汛。仍不免淮弱黃強。黃流入運。則所改運口。其受益安在。顧琮等所奏霜降後興工開挖引河之處。竟不必行。著大學士高斌於秋汛過後。河務稍暇。赴豫查勘。是否應行開濬。或不必挑挖。詳悉審度。具摺奏聞。蔣炳等摺一併鈔寄高斌閱看。凡經管河務之該督撫。將此旨一併諭令知之。○戊午諭軍機大臣等。各省查辦傳鈔偽稿各犯。頭緒紛繁。迄今將及一載。尚未得其端倪。因命軍機大臣等。將歷次奏報各案。逐一分晰查奏。除已經究出來。應行併案辦理外。其查拏未獲。及根究未明者。四十四案之多。該督撫等何以並不上緊查辦。著將所查清單分寄各省。交該督撫等。按照單開各案。應查拏者。作速查拏。應根究者。作速根究。務得首

惡勿致漏網并使待質之犯亦得早為發落
完結毋得遲回觀望徒多拖累并將現在作
何辦理緣由速行明白回奏○又諭據永常
奏稱湖南湘鄉縣知縣卓爾布遵奉撫檄平
糶倉穀有刁民周二朱姓等意欲多買率眾
搬石縣門喝令罷市藩司周人驥等委知府
呂肅高前往臣恐查辦未周即委岳常道淑
寶星赴該縣率同查辦等語此事在於六月
初八日時永常尚在黃州查審逆案至十三
日回署接據該藩臬等稟報即行奏聞而范
時綬近駐長沙何以轉未奏及即云欲待查
明情節再行入告然此等刁民聚眾之事獨
不宜一面查辦一面奏聞耶看來范時綬近
日所辦事務頗不如從前之勇往奮勉即如
今日鑲黃旗漢軍都統所奏參革黃平州知
州王琳應追沈溺鉛飭一案據該撫以王琳
患病未起並無隱匿寄頓盜覆王琳應追之
項既無可著追自應押解回旗交部照例治

罪何得任其託詞遷延以致懸案莫結此等
皆非實心辦事之道范時綬本屬世受國恩
今新加擢用不當如此可一併傳旨申飭○
又諭據麗柱奏稱荆關徵收稅課自乾隆十
六年六月至本年六月除正額外實盈餘銀
三萬一千二百餘兩因今春船隻往來無幾
比較上年雖多收盈餘銀一萬九百餘兩究
不能十分充足等語殊屬不知大體關稅盈
餘銀兩該部定以比較之例原以杜監督侵
蝕之弊今於額稅之外既有盈餘三萬一千
餘兩比較上年計多一萬餘兩則據實奏報
可也何得又云究不能十分充足必如何而
後謂之充足乎此不過以求益為見好之地
而不顧立言之謬所見甚為卑鄙著傳旨申
飭○是月直隸總督方觀承奏前奉諭將永
定河工趕挑幾處所費幾許詳悉繪圖具奏
查新挑引渠自頭工至六工南岸凡七段北
岸凡五段內裁灣取直者十二處挑切淤嘴

一處共費帑二千二百七十餘兩現暢下無阻第漲發後濁流所經常改溜生灘致成兜灣須每年於河涸時隨其形勢酌加經理得旨知道了然亦不可開以工代銷之端也○大學士管江南河道總督高斌奏本年徐州一帶雨水調勻秋禾長發惟淮安雨澤稀少屬望甚殷現虔誠祈禱尚未得降甘霖得旨京師亦甚望雨向以春夏之交今乃夏秋之際益增憂懣也○江蘇巡撫莊有恭奏前以直隸蝻生奉諭旨江蘇澤國而去京稍遠恐汝不肯實力蔓延為害臣蒙簡畀八府三州之地一民一物之病皆無可旁貸四月下旬上元句容江浦泰州報有蝻生早經撲盡淮安海州徐州間復續生亦旋萌旋捕再浙省海糧偽票一案雖審察情形有似市井無賴誑財者之所為而海糧名目頗駭聽聞蘇松人情囂而易動現首犯雖獲復遴員分頭查訪至通省雨澤俱未暢足率屬祈禱冀沛甘

霖得旨覽奏俱悉又批若能長守此天良諸事自當裕如勉之又批朕早以為不過如此而已非如偽稿也正當示以鎮靜若汝令人自首之舉所謂揚湯止沸也又批一得雨澤即速奏聞以慰朕懷○安徽巡撫張師載奏安省上年冬雪頗少恐近水窪地或有蝗蝻發生四五月間據鳳陽屬之宿州靈璧潁州屬之亳州報有蝻子萌動即飛飭員弁及早撲除幸未長翅飛揚未稼毫無妨礙現早禾結實可望豐收得旨外省捕蝗率多掩飾不肯盡力今後勉力改過盡心督捕不可自圖安逸也○浙江巡撫覺羅雅爾哈善奏今年春夏雨多海潮洶湧海寧縣石塘外積沙間被衝卸將軍殿之柴盤頭亦有坍塌幸蜀山一帶漲有新沙塘工無礙臣查浙江海塘情形若溜趨南大壘則紹屬山會上虞被其患或溜趨北大壘則杭屬海寧仁和受其侵惟由中小壘出入則兩岸田廬俱受安瀾之慶

而中疊山勢僅寬六里潮汐往來浮沙易淤且南岸文堂山腳漲有沙嘴百三十餘丈挑溜北趨北岸河莊山外亦有沙嘴五十餘丈頗礙中疊大溜現酌將此兩處漲沙挑切疏通俾免偏礙阻滯之患再將軍殿之柴盤頭係頂衝要工坍塌處速應補葺以護塘根得旨所見頗得領要○山西巡撫阿思哈奏遵旨籌辦晉省鼓鑄銅劬惟有招商承辦之法臣廣行召募據本省商民呈稱情願出貲墊辦購買後分作五年運到按年領價其官價請照乾隆九年劉光晟採買洋銅例每百劬給腳價銀十四兩但恐該商墊用過多或致辦運遲誤并請按每年應辦之數先給腳價三分之一餘俟頭運銅劬交足我給報聞○陝西巡撫鐘音奏本省延川榆林吳堡邠州等州縣五月初雨中帶雹微傷麥禾委員確勘並未成災業經分別重輕借給籽種俾及時補種秋禾其被傷輕重處統俟秋收厚薄

另行辦理再自五月以來雨澤稀少民情屬望甚殷幸於六月初旬各屬已得甘霖早禾滋長得旨覽雖不成災亦應撫綏得所又批如此則何不早奏以後不可○陝甘總督黃廷桂奏五月以來西同二府邠乾二州雨澤缺少六月初旬據各稟雖已得雨未能普透惟西安屬之渭南同州屬之蒲城並乾州與所屬武功四州縣始終缺雨秋田不能布種臣駐劉窩遠不知近日情形因飭藩司速查得雨未透州縣曾否續沛并四處如於立秋前後得雨不拘何項雜糧俱令趕種倘得雨再遲秋成失望即應豫為籌辦得旨所奏是鐘音前日所奏畧遲已批申飭矣○署四川布政使覺羅齊格奏川省五月以後各處米價較昂查上年秋成原未十分豐稔本年夏熟亦止八分又因下游江浙歉收之處商販倍多糧價陡長但本年秋收後倉儲買補既不可緩商客販運又不便禁兼之外省流寓

日增民間日食有增無減欲市價之平恐難
豫必除臨時酌辦外現與督臣籌畫調劑務
使民食無缺得旨覽又批所慮是與督臣商
議無已倉儲之補或可緩耳○四川建昌鎮
總兵董芳奏建昌各營僻在邊徼人多愚蠢
外來入伍者又半屬游手是以兵丁技藝難
於純熟現責令營員每月定期操演并酌加
陞降俾知鼓勵至所屬宣撫司二員安撫司
二員長官司七員土千百戶三十餘員土目

數百其中醇野不一抵任後即諄諄化誨并
令曉諭所屬部落力滌前非如有恃強欺弱
等事許赴地方文武衙門控理並赴建城伸
訴毋得彼此構釁滋生事端現已漸知畏法
得旨好諸凡實力為之○貴州巡撫開泰奏
前奉旨直省懇報升科准業戶自首以一年
為限嗣據平越府水城廳及開州威寧州貴
筑餘慶開泰畢節綏陽平越等州縣冊報乾
隆十六十七兩年自首田地共二千餘畝查

黔省山多田少以通省頃畝計之不敵內地
數大州縣從前雖經查丈閱年已久兼之民
苗舊俗凡田土若干止據穀種之多寡為憑
不知按照弓口合算現今頃畝難保不浮於
糧冊第苗疆情形既不便履畝丈量致滋紛
擾又不得任豪強狡黠影射占侵嗣請飭地
方官凡遇民苗田土之案務親行踏勘逐一
丈量秉公剖斷其有隱漏免其治罪彙入升
科得旨所見是

大清高宗法天隆運至誠先覺體元立極敷文
奮武孝慈神聖純皇帝實錄卷之四百十七

大清高宗法天隆運至誠先覺體元立極敷文奮武孝慈神聖純皇帝實錄卷之四百十八

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次並經桂

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次並經

尋常紀錄十四次臣德瑛經筵講官太子少保內閣學士稽察欽奉 上諭事件處管理

敕修

乾隆十七年壬申秋七月己未朔享

太廟遣誠親王允祕恭代行禮○庚申

上詣暢春園問

皇太后安○諭軍機大臣等碩色奏查閱黔省營伍摺內古州屯軍一項從前所給屯田不敷日用查看山頭地角尚不無餘隙已飭古州兵備道督勸屯軍將附近山崗畸零隙地勤加開墾等語此事似近理而必不可行屯地與苗疆相錯凡所謂山頭地角附近屯田者皆苗地也既經分設屯糧相安已久一令

開墾將來越界占墾無已必有借此侵占苗田生事起釁者若謂屯田生齒日衆苗人又何獨不然此時雖為隙地至開墾之後必不甘心爭奪之端由此而起是所補於屯軍者甚微而關係苗疆者甚大不可因屯軍一時之感激而不為苗疆久遠計也該督身任封疆何乃見不及此一任屬弁等慫恿遽爾准行殊屬非是已諭開泰令就近飭該道等即行停止可即傳諭碩色知之○御史歐陽瑾奏科場定例凡開列具題內外簾官員俱於初六日黎明入朝候旨派出即行入簾近科派出之員每在家探聽遲至午後始齊集入闈雖片時遷延在外而接會親友恐滋弊端請勅禮部有宣旨不到者一面叅處一面請旨更換其不在開列內派出者該部即差人往傳至闈中繕寫進呈硃卷及付梓者考官濫行改削多與原卷不符請於揭曉後核對原卷有改削過三十字者叅處得旨這所

奏是著照所請行。○鑲白旗三等奉國將軍宗室成信乞休以庶子永俊照例襲封奉恩將軍。○辛酉諭軍機大臣等湖南巡撫范時綬奏於善化縣訪獲蘄州奸民張漢元供係羅田匪犯馬朝柱頭人張錫士手下之人根追馬朝柱下落據供見張錫士說馬朝柱現在天堂寨山下南邊大合菴內躲住等語馬朝柱係叛逆首犯斷不得使之漏網該督等辦理此案何以尚未弋獲著將范時綬原摺

字樣卷四十八

鈔寄該督等閱看該處是否有大合菴曾否嚴加搜捕不得因正修等已經正法遂將首犯付之通緝虛文了事也尋湖廣總督永常奏臣密委員弁馳赴天堂寨山下該處並無大合菴亦無馬朝柱蹤跡復准南省咨解張漢元等親提研訊審係販鬻愚民其供出之張錫士等查明亦非逆夥立即省釋至馬朝柱現在嚴督務獲得旨覽奏俱悉○御史陸秩奏每歲旗丁納糧一應氣頭殿底鼠耗等

項每石加收二斗五升內有四升七合八勺以備曬颺折耗臣聞漕米兌倉必先曬颺乾潔始行交收若再徵此項耗米未免額外重出請免其交納至旗丁於水次收糧之日恐因曬颺收兌遂藉口交米艱難百法苛求勢必運官刁難州縣而州縣刁難百姓請令有漕地方督撫糧道飭各該州縣及運弁等徵收漕米毋得額外誅求得旨所奏諭令收漕州縣毋得留難之處是著照所請行餘著議

字樣卷四十八

奏尋倉場侍郎鶴年奏漕艘在通交米惟歲變過多者始令曬颺餘即起兌並非逐幫逐船概行曬颺今御史陸秩請將原備曬颺米免收雖為惜丁起見但此項原在每石加耗二斗五升之內皆閭閻惟正之供非旗丁自行捐備況除去各色耗米外尚餘三升八合仍折給旗丁作回空之用若并將此項耗米免交統計全漕約十六七萬石是以國家額徵之正供為運丁格外之盈餘於正項有虧

於小民無補。自應仍舊徵收。下部議。尋戶部議。每年全漕數百萬石。勢不能盡行曬颺。若并免交此項耗米。恐曬颺未必盡淨。而正項反致虧缺。請嗣後驗看米色。如果乾潔。毋庸曬颺者。即行起卸。將原備曬颺米一併交納。作正支銷。其潮溼者。責令曬颺。計每石折耗若干。將原備米抵補足額。不敷令旗丁買補。從之。○壬戌。兵部議奏各省海洋巡哨。向例止每年春秋二季。派撥官兵巡查。並未有指

實錄卷四一八

十一

定地方。剋期會哨之例。前據閩浙總督喀爾吉善奏。令閩浙兩省鎮臣。總巡洋面。定以兩月與鄰省總巡官兵會哨一次。其分巡營員一月會哨一次等語。經臣部令該督會同閩浙兩省水師提督妥商。并通行廣東。江南。山東。沿海各將軍。督撫。提督。議覆。據原任山東巡撫準泰奏。東省登州鎮水師營。分南北東三汛。派撥官兵出巡。向例不與鄰省會哨。又兩江總督尹繼善會同江蘇巡撫莊有恭原

任松江提督武進陞調任京口將軍薩爾哈岱奏。江省蘇松狼山二鎮各有分管洋面。每年派定將備。按季輪流巡查。毋庸另立章程。又喀爾吉善會同福建水師提督李有原任浙江提督吳進義奏。海洋會哨。必擇安穩島澳。寄棧避風。今議於涵頭港鎮下關銅山大澳大洋山九龍港沙角山等處。令閩浙兩省鎮臣會集巡哨。但海洋風信靡常。不必限定兩月一次遇會哨之期。先遣標員前往指

實錄卷四一八

十一

定處所等候。如兩鎮未能同時並集。即先後取具印文繳送。總以上下兩鎮必赴指定之地。為準。違誤立叅。至分巡洋汛。相去本非甚遠。可一月會哨一次。又兩廣總督阿里衮會同廣東巡撫蘇昌調任廣東提督林君陞奏。粵東海道綿長。且與閩省連界。向未定有會哨之法。請照閩浙兩省一例。會哨均應如所請。令各該督撫等嚴飭總巡各鎮及分巡員弁實力奉行。從之。○宗人府府丞王會汾乞

假養親允之○癸亥

上詣暢春園問

皇太后安○諭軍機大臣等前據胡寶瑤奏稱捕蝗之事將次完竣現往大城霸州一帶覆勘俟立秋以後蝗不復生一無遺患再行奏明回京等語今交秋已經數日尚未見到想覆勘事猶未竣抑或別有萌生之處深慮朕懷再盛暑炎蒸旬餘未得雨澤田禾光景若何急於望雨否一併傳諭詢問著即速據實奏聞尋奏臣由大城文安等處覆勘間有蝻子續生立為撲除現往宛平縣之盧溝橋東南等處搜捕遺孽一二日內即可竣事回京至臣沿途經過州縣田禾皆已穎粟若再得雨固加潤澤即稍遲亦可無妨得旨知道了又批目下望雨甚迫朕憂心如焚何為此寬解之言耶○又諭近日京師天氣炎熱半月以來未降雨澤今已立秋正當禾稼秀實之時旬餘不雨恐於禾稼有妨現在直屬地方

實錄卷四十八

七

一

實錄卷四十八

八

情形若何田禾急於望雨否伏暑中有病暍者否再各屬蝗蝻撲捕是否淨盡胡寶瑤尚未回京或係覆勘未竣或別有萌生近俱未據方觀承奏報甚為厯念著傳諭詢問令其即行奏聞以慰懸望尋奏直屬自六月後得雨霑透田禾秀實勝常近雖逾旬不雨尚可無妨如再於本月望前得雨早晚田禾可期豐收若雨水短缺恐高地稍減分數至伏暑中間有病暍者止係長途奔走之人其居民並無因暑生疫之處再各屬飛蝗撲捕已盡雖有蝻子續生亦隨起隨撲不至為害胡寶瑤覆勘天津已竣現赴宛平龐村一帶再加查勘即行回京得旨覽奏雖屬慰朕之念然恐有不實此際朕已憂心如焚望澤之至矣若五日之期稍遲恐早禾不無減分數之慮而晚田則全失收此雖無可奈何之事然民艱必不可忽視也○又諭據吉慶節次奏稱滄州等州縣蝗孽已經撲捕淨盡現赴青縣

靜海天津一帶再行查視。務盡根株等語。數日以來。未據奏報。或撲捕事猶未竣。抑或別有萌生之處。殊厯朕懷。再盛暑炎蒸。旬餘未得雨澤。田禾光景若何。急於望雨否。一併傳諭詢問。著即速據實奏聞。尋奏各屬蝗孽續生。臣分派鹽屬官員及鎮標將弁分途撲滅。其靜海天津等縣。蝻孽最多之處。臣親往督捕。現在大勢漸減。可無貽害。至各處田禾。經前次得雨深透。雖盛暑炎蒸。地中並不燥烈。

實錄卷四一八

九

尚非急於望雨之時。得旨。此語似屬粉飾。朕殊不信也。○刑部議奏。據湖廣總督永常奏。奏武漢黃德道姜順龍。委令搜捕首逆馬朝柱。退縮玩縱。應照將帥玩視軍務。遷延貽誤。例治罪。得旨。姜順龍身為監司。當擒捕逆匪之時。該督委以總統重任。乃逗遛觀望。託辭推諉。以致首逆遠颺。法司照統兵將帥玩視軍務。苟圖安逸。遷延貽誤。例擬以斬決。洵所應得。但此案縱惡養奸。皆由於知縣馮孫龍

實錄卷四一八

十

一人。業已置之重辟。以示炯戒。姜順龍雖罪無可辭。而於此條定例之後。尚屬初犯。特為法外施仁。免死發往軍臺効力。嗣後有似此者。必當按例即行正法。○免江蘇靖江縣乾隆十六年。新坍折實平田。額徵銀二百一十八兩有奇。米七十石有奇。○以太僕寺少卿增壽保為都察院左副都御史。○甲子。諭熱審減等。向例以立秋日為止。立秋在六月內者。以七月朔日為止。今歲天氣炎蒸。其熱審減等。著展至處暑日為止。○又諭。從前捕蝗不力之各地方官。已據侍郎胡寶瑤直督方觀承。查明分別叅處。其實心勇往之員。前經降旨。令該侍郎等據實查奏。今據奏天津道董承勳。知府熊繹祖。交河縣知縣黃元圮。青縣知縣葉志寬。棗強縣縣丞沈鳴皋。靜海縣守備徐雲龍等。俱能實力搜捕。著交部議敘。侍郎胡寶瑤。周巡猷。澮晨。夕督捕。甚屬勞勩。雖已加恩。仍應敘錄。天津鹽政兼總兵官吉

慶初未經心及朕降旨督飭即親率員弁往來撲捕實心宣力俱屬可嘉胡寶琛吉慶著交部一併議敘○諭軍機大臣等黃廷桂奏稱夷商交易畜貨俱已遵旨如例現在定期過山等語夷人貪得無厭必當示以節制今既將浮多畜貨駁回該商等俱遵奉約束已得天朝控馭之體所有伊等應得貿易利息及本分賞賜觀瞻所係雖不必加厚亦不可矯枉過正故為裁抑前經將此意傳諭綽爾

實錄卷四百六十八

十一

多今黃廷桂署理甘肅撫篆皆伊任內所應辦之事當酌中區畫務令輕重得宜至夷目阿布都拉患病回巢未必非將現在辦理情形告知伊台吉是以託故先回欲於貢使未起程之前抵該部落耳其求醫診視正欲使知遘疾非虛以掩先回之迹皆其詭詐伎倆無足言者邊防宜加整飭但當不動聲色密為防範夷商數百人耳目窺伺不可稍露形迹致駭觀聽以啟其疑黃廷桂當善體此意

新撫鄂樂舜到甘肅併將此諭知之○又諭從前朕赴木蘭圍場時應來之蒙古王台吉等皆迎至波羅河屯今歲朕在避暑山莊過中秋節於八月十六日起鑾進哨該衙門行文蒙古王台吉等令不必赴波羅河屯於八月初旬至避暑山莊領賞其不應隨圍者即由彼處各回游牧並行令青海貝勒達什策凌等知之○乙丑諭軍機大臣等蔣炳奏光山縣知縣譚龍一摺立言殊屬非體此等怠玩偷安之劣員深負司牧之任固不可姑息貽誤但摺內措辭謂其一切政務亦多廢弛而專參其不親歷稽查保甲地方保甲固應實力查辦亦政務之一事耳又豈在一切政務之外乎州縣中誰為實力查點保甲者參之其可勝參乎又以緝拏逆匪馬朝柱等案犯為由豈廢弛政務之縣令不當參乃因緝拏馬朝柱不親歷稽查之一事始當參乎如此立言無知者不謂廢弛溺職自當斥革

實錄卷四百六十八

十二

而轉議用法之過重。且謂州縣之難於奉職矣。將此傳諭蔣炳知之。○又諭。今日召見侍郎。裘曰修。詢及歸途經歷情形。據奏。南來將至滕縣二十里。有營房處一人。衣冠長跪。與前舉動迂踈。語不可了。後為營兵驅逐而去。但聞云有章奏之事。詢之輿人。云其人王姓。係監生。在縣城居住。瘋病年餘。凡遇欽差過往。皆如此跪訴等語。東省往往有此不安分之人。其所稱章奏者何事。於地方實有關係。

續纂卷四百十八

十一

是否病狂。抑或託為瘋癲之狀。著傳諭鄂容安詳悉查明。據實具奏。○和碩簡親王德沛故。賜祭如例。○丙寅。諭軍機大臣等。年來米價在在昂貴。深虞疇咨。上年大學士高斌曾奏動帑委官採買。數盈萬千。剋期取足。市價鮮不驟昂。有妨本地民食。請永行停止。經軍機大臣等議。令該督撫量其緩急。通融籌辦。近復有以停止採買為言者。夫採買以裕倉儲。本為民食計耳。乃因採買而市價益昂。是

未得向後接濟之益。而先受當前貴食之苦。市儈共知採買在所必需。甫屆西成。豫為擡價之地。小民嗜利。習為當然。地方官亦以奉行為職務。在取盈。年復一年。有增無減。籌米價者。率以停採買為言。非無所見。雖未可明立禁令。永行停止。而以今歲情形而論。各省倉儲。尚多有備。即或有需。亦可於附近撥給。所有存貯實數。得十分之三四。即不必亟資買補。其動帑委員採買之處。似可概行停止。

實錄卷四百十八

十四

官買少。則市糶多。米價庶可望其漸平。於民食有濟。著傳諭詢問各該督撫。令將本地收成情形。據實查明。詳悉妥酌具奏。如應行停止。即一面奏聞。一面出示曉諭商民。俾共知悉。尋奉天府府尹鄂寶奏。奉屬倉貯實數。雖及十之三四。但民倉米向有旗人借支之例。貯備宜裕。且該處旗民多以務農為業。一切費用仰藉於糧石。如停止採買。恐本地銷售無多。勢必他處運糶。本年尚屬有秋。請量為

收買價昂即停。直隸總督方觀承奏直屬倉糧有應買補者。止係春月平糶之數。尚屬無多。現今穀豐價賤。請陸續酌買還倉。至八溝一帶。每年交十一月後。蒙古各處米糧紛集。向來動項收買。頗有利益。本年屆期另行籌辦。兩江總督尹繼善。江蘇巡撫莊有恭。奏江省地窄民稠。食指繁庶。倉貯尤宜充裕。但委員動帑。全數取盈。恐於民食有礙。今酌議各屬貯糧。已及十之五者。停止採買。其不及五

平糶奏四三八

五

分者。買至五分而止。浙江巡撫覺羅雅爾哈善奏。浙省各屬倉貯。已足原額十之七。應停採買。湖廣總督永常。湖北巡撫恒文。奏。楚北各屬倉貯。尚屬有盈無虧。本年被旱。各州縣雖賑糶。或有不敷。仍可銀米兼賑。應將動項採買之處停止。署湖南巡撫范時綬。奏。湖南如永州。常德。辰州。沅州。各府並郴。靖。澧。桂。各州。每年例用倉糧。碾運兵米。兼以湖北。江西。浙江等省。向資接濟。亦須緩急有備。今查常

平應買動糶穀三十餘萬石。本年秋收豐稔。請及時買補。山東巡撫鄂容安奏。東省倉貯實數。合計已有十之四。自應暫停採買。但各屬貯穀。多寡不同。上年被災之地。倉貯空虛。附近亦無可撥補。幸本年尚屬有秋。市值平減。請將節年平糶穀十四萬餘石。原存價銀。酌買補倉。並撥給匱乏之地貯用。陝西巡撫鍾音奏。陝省西同等屬。因被秋災。現停採買。至延榆等處。界在邊地。積貯宜裕。缺額糧石。

平糶奏四三八

五

或仍照舊採買。俟秋收後酌辦。陝甘總督兼署甘肅巡撫黃廷桂奏。甘省常平倉額。已足十之七八。即緩急需。用不敷。尚可於附近撥給。應停採買。至本年大勢豐收。糧價減落。各州縣出糶穀。於秋收後。各在本境買還。為數尚少。毋庸議停。四川總督策楞奏。川省各屬倉糧。本年約計出糶三十萬石。常平尚有溢穀。可以抵補。毋庸另行採買。但各州縣衛所倉貯。盈縮難齊。有溢穀多而應買甚少者。有

應買多而並無溢穀者。有易於撥運而不能如數者。有數能敷補而輓運維艱者。現在分別確查辦理。兩廣總督阿里衮廣東巡撫蘇昌奏粵東濱海瘠區山多地少各府州屬產米不敷民食必藉官糴接濟。現在倉貯額穀未及十之三。應停應買。俟察看本年秋收情形籌酌再奏。廣西巡撫定長奏粵西常平額穀止缺十之一。雖本年收成豐稔買補甚易。但貯穀既多自可停止採買。惟本年碾運黔

平糶奏稿下八

十七

省兵糧一萬九千餘石。又來賓宜山恭城三縣共虧穀三千六百餘石。均應買補足額。現擬於平柳慶三府屬產穀之地分買。雲貴總督碩色雲南巡撫愛必達奏滇省跬步皆山不通舟楫各屬產穀止供本境之用。不特隣省不能販運。即隣邑亦艱輓輸。是以常平貯穀例應存七易三年來秋成豐稔并有借糴不及三數者。即各就本境買補為數無多。毋庸議停。貴州巡撫開泰奏黔省各屬倉貯缺

平糶奏稿下八

十八

額不及十之一。毋庸買補。惟新疆各營兵糧每年在古州等廳縣採買屯苗米撥支。又威寧州素不產米。所有鎮標各營兵米於附近收買。均請照舊辦理。俱報聞。安徽巡撫張師載奏安省各屬倉糧總計雖存十之三。而逐細核算其中多寡懸殊。並有存貯不及一二分者。今秋收豐稔請分別辦理。如存穀已十之四以上者。概停買補。其不足十之一二三四分者。視該處市價果平。即在本境收買。第以買足十分之四為率。價貴即止。得旨。如所議行。閩浙總督喀爾吉善福建巡撫陳宏謀奏閩省僻在海疆不通商販。若官倉貯穀太少。難為緩急之備。現今通省大勢豐收。臣悉心籌辦。如倉貯已及原額十之五。而該處糧價尚平。仍令乘時酌買。價貴即止。其不足五分者。統以買足五分為率。至本年被災之廈門廳存穀止及十之一。若一時買足五分。恐本地艱於採辦。請動項赴臺屬彰化淡水二

廳縣產穀之地酌買得旨覽奏所議甚妥咨部知之河南巡撫蔣炳奏豫省向無動項委員採買之事各屬倉貯較原額已足十之五此外尚有出借平糶各項穀應於秋後收買查本年尚屬有秋其民借未還者自可照例催徵至平糶穀石若一併買補恐致價昂應暫停得旨另有旨諭（丁卯）

上詣暢春園問

皇太后安○諭八旗都統等近日無賴匪徒重

軍機處

利放債於旗人生計攸關爾等應留心查辦將查出之人即發遣拉林阿勒楚喀耕種地畝但該處除耕種外別無他務伊等如至彼處仍不改悔著該將軍等查出即發往黑龍江給與索倫等為奴其所放重利債追出不必入官著分貯各旗或獎賞兵丁或賙急貧窮爾等酌量辦理○禮部議覆浙江學政彭啟豐奏稱商籍官生請改歸本籍考試一摺查官卷應試或商或民應隨祖父之籍不得

牽混請嗣後本官由民籍中式者其子孫編入民籍官卷不准復隸商籍如已冒商籍入學者勒限改歸未入學者不得再考商籍若本官由商籍中式者其子孫編入商籍官卷不復於本籍重編官號其同胞兄弟之子雖例得編為官生然必與本官同籍者方准編入若民商異籍者不得借名改歸至商籍應試之人或借族姓鹽引充考商籍不論為官為民即照冒籍例處分從之○又議覆湖北

軍機處

學政葛德潤條奏考試各事宜○各省鄉試同考官酌量裁減查江西廣東河南等省內簾人數前經議准酌增今科舉錄取人數各較減十之三四五不等校閱尚易其可否酌減之處應行令各該撫確查議覆○考試拔貢照鄉會試之例論題以孝經周子太極圖說通書張子西銘參出應如所請自本年為始通行各該學政遵行○鄉試編坐官號止有官員子孫同胞兄弟及同胞兄弟之子今

各省相沿。並將父與伯叔編入。與例不合。請勅部定議。查父與伯叔。編列官生。名義殊覺未安。應勅各該撫學臣。嗣後編列官卷。遵照定例。毋得以不應編之人編入。學政全書。請行增刊。查自乾隆五年以後。凡事關學政。奉到諭旨。及臣工奏准者。尚未續刊。應彙輯成書頒發。從之。○以翰林院侍講學士張九鎰。汪廷瑛。修撰梁國治。編修張裕榮。充日講起居注官。○旌表守正捐軀之河南固始縣

實錄卷四一八

三

民黃三妻蔡氏。○戊辰。

孝懿仁皇后忌辰。遣官祭

景陵。

上至靜安莊。

孝賢皇后梓宮前奠酒。○臨奠定安親王。

上還宮。○己巳。

上幸圓明園。○庚午。

上詣暢春園。問

皇太后安。○諭軍機大臣等。延綏鎮總兵何祥

書。歷任有年。昨春尹繼善。即曾奏其年已七十有餘。不知近來精力何如。尚可勝任否。邊鎮要缺。宜得老成鎮靜之人。但總兵重任。非精力矍鑠者不可。著傳諭黃廷桂。令其據實具奏。尋奏。何祥書。素患腿疾。年力就衰。現已稟請代奏。乞休。得旨。覽。○辛未。

上詣暢春園。問

皇太后安。○諭曰。閩浙總督喀爾吉善。奏。福

建布政司書吏人等。冒領餉銀。種種弊竇。該

實錄卷四一八

三

司顧濟美。於支放時。未能覺察。交盤時。亦不能清查。請解任留閩。俟審定。查明應得處分。另奏。請旨等語。著照所請。顧濟美。解任留閩。俟查清庫項。及各案審定。具題到日。另降諭旨。喀爾吉善。不能覺察。節年積弊。盤查司庫。亦未將侵虧庫項之處查出。著一併交部嚴察議奏。○諭軍機大臣等。喀爾吉善等。奏。奏藩司書吏。冒領餉銀一案。已有旨諭部。此等積蠹。勾結交通。作奸冒餉。恣意侵蝕。情罪至

為可惡。今年兵部書吏有用空白作弊之案。審明時即行正法。所有閩省冒餉書吏人等。即照此辦理。以為蠹役之戒。不可稍存姑息。○又諭據陳宏謀奏稱。雲貴銅鉛銀錫等廠。工作貿易。多係江楚之人。向聞犯罪脫逃者。往往竄入藏匿。馬朝柱籍隸楚省。壤址毗連。設或竄匿各廠。鄉民類聚。殊難辨識。請勅雲貴總督嚴密稽查等語。此奏似有所見。馬朝柱身為逆首。自知罪大惡極。本地難容。潛竄隣省各廠。希冀偷生。亦情之所必有。著傳諭碩色。愛必達。開泰。令將馬朝柱年貌。詳悉開列。督率廠員嚴密查察。妥協辦理。毋俾首惡得以容隱。致有漏網。○以福建按察使德舒為福建布政使。延建邵道來謙鳴為福建按察使。○壬申。諭熱審減等之期。已令展至處暑日為止。但目今雨澤尚未霑足。著刑部仍行減等。俟雨足後。再照舊辦理。○癸酉。中元節。遣官祭。

聖集卷四十八

十一

永陵

福陵

昭陵

昭西陵

孝陵

孝東陵

景陵

泰陵 遣官祭

端慧皇太子園寢。○諭據直隸總督方觀承

聖集卷四十八

十四

提督布蘭泰查奏各標營領餉八旗官馬。內馬蘭鎮總兵什格。原任泰寧鎮總兵馬世岱。並不經心督率餵養。以致臃瘦貽誤等語。馬世岱已經解任。交旗以叅領用。什格亦著解任。來京候旨。馬世岱。什格。俱著交部議處。以為不實心辦公之戒。○諭軍機大臣等。蔣炳奏本年六月間。黃水長發。武陟縣班家溝等二十四村莊。高粱俱被水泡。晚秋俱已損壞等語。已諭令妥協撫綏。俾需實惠。但所奏此

項地畝。上年列入八九分災。及七八分災一語。殊未明晰。上年既至八九分災。何以不早為設法捍禦。致令年年被水成災。既係臨河水到之區。何以向無隄岸。著詢問顧琮。令其會同詳悉繪圖呈覽。尋河東河道總督顧琮河南巡撫蔣炳奏。武陟縣班家溝等處。貼近沁黃。自上年被水成災。本年該處人民。因築小堰禦水。而伏汛過大。下流宣洩不及。仍致被淹。查武陟縣黃河繞其南。沁河環其東北。

實錄卷四百十八

五

沁河繞其西。向來並無隄工者。因四面皆河。且在沁黃交會之處。若建立隄岸。則外灘日漸淤高。一遇沁黃並漲。為害滋大。且此處修築大隄。所保護者。不過數十村莊。及遇水漲隄根。必須添設埽工。糜帑甚鉅。仍不能必其久遠保護。似可毋庸添築。報聞。又諭阿思哈奏。辦理生息銀兩一摺。所見甚謬。前因該督撫提鎮經理不善。延久未清。是以令其善為料理。俾賞卹得霑實惠。原本亦可漸次歸

足耳。乃即有誤會之總兵丁大業欲減賞卹條款。經巡撫定長駁正奏聞。傳旨申飭。不意阿思哈謬誤亦復如此。無論增息歸本。重利病商。萬不可行。即所稱賞卹規條。去其過優過濫。語亦非體。賞卹當有節制。豈不為歸本起見。即可任其過優過濫乎。如果有過濫當裁之處。何必待欲歸足原本。方行辦理乎。前恐各省中有似丁大業之錯誤辦理者。已令於奏事之便。傳諭各督撫提鎮。阿思哈雖未接到。何以亦如此陳奏。著嚴行申飭。

實錄卷四百十八

五

大清高宗法天隆運至誠先覺體元立極敷文
奮武孝慈神聖純皇帝實錄卷之四百十八

實錄卷之四百十八

七

大清高宗法天隆運至誠先覺體元立極敷文
奮武孝慈神聖純皇帝實錄卷之四百十九

後經總管經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

史部經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

世宗廟都尉軍功加十九級隨帶加二級又加二級並量結內大臣戶部尚書經筵講官滿洲都統軍功紀績五次

尋常紀績十四次並德煥經筵講官太子少保工部尚書紀績六次並曹振鏞等奉

教修

乾隆十七年壬申七月甲戌

上詣暢春園問

皇太后安○諭騎射乃滿洲要務從前旗人練習技藝皆知以弗及於人為恥近來各圖安逸並不留心操練朕欲挽積習而復舊制親先騎射不憚勤勞率衆行圍又屢經降旨訓飭爾等終不悛改該管大臣等亦不肯實心教導著諭領侍衛內大臣八旗都統前鋒統領護軍統領等嗣後武職內凡陞轉承襲各官引見者除例應射箭無庸置議外其不應

射箭之印務章京及侍班官員亦皆令其射箭。○乙亥。

上御勤政殿聽政。○諭軍機大臣等直省錢價昂貴。屢經籌辦。迄未平減。前有言及畿輔村莊富戶藏積錢文者。部令該督勸導發賣。近日山東布政使李渭復奏稱富戶積錢。北省多有此弊。請立定限制。不得過五十串。其舊時多積錢文。限半年出賣。如仍前多積。經地方官查出。按時價官為易換。以充存留錢糧支給之用等語。夫國家之鼓鑄有限。而民間之藏積無窮。今鼓鑄日增。流通日少。則所云藏積之弊。洵亦向來所有。但如該布政使所奏驟行之恐不無滋擾。應先行明切曉諭。以國寶當廣為流通。勸導各富戶隨時出易。以便民用。易銀藏貯。無損其富。而錢多價減。於衆人均有裨益。如諭之不從。再治以官法。多派能員實力查辦。按時價以官幣換易。勿令壅滯不流。或亦疏通之一道。將此傳諭各省。

督撫知之。○又諭據總督尹繼善奏。吳淞營參將孫鼎元於上年八月內將偽稿呈送武進陞閱看。又始終隱匿。不據實首報。請將該弁革職拏問等語。孫鼎元既經呈送閱看。自應向伊逐層根追。但尹繼善辦理此業務在究出捏造首惡。明正典刑。若不過輾轉傳看之人尋枝數葉。頭緒紛繁。益難辦理。至於武弁中互相傳閱不行首報者。如從前碩色叅奏唐開中及李朝英等案。朕俱加恩寬宥矣。孫鼎元現在該督研訊。自可得其實情。若僅止呈送情節。應俟全案完結之日。交部分別定議。倘其豫知偽稿根源。有心隱匿。不據實首報。再行奏明革職治罪。可傳諭尹繼善知之。○又諭。自六月中旬以後。畿輔各屬雨澤短少。炎熱異常。時得微雨。亦未霑足。朕心深為憂灼。江安亦有望雨之奏。東省雨澤若何。今日李渭奏到秋禾情形。但稱雨水調勻。得無少有粉飾乎。田家是否望雨。著傳諭鄂

容安。令其據實即行奏聞。以慰朕念。前詢滕縣人攔告欽差一事。何亦尚未覆奏。一併確查速行具奏。尋奏。東省夏秋之交。各屬得雨霑足。田禾暢茂。李渭所奏雨水調勻之處。確係實情。至攔告欽差之監生王世懋。臣委員密往滕縣訪拏解訊。驗其情狀。瘋狂屬實。其搜出字帖三紙。並非章奏事件。臣隨飭解回滕縣。交伊親屬管束。報聞。○又諭曰。黃廷桂奏到。陝省西安等屬雨澤缺少。及先後得雨尚未霑足。各情形。聞之益增焦灼。該省既如此。待澤孔殷。鐘音身在省城。何以不早行具奏。昨因奏聞遲緩。已於摺內批示。今日奏定。邊被水摺內。亦僅及本處山水為災。此乃一隅之患。而各屬曾不得雨霑足之處。何以並未提及。農田切要。任封疆者。應刻刻經心。何得如此稽遲。致厯懸念。著將目下曾否得有透雨。農田光景若何之處。迅速奏聞。立秋已半月有餘。收成分數。大局已定。設或歉收。即

應豫籌撫綏之道。無得稍為遲緩。更不可稍為粉飾。○和碩莊親王允祿等議覆禮工二部會奏。

孝賢皇后升祔

太廟

奉先殿一摺。按自古皇后祔廟之禮。經無明文。然既葬之後。几筵既徹。必祔廟以依神。推之后禮。應亦相同。查康熙十三年。

孝誠仁皇后山陵禮畢。升祔

奉先殿。未祔

太廟。今

孝賢皇后升祔大禮。命臣等再加酌議。謹考據前事以聞。得旨。

孝賢皇后神主。遵照

孝誠仁皇后之例。奉安

奉先殿。○以工部尚書孫嘉淦充經筵講官。翰林院侍講學士德昌充日講起居注官。○以太僕寺卿楊嗣璟為宗人府府丞。○丙子。諭

曰。前鋒護軍。皆應嫻習騎射。但每月雖照定期射箭。該管大臣等。視為具文。未必盡心教訓。及軍政屆期。伊等亦不過臨時稍為演習。事過即置而不問。技藝何由熟練。從前

皇考忠兵丁騎射最要。特降諭旨。揀選前鋒護軍引見。曾有加恩錄用者。有因騎射平常。將該旗大臣治罪者。此皆訓養兵丁之道。著諭前鋒統領護軍統領等。今歲俟朕迴圍後。於護軍校前鋒護軍內。將人材騎射可觀者。每

翼各揀選前鋒校二十名。前鋒二百名。上三旗每旗各揀選護軍校二十名。護軍二百名。下五旗。每旗各揀選護軍校十五名。護軍一百五十名。復奏派王大臣閱看。於每翼內揀選前鋒校。前鋒十五名。每旗內揀選護軍校護軍十名。帶領引見。嗣後每年照此辦理。○大學士等議覆陝西布政使張若震奏稱。直省地方遼濶。窮民多就山澤謀生。其中恐有奸匪煽惑愚民。請豫為防範稽查。其歷久封

禁之山。不許奸民捏端開採墾種。又戶部尚書蔣溥奏。私挖硝磺一項。亦請嚴加申禁。各等語。查各處深山大谷。凡係種麻種靛挖礦開煤。樵採。捉捕。各項民人會聚之處。或有匪徒竄伏。應令各督撫。通飭所屬州縣。勘明申報。該管巡道。會同營員等。夏冬二季親查。至閱久封禁之山。產硝產磺之地。並令嚴行查禁。如有奸民偷挖情弊。即將地方官弁叅處從之。○丁丑

上以秋獮木蘭奉

皇太后自圓明園啟鑒。○詣

皇太后行宮問安。○諭軍機大臣等。永常等查奏。僧正修原供內稱。馬朝柱並不識字。又吳成雲等姓名。俱係捏造等語。馬朝柱前經查出家信等項。雖不成字句。亦非全不識字之人。且豫省現在拏獲吳成雲。供係馬朝柱妻弟。則虛捏姓名之語。似亦未可盡信。業經解楚。正可追究。馬朝柱實在下落。總之此案非

獲馬朝柱到案。仍未足以嚴首惡而正人心。該督等尚當以嚴緝首犯為要。將此傳諭知之。○是日。駐蹕南石槽行宮。○戊寅。

上詣

皇太后行宮問安。○兵部尚書舒赫德。戶部侍郎兆惠奏。臣等將施奕源詳加鞫訊。據供。偽稿係伊兄施奕學。前在京時。自外拜客持回。得於江西提塘劉士祿處。其人現已年滿回籍。及再加追究。則又頓翻前供。臣思此案江西發覺年月最早。就此根究。或可窮其源流。施奕源幼年狡猾。所供劉士祿給稿。施奕學之處固難遽信。然亦未必無因。應將現供情節。寄知尹繼善鄂昌。令其一併查辦。得旨。尹繼善等處。速行文查辦。但不可存閉門窻月之想。若此間根究得實。非汝二人之功乎。又批。此人雖年幼。斷非祇此一人在家。如僕人親戚之類。原可隔別訊問。錯綜對究。即如施奕學拜客所持來。其家人必有知其果否。

拜客果否持來者。若盡不知。即可明說施奕源之妄供。此皆易明之處。而汝等總未言及。蓋汝等心中。總橫一此難辦之想。此殊不解。○是日。駐蹕密雲縣行宮。○己卯。

上詣

皇太后行宮問安。○諭朕此次巡幸木蘭。時屆西成。禾稼接畛。雖經嚴飭隨從人等。不許踐踏。猶恐不無蹂躪。著加恩將經過州縣地方。本年應徵地丁錢糧。蠲免十分之三。該督方觀承查明照例辦理。該部即遵諭行。○是日。駐蹕要亭行宮。○庚辰。諭此次東三省學習隨圍人員內佐領等官。每人各賞官用緞二疋。防禦驍騎校等二人。共賞官用緞一疋。兵丁等各賞給一月錢糧。以示恩賚。○兵部尚書舒赫德。戶部侍郎兆惠等奏。施奕源指供伊兄施奕學給看偽稿。並鈔寄江西。與施奕度閱看。及訊之施奕學在京僕人等。並無確証。現聞施奕學來京會試未到。應將施奕源

暫行拘禁。俟施奕學就獲時。再行質訊。報聞。
○是日。駐蹕兩間房行宮。○辛巳。

上詣

皇太后行宮問安。諭軍機大臣等。據尚書舒赫德侍郎兆惠所奏。查審施奕源傳鈔偽稿一案。以此案現在究至江西報房。今施奕源所扳劉士祿。既係提塘。則所得不為無因。已飛咨該督撫留心查辦等語。看來此案前已追至報房章錦。今施奕源又供出提塘劉士祿。則線索似屬較近。若從此實心根求。必可得其來歷。該督等此時諒已接到咨文。可傳諭尹繼善。令其上緊查辦。其施奕學之稿。並宜逐層嚴究。務得首惡。明正典刑。以彰國憲。若再將就了事。輾轉稽延。仍復歸於無著。尹繼善亦自知輕重也。○又諭據鄂昌所奏。查辦傳鈔偽稿一案。稱羅鎮杭所傳偽稿。遞究係得之劉安徐朝周等。其稿內原有偽批。各犯堅供不知是何人添入等語。稿內偽批。必

有添寫之人。何得輕為脫卸。並不上緊根求。則凡屬添註批點之犯。皆可以稿內原有為辭。均得從輕發落矣。況偽稿得自何人。則偽批即可從此追問。逐層嚴究。諒無不得之理。徐朝周既在患病。俟該犯病痊之日。仍令該撫詳悉研究。毋得再為顛預了事。再另摺所奏羅潤珍呈首李開花一案。將該犯解赴原籍安置約束。辦理又復錯謬。羅潤珍造言生事。於學政轎前遞呈。若非因其瘋疾。本應置之重典。此等癲狂之徒。自宜嚴行拘禁。或永遠枷號。方為妥協。但行解回原籍安插。保無日後復有潛行他往。妄言惑眾之事。著傳諭該撫。令其速行湖南巡撫范時綬。遵照辦理。近來鄂昌所辦諸事。並不實心。惟以沽名邀譽。將就了事。若再如此。則不能承受恩澤矣。可傳旨嚴行申飭。○又諭據范時綬所奏。湘鄉縣刁民周二等聚眾抗官一案。尚屬照例查辦。不至草率。至所稱知縣卓爾布。激成事

端辦理不善。現在會疏題叅等語。尚未見其妥協。若因刁民滋事。將地方官即登白簡。將來愚頑之徒。必且以此脅制官長。殊非整飭刁風之道。但既已具題。必已摘印。看來卓爾布亦非稱職之員。此後若遇此等案件。應於事後酌量改調。或再行叅革。均未為晚。可傳諭知之。○是日駐蹕常山峪行宮。壬午諭各處看守行宮之千把總。從前曾經量加擢用。近年以來。久未舉行。其中人材弓馬。或尚有可以造就者。所有口外看守行宮之千把總。即著總管阿敏爾圖酌量保送。交總理行營王大臣揀選引見。其在口內者。著總管豐盛額保送。俟迴鑾時揀選引見。候朕量加擢用。以示鼓勵。○江蘇巡撫莊有恭疏報吳江震澤二縣。乾隆十六年新漲田蕩四百三十四頃三十七畝有奇。坍沒田蕩八十四頃二十九畝有奇。分別升蠲額賦有差。○緩徵江蘇靖江沛縣宿遷沐陽四縣水災。電災新舊

額賊兼貸飢民。○以陝西督標中軍副將圖爾禪為直隸馬蘭鎮總兵官。○是日駐蹕喀喇河屯行宮。癸未

上詣

皇太后行宮問安。○是日駐蹕避暑山莊。至八月癸卯。皆如之。○甲申。諭軍機大臣等。據四川總督策楞奏稱。盤獲形跡可疑之湖廣人一名。年貌疤痕。鬚髮齒牙俱與馬朝柱相似。詭名張國正。及設法研訊。又供名叫柳春來。現在解楚質審等語。此人年貌齒髮。既與馬朝柱一一相肖。且據供姓名屢易。而質之流犯蘇天章。又並非所供姓名。其形跡甚屬詭秘。或即實係馬朝柱。捏供狡飾。亦未可定。現已解楚質審。可傳諭永常務令詳細研究。并提逆黨一一識認。得有確據。即速奏聞。此等叛逆重犯。該督等斷不致稍為忽視。亦必無草率遷就。希圖了事之理。但不可因川省獲有此犯。遂爾少弛捕緝。轉使真正渠惡得以

乘間遠颺也。尋奏臣接准川省咨解張國正到楚。即提現禁逆犯馬朝柱家屬。并逆夥多人。細加質認。訊出張國正。即柳春來。實非馬朝柱。報聞。又諭向聞濱海地方有行使寬永錢文之處。乾隆十四年。曾經方觀承奏請查禁。朕以現在制錢昂貴。未令深究。且以為不過如市井所稱剪邊沙板之類。仍屬本朝名號耳。乃近日浙省搜獲賊犯海票一案。又有行使寬永錢之語。竟係寬永通寶字樣。夫制錢國寶。且鑄紀元年號。即或私鑄小錢。攙和行使。其罪止於私鑄。若別有寬永通寶錢文。則其由來不可不嚴為查究。又聞江淮以南米市鹽場行使尤多。每銀一兩所易制錢。內此項錢文幾及其半。既鑄成錢文。又入市行使。則必有開鑄發賣之處。無難查辦。著傳諭尹繼善。莊有恭。令其密飭幹員。確查來歷。據實具奏。浙閩濱海郡縣一併令該督撫等密行查辦。不可因從前之失。於查察遂爾稍

存回護。並宜鎮靜辦理。勿令胥役人等借端滋擾。聲張多事。尋尹繼善。莊有恭等奏。寬永錢文。乃東洋倭地所鑄。由內地商船帶回。江浙之上海。浙江之寧波。乍浦等海口。行使尤多。查寬永為日本紀年。原任檢討朱彝尊集內載有吾妻鏡一書。有寬永三年序。又原任編修徐葆光中山傳信錄內載市中皆行寬永通寶。是此錢本出外洋。並非內地有開鑄發賣之處。但既係外國錢文。不應攙和行使。臣等現飭沿海各員。弁嚴禁商船私帶入口。其零星散布者。官為收買。解局充鑄。報聞。丙戌。吏部議准貴州巡撫開泰奏。稱威寧一州夷獮雜居。界連四川。並與雲南之東川。烏蒙。昭通等處接壤。實為黔省極邊要地。請將原駐安順府城之貴西道移駐威寧州。彈壓從之。丁亥。諭據浙江巡撫雅爾哈善以原任提督吳進義曾見偽稿。既不立時查拏。於前復捏詞奏辯。掩飾於後。昏愎負恩。擬以斬

候吳進義曾見偽稿於簽押套中誤行發出此亦事之所有者然其罪不過在於未行奏報耳使其能遵旨據實自承不獨並無大罪且尚不至去官惟其捏詞掩飾必欲自居於無過之地轉致罹於重罪但念其曾為封疆大臣年已衰老既經革職著格外加恩免其治罪○又諭兵部議奏滿洲千總海祿以母老請改補近省一摺滿洲在旗原有行走之處何必改補近省嗣後此等員弁如有以親老為請者俱著回旗在原處當差○諭軍機大臣等雅爾哈善奏松江提塘陳公壽史祖賢准江省解浙質審陳公壽初供得自普濟堂張世倫及咨提張世倫據覆久已物故復隔別研鞫史祖賢供出陳公壽本生父仰裕天陳公壽又供得自包恒山已將陳公壽史祖賢解回江省就近根究等語偽稿來歷頭緒紛繁狡黠之徒每指供病故人犯冀其無從質對無從追究此情形所必至是以上年

十月內即經傳諭各督撫不得委之已故之人苟且完結今陳公壽初供已故之張世倫及史祖賢供出伊父始據實改供其狡獪情形比之到案供明者尤為可惡現在江蘇質審如別有情節自應按律定擬即僅止傳鈔亦當較尋常傳鈔之犯加等治罪將此傳諭該撫知之○又諭曰陳宏謀奏閩省傳鈔偽稿人犯陳旺供係得自病故之陳銘據德化縣確查委無捏飾取結呈送又范振智供係江西羅紹文所給羅紹文已經病故等語傳鈔偽稿一案層層根究已如入海量沙至一委之病故則更無從究詰狡黠之犯希圖脫卸已罪計必出此是以上年十月內即經傳諭各督撫等無得將已故之人混行搪塞苟且了事今閩省案內供出病故者即有兩人該撫豈未見前旨耶陳宏謀向有此好名之習客爾吉善亦聽其如此姑息了事耶俱著傳旨申飭令將各案犯嚴切根究據實奏聞

其供係得自病故之人即實係病故亦應照尋常傳鈔者加倍治罪。庶嗣後不敢妄供而偽稿一線不致中斷矣。并諭各督撫知之。

戊子

上詣

皇太后行宮問安。○是月直隸總督方觀承奏臣在防汛工次據固安通州涿州等州縣各報得雨四五寸不等得旨今日此雨畧解愁煩仍望優渥耳。又奏臣工次續沛甘霖約

計入土八寸秋禾可望有收得旨此處分數殊不及迤南雖云少慰仍屬望澤也。○兩江總督尹繼善奏傳鈔偽稿一線逐層究至原署江西糧道施廷翰長子施奕度得之伊弟施奕學從京寄出請將施奕學拏解京師以懲質訊得旨又屬無著落甚覺煩懣也。○又奏下江之江蘇常鎮揚通上江之太寧池鳳滁泗等府州屬各被旱輕重不等現在委員履勘並豫籌賑撫事宜得旨京師夏杪秋初

亦甚望雨。不知南省此際得雨否甚切縣念如致成災一切綢繆之處須豫為留意。江蘇巡撫莊有恭奏銅山沛縣沿河灘地因黃水驟漲淹損秋禾衝塌房屋現在查明撫恤得旨是要協辦理毋致失所。○江南河道總督高斌奏黃運湖河秋汛各工平穩惟淮揚一帶秋田望雨甚殷現在虔誠祈禱得旨京師雖得有雨澤而未優覽奏益切焦思將來致成災否速行據實奏來尋奏江北淮揚徐海各屬甘霖普降得旨欣悅覽之京師亦得霑足晚田半收早田仍豐若關外則仍多稼與與也。○安徽巡撫張師戴奏安省各屬早稻豐收中晚二稻亦俱秀實惟雨水未能霑足現在朝夕虔禱得旨覽奏俱悉若致成災不可掩飾並將妥協撫恤之事豫為講求民瘼不可忽視也。○又奏泗虹靈宿等州縣蝗蝻萌生臣親往督捕淨盡得旨此猶恐有未盡之處即如七月半尚有蝗蝻此非撲捕不

力而何今歲姑寬汝明年若仍不先事豫防將罪及汝汝亦何必為一二劣員取名市惠哉○江西巡撫鄂昌奏臣接准舒赫德兆惠咨開偽稿一案審係施奕學得之江省回籍提塘劉士祿臣隨將劉士祿拘訊據供此稿係前任提塘時管總人湯賜聯得之趙殷中家查二人現在京中請飭舒赫德等立行拘究至施奕學已在江省拏獲同劉士祿並解江寧質訊得旨好○閩浙總督喀爾吉善等

奏前奉旨令近邊各省將附近番夷形貌衣飾繪圖呈覽查閩省界在東南外夷番衆甚多臣等繪圖進呈通計畚民二種生熟社番十四種琉球等國外夷十三種種各有圖圖各有說凡風土嗜好道里遠近無不具載報

聞○福建巡撫陳宏謀奏閩省濱海各州縣七月間風雨驟發多被淹傷內惟南安同安二縣廈門金門二島被災尤重現在查明撫恤得旨覽奏俱悉其應撫恤者實力詳查俾

需實惠可也○又奏閩省各屬屯糧定例歸縣徵收但查興化府屬之仙遊縣額徵屯米專供府城防兵之需該縣距府城百有餘里自縣運糧支放勞費徒多請將屯糧交納府倉以便就近放給兵米報聞○湖廣總督永常奏楚屬秋田缺雨現在虔誠祈禱得旨京師亦然六七月之間乃望雨實為希有之事目今得雨否速奏以慰朕懷尋奏各屬雖節經得雨未能一律霑透內惟鍾祥京山荊門

鄖縣保康東湖等六州縣旱象已成現委員查明辦理得旨覽奏俱悉○又奏逆案要犯吳方美吳方曙現經緝獲臣等嚴加鞫訊並根究馬朝柱下落得旨備極嚴刑設法追究務得正犯方了此局勉之又批此二犯既得再上緊緝捕恐彼遊魂亦難兔脫矣○又奏謝子額勒登額授副都統恩得旨擢用汝子實因汝辦逆案可嘉當善為教訓令其成器以全汝顏面○河南巡撫蔣炳奏豫省各州

四九五

縣於七月初旬得雨五六寸不等得旨覽奏欣慰但五六寸之雨不尚覺微不足乎又奏豫河險要工程必賴物料濟用查懷慶河南府屬二三州縣間產楊槐經臣分飭沿河各廳禁民濫伐以示撙節但工程所用日繁難資接濟請撥項前赴江省豫購杉木備用得旨此事仍應力行不可廢弛十年之計豈宜顧目前耶陝西巡撫鐘音奏陝省西安鳳翔同州乾州等府州屬秋田望雨甚殷現

平定縣志卷九

三

在虔誠祈禱得旨此奏似屬少緩以後不可朕惟以農務為重也又奏定邊縣山水驟發人口房屋多被淹傷現已查明撫恤得旨覽奏俱悉山水為害不過偏災所要者雨暘耳前奏望雨之處今已霑足否何無一言耶陝甘總督黃廷桂奏本年夷商赴肅貿易有浮帶畜貨不遵定例者業經駁令帶回其在哈留放牲畜並嚴禁客民私相交易再安西一帶營務邊防俱關緊要臣因提臣綽爾

平定縣志卷九

三

多尚係新任將籌辦各事宜詳悉告知得旨知道了卿看綽爾多能勝此任否尋奏綽爾多人甚老幹但安提有統領官兵應援哈密之責其能否相機籌辦尚未確有所見報聞又奏夷商交易一事臣面飭鎮臣馬得勝妥協辦理得旨此人外剛而內柔尚慮其不無遲回觀望也又奏安甘涼肅在厥孳生馬匹歲漸蕃衍雖經撥有弁兵牧放而馬多人少調習不能遍及請令各標營酌派步兵一二百名輪往牧廠分給馬駒乘騎使之馬兩習又安西各營將備等官於各處道路水草邊防隘口未能熟悉應令安提按季量派弁兵分巡各卡既以習勞兼能曉悉邊務得旨覽奏俱悉安西提督綽爾多奏哈密沿邊一帶卡座臣現擬親往查勘得旨若尚未起行俟貿易夷人回巢後再行往查不遲新授廣東提督胡貴具摺謝恩得旨知道了諸凡勉一實字自然勝任快愉也

大清高宗法天隆運至誠先覺體元立極敷文
奮武孝慈神聖純皇帝實錄卷之四百十九

實錄卷之四百十九

四

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十

監修總裁官經筵講官太子太傅文淵閣大學士文淵閣領閣事領侍衛內大臣侍衛內大臣
吏部尚書禮部尚書兵部尚書刑部尚書工部尚書戶部尚書各部院寺司官等

吏部尚書禮部尚書兵部尚書刑部尚書工部尚書戶部尚書各部院寺司官等

總纂官經筵講官太子太傅文淵閣大學士文淵閣領閣事稽察欽本
上諭事外巡官理刑部戶部工部事務

世宗憲皇帝御筆加十九級隨帶加二級又加二級並重誥大臣戶部尚書鑲黃旗滿洲副都統軍功紀敘

皇帝紀敘十四次並鑲黃旗滿洲副都統軍功紀敘六次並曹振鏞等奉

敕修

乾隆十七年壬申八月己丑朔諭此次交與

平定公同下二

一

直隸各標營餽養官馬廐分充足總督方觀
承提督布蘭泰均能留心董率著交部議叙
吏部議准原任甘肅巡撫楊應琚疏稱甘
屬各廳學等從前鑄給印文多與官銜不符
請改鑄頒給等語應如所請改鑄甘肅臨洮
府儒學印為蘭州府儒學印蘭州儒學記為
狄道州儒學記狄道縣儒學記為皋蘭縣儒
學記臨洮府經歷印為蘭州府經歷印洮州
衛儒學印為洮州廳儒學印監收莊浪倉糧

關防為涼州府莊浪茶馬同知關防莊浪在城驛為平城驛記蘆塘松山二驛為松山驛記王鉉大壩二驛為三眼井驛記古浪驛為營盤驛記西寧衛土官指揮使為西寧縣土官指揮使印西寧衛土官指揮同知印為碾伯縣土官指揮同知印莊浪衛土官指揮使為平番縣土官指揮使印莊浪衛土官指揮僉事為平番縣土官指揮僉事印陝西布政使司照磨所為陝西甘肅布政司照磨所印其莊浪縣儒學鑄給莊浪縣儒學記從之○江西巡撫鄂昌疏報南昌進賢永豐萬安永寧樂安建昌安義德安南康信豐定南等十二縣首墾老荒續荒及額外新生田地山六十三頃五十五畝有奇○四川繼事田土百戶募車故以子三春襲職德爾格忒宣慰司喇嘛彭錯丹巴故以喇嘛魯朱江錯襲職○琉球國使臣鄭國貞在閩病故賜卹如例○旌表守正捐軀之山東沂水縣民徐小四妻

馬氏湖南桂陽縣民廖爾達女廖氏庚寅諭軍機大臣等傳鈔偽稿之施奕學已據趕回江西於七月二十一日拏獲看來此人形迹可疑其得稿甚早由此追尋來歷或可得一實在根據著傳諭尹繼善令其嚴切追究不可草草放過且伊父遣家人追回江西更恐有串供彌縫之處不可不留心嚴訊并提塘劉士祿恐亦是一近線此案淹纏不已深可憤悶其悉心研鞫無怠莫復致輟轉終歸子虛也○又諭曰喀爾吉善等奏稱吳進義傳看偽稿一案據陳公壽沈翼天等衆供如一吳進義看過偽稿百喙難辭既不查拏於前又復捏詞奏辯於後比照知情故縱律量為末減擬斬監候等語此案初奏到時朕即以吳進義年老昏愊署中案件文移必不能一一照料其誤從簽套發出自屬情理所有設於彼時據實陳明朕必原情曲宥即初奉諭旨時自知悔悟據實奏明亦不致罹此重

罪乃屢屢具摺強辯到案堅不承認必欲盡情推卸自居無過之地不知傳送交發各有經手原人伊即倚恃老病而衆供確鑿斷不容掩今既按律定擬情無可原然朕仍欲格外加恩免其治罪但罪雖可免而終始情節不可不明著將另奉諭旨令吳進義閱看并追詰其實在果曾閱看與否彼之狡供不承者畏治罪耳今既許以加恩伊若仍不將實情吐出則全是無心肝敗類之尤矣其另旨

且行封存俟訊明後著即將原供奏聞再為裁定其案內人犯照擬發落完結（辛卯）

上詣

皇太后行宮問安 諭從前因長蘆各商積欠甚多今於每引加鹽五十觔分派行銷續經部覈每年應增課銀八萬九千餘兩但蘆商積困之餘舊欠甫清若按觔加課商力未免拮据著將所加鹽觔減半納課永為定額其乾隆二年至六年應追未完加觔課銀一十

四萬餘兩著一併加恩豁免以示卹商之意軍機大臣等議覆長蘆鹽政吉慶奏蘆東各商自用公費銀兩請免解交內務府一摺查蘆東公費原係各商自行攤湊作一切公事之用自前任鹽政麗柱奏請歸公按年起解各商辦公無措復需攤派為累滋多應將此項銀兩仍留為蘆東二處各商辦公之需不必令一併解交從之 壬辰遣官祭黑龍潭

昭靈沛澤龍王之神玉泉山

惠濟慈佑龍王之神○吏部議覆浙江按察使德福奏稱各州縣竊盜案件向例止令該管上司於年終覈其緝獲多寡別功過未經定有承緝處分但竊盜滿貫之案與零星攫竊者異若漫無責成任其疎縱於法未合應如所請嗣後州縣承緝滿貫竊盜重案照承緝誘拐等犯例勒限緝拏限滿無獲照不實力察訪逃竊例議處至所稱地方官規避

處分抑勒短估應照盜案內嚇阻事主抑勒改供例議革未免過重請改照不應重私罪律降調從之。癸巳諭軍機大臣等偽稿一案現在尚未完結各省查辦傳鈔各犯往往露章叅劾員弁及審結一案後即題請交部覈擬此甚非是傳鈔人犯所以必須輾轉追訊者專為根究正犯今正犯未得而徒於傳鈔之人紛紛題達見之郎鈔此所謂舍本就末未免張皇駭聽嗣後俱且不必具題交部

即有關涉文武員弁者一面具奏一面但令咨部存案其餘一切發落人犯除隨時奏報外統於通案完結之日按省彙齊咨部查覈并可不必逐一咨部可於各督撫奏事之便傳諭知之。○又諭曰定長奏到桂林盤獲僧俗兩人窮詰至再據供係匪犯吳方曙夥犯李興樓并供出馬朝柱藏匿湖南城步縣地方飛咨會緝現將吳方曙李興樓押解楚省質審等語此等匪犯狡詐百出向來長途押

解不過循例鎖鑰撥役防護最易脫逃著即速傳諭定長及該撫范時綬務須選擇強幹弁役嚴密防範不得稍有疎虞至所供馬朝柱藏匿處所苗寨岩洞俱有地名著傳諭范時綬務須嚴緊搜捕不得避失於查察之咎轉致疎縱則其咎更重至吳方曙一犯前經永常奏稱已經拏獲審明正法何得逃往粵西若非吳方曙何以軍師稱號及詰盤謀叛事發逃竄為僧種種符合其中孰真孰偽則已正法之吳方曙又為何人此處殊有關係可傳諭永常令其將新獲之吳方曙詳悉研究不必迴護據實速行奏聞尋奏臣前獲逆犯吳方曙衆証確鑿實係正犯無疑其粵省新獲吳方曙應屬假捏但既據粵撫咨稱該犯供出馬朝柱藏匿之處臣隨飭員弁前往城步縣搜捕並無馬朝柱蹤跡挨查各苗地亦無金雞崗東坡寨等處現在飛咨粵省將假冒吳方曙等犯解楚質訊報聞。○甲午賜

扈從王公大臣等宴。命刑部左侍郎覺羅勒爾森內閣學士蘇章阿太常寺卿德通為繙譯會試考官。命禮部左侍郎呂熾為會試知貢舉大學士陳世倌禮部右侍郎高壽為正考官內閣學士鄒一桂為副考官。乙未命內閣學士寶光兼提督河南學政。丙申諭曰在京總理事務王大臣和碩履親王允禩等奏稱初六日主考官官入簾時於內簾監試御史蔡時田行李內搜出關節二紙外簾監試御史曹秀先認係伊姪舉人曹詠祖筆跡請交刑部審擬等語。科場弊竇自奉皇考世宗憲皇帝嚴加釐剔內外肅清朕臨御以來留意整飭謂當諸弊盡除人知奉法乃尚有慙不畏死藐法行私潛通關節其人者實出於情理之外蔡時田身為御史以監試為職乃受帶關節尤屬不法。蔡時田著革職曹詠祖著革去舉人至曹秀先明舉伊姪未必非見事敗露為先發卸罪之舉亦著解任。

并案內有名人犯交在京總理事務王大臣會同該部嚴加刑訊切實審擬定罪具奏。諭軍機大臣等蔡時田受帶關節一事情罪甚為可惡已有旨交在京總理事務王大臣會同刑部嚴審定擬務當徹底嚴查且係兩紙必欲以其轉為代求之人俱應嚴加刑訊不可稍有寬縱。又諭蔡時田受帶關節情罪甚為可惡已有旨令在京總理事務王大臣會同該部嚴審定擬但王大臣不過會同查審至訊供定案係該部專責。科場作弊罪與賄賣生童無異自應立決即例應監候亦當入於本年情實定擬將此諭阿克敦劉統勲知之。又諭曰鄂昌奏施奕學偽稿供得自劉士祿劉士祿供係管總相公湯賜聯得之江西監生趙殷中湯賜聯在京中江西提塘家管總趙殷中在京包攬捐納現住廊房頭條衙衙已密咨舒赫德即拏該犯究訊等語湯賜聯趙殷中實為偽稿要犯看來來歷

已近可傳諭舒赫德令其即速查拏嚴切究訊不可又如前推往外省為閉門窻月之計彼時既不能當下查出今若仍不能追出真線咎將誰諉乎又諭據尚書舒赫德奏稱施奕學傳鈔偽稿一案其提塘劉士祿在江供出之湯賜聯趙殷中二犯當即據咨密拏江西提塘寓內並無湯賜聯其人止有管總之湯應泰再三刑訊堅供並無自趙殷中家持稿與劉士祿看之事實之趙殷中供亦相符現在飛咨督臣尹繼善令將劉士祿解京質問等語此案傳鈔年月既較諸案為早而得之於在京提塘其來歷似乎尤近正宜嚴切追究乃劉士祿所供湯趙二人又堅供並不知情此必劉士祿希圖脫卸狡展時日耳劉士祿及施奕學俱現在江省著傳諭尹繼善令其就近詳悉研究毋任飾辭妄供如有實在來歷即速奏聞若仍堅執前供則湯應泰年已七旬未便遽解竟特劉士祿一犯嚴

行押解來京以便質證不可疎忽致令免脫或自盡殘生皆惟尹繼善是問至湯應泰是否即係湯賜聯之處並著照咨確訊務得的名一面仍令舒赫德設法訊問密加查訪此案於偽稿根源關係甚重不可存草率了事之意可一併傳諭知之○丁酉

太宗文皇帝忌辰遣官祭

昭陵○戊戌遣官祭

闕帝廟○賜扈從王公大臣及蒙古王貝勒

額駙台吉等宴

吏部議覆給事中朱若東

奏請定州縣差遣委署之例以重地方等語

查州縣為親民之官凡遇公務差遣自應先

用丞倅閒曹其有必須派委印官者如往返

在一月內外仍照舊例暫委佐雜官代辦事

件倘遲至三四月以上應如所奏照調取入

闡例委員署理從之○己亥

太祖高皇帝忌辰遣官祭

福陵○諭軍機大臣等蔡時田攜帶關節一案

前已降旨草職交部令王大臣等會同刑部嚴刑審訊今日報到何以並未覆奏可傳諭王大臣及刑部堂官著速為提訊詳悉追究伊所帶關節究係欲與何人務得實情毋任捏飾並不必拘定萬壽期內不加刑訊之例惟宜迅速嚴密為要所有審訊情形即於下報奏覆勿再稍有延緩○又諭據碩色愛必達所奏查辦治大雄之子治繼鈞借貸銀兩一案請將治大雄交部議處治繼鈞依律杖徒等語提督治大雄前因其嫁女宴會等事有失封疆大臣之體并於伊子治繼鈞借銀一事含糊取巧降旨草職令以哈密總兵効力行走已經示罰不必再行交部至伊子治繼鈞借貸銀兩業經伊父照數繳還按其應得之罪竟令該督等在外結案咨部知之可矣可傳諭碩色愛必達知之○又諭曰碩色愛必達所奏貴州盤獲匪犯周夢桂供出素文勝等私藏刀劍歃血結盟一案據稱素文

勝劍藏古劍之處已經兩省文武會同搜起無獲現在細加訪查如果實無影響取具地方各官切結呈送等語此事前據開泰奏到看來似屬荒唐但周夢桂既有此語且有牽涉李開花名字又不可不嚴行查辦今素文勝既經解黔質審對簿之下虛實自可立辨如屬周夢桂挾恨混扳審訊明白即可結案若地方官取結一事乃外省陋習何足視為憑據即如湖廣羅田逆案知縣馮孫龍亦曾具稟以為並無蹤跡可疑不數日中馬朝柱即至敗露究亦何益於事乎此事雖非羅田重案可比但該督等以取結為了事則未免沿習具文甚不可也可傳諭碩色愛必達開泰知之○庚子

上奉

皇太后御勤政殿侍晚膳○賜扈從王公大臣及蒙古王貝勒額駙等宴○辛丑

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

顯佑宮

東嶽廟

城隍廟○

上詣

皇太后行宮行禮

御澹泊敬誠殿扈從王公

大臣官員及蒙古王公台吉等行慶賀禮 奉

皇太后御勤政殿侍宴 工部議准貴州巡撫

開泰疏稱黔省各標鎮協營及各屯衛歲需

硝觔請三年開採一次令承辦各官煎熬運

局各營衛按照年額分領俟將次領竣再行

採辦并於黔西州附近地方另躡新硐熬解以備支用至省府二局舊庫窄狹請在上下兩游適中之地添建硝庫二處從之 壬寅上奉

皇太后御勤政殿侍晚膳 諭據閩浙總督喀爾吉善奏稱泉州府屬之晉江南安溪同安等縣廈門一廳於七月初八初九等日大雨颶風水勢湧漲官民房屋俱有衝坍之處廈門海口商漁戰哨各船亦多撞擊漂沒等

甲辰八月十二

上

語晉江等處猝被風雨海水汎溢看來災勢頗重朕心深為軫念該督喀爾吉善已經前往查勘著督率屬員實心經理所有應行撫恤事宜一面辦理一面奏聞其被災稍輕之永福羅源永春莆田等州縣并著委員確查分別撫恤務俾災黎均無失所以示朕痼瘼一體之意該部遵諭速行○諭軍機大臣等永常奏請揀選州縣佐雜各十員發湖北省差遣委用等語朕於乾隆十五年正月諭各

督撫外省揀發人員將來皆有民社之責當俟引見發往朕或有巡幸督撫等皆先期豫知而此等揀發之員並非急不容緩或於起駕之前或俟回鑾之後俱可隨時奏請傳諭甚為明晰永常初任總督或尚未及聞恒文外任已久會商時何以不行告知耶著將此摺存記俟回京日交部揀選引見發往另行傳諭該督等知之○又諭前因直省米價多由採買致昂諭令覈計倉儲實數得有十分之三四即可不必亟資買補乃指豐稔有秋足敷民食者而言今據蔣炳所奏約計豫省本歲收成合計可得八分而通覈常平倉穀較之原額僅及十分之五則西成未為豐裕而常平所貯為數太少且秦晉接壤尚需接濟此又不可泥於前旨所當因地制宜或於價賤之處陸續收買不必剋期取足令奸商聞風擡價致於民食有妨將此諭蔣炳知之○又諭據蔣炳奏稱山西河東諸郡旱象已

成又關中苦旱秋種大半已槁且聞愈西愈甚其勢廣遠兩省儲貯皆虛等語觀此則秦晉兩省被嘆歉收已有明驗而阿思哈前奏蒲解等屬六州縣秋陽燥烈如旬日內仍無雨澤竟至成災此八月初五日所奏已及浹旬而至今尚未奏到不知雨澤曾否霑足田禾所關朕心無刻不切切繫念該撫身膺司牧何急急乃爾耶著傳旨詢問令其即速奏聞其蔣炳所奏籌撥穀石之處俱合機宜著照所請如山陝兩省實有資借之處著先期知會蔣炳彼此相商一面辦理一面奏聞○又諭據蔣炳奏稱山西河東諸郡旱象已成又關中苦旱秋種大半已槁且聞愈西愈甚其勢廣遠兩省儲貯皆虛等語觀此則秦晉兩省被嘆歉收已有明驗且黃廷桂張若震奏到情形西省缺雨州縣頗多而今日鐘音僅稱西同乾三府州為甚鳳翔興商次之恐將來西成不無失望其言急緩無迫切之情

豈所以體朕保赤誠求之至意耶鐘音著傳
旨申飭其蔣炳所奏籌撥穀石之處俱合機
宜著照所請如山陝兩省實有資借之處著
先期知會彼此照應一面辦理一面奏聞尋
奏陝屬西同鳳乾興商六府州屬被旱成災
者通計原有三十餘州縣查各屬常社倉貯
穀尚多加以延廊秦等屬餘糧通融撥濟復
用銀米兼賑約算可敷賑糶無庸豫省接濟
報聞○和碩履親王允禔等覆奏臣等將蔡
時田嚴刑鞫訊據供所帶關節二紙原擬入
簾時遇有相識之人相機轉託並非實有其
人質之曹詠祖供亦相同查蔡時田身為御
史奉命監試乃反收受關節串通囑託曹詠
祖奔競夤緣藐法營私情罪俱為重大均應
照律治罪曹秀先雖訊不知情但於伊姪曹
詠祖未能約束應交部議處得旨蔡時田曹
詠祖俱著即處斬餘依議○癸卯

上奉

皇太后御勤政殿侍晚膳

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申八月甲辰秋分夕

軍機處官三

月於西郊遣理郡王弘曉行禮○

上自避暑山莊奉

皇太后啟鑒幸木蘭○詣

皇太后行宮問安大學士等議覆雲貴總督

碩色奏稱古州營歲需硝勛請就本地採辦

設法稽查等語查古州各苗寨出產地硝未

便棄為苗人所有應官給價值收買煎熬以

供古州鎮屬三營及朗洞下江等營之用并

責成古州道查禁勿令偷漏滋擾疏縱揭叅

從之○是日駐蹕中關行宮 乙巳諭軍機

大臣等在京總理事務王大臣會同刑部審

擬蔡時田曹詠祖私通關節一案請俟九月

初間正法此案情罪可惡非尋常罪犯可比

著傳諭王大臣及該部奉到諭旨速傳德保

即行監視正法不必俟至九月 以甘肅永

昌協副將馬乾為陝西延綏鎮總兵官 是

日駐蹕波羅河屯行宮 丙午

上詣

軍機處官三

皇太后行宮問安 諭國家設科取士期得真

才士子誦法聖賢當知以名節為重始進不

端則為衣冠中敗類至於列掄選之任而懷

穿窬之心則更衣冠中禽獸矣玷儒林而壞

士習莫此為甚是以禁令綦嚴凡使人重懷

刑不犯有司正以慎重掄才大典耳近科來

特申懷挾之禁勿令魚目混珠意內簾弊竇

久已肅清不謂尚有潛通關節其人者雖千

百人中僅此一二人然此一二人者未嘗非

千百中之人况此特其敗露者耳其默識心存無能發摘者謂再無其人其孰信之夫刑章國憲持世之大防從前學政賄賣生童若俞鴻圖喀爾欽皆經正法朱荃未及明正典刑而贓私盡已發覺案犯業俱治罪雖功名之途不無熱中而效尤賴風將何底止吹噓剪拂流為植黨營私故釣名者甚於市利法所不容朕雖欲曲宥之豈不計及世道人心乎蔡時田曹詠祖已照法司律擬即行斬決至宦家子弟鄉科以官卷邀恩及會試入闈同年同官情面相關囑託嚮應勢尤易便身居朝列不以正率先冒犯營私此而不懲更無以服寒峻而昭炯戒曹秀先一併交部嚴加議處科場有此深為可愧朕固不忍輕量天下士而人心叵測不能無於予改是之嘆倘尚有以身試法者流亦惟有按律從事刑茲無赦而已士子讀書立品安命待時力田逢年必有其候考官虛公秉鑒當念為國樹

人之義何至苟且夤緣甘蹈重辟即或倖逃法網而踰牆之醜行已為人倫所不齒况當光天化日之下作此如鬼如蜮伎倆自作孽不可逭天地鬼神必不容欺其可不知所戒哉又諭前聞陝省夏秋以來雨澤愆期頗有旱象朕心深為軫念於該督撫奏到之時屢經傳旨切詢是否成災速行具奏并飭河南巡撫蔣炳於秦豫隣近州縣酌撥漕穀以備接濟今據西安巡撫鍾音奏報西同鳳乾等屬缺雨情形是被旱地方甚屬廣濶即使續得甘霖可以犁種春麥而本年夏收已屬失望民食必多拮据撫恤之道自不可不亟為籌辦該部即速行文該督黃廷桂令其回至西省親行查勘會同該撫悉心籌畫現在該督撫已飭屬緩徵所有應需賑恤事宜著即一面具奏一面辦理如成災分數甚重本地倉儲不敷動用即行咨會豫撫委員接運務使被災窮黎不致一夫失所以副朕勤求

民瘼至意。諭軍機大臣等據鐘音奏到陝省西同鳳乾等屬被旱情形。看來災象頗廣。朕心深為懸注。但鐘音初歷外任。一經詰問。非迴護掩飾。失之過輕。則有意張皇。又失之過重。其覆奏之處。恐未足為信。至一切受災分數。不過盡憑守令開報。將來照此賑恤。亦不能妥協。現在甘省地方寧謐。黃廷桂經練賑務。著速行傳諭。令其即回西安。如經過有被旱州縣。即可親行查勘。於災地民情。自可得其確實。一面備悉奏聞。一面即將辦賑事宜。會同鐘音詳悉妥酌。俟辦理災務已有就緒。再行回至甘省。或將甘撫印務。即於西省隨帶辦理之處。并令該督酌量奏聞。尋奏西同鳳乾等屬被旱成災者。共三十餘處。臣奉命回陝查勘。并籌辦賑撫事宜。有倉貯不敷者。酌撥甘省平慶秦等府州貯穀接濟。并將災地應徵銀糧。照例停緩。至甘撫印務。臣隨帶赴陝。一俟辦有就緒。或再回甘省。或在陝

平定回疆方略卷一百一十二

三

一

隨辦容臣臨時酌定。得旨所辦甚好。又批鄂樂舜已令馳驛赴任矣。又諭陝省西鳳等州縣被旱成災。應亟為撫恤。鐘音初歷外任。驟遇災歉。輕重之間。尚恐未得實情。情形辦理不能妥協。已有旨令黃廷桂回西安親行查勘。鐘音可俟黃廷桂回省。悉心商酌辦理。凡撫恤災傷。以賑濟為急。但須鎮靜安詳。實心督率。務使災黎無致失所。若稍涉張皇。又遇刁民乘機滋事。轉非綏輯之道。將此傳諭鐘音知之。是日駐蹕張三營行宮。丁未上詣皇太后行宮問安。祭先師孔子。遣大學士史貽直行禮。補行甘肅貴州乾隆十六年分大計。不謹官三員。浮躁官一員。休致官三員。年老官十一員。才力不及官三員。分別處分如例。○是日駐蹕十八里台大營。○戊申祭大社。

平定回疆方略卷一百一十三

四

大稷遣履親王允禔恭代行禮。

上行圍。○是日駐蹕海拉蘇台大營。○已酉。

上詣

皇太后行幄問安。

上行圍。○諭軍機大臣等張師載莊有恭同奏到蕭縣南門城牆獲有匿名揭帖一案拏獲趙貴卜海審明現在嚴拏卜湧等語此事或係馬朝柱餘黨故為節外生枝以惑衆聽或係挾仇誣陷卜趙二人即果挾仇而造作大

平定縣志卷之三

七

逆喪心之語雖非馬朝柱本案之犯而其情可惡亦當重治其罪著傳諭該督撫等令其協同辦理如果係卜湧挾仇所為必證據一
一明確自可無疑若稍有疑竇即當詳悉密行訪察不得歸獄此人草率完案尤當迅速完結不得拖延滋蔓歸於無著著傳諭該督撫知之○又諭據范時綬奏拏獲之李國棟一犯審係兵役誘令供吐馬朝柱下落分與懸賞銀兩因而供認等語教供冀賞乃愚妄

無知之見首犯未獲何由得賞此供殊未足信雖有此等妄供而馬朝柱一犯必須嚴查務獲明正典刑現今尚在嚴拏而已有此等冒賞情弊真犯一日不獲則遠近之造作假偽情弊百出豈不又成一李開花終歸無著至今尚假託其名惑人觀聽若致如此則責有攸歸該督不可不為加緊嚴也至吳方曙一犯前經審明正法何得廣西又盤獲一吳方曙前已傳諭詢問永常今此犯曾否解到或係本案逆黨或即馬朝柱託名冒認該督務確審實情即速奏聞不得稍有迴護○又諭曰吳進義傳看偽稿一事前經該督撫等審明定擬隨降旨傳諭吳進義令其據實供明今據莊有恭稱陳公壽史祖賢等隔別嚴訊翻異前供套夾夾則甘認罪鬆刑又復呼冤若不質明終無著落已委蘇松道申夢璽押帶陳公壽赴浙會審在案等語吳進義之定罪所據者衆證確鑿今陳公壽等已認復翻

此或吳進義教唆證犯令其反覆變幻以明衆證俱畏刑誣服未為信讞如此則其情更為可惡但恐浙省承審各員附會原參有心周內此亦外省完案之一法在本省牢不可破而隣省或有風聞若必符合原參則真情何由而得朕於政事務得其平毫無成見著傳諭雅爾哈善不得因前經定案稍存迴護况此案亦並非雅爾哈善所參如仍不將實在情節徹底審明惟事委曲完案或欽差大臣前往或提至京中另派大臣質訊明確則雅爾哈善何辭以對朕耶著將此傳諭令其平心靜氣據實研訊奏聞尋奉陳公壽從前解浙會審不待刑訊即將封寄偽稿情由逐細供明嗣因在江翻供經撫臣莊有恭解浙研訊復供吐實情如前並非承審各員有所附會周內臣等辦理此案務求明允固不敢草率推諉亦不敢刑求誣斷報聞又諭據范時綬等覆奏湖南省查辦傳鈔偽稿各案

一摺殊未明晰上緊根究之意不過因朕命軍機大臣查奏飭催不得不為此奏以塞責耳即如王世堂所得偽稿供得之江南人法堯文而法堯文在江南又稱實未給稿於王世堂係周儀字囑代認遂復俟解到審訊法堯文所供雖屬不符而王世堂現在湖南何難再為研訊而必俟法堯文到案始行質問耶此等處皆見其並不上緊查辦可傳諭該撫如法堯文已解湖南面證之下自無遁情若尚未解到即先提王世堂等細加根究務得確實來歷毋但以虛文了事是日駐蹕呼魯蘇台大營 庚戌
上行圍 是日駐蹕準烏拉岱大營至壬子皆如之 辛亥
世宗憲皇帝忌辰遣官祭
泰陵 禮部以繙譯會試中額請得旨這繙譯會試滿洲取中十六名蒙古取中二名 又以會試中額請得旨這會試滿洲蒙古取中

七名。漢軍取中一名。直隸取中二十二名。奉天取中一名。山東取中十三名。山西取中十五名。河南取中十名。陝西取中十二名。江南取中三十一名。浙江取中二十九名。江西取中二十五名。湖北取中十名。湖南取中四名。福建取中十四名。廣東取中十四名。廣西取中五名。四川取中八名。貴州取中七名。雲南取中七名。浙江巡撫雅爾哈善疏報上虞壽昌龍泉等三縣。乾隆十六年首墾田十五頃三十八畝有奇。壬子。

上行圍。蒙古王額駙台吉等進宴。諭軍機大臣等。阿思哈奏稱蒲州府屬之永濟等十州縣雨澤稀少。現在委員查勘。加意撫恤等語。晉省夏秋缺雨。頗有旱象。朕已早有所聞。正深慮念。今覽阿思哈所奏。但稱雨澤稀少。不無乾旱。及約計大畧。亦不過十分中之三四。似不免粉飾迴護之意。封疆大吏當地方災。稔見告。豈可如此。淡漠相視耶。至欲望接

濟於陝省。欲其禁止過糴。秦晉接壤。寧不知陝省今秋旱象已成。現在籌辦撫恤。豈有餘糧能借晉省之用耶。其河南一省。前已降旨。令該撫蔣炳豫撥米石。以備秦晉兩省接濟。並曾傳諭阿思哈。想伊具奏時。尚未奉到耳。據該撫現奏。回省後。親赴蒲解查勘。著即據實勘明。督率屬員實心經理。再大同朔平一路。既屬有秋。以本省之豐收。酌量採買。以資賑糶。於勢較便。但未知道路相距幾何。是否易於輓運。著即速通盤籌畫。一面辦理。一面奏聞。尋奏蒲解等屬各被災輕重不等。臣籌備賑糶糧石。即擬於附近之臨汾襄陵洪洞浮山趙城太平曲沃翼城岳陽平陸絳縣河津稷山垣曲等十四縣撥運。協濟至借資豫省糧石。除札商撫臣蔣炳酌撥。河陝各屬貯糧五萬石外。尚需若干。俟通查完畢。再行酌定。具奏得旨。此時尚在未定。甚屬遲緩。兵部尚書舒赫德奏。臣接准江督尹繼善咨稱。

施奕學在江南供認偽稿來歷係前在京時伊叔施廷舉次子阜保自官學持回給看並稱此案發覺後伊弟施奕源遣家丁陳谷趕赴江西囑其不可供出阜保等語臣隨拘拏阜保并伊弟官學生施純德再四研訊堅不承認查此案查辦已逾一載各處人犯展轉狡賴無可質對請飛咨尹繼善令將施奕學施奕度劉士祿陳谷等解京對鞫得旨是令其一路各別起解不得串供又批汝不無畏難之意此大不可○命京畿道監察御史李師中提督山西學政○癸丑

上詣

皇太后行幄問安

上行圍 是日駐蹕敦達烏拉岱大營甲寅上行圍諭軍機大臣等施奕學在江南供出阜保給稿及施奕源差陳谷前往囑其不可供出阜保等情此供似實若非實有其事何緣又拉出一阜保此皆伊親兄弟非誣扳他

人可比其施奕源堅不承認則因無人質對且恐與施廷舉有礙此案為日久伊早已串定供詞矣阜保尤應嚴加鞫訊即堅執不承亦當設法嚴審其官學生豈止阜保施純德二人自當從伊二人逐一追問施廷舉亦必知情即應傳訊舒赫德豈見不及此總之舒赫德承辦此案初意即存畏難推託之見今雖奏請將施奕度等解京對質亦非出於本意仍屬取巧推卸此時在江在京各犯俱已串定口供即解京亦不過挨延時日耳非實在辦理之道舒赫德非不能辦理此事之人不應如此著派劉統勲會同嚴審阜保施純德既係官學生可從官學中追問從前無從蹤跡疑是江西人今既有官學可尋則又不必論其是江西人與否矣施廷舉著即解任可傳諭施廷舉伊尚係明白人伊子姪中既有此事伊亦曾追問過家庭間必得其實在來歷若能將此案究辦明晰得其由來不

但原職可復仍當加賞如欲置身事外不從實供明朕親審張廣泗伊所目見回京時即將伊照張廣泗之例親加嚴鞫其時衆犯供明伊必無從狡飾噬臍何及將此嚴行傳諭施廷皋並諭舒赫德劉統勲將審出情節即速奏聞劉統勲係特派承審若亦附和推諉豈任用之大臣舉不肯出力耶一併傳諭知之又諭今早舒赫德奏到旋即降旨傳諭封發項於行圍之際馬上細思施奕學在江南所供阜保給稿之語必係確情實無可疑使其果係畏刑妄供希圖狡展時日則該犯京中或江西豈別無一二認識之人何人不可誣扳而必欲累及堂兄阜保且以伊親弟施奕源為證耶此情理必無之事且施奕源遣陳谷至江蘇囑其不可扳出阜保亦似非憑空結撰之語阜保施奕源堅不承認自來審鞫重案亦豈有到案即可成招者況此案發覺日久伊等串通供詞自應如此豈可據

為確供此皆易想到者而舒赫德竟想不到無他不過一難辦之心橫於中耳施奕學等現據舒赫德飛咨提解不日自可到案此時未到之前必無靜候對質之理且恐伊等潛通信息又行串供捏混耳已派劉統勲會同嚴審可再傳諭舒赫德令其商同劉統勲設法詳細追究毋任狡飾並諭以此時若不據實承認將來施奕學解到對質得實必加倍重治其罪後悔無及也仍明切曉諭施廷皋此稿斷非出自伊手亦不必畏懼即伊子姪亦不過傳遞接看本無重罪但能就伊子姪中據實查出來歷伊不但無罪且必另有加恩之處此案辦理至阜保頭緒顯然可得若再不上緊根求反覆審訊仍無一實在下落朕必於舒赫德是問餘悉前旨原任都察院副都御史世襲一等子積德故賜祭如例是日駐蹕巴顏布爾噶蘇台大營乙卯命揀選下第舉人諭今歲

萬壽恩科各省計偕雲集而中額所收例有定數其下第舉子中有年力才具可以及時錄用者特予格外加恩揀選引見分別以知縣試用教職銓選俾得早列仕版目今巡幸塞外若俟回鑾再行揀選未免守候需時著在京總理事務王大臣及協辦大學士阿克敦尚書舒赫德劉統勲孫嘉淦於會試揭曉後即行會同揀選大省四十人、中省三十人、小省二十人、俟朕回鑾以次引見其年在七十以上難以復圖進取者並著該部查明具奏候朕酌量加恩仍豫行曉諭各舉子知之諭軍機大臣等大學士高斌奏稱外河黃水自六月二十八日盛長消退無多是以湖水尚未能暢行出口俟黃水畧再消退方可暢出會黃等語前因黃水倒漾入運曾經傳旨詢問迄今入秋已及兩月何以黃勢尚強清流不能暢刷如此日久於運河豈無妨礙著傳諭大學士高斌等令其悉心籌畫方為合

宜使黃水無倒漾之慮速行詳悉妥酌奏聞尋奏洪澤一湖上承淮水諸河之水出清口以會黃匯水本多敵黃原屬有力本年夏秋之交雨澤稀少諸水存在淺落適遇黃水驟長河強淮弱黃水遂倒漾兩月現在湖水漫過山圩滾壩暢出敵黃急溜入運河道汴刷深通不致妨礙得旨覽奏俱悉又諭曰阿思哈奏到蒲絳等府州被旱成災所有委員查勘籌撥備賑之處俱應妥協辦理不得稍存粉飾之見致窮民失所更不得任州縣胥役侵蝕浮冒必令災黎均霑實惠又思晉省俗尚儉嗇蓋藏必裕與他省浮靡空虛者有間似尚可勸諭以任恤周急之義且樂善好施原有優敘然當鎮靜撫綏若稍張皇又恐刁民乘機滋事將此傳諭阿思哈令其飭屬實心承辦其河南省就近豫備接濟米石已另經傳諭會商一併諭知又諭曰鐘音奏到八月初九初十日西安省城已得雨霑

足其雨勢似屬廣普等語於耕犁春麥甚屬有益稍慰懸注之念前經降旨令黃廷桂回陝辦理災賑今覽鍾音所奏俱已豫為籌辦其收糴囤糧以備平糶一事甚合肯綮至西安等屬二十二縣廳成災之處一切賑卹事宜務當妥協辦理不可專任州縣開報任意濫冒亦不得令實在災黎流移失所其本省撥動糧石足敷賑卹前因蔣炳奏到豫備撥協隣省糧石傳諭山陝河南三省督撫會商今陝省既可無需接濟而晉省蒲絳等屬成災去河南較近或即為晉省協賑之用仍著該督撫通融詳悉會商具奏尋奏晉省蒲州等處與豫省陝州並所屬靈寶閿鄉二縣相隔一河應即於陝靈閿備撥糧內飭晉省需米各州縣陸續領運以十月為止得旨好又諭曰尹繼善高斌張師載等先後奏到蕭縣逆帖一案已將卜湧及其子卜正一併拏獲搜其行笈所帶呈詞底稿與揭帖字蹟相

符質訊明確即正典刑以昭法紀等語此案前據莊有恭等具奏即曾降旨傳諭該督撫等以卜湧挾仇誣陷造作逆語固當重治其罪然必須證據一一明確若稍有疑竇即當詳悉察訪蓋卜湧挾仇誣陷之語本出自趙貴卜海二人而字蹟相同亦所常有似均難據為確證若將卜湧即置之法恐不免草率結案之意著傳諭該督撫等務令詳悉研究仍一面密行訪察果係實無可疑再定其罪如此逆揭重案辦理固宜迅速亦不可不加詳慎也調原任四川瀘州知州安洪德來京引見是日駐蹕巴顏溝大營丙辰上詣皇太后行幄問安上行圍是日駐蹕默爾根烏里雅蘇台大營丁巳上行圍兵部尚書舒赫德刑部尚書劉統勳奏臣等復將卓保嚴訊據供實無轉給施奕

學偽稿之事其施奕源遣人送信囑託一節設法根求又無確據現將卑保等隔別嚴禁俟施奕度施奕學陳谷自江南解到時會齊鞠訊得旨是 是日駐蹕達顏達巴漢大營是月江西巡撫鄂昌奏江省鑄錢原設十爐嗣因庫錢充裕而滇銅又不能接繼是以前撫臣阿思哈奏減四座今庫錢短少除搭放兵餉外民間兌換不敷採買滇銅已到計現存洋滇二銅足資配鑄請仍添四爐共以十爐鼓鑄報聞 新授浙江按察使同德具摺謝恩並請陛見得旨且不必來汝能辦事但不用聰明而實心奮勉可也 閩浙總督喀爾吉善奏閩屬莆田仙遊惠安三縣並原報被災之晉江南安同安安溪四縣秋田續被水淹現飭各屬查明撫卹得旨覽奏俱悉督率屬員妥協為之 福建巡撫陳宏謀奏閩省水陸各標鎮營官兵月支俸餉俱係營員造具冊領先赴巡撫衙門驗掛再發司道

支給惟旗營並督標三營及水師營餉米止由旗員營員差委弁目自向司道支領司胥書識得以乘機混冒嗣後請令先造清冊送臣衙門驗掛轉發司道覈支得旨立法不過如此行之總在人耳 署湖南巡撫范時綬奏南省倉貯額穀上年本年先後平糶均未買補除截漕五萬石抵補本年應買穀數外餘應及時買足其從前協撥安徽平糶穀十萬石所有解回糶價尚難同時購補查南省貯穀本有溢額二十餘萬石每年出糶歸價請將此項撥抵十萬石補足備貯原數不必另行糶售尚餘溢穀十餘萬石留備本省賑糶及隣封接濟之用得旨甚好 河南巡撫蔣炳奏豫省界連秦晉本年兩省被旱廣遠倉貯不敷賑糶查附近山陝之陝州及所屬靈寶閿鄉並沿河之偃師孟津等州縣原貯漕穀二十萬餘石可以撥運再陝州西接潼關東隣河東且濱臨黃河一水可通今擬將

偃師孟津等處貯穀。並運陝州水次豫備。如將來山陝需用。即可就近領運。又運米較運穀為省。應令各屬將穀碾米運貯。得旨。所奏甚合機宜。山東巡撫鄂容安奏。東省各屬倉貯。經臣密委道府前往抽查。諸多懸缺。今秋收豐稔。正宜及時籌補。再各處徵收漕糧。向有浮收派運之弊。臣酌定規條。升斗必用小口。聽民自行量兌。並設盤製器。餘米收給本戶領回。先期公派運糧車馬。到時即行。不許令其守候重運。其運費銀兩。除公扣水次需用外。餘項勻給車戶水次。仍令州縣官自遣家人胥役。交收車戶。止管運而不管交。免致多方悉索。得旨。總在行之得宜。如此立法。即能無弊乎。河東鹽政薩哈岱奏。解州安邑夏縣芮城等四州縣。夏秋被旱。高田難望有收。幸八月初旬連次得雨。尚可及時種麥。得旨。知道了。阿思哈所辦妥當否。尋奏。解安夏芮等屬飢民。現在撫臣阿思哈加意撫卹。

其永濟臨晉猗氏虞鄉榮河萬泉等縣被旱之處。臣細加訪察。一併妥協查辦。報聞。陝西巡撫鍾音奏。陝屬咸寧長安渭南臨潼富平三原涇陽醴泉高陵耀州蒲城澄城大荔華陰岐山扶風乾州併所屬之武功永壽白河商南等二十一州縣。潼關一廳。秋田被旱。臣豫籌撫賑糧石。恐各屬常社倉貯穀不敷。將延鄜秦等屬溢額應糶穀十餘萬石。撥運備用。復因臨潼等處有商囤糧數萬石。並發帑前往收糶。以備平糶。報聞。又奏。陝屬被旱各州縣得雨。需足正可及時種麥。民情甚為欣悅。得旨。雖云稍慰。然秋深得雨。而汝遽為侈泰之詞。甚不可也。陝甘總督黃廷桂奏。夷商額連胡里等攜帶牲畜來肅貿易。臣札囑肅州鎮總兵馬得勝甘肅道文綬分別等次給價。總之交易則謹守定制。不得遷就款賚。則照常相待。勿致簡薄。得旨。甚好。

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十一

實錄卷之四百二十一

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十二

監修總纂官經筵講官太子太傅文淵閣大學士文淵閣副閣事領侍衛內大臣侍奏欽奉 上諭事件處管理

吏部理藩院掌印正黃旗滿洲都統世襲副都統功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲副都統軍功加十九級隨帶加二級入加二級臣重諾內大臣戶部尚書錢盛滿洲都統軍功紀錄五次

尋常紀錄十四次臣總纂經筵講官太子少保工部尚書紀錄六次臣曾振鐸等奉

敕修

乾隆十七年壬申九月戊午朔

實錄卷之四百二十二

一

上行圍諭刑部奏羅于朝在監自縊一摺請
將司獄提牢等官交部查議此不過循照常
例耳羅于朝係有心貽誤軍機擬斬之犯必
應明正典刑方足以昭炯戒從前朝審二次
情實適值停止勾決之年所以未及正法今
年朝審屆期此等情實重犯該部自應豫先
飭屬嚴加防範乃令得以在監自縊逃於顯
戮又僅援照尋常疎防監犯自盡之例請將
司獄提牢等官交部查議殊屬不合該堂官

等著一併交部嚴加議處 是日駐蹕珠爾和羅大營 已未

上詣

皇太后行幄問安

上行圍 諭曰外任八旗官員均為滿洲世僕伊等身居外任既不能在內當差自應將伊子遣赴京城挑補拜唐阿行走代伊報効於理方協況伊等之子挑為拜唐阿後如果行走奮勉又未嘗不加恩陞用此乃朕教養旗

一四 此卷二十二

人至意乃伊等不知仰體朕心惟以伊等來京當差為苦必欲躲避任所令其習於安逸以致終身棄置無用朕殊不解嗣後外任官員之子除准留一人隨任外餘俟年已及歲即赴京挑補拜唐阿但當差之人太多亦不無繁費如有四五子者可酌留二三人餘令赴京挑差至伊等皆係外任官員若將其子挑為阿哥之哈哈珠色恐有借端營求情弊此項著不必挑補 又諭朕前將額駙策凌

之子吹濟多爾濟承襲伊兄蘇巴什禮公爵並派入內廷跟隨阿哥讀書蓋以額駙素能為國宣力垂念施恩不意吹濟多爾濟患病溘逝朕心深為憫惻著賞銀五百兩交伊兄沙克都爾扎布令其於沿途護送靈櫬但公主額駙墳墓在京每年祭掃不可無人又吹濟多爾濟之母並無人侍奉俱屬可憫朕意於額駙幼子中再著一人來京辦理公主額駙祭掃之事兼侍奉吹濟多爾濟之母第從前額駙之子林沁多爾濟前赴木蘭請安朕因其尚未出痘仍行遣回近來未知曾否出痘將此傳諭成衮扎布令於額駙諸子中擇其已經出痘者一人遣令赴京如俱未出痘或於伊子及伊弟策登扎布之子內遣一年幼者來京繼與吹濟多爾濟為子亦可 是日駐蹕鄂爾楚克哈達大營 庚申

上行圍 是日駐蹕扎克丹鄂佛羅大營 辛酉

上行圍 賜扈從王公大臣及蒙古王貝勒額駙台吉等宴 遣官祭

歷代帝王廟 遣官祭

都城隍之神 諭軍機大臣等尚書舒赫德奏據欽天監監正劉松齡稟稱有西洋波爾都噶爾亞國遣使臣巴哲格來請安進貢等語已照雍正七年之例派內務府郎中官柱同該監正劉松齡馳驛前往接取可傳諭該督阿里衮俟官柱等到粵時其該國使臣可

酌量款以筵宴所有沿途一切供應並著量從豐厚以示懷遠之意 四川總督策楞提督岳鍾琪奏雜谷土司蒼旺與梭磨土司勒兒悟卓克基土司娘兒吉構釁經臣等委員前往剖處蒼旺抗執不遵輒將梭卓所屬土民番寨聚兵攻燬又私造鐵礮潛蓄逆謀查雜谷地方延袤二千餘里為西南一大部落距舊保縣不遠中有古維州最為險要今蒼旺擅攻梭卓兩寨若任其層次吞併一到古

維州便可直趨保縣不得不豫為籌辦現擬

調兵四千名以三千名分起進發於八月二十二日先遣兵五百名委威茂協副將和楞額松茂道張之浚城守叅將六格茂州知州黃廷銑以剖斷三家曲直為名乘虛直搗逆首寨穴使不得越至古維州餘兵於二十四五六日陸續進攻其一千名檄調松潘鎮帶領於雜谷西北一帶七布峨眉等處截其勾通郭羅克之路并檄飭瓦寺土司選帶土兵隨營調遣臣等即於二十七八日親往相機攻剿倘該首畏罪遠竄而古維州雜谷腦要隘可得即將番民改土歸流亦屬一勞永逸得旨知道了餘有旨諭諭軍機大臣等據策楞岳鍾琪奏稱雜谷土司蒼旺擅行攻殺搶擄又製造軍器逆蹟昭著現在派兵前往相機進剿等語蒼旺恃其地廣人衆與勒兒悟娘兒吉構釁殺掠不服官兵彈壓自應大加懲創以靖蠻疆但四川兵氣孱弱且當瞻對

金川兩次用兵之後元氣未復該提督等務宜加意慎重必能刻期成功俾苗衆懾服方為妥協所有一切辦理情形惟在據實具奏更不得畧有粉飾了事之意如從前瞻對軍情究亦不能逃朕洞鑒也至改土歸流一事不惟不必豫存此心并語言文告之間亦宜慎密蓋歸流非夷情所願萬一稍有風聲必致衆情驚駭將人自為守又成不了之局只應專辦蒼旺為是計該督提等此時已抵雜谷其現在情形仍令作速馳奏尋奏改土歸流雖屬番民所不願但雜谷番寨皆與保縣居民錯處每須傭工內地以資生計族類雖殊語言可接兼之蒼旺殘刻性成番衆無不受其荼毒是以大兵所至相率投誠先後降番六萬餘丁經臣等派員撫插並令查明戶口田土確數造冊議奏至松崗番寨稍遠將來應否改土歸流俟蒼旺勦滅後另行籌辦臣等現在相機進勦一切軍情惟有據實直

陳不敢粉飾了事得旨好佇望捷音又批外省綠營粉飾習氣牢不可破即汝二人不欺能保衆人之不欺乎是日駐蹕布扈圖大營 壬戌

上詣

皇太后行陸問安

上行圍 是日駐蹕伊遜薩爾巴里哈達圖扎

卜大營 癸亥

上行圍 諭軍機大臣等前據阿里衮奏稱暹

羅國貢使到粵委員前往查驗安頓俟具覆到日會同撫臣具題等語今將及兩月何以尚未題到可傳旨詢問再現今西洋波爾都噶爾亞國使臣到粵已循照舊例派員會同西洋人前往接取而暹羅等國貢使則向無自京差官接取之例恐該使臣等同時入境相形之下似覺有所區別者可併傳諭該督撫等令將二國使臣酌量先後分起護送其抵省進京總不必令在一處可也尋奏暹羅

國貢使到粵後因進貢方物名色數目及貢使商稍人等姓名必待通事報明方能造冊是以題報稍遲至該使臣既不便與西洋波爾都噶爾亞國貢使同行應令先起護送進京奏入報聞又諭據鄂昌奏武寧縣拏獲天堂寨逆夥李天洞等犯已經解往楚省質訊等語李天洞一犯如何得受逆剄招引多人當時原招內曾否有人供出著永常悉心詳查確訊毋使稍有隱遁至此案以拏獲首惡馬朝柱為要其他被誘入夥之徒俱屬枝葉如其自行敗露或被他人供發自不容置之不問若一概通行查拏則舍本逐末非辨理之道且未免擾累多事可一併傳諭永常并寄鄂昌知之○又諭曰鄂昌所奏廖以權供稱曾向施奕源問過偽稿施奕源說是有我的我還看過等語是又屬施奕源等傳鈔之確證可將此摺鈔寄舒赫德劉統勲俟施奕學等解到之日將摺內情節一併詳悉研訊

上詣

是日駐蹕阿濟格鳩和羅大營甲子皇太后行幄問安遣官祭昭忠祠諭據喀爾吉善李有用奏稱今秋厦門一帶猝被颶風各營戰哨船擊碎沉溺者共一十七隻內有在洋行駛者亦有在港澳灣泊者應照例分別辦理等語閩省此次風災勢甚猛烈其擊碎船隻非不能小心管駕者可比若因灣泊港澳遂令著賠情實可憫著加恩准其一體動撥錢糧速行趕造補號以資巡防其軍械器具亦照例動支公糧按數補配應用該部即行文該督提等遵照辦理○又諭閩省今秋猝被風潮雖據該督奏報晚禾甫插於收成無礙但風勢猛烈廬舍多有坍塌無力窮黎既營棲息復計饗飧未免拮据著加恩將晉江南安同安安溪等四縣被災貧戶概行加賑一月俾災民不致失所該部即遵諭行○諭軍機大臣等舒赫德等奏稱接到江

西巡撫鄂昌來咨。廖以權供出施奕源看過偽稿。刑訊施奕源堅不承認。應聽鄂昌提取吳善楷、吳善魁與廖以權質對。另作一傳稿。頭緒查辦等語。此所見又復非是。施奕源既供出廖以權向伊面述偽稿。則廖以權原係施奕源案內要犯。自應將該犯等提取來京。與施奕源質對。方得實情。何得因其牽入吳善楷、吳善魁。又欲令該撫另作一頭緒查辦。此豈非不欲究辦之意。橫據胸中所流露者耶。因鄂昌奏到已傳旨鈔寄。可將此諭舒赫德、劉統勳令即行文提犯歸案辦理。毋得他諉。又諭曰：舒赫德、胡寶琛等查辦囤積錢文一事。據稱先行出示曉諭。現有陸續呈交每戶一二百餘千不等。撥動庫銀易換賞給花紅獎勸。近日市價疊減。每兩多換十數文等語。此京師及順天府屬所辦。其直隸各屬州縣遠濶。囤積倍多方。觀承辦理若何。可傳旨詢問。令其據實奏聞。尋奏臣通飭各府州

屬查禁積錢。現在民間不敢再行囤貯。其舊積之錢。令俟農忙後陸續呈繳。出易復於隣近水次地方嚴禁客船攜帶。目下錢價平減。臣仍飭地方官實力奉行。以期漸次流通。得旨是實。力行之。不無稍補。又諭九卿議覆廣東東莞縣民陳水養護母推跌胞兄陳德士身死一案。既經定議改為斬候。具題而伍齡安等又另摺奏請准其留養。此甚非是。陳水養致死胞兄按律本應斬決。惟其護母情切。推跌致斃。並無向毆情形。是以特交九卿定議。今既改為斬候。將來秋審之時。朕或酌量加恩。准其減等發落。亦未可知。若此時遽請留養。不過枷責完結。雖原情實有可矜。而按法殊屬未協。即以伊母苦節衰年。必應留養。設使減等之後。而不生子。當何如。乎伍齡安等此奏。顯係沽名邀譽。不自知其情理之錯謬。著在京總理事務王大臣傳旨申飭原摺擲還。又諭曰：鄂容安所奏東省生息銀

兩一摺請仍照舊一分五釐行息自因每年需用不敷起見但原降諭旨乃因有無贏餘歸還原本通行詢問該省減作一分起息既有不敷自應另行專摺奏明照舊行息不應敘入歸還原本之旨今若將此奏交部則無知者轉似因欲歸還原本將已減之息復加增照舊殊與原降諭旨之意不符著將此諭鄂容安知之又諭曰定長奏到粵西查獲吳方曙及同夥之李興樓解楚質審准湖南撫臣查係假冒交給帶同等語吳方曙係有名逆犯審實即應重辟緣何乃有甘心假冒之人殊非情理所有著該撫確切根查明晰實係何人何故自行假冒或聽人指使教誘據實奏聞毋得稍存迴護至該撫從前原據屬員盤獲稟報審辦成招遽行具奏非出有心所請交部嚴加議處著加恩寬免又諭曰阿蘭泰吳達善等奏盛京副管領墨爾金筆帖式珠蘭泰私行出口在吉林寧古塔

等處被獲請從重治罪等語墨爾金珠蘭泰俱係現任職官無故私往吉林寧古塔等處必為偷挖人參著傳諭阿蘭泰將墨爾金等詳細鞠訊從重定擬是日駐蹕安巴鳩昂阿大營乙丑

上行圍諭軍機大臣等據尹繼善奏稱劉士祿到江質審頃翻前供質之施奕學亦堅稱得之堂兄阜保並未得自劉士祿至施奕學得稿於阜保曾經告知施奕源施奕源因何隱匿阜保轉扳劉士祿之處必須嚴訊施奕源等語施奕源狡詐多端所供並非確實來歷不過多方扳扯為耽延時日之計而此案來歷惟應從施奕源是問舒赫德劉統勳可不勞而得其實在情節此案施奕源等原係傳鈔並無重罪而伊等彼此抵賴隱匿看來實有可疑或竟由此得其根底亦未可定已諭尹繼善將施廷翰一併解京其施氏是否與張廣泗有親及平日與張廣泗往來情意

若何著舒赫德等留心密行訪察再漢軍中有向日依附張廣泗隨任餉口今流落怨望幸災樂禍之徒捏撰此稿故伊等得之最先俱著舒赫德等一併詳悉察訪倘由此得首先捏撰之人豈不大快毋更畏難推諉也○又諭施奕學一案已令解京質審其施廷翰現在革職在江亦著派員護解來京伊子姪犯案追訊恐伊途次自戕滅口著傳諭尹繼善令解員密行防範不得稍有疎虞是日

駐蹕布爾噶蘇台昂阿大營○丙寅

上詣

皇太后行幄問安○

上行圍賜扈從王公大臣及蒙古王貝勒額駙台吉等宴○諭軍機大臣等朕覽秋審緩決官犯本內川省之周際昌袁定國二犯該督俱擬緩決具題袁定國虧空未完銀兩係在一千兩以下尚可監追周際昌侵扣腳價至二千六百餘兩之多按例無可寬宥或以

其尚在一年限內姑准稍緩其死不應於審語內加入辦運軍需尚無違誤之語若以辦運無誤遂可擬以緩決則凡稍能辦事者豈竟可以任意虧空乎金川軍需案內原辦章程本屬未善所有各員虧缺已經查明加恩寬限扣追周際昌一犯如果別有隱情該督亦應專摺奏明候朕酌奪不當於秋審本內具題即以為了事也況現在川省又有用兵之事於承辦軍需各員尤不可弛縱周際昌等未完銀兩仍著上緊追繳如明年秋審時尚未全完即按其限期及未完之數定擬其辦運無誤等語不必闌入可傳諭該督策楞知之又諭此次來至圍場之蒙古王公台吉等若過年班著不必來是日駐蹕阿貴圖大營丁卯諭曰八旗發往拉林阿勒楚喀種地人等多未攜家同行恐不能在彼安心或私自逃回或逃往他處皆未可定著傳諭八旗大臣等嗣後咨送拉林阿勒楚喀種

地人等將家屬一併咨送。不准留京。兵部尚書舒赫德刑部尚書劉統勲奏臣等審訊施奕源施阜保傳稿寄信各情節該犯等秉性游移一味茹刑狡賴臣等細閱督臣尹繼善撫臣鄂昌所取施奕學廖以權等供詞究至施氏兄弟別無徑路可尋現在多方根究斷不敢畏難推諉至施廷臯父子與張廣泗查無關涉之處其張廣泗平日親友或有流落怨望造言生事之徒應一併詳細察訪得旨施奕學供偽稿非得之劉士祿實係得之施奕源則施奕源最為要犯汝等應留心設法研鞫○吏部議奏御史曹秀先失察伊姪曹詠祖寅緣作弊請照溺職例治罪得旨曹秀先於曹詠祖交通關節之事既經王大臣等會同審明並不知情且搜獲時即認係伊姪筆跡據實舉出尚無大咎伊姪在京寅緣作弊不能約束教訓漫無覺察失察之罪實所應得曹秀先加恩免其革職著降二級留

任○改鑄江南山清盱眙河營守備條記為山清裏河上營守備條記○旌表守正被戕之山東冠縣民劉德輝女劉氏○是日駐蹕張三營行宮 戊辰

上詣

皇太后行宮問安 軍機大臣等議准四川總督策楞提督岳鍾琪奏松潘口外諸番剽掠時行自雍正十年定例每歲令鎮臣出口化誘清理一切盜賊案件並支領賞項於番部適中之地分別勸懲但行之既久官弁視為年例不免虛應故事即如郭羅克肆行搶刦當鎮臣馬良柱出巡之日再三調遣不至是有名無實兼恐與體統有關且番衆年年接應官兵裹糧馳候殊滋勞費臣等公同商酌若將此事竟行停止固非所宜而頻年來往不特未革其不馴之性抑且漸啟其玩視之心請照內地出巡之例三年舉行一次應如所奏行令該督提一體遵照轉飭該鎮將等

嗣後每屆出口化誨年分一切妥協辦理從之○以正白旗蒙古副都統那沁為直隸泰寧鎮總兵鑲紅旗護軍統領塔勒瑪善為正白旗蒙古副都統署護軍統領常在為鑲紅旗護軍統領○調盛京副都統額勒登為寧古塔副都統以護軍叅領宗室勒克為盛京副都統○是日駐蹕波羅河屯行宮○已已諭軍機大臣等方觀承所奏辦理囤積錢文一摺乃屬甫經飭屬辦理此事通行傳諭已

及兩月現在京城及順天府屬據舒赫德胡寶琮奏稱囤積錢文陸續呈交市價漸減是行之已有成效曾經降旨詢問直隸近日情形豈尚未經奉到耶該督所辦未免失之過遲錢文為民間日用所必需市價早減一日小民早受一日之益況風行草偃風之行也不疾則其應也亦愈緩著傳諭方觀承照伊摺內所奏董率屬員實心經理作速奉行毋得視為具文其成效若何各屬錢價有無平

減速行據實具奏尋奏臣飭各屬查禁積錢並錢價現在平減之處前經覆奏在案向後收獲漸畢米糧上市正可令積錢之家源源出易不至再延報聞○又諭曰雅爾哈善奏到吳進義閱看偽稿一案已供認不諱此案吳進義不過曾經見稿本無大罪因其堅不承認必欲置身事外希圖開復是以愈滋葛藤愈見無恥及見朕寬宥之旨始行俯首無辭其人實屬不堪但念其年已衰老仍著從寬免其治罪至陳公壽供出傳稿於千總孟宗及桃源縣生員邵必勝即令莊有恭就近提訊嚴行追究務期速得實在來歷毋任狡展吳進義已另降諭旨所有前寄雅爾哈善令與吳進義觀看之諭旨一道於奏事之便仍令繳回即傳諭莊有恭雅爾哈善知之○又諭曰雅爾哈善奏到常山縣民左雙興拾得逆書一事已經密飭文武員弁嚴加訪緝造書正犯提督史宏蘊亦同日奏到馬朝柱

早經敗露通緝即使遊魂速竄何敢公為
逆書自屬必無之事非奸民偽託煽惑愚
民即係挾仇暗害但閱逆詞文義又非馬
朝柱本案逆黨內鄉愚全不識文理者可
比著傳諭該督撫等鎮靜嚴密迅速確查
務得捏造之人究明實在情節據實奏聞
馬朝柱現在通緝若將此案張皇又成一
事益復駭聽滋擾但當實力奉行或從地
方匪棍幸災樂禍之徒訪察或在詞內有
名人等之仇家怨口多方密訪不得僅以飭
交查拏為詞終歸無著將此傳諭該督撫提
等知之○以山東臨清協副將吳三傑為雲
南普洱鎮總兵官是日駐蹕中關行宮
庚午

上詣

皇太后行宮問安遣官祭賢良祠 辛未諭
曰協辦大學士吏部尚書梁詩正之子舉人
梁同書著加恩准其一體殿試 軍機大臣

等議覆福州將軍新柱閩浙總督喀爾吉善
福建巡撫陳宏謀奏蘇祿國番目萬勝里叻
帶同番丁通事等來請貢期一摺查蘇祿國
原在准通朝貢之列但該國王遣來番目既
係管城早官委用通事僅一內地水手其所
齎國書不知應投何處而咨會又未兼譯漢
文一切草率恐有奸民勾結滋事情弊該將
軍督撫等傳諭番目令將國書齎回所帶貨
物照例免稅其通事併舵水人等嚴加安插
辦理尚屬合宜但戢奸之法不厭周詳字小
之恩尤宜寬大應令該將軍督撫等密飭道
廳各員妥協經理詞令則不妨嚴明接待則
量從優厚俾番目等懽忻返國懷畏交深從
之○甘肅臨洮衛指揮使趙廷基故以其子
恒鈿襲職○貴州定番州屬程番司土官程
天賢故以其弟天順襲職○是日駐蹕避暑
山莊至壬申皆如之

大清高宗法天隆運至誠先覺體元立極敷文奮武孝慈神聖純皇帝實錄卷之四百二十二

中集卷四十三

十一

大清高宗法天隆運至誠先覺體元立極敷文奮武孝慈神聖純皇帝實錄卷之四百二十三

監修總纂官經筵講官太子太傅文淵閣大學士文淵閣領閣事領侍衛內大臣詹察欽奉 上諭軍機處管理

吏部理藩院事務正黃旗滿洲都統世襲副都統軍功七級隨帶加一級尋常加二級軍功紀錄一次臣慶佳

總纂官經筵講官太子太傅文華殿大學士文淵閣領閣事詹察欽奉 上諭軍機處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書戴世琳滿洲都統軍功紀錄五次

尋常紀錄十四次臣德瑛經筵講官太子少保工部尚書紀銀六次臣曹振鏞等奉

敕修

乾隆十七年壬申九月癸酉

上奉

皇太后自避暑山莊迴鑾○詣

皇太后行宮問安○諭軍機大臣等朕覽陝西

省秋審情實各犯招冊內如申得宗王四兒

李天增張國臣馮八兒曹子全趙四伍經雲

伍于得馬四等犯或倫紀攸關或毆差奪犯

或兇毆斃命或夥棍輪姦或行竊拒捕皆係

應入情實之犯而乾隆十五十六兩年秋審

均以緩決具題若非九卿改正竟爾依樣葫

蘆則此等重犯皆已在三次二次緩決之內矣。豈國家明罰勅法辟以止辟之意。向來九卿核擬具題。朕每按各省擬改之多寡。以酌定該督撫等辦理之當否。然不過就其一年所辦之案。通行降旨申飭而已。若不將二三年內秋審招冊。詳悉披覽。亦不覺陝西一省。未能允協者。如此甚多也。此皆陳宏謀在西安巡撫任內之事。陳宏謀素好沽名。豈數年以來。竟未悛改耶。雖既往可以不咎。但亦不可不明切曉示。以警戒於將來耳。陳宏謀著傳旨申飭。○是日駐蹕喀喇河屯行宮。○甲戌。四川總督策楞提督岳鍾琪等奏。雜谷土司蒼旺不法。經臣等先後發兵進剿。該處地廣民稠。必須勦撫兼行。蒼旺大頭人拖把。忠中沙加豆如等三人分守官寨。臣等前派帶兵先往雜谷之叅將六格等於八月二十七日過保縣。即兼程馳抵維州。占踞三關要口。并一切險隘及橋梁可通之處。派兵分守。續

發之兵亦接踵而至。并攻雜谷腦。斷其取水之路。該頭人拖把等率衆乞降。臣等因真偽未辦。暫行拘禁。其自舊保至雜谷腦沿途各寨。臣等選派素與番民熟識之生員商賈等前往招降。各番戶於臣等抵營後。盡數投誠。情願改土歸流。又蒼旺攻奪梭磨之九子孟董等寨。亦來營投降。統計降番一百零六寨。現委員弁逐寨犒賞安插。查造戶口地土冊籍。以定將來輸賦。並派官兵前往梭磨招復土司勒兒悟。歸寨撫插該管番民。臣等現擬領兵前赴松岡進剿。得旨。此皆卿等素有成竹。故所至成功。俟題奏到日。有旨交部議叙。其一切經理尚應妥酌。以期邊疆永寧可也。○又奏據駐劄通化把總盧丕振報稱。該處地方有三叉河一道。原與雜谷不通。今逆酋蒼旺遣人暗搭索橋三處。當即帶兵前往砍斷。並拏獲三人。審係大頭人忠中派遣修造。臣等到雜後。將拖把忠中沙加豆如等鞠訊。

據拖把沙加豆如供稱蒼旺一切逆謀惟忠中密與商議是以搭造索橋為蒼旺運礮之路臣等隨將忠中梟示其拖把沙加豆如等帶往軍營効力贖罪得旨覽奏俱悉諭軍機大臣等據策楞岳鍾琪奏到九月初三四五等日雜谷腦番民盡數來營投降現已分遣文武逐寨犒賞安插等情形一摺辦理頗合機宜前奏到時朕心甚為懸注不料奏功如此迅速甚屬可嘉俟題到交部議敘已於摺內批示矣至摺中所奏拖把忠中沙加豆如三人皆蒼旺之大頭人為伊看守官寨而忠中又與蒼旺密謀叛逆何以遽肯隨拖把投降已經來降何以又將忠中梟示此雖已經辨結之案而情節尚未甚明晰可於後摺詳悉具奏至改土歸流之處更宜妥酌蓋環蜀皆土司地一聞雜谷改流將謂天朝有兼併蠻地之意人人自疑應明示以蒼旺孽由自作覬覦保縣封疆大臣不得已用兵並非

刊其土地各土司宜世守疆圉永受皇恩其已經歸附之一百零六寨及將來勦除蒼旺本境或當設官安汛防守控制以為保縣藩籬且奏中有令生員民人招降之語可知保縣逼近番界若輩為我用則得其力不然則亦漢奸而已耳此後惟將邊界分畫明晰再不可令內地民人踰此更進番部至校磨卓克基之地有為蒼旺侵占者俱應查明歸還勒兒悟娘兒吉方為大公至正總之辦理邊疆事宜不厭詳慎為久遠計此番成功真屬僥倖望外不可更生冀倖惟期番境永寧無事斯善矣將此諭策楞岳鍾琪知之園中所得鹿肉各賜一分由驛發往尋奏蒼旺頭人忠中當官兵進勦雜谷時伊獨倡議固守并密調土兵協力抵禦及拖把沙加豆如等見勢危迫欲將忠中擒獻伊始隨眾出降是該犯之降既出於眾人之迫脅而附逆助謀其罪尤大是以即為梟示至蒼旺恃勢虐鄰土

司中久為側目。一聞逆酋就縛。皆以除害為快。尚不致於生疑。保縣本與番寨接壤。民人往來。稽察難周。今雜谷既列版圖。古維州天然險要。即於此盤詰奸匪。則私越者自可杜絕。其蒼旺所奪梭卓兩處地土。業經查明歸還。臣等此番用兵。實因逆酋悖逆不法。幸迅速成功。已出望外。又何敢更生冀倖。得旨。此事究屬冒險而乘易。然既已成功。諸凡皆不必論。若朕以兵為可試。則將令汝等乘勝移

師。問郭羅克之抗命不法矣。○河東鹽政薩哈岱奏。解州安邑運城等處附近鹽池地多硝鹺。即豐年所產米麥。亦不敷民食。全賴鄰省運販接濟。本年夏秋被旱。收成無幾。臣諭令運鹽各商。於就近豐收之地。採買米麥。分發解安運城三處平糶。得旨。好。直隸總督方觀承疏報寧河昌黎樂亭赤城等四縣。乾隆十年十六年首墾水旱田地六十九頃七十七畝有奇。是日駐蹕常山峪行宮。○乙

亥。給年老舉人職銜。論今年舉行

萬壽恩科。禮部會試士子雲集。其中有年臻耄耋。尚與觀光者。雖未經入彀。而龐眉鶴髮。偕試禮闈。亦場屋中人瑞也。所有八十以上之徐文靖侯勤。王鑒周中規。俱給予翰林院檢討職銜。七十以上之張簡。杜繼衍。任湖趙居祿。邱釗。周士梁。張明極。何魯。李熙。鐸。林玉藻。俱給予國子監學正職銜。現任學正王延年。著該部帶領引見。再降諭旨。用賁殊恩。以光盛典。○命秋審服制彙冊。諭各省由立決改為監候人犯。均係服制攸關。其改擬監候。已屬原情酌減。若於秋審時入於緩決。則減之又減。殊非慎重倫常。明刑弼教之道。是以上年降旨。令概入情實。此其中情節多端。如父母被毆致傷。或勢在危急。救護乃其至情。使父毆叔。而子助父以斃叔。亦得謂之救父。則是長不友不睦之風。非止辟之意。但散在各省招冊中。有勾決者。有未勾決者。或未悉朕

輕重權衡反滋疑議著該部將此等案犯查明彙為一冊與官犯招冊俱先期進呈候勾其有應宥者亦可即予減等發落朕於各省招冊反覆研究務協理法之大中人命至重大德好生何忍不以哀矜為念但飭法違道務在活人斯乃婦人之仁中外問刑者其共知之○諭軍機大臣等方觀承奏稱現赴永定河查工候遣嚮導前往會同查看金陵道路等語十月內舉行

孝賢皇后奉安地宮禮考之國家舊典朕應親送奉移梓宮距奉安地宮之期幾半月有餘朕於十月十三日靜安莊臨送後至二十二日前往二十七日奠畢回鑾可傳諭方觀承令其速為豫備至金陵應俟明歲仲春恭謁

泰陵後便道前往即由霸州一路水圍旋蹕此時不必豫備○又諭據新柱奏閩省胥識冒領餉銀一案暫署撫篆兩月不能查出請交

部嚴加議處等語此係因失察胥吏作弊朕批示覆奏但失察胥吏作弊雖干吏議而事屬因公此案題結時所有歷任之督撫藩司本內自必照例查叅該部亦自必照例議處此時何必降旨交部即新柱亦毋庸自行奏請也可傳諭知之○是日駐蹕兩間房行宮

○丙子

上詣

皇太后行宮問安○諭本年十月二十七日行

孝賢皇后奉安地宮禮稽之國家舊典

皇祖聖祖仁皇帝於

孝誠仁皇后

孝昭仁皇后

孝懿仁皇后俱經親送自應謹遵

祖制但奉移梓宮距奉安地宮之期計逾旬日

朕於十月十三日至靜安莊臨送後擬於二十二日自京起鑾恭謁

祖陵禮畢屆期詣

孝賢皇后陵寢親行視奠即著此次隨往木蘭之王大臣官員等隨駕前往不必另行奏派。又諭曰古北口提督布蘭泰現在患病著於任所調理提督事務緊要辦理需人原任總兵官馬負書現在隨營即著前往代為辦理。戶部議准四川總督策楞疏稱川省提標鎮協營前派出師金川陣亡傷亡病故弁兵等長支俸餉銀一千零二十二兩有奇請照出師瞻對官兵之例豁免從之。○是日

駐蹕要亭行宮○丁丑

上至董格莊臨奠定安親王園寢○諭據四川總督策楞提督岳鍾琪先後奏報雜谷土司蒼旺擅將梭磨土司勒兒悟卓克基土司娘兒吉所部番衆攻殺搶擄不遵官司約束又私行製造鐵礮種種悖逆不法旋調發官兵於八月二十二日分起進發於九月初抵雜谷腦遠近番衆盡數投降統計一百餘寨四萬餘人換製衣帽服飾額請改屬內地等語

雜谷境聯保縣原係古維州地蒼旺於金川軍務之時尚能出力加授職銜伊弟兄勒兒悟娘兒吉亦俱賞給印信乃蒼旺罔念國恩操戈構釁悖逆不道亟當勦除以綏邊圉該督策楞提督岳鍾琪統率官兵直抵巢寨撫勦兼施機宜悉合迅奏膚功著交部從優議敘所有在事各員弁該督等一併查明報部議敘○諭軍機大臣等策楞岳鍾琪奏到雜谷腦招撫番民已及四萬餘口俱照內地民人製換衣帽並查出蒼旺侵收銀兩分賞及相機進勦各情形具見辦理合宜膚功迅奏已有旨交部議敘惟俟蒼旺就擒捷音耳至摺中所奏自雜至梭可通之橋梁俱經蒼旺豫令頭人拆斷之處若蒼旺因攻圍梭卓拆斷橋梁則雜谷處亦其一窟何以不行防範反割絕而委之度外於理似未可信若蒼旺聞官兵進勦拆橋抵拒則前度必已多方守禦據險設備可能即成破竹之功此處尚未

明晰可諭該督等查明具奏○是日駐蹕密雲縣行宮○戊寅

上詣

皇太后行宮問安○諭軍機大臣等據雅爾哈善覆奏陳公壽在江翻異前供及前後訊明緣由一摺陳公壽接到錢玉珍所寄偽稿用包封轉寄吳進義以圖見好本屬實情乃在浙在江屢易供詞久懸案牘及江省委員帶往浙省會審始將曾受吳進義厚恩欲代留

開脫地步之處逐一供出此等狡猾之犯情屬可惡非僅尋常傳鈔者比已據雅爾哈善請將該犯加等治罪江省如有訊問之處作速將實在情節審明從重歸結至錢玉珍遠寄偽稿亦屬好事之徒與傳鈔看情罪較重其供出之已革千總孟宗及生員邵必勝前已諭令莊有恭就近提犯嚴行根究并令上緊查辦務得來歷不可任聽狡供又致遷延時日現在曾否究有頭緒即行詳悉奏聞

○戶部議准前任甘肅巡撫楊應琚疏稱甘屬張掖寧夏寧朔中衛皋蘭等五縣府田偏重地三百五十六頃六十六畝有奇請減則徵收共豁銀二百二十三兩有奇糧一千七百零三石有奇從之○山東巡撫鄂容安疏報新城寧陽莒州日照聊城等五州縣德州衛本年首墾地三十九畝有奇○賑貸河南武陟縣水災飢民○是日駐蹕南石槽行宮○己卯

上迴鑾奉

皇太后居暢春園○

上詣

安佑宮行禮○幸圓明園○庚辰

上詣暢春園問

皇太后安○諭浙江江西湖廣等省上年動缺倉儲恐一時採買市價騰踊因酌量截留各該省本年應運漕糧以資撥補所有浙江截留四十萬石江西截留二十萬石湖廣截留

十萬石其減歇船丁。雖非因災可比。但照例給予折半月糧。各丁苦蓋日用之費。未免拮据。著於例給折半之外。再加恩賞給一分。以恤丁力。該部即遵諭行。○又諭曰。協辦大學士吏部尚書梁詩正。因伊父梁文濂現年八十一歲。奏請回籍終養。梁文濂家居頤壽。朕已疊次加恩。梁詩正典領銓政。供職內廷。正資宣力。但父子至情。年逾大耋。理應承歡膝下。以遂孝思。著准所請。回籍侍養。吏部尚書員缺。著孫嘉淦補授。即令協辦大學士事。汪由敦補授工部尚書。○辛巳。諭軍機大臣等。據綽爾多奏。本年八月。準噶爾投誠之喇嘛根敦林沁。袞楚克巴臧二名。詰問有中途被獲。復逃情事。曉諭回巢。該夷等以若不收留。再無生路。哀懇哭求。情詞迫切。萬難拒回。應暫留卡汎。請旨安插辦理一摺。此等遁逃之犯。料理安插。徒費錢糧。是以議令盤詰。情由斟酌妥辦。不准概行收留。但向來雖有詰問。

曉諭之名。俱稱哀懇收留。從未見有一人回巢者。蓋該犯既經逃出。自難復回。徒多一番詰問。回巢竟屬具文。殊可不必。嗣後如有投誠之人。查詢明確。竟照舊例奏聞辦理。不必復行詰問。此次投誠之根敦林沁。袞楚克巴臧。即照例安插辦理。可傳諭綽爾多知悉。并諭北路副將軍等知之。○又諭曰。彭啟豐現在出差。部務辦理需人。裘曰修著兼署吏部侍郎事務。○調刑部侍郎王淳為戶部侍郎。工部侍郎蔡新為刑部侍郎。順天學政張泰開。仍為工部侍郎。○壬午。

上詣暢春園問
皇太后安。○

上還宮。○禮部議准直隸總督方觀承奏。臣奉旨修葺金太祖金世宗陵寢。並增建享殿。現在工程已竣。請供設神主致祭。從之。○以大學士來保。史貽直。陳世倌。吏部尚書孫嘉淦。戶部尚書蔣溥。刑部尚書阿克敦。劉統勳。戶

部侍郎裴曰修禮部侍郎介福利部侍郎勒爾森秦蕙田工部侍郎何國宗內閣學士鄒一桂錢維城充殿試讀卷官○以都統銜班第為正紅旗漢軍都統○貴州黎平府屬龍里司土官楊正位故以子通仁襲職○癸未上御乾清門聽政○策試天下貢士邵嗣宗等二百二十九人於太和殿前制曰朕紹承大統撫御萬邦宵旰孜孜勤求治理所冀內外臣工靖共爾位閭閻黎庶共慶盈寧羣材之登進日隆邊境之敕寧益永庶幾海內臣民共登上理焉顧官方或未盡肅民食或未盡豐取士之術猶疎邊圉之防未備將何以整綱飭紀以臻郅隆之治歟國家設官分職所藉以熙績亮工宣上德而達下情也唐虞之世五臣四岳九官十二牧師師濟濟一堂之上同寅協恭用能明良喜起成中天之盛治然雖有都兪不廢吁咈一時動色相戒者猶以叢脞為虞觀廢拜颺言慎乃憲屢省乃成

其交相責者何至也朕日以修和之盛望之内外大小臣工顧因循瞻顧之私或猶有未盡化者官方之砥礪其道奚從農者天下之大本也德惟善政政在養民開其資財之道斯以蓄積多而備先具周家穡事啟國爰興八百之基逮至西漢文帝蠲租勸農之詔屢下而皆以務本為兢兢豈非治要之所在歟今幅員日廣民生日繁游惰雜處其間雕文刻鏤傷農之事愈興俗尚奢靡罔知節儉朕勤求民瘼閭閻之艱苦纖悉周知偶有偏災賑卹立沛然裕民足食之道有不得不深為計者今欲重農事而務本計其道安在制科取士所以振淹滯儲任使也登明選公責在有司鑑空衡平言乎公則生明也比年以來加意釐剔宜人知畏法罔敢觸禁矣而不謂舞弊者之即生於察弊此雖千百人中僅亦一見即或者處士虛聲恩門年誼習俗相沿流風未殄歟司衡者秉校士之任當使寒畯

無淪落之虞。非材絕覬覦之念。斯無負關門
籲俊之盛典。宜如何立法。俾宿弊永蠲。以光
文治。歟。國家文德既修。武事必備。防邊固圉。
綢繆未然。非以誇遠畧也。漢唐宋以來。兵制
迭更。其間善否。或亦有可採求者。歟。有必勝
之將。無必勝之兵。選將固在所重矣。然將非
兵莫與為用。兵非將莫與為統。聯屬之方。嫻
習於平時。誠不可緩。我國家全付所覆土宇。
販章亘古罕匹。而將士之勇。韜畧之嫻。訓練
之精。制勝之神。皆遠過前代。惟是承平日久。
或狃於佚樂。易致廢弛。則修明武備。以慎固
邊圉。所宜豫為籌論者也。凡此者。上自廟堂。
下周鄉國。本保泰持盈之心。籌制治保邦之
要。思皇多士。久霑雅化。其以素所蘊蓄者。詳
著於篇。朕將親覽焉。諭軍機大臣等。據開
泰奏。推陞陝西長武令之邛水縣縣丞金玉
年力已衰。為人迂緩。難勝知縣之任。已准其
休致。咨部開缺等語。此事辦理甚是。督撫有

察吏安民之責。此等人員。若俟引見扣除。或
至新任糾叅於地方。已多貽誤。為督撫者。往
往因其推陞他省。容隱不言。殊非國家倚任
封疆之意。開泰不以其既經陞任。苟且姑容。
咨部開缺。如此存心。方為公正。可於奏事之
便。傳諭各督撫知之。○又諭曰。湖北巡撫恒
文奏。動耗羨一摺。內稱本年春撥解黔銀兩。
共用水腳鞘藉銀十二兩零。於本年三月分
耗羨內動給等語。此奏殊不知大體。各省耗
羨章程。具有定款。無定數之項。部議令隨時
奏明。固為慎重錢糧起見。但若僅十餘金之
事。亦專摺奏請。其瑣屑細碎。殊非政體。嗣後
此等動用之處。若在百兩以下。應成總彙。摺
奏。聞方為得體。可傳諭各省督撫知之。○以
都察院左副都御史增壽保為正白旗漢軍
副都統。○以通政使司副使孫灝為太僕寺
卿。○以司經局洗馬周玉章充日講起居注
官。○新中式貢士毛師灝。以殿試懷挾交部

枷責如例。○甲申。

孝慈高皇后忌辰遣官祭

福陵。○

上御懋勤殿。勾到各省情實官犯及倫紀攸關並雲南貴州情實罪犯。停決倫紀攸關案內雲南斬犯一人。四川斬犯四人。廣東斬犯二人。福建斬犯一人。陝西斬犯一人。湖南斬犯一人。江西斬犯三人。浙江斬犯一人。安徽斬犯四人。江蘇斬犯一人。山東斬犯二人。山西斬犯一人。直隸斬犯一人。又貴州情實斬犯一人。餘八十一人。予勾。○諭本日勾到情實官犯內李為棟王瑞霖二犯。因賄囑朱荃為伊子營求入學。本按以財營求與受財人同科。問擬絞候。已屬該部輕為出脫。至策楞擬以緩決更屬沽名曲庇。著交部嚴察議奏。蓋入學乃士子進身初步。原與科場一律營求賄囑之風。斷不可不嚴為防範。在輦轂之下。糾查嚴密。易於敗露。至各省學政出京赴任。

途次接見官員。乘便密行賄託。其事甚易。孰從稽察。似此情罪昭著。犯証確鑿之案。若不明正典刑。將來玩法之徒。益無忌憚。且今歲科場搜出關節。既伏厥辜。至殿試策名大典。復有豫擬策條。懷挾應試者。條對策問。若僅完卷塞責。較之三場。乃甚易之事。尚需宿構。懷挾則其鄉會中式時之舞弊。不問可知。朕特未加深究耳。可見衣冠中不少敗類。實出尋常意料之表。敗露者如此。其僥倖入彀者。益難信其必無矣。比聞新進翰林輩。視交通關節。竟不以為惡習。可恥。偷為一切真材益淪。力挽頹風。朕不辭也。此而可寬明刑弼教之意。安在。李為棟王瑞霖二犯。已於秋決內予勾正法。並將此嚴切曉諭中外知之。○諭軍機大臣等。直隸總督方觀承。召見時面奏。稱江南徐州府蕭縣城門守兵。獲有奸民偽託馬朝柱揭帖。該督撫等通行查拏。因并將逆書鈔發行。至直隸似非慎密辦理之道。方

觀承所見甚是該督撫查拏逆犯祇應開具該犯年貌籍貫及所犯事由移會隣省至此等逆詞止可鈔錄進呈其原稿或應封固留對筆蹟非承審官員不當令見結案時即行銷燬并不當存留案牘何得公然鈔播使無知愚民鈔錄傳看轉滋煽惑是正墮奸民術中矣著傳諭尹繼善等不應如此辦理看來外省督撫辦事惟尚虛偽習氣未除朕極力教誨終不知改實覺憤懣也并於奏事之便諭各省督撫知之○又諭曰定長奏桂林盤獲僧人解楚審非吳方曙駁詰至再供實係吳晟相從逆後馬朝柱將晟改為承并將廖文章引進燒炭逼脅入夥自認從逆發米守門與已正法之吳方文相好已發遣之楊存信相識其為逆黨實無疑義已備錄供詞解楚收審等語該犯初供吳方曙之處雖屬冒認但於馬朝柱逆謀及山寨各情形無不熟悉當非憑空結撰者著傳諭永常秉公詳悉

研審不得謂初供非實即屬子虛稍存迴護成見其從前所奏逆黨案內並無吳晟相姓名恐屬遺漏并諭永常知之○又諭曰成衮扎布第五子德勒克多爾濟著出嗣吹濟多爾濟承襲公爵並辦理公主額駙祭掃之事仍管理佐領事務○旌表守正捐軀之安徽宿州民陳友德聘妻李氏○乙酉直隸古北口提督布蘭泰遺疏聞得旨布蘭泰歷任封疆宣力有年今患病溘逝深為軫惻應得卹典著察例具奏○諭軍機大臣等前因布蘭泰患病調理提督事務著馬負書代辦今布蘭泰已經病故所有直隸提督印務不必另降諭旨即著馬負書署理馬負書現有服制俟伊服闋之日自行奏聞可傳諭馬負書知之○是日起

上以孟冬享
太廟齋戒三日○丙戌
孝敬憲皇后忌辰遣官祭

泰陵○丁亥

上御養心殿召讀卷官入親閱定進呈十卷甲第○是月兩江總督尹繼善奏臣奉旨令將施廷翰解京質訊即咨江撫鄂昌委員由江西起解臣仍派員護送至施奕學施奕度陳谷張三劉士祿彭祖立等已於九月初隔別起解得旨覽朕意此事汝不來終屬疑案可令莊有恭署理總督印務即行馳驛來京同在京大臣共審此事方得水落石出也○又

奏江省傳鈔偽稿各案臣悉心研鞫惟施奕學一線日期最早現經訊明偽稿得自阜保即遵旨將施奕學等解京質審得旨此事總不可信矣朕甚愧之又批此事頗不實今經審明令原問官來京同審此旨到可令江寧原問官周承勅錢度朱奎揚等並其餘承審之員即帶卷案馳驛來京其江西承審各官俟鄂容安到時自有旨諭且不必提起密之○江蘇巡撫莊有恭奏准徐海三府州屬入

夏以後蝗蝻發生臣檄飭各州縣實力撲捕秋成尚屬豐稔得旨豈有近冬而始奏捕蝗事竣之理非所以重民瘼也戒之○江西巡撫鄂昌奏臣聞浙省常山縣民左雙興拾有逆犯馬朝柱遺書係遞送玉山縣民朱捷三等同謀叛逆臣隨令廣饒道和其衷訪拏朱捷三等十七人解省研究並移咨浙撫飭將原書及左雙興解江質訊得旨據實審理莫復似偽稿枉入無辜以卸已責○閩浙總督喀爾吉善奏臣年力就衰負荷海疆重任恐有貽誤請准臣回京供職得旨汝為吾思一可任閩浙總督而又非現任要地者為代則可不然實不得人且汝精力亦尚可支持何必為此虛文○新授福建布政使德舒奏請陛見得旨不必來京一切據實盡心莫偷安莫遲才終身服膺可也○新授福建按察使來謙鳴具摺謝恩得旨汝非不能辦事者但莫模稜可也○署湖南巡撫范時綬奏錢弊

多由私銷請改輕錢文使私銷者無所得利其弊自絕再各省銅廠採煉銅觔除解局供鑄外餘銅請聽商民交易庶銅多價賤私銷不禁自止得旨此事實無良策且待緩圖○山東巡撫鄂容安奏東省各州縣先後得雨普徧麥苗滋長得旨欣慰覽之今令汝往江西查辦阿桂到時自有口諭諸事莫負初心認真任怨以明疑案畧存成見有所遷就何以見朕耶勉之○長蘆鹽政天津總兵吉慶奏山東運同原駐蒲臺縣因介濱州樂陵之間名濱樂分司運判原駐膠州係萊州府所屬名膠萊分司今運同運判皆移駐省城雖春秋二季各至所屬巡查終屬鞭長不及請令運同仍駐蒲臺運判仍駐膠州得旨如所請行○陝甘總督黃廷桂等奏臣奉命回陝沿途查看被災之永壽乾州武功咸陽咸寧長安醴泉涇陽等州縣臣鐘音由蒲城大荔渭南臨潼等處逐一履勘雖秋成失望幸八

月內雨澤霑透麥苗滋長糧價日就減落惟入冬以來恐貧民餬口維艱臣等將賑糶事宜豫為籌辦得旨覽奏俱悉賑卹之事督率屬員詳妥為之得霑實惠○四川總督策楞提督岳鍾琪等奏校磨所屬之嗎爾密等處流番經臣等招復該土司勒兒悟回巢撫插旋因蒼旺攻圍卓克基官寨甚急并檄令校磨遣兵救援該逆酋聞雜谷腦已失退守巢穴都司本進忠等帶領土兵從後追擊賊番敗回巴爾康駐營拒守臣等現抵卓克基俟確探形勢即行進剿報聞○又奏臣等偵探蒼旺巢穴在山岡險隘之區碉寨鱗接而北路山頂一泉係其取水之路因分兵三路進剿北遣遊擊李華等攻克達凹山梁直至山頂絕其水道南派副將額僧格等攻取大小戰碉七座並招復番寨數處中路令副將李中楷帶領先鋒官兵前驅奪卡臣等率領大隊并力攻擊連日奪取碉卡二十餘座直逼

賊巢並令通事人等曉諭番衆有投誠者即從寬免賊番相率乞降蒼旺勢窮就縛現在牢固禁守候旨獻俘得旨欣慰覽之蒼旺不值獻俘即於軍前正法以警番衆可也卿等已有旨交部議敘茲可將一切事宜悉心妥議務期番疆永享敕寧之福以副朕綏靖之志卿等其共勉之○兩廣總督阿里衮奏臣奉旨查禁民間積錢因飭各屬先行曉諭有錢之家隨時出易並委員妥協查辦得旨此在辦理得法而又行之久遠方為有益若不過奉行文書則不但無益而且滋擾深恐汝不能辦此也○貴州威寧鎮總兵官牛射方奏威寧僻處黔邊西北界雲南之昭通鎮雄東北界四川之永寧赤水並所轄畢赤水城二營皆係崇山密箐兼多銅鉛諸廠恐有匪徒竄處現飭各營弁兵加意搜查並修補軍裝甲械等項得旨是時時勉力為之

大清高宗法天隆運至誠先覺體元立極敷文奮武孝慈神聖純皇帝實錄卷之四百二十三

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹繕

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣謹繕內大臣戶部尚書呂海寰滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申冬十月戊子朔享

十一月一日

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

端慧皇太子園寢○

上御太和殿傳臚賜一甲泰大士范棫士盧

文昭三人進士及第二甲錢載等七十

人進士出身三甲杜錡等一百五十八人

同進士出身○頒乾隆十八年時憲書 順

天府行鄉飲酒禮 諭鄂容安著暫署江西

巡撫其山東巡撫事務著原任甘肅巡撫楊

應琚暫署郎中阿桂著暫署江西按察使給

十一月一日

事中范廷楷著暫署撫州府知府俱著往山

東隨同鄂容安前赴江西鄂容安到日鄂昌

即帶同丁廷讓戚振鸞馳驛來京 諭軍機

大臣等凡陞補官職具摺謝恩者藉以達其

感激圖報之意乃禮之當然必本身受恩

及祖父為其子孫陳謝乃可若子孫為祖父

謝恩則於理不順至伯叔兄弟則更屬旁及

近日如高恒之為其父謝恩又為其兄謝恩

數日之中接踵而至朕日理萬幾固不以批

示為繁而諸臣之習於虛文甚非務實崇簡之道也至請安一事本屬臣子親上之誠而外省督撫等亦俱習為故套即如朕巡幸木蘭由起鑾抵熱河以至進哨出哨竟繕寫數摺差人守候按時投遞其實意安在耶而陝撫鍾音至以差弁之豫先誤投不及於出哨時請安又復具摺陳明更覺瑣屑矣又如孝賢皇后奉安地宮各省督撫提鎮職守封疆豈有悉行來京恭送之理其在近省或原係內府舊人具摺奏請似尚出於本意而遠省督撫以及提鎮藩臬學政等亦復紛紛陳奏可見並非實心以為必應恭送不過視為具文以一奏了事耳此等皆甚非所宜可傳諭各省督撫將軍提鎮等惟宜一本至誠其虛文陋習悉行屏除為是 已丑

上御懋勤殿勾到四川廣東廣西情實罪犯停決四川省斬犯一人廣東省斬犯一人絞犯四人餘一百七十五人予勾 諭軍機大臣

等前曾經降旨傳諭各省督撫凡陳奏內有應行交部事件不必將寄信諭旨敘入今閱廣東省秋審情實各犯招冊內海陽縣聚眾拆房一案竟將寄信諭旨一併敘入殊屬不合嗣後各省題達事件不得復行裝敘寄諭之旨著再通行傳諭知之 庚寅

上詣暢春園問

皇太后安 幸圓明園 軍機大臣議覆四川總督策楞提督岳鍾琪奏稱番眾苦蒼旺殘虐投誠者四萬餘人悉願改土歸流其已入版圖之雜谷腦等處應築城並設副將理番同知各一員兵一千二百名雜谷腦之西南係梭卓接壤均須建汛設兵查威茂營舊制原係叅將今應仍改叅將即將該協副將移駐雜谷腦均歸松潘鎮管轄兵即以威茂所裁並通省各營通融抽撥同知亦有瀘寧一缺可以裁改并照松潘同知之例增設照磨一員統於善後事宜內分別籌辦等語其改

設副將移駐同知撥兵設汛之處均應如所請至築城大興工役恐遠近諸番聞而駭異將以問罪興討之舉疑為利其民人土物殊非鎮靜之道應無庸議從之。辛卯

上御洞明堂勾到福建奉天情實罪犯停決福建省絞犯一人餘八十人予勾。諭軍機大臣等江蘇巡撫莊有恭陳奏捕蝗諸弊因向無責成地主舉報之例撲捕踐踏雖酌給工本而農民恐得不償失希延至飛躍即可移禍鄰田又百姓恃有雇夫撲捕之例見蝻不肯自捕及應募受值又虛應故事冀日領錢文因以為利及設法收買又見蝻不肯即報待至長大捕賣多得錢文請嗣後民地俱責成地佃巡查撲捕議定成例等語從來有一例即有一弊向因蝗蝻貽害田禾立法撲捕自守令以至督撫責成定例綦嚴乃因嚴於衆處而農民中狡黠之徒詐偽叢生奸弊百出莊有恭所奏種種情形皆所實有但此皆

有司應行查辦之事如該督撫實心督率該屬員實力奉行則有蝻孽而田主不報夫役受值而撲捕不力豈有不行懲責之理若必事事著為成例三尺法其可盡耶億萬戶能盡曉耶但當蝗蝻舉發之時奸徒巨測必有謂因捕蝗而責百姓執成例以煽惑愚民由此抗官滋事者該督撫應先期化導曉諭俾愚民共知其詭譎情狀有司皆所洞悉則自不敢犯犯而責之亦不敢抗此自在奉行而不在定例將此傳諭各督撫知之。○壬辰諭軍機大臣等據駐藏大臣那木扎勒等奏審明阜和營兵譚林殺斃本營兵魏正明一案將譚林照故殺律擬斬監候等語西藏番夷錯處非內地情形可比譚林係該處防兵擅將同夥兵丁致斃即應在彼正法以示懲警乃僅照內地例辦理甚屬非是那木扎勒多爾濟著飭行。禮部議准御史常海奏內場監試等官雖無衡文之責然場務俱係經辦

嗣後內場監試及提調知貢舉等官其子弟亦應一體迴避從之。署湖南巡撫范時綬疏報龍陽縣大圍隄續墾田二萬三千九十畝有奇。○癸巳。

上詣暢春園問。

皇太后安。○至靜安莊。

孝賢皇后梓宮前奠酒。還宮。○諭兩江總督

尹繼善著馳驛來京其總督印務著巡撫莊有恭暫行署理。○諭軍機大臣等薩哈岱奏

本年河東池鹽自五六月以來風日燥烈過於旱乾以致池水缺少又難儘力澆曬迨至八月以後陰雨連綿地氣寒涼不能成鹽等語此奏殊屬不合天氣非晴即雨鹽池澆曬要在乘時趕辦今據奏晴則燥烈雨又寒涼俱不能成鹽然則何時而可耶無非一味藉詞推諉其不能實心辦理於此可見薩哈岱著傳旨申飭。○又諭據顧琮奏稱胡家屯溜刷外隄該河道詳請建築壩臺以備下埽工

大費鉅且緩不濟急因詳加指示於隄後幫寬即與隄外建築壩臺無異等語從來河員在工樂於興作每於不急之處建築大工無非藉以開銷之意而工程既竣又議歲修輾轉徒滋糜費及至盛漲漫溢者仍復漫溢衝決者仍復衝決於實用毫無裨補如江南諸隄岸經朕指示停修者以歲計之所省不知幾何矣顧琮所稱隄後幫寬之處並未繪圖呈覽無從指示已交與高斌令其於回任時乘便前往該處詳加相度會同商酌奏聞著傳諭顧琮知之。○又諭江省查辦偽稿案內張三得稿來歷多有疑實必須令原辦各官會同研訊是以令承審官來京並令尹繼善鄂昌同審三面質對始無遁情但此案頭緒雖多必有一實祇因輾轉根追承審諸員捕影尋聲取供不實而督撫拘於體制惟案牘供單是信不必盡得確情此亦向來積弊然正緣因此益迷其所失甚大將來水落石出

咎有攸歸。朕辦理庶務。毫無成見。惟期得實。在情形。軍機大臣等承旨。鞠訊。皆親身研審。與外間專委辦員者。迥異。莊有恭鄂容安從前皆身在事外。現經特交辦理。又非尹繼善等初次承辦者。比所有關涉此案人犯。應查拏者。即行專人查拏。應審訊者。即行親身究問。一切行牌詳轉套數具文。俱應痛改。如仍以外官體統相臨。惟委之屬員承辦。不得實情者。必重治其罪。將此傳諭。莊有恭鄂容安知之。○江西巡撫鄧昌奏。南安府上猶縣石溪隘粟米坑。有匪犯何亞四。謀為不法。得信即帶兵往拏。當獲匪犯李聖昌一名。訊供尚有李開花李德先李萬先朱紅宗帶兵前來。又獲李行萬一名。即李萬先。訊供相同。臣即飛飭文武官弁。多帶兵役。凡深山密箐。加意搜緝。勿致脫逃。并即親赴查辦。諭軍機大臣等。鄧昌奏到。南安府上猶縣匪犯何亞四等。謀為不軌。一摺。據稱現在親往查辦。但現獲

僅李聖昌李行萬二名。其首犯並夥黨。曾否續有拏獲之處。著傳諭該撫。速行實力查拏。無令逃竄。所有拏獲人犯。務當親自鞠訊。外省習氣。一切委之屬員。取供過堂。虛文了事。此等重案。不可仍前付之委員。致為所欺。朦也。慎之。又諭鄧昌。摺著鈔寄鄂容安。令其速行前往接辦。此等重案。非鄧昌所能辦理。鄂容安到日。如首犯尚未就擒。餘黨尚未淨盡。應即親往查辦。現在交辦偽稿一事。應提人犯。自可專差委員查緝。此案必應親履其地。周閱情形。深山曠僻之地。固易藏奸。然非無地可容。鋌而走險。何遽為此。看來或係捏造偽稿之人。自知法不容誅。竄伏山林。煽惑嘯聚。或係馬朝柱夥黨。別營窟穴。此二案通誅已久。或天網難逃。由此敗露。得獲渠魁。以正國法。亦未可定。著傳諭鄂容安。令其詳悉體察。務得根株。據實具奏。斷不可委之屬員草率了事也。○吏部議覆陝甘總督黃廷桂疏

稱蘭州府屬河州之景古城距州治較遠應以該州州判移駐定羌驛與景古城地方較近一切可資彈壓應如所請從之○甲午

上以

孝賢皇后升祔詣

奉先殿行告祭禮○諭軍機大臣等據雅爾哈善奏稱常山縣民左雙興拾獲匪書一案現在江西查審已據供出喻開仕一犯與書內所開之人許訟有仇委令金衢道羅源浩赴江會審等語此案人犯俱在江省其是否與上猶縣何亞四案內各犯有相關涉之處可傳諭鄂容安令其留心體察再何亞四聚眾不軌之處已令鄂容安親身查辦但看來此案情節非羅田逆犯馬朝柱之可比或係無知之徒妄言煽惑而地方文武員弁欲藉此見其奮勉出力亦未可定然又不可豫存此心以致粉飾了案惟在辦理時確按情形詳悉研究耳可一併傳諭知之尋奏臣抵江西

訊明喻開仕一案後即趕赴上猶縣查辦何亞四一案途遇鄂昌詢知何亞四已經就擒現將獲到各犯悉心研鞫此案實與馬朝柱喻開仕之案無涉亦無曾見偽稿之人其案內未獲餘犯仍飭嚴緝得旨好○又諭雅爾哈善奏常山縣民左雙興拾獲匪書一案現經江西查審供有喻開仕一犯與書內所開之人許訟有仇委員赴江會審請將進呈原拾匪書裁截發下查驗筆跡等語此案之出於挾仇傾陷事屬顯然但敢於造此大逆之語自不可不重治其罪其是否即係喻開仕偽撰確加研究自可得其實情至所拾匪書前據奏到閱看後已交軍機大臣焚毀無可截發況查驗筆跡亦係外省具文即如善書之人一手能兼數體彼知到案必對筆跡或故意隨手另寫何足視為確據耶可傳諭雅爾哈善知之○又諭據巡臺御史立柱錢琦奏稱出口船戶徐得利許得萬李長茂陳鄭

全等船。先後在洋被劫。並平安協把總徐念帶兵巡洋。被漁船舵水打傷兵丁等語。閩省為海疆重地。臺灣一府。孤懸海外。巡緝奸匪。尤為要務。該督提等身任地方。自應嚴飭屬員。加緊防範。今兩月之中。劫案疊疊。且至拒捕迎敵。打傷巡兵。可見地方文武之並不實心整頓。該督提等所司何事。現在曾否設法查拏。亦並無一字奏及。甚非委任封疆之意。著傳諭喀爾吉善。李有用。令其查明具奏。○

以湖北糧儲道李治運為安徽按察使。○調山東登州鎮總兵顧春為江南壽春鎮總兵。以草職安西提督李繩武署山東登州鎮總兵。○乙未命大學士傅恒。陳世倌恭點

孝賢皇后神主。是日恭奉

神牌升祔

奉先殿。○諭軍機大臣等。吳淞營叅將孫鼎元。傳送偽稿一案。已據尹繼善奏。查究得自高士貴。從高士貴遞究。得自邱順。現在查拏邱

順等語。著傳諭莊有恭。令其嚴行查辦。逐層根究。務得實在根源。速行具奏。此案拖延已久。若再觀望諉卸。正線愈迷。外官習氣。往往一委屬員。其取供多不確實。以致輾轉延緩。已有旨令尹繼善來京會審施奕度一案。莊有恭現署督篆。特交承辦。非他人可比。自當知所輕重也。○以兵部侍郎裘曰修。知武舉內閣學士李因培。為武會試正考官。侍講學士汪廷璽。為副考官。○丙申。

上御懋勤殿。勾到陝西湖廣情實罪犯。停決陝西省絞犯二人。湖廣省斬犯一人。絞犯一人。餘一百十八人。予勾。○內閣翰林院帶領辛未科散館之修撰編修庶吉士等。引見得旨。清書修撰吳鴻。已經授職。其庶吉士沈棫。蔣櫟。王啟緒。吳鵬南。林明倫。俱著授為編修。張曾敭。著授為檢討。葉藩。以知縣即用。漢書編修饒學曙。周澧。已經授職。其庶吉士李承瑞。湯世昌。戈濤。路談。劉墉。王應瑜。丁田。謝李。綬。湯先甲。

羅典葉觀國蔣良騏王紱周於禮朱嵇泰百里盧明楷俱著授為編修全魁艾茂俱著授為檢討柯一騰范思皇姚晉錫穆丹劉宗珙俱以部屬用狄咏箎史鳴皋梁兆榜吳為壠俱以知縣即用洪其哲軒轅誥郭兆高辰孫昭俱著歸進士原班銓選○諭軍機大臣等都察院奏江南鳳陽府鳳陽縣王莊驛解任驛丞鄧桂元揭報知府尤拔世遽信訛言檄行豫備疲勞驛站曲意逢迎一摺看來尤拔世在江年久於地方一切事務皆能辦理妥協似不致於如此妄率即偶因傳言飭屬探聽亦屬外省常有之事尚非大過驛丞鄧桂元因驛馬疲瘦解任餽養之後遽行直揭都察院顯有藉端報復之意且據奏該驛印信已交縣庫輒將空白印封填用更屬違例著將此摺鈔寄莊有恭令於署理督篆時查明據實具奏尋奏鄧桂元因驛馬疲瘦經尤拔世揭叅離任乃敢於叅後捏訴本管上司且

違例填用豫存空白印封請交部治罪下部議○旌表守正捐軀之安徽亳州民卜永顯女卜氏○丁酉諭據哈達哈等奏今科武會試地字園外場四川雲南二省新科武舉甚屬平常請通飭各該督撫加謹遴選務得真才等語武闈取士以備干城之選所重在弓馬技勇該二省新科武舉如此平常該督撫鄉試監臨時何由取中甚非慎重掄才實心甄拔之道姑念初次暫免交部議處著該部傳旨申飭嗣後各省監臨有似此草率從事不能實心較閱以庸弱濫充者定行交部嚴加議處可通行傳諭各省督撫知之○授一甲一名進士秦大士為翰林院修撰一甲二名進士范梈士一甲三名進士盧文弨為翰林院編修○戊戌

上至靜安莊

孝賢皇后梓宮前奠酒○御懋勤殿勾到浙江江西情實罪犯停決江西省絞犯二人餘八

十一人。予勾。○諭軍機大臣等。原任內閣學士劉藻來京。召見時。朕詢及巡撫鄂容安。在東省居官如何之處。伊奏稱。撫臣辦事實心。惟不時出巡。州縣官供應太煩。未免苦累等語。督撫統轄全省。出巡本有定期。其或遇有地方應行查勘彈壓之事。自當隨時親身查辦。但該地方州縣等官。因督撫按臨。意圖見好。不無供億之煩。或係州縣官耽於安逸。畏上司之不時經臨。藉口苦累。亦未可定。可傳諭鄂容安。令其於便中據實奏聞。尋奏。巡查地方。為督撫專責。乃屬員往往藉供應為名。多有派累。臣向俱輕裝簡從。嚴禁供應。至地方吏治民情。為督撫者均宜熟悉。若稍避嫌怨。深居簡出。必致諸務廢弛。於公事無濟。得旨。所見是。○己亥。

上御懋勤殿。勾到江蘇安徽情實罪犯。停決江蘇省絞犯一人。安徽省斬犯一人。絞犯一人。餘一百十三人。予勾。○內閣翰林院帶領新

科進士引見。得旨。新科進士。除一甲三名。秦大士。范梈。士。盧文弨。已經授職外。錢載。蔣和寧。邵嗣宗。張模。梁同書。謝墉。金維岱。吉夢熊。朱陽。甘立功。馬騰蛟。趙瑗。張坦。鄭岱。鍾。盧穀。熊恩。紱。湯堦。龍煜。岷。趙佑。吳以鎮。江聲。曹昞。紀復亨。董元度。景福。秦釐。翁方綱。鞠愷。陳齊紳。博明。王猷。王政。義。張孔。紹。馬錦文。陳奎。王懿德。萬廷蘭。賈煜。俱改為庶吉士。梅理。沈清。任。楊有涵。陶其懷。德風。顧光旭。陸象雲。王雲鵬。龔同。多倫。五。蔡璜。俱著分部學習。照例試用。張霽。沈作霖。宋景洙。曹鏞。胡邦翰。歐相箴。汪濤。宦儒章。劉標。俱著以知縣即用。周天度。陳啟宗。王欽。胡耀南。胡德琳。黃恩。錫。戴之。适。屈綱。屈宜紳。謝奉璋。李先達。王文徵。杜首瀛。石為。藝。俱著分發各省。以知縣用。黃達。嚴元燮。王宏善。曾元景。王宸。佶。呂炯。郭鳳翔。張璽。祁宗孟。曾殿川。郭天性。俱著以教職即用。餘著歸班銓選。○諭向來督撫。惟圖安逸。端居

省會。反博鎮靜之名。即遇所屬有水旱震溢。及聚衆不法之事。不過委之屬員。據稟報查辦。並未目覩情形。何以救民水火。曾經降旨通行申飭。近來督撫多奏明親往查辦者。而外間又謂督撫不時出巡。供應頻煩。苦累州縣。召對時亦有人言及此。屬員供億逢迎。本有禁例。如督撫以供應不周。需索州縣。州縣以應付華盛。取媚上司。此則弊政之大者。言官風聞。何不指叅。督撫身任封疆。朕倚以恤民瘼。而清吏治。苟出於此。何以察吏。但即輕裝減從。而隨行弁役。車馬食用。自所必需。雖隨時發價。亦必由地方辦集。闢草者流。畏大憲不時按臨。耳目所及。難於藏拙。或藉此妄生議論。亦不能保其必無。但因此遂以曩時督撫之深居簡出。為安靜得體。是則所謂因噎廢食矣。然督撫統轄全省。凡有舉動。必當權其輕重。如事在得已。原不必以僕僕道途為勇往任事。至彈壓撫綏。事關重大。則亦必

身先屬吏。董率指示。方克有裨實濟。若僅以奏報親行為了事。雖經身履其地。而畧無措置。轉致幕容招搖。家人滋擾。則又不若不親往之為愈矣。浮言雖不足動聽。既有此言。不可隱而不宣。將此通行傳諭各督撫。令其留心體察。諭軍機大臣等。阿里衮所奏籌辦生息銀兩一摺。所辦非是。前因各處生息銀兩多未歸還。原本降旨傳諭。令其善為料理。俾得漸次歸足。原以此項本銀發出多年。恐承辦員弁。經手胥役。辦理不善。致有侵蝕懸宕之弊。並非為急於歸本起見。而各省督撫提鎮中。乃有以節省賞需。加增利息。冀得速歸原本。為請者。業經屢次傳旨曉諭。今阿里衮奏內。將商人領過運腳。同正價餘利。一併繳庫。湊歸原本。誤會諭旨本意矣。著傳旨申飭。又諭阿里衮奏稱。本港洋船載米回粵。請照外洋船隻之例。一體減免貨稅等語。外洋貨船。隨帶米石。至閩粵等省貿易。前經降

旨萬石以上免其貨稅十分之五五千石以上免其貨稅十分之三原因閩粵米價昂貴以示招徠之意若內地商人載回米石伊等權衡子母必有餘利可圖若又降旨將船貨照例減稅設一商所載貨可值數十萬而以帶米五千石故遂得概免貨稅十分之三轉滋偷漏隱匿情弊殊非設關本意至上年新柱在粵因米價未平出示曉諭乃隨時酌量辦理之事豈可援以為例耶著傳諭阿里衮

知之吏部議奏此次奉旨分發各省以知縣用及分部學習人員俱照舊例辦理其以教諭即用各員除現在各省冊報內應以年老休致之缺即予先補外並飭各督撫於未冊報教職內雖年未七十而才具不能勝任者亦加甄別開缺將此項人員按次銓補再此外如有陞任及丁憂事故等缺亦儘補用從之兵部以武會試中額請得旨這考試漢軍取中三名直隸取中十名陝西取中十

一名廣東取中四名河南取中五名山東取中三名江南取中二名山西取中四名湖北取中三名湖南取中二名四川取中一名廣西取中二名福建取中四名浙江取中四名江西取中五名雲南取中一名貴州取中一名○旌表守正捐軀之河南長葛縣民李有德妻路氏庚子

上詣暢春園問

皇太后安○至靜安莊臨送

孝賢皇后梓宮○迴圓明園○諭軍機大臣等據山東巡撫鄂容安奏稱鄒城縣差役在於縣屬附近邳州之南園地方揭有逆帖語多狂悖且將邳州陶合社范安仁祖孫父子俱列帖內顯有奸徒挾仇圖害現在飛咨江南督撫飭拏等語此事看來與蕭縣卜湧一案伎倆相同既據飛咨江省飭拏曾否已就弋獲著傳諭莊有恭令其速行飭屬嚴拏勿致奸徒聞風遠颺莊有恭新任封疆現署督篆

於此等事。辦理固在迅速。然尤當以靜鎮為主。嚴明為要。慎勿過於張皇。或則失於姑息。以致訖無定見。不能悉合機宜也。尋奏據邛州知州稟稱。親至陶合社范安仁家查訪。實係務農良民。且逆黨謀為不法。自必行蹤詭秘。決無將同夥姓名住址書寫張貼。以待擒捕之理。而逆帖所列姓名。又僅范安仁父子祖孫一家。其為挾嫌傾害無疑。所有造具逆揭之犯。現在密飭查拏。報聞。○又諭鄂昌奏

到上猶縣匪犯何亞四等謀為不法一案。初意不過三四奸宄。私為邪說。地方文武不無因楚省辦理馬朝柱之案。有意張大。令覽摺內報獲匪黨人犯及逆書旗械等物。則逆跡已著。幸而及早發覺。不致貽害地方。該撫正應身往查辦。但首犯必當迅速嚴緝。稍遲則恐其漏網。又為馬朝柱之續矣。首犯未獲。一切奸匪聞風。往往託名惑眾。如李開花事隔多年。而馬朝柱及此案俱託其名。此皆因當

時未獲明正典刑。故耳。何亞四一犯。必當設法務獲。以伸國法。其附逆夥黨。當如今年辦理馬朝柱之例。審明即於該處一面題報。一面正法。毋得曲為開脫。使愚頑知所警懼。看來此案。知縣高顯宗首發奸匪。早破詭謀。尚為實心辦事之員。著傳旨嘉獎。俟此案完結之日。交部議敘。其現在應行查辦之處。該撫悉心奮勉。嚴密辦理。務令根株淨盡。俾地方永遠寧謐。將此諭鄂昌知之。併諭鄂容安。○

又諭據江西巡撫鄂昌先後奏報。南安府上猶縣地方匪犯何亞四聚眾不軌一案。現獲匪黨四十餘人。其首犯何亞四尚未就擒。查該犯係廣東長樂縣人。其搜出逆書內有南雄通族人等兄弟叔祖字樣。現咨廣東督撫一體嚴緝。究訊等語。匪犯何亞四原籍既隸粵東。其逆書內又有南雄通族之語。現在江省發覺嚴拏。或已竄歸故鄉。潛蹤族屬。亦未可定。可傳諭阿里衮令其即速遴委員弁於

長樂南雄二處嚴密躡緝並訪提該犯的族
詳悉根究務得逆首并宜迅速辦理勿令聞
風別竄又成一羅田之馬朝柱至今尚未弋
獲也如緝獲何亞四務委妥員嚴密防範解
江審明正法毋致免脫逆書一紙并令鈔寄
○辛丑諭軍機大臣等據尤拔世所奏地方
情形一摺殊未明悉宜旱而不宜水語尤疵
謬田地高下雖土性各有所宜均需雨澤調
勻方可望其收成就豆雜糧不過稍能經耐
豈有轉宜於旱之理至鳳屬常年非水即旱
若今歲米價昂於往年則恐於民食有妨即
當詳明督撫查辦凡地方水旱情形必應據
實奏聞方是不應如此含混著傳旨申飭
又諭前據策楞岳鍾琪奏雜谷蒼旺恃強凌
弱侵擾梭卓土司不遵開示現經發兵進剿
等語朕令其悉心籌畫如辦理不善又如金
川瞻對大費周章矣不意其數日間直抵松
關並擒蒼旺且奏請於雜谷腦建立城卡添

設防兵將投出之番民盡改歸流蒼旺果有
心滋事豈毫不設備竟如此之易滅耶岳鍾
琪前帶兵金川時留駐黨壩一年有餘何曾
攻克一處以此觀之必係土司自不相睦汝
等乘人之危耳設他處土司望風驚駭謂天
朝尋釁加兵利其土地民人由此各懷疑懼
所謂綏靖邊陲者安在且又未熟籌現在軍
興所費幾何將來改歸內地後每年歲賦幾
何一切添設兵卡是否所入能敷所出此次
効力土司內未必無蒼旺舊部輒將伊家口
什物分賞漢土官兵尤屬不知大體岳鍾琪
何足深責策楞受恩深重亦復如此輕舉不
曉事耶所辦殊與朕意不合但事已如此祇
可不加深究將此寄策楞知之尋奏本年四
月內雜谷蒼旺以殺害頭人易沙等起釁維
時遣委都司本進忠等前往化誨並未料有
用兵之事該酋抗不遵依日夜攻打勒兒悟
並焚掠卓克基地土經該土司屢次聲報未

便置之不問。一面將商辦情形奏聞。一面派兵陸續進發。因乘雜谷腦空虛之際。進至松關。番人等一聞招撫。相率如歸。並獻計斷其水道。情願引路前進。勢如破竹。直搗賊巢。遂得生擒逆首。總之此次用兵之始。實屬商謀。出其不備。乘雜谷腦空虛而入。繼因該首逆跡確鑿。連夜進剿。值機會之相湊。幸而竣事。易速得旨。此何言耶。豈有先欲乘其不備。而後始知其逆謀確鑿之理。如此。則先欲乘其不備者。為何事而起。此不過欲實前言之謬。而不知反露辭游矣。又稱將抄獲蒼旺貲財人口。一時分賞漢土官兵。意在鼓勵。而未計及有失大體。實屬冒昧。再始事之時。並未通盤籌畫。前後經費。率爾舉行。設使無此機會。該酋得以有備。必致告竣無期。接到諭旨。不啻如夢初醒。此後遇有事涉兩可。請旨遵行。不敢草率復蹈前轍。得旨。豈復有一易破之蒼旺。此不待言也。即如郭羅克。現今抗不遵

命。爾等能如彼何哉。○壬寅。諭阿思哈奏稱。山西蒲解等屬。被旱偏災。平陽紳衿耆庶人等。捐輸銀兩。就近解交河東道庫。以為加賑銀穀兼散之用等語。此奏殊為卑鄙。錯謬之至。朕實駭聞。直省偶遇偏災。地方殷實之家。樂善好施。或自出家廩積貯。或出己貲糴運米石。散給貧民。功令原所不禁。惟具數報官。量加優敘。以為閭閻任卹者勸耳。並非敘賞貯庫。藉以助賑也。國家賑濟蠲緩。重者數百萬兩。少亦數十萬兩。悉動庫帑正項。從無顧惜。地方富民所捐幾何。貯庫助賑。殊非體制。此端一開。則偏災之地。貧民既苦艱食。富戶又令出貲。國家撫恤災黎。何忍出此深負朕痼瘼一體之意。阿思哈著交部嚴加議處。所捐銀兩。著發還。聽該紳衿等自行辦理。○又諭山西蒲解等屬。秋禾被旱。業經照例賑恤。其災地內。原未播種秋禾麥地。及附近災地。得雨稍遲之處。應納糧賦。定例不在蠲緩之

列仍應按限輸將貧民未免拮据著加恩將永濟等十一州縣蠲緩餘剩留種麥地錢糧及平陸河津稷山絳州等四州縣本年下剩未完民賦一併緩至來歲麥熟後徵收以紓民力其平陸等四州縣應行徵半還倉之春借常平義社各糧亦著加恩全行緩至來歲秋收後徵收俾民食得以寬裕該部遵諭速行○又諭阿思哈不勝巡撫之任著來京候旨山西巡撫員缺著定長調補廣西巡撫員缺著李錫秦補授定長未到之先著侍郎胡寶瑤前往暫行署理馬燦著暫署順天府尹事○諭軍機大臣等尹繼善奏到江西饒九道和其衷等所報左雙興拾得逆書一案又奏鎮江府營房寄信一案皆託名馬朝柱前此據鄂容安奏郟城縣逆揭內開郟州陶合社范安仁祖孫父子姓名并卜湧妄貼逆揭已有四案皆不問可知為挾仇誣陷總因首逆馬朝柱未經弋獲是以刁徒造為逆書舉

平日怨恨之人及殷實飽暖之家具列其中地方官查辦雖明知其冤必須按名提解質審迨至到案辯明而良善無辜已不勝其累正墮奸人計中且州縣官拏究株連旁出紛煩而緝獲正犯之力轉懈馬朝柱益得竄逸偷生并墮首逆計中矣該督撫等應出示曉諭嚴拏馬朝柱正犯到案審明容留藏匿夥黨方行緝拏究擬如有架名馬朝柱逆揭牽累良民希圖陷害者但密緝捏造之人照助逆匪黨從重治罪其帖內開具人名概置不問並不必提解到案如此庶足以息刁風而安良善此風江浙等省為甚山東近亦有之閩省恐亦有似此者將此傳諭各該督撫照此辦理○又諭吏部議覆愛必達所奏請將何愷補授黑鹽井提舉一本以丁憂服滿人員例應在部投供歸月銓補從無將在外題補要缺豫行扣留以待服滿之員到部引見補授之例等語此事前據愛必達奏到因其

不甚明晰曾經降旨申飭嗣該撫將何愷丁憂服闋日期聲明仍請補授此缺及交部議實與定例不符提舉一缺即屬緊要通省中豈無可以勝任者而必欲用一丁憂服滿未經到部之何愷該撫以不合例之員屢次潰奏轉致員缺久懸甚非辦事之道著傳旨申飭又諭據陝西布政使張若震奏稱陝省辦理災賑在在需員請勅部於候補候選州同縣丞以下等官內揀選十員發陝差遣委用等語辦賑需員事屬緊要已照請飭部揀發但其奏內有稟商督撫二臣意見相同之語請揀人員自應督撫具奏方合體制如張若震未經稟商擅行入告是乃該司冒昧若稟商而意見相同何得委令藩司自行奏請豈督撫轉不應奏耶戶部議准閩浙總督喀爾吉善疏稱船戶配載由浙運閩備糶米石於浙境瑞安縣洋面被風破船米沈失無存現取具印甘各結到部應予豁免從之

豁除直隸樂亭縣潮衝田八十頃九十三畝
有奇額賦

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十四

大清高宗法天隆運至誠先覺體元立極敷文奮武孝慈神聖純皇帝實錄卷之四百二十五

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事務處管理

吏部理藩院等處正黃旗滿洲都統世襲領侍衛內大臣稽察欽奉 上諭事務處管理

總纂官經筵講官太子太傅文華殿大學士文淵閣領侍衛內大臣稽察欽奉 上諭事務處管理刑部戶部工部事務

世襲副都統軍功加十九級隨帶加二級又加二級臣董誥內大臣戶部尚書謹將滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄一次臣曹振鏞等奉

教修

乾隆十七年壬申十月癸卯

實錄卷之四百二十五

上詣暢春園問

皇太后安

溫惠皇貴太妃七旬壽

上詣行禮侍宴○還宮○策試中式武舉劉廷

棟等六十五人於太和殿○軍機大臣等議

覆四川總督策楞提督岳鍾琪奏稱松岡投

誠番民一萬餘口應按寨分設撫夷掌堡並

擇番目內素為番衆信服者設為土守備千

把以備調遣等語查雜谷本吐蕃苗裔自唐

宋以來世守其土明代授為安撫司康熙十
九年率屬內附仍予舊封未便以蒼旺一人
悖逆遂致亡其世守應飭該督提另擇蒼旺
近屬內伯叔兄弟一人素為番民信服者換
為土司所奏應無庸議得旨依議速行○甲
辰

上御乾清門聽政御懋勤殿勾到河南山東
情實罪犯停決河南省絞犯八人餘一百五
十七人予勾諭軍機大臣等開泰題陞南
籠府知府之松桃同知袁振緒今日吏部帶
領引見看來年力漸衰且亦不過恂謹平常
之人無甚出色因南籠尚非要地已照所請
補授著傳諭開泰令於該員回任後留心察
看如不能勝知府之任不妨據實奏聞不得
以係伊保題之人遂稍存回護○又諭據高
晉奏稱壽州等八州縣及鳳陽等三衛被旱
之處業據各屬報稱以田畝計一邑之中多
者不逾五分少者不及一分被災甚輕無庸

撫恤等語。安省鳳潁泗等屬秋禾被旱情形。前據張師載題報聲明。現在飛飭查勘分數。如果成災。照例辦理。今既查明被災甚輕。自應速為奏報。以慰朕懷。何以高晉已經具奏。而張師載轉未奏到。可傳旨詢問。其壽州等州縣衛。今年被災分數輕重。若何。應否賑卹之處。令將實在情形據實查明。速行奏聞。戶部議覆。湖南布政使周人驥奏稱。各省道員於所屬知府新舊交盤。遵例出結。而於直隸州止具倉穀印結。各項庫貯錢糧不加結。詳報易啟侵虧之漸。應令一體盤查出結。以專責成。應如所請。通行飭遵。從之。以江蘇按察使台柱為廣西布政使。乙巳。上御紫光閣。閱中式武舉騎射。御懋勤殿。勾到山西直隸情實罪犯。停決。山西省絞犯一人。直隸省絞犯四人。餘八十一人。予勾。諭圖爾炳阿。前在雲南巡撫之任。不能實心察屬代為彌補。部議照監守自盜治罪。但尚與

婪索肥橐者有間。著加恩從寬釋放。又諭教漢貝勒羅卜藏為人誠實。宣力有年。今聞溘逝。朕心甚為憫惻。著派御前侍衛馳驛往奠。並賜銀三千兩。照郡王例治喪。河南巡撫蔣炳疏報鄧州已墾成熟地二頃三十二畝。有奇。以安徽廬鳳道許松佑為江蘇按察使。丙午。

上御紫光閣。閱中式武舉技勇。並覆閱騎射。諭軍機大臣等。各省辦理傳鈔偽稿。本期根究實在來歷。逐線追尋。務得首先捏造正犯。以伸國法。而懲訛言耳。乃及今一載有餘。茫如入海算沙。了無頭緒。此皆因各督撫等一切委之屬員。惟據詳稟供詞。虛文塞責。並未實心研究。實力查辦。承辦之員。往往推卸隣境。隔省隔屬。輾轉關查。挨延時日。而其中情偽百出。有挾仇誣扳者。有受囑開脫者。有畏刑妄承者。甚至教供串供。附會遷就。株連擾累。不勝其煩。而正線轉迷。首犯尚悠然事外。

即如湖南省周儀主萬煩串囑隱瞞高求楊三懇囑開脫經傳旨詢問范時綬始將各情弊審明具奏而江西省審張三施奕度一案尤為閃爍不實是以將尹繼善鄂昌及承審各官調取來京公同面質務使水落石出確得實情倘他省督撫辦案有似此者亦必照此辦理蓋政刑所關不容絲毫假借偽矯流言亂民風者尚小而上下相蒙關吏治者甚大若顛預了事以模稜為大度以朦混為包

荒政治尚可問耶若因案情難於根究遂爾懸擱嗣後有似此者其得竟付之不問乎我大清國有此政體乎督撫身任封疆膺心膂股肱之寄辦理一人大案尚惟委之屬員不能上緊根追分憂宣力之謂何亦可謂不知輕重矣朕勵精庶政朝夕勤乾不敢稍自懈怠日以勅幾熙績為心方今逢熙洽全盛之時政事即未盡整肅尚不應遽至廢弛然偽稿之首犯杳無下落羅田逆案渠魁馬朝柱

及要犯馬朝貴熊得勝熊友勝等竄逸無蹤思之良為愧慙將此傳諭各省督撫俾咸知警省○賑貸安徽壽州鳳陽定遠臨淮霍邱泗州盱眙天長等八州縣鳳陽長淮泗州等三衛本年旱災飢民○丁未

上御太和殿傳臚賜中式武舉一甲哈廷樑林建鼎馬琰三人武進士及第二甲田允中等七人武進士出身三甲伊天培等五十五人同武進士出身○詣暢春園問

皇太后安○幸圓明園○諭軍機大臣等今年各省秋審人犯九卿從緩決改入情實者除官犯內之李為棟王瑞霖二犯已經降旨將該督交部察議及倫紀攸關各犯俱係照例更正外尚有雲南之傅彪等二案貴州之劉鳳章一案四川之王啟俸等三案廣西之何貴兆一案廣東之張明達等三案福建之邱貴生一案陝西之張氏等三案湖廣之李周臣等三案安徽之鄭子傑一案江蘇之范九

等四案。河南之王吾尼一案。山東之孫虞衡一案。山西之屈旭娃一案。直隸之王文利等二案。按其所犯情罪。或火器斃命。或拒捕傷人。或有心故殺。或白晝搶奪。或夥衆輪姦。或搶犯毆差。或造言惑衆。或挾忿謀殺。或偷盜庫銀。或殺人訛詐。或兇毆立斃。皆屬法無可貸之犯。而該督撫擬以緩決。豈辟以止辟之意。此在有意姑息。固屬不可。而草率定擬。權衡失宜。亦非明允之道。二者必居一於此矣。朕辦理政務。從無絲毫成見。即如各省原擬緩決人犯。九卿改為可矜者。亦至數十人。朕察其情節。實有可矜。已悉予免死。減等發落。並非一意從嚴。但秋審為讞獄重典。督撫委任封疆。明刑弼教。是其專責。自應加意詳慎。以期無枉無縱。方足以申國憲而垂炯戒。若明知所擬未必悉協。而以為九卿自能改正。則更非實心辦事者所宜出矣。著傳旨申飭。並通行傳諭知之。○又諭莊有恭奏陳公壽

偽稿來歷。不容遷就附會。苟且完結。其言是矣。而似不無回護之見。然其是否回護。舉可不問。惟期明晰確情耳。閱摺內錢坤稿來歷。即從孟宗邵必勝。而邵必勝即舒赫德尹繼善會審倪心傳官貴震之案。一線之來路已明。未必別有端緒等語。看來雖似不肯將就併案。欲另行提究之意。而隱然留為地步。將來不過仍歸之官貴震一線了局。預以奏明為開脫之地。此更不可。邵必勝到案。即當詳細推鞠。務求的確。若謂陳公壽之案。不期亦出官貴震。則天下必無之事。正所謂附會遷就矣。如仍存成見。不得確情。則有尹繼善鄂昌之例在。莊有恭所署。即尹繼善之任。豈尹繼善可來京面問質審。莊有恭獨不可來京耶。速究確實來由。詳悉奏聞。毋徒空言為也。○又諭沈德潛以新修西湖志纂進呈。朕省方勝覽。備見詩篇詔諭。此專志西湖。無煩特為之序。成詩三首。題簡端以代弁言。並書橫

卷其祇受之昨梁詩正陞辭亦有重葺西湖志之奏以地言之則德潛吳人也湖山鄉曲當讓之梁詩正均一志耳即以此稿合成之可沈德潛傳王霞各賜表裏二書留覽（戊申）

上詣暢春園問

皇太后安（還宮）兵部議覆署江西巡撫鄂容安奏稱上猶縣匪犯何亞四肆謀不法親至該縣踏勘由水陂至營前城上信地下信地等處查下信地即該犯舉事之所營前城向設浮龍司巡檢把總外委各一員兵四十名其間山險路歧稽察難遍應於上信地移駐千總一在營前防兵內抽撥十五名再於鎮標所屬抽調二十五名以為一汛下信地另設塘汛亦於附近別營撥兵十名駐守其營前城之外委裁去仍留把總一兵三十名至浮龍司巡檢微員不足彈壓應改為上猶縣縣丞仍駐營前再崇義縣之金坑與龍

泉縣之左安村大半棚民雜處亦易藏奸龍泉縣向設禾源司巡檢地非緊要應改駐龍猶接壤之左安村仍兼管禾源一帶崇義縣上堡司巡檢原駐過埠距縣治尚近應改駐金坑仍兼管過埠一帶應如所請得旨依議速行（己酉）

上啟鑒謁

東陵並臨送

孝賢皇后梓宮奉安地宮（是日駐蹕煙郊行

宮）庚戌福建巡撫陳宏謀疏報羅源縣墾田園一十五頃七十畝福清縣墾水田一十六頃九十八畝（是日駐蹕白澗行宮）辛亥調戶部侍郎德爾敏為工部侍郎（是日駐蹕隆福寺行宮至癸丑皆如之）（壬子

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○至

孝賢皇后梓宮前奠酒奉移

梓宮於地宮前享殿○遣官祭

后土之神

昌瑞山神○癸丑諭軍機大臣等據內閣學

士夢麟所奏商城縣地處萬山界連江楚請

於南陽鎮標酌派官兵移駐該地會哨分巡

一摺著抄寄該撫將炳令其確按地方情形

將應否如此辦理之處詳悉酌議具奏○甲

寅

上臨享殿奉移

孝賢皇后梓宮安地宮

上親奠酒王以下文武大臣官員隨行禮○諭

萬年吉地工程堅固宏整茲者

孝賢皇后梓宮奉安地宮禮成在工大臣官

員具見敬謹將事侍郎德爾敏等著交部分別議敘○又諭曰

孝賢皇后奉安地宮禮成所有總辦喪儀王

大臣及禮工二部并各衙門派有執事及送

梓宮之大臣官員俱著交部分別議敘○又

諭此次直隸辦差人員俱敬謹妥協總督方

觀承及辦差文武各官著交部議敘○工部

議准南河總督高斌疏請修太行隄並浚隄

南洩水河從之○以江南督標副將王綏為

江西南贛鎮總兵○是日駐蹕桃花寺行宮

○乙卯諭軍機大臣等據尹繼善奏覆上猶

縣奸民何亞四邪說惑眾一摺內稱知縣高

顯宗不早查辦現令該道嚴查詳揭會叅等

語此案前據鄂昌所奏知縣高顯宗一聞逆

信即親自帶兵擒捕掃其巢穴雖首犯未經

就獲看來尚屬勇往辦事之人是以曾經降

旨諭令嘉獎今尹繼善又以該縣具稟日期

不符並不及早查辦飭令查揭會叅但彼時

或因何亞四等逆跡未著。未便張大其事。此中情節。尚宜詳悉體察。固不必因有嘉獎之旨。有意開脫。亦不得以地方有事。惟諉之知縣一人。立登白簡。以塞責。更不可令善於規避之人。反得濫邀嘉獎。已傳諭鄂容安。令其再行查察據實奏聞。莊有恭暫署督篆。可一併傳諭知之。至何亞四一犯。年未及壯。非馬朝柱之蒼猾詭秘者可比。若上緊搜捕。斷無不獲之理。尹繼善現在暫令來京。莊有恭接辦此案。務宜作速嚴飭查拏。毋令遷延時日。轉致遠颺。又成羅田話柄也。尋鄂容安奏上。猶縣知縣高顯宗。於何亞四等不法一案。初因巡檢張仕具稟。止稱該犯等形跡可疑。隨拘何亞四父叔到案。令其立限送官。未即差拏。其辦理原屬不善。及一聞實在為匪情跡。即親往追捕。雖未即時擒獲。而最要人犯。先後拏到。核其功過。尚足相抵。報聞。○以科爾沁貝子達勒瑪達都。為理藩院額外侍郎。○

以廣東雷州協副將鄭得元。為湖北宜昌鎮總兵。○是日。駐蹕盤山行宮。至丁巳。皆如之。○丁巳。吏部議准。調任廣西巡撫定長疏稱。武緣縣鎭鄒寨巡檢事務較簡。應併歸高井寨巡檢管理。其鎭鄒寨改為上林土縣。並移駐該土縣之河北甘蔗園。那樓寨巡檢併歸隆安縣典史管理。其那樓寨改為果化土州吏目。陽萬土州州判併歸田州土州同兼管。遷隆土崗地方併歸忠州州同兼管。羅白土縣地方併歸江州土州同兼管。鎮遠土州地方併歸佶倫土州吏目兼管。又臨桂縣屬蘆田市巡檢改為蘇橋巡檢。其蘆田所轄併歸臨桂縣典史兼管。從之。○賑卹江蘇上元。江寧句容。江浦。六合。泰州。興化。靖江。丹徒。阜寧。安東。鹽城。江都。高郵。寶應。陽山。寶山。贛榆。通州。十九州縣旱災飢民。並緩徵新舊額賦。○賑卹山西永濟。臨晉。猗氏。虞鄉。榮河。萬泉。解州。安邑。夏縣。為城聞喜。十一州縣旱災飢民。

並緩徵新舊額賦。○賑貸湖北鍾祥京山潛江荊門當陽隨州江陵遠安枝江襄陽棗陽宜城均州穀城鄖縣鄖西保康竹山竹谿東湖二十州縣武昌荊州荊左荊右襄陽五衛本年旱災飢民並緩徵額賦。○是月署兩江總督江蘇巡撫莊有恭奏據山盱廳報稱現在遵旨停修之高澗龍門清水潭三處外越埽工於九月二十八日被風暴汕掣貨船失風人口俱有淹斃又東壩迤南秦家高岡等處於十月十四日亦被風暴掣動新舊磚工並損塌民廬又高堰七堡起至十三堡止倒卸石工二十段並帶動三十餘丈現飭搶護估修並令地方官查明衝倒民舍確數照例撫恤報聞。○江西巡撫鄂昌奏大庾縣地方拏獲上猶縣奸民何亞四夥黨李德先究出何亞四現在逃往萬羊山除飭文武員弁前赴查拏外並行文湖南廣東接壤之地一體嚴緝得旨知道了上緊嚴緝何亞四勿令免

脫。○署江西巡撫山東巡撫鄂容安奏東省吏治民風臣力圖振刷不肯稍有姑息遷就而地方官號為老鍊者每居心蒼猾以及平庸無能者率多應文逃責遇事甚或置若罔聞臣不得不隨事嚴督得旨此所以為難也且劉藻前日即以汝為多事以準奏為賢然此等浮議豈能動朕聽哉又稱臣蒙恩暫署江撫誠恐東省各官或任事有始無終於地方大有關係况係本任之事何敢以暫離其地稍存歧視現已將一切要務札致署撫臣楊應琚辦理得旨將此早面諭楊應琚矣其人不過一外似諳練內無定見之人深恐其不能實力行之汝至江西將現辦之事就緒之後朕當圖兩省之輕重以定汝之去留此時之終為江撫或仍為東撫朕亦不能定也勉之又稱江省現有大案蒙以阿桂暫署臬司范廷楷暫署知府臣可收臂指之效得旨又用一徐垣矣此人亦可資臂使又稱南安

上猶一案。臣當速往。案犯雖多就獲。而善後事宜。亦須目擊方能了當。得旨甚是。據鄂昌奏匪黨就擒。正兇未獲。宜上緊緝拏。不然。又成一馬朝柱。豈非我君臣之羞。又稱江西省官員。惟廣饒道和其衷。曾任山東臬司。見其尚能辦事。未深知其人。得旨亦不過駕馭可用之材耳。可信處未定。又稱現任濟東道王廷諍。精神才幹。俱屬可用。得旨但恐其衰年。不然。尚可出力。又稱德州知州陸福宜幹練。

老成。勇於任事。得旨果有可用之材。又稱浙江金華府董榕。前在豫曾於隣省訪獲巨匪。素能耐煩任事。得旨記得此人可。○閩浙總督喀爾吉善。奏接奉諭旨。查閩浙兩省。環山濱海。地少平易。臣與兩省提臣酌商。勘有可立圍場者。令該處標營。每年實力舉行。其無可行圍之地。即於教場。照行圍規矩法度演習。得旨知道了。以行圍而繪圖貼說。足見外省之事。皆紙上談兵也。○湖廣總督永常奏。

湖南郴州屬桂東桂陽二縣。與江西之上猶崇義縣接壤。准江西來文。上猶縣奸民何亞四。謀為不法。除拏獲多人外。首犯何亞四在逃。行文一體嚴緝。當飭衡永郴道桂陽營無分疆域。嚴密搜捕。得旨覽奏俱悉。楚省之馬朝柱等。尚未就獲。而江省之首犯。又復脫逃。似此安能寧靖地方。用爾等督撫。所為何事。協力緝拏。以全朕用人顏面。將此旨密咨各省。應緝二案之各督撫。知之。用力嚴捕。毋為

虛詞。並令各行明白。廻奏。○山西布政使多綸。奏晉省各屬內。被旱成災處所。查惟永濟臨晉猗氏安邑較重。解州夏縣虞鄉芮城次之。滎河聞喜較輕。所有撫恤借糶。在在需米。必須於隣近州縣倉內。酌撥協濟。現與撫臣酌商辦理。得旨覽。阿思哈所見甚鄙。汝為布政使。何無一言救正。足見汝之為人矣。○陝甘總督黃廷桂等。奏准山西撫臣阿思哈來咨。山西省蒲解二府州屬。本年秋旱。米糧短

少飭商赴陝採買。今延榆鄜綏等處採買過多。市價漸增。查榆林府屬葭州府谷神木榆林懷遠等處常平倉均貯有溢額米石儘可容會晉省令赴榆林購運。於彼省民食有濟而倉貯亦可免陳積得旨甚好。四川松潘鎮總兵馬良柱奏准督臣策楞提臣岳鍾琪知會前往招撫黑水後番。於九月十一日行抵七步地方。該處番民口稱土司蒼旺殘暴不仁情願歸順。當即招來四十八寨番民兒不太兒噶他等百十餘名。查黑水後番上寨二十寨總名果壩共三百四十四戶大小男婦一千五百七十五名口。下寨二十八寨總名南窩共五百五十八戶大小男婦二千九百一十八名口。俱查造冊籍申報。尋至黑水後番適中之赤布寨地方。番民悉衆來迎。喻以大義令其各安住牧。得旨如此兵威何不於尚之金川及今之郭羅克用之。將此旨寄策楞岳鍾琪知之。

大清高宗法天隆運至誠先覺體元立極敷文奮武孝慈神聖純皇帝實錄卷之四百二十五

大清高宗法天隆運至誠先覺體元立極敷文奮武孝慈神聖純皇帝實錄卷之四百二十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申十一月戊午朔諭陝省今

平定縣人白丁二

年被旱偏災米豆草束價值昂貴駐防滿兵所領折支銀兩未免不敷購買著將癸酉年春季分西安駐防應領折支米豆照原定每石一兩之數加給五錢草價加倍賞給俾兵丁不致添價採辦以示體恤○諭軍機大臣等開泰奏請揀發人員一摺已勅部揀選引見至所請將丁憂同知沈孟堅一體發黔之處未經交部現在發往各員量其才具加以造就將來自可以備臂指之使即使沈孟堅

熟悉風土亦不必定需此一人也可傳諭開泰知之○是日駐蹕蟠龍山行宮○已未調鑲白旗蒙古都統誠親王允祿為正白旗滿洲都統以散秩大臣保德為鑲白旗蒙古都統○是日駐蹕湯山行宮○庚申

上迴鑾詣暢春園問

皇太后安○迴圓明園○吏部議准雲南巡撫愛必達疏稱廣西府屬彌勒州竹園村地方緊要應增設巡檢一員鑄給竹園村巡檢印

平定縣人白丁二

信並裁雲南府司獄一缺從之○以熱河副將富海為福建福寧鎮總兵○予故壽春鎮總兵改光宗祭葬如例○辛酉諭軍機大臣等安寧奏報許墅關乾隆十六年七月至十七年七月一年徵收稅銀較上屆多銀一十一萬有餘據稱因上年浙省歉收米貴江廣各省販運赴浙者眾是以較多等語此言非是從前關稅偶有缺少督撫查覈往往稱隣省歉收商販不前若如安寧所奏則情形正

屬相反豈足信耶。此蓋因上春朕巡幸江南。地方官豫行肅清河道。商船多停泊未進。回鑾後始各連檣直下。是以許關之稅。春夏較少。而秋冬以後較多也。安寧不知實在情形。漫稱隣省米貴所致。殊屬未當。此摺已交軍機處節去。此數語。交部覈議。可傳諭安寧知之。○又諭據恒文奏稱。十月二十二日起程。前往荆門。鄖縣等被災州縣。加意稽查。一切審題案件。現在咨部扣展等語。直省被災地方。所貴督撫前往辦理者。或因災傷過重。米價昂貴。民情不甚寧帖。司道守令不能彈壓。是以必須親行耳。今據奏糧價俱不為昂貴。民情亦皆安帖。如此則司道大員查辦足矣。何待親行。況因此轉將一切審解事件。稽遲扣展。益復無謂。前諭各督撫謂以奏明親往。為了事。此正切中其弊矣。恒文著傳旨申飭。並諭各督撫知之。○又諭據鄂昌奏到。何亞四謀為不法一案。已於十月二十三日夜間。

在曲潭灣深山內。拏獲首犯何亞四。俟親提審訊明確。另行奏報等語。何亞四謀為不軌。情罪重大。既經拏獲。於審明後。即加之極刑。亦所應得。至其餘從逆之犯。亦不必以為從。及其次為從。分別末減。著傳諭鄂容安從重辦理。一面奏聞。一面即行正法。使遠近愚民共知儆惕。再摺內止云。據報官兵鄉民將首逆何亞四拏獲。官兵固應奮勇。其鄉民如何前往拏獲情形。未經明晰。可併傳諭鄂容安令其詳悉查明具奏。○又諭江西上猶縣逆犯何亞四謀為不法一案。據鄂昌奏報。已於十月二十三日夜間。在曲潭灣深山內拏獲等語。同一逆首。馬朝柱情形。更為猖獗。該督撫自應設法上緊查拏。何以至今久未擒獲。恐專向四外尋求。轉迷蹤跡。著傳諭永常令其仍於近境詳晰嚴拏。務期速獲。毋以久而愈懈。○戶部議覆閩浙總督喀爾吉善奏稱。浙省因上年旱災。將內部并江南。江西捐監。

之例。移歸浙省報捐。今歲浙屬豐收。應請停止。至常平捐穀一款。本省倉儲現足十分之七。即來歲青黃不接時。亦可敷糶濟。無庸亟為捐補。應如所請。從之。○壬戌。

上詣暢春園。問。

皇太后安。○幸靜宜園。駐蹕。○諭。向例月選官員。由九卿驗看。所以澄銓敘而辨官材。典至重也。但九卿人衆。往往互相觀望。不肯實心體察。虛應故事。屢經傳旨申飭。而積習不悛。或有託故不到者。如此。則審官量材之寄。其何賴焉。嗣後月選各官。應由九卿驗看者。該部屆期。取九卿職名。奏請特派驗看。如仍蹈故習。朕惟於派出之人是問。該部即遵諭行。○又諭吏部。以此次各部院保送道府。滿洲郎中。僅止三員。輪用滿班。不敷銓用。請以滿郎中。陞用道員。滿員外。陞用知府一摺。固屬因時通變之道。然國家用人。內外一體。在外則地方為重。在內則曹務攸司。何必亟資外

補。始足展其才力。近年滿員保送外任者多。以致各部院諳練出色之司員漸少。其現任同知。通判。州縣內。俸滿而未得陞用。則不乏其人。當酌為疏通。嗣後除特旨除授外。滿洲司員保送道府之例。著暫行停止。此議著存案。俟數年後。朕酌量滿司員應外用之處。照所議行。其漢郎中。向係論俸截取。該堂官分別宜用。繁缺簡缺。及不宜外任。引見註冊輪選。而該堂官即有以應簡而濫列為繁舉任失當者。曾降旨申飭。現在司員中。明敏練達。勇往任事者。亦殊難其選。皆由樂外轉而輕曹署所致。其應如何酌量久任之道。該部一併定議具奏。尋議。六部郎中。所以不得久任者。漢郎中共五十二缺。現在除道府改補。並簡缺未用。及有事故不合例外。其間尚有才具不宜外任者。所有合例堪保送繁缺之員。原屬無幾。是以一經輪用。未免過速。查舊例。漢郎中計俸在一年以上。始准截取。今請於

一年之外再增一年。如未滿限遇有道府缺出。仍以外班補用。又現在滿司員外用之例。遵旨暫行停止。其滿班應得道府等缺。亦歸外班。則外班既得疏通。而部員亦可資久任。惟是繁缺記名人數無多。而道府兼掣。仍屬缺多人少。輪用尚速。嗣後專以道缺為郎中陞班。知府缺出。專以員外郎陞用。應較郎中之俸再增一年。至三年方准截取。如無合例之員。亦以外班抵補。其內閣侍讀。亦照六部員外例。論俸截取從之。○諭軍機大臣等。策楞覆奏進剿雜谷經費。並將來駐防官兵所需。及雜谷松岡出產各確數一摺。殊未明晰。國家帑項正供。於邊防要計。應動用之處。本不應惜費。然亦不可因一二好事之人。以致虛糜擲之無用之地。今既冒昧辦理。則現在已費幾何。將來每年需用幾何。所入不償所出者。為數幾何。抑或如此一番經理。較之向來經理者。實省幾何。俱當一一詳悉具奏。何

得謂倉猝興師。未及通盤籌畫一語。朦混了事耶。著傳諭策楞。令其再行詳細確查。一一奏聞。且向時內外地界。原屬犂然。官兵尚有闌入番境。需擾土司者。今即將此輩移駐其地。益恐魚肉番徒。一不相安。必致激成變故。況環蜀皆番。設或他處土司。望風驚駭。謂天朝畏強凌弱。掩襲邀功。人懷疑懼。則開無益之疆。啟莫大之釁。策楞岳鍾琪。其能置身事外乎。將此一併傳諭知之。尋策楞奏。前奏軍營經費銀二萬一千餘兩。祇係約畧叢計之數。今據報詳查。動存各項實費一萬九千餘兩。即將來報銷。亦決不出此範圍。至駐防官兵。每年需用確數。除松岡現經奏明另設土司外。止有雜谷腦移駐各官兵役。俱係裁改抽撥。各有本營本缺之俸薪糧餉。無庸另添。惟是川省邊兵口糧。向係折色。其折價之低昂。各處不同。今議抽撥之兵。較向來米折。應增銀四百九十兩。又威茂營新設叅將一員。

千總二員。理事同知衙門。所設通事。各項計將來雜谷稅賦。每年所入。尚敷所出。但以現在已費之數而論。則所存抵項。實為所入不償所費。此番用兵之始。祇慮蒼旺緩則有備。並未計及久遠。實屬冒昧。若就目下而論。番民久受蒼旺欺凌。今得剿滅。人皆稱快。並無驚駭。所有駐兵。自當嚴加約束。不致稍有滋擾。得旨覽。岳鍾琪奏。臣於邊疆重事。何敢不籌及萬全。致啟釁端。惟是蒼旺惡蹟種種。恃強凌弱。土司勒兒悟。畏其攻擊。逃避黑水地方。娘兒吉。連次聲請救援。臣再四思維。寧受冒昧。擅發官兵之罪。斷不敢於軍事稍有貽誤。故與督臣悉心籌酌。為先發制人之計。乘雜谷腦空虛。率兵直搗賊巢。蒼旺就擒。正法之日。各番情形。莫不踴躍。謂為番部除一大害。至各番改土歸流之後。恐官兵闖入其境。魚肉番徒。亦皆事之所有。但查下寨。雜谷腦孟董九子。龍窩等五溝。其所屬番民。原係內

地熟番。非松岡上寨可比。以之歸流。人皆樂從。若慮因蒼旺剿除。各土司人懷疑懼。現在察看情形。番眾相安。並無驚駭。得旨覽。奏俱悉。事已如此。亦不復究。未免始終迴護費詞耳。○癸亥。

上迴圓明園。○諭上年豫省陽武河工漫溢。陽武封邱。祥符延津。四縣均被偏災。所有借給麥種銀穀。應於本年秋後徵還。但念災地甫經翻種。收成尚歉。且本年仍有應徵帶徵之項。一時并徵。民力未免拮据。著將陽武。封邱。祥符延津。四縣災民。所借籽種銀穀。俱緩至明年麥後開徵。以紓民力。該部即遵諭行。○以廣東廣州城守副將袁秉敬為廣西左江鎮總兵。○甲子。遣官祭

先醫之神。○諭嗣後引見之雲南貴州廣東廣西福建等五省年滿千總。留巡捕營當差者。將伊等有無親老及別情不能遠離之處。該部詢問。如有不能遠離情節。仍發本省照

例補用。○諭軍機大臣等。新柱奏報閩海關徵收併封平餘等項銀兩摺。已降旨交部覈議。但乾隆十四年至十五年徵收用存各數。久應報銷。雖據稱咨准部覆。令扣足一年為滿。亦應於接准部咨之日。即行奏明緣由。不應遲至此時。並十六年一同奏報。著傳諭新柱知之。○命刑部尚書劉統勳在軍機處行走。○乙丑。

上奉

皇太后還宮。○詣

皇太后宮問安。○丙寅。

上御乾清門聽政。○御懋勤殿。勾到朝審情實罪犯。停決斬犯一人。絞犯五人。餘十九人。予勾。○諭軍機大臣等。蘇昌覆奏暹羅國遣使進貢一摺。二人所奏皆不明晰。此事前據阿里衮初報之後。將及兩月。尚未題到。又因適有西洋進貢之使。故降旨令其分路行走。毋使相見。並詢問該督撫。暹羅所貢係屬何物。

乃阿里衮蘇昌近經先後奏到。祇稱必須查明彙報。以致稽遲。究之所貢何物。總未奏明。此最易理會之旨。而尚如此疎漏。他事尚可問耶。今貢使既經起程進京。其貢物亦不必再行詢問矣。可傳諭申飭。○又諭據范時綬奏稱。陳可望傳鈔偽稿一案。周儀等字囑串供。從前未能審出實情。請交部議處等語。各省督撫辦理傳鈔偽稿一事。其實心查辦與否。應俟通案完結之後。覈其功過。分別察議。此時首犯未得。正宜上緊追究。尚非交部查議之時。何必遽行奏請耶。可傳諭范時綬知之。○丁卯。諭軍機大臣等。永常覆奏馬朝柱尚未就獲。現在密督所屬加意訪緝。並何亞四已經拏獲一摺。係限行六百里馳奏。鄂昌早已奏到。馬朝柱為該省首逆要犯。果能得有實在下落。或已經擒捕。自應迅速奏聞。若仍不過現在訪拏。有何緊要。而必日行六百里耶。可傳諭永常知之。○又諭據莊有恭奏

稱九月二十八日。西北風暴。將山肝廳停修之高澗。龍門。清水潭三處。外越埽工。尾土。汕掣。被淹貨船二十餘隻。又十月十二日。暴風撞掣東壩。迤南秦家高崗等處。新舊磚工。及高堰七堡至十三堡間段石工。現在相機搶護等語。此摺著鈔寄高斌閱看。南河陋習。以歲修為浮冒地。朕閱河時。深知其無益。特令停修。如該處工程。果有必不應停修之勢。往來商船。藉以保護。則生靈軀命攸關。朕之降旨。不過出於偶爾閱視之時。高斌係久於河務者。彼時即當據實奏明。不可停修之故。且船隻之被淹。與埽工之被汕。不相關涉。莊有恭此奏。雖據廳員稟報之詞。而牽入停修。若謂因停修所致者。則停修未及逾年。外越埽止。不應遽至汕掣無存。露出石岸。以致不能捍禦。若謂石岸必須越埽。以為捍禦。則百里石工。又何曾一律皆有外護。著傳諭高斌。即由豫省回江。親往勘明。速行奏聞。其工員以

停修之後。無可開銷。故諉諸汕掣。以為將來復行歲修之計者。著該督等據實查參。不可稍有迴護。至高澗等處。失風船隻。撈救及淹斃人口。並民間倒塌廬舍牆垣。一併傳諭莊有恭張師戴。加意撫恤。毋致失所。○戊辰。諭今年山西蒲解等屬。秋禾被旱。其勘明成災。僅止五分者。定例不在賑恤之列。但距麥收已踰數月。時屆隆冬。小民謀食。未免拮据。著格外加恩。將聞喜。榮河。解州。萬泉。芮城。各州縣。被災五分之處。一體撫恤。一月口糧。於十二月初旬開賑。俾度歲不致乏食。以示軫念貧黎之意。該部遵諭速行。○諭軍機大臣等。傳鈔偽稿一案。所以必須逐層追究。原在根求。偽撰首逆。從前令酌量情罪。重輕分別發落。亦恐各省辦理不善。使無知愚民。久滋拖累耳。乃該督撫等。並不慎密查辦。且竟有將所定章程。出示通行曉諭者。以致狡滑之徒。避重就輕。巧為移接。轉迷正線。即如總督尹

繼善在督撫中尚屬能辦事之人。於江西施奕度一案。竟不能究明來歷。及提犯至京。令軍機大臣詳悉研訊。迥與原供不符。復令該督帶同承審各官。馳驛來京。公同嚴究。亦與軍機大臣所審無異。由此觀之。則各省所辦吏。俱不可問矣。總之外省陋習。一切聽斷案件。率皆委之屬員。取供成招。及解至督撫親審。不過就其已成之獄。畧為摘問而已。使其能如在京大臣之詳慎推鞠。亦何至如此錯誤。現在各省查辦偽稿之案。俱未得有端緒。未必不由於此。著傳諭各該督撫等。所有現辦傳鈔各案。必宜一秉虛衷。親提確訊。務得正線。若仍聽屬員草率遷就。併案了事。必照江西此案之例。令其來京會審。一經審出實情。定將該督撫等從重治罪。凜之慎之。○御史薛澂奏。凡遇考試。各部院堂官。一經派出。無論在闈在朝。應停止本衙門司員畫稿。以杜嫌疑。而專校閱。得旨。此奏是。著照所請行。

○已已。

上詣

皇太后宮問安。○諭操閱八旗官兵。進退不齊。雖係章京等之事。但該管大臣。亦在隊內。惟將章京等叅奏。未免諉過。所有該管及閱陣大臣。著一併交部察議。○諭軍機大臣等。據黃廷桂鐘音覆奏。布政使張若震奏請揀發佐雜一摺。殊未明晰。陝省如果委用需人。該督撫即應奏請揀發。不必委之藩司。若需人尚非甚急。即該司曾經面稟。亦宜將不應奏請之故。明切諭知。何得以事屬可行。遂聽其自行陳奏。今黃廷桂等摺內。不過引咎之詞。而於該省之實在需人與否。並未奏及。前因西安有辦理災賑之事。是以即勅部揀選發往。今降旨詢問。亦當於摺內聲明。方是何以如此含糊。可傳諭黃廷桂鐘音知之。○大學士等議奏。盛京巡察御史九成奏稱。盛京將軍。並五部等衙門。辦理事件。有遵照在京各

衙門期限者有仍照該處正限餘限者未經畫一請下部定限飭遵查盛京五部事務較簡嗣後禮兵工等部照在京衙門酌減五日定限十五日戶刑酌減五日定限二十五日如有行查會稿禮兵工以三十日戶刑以四十日為限其舊定之正限餘限悉除又稱盛京五部司員遇因差進京往往託病不即回任若節次差遣則在任辦事日少仍得按年報滿似非整飭吏治之道嗣後各員如遇差

實錄卷四十二

十一

到京因病不即回任者即令呈報該旗驗明咨部行知盛京查照並計日扣足方准報滿從之庚午

聖祖仁皇帝忌辰遣官祭

景陵

上詣

奉先殿

壽皇殿行禮○是日起

上以冬至祀

天於

園丘齋戒三日○諭軍機大臣等楊應琚奏登州府知府張勤望顏情廢弛請交部嚴加議處一摺已勅部議奏張勤望由部員陞用朕知其人原非強幹之材但該員在登州任內果屬廢弛不能稱職則或酌量以同知等官降調或不宜外任尚可改補京員若年力衰憊難以驅策亦即可令其休致乃摺內均未聲明僅照例奏請交部是該撫不過因係

平定本會二十二

二八

鄂容安移交遂據司道稟覆之詞入奏其所稱體訪確查亦屬具文套語耳外省督撫辦事習氣往往貌為整頓而按之多無實際即如衙署被竊亦尋常所有之事該撫乃因此摺奏兗州鎮臣成元震衙署被竊殊屬疎懈等語總兵有彈壓地方操練營伍專責但當問其平日居官如何若就被竊一事指為疎懈豈提鎮大員但於衙署前撥兵巡邏即為稱職了事耶看來楊應琚因前者在京目擊

京中辦事情形。諸事不容頽廢。遂亦欲自見其奮勉之意。而究之仍蹈外省陋習。著諭令一切勉力實心。擴充識見。以副委任。○辛未。諭鑲黃旗滿洲都統等。奏承襲世管佐領富喜之缺。現將伊子閑散富明阿擬正。將另支曾經承襲佐領達勒扎之孫閑散羅保擬陪。查羅保現派在拉林阿勒楚喀地方耕地。即咨取來京引見等語。所辦非是。羅保若名應擬正。自可調其來京。若止係擬陪。又何必令其往返數千里。徒滋勞費。況此支又有海寧祿常等。現在擬陪之列。所有咨取來京之處。不必嗣後各旗。遇有佐領等缺出。奏請承襲。其人名次果應擬正。自當照例咨取引見。若止係擬陪。則如此項之派往耕地。及各省駐防人員。皆可將伊等名次開列。停其咨取來京。惟就在京應行擬陪之人。揀選引見。○刑部等部議覆浙江巡撫雅爾哈善奏稱糧船規費。多由頭幫軍伍。指端派歛。實為諸弊之

數。嗣後如有將已裁陋規。復行婪索者。惟頭幫是問。將該員弁計贓治罪。應如所請。從之。○壬申。

上詣

南郊齋宮齋宿。○諭江西南安府上猶縣匪犯何亞四。聚眾謀為不軌一案。據署撫鄂容安查明地方官弁查拏情形。奏稱上猶縣知縣高顯宗。於巡檢張仕具稟之時。未即差拏。及確查該犯謀逆情節。即親身督捕。功過尚足

相抵。其浮龍司巡檢張仕。以微員首發逆謀。擒捕之時。又復勇往先行。該撫現奏請將巡檢司改設縣丞。於營前地方分駐。張仕即著陞授縣丞。以示鼓勵。至把總謝又榮。同該縣等前往擒拏。該縣促令施放鳥鎗。輒勒取擔承憑據。且僅放鎗駭散逆黨。當下並未拏獲一人。以致首逆竄匿。久而就獲。似此懦弱誤事之弁。咨革不足蔽辜。著拏交刑部治罪。○署江西巡撫鄂容安奏。訊得匪犯何亞四。住

居上猶縣之粟米坑。種地時。刈獲銀三百七十兩。有閩人李德先。聞知。起意誑騙。遂託言算命。稱為大貴人。於風頭插豎紙旗。言若拜得旗開。即是大貴之驗。又令該犯疊桌高坐。李德先連拜三日。端受不跌。該犯益信以為實。又用錫塊刻山河二字。熨於該犯手上。詭稱天生異相。并自言即李開花。能書符召將。夥犯何文宗等。領受偽劄。輾轉糾結多人。於下信地祭旗舉事。以上逆情。各供不諱。業將定擬凌遲之何亞四。李德先。並擬斬之何文宗等八犯。決不待時。得旨覽奏俱悉。該部知道。

實錄卷之六

三

大清高宗法天隆運至誠先覺體元立極敷文奮武孝慈神聖純皇帝實錄卷之四百二十六

實錄卷之六

三

大清高宗法天隆運至誠先覺體元立極敷文奮武孝慈神聖純皇帝實錄卷之四百二十七

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申十一月癸酉冬至祀

天於

圜丘

上親詣行禮○詣

皇太后宮問安○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○甲戌

上以冬至節詣

壽康宮行慶賀

皇太后禮王大臣於

慈寧門衆官於午門行禮○御太和殿受賀○

諭軍機大臣等定長摺奏任國昌偽稿得自

武岡州蔓延恒請就近歸楚省辦理且稱此

案自全州發覺已三閱月准湖南撫臣咨覆

該武岡州並無隻字報聞不無玩視等語此

等重案一經搜獲該撫等即應飛行知會嚴

速根追查辦豈有發覺已三閱月而該地方

官竟任意延緩且湖南撫臣尚惜無知覺之

理看來兩省均不免推諉情弊著傳諭范時

綬定長令其速行查審究追務得實在根據

若以事屬隔省。互相推卸。使重案懸擱。不得實在來歷。惟該撫等是問。○又諭兗州總兵成元震奏稱十月二十八日夜。署內被竊。請交部議處一摺。衙署被竊。原無交議之例。即有應得處分。亦不過於彙題時。聲明情由而已。似此瑣屑之事。何得自行奏瀆。成元震此奏。可見其並不出於誠心。不過偵知巡撫既經奏聞。亦以一奏塞責了事耳。著傳旨申飭。○又諭定長覆奏粵西查獲吳方曙李興樓

等犯。經楚省審明假冒一摺。殊不明晰。此案雖已據該撫奏明。覆訊實係逆黨吳晟相。楊興樓更易姓名。復行錄供。解楚收審。但此摺係覆奏。寄諭之旨。自應仍將原委。約畧係吳晟相更名之故。聲敘。乃僅籠統奏謝寬免議處之恩。而於本案情節。以業經馳奏一語了事。朕日理萬幾。披覽奏牘。豈能一一復查原案耶。可傳諭定長知之。○賜大學士史貽直陳世倌協辦大學士阿克敦孫嘉淦黑狐端

罩。○乙亥。軍機大臣等議覆。四川總督策楞等奏。稱查得蒼旺之胞兄大朗。送素。有殘疾。人亦癡愚。此外別無近屬。惟校磨土司勒爾悟之弟根濯斯加。與蒼旺為再從兄弟。金川用兵時。曾經出力。又素為校卓。雜三處番眾信服。堪以辦理土司事務。應請授以松岡長官司。照例給印信號。紙應如所請。根濯斯加准授為長官。管理松岡地方。以承雜谷舊業。從之。○丙子。

上詣

皇太后宮問安。○諭軍機大臣等。傳鈔偽稿一案。江南江西兩省。頭緒紛繁。該督等應逐線詳悉推究。尤應迅速根查。務得實在來歷。雖京中現交大臣查辦。而該省發覺行查之案。應辦者尚多。可傳諭莊有恭。不可因京中有提解人犯。尹繼善在京會審。遂生諉卸觀望之意。稽延時日。其原承審各官。現已來京。即應另派幹員。該署督董率辦理。不可仍蹈從

前故鞫訊一委屬員。使正線不明。首逆不能即得。倘有此等情弊。必不能逃朕洞鑒。惟莊有恭是問。著將現在作何查辦。並辦理若何之處。速行奏聞。○刑部議覆陝西布政使張若震奏稱。杖笞捐贖。向例均照徒罪以下銀數。但思徒與杖。相隔五等。若盡該以徒罪以下四字。輕重似無區別。應將原例分晰酌減。應如所請。但各照原律五等依次遞減。條目太繁。嗣後除徒罪仍照舊例原數捐贖外。犯杖者。貢監生納鍰二百兩。平人納鍰一百兩。犯笞者。貢監生納鍰一百兩。平人納鍰五十兩。再有職官員品秩不一。如三四品以下。及進士舉人。其有犯杖笞納贖者。不得照貢監之例。另擬分晰遞增。從之。○調任山東巡撫鄂容安疏報。壽光縣墾洱河新淤田四十畝。有奇。○旌表守正捐軀之福建長樂縣民邱宗莊妻林氏。○丁丑。諭今年在避暑山莊看箭。見策登扎布人尚可驅遣。射又中。把是

以加恩賞給花翎黃褂。乃至木蘭圍場。即推患臂痛。於一切差事。竟不向前。且自請宣對。朕命軍機大臣傳詢。又稱並無應奏之事。其意不過欲朕一召見。便可誇示於人。種種取巧。竟是不安本分之人。今經理藩院。奏伊該管旗分之軍裝器械。不能整頓。著明白回奏。所有賞給花翎黃褂。俱撤回。○御史張馨奏。驗看月選官。請飭部於奏派九卿時。將滿漢科道職名。一併開列。俟派出。隨同驗看。得旨。所奏是。○豁除湖北監利縣之車灣修隄。它壓田地七十九頃。有奇。額賦。○戊寅。諭軍機大臣等。據鄂容安奏稱。將先行拏獲之管大任。同房書辦張遂田。朱德五。二人。馳驛起解等語。所辦甚屬妥協。周到。已於摺內批示。惟郭庚為在京供出之肉鋪劉姓。前經軍機大臣密咨提解。而摺內但稱現拏劉姓等到案。其供詞及起解日期。均未奏及。劉姓係此案緊要人犯。既經拏獲。即應速解來京。此但

問其曾否將偽稿轉給郭庚為與否。至該犯得稿來歷。取有確供。一面嚴提追訊。一面即可將該犯先行起解。不必更待逐層追究。嗣後凡有提解要犯。皆應如此辦理。鄂容安奉到此旨時。劉姓等犯諒已在途。若尚未起解。令其速委幹弁。由驛站飛解來京。以便質審。

○已卯。

上詣

皇太后宮問安。○庚辰。諭江蘇准徐海三屬。屢

被偏災。今歲雖獲豐收。而積欠之餘。民氣未復。所有本年地丁漕米。已多全數通完。其歷年被災停緩漕米。若概令完納。未免拮据。著加恩將乾隆十五年以前。緩欠漕米。分作癸酉甲戌二年帶徵。以紓民力。該部即遵諭速行。○又諭各省查辦傳鈔偽稿之案。究出江西人犯最多。鈔傳年月亦較他省獨早。偽造正犯。雖不必即係該省之人。而從此根尋。似可得其端緒。乃巡撫鄂昌按察使丁廷讓。於

辦理之始。即不能實力根查。一任各犯串供狡飾。以致案情多有不實。輾轉株連。不勝擾累。而究之實在根株。毫無著落。即如施廷翰之子施奕度傳鈔一案。竟至附會成獄。若非提解來京覆訊。何由申雪。然此猶係該督尹繼善心存成見。以致錯誤。至於彭祖立等犯。則江西已經成招。及解江南。始行審出誣扳情節。其段樹武。彭楚白。楊朝章。李景文等犯。傳鈔接受之處。亦多有疑竇。由此觀之。該省

所辦。尚可問乎。現今廷臣將各犯詳細推鞫。分別提解省釋。正所以力除外省滋擾之弊。在尹繼善統轄兩江。尚屬駐劄隔省。鄂昌。丁廷讓身任江西。耳目最為切近。乃至舛謬如此。更何所辭咎。鄂昌。丁廷讓已令來京。著解任候旨。江西巡撫員缺。即著鄂容安調補。江西按察使員缺。即著阿桂補授。○又諭據閩浙總督喀爾吉善。福建巡撫陳宏謀奏稱。興化府屬莆田仙遊二縣童生。取入府學額數。

向係三七分撥。前任學政吳嗣爵奏准憑文撥取。而歷次撥取。仍係三七之數。本年科試。學政馮鈐將莆童少撥二名。有童生黃天錫等。羣相喧擁。懇求添撥。現在嚴飭查辦。以懲惡習等語。莆仙二縣童生。取進府學。三七分撥。相沿已久。吳嗣爵之奏。未必不明知三七分撥。本無所偏枯。而姑藉此為陳奏塞責之地。部議以憑文錄士。言之似屬有理。遂照所奏覆准。迨既經定例之後。接任學政。即當遵照辦理。若以吳嗣爵所奏。原未允協。亦宜奏明更正。乃葛德潤任內。歷次考試。仍係三七分撥。若果專就文藝酌取。豈有悉能暗合之理。其中顯有遷就情節。該學政馮鈐。此次考試。少撥莆童二名。遂致刁童喧擁滋事。此等惡習。固應嚴加懲儆。而始事之籌畫未周。接任之因循姑息。則吳嗣爵葛德潤二人之咎。著令伊二人明白回奏。吳嗣爵已簡任道員。交與江蘇巡撫莊有恭據詞代奏。○辛巳。

上詣

壽康宮侍

皇太后宴。○壬午。

皇太后聖壽節。遣官祭

太廟後殿。○

上詣

壽康宮行慶賀

皇太后禮。王大臣於

慈寧門。衆官於午門行禮。○詣

皇太后宮侍宴。○癸未。諭陝省今年被旱偏災。屢經降旨。令該督撫等加意撫恤。其勘不成災。及與災境毗連州縣。應徵錢糧。雖定例不准蠲緩。而該處收成。究屬歉薄。小民既謀食用。復効輸將。未免拮据。著加恩將韓城。麟游。南鄭。西鄉。城固。褒城。沔縣。洵陽。平利。三水。中部。洛川。宜君。寧羌。興安。隴州。邠州。汧陽。鳳縣。略陽。石泉。長武。鎮安。雒南等二十四州縣。本年未完地丁銀四萬八千餘兩。本色糧米一

萬三千餘石。緩至來年麥熟後帶徵完納。其節年民欠常平社倉糧石。及南鄭一縣未完。乾隆十六年屯豆五百餘石。一併緩至麥熟徵還。以紓民力。該部遵諭速行。○諭軍機大臣等。據鄂容安奏。審訊傳鈔偽稿之肉鋪劉姓。已逐層遞究。至傅聖元。現將劉老四等犯。此有關涉之四犯。先行解京。其張良才等犯。請留江西追究等語。劉姓得稿來歷。既據究至傅聖元。從傅聖元曾否又有究出人犯。及該犯到案。大概供情。何以均未奏及。此案郭庚為得稿劉姓之處。現在已有著落。該撫務須悉心根究。實力查辦。其彼此接受之際。尤宜於訊鞫時。留意體察。毋任狡供支飾。朦混未清。致迷正線。並遵照前旨。將拏獲之犯。訊取確供。一面節次查追。一面即速解京質審。如供出之人。或遠在他省。若仍咨提到江審訊。始行解京。是仍屬江西專辦此事。非朕特交軍機大臣辦理本意。且輾轉提解。未免往

返需時。此後由江省究出他省人犯。但將本犯取供。具奏速解。一面飛咨該省。逕令將供出之犯。馳解來京。再由京中行文飭催。較為迅速。再偽稿之案。似於江西根尋為近。劉姓等犯。已據該撫查究辦理。此外或有蹤跡。得自訪聞之處。並令遇便附摺奏聞。一併傳諭知之。○又諭據鄂容安奏。稱准湖南撫臣范時綬咨開。平江縣屬高坪地方。有年輕男子。並老婦幼女。其男子與檄開何亞四年貌相似。訊據供認。現在咨覆湖廣督撫。將現獲何亞四之父何永吉。及何文伸。一併解江確審等語。何亞四聚眾謀逆。已據江西審明正法。而現今楚省復行緝獲。雖據該撫稱年歲不符。手無印格。但果非本犯。何以甘於誣認。看來該犯或因於楚省被獲。而伊父母亦俱在彼。先後到案。希圖狡賴。在江為匪情事。轉不難供認真實姓名。亦未可定。總之此案已正法之何亞四。若係冒認。亦不過係伊弟兄。

均屬逆黨。即置重典。亦所應得。但江楚兩省。前後所獲。究係孰真孰偽。不可不根查確實。著傳諭鄂容安。令其秉公據實詳審。明確不得稍存迴護意見。○甲申。軍機大臣議覆。察哈爾總管達什琳沁奏稱。八旗馬匹牧場。應就近擇水草豐茂處所。並派該總管公同牧放。應如所請。再查向例。牧放馬匹。係派散秩大臣。及副都統等員。給予幫貼銀兩。總管係三品職銜。其幫項應減半給予。從之。○乙酉。諭本年八旗查得發往拉林阿爾楚哈屯田人內。有攜帶家口者。有單身前往者。辦理殊不畫一。經副都統滿泰條奏。朕已降旨。令八旗都統等。將各旗所有派往屯田之人。未曾攜帶妻子者。查明。官為治裝送往。以示體恤。但思程途遼遠。伊等家屬。又皆婦女。官為差送。諸多未便。此內如有願往者。聽其自願。親戚伴送。毋庸官為發差。嗣後八旗派往屯田之人。俱著攜帶家口。○以戶部尚書蔣溥充

續文獻通考館正總裁官。○丙戌。諭直隸開州東明長垣三州縣。上年曾被水災。今歲秋成。亦未豐稔。所有積年民借籽種口糧。並麥種銀兩。例應於開徵之期。照數徵還。但念災地民氣。未能驟復。一時新舊並徵。不無拮据。著加恩。將開州東明長垣三州縣。上年被水村莊。應完乾隆十六十七兩年。所借籽種口糧穀石。並十六年借給麥種銀兩。俱緩至來年。麥秋後。照例徵收。以紓民力。該部遵諭速行。○諭軍機大臣等。湖廣羅田縣逆首馬朝柱。遊魂遠竄。屢經飭諭各省督撫。嚴行搜捕。迄今已逾半載。尚屬毫無蹤跡。而各該督撫摺內。多以現在躡緝一語奏報了事。幾成具文矣。該犯情罪重大。若使久稽顯戮。何以申國憲而正人心。向來外省通緝之案。該上司及地方官等。不過行一文出一結。彼此互相掩飾。最為惡習。即如從前李開花一犯。至今尚為奸徒。借名煽惑之具。殊有關係。此案豈

可復蹈前轍耶。著傳諭各該督撫各宜督率所屬實力跟緝務期就獲毋致漏網倘仍視為奉行故事將來一經別省盤獲究出該犯經由地方必將該督撫等從重治罪不僅照失察奸匪過境之例予以降罰而已其各凜之毋忽○又諭曰吉慶回奏商人沈朝安等豁免加餉課銀一摺甚屬非是加餉課銀准其分別減免原係體恤商力之意沈朝安查奕茂所辦鹽務乃內府引地伊等不過代為

五十八

辦理與衆商之自備成本者不同所有減免課項雖不必仍解戶部自應照數繳之內府何得遽入已案至原奏雖照兩淮吉安之例三年一換不過改易姓名原係本人承辦即果屬輪流更替亦不必更於減免之外留此一項以取悅於衆商也吉慶所奏意在掩其不照舊案辦理之誤而不覺其言之過於支離甚非實心辦事之道著傳旨嚴行申飭○又諭據新柱奏稱建陽縣民劉景馨拾獲逆

書一案督撫二臣現在遵旨辦理等語前因江浙山東等省屢有刁民聚名馬朝柱挾仇誣陷良民之案是以降旨傳諭該督撫令但密緝捏造正犯其帖內所開之人不必提拏以省拖累因閩省民風刁薄恐有似此者亦經傳諭今觀新柱所奏該省果有其事但該督撫既經辦理自應奏聞何以尚未奏到或因捏造正犯尚在查究欲俟究明後具奏耳著傳旨詢問○是月直隸總督方觀承奏保

五十九

定府屬滿城縣奇村河發源一畝泉滙雞距泉流入保定府泉源微弱不能常繼臣委員赴上游徧訪滿城之東孫家堂舊有申泉年久淤塞挖驗得大泉眼九處小泉眼無數又於孫家堂之東得連寶泉夏家莊之南得五花泉龍泉寺之西得紅花泉臣親赴查看一律疏濬申泉一源比一畝泉倍為旺盛加以連寶諸泉合流並注引入奇村河會歸府河於灌溉舟楫往來均便得旨甚好○福州將

軍新柱奏臺灣凹莊民人及汎兵被番人焚殺一案。據臺灣道訪訊實係熟番與民人挾仇勾引生番出而焚殺。不難審擬完結。臣思番性難馴。干連人衆。恐其心懷疑畏。已密商督撫。札該道善為籌辦。得旨是。○湖廣總督永常奏。江西上猶縣匪犯何亞四。業經該省拏獲。今湖南按察使報稱。平江縣高坪地方。於民人何太源家查出老婦幼女各一口。並老婦之子何文作一名。據何文作供。小名何亞四。父即何永吉。母即老婦鄧氏。幼女賴氏。係兄何文伸養媳。並供何永吉。何文伸。現在黃壁岩躲避。當赴查拏就獲。雖何亞四。年歲不符。諒非正犯。而何永吉五名。實係案內有名之人。均應解江質審。又據澧州查獲何文伸一犯。亦解往歸案辦理。報聞。○署山東巡撫楊應琚奏。曹州府鄆縣匪棍劉漢裔。挾嫌首控馬姚班。田福並平日怨家魏景白等。從邪教謀反。經該府密飭各屬拏獲馬姚班各

犯解省。訊得劉漢裔始則冒充教主。誘惑多人。繼而因忿首控。所首詞內。又未將同夥之董玉璧等。據實開首。除馬姚班等。係案內應拘待訊人犯。其魏景白等。實係挾嫌誣陷。應予省釋。現密咨河南湖廣務將案內有名各犯嚴緝。速解來東。質訊定案。以淨根株。得旨所辦甚好。○署山西巡撫胡寶瑤奏。晉省蒲解各屬被災情形。一路查訪。尚不十分過重。散賑事宜。現在遵照規條。悉心料理。並飭該管道府就近覈查。至被災州縣。惟猗氏永濟臨晉三屬。七八分不等。虞鄉萬泉解州安邑夏縣芮城六處。五六分不等。榮河聞喜僅止五分。現在米販流通。民情安帖。得旨好。一切據實為之。○又奏。查得晉省芮城聞喜二縣除被災地畝外。尚有勘不成災各村莊錢糧亦因早歉收。尾欠未完。概請緩徵。並通飭永濟等十一州縣。其附近災地。如有不能全完者。遵照一體辦理。得旨是。

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十七

增補卷四百二十七

元

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十七年壬申十二月丁亥朔

上幸瀛臺。○諭據安西提督綽爾多奏稱哈密
防兵內。不無老弱充數之人等語。哈密為西
陲要地。派兵駐守。有巡防捍禦之責。所關綦
重。明年四月屆換班之期。該提鎮等於挑選
防兵時。宜加意慎重。務擇年力精壯。技藝優
嫻者派往。以收實用。嗣後如不力為奉行。草
率冒濫。仍以老弱充數者。著駐哈鎮臣據實
咨報該督查明。奏。以昭整飭邊防之意。○
諭軍機大臣等。綽爾多所奏哈密防卡情形。

一摺。已交軍機大臣議奏。觀其摺奏情詞。不過紙上談兵。其於實在機宜。未必有當。所稱準夷不肯捨平夷而奔山卡一語。尤非知兵之言。兵無定形。山卡無備。則敵人必趨險爭利。若專拘泥陣法。較量夷險。以為防禦夷人之策。此正所謂膠柱鼓瑟者矣。綽爾多簡任安西。膺邊疆重寄。惟應實力整頓營伍。慎固邊防。不可敷衍塞責。致染外省辦事習氣。可一併傳諭知之。○又諭高斌覆奏。高堰山盱磚石尾土等工。被風汕掣一摺。內稱陡起暴風。打壞船隻。淮揚道李奇齡乃接連汕掣工段。一併寫入。混行具稟。俟查明另摺參奏等語。似屬誤會朕旨。向來河工習氣。往往以興工為冒帑之地。前因莊有恭奏報被風情形。摺內牽入停修字樣。恐係工員以停修之後。無可開銷。故委之汕掣。以冀將來復行歲修。是以令高斌親往查勘。不可稍有迴護。非以此段工程係經朕指示停修。雖至汕掣。亦不

許復行請修也。凡朕所降諭旨。若實有難於遵行者。朕每不惜講求更正。况河工重務。尤宜隨時詳勘。方能悉合機宜。李奇齡以打壞船隻。由於汕掣工段。已非實在情形。高斌祇應將工段之實係應修與否。據實查奏。其打壞船隻。與汕掣工段。兩無交涉之處。不辯自明。若因係朕指示停修工段。概不許河員稟修。以此為李奇齡之罪。具摺參奏。不惟與河工修防事宜不合。且并不知朕辦理一切政務。毫無成見之虛衷矣。將來工程之應修與否。仍俟勘實具奏。其誤會朕意之處。著傳諭高斌知之。尋奏高堰山盱二廳工段倒卸實應亟加修補。其高澗等處。掣卸外越埽壩。原屬停修工段。毋庸修補。得旨尚有牽就迴護之意。○以故喀爾喀扎薩克鎮國公旺扎勒子瑪哈巴拉襲爵。○戊子。諭知府為親民最要之官。各省同知及直隸州知州內。在任已過三年。能勝知府之任者。該督撫秉公保薦。

不拘員數一面奏聞一面即將該員送部引見以備簡用。諭軍機大臣等據范時綬奏川省獲解形跡可疑之張國正本名柳春來既實訊並非馬朝柱而在川所供致死人命之處亦屬捏詞但曾屢次拐騙應枷責收管等語該犯雖由川省誤認馬朝柱盤獲解訊但屢次妄供假捏姓名行蹤詭詐實屬奸匪之徒若僅照尋常拐騙例從輕枷責未免寬縱著傳諭范時綬將該犯永遠枷號以示懲

儆。又諭據湖南巡撫范時綬奏稱首逆何亞四既經江西拏獲今平江縣現獲之何亞四真偽難定但同獲有逆犯之父母兄嫂又未必盡屬虛假現在飛提各犯到省質認俟認審的確再行解江究詰等語楚省拏獲何亞四之處前據鄂容安奏到業經傳諭令其秉公詳審江省正法之何亞四與楚省現獲自認之何亞四二犯年貌與當日江省所開俱有相符之處在江省取有李德先與何亞

四同謀不軌確供而現在之犯又與伊父母兄嫂同獲情節俱屬可疑其中真偽尚須備細推求該犯等現在楚省即先令范時綬審訊明確再行解江交與鄂容安覆訊在鄂容安固不得以已經正法之犯始終認為正身范時綬亦不得以現在緝獲之人必屬此案首逆此等重案既涉疑似惟宜一秉虛公和衷查辦務求一是均不可稍存迴護意見可即傳諭鄂容安范時綬知之尋范時綬奏平

江縣所獲之何亞四訊明實係何亞滿並非何亞四臣因何亞四江省已獲業將該犯同何永吉等解往併案辦理報聞○賑貸甘肅皋蘭河州金縣狄道渭原靖遠通渭岷州鎮原靈臺安化西寧碾伯大通清水徽縣等十六州縣衛及狄道伏羌西和平涼崇信隆德華亭固原安化正寧靈州秦川秦安河州岷州鹽茶廳鎮原合水環縣寧夏西寧等二十一廳州縣本年水災電災飢民並緩徵新舊

正借額賦○已丑

上詣

皇太后宮問安○幸瀛臺○諭阿思哈明琦俱係旗人年力方壯不可任其投閒就逸且尚屬無心之過阿思哈著以六部員外郎用明琦著以六部主事用○工部議覆陝甘總督黃廷桂等奏稱本年西同等屬旱災現今賑恤然當來春青黃不接之時仍恐民食拮据查寧羌靖邊延川米脂長武等五州縣城垣前經題准興修又被災之永壽武功興平富平藍田鳳翔岐山扶風大荔等九縣城垣應緩修今為調停民食起見應將寧羌等五州縣城工暫停其題准估項移為永壽等九縣修城之用其寧羌等五州縣城垣俟工竣再修均應如所請得旨依議速行○賑恤河南武涉縣水災飢民並緩徵本年額賦○庚寅諭軍機大臣等前據鄂容安奏鈔傳偽稿一案從肉鋪劉姓逐層遞究至傳聖元於十一

月二十五日奏到其傳聖元到案如何供情及曾否又從該犯根究有人之處前摺尚未奏及已經傳旨詢問迄今又踰數日未見該撫續有奏報著傳諭鄂容安令其遵照前旨實力查辦速行奏聞並嗣後如有究出人犯及案內應奏情節並令不時奏聞勿得稍有遲滯○閩浙總督喀爾吉善等奏建寧府屬建陽縣稟報十月二十七日縣人劉景馨於縣堂檢獲匿名帖內稱永平里地方有逆首馬朝柱並餘黨姓名該縣前往查訪所開姓名非係溫飽生監即屬安分良民其年貌與奉文通緝之犯一無相同其為捏陷無疑已密飭另緝捏造揭帖之人所有誣陷之家盡予省釋諭軍機大臣等據喀爾吉善陳宏謀奏建陽縣民劉景馨拾獲匿名揭帖一摺此案前已據新柱奏到而該督撫始行奏聞且並未究出捏造之犯不過稱現在緝訪何以遲至數日至所稱帖內所開之人問明平日

有無仇家。即予省釋之處。意在鎮靜。以省株累。而未免過圖省事。幾於不辦矣。朕前旨所謂不必提解者。蓋恐辦理不善。即視為匪逆重犯。概行嚴拏。驚惶滋擾。或致久行羈候。胥役從中需索。以致拖累良民耳。至所開人名。自應令其到案。逐一質問。詳細體察。方能得其實在情節。若竟置之不論不議。即其是否捏造。是否挾仇。亦屬影響。何由使正犯水落石出耶。從前各該督撫辦理此等案件。既屬過於張皇。而喀爾吉善等因有朕旨。又似覺矯枉過正。著傳諭該督撫知之。○辛卯。

上御太和殿視朝。文武陞轉各官謝恩。○鑄給湖北漢陽縣江防水利縣丞關防。從巡撫恒文請也。○以吏部員外郎圖爾炳阿為河南布政使。○豁除湖北江夏縣屬楊林洲坍地一十四頃八十四畝有奇。甘肅平羅縣築城廢地一百四畝有奇。平涼縣電災廢地二十九頃四十一畝額賦。○以故二等子達

勒馬達都子班扎布襲職。○壬辰。

孝惠章皇后忌辰。遣官祭。

孝東陵。○予故杜爾伯特扎薩克固山貝子丹

珠爾察奠如例。○癸巳。

上詣

皇太后宮問安。○幸瀛臺。○定刑部援請罪犯

留養例。刑部議船廠將軍傅森等咨稱罪犯

杜學良毆斃小功族兄學勉。按律擬斬立決。

其所供父老丁單之處。行據晉撫咨覆。雖係

孤子。但伊父現年六十九歲。與留養之例不

符。得旨杜學良著即處斬。此案該部雖因該

犯親年未及七十。聲明與例不符。但該犯之

父遠在晉省。而伊住居船廠。致斃人命。其並

未在家侍養可知。此等兇徒。若令得援親老

丁單之例。邀恩留養。於情法既屬未協。亦非

所以教孝。嗣後凡例應留養之犯。必查明現

在本籍者。方准援請。若在他省獲罪。即屬忘

親不孝之人。雖與例相符。亦應不准其留養。

○諭軍機大臣等據鄂容安奏到審訊萬仁湯等情形。及起解日期一摺。閱各犯供詞。不過復理前說。未見確實情節。而萬仁湯所供尤屬閃爍游移。難以憑信。應俟該犯等到京。再行詳鞫。惟是郭庚為供出之肉舖劉姓一線。既經逐層究至傳聖元。則該犯等到案供情。及曾否又經究出有人之處。何以轉未奏到。即或以該犯供情。尚未確鑿。而大概情形亦宜先為馳奏。不應遲至十餘日。於此次奏事之便。亦并無一字奏及。至鄂容安調任江西。專為辦理事。自無不留心體察。加意查訪。今抵江將及兩月。曾否於現辦各案之外。別有見聞。再江西新更撫臬。此番查辦。與從前所辦外間輿情若何。此等處皆宜一一詳察的確。隨時奏聞。總之鈔傳人犯江西最多。而傳聖元等傳鈔年月。已在十五年九月間。其來歷漸近。尤宜上緊根究。萬一當面錯過。致迷正線。將來即使復行清理。亦致稽遲時

日獲犯愈難。殊非特任鄂容安等之本意矣。可將此一併傳諭知之。○吏部議准國子監奏稱。向例保舉人員。遇本監出有助教學正學錄之缺。俱通融補用。未免過優。嗣後助教缺出。應於學正學錄內揀選奏補。從之。 甲午

上詣

大高殿行禮。○諭軍機大臣等傳鈔偽稿一案。江南省現在查出應辦頭緒甚多。莊有恭署任經月。所有審理之案。雖經摺奏。但提犯未能迅速。奏報甚覺寥寥。此等重案。非可視同尋常。依限查審。延緩時日。周承勅錢度係承辦熟手。其從前誤審之處。俱已訊明。應俟案結之日。另降諭旨。此時無可質對。即著馳驛回任。協同該署督將應辦各案。速行詳悉研究。務得確情。按求正線。早獲首惡之人。以贖前愆。其審出情節著莊有恭隨時奏報。御史王荃奏原任山西巡撫阿思哈業經罷斥。

今復用為部曹。臣恐外間無識之徒。謂以彼其人。以彼其事。甫遭嚴譴。又將大用。實有關於政體。得旨。奏內所稱。又將大用之語。朕並未存之於心。亦更未出之於口。王荃何以知之。若騰詞簧鼓。何事不可加。著該部嚴察議奏。○予故古北口提督布蘭泰祭葬如例。謚愍僖。○予故護軍統領富達禮。半葬如例。○以故奉恩將軍呂順子登久。年尼保子舒爾金。各襲職。○乙未。諭軍機大臣等。李錫泰前於藩司任內。曾經奏請來京。陛見。今陞授巡撫。又奏懇於到任之後。赴闕請訓。李錫泰久任粵省。未曾來京。已歷六年。著准其所請。但定長甫經調任。而李錫泰又行來京。邊疆重地。未便乏人彈壓。定長著暫留廣西巡撫之任。俟李錫泰陞見回任後。再行來京。如接到此旨。定長已經起程。仍令速回粵省。可傳諭定長李錫泰知之。又諭傳鈔偽稿之案。江南江西二省。查出頭緒甚多。現已降旨令江

南承審之道員錢度。周承勳。馳驛回任。協同署督莊有恭。作速詳悉研究。其江西各案。多與江南有關涉之處。可傳諭鄂容安知之。務宜上緊根追。此事非尋常刑名案件可比。不必拘泥常例。扣除封印。及不理刑名日期。隨到隨辦。總以迅速為要。既可以省無辜之拖累。而狡滑之徒。亦不及串供延飾矣。○廣西巡撫定長奏。全州知州胡在穗。向係發河工。以同知補用之員。自任全州。雖屬奮勉。而於地方事務。究未熟悉。若仍以同知歸河工補用。庶人地相宜。諭軍機大臣等。定長奏請將全州知州胡在穗。仍以同知歸於河工補用一摺。已於摺內批飭。但思胡在穗。既係漢軍。必以邊境風土為苦。故欲仍歸河工。以為規避之計。定長此奏。不免出於瞻徇。若論地方河工。則俱有應辦之事。知州不能勝任。又豈能勝同知之任乎。定長簡任封疆。察吏是其專責。惟當問其於知州任內之事。有無廢弛

貽誤與否。據實具奏。加以處分可耳。何必委曲遷就。請以河工同知補用。此等處甚屬不可。著再傳旨申飭。○丙申。諭。向來巡察盛京船廠。俱於科道內。由都察院帶領引見。簡派至巡察黑龍江。則於科道部員內吏部帶領引見。辦理殊不畫一。嗣後巡察黑龍江。亦著於科道內。由都察院帶領引見。○諭軍機大臣等。方觀承奏直隸傳鈔偽稿案內。訊明宋名儒。並非劉豐恒一摺。殊未見上緊實力查辦。劉豐恒係柏光玉供出之犯。既取有伊兄劉師孔供詞。可見確有其人。自應嚴行捕緝。斷無不獲之理。至宋名儒到案。質明實非劉豐恒。亦應仍向柏光玉及伊兄劉師孔根究下落。分咨原籍及江南督撫。飛行提解。且又安知非柏光玉別有來歷。隨口妄供。以為狡展之地乎。此等處更宜留心查察。詳悉研究。若如此顛倒了事。不獨徒滋拖累。而柏光玉偽稿來歷。豈不終歸無著。即久行羈候。有何

益耶。可傳諭方觀承知之。○又諭。今日吏部帶領引見之盛京筆帖式永泰。五達二員。清語生疎。不能奏對。盛京為我朝根本之地。國語乃其素習。且永泰等俱係考中繙譯之員。尚然如此。其餘想更無足觀。此皆由該將軍等平日不能悉心教導之故。著傳旨申飭。○旌表守正捐軀之河南長葛縣民余士元妻余氏。○丁酉。諭軍機大臣等。阿里衮蘇昌所奏酌量就本省陸續買補倉穀一摺。係按粵東情形。通融籌辦。果如所奏。能於倉貯民食兩有裨益。自應如此辦理。但此係七月內通行傳諭之旨。何以遲遲至今。幾及半載。始據奏到。倉貯民食為地方第一要務。該督撫奉到朕旨。即應詳悉妥議。作速具奏。方是外省習氣。遇有應辦事件。其中情形雖已悉知。必拘牽文移。通行各屬。俟其覆齊。然後據案定議。所以多致稽延。時日。看來該督撫等均尚未能免此。可傳諭阿里衮蘇昌知之。○又諭

據吉慶回奏。商人李朝安等。免追加勦課銀一摺。現經內務府大臣議駁。降旨令明白回奏。此事前因該鹽政奏到。語涉支離掩飾。曾經傳諭訓飭。但吉慶身司鹺政。此項應追銀兩。其中備細原委。自所稔知。或另有隱情。即不妨據實陳奏。如自知前奏之謬。亦應一一明白指出。不得一味含糊認罪。遂可顛預了事也。可傳諭吉慶。仍令其即將實在隱情。明白回奏。○以故奉國將軍寶麟子和中額奉

軍機處

恩將軍阿爾寧子恒霽各襲職。○戊戌。諭軍機大臣等。軍機大臣會同兵部議覆黃廷桂所奏礮局事竣。及舊礮照舊存留事宜一摺。已降旨依議。黃廷桂辦理此事。未免錯誤。陝甘各標營。既距省遠隔數千里。又兼山路陡險。所有各項礮位。自應即於各提鎮駐劄地方。就近改鑄。何必設局省城鑄造。今應行銷毀之舊礮。雖議令即在本營銷毀變價。而新鑄之礮位。逐一遠行運送。豈不徒滋勞費耶。

此雖永常在提督任內奏辦之事。黃廷桂統轄兩省軍務。到任以後。何亦竟未詳悉籌畫。著即遵照部議辦理。將此傳諭知之。○又諭。據鄂容安奏。稱傳聖元之稿。由歐陽渭王遞究至熊茂鏡。而熊茂鏡供出王獻有之弟王顯修。已據承認。彼此鈔看等語。此案前從王獻有遞行追至郭庚為。今從郭庚為供出之劉老四。又遞行追至王顯修。雖偽撰正犯。未必即在此二十五人之中。而實在來歷。正可

軍機處

因此而得。各犯現已陸續解京。應俟到京時。詳悉推鞫。其龔英發等五犯。該撫務宜上緊根究。尤須覈對年月先後。取具確供。即飛行起解。毋令在途串供。偽稿之案。辦至此時。來歷愈近。則狡展之弊愈多。少不留心。必至又迷正線矣。可傳諭鄂容安知之。○又諭。據策楞奏。稱川省江玉成等傳鈔偽稿。究至湖北之劉國興。又由劉國興。究至李朝選。已准山西訪獲。其李朝選得自何人。應聽山西辦理。

等語此案既經究出多人是亦偽稿之一線
務宜上緊根追不可將就了事草率併案可
傳諭署撫胡寶瑤令將李朝選得自何人之
處作速嚴切追訊逐層根究勿任狡供延飾
併將該省現在查辦情形據實奏聞以安
西提督綽爾多為黑龍江將軍京口將軍王
進泰為安西提督己亥

上詣

皇太后宮問安命翰林院侍讀學士陳大略

實錄卷四百二十八

二八

提督湖北學政○庚子遣郎中福德官保往
山東會同本省巡撫查辦事件○調正藍旗
漢軍副都統李侍堯為熱河副都統以熱河
副都統海常為京口將軍○辛丑

上御乾清門聽政○舉行奉天及各直省駐防
旗員軍政卓異官三十六員不謹官三員罷
軟官六員年老官十四員有疾官十四員才
力不及官十三員浮躁官三員分別陞賞處
分如例

大清高宗法天隆運至誠先覺體元立極敷文
奮武孝慈神聖純皇帝實錄卷之四百二十八

實錄卷四百二十八

二九

大清高宗法天隆運至誠先覺體元立極敷文奮武孝慈神聖純皇帝實錄卷之四百二十九

監修總裁官經筵講官太子太傅文淵閣大學士人閣閣學士領侍衛內大臣稽察欽奉上諭事件處管理

吏部理藩院事務正黃旗滿洲副都統世襲騎都尉軍功七級隨帶加二級尋常加二級軍功紀錄一次戶部

總裁官經筵講官太子太傅文華殿大學士文淵閣領侍衛內大臣稽察欽奉上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書漢滿洲副都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將鑄印局

纂修

乾隆十七年壬申十二月壬寅

上詣

皇太后宮問安。諭軍機大臣等據御史陳作梅奏稱昇平日久武備漸弛提鎮諸臣於營伍訓練之事未嘗不加意整飭而當召募兵丁時苟年未衰頹即力非壯勇或亦概許充投此等即非老卒半屬弱兵冒濫充數莫此為甚等語。國家武備修明督撫提鎮身任封疆於挑補兵丁一事自當慎重簡拔該御史雖因從前哈密防兵曾經降旨申飭故有此

奏但各省中或有積習相沿於召募時不無冒濫充數者亦未可定可將此傳諭各該督撫提鎮等嗣後務宜加意遴選以收設兵衛民之實用。○禮部議覆莊親王允祿奏稱時憲書二十八宿值日古法背宿在前參宿在後自用西法以來定為參前背後今重修儀象志恒星經緯表業經改正則時憲書與七政書自應畫一遵改等語查背星所占度本狹參星所占度本廣若如西法以參在前背在後是參反距背一度而參宿距井之十度三十六分轉移而歸背矣不如依古背前參後與三方火前水後之序亦合應如所請飭欽天監改定頒行從之。○癸卯諭今歲直隸長垣東明開州三州縣因豫省黃河漫溢被災較重業經降旨加恩賑恤現今水漸消退地方肥澤若將涸出地畝廣種春麥則明年五月間災地民食可資接濟著方觀承轉飭該州縣查明被災七分以上實在無力貧戶

按其所種麥地酌借麥種銀兩俾得及時購備播種齊全以期麥秋有望該部遵諭速行○諭軍機大臣等永常所奏審訊羅田逆黨李天洞等一摺李天洞在江省被獲既供明領有劄付何以解楚質審又復堅不承認若云江省畏刑妄供豈至楚省遂不畏刑耶雖李天洞之果否曾受偽劄拏獲李正南到案實證自明而永常奏內似有迴護從前審訊胡濟修等未甚明確之意至此案專以嚴拏馬朝柱為主若李正南等究之不過枝葉耳屢經傳諭恐將來又成李開花故轍致為奸民借名煽惑之具務宜作速上緊躡捕不可付之通緝了事著一併傳諭知之○軍機大臣議覆調任安西提督綽爾多奏稱哈密塔勒納沁之東北有河源小堡向設千總一員卡兵五十名而又分佈鶯膀山三道大坂舒魯松卡等處冬月仍徹歸堡倘準夷由上下摩垓等處潛來河源小堡已隔賊人之外莫

若塔勒納沁地方形踞險要應請將三堡額駐兵五百名內撥出一百名再於哈密存城兵內派出一百五十名再合河源小堡之兵五十名共成三百名並設都司或守備分駐其地等語查塔勒納沁距哈密二百餘里又北五十里設有河源小堡卡汛上年九月內總督黃廷桂於籌議防範事宜內奏稱塔勒納沁向派弁兵駐劄但形勢頗低北山一帶由上摩垓可遠至哈密城由坡子泉金鈞峽可直抵橋灣俱不能瞭見是塔勒納沁地方亦未能形踞險要今綽爾多奏請於三堡撥兵一百名哈密城撥兵一百五十名此二處城堡存兵已覺單少恐不足守禦且塔勒納沁撥兵亦僅三百名亦不足以壯聲勢至河源小堡為塔勒納沁西北門戶向設防兵五十名又分派鶯膀山三道大坂舒魯松卡等處每年防冬之期俱駐於河源小堡以為塔勒納沁外障今若將此項兵丁一併歸入塔

勒納沁城。則河源小堡。幾為空設。況塔勒納沁地勢既低。不能遠瞭。撥駐之兵。止可防賊潛越。而西北一路。終當以河源小堡為要卡。不可輕議併撤。應交總督黃廷桂。確按情形。詳妥籌議具奏。從之。○以工部侍郎德爾敏為正藍旗滿洲副都統。○以故一等子積德子常安。頭等男方海子索諾木策楞。三等男高煥子高垣。各襲爵。○甲辰。

上詣

皇太后宮問安。○諭軍機大臣等。莊有恭奏稱。孫鼎元偽稿一案。遞追至范仲玉。而范仲玉供出之桐城人張清。堅不肯承。現仍嚴審等語。范仲玉既供得稿於張清。一經質訊。虛實立辨。張清如不承認。此稿來歷。又應仍向范仲玉是問。可傳諭莊有恭。令其上緊作速根究。不可任其狡展。不必拘定封印期內。不理刑名也。若再不能究出確情。即將該犯等奏明解京。交與軍機大臣。一併嚴審。○又諭據

莊有恭奏稱。陳公壽方玉珍前後情節。舛錯支離。倭承倭翻。愈供愈滑。加刑則無不可承。鬆刑則極口呼冤。請飭浙撫將吳建義案內之沈翼天。楊寶。郁起鳳。高正學。四犯。解蘇實審等語。此案陳公壽等在浙既皆供認。而至蘇屢次翻改。其中自有疑實。若不詳悉研究。必致轉迷正線。但止將沈翼天等解蘇質證。即便審出實情。恐雅爾哈善亦未能折服。設將陳公壽等復行解浙。安知不又承認乎。蘇杭相距甚近。雅爾哈善。竟帶沈翼天等四犯至蘇。會同莊有恭逐一秉公確訊。如別經究出來。應亦即飛提到案。逐層嚴究。不必拘泥封印。及不理刑名日期。總以迅速為要。如再不能得有頭緒。即將各犯解京詳鞫。至莊有恭雅爾哈善會審此案。並宜各祛成見。均不得稍存迴護之意。可一併傳諭知之。○又諭莊有恭奏稱。蘇屬今夏稍旱。所交漕米。間有大粒之青腰白臍。懇密交倉場存案等語。漕

糧上供天庾。自應潔淨乾圓。向來抵通之際。每多將就收納。今歲釐剔積弊。查察恭嚴。所有成色米石。此後自難復行搪塞矣。莊有恭所奏。即係地方實在情形。亦不免有豫存地步之意。著傳諭知之。○又諭據鄂容安奏鈔傳偽稿案內之金天彩。身係武生。積年訟棍。王獻有。出入衙門。素不安分。且金天彩曾指授王顯修。令其轉央龔英發。供係得自帥連及。以圖不歸。王獻有一線。其設心狡展。尤屬顯然等語。金天彩。王獻有。二人情節種種可疑。即應嚴密速辦。聞金天彩之子中式舉人。伊父現犯重案。其子本應一併拏究。著傳諭鄂容安。即派范廷楷。密往伊家。將金天彩之子嚴拏。由驛解京。並於拏護時。體察該犯有無惶懼情景。及伊家所有一應字跡等類。俱即逐細搜查檢閱。總之宜密宜速。不得稍有透漏消息。并暗為防範。勿令畏罪自戕。以圖滅口。至違員押解時。更應飭其留心管押。勿

致稍有疎虞。看來金天彩等。即非捏造正犯。亦自必知來歷。此事蹤跡愈近。不可不嚴行查辦。且該犯現被拏解。倘有實在不能掩飾情節。自必分外慌張。范廷楷至彼。即可看驗情形。察其虛實。若得有端倪。該撫即速奏聞。再外省胥役。專與案犯關通。豫為地步。嗣後提拏要犯。該撫俱應特派幹員。令其親行前往。方為妥協。該省此案現在辦理嚴緊。其捏造正犯。或同謀知情之人。自懼敗露。必另有了一番情狀。以及街談巷議。或於無意中吐露根源。尤當密行暗訪。廣為查察。鄂容安於此等處所。俱應詳悉籌及。著一併傳諭知之。○上諭。太后宮問安。○諭御史書成奏稱傳鈔偽造孫嘉淦奏稿一案。外省督撫。不能實力查辦。特令廷臣分別提解省釋。勢必曠日持久。雖省釋出自天恩。而株連終所難免。懇將現在

人犯概行免釋。勅下督撫嚴密訪拏等語。前因雲南發覺此案。該督碩色一面奏聞。一面即咨查江西。湖廣等省。彼時朕意謂流言。誹張原可置之不問。但該督撫既經拏犯審訊。斷無降旨反令不必查辦之理。尚恐株連淹繫。早降旨密諭各省。其僅屬傳看及互相鈔播者。即令分別發落。嗣因江省傳布最多。案犯最衆。而該督撫等辦理錯謬。以致輾轉誣扳。至施廷翰子姪。奏請在京提犯。因就近命軍機大臣等審明實係無辜。即予昭雪。乃知外省辦理並未實心研究。惟求上下接受有人。便歸案完結。轉致草率株連。正犯何由而得。遂將該撫臬等解任來京。所有應行質訊之犯。自應提解詳悉推鞫。務得實情。自京中查審之後。其命外省提解人犯。皆係實在傳鈔散布。確有實據者。承審各官亦皆知儆惕。不敢牽涉影響。猶慮此案查辦經年。正犯或難究出。特召廷臣面加詰詢。僉謂頭緒漸近。

自不可忽為中止。且在京辦理。各犯省釋者多。滋蔓日少。情節漸次明晰。若交外省督撫訪拏。非浮混遞交。即讎扳誣首。徒益糾煩。首犯終無弋獲之日。此皆明切宣示。中外所共知者。今書成身居言路。不思辦理重案。必當水落石出。當此政治清明之日。忽為顛項了事之見。使如所言。則朕與諸臣何必惟日孜孜。託名清簡。諸事皆可不理矣。且伊係滿洲世僕。似此喪心病狂之言。如詛咒彼父祖者。乃視為漠然。則所繫於敗壞滿洲尊君親上之風。為尤甚。著革職。交武備院執傘苦差處學習規矩。○諭軍機大臣等。據黃廷桂奏。稱陝甘各標營生息銀兩。飭令極力招商領運。其無商僻遠營分。將本銀提至省城。設法代運。如此經理。庶四五年之內。原本可以全繳等語。此又誤會朕旨矣。綠營生息。原為惠濟兵丁而設。所撥本銀。皆係庫項。原議利息充裕之後。即將原本陸續歸款。乃各省辦理不

善經營弁役。不免從中侵蝕挪掩之弊。以致原本懸宕。能歸全者。甚屬寥寥。是以降旨傳諭。令其善為料理。亦欲釐剔積弊。使原本可以漸次歸足。而此後以息作本。源源生息。仍不失惠濟兵丁之本意。並非專為歸本起見也。乃督撫提鎮中。竟惟以急圖歸本為事。或請酌減賞需。或請增添利息。種種舛謬。不一而足。業經傳旨通飭。黃廷桂豈尚未經奉到耶。然黃廷桂久任督撫。似亦不應誤會若此。可再行傳諭知之。○又諭據陳宏謀奏。稱龍溪等縣。拏獲民人崇奉西洋邪教。現在嚴究有無交通外國。並此外傳教夥黨。一併嚴拏務獲。分別按擬等語。西洋人之崇奉天主教。自是該國習俗。閩廣瀕海愚民。多有習於其教者。究之尚與邪術煽誘有間。即如京師現有天主堂。亦何能遂至惑衆。現在李嗣娘嚴恐等。既經獲報到案。自應照例查辦。若必概行查拏。則未免滋擾。且於整飭人心風俗之

處。亦未見有益。當以不必深究為是。可傳諭陳宏謀知之。○又諭陳宏謀所奏。查明莆田縣童生。觀榜喧擁。審無脅衆罷市緣由。一摺。此事雖由歷任學政。辦理不善。以致釀成事端。然刁風惡習。自不可不加以懲儆。且貿易人一時徹閉。尚非罷市而何。觀陳宏謀所奏。似猶不免大事化小。小事化無之意。此甚不可。著傳旨申飭。○吏部議准。調任廣西巡撫。定長疏。稱雒容縣平樂縣典史二缺。應請改為暖俸。照例歸部銓選。其橫州大難司融縣。思管鎮賓州安城鎮。遷江縣平陽墟巡檢四缺。亦歸部選。又羅城縣通道鎮懷遠縣梅寨巡檢二缺。請照沿邊烟瘴之例。在外調補。三年俸滿。咨部辦理。從之。○丙午。諭隨祭

壇

廟。事關大典。多羅額駙圖拉。係總管佛倫之子。且曾為侍衛。乃本年歷次隨祭。竟俱稱病不到。甚屬懶惰。著革去額駙品級。發粘竿處効

力行走。其五次以上。隨祭不到之大學士史貽直。協辦大學士孫嘉淦。侍郎嵇璜。雅爾圖。散秩大臣公馬贊。俱著交部察議。佛倫不能教訓其子。亦著交部察議。○又諭捏造孫嘉淦奏稿之犯。係有心傳播逆詞。搖惑人心。為王法所不容。該督撫一見傳稿。即行追究。自屬應辦之事。若但經具摺密奏而未宣布。朕尚可自為裁酌。即不令查辦。亦未可知。乃業由外省查辦。遠近彰著之事。如此而尚謂可不必辦理。則凡命盜等案。牽連難結者。舉不必辦理矣。且所追究者。皆經傳看。或鈔錄傳播。伊等身為大清國赤子。見此等逆詞。不稍動心髮指。而稱為新聞。不問事之有無。樂為傳錄。此皆幸災樂禍。不安本分之流。既各有證有據。有給有收。並非流言無根。腹誹道謗。繫風捕影。驅良民而加之罪也。其輾轉根尋。自必到案。方可辦其虛實。且根尋首犯。非從傳看之人。逐層追究。何由得其實在來歷。勢

必終成疑案。若以提解為株累。則凡命盜案內牽涉之犯。概不必提解。案情何由而得。且更有深慮者。外省督撫。牽於積習。並不實心經理。一切草率。惟圖完案。久而愈迷。不得已乃命在京大臣審辦。尹繼善來京。隨同審辦。伊始知從前在外之刺謬。江南。江西。所辦如此。他省亦大概可知。偽稿之案如此。他事亦更可知。此案之誣謗朕躬。全屬虛捏。原不辯而自明。但關繫風俗人心者甚大。非不知首先捏撰之人。狡獪百出。辦理本自不易。然竟畏難中止。則無由正人心而維風俗。且外省督撫。養尊處優。牢不可破之惡習。無所懲戒。何由更改。既明知其辦理背謬。而復為姑容。國家任用封疆大臣。安用有此。外省吏治。尚可問乎。若但謂一切報罷。遂為息事寧人。則朕自御極以來。即可高居端拱。耽樂深宮。又何事十七年焦心勞思。朝夕孜孜。君臣交儆。豈至此日而反改前度耶。昨御史書成。並不

知大義所在。已降旨斥革示懲。伊身為言官。尚不能備悉原委。遠方傳說。更難保其必無浮議。因再行明白宣諭中外知之。諭軍機大臣等高斌所奏洪澤湖工。現在辦理實在情形一摺。內稱風暴損船。與湖堰工程全無干涉。淮揚道李奇齡接連混稟。實屬荒謬等語。並將該道另摺參奏。請交部議處。此事前因莊有恭奏報摺內。將停修工程。被風汕掣。與船隻之擊損。皆因停修所致者。恐係工員因停修之後。無可開銷。借端稟報。以為將來復行歲修之地。故令高斌詳悉查勘。留心體察。而高斌前此覆奏摺內。又似含糊其詞。以為既經停修之工。該道李奇齡即不當混行稟報。是以復令據實確查。今既先後查明。所有高盱二廳屬汕掣石土等工。有在停修之內者。有不在停修之內者。而停修工程。亦有並未汕掣者。是不獨船隻之損壞。與工程之汕掣無涉。而汕掣之與停修。亦屬無涉。其前

此之接連混稟。早已在朕洞鑒之中矣。然既據實查明。亦毋庸復將該道參奏議處。惟於現在汕掣工程。分別應賠應修。督率上緊趲辦。以資捍禦可耳。著傳諭高斌知之。○丁未。諭軍機大臣等。據鄂容安奏。現在查辦傳鈔偽稿各犯情形一摺。內稱逐一嚴鞫。不肯稍為放鬆。再請將發落之例。稍為變通。嗣後如兩案併發。則照例從重科斷。如一案先行發覺。照例治罪。若再經別案供出。仍行分別枷責等語。查拏捏造偽稿正犯。必須逐層根究。其但經傳鈔之犯。分別發落。自是從前辦理結案之法。並非成例。所有先經發落各案。原不必一一重問。如其現在供出人犯。即使從前已經發落。仍當詳悉推求。即令變通科罪。亦不過辦理之一端。俱在枝葉糾纏。於實在根查正犯要領之處。毫無干涉。總之此案全在查出捏造正犯為主。其餘皆屬枝葉。該撫所奏。尚未得尋源探本。切實根求之道。可傳

諭鄂容安知之。○戊申。

上詣

皇太后宮問安。○諭盛京刑部侍郎富森著來京補授內閣學士。其員缺著吳達善調補。所遺禮部侍郎員缺著蘇章阿補授。世臣不宜盛京兵部侍郎之任。著補授內閣學士。其員缺著卞塔海補授。○工部議覆大學士管江南河道總督高斌奏稱外河廳屬吳城隄隄經洪湖水漲衝刷殘缺。應於舊築碑工迤下接建一千二百二十丈。應如所請。得旨依議速行。○已酉。諭軍機大臣等。胡寶瑤奏萬泉縣知縣張文燦辦理衛有參傳鈔偽稿一案。昏憤藐玩。其平日居官浮滑。庇縱吏胥。聲名甚是平常。先行另疏題參等語。該令張文燦於偽稿重案。全不實心查審。以致誤聽捏詞。延擱日久。復一味欺朦諉卸。非加參革。無以示懲。至於具疏題參。自應將平日居官庸劣之處列入。不必概行聲敘。該撫所辦甚屬

得體。著傳諭知之。至衛有參一案。現在作何追究。著即詳奏。○又諭據莊有恭奏稱。參將孫鼎元傳鈔偽稿一案。逐層遞究。至桐城縣民人張清。現在密咨提拏審究等語。各省查辦此案。多就現獲人犯。委員審訊。得有交替之人。即發落完結。希圖了案。以致案犯輾轉供扳。轉迷正線。遷延時日。首犯未能就獲。朕今日召見軍機大臣。及督臣尹繼善詢問。此招情節。據尹繼善奏稱。此案臣在江南時。已遞究至儀徵等處。尚未歸案等語。外省歸案意見。最足誤事。即如江省查辦偽稿之案。因頭緒紛繁。審理不易。多欲歸併完結。督撫既存此見。則承審之員。順從意旨。將就完案。所以稽遲錯誤。至今未得根柢。尹繼善所奏尚未歸案之語。豈非積習橫據於胸中。所流露者耶。莊有恭所奏。雖稱逐層根究。有人朕實未能深信。其必無顛頂了事之見。可傳諭莊有恭。令其悉心研究。實力查追。不得專委屬

員草率遷就終歸無著總之辦理此案惟應向上根究得其所由來方可漸追漸近至轉給傳鈔則支分派別獲犯雖多徒滋紛擾將此一併諭令知之○又諭各省查辦傳鈔偽稿之案為日已久未有端緒前經降旨令軍機大臣通查各案傳諭各該督撫等作速根究查拏閱今又已半載該督撫節次查辦自必逐層究出有人於此案根株似宜漸近從此實力推求溯流窮源庶得首先捏造正犯以彰國憲倘僅視為通行故事止求上下手接遞有人草率併案必致愈久愈迷即如江西承審施奕慶郭庚為等案朦混未清以致附會牽連不勝擾累而於實在根據轉無著落他省若盡如此則平日所倚賴封疆大臣者何在若或有此等情弊亦斷不能逃朕洞鑒著再於各督撫奏事之便通行傳諭令其各行嚴速追究一面即將現在如何辦理之處詳悉據實奏聞○又諭據泰寧鎮總兵那

親叅奏頭等侍衛伊特訥縱容雇工人於蜘蛛山前放鷹請交部嚴加議處一摺

陵寢重地理宜肅清但山前相距尚遠且滿洲奴僕射獵亦非不法之事該鎮已將架鷹之雇工人照例治罪足以示懲伊特訥不必交部議處可傳諭那親知之○辛亥

孝莊文皇后忌辰遣官祭

昭西陵○

上詣

奉先殿

壽皇殿行禮○詣

皇太后宮問安○諭據刑部查奏奉天省老格被勒身死究出盜情一案其中命盜情跡均有未甚明確之處盛京刑部侍郎富森已補授內閣學士著將案犯即速押帶來京令刑部堂官會同富森及奉天府府尹鄂寶秉公詳悉審明具奏○壬子諭偽稿一案皆由各省辦理不善至今未有端緒若於發覺之初

即行實力根追。詳慎研究。正犯自可早得。何至曠日持久。徒滋株累。蓋外省陋習。督撫養尊處優。一切委之屬吏。而承審各官。亦不過據供錄報。甚至惟事刑求。牽率附會。一經確按。則全無實際。此來歷之所以愈致迷惑也。在偽撰首逆。誣張誕妄。固屬法所不容。然使弋獲到案。審訊明確。或可別有裁奪。從前皇考時。如曾靜張熙之徒。既明知為正犯。不妨法外施仁。然使有逆書而付之不理。可乎。此

案自碩色一面奏聞。一面咨拏根究。既已延及數省。遲至經年。斷無驟然中止之理。他如傳鈔各犯。原非安分之人。里巷流傳。本自應明知為誣謗而共憤。亦即有無從辨真偽而同誼。此朕教化未孚。愧用以憐。正犯一得。則其餘皆可置之不問矣。近因江南江西所辦案情不實。牽入無辜。故令軍機大臣提犯來京。會同詳鞫。亦以省擾累耳。昨據巡撫鄂容安奏江省審結傳鈔各案。多有朦混供認巧

為移接之處。欲按其傳鈔次數。逐案予以應得之罪。莠民詭避。亦所不免。然此在根尋正犯。毋取波及旁枝。各督撫其尚發爾天良。溯彼舊習。若仍聽屬員草率遷就。惟於一二傳鈔之人。輾轉追求。而實在根源。轉歸無著。尹繼善鄂昌之前車具在。可不深以為戒乎。著再通行曉諭知之。○又諭朕命刑部查奏命盜等案。因贓證情跡未明。監候待質者。共五十七案。內康熙年間一案。雍正年間十一案。而自乾隆元年至十七年。統計已未入秋審者。積至四十五案。雖年遠之案。漸消漸少。近者則積而見多。然使於辦理之初。即能詳慎研究。務在得情。則監候之案。何至如此。即此亦可見近來辦事諸臣。不如從前之實心振作矣。此非使無辜之人。久繫囹圄。即使應辟重犯。久稽顯戮。而犴狴之中。淹禁多人。亦非所宜。皆因承審各官。不能實力查辦。又或刑部司員。以有遵駁改正議敘之例。多尋罅漏。

外省無以登答。轉成疑案。一經題明。監候待實。即束置高閣。而接任之員。又非本任之事。率多因循。非明慎用刑而不留獄之意。著刑部將此沉案。速行清理。嗣後內外問刑衙門。於一切命盜重案。各宜留心迅速查辦。應緝拏者。上緊緝拏。應定擬者。即行定擬。勿致塵案日積。若本非難結之案。承審各官。不能審出實情。惟以監候待質為遷延時日之計。且藉得邀免處分。希冀錄敘。該堂官督撫察出。即嚴行叅處。此亦清理庶獄之一法。可通行曉諭知之。○諭軍機大臣等。原任河南布政使富勒赫。前據調任巡撫陳宏謀奏其才力不及。而蔣炳於屬員賢否摺內。則但稱該司居心醇正。辦事勤慎。富勒赫究竟能勝藩司之任與否。著再詢問蔣炳。至按察使秦烱。據蔣炳稱其辦事明晰。但秦烱似亦非才具出色之人。臬司為刑名總匯。責任綦重。蔣炳應留心體察。可一併傳諭知之。○又諭今日閱

阿里衮所奏各摺。多係覆奏節次所奉寄諭之旨。此等於奉到諭旨時。自應隨時辦理。覆奏即或查辦需時。亦應按其先後陸續分次奏報。何以積至歲底彙齊具奏。在阿里衮亦未必親加檢點。不過委之幕賓。臨期趕辦。以為塞責之計。是幾視為奏覆存案。與彙繳硃批奏摺無異矣。有是理乎。況阿里衮久在內廷行走。豈不知歲底諸務轉集。而朕於督撫奏摺。無間緊要尋常。均須一一詳覽批示。乃一日之間。累牘紛陳。何竟冒昧若此耶。可將此傳諭阿里衮。伊非他人可比。若不知者。將謂朕以批閱為煩。亦不向伊宣示矣。○又諭據莊有恭審奏。碭山縣劣生戚克訥。黃修。激衆罷考一案。止將同行之黃身檢等。照例發落。而應擬斬決絞候之首從重犯。則稱俱於取供後。在監病故。毋庸具題。生童激衆罷考。最為學校惡習。既經審實。必明正典刑。方足示儆。乃戚克訥。黃修。二犯。皆以監斃而逃。顯

戮看來非係冒名頂替。即係畏罪自戕。即如湖南知縣徐鴻昇等。於已經奉文勾決之重犯。竟敢臨期疎縱脫逃。則戚克訥等之果係在監病故。豈可不為查察耶。總之外省辦事習氣。多涉虛偽。江南江西承審偽稿各案。舛謬甚多。由此觀之。朕於各該督撫所辦事件。雖欲深信而不可得矣。此案二犯。悉皆監斃。其中大有情弊。著莊有恭悉心確查。得有實據。即將該縣知縣典史題參。從重治罪。不可稍有徇隱。○閩浙總督喀爾吉善等奏臺灣北路洋面。向屬禁地。不許商船前往停泊貿易。是以向來亦未專設水汛。今於秋夏間。據報船戶徐得利許得萬李茂茂陳鄭全等。先後被劫。因令把總徐念帶領兵丁。扮商前往緝捕。在後隴洋面。適遇匪船。即行尾追。匪船飛石拒敵。打傷兵丁。兵船亦即開鎗打死匪船水手二人。匪船知係官兵。扮商誘捕。亦即逃避。當經拏獲舵水七名。訊供辦理。查把總

徐念扮商誘捕。期於必獲匪黨。誤認兵船為商夥。輒敢拒敵。此次弁兵尚屬奮勇追捕。實非怯懦被傷。現在飭屬加緊防範。設法查拏。諭軍機大臣等。前據巡臺御史立柱等奏稱。臺灣出口船戶徐得利等。先後在洋被劫。并有安平協把總徐念帶兵巡洋。被漁船舵水打傷兵丁之事。因所奏未甚明晰。是以降旨令該督提等查明具奏。今據喀爾吉善等覆奏情形。是其辦理巡緝事宜。已屬妥協。其把總徐念帶同兵丁巡緝匪黨。期於必獲。潛蹤誘捕。因致受傷情節。果屬明確。其奮勇甚為可嘉。著該督提等查明在事弁兵。酌加獎賞。如徐念人材可用。將來有千總缺出。即行拔補。以示鼓勵。工部議准。大學士管江南河道總督高斌奏稱。高堰山盱一帶。磚石工段被衝。亟須興修。得旨依議。速行。○以內閣學士鄒一桂為禮部侍郎。是日起

上以歲暮裕祭

太廟齋戒三日 甲寅以歲暮禋祭遣官祭

太廟中殿

後殿○乙卯禋祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○遣官祭

太歲之神○詣

皇太后宮問安○丙辰

上詣

皇太后宮問安○御保和殿筵宴朝正外藩左

翼科爾沁和碩土謝圖親王阿喇布坦多羅

貝勒特古斯額爾克圖固山貝子多羅額駙

扎拉豐阿護國公索諾穆色楞額輔國公色旺

諾爾布丹津多羅額駙多爾濟公品級頭等

台吉吹扎布巴林多羅和碩齊郡王琳沁和

碩額駙德勒克喀爾喀多羅貝勒丹津土默

特固山貝子齊旺喀喇沁護國公瑚圖靈阿輔

固山貝子齊旺喀喇沁護國公瑚圖靈阿輔

國公敏珠爾喇布坦烏喇特輔國公恭額喇

布坦教漢和碩額駙朋蘇克喇錫翁牛特二

等台吉諾爾布扎木素右翼喀爾喀和碩親

王成衮扎布額琳沁多爾濟多羅貝勒車布

登那木扎勒徹蘇隆固山貝子徹穆楚克扎

布輔國公恭額敦坦蒙固多爾吉徹登頭等

台吉喇布坦遜都布格扎布多爾吉都巴扎

布郭爾羅斯扎薩克頭等台吉都噶爾扎布

喀喇沁頭等台吉他布囊丹津達爾扎茂明

安。二等台吉德穆楚克拉旺。及兼領侍衛內大臣之大學士等。召科爾沁和碩土謝圖親王阿喇布坦。喀爾喀和碩親王成衮扎布。額琳沁多爾濟巴林和碩齊郡王琳沁。科爾沁多羅貝勒特古斯額爾克圖。喀爾喀多羅貝勒丹津車布登。那木扎勒。徹蘇隆。科爾沁固山貝子多羅額駙扎拉豐阿。喀爾喀固山貝子徹穆楚克扎布。喀喇沁護國公瑚圖靈阿。輔國公敏珠爾喇布坦。至。

御座前。賜酒成禮。○是月。江西巡撫鄂容安奏。准軍機處來咨。彭楚白在京。供出得稿於盧魯生。曾見盧魯生長子。說係伊次子得來等語。臣即擎到盧魯生長子盧錫齡。次子盧錫榮。訊稱得自開酒店之李殿臣。查李殿臣係已在案人犯。恐有希圖併案之弊。復行研詰。語多閃爍。得旨。此二人速行妥解到京。看來此事已近。勉之。○湖廣總督永常奏。湖北施南一府。自雍正十三年改土歸流以來。久成

內地。附近川黔兩楚人民。墾荒者接踵而往。近田土拐帶業蹟。日見紛紜。必得另立章程。妥為安置。嗣後外省及各屬人民入施者。請照入川給照之例。開造眷屬清冊。呈報本籍。給照前往。交與該地方官查驗。收入保甲。一體編查。其現在落業民人。凡有夫妻子女者。無論流寓久暫。悉予編保。其單身游手之徒。限三月內查明。取具親鄰保結。方准編入。其老荒山場。概行封禁。得旨。覽奏如所議行。○

署山東巡撫楊應琚奏。東省各屬地方。勸諭開墾。貧乏之戶。牛具籽種。多無所出。應令各州縣。按所墾地畝。借給賃牛製具銀。更有認墾無力者。并予酌借牛價。請於沂州府屬捐貯雜糧四千餘石。糶價內借支。得旨。甚是。○又奏。訊得押解東省首告叛逆人舒有奇。龍克燦。二犯。所首叛情。俱無實跡。其被首之牛其祿。王子上等。現飭員差前往贛榆沛縣。滕縣等處。躡緝。俟獲到。會同欽差司員定案。具

奏得旨速行審究。不必拘於封印。不動刑之說。以致遲延。○署山西巡撫胡寶瑑奏。前撫臣阿思哈任內。准河南來咨。內稱現有運貯陝州米七萬餘石。可撥運晉省。嗣以賑糶各糧已足敷用。當經咨覆豫省停撥。臣思來歲正月以後。賑務完竣。自二月以迄麥收。正當青黃不接之時。仍須籌撥。現在委員赴豫領運。得旨好。○甘肅巡撫鄂樂舜奏。皋蘭等十六州縣。衛本年被水旱雹災之處。除照例分別賑恤外。臣因邊地苦寒。窮民衣食不充。飭照京城冬月煮粥之例。設廠散給。其衣不蔽體者。亦為備給。得旨甚好。○四川總督策楞奏。接准松潘鎮臣馬良柱寄奉硃批。臣實深惶悚。此次雜谷用兵。乘番衆之解體。斯首逆之就擒。其與金川情形。實有難易不同。得旨爾等不過乘人之危耳。又稱郭羅克縱放夾壩。其罪原無可寬。但該酋捨刼班禪額爾德尼使人之後。知有頒發勅諭。及恩賞物件。隨

畏懼退還。似尚有一線可原。現在郭羅克土目丹增已遵將賊首一名交出。並稱於數日內再拏一名出獻。臣訊得交出之人。止係從賊。尚有那富丹等為首之人未交。當經指名嚴飭。勒令縛獻。得旨辭甚費而終於不能迴護。但朕旨所戒爾等之既往。非欲興事於將來。爾等莫又錯會朕意。欲辦郭羅克也。此非爾等所能。恐不似雜谷之易與也。○雲南布政使彭家屏奏。滇省跬步皆山。居民每挑挖匯水之區。以資宣洩。名為地海。然地高蓄淺。積水既去。涸出之地。有力者輒行報墾。踞為己業。一遇亢旱。補救無力。而雨足之時。近湖地畝。又每受其漫溢。請自乾隆九年以前。已經報墾地畝外。不許再行報墾。其匯水之區。勸諭農民隨時疏濬。以備旱潦。得旨如所奏。告督撫存案可也。○貴州巡撫開泰奏。黔省額貯倉穀。每年平糶。民苗糶買有限。未能周徧出易。易致損耗。該州縣等交代時。以係積

年原存之物。往往不辨米色。上下交收。殊非整飭倉儲之道。現飭各屬。凡遇新舊交代。米色必須認真。不得遷就接受。如經查出。定行糾劾。得旨好。應如是辦理者。○是年。旌表孝子直隸等省侯實祿等十六名。孝婦江蘇王氏一口。貞女江蘇陳氏等一十八口。守節合例。八旗滿洲常保妻寧古塔氏等一百四十六口。蒙古德保住妻劉氏等二十四口。漢軍郎正堂妻張氏等一十六口。奉天等省王振基妻汪氏等六百六十九口。夫亡殉節。滿洲查林妻鈕和里氏等二口。湖北等省舒之獻妻胡氏等二口。未婚守志。鑲黃旗四格聘妻趙氏等七口。湖南等省范仲昌聘妻朱氏等三口。百歲。廣東生員詹星斗一名。百歲壽民婦。直隸等省張俊德等四十六名口。各給銀建坊如例。○一產三男。直隸等省傳廷獻等十三家。○會計天下民穀數。各省通共大小男婦一萬八千二百八十五萬七千二百七

續纂卷四十九

聖

一

十七名口。各省通共存倉米穀二千六百六十七萬二千八百三石五斗五升三合八勺。

續纂卷四十九

音

大清高宗法天隆運至誠先覺體元立極敷文奮武孝慈神聖純皇帝實錄卷之四百二十九

大清高宗法天隆運至誠先覺體元立極敷文奮武孝慈神聖純皇帝實錄卷之四百三十

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次正度桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉春正月丁巳朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○是日

立春順天府進士牛春山寶座○戊午諭陝省西同等屬之耀州等三十七州縣晉省蒲解等屬之永濟等十一州縣上年夏秋被旱業令該督撫等加意撫卹照例蠲賑以期被災窮黎不致失所今時屆春和東作方興距麥秋之期尚遠小民餬口維艱朕心深為廛念著加恩將陝晉二省被災州縣內勘明成災六分以上者無論極貧次貧概行加賑一箇月以資接濟該督撫其董率屬員妥協經理務俾閭閻均霑實惠以副朕愛養黎元之意該部遵諭速行○是日起

上以祈穀於

上帝齋戒三日○己未諭國子監助教曹洛裡

年逾大耋精力康強分教成均蔚為耆宿著

加恩授為司業額外行走○庚申

上詣

南郊齋宮齋宿○江西巡撫鄂容安奏江省傳

鈔偽稿各犯多係十五年九月十月間之事惟

現訊據劉時達供伊子劉守樸於十五年七

月。由浙寄稿來江。查與石憲曾李世璠等所供傳看之時。均屬相符。較之別案日月獨早。由此根尋。線路稍近。劉守樸已回廣東原籍。現在咨拏解京。但粵省赴都。必由江西省城。該犯到時。臣即就近先行研訊。得旨甚好。此事看來已有頭緒。惟劉守樸在廣東。慮廣東不能速辦得宜耳。○辛酉。祈穀於

上帝。

上親詣行禮。○詣

皇太后宮問安。○諭軍機大臣等。據鄂容安奏查審傳鈔偽稿之盧魯生一案。係南昌衛守備劉時達給與。隨提訊劉時達。據供十五年七月。伊子劉守樸。前任浙江金華縣典史時。在家書內封寄。并供劉守樸業已告病。回廣東原籍等語。看來此案傳稿年月。較他案為最早。似於根株漸近。所有供出之劉守樸。或係聞風畏罪。先期託病潛回。亦未可定。劉守樸前在金華。既傳此稿。則金華地方必有偽

稿蹤跡。必得幹員前往訪辦。庶能得其根柢。著將供單鈔寄莊有恭。雅爾哈善。令其即派承辦此案之周承勅。錢度。速往該處。密行確加訪查辦理。應拏問者。即著拏問。令其從權行事。並將劉守樸從前在浙。係於何時告病回籍。及是否實係患病。或係捏辭。該地方有無偽稿傳播之處。一併詳悉體訪。務須得其確據。不可稍有疎露。再供單內。劉守樸之長隨王玉琳。既係寄信到江之人。亦屬要犯。著

莊有恭等。一併密行查拏。務獲。速即解京。周承勅。錢度。此案許其具摺。由驛遞奏。以期迅速。○又諭。現在查辦江西省鈔傳偽稿之撫州幫千總盧魯生一案。究出與千總石憲曾。在李世璠家得稿於南昌衛守備劉時達。據江撫鄂容安摺奏。訊據劉時達供稱。乾隆十五年七月間。兒子劉守樸。在浙江金華縣做典史時。遣家人王玉琳送寄家信來江。於信內附寄孫嘉淦奏稿一張。與劉時達閱看。劉

守樸已經告病回廣東潮州府屬之海陽縣原籍。現飛咨嚴拏馳解等語。劉守樸於十五年七月間寄稿與劉時達。則其得稿最早於根源甚近。實為此案要犯。著即傳諭阿里衮令其速派幹員密往海陽立將劉守樸嚴加查拏。即由驛遞飛速押解來京。不得稍有延緩。並宜加意防範。似此第一緊要之犯。倘稍有疎虞。或致沿途自戕滅口。阿里衮何能承當此罪耶。再其家人王玉琳。雖據劉時達供伊子解任時。即已辭去。不知何往等語。或此時尚在廣東。亦著一併嚴速訪查蹤跡。務獲速解。○壬戌。享

太廟。遣和碩履親王允禔恭代行禮。○遣官祭太歲之神。○諭。朕於二月內恭謁

泰陵。旋蹕順道詣

金陵祭奠。由黃新莊奉侍

皇太后。前往霸州水圍。候

皇太后鑾輿回暢春園。朕即從霸州一帶閱視

永定河工。至南苑駐蹕。所有應行事宜。著各該衙門照例豫備。○癸亥。

世祖章皇帝忌辰。遣官祭

孝陵。○

上詣

皇太后宮問安。○諭軍機大臣等。據莊有恭所奏偽稿案內。朱老五供出之饒玉文。展轉究出李柱國。王賢施秉乾。張廣永。陳瀛。汪連等。並施秉乾畏罪自盡一摺。此案首犯未得傳

鈔各線。俱關緊要。況施秉乾供在張廣永家同看。其來歷更屬可疑。此等要犯。自應加意守禁。何得尚令伊家人同在一處。又并不多派幹役。小心看視。而身佩小刀。亦不令其解去。以致施秉乾得乘間自戕。殞命。看來外省疎懈習氣。牢不可破。全無震動恪恭之意。其看守雖在該縣。莊有恭何以竟未嚴飭防範。摺內亦祇請將該縣議處而已。若置身事外者。然則督撫所司何事耶。莊有恭係新受恩典之人。且

錢度周承勅等甫自京師回南。目擊在京辦理情形。聞之自當愈加愧奮。乃尚如此玩愒。可謂深負朕恩。姑念其初任封疆。從寬傳旨嚴行申飭。嗣後若不滿除陋習。痛加悛改。則有鄂昌之前車在。至知縣李永書疎忽至此。自不可復膺民社。但此案尚未究明正犯。若顯掛彈章。又滋浮議。著莊有恭將其不稱職處。另款查叅。所有軍機大臣另文提解各犯。即行遴委妥幹之員。由驛遞迅速馳解。沿途並宜慎選弁役。加意看管。倘或再有疎虞。必於莊有恭是問。恐莊有恭亦不能當此重罪也。其陳瀛此稿得自何人之處。仍令作速根追。但經供出有人。質對明確。即將現犯陸續飛解來京。可一併傳諭知之。○又諭山東滕縣生員龍克燦等首告江南贛榆縣人牛其祿等謀逆一案。前經降旨令郎中福德官保往山東協同楊應琚查辦。此等重案。必當嚴密迅速上緊辦理。京中派往之司員及該按

察使阿爾泰。自應赴滕沛贛榆等處。分頭確加體訪。應查拏者即行查拏。方能得其實在確據。亦不至累及無辜。乃前據楊應琚摺奏。僅稱選差幹員。提拏搜查等語。看來不過委一二佐貳之手。而福德官保等安居省會。坐待案犯至省。始行審辦。並不親身前往。甚屬疎懈。如此何用遣伊等前往耶。其作何辦理情形。至今亦並未具摺奏聞。殊非實心任事之道。楊應琚著傳旨申飭。並諭福德官保。於奉到此旨之日。如案犯尚未到齊。仍令會同按察司。即速分往該處。確查速辦。其現在查辦情形。即速具奏。尋楊應琚會同福德官保奏。訊據牛其祿叅拜老堂。得受邪經。因捏為十轉金丹之說。指稱親王。騙誘愚民。龍克燦等轉相招引。夥布旋以舒有奇入會。不遂商謀。控告。龍克燦自以向曾入教。不敢首報。邪說遂演為逆跡。附會獻叛二字。希圖卸罪。王子上等雖寄受邪經。並無叛逆情事。得旨。三

法司核擬速奏。尋議牛其祿首布邪言。煽惑人心。擬斬立決。舒有奇所告雖斬決罪人所犯審非叛逆。餘人皆係被誣。龍克燦夥布邪言。復捏辭首告。均擬斬監候。秋後處決。王子上等受寄邪經。不即首告。分別革杖從之。甲子。諭軍機大臣等。據延綏總兵馬乾奏稱。延安營兵丁因添製軍裝。所關季餉有限。約有二十餘人。至守備衙門喧譟。現在親至該營根究首從。嚴行懲創。並將該將備另行揭叅等語。兵丁喧譟滋事。最為綠營惡習。自應究明首從。嚴行懲創。至叅將高時農。初以時屆歲暮。恐添製軍裝。致兵丁拮据。欲俟今春補製。後以各兵所領月餉有限。設法通融接濟。看來並無不合之處。守備趙廷輔。雖堅請扣餉。致啓釁端。然係辦理公事。亦無大過。苟其中有別故。亦應查明。行私實據。自當叅處。若以一二悍卒喧譟之故。遂將該將備籠統均登白簡。豈不愈長刁風。殊非整飭營伍之

道馬乾現已親往延安。可傳諭總督黃廷桂。令其據實確查。妥協辦理。○又諭曰。治大雄在雲南提督任內。叅奏伊子治繼鈞借貸銀兩一案。巧詐卑鄙。因其於營伍事務尚屬諳練。從寬僅予革職。仍令以哈密總兵効力行走。此朕格外之恩。乃治大雄自奉到部文及抵任哈密以來。並未具奏陳謝。祇有請安一摺而已。總兵仍屬封疆大員。非廢斥者可比。既具摺請安。豈竟不知當具摺謝恩乎。甚屬糊塗。若以降革之後。心懷缺望。諒治大雄亦必不敢出此。姑念伊係武臣。不嫻體制。著傳旨申飭。○乙丑。

上詣

大高殿行禮。○兩廣總督阿里衮奏。據廣州協稟報。東莞縣匪人莫信豐等。散布偽劄。欲奔增城縣藍汾山內聚眾。旋准撫臣蘇昌札稱。該縣居民安分守法。惟近有無賴棍徒。用花邊白布。寫永保平安四字。中書一周字。給與

鄉愚。詐騙銀米。已飭營縣查拏等語。復據增城博羅三縣訊報華峯山及長平地方奸匪。均有東莞縣人倡率。似與該縣之莫信豐一黨。除飛委將弁分頭堵拏。臣仍帶兵親赴增城。搜查有無巢穴。務全擒獲。得旨。如所奏。則實有不軌形跡。蘇昌何乃如此。欲化有事為無事耶。既親身前往。一切妥速為之。丙寅諭軍機大臣等。據阿里衮奏廣東之東莞等縣奸民莫信豐等聚眾為匪一案。已於摺內批示。令其妥速辦理。粵東嶺海交錯。奸匪易於潛蹤。此案逆匪既有樹旗號召情事。復經搜獲器械。且互相勾結。甚至界連數邑。若不嚴行查拏搜捕。痛斷根株。必大為良民之害。阿里衮聞信親往。自屬辦理得宜。蘇昌身任巡撫。該省有此等謀為不軌之事。乃札覆該督。稱係不過無賴棍徒。乘機詐騙鄉愚之伎。看來不免有大事化小。小事化無之見。何以綏靖地方。著傳旨詢問阿里衮。蘇昌此案究

係是何情形。據實速行奏聞。至於阿里衮承辦此事。用法宜嚴。完結宜速。宜照江南英山之例。嚴加處治。庶足安靖海疆。俾愚民知所懲儆。一併傳諭知之。○又諭據陳宏謀摺奏漳州南靖地方盤獲匪船軍械偽劄偽印等項。訊據匪犯蔡明烈等。同供夥黨甚多。現據供出有名匪犯四十名。其首逆蔡卓然。軍師馮珩。已經拏獲。現在逐加根究。務必按名嚴拏。弋獲等語。此等重案。正宜迅速辦理。方可永絕奸宄。綏輯地方。該督喀爾吉善親往泉州一帶。董率查辦。甚合機宜。現在首犯業已就擒。其餘從逆黨羽。自可按名緝獲。不難搜絕根株。此案統宜按照江南英山之例。從重處治。庶足懲儆匪逆。安靖海疆。該督現在查辦一切。用法宜嚴。完結宜速。務俾愚民知所畏懼。而亦不致擾累無辜。方為妥協。著傳諭喀爾吉善知之。召大學士及內廷翰林等茶宴。以新正詠雪聯句。○丁卯。

上詣

大高殿行禮。○詣

安佑宮行禮。○奉

皇太后居長春仙館。○幸圓明園。○戊辰直隸

總督方觀承奏熱河地方遼濶山溝險僻遠

來墾荒就食之民散處其中復踰邊境與蒙

古錯處。向例設牌頭鄉長鄉約約束其蒙古

地方教漢奈曼翁牛特土默特各處流寓民

人附近歸八溝塔子溝等所管轄亦設鄉牌

互相稽查。但口外汎廣兵單該鄉牌等均係

流寓之民且蒙古地界非營汎所轄請令熱

河道屬十巡檢各於所轄地方每季巡查一

次五廳員以公出之時於所過村莊挨次巡

查至熱河道有分巡專責應令一年兩次巡

查其三十二汛之專防千把外委校織巡防

應於交界處按半月會哨一次四營都司守

備每季各於所轄汎內巡查一周河七協副

將每年兩次查閱營伍即令遍為巡哨至土

默特東南鐵溝地方每年係熱河副都統巡

查一次鐵溝西北即係教漢奈曼翁牛特土

默特等處邊界副都統巡查鐵溝後稍紆路

即可查一周又保甲之法口外亦可做行應

就各村烟戶多寡酌量編立先令該管巡檢

挨戶編查給與門牌仍以原設牌頭領之新

來之人實有歸著者准報廳給牌居住形跡

可疑者不准容留至蒙古界內種地民人亦

一體編次給與門牌按現在各戶務使歲有

減汰不許增新其有不法事件即稟各該廳

查逐仍令熱河道出巡之次逐村抽查如查

辦不實及容留無籍之人將該管廳官分別

記過其鄉牌人等責治僉換得旨如所議行

已已

上奉

皇太后幸山高水長至癸酉皆如之○御大幄

次賜蒙古王貝勒額駙台吉等宴庚午

上奉

皇太后幸同樂園侍早晚膳。至癸未皆如之。御奉
三無私殿。賜皇子諸王等宴。諭軍機大臣等。碩
色所奏查閱滇省營伍。分別優劣一摺。似尚
不無粉飾之意。即如督標是其專轄。而摺中
乃以督標為優。得無稍有假借耶。即使果優
於他鎮。而該督於通省營伍。不能一一留心
整飭。已可概見。並其所稱技藝進退。尚能合
式之處。俱難以遽信矣。且連環鳥鎗。不過四
五人。若多至七人。亦未見其熟練。雲貴為邊
徼要地。在在設有重兵。巡查簡閱。自不可少。
存姑息。碩色本輒弱之人。不患其過於振作。
惟患其過於萎靡耳。且如臨元鎮營伍。既屬
廢弛。劉應蓮在任數載。所司何事。自當嚴行
叅處。方足以肅軍紀。而另摺僅請交部察議。
此亦其優柔不振之一端也。著一併傳旨申
飭。辛未

上詣

安佑宮行禮。○御正大光明殿。賜朝正外藩等

宴。召科爾沁和碩親王阿喇布坦多羅貝勒
特古斯額爾克圖喀爾喀和碩親王成衮扎
布額琳沁多爾濟多羅貝勒那木扎勒齊素
隆固山貝子車木楚克扎布。輔國公蒙固巴
林多羅郡王琳沁烏珠穆沁多羅貝勒車布
登喀喇沁固山貝子扎拉豐阿。鎮國公瑚圖
靈阿。輔國公敏珠爾喇布坦。和托輝特輔國
公多爾濟車登烏喇特。輔國公恭格喇布坦
等。至御座前。賜酒成禮。○順天府行鄉飲酒
禮

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十一

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂
總纂官總纂官太子太傅文華殿大學士文淵閣領閣事稽察欽奉 上諭事務處管理刑部戶部三庫事務
世襲副都統軍功加十九級隨帶加二級又加二級臣重誥內大臣戶部尚書鑲黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉正月壬申

上御正大光明殿賜大學士尚書等宴諭軍
機大臣等莊有恭雅爾哈善奏到會審陳公
壽翻供情節一摺據稱遵旨將陳公壽等由
驛解京請調取吳進義及伊家人郁起鳳三
面質對並請赴京候旨查詢情節等語前因
此案陳公壽等條認條翻前後情節支離舛
錯是以降旨令雅爾哈善至蘇秉公會審今
竟以所見各有不同未能得其實在來歷看
來雅爾哈善於此案不無迴護之意俟人犯

到京審訊之下。自不能逃朕洞鑒。該撫等各有封疆之責。未便因一二人犯供情狡展。即行來京。陳公壽等犯已交軍機大臣虛公研鞫。莊有恭雅爾哈善不必來京。至吳進義前已降旨寬宥。釋放回籍。此事伊即或有委曲承認之處。伊已年老。亦係應令休致之人。即仍審明見稿屬實。既經朕加恩寬宥。亦不必復治其罪。倘謂此稿竟出吳進義之手。則朕可信其必無此理。若再從原籍調取來京。徒

乾隆十八年正月下

二

滋物議。於根究正線毫無益處。總之查辦各案本意。只欲究出偽撰首犯。現在軍機大臣查審江西千總盧魯生一案。於正線已近。若從此遂得首逆。則其餘皆屬枝節。並可置之不問矣。可將此一併傳諭。莊有恭雅爾哈善知之。又諭曰。黃廷桂奏延安營兵丁因扣餉添製軍裝聚眾塞署一案。該守備趙廷輔不於平時整辦。參將高時農並不先事曉諭。致滋事端。俟此案審明之後。另行分別嚴參。

等語。此事前據該鎮馬乾奏到。朕以參將高時農設法通融接濟。並無不合。而該備係辦理公事。尚無大過。曾經降旨傳諭黃廷桂令其確查妥辦。該督尚未奉到。今觀所奏。亦不過據該鎮查報辦理。殊覺未協。總之此案該將備等。雖均有料理未善之處。但不必因此立掛彈章。益令悍卒無所顧忌。致長刁風。馬乾係屬武臣。不諳政體。黃廷桂自應斟酌具奏。方是著傳諭該督。令其仍遵前旨。據實確

乾隆十八年正月下

一

查妥協辦理。○甲戌。諭軍機大臣等。新柱奏到上年十二月漳州盤獲匪船。搜出軍械偽劉偽印。親自帶兵前往防禦。查拏一摺。前據該督喀爾吉善摺奏。亦稱訊據匪犯蔡明烈等供。係自詔安縣白葉林湖來。欲挑往廈門大擔海船裏去等語。此等匪逆。糾眾製械。潛謀不軌。自必究訊確實。逐名搜捕。清除巢穴。斷絕羽黨。一切從嚴辦理。方足安靖海疆。但伊等既肆逆謀。必多詭詐。其同夥名姓住址。

及製造窩藏器械地方併裝載船人數目並現經拏獲船隻器械的係來從何處實欲運往何處與接收地方通同人衆均須詳細明確一一訊供查辦不可任其狡譎誑供致有奸徒漏網之處再據陳宏謀續報摺內雖稱其首逆蔡卓然軍師馮珩已經拏獲而蔡卓然馮珩是否的係首犯主謀之人抑此外尚有造謀指使未經供出之渠魁逆匪必一一得其確情勿致混供誣認稍有隱遁又其殊

千九百一十二

五

標照上開寫自浙江發字樣雖詭秘情形未可遽信然亦宜盡情推鞠總以嚴密迅速完結為貴仍遵前旨統照江南英山之例辦理著傳諭喀爾吉善新柱陳宏謀知之並將近日情形作速詳奏又諭江西傳鈔偽稿之案究至衛守備劉時達據供係伊子劉守樸自浙江金華寄來此係年月最早之正線該員雖係告病回籍金華地方自必別有偽稿來歷已著周承勅錢度前往密行體訪但此

千九百一十二

五

案查辦已久且江浙接壤供情必有傳聞如果係捏造傳鈔之人非多方掩飾迷藏正線即恐先事驚惶別生枝節浙人多喜造言生事此時現有福建盤獲奸匪咨浙查拏之犯恐奸徒或藉此從中煽惑尤當鎮靜辦理鄂容安所奏不無所見著鈔寄雅爾哈善看總之此案以務得正犯渠魁為亟不必多纏枝葉雅爾哈善應加意採訪果關正線務宜嚴速追查不可稍有脫漏如實係旁枝不妨量從寬假毋過張皇惟期得有實際不致稽延時日方為妥協並令雅爾哈善將此旨傳諭周承勅等一同留心再新調金華府知府張照乘因董榕尚未到江一時未能赴任已降旨與嘉興府知府湯任對調著雅爾哈善飭令該員速赴新任一切上緊慎重辦理此係最關緊要之時不可稍有疎懈○軍機大臣等議覆將軍阿蘭泰奏稱盛京兵所拴馬匹近年倒斃甚多買補尚未足額若將錢糧坐

扣生計有礙請於乾隆十六十七兩年官鋪生息及滋生庫紅白賞餘二項銀內借給半年錢糧應如所請至稱自二十年起分作三年扣還兵力究屬拮据應展至五年按季扣還歸款從之○乙亥諭據閩浙總督喀爾吉善奏稱福建漳州府屬之平和南靖二縣地方匪犯蔡榮祖馮珩等謀為不軌業經擒獲首從各犯現在逐加嚴訊按律定擬其失察之督撫及文武各官統於正案內一併附參

請旨交部嚴加議處等語閩省山海交錯民風刁悍今逆匪蔡榮祖等糾眾造謀雖黨羽不過數十人而搜獲偽劄中竟敢擅稱名號且有訂期攻城之語是其妄肆逆萌大干法紀該督喀爾吉善馳赴漳郡督率屬員逐名搜捕使逆黨不致漏網良民不致驚擾辦理甚為妥協所有案內首從各犯審明按律定擬以昭炯戒至該督撫等查辦此案迅合機宜俱著交部議敘在事文武員弁內有奮勉

出力者亦著該督撫查明具奏交部分別議敘守備葉相德一有風聞即親身前往首先盤獲匪船殊屬可嘉著送部引見其該督撫及地方文武各官失察之罪俱著加恩寬免○又諭據閩浙總督喀爾吉善奏稱汀漳龍道單德謨於逆匪蔡榮祖等謀為不軌一案其中蔡涓一犯現充道役該道昏憤玩縱已屬不職及拏獲匪犯後亦並不稟報檢舉據實叅奏請旨革職等語單德謨由特恩陞用

擢至監司乃於此等重案既不能覺察於前又並不檢舉於後按其情節殊為可惡僅予罷斥不足蔽辜著革職發往軍臺効力贖罪○諭軍機大臣等據喀爾吉善奏拏獲平和等縣逆匪蔡榮祖等謀為不軌現在嚴審定擬一案其查辦迅速甚合機宜至濱海嚴疆民風向稱刁悍似此聚眾滋事之案原不能保其必無但須及時槌發奸伏不致滋蔓為害即見其能留心地方實力整頓所有該督

請旨交部查議之處已著加恩寬免仍交部議叙矣。案內現獲首從各犯及供出有名逆黨務宜速為審究上緊搜捕一切從嚴辦理不可稍存姑息。此等不逞之徒即多戮數人亦何足惜耶。其署知府奇靈阿知縣許齊卓雖於審訊時將馮珩一犯疊夾致斃但此等重案自當嚴行夾訊且首逆已獲而馮珩同謀情節亦俱明確無可究質但恐其偽死耳。仍應詳查戮屍該署府等將來不必再行查叅。再海澄公黃仕簡尚屬安靜謹飭之人家人收租亦屬常事。此不過匪黨藉口託詞若因此查詢恐長頑佃抗欠刁風竟置之不問可也。著一併傳諭喀爾吉善知之。丙子諭軍機大臣等據岳鍾琪奏稱郭羅克屢次劫掠請於三月內前赴松潘飭令擒獻賊贓倘該土目抗拒不遵一面檄調漢土官兵親身督率前往擒捕併力攻擊等語是竟欲用兵於郭羅克矣。昨策楞奏內尚止欲令其擒獻

正賊今岳鍾琪此奏則更庸妄紕謬又不當僅以錯會朕意責之在伊等不過欲迴護雜谷一事而究之終不能迴護且恐自速其罪耳。上年雜谷之役據伊等初奏以為逆跡已著不可不除故亦聽其前往然朕彼時方以瞻對金川曠日持久為戒不免深為廕念及觀其節次奏報情形其乘虛襲取事屬顯然是以屢經降旨訓飭並於馬良柱摺內明切批諭令寄伊等知之原欲使之知所警愧乃竟不但不愧而且欲又生釁端國家之兵馬糧餉該督即不知慎重而邊圉重地全不為培養元氣休息人民之計是豈封疆大臣之用心耶。以國家全盛之時辦一郭羅克本非難事然即使立就擒捕亦復何關緊要而況其未必如雜谷之易與乎。看伊二人所奏意見似有不同是策楞尚知所畏懼而岳鍾琪則幾無所顧忌矣。著一併傳旨嚴行申飭如伊等意在必行不妨據實奏聞並出具軍令

結狀定限幾日可以成功朕亦不難准行若將來稍有稽誤惟伊二人是問可令伊等自審度之○又諭據延綏鎮總兵馬乾所奏查明延安兵丁不法壘砌守備衙門緣由一摺內稱該營將備因提臣將次巡查於歲暮扣留餉銀製辦軍裝縱無侵蝕情弊其平日之廢弛固可概見迨衆兵喧譟滋事守備趙廷輔竟閉門不出叅將高時農復趕至城外下跪央求現在揭報題叅等語此事前據馬乾黃廷桂先後奏到因見高時農始則阻其扣餉繼又設法接濟而趙廷輔亦屬辦理公事尚無大過若概登白簡轉長悍卒刁風是以節經傳諭黃廷桂令其查明妥辦今觀馬乾所奏則此案召釁自趙廷輔高時農二人及至激成事端一則閉門不出一則下跪央求似此庸劣無能實出情理之外其罪又不僅止不恤兵艱而已黃廷桂即行查明據實題叅請旨交刑部治罪以肅官常而昭軍紀

至兵丁張廣等聚衆壘門鳴號出城不法已極且該將備等現經拏問而鼓譟之兵若仍以為首二三人寘之於法其餘遞從末減不足以昭炯戒自當多處數人從嚴辦理即其罪不至死者或發往烏拉等處充當苦差以示懲創庶將來各營兵丁知所畏懼可令黃廷桂斟酌查辦一併傳諭知之○戊寅諭朕此次恭謁

泰陵著履親王莊親王大學士來保史貽直在京總理事務一定邊左副將軍成衮扎布奏準夷素性詭譎近未通使請於五六月間派賢能台吉官員各一二人以年例買馬為名在烏梁海暗偵再喀爾喀副將軍每年於軍營四季駐班請令在叅贊上隨內地大臣行走學習得旨值班副將軍著在叅贊上行走餘著軍機大臣會同該將軍議奏再散秩大臣薩喇勒頗悉準夷情事若選派索倫烏拉齊帶往於軍營有益著一併議奏尋議烏梁

海探信之處。應如所奏。至薩喇勒前赴軍營。應派索倫烏拉齊一百名。再令薩喇勒於伊屬下挑選數十名。並令察哈爾八旗總管於舊厄魯特等項人內。每旗挑二十餘名。密行豫備。從之。○諭總督策楞阿里。現在丁憂。四川總督印務著黃廷桂署理。奉到諭旨。即速馳驛赴任。陝甘總督印務著尹繼善署理。兩廣總督印務著班第署理。尹繼善班第俱著馳驛速行前往。江西巡撫鄂容安著署理。兩江總督印務。即著在江西辦理。諭軍機大臣等。現在審訊盧魯生一案。原革江南衛守備楊琳。有應行質訊之處。已經軍機大臣等飛咨提解。楊琳係此案要犯。查係原籍湖廣。現住江西。著傳諭江西巡撫署兩江總督鄂容安。湖廣總督永常。湖北巡撫恒文等。速將該犯楊琳提拿到案。遴委妥員管押。由驛遞飛解來京。並飭解員小心防範。倘稍有疎虞。或致該犯途次自戕滅口。該督撫之罪。即

無可逭矣。○禮部題朝鮮國王李昫遣使表賀萬壽。冬至元三大節。及進歲貢方物。賞賚筵宴如例。○辛巳。諭各省傳鈔偽稿一案。朕屢經降旨宣示中外。此等奸徒傳播流言。其誣謗朕躬者。有無虛實。人所共見。共知不足置辯。而譸張為幻。關係風俗人心者。甚大。不可不力為整飭。乃各省督撫。僅視為尋常案件。惟任屬員取供詳解。過堂一審。即為歸案了事。以致輾轉蔓延。久迷正線。各省就案完結。情形大畧。不過如此。而在江西為尤甚。即如施廷翰案內之張三。施奕度。江西承審各官。草率錯謬。及到江南。亦不能審出實情。幾認為捏造。正犯經朕命軍機大臣等審明。昭雪而干總盧魯生在江西兩次到案。俱被狡飾。脫漏。又經軍機大臣從解京之書。辨段樹武彭楚白等供詞互異之處。細加窮詰。始將干總盧魯生守備劉時達傳稿情節。逐層究出。比盧魯生劉時達先後到京。朕督令諸臣虛心

研鞫反覆推求。始則借端支飾。繼則混指同寅。既不能推卸。傳稿實情。又不能供得稿來。歷詰問再四。即各委之伊子。忍心害理。莫此為甚。迨情竭詞窮。始將其會商捏造種種奸偽情節。并將偽稿條款逐一默寫。及其造謀起意。於破案後。商同借線掩飾情由。一一吐露。矢口不移。當此光天化日之下。乃有此等魑魅魍魎。潛形逞偽。實出情理之外。今不待重刑。供情俱已確鑿。殆由奸徒罪大惡極。傳

鈔貽累多人。好還之道。自無所逃耳。盧魯生劉時達著議政王大臣大學士九卿科道會同軍機大臣再行詳細研鞫。定擬具奏。至督撫為封疆大吏。不特此等大逆之犯。即尋常案件。孰非民生休戚攸關。而養驕飾偽。妄自託為敦體。可乎。此案若查辦之始。即行竭力根究。自可早得正犯。乃粗率苟且。江西舛謬於前。江南迷誤於後。均無所辭咎。江西近在同城。羣衛弁騰口囂囂。毫無顧忌。串供借線。

幾於網漏吞舟。厥罪較重於南省。解任巡撫鄂昌按察使丁廷讓知府戚振鷺俱著革職。等因。交刑部治罪。總督尹繼善及派往江西同審之周承勅高麟勳俱著交部嚴加議處。錢度朱奎揚等尚與專委承辦者有間。俱著交部議處。至衛弁乃總漕專責。瑚寶亦不能辭責。亦交部嚴察議奏。當日查辦之始。未知根源所在。須披葉尋枝。勢不得謂法不及眾。畏難中止。以致顛預了事。朕猶恐拖累者眾。屢經密諭各省督撫分別發落。以省拖延。即武弁大員。曾經私看者。亦悉置不問。然在伊等食毛履土。見此大逆不道之詞。當為痛心疾首。譬如聞人詈其父祖。轉樂為稱述。非逆子而何。然使非有首先捏造之人。則伊等亦無從傳聞。是傳聞者本有應得之罪。不可謂被所愚弄。而朕則憫其無知。譬子雖不孝。父不忍不慈。今首犯既得。不妨曲宥。除在京人犯已予省釋外。著傳諭各省督撫通行出示。

曉諭。無論已未發覺。概行從寬免究。釋放。凡屬此案。例應擬罪人衆。蒙朕格外寬宥。務宜痛自改悔。動尊君親上之天良。戒造言喜事之惡習。安靜守分。庶不致良苗化為稂莠。永受朕保全愛養之恩。夫讒說殄行為聖世所不容。奸頑不除。則風俗人心。何由而正。而吏治狃於因循。尤關治道。朕宵旰憂勤。與諸臣共相敦勉者。豈肯稍存姑息。致啟廢弛之漸。將此一併宣諭。中外知之。○壬午諭盛京引

見筆帖式人員。國語甚屬生疎。皆由監視大臣徇情挑取。嗣後考試繙譯筆帖式時。著將盛京各大臣名銜開列請旨。候朕酌派。以專考試之責。如帶領引見時。仍有不嫻國語者。惟派出考試之人是問。○又諭捏造偽稿正犯已經審明。原任糧道施廷翰及伊子貢生施奕度等俱著加恩開復。○諭軍機大臣等。前因捏造偽稿之劉時達。供出自伊子劉守樸。金華任所帶來。當即降旨。令周承勅錢度

前往該處密行查辦。今偽稿正犯已得。所有傳鈔各案。業俱加恩免其查究。前供既審係誣妄。無可辦理。周承勅錢度著即各回本任。將此傳諭伊等知之。○命莊親王允祿履親王允禔和親王弘晷在議政大臣上行走。○癸未諭軍機大臣等。前經降旨。令錢度周承勅前往金華一帶訪查傳稿蹤跡。務得根原。旋審盧魯生劉時達二犯。供出商同捏造情。形確實。是以降旨。令伊二人即回原任。今據伊等奏到。查劉守樸幕賓孔則明等供詞。是劉時達偽稿。或另有來歷。一時混行誣服。亦未可定。事關重大。不可不加意詳慎。著傳諭周承勅錢度即日帶同此案現在人犯。馳驛飛速來京覈訊。毋得刻遲。○又諭前經降旨。傳鈔偽稿案內人犯加恩免究釋放。但劉時達之子劉守樸一犯。尚有應行質訊之處。前據鄂容安奏稱。已令范廷楷前往廣東一路迎拏。范廷楷於何處接到該犯。及途中訊出

供情。著即由驛遞飛速奏聞。仍將劉守樸遴委委員。由驛飛解來京。務宜加意防範。又諭據莊有恭奏李坤等傳鈔偽稿一案。究至汪成悅心傳。現在悉心研鞫等語。此案前因正犯未得。是以傳諭該撫令將李坤等嚴行根究。提解來京審訊。今盧魯生劉時達已將商同捏造情由。逐一供出。所有傳鈔各犯業經明頒諭旨。從寬免究。此案傳稿年月。在十六年春間。竟可就案完結。不必查究矣。其知縣韓墉曾見偽稿。不行舉報。自有應得之罪。應照例題叅交部。遵照前旨。俟通案完結之後。另行覈定。至王玉琳一犯。是否實係已回原籍。該犯係盧魯生等案內之人。仍令留心蹤跡。務獲解京。一併傳諭莊有恭知之。又諭準噶爾無遣使入覲之信。或以所請不遂之故。妄生窺伺。亦未可定。安西提督王進泰係屬新任。恐未必深悉情形。永常在彼更事已久。著傳諭永常。倘至四五月。尚無夷使來

信。即著伊馳赴安西。與王進泰協同商議防範事宜。俟旨到日。即可酌量起程。現今尹繼善前往署理陝甘印務。朕已另有指授。一併傳諭永常知之。○甲申

上奉

皇太后居暢春園。○諭閩浙總督喀爾吉善奏平和縣逆匪蔡榮祖等謀為不軌一案。據稱漳州鎮標中營遊擊李如筠一聞逆匪蹤跡。即親身前往搜獲。助逆要犯殊屬奮勇可嘉。著該部行文調取來京引見。酌量陞用。以示獎勵。○又諭將軍七十五奏稱涼州莊浪滿兵。照管準噶爾夷人兩次赴藏。所有倒斃駝馬內。除本身額馬。及八年添撥馬匹。業經賠補外。其八年及六年倒斃駝馬。請展限六個月。令其賠補等語。兵丁騎用駝馬。並不加意照料。以致倒斃如許之多。本應按數賠補。但赴藏路途遙遠。又值冬春雨雪。該兵丁等業已賠補兩起。若將八年六年倒斃之數。令其

一時全賠。究恐兵力不逮。著加恩將未賠補駝馬。全行免其賠補。此後兵丁遇有差役。務將官駝官馬。加意餵養。若不留心。仍致倒斃。必令如數賠補。斷不寬免。○諭軍機大臣等。據蘇昌奏稱。增城縣匪徒王亮臣等。糾衆結盟。欲圖搶掠村莊。現獲史恒玉。黃見剛。陳亞福。田開裕等一百餘人。並起出白布偽照。及刀械旗槍等物。因督臣駐劄距增稍遠。臣隨親帶兵弁抵增。督率搜捕。嚴行究治。不敢稍有寬縱等語。此案前據阿里衮奏報。有據撫臣札覆。不過無賴棍徒。詐騙鄉愚之語。當經傳諭該督撫。令將實在情形。速行奏聞。今蘇昌此摺。又與札覆督臣之詞。迥然不同。且阿里衮摺內。已於二十六日進山搜捕。而蘇昌又稱二十三日到增。至二十六日拜發摺奏時。尚稱督臣亦有來增之信。伊二人究係何人先到。甚不明晰。督撫同為封疆大吏。遇有地方要務。必宜聲息相通。方能迅合機宜。看

來蘇昌於辦理之初。顯有大事化小。小事化無之意。後見其事難於銷歇。始行親身前往耳。所奏殊屬取巧。但此案究竟是何情形。其首犯曾否就擒。餘黨曾否就獲。著傳諭阿里衮。蘇昌會同妥辦。據實奏聞。仍遵前旨用法。宜嚴完結。宜速庶濱海愚頑。知所儆戒。其阿里衮。蘇昌先後到增日期。并令聯銜覆奏。均毋迴護。可一併傳諭知之。○乙酉

上詣暢春園問

聖駕回京

三

皇太后安。○還宮。○鑄給九姓司儒學鈴記。從前任四川總督策楞請也。○鑄給廣寧縣白旗堡巡檢印信。從奉天府府尹鄂寶請也。○豁免山東章邱。齊東。濟陽。禹城。臨邑。長清。陵縣。德平。平原。德州。衛肥城。平陰。惠民。青城。陽信。海豐。樂陵。商河。濱州。利津。霑化。蒲臺。滕縣。魚臺。蘭山。茌平。莘縣。夏津。博興。高苑。樂安等三十一州縣。衛無。力貧民。挨年帶徵。及民借常監等穀。一十四萬五千六百五十三石有

奇。銀一萬一千八百八十四兩零。及未完商社等穀。二萬六千五百一十五石有奇。是日起。

上以祭

社稷壇齋戒三日。丙戌諭在京王公大臣官員俸米。於去歲清查通倉時。加恩豫放三季。因倉中出米豐裕。民食愈以從容。目下米價雖未昂貴。但思支放俸米之期。需至來歲春季。為日尚遠。朕體恤旗民。通行籌酌。再加恩。

平糶人百二十二

王公滿漢大臣官員。將明年春季俸米。豫給一半。於本年三月初一日起。陸續支放。明年秋季俸米。豫給一半。於本年八月初一日起。陸續支放。其出放倉廩。及時修整。待貯新漕。則倉儲徹底清釐。而米價因此平減。於旗民日用。亦甚有裨益。其現今開放。與將來收貯。廩座次第。及董率稽查事宜。仍著原派之尚書舒赫德等會同倉場總督。妥協辦理。是月。直隸總督方觀承奏報直屬得雪霑渥。得

旨。京師亦霑足矣。真新春第一喜事也。漕運總督瑚寶。河南巡撫蔣炳奏。漕船定例。令糧道親押。但空船回次。與重運有間。且豫省驛鹽糧三事。統歸一道。再令押空。為時太久。請另委通判一員。赴通管押歸塢。俾糧道得以遄歸。料理諸務。得旨。著照所請行。閩浙總督喀爾吉善奏。訊據續獲平和匪黨李振榮。供出已經入夥之李改。吳天鳳。俱係漳州府汛三營兵。失察將備。均應叅革。惟各營現在分撥弁兵。查拏餘匪。防範地方。非暫時代庖之員。所能料理。兵丁尚在訊究。將備驟行全撤。恐致惶惑。且各將備自知罪愆。猶冀奮勉自効。請暫寬叅處。俟通案定擬後。分別題叅。得旨。所見甚是。足慰朕懷。○福建巡撫陳宏謀奏。閩省入春。陰雨過多。鹽場不敷民食。現在督率鹽道。加給竈戶薪水。趕煎一面。札商浙省。借撥餘鹽。至省會米價難定。不可不豫為平糶之備。省城府廳縣各倉。恐有不敷。

平糶人百二十二

六三七

已令延平建寧二府倉各撥穀二萬石碾米一萬石陸續運省俟米價果昂即開倉平糶其價銀歸還脚費等項外餘發交該二府買補還倉得旨覽奏俱悉福建提督譚行義奏南靖縣盤獲匪船一案據漳鎮總兵馬龍圖報稱漳州府已將獲犯蔡明烈訊供據稱有國師馮珩大頭目蔡卓然欲乘機搶劫現在馮珩蔡卓然俱經拏獲其有供出匪犯仍飭分頭協緝得旨知道了汝為閩省武弁之首似此地方不靖之事總督即行親往而汝安然不舉豈勤勞匪懈之義乎○兩廣總督阿里衮奏據東莞各屬稟報拏獲匪犯一百七十餘名惟王亮臣湛佐一梁德徐嘉偉在逃未獲臣仍帶領官兵搜查華峯藍汾等山尚無屯聚巢穴現在嚴飭地方設法堵緝得旨覽奏俱悉未獲要犯上緊緝拏班第到時將情形告彼知之○廣東巡撫蘇昌奏粵省馬步戰兵均由考補惟守兵向以餘丁選用

但係故兵子弟親族多有年輕力弱之人現在詳加考驗不敢拘泥舊習概予濫充如無可補即另行召募得旨此言正不可信不謂汝乃用巧負恩也

大清高宗法天隆運至誠先覺體元立極敷文奮武孝慈神聖純皇帝實錄卷之四百三十一

面奏聞一面即行辨理勢難挽回深為慮念

廷桂現署川督該省情形素所熟悉到任之

日即令策楞將此案前後所奉諭旨轉交閱看并將從前辦理情節詳悉告知黃廷桂再加確查具奏至郭羅克原係徼外遠番如尚知畏法不致恣橫儘可置之不問倘怙終不悛罪惡昭著有必不可已之勢黃廷桂詳察情形妥酌奏聞辦理將此一併傳諭知之○戊子祭

大社

大稷

上親詣行禮○陝甘總督黃廷桂奏延安營兵丁聚衆塞署叅將高時農守備趙廷輔均屬怯懦無能總兵馬乾既經親赴延城即當加意彈壓嚴行辦理乃一宿遽返並未將起事根由及首從兵丁確切傳訊回署後遽將該將備印信摘取委員署理其種種輕率不諳之咎業經申飭教導得旨高時農等已有旨了即馬乾亦屬不妥有旨交部嚴察議奏又批豈惟不諳竟是怯懦而又不肯不去恐朕

罪彼今觀所奏則是取巧畏懦不堪之人矣已丑

上御乾清門聽政○詣暢春園問

皇太后安○幸圓明園○諭曰已故教漢貝勒羅卜藏原係二等台吉因在軍前奮勉出力以次加封至貝勒雖非世襲之職但念其効力行走有年著加恩將伊長子垂濟扎勒承襲貝子再伊第三子桑濟扎勒為羅卜藏素所鍾愛並著加恩以桑濟扎勒為輔國公○

又諭前據延綏鎮總兵馬乾奏延安兵丁因扣餉製裝起釁壘砌守備衙門該備趙廷輔於彼時閉門自守叅將高時農向衆兵跪求息事已傳諭黃廷桂令其查叅交部治罪今據黃廷桂奏該鎮馬乾親赴延城僅住一宿遽回本任並未將起事根由及所拏不法兵丁傳訊分別首從詳請整治等語馬乾身總戎行兵丁滋事不法自宜率先彈壓嚴拏詳究乃觀黃廷桂所奏該鎮毫無膽畧其前後

奏到情節。蓋欲以避不職之罪。不得已始赴該地叅劾屬員。藉道重譴。似此畏懦取巧。實屬有玷職守。著交部嚴察議奏。尋議革職從之。○以翰林院修撰吳鴻充日講起居注官。○以詹事府詹事徐以烜為內閣學士兼禮部侍郎。調山西大同鎮總兵張乃義為陝西延綏鎮總兵。以四川督標副將額僧格為大同鎮總兵。江南河標副將黃正元為浙江處州鎮總兵。庚寅。諭嗣後護軍統領內除出差及隨圍人員尚有四五人。即毋庸另請派署。惟僅餘二人再行具奏請旨。○刑部議覆山西按察使唐綏祖奏復軍流僉妻之例。除緣坐應流及強竊盜免死減等並罪應軍流者。定例原屬僉遣外。如犯姦誘拐畧賣採生折割用藥迷人放火發塚興販硝磺假造印信造賣賭具鹽梟礦徒私鑄私銷案犯。以及兇惡棍徒擾害良民罪擬軍流者。均屬無賴奸棍。情罪既屬可惡。事犯後形蹤巨測。易

致疎脫。應如所請。僉妻發遣。不得任其託故規避。到配之日。俾其顧戀室家。不致隻身遠颺。此外如非本夫願帶妻妾願隨者。應仍照乾隆八年定例免僉從之。○辛卯。上詣暢春園問

皇太后安。諭軍機大臣等。據錢度周承勅奏稱訪辦劉守樸家人李九齡并書吏陳文泰一案。審係陳文泰誣扳。又供出門子薛志貴曾於劉典史署內傳稿。至何年何日實記不清等語。看其供詞游移。彼此推諉。年月又屬恍惚。按之全無實據。著錢度周承勅仍遵前旨。押犯來京可也。又諭前因江西省審據劉時達供係伊子劉守樸自金華封寄偽稿。署督鄂容安檄委范廷楷前往粵東一路迎訊。劉守樸朕降旨並令周承勅錢度赴浙江查辦。今據鄂容安奏粵省護解劉守樸由小路抵贛與范廷楷不值已委按察使阿桂迎往密訊一面就供查辦等語。此案軍機大臣

等審明盧魯生劉時達商同捏造偽稿情形並將該犯等發覺後豫商指供劉守樸為脫卸出路情節一一究出朕明降諭旨復令王大臣九卿科道等公同研鞫再四該犯等供認確鑿矢口不移正當定案之日值周承勅錢度覆奏查訊劉守樸幕友供詞又有代伊將稿封寄伊父一語是以暫緩結正降旨仍令范廷楷訊取劉守樸確供速奏此乃朕務加詳慎不使案犯情節稍有絲毫遺漏之意今阿桂既已前往迎訊鄂容安承辦此事當仰體朕意務在得其實情蓋此案在周承勅等審係伊家人王玉琳得自蘇州並援伊妻舅吳姓為證而莊有恭提訊吳剛則又供稱於乾隆十五年三月內在廣州許妙觀家得來帶至金華給與劉守樸其在蘇州時與王玉琳並未謀面等語彼此供情已多參錯在劉時達初供伊子封寄旋即自認謊供其商同捏造情節已明但從前既有伊子封寄一

語自不得不再加窮究倘其全屬子虛妄行扳扯縱令輾轉究追自必不能更有來歷一經覈訊終歸誕妄若封寄屬實但使確有來由何妨逐層遞究况劉守樸訊供之後飛解來京其虛實情偽豈能稍有遁情該署督不可憑信前供遽以劉守樸封寄為實而強求來歷亦不必豫料其出於狡卸有心附會總之悉秉虛公慎勿少存成見一有確供即具摺由驛先行奏聞吏部議覆山西按察使唐綏祖奏稱晉省民風好尚賭博應嚴定地方官失察之例除於咨題案內牽連賭博地方官應查叅者仍逐案咨題隨招附叅外其僅止賭博或鬪毆自盡命案牽連賭博例應外結者州縣通報臬司即詳記檔案俟審明後察其是否自行拏獲抑係別經發覺統於季終摘敘案由將失察之員彙齊咨叅照例議處隱匿不報照應申上而不申上私罪律罰俸九箇月至從前僅予記過完結事件原

係舊習相沿今案已久結官已數更懇從寬
免其深求均應如所請從之○兵部議准直
隸泰寧鎮總兵那親奏稱泰寧鎮所轄馬水
沿河插箭礮山等四營乾隆二年經直督李
衛改令鎮臣隔年巡查一次現在各營官兵
技藝不免生疎自應仍照紫易涑房水東之
例每年巡查一次從之○又議覆那親奏稱
鎮標兩營額設經制千把外委又續添分防
千把共二十六員不敷差遣前任總兵馬世
岱未奏添設竟於兩營兵目中私拔額外外
委八員給八品頂帶理合參奏概行裁革仍
請援照馬蘭鎮之例添設額外外委十員給
八品頂帶仍食伊等原糧協同當差應如所
請其前任總兵官馬世岱私設外委擅給頂
帶查照應奏不奏之例議處從之以刑部
右侍郎書山為八旗繙譯鄉試正考官太僕
寺卿赫慶為副考官理藩院左侍郎王保為
蒙古繙譯鄉試正考官 壬辰

上自圓明園啟鑒謁

泰陵諭軍機大臣等前經降旨令鄂容安署
理兩江總督所有印務即著在江西辦理但
江南省地方遼濶案件殷繁一切恐難遙制
從前原令鄂容安在西省查辦偽稿一案今
首犯已經究出該署督自不必專駐江西著
傳諭鄂容安令其自行酌量往來兩省分期
駐劄俾公務均有裨益○又諭蘇昌摺奏增
城等縣逆匪王亮臣等謀為不軌一案據稱
匪黨多人頭目黃上言等俱經就擒惟首逆
王亮臣竄匿未獲現在嚴拏其現獲各犯率
同司道等先行上緊審究等語前據阿里衮
具奏於正月初七日迴至增城即日赴省會
同撫臣查審而蘇昌此奏則係初六日拜發
之摺並未俟阿里衮到省已先行審訊奏聞
合之該督撫前奏先後到增城情節似未免
彼此各懷意見督撫同事封疆有此形迹殊
非和衷共濟之道現在阿里衮已至省城該

督撫等遵照前旨。會同妥辦。如班第到粵。尚有接辦之處。務宜和衷商酌。妥協查辦。方於地方有益。至此案首犯。必須上緊緝拏。尅期就獲。外省陋習。一入通緝。即屬虛應故事。如羅田之馬朝柱。至今遠竄無蹤。斷不可復蹈其轍。其現獲各犯。宜嚴行確訊。窮究黨羽。一切從嚴辦理。以儆刁風。不得稍涉姑息。將此一併傳諭知之。○又諭永常等具奏。覆訊粵省所解逆黨吳晟相。楊興樓二犯。一摺。據稱該犯等實係苗人。其僧人福慧俗名羅晟相。於乾隆十四年間披剃。上年七月內。楊興樓往廣西買鹽被拏。實不知有天堂寨情事。詰其在粵何以供認。據供初因疊夾。又被用燒紅鐵鍊放之地下。使之赤膝。令人扯耳跪於其上。受刑不起。即照詰混供。逐一質訊。提到之鄰族人等。咸各極力代辯等語。該二犯經粵省兩次質審。謂其實係逆黨。毫無疑義。今觀永常等所奏。則粵省所辦。全屬子虛。定長

前奏稱並未刑求。供吐鑿鑿者。看來不過一任屬員錄供詳報。即據以定案。此等要件。豈可稍涉疑似。且堅執意見。始終迴護耶。著傳諭定長令其將從前審訊情形。是否並未刑求。抑實有嚴刑取供之處。一一據實覆奏。○免鳳陽中衛幫丁無力完繳銀二百八十三兩有奇。○是日駐蹕黃新莊行宮。○癸巳駐蹕半壁店行宮。○甲午遣官祭先醫之神。○諭河南陽武封邱延津武陟等縣近年被水偏災。屢經降旨加恩賑卹。並將乾隆十六十七兩年應徵錢糧分別緩帶。今屆開徵之期。自應照例完納。但念該地積歉之餘。元氣未能驟復。若一時新舊並徵。閭閻未免拮据。並加恩將陽武封邱延津武陟四縣十七年分緩徵錢糧。分年帶徵。其歷年所有借欠常平倉穀。均分作兩年徵收。以紓民力。該部即遵諭行。○又諭曰。富勒赫著以布政使銜前往江南。隨大學士高斌學習河務。

○是日駐蹕秋瀾村行宮○乙未。豁免福建
閩縣侯官長樂連江羅源晉江惠安順昌等
八縣無著漁課銀六百九十一兩有奇。是
日駐蹕梁格莊行宮○丙申。

上謁

泰陵。未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員
隨行禮○

皇后千秋令節奉

皇太后懿旨。停止行禮○諭軍機大臣等。傳鈔
偽稿一案。所有劉守樸得稿吳姓之處。已據
江省將吳剛一犯解京。經王大臣等會同研
鞠。訊明並無給稿劉守樸情事。現俟劉守樸
到時。再行詳訊。即可定案。至雅爾哈善所奏
訪查已故之聞人裕。傳看偽稿。輾轉得自降
調知縣王清箱家人王忠等語。聞斯盛等犯
所供年月。俱屬游移影響。看來不過彼此傳

鈔傳看之人。已據該撫移咨山東將王清箱
及伊家人王忠鄭陞查拏解京。應俟到京後
審明確供完結。其休致教諭龔春生及監生
汪國宰等。既係生監職官。自應查明照例咨
革。其餘各犯。即遵照前旨。概行從寬省釋。不
必再加根究矣。一併傳諭雅爾哈善知之。
又諭據浙江巡撫雅爾哈善奏。訪查金華府
已故書吏聞人裕。傳看偽稿。輾轉得自降調
知縣王清箱家人王忠。已飛咨山東撫臣將
王清箱及伊家人王忠鄭陞查拏解京等語。
前經降旨。將各省傳鈔人犯。概行從寬省釋。
免究。但王清箱等犯。尚有應行質訊之處。著
傳諭楊應琚。令其仍行遴委員弁。即速由驛
遞隔別押解來京。不得延緩。又諭曰。喀爾
吉善奏。到平和縣逆匪蔡榮祖謀為不軌。案
內究出兵丁李改吳天鳳等。聽從入夥。現在
切實追究。逐名拏獲。質訊營兵將備。非尋常
失察可比。應立時嚴叅。但漳郡現在情形。若

驟行全徹恐兵心即致惶惑無措懇暫寬察處俟鎮臣馬大用回任督率有人詳悉分別題叅等語設兵正以緝拏奸匪乃至身為逆黨其罪自浮於齊民但若輾轉根究恐愈究愈多其中倘有誣扳株累情弊則兵情惶懼人懷不安非綏靖地方之道此旨到日其已供出者自當緝拏其餘竟不必再行追究以致蔓延多人其餘究出從逆各兵雖係為從必當即行斬決以儆戎行不可稍為姑息再拏獲匪徒既有二百餘名此時已覺為時稍久若再遲時日恐致意外別生事端殊為可慮所有供證明確之犯應處以極刑及決不待時者此旨到日即可一面即行正法一面奏聞餘犯照例題達不妨先後完結總以迅速辦理為要至將備管轄營伍不能先事覺察咎無可辭但此等匪犯詭秘多端斷不肯於本管官耳目所及稍露形迹該將弁罪止失察尚不至干罹重譴此時暫緩叅處該督

所見甚為合宜即其聞風盤獲飛速撲捕奮勇出力之處功罪各不相掩該督題結此案時亦應據實敘入方為公當并將此旨曉諭各將弁等以安其心一併傳諭知之吏部議覆山東按察使阿爾泰奏稱東省民俗强悍兇徒挾仇往往放火延燒險惡與強盜相等應嚴定承緝處分之例凡兇徒放火延燒地方官立即撲拏如有顯跡證驗或致脫逃無論曾否致死人命俱以報官之日起照盜案例題叅議處勒限緝拏或並無顯驗失火之家妄扳混控希圖挾制官府者照例治罪該地方官希免處分諱匿不報照諱盜例革職既經獲犯不按律究擬自行從輕完結者照故出人罪律革職上司通同徇隱不揭報者照徇情例降一級調用其尚未延燒即被救熄及故燒人房屋田場積聚之物本犯罪止軍流如脫逃未獲扣限六箇月查叅照不實力察訪逃竊例罰俸一年應如所請從之

○是日駐蹕秋瀾村行宮。○丁酉。

孝康章皇后忌辰遣官祭

孝陵○是日駐蹕半壁店行宮。○戊戌諭軍機大臣等鄂容安奏詳訊劉守樸一摺據稱該犯供於十五年七月間在金華縣丞任麟書處得稿差家人王玉琳於家信中寄與伊父等語王玉琳寄信之前劉時達在江西及來京初供曾有此語何以劉守樸現在所供恰與暗合若非該犯等先期串供豫為彌縫掩飾之地則或實有寄稿情事抑或別有來歷此等處不可不詳悉詰訊不可因劉時達已經供認少有遷就模糊可將此傳諭大學士來保等將劉時達再行研質務得確情其劉守樸一犯現在患病已令軍機司員前往途次密飭防護到京矣○又諭曰舒赫德奏盧魯生現在病勢沉重請速正典刑一摺早間鄂容安奏到劉守樸供情曾傳諭大學士來保等再將劉時達詳加詰訊想亦不過一

二日之事如盧魯生尚在可待俟覆奏

到日再行降旨如或病勢迫不及待則

該犯本屬必當明正典刑之人即著在

京軍機大臣會同議政王大臣大學士

九卿等一面將盧魯生押赴市曹凌遲

處死一面進本題達其劉時達或應俟

劉守樸到京後再行酌量辦理但據鄂

容安奏稱該犯現亦病重其能到京與

否亦尚未可知已令軍機司員前往途

次密飭防護矣一併傳諭知之○以故五經

博士關顯宗弟緒宗襲職○是日駐蹕周口

店大營○已亥

上詣金陵行禮○先是丁酉日

皇太后自暢春園啟鑾是日

皇太后駐涿州行宮○

上詣

皇太后行宮問安○補行直隸寶坻等處駐防

官乾隆十七年分軍政卓異官一員年老有

功績官二員年老官一員分別陞賞處分如
例○雲南永順鎮總兵劉應蓮緣事革職以
湖廣督標中軍副將哈峻德為永順鎮總兵
○是日駐蹕涿州行宮 庚子

上詣

皇太后行宮問安 是日駐蹕紫泉行宮 辛

丑

上詣

皇太后行宮問安 諭休致翰林院檢討王太

實錄卷四百三十三

四

岳著加恩照舊供職 是日駐蹕趙北口行

宮

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十二

實錄卷四百三十二

三

大清高宗法天隆運至誠先覺體元立極敷文奮武孝慈神聖純皇帝實錄卷之四百三十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十八年癸酉二月壬寅春分朝

實錄卷四百三十三

日於東郊遣誠親王允祕行禮○

上奉

皇太后御舟至蓮花淀閱水圍詰

皇太后行幄問安○諭此次朕恭謁

泰陵巡視河隄並奉

皇太后閱視水圍所有經過地方著加恩蠲免

本年應徵地丁錢糧十分之三總督方觀承

查明照例辦理該部即遵諭行○諭軍機大

臣等據蘇昌覆奏增城逆匪王亮臣等謀為

不軌該督撫等先後辦理情由一摺詞語仍

復含糊看來此案發覺之始蘇昌據該營協

稟報殊不以為意及第二次據該縣稟到知

事不可掩方行親往增城查辦而阿里衮一

聞稟報即赴該處搜山拏犯阿里衮辦理頗

為合宜蘇昌則不免沿外官積習朕早洞鑒

及此今蘇昌覆奏乃以慎密為辭又謂分頭

佈置則更屬回護取巧矣且傳諭詢問阿里

衮蘇昌二人理應聯銜覆奏乃聽蘇昌獨自

實錄卷四百三十三

具摺而阿里衮摺中僅報獲犯辦理大概而

蘇昌不欲查辦初意一字不及阿里衮身為

總督如撫臣果有此等情節何難明白指出

而乃又存意見並不據實陳奏益屬非是朕

用人行政一秉至公於諸臣是非所在不容

稍有朦混該督等豈竟未之知耶阿里衮蘇

昌俱著傳旨申飭至此案逆首現在遠颺該

督撫遵照前旨上緊嚴拏期於必獲其東莞

令周紱將王亮臣曾經拘喚到案乃聽信狡

供率行取保以致免脫該令昏庸不職之罪實無可逭但既據該督等奏明勒限一月緝拏計此摺回粵已屆滿限如果將王亮臣擒獲再行奏聞請旨如尚未就獲該督撫等一面另行嚴緝一面即將周紱嚴行題叅一併傳諭班第知之 兵部議覆漕運總督瑚寶疏稱江淮衛六幫興武衛頭幫九幫鎮海衛後幫均改簡缺歸部銓選至浙省之台州衛前後二幫金衢頭幫丁窮幫因實屬疲難改為繁缺應如所請從之 是日駐蹕郭里口行宮 癸卯

上奉

皇太后御舟至和樂淀閱水圍詣

皇太后行幄問安○諭前經降旨令各省督撫將同知直隸州知州能勝知府之任者秉公保薦奏聞引見據該督撫前後奏到摺內往往有保舉一人塞責者此特慮將來罹濫舉之咎自為地耳如薦賢為國之義何或因前

旨有在任三年一語難得合例人員今不妨稍寬其途從前

皇考時遇才猷傑出之員竟有由知縣逾格陞用知府者其令各督撫再通行保舉一次如同知直隸州內果有可勝知府者不妨不拘年限設又不得人即於所屬知州知縣內擇其才猷出衆能勝知府之任者據實秉公保舉送部引見以廣儲用 又諭前經降旨各省督撫將傳鈔偽稿人犯毋論已未發覺俱

實錄卷四三三

日

加恩免究釋放雖未嘗區別官民言之但傳鈔一事在愚民無知固有應得之罪而首犯既伏厥辜尚不妨曲為寬宥若職官既列薦紳見此大逆不道之詞當無不變指痛恨且其真偽原屬了然豈有遁仕籍閱鈔報而不如此為偽者是其罪實不得與愚蒙無識者等正不可因有此旨概置勿問也今據江蘇巡撫莊有恭奏山陽縣知縣韓墉湖南巡撫范時綬奏提塘武進士蕭引鵬均於得稿之

後不據實首稟轉傳閱各請革職治罪是
各督撫原知職官之不與平民等也韓墉蕭
引鵬俱著革職照該撫等所擬治罪並再傳
諭各省督撫自奉前旨以後傳鈔各犯除平
民免究外其已經究出到案之文員交吏部
武員交兵部仍行照例定擬彙齊歸結不必
逐案具題至於未經發覺者俱從寬免究用
昭肆青包荒至意諭軍機大臣等鄂樂舜
覆奏保舉能勝知府之同知知州一摺甚屬
非是薦賢本以儲用甘省所屬丞牧何至無
一可登薦牘者即云抵任未久尚有未經親
見之員而該省藩臬大僚於屬吏賢否平時
豈無見聞此係明頒諭旨並非甚密之事何
難向該司等悉心咨訪商酌務得其人以入
告耶看來鄂樂舜不過心存推諉欲避將來
濫舉之咎聊為此奏以塞責耳殊非為國得
人實心任事之道著傳旨申飭是日駐蹕
端村行宮 甲辰

軍機處四十二

三

上詣
皇太后行宮問安遣官祭黑龍潭
昭靈帝澤龍王之神王泉山
惠濟慈佑龍王之神和碩莊親王允祿等
奏報京師得雪得雨情形得旨此間微雪而
繼之以雨正慮雪大則傷麥若雨則實佳耳
○是日駐蹕圓頭行宮 乙巳
上奉
皇太后御舟至池魚淀閱水圍詣
皇太后行宮問安○遣官祭
關帝廟直隸總督方觀承奏經理各倉告
成現捐貯穀二十八萬餘石將各州縣村莊
里數繪圖鑲板呈覽得旨知道了圖留覽
是日駐蹕趙北口行宮 丙午
上詣
皇太后行宮問安恭送
皇太后改鑾回暢春園○遣官祭昭忠祠兵
部議覆原任四川總督策楞疏稱重慶府屬

軍機處四十二

三

之金佛山與黔省正安婺州接壤離城寫遠應於西面三岔溝設外委一員帶兵二十名再於南面淨石寺之西北獅子口兩處安設塘鋪每鋪駐兵五名於重慶鎮中左右三營各撥兵十名陳家場地方亦於重慶鎮中營撥兵三名合舊額五名仍歸南川汎管轄並每月會同南川縣典史帶領兵役巡查應如所請從之○蠲免河南永城鹿邑夏邑商邱柘城等五縣乾隆十六年分被水田賦一萬七千六百四兩有奇並緩徵本年額賦有差○鑄給沔陽州管理水利州同關防從湖北巡撫恒文請也○是日駐蹕霸州行宮丁未諭軍機大臣等據禮部具奏暹羅國進貢使臣現在已經到京但西洋貢使計由粵起程亦將次可到兩處使臣同時在京一切料理賞賚事宜或稍有參差轉屬未便著傳諭大學士來保會同該部俟朕於二十四日至南紅門時帶領該使臣在彼接駕令即於路

旁瞻仰其一應加恩賞賚之處一面即行酌量辦理俾得迅速起程回國可即傳諭來保知之○命戶部侍郎兆惠赴藏辦事以內閣學士夢麟署戶部侍郎○是日駐蹕馬家鋪行宮翌日如之○戊申

上御舟閱視永定河工○定三品京堂京察例諭前經降旨部院堂官稱職與否久悉朕懷自可隨時黜陟京察之年停其自陳四五品京堂特派王大臣秉公分別去留奏聞引見至三品堂官則非尚書侍郎比也今既不令自陳轉得以散地容其濫竽可乎其令吏部於京察時將伊等事實另繕清摺進呈候朕親為裁奪○諭軍機大臣等近年準噶爾台吉喇嘛達爾扎奏懇延請喇嘛及往藏熬茶等事朕俱未允行今一年以來未有遣使入覲之信或陰懷不軌潛圖入藏亦未可知所當密為防備今遣兆惠前往協同多爾濟舒泰辦事可傳諭多爾濟等俾其乘便曉示達

賴喇嘛一切機宜務宜豫為留意○已酉上閱視新夏口隄工○諭緣河隄埝內為河身要地本不應令民居住向因地方官不能查禁即有無知愚民狃於目前便利聚廬播種因卹日久漂溺之患曩歲朕閱視永定河工目擊情形因飭有司出示曉諭並官給遷移價值閱今數年於茲而朕此次巡視見居民村莊仍多有占住河身者或因其中積成高阜處所可禦暴漲小民安土重遷不願遠徙而將來或致日漸增益於經流有礙不可不嚴立限制著該督方觀承將現在隄內村民人等已經遷移戶口若干房屋若干其不願遷移之戶口房屋若干確查實數詳悉奏聞於南北兩岸刊立石碑並嚴行通飭如此後村莊煙戶較現在奏明勒碑之數稍有加增即屬該地方官不能實力奉行一經查明定行嚴加治罪○軍機大臣等奏酌裁辦差成例向例

聖駕巡幸地方安設臺站兵部派撥各衙門筆帖式領催前往馳送本報此項廩給口糧俱地方官支應恐有借端需索及家人滋事等情地方官以由京派往人員或致掣肘應令該部嚴行訓飭又每次內閣理藩院衙門隨從人等向有支給驛馬之處究於驛務有礙應請停止兵部向有隨營馬三十匹該部馱載帳房等項於此內撥用嗣後應令自行雇備但酌留馬二十匹備緊急差務至欽天監派出之博士天文生等除酌給八旗官馬及順天府雇備長車外均不得向驛站支給又鑾儀衛校尉署史等人數衆多賢愚不等需用車馬每站分班更換但據兵部派委之役帶票前往支給恐有需擾查該部每次俱有隨營官員應於此內揀派一員先期持票往支按名分撥得旨嗣後凡應行安臺處所該督撫照例安設報明該部所有馳送事件即於本省武弁內酌量派用並令於數站之內

遴委地方官一員往來稽查十日彙報行在兵部一次以憑查覈其由京派撥筆帖式領催之處永行停止餘依議○予故內大臣額駙班第祭葬如例○予故黑龍江將軍傅爾丹祭葬如例謚溫愍○是日駐蹕韓村行宮○庚戌

上幸南苑行圍○諭軍機大臣等永常奏請鈔寄兩年內準噶爾夷使到京辦理原委一摺前經降旨傳諭永常以四五月間尚無夷使來信令其候旨起程前赴安西密行豫備如果臨時有必應前往豫備之處自當另降諭旨先令該督來京候朕訓諭一切機宜再行前往其近年辦理夷使事件統俟該督到京後令軍機大臣等詳悉錄交帶往此時且不必鈔寄可傳諭永常知之○兵部議覆河南巡撫蔣炳疏稱光州屬商城縣幅員遼濶牛食畝為適中要區原設外委一員官兵十五名勢屬單弱請將襄城營守備改為汝寧營

左軍守備移駐商城於南陽鎮抽撥兵丁一百二十名內分派八十名同原設外委兵丁及光州屬各汛俱令守備管轄牛食畝等處即令原設外委駐劄巡防至光山縣之新店集地方即將南陽鎮抽撥餘兵四十名併歸德營睢州外委一員改設駐防又歸德河南二府稅課司各一員均宜裁應收稅銀歸併各府經歷兼管其商城縣之牛食畝羅山縣之大勝關各設巡檢一員再於商羅二縣民壯內各抽八名改為弓兵均應如所請從之○是日駐蹕南紅門行宮○辛亥

上行圍 詣

永慕寺行禮○禮部奏稱暹羅國王進貢表文內懇賜人參纓牛良馬象牙並通微規儀內監臣等當即發還並嚴飭該使臣令於歸國後明切曉諭該國王嗣後恪守規制益勵敬恭其所進方物及一切筵宴賞賚請旨遵行得旨知道了所進方物照例收受其筵宴賞

賚著加恩照上次之例行○蠲免江蘇上元江寧句容江浦六合靖江泰州興化贛榆通州等十州縣十七年分水災地丁屯折公費地畝蘆課等項銀三千四十兩有奇本色米豆九百八十一石有奇○旌表守正捐軀之陝西扶風縣民喬中智妻蕭氏○是日駐蹕舊衙門行宮翌日如之 壬子

孝昭仁皇后忌辰遣官祭

景陵

上行圍 諭雲南巡撫愛必達奏請來京陛見著准其所請其巡撫印務著總督碩色暫行兼署 諭軍機大臣等據蘇昌奏究訊現獲增城縣逆匪莫信豐等謀為不軌情節並起獲偽劄偽照一摺前據該撫奏報此案大概情形朕以其不俟阿里衮至省即先行審訊奏聞當經傳諭訓飭今據稱督提二臣已於初十四等日旋至省城而此摺又不行會同阿里衮具奏所見益屬卑鄙錯謬總之此

案發覺之初蘇昌未免有不欲查辦之意而阿里衮聞信即行親往蘇昌則竟因此心存成見觀其屢次獨奏與阿里衮跡涉齟齬益屬顯然督撫同事一方諸務當和衷商辦若一味固執意見全不以地方為念不特於公事無裨亦大負委任朕前後所降諭旨甚為明切伊尚不知仰體朕意漸除舊習將不能承受恩澤矣著傳旨申飭至逆首王亮臣現在未獲並令該撫上緊嚴密查拏務期弋獲若僅付之通緝了事又蹈羅田舊轍必於該撫是問一併傳諭知之○刑部議覆廣東巡撫蘇昌奏稱曲江縣民陳茂菑戮傷小功服叔陳丙林身死按律擬斬立決應如所擬其聲叙救母情切之處臣部仍照例題請得旨陳茂菑著即處斬此案陳丙林與陳氏互毆已受多傷該犯勢非危急託言救護輒將服叔棍戮致斃前經降旨以父毆叔而子助父斃叔不得謂之救父此正母毆叔而子助

母以斃叔。不得謂之救母者也。蘇昌聽屬員姑息。率請聲叙。長不睦之風。非止辟之意。著交部察議具奏。餘依議。○癸丑。

上行圍。遣官祭。

歷代帝王廟。○諭上年朕雖經降旨將軍政武職大臣自陳請罷之例停止。但該部仍應具奏請旨。著交兵部。遇軍政之年。八旗都統內兼管之諸王尚書外。其餘都統前鋒統領護軍統領副都統等職名事實。著繕摺具奏。

請旨。○又諭傳鈔偽稿一案。前因劉時達在江西供係伊子劉守樸從金華縣典史任所封寄。隨經降旨。令周承勅錢度前往該處密察確訪。嗣經王大臣等審明偽稿即係盧魯生與劉時達同謀捏造。奏請按律定擬。其日適據周承勅等奏稱。究出劉守樸寄送偽稿家信。係伊幕友孔則明代寫。其稿係伊妻舅吳姓自蘇州帶來等語。朕以此案雖經王大

臣等會同再三研鞫。毫無疑竇。但讞獄之道。

不厭詳慎。孔則明既供有封寄偽稿之說。亦當窮其虛實。未便因劉時達已經自認為造稿首逆。即概置之不問。是以諭令周承勅等帶犯來京。覆加質審。此朕明慎用刑之至意。今軍機大臣等審明孔則明代書寄稿家信之處。全屬子虛。實因署金華府知府查延掌將封寄情節。說與孔則明。令其自認。以致該犯初到案時。即畏罪附和。誣認誑供。及周承勅等覆訊。又因該犯所供與該署府詳送親

供相合。即遽信有傳稿實情。今既反覆推求。供情確鑿。是劉時達同謀造稿。及串合掩飾情罪。全行昭著。無可候質。著議政王大臣大學士九卿科道。即行會議。按律定擬。具題完結。周承勅錢度前因於施奕度等一案辦理錯謬。特令隨總督尹繼善來京。於在京王大臣會審時。令其在旁看視。目擊在京諸臣查審情形。朕謂該道等必當痛自改悔。肅除外省審案積習。今於此案復祇據該署府詳送。

親供草率成案甚失朕教誨成全之意而該署府查延掌於此等重案並不實心推鞠一味誘供混詳希圖定案不稱司牧之任周承勅錢度查延掌俱著交部嚴加議處莊有恭身任封疆於一切刑名案件自當虛公研究今於吳剛一犯不無因其籍隸廣東過存避徇之心反有周內之跡封疆大吏豈宜如此亦著交部察議諭軍機大臣等據福建提督譚行義奏平和等縣逆匪案內有兵丁吳天鳳等聽從入夥請從重究擬其在事將弁並臣失察職名現在查送督臣嚴參等語設兵正以緝奸乃至身為逆黨其罪自不得與齊民等至將備管轄營伍平時不能約束稽查即予以重譴亦屬分所應得第此等匪犯詭秘多端斷不肯於本管官耳目所及稍露形迹其失於覺察尚非有心之咎前已傳諭喀爾吉善應俟題叅到日再行交部照例查議可將此傳諭譚行義知之戶部議覆陝

甘總督黃廷桂疏請更定鹽務章程平慶寧三府州縣各於要地設廠抽收土鹽稅課應令司稅各員設立串根流水豫送該道鈐印給發慎選妥役抽收該道仍不時稽察又渭源縣未設鹽引其原設稅額應按鹽徵收完課請將每年稅銀六兩四錢零在販賣鹽內每斗收稅三釐完納額解之數如額外多收指名報叅又狄道州徵收稅銀向係吏目赴熬鹽處所收解除交正課銀十二兩外尚餘錢八九十千不等請抵解按丁加引銀二十六兩六錢零免令里名地丁項下攤徵其餘錢仍留補該員養廉又涼莊道屬素不產鹽所食皆係永昌鎮番二縣土鹽並無商引而每年鎮番縣屬蔡旗野豬灣六堡稅銀九十八兩一錢零永昌縣屬新城各堡稅銀四十三兩一錢零又隸武威縣收解越境徵收未便請嗣後令各該地方官就近按數收解均應如所請從之又議覆黃廷桂奏請停修

城垣急建倉廩甘省連年採買穀石日增各屬舊倉不敷隨地寄放州縣難於照料道府難於盤查添建倉廩實難再緩甘州河州狄道州三處前議急修城垣款內除狄道州城西修築石岸挑挖引河動用銀一萬七千二百四十一兩有奇應行修挖外其三處城垣目前尚可暫停請即以原估工銀七萬四千一百四十餘兩移作建倉之用所少無多撥補亦易應如所請從之 是日駐蹕新衙門

行宮翌日如之 甲寅

上行圍 戶部議覆原任江西巡撫鄂昌條奏辦理截留漕米事宜一此次所截漕米應照乾隆八年例正改兌米與副米搭配共成二十萬石並照江南之例旋經放糶者每石加耗三升一截漕原為通省儲備有漕各縣應留補者存留本縣附郭應撥本府者撥存本府至無漕各縣附近水次與不近水次應撥給者分別查辦一撥運水脚等項查照乾隆

八年例辦理一撥運脚費俱於司庫乾隆十六年各屬買穀贏餘銀內支用一截留撥運九江贛州二府米石應照例會九贛二關一體免徵稅料一撥米補倉請以倉穀算法截留漕糧以漕糧算法積零成總各符二十萬石之數應如所請從之 兵部奏定例江南浙江山東湖廣等省繁衛守備千總缺出由總漕揀選題補第經年累月始行題調要缺久懸而漕督統轄通漕與督撫專轄一省者不同若照文職定限一月為期太迫應酌定三箇月題補遲延照例議處從之 乙卯上詣暢春園問

皇太后安 迴圓明園 遣官祭賢良祠 丙辰諭馬步營器械向例每年查驗一次馬營器械需用之處尚多應照例閱看至步營兵丁專司巡查街道平治道途非馬營可比其查看器械之例著永行停止○又諭刑部定擬草職犯總謝又榮一案殊屬錯謬謝又榮

身為武弁分駐上猶緝匪安良職守攸寄當逆犯何亞四等聚衆不法經該縣會同該弁帶兵前往並不奮勇擒捕又知縣高顯宗促令放鎗尚必勒取憑據始行施放且僅圖駭散逆黨當下並未拏獲一人以致首逆竄匿久而始獲此特大吏辦理尚覺迅速么魔未致猖獗耳不然其為民害可勝言耶似此懦怯債事之員實與臨陣退縮貽誤軍機者無異即以軍法從事亦所應得故特降諭旨拏

交刑部治罪而該部乃曲引知罪人所在在即捕律擬以杖流夫謀叛之人豈得與尋常竊盜賭博諸罪可比為此市恩故縱何足以肅官常而昭軍紀刑部堂官著交部嚴察議奏其原摺擲還令其另行定擬○是月署兩江總督江西巡撫鄂容安奏江省各屬棚民類皆閩粵流移編甲稽查不足以資約束現已嚴飭地方官詳議切實規條再廣信府屬上饒廣豐境內之封禁山界連閩浙周三百

餘里兵役憚於深入民人多有私入禁地居住者恐山中或有藏匪兵役明知故縱現在派員前往詳查實在情形另為酌籌又鄱陽湖波濤險惡歲敗公私船隻奸民乘危撈搶官民視為畏途前議於星子縣屬渚溪王湖壘地方開河避險旋以議費中止今仍委員前往履勘據實籌辦得旨諸凡具見留心但亦不必欲速妥酌為之可也○安徽布政使江寧織造高晉奏龍江西新關稅務惟東壩

芮嘴和州舍山四口距省最遠差役積弊甚多請於所屬州縣佐雜及上江候補人員內調取四員分委要口勤者記功惰者掣換玩法者咨明請叅報聞○署山東巡撫楊應琚奏報東省屢次得雪深厚得旨欣慰覽之但雪澤過多不無釀寒傷麥之虞乎○又奏搜掘蚰子諸務皆已辦有成局得旨此尤第一要務勉之莫為空談○署山西巡撫胡寶瑤奏雁門關西隣寧武東接紫荆逼近臨邊朔

州威遠等處向止安兵十名。外委把總一員。甚覺單弱。每遇公事差遣。汎房幾於虛設。酌擬改設經制把總一員。兵三十名。仍於代州東路營內抽撥。報聞。○陝西固原提督齊大勇奏。准延綏鎮總兵馬乾咨。覆延安營不法兵丁張廣等。現已拏赴督臣衙門審辦。守備趙廷輔。叅將高時農。不能設法消釋。於懇求之始。復畏避。跪央於喧譟之後。均屬庸懦。不職。合併題叅。得旨。汝無一語及馬乾足見庇護。使汝當此事。亦不過如馬乾之畏縮耳。何以勝一省武弁表率耶。○廣東巡撫蘇昌奏。粵東瀕海依山。民多獷悍。逆匪王亮臣等。糾衆不法。雖經翦除。尤當密為防範。查保甲之法。向來奉行故事。遂致陋弊種種。現擬通飭各屬。逐戶親編。畸零戶口。設法歸甲。慎選保正。甲長申嚴連坐之條。定以舉首賞格。至粵東山場險遠。奸徒易於潛匿。如欽州屬之十萬山。新會縣之古兜山。增城龍門之藍汾山。

俱綿亘數百里。應令州縣官按季會同城守武員。親行會哨。申報捏飾。叅處。又礦廠工丁多至數百人。應令將姓名年籍。備造循環清冊。送官倒換稽查。至燒炭種菰種靛等項。雖係異籍民人。搭寮居住。無異土著。亦應編成保甲。設立保正管束。並派就近佐雜閒員。不時赴山巡查。又廣惠潮肇高雷廉瓊八府海疆口岸甚多。拖風漁船。久站洋面。難保無搶劫商旅之弊。應照保甲例。十船編為一甲。連環互保。地方官每月查點一次。站洋者嚴押船主保甲。剋期尋歸究處。徇隱一體連坐。為匪十船並治。以上次第興舉。不任陽奉陰違。亦不敢進銳退速。得旨。二語得要。仍應實力行之。○雲貴總督碩色。雲南巡撫愛必達。奏開化府屬沿邊與交趾接壤。馬白八寨壩灑等汛。又與沙匪所踞之猛康。洪水接壤。據報該國勦除沙匪。恐被攻窘迫。逃竄越境。即交兵遠來。亦恐不諳地界。追入內地。臣已飛飭

開化鎮總兵。派委將弁。督各汛兵練。協力巡防。報聞。

實錄卷四百三十三

三

大清高宗法天隆運至誠先覺體元立極敷文奮武孝慈神聖純皇帝實錄卷之四百三十三

清 實 錄 乾隆十八年三月上

大清高宗法天隆運至誠先覺體元立極敷文奮武孝慈神聖純皇帝實錄卷之四百三十四

嚴修曉藏官經廷議官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經廷議官太子太傅文華殿大學士文淵閣領閣事務稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經廷議官太子少保工部尚書紀錄六次臣曹振鏞等奉

敕修

乾隆十八年癸酉三月丁巳朔清明節

平定人甲子一百

上詣

安佑宮行禮○遣官祭

永陵

福陵

昭陵

昭西陵

孝陵

孝東陵

景陵

六六一

泰陵 遣官祭

孝賢皇后陵

端慧皇太子園寢 諭豫省今歲雨澤應時
來秋可望豐稔但念該省積歉之餘民氣尚
未全復所有舊欠倉穀籽種等項若一時並
徵閭閻生計未免拮据前已降旨將陽武等
縣借欠倉穀分年帶徵著再加恩將祥符陳
留蘭陽鄭州滎澤河陰商邱永城鹿邑夏邑
汴縣新鄉獲嘉淇縣滑縣濬縣上蔡太康等
十八州縣借欠倉穀及商邱永城鹿邑夏邑
睢州等五州縣借欠籽種銀兩俱一體分作
兩年徵還以紓民力該部遵諭速行 諭軍
機大臣等現命侍郎兆惠前往西藏所有駐
藏官兵如將屆更代之期應於川省各營內
早為選派豫備其將領中如李中楷馬如龍
輩亦即速調數員赴省俟兆惠到時酌量帶
往現在應行代還兵丁仍令暫留防所不必
徵回應於何時徵回聽該侍郎會同駐藏大

臣酌量辦理此係豫籌密備之事不可稍涉
張皇致駭衆聽可傳諭黃廷桂岳鍾琪知之
尋兆惠等奏派換官兵共五百餘員名同時
行走需用烏拉甚多且換班之期尚早今擬
帶副將李中楷遊擊馬如龍本進忠拴住兵
五十名先行出口繼令遊擊紀萬年李華帶
兵二百名隨後起程約於六月底抵藏其餘
派換兵二百五十名來歲二月酌派將弁帶
領於四月抵藏換回舊兵併請嗣後換班兵
五百名均於春夏之際分兩起赴藏交替現
在下班兵俟到藏後察看情形酌量徵回得
旨如所議行 又諭去年準夷曾來北路貿
易當經該處逐回此正肅清疆界之意伊等
未經獲利今年豈復再來但準夷卑鄙近利
或又欲祈請通商可寄諭成衮扎布此際如
遣使來求貿易即當明白曉諭伊使以爾台
吉屢次遣使懇求可否准行之處俟代奏請
旨即行奏聞如不遣使豫求竟稱貿易伊等

性情詭詐。不無藉此窺伺。致滋事端。著成衮
扎布飭令各卡加意嚴防。並將情形速行奏
聞。又諭前因防備準夷。令薩喇勒前赴哈
密。會同永常防守西路。以鄂爾坤軍營並未
派有大臣。伊一人前往。不能使彼處無疑。且
辦事亦恐掣肘。是以降旨。由京師察哈爾挑
派員弁三百名。令其統率帶往。可傳諭薩喇
勒。令於牧所豫備行裝。俟朕特派尚書舒赫
德於四月中旬由京起程。經過察哈爾地方
時。隨同前往。一切應辦事宜。務抒所見。協同
辦理。再察哈爾所派二百名蒙古兵弁業已
選定。伊起程後。即交彼處總管。仍於游牧所
駐劄。如一時調用。即照來文限期起程。戊
午定刑部駁議。議叙刑部議駁外省題
達案件。經督撫遵駁改正者。司員得並邀議
叙。夫指駁案情。必有首先立議之人。乃將各
員通行議叙。其中隨同畫稿並學習額外之
員。均得濫邀叙錄。非覈實之道。且由刑曹陞

調別衙門者。恃有加級紀錄。可以抵銷。往往
不肯認真勉力辦事。因思吏部司員向因議
處之案較多。別部僅將承辦之滿漢司員各
一人開送議處。此雖非正例。然以吏部議罰
可以通刑部議叙。其於考課之法。方為平允。
嗣後刑部各司。遇有因題駁議叙者。著照此
旨行。○已未。

上詣暢春園問

皇太后安。○諭藩臬兩司履任三年屆滿。請旨
陞見。乃古述職之意。朕得隨時察看。以備簡
用。其奏請未經允准。次年以後。每年俱應復
行具奏。若又待三年之期。是六年矣。近來各
省藩臬中具奏之例。多未畫一。該部可通行
傳諭。嗣後均照此旨行。○諭軍機大臣等。各
省藩臬到任三年之後。請旨。陞見。經朕臨時
酌量降旨。其批示未准者。次年自當再行請
旨。不必仍扣三年之限。溫福於十五年奏請
未准。直至今歲再奏。已屆六年。伊係滿洲世

僕在外年久不應亦以請旨。陛見視為舉行故事也。著於奉到此旨時。三日內交代。馳驛星速來京。陛見。○兵部議覆陝甘總督黃廷桂疏稱。同州向未設郡。原駐把總一員。馬步守兵二十七名。除分防羌白鎮等四汛各兵五名。存城兵止七名。今同州已改為府治。請將華州駐防之潼關協千總移駐同郡。即將原設把總移駐華州。就近於潼關協營內撥馬步守兵十三名。以足四十名之數。併抽羌白鎮等四汛兵各二名歸城內。每年應支本折糧餉。仍隨潼關廳倉按季支領。又新舊兵住房營房馬廐。并操演空地。均置買建蓋。應如所請。從之。○庚申。

上御勤政殿聽政。○軍機大臣會同刑部奏。捏造偽稿一案。先經雲貴總督叅奏。輾轉追至江西。傳鈔之江錦章。遞究至彭楚白。經江撫審擬彭楚白得稿於段樹武。發落完結。臣等

因案情可疑。將傳鈔授受未明之段樹武彭楚白等請旨行提到京。詳細推究。據段樹武供稱。實未給稿。曾經彭楚白告知伊另有得稿來歷。及研訊彭楚白始供係伊本官撫州衛千總盧魯生給稿傳鈔。所供得稿於段樹武。實因盧魯生之次子盧錫榮。囑令隱瞞等情。隨提盧魯生審訊。詰其得稿來歷。初供係伊次子盧錫榮。不知從何處鈔來。迨再三究詰。忽供係伊在贛州衛千總李世璠處得稿。於永新所千總石憲曾。忽供得稿於南昌衛守備劉時達。並稱係劉時達之子劉守樸。任所寄來。因其言語支離。反覆開導。始據該犯供認自行起意。與劉時達商謀捏造。緣該犯係四川南部縣人。曾任長淮衛守備。緣事降調。千總乾隆十五年七月內。在劉時達家。慮及辦差賠累。妄希停止巡幸。遂與劉時達編造奏稿。湊成五不解十大過名目。復思孫嘉淦肯上條陳。借名聳聽。於各幫會議公事時。

給衆閱看。交書辦彭楚白鈔傳。旋據劉時達供。係廣東海陽縣人。現任南昌衛守備。於乾隆十五年七月內。因盧魯生起意捏造偽稿。一時聽從編湊。當經盧魯生取去。給人鈔傳。從前所供兒子劉守樸金華寄來。實係自知罪重。希圖推卸。一一供認不諱。盧魯生業經先行正法。其通同捏造之劉時達。應不分首從。一律凌遲處死。盧魯生之子盧錫齡。盧錫榮均應斬立決。緣坐家屬及見稿不首之犯。均按律分別定擬。得旨。盧魯生。劉時達。二犯。商撰偽奏。肆行傳播。其誣謗朕躬。凡天下臣民自所共曉。不足置論。而當此承平之世。乃敢作偽逞奸。搖惑衆聽。其貽害於人心風俗者甚鉅。自應並置重典。以昭炯戒。但劉時達提解來京。一經研訊。即將與盧魯生商謀偽撰。及從前串供捏飾情節。逐一據實供認。且伊子劉守樸係患病垂斃之人。該犯亦何難堅執江省初供。以希狡卸。而王大臣等再三

詳鞫。始終自認不諱。此可見其天良猶未盡昧矣。朕君臨海宇。刑賞一秉至公。從無絲毫成見。盧魯生起意捏造。實為此案罪首。已經先行正法。劉時達著從寬免其凌遲處死。改為應斬。盧魯生之子盧錫齡。盧錫榮亦著改為應斬。俱監候秋後處決。其劉時達家屬之應行緣坐者。俟解京之日。該部另行請旨。○以散秩大臣平保為鑲黃旗蒙古副都統。○以詹事府少詹事于敏中為詹事。○壬戌。

上詣暢春園問

皇太后安。○還宮。○諭軍機大臣等。阿里衮蘇昌覆奏查辦增城匪案。先後到增日期一摺。所答非所問。甚屬支吾糊塗。此案阿里衮一聞匪信。即由肇慶取道往增。入山搜捕。其辦理自合機宜。但其摺內有據撫臣札致不過無賴棍徒詐騙鄉愚之語。及據蘇昌所奏匪逆情形。又與札致督臣之語。迥不相同。前之降旨詢

問。蓋專為此而不在到增之先後也。若使蘇昌並無此札。阿里衮何至捏詞入告。如其札致語實則蘇昌於辦理之初全然不以為意。又何至二十日聞信。二十一日即行往增。派兵查辦此等處甚不明晰。該督撫接到諭旨。自應將前後情節據實覆奏。乃其摺內止將伊二人到增日期牽混搪塞。增城為廣州屬邑。總督駐劄肇郡。其道路之遠近得信之遲早抵增之先後皆可不問而知。者著再傳諭該督撫令其另行聯銜據實奏聞。如再稍有迴護。朕斷不容其彼此含混以圖了事也。○又諭總漕瑚寶因失察逆犯盧魯生等捏造偽稿一案。部議革職。朕已降旨從寬留任。但該督節制全漕。衛所員弁是其專轄。伊等係由武途出身。乃以職司漕務。輒自附於文員。既無營伍差操。又無地方考成。其本分弓馬一切置之不問。惟事羣居宴會。飲酒博奕。惡習極為汙下。甚且造言生事。無所不至。有如

盧魯生等喪心病狂。身攬重辟。此實該督平日不能留心整飭之咎也。可傳諭瑚寶此番留任。係朕格外之恩。嗣後務宜加意振刷。嚴行訓飭。倘將來所屬衛弁仍不能痛改積習。不法滋事。必將該督從重治罪。刑部侍郎蔡新奏請給假省親。並懇開缺得旨准給假。不必開缺。○癸亥。諭軍機大臣審訊陳公壽傳送偽稿一案。不獨由報封發之事全屬誣枉。而陳公壽亦始終並未見稿。無怪乎吳進義從前之堅不承認也。浙省辦理之初。未免以事涉同省大員。恐蹈瞻徇。遂專向吳進義追求。過於周內。而吳進義於喀爾吉善等參奏之後。屢摺奏辯。跡似膚受。即如武進陞有檢舉孫鼎元稟送偽稿之奏。安知吳進義未經見稿。伊屢任提鎮。身受厚恩。見稿之罪尚輕。欺隱之罪甚重。且據該撫節次具奏。又俱持之甚堅。是以將伊革審。殊不意其悉屬子虛也。若非陳公壽在江翻供。經莊有恭奏請

覆訊。豈不竟成冤獄。外省審讞之案。非遷就草率。虛應故事。即豫存意見。不能虛心推究實情。此等陋習。牢不可破。雅爾哈善係屢次獲譴之人。加恩錄用。膺封疆重寄。宜倍矢實心。以圖報効。不應仍復如此。且其審理此案。多據承審各員錄供稟報。亦未逐一親加詳鞫。尤非慎重之道。著交部嚴加議處。將來若再不痛自湔洗。惟有重治其罪而已。其浙省承審官。查明一併交部嚴察議奏。至吳進義。如果見稿屬實。既不查拏於前。又復掩飾於後。自難辭咎。今既審屬無辜。又豈可以已經寬宥。遂不予昭雪。況武進陞。不過令其休致。吳進義並未見稿。是不但無罪。亦且不應廢斥矣。著該部行文調取來京引見。另降諭旨。朕經理庶務。至公至平。毫無成見。必不以曾經奏結之案。稍有迴護。嗣後各督撫。凡遇一切刑名案件。各宜一秉虛公。務臻平允。副朕此意。可通行曉諭知之。○戶部議覆前任四

川總督策楞條奏開採鉛廠事宜。一冕寧縣沙雞鉛廠。與紫古喇銅廠相近。其抽收課耗。稽查透漏。約束商匠。令紫古喇廠員就近兼管。至發價收買等事。亦令建昌廠總理經管。一外來客商。本地殷實良民。均由地方官查驗工本。並所採地名指界註照。庶無占混。一煎出淨鉛一百觔。應抽課鉛二十觔。收耗鉛四觔。八兩餘全歸官買。同課耗鉛解局供鑄。其鉛內單出銀星。亦照例每銀一兩抽課二錢。收耗四分五釐。餘給商。一官買餘鉛。應照長寧廠收買黑鉛之例。每百觔給價一兩六錢。一解鉛腳費。應照運銅例支給。仍由該總理具批。濟局交兌。一煎獲銀鉛抽收課耗。巡查登記。應照建昌銅廠之例。廠員設書記二名。巡役六名。課長一名。一總理及兼管廠員。已有銅廠月費數用。惟往來盤費紙筆等項。不無所需。應請每月各給雜費銀二兩。書記巡役課長月給公費如額。一夫匠中每十名

擇一老成勤慎者立為頭目。凡錢債口角聽其調處。惟賤賄私鑄假銀行兌等事責令本商稟究。更選幹練者一二名立為商總稽查各商一切私鉛漏課等弊。仍於出入要隘設卡巡防。一煎爐前一日該商協同巡役赴官領票。每煎一爐即將所獲銀鉛若干填註印簿。至應抽課耗及官買餘鉛俱令商交廠員公解。照數給價。一開廠後商民採獲若干抽課耗若干給價收買若干。廠員按月通報季底總理造冊送司覈請彙題。一建蓋房屋應令司庫扣存項下。動支一百兩。一買鉛應發現價。但鉛廠每次請領不過二三千兩。若令專差赴省未免糜費。應俟領銅之便隨請鉛價。其運鉛赴廠需用馱腳等項亦照建昌向請銅價之例議給。均應如所請。從之。○和碩康親王巴爾圖薨逝。遣皇三子永璋前往祭奠。○補行西安駐防乾隆十七年軍政卓異官八員議叙如例。○甲子諭科爾沁貝子達

爾瑪達都之子班珠爾著在御前行走。○乙丑上詣暢春園問皇太后安。○幸圓明園。○軍機大臣等奏舉行常雩典禮請交太常寺具題。毋庸先由禮部具奏。報聞。○丙寅廣東巡撫蘇昌疏報保昌四會合浦文昌等四縣勸墾荒稅地七百八十五畝。有奇。廣惠潮肇雷羅嘉七府州屬勸墾額外旱田四千七百一十四畝。有奇。又廣惠潮肇嘉五府州屬勸墾額外水田一萬七千九百一十二畝。有奇。○丁卯孝賢皇后忌辰遣官祭陵寢。○吏部議覆陝甘總督黃廷桂疏稱洛川縣黃龍山深在萬山之中止有外委把總帶兵巡防例不干與民事盜竊命案應設專員稽察彈壓。現有同州府屬華州州同一員地非遼濶事務不繁該處知州吏目足資辦理應移駐黃龍山改為直隸廊州州同兼管洛

川宜君中部三縣捕務。並專查黃龍山一帶近山村莊。至聯界之白水。澄城。韓城。邵陽。四縣交接之處。倘有潛匪。聽該州同查移地方官就近查辦。鑄給鄜州州同分防黃龍山兼管捕務條記。並於洛川。中部。三縣各抽民壯四名。宜君抽撥民壯二名。交該州同以資緝捕。均應如所請。至稱新設直隸州州同。即以華州州同孫宗翰調補。與例不符。應歸選補從之。○旌表守正捐軀之河南祥符縣民張尚智妻姚氏。○戊辰。諭軍機大臣等。提督林君陞摺奏據潛山營稟報聞羅田縣盤獲馬朝柱之乾丈人鄭后然。現在該縣就犯嚴訊。馬朝柱下落等語。逆犯馬朝柱竄匿未獲。屢經傳諭各督撫嚴行查緝。勿致久而愈懈。該督等自應設法嚴緝。不時確訪。上緊查拏。務獲今羅邑現獲匪黨。嚴訊下落。已據林君陞星速奏報。鄂容安莊有恭何以竟未具奏。著傳諭詢問。倘伊等現在查緝。一有下落。即速

奏聞。再朕聞江南冬春以來。得雪頗大。天氣寒冷。於麥苗有無妨礙。又米價稍長。青黃不接時。應否有豫為調劑之處。著鄂容安莊有恭等詳悉查明具奏。可一併傳諭知之。○已

上詣暢春園問

皇太后安。○遣官祭

先蠶之神。○戶部議覆廣東巡撫蘇昌疏稱。豐順縣僻處萬山。難於輓運。額貯穀僅五千二百八十九石九斗八升四合。除碾支兵米外。所存無幾。不敷糶濟。請將乾隆十六年領運三水縣廣益倉穀二千石。又南澳同知糶存三水縣廣益倉穀一千石之價銀。移交豐順買補。一併加貯入額。應如所請。從之。○庚午。諭大理寺所奏傳鈔偽稿案內。永遠枷號之陳俊臣。江起保。二犯。未便據咨釋放。一摺。各省傳鈔之犯。前因首犯既得。特降諭旨。無論已未發覺。概行從寬免究。此原指未經定

擬者而言乃格外之恩也其已經定擬發落者無庸另辦至永遠枷號人犯情罪較重又非僅傳鈔傳看者比自應入於大理寺年終彙奏案內候旨定奪乃該撫恒文既未奏明亦不咨該衙門遽將陳俊臣等釋放辦理殊屬錯謬該寺所奏甚是恒文著交部嚴察議奏其各省傳鈔案內凡有永遠枷號人犯俱著照此辦理○又諭阿桂著來京補授內閣侍讀學士其江西按察使員缺著范廷楷補授○又諭原任科爾沁貝子達爾瑪達都為人誠樸宣力有年前因患病在京調治忽聞溘逝朕心深為悼惜著加恩派御前侍衛副都統富德齋經被一件賞給並銀三千兩照貝勒例辦理○禮部議奏裁減各省鄉試房考官據各省督撫疏奏除山西江西四川房考官實無閒曠無庸議裁山東酌減易詩各一員定為十二員河南酌減易詩各一員定為十二員貴州酌減易詩各一員定為八員

湖北酌減易經一員定為十員浙江酌減易詩各一員定為十六員福建酌減易經一員定為十一員廣東酌減易經一員詩經二員定為十員又調任廣西巡撫定長疏稱廣西外簾舊設受卷謄錄二所官均係四員應併各裁二員均應如所請從之○補行湖廣乾隆十七年分軍政卓異官五員年老官三員才力不及官四員分別議叙處分如例旌表守正被戕之直隸永清縣民張榮妻杜氏○辛未月食○予故閩粵南澳鎮總兵何勉祭一次

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十四

中錄卷之四百三十四

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十五

監修總裁官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉三月壬申

上詣暢春園問

皇太后安○幸豐澤園演耕○還宮○諭山西

歸化城口外善岱等處各協理通判所管招

民墾種荒熟地畝歷年應徵租糧草折自乾

隆二年至乾隆八年積欠未完銀兩甚多若

一時新舊並徵民力未免拮据且該處情形

與內地不同應加恩分別帶徵著將善岱舊

欠自乾隆十八年起分限二年崑都崙舊欠

分限四年和林格爾舊欠分限五年托克托

城舊欠分限八年清水舊欠分限十年該承追督催各官照依分定年限如數帶徵俾漸次清完以紓民力該部即遵諭行 江西巡撫鄂容安疏報上高萍鄉新喻萬安永新鉛山弋陽鄱陽餘干德化南康上猶定南等十三縣勸墾老荒續荒及額外新生田地塘二十頃二十畝有奇 河南巡撫蔣炳疏報內鄉確山二縣勸墾荒地四十八頃七十七畝有奇 癸酉諭八旗世職官員往往安於逸樂遂致國語騎射日見生疎朕曾降旨擇其可教之人帶領引見或補用侍衛或著在護軍營當差令其加意學習此皆眷念舊勲教有旗人至意然既經選擇者如或行走平庸尚須斥退另襲其未經選擇者又或以未行引見暴棄自甘轉非教育成全之道伊等身係滿洲不過由祖父得官而於國語騎射不能自勉黜革另襲亦屬當然但原議尚未詳盡著將此項在旗行走之世職恩蔭等官應

如何考驗并此次考驗後如何著為定例之處交八旗大臣另議具奏 又諭督撫叅劾屬員請旨革審自應確按款證速為審結乃向來外省陋習遇有叅革發審案件往往稽遲懸擱甚至有歷二三年尚未具題者該督撫於題叅摘印後即諉之承審各官一任其輟轉遷延並不實心查辦此在劣蹟昭著者事隔經年人言漸息既可避重就輕巧為開脫若款證本屬未實蹟涉枉抑者則又必回護原叅不能即為定案即使審虛開復被叅之員羈候年久不獨貲產耗竭無以自存而志氣墮頽亦多不堪錄用矣督撫皆朕所倚任不應藉此以行其好惡之私至承審各官或未免有迎合上司之意則亦皆該督撫之咎也此等陋習不可不亟為整頓嗣後各省題叅革審之案俱著另行嚴立限期如有不能依期完結者令該督撫據實摺奏請旨展限不得仍前延玩致滋弊端其應如何分別

立限之處該部即行酌議具奏尋吏部議向例欽部事件以文到日為始限四箇月具題兼管二省之總督限六箇月惟不能依限完結者隨本展限即准扣除是以往往藉辭懸擱請嗣後務遵定限完結如任意遲延未經奏請展限部臣不准扣除承審各官照例議處得旨六箇月限者著改為四箇月四箇月限者著改為兩箇月又諭據山東巡撫楊應琚奏武定登州曹州等府今年雨雪調勻麥收可望但各該府屬之利津等縣俱經被水之後若將節年拖欠未完之項照常徵比民力未免艱難等語著將武定府屬之利津雷化蒲臺海豐四縣登州府屬之蓬萊萊城福山棲霞四縣及曹州府屬之濮州范縣二州縣應徵節欠穀石統於本年秋後起限徵收分作兩年完納以紓民力該部即遵諭行戶部議覆湖北巡撫恒文疏稱恩施縣外屯一處距郡城四百餘里在川省巫山奉節

建始三縣之中屯民五百餘戶遇一切公務必越建始往返旬餘實為不便從前改衛為縣時建邑尚隸川省是以未及議歸今建邑已改隸施郡請將外屯一處改建始縣管轄其項畝糧銀額徵烟戶冊籍飭令恩施縣造移建邑接管應如所請從之○甲戌諭軍機親王巴爾圖祭葬如例諡曰簡○甲戌諭軍機大臣等方觀承奏據宣化鎮總兵吳士勝稟報水溝臺汛兵被蒙古細縛搶去一案此事前據遊牧總管惠色奏稱察哈爾牛羊羣牧長策凌達什等稟報該處失馬八匹尋至邊城見三人趕馬進邊正在尋看有汛兵向伊等施放兩鎗并拔刀恐嚇將伊等細去至夜半放回次日伊等將兵丁一人拏住呈報等語看來竊馬賊人擾累蒙古復恃有該地兵為之窩庇致竊匪益無畏忌該鎮吳士勝平日不能約束已難辭咎乃所稟該督情節則但稱蒙古欲行越邊汛兵攔阻被縛等情明

係袒護汎兵欺朦該督且伊現任總兵遇有此等事件並不自行陳奏而以一稟支飾其希圖含混了事更屬顯然伊由叅將節次擢用總兵似此存心是全不知朕恩矣此案現派部員前往審理倘吳士勝仍尚欲始終迴護或授意兵丁令其狡供掩飾一經朕察出定必重治其罪著郎中福德蘇崇阿將此旨傳諭吳士勝令其將此案情節另行秉公確查自行回奏又諭前降旨將各省傳鈔偽稿案犯無論已未發覺概行從寬免究原指愚民無知未經定擬者言若已經定擬永遠枷號人犯其情罪自屬較重非僅傳鈔傳看者比至於身為職官復轉行傳播其罪益無可逭豈得與平民一例省釋是以朕復降旨將此案文武員弁仍交與吏兵二部定擬彙題完結乃署督鄂容安前奏將永遠枷號之江錦章一犯及守備王百祥等六名俱行釋放殊屬非是現在湖北巡撫恒文並不分別

案犯情罪遽釋陳俊臣等二犯已經交部嚴加議處鄂容安亦在應行議處之內念其查辦此案以來尚屬勇往出力特從寬免其交部若使他人如此定不能邀朕曲宥也補行乾隆十六年分廣東廣西湖北河南等省大計不謹官十二員罷軟官三員浮躁官三員才力不及官十員年老官二十二員有疾官十一員分別處分如例戶部議准湖廣總督永常疏稱襄陽鎮標中前左右四營并襄陽城守均房安陸等七營所轄地方乾隆十七年被旱歉收米價昂貴兵食拮据各該鎮營請豫領米折銀二十四百四十五兩有奇採買米石接濟從之乙亥

上耕耤詣
先農壇行禮更服至耤田所
躬耕三推復加一推
御觀耕臺命怡親王弘曉裕親王廣祿和親王弘晝各五推吏部尚書達勒當阿戶部尚書

蔣溥禮部尚書王安國兵部尚書李元亮刑部尚書劉統勲工部左侍郎德爾敏左副都御史廣成通政使多德大理寺卿齊達色各九推畢順天府尹率農夫終畝賞耆耆老農夫如例○丙子

上詣暢春園問

皇太后安○幸圓明園○諭朕為旗人壽畫生計節次加恩將護軍領催馬甲養育兵缺陸續增添但八旗生齒日繁用度不無拮据著加恩增添馬甲一千名歸併健銳營添蓋官房撥給居住再八旗養育兵並無差使月支糧銀二兩自當調劑即如十人中現止六人食餉若於每月二兩內勻出五錢六人所勻之餉足增二缺再賞給二缺則十人皆可霑恩而現在所勻之餉亦並非一時全行裁減其八旗如何分缺如何補放之處著軍機大臣會同八旗大臣核議具奏以喀喇沁固山貝子扎拉豐阿為理藩院額外侍郎旌

表守正捐軀之江蘇海州民王廷和妻楊氏丁丑諭考績古制也前因部院大臣及各省督撫屆期循例自陳近於故套且皆朕所深知量其材具隨時黜陟何待三年故降旨停止非怠於披覽也其四五品堂官特派王大臣驗看察核後帶領引見惟三品京堂雖列大僚不同卿貳即交部通行考核勢必無所殿最或藉以高下其手者有之故令該部開具事實逐加詳定此足以見朕之核實慎簡矣今次吏部所進各官事實清摺內如李世倬文保不過旅進旅退即姑容延待數年未始不可但使衰庸者久居班列有妨後進遷次之階亦非澄敘官方之道李世倬文保俱著以原品休致餘著照舊供職○又諭向例八旗軍器每年特派王大臣查驗一次事既煩擾而兵丁等不無繁費著改為三年查驗一次但既經展限欽派王大臣等自不得仍前塞責了事務宜悉心認真察看若仍不

以為事至朕親閱之時軍裝不整定將所派之王大臣治罪決不寬貸查驗之時除八旗驍騎營官兵丁前鋒護軍包衣護軍仍照例閱看外其包衣佐領下披甲人及王公門下包衣佐領下兵丁軍器俱不必查驗戊寅諭軍機大臣等定長覆奏保薦知府一摺據稱所屬同知知州並無合例應行送部引見人員此泥於前旨任三年一語若接到朕續降諭旨自當另具摺奏定長在粵西已及數載果有才能出衆之員即年例未符何妨具摺保薦看來此案頗有因已經調任離粵在邇欲避濫舉之咎但為聯銜一奏以塞責耳甚非實心任事之道著傳旨申飭仍令遵旨據實保薦奏聞又諭據定長覆奏審訊吳晟相等情形一摺內稱初次審出該犯自認為吳方曙從逆天堂寨事發逃竄等情不過扯耳端跪並未嚴刑續准楚咨解回復行確訊據該犯將引進燒炭逼脅從逆及事

發披剝各情一一供吐併自繪寨圖親書口供亦僅將該犯刑夾一次並無嚴刑疊夾使赤膝跪於燒紅鐵鍊之上等語此案經楚粵兩省往返訊鞫該犯到粵則俯首供認至楚忽翻異前供而永常所奏乃係粵省全用刑求強令誣認是以降旨詢問定長今觀該撫所奏審訊情節未必盡屬刑求而所委承審此案之平樂府知府顧珊看來亦非酷刑枉法者吳方曙一犯已經永常拏獲審明正法該犯在粵就捕又行自認則永常前奏未免有迴護之見著將吳晟相李興樓二犯即行解京交軍機大臣等訊問並傳諭永常定長知之戶部議覆漕運總督瑚寶疏稱嚴嘉二幫截留漕糧與杭寧幫丁船同係一年減存請將嚴嘉二幫丁船六十八隻循照杭寧等幫減丁前奉恩旨一體加給二分苫蓋口糧應如所請從之賑卹安徽壽州鳳陽臨淮定遠霍邱泗州盱眙天長等八州縣及鳳

陽長淮泗州等三衛乾隆十七年旱災飢民並蠲緩額賦其壽定霍泗盱天等六州縣漕糧漕項銀米鳳陽臨淮二縣漕項銀及舊欠漕糧并衛田應徵新舊漕糧漕項均予緩徵已卯

上詣暢春園問

皇太后安○幸靜宜園駐蹕翼日如之諭曰永常著來京陛見其湖廣總督印務著開泰署理俟開泰到楚交代後起程來京定長著署理貴州巡撫開泰著於交代後起程前赴新任諭軍機大臣等鄂樂舜奏巡查甘涼肅情形一摺已於摺內批示其所稱番性獷悍難馴控馭之道宜於防範中仍加矜恤勿格外苛擾勿過於脅逼等語如果巡查所至實有應行振刷辦理以為綏靖疆圉之計自應據實入告但鄂樂舜此奏全屬泛論不過因巡察一番敷衍其說以見不虛此行耳未必於地方實有裨益也封疆大吏不能實心

實力隨事籌辦而徒以虛文相尚何事此喋喋為耶然或伊誤會此旨輒思勉強振作又故為更張紛擾則尤其大不可者朕於一切政事務期實際鄂樂舜始終未能領悉朕旨不免沿習故套著將此一併傳諭知之署山西巡撫胡寶瑤奏據護理總兵印務巴泰稟稱原任大同鎮總兵今調延綏總兵張乃義虧空存營公帑一千八百餘兩臨行未能歸款又部准應給各營製造柳鐸牌架等銀二十九百餘兩未經給發即行交印起程等情旋於巡查北鎮時面詢中軍遊擊色倫泰并各叅遊等官僉稱並未給發實係捏冒開銷私侵入索至色倫泰專司錢糧出入一任該鎮侵那私用並不詳揭恐有徇情容隱及通同侵冒情弊均應叅革究追得旨這所叅張乃義色倫泰俱著革職其侵冒徇隱各緣由該署撫一併嚴審定擬具奏庚辰兵部議准署山西巡撫胡寶瑤疏稱山西冀寧驛

傳道專管通省驛務分巡太原潞澤等處地方定制已久嗣將驛務改為分管責成不專有損無益請仍照各省專員之例將山西通省驛傳事務仍歸冀寧道管理從之 蠲免河南武陟縣乾隆十七年水災地畝糧銀五百七十四兩有奇 以故青海扎薩克固山貝子莽鼐長子羅布藏色布騰襲爵 旌表守正捐軀之江蘇泰興縣民田大有妻戴氏 辛巳

上詣暢春園問

皇太后安○迴圓明園 諭軍機大臣等據吳士勝覆奏水溝臺汎兵劉成被牛羊羣蒙古網縛搶去一摺甚屬支飾迴護不僅拘執錯謬而已沿口汎兵窩留竊匪擾累蒙古事屬顯然吳士勝身為總兵約束兵丁是其專責豈可有意徇庇且如察哈爾蒙古本屬我朝世僕張家口外牧羣現俱隸之太僕寺安設臺汎不過稽查出入以防私越耳乃吳士勝

奏內汎將屬弁稟詞錄入有本日汎兵劉成瞭望午時見有蒙古十數人騎馬直至邊牆等語在吳士勝不過藉此張大其詞以為支飾之地竟視察哈爾蒙古如準夷水溝臺諸汎不啻安西要卡矣此等夢譫之語覽之可發一笑至其奏內有曾與惠色面商並無異詞及接惠色札致又有若遽入告恐增宸慮之語若果係如此則是惠色以計安頓吳士勝而伊先行具奏亦屬不合吳士勝既有此奏不可不查問明晰可再傳諭郎中福德蘇崇阿奉到此旨時即傳吳士勝惠色至彼當面對問令伊二人據實明白回奏仍將此案實在情節秉公確查速行奏聞若再有迴護及圖含混了事必不能逃朕洞鑒 賑卹湖北鍾祥京山荊門隨州江陵枝江棗陽宜城均州穀城鄖縣鄖西竹谿東湖等十四州縣併武昌荊州荊左荊右襄陽等五衛乾隆十七年旱災飢民 旌表守正捐軀之山東曹

縣民張戀妻常氏 壬午

上御勤政殿聽政。諭刑部侍郎蔡新現在告假省親。內閣學士李因培著暫行署理刑部侍郎事務。○兵部議准大學士公傅恒奏請酌定各省駐防軍政卓異人員凡薦舉之員數仍以駐防之多寡酌中定額嗣後黑龍江不得過七員。盛京不得過六員。船廠不得過五員。西安綏遠城均不得過四員。杭州江寧荊州均不得過三員。涼州天津廣州京口寧夏成都均不得過二員。熱河青州山海關福州均不得過一員。河南太原二處駐防官最少應俟軍政屆期由部奏派大臣前往考察。又獨石口千家店張家口古北口鄭家莊昌平州六處及保定寶坻固安東安雄縣良鄉霸州采育八處軍政之年向係原派巡察大臣考核該處員數無多且係分駐難以定額。如果有賢能出衆者准其薦舉一員否則寧缺毋濫從之。○鑄給張蘭巡檢司印信從署

山西巡撫胡寶瑤請也。以國子監祭酒雙慶為內閣學士兼禮部侍郎。以印務叅領佟澤溥為鑲紅旗漢軍副都統。癸未上詣暢春園問

皇太后安。還宮。諭軍機大臣等前據班第等奏稱署東莞令周紱因將逆首已獲復縱革職勒拏茲查王亮臣逃入崖州原係該令究出差役前往一同在場拏獲尚在一月限內相應聲明等語向來督撫遇屬員叅處案件往往於結案之時曲為開脫最屬外省陋習此案王亮臣逃入崖州如確係周紱究出蹤跡差役往拏且在一月限內其處分尚可從輕但恐該督撫等不過據該令稟報之詞其情節則未必屬實耳可傳諭班第蘇昌令將周紱究拏王亮臣前後實在情節再行確查若果與前奏無異即另摺敘明奏請交部但不可揜飾回護致蹈外省陋習也。戶部議覆雲貴總督碩色疏稱金江兩岸懸崖峭

壁水勢汹涌自黃草坪過大漢漕險灘榔比運船一經漂沒實難打撈查辦運京銅經歷川江黃河等處其沉溺非人力所能施者原有豁免之例金江險倍川江請照例一體豁免應如所請從之又議覆貴州巡撫開泰疏稱大定府屬威寧州山多地寒米穀稀少近年生齒日繁銅鉛各廠人夫叢集食者益衆兵丁領支折色自行買食每值青黃不接或陰雨綿連兵民爭糴往往懸釜待炊應為設法籌備威寧鎮標折色兵糧請改撥本色支給所有應支本色及遇閏加支每年應添撥不敷米三千一十二石七斗五升除威寧州按年於隣封附近州縣採買一千石外請將平遠州之時豐歲稔崇信三里額徵餘米七百七十四石九斗撥赴水城廳倉畢節縣額徵餘米七百九十九石五斗及備支畢赤營糧米一十一石四斗六升撥黑章汎均令威寧州接收運貯又於大定府屬之悅服里

撥額徵秋糧米四百二十六石八斗九升貯威寧倉以抵鎮兵不敷之數至畢赤營兵丁遇閏應需加支月糧一百九十五石即於大定府屬之仁育里應徵秋糧按年照數撥還其大定府改撥威寧畢節兩處米請於黔西州額徵餘米按年照數撥還府倉以補應支額數又威寧州及黑章汎地方應建倉廩四間均應如所請從之是日起

上以孟夏享

太廟齋戒三日甲申諭朕因督撫叅劾屬員並不實心查審惟委承審各官遷延滋弊交部另立限期按例分別舊限六箇月者改為四箇月限四箇月者改為兩箇月原欲使被叅者不致屈抑日久或疑為期太迫不思督撫列款糾叅必經確訪至查審時果能虛公研鞫虛實無難立辨即謂定制須由道府州縣次第審詳此不過外省陋習耳江西鄱昌等正坐此病究之所委道府州縣亦無不迎

合上司意指。則仍是督撫自定案。亦安用是虛文為耶。然案情有難易。道路有遠近。此後凡督撫叅官。能依新限速辦。固見敏幹。如新限內不能完結。即著將實在情由豫行摺奏。其尚在舊例限期之內者。寬其議處。若仍徇於積習。致逾舊限。該部隨本查叅。諭軍機大臣等。京口減撥運京船隻一案。現在署督鄂容安辦理兩省事務。難以兼顧。著交與江蘇布政使郭一裕。令其將如何變價解京足敷成造之處。詳悉妥辦。一面奏聞。一面詳報署督。咨部查核。著傳諭鄂容安知之。併諭郭一裕。尋鄂容安奏。據郭一裕報稱。京口戰船九十二隻。議裁二十四隻。請於舢舨船內派減八隻。沙船內派減一十四隻。唬船內派減二隻。至此項船原令變價解京。抵直隸造船之費。但戰船不適於民用。價值無幾。請將現減之船。撥抵京口各營輪造舢舨船八隻。蘇狼捷漕京口等標內。應造沙唬船一十六隻。

扣出造價解直歸款。其裁船存剩弁兵水手。遇缺酌補。未補之前。仍在水師營內支給俸餉。裁存礮位器械。均歸水師營收貯備用等情。辦理尚屬周妥。得旨。郭一裕所辦原安。又諭總兵那親奏。兵丁收砍樹枝一摺。看其情詞。與佛倫不相和協。藉端陳奏。已屬顯然。據稱金啟澤等收存風刮樹枝。被領催八十三等拏獲解送。並稱八十三挾嫌圖報。已發交理事通判會同知州確審定擬等語。其摺內既稱該弁兵等推諉不報。共相隱匿。則顯係兵丁偷竊樹枝。該鎮不能查察。致被拏獲。押送。乃復連篇累牘。嘵嘵不已。究何能掩其迴護之迹。那親已有旨交部嚴加議處。至另摺所奏。與佛倫抵牾掣肘情形。并將節次案件逐一鈔錄進呈。尤屬煩瑣不合。看來那親器小易盈。取巧多事。著傳旨嚴行申飭。又諭曰。顧琮奏大挑運河及築壩椿榮銀兩請動支。司庫耗羨一摺。所奏甚不明晰。河工有

興築辦料理宜於河庫項下開銷其司庫耗羨銀兩原以備地方公用是以常例之外有必需款項經部議令督撫隨時奏明動用今此項工料既已先動河庫節省銀兩購辦何必復於司庫耗羨內請撥輾轉撥補徒覺紛繁著傳諭詢問顧琮令將此項已動河庫銀兩何以必應於司庫耗羨銀內撥還及摺內聲敘未晰之處另行明白具摺奏聞尋奏東省運河椿檉銀兩於乾隆元年經前河臣咨部准於司庫動支嗣以挑河例有限期故先於河庫項下借發事竣核實移司撥還歸款但輾轉撥補究屬紛繁查河庫現有存貯節省銀兩所有一切椿檉請即於此項支銷仍行核實造報得旨汝從未似此奏一明白事也知道了咨部知之○乙酉諭曰那親著來京補授正黃旗蒙古副都統其直隸泰寧鎮總兵員缺著任澍補授○諭軍機大臣等據方觀承奏稱自下各處市集錢價每銀一兩

換錢八百三十至七十文不等通州船艘通行乃向來錢貴之時今每銀一兩仍換錢八百四十文實因錢價大勢平減之故等語是查辦囤積錢文行之已有成效矣但每年回空糧艘多有私帶錢文之弊從前錢貴之時尚所不免況現今錢價平減耶已交步軍統領衙門令其加意稽查可傳諭方觀承密飭所屬沿河州縣一體留心體察惟以不動聲色行所無事為妥若又出示嚴禁差役訪拏張大招搖則與實在辦理之處轉屬無益○又諭前因直省錢價昂貴皆由富戶藏積過多所致曾經傳諭各該督撫令其明切曉諭廣為流通自上年秋冬以來京城及直隸地方囤積錢文陸續呈交錢價日漸平減民間頗為稱便近據方觀承奏稱現在行使錢文十分中約有二分係康熙雍正舊錢其上多有斑綠可知出自埋藏目下各處市集每銀一兩換錢八百三十文至七十文不等通州

船艘通行。乃向來錢貴之時。今每銀一兩。仍換錢八百四十文。實因錢價大勢平減之故。等語。是行之已有成效矣。錢文為日用所必需。價值平減。則其為小民利益者甚溥。該督近在畿輔。雖因朕不時提撕。不敢視為奉行故事。然亦可見凡事果能行以實力。決未有為其事而無其功者也。著將方觀承從前覆奏辦理囤積錢文諸摺。鈔寄各該督撫。令其詳悉閱看。如該省錢價。現在尚未平減。即可

平定六年四月二十二

五

酌量地方情形。仿照行之。實於民生大有裨益。該督撫等。如自揣不能如此辦理。亦不必勉強從事。以致徒滋紛擾可耳。可通行傳諭知之。○是月。直隸總督方觀承奏。子牙河。係滹沱下游。由獻縣河間。入大城縣境。經楊家莊王家口。莊兒頭等處。循格淀隄。匯入天津之三岔河。為長蘆鹽引。通運畿南要道。前以大城境內。河身窄狹。西隄偏臨河岸。每憂夏漲。議於楊家口。開挑支河。下穿閏兒莊東隄。

導由陳家泊。仍歸正河。嗣因支河分溜過多。正河淤墊。阻滯商船。議請挑挖。但支河水深溜湧。施工不易。正河淺窄。究必淤填。現在相度地勢。請即以楊家口至閏兒莊東隄之支河。作為正河。再於閏兒莊河尾。北通蔡家窪。沿溜兒莊東隄。抽挑河槽一道。下接黑龍港。舊河展挖深通。俾楊家口以下全河俱於子牙橋北。歸入正河。得旨。朕記得原訓及此。汝尚以為未可。今如何。然出於遷就遵旨。則不

平定六年四月二十二

五

可也。又稱。自楊家口至子牙橋北之正河。毋庸挑挖。亦不必攔截。留作越河。分殺水勢。惟將子牙橋北。至莊兒頭之正河三十里。隨河底高下。一律挑深七尺。至閏兒莊現在河流。穿越東隄之處。應建攔河草壩。使循軌之水。悉歸正河。另於壩北東隄之上。修建滾水石壩一座。俾夏月盛漲。由此分減。即以隄外舊河。作為引河。得旨。如所議行。○福建漳州鎮總兵馬大用奏。報回鎮任事。并失察鎮屬兵

丁李改竄入匪夥呈請督臣叅處等情得旨以後諸凡留心鎮靜地方以安閭閻可也○署山東巡撫楊應琚奏據各州縣呈報搜掘蚰子根株已盡臣仍於春融之次嚴飭窮搜四月後親往查看得旨朕亦不必再諭若直隸州縣有稱飛蝗入境者當問汝耳署山西巡撫胡寶瑤奏大同鎮總兵張乃義拔捕兵糧考校員弁並不公正致滋物議調任延綏之後復勒令中軍色倫泰等札致各營派送盤費雖旋經退出而貪詐營私已有實據得旨此奏甚公可嘉署陝甘總督尹繼善奏報西同等屬春雨深透二麥暢茂上年災歉之區米價均已平減得旨京師亦同此景惟冀四月間雨澤故朕此際因慰慶而望愈切署兩廣總督班第廣東巡撫蘇昌奏增東二邑不法奸民逃入安南界內該國土官潘宏耀先後協同緝拏梁德黃宗漢湛佐一等實心効力應從優給與獎賞得旨好貴

州巡撫開泰奏黔省存倉米穀數多時久不特平糶有限出易難週縱設法增糶而買補尤艱請嗣後免息出借俾借一還一民無升斗之損春借秋還量為出易不待買補更不致有妨米價得旨覽奏俱悉亦密諭部並議矣

大清高宗法天隆運至誠先覺體元立極敷文奮武孝慈神聖純皇帝實錄卷之四百三十五

大清高宗法天隆運至誠先覺體元立極敷文奮武孝慈神聖純皇帝實錄卷之四百三十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部庫事務

世襲副都統軍功加十九級隨帶加二級又加二級臣等謹將內大臣戶部尚書鍾麟滿洲都統軍功紀錄五次

尋常紀錄十四次臣等謹將經筵講官太子少保工部尚書紀祿六次臣等謹將等奉

敕修

乾隆十八年癸酉夏四月丙戌朔享

實錄卷四百三十六

太廟

上親詣行禮○諭軍機大臣等據湖廣總督永常奏稱兩湖地方遼濶接壤江南江西河南陝西四川貴州廣東廣西八省此內又多遼谷深林崇山疊嶂人蹟罕至之處若不設法巡防難保奸徒不無藏匿茲臣現就所轄地方某處應與某省酌量訂期會哨第恐各省營制不同形勢互異必須彼此商同始能遵行永久等語永常此奏雖因馬朝柱等前車

之鑒而弭奸匪以安善良則原屬封疆大吏應辦之事蓋山谷險峻既易藏奸向來地方各官又以界聯兩省不免互相推諉若能彼此會同不時巡哨則宵小自必無從潛匿與其查辦於事後不若豫防於臨時也現在如河南之信陽江南之英山江西之上猶與楚省交界各處已經定有會哨之例自當實力奉行其餘山陬水湄幽僻阻隘為人蹟所不至之地尚復不少可傳諭各該督撫令其確按地方情形將作何協力巡查之處一體留心分別酌籌會同商辦則兩省巡哨之事歸於畫一而不致有所扞格於安靖地方之道甚屬有益該督撫等惟宜和衷商榷一切出以鎮靜不可張皇其事致駭愚民觀聽倘各督撫中有不能如此辦理者亦即據實覆奏尋兩廣總督班第以咨商湖廣江西籌辦會哨事宜入奏下軍機議尋議該督奏稱兩省交界地方俱設有營弁自應責以定期會哨

實錄卷四百三十六

兌旗兌籌申報稽查。至文職官。均有地方之責。江西來咨。議立總巡。季巡。月巡。立法過多。似與出以鎮靜。不事張皇之諭旨未合。而湖廣來咨。又以道府州縣地廣事繁。或不能親往。聽委丞倅等官往代。亦似責成不專。請嗣後令道府州縣遇停訟及公事出巡之便。隨時察勘。不得全行諉卸武員。應如所請。交該部行文兩湖及江南江西河南陝西四川貴州廣東廣西等省一體遵照辦理。從之。○又諭牛羊羣蒙古綏縛汎兵一案。前因該鎮吳士勝並無一字奏聞。特命傳旨申飭。及吳士勝具摺覆奏。則稱惠色札致曾有若遽入告。恐增宸慮等語。復令伊二人當面對問。今覽惠色與吳士勝來往書札。是在吳士勝本意。原屬遲疑。而惠色之札。又與之適合。雖其回護兵丁之處。不因此而遂可稍為掩飾。然惠色既經札商於前。又復自行繕摺具奏。未免有意取巧。看來惠色平日尚不至如此詭詐。

者。而此事則甚為不合矣。著傳旨申飭。○丁亥。諭軍機大臣等。錢陳羣所奏偽稿隱約其詞。意在必不查辦。甚為悖謬。此案經軍機大臣究出首惡。復經議政王大學士九卿科道研鞫數四。審慎明確。方寘極典。已詳悉宣示中外。錢陳羣何尚作夢囈語耶。即使具摺時。尚未見明旨。而此等大逆不道之渠兇。貽害世道人心。乃謂可置之不問。為臣子者忍存此心耶。忍見之毫楮耶。當由病魔邪障。昏亂顛倒。抑或由加恩過厚。無福承當。折受故耳。著傳旨嚴行申飭。此乃格外恩典。若在他入。必當交部重治其罪矣。伊謂業已回家。不能重治其罪耶。原摺不批發。錢陳羣不得存稿。如欲留以取巧沽名。將來別經發覺。并爾子將不保首領。慎之。○又諭據楊應琚奏。稱泰安縣民王盡性等捏造歌詞。刻印貨賣。照妄布邪言例。分別擬以斬決流徒等語。此等匪徒。自應嚴行查禁。但案擬交部。竟若成一大

案似亦不足如此辦理。且恐轉駭愚民聽聞。可傳諭楊應琚將為首之人立予杖斃。其餘各犯酌量枷責發落。所撰歌詞板片既經追燬。惟嚴禁民間不得再行傳播可耳。楊應琚摺亦無可批示。亦不必存案。可一併傳諭知之。○兵部議覆湖廣總督永常等奏稱桂東縣增設桃坪頭汛。應於桂陽營存兵內抽撥十五名。並以新坑外委移駐該地。桂陽營增設下東溪白沙凹塘。應於宜三都存兵內抽撥五名。南路寨前東陂沙田等三塘各撥兵一名。共八名分駐巡防。仍歸桂陽營管轄。應如所請從之。○陝西巡撫鍾音奏試用候補人員自乾隆五年定例。月給薪水銀兩。於存公項下動支。嗣陝省以員數無多。補缺較易。是以酌定耗羨章程案內未經列款。迄今停給。近查陝省候補多員。需缺日久。且有差委事件。請仍照定例。月給薪水銀兩。以資辦公。報聞。○加贈浙江處州鎮總兵李琨署都督

實錄卷一百一十二

五

同知銜。○戊子諭。此次西洋貢使來京。劉松齡前往接引。沿途辦理一切甚屬黽勉。著加恩賞給三品職銜。食俸。再伊等照料貢使。不無需費之處。著加恩賞給銀二千兩。○諭軍機大臣等。據吳士勝奏稱。萬全縣拏獲張家灣人張英等。供認二月初八日同山西人楚進寶常國安夜出水溝臺。又和口外達子七巴前往大海溜地方偷馬八匹。於十一日五更仍由水溝臺入口。該汛兵弁若非怠惰疎防。必有通同故縱情弊。現在一併拏交欽差處嚴審定擬。其專轄將備咨呈督臣題參。并請將臣交部嚴加議處等語。水溝臺汛既經設有兵弁。稽查匪竊。是其專責。乃賊犯張英等夥盜馬匹肆行出入。該兵弁等何竟毫無覺察。現據奏稱拏交欽差審擬。著傳諭郎中福德蘇崇阿令其將有無通同故縱之處逐一嚴加審訊。務得實情。明正其罪。以示懲儆。至該鎮吳士勝不能稽察約束。自有應得處

實錄卷一百一十六

六

分但此時且不必交部應俟此案審明後再降諭旨可一併宣示吳士勝知之○又諭向來各省督撫於屬員虧空之案但以察出劾奏遂卸已責其帑項之有無著落並不即為查辦及至審明具題起限著追而狡詐之徒早已多方寄頓各行原籍動輒逾年不過以家產盡絕一語照例結覆縱使著落上司分賠完項而本人轉得置身事外殊非國家懲貪之意即如刑部現辦原任雲龍州知州張璿應追盈餘鹽課題請豁免一案張璿於乾隆十年因墮誤鹽餉題參革審十一年病故直至十二年五月始行審結通計侵挪認賠銅本薪本鹽課等項至有二萬七千餘兩之多而查其原籍貲產不及百分之一所有侵挪正項既已於各上司按股分賠其應賠餘課延至七八年之後又以無力請豁在張璿物故已久家產實屬全無自亦無可另辦然使於參革之時即能嚴行查追必可不至於

高宗實錄卷四三六

四

高宗實錄卷四三六

八

此且亦安知非張璿於發審之後知其虧空國帑數至累萬必干重辟而自戕其軀命乎督撫簡任封疆有澄清吏治之責使此等劣員既逃顯戮復邀豁免何足以示儆戒現在侵貪各案俱照定例辦理承審限期又經特降諭旨酌定各督撫等諒亦不致故蹈前轍可於伊等奏事之便再為通行傳諭嗣後遇有此等參案務上緊實力查辦倘仍拖延歲月終歸無著惟以分賠豁免為了事朕必於該督撫是問○是日起

上以常書紀

天於

國丘齋戒三日○己丑諭永常著即馳驛來京開泰未到之前其湖廣總督印務著恒文暫行署理○諭軍機大臣等據愛必達所奏二月分糧價清單內其各屬中有較上月相同者有較上月稍有增減者而二概註以價中字樣不無含混將就之意米糧時價有貴賤

中之分而各屬之貴賤中價又自各有不同
自應確按地方情形據實開報為是可傳諭
愛必達嗣後宜將各屬貴賤中價酌量分別
註明概不得以價中二字草率塞責又諭
貴州貴西道朱炎記其在道員中尚屬稍優
之人且歷任已久是以特降諭旨調取來京
引見以備簡用今觀其精力衰頹大不如前
於稽察屬吏整飭地方諸務恐不能辦理裕
如且開泰亦曾奏其有觀望之習可傳諭開
泰令將朱炎近日居官如何能否勝任之處
據實奏聞○博爾都噶里雅遣使已哲格伯
里多瑪諾入貢奉表言臣父昔年仰奉

聖主

聖祖皇帝

世宗皇帝備極誠敬臣父即世臣嗣服以來繼
承父志敬效虔恭臣聞寓居中國西洋人等
仰蒙

聖主施恩優眷積有年所臣不勝感激懽忭謹

遣一介使臣以申誠敬因遣使已哲格等代
臣恭請

聖主萬安並行慶賀伏乞

聖主自天施降諸福以惠小邦至寓居中國西
洋人等更乞鴻慈優待再所遣使臣明白自
愛臣國諸務俱令料理臣遣其至京必能慰
悅聖懷其所陳奏伏祈採納得旨覽王奏並
進方物具見悃忱 庚寅

上詣

南郊齋宮齋宿○諭軍機大臣等據方觀承奏
萬全縣拏獲張家灣人張英等供認二月初
八日出水溝臺汛同口外達子七巴偷馬於
十一日夜趕到水溝臺入口兵丁都不知道
所偷馬匹賣銀羣分已供認確鑿現解欽差
部郎審訊等語張英等顯係積匪其敢於出
入口汛該管兵丁必有窩藏之處所供兵丁
都不知道明有通同掩飾情弊若果係不知
何以於蒙古欲行進口之時又有放鎗逐回

之事不可不嚴行審究。著傳諭郎中福德、蘇崇阿將此案是否汎兵窩藏竊匪緣由細加研訊。務得其實在情節。不得稍有蒙混。草率。○辛卯常雩祀。

天於

園丘

上親詣行禮。○詣暢春園。問。

皇太后安。○辛圓明園。○癸巳。

上詣暢春園。問。

皇太后安。○甲午。

上御山高水長幄次。賜博爾都噶里雅貢使宴。

○旌表守正捐軀之江蘇吳縣民周添行女。

周氏。○乙未。軍機大臣議奏查乾隆七年防

守北路派兵案內。綏遠城一千名。右衛一千

名。土默特一千名。八旗察哈爾二千名。俱經

飭備調遣。今除黑龍江於上年奉旨飭備二

三千名外。所有各該處應請再行密飭豫備。

如遇調遣。應時遣發。仍不得張皇致露聲息。

從之。○戶部議覆浙江按察使同德奏稱民間認墾地畝。向由州縣給照。易啟豪強冒占。胥吏欺漁等弊。嗣後請照田房契尾例。由布政司刊照編號。於騎縫鈐印。豫發各州縣。俟認墾呈報後。即於印照騎縫處填寫業戶姓名。畝分四至。截半付業戶執收。照尾隨冊報司查覈等語。查認墾之例。水旱升科。各有年限。與田房置買。即時納稅者不同。未便照契尾一律編號填寫。惟州縣給照。該管上司。或

查察未周。易滋弊竇。應如所請。令布政司刊

照給發。如認墾後實有地瘠經墾不熟者。仍

准繳銷。從之。○又議覆浙江按察使同德奏

稱州縣訟案。大約爭產居多。查乾隆九年定

例。民間田房。如係賣契。又經年遠。即無杜絕

等項字樣。概不准贖。今請以三十年為限。限

外不得找價興控等語。應如所請。載入續頒

條例。通飭遵行。從之。○蠲緩雲南劍川州鶴

慶。禦乾隆十六七年地震水災額賦。並予賑

恤及葺屋銀兩。丙申刑部等衙門議奏閩浙總督喀爾吉善奏逆犯蔡榮祖係平和縣文生。素與南坪山道士馮珩交好。在馮珩處與平和縣民楊藕等相識。談及馮珩素曉法術。何不邀同舉事。十七年二月。衆議以蔡榮祖通曉文理。推為盟主。馮珩為軍師。在馮珩家結盟。倡議捐銀招夥。衆各允從。蔡榮祖以堂弟蔡明烈係道役。蔡涓之子。囑其打造軍器。練保等自不敢過問。蔡涓經伊子告知。亦極口慫恿。蔡榮祖又以首出庶物。萬國咸寧八字令。匠刻一偽印。並擬偽號大寧國字樣。造偽劄九十張。填給分頭招人。營兵李改林。玉標。吳天鳳等三名。相繼入夥。遂與馮珩定期十二月二十七日。打搶漳州府城。於南門外道廟會齊。以白布纏頭。白粉塗胸為記。至期蔡明烈往河下雇船。裝載火藥軍械。路經南坪山。邀馮珩同行。馮珩隨邀楊藕等駕船前進。蔡榮祖之船先已開行。時漳郡文武已

有風聲。守備葉相德帶兵赴南靖巡查。適遇蔡榮祖之船。行至湘山地方。當經盤住。於該犯身上搜出石印。並令旗偽劄軍械等件。訊供時。蔡榮祖畏罪。捏名林雄。妄稱武生。蔡卓然是總頭目。及續拏蔡卓然。並獲馮珩并蔡明烈之父蔡涓等到案。互質始供。認真實姓名。並謀反各情。不諱。蔡榮祖應擬凌遲決不待時。馮珩業經監斃。仍應戮屍。夥犯及入黨營兵。按律定擬斬絞。即行正法。均應如該督所擬定案從之。○以工部尚書哈達哈署步軍統領。○豁除江西鉛山縣水衝田五畝。有奇額賦。○丁酉諭工部查奏節慎庫修墊道路銀兩一摺。仍有浮混之處。即如直隸各州縣所辦營尖道路。雖經豫備。而並未經行駐蹕者。該部向俱指駁。不准開銷。降旨恩准開銷者。不一而足。今喜峯口等處道路。並非朕所經行之地。與直隸同。即應准銷。亦當聲明請旨。此不過以承辦之員。係石門工部。遂至

庇護。工部堂官著交部察議。○又諭據喀爾吉善奏稱。平和縣逆犯蔡榮祖等謀為不軌一案。請將失察兵丁為匪之千總張龍等失察書役為匪之知府魏崢等。交部議處。併請將該督提交部嚴加議處等語。兵丁書役潛入匪黨。該管員弁不能先事覺察。自有應得處分。但奸徒為匪形跡詭秘。失察之咎尚屬因公。且此案該地方文武先期聞信。盤獲逆首。究出匪黨。即已悉行擒捕。不致漏網。該督等辦理甚為妥速。所有喀爾吉善譚行義及千總張龍。知府魏崢等。俱著格外加恩一體免其議處。○又諭福建平和縣逆犯蔡榮祖等聚眾為匪一案。經地方文武先期聞信。盤獲匪船。究出逆黨。該督喀爾吉善派委將備四路搜捕。首從各犯全行就獲。在事員弁已經降旨議敘。並免其從前失察處分。所有協同搜捕之兵役奮勇出力。亦屬可嘉。自宜量加獎賞。著該督撫查明其擒獲首從要犯一

名著賞銀二十兩。擒獲次等匪犯一名。著賞銀十兩。令各兵役均勻分領。以示鼓勵。○戶部議覆直隸總督方觀承疏稱。萬全縣倉舊建於本城。張家口洗馬林三處計八十間。今例存米穀及額徵屯糧兵米等項。僅敷存貯。所有張家口同知積存採買穀一萬六千餘石。請於張家口下堡建倉十二間。洗馬林口內萬全縣倉旁建倉八間。另貯。應如所請。從之。○調福建建寧鎮總兵傅祿為陝西延綏鎮總兵。福建金門鎮總兵馮滙為建寧鎮總兵。江南蘇松鎮總兵黃正綱為金門鎮總兵。起服闋。江南蘇松鎮總兵王澄補原官。○戊戌。予故綏遠城建威將軍補熙祭葬如例。謚溫僖。○己亥。上御勤政殿聽政。江南河道總督高斌奏。山盱廳古溝東壩湖工係乾隆八年堵漫口後築石於深塘之內。迄今十載。工段漸見低墊。隨令加高。今於春融凍解後。中段倒卸兩頭。

俱有脹裂。總緣下係深塘。土鬆石重。難以經久。現飭補修。並令於舊石工內。退進二丈。另砌石加軌。將舊工基址。留為外護。所有工項。請飭部撥解河庫報聞。○以通政使麒麟保。雷鉉。並為都察院左副都御史。○庚子。禮部議覆。廣西巡撫李錫泰奏。稱南寧府四十八屬土司。俗多靡費。惟節之以禮。庶知儉約。請將會典律例。所載五品以下官員。應用禮數。服色各條。頒發遵行。應如所請。從之。○刑部議覆。廣東巡撫蘇昌奏。稱。例載。州縣命案。如印官公出。鄰邑寫遠。准佐貳等官代驗。廣東州縣所轄地方。間多遼濶。印官公出。而吏目典史。本城各有責守。未便遠赴相驗。查巡檢同屬佐雜。且係所轄地方。請飭就近驗報。應如所請。從之。○豁除福建邵武縣水衝寺田七頃五十七畝。有奇。額賦。

大清高宗法天隆運至誠先覺體元立極敷文奮武孝慈神聖純皇帝實錄卷之四百三十六

大清高宗法天隆運至誠先覺體元立極敷文奮武孝慈神聖純皇帝實錄卷之四百三十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將領等奉

敕修

乾隆十八年癸酉四月辛丑

上幸長春園。賜博爾都噶里雅貢使宴。遣還。賜國王敕曰。洪惟我

聖祖仁皇帝。

世宗憲皇帝。恩覃九有。光被萬方。因該國王慕義抒誠。夙昭恭順。是以疊沛溫綸。並加寵錫。今王載邁使命。遠涉重瀛。感

列祖之垂慈。踵闕庭而致祝。敬恭式著。禮數彌虔。披閱奏章。朕心嘉悅。既召見使臣。遂其瞻仰之願。復親御帳殿。優以燕賞之榮。西洋國

人官京師者。晉加顯秩。慰王遠念。茲以使臣歸國。特頒斯敕。其錫賚珍綺。具如常儀。加賜綵緞羅綺珍玩器具等物。王其祇受。悉朕瞻懷。○壬寅。

孝端文皇后忌辰。遣官祭。

昭陵。○諭哲哩木之副盟長著額駙色布騰巴勒珠爾補授。伊現住京師。著伊兄喇什納木扎勒署理。○署兩廣總督班第奏。訊得王亮臣起意圖謀不軌。與梁德黃宗漢。湛佐一。輾轉糾黨。寫刻偽劄印。捆兵搶犯各情節。與已正法之莫信豐等。前招相符。其前獲之鄧文煥。供有劉子美。曾稱王亮臣王侯貴相。并言有朱紅卓。即李開花。可以借名起事等語。今訊王亮臣。並無劉子美看相之事。且不知有朱紅卓其人。質之鄧文煥。稱轉糾蘇卓東入夥謀逆。唯恐供明罪重。因將實無其人之朱紅卓。及不知蹤蹟之劉子美。捏供以圖人不。到案。得以旦夕苟延。查蘇卓東業經高明縣

拏獲。并訊伊又有轉糾梁瑞貴一人。又前獲陳見思一犯。質之王亮臣。稱係與聞謀逆。因年老不令入夥。但曾勸王亮臣赴華封山舉事。又肩任代管家務。勸其遠逃。均屬要犯。現經分別定擬。即行正法。下部知之。○癸卯補行湖南省。乾隆十六年大計。不謹官二員。罷軟官一員。年老官五員。有疾官二員。才力不及官三員。浮躁官三員。分別處分如例。○甲辰。

上詣暢春園問

皇太后安。○諭各省鄉試。向例巡撫入闈監臨。前因封疆職守綦重。曾經降旨。將專駐巡撫省分。令於藩臬二司內。酌委一員入闈監臨。巡撫止於點名時。督同搜查。本屬因地制宜之意。但思士子扃闈考試。人數衆多。又有執事之武員兵丁等。均須約束。恐藩臬尚不足以資統理。且如江蘇、安徽三省。現據鄂容安奏稱。藩臬事務最為繁多。不便行調入闈等

語。嗣後該二省俱著仍照舊例行。其餘專駐巡撫省分。亦仍令巡撫入闈督率彈壓。俟三場完竣後。即行出闈。交與所委之司員在內辦理。庶關防嚴肅。於地方場務均昭慎重。○命翰林院侍讀宗室良誠提督安徽學政。○以翰林院編修楊方立為雲南鄉試正考官。編修沈棻為副考官。洗馬史貽謨為貴州鄉試正考官。御史李友棠為副考官。○乙巳。諭盛京戶部。刑部。三部郎中八缺。著留戶部一缺。用本處人員。餘七缺。并員外郎十六缺。主事十七缺。均以京員補用。禮部。兵部。郎中四缺。主事五缺。均用本處人員。員外郎八缺。著以京員補用。兵部一缺。餘七缺。留用本處人員。○諭軍機大臣等。據吉慶奏稱。天津縣之李七莊等處。已有蝻孽生發。滄州亦報有四五處。現在率同鹽屬及地方文武員弁。撲打焚燒。務期淨盡等語。天津一帶。地氣卑濕。向多蝗蝻生發。乘其蠕動之初。即行掃除。為力尚

易。若待其跳躍飛翔。縱使設法撲捕。已不能無損矣。吉慶所奏。頗能留心地方。但伊係武員。其於郡邑各官。恐未必能臂指相應。可傳諭總督方觀承。令其飛飭所屬。一體上緊撲滅。毋致滋生為患。再此外濱水州縣。及上年大名等屬。曾有蝗蝻之處。恐不無遺孽萌動。此時亦宜豫為消弭之計。可令其一併留心。以除民害。並將近日望雨情形。由木如何之處。作速據實奏聞。尋奏。津滄等處。蝻孽萌生。臣與鹽臣吉慶。分頭查辦。滄州現已撲除。十七八津屬。雖疊有萌生。俱甫經蠕動之時。經地方官早為掩掘。加以鹽臣督率。不致滋延。惟是大名一帶。濱水州縣。蝻子易於生發。查詢該道府。據稱並無萌動形蹟。現仍委員前往察看。得旨。是。邇日密雲不雨。益增惕息耳。又諭。張師載請以亳州州同李春明署理英山縣知縣一摺。已照所請。降旨。准其署理矣。但逆犯馬朝柱。現在尚未就擒。或仍逃

匿於附近地方。亦未可定。張師載奏內。既稱該員上年曾經委赴英霍一帶查緝逆匪。今署理邑務。可令於到任之後。上緊設法偵緝。果能實力查拏。擒捕首逆。不但准其實授。必且優加擢用。倘使要犯終於漏網。則馬朝柱之遠颺。安知非該員從前辦理疎忽之所致。可傳諭張師載。令將此旨宣示李春明知之。毋得視為通緝之案。虛應故事。致干重譴也。○以故三等男明保子德成襲爵。○丙午。諭京師自三月得雨以後。雖間得微雨。未能霑足。現今麥秋已屆。農家待澤甚殷。朕心軫念。宜申虔禱。著禮部即查照定例。敬謹舉行。○又諭。京師目下缺雨。農家待澤甚殷。朕心深切軫念。現在虔申祈禱。著刑部堂官。照乾隆十年祈雨減罪之例。將徒杖以下等罪。查明情節。或應釋放。或應減等者。即行具奏發落。其尋常案件。亦著速為完結。毋得稽延滋累。併行令直隸總督。一體辦理。○又諭。軍政為

國家大典黜陟宜秉至公。此次護軍統領慶泰、恒祿將護軍叅領福祿、都楞額、塞克圖等填注有疾。福祿等於軍政王大臣前呈辯現已病痊。慶泰、恒祿復稱其平日當差滑懶。若果如此，早應叅奏，不必俟軍政內藉填有疾且於其遞呈後又稱其滑懶前後不符。其心自難折服。慶泰、恒祿著交部查議。至福祿等雖稱病痊，平日當差想必平常。福祿、都楞額著革去護軍叅領，在藍翎侍衛上効力。塞克圖年老著原品休致，不給俸。○諭軍機大臣等方觀承題叅古北城守營軍器被竊，請將千總碩來革職。都司劉壽議處一本。方觀承辦理此案甚屬寬縱，軍器關係緊要，該弁等均有典守之責。若平時稍一留心稽查，何至屢行被竊？且失去烏鎗至一百餘桿，廢鐵至一千餘觔之多。此必非一朝一夕之事。而兵丁張德復將礮位肆行售賣，尤干法紀。該弁等漫無覺察，直至該提訪聞盤驗始行查出。

玩縱已極。看來此案非可僅照尋常失察被竊之例。効叅一二員弁希圖了事者。著傳諭方觀承令其將該營軍械被竊始自何時及該弁等有無知情故縱之處詳悉嚴查。另行據實題叅。原本著駁回。○又諭尹繼善所奏審擬延安營兵丁聚衆不法一案，足該督好名市恩之念，全未悛改。不止失之寬縱而已。陝省為西陲要地，在在設有重鎮。兵丁張廣等乃敢以製辦軍裝細故輒行聚衆鼓譟，壘塞守備衙署，刁悍不法。至此已極。若不嚴加懲創，何足以示炯戒？前曾傳諭黃廷桂令其從嚴查辦。此正辟以止辟之義。今尹繼善僅將為首之張廣主訓二犯擬以立法，其餘俱依為從例遞減其罪。豈於此等悍卒尚存姑息？以邀稱譽耶？尹繼善係屢次獲咎之人，經朕加恩寬宥。每事諄切訓誨，以為伊必感激奮勉，漸除積習。而不謂其仍然故態也。且如叅將高時農尚兵丁下跪央求庸劣不堪。既已

另疏題叅解部治罪而其摺內乃牽入伊母年老卧病意圖息事等語伊母年老卧病與伊之庸劣不堪有何關涉其紕謬無理甚不可解。豈尹繼善轉以此而取其能孝乎。若不亟思痛加煥改則伊將來獲罪之處朕不能料其作何究竟矣。此案已飭交該部俟題本到日從重改擬傳諭知之。○又諭據王進泰奏查看沁城無庸添駐防兵一摺前據綽爾多奏請於哈密並三堡河源小堡等處抽撥防兵添駐沁城經軍機大臣議令該督提確按情形妥議具奏。今據稱沁城係貿易夷人經由之地無故添設兵丁恐轉啓猜疑等語增兵防戍原為先事綢繆之計若稍涉張揚致啓外夷疑釁轉非綏靖邊疆之本意况綽爾多所議抽撥防兵之處俱係哈密要隘自未可輕為併撤有顧此失彼之虞。王進泰此奏看來尚屬妥協可將此傳諭尹繼善王進泰知之。○又諭王進泰奏稱哈密貝子玉素

布本年奏請陞見倘準噶爾稍有聲息該處恐統領無人等語已降旨玉素布令其今歲不必來京可傳諭王進泰知之。○丁未上詣黑龍潭祈雨。○福建巡撫陳宏謀奏建寧縣在籍知州徐時作捐祀田五頃七十二畝學田十畝請循例立案並載入縣志下部議尋議徐時作捐置義田與雍正十年內閣學士張照雍正十一年直督李衛捐田立案入志之例相符應如所請從之。○戊申諭軍機大臣等內務府奏據蘇州織造安寧呈請飭發圖拉之子常泰到蘇清交未完銀兩一摺圖拉交盤案內既有未清款項安寧從前即應將常泰留蘇覈對明白據實奏聞不應任其回京乃既令常泰回京又不具奏竟自行咨內務府關取殊屬不合著傳旨申飭但伊既稱圖拉尚有未清銀兩必需常泰到蘇著令常泰往蘇覈對仍令安寧將如何辦理之處據實具奏。○戶部奏查中江稅務遇更換

之期。例由盛京五部司員內揀派。所有本處及由京補放人員。俱可揀擬正陪。今兩次所擬。俱係本處人員。恐遂相沿為例。應行文該將軍等。嗣後年滿更換於本處。及由京補放人員。各揀一員。擬定正陪。送部引見。報聞。○以福建福州將軍標副將項朝選。為雲南曲尋鎮總兵。○已酉。

上詣暢春園問。

皇太后安。○戶部議奏。查得向例上三旗滿洲。

有不安分為匪者。發往拉林阿勒楚喀耕地。至另記檔案。如開戶家人。并王公佐領下隨田民人。及高麗人。一概援照發往。似無區別。嗣後請將八旗另記檔人。為匪者。停遣拉林。即照民人例發遣辦理。從之。○和碩莊親王允祿等覆奏。八旗世襲官員。清語騎射。該旗自應隨時教習。其考驗引見之處。亦應酌定章程。以示鼓勵。查各員內。有兼管參領。佐領印務章京事務者。俱係簡放人員。其幼官。亦

設有兩翼官學。平時教習。均毋庸議。請嗣後年逾六十以上者。扣除不入引見。餘由值年旗於秋間帶領引見。倘平時屢加教導。仍復技藝生疎者。臨時參奏。另請揀選承襲。此次引見承襲後。每值軍政年分。交派出之王大臣。照例考驗。請著為例。得旨。依議。如秋間引見時。仍有不嫻騎射者。惟該都統是問。○甘肅巡撫鄂樂舜疏報。靈州墾地四千五十七畝。○庚戌。戶部議覆。署湖南巡撫范時綬等疏。稱酌議榔桂二州礦廠章程。一。廠務飭該管知州監督。道員總理。一切抽課起運報銷。委佐貳等官經理。以一年期滿更替。一。礦廠設有委員。應添建廠房。於抽收砂課項下動支。報部覈銷。一。各廠砂課。並實貯之銅鉛錫。由該委員監收支放。一年期滿。聽該管道員盤查冊報。一。各礦派員專管。仍令該管道員給連三印票。一。客販收執。一。存廠備案。一。解司稽覈。其砂課並銅鉛錫登放各簿。亦鈐道

印。銅鉛錫砂色。責令委員嚴督商人於估砂時據實分別高下。照例抽課造報。一焦源河口添設卡一卡員。一所有卡房並官役薪費統於增建廠房案內造報覈銷。應如所請從之。○兵部議覆直隸總督方觀承奏稱蘭溝南石槽密雲縣要亭子。蟠龍山。涿州南關等六處煙郊白澗桃花寺隆福寺黃新莊半壁店秋瀾梁格莊等八處看守行宮員弁應准其於督提二標天津泰寧二鎮所屬各營內把總缺出於本營外委拔用九缺之後將該弁考拔一缺以示鼓勵。應如所請從之。○辛亥戶部議准福建巡撫陳宏謀疏稱各年由臺配載兵米船被風擊米沒無存者應予豁免從之。○壬子

上詣暢春園問

皇太后安。○命湖廣總督永常護軍統領努三

馳驛前往安西並頒給欽差大臣關防。○癸

丑

上御勤政殿聽政。○諭今日朕御門理事編修周於禮誤隨起居注官登階站立勝保恰與聯接即應指飭下階乃朕向伊降旨而伊仍茫然不解輒行匆遽前跪周於禮係邊省新進翰林未諳儀制勝保以滿洲講官憤憤若此豈於侍從儀節全未諳習耶周於禮免其議處著將勝保交部察議。○以翰林院侍讀學士覺羅奉寬為詹事府詹事。○甲寅諭軍機大臣等內閣學士錢維城奏浙省蕭山等縣之江海塘等工請復民間歲輸修理之例一摺所見頗是塘工關係民生從前悉令改歸官修原屬軫念民勞之意但事經動帑官辦即未免輟轉遷延其工費稍鉅者固不便取足閭閻如遇小有坍塌應行培補之處需費本屬無多自不若酌從民便聽其自為修補俾得隨時辦理較為有益若將此通行各省恐啓輕用民力之漸且滋物議其浙省既有舊例可循著將原摺鈔寄雅爾哈善令其

仿照斟酌行之。尋奏。紹興所屬山陰。會稽。蕭山。上虞。餘姚等五縣。沿海一帶土塘。舊係民間按畝捐輸修補。乾隆元年。准部行文。遇應修段落。官於存公項下。動支辦理。臣體察民情。所有五縣土塘。除工大費繁。另行酌辦外。其每歲小有坍塌之處。仍聽民修為便。報聞。

○定

太歲壇祈雨樂章。大學士等議奏。查乾隆十七年。經禮部奏。祈雨告壇。自乾隆七年。始增

樂章

五

用樂。與一應祇告不作樂之例。似未盡一請停止。今面奉諭旨。祭禮用樂。以導和氣。而格神祇。乃事神之禮。與齋戒徹懸。自致誠恪。其義各異。且樂足以宣通陰陽之氣。祈雨致祭。仍用樂為是。請飭禮部。嗣後祈雨祭壇。遵用樂。再查乾隆七年。議定祈雨儀注。太歲壇所用。乃歲祭通用樂章。與祈澤之義。無涉。應交樂部。另行撰擬。載入會典。得旨。是。尋撰進樂章六奏。迎神。奏需豐之章。初獻。奏宜豐之

章。亞獻。奏進豐之章。終獻。奏協豐之章。徹饌。奏應豐之章。送神。奏洽豐之章。○乙卯。上詣暢春園。問。

皇太后安。○是月。盛京刑部侍郎吳達善奏。盛京五部京察。向於吏部題覆到時。並不宣示。除卓薦察劾人員外。其餘等第優劣。該員等皆未周知。似不足以昭激勸。請嗣後部覆到日。會同各部。將考察過人員。按冊唱名宣示。得旨。著照所請行。○直隸總督方觀承奏。天

學集卷之三

二

津。靜海。滄州。鹽山等縣。近日俱有蝻孽生發。臣親至津屬捕蝗處所查看。並嚴飭各縣。上緊焚撲。自可不留餘孽。再生蝻之地。掘土察驗。二寸以下。即屬潮潤。麥苗不致受傷。日來得有陣雨。田禾頗受涼潤之益。得旨。目下乃最要之時。朕日夜焦思。此奏不無粉飾。至蝻蝗事。更應上緊督率。其一切綢繆。亦應豫為留心也。○江蘇巡撫莊有恭奏。據淮安府知府趙百稟稱。淮民習於游惰。不知紡織為何

事因募織工。並備織具。設局教民學習。淮關監督高恒。聞即捐款。於板閘添設一局。各道廳於清河添設一局。紳衿耆庶。亦皆鼓舞。有自募紡人。在家學習者。再查淮屬可種木棉。而民不知點種之法。該府購買棉子。募匠率山陽農民。分頭試種。將來結實。亦可資衣食。大約淮泗以南。病在不儉。淮泗以北。病在不勤。今將該府所定紡織規條。鈔發徐海各府州。飭令遵照辦理。得旨。甚好。○閩浙總督喀爾

平定奏

三

吉善等奏。淡水同知稟稱。所屬大浪泵港。豎有紅布旗。上寫周尙孫郭四字。及統領淡八社壯番民等字樣。根究實係民人劉和林。因圖利起見。欲奪郭騰琚所充通事。遂製旗插豎。以冀陷害。茲劉和林業經拏獲。不致驚擾地方。得旨。是應重處。不應姑息者也。○又奏。逆犯蔡榮祖案內。從犯葉肇。於收禁府監後。越獄在逃。旋經平和縣派兵帶同該犯家長葉景廉。於銅壺山洞內擒獲。查該犯原係叛

案牽連人犯例。擬遣烏喇。乃收禁未遣。復行越獄。應加重定擬。斬決。俟奉到諭旨。即於漳州本地正法。得旨。應如是辦理。○福建巡撫陳宏謀等奏。閩省命案。起於械鬪者居多。揆其所以糾鬪之由。多因有事告官。不即公為審斷。且案犯抵罪。止問下手之人。而主謀者率多漏網。臣等嚴督地方官。遇事速審速結。不許拖延。如有械案。必究出主謀糾約之人。按例定擬。並查有家室者。僉妻發遣。俾有所牽制。查乾隆十三年。奏准三年之內。地方如無械案。將族正約正。從優獎勵。今應實力奉行。果能積年安靜。其族正房長官。為給扁示獎。倘平日不能勸導。臨事坐視。又不報官。即照例一體連坐。得旨。總在汝等實力整飭。所謂有治人無治法也。○雲貴總督碩色奏。開化鎮府稟報。有附近夷民。傳布印帖之事。當將首犯李士明。楊天才等拏獲。並搜出木印模。及布印帖偽牌等件。訊稱交趾地方有漫

棍徒人傳帖招人。幫他攻打交趾。臣思。棍人
即有招人情事。而內外疆界攸分。豈能傳至
內地。供詞未為確據。旋據稟獲得過偽劄人
犯數十名。並起獲鎗刀器械。實屬聚眾不法。
其首從各犯。已拏獲八九十名。分別定擬得
旨。好。○又奏。麗江府屬女土弁。未志明頭人
王芬。保長和。為貴催頭。和可清。等於改土歸
流後。仍循夷俗。收各寨山租陋規。又任所管
康普。樞子。赴球。獠地方。放債取利。準折入口。

平錄卷四十七

三

送充規額。殊屬藐法。今該女土弁。自首交出
球夷男婦五十八名。口情願出賃送還。姑予
免議。外其頭人。保長。催頭等。照例枷責。並出
示曉諭。如管下再有放債準折等情。即照紅
苗越境搶奪例。辦理報聞。○貴州巡撫開泰
奏。古州兵糧三百七十八石。向由該州衛田
運納。其地在朗洞之東。八九十里。距古州二
百餘里。擔運維艱。朗洞營兵糧。向由粵省運
經古州。遞送朗洞。而朗洞附近之租。又需運

往古州。往返周折。臣酌量情形。飭將古州衛
田租。就近改運朗洞。即於朗洞撥運粵米內
照額扣貯古州。抵支兵糧。得旨。好。

平錄卷四十七

示

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十七

大清高宗法天隆運至誠先覺體元立極敷文奮武孝慈神聖純皇帝實錄卷之四百三十八

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲部統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲部統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉五月丙辰朔諭欽天監滿

漢監副著各裁去一員添設西洋監副一員

嗣後漢監正缺出著將漢監副及西洋左右

監副一併開列請旨○諭軍機大臣等軍營

駐防之喀爾喀兵向仰給於扎薩克後經加

恩月給羊價每名一兩五錢乾隆六年因徹

內地之兵餘米頗多復增給月米一斗但此

項米放完後內地運往維艱且喀爾喀人等

食牲度日止須給予羊價存米放完竟可停

給其鄂爾坤駐防之兵原為保護喀爾喀游

牧而設仍酌令各盟照例給養至軍營大臣

官員及內地兵米應如何運往之處著傳諭

舒赫德詳議具奏○禮部議覆陝西布政使

張若震奏稱各省舉行鄉飲酒禮事不畫一

應請嗣後每歲於十月中舉行一次紳士內

舉一為大賓耆庶內舉一為介賓一為耆賓

詳准督撫各衙門咨部存案如舉鄉賓後其

人有犯即詳斥並報部除名查順天鄉飲每

歲於孟春望孟冬朔舉行各直省亦應遵例

於正月十月舉行二次至賓介之數儀禮有

大賓介賓眾賓及遵會典鄉飲酒圖有大賓

介一賓二賓三賓眾賓一僎二僎三僎未有

云耆賓者該布政使所稱舉一為耆賓之處

無庸議至遵僎義同乃公大夫之居鄉者來

助主人以樂賓有則備無則缺可也應令地

方官察實舉報仍將賓介開具名籍送部存

案如舉後有犯應如所請咨部除名從之○

廣東提督胡貴奏增城縣逆首王亮臣等陸

續就擒。將在事員弁分別獎賞。並查前失察職名開叅。至臣到任兩月。未能先事查拏。請交部議處。得旨。該部知道。奸徒為匪。地方文武員弁。不能先事覺察。自有應得處分。但一經發覺。即能實力擒獲。匪犯不致漏網。尚屬奮勉可嘉。其在事出力員弁。著加恩分別議敘。從前失察各員。俱從寬免其查叅。提督胡貴。到任未久。亦著加恩免其議處。○丁巳。諭軍機大臣等。近來旗人在外省者漸次日多。循良之徒。奉法惟謹。其有不安本分者。希冀招搖詐騙。或至冒稱宗室。滋生事端。俱未可定。地方官員。不免受其欺壓。試思天潢派系。統屬宗人。豈有遠離邸第。浪蹟萍蓬。在外招搖滋事之理。其為棍徒捏冒。不問可知。若有似此情節。不可不嚴行查辦。著傳諭直省各該督撫。嚴飭所屬。留意稽查。倘遇有冒名宗室。竟著紅黃腰繫。恣行無忌。大干法紀者。即密行查拏。奏聞正法。俾知所懲儆。不敢妄行。

於國體亦得矣。○軍機大臣等議奏。八旗蒙恩新增馬甲一千。並著於健銳營建房給住。查此項一千甲缺。滿洲都統。每旗應增九十。四缺。蒙古都統。每旗三十三缺。請交各該旗於現在養育兵內挑補。俟健銳營兵房造竣。遣往居住。其如何管轄操演之處。聽健銳營辦理。此項所遺養育兵缺。即按照一兩五錢之數挑補。再查養育兵。滿洲蒙古漢軍二十四旗。共額一萬五千一百二十四名。向支月銀二兩。今於每名下酌勻五錢。六缺內可勻出二缺。又恩添二缺。統計於原額一萬五千一百二十四名外。共增一萬八十八名。此項增出之缺。請按照滿洲蒙古漢軍旗分。勻撥挑補。並請嗣後八旗原額養育兵缺出。各旗均照一兩五錢之數挑補三缺。增挑勻額一缺。月銀亦照一兩五錢支給。從之。○兵部議覆直隸總督方觀承疏。稱直隸宣化鎮懷來路為衝要差繁之地。向止設馬守二項兵丁。

並無步糧。請於張家口協營下抽撥步兵五十二分。分派懷來路三十二分。懷來城二十分。即於守兵內揀選拔補。所遺守糧歸於張家協營召募補額。應如所請從之。○以河南城守尉保住為寧夏左翼副都統。○戊午。孝誠仁皇后忌辰。遣官祭。

景陵。○諭軍機大臣等。喀爾吉善等奏據提臣李有用札稱。諸羅縣知縣徐德峻親往鹽水港等處緝盜。被海豐莊民鳴鑼糾眾執械圍逼。令該知縣寫立甘結始得放回。又彰化縣巡檢張振勳捕賊起賊。該處民人執械搶犯一摺。喀爾吉善等所奏。僅據提臣札牘之詞。於此二案起釁根由。並實在情形。尚未詳悉。臺灣海疆要地。番夷雜處。民風素稱刁悍。今地方官員親拏賊盜。而奸民聚眾。竟至拘圍知縣。勒寫甘結。打傷差役。搶奪案犯。此等刁風斷不可長。若非痛加懲治。何以警伏莠頑。又安良善著傳諭喀爾吉善陳宏謀令其查

審確實。從嚴辦理。仍將實在情由詳悉速奏。○直隸總督方觀承奏據各屬報雨情形。惟順天府屬並宣化易州多已霑足。其餘均止一二寸不等。天河正順。四府乾暵較甚。再查蠲孽天津滄州報有四十餘處。靜海二十一處。現用以米易蠲之法。分路設立廠局。凡捕得蠲子一斗。給米五升。村民現俱踴躍搜捕。此外如鹽山南皮慶雲順天府屬之寧河霸州遵化州屬之豐潤等處。雖間有生發。已隨時撲打。至易蠲米項。臣飭於本處倉貯暫行動撥。並天津貯有採買奉天米項。亦可撥放。俟事竣奏請撥還。得旨覽奏俱悉。京師雖已霑足。保陽尚亦望澤。不應因此處不祈而外郡亦不祈也。仍竭誠祈雨。必需足優渥。方釋懸望耳。有應行籌濟之事。亦即速辦。○調福建金門鎮總兵黃正綱為廣東瓊州鎮總兵。以京口水師副將楊天柱為金門鎮總兵。○己未。諭額爾克錫拉病故。例予遣奠。著西寧

副都統舒明前往。順將旺丹多爾濟帕拉木游牧情形查看。如有應行籌辦之事。即行奏辦。○諭軍機大臣等。據總督方觀承奏。稱各屬稟報。惟順天府屬並宣化。易州。得雨多已霑足。其餘均止一二三寸。天河正順。四府乾暵較甚。高下麥田。均已減收。再。蝻孽惟天津。滄州。二處為甚。靜海。次之。各該處現用以米易蝻之法。分路收捕等語。天津一帶。蝻孽生發。前據吉慶奏到。其督率撲捕。尚見留心民事。但近日蝻孽情形如何。曾否查搜淨盡。於田禾有無妨礙。自應隨時奏聞。至天津各屬。乾暵較甚。得雨並未霑足。不獨二麥必減分數。當此秋禾生發之際。望澤尤殷。不知亦曾竭誠祈禱否。吉慶何未奏聞。侍衛拜雅爾昨於京城祈雨有應。今特令馳驛來津。祈求雨澤。所有一切應行豫備之事。著吉慶速行料理。務期仰邀天佑。甘霖優渥。方釋懸念耳。可一併傳諭知之。

尋吉慶奏。侍衛拜雅爾來津。並蒙頒到鮓答石三塊。令交虔誠祈禱。當即出郊接捧至壇。交拜雅爾恭設誦經。旋陰雲密布。於初十日亥時起。至十一日未時止。甘霖大沛。所有鮓答石三塊。恭繳報聞。○予故察哈爾總管兼副都統銜達什祭如例。○以故四川松茂道屬祈命寨土千戶拔各笑子阿革襲職。○庚申。

上奉

皇太后幸萬壽山。侍膳。○辛酉。

上詣暢春園。問

皇太后安。○軍機大臣奏。張家口牛羊羣總管惠色等。審擬蒙古賊犯朋蘇克偷盜塞楞達什馬匹。賄通汛兵劉成。私放進口一案。詳覈案情。非蒙古積匪。無由熟悉徑路。非兵丁通同。不能越進關隘。劉成應照駐劄外邊官兵偷盜蒙古馬匹例。擬絞立決。朋蘇克兼有另案偷竊。應照盜蒙古四項牲畜例。擬絞立決。

又另案賊犯任黑子等十一名。應如該總管所擬。照本例擬絞監候。至總管惠色。總兵吳士勝。約束不嚴。請交部嚴議。得旨。朋蘇克著即處絞。劉成著改為監候。餘依議。○癸亥。諭現在刑部辦理秋審案件。其中緩決人犯。閱時既久。為數益多。爰書日覺紛繁。罔罔徒滋淹繫。朕心深為憫惻。著該部查明。朝審秋審各犯。酌其情罪稍輕。緩決至三次以上者。分別請旨減等發落。至此外有情罪本重。歷年查辦未經寬減。而定案在康熙雍正年間。緩決十餘次。至數十次內。有一綫可原者。亦著查明分別請旨。○吏部帶領考試。截取滿洲進士。舉人。富炎泰等三十六員。引見。得旨。富炎泰。布彥孝。順阿。趙德榮。何紳。巴德那。淳。麻致祥。吉來奇。寵格。七十一。心。常常喜。文達。吉郎阿。郭明安。篤哈德。昌朱成阿。關保。依常阿。薩丙阿。著記名。以知縣用。鄂寧著在戶部額外筆帖式上。學習行走。關達。白英。九十四。人。

既平庸。更全失旗人本色。關達。白英。著在粘竿處拜唐阿上。學習行走。倘有不勤。即叅奏治罪。九十四。著交與伊父鄂樂舜任所。嚴加教訓。俟知禮法。習政事後。伊自奏聞。討差使。餘著歸原班用。○兵部議覆。兩江總督鄂容安疏稱。太湖協下。向未設有隨營備弁。查該協左營分防之簡村守備。事務簡易。請於左右營。增設千總二員。一在守備之原駐簡村分防。一隨守備調回本協營下。以資調遣。應如所請。從之。○甲子。諭軍機大臣等。據吉慶奏。本月初四日。靜海得雨二三寸。初六日。親歷天津縣各處查勘。得三四寸。雖於大田有益。究未深透。霑足。民間望澤仍殷。現在竭誠祈禱等語。前據方觀承奏。稱直屬惟順天屬宣化。易州。得雨霑足。其餘各處。均止一二三寸。天津河間等四府。乾暵較甚。麥田俱已減收。朕心深為懸切。今天津靜海。雖得雨數寸。均未霑足。而保陽以南一帶。各府屬地方。數

日以來未知曾否得有雨澤。現在情形若何。著詢問方觀承。令其查明速奏。仍一面虔誠祈禱。以冀甘霖優渥。倘有應行籌辦接濟之事。即行奏聞速辦。○乙丑鑄給湖南衡州常德辰州各府同知。永州寶慶常德各府通判。關防從巡撫范時綬請也。○丙寅諭廣東增城縣逆匪王亮臣一案。該督阿里衮聞信之日。即親往查拏。辦理甚合機宜。該提胡貴協同搜捕。亦詎勉出力。現在奸徒首從。以次就擒。固有竄逸。其在事文武員弁。前已降旨加恩議敘。阿里衮胡貴著交部一併議敘。該撫蘇昌以地方如此重案。尚存苟安息事之心。後見其事難於消歇。始親行前往。乃其屢次奏覆情節。終覺心存取巧。未泯成見。不思和衷以濟公事。免處分為幸。不必議敘。○吏部議准前任兩湖總督永常等奏稱恩施縣之北鄉木貢村地方。山深箐密。最易藏奸。請將該縣縣丞移駐彈壓從之。○予故福建巡撫

前浙江布政使潘思渠。入祀浙省賢良祠。○
丁卯

上御勤政殿聽政。○諭軍機大臣等。前據楊應琚先後奏稱。東省四月以來。久無雨澤。五月初一日。省城得雨五寸。濟南曹州泰安武定等屬。各於四月二十六七日。得雨一二寸。現在委員巡查。各屬俱無蝗蝻。惟濟寧汶上魚臺等州縣稟報。南旺湖中。涸出葦草地內。生有蝻子。尚係黃白色。俱經撲打盡絕。而果否確實。擬親往查勘等語。目下秋禾正當生發之際。必得雨澤霑足。方於農田有益。看來各屬得雨。尚俱未透。不知數日以來。亦曾續沛甘霖否。可傳諭楊應琚。務令隨時速奏。以慰懸念。至濟寧等處。近因蝻孽萌生。此惟在地方各官。實力搜捕。庶可弭患於未然。若委員巡查。虛應故事。道府委之州縣。州縣又委之胥役。差役下鄉。徒滋擾累。村農未受捕蝗之益。先受捕蝗之害矣。楊應琚現既親往查

勘務督率屬員上緊搜捕。不致稍留遺孽。其地方胥役。并宜不時嚴加查察。勿徒以奏明親往。遂為了事也。可一併傳諭知之。○又諭蒙古漢人。同屬臣民。敘入章奏。祇應稱蒙古內地。乃向來督撫奏事。往往有稱為蒙漢者。屢經降旨申飭。今鐘音奏報地方情形摺內。又有蒙漢相安。並無滋擾之語。紕繆不合。著傳諭申飭。○禮部議准。順天學政張泰開疏。稱乾隆九年。遵化州改為直隸州。豐潤。玉田。

實錄卷四三八

下三

二縣。向隸永平府。改撥該州統轄。所有二縣撥府文武童生六名。亦改撥州學。查豐。玉。二縣。始由順天府改隸永平。順天府向無府學。是二縣原未帶有撥府童額。嗣因改隸遵化州。遂以永平進額減為撥州之數。是永平府學。不因二縣而增。自不便因改撥而減。請將該府撥減文武生六名原數復還。從之。○以太常寺卿德通。太僕寺卿孫灝。並為通政使。○以編修佟保。充日講起居注官。○蠲免廣

東豐順海陽澄海等三縣乾隆十七年水災額賦。○戊辰遣官祭

關帝廟。○陝西巡撫鐘音奏。承審叅案。新限兩月。查向來被劾之員。雖當經摘印。必俟部文到日。然後集訊。嗣後請於該員摘印後。即將款証人等。先行審辦。部咨到日。照例定讞。於兩月限內。可以辦結。報聞。○已巳。諭軍機大臣等。昨因楊應琚奏報東省得雨。尚俱未足。於本月十二日。傳諭該撫。令將數日內。曾

實錄卷四三八

下四

否續沛甘霖。隨時速奏。并令督捕蝗蝻稽查州縣胥役。毋使滋擾。今該撫奏到摺內。仍稱得雨。州縣未盡霑足。本月中旬。再得透雨。則西成可期等語。又另摺內。稱履勘東平之安山湖。並無蝻子蹤跡。其汶上嘉祥等屬。所生蝻孽。實已撲滅無遺。運河水勢微弱等語。看來東省得雨。全未霑足。其運河水勢減弱。亦因雨勢稀少所致。且湖澤乾涸。尤易生蝻子。是以從來蝗之為害。惟沿河州縣為甚。今雖

所在撲滅。若非即得透雨。仍恐餘孽未盡。可再行傳諭楊應琚。令上緊搜查。不得以已經親勘淨盡無遺。遂謂可以無慮。并令將現在如何搜捕。及沿河州縣。日內曾否得有透雨之處。作速奏聞。○湖北巡撫恒文奏黃安縣稟稱書識藍之玉。見有馬朝柱逆書一封。持繳到官。查逆書已折。內有稿上門上控道府等語。封口寫仰羅山縣字樣。當即委員赴羅山密訪。並行文河南一體查緝。旋據委員訪得該縣汪沁。本年僉點官銀匠八家。餘懷怨憤。串通已革櫃書王汝梅。屬生員閔潤民等。商做逆帖。交銀匠魏爾爵送至黃安。以圖傾害羅山縣官。此案應聽河南撫臣審辦。得旨知道了。總之馬朝柱一日不獲。此等側見旁出。鬼蜮伎倆不息。勉力查緝。馬朝柱可耳。何至今尚無消息耶。○庚午。以翰林院侍講圖轅布為四川鄉試正考官。禮部郎中馮成修為副考官。翰林院編修劉墉為廣東鄉試正

考官。編修謝溶生為副考官。御史溫如玉為廣西鄉試正考官。禮部員外郎陳大復為副考官。翰林院侍講汪廷璵為福建鄉試正考官。御史毛輝祖為副考官。翰林院編修邵樹本為湖南鄉試正考官。編修李承瑞為副考官。○以故三等鎮國將軍亮京子恒文。照例襲輔國將軍。休致奉恩將軍熙成子成翰襲職。

大清高宗法天隆運至誠先覺體元立極敷文奮武孝慈神聖純皇帝實錄卷之四百三十八

大清高宗法天隆運至誠先覺體元立極敷文奮武孝慈神聖純皇帝實錄卷之四百三十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉五月辛未

上詣暢春園問

皇太后安○詣

大高殿行禮○還宮○蠲緩浙江仁和海寧山

陰蕭山諸暨上虞等六縣仁和場乾隆十七

年水災額賦並予賑恤有差○壬申諭軍機

大臣等據喀爾吉善等奏稱諸羅縣海豐莊

刁民糾衆圍逼知縣徐德峻勒寫甘結及彰

化縣巡檢張振勳捕賊起賊被該處民人執

械搶犯二案現在究追兇黨按名弋獲嚴加

懲創以示炯戒等語臺灣為海疆要地此等刁風斷不可長已傳諭該督撫令其查審確實從嚴辦理今既先後拏獲數十人著即嚴飭該道府作速審究其應行正法之犯於定案之日一面奏聞一面即於該處正法示衆不必俟具奏得旨方行辦理蓋臺灣距京甚遠輾轉稽遲已隔數月海外愚民漸忘其事亦何以知所惕畏乎至另摺所奏彰化縣屬之大肚社豎旗一事其中情節甚不明晰趙悻以受趙新欺侵既以豎旗希圖陷害何以並未有人指證即先自行投首其情理殊不可解必宜詳悉根究務得實據以懲惡習不可據以趙悻為正犯將就了事以致案情終留疑竇也可一併傳諭知之○又諭湖北黃安縣照壁上潛掛馬朝柱寄羅山縣汪沁字札前據恒文奏稱該縣汪沁已經究出櫃書王汝梅與生員閔潤民等商謀捏造今蔣炳所奏委員前後具稟情節又迥不相符現既

提犯到省。親加確訊。是否果係王汝梅。與閩
潤民等。通同捏造。抑另有正犯。尚須訪緝。自
應虛心體察。詳細研究。但閩札中語氣。必係
與該縣素有嫌怨之人。且知衙門事體者。所
為。在汪沁因事涉已身。亟欲造札之犯。早有
歸著。於王汝梅等。不無刑求周內之處。而此
等奸徒。挾嫌誣陷。非確有指實證據。則其倏
認倏翻。以為狡卸之計。亦未可定。著傳諭蔣
炳。令其一面密為訪查。一面詳悉推鞠。務得
捏造正犯。重治其罪。至馬朝柱一犯。久未弋
獲。致令奸徒鬼蜮之伎。往往藉此設謀誣陷。
前已屢經傳諭各督撫等。上緊緝拏。豫楚壤
地相接。該撫勉力查拏。毋以久而生懈。可
一併傳諭知之。○是日起。

上以夏至祭

地於

方澤。齋戒三日。○癸酉。諭。獄重案。勅交三法
司核擬。原期詳慎。以昭平允。其事屬眾議。僉

同。固成信讞。如或跡涉兩是。間有一二人不
能盡歸畫一者。自不妨各抒所見。俟旨酌奪。
向來原未定有不准兩議之例。今據左都御
史梅穀成。於召對時。奏稱近年法司辦理刑
名。每以兩議為諱。朕前因刑部。都察院。每各
持意見。彼此分明。竟成兩衙門相角。此實惡
習。有關政體。是以降旨訓諭。而乾隆六年。大
理寺少卿周倭。因奉有訓飭諭旨。遂奏請畫
一具題。夫獄一成而不變。案情律意。推校不

憚周詳。要歸一是而已。固不得逞其偏見。攘
臂相爭。而避立異之名。苟且附和。亦豈國家
設官集議之本意。且懦黯者。轉得藉口。以為
蒿目無策。嗣後三法司核擬重案。如有一二
人意見不能相同者。原可兩議具題。但不得
合部合院。各成一稿。朕欽恤庶獄。不厭博咨。
諸臣亦當悉祛成見。勵乃靖共。將此通行曉
諭知之。○諭軍機大臣等。據方觀承奏。宣化
鎮總兵吳士勝稟報。獨石口兵丁。因副將安

泰醉後混行責打。聚衆辭糧一案。現飭按察使永寧前往會同口北道嚴察究訊。並將該鎮辦理情節徹底查明。叅奏等語。副將安泰嗜酒召釁。殊屬不職。而兵丁等藉端滋事。尤干法紀。自當嚴行究處。以肅軍政。而儆刁風。至總兵吳士勝。既不據實揭報於平時。又不詳查妥辦於事後。種種乖謬之處。不一而足。已據方觀承委令永寧前往查辦。可令該督再行飛飭該司等將此案起釁緣由。並案內首從各犯。及吳士勝前後錯謬情節。一一詳悉確訪。嚴查辦理。務須秉公據實。不得稍存瞻徇姑息之見。再羅田一案。首犯馬朝柱遠颺未獲。屢經飭諭江廣及各省督撫嚴密躡緝。協力查拏。迄今將屆一載。杳無著落。如尚潛內地。諒無不就獲之理。口外地方遼濶。易於藏奸。恐該犯因所在偵緝無地可容。或竟潛蹤遠竄。希圖漏網。亦未可定。可令方觀承遴委妥幹員弁。往口外一帶地方密行體訪。

留心蹤跡。倘由此竟得首惡渠魁。明正典刑。亦一快事也。一併傳諭知之。○軍機大臣等議奏。戶部尚書蔣溥奏稱。上年御史陸秩條奏漕米抵通。如經抽驗潮濕。曬颺折耗。准該丁以所帶餘米作抵。如無應抵之處。餘米免其交納。臣思餘米亦屬正供。准其作抵。該丁等未免任意收兌。或致正供有虧。此項餘米必須另議歸款等語。查原帶耗米。本係額供正賦。自應照數歸倉。嗣後米色潮濕。曬颺折耗者。准買別幫食米抵補。如補不足額。照起欠例。於下年搭解完交。得旨。陸秩託言曬颺市惠旗丁。以致滋弊。著嚴飭行。餘依議。○甲戌。

上詣
北郊齋宮齋宿。○乙亥。夏至。祭地於
方澤。
上親詣行禮。○詣暢春園問。

皇太后安。○幸圓明園。○丙子補行山東省乾隆十七年軍政卓異官三員。有疾官年老官各一員。分別陞賞處分如例。○丁丑諭。瞻對案內草職間擬之總兵袁士弼。前已降旨減等發落。核其情罪。猶有可原。且久歷行間。精力尚堪驅策。著加恩以叅將用。○考選八旗軍政。不謹官十二員。罷軟官四十一員。年老官三十三員。有疾官二十八員。才力不及官二十一員。照例分別處分有差。其曾經出兵打仗之年老官三十四員。有疾官十六員。賞給全俸半俸有差。○戊寅。

孝恭仁皇后忌辰。遣官祭。

景陵。○諭各省標營。分年特派大臣查閱。及督撫提鎮有統轄操防之責。例應以時巡視。所以簡軍實。嚴武備也。自以各兵之漢仗技勇為本。至於旗幟衣帽。期足以別隊伍。整軍容。無缺可矣。奚事增美為。近來外省營汛。每遇大員蒞閱。往往先期部署。為一切觀美計。製

造旗幟。更易號衣。公費不足。遂坐扣兵餉。以致伊等生計維艱。是營伍未有整頓之實。而兵丁先被扣餉之累。殊非巡查簡閱之本意。嗣後查驗兵丁。務覈其實。毋以旗章衣服粉飾外觀。至或有欽差大員經過。營汛地方兵丁。循例站隊者。亦俱無庸張設旗幟。總之整飭戎行。全在漢仗技勇。其緣飾之具。皆屬無益之虛文。而因以扣餉瘠兵。則尤其大不可者。著通行各省督撫。提鎮咸共知之。○又諭。

據莊有恭奏。丁憂服滿知縣王名標。前經推陞貴州永寧州知州。原任撫臣王師奏請。以陞銜仍留元和縣知縣任。今回籍服滿來蘓。應坐補原缺。但王名標籍隸山陰。在五百里之內。與例未符。請令赴部另補等語。王名標著仍發往貴州。以知州補用。向來近省州縣內。往往有陞任遠省。而該督撫以人地相需。奏請陞銜留任者。雖係因地方起見。亦易起規避之漸。嗣後各省奏留人員。如遇丁憂。

事故起復之日。俱著仍赴陞任省分候補。著為令。○諭軍機大臣等。楊應琚奏續得雨澤情形一摺。殊未明晰。東省四月以後。農田待澤甚殷。必期深透。足方慰懸望。今所奏五月十一二等日。各屬或得雨一二寸。或四五寸不等。而是否霑足。抑或尚未深透。其正當虔誠祈禱。及豫為設法調劑之處。並不詳細奏明。至該省閘河。朕聞現在水淺。摺內亦不行奏。及看來楊應琚。雖不至有心粉飾。然深

上詣暢春園問

皇太后安。○諭閩粵等省。民俗刁悍。官司差捕罪人。動輒聚眾毆奪。而定例止坐首犯。其未經傷人者。即首犯亦罪不至死。附和之徒。俱

得遞從末減。故愚民無所惕畏。罹法者眾。而各省近來效尤者亦多。從前康熙年間。因直省盜案甚多。特嚴不分首從之例。而盜風遂輯。嗣後各省有毆差奪犯致斃人命者。俱著不分首從。即行正法。其但經聚眾奪犯。無論曾否毆傷差役。即照因而傷人律從重擬絞。若數年後。此等案件漸就減少。再為酌量降旨。仍復舊例。該督撫可通飭所屬。嚴切曉諭。俾愚頑咸知奉法不犯有司。亦辟以止辟之道也。

○工部覆奏御史李文駒奏。臣部查估萬安倉工程遲延之處。著臣等明白回奏。查三月十二日。臣部接到該倉來文。隨派司員。并移知該倉委員。會同查估。因倉員意欲增估。不肯與臣部派員。公同畫押。復經文催至今。尚未覆到。得旨。此事明係工部遲延。及令查奏。並不將遲延之處。據實奏明。殊屬取巧。工部堂官著一併交部察議。其現在估計工程。該司官與旗員。有無意在增減。著公德

保侍郎德爾敏。前往據實確估具奏。○豁除甘肅中衛縣白馬寺灘水衝沙壓陂亢地一萬八千四百九十畝有奇額賦。○庚辰諭軍機大臣等。今日馬燦奏報訪聞武清續生蝻孽一摺。殊未明晰。所屬果有續生蝗蝻尚足為災。即當極力搜捕。以期不留餘孽。如已淨盡不致遺患。即當回京。不必久羈郊外。逡巡觀望也。再京師自初間得雨之後。今閱半月有餘。目下又復望澤。其馬燦經過地方田禾光景若何。亦應不時入告。以慰軫念。摺內何以竟未奏及耶。可一併傳諭知之。○又諭直隸各屬。前據方觀承奏報。於本月初十一兩日得雨之後。又將及兼旬。京師天氣炎燥。望澤甚殷。不知各屬中亦曾續得甘霖否。此時麥收已畢。秋禾光景如何。何不隨時奏聞。以慰懸切。傳諭方觀承接到此旨。即將地方情形速行繕摺具奏。○辛巳。上御勤政殿聽政。○諭軍機大臣等。據楊應琚

所奏登萊青三郡麥收分數。均在八分以上。其登州所屬之蓬萊等十縣。於五月十一二日。各得雨二寸至六寸等語。已於摺內批諭矣。但東省自入夏以來。雨澤殊未霑足。今登郡十邑。雖稱續得微雨。而各屬之皇皇待澤。其情形究竟如何。何不一併奏聞。此際務宜竭誠祈禱。仰冀大沛甘霖。如秋禾稍或有損。其應行豫為籌備之處。亦宜即行酌量布置。又不得但以一奏為了事。再各屬蝗蝻光景若何。曾已撲滅淨盡否。然總不如早晚得有透雨之為快也。可再傳諭楊應琚知之。○又諭據方觀承奏稱。永定河南北兩埝。刊立石碑一摺。於現在村莊戶口。毋許稍有增加。其飭禁稽查之法。亦不過如此。將來碑文刊刻竣工。可即搨印二本進呈。以一本存於軍機處。遇朕閱視河工時。即帶往查驗。如不實力嚴禁。致埝內戶口。逐漸增添。惟方觀承是問。至直隸地方。現在望雨甚殷。月內若再不得

透雨則恐於秋禾有礙。尚宜竭誠祈禱。方觀承現往天津會同策楞查辦御史陸秩叅奏長蘆鹽務一案。應即交與該司道等率屬虔禱。務期甘露霑足。方釋懸切。再吉慶於查捕蝗蝻頗見實心。今伊既有應行面質之事。恐不能兼顧。方觀承至天津。並宜專委大員。仍照吉慶所辦之法。督率辦理。不可因吉慶回津。遂至稍有懈弛也。可一併傳諭知之。○以翰林院侍讀學士陳兆崙為太僕寺卿。太僕寺少卿圖爾泰為太常寺卿。○以翰林院檢討王太岳充日講起居注官。○壬午。

上詣暢春園。問

皇太后安。○癸未。諭楊朝鼎身列諫垣。且任巡城。乃放蕩不職。卑鄙污賤。至於如此。都察院堂官訪聞既確。即應據實叅奏。請旨交部治罪。方足以振風紀而肅官箴。何得僅請嚴加議處。且摺內所稱霖雨未足。宵旰靡寧。該科漠不相關等語。朕之憂勞祈歲。與一微末無

恥之楊朝鼎何涉。此明係畏懼屬官。竟似不敢彈劾。而為此紆迴牽引之詞耳。如此畏首畏尾。何以董率所屬。都察院堂官著飭行。楊朝鼎著革職。交刑部。其與富戶交結往來情弊。一併嚴審治罪。○諭軍機大臣等。據成衮扎布等奏稱。今春喇嘛達爾扎發兵往哈薩克征伐達瓦齊。伊兵轉與達瓦齊合結。連哈薩克兵將喇嘛達爾扎拏獲。達瓦齊即為台吉。又有準夷察罕宰桑帶領將及百人向南逃走等語。朕思準夷性多奸狡。或知我防範故捏造此言。使人傳播。實隱為窺伺之計。亦未可定。至察罕宰桑如果向南逃走。別無去處。必至安西。可傳諭永常等如彼帶人投我邊界。詢實情節。一函具奏。一面照薩喇勒之例送京。此時各卡仍應嚴加防範。不可疎忽。○又諭吉慶所奏蘆東額餘引票及商寬正雜錢糧全數通完一摺。看來吉慶於辦理鹽務頗屬諳練。即如餘引一事。從前悉皆不

能銷完。今則於五萬道之外又增銷三萬道。鹽政一官以裕課恤商為職。果其實心辦事。不避勞怨。而外間或生浮議。即有叅劾之者。自不能逃朕洞鑒。必不因此而遂加以處分。若於經理公務。雖屬妥協。而其中仍不免有借以營私之處。朕亦必不因其能出力辦事。而遂稍為迴護。朕於臣下是非。一秉大公。毫無成見。現命策楞方觀承前往天津查辦御史陸秩所奏老少牌鹽一案。可將吉慶此摺。

欽此

鈔寄伊二人閱看。并不妨令陸秩知之。刑部議准福建巡撫陳宏謀疏稱安溪縣民許皆圖姦毆傷無服族叔許巧身死一案。經臣部覆准照律擬斬監候。茲又據疏稱許皆在監復毆死監犯廖瑛。擬絞監候。應請歸案從重完結。得旨。許皆因姦拒捕毆傷許巧身死。本屬應斬之犯。乃復在監毆死廖瑛。兇惡已極。雖應歸案從重完結。然此等兇徒。屢斃人命。實王法所不容。例載免死減等人犯復行

兇為匪者。照原擬斬絞罪名。即行正法。許皆若均照常一例。監候於情法未為允協。著改為斬決。嗣後有似此已犯死罪復行兇致斃人命者。俱著照此加重定擬。又諭軍機大臣等。今日刑部題覆陳宏謀所擬監犯許皆毆同監廖瑛身死。將許皆歸案從重完結一本。許皆係因姦拒捕致死人命。應行問抵之重犯。理應嚴加看守。乃復於獄中致斃人命。則其平日不加扭錄。漫無防範。一切疎縱。可知。

欽此

地方大員之不能督率所屬。留心整頓。亦更可知。該撫仍曲為掩飾。以午飯暫開手鐐為詞。將禁卒提牢俱擬以從輕。而於不行飭屬防範之有司官員。又復聲請免議。陳宏謀久歷封疆。尚有能事之譽。今觀其所屬急玩成風。而伊一味徇縱。平日之市恩。可知。此即其所以得譽耶。伊乃屢經訓飭之人。若終不能改。何以承受恩典耶。著傳諭申飭。署四川總督黃廷桂。叅奏雙流縣知縣徐審人甚平。

庸復訪有匿竊不報之案該員自揣不免叅劾因詳請告休但似此緝捕不力之員未便聽其休致請旨革職得旨這所叅徐審著革職向來地方官闡茸無能貽誤職守自知不免叅劾往往託病求退而該督撫亦遂徇情為之題請者有之在地方原去一庸劣之員而彼人仍得有章服之榮或可再圖起用如尹繼善之類每每如此因以得譽而不知使庸劣之員因此不畏功令甚非所以肅官箴

實錄卷四百三十九

十四

也黃廷桂不以徐審已經具詳告病聽其休致據實題叅甚屬公當不知者或以為過刻然使各省督撫悉能如此何患吏治之不日就整飭乎著通行傳諭知之○甲申諭今歲四五月間雖疊沛甘霖近日以來又覺炎亢農功待澤甚殷著禮部照例虔誠祈禱○又諭各省雨水收成督撫既以時奏報題鎮亦令據實入告者朕勤求民瘼之心也乃武員往往聽鄙陋無知之字識撫拾浮詞如狼山

總兵永柱摺內牽入景運興隆之類豈令奏報本意耶如此即果屬時若多稼轉不能信其無粉飾矣其諭各督撫提鎮嗣後務據實陳奏寧質毋泛再蝗蝻為害甚大朕屢飭督撫大員躬親督率搜捕是以提鎮亦有協同往撲者然若攜帶多人需索供應則農民轉受其滋擾捕蝗之害更甚於蝗此尤其大不可者一併通行傳諭知之○禮部議覆御史溫如玉奏稱順天府大宛二縣童試向有審

實錄卷四百三十九

一

音之例以杜冒籍查順天府外屬及直隸天津一府冒籍亦所不免嗣後順天府屬之州縣衛學及直隸天津府請飭校錄之四路同知及該府俱照大宛二縣之例於試前審音並取具廩結存案應如所請從之○旌表守正被戕之河南滎陽縣民趙洪祥妻李氏○是月尚書舒赫德將軍成袞扎布奏臣等於五月下旬派看水草待衛索拜等前往西路尋探俟六月初十前後防秋兵到齊先飭駐

防鄂爾坤兵一千名赴塔密爾。鄂爾坤中間防守。臣等與叅贊大臣達清阿、安崇阿等帶領防秋兵。徐徐行圍進至察罕諾爾特爾奇河源等處。候索拜等音信。至秋季應更換號。椿時。仍派人前往更換。如有信息。即帶兵前進。相機辦理。報聞。○直隸馬蘭口總兵圖爾禪奏查鎮標兩營經制千把外委。舊設三十二員。經前鎮臣布蘭泰於乾隆十二年奏請添設八品空頂帶外委十員。以備巡護差遣。

清乾隆四十四年

今

孝賢皇后陵寢。加增巡護事宜。存營弁員。仍不敷輪替。請再賞給八品空頂帶外委五員。仍照前例。食伊等原糧。毋庸扣給養廉。協同經制外委一體當差。得旨依議行。○署直隸古北口提督總兵馬負書奏營制演習陣法。皆豫為布置。無濟實用。應令於秋冬收穫後。在野隨地成列。為仰攻旁擊之勢。分合進退。以金鼓為節。牌兵捍衛鎗兵鎗住。則牌兵奮擊。

馬兵衝壓。聞金各還原伍。至常月教場演習。仍依營制。得旨。汝試行之可也。○漕運總督顧琮等奏。入夏以來。汶水微弱。現飭疏濬。並酌放各湖收蓄之水。令各閘相機啟閉。以濟幫運。刻下河水深四尺一二寸。至五六尺不等。如船有喫水重者。只須將帶貨起剝。即可前進。再查東省沿河一帶。春雨霑足。入夏未得透雨。今據濟寧州報稱。於五月初十日得雨。入土二寸。於秋禾有裨。民情安帖。得旨。二寸之雨。焉得為霑足。况聞東省望雨甚切。而漕河則苦水短。爾等何不據實直奏。設法調劑。徒為此粉飾之言。何益。○署四川總督黃廷桂奏。現在藏兵前後換防。臣飭乍了昌都巴塘說板多拉里等處糧臺各官。以換防需備供支為辭。採買青稞二千石存貯站所。如有需用。免致臨時周章。得旨。好。

清乾隆四十四年

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百三十九

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉六月乙酉朔公德保等奏

萬安倉工程工部司員祇就拆砌項下估計
於厥座滲漏無益應酌改揭修至旗員意存
增估彼此推諉以致遲延均屬不合請交部
察議得旨此案前因旗員以工部司官估計
短少而工部則稱旗員意在增估是以派德
保等前往確覈今德保等估報該倉應修工
料尚不及工部司員原估之數則工部司員
惟應議其遲估之過德保等調停均叅非是
工部司員毋庸察議其原請加估之旗員四

十九富昌著交部嚴加議處。向來旗員承修
廩座。往往慮及工部料估之數不敷。輾轉議
增。議減以致遲延時日。嗣後各倉遇有應修
工程。著工部倉場該旗各派司官一員。會同
料估修理。○丙戌

上詣暢春園問

皇太后安。○諭軍機大臣等。從來錢文私銷之
弊。甚於私鑄。是以律載罪名較重。朕前經降
旨。令各省督撫實力嚴查。乃近年來。拏獲私

鑄者。尚或有之。拏獲私銷者。殊少。蓋因地方

官。不過奉行故事。私鑄易於犯案。而私銷非
實心訪察。難以根尋。遂致奸徒漏網耳。今日
進呈本內。河南巡撫蔣炳題訪獲私鑄。究出
私銷一案。辦理甚屬可嘉。可見伊於地方諸
事。尚屬留心。至刑部覈覆張師載訪獲翦邊
私鑄一案。該犯等既將制錢翦邊改鑄。即與
私銷無異。但此案為首之犯。已歸入私鑄案
內。問擬斬候。是以照部議完結。可傳諭各督

撫。嗣後應飭屬詳悉確查。嚴行究審。不特現
獲盜銷之案。固應治以本罪。即私鑄之案。或
有私銷情弊。務須究出實情。按律定擬。不得
以私鑄混行結案。○旌表守正捐軀之河南
葉縣民石勇妻王氏。守正被戕之廣西永福
縣民駱神法妻丁氏。○丁亥。諭總督喀爾吉
善奏稱。浙省各屬米糧充裕。溫處二郡價最
平賤。遂有奸民販運出洋。現已拏獲數起。等
語。前歲溫台被旱成災。米價昂貴。遂至鬧賑

搶糧。罹重典而不恤。經朕多方籌畫。無災截

漕。凡以為小民饔飧計也。今幸仰荷

天庥。年穀順成。附近之江南。江西。各省米價亦
大勢平賤。是元氣稍復。方慰朕心。而貪黠之
徒。輒復販運出洋。以圖厚利。在壟斷者固自
不知遠謀。而蚩貿者亦甚難於化誨矣。其江
蘇沿海州縣。恐亦有似此者。該督撫等宜嚴
飭文武各屬。實力稽察。並宜勸導閭閻。各圖
餘九。著通行曉諭知之。○又諭順天府尹事

務現係府丞馬燦署理。今歲鄉試屆期。府尹、府丞各有專辦之事。馬燦一人不能兼顧。府尹事務著李因培兼管。馬燦協同辦理。鄉試時馬燦入闈提調。李因培在外辦理地方事務。○諭軍機大臣等。獨石口兵丁辭糧一案。前據方觀承奏稱。安泰嗜酒滋事。其罪固無可逭。但該鎮吳士勝因兵丁辭糧。即將副將摘印揭叅。豈不益長刁風。現在會同提臣查明另行題叅等語。所奏頗協大體。已於摺內批示。今方觀承又將安泰會疏題叅革審。豈因該鎮已經委員摘印。有不便中止之勢耶。抑已會同該提馬負書查明。安泰果有斷難姑容情節耶。然方觀承從前既經具奏。此時即不題叅。亦當先行奏明方是。且兵丁崔大用等俱已看守候審。並非難於查辦之事。永寧良卿前往該處。二十餘日。何以尚未查究明確。可傳諭方觀承。即將具本題叅緣由。及該司道等現在作何查辦情形。逐一詳悉速

行奏聞。○旌表守正被戕之山西代州民劉繼武女劉氏。守正捐軀之山西平遙縣民張守英妻耿氏。○戊子。諭命案內殺一家非死罪三人者。律應凌遲處死。即所殺三人中有實犯死罪之人。及三人而非一家者。亦擬以斬決。良以其兇殘不法。罪浮於謀。故殺。亟當立置重典。以示炯戒也。乃內外問刑衙門。按限審轉。僅與尋常命案等。往往遲至半年。甚或年餘。始正厥辜。此不但死者含冤者衆。而閭閻之間。日久漸忘其事。安望其動色相戒。生畏法之心乎。且使兇惡之犯。或至瘐死圜圉。竟逃顯戮。亦無以慰多幽魂於地下。嗣後凡殺死三命四命之案。各督撫當速審題達。法司即時覈覆。不得以定限尚寬。稽延時日。庶國憲彰而人心知所懲儆。斯不失辟以止辟之義。可通行傳諭知之。○諭軍機大臣等。鄂容安所奏江省屬員賢否摺內。以臬司范廷楷諸事任性。擅作威福。看來范廷楷由司

員歷任科道。辦事未免恃才自喜之意。即此番陞擢。亦不過取其才具可用。在鄂容安尚能節制策勵之。若將來能知所改。則可耳。至吉南顓道一缺。據奏非精明強幹之員。不能勝任。頃已降旨將撫州府知府徐垣補授。想亦可收臂指之助也。可一併傳諭知之。○已丑。

上詣暢春園。問

皇太后安。○諭守令以親民為職務。必其與民

相浹洽。然後能勸農桑。興教化。非謂簿書期會無誤。即云勝任也。邇來守土之官。不過奉行教令。於錢穀刑名是較。督撫以此課有司。部院以此課督撫。吏或拘牽文義。毛舉瑣細。往返駁詰。案牘滋繁。議者至謂地方有司。救過不暇。奚能留心民生休戚。斯言近是。然一再更張。將無藉口優游。其不留心民生休戚。如故。則何以別有司賢否乎。然案牘繁滋。亦非敷政之要務也。應如何酌歸簡易。俾庶政

不病瑣屑。而親民者有教養之實。及民則得矣。其令九卿科道直隸總督及督撫。因事在京者。詳悉定議以聞。○又諭雲貴總督碩色。奏請將籤陞奉天府治中之白鹽井提舉高錦。以陞銜仍留原任。各省州縣中。該督撫奏請陞銜留任者。必因員缺果屬緊要。人地實在相需。若提舉一官。不過專司鹽井。即易生手。何至遂難勝任。且鹽井係膏潤之地。而奉天道路較遠。以此奏請。適以啟屬員規避。戀缺之私。甚屬不合。所奏不准行。仍著傳旨申飭。○諭軍機大臣等。莊有恭題叅董權文。管理揚州關稅務。侵蝕弊混一案。於上年七月內。即經莊有恭密奏嚴查。雖題叅在數月之後。而其中弊混情節。早已查察明確。非一時訪聞可比。自可速為審結。何亦遲至半年。尚未具題。外省辦理叅案。或回護原叅。或有意開脫。稽延歲月。前經明降諭旨。嚴立限期。著傳諭莊有恭。令將董權文一案。現在如何查

辦之處。速行奏聞。鄂容安現署督篆。併諭令上緊嚴審。作速題結。不得任屬員輾轉延擱。并將至今未行審結緣由。一併查奏。又諭李繩武所奏報雨一摺。殊屬不實。已於摺內批示矣。即如登郡正在望雨。於五月二十四日。僅得雨四寸。豈遂可謂霑足。而摺內乃稱秋成豐稔。已兆於斯。此等粉飾套語。最為外省陋習。地方大吏。或有奏報不實之處。尚冀伊等入告。有以得其實在情形。若亦如是。何必多此一奏耶。著傳旨申飭。○調直隸宣化鎮總兵吳士勝來京。命吳進義以提督銜署宣化鎮總兵。○庚寅諭曰。

皇考世宗憲皇帝時。因朝臣與諸王交接往來。曾經

降旨訓諭。深戒黨援。用以防微杜漸。垂示方冊。最為深切著明。所當永遠恪守。朕臨御以來。意諸王大臣自必凜遵。

聖訓。慎持防檢。是以未經特頒諭旨。乃諸王中

一二節遴者。竟有招納之事。而大臣中。亦有在王府往來者。如此因循。則

皇考整飭風俗。防弊遏邪之苦心。及朕而即弛。朕甚懼焉。且如旗員素隸各王門下者。本自不禁。其非本門。及漢大臣。則全無交涉。設有政務。何妨公言朝省。奚僕僕私謁為耶。歲時投刺。即開促膝密談之端。形迹未絕。保無掣肘顯為之事。且其意將以此為榮耶。抑別有所為耶。甚無謂也。日久漸忘。人或藉口。其令

各部院及八旗衙門。各錄朕此旨一通。於壁庶諸臣觸目警心。遠嫌自重。其或再犯被人糾叅。朕將執法從事。毋謂不教。○諭軍機大臣等。前聞江南一帶米價大勢平減。今據莊有恭奏。江蘇各屬糧價單內。仍俱註價貴字樣。或較從前市價騰湧時。則已為平減。而以平常價值論之。終未免昂貴耶。然此乃四月分據各屬所報者。目下各處米價若何。有無增減。著傳諭莊有恭。令其作速確查。據實具

奏不得因有旨詢問。稍存粉飾之見。其江寧淮揚。曾否報得透雨。秋禾情形如何。一併奏聞。以紓軫念。○又諭馬燦奏。稱香河縣於本月初三日酉時。有飛蝗自縣東南界飛來。落於李家窪等三處等語。已著李因培。馳驛前往撲捕矣。該邑距天津不遠。天津一帶。蝻子前已據方觀承。吉慶奏。稱撲捕淨盡。何以又有生翅飛翔隣邑者耶。著傳諭方觀承。吉慶。令將津屬遺蝗。務即速撲除淨盡。此次起自何方。據實奏聞。不得稍存迴護諱飾。○以原任江南提督武進陞署陝西延綏鎮總兵。○辛卯。諭軍機大臣等。據鐘音奏。陝省今年二麥豐稔。山西蒲絳亦稱樂歲。無須陝省接濟。似應於麥登之後。暫行禁止出境等語。所奏非是。山西蒲絳。二屬與陝省接壤。向皆仰資接濟。從前陝省歉收。糧食止供本省。自不得不申明禁例。停止販運他出。今該撫既稱該省二麥豐登。則本地民食優裕。而晉省蒲絳

等屬。又當上年災歉之後。該督撫等正宜聽其流通。惠濟隣省。乃欲禁止出境。究之舟楫可通。商賈惟利是趨。未必不私通販運。徒滋吏役查拏等弊。是官受過羅之名。而民收居奇之實。於事理殊未明晰。非獨分疆畫界。厚陝而薄於晉也。此必係尹繼善首倡此議。欲以市惠陝民。而慫恿鐘音為此奏耳。所奏不准行。著傳諭該督撫知之。○又諭直隸天津。滄州。各屬蝻孽萌生。前據方觀承。吉慶陸續奏報。搜捕淨盡。昨據馬燦奏。香河縣飛蝗自東南飛落。則是天津遺孽。尚未盡除。以致滋蔓隣邑。旋經傳諭方觀承。吉慶。令查明起自何方。務將遺蝗撲除淨盡。現在該督等如何查捕。曾否淨盡。并此外有無查察未周。續報萌生之處。著即速據實奏聞。○又諭策楞會同方觀承。查辦御史陸秩。奏長蘆鹽務一案。回京。據策楞摺奏。稱津邑向食牌鹽。沿河額引壅滯。今停止鹽牌。積引俱銷。是杜一邑

之私已裕各邑之課。請將此項鹽引免其納課。於四鄉分設子店。毋庸限時定數。聽民就便買食。其詳細條款。聽督鹽二臣酌議等語。此雖策楞一人之奏。想在彼已有成議。伊等所見。是專為牟利計矣。甚屬非是。釐政原以通商便民。如鹽臣辦理不善。即善而挾行其私弊。均當從重議處。若能實力擔當。致招浮議。則當為之主持。今因地方衿棍散布流言。希圖挾制。遽議蠲課減價。是國家之恩澤。直為若輩聳動挾要而得。不特無此政體。亦且易長刁風。且如灤州等八州縣。自高斌等奏停鹽牌之後。不聞別有減彼處鹽課之事。均一直省釐務。自應畫一辦理。南省產鹽之地。如淮安等處。豈盡食無引私鹽乎。吉慶向管淮鹽。自知成例。策楞所奏不可行。著傳諭方觀承等。遵旨妥議辦理。○又諭。邇日天氣亢旱。直隸各屬待澤甚殷。雖據報五月十一等日得有雨澤。俱未深透。普遍數日來。密雲為

風所阻。朕心日夜焦勞。直屬曾否有得雨之處。現在田禾光景若何。是否已成旱象。該督一併查明速奏。○壬辰。諭督撫叅劾屬員。發審之後。往往遲久不行題結。朕屢降旨明切曉諭。並交部嚴立限期。凡以勵治體。銷塵牘。俾官不留獄。而虛實速明也。審案遲久不結之弊。或於其人不無偏護。特以劣蹟昭著。無能代為掩飾。不得已挂之彈章。雖款証確鑿。而曠日經時。冀可巧為開脫。又或素所憎惡之員。及誤聽人言。既已列款糾叅。而証據不實。不能成讞。則故使之羈候。罔圖不肯遽伸。其枉此輾轉遷延。由於不能秉公實心查辦。故也。今查各省督撫叅案。自十四年至本年未結者。幾及百餘案。直隸閩浙四川等省為多。如準泰在東省題叅案件。或因伊獲譴去官。後任及承審屬員未免有心延玩。若方觀承喀爾吉善策楞皆現任地方。自應督飭所屬速行查審。何致積案累累。逾限許久。著伊

等三人各自將逐案不能審結緣由速即明白回奏。○諭軍機大臣等策楞所奏將津鹽免納引課一摺。昨已降旨諭其非是。誠以為政當知大體。若因浮言挾制。輕議更張。則莠民之刁風。漸不可長。但思天津向食賤鹽。今令官商。一如私價發賣。則病商。若因輸課。而令與他處官價同。則病民。吉慶所辦壓派商人。則不便於商。限時限觔。則亦不便於民。皆非經久可行之道。著傳旨詢問方觀承。令將津邑現在釐務如何善為調劑。使商無虧成本。而民間亦不致貴食之處。與吉慶妥商覆奏。再灤州從前如何亦食牌鹽。因何禁革牌鹽。舊價幾何。現定官價幾何。又吉慶向任兩淮鹽政。如淮安等濱海地方產鹽之地。間闕係食牌鹽。抑食引鹽。著一併詳悉查明具奏。○又諭刑部覈擬浙省命犯汪武德一本。此案因該犯小功服兄汪武喜圖姦伊妻起釁。該撫原題將汪武喜之妻自言其夫平日人

倫不正一語敘入本內。欲為汪武德末減地。所辦非是。服制攸闕之案。其中或有因姦情末減者。必係實有證據。方可援引聲敘。今汪武喜調姦一節。出自汪武德夫婦之口。安知非伊夫婦見汪武喜已死。捏造此語。希圖脫罪。承審官員。又將汪武喜之妻畧涉影響一語。援以為証。若以此即減兇犯之罪。豈可以為信讞乎。向來外省承辦命案。率多市惠姑息。於兇犯則任其狡飾。裝點情節。牽引質證。以為開脫之計。於屍身則聽兇犯之誣詆。坐以罪狀。迨爰書既定。雖仍按律問擬。而所有起釁情節。即為法司覈擬聲請。及秋審分別矜緩地步。此各省相沿陋習。甚非除暴安良。辟以止辟之義。著傳諭各省督撫。嗣後辦理命案。如因姦起釁等情。無實在憑據者。不得於看語內。混行聲敘。即別項情節。苟非供証確鑿。亦不得聽該犯畏罪捏供。將無作有。以致案情失實。難成信讞。可於各督撫奏事之

便將此通行傳諭知之。○吏部議奏前經給事中朱若東奏查新設地方領憑程限當經咨查各省。茲據江蘇、福建、廣東各該撫咨覆到部。查文武官自京領憑赴任。應分別限期。江蘇省之徐州府、海州均定限四十日。通州五十日。太倉州、五十五日。福建省之永春州定限九十日。龍巖州一百日。廣東省之嘉應州、連州均定限一百日。羅定州一百五日。飭行遵照。並載入現行例冊及會典從之。○改直隸滿城縣方順橋巡檢為管河縣丞。其原設巡檢移駐三座塔地方。管理土默特兩旗事務。鑄給印信。從總督方觀承請也。○癸巳上詣暢春園問

皇太后安。○諭。現在天氣亢旱。天津一帶河流未免淺澁。重運維艱。著將南漕尾幫於抵津時截留二十萬石存貯天津水次各倉備用。該督等即遵諭妥協辦理。○諭軍機大臣等。御史陸秩奏長蘆鹽務弊竇。朕未將該鹽

政等降旨解任質審。但特派大臣前往會同總督方觀承查辦。吉慶理應具摺奏謝。乃覽伊摺內並未奏及。是伊漸染外官習氣。自謂一經奏謝。反似不能無過。是以不行陳奏耳。伊係內府世僕。豈宜如此居心。著傳旨申飭。○又諭。據吉慶奏調劑天津鹺務一摺。殊未明晰。現交軍機處查明。再行降旨。前策楞奏辦理天津鹽務摺內云。詳細條款聽督鹽二臣酌議具奏。面奏時云。曾見會商摺稿。伊等何以尚觀望未奏。且昨經傳諭詢問。津鹽如何辦理。方使商民均便。可以久行無弊之道。令方觀承、吉慶會商覆奏。今此摺尾雖照例寫入會同督臣字樣。但方觀承現在何處。何以竟無一語陳奏耶。著再行傳諭詢問。○以原任四川總督策楞署兵部尚書。○豁除江蘇沛縣昭陽湖水沉民地二千一百六十八頃七十六畝。有奇。麻地三頃七十三畝。有奇。湖租地四百一十五頃。額賦。○甲午。諭。據漕

運總督瑚寶摺奏運河自南柳林閘迤北至戴家廟閘一帶情形併嚴飭沿河文武各官上緊催趲務期進行無阻等語漕糧重運全賴河水暢流今歲四五月以後雨澤稀少其河流窄狹處所水勢未免淺澁以致重運稽阻一俟甘膏大沛自然漲資浮送此並非運丁等有心延緩該督現在籌辦一切可漸次輓運北來勿事催趲過嚴該部即傳諭知之○諭軍機大臣等河南巡撫蔣炳覆奏承審

參案限期一摺稱嗣後請參案飭提到省酌量案情輕重或委首邑審招或遴委附近賢員赴省承審設有情節未明俱可就近指駁聲覆兩月之內可以速結等語督撫參劾屬員發審之後往往遲久不結朕屢經降旨明切曉諭並令該部改立限期今據蔣炳所奏河南審案已於兩月內題結可見現定之限並非太迫其所稱赴省承審就近指駁之處可傳諭各省督撫嗣後俱照此辦理毋得仍

前因循怠玩以致審案逾限不能歸結○衍聖公孔昭煥奏有一人跟一擔夫到臣門上口稱浙江人姓丁名文彬係臣家親戚攜有書籍要見並投書一封閱之語多狂誕臣不勝駭異當差人搜其擔內得所攜書二種面書文武記傍書洪範春秋書面寫大夏大明新書又有偽時憲書六本書昭武偽號臣以撫臣楊應琚現往兗州一帶捕蝗未回除一面札知外即將逆犯丁文彬並挑擔人田姓及逆書手字發曲阜縣嚴禁候撫臣回省訊辦得旨所見甚正所辦甚決嘉悅覽之○裁貴州普安州劉官屯驛丞設分駐捧鮮巡檢換給印信從陞任巡撫開泰請也○旌表守正被戕之河南新蔡縣民婦湯彭氏女湯氏○乙未諭直隸各屬入夏以來雖連次得雨終未霑足目下天氣炎燥望澤甚殷朕心日切焦勞若再遲旬日不能普被甘霖恐於秋成分數不無有減小民饔飧即宜豫為籌畫

前已降旨於天津截漕二十萬石以資接濟其各屬中或有應行籌辦事宜該督方觀承亦即宜悉心妥協料理務期有備無患以副朕軫念民瘼至意該部遵諭速行○諭軍機大臣等直省各屬入夏以來雖間有連次得雨之處而甘霖未邀普被朕心日夕焦勞近據該督方觀承稱若六月二十前後得有透雨竟無妨礙若再遲時日即須補種晚穀未免又需工本請照春月出借之例查明實在無力農民酌量借給籽種口糧俾得速行補種等語著傳諭該督方觀承即酌量各屬地方情形轉飭該州縣豫為籌畫如須補種之時即可按戶出借若待得雨後再行詳請飭辦則緩不及濟農民未必得沾實惠至將來若再不得雨秋成即恐有損現於天津截漕二十萬石以資接濟并有旨諭部令該督將應行籌辦事宜豫為料理以期有備無患可一併傳諭知之○又諭方觀承覆奏題叅副

將安泰一摺其因吳士勝已委員摘印在先而安泰又實有應叅之罪此則前諭已及之者但所辦殊不得體耳聚眾辭糧最為綠營刁悍惡習若兵丁有負屈之處赴上司告理雖法所宜禁而情尚可寬至把總張萬明身係職弁有約束兵丁之責乃敢從旁主使致起釁端此其居心傾險罔畏法紀更不可不嚴加治罪現既解省覆勘著傳諭方觀承務將主使聚眾各實情速行嚴審定擬俾各營弁兵咸知懲儆再藩臬俱有奏事之責在各省中尚偶有自行摺奏者而直省兩司則終年未見一字入告著傳旨詢問豈該督有意禁約不令具奏耶抑畏懼該督而不敢自行具奏耶即如此事經派永寧前往查辦既另究出兵丁王天德等約眾告退及把總張萬明從旁主使情節即當一面具摺奏聞何必定俟該督轉奏乎永寧著傳旨申飭并諭王麟知之○又諭據署山東巡撫楊應琚所奏

審訊造作逆書之浙江上虞人丁文彬一案。據該犯供稱。住在松江十餘年了。乾隆十四年三月初三日。曾把這書上兩冊文武記二本。太公望傳一本。獻過莊大人。名有恭。那時他做學院。到松江來考。在西門月城內送他的。他接去。沒有回報。也沒有把書還我。等語。丁文彬所著逆書內。大逆不道之言甚多。莊有恭既經接收。何以並不具摺奏聞。又不即將該犯拏究。著傳旨詢問。令其據實覆奏。仍將從前所獻逆書一併進呈。尋奏。臣於十四年春間。按試松江時。記有人獻書。臣隨手繕閱。見有丁子曰三字。臣斥為真妄人。左右以係瘋子對。遂棄擲。不復省其中作何語。今該犯既名丁文彬。則所稱丁子曰。即逆書無疑。今事隔五年。不知此書尚存與否。容細檢進呈。得旨。此奏又屬取巧。細查書來。不可終歸烏有。○又諭楊應琚所奏審擬造作逆書之丁文彬一案。已交法司覈擬速奏。但楊應琚

另摺有該犯氣體瘦弱。亟宜早正典刑之語。此等大逆之犯。豈可使其逃於顯戮。法司即速行辦理。約計部文到東省時。亦必須旬餘。著傳諭楊應琚酌看該犯現在光景。若尚可等待部文。則候部文正法。如恐不及待。即照所擬先行凌遲示衆。勿任瘐斃獄中。致奸慝罔知懲戒也。○戶部議准署兩江總督莊有恭疏稱。洞庭東山丁糧。經前撫臣陳大受題歸太湖廳同知徵收。其西山與吳縣地方較便。應歸該縣徵收。從之。○旌表守正捐軀之湖北應城縣民沈煥彩妻田氏。○丙申上御勤政殿聽政。○諭。入夏以來。雨澤愆期。天津等近京州縣。有蝻孽生。發近或以飛蝗入告。外間議論多稱係土蝻。且。有見之章奏者。此則不無諱飾之意。朕謂蝗何須諱。但能捕除不致為災。則雖有若無也。且向來所見蝻。不過趯躍於叢草中。若成羣而飛。被畝而集。則與蝗何異。現據兼管府尹李因培所

奏亦有飛集多在高粱叢內。食葉留心之語。既能食葉。又安可謂無損禾稼乎。即其中間有螞蚱。亦不可以此藉口。忽於撲捕。縱使村民雜捕。貪易錢米。所損官帑幾何。較蝗害何如耶。其令該地方董率鄉民。上緊設法撲捕。務期淨盡。但宜輕騎減從。逐畝查勘。若委之胥役地保。科派擾累。以及蹂躪田禾。則農民未受捕蝗之益。先受捕蝗之害。必重治其罪。○諭軍機大臣等。聞得總河顧琮近患腿疼。

時或艱於步履。不知其於河道工程事務尚能辦理不致有誤否。著詢問蔣炳楊應琚。令將顧琮近日腿疼若何。曾否痊愈。并於應辦事務。有無妨礙之處。各據實奏聞。不可彼此通知商榷。○以侍講傅靖充日講起居注官。○丁酉。

上詣暢春園問

皇太后安。○諭各省審理叅案。前已勅部嚴立限期。但督撫題叅屬員。即款跡昭著。不過摘

印看守。必俟奉准部文。始行提訊。若雲貴等遠省往返已逾數月。是於未起限之先。已稽延半載矣。且從來督撫叅員。斷無懸擬其被屈。不令審究之理。是叅則必革。昭雪須俟審明。自以速審速結為是。然大員或慮體制攸存。嗣後文職道府以上。武職副將以上。仍照舊例。於題叅得旨部文到日。再行提訊。部文亦著速行。其餘文武官員。於具題日。即將案內應質人犯。拘齊審究。如督撫同駐省分。一

面具題。一面行知。應承衙門。照例提審。庶是非早辨。案牘易清。著為令。○又諭據黃廷桂奏。稱推陞山東登州府知府之松潘同知于學謙。才具中平。為人樸實。安靜無擾。番民相宜。登郡沿海重地。察吏安民。恐非所長等語。朕面詢策楞。見亦相同。黃廷桂不以已經陞任之員。稍為假借。秉公驗看。據實陳奏。深得督撫實心辦事之道。甚屬可嘉。于學謙著以陞銜。仍留松潘同知之任。不必赴部引見。

○諭軍機大臣等前因順天所屬之香河縣河北屯等處報有飛蝗自東南而來恐由天津一帶竄至隣境曾降旨詢問方觀承吉慶今據先後覆奏天津各屬蝻孽悉已撲除並無成翅而飛者且天津之距香河尚隔寧河武清二縣等語京師於十二日仰邀

天佑已沛甘霖若雨勢普徧即蝗蝻自可悉就掃除但香河之蝗既非天津飛來則必由寧河武清一縣延蔓而至且或係香河本地自

生託詞諉卸亦未可定既有此奏不可不為詢明可傳諭李因培方觀承令其據實查奏其各屬得雨分寸若何及田禾情形一併速行奏聞○又諭據尚書舒赫德副將軍成家扎布等奏稱探得準噶爾達瓦齊戕害喇嘛達爾扎自立為台吉現聞遣使前來請安已密行知會西路軍營等語可即傳諭永常努三尹繼善王進泰等如夷使到哈密一切事宜並可照舊辦理其攜來人數貨物牲隻亦

必遵照立定章程或有額外多帶即按數駁回以示節制其西路現在防範機宜務宜加意慎密不可稍露形迹致使伊等得以窺測也○戶部議覆署山西巡撫胡寶瑤疏稱神池朔平營兵馬豆向由神池營關領查該倉經節年支放存豆漸次不敷利民八角二倉歲貯頗充嗣後應將二倉附近之青羊渠等屯所徵豆額自十八年為始交神池以備支放應如所請從之○戊戌補行山東省乾隆

十六年大計不謹官一員罷軟官一員才力不及官一員浮躁官一員年老官五員有疾官二員分別處分如例○命太僕寺卿孫灝提督河南學政○己亥諭軍機大臣等巡撫恒文奏上年襄陽縣盤獲信從天主教之曹殿邦寫寄萬一舉番字經札藥方等物及現在拏獲假冒欽天監差役之唐縣民人邱蘭究出曹應文代畢珠所寫番字書札各情一摺內稱伊等字跡臣等既不認識而此處亦

無認識之人。恐有悖逆不法情弊。即應嚴加根究。何敢草率完結。現在訪查有無夥黨。並為匪確情。再行嚴審。所有西洋番字經札一并進呈等語。曹應文等寫西洋番字。密相札寄。並假充差役。既經拏獲。其有無別情。自應訊究。但京師現在亦無認識番字之人。若交與西洋人之在欽天監者。令其譯漢。即札中果有不法情弊。伊等恐亦未必寫出實情。且伊等在中國已久。尚屬安分守法。想無煽誘為匪情事。一經查辦。轉致驚疑。看來此事。只應在曹應文等究明緣由。可傳諭恒文。該犯現在楚省。其所寄番字札中情由。俱可就近訊問。照例辦理。在外究結可也。○又諭。開泰奏請移設毛口。楊松各驛。及裁汰烈當驛。並改建塘汛各事宜一摺。朕已照常批示矣。該撫摺內。稱將移設地方里數及增裁各項。詳細聲明具題。請旨飭部議覆等語。著傳諭開泰。此事例應具題。飭部議覆。勿以奉到硃批。

平定人四十四

平定人四十四

三十九

即謂已經允准。輒鈔錄咨部。遂不復具題也。○吏部議覆署兩江總督江西巡撫鄂容安疏稱。淮安府屬鹽城縣之上崗草堰二閘。請歸上崗司巡檢帶管。其原設上崗閘官。調管泰州丁溪閘。草堰閘官。調管泰州之小海草堰等閘。至興化縣之劉莊場八竈河口閘。即令該場大使帶管。其大團河口閘。歸安豐司巡檢帶管。白駒天妃二閘。現有閘員。無庸另設。應如所請。從之。○以兵部侍郎裘曰修為浙江鄉試正考官。翰林院編修吳鵬南為副考官。禮部左侍郎董邦達為江西鄉試正考官。翰林院編修戈濤為副考官。翰林院侍讀學士莊存與為湖北鄉試正考官。禮部郎中李玉鳴為副考官。

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十

實錄卷之四百四十

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十一

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院寺正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

數修

乾隆十八年癸酉六月庚子諭曰侍郎李因

平年八月四日

培參奏武清縣知縣朱馥諱匿蝗蝻欺蔽狡
飾朱馥著革職仍留該處押令隨同署員親
身撲捕其武清縣知縣員缺著該部於候補
人員內速行揀選帶領引見○實授苗國琮
為浙江黃巖鎮總兵○辛丑諭軍機大臣等
陳宏謀覆奏查辦屬員虧空一摺內稱若因
上司分賠而本員反以產盡邀免或查報不
速而有產者亦得冒免尤欠公平現在閩省
凡有虧空之案俱一面拜疏一面密咨原籍

先將家產查封以待審明賠補等語前因各省督撫於屬員侵欺虧空之案題參之後並不即為查辦致貪狡者得以多方寄頓徒貽上司分賠之累而本人轉置身事外甚非國家懲貪之意是以降旨傳諭各督撫令其上緊辦理該督撫奉到前旨自應將未完各案如何立法清釐即行奏聞何以尚未奏到著傳諭詢問令將現在各案如何辦理之處速行具奏○又諭據吉慶奏鹽屬銷引地方賣鹽錢文悉令在本州縣市集出易不得囤積在店運往他處售賣射利等語吉慶此奏為商人囤積射利起見亦疏通錢法之一端但各省鹽務地方情形不同著將此摺鈔寄各督撫鹽政令其查察所屬情形若果如吉慶所奏立法稽查行之可有成效不致滋擾商民著即奏聞仿照辦理如或有未便之處亦不必勉強著詳悉酌量具奏○壬寅

上詣暢春園問

皇太后安○還宮 癸卯命尚書劉統勳汪由敦納延泰在紫禁城騎馬○以原任安徽巡撫銜哲治署兵部侍郎○甲辰

春園問

皇太后安○幸圓明園○諭軍機大臣等御史沈景瀾請嚴販米出洋之禁一摺所奏亦非實在情形外洋諸國決無仰食於中國之理從前洋商船隻尚有載回米石者其漁船多帶米石或以資近島居人及洋面匪船是不可不禁耳至臺灣產米素裕閩省之漳泉等泉向來尚資臺米接濟乃謂由內地帶往不更為倒置乎各省米價之貴不盡由於販米出洋而查禁之法惟在實力奉行不在多定禁例著將此摺鈔寄沿海各督撫令其閱看并將各該省現在如何查禁是否仍有透漏與內地米價究竟有無妨礙各據實奏聞○兵部議覆署兩廣總督班第疏稱廣西右江

鎮總兵員缺。遵例揀選得慶遠副將陳廷桂擬正副將李時升擬陪題請補放。查陳廷桂現在革職留任。與例不符。應飭該督另揀具題。得旨。右江總兵一缺。地處邊瘴。風土惡劣。必得與該處服習者。始可題補。若所保人員內有降革事故。該部即按例議駁。恐一時難得相宜合例之員。而總兵大員。膺封疆重寄。今祇由該督揀選請旨補放。亦非慎重簡畀之意。嗣後右江總兵將屆俸滿。著該督即於本省副將。豫行揀選。不必拘以有無事故。但擇其人地相宜。堪勝總兵之任者。擬定正陪。送部引見。候朕簡用。此次揀選之陳廷桂。李時升。即著照此例行。陝西巡撫鐘音疏報隴州扶風等州縣首墾熟地九頃八十三畝有奇。○乙巳諭山東布政使李渭。以失察案內降級從寬留任。具詳該署撫代為奏謝。藩臬原得具摺奏事。豈有他事皆可入告。而陳謝反不可耶。向日兩司有喜事。漬奏。侵督撫

之權。挾制傾陷者。經朕訓飭。此風雖改。而未免矯枉過正。又有過於畏忌。緘默藏拙。甚至具稿蒙批。皆向督撫呈覽者。靖恭之意。安在。著該部通行傳諭知之。○諭軍機大臣等。前因各省侵虧案件。該督撫於題參後。並不上緊即行查辦。以致點詐之徒。多方寄頓。徒貽上司分賠之累。即本人應追之項。遷延日久。多以產盡請豁。甚非懲貪之道。是以因刑部題覆張璠一案。特為通行傳諭。今據范時綬覆奏。摺內僅就諭旨敷衍。泛為議論。於將來應如何上緊查辦。及該省此等案件。現在作何辦理之處。并未奏及。則其奉到諭旨。不過以具摺覆奏。遂為了事。仍復置之高閣耳。昨陳宏謀所奏閩省查辦之法。已降旨傳諭各省督撫。令其作速覆奏。可再傳諭范時綬知之。○丙午諭莊有恭覆奏承審參案一摺。據稱現在未結者四案。李潯清劉廷光兩案。俱經審明。因赴淮捕蝗。未及具疏。彭存仁何思

恭兩案須回署親勘其繕疏俱當在新限之外等語所奏非是莊有恭雖赴淮捕蝗既定之案何難存署敘供於中途拜發且起程之期距新限尚在一月以外即未勘之案亦何難於事竣回署後即速勘定而遽為展限之計乎近據巡撫中自知策勵者如蔣炳胡寶瑤皆能將各案依限奏結即其他督撫亦未有以展限請者可見現立之限原非迫促也莊有恭新授簡畀不加奮勉當此章程初定輒欲輟轉遷延固守外省陋習甚屬不合著交部議處○諭軍機大臣等據蔣炳所奏審訊黃安縣逆札一案知縣汪沁因貪黷銀匠一事適有李遇隆色攬赴省控告遂懸擬造札妄事刑求幾成冤獄如此不職之員自不得以奸徒傾陷之故而曲為姑容但此案李遇隆等及王剛臣父子既經反覆推鞠委無適情則造札正犯必應速緝務獲嚴治其罪且札內所稱該縣之事若非本地衙門中人

何以知之此亦易為蹤跡不可但以通飭查拏遂為了事使奸徒得遂其傾陷之技而竄身遠颺安然事外致愚頑之人罔知懲戒也然但使馬朝柱就擒自無此等假託之事更不可不留心物色耳可一併傳諭知之○又諭方觀承奏審擬獨石口兵丁聚衆辭糧一案所稱總兵吳士勝並不親往嚴行查辦而於把總張萬明等不法不能即行查出等語如此則該鎮辦理此案咎在不能詳查而其乖張錯謬情節轉置之弗問矣所奏非是聚衆辭糧最為刁悍惡習該鎮於安泰嗜酒不職平時早應揭報及至兵丁等藉端滋事自當先行查辦暫緩糾參乃不法悍兵尚未示懲即將該弁印信摘取不特從無此體制亦且益長刁風沿邊營伍何以明示炯戒是其乖謬之處實在於此朕前旨謂不應遽將該副將題參亦正為此耳朕於滿漢大臣從無異視何惜一嗜酒不職之副將而欲為之寬

假方觀承摺內所敘情節似有以朕為迴護滿洲之意豈能逃朕洞鑒耶方觀承著嚴行申飭○又諭瑚寶奏報料理漕船過閘情形一摺殊不明晰相度運河水勢酌籌啟閉俾糧艘適行乃漕臣專責今瑚寶摺內稱六月十二十三等日得雨沿河一帶高粱茂盛豆穀長發而於糧運則祇稱查探水勢星速催趲前進等語其得雨後水勢是否較前旺盛糧艘能否不虞阻滯之處何以轉未奏及耶

著傳諭詢問令其速行奏聞○丁未遣官祭火神廟○諭福建按察使來謙鳴來京陛見奏稱伊前任廣東運使任內因廣東布政使及運使衙門向有值月鹽商陋規五千兩曾面稟督臣策楞欲行裁去督臣諭以運使有承辦戰船須此項津貼何必遽行裁革彼時雖未具詳明裁實未收受等語朕以運使衙門雖經伊裁去而尚有布政使陋規此不可以不問及詢策楞始知此項陋規前任督臣

久行裁禁來謙鳴並未向伊稟裁等語因令軍機大臣傳來謙鳴面質乃伊言語支吾至有並未奏及此事之語伊未奏及朕何由而知殊不意挾詐面欺世間竟有如此鬼蜮其意以為在朕前獨對朕亦未必復加詳察或者默識其廉獎擢皆未可定殊不知朕豈易欺者哉居心如此實為僉邪之尤來謙鳴著革職伊前在雲南知府任內尚有未完之項著各省差員遞行押往雲南著追完日該督

撫具奏請旨○諭軍機大臣等來謙鳴已降旨革職但喀爾吉善新柱陳宏謀等奏報屬員賢否摺內俱經將伊列薦不知伊等於來謙鳴居官有何可取據以保薦豈伊等竟皆受其愚蔽所謂察吏者果安在耶著傳旨申飭再來謙鳴前在雲南知府任內尚有未完之項現發往雲南著追可一併傳諭喀爾吉善陳宏謀令將伊任所貲財查明移咨滇省照數抵補不可稍有隱匿以贖妄舉之愆○

又諭碩色所奏匪犯何聖烈等與犛匪盤道鉗等交通不法一案內稱犛匪現在逃匿如已經安南追獲殲除則已倘未就擒當酌相機宜辦理等語內地民夷出交助匪自宜嚴治其罪其犛匪逃匿雖在外藩但竟置之不問似亦非體應行文安南國王言犛匪盤道鉗等本交趾所屬在該境內聚衆不法因有與內地匪犯勾結情由所有現獲助匪逆犯何聖烈等業已即行分別正法其犛匪盤道

平定人三十一

鉗尚在竄匿若內地發兵擒捕恐於該國不無騷動該國王宜作速自為追捕務期悉就殲除毋致再行勾徒滋事著傳諭碩色知之○兵部議覆閩浙總督喀爾吉善奏江南太湖營於乾隆十一年經前任江蘇撫臣陳大受奏改為內河水師查江浙兩營事同一例所有浙江之太湖營亦應改為內河水師應如所請從之○署四川總督黃廷桂奏前督臣策楞任內兩司將臣胞弟直隸茂州知州

黃廷銑保舉堪勝知府具詳以策楞丁憂離任未及具奏臣現已題請迴避另於所屬內保舉堪勝之員給咨送部引見得旨黃廷桂不過暫署川督且在督撫中頗能實心辦事伊弟黃廷銑不必迴避著加恩准其保舉一體送部引見○準噶爾部人美諾克來降命賞給安插如例○安徽巡撫張師載疏報貴池舒城等一十五州縣首墾田一百八十頃八十八畝有奇○戊申

上詣暢春園問

平定人三十一

皇太后安○諭曰永桂吳三傑俱著來京候旨江南狼山鎮總兵員缺著呂九如署理雲南普洱鎮總兵員缺著馮哲署理呂九如馮哲服闋之日該部再行請旨實授○諭軍機大臣等喀爾吉善等奏孥獲海豐莊糾衆抗官之吳典及鹿仔港糾衆搶犯之施篤供出倡首之施天賜一名現在勒捕務獲後飭屬一併嚴審定擬解省審明辦理等語臺灣海疆

要地。奸民聚衆。圍官搶犯。不法已極。若解赴省城正法。彼地無由而知。不足示儆。著於該道府審訊確實之後。即於該處地方正法。俾伊等目覩奸頑就戮。深知畏懼。方足以懲刁俗而挽頹風。將此傳諭喀爾吉善等知之。○喀爾喀王公喇嘛等。遣台吉達什丕勒三都克扎布。進馬五千七百四十一匹。駝一千六百二十隻。予議敘加賞有差。○以江南常鎮道劉慥。為福建按察使。○旌表守正捐軀之直隸喀喇河屯民盧同女盧氏。○己酉。諭軍機大臣等。京師自六月十二日。甘霖大霑之後。連次得有雨澤。已極霑足深透。聞天津迤南鹽山南皮一帶。尚在缺雨。早禾已屬無望。朕心甚為憂念。不知似此等州縣。共有幾處。將來獲有雨澤之後。或有補種雜糧與否。實在情形若何。可傳諭方觀承。令其詳細查明。據實分晰具奏。不可稍有隱飾。○軍機大臣議覆盛京兵部侍郎卞塔海奏。稱來歲巡幸

盛京。凡經由程站驛馬車輛。俱應豫行飭備。查自沙河站至舊邊十二驛馬。每驛五十匹。請各添五十匹。盛京額七十匹。添三十匹。穆奇沙爾。許噶布拉村三驛。共十五匹。添五十匹。自英莪門至尚家河。向未設站。請於馬前寨。鳩河洛地方。添設二站。並添馬七十匹。以上統計。應添馬九百三十五匹。除鳳凰城法庫等二路。徹出六十匹外。尚多不敷。請於大凌河。養息收哈達郭洛等處。收羣內會同該總管挑備。又沙河至盛京。腰站十三處。各撥三十匹。盛京至馬前寨。腰站五處。各撥二十匹。請飭直隸總督。於附近驛下酌撥。又隨營馬。請飭盛京將軍。於官馬項下撥三百匹。備用。車請飭奉天府尹。於英莪盛京廣寧寧遠等處。各備五十輛。往來馳送文件。請飭盛京將軍。於八旗驍騎校內。挑十二員。兵二十四名。分撥各站備遣。均應如所請。從之。○又議奏天津老少牌鹽一案。臣等請調吉慶來

京面議據稱牌鹽為侵引蠹課之由必應停止。老少養贍日給大制錢二十四文。官鹽每觔小制錢五文。閭閻自可相安。惟商運成本不敷。請將所銷餘引免其輸課等語。查天津額引七百道。業經照例輸課。其餘引應如該鹽政所議。無庸增納。至作為公共口岸。一切章程。仍交該鹽政會同直督酌定。咨部存案。從之。吏部議奏署兩江總督鄂容安奏稱一應奏案督撫於具題後即提犯到省候奉

高宗實錄卷四四一

五

到諭旨。率在省司道審辦。以免招解往返。並杜捏病展延諸弊。一應叅案督撫務於原訪之初體察確鑿入奏。原叅情節不虛。案證不難即得。自不致枝展踰限。均應如所請。通行飭遵。從之。以太常寺少卿張映辰為陝西鄉試正考官。翰林院編修盧明楷為副考官。署戶部侍郎夢麟為江南鄉試正考官。翰林院檢討王太岳為副考官。庚戌。

上御勤政殿聽政。○諭軍機大臣等雅爾哈善

摺奏浙省完欠錢糧一摺。內開未完銀二十八萬八百餘兩。前次浙省自張若震任布政使時。所有額徵錢糧俱係年完年款。並無宿逋。朕以該省官民能敬事急公。曾降旨嘉獎。今僅一二年間。何以逋欠如此之多。如係災歉寬緩尚屬有因。但該撫摺內並未聲明。若經徵怠玩。致長抗欠刁風。則甚不可。著詢問雅爾哈善。令其將該省未完銀兩緣由查明據實覆奏。○辛亥。

高宗實錄卷四四二

五

上詣暢春園問

皇太后安。○壬子。諭八旗滿洲官員向來止許居住內城。間有年老退閒者。尚可於近京之田園祖塋地方。就便居住。至南城外乃漢大臣官員所居。並非滿洲官員應居之地。近聞滿洲官員內。竟有移居南城外者。甚非所宜。著八旗都統嚴行飭禁。其現今居住者。概令遷移入城。再著派御前大臣侍衛。即行前往會同巡城御史。將現在南城外居住之滿洲

俱係何項人員。即行查明奏聞。○戶部等部議覆閩浙總督喀爾吉善等奏稱臺澎兵餉向例兩次赴省領運。重洋冒險堪虞。請於春季風色平和之時。將全年俸餉。一次領運。臺餉存貯府庫。仍照向例派撥防守。澎湖通判庫防範臺府庫貯。責成該道盤查。澎湖通判庫貯。責成該道府。遇有新任自厦赴臺者。道經親盤。均應如所請。自下年甲戌為始。准全領

實錄卷四十四

五

一

運從之。○癸丑諭據李因培奏稱順天屬邑飛蝗。皆自灤州玉田而至等語。順屬飛蝗。既來自永平。則永平一帶極宜加意撲捕。毋使滋蔓。若僅以驅逐為事。必於禾稼有損。總督方觀承現在永定河守汛。李因培既係署侍郎事。即著以欽差馳驛前往該處。督率道府營縣等官。上緊搜捕。務期淨盡。勿致飛揚。四出貽害。田禾其地方官有不實力者。即著叅處。○諭軍機大臣等據高斌張師戴所奏清

黃汎水盛長。工程平穩情形一摺。內稱山盱仁義禮舊三滾壩。已過三尺五寸。令布政使富勒赫等前往加謹守護。將智信二壩相機啟放。以資減洩等語。殊未明晰。朕南巡閱視河工。經相度審定。於三滾壩之外。增建智信二壩。原為宣減盛漲之計。應以乾隆十五年滾壩過水三尺五寸。天然壩仍未開放為準。智信二壩石面加封浮土。必三壩已過水三尺五寸。猶不足以減盛漲。則啟智壩之土。仍不減。乃次及於信。以示節宣之度。今三壩雖據稱過水三尺五寸。而智信二壩一時齊放。殊與前降諭旨不符。想高斌等亦必因水勢過盛。有萬不獲已情形。然其摺內何以並未詳晰奏明。可傳諭高斌等。令將實在情形。及與下河一帶民舍田廬。有無妨礙之處。作速據實奏聞。○又諭方觀承奏稱前報缺雨之順德府屬邢臺得雨七寸。唐山得雨一尺。其餘州縣及鹽山南皮並廣平府屬。尚未報到

實錄卷四十五

五

等語。看來近京一帶地方已得優渥。霑足。田禾可以無虞。其遠郊州縣恐未必盡獲霑沛。目今將交七月。秋禾被旱者既難補種。未損者急賴霑濡。所有順德廣平等屬。從前奏報缺雨州縣。未知近日曾否續得透雨。可傳諭方觀承令其速行查明。據實奏聞。是月直隸總督方觀承奏裁掣老少鹽牌。改給養贍錢文。原為靖私疏引起見。天津士民恐改行引鹽。商人王志德得以壟斷。遂創為浮議。有

實錄卷四四一

六

云鹽臣吉慶與王志德同宗者。有云運使盧見曾與王志德親厚者。經臣曉諭鹽價照牌鹽之舊定。以每觔小制錢五文。民間仍可食賤。衆情乃知此舉。鹽政非為瞻顧商人王志德而設。而蘆商中又多與王志德不睦者。有素不安分之武舉金國英等。斂錢欲將鹽價刊碑。並稱不許查拏。越境私銷。經天津府詳斥監禁。照棍徒例辦理。目今私鹽已除十之七八。老少貧民每月朔支領錢文。咸稱得所。

得旨。如此則吉慶不但無私。尚屬擔當。辦理豈可信。浮議而啟愚民挾制官長之漸乎。浙江巡撫雅爾哈善奏永嘉縣南龍外洋有遭風番船一隻。頭目一人。查係呂宋國職官。應照例撫恤。現咨閩省。並派巡船護送至廈門。遇便附送歸國。報聞。閩浙總督喀爾吉善等奏延建邵道稟報邵武縣訪得縣屬禾坪里有杜國祥。杜奇羅家球等倡立鐵尺會。當將杜國祥拏獲。建寧縣訪有民人江茂等

實錄卷四四二

七

與邵邑杜奇等結連鐵尺會。當將江茂等拏獲。訊據供出會夥羅家球等九名。亦已拏獲。並起出鐵尺二根。偽劄稿一紙。內杜奇一名在逃。現在嚴緝。務獲報聞。又奏廈門地方安海渡船被盜。聞同安縣屬柏頭村有林篤林協等素駕小艇在海為匪。兵役至該村訪緝。見村外有二艇。內藏十餘人。即林篤林協匪船。當將二人擒獲。餘竟上岸糾衆拒捕。將二犯帶鎖奪回。旋據興泉永道稟報帶領兵

役。前往柏頭村。所有拒捕奸民。並匪犯林協等十三名。匪船二隻。俱已拏獲。臣思林姓聚族濱海而居。庇護盜賊。其間必有一二巨慝。現飭隨究隨拏。務得倡率拒捕之首。置之重法。得旨是。速行定罪嚴處。以警刁風。○署山東巡撫楊應琚奏。營制軍械。當以鳥鎗弓箭為先。大刀長鎗。原非所亟。乃山東各營如沂州一營。以此項占兵額至八十名之多。竟有不能施放鳥鎗弓箭者。即他鎮亦未免濫充。應請嗣後一體改為鎗箭。而大刀等項。兼習者聽。但不許以此應募入伍。得旨甚是。

實錄卷四十一

四

大清高宗法天隆運至誠先覺體元立極敷文奮武孝慈神聖純皇帝實錄卷之四百四十一

實錄卷四十一

四

大清高宗法天隆運至誠先覺體元立極敷文奮武孝慈神聖純皇帝實錄卷之四百四十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務黃旗滿洲都統世襲騎都尉軍功加七級尋常加二級軍功紀錄一次臣履歷

總纂官經筵講官太子太傅文華殿大學士文淵閣領閣事稽察欽奉

世襲騎都尉軍功加九級隨加二級又加二級臣謹詣內大臣戶部尚書理藩院滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

敕修

乾隆十八年癸酉秋七月甲寅朔享

平定人曰四二

太廟遣誠親王允祕恭代行禮○兵部議覆陝西固原提督齊大勇奏稱各營設兵馬步守三項相兼查延綏鎮屬之魚河歸德鹽場三堡現未設馬步名糧在營守兵進身無階請將波羅協抽出馬兵十五缺步兵十五缺以馬步各十缺撥換魚河堡守兵二十缺以馬步各五缺撥換歸德堡守兵十缺定邊協抽出馬步兵各五缺撥換鹽場堡守兵十缺嗣後波羅協遇馬步兵糧缺出停其召募照依

指撥名數陸續先儘魚河堡次歸德堡各在守兵內選拔所遺守兵糧缺送歸波羅協召募補額其定邊協有馬步糧缺亦照波羅協之例辦理應照所請從之○乙卯

上詣暢春園問

皇太后安○諭軍機大臣等蘇昌所奏動支耗羨銀兩一摺已勅部知之矣但摺內所開西洋貢使巴哲格進京往回盤費一項該貢使既經給與勘合自有供應自京接引之郎中

平定人曰四二

官柱等又稱該撫送與豫備途次盤費並未收受何以尚至開銷銀一千餘兩即係實在支用亦應俟該貢使回國之後一併報銷交部查覈方是現在尚未回至粵省何以此時即行開銷具奏耶若以此項係在十七年耗羨款內必須分年奏報則將來摺內原可聲明即此可見其辦事並不用心著傳旨申飭並令將此項動用之處另行明白回奏尋奏覆西洋貢使巴哲格進京隨從官役甚多沿

途供應恐難足用。查雍正四年西洋貢使麥德樂赴京。於填給勘合外。復於火耗項內支銀一千一百兩。致送使臣以備沿途廩給不敷之用。臣因援例致送。飭司於十七年耗羨內支取。按照年款開銷。是臣愚昧拘泥。至前項銀因該貢使已抵粵。據伴貢同知稟稱往返均未動用。如數繳還貯庫。入十八年耗羨款內。得旨。若非此旨。則不成已奏銷之項乎。

○又諭蘇昌奏報廣東地丁已未完數目一

摺。據開十一。十四。十五等年。未完銀八十餘兩。至七百七十餘兩不等。十六年未完銀一千五百餘兩。十七年未完銀至一萬二千八百餘兩。從來清釐錢糧之法。全在平時留心經理。地方大吏果能督率所屬。清釐積弊。則民間逋負何致日多一日。今該省十七年所欠數目。較之十五年以前。不止相懸什百。即謂歷年舊欠。因陸續帶完。是以為數漸減。亦不應就十六十七兩年之間。相較已增至倍。

從蘇昌於此其何所辭咎耶。著傳旨詢問。尋奏覆查十七年未完民欠一萬二千八百餘兩。內惟東莞博羅二縣。因本年春間辦理要案。未克專力催徵。以致共欠六千兩。高要縣並無別事。亦欠二千五百餘兩。加以別縣積欠。共一萬二千八百餘兩。地方官不善徵比。咎固難辭。而臣平日督催不力。更無可辯。應請將臣交部嚴加議處。得旨。汝竟糊塗不解事也。○吏部議覆國家舊定律令章程難遽

議改。惟內外文移。瑣屑煩苛。一事而屢更不定。一案而數年不結。積習相沿。誠非政體應請勅內外各衙門。凡一切文冊。務歸簡便。其間有文法未協。而事理可通。字句舛錯。而案情無誤。無關弊實。酌其輕重。隨時辨結。不得動加駁詰。再查各衙門現行事例。有無關輕重。可以裁歸簡易之處。在內令各部院。叅酌於兩個月內。將應刪條款。會同九卿科道。詳議具奏。在外令各省督撫。詳酌於接准部文

日四個月內分別列款具題凡應行酌減事件。勅令會同九卿科道議奏。至教養為守令專責。請嗣後各省守令內實有留心民事著有成效者。令該督撫遇有保題卓薦等事。即於此項人員揀拔從之。刑部議覆江蘇按察使許松估奏稱原配充軍逃犯例按脫逃次數各照原配充軍計次調發其免死減等遣犯逃回向例分別定擬如無行兇為匪遞回遣所枷責因屬外遣無可加調是以不計次數解回配所不再議調是免死充軍之逃罪較原配充軍之逃罪反輕未為允協等語查免死充軍人犯較原擬充軍人犯情罪本重例內不計脫逃次數仍發配所枷責示懲似屬反輕但如該按察使所奏免死軍犯脫逃照原擬軍犯計次調發亦無區別請嗣後免死減等發邊衛充軍人犯內有逃回者照原擬充軍人犯逃回之罪按次遞加初次逃回者照原犯充軍二次逃回例枷號兩個月

調極邊衛充軍再犯者照原犯充軍三次逃回例調發極邊烟瘴充軍如怙惡不悛逃至三次者改發寧古塔等處當差仍通行各省并移律例館補載得旨允行以青州副都統格木德西安副都統色克慎對調丙辰諭戶部侍郎事務現在辦理乏人着阿里衮暫行兼管丁巳諭曰哈達哈等查奏居住正陽門等三門城外之滿洲官員兵丁竟至四百餘家此內年老退休及閒散無職事之人在僻遠閒曠之地尚可至現任職官每日應入署辦事護軍近列羽林各有差使倘遇暮夜傳喚隔城殊為未便且內城自有各旗分地尤當恪遵定制其離親族而潛往者徒以近市喧囂闐闐龐雜非溺於酒食游戲即私與胥吏往還便易耳著將現任官員交該部察議兵丁人等交該管大臣責處至宗室更屬不合交宗人府嚴加議處其管理宗人府王公及八旗都統並護軍統領等平時漫

無約束稽查著一併交部察議所有現在居住南城外閒散人等著軍機大臣會同步軍統領酌量分別除閒曠處所仍聽其居住外其餘官員護軍等並勒限令其陸續入城居住嗣後八旗都統嚴行禁飭凡滿洲人等毋得復在南城外居住年老退官者仍聽尋議臣等遵旨將南城外旗人應否居住地方酌量分別查正陽門以南天橋以北崇文門以西宣武門以東一帶地方市廛龐雜在彼居住之官員兵丁應勒限令陸續入城居住其餘閒曠之處八旗告休及閒散人等尚可暫准居住現任官員及護軍等應勒限令移進城仍交該管大臣查禁毋許復住外城報聞以休致奉國將軍德敏子順昌故奉國將軍永珙弟永蔭均照例襲職戊午諭旗員步射所關甚要屢經朕降旨申飭八旗大臣當必稔知自應將官員鼓勵練習本日正藍旗滿洲引見人員射箭撒放多不合式伊等

所司何事而聽其流弊若此著曉諭八旗王大臣等嗣後旗員若仍蹈前習朕惟伊等是問○補行雲南省十七年分軍政卓異官四員年老官二員才力不及官二員分別陞賞處分如例己未

上詣暢春園問

皇太后安○諭曰奇通阿之公爵係伊祖父出師奮勉故特施恩賞給者雖非世襲罔替但念伊祖父勤勞仍可承襲而奇通阿現又已襲親王伊並無同胞弟兄若將此公爵令伊子承襲未免過優將此著該衙門存案軍機大臣等議覆陝甘總督尹繼善條奏安西等處邊防事宜一挑選精銳官兵分委大員查驗一牧養馬駝宜嚴飭經管將弁加意調習一口外路徑查勘水草一防兵宜酌帶鳥鎗一防所多貯鉛藥一甘肅兩州宜分貯銀兩備撥應如所請從之庚申諭軍機大臣等前命李因培馳驛前往永平一帶督率地

方官撲捕飛蝗今已數日未見摺奏不知現在飛蝗曾否悉就撲滅不致為害田禾否何以尚未奏到甚為懸念可傳諭李因培令將近日撲捕實在情形作速奏聞恐伊家人齎奏行走不能迅速嗣後凡有奏報俱著由驛遞馳達可一併傳諭知之 壬戌

上詣暢春園問

皇太后安 諭前經降旨截留南漕二十萬石分貯天津水次各倉備用但恐該旗丁等以非抵通交納可比於米色斛面或至任意攙和短少希圖朦混免收而州縣印官不能親身經理胥役人等又往往藉端勒索於中漁利此等弊端均所不免著該督方觀承即飭天津道董承勳親往監看嚴加稽察嗣後如有截漕省分俱著該督撫等專派就近駐劄之道員監看稽察不得但委之州縣佐貳以致滋弊著為令 廣東巡撫蘇昌疏報廣潮連嘉西府州屬共開墾水田沙坦六十六頃

五十五畝有奇 癸亥

孝懿仁皇后忌辰遣官祭

景陵 諭武職兼銜乃沿明代舊制其中陞銜陞任條例紛繁即以敘錄軍功不可不留此勲階以為獎賞之地然與現任職事何與焉徒使胥吏得以高下其手且外省叅遊遇陞銜調任畏其遷移繁費至有營求督撫保奏留任者是陞銜本以鼓勵戎行而日久轉為苦累亦何用此虛文為也嗣後武職中之大銜小銜應作何刪除更定一歸簡易止就現在官職分別年分論俸陞轉之處著該部詳悉定議其軍功給劄議叙作何分別階級及漕運河工從前照軍功議叙者應行改為加級紀錄之處一併酌定具奏尋議叅遊都守各缺悉按等級推陞必須多寡相稱查各省叅將一百六十三缺遊擊四百五十缺都司三百四十八缺守備八百十八缺向例加署都司銜之守備即陞遊擊是守備尚可兩途

陞用今加銜既刪守備祇陞都司則都司缺少守備人多未免遲滯臣等酌議請於各省遊擊除分防要地未便更易外酌改都司八十缺其應何營更改之處令各督提酌定報部註冊所有應改各缺其現在人員仍照原官陞轉俟陞調離任後陸續改換則守備之缺倍於都司都司之缺多於遊擊陞途更寬至水陸分途陞用祇於本營內較俸不必加銜軍功議叙人員向係按功加等次兼銜給劄推陞時照京俸一年作半年算應將此項人員陞補實缺無庸給與虛銜運糧衛弁向有加銜加級不同以省分之遠近運次之多寡為量原照軍功例從優獎勵應請將加銜改為加級准其隨帶其河工武職議叙俱係加級紀錄並不加銜應毋庸議得旨著即施行又諭曰馬燦署理順天府府尹以來並未見有實心出力之處今夏順屬蝻孽萌生且有飛蝗為患馬燦身任地方不能先事督

察防範及奏請前往督捕之後又不實力辦理以致滋長日久延及海子東門內外經朕察知特派御前侍衛帶領營員前往撲捕勢甚蔓延此皆馬燦從前懈怠玩忽所致著革職以中書在軍機處効力贖罪兵部議覆貴州鎮遠鎮總兵唐開中奏稱武舉會試未第向例具呈兵部咨回本省分發各營効力給與馬糧隨千把一體差操原因武舉未諳營伍令其効力學習但貪圖近便多請分發本籍協營而部臣亦准照所請分發查協營大小不一馬糧多寡不同分發大營則馬糧易給分發小營則馬糧無多祇敷該營遞文護餉之用倘有缺出必先給武舉則營中少一當差之人若挑補兵丁則武舉亦難枵腹効力勢必酌量改撥但與其改撥於到營之後不若釐定於分發之先請嗣後未第武舉有具呈隨營學習者由兵部發回本省令該督撫提鎮酌量營分大小就近分發應如所

請從之。工部議准河東河道總督顧琮疏稱運河廳屬汶上縣汎何家口舊有滾水石壩一減水石閘一年久朽塌河溜遷移不能洩水請動項興修於舊壩迤南另建滾水石壩一從之。甲子。

上御勤政殿聽政。諭順天府府丞員缺著申甫補授李因培未回京之前順天府府尹印務即著申甫暫行護理。諭軍機大臣等據李有用奏稱同安縣林篤等行竊販私糾衆拒捕打傷兵役一案先後拏獲各犯共三十餘名又林姓族房交出林對一名俱交該道廳嚴加審訊等語閩省濱海地方民風刁悍伊等率多聚族而居平日以販私行竊為事遇兵役查拏往往糾衆拒捕恣行不法此等惡習必宜嚴加懲儆今林對一犯雖據族人交出焉知非見官兵搜捕甚嚴希圖卸罪其是否此案正犯殊未可信可傳諭該督等即將現獲各犯隔別研訊究販私行竊共若干

人糾衆拒捕又若干人其主謀倡率之犯尤宜追訊明確務得正犯逐一按名捕獲分別速行嚴辦以示炯戒不可少存將就了事之意以致刁民或有漏網此旨到日仍著速行回奏。尋閩浙總督喀爾吉善福建巡撫陳宏謀奏覆同安縣林姓在廈港行竊經外委帶兵先獲林對一名林姓族人擁集拒捕該犯脫逃嗣撥兵赴村搜拏林姓將林對交出並獲鹽犯林孕等究出販私林超等各犯亦經拏獲。是此案販私人犯原係搜拏拒捕時併獲非同時拒捕之犯而林對一犯則係官兵初次首獲後被脫逃官兵等指名向林姓族人根要始行交出非族人自行交官臣現飭員將現獲四十餘名逐一研究得有拒捕確供者十餘名餘尚未質究確實得旨覽又批此非開脫而何朕前用此舞文之筆可乎。又諭據巡視北城給事中常福等奏六月二十至二十六等日北城所屬之白家疇韓

家川等村落有飛蝗螞蚱。詢問鄉耆地戶皆稱自北飛來。又七月初七日。白家疿穀子地內。蝻子萌生。現在協同該州悉力捕除等語。北城所屬村地。白家疿以北。俱與昌平毗連。所有飛蝗。明係該州查捕不力。以致長翅延飛。霸昌道王檢等。在彼督率。何以並未實力撲滅。容其滋蔓。若此。現在特派御前侍衛富德五福等。前往查察。督撲著傳諭方觀承。將現在如何辦理情形。及曾否淨盡。有無遺留蝻孽。作何撲除。不致貽害之處。一併據實確查奏聞。以翰林院侍讀梁錫璣充日講起居注官。以詹事府詹事于敏中為內閣學士兼禮部侍郎。湖南正考官邵樹本。丁憂以翰林院侍講學士溫敏為湖南正考官。

乙丑

上詣暢春園問

皇太后安。諭軍機大臣等。方觀承覆奏昌平飛蝗捕除完竣。并飭查白家疿是否從前漏

捕遺孽等因。一摺。詞語甚屬支離。即所稱武清、香河二處。據清河道宋宗元稟稱。一二日內均可完竣之語。殊不足信。武清、香河等處久已據奏撲捕淨盡。何以又云一二日內始可捕完。此其不可憑信益明矣。且南苑地方前報撲捕已竣。近聞該處蝗蝻又復生發。現復遣人前往查捕。豈得如該督所云各處俱已查報淨盡。數日來並無報有復起之處乎。今年直隸各屬蝗蝻。若非朕時刻留心查訪。督飭並特遣大員經理。又疊派侍衛帶領弁兵搜捕。勢必禾稼傷損。有減收成分數矣。再看來飛蝗所過。即復生子。有遺留縣延不絕。可傳諭該督方觀承。令其即速查明各屬飛蝗經過及落地處所。逐細搜剿。務早絕其根源。勿使稍有遺孽。若今年報捕完竣之處。明歲復有生發。朕將惟該督是問矣。至現在直屬蝗蝻未盡共若干處。如何辦理情形。仍遵前旨詳查。據實覆奏。尋奏覆直屬蝗蝻宛平

等三十二州縣衛俱於七月初六以前先後結報撲淨其續報蝻孽生發現在撲捕未盡者灤州已除十之六七玉田豐潤已除十之七八現飭員撲捕以期淨盡報聞以翰林院編修劉星煒為河南鄉試正考官編修葉觀國為副考官編修林明倫為山東鄉試正考官編修張裕華為副考官侍講學士金柱為山西鄉試正考官宗人府主事睦朝棟為副考官丙寅欽差署侍郎李因培奏覆查各路蝗蝻惟灤州情形最重據通水道王楷原立三局派捕村莊共二百二十二處實在淨盡者一百三十五處未淨者八十七處約捕完十分之六其未淨村莊皆在團山王山州城三大局內現在多添員役嚴限督催尚須三五日方能廓清至王楷自六月在灤祇坐駐調度並不前往查催以致委員弛惰蝗蝻日益得旨有旨諭部諭曰侍郎李因培奏灤州被蝗村莊二百餘處通水道王楷自六

月內前往惟坐駐開平調度並不親往查驗立限督催以致委員弛惰等語王楷自翰林不數年間用至監司大員亦因其小有才該督稱其奔走勤勞耳今該屬蝻孽生發乃不躬親督率上緊撲除玩視民瘼莫此為甚王楷著革職仍留該處令其隨同委員親身撲捕並守至明春若無蝻孽萌生該督再行請旨以為苟安溺職者戒今年直隸各屬自六月中旬以後甘霖疊沛田禾長發茂盛但蝻孽萌生雖云貽害田稼不過百分之一何若地方官及早查捕併此百分之一亦不貽害乎目今南苑東南蔓延者即永平未經實力撲捕所致而白家疇之滋孽又昌平所未淨者也雖經屢派御前侍衛前往督理而地方官所司何事且天津所屬春末夏初之蝗何嘗不盛經吉慶親行督率竭力搜除今並不為害足見本屬人力可施惟在實心辦理耳吉慶著交部議叙方觀承雖屢經督飭終不

實力查辦。以致日益滋生。且該督近來辦理諸務。又覺蹈上和下睦之故智。王楷係專委督捕之員。而有心姑息。並不查叅顯屬徇庇。著明白回奏。現在直屬未盡蝗蝻共若干處。如何辦理情形。該督一併詳悉確查速奏。尋奏覆查灤州蝻孽蔓延。彼時王楷在武清捕蝗。臣因灤事緊要。而王楷上年在保定府任內。辦理捕蝗屬員。皆畏其過嚴。臣因專委查辦。謂可倚信。不圖王楷並不親身查催。以致委員弛惰。臣不早覺察。咎實難辭。應請將臣交部嚴加議處。下部嚴議。尋議照徇庇例降三級調用。得旨。方觀承著革職。從寬留任。旌表守正被戕之直隸大興縣民韓柱兒妻楊氏。安平縣民崔盛印女崔氏。丁卯諭軍機大臣等。喀爾吉善等摺奏臺灣營兵胡勝喜持刀入鎮署。欲行刺總兵一案。該督現在提訊辦理情形。甚屬妥協。陳林每以專閫大員。召營營兵致欲持刀行刺。其中或別有情

由。自當確實審究。該員本屬武臣。因其漢仗技勇。尚屬可用。是以簡任臺鎮。其平昔於禮法官箴。不能防檢之處。看此案情節。自所不免。如查明應行叅劾。即將該鎮照例叅奏。至臺灣海疆重地。人心刁悍。營兵懷挾私憤。輒敢行刺本鎮大員。斷不可不嚴加懲儆。務即查訊明確。速行按律從重辦理。傳諭該督等知之。兵部議覆。閩浙總督喀爾吉善奏稱漳州鎮山海奧區。左右兩營遊擊及城守營守備駐劄之地。離府治二百里。形勢隔越。請將附近之漳浦海澄二營。改為鎮標。左右兩營將鎮標原駐之平和龍巖二處。改為平和龍巖二營。仍歸鎮屬。並將原駐漳平之城守營守備。撤回郡城。與遊擊同駐。而以新政龍巖營守備。駐劄漳平。其鎮標左右兩營。原額馬步守兵八百餘名。多寡不符。鎮標兩營。係援勦之師。原設馬二步八。漳浦海澄二營。係城

守防兵原設馬一步九營鎮更換則馬步之數亦應彼此改撥原頒漳浦海澄遊擊關防應送部銷燬新改龍巖平和二營遊擊應請鑄給關防均應如所請從之調福建漳州鎮總兵馬大用為臺灣鎮總兵福寧鎮總兵富海為漳州鎮總兵戊辰中元節遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵

端慧皇太子園寢諭定例州縣等官捕蝗不力藉口鄰封希圖卸罪者革職拏問該管上司不速催撲捕者降級留任向來督撫往

往以該道府前經節次督催現在揭報情由於本內聲叙遂得邀免處分以致道府玩視民瘼並不留心督察今歲直隸自春徂秋捕蝗未盡者即由於此嗣後州縣捕蝗不力應拏問者俱應將道府一併題叅交部議處該督撫等不得有心姑息於本內濫為聲叙以為寬貸之地該部通行傳諭知之又諭江蘇巡撫莊有恭覆奏學政任內接收丁文彬逆書昏憤縱逆罪無可逃請交部嚴加治罪一摺此案前據楊應琚奏到降旨詢問莊有恭令查取逆書進呈旋據奏稱於乾隆十四年曾有瘋人丁文彬跪獻此書當時並未留心查閱後亦不復寓目事隔五年不知敗簏破篋中果存此冊否俟捕蝗回署細檢等語朕即知其存心取巧必不將原書查取呈覽姑先為此奏豫存掩飾地步當即批令細查書來不得終歸烏有今果以空言回奏不出朕之所料丁文彬逆書內敢於指斥本朝妄

肆詆訕莊有恭之意。蓋恐進呈此書則罪戾顯然。故藉詞尋覓不見。以避重就輕。夫大逆不道之詞。豈有曾經寓目。致令迷失之理。必係聞信查出。私為銷燬耳。莊有恭受朕深恩。不應狡詐為鬼蜮伎倆。至是也。即拏問治罪。亦所應得。但天下之似此者。未必僅莊有恭一人。伊為巡撫。尚屬能辦事。且伊巡撫任內。若見此等。必早為奏辦。當在學政時。其意不過以學政司文衡之員。何必多此一事。是其

學政司文衡

三

罪不在巡撫。而在學政。且欲保全學政俸祿。養廉耳。著照伊學政任內所得俸祿養廉數目。加罰十倍。交兩江總督請旨。以為徇名利而忘大義者戒。該部知道。摺並發。諭軍機大臣等。方觀承題。參灤州知州孫昌鑑捕蝗不力一本。所辦非是。蝗蝻生發。州縣不親身力捕者。例應革職。拏問。該管上司亦各有應得處分。今該督乃僅將該員題參革職。並不按例拏問。而該管上司則槩置之不問。將來

捕蝗州縣。其何知所懲儆。前李因培亦曾以該員智識庸庸。僅奏請革職。在李因培或因未諳成例。或因署任不為己甚。若方觀承則久任封疆。不應如此草率了事也。此本著駁回。並朱馥一案。皆令其按照定例。另行題參。並該管道府。一併查參。請旨議處。可將此傳諭方觀承知之。調直隸泰寧鎮總兵任澍為福建福寧鎮總兵。以一等護衛養善為泰寧鎮總兵。

福建福寧鎮總兵

三

大清高宗法天隆運至誠先覺體元立極敷文奮武孝慈神聖純皇帝實錄卷之四百四十二

大清高宗法天隆運至誠先覺體元立極敷文奮武孝慈神聖純皇帝實錄卷之四百四十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處總

吏部理藩院事務黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董浩內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉七月己巳

上詣暢春園問

皇太后安○諭軍機大臣等李因培奏報灤州捕蝗已淨村莊一摺據稱灤州未淨蝻孽莫甚於團山土山州城三局已多派員弁撲捕定限完竣約五六日可以竣事當星馳回京等語看來永平所屬蝻孽勢甚蔓延尚須實力查捕以期淨盡且蝗蝻最易滋生甫經撲滅遺種旋復萌動即如海子一帶經派令御前侍衛等前往搜捕畧盡現在又有續生蝻

孽此即其明驗而查辦之法亦惟有盡力搜捕毋俾遺種未可以一經掃除遽保無虞也李因培應在彼多駐數日督率地方官上緊撲捕務盡根株更宜於淨盡後細查有無蝻種復出必十分放心再行回京伊兼管府尹科場監臨乃八月初間之事現在不必急於回任即行傳諭知之○又諭據高斌等奏稱六月間清黃水勢過盛五壩同時啟放減水下注淮揚運河西隄以西自寶應以下臨近

湖邊下地俱淹浸成災等語當清黃異漲之時自不能不啟壩以資宣洩但水勢直趨下流瀉湖地畝必多被其淹浸雖據稱高阜處所尚無妨礙其已經被浸田畝共有若干及實在成災分數俱應一一確勘如有應行撫卹者即宜豫為辦理此皆督撫大吏專責乃據鄂容安止稱銅山等邑被淹頗寬下游高寶等州縣被水輕重不等之語所奏尚未查報明晰莊有恭則竟未奏聞著傳諭該督撫

令其據實查明一面速奏一面即行撫卹以慰軫念尋莊有恭奏覆臣會同河臣高斌查勘邵伯湖之減水二閘金門衝開共八十一丈水大溜急高郵之車邏壩其土壩被風浪漫開六十餘丈至兩邊石裏頭而止查石脊至土隄上止七尺餘寸今逐日漸減現止過水三尺餘寸此兩處衝漫之情形也至民田則湖西一望汪洋隄東一帶亦多被淹臣查勘各村舍高處無礙低處遷附近地惟邵伯二閘以北高郵城外以南沿隄搭棚棲止災民此現在田畝廬舍之情形也臣細訪輿論災雖較重於七年而高寶一帶數年來收成較稔元氣尚未大傷臣一面令該府縣親查搭棚戶口給以印票先行動項撫卹臣擬查勘淮徐事竣即回邵伯協同河臣督辦堵禦事務仍駐揚州辦理一切賑卹得旨覽奏俱悉看來此災匪輕應竭力妥辦撫卹餘有旨諭諭曰據高斌等奏稱七月初二日夜桃源

南岸顏家莊溜勢下移緊急下埽不及隨就近開放水戩頂溜一洩氣勢漸緩化險為平等語開溝引放溜勢自可藉以漸緩但所畫圖內朕尚有未甚明了處如畫圈處係開放水口然所進之水仍由此出則格隄內亦必逐日加增無從宣洩則衝溜險急之際何以遂得無恙又如硃點處原挑放淤之倒溝因何未用可傳諭高斌等令將現在水勢情形及所問未明晰之二處詳悉繪圖貼說奏來又覆奏開放智信二壩一摺看來今年黃河異漲實有必需啟壩暢洩不得已情形但據奏稱自寶應以下臨近湖邊之下地田禾淹浸成災等語其某州縣被災田畝若干及高阜田畝是否實係全無妨礙所奏尚未明晰亦著速行查明據實奏聞尋奏覆查顏家莊隄工被衝勢甚危險幸塘內積水較低就近開放溜勢得以平緩塘內黃水亦可停淤澄清所有硃圈處隄口暫就寬塌東西兩頭先

經裏護平穩。再查黃河放淤。若形勢不甚危迫。原應倒溝細流放水。今因急溜衝隄。迫不及待。所有硃點處。原挑放淤之倒溝。是以未用。至自寶應以下。臨湖窪地。田禾被淹。係就當日情形具奏。其中分別成災與否。及被災田畝若干。一時尚未得確數。得旨覽奏俱悉。○鑄給京口水師右營遊擊關防。從署兩江總督鄂容安請也。○直隸總督方觀承奏。據邢臺縣稟報。拏獲邪教李起奉。史珍。高榮等。訊供李起奉所藏經卷。係師韓士英所給。史珍係王會引誘入教。高榮係南和縣郝成業之徒。皆馮進京黨羽。并供出縣民胡學詩等。均與王會往來。是此案各犯。必須嚴究。交通併案細鞫。得旨所辦非是。○又奏續拏邪教王文臣。郝成業。孟加明等。訊係王會夥黨。而王會糾合為逆。指稱馮進京。佛力幫助。今據邢臺縣將王會緝獲。訊供王文臣等黃紙合同。皆伊親寫散給。其所供馮進京言詞。似挾

有妖術。現已移咨晉撫。將馮進京解直質審。再武安縣獲馮進京黨羽劉夫榮。并續究收受王會合同之郝春子。王勤學。現拘究審。其餘各犯黃紙合同。經卷歌謠。臣擬於本月十八日。親赴順德詳鞫。得旨所辦好。○庚午諭軍機大臣等。方觀承奏。據邢臺縣訪獲邪教李起奉等二摺。其第一摺內有必須嚴究交通。借名入教。謀為不軌情節之語。是以批諭所奏非是。蓋謂邪教不能保其必無。必逐案皆究。以不軌是教之反叛也。及閱第二摺內。顯有依附經典。編造歌謠。謀為不軌實跡。故又批以所辦是。而准其前往。足見朕之處分一切。原無成見。及閱各犯供情。及王文成等所收字跡。雖有悖逆之詞。然不過造作妖言。傳播煽惑。與僅騙財物者不同。惟應嚴密查拏究治。以正風俗。而究非謀叛大案可比也。可傳諭方觀承。令其訊取確情。按律速行定擬可耳。○戶部議覆四川總督黃廷桂奏。稱

青雲營地處偏僻。不通商販。河水阻隔。各汛兵糴運維艱。請照威茂協例。將該營每年四季米。於頭年九月豫行折色給領。乘時採買。按月支放。應如所請。從之。○補行雲南貴州省十七年分軍政。年老官二員。才力不及官二員。分別處分如例。○壬申。諭曰。署尚書策楞。尚書劉統勳。命往江南。有會同高斌查辦事件。著即馳驛前去。○又諭。江南歙縣太湖太平等處地方。於五月二十五。○等日。山水漲發。田畝淹浸。房屋民人。間有損傷。前據鄂容安等奏到。朕已批示。被水村莊。雖屬一隅。亟宜撫卹。毋致失所。著傳諭該督撫等。督飭所屬。實力查辦。所有被傷處所。務宜照例賑卹。倘有成災。即行加意撫綏。一面奏聞。一面辦理。俾災黎得沾實惠。該部遵諭速行。○又諭。從前將八旗滿洲人員。選用外省文武等官。其蒙古旗人。分用部院者。員缺本少。是以外任未經議及。朕思滿洲蒙古。均屬本朝世

僕。伊等於外任分缺銓用之處。亦宜量子疏通。現在滿洲司員。陞用道府。既經暫行停止。其文職同知以下。著將蒙古人員。與滿洲一體揀選。引見。選用。武職副將以下。著就滿洲應得缺內。酌予十分之二。其作何分班輪選之處。仍著該部定議具奏。尋議。蒙古人員。向無外用之例。是以遇揀選保送之處。不得與滿洲一體錄用。今遵諭文職同知以下。將蒙古與滿洲一體揀選。引見。查滿洲人員。外用同知以下等官。或揀選保送。或按俸截取。其選用班次。向有成例。嗣後應用滿洲人員時。將蒙古人員。一體截取保送。揀選考試。按照各班帶領引見。其奉旨記名者。入於滿班內。通較俸次深淺。名次先後選用。又遵諭蒙古人員。於武職副將以下。滿洲應得缺內。酌予十分之二。請嗣後應用滿員缺出。俱於補放滿洲四缺之後。補放蒙古人員一次。照例行文咨取。至輪用千總一項。兵部行文八旗蒙

古於所屬親軍前鋒護軍內每旗保送四五名各部考驗揀選引見記名註冊亦俟滿洲補用四缺後第五缺將蒙古掣補一名命下即按旗分辦理并載入例典遵行從之○又諭州縣捕蝗不力既有草職拏問之定例又有不申報上司者草職之例一事而多設科條適足滋弊即堂司官或知奉法而吏胥之稱引條例上下其手被議者或重或輕紛滋訛議年來直隸查叅捕蝗不力之案辦理多未畫一即其證也至州縣捕蝗需用兵役民夫并換易收買蝻子自有費用其勤民急公者或不費而事已濟而錙銖是較玩視民瘼者多往往藉口無力捐辦現在各省尋常事件尚得動公辦理似此要務何以轉不動支公項朕謂捕蝗不力必應遵照

皇考世宗憲皇帝諭旨重治其罪不可姑息而費用則應准其動公嗣後州縣官遇有蝗蝻不早撲除以致長翅飛騰貽害田稼者均草

職拏問著為令其有所費無多自行捐辦而實能去害利稼者該督撫據實奏請議敘其已動公項而仍致滋害傷稼者奏請著賠又今歲江南各屬蝻孽萌生雖經該督撫具奏乃從未將地方官據實題叅豈非庇下而欺遠著該督撫明白回奏尋奏覆查沛縣蝗蝻因新舊令彼此推諉撲捕不力挨延之咎固在前署令邱深造而面誑飾說則新令孫循徽更不可信經臣叅奏部議草職在案繼巡

查至安東海州據道府稟揭安東五港司巡檢李師悅海州惠澤司巡檢金晁皆查捕不早至長翅搭鞍捏報飛蝗希圖卸責是以將兩巡檢咨部草職拏問餘印委各員尚能勉辦理不致有傷禾稼報聞○吏部議准江蘇巡撫莊有恭奏稱贛榆縣知縣畢宿煩受王子上囑託縱令附會邪教之牛其祿出境復播妖言惑眾應照徇情例降調得旨牛其祿曾因附會邪教交地方官嚴行管束乃畢

宿娟受王子上囑託許其出境以致該犯復播妖言煽惑衆聽若僅照尋常瞻徇之例議以降調未足蔽辜著革職發往軍臺効力以爲地方官徇情不實心者戒○太常寺奏八月初五日。上丁。釋奠。

先師孔子。請遣官行禮。得旨。春秋釋奠例應遣官。朕自往歲恭詣。

孔廟行禮後。已閱五年。仰止宮牆。心殷景慕。此次親詣行禮。○旌表守正捐軀之陝西武。

功縣民金庫妻馮氏。○癸酉。

上詣暢春園。問。

皇太后安。○諭奉。

皇太后懿旨。那蘇圖之女戴佳氏著封爲孀。欽此。所有應行典禮該部察例具奏。○甲戌。

上詣暢春園。問。

皇太后安。○幸靜宜園駐蹕。至丙子皆如之。○

諭曰。鴻臚寺卿儲麟趾請令各省道員兼帶宣諭化導官銜。分地周巡一摺。所見非是。宣

諭化導。不過偶一行之。若竟定爲例。則督撫大吏以至州縣。均有教養斯民之責。而專委之道員。久之反成虛應故事。且教人以言。其感已淺。分地周巡。安能以一人之力。使窮鄉僻壤。無不家喻戶曉。但風俗未淳。地方有司。誠不得辭其責。國家條教。具已詳明。嗣後務當實力奉行。隨時教導。留心整頓。俾民風日歸淳樸。儲麟趾此奏不必行。○乙亥。諭軍機大臣等。高斌等奏。高郵汎水增長。現在東隄受險。隨啟放南關壩。以減盛漲。一摺。高郵汎水盛漲。則東隄亟宜保護。自不得不將南關一壩。暫行啟放。實亦出於無可如何。但啟放之後。下游民田。不無淹浸。如當水溜下趨勢。稍平減。東隄可保無虞。即應亟爲堵閉。水少下一分。下游即少受一分之患。可傳諭高斌。張師載等。令其酌看情形。迅速辦理。至前奏臨近湖邊。早下田禾。俱因滾壩減水。致多淹浸。并此次放水受害之處。其成災地畝。統計

有幾何。著即一併詳悉查明。速行奏聞。併諭巡撫莊有恭。確查成災處所。辦理尋高斌等奏覆。查車邏壩現過水三尺。若再消退。即可斷流。惟邵伯二閘衝缺。口門二十八丈。臣現督令連夜進埽。築壩堵閉。不敢刻緩。至下河此次被淹受害。成災地畝。現在臣莊有恭詳細查辦。尚未得有確數。報聞。○又諭據李因培奏。查浦灤州蝗蝻情形。一招內稱。州城土山二局。已經完竣。惟團山一路。岡巒連接。北有近邊大山。遼遠深邃。已委員率領人夫。前往根求。即不可登躡之處。亦令設法搜索等語。蝗蝻遺孽在山。亦必藉土滋長。若崇岡峭壁。有石無土之處。蝻孽亦無從滋蔓。如果人力難施。而塞外又無禾稼。著傳諭李因培。所有該處蝗蝻。惟於土多易生之地。設法盡力搜捕。俾無餘孽。如所奏石山塞外。不必辦理之處。無庸多派兵役。過為搜索。至現在查捕事宜。約計辦理分數。何時可以報竣。禾稼究

竟稍有損傷與否。李因培所奏。尚未明晰。著再詳悉查明。據實具奏。尋奏覆。查西北團山一路。岡巒連接。蝗蝻所起。不能遽定根株。凡有土之區。難保必無遺種。是以令人前往根求。現在分別辦理。設法撲捕。其崇岡峭壁。人力難施之處。遵諭無庸過為搜索。至辦理分數。告竣日期。尚容另摺具奏。報聞。○又諭曰。署山西巡撫胡寶瑤奏。訪獲忻州及長子縣二處邪教匪犯王正德。馮進京等。現在查拏辦理。一招前據方觀承奏。邢臺邪教李起奉等一案。稱從史珍之妻胡氏。究出王會一犯。供稱得自山西馮進京。看其情節。乃依附經典。編造歌謠。雖非謀叛大逆之案可比。而供詞乃有悖逆之語。今胡寶瑤所奏。原鈔邪經。皆里巷荒誕之詞。其直隸究出王會所供。馮進京悖逆妖言。俱未奏及。若果已究出。胡寶瑤必不肯為之隱諱。或係甫經訪查。尚未詳究耳。但據邪詞。甚屬鄙俚。何以能誑騙銀錢。

多至數百兩。其中或另有煽惑之處。不肯實供耳。宜並加窮究。著將方觀承原奏鈔寄胡寶琮。胡寶琮此摺亦鈔寄方觀承。參互閱看。此案蔓延兩省。人犯既多。輾轉根究。又必有逐層供出之犯。往返關提。長途解送。易致疎虞。著傳諭伊等。令其各究所獲案犯。根尋研究。彼此知會。應歸何省解結之處。詳細妥酌。其解送人犯。必應嚴飭所屬。加緊防護。設有疎虞。竄逸情弊。該督撫等無所辭咎。又方觀

承前奏。親往邢臺查辦此事。至今未見奏到。現在情形若何。著一併奏聞。尋奏查直隸訪拏邪教案內。究出王會等所供馮進京言詞悖逆。似有妖術情節。當經密移山西撫臣胡寶琮。速行查究。馮進京在彼既有應行根究之處。臣遵諭各就所獲案犯。將現在情形研究。俟辦理大局已定。照以少就多之例。再將馮進京解直質訊。併案完結。報聞。○旌表守正被戕之山西繁峙縣民劉有寶妻韓氏。○

丙子。諭曰。泰寧鎮標中軍遊擊李超。守備孫士英等。虧那營項一案。前經總督方觀承題叅革審。並未將前任鎮臣馬世岱那親等。有無知情。及失於覺察。一併查叅。本欲部議時降旨。今據該鎮總兵任澍奏稱。那親曾將虧缺緣由知會。隨查得馬世岱并李超任意私那。經咨明督提二臣等語。則那親已經移交查辦。尚無不合。而馬世岱則通同舞弊。罪狀顯然。方觀承僅叅該弁。而不將任澍咨明

之處敘入。必因近日題叅獨石口副將安泰。曾經降旨訓諭。馬世岱亦屬滿員。且已降調。遂不行一併查叅故耳。不思朕辦理庶務。初無成心。滿漢全無歧視。即如安泰一案。不過因使酒啟釁。而悍卒刁風。宜先示懲創。不可先治所管之罪。即漢人當此任。亦應如是辦理。方觀承何乃一味取巧。所見卑鄙錯謬。一至於此。著嚴行申飭。并令明白回奏。馬世岱著解任。一併解交該督嚴審。定擬具奏。尋奏

營員虧空。累任統轄上司。例應於疏內聲明。附叅。但查李超虧那扣存兵丁號衣銀項。孫士英虧那生息截曠還官等項。數目煩碎。先後參差。應查其虧那月日。是何鎮臣任內之事。於審明具題日。分別叅處。是以原疏內未即聲明。至任謝奏內所稱馬世岱。李超任意私那。經咨明督提二臣之處。緣馬世岱有私那典當生息銀兩。并浮當衣服至一千一百餘兩之多。例應專案叅追。當經委清河道查辦揭報。臣於七月二十六日題叅在案。臣職任封疆。如屬內有骫法營私者。無論滿漢官員。均應據實糾劾。不敢稍存瞻顧。得旨此奏。又屬用巧。何必廿六廿八之日。不可倒移乎。

○丁丑。

上詣暢春園。問。

皇太后安。○迴圓明園。○諭。據河道總督高斌等奏稱。本月十二日。西風大暴。湖水奔注。高郵城南車邏壩過水四尺八寸。沿河小船。多

被衝損。西岸人家房屋。打壞二百餘家等語。前因江南被水州縣。已降旨令該督撫等加意撫卹。今遇湖水盛漲。車邏壩過水至四尺有餘。下游田禾。必多被淹之處。現在民房已有損壞。一切俱宜亟加撫綏。毋俾失所。著莊有恭速赴高郵一帶。親行查勘。督率所屬實心籌畫。一面奏聞。一面辦理。仍將臨湖田畝被淹若干。及如何辦理情形。據實速奏。以慰軫念。該部即速傳諭知之。○又諭。朕此次行圍。著履親王。裕親王。大學士來保。史貽直。在京總理事務。其月選之文員內。通判州縣等官。武員內。八旗護軍校。驍騎校。及外省送到之補放水手官。驍騎校。並年滿千總等官。并俱著王大學士。照從前之例驗看。其外省督撫提鎮等奏摺。亦著照例。自起鑒之日為始。俱齎赴在京總理處。加封交內閣。隨本呈送。行在候朕批示。隨本發回。仍於總理處交付齎摺人祇領。該部即通行傳諭知之。○諭軍

機大臣等。給事中朱若東巡漕回京。召見時
詢問沿途情形。據奏稱東省至直隸一帶。年
景尚好。惟河間以北。良鄉以南。夏秋雨多。
未霑足。田禾未經下種者。約十分之一。蝗蝻
亦尚未淨等語。南路蝗蝻。前據方觀承奏稱
撲除淨盡。何及今尚有萌生。應傳諭該督。速
行派員前往撲滅。務盡根株。勿使稍留遺種。
至直隸今歲大田情形。方觀承屢次奏報。稱
通省大局俱好。河間等處。既經被旱。何以並
未奏明。看來一省之中。被災者不過數邑。此
數邑之中。又僅十分之一。尚屬一隅偏災。目
今漸屆秋深。一切雜糧。均已不及補種。只可
待得雨後種秋麥耳。其間失收貧民。生計不
無拮据。有應行撫卹者。自應查明撫卹。或借
給籽種口糧。勸種秋麥。以為來歲接濟之計。
俱當善為料理。該督查辦南和等屬邪教。審
明後。即著速赴河間一帶。親行查勘。一面撫
卹。一面奏聞。以慰軫念。○戊寅。諭曰。工部製

造庫郎中。員缺緊要。向例由吏部將六部俸
深郎中。擬定正陪。帶領引見。多係年老平常
之員。往往不得其人。嗣後遇有缺出。著工部
堂官。於本部司員內。揀選保題。引見補用。○
又諭曰。福祿在總兵之任。安逸日久。竟成懦
弱。著以頭等侍衛行走。果能奮勉。朕仍施恩
復用。○諭軍機大臣等。開泰奏湖北應補常
平額穀一摺。據稱官倉買補。易致市僧藉口
擡價。請早發價銀。令地方官零星平買。或行
戶中。有情願承買者。即豫行發給。於來春完
倉等語。採買倉穀。在於酌量地方年歲情形。
權衡貴賤。使囤積者不得居奇。即市僧無從
藉口。豫將銀兩交州縣收貯。設遇陞遷事故。
前後交代不清。必且滋弊。若豫行發給行戶。
誰不踴躍樂從。但行戶之米。仍需於本地民
間購買。徒多一轉手。致令中飽欲壑。於調劑
價值。亦未見有益。若發價民間。令於明歲完
倉。在殷實者。必不願領。願領者。必致追呼。其

滋擾正與青苗法等耳。該省倉穀應補之額未為甚多。惟在督率地方官實心籌畫。即照舊於豐收州縣酌量採買。奸販亦不得藉口擡價。不在更張成法也。可傳諭開泰知之。○已卯。

上御勤政殿聽政。○諭軍機大臣等。直隸泰寧鎮標中軍遊擊李超等虧那營項一案。傳訊那親據稱伊在泰寧鎮任。聞營中生息銀兩多有未清。隨查得馬世岱並營弁私那之弊。於離任時移交任謝等語。如此則馬世岱舞弊情節係那親查明交辦。任謝於詳報該督時斷無敢於刪除隱匿之理。方觀承之不行敘入本內。一併題參實出有心。並顯然矣。總之方觀承存一滿員之見於胸中。且謂馬世岱已經降調。是以取巧觀望。並不據實辦理。督撫統轄全省。一切皆資整飭。直屬各標營滿員甚多。方觀承以此居心營務將不可問。朕用人行政。一秉至公。豈肯於賞罰大權稍

示偏倚。方觀承尤不應如此妄意窺度也。前已降旨。令其明白回奏。著再傳諭令將任謝曾否咨明。及何以不行敘參情由。據實奏聞。督撫大員不欲因此遽令來京質對。但經兩次詢問。如仍不過以含糊認罪為了事。是真自取罪戾。將不能承受恩澤矣。尋奏查任謝報出馬世岱李超虧那情弊。經臣委清河道前往查辦。其李超等虧那營項一案。隨經該鎮查明揭報。是以先即題參。其馬世岱一案。因所查銀數牽混。復令覆查確實。是以題參在後。報聞。○吏部奏揚州府江防同知孔傳樞於乾隆十七年十月。部議草職。著該督撫出具考語。送部引見。其所遺員缺。該督撫自應於接准部文日限一月內。即行保題。乃遲至半年有餘。俟孔傳樞仍發江補用之後。將該員題請署理。其任意遲延。不無留缺待人情弊。得旨降革人員。復特降諭旨。令該督撫出具考語。送部引見。此朕愛惜人材。不忍輕

棄之意。已屬格外加恩。及引見後。或發往他省。或仍發原省。或照部議降革。悉視其人之才具如何。酌量降旨。該督撫等於該員奉文降革。即應照例出缺。乃高斌於孔傳糧送部引見時。奏請仍留署江防同知之任。朕諭以引見時有旨。初未照所請行。今該部以遲延留缺查奏。而不知前奏即已錯謬。特未經交部耳。高斌著察議具奏。各省督撫於因公降革。送部引見人員。若概違成例。為屬員奏請留缺。適以啟市恩徼倖之弊。漸不可長。可將此通行傳諭知之。○以詹事府左中允積善充日講起居注官。○庚辰諭曰。御史曹秀先請頒發御製祭文。遇有蝗蝻郡縣。即行謄黃告祭之處。所見甚為迂謬。蝗蝻害稼。惟當實力撲捕。此人事所可盡。至於祈神報賽。禮亦宜之。若欲假文辭以期感格。如唐韓愈祭鱷魚事。其鱷魚之遠徙與否。究亦無稽。未必非好事者流。附會其說。朕非有泰山北斗之文。

筆。似此好名無實之舉。深所弗取。所請不必行。餘著議奏。尋議該御史摺內稱舊時州縣捕蝗。多係捐辦。今奉旨許令動公。該州縣意必報多。上司限以報少。駁詰往返。愈煩案牘。請嗣後捕蝗時。雇募夫役。并換易蝻子價值。動用錢糧。令同城教職佐雜。一面會同給發。一面僉書名押。開報該管上司查覈。并嚴飭不得假手家人書吏。致滋混冒。應如所請。從之。○又諭曰。任澍所奏泰寧鎮降調總兵馬世岱與遊擊李超等通同虧那生息銀兩一案。傳訊那親據稱伊經查出。於離任時移交任澍等語。如此則馬世岱之通同舞弊罪狀顯然矣。生息銀兩原以惠濟兵丁。若將備得以浸漁。則生計必至拮据。今泰寧一鎮近在畿輔。馬世岱竟敢恣其貪蠹。其在他省。不問可知。即如張乃義離任時。那用存公銀兩至一千八百有餘。是其明驗。亦惟不顧情面之胡寶琛。能不以其調任延緩。據實參奏耳。至

各省督撫遇有此等貪劣之員或以提鎮等與已同為大僚武職非文官可比或經陞遷降調無妨陽為不知不肯過為己甚且生息銀兩本非正項營弁侵蝕亦不比州縣貪婪有關民瘼是以率皆苟且姑容不行叅劾不知督撫統轄全省病兵病民不容歧視苟有姑息其貽害營伍者甚大甚非朕畀任封疆之意著該部通行傳諭知之○諭軍機大臣等前因高斌奏到湖河異漲七月十二日車邏壩過水情形當經降旨令莊有恭前赴高郵一帶查勘今據該撫奏稱於七月十六日自蘇前赴江寧會同學臣考驗拔貢等語高郵等屬猝被水患亟應查明撫綏甚關緊要該撫另摺中有高寶興化被水無多之語當係七月十二日以前此後車邏壩過水至四尺有餘則下游被水必重田廬必有災傷著再行傳諭莊有恭遵照前旨即速前往詳悉查勘加意撫卹俾窮黎得霑實惠毋致一夫

失所其淮海一帶被水州縣已據該撫派委按察使許松估查辦該司尚屬能辦事之員將來高寶等處有應行賑卹事宜亦即令許松估往來督率州縣官實力奉行嚴查胥役中飽等弊務令無濫無遺以副軫念再莊有恭所奏大江以南自六月望後雨未霑足其於何時得有霑足雨澤田穀收成分數究竟有無妨礙及現在民情若何著一併速行據實奏聞○刑部議覆雲南總督碩色疏稱查何聖烈等搖匪散劉招人謀為不軌業經訪獲確訊即請正法何聖烈依律凌遲處死楊起秀李士明馬老四權廷貴斬決監金諒絞立決餘犯照例分別辦理應如所請從之○

辛巳

上詣暢春園問

皇太后安○還宮○壬午定科道及道員品級諭國家設官分職期於有裨實政若同一官而差分階級膺此任而兼帶他銜於官制體

統殊為未協。如翰林部曹小京官補用御史。既經簡擢。同列諫垣。即應無所區別。乃舊有五品六品之分。試俸不試俸之異。又如各省道員。例以布政使司叅政。叅議。按察使。司副使。僉事等銜。分別兼帶。但道員職司巡守。以整飭吏治。彈壓地方為任。至於錢穀刑名。則藩臬專責。各有攸司。且知府以下。悉其統轄。兼叅議僉事銜者。階秩反卑。其何以表率。此皆舊例相沿。宜為變通。以歸畫一。而重職守。

嗣後給事中。著仍為正五品。御史俱改為從五品。不必試俸。直省守巡各道。著俱為正四品。停其兼銜。其道員俸深。應如何銓叙之處。該部定議具奏。尋議查道員外陞按察使。原不分叅政。副使。叅議。僉事等兼銜。先儘即陞卓異人員。列名於前。次將俸深人員。任內無事故者。通行開列。具題補授。仍應遵照辦理。至道員內陞京堂等官。向例兼叅政銜者。陞太常寺少卿。鴻臚寺卿。兼副使銜者。陞太僕

寺少卿。通政使司叅議。兼叅議僉事銜者。陞光祿寺少卿。鴻臚寺少卿。今道員既俱定為正四品。若僅以副使道所陞之太僕寺少卿。通政使司叅議陞用。未免缺少人多。查太常寺少卿。鴻臚寺卿。向係從三品道陞缺。光祿寺少卿。向係從四品道陞缺。品級雖有稍異。而員缺並未裁減。陞轉未甚懸殊。應請准其一體陞用。至鴻臚寺少卿一缺。係從五品。向為正五品道陞缺。今道員既改為正四品。與

鴻臚寺少卿。品秩稍殊。應毋庸以道員陞用。從之。又諭滿洲等習俗純樸。忠義稟乎天性。原不識所謂書籍。自我朝一統以來。始學漢文。

皇祖聖祖仁皇帝。俾不識漢文之人。令其通曉古事。於品行有益。曾將五經及四子通鑑等書。繙譯刊行。近有不肖之徒。并不繙譯正傳。反將水滸西廂記等小說繙譯。使人閱看。誘以為惡。甚至以滿洲單字還音。鈔寫古詞者。

俱有。似此穢惡之書。非惟無益。而滿洲等習俗之偷。皆由於此。如愚民之惑於邪教。親近匪人者。概由看此惡書所致。於滿洲舊習所關甚重。不可不嚴行禁止。將此交八旗大臣。東三省將軍。各駐防將軍大臣等。除官行刊刻。舊有繙譯正書外。其私行繙寫。并清字古詞。俱著查覈嚴禁。將現有者查出燒燬。再交提督從嚴查禁。將原板盡行燒燬。如有私自存留者。一經察出。朕惟該管大臣是問。○諭

軍機大臣等。給事中朱若東奏請加挑東省河道一摺。似未確按情形。今歲東省運道於淺。自因夏間乾暵所致。向來雨水調勻之年。泉源充足。漕運遄行。固其常。而今夏所值乃其偶。朱若東遂有增帑加挑之請。是徒為河員多一開銷地步耳。該省歲挑成例。歷來定有章程。如使工歸實用。何至於高積厚。河工向屬弊藪。惟在董其事者。實力督察。嚴查冒濫積弊。方能於工程有益。不然帑雖增而工

不實。安可以有有用之脂膏。飽無窮之谿壑耶。所奏不可行。但運河關係緊要。或近年歲挑不力。較前加淤。亦未可定。著將原摺鈔寄策楞。劉統勳。於歸途之便。將長溝安山一帶河道。逐加閱視。如有應行籌畫之處。酌量奏聞辦理。再高寶等屬。因湖河異漲。車邏壩過水四尺有餘。下游多被淹浸。朕心深為軫念。已令該撫莊有恭。赴彼查勘撫卹。清江距高寶不過三數日之程。並著策楞。劉統勳。前往該處。將被水光景。及地方官辦賑情形。詳悉確查。據實奏聞。以釋懸注。尋奏。臣等沿途察訪。被水災地。惟淮揚徐海較重。幸二麥秋成。頗豐。目下米糧價值。未甚增長。除被水田畝外。高田穀稻。尚望有收。民情均屬安堵。其辦賑情形。凡漂沒廬舍。棲止湖隄貧民。俱已計口撫卹。其餘被災各村。分別極貧次貧。照例辦理賑卹。臣等查勘河務工料。必須身經目歷。淮徐一帶。一體留心查察。將實在光景情形。

隨時具奏。得旨。覽奏俱悉。屢經頒旨。爾等不時據實奏聞。○戶部議覆倉場侍郎鶴年奏。稱豫東二省。額徵運通粟米五十七萬餘石。自雍正十年起。至乾隆十七年止。以京師餽養馬駝。需豆甚多。而東豫二省。向為產豆之區。即於運通粟米內。節次改徵黑豆二十五萬九千三百餘石。足資餽養。但二省原徵粟米。除運薊截留津。易等處。及改徵之數。運京已不及一半。而京倉支放兵餉零檔。每年應需四十萬餘石。不敷所放之數。往往以稜代粟。倉無存積。而價值日昂。至京倉現存黑豆六十萬石。六千有零。足供三年支放。若將來仍照舊運通。則黑豆日盈。而粟米日絀。且農民多喜食粟。而黑豆又難久貯。請自十九年為始。豫東二省。應運黑豆。酌半改徵粟米。分貯京通各倉。則豆無潮黧。而粟不昂貴。應如該侍郎所請。酌半改徵。至黑豆久存。既係易於霉變。自不應陳積三年。應令該侍郎等將

本年秋季及來年春季俸米。以豆抵粟。按色搭放。得旨依議速行。○刑部議覆廣西巡撫定長疏。稱徐國楷因瘋殺死黃氏等四命一案。查因瘋殺人之犯。例得免抵。追給葬埋銀兩。將該犯交親屬鎖固看守。但瘋者親屬。如係充裕之家。房屋寬展。不難禁錮。若貧寒住房淺窄。眷屬聚處一處。安有閑房鎖禁。況瘋犯或係孤身。並無親屬。勢必責保隣看守。恐防範不周。復行滋事。請嗣後遇瘋病殺人之案。訊明後。仍將該犯監禁。如果瘋病已愈。方發交親屬領回。則無知犯法。固屬可原。而事關殺人。即禁錮固圍。亦為平允。應如所請。通行各督撫遵照辦理。從之。○工部議覆大學士管江南河道總督高斌奏。稱臣遵旨查勘海州沐陽一帶。地近海濱。形勢窪下。為眾流匯聚之處。屢經築堰加幫。以及疏河建壩。然遇水勢盛漲之年。水患仍不能免。臣等酌籌補救之策。應將下流入海道路。再加疏濬。俾

其分途暢流。分別緩急辦理。如鹽河場河一帶。并武障越河修閘幫堰等工。俱係淮北引鹽運行之路。刻不容緩。照例飭商捐辦。分段興挑。至挑濬義澤車軸五圖等河。及建造石閘等工。應俟秋成後題估動項興修。應如所請從之。○是月。欽差署侍郎李因培奏覆臣奉命赴永平一帶查捕飛蝗。初四日至玉田縣。該縣續報之八里鋪等五莊。蝻孽共十一處。又查出姬家莊。張家莊等處。蝻孽並集。臣

聖旨奉旨

○

酌留員弁。協同撲捕。初五日至灤州。經通水道王楷。并該府州等陸續查出康各等莊一百十八處。又何家寨等四十四莊。哨牛淀等三十八莊。共計二百處。該道分為二十局。多撥人夫撲捕。奈幅員遼濶。迭起循生。臣必須留駐摩畫。將現在段落。分員專責。立限催辦。俟部署已定。再赴盧龍等處巡查。報聞。○江蘇巡撫莊有恭奏據司道公稟。本月二十三日。上元縣查獲僧人段中賢。於鋪蓋內搜出

聖旨奉旨

○

木牌一面。並木盤護書等件。檢看中多悖逆之語。當即批飭該司道。悉心嚴鞫。按律究擬。報聞。○布政使學習河務富勒赫奏。臣奉命查勘蕭瑋一廳。祇有埽工一段。料物畧備。餘若銅沛。邳睢。宿虹。桃源。海防等五廳。隄埽工程。不能一律高厚。料物亦不敷用。至外河。山峯兩廳。埽工多已上水。料物亦無堆貯。臣細加訪問。始知各廳將歲修搶修錢糧。任意虧空。以致工料無措。應請勅令高斌。張師戴。逐一覈實清理。并虧空誤工各員。嚴叅治罪。得旨。此非高斌所能辦。已有旨了。○安徽巡撫張師戴奏。據布政使高晉議稱。查太平。歙縣。貴池。太湖。四縣。被水窮民。田土已被衝壓。廬舍人口。又復漂流。現在資生無策。應改作極貧。照例撫卹一月口糧。并給與殮埋修葺銀兩。至衝壓田禾。查實係貧戶。并照例酌給籽糧。又英山。旌德二縣。并新安衛。被災既輕。毋庸撫卹。其衝坍房屋。壓損田禾。亦一例給發

修費。借給工本。得旨覽奏俱悉。○閩浙總督喀爾吉善。福建巡撫陳宏謀等奏。鐵尺會奸民誘衆一案。嗣據文武官先後稟報。拏獲要犯杜正連。僧道三等。并會夥劉陞等四十餘名。臣委員逐加訊究。緣邵武縣奸民羅家球。與杜國祥。杜奇等。結會盟好。杜國祥因貧起意。偽造劄付。將舊本誥命式樣。令同會之張繼美刊刻。製偽劄十一張。并刊刻木印一顆。用就劄付。令杜奇各鄉散賣。尚無承受之人。杜國祥旋恐事破。將偽劄木印。即行燒燬。嗣在杜國祥家搜取會簿。並偽劄底稿。嚴訊杜國祥。始將情由供出。茲首犯杜國祥已獲。為從之杜正連。杜奇。張繼美。知情散劄之羅家球等七人。內除杜奇。張繼美。逃匿未獲外。餘犯俱經緝獲。臣即飭令延建邵道。委員解省。嚴訊情罪。分別定擬。得旨看來非大事。惟為首者重處。餘不致蔓延可耳。不必具題。具摺奏聞。

大清高宗法天隆運至誠先覺體元立極敷文奮武孝慈神聖純皇帝實錄卷之四百四十三

大清高宗法天隆運至誠先覺體元立極敷文

奮武孝慈神聖純皇帝實錄卷之四百四十四

監修總裁官經筵講官太子太傅文淵閣大學士文淵閣領事侍衛內大臣稽察欽奉 上諭事件處總

吏部理藩院事務正黃旗滿洲都統世襲騎都尉軍功加七級隨帶加二級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教條

乾隆十八年癸酉八月癸未朔

上詣

大高殿行禮○甲申以舉行仲秋經筵遣官告

祭

奉先殿

傳心殿

上御文華殿講官暨侍班之大學士九卿詹事

等行二跪六叩禮分班入殿內序立直講官

四人出就講案前行一跪三叩禮復位直講

官伍齡安蔣溥進講論語視其所以一章講

畢

上宣御論曰所以所由所安雖在人曰視曰觀

曰察則在己必也如衡如石而物之懸者自

呈其輕重如水如鏡而物之照者自露其妍

媸故聖人教人無非自盡其力而更要在不

存成見不然萬理紛前一指或蔽其為以為

由為安且不能辨又焉能致視致觀致察以

期人之不度哉雖然知人則哲惟帝其難是

以聖人再三丁寧而不厭其詳者抑亦有懼

於聽言觀行矣講官暨侍班官跪聆畢興直

講官介福嵇璜進講易經君子體仁足以長

人一句講畢

上宣御論曰元足以包四德而仁亦足以貫四

端體仁即所以體元體元即所以體乾也然

四端無非仁而仁之本則在於博愛四德無

非元而元之本則在於大生試觀四時之春

而可知天地之心矣體仁長人又何待著占

而龜卜哉雖然無亨利貞不能成其為元而

無義禮智亦不能成其為仁。故聖人義制事。禮制心。不妨並用。而其為全體大用之本者。必於仁焉是存。肫然而無不愛。廓然而無不容。已飢已溺。闕切深衷。曰教曰養。等之無窮。此聖人之所以體仁也。此其所以能長民也。講官暨侍班官跪聆畢。大學士傅恒等奏曰。皇上睿智符乎離照。發育合於乾元。旁燭無疆。物來而順應。至誠不息。時措而咸宜。固已會有極。歸有極。協平康正直之施。養其欲。給其求。備輔相財成之道。臣等幸侍經筵。親承睿訓。不勝欽服。奏畢。諸臣出就拜位。行二跪六叩禮。禮成。上還宮。賜講官及侍班官宴於協和門。○諭喀爾吉善覆奏。承審叅案遲延一摺。內稱浙省四案俱已審題。閩省未結者三案等語。閩省督撫同城。所有喀爾吉善叅劾之案。自應陳宏謀查辦審題。何以遲延不行完結。陳宏謀著交部議處。○諭軍機大臣等。邢臺邪教案內。李起奉供出之韓世英一犯。前

據方觀承奏稱。該犯現住京師。飭令哈達哈查拏。今據拏獲。姓名住址。雖屬相符。而年貌與原供絕不相合。且搜查家中。並無留藏經卷。又堅供與李起奉從未謀面。看來韓世英或係李起奉素日所知。一時混行指出。以為推延之計。抑或向有嫌隙。挾讐誣扳。亦未可定。現在韓世英已飭解直質審。著傳諭方觀承。可將該犯等詳細研鞫。務得實在情形。不可令其妄供狡展。○以原任青州將軍納延

泰署鑲白旗蒙古都統。○乙酉。諭曰。哈達哈現在丁憂。步軍統領事務。著雅爾圖暫行署理。○又諭。據侍郎玉保奏稱。圍場所添官兵。請照各口駐防之例。一體給與口糧。或照原議給與地畝等語。添設官兵。原因巡查圍場學耕地畝。若撥給口糧。反至有誤耕種。亦非久遠生計。將此寄與玉保查覈。將無礙圍場之處。賞給官兵。令伊等學習耕種。○諭軍機大臣等。前因高寶等屬。湖河異漲。民田多有

被淹。降旨令策楞、劉統勲就近前往確查具奏。後聞該處於七月十二日猝被風雨隄壩漫溢。即有人言該處現在被水尚不及七年之甚。今莊有恭摺報情形稱較乾隆七年被災更重。閭閻既經被水自應亟加賑卹。但乾隆七年災地廣濶朕不惜多用帑項加意撫綏。今年高寶一帶雨驟水漲漫缺隄壩以致民田淹浸人口損傷。如果較之七年更重屬實。即當照前辦理。雖多費帑金而災黎可以不致失所。若係小民因災藉口冀邀格外之恩。或地方有司及奸胥蠹吏借以張大其事希圖乘機中飽。則此風亦不可長。莊有恭所奏安知非即屬員稟報之詞。著再傳諭策楞、劉統勲將該處被水實在情形詳悉確行查勘。是否較之乾隆七年被災輕重若何。實應如何辦理。伊二人親加履勘目擊情形。如有所見即告知莊有恭令其速為酌量妥辦。並一面速奏。尋奏查乾隆七年古溝衝缺後運

河東隄閘壩全開是以淮揚被災甚重。今歲止車邏壩過水二閘衝開口門。凡當衝之高郵、甘泉、興化等處被災較重。餘若寶應、江都等縣實輕。臣親勘情形徧訪輿論實未有七年之重。現委員分別妥辦。得旨覽奏稍慰。然亦不可豫存成見。謂必不似七年災重也。如此則必有諱災之意。百姓不免失所矣。將此告知莊有恭。○又諭前因高寶一帶猝被水患傳諭莊有恭令其即行前往查勘。今據該撫摺奏已經親往該處并飭撥銀兩分發各屬照例先行撫卹等語。看來今歲高寶等屬被水情形甚重。災民亟宜撫卹。前已諭令策楞、劉統勲就近查察。著再傳諭莊有恭務宜實力詳查辦理。毋俾窮黎一夫失所。其淮海等屬漫缺田禾淹傷處所自宜一併賑卹。前已令許松侐往來督率嚴查。毋任胥役中飽。務令災民均霑實惠。無溢無遺。再摺內所奏大江以南雨澤情形尚未霑足。未知此後何

時方得透雨。將來田禾收成。究竟有無妨礙。仍令一併查明速奏。尋奏查大江以南。俱於七月十九。二十一。二十四。五。六。等日。甘雨疊沛。積水將至盈尺。十分霑足。且得雨正交處暑。甚屬及時。秋禾茂發。將來可望九分收成。得旨。覽奏俱悉。○又諭。方觀承奏。七月二十八日。山西解交邪教首犯馮進京。即於是夜三更。瘡發身斃等語。此摺殊未明晰。馮進京倡立邪教。煽惑鄉愚。已據陸續審出多人。所有究訊質審之處。皆應於該犯是問。乃此案第一要犯。其查拏究問。及解送收審時。承辦之員。自宜小心防範。詳細研鞫。今據稱該犯杖瘡潰爛。沿途擡送。到直即行殞斃。似有急令滅口情形。前據胡寶琮初奏。殊不以為意。此因初供原無邪逆情節。自應如是辦理。及至知有邪逆情節。遂親往該處查拏。皆已合宜。方待其查明具奏。何以竟解直質審。並未奏聞。且重杖成疾致斃之犯。不知是否山西

拏獲之馮進京。抑係替代者。長途解送。安知不有奸胥猾役。從中替換情弊。未可遽行輕信。著傳諭方觀承。胡寶琮。令其各將所屬詳悉嚴查具奏。再此案情節。看來雖屬悖逆。究與馬朝柱等案。顯為謀悖者不同。各省似此未經發覺之案。不能保其必無。但既經拏獲。究出自不可不辦。該督等查審明確。可將首先傳播如王會等數人。即行杖斃。俾鄉愚知所懲儆。餘犯照例完結足矣。無庸繕本具題。將此一併傳諭知之。尋胡寶琮奏。臣審擬逆犯馮進京時。其家幼孩。亦經提訊。彼此呼喚如常。實非生面。而解直則有文武員弁。公同看守。又與王會等面質識認。斷無替換等弊。其因杖後發瘡致斃。並無別情。再該犯借邪教以誑錢。王會又借該犯以惑眾。實為此案罪魁。立斃儆眾。尚覺寬典。餘犯遵諭各就本案連結報聞。○兵部議覆署湖廣總督開泰疏稱。黔省驛路。惟毛日烈當二驛。地多嵐瘴。

水草惡劣。馬易倒斃。官弁亦多染病。更有左右兩河。春夏雨漲。行人每苦守候。查毛口驛附近之那貢塘一帶。可開新路。下名阿都田。歷大烈當等處。出白沙塘。直抵罐子窑。土路兩旁。俱有馬道。較舊路實為坦易。且無嵐瘴之虞。請將烈當一驛裁汰。將毛口驛移駐阿都田。罐子窑驛移駐白沙關。楊松驛移駐上寨。再毛口。楊松。二驛。向無站夫。請將烈當驛裁汰之站夫一百名。改設毛口驛。楊松驛增設站夫一百名。於裁汰烈當驛馬夫工料項下撥給。應如所請。從之。○丙戌。諭軍機大臣等。直隸邢臺縣拏獲邪教一案。詢據王會稱。傳自馮進京。而馮進京家中搜出經卷。多釋道俚鄙之詞。尚無悖逆語句。看來馮進京固屬邪教之首。然不過借此以引誘鄉愚。至其散給合同。託言煽惑。則王會所為。即其入教男女。多在順德。及河南彰德一帶地方。其係王會勾引。已屬顯然。是王會實此案罪魁。

應立斃以示懲儆。至於被誘入教之犯。皆鄉愚無知。受其誑惑。非有兇悍要結情節。無足深究。著傳諭方觀承。令其遵照前旨。將王會審明杖斃示衆。其現獲各犯。訊出情節。即分別杖責枷號發落。未獲各犯。亦不必再為窮治。將此一併諭令蔣炳。胡寶瑒。知之。朕於人心風俗所係。應辦者斷不姑息了事。而於不必辦理者。亦不忍尋枝數葉。輾轉株連。惟得其至當而已。○陝西道監察御史蔣元益奏。河防官員。於一應河務事宜。皆須親身查勘。先事豫防。近聞河道總督高斌。顧琮。俱已抱疾。步履艱難。或遇異漲險工。恐不能輕騎疾馳。親往調度。應請勅令解任。另簡能員。諭御史蔣元益。請勅令高斌。顧琮。解任一摺。所奏甚屬取巧。用人乃政治之大端。朕於中外大小臣僚。凡有簡任。罔不衡量審慎。況在大臣畀以要職者。何日不往復於懷。豈待小臣提奏。始加省察耶。科道職司言路。大臣中果有

營私舞弊。貪婪不職等情。即明列彈章。亦分所應爾。如謂年齒衰邁。夙膺痼病。要於辦理諸事。並無妨礙。豈可輕為棄置。高斌未任河道以前。向有足疾。衆所共知。以其老成練達。熟悉河務。是以簡任南河總督。伊蒞任以來。數載辛勤。毫無貽誤。豈以不能輕騎疾馳。遂足為累耶。且協辦則有張師載。學習則有富勒赫。即地方遼濶。亦不待高斌之輕騎疾馳也。至於顧琮。才幹雖少。誠樸有餘。於河務尚堪經理。夏間陳世倌曾面奏其不能動履。及詢之史貽直。則謂尚能照舊辦事。史貽直之子史奕昂。現任河道。或因其子為彼屬員。不敢據實陳奏。或利其易事。不欲更易上官。此亦人情所有。隨復詢問豫東兩省巡撫。倘伊等覆奏彼此互異。自當別為籌畫。而該撫等同聲一辭。謂夙疾漸愈。則其堪膺職任。更可無疑矣。朕臨馭天下。一秉至公。毫無成見。即照察所及。從不以用智矜明為尚。惟達聰明

目。公聽並觀。輕重妍媸。因物付物。此無不可。與天下明白曉諭者。若謂蔣元益受陳世倌風指。敢為此奏。亦未必然。即有之。亦無形迹。不欲因興大獄也。此不過見策楞劉統勳奉差江南。現有查辦之事。度其必為河臣而發。是以豫行陳奏。以沽建白之名。其揣摩迎合之私心。又何能逃朕洞鑒耶。將來策楞等查出情弊。果係高斌。張師載。實有徇隱。據實叅劾。自有應得處分。蔣元益以微末小臣。取巧妄奏。甚屬不合。著嚴行申飭。○雲南道監察御史耀成。奏查會清河。上自圓明園。至通州一帶河道。向因清河本裕倉收貯號糧。皆由水運。河身河岸。俱經修整。後因旱路車載。停止水運。該處居民。竟將臨河兩岸。占墾地畝。以致河身淤淺。偶遇陰雨連綿。河水漲溢。有損田禾。該處居民。皆稱奉聞官租。給分種。每年納租交關。官轉送奉宸苑等語。是否難以確信。應請交該衙門。將河道逐一查勘修整。

并議定離河若干尺。不許耕種。得旨著交五福李因培申甫查勘。尋奏。臣等前往查勘。緣臨河兩岸。內有地勢較高。水流不及之處。一路間有墾種田地。因傳訊開官丁大倫。據稱雍正四年。水運改陸後。河邊漸有淤出高處。附近居民零星開種。開官向地戶量取租錢。留為備辦外聞繩鉤。及修理所住官房。並無轉送奉宸苑之事。臣等查明。雖零星片段。沙石相間。非膏腴可比。然究屬官河邊地。若逐漸墾種。必致日益填淤。自應嚴禁。將界限清出。插官柳標記。以杜後來越占等弊。得旨允行。○以通政使司通政副使李清芳為詹事府詹事。兼翰林院侍讀學士。○丁亥。祭先師孔子。

上親詣行禮。○詣暢春園。問

皇太后安。○幸圓明園。○戊子。祭

大社。

大稷。遣和碩履親王允禔恭代行禮。○諭軍機

大臣等。普福奏報。淮北板浦等場。被水淹浸一摺。殊未明晰。鹽場猝被水患。所有竈戶人等。亟應查明賑卹。普福所奏。僅係籠統約計之詞。其實在被災情形。及鹽池廬舍。被淹確數。均未分晰。普福專司鹽政。一聞場竈被災。即應迅速前往。親加查勘。實力撫綏。乃不過按例檄委道員查辦。而該道李奇齡。已據河臣奏稱。委令堵築邵伯東隄漫口。更屬緊要重大。必不能分身兼顧。若待文移往返。豈不致貽誤地方耶。普福係內務府世僕。何身耽安逸。乃爾著傳旨申飭。仍令將實在被災情形。詳悉查明。據實奏聞。尋奏查淮屬板浦。中正。臨興。各場。暨泰屬廟灣等場。緣六七兩月。靈雨連綿。湖河並漲。以致鹽地淹浸。當即委員分頭查勘。并先發銀八千兩。如各處鹽義倉穀不敷賑濟。即銀米兼賑。臣隨即起程至邵伯。適遇河臣高斌督築口岸。委李奇齡仍往淮北一帶照料工程。臣因伊兼理鹽道。是

以著其就便巡查災務。臣一面由金灣六閘下河。至泰屬北七場。水陸兼程。逮至淮北三場一路。察看撫卹。查廟灣場地窪下。衆水匯歸。成災約有七分。其亭場廬舍。並無坍塌。竈力尚可支持。毋庸先行撫卹。照極貧次貧例。按期賑濟。至淮北之板浦中正二場。成災九分。臨興場成災八分。該處被災較重。亭池廬舍。俱有淹沒倒塌。照例先行撫卹一月。再照成災分數。分別極貧次貧賑濟。並給修葺廬舍銀兩。現飭員趕緊妥辦。不敢稍耽安逸。報聞。○工部議准。浙江巡撫雅爾哈善疏報。山陰縣宋家淩塘工。潮汐交匯。衝坍銹裂。亟宜修復。其先行搶堵柴埽工程。并請動項支給。從之。○順天鄉試。以兵部右侍郎兼管府尹李因培為監臨官。吏部尚書協辦大學士孫嘉淦為正考官。禮部侍郎嵩壽為副考官。○已丑諭。淮揚高寶等處。現被水災。朕心深為軫念。已降旨令該撫莊有恭前往查勘賑卹。朕思該處猝被災傷。小民蕩析離居。艱於餬口。

一應撫卹事宜。不可不多為籌備。著將江蘇本年應徵漕糧。截留四十萬石。該督撫等酌看災地情形。分別運貯。戶部秋撥銀兩。亦著於該省多為酌留。臨期奏聞請旨。以備賑糶之需。該督撫等督率所屬。實力妥辦。務令災黎均沾實惠。該部即遵諭行。○諭軍機大臣等。胡寶瑤奏。邪教首犯馮進京。在直監斃一摺。此案已據方觀承奏到。朕以其中多有疑竇。曾經降旨該督撫。令其將有無中途更換情弊。嚴查具奏。想胡寶瑤尚未奉到。今觀摺內所奏情節。該犯在晉省。不過曾責十餘板。且遴委文武大員。小心護送。赴直交收。諒無從更換。在馮進京倡立邪教。煽惑鄉愚。本屬應行杖斃之犯。而現在又無從質訊。其在直在晉。有無嚴刑致斃。均可置之不問。更無庸彼此剖白。糾纏不已。前已降旨。諭令方觀承等。將案犯分別發落。著即遵照前旨。速行辦理完結。可傳諭方觀承。胡寶瑤知之。○又諭。

曰雅爾哈善奏報地方雨水情形一摺。看來該省夏秋以來天氣亢旱。望雨甚殷。朕心深為軫念。計該撫奏摺距今又將二十日。現在未經得雨之處。曾否得有雨澤。其未經霑足者。曾否續降甘霖。各屬中晚禾苗。是否未致妨礙。著該撫速行查明奏聞。以慰懸念。浙省自十六年被旱之後。元氣尚未全復。若今歲收成歉薄。小民生計。必更覺拮据。該撫應督率屬員。詳加查勘。凡有應行辦理之處。豫為籌畫。倘有成災處所。宜即加意撫綏。妥協辦理。不可稍有諱匿。至所奏查拏羅教人犯。及搜獲榜文經卷等書一摺。榜文係康熙年間舊刻。看來周喜吉等。不過騙錢入會。尚無散割作奸情節。該撫等審訊明確。只應將現獲各犯量加創懲。分別發落。經卷板片。照例銷燬。就外完結可也。將此一併傳諭知之。○庚寅。諭軍機大臣等。莊有恭奏上元縣查獲僧人段中賢。研審勘擬一摺。觀該犯供詞。及搜

獲木牌木盤字句。悖逆不道。但類瘋人所為。至羅田首逆遠颺未獲。屢飭各督撫嚴密偵緝。尚無著落。此案雖由蹤跡馬朝柱。經盤詰而得。其是否即係馬朝柱。究未可定。該犯現有嫂姪。及該寺僧人等。均可提訊質對。諒亦無從掩飾。該撫應虛衷研究。務得實情。如豫存成見。以為必係馬朝柱。因而附會鍛鍊。希圖完此大案。則斷不可。若審明並無黨羽。不過瘋狂之人。即按其情罪。酌量在外完結。亦不必題達也。即傳諭莊有恭知之。○吏部等部議覆。署兩廣總督班第條陳海疆守禦官制分防事宜。○新寧縣應添設縣丞。查新寧縣向止知縣典史二員。廣海寨巡檢。離大澳二百餘里。應於大澳適中處。那骨堡地方。添設縣丞一員。於通省佐雜冗員內。裁汰改設。○工丁鋪戶。應編甲管束。查五堡各處山場。所聚異籍。其大澳鋪戶中。應責成縣丞。召募本地老成殷實者。承充澳長。至山場柴炭。劃

分山界之外。各聽商民開採。所需工丁。除來
厯不明驅逐外。其餘逐名開冊。呈送縣丞。并
各舖戶一體編甲稽查。大澳應添撥巡船。
增設礮臺。查大澳為那扶營都司所屬。相距
窩遠。所設塘兵。向祇七名。夏間泊船有限。春
秋冬三季。桅船雲集。其中私鹽偷越。販米出
洋。一切違禁等事。均須防範。請於廣海營春
江協內抽撥拖風船一隻。快櫓船一隻。派千
把一員。配足官兵管駕。駐澳巡防。并請於大
澳汛房之處。設礮臺一座。均應如所請。從之。
○戶部議覆。河南巡撫蔣炳疏稱。澠池。桐柏
伊陽等三縣。裁汰訓導衙署。據該府縣查明。
房屋無幾。多屬破爛。請准其歸併教諭收管
修葺。又盧氏縣裁汰訓導衙署。據該縣查明。
向無義學。現於其中延師訓迪。應請准其改
設。又陳州府添設訓導。據該府查明。倫堂左
右。現有房屋數間。請分為府學教授訓導衙
署。其新鄉。南陽。南召。淮寧等四縣。添設教諭

訓導應添建衙署。均如所請。從之。○辛卯。

太宗文皇帝忌辰。遣官祭

昭陵。

上奉

皇太后還宮。○詣

皇太后宮問安。○諭軍機大臣等。此次昆明湖成
造戰船。較上屆為多。若照前次止委廳員恐辦
理未能妥協。著該督於道府大員內酌派一員
前來董率料理。○署兩江總督江西巡撫鄂容

安奏。參革常鎮揚通道董權文。侵稅弊混一
案。臣因日久未據審解。當即提犯細鞫。廢員
陳齊東為董權文管關。侵用公銀。復私索規
禮屬實。并查各員會審單內。俱無董權文私
賊入已字樣。此案情罪已明。現經繕疏具題。
但查外省尋常命盜案件。每多遷延不結。以
致案情日久變幻。理應一循定例。屆限即參。
不准扣展。倘無病捏稱有病。輕病捏稱重病。
別經察出。將扶同驗結之員一併參究。諭軍

機大臣等鄂容安覆奏承審叅案一摺。所稱
居限即叅。及查明捏病叅究。扶同驗結之處。
如此釐剔積弊。州縣各官。庶可不知所警戒。叅
案自能依限完結。各省俱當照此辦理。著將
原摺鈔寄各督撫閱看。○壬辰。

上詣

皇太后宮問安。○遣官祭黑龍潭

昭靈沛澤龍王之神。玉泉山

惠濟慈佑龍王之神。○癸巳。

太祖高皇帝忌辰。遣官祭

福陵。○諭原任侍郎劉綸將次服闋。著來京補
授戶部侍郎。其未到之前。戶部侍郎事務。著
衛哲治暫行兼管。○甲午。諭今歲淮揚下游
被水。亟需賑卹。前已降旨截留該省本年漕
米四十萬石。備賑濟之用。但該處戶口極繁。
必尚多需米石。向來籌辦賑務。每動帑委員
告糴鄰境。市僧聞風。涌價射利。往往因一省
被災。而鄰封稔歲。胥受貴價之苦。非救荒善

策也。朕思定例銀米兼賑。而江淮舟楫相通。
商販四集。貧民得銀即可易米。正當聽其自
為流通。不必官為採買。如所截漕糶。及該省
倉儲。尚不敷賑給。該督撫即隨時奏聞請旨。
現在太倉充裕。朕不惜多分天庾之儲。惠此
嗷嗷兆姓。該督撫等。惟當督率屬員。實力撫
綏。毋令一夫失所。並出示曉諭災民。各安分
待賑。以副朕軫念至意。該部遵諭速行。○諭
軍機大臣等。莊有恭奏查勘車邏壩漫水情
形一摺。於水勢如何。及成災田畝若干。全未
明晰。今年河湖異漲。被災甚寬。所有撫卹事
宜。該撫等宜極力查辦。務俾均霑實惠。莊有
恭雖現駐淮揚。督率辦理。但災地既廣。恐伊
一人或未能周察。可傳諭策楞。劉統勳令其
暫留江南。會同商辦。俟定有章程。交莊有恭
督辦。再行復命。不必急於回京也。至江南被
水地方。或言較七年為輕。或言較七年為重。
其究竟水勢若何。及成災分數。可令策楞等

體訪輿論。確勘情形。據實速奏。向來賑卹。原有銀穀兼支之例。但此項穀石。若從鄰省採買。恐鄰省市價。未免有加昂之慮。江南為水陸通衢。商販輻輳。今聞該處需米。圖利者自必益加雲集。若全以銀折賑。民間儘可自行買食。是災黎既可沾恩。而鄰封亦不至食貴。庶為妥協。尋策楞。劉統勳奏覆。臣等面詢撫臣。據稱前奏較重於七年者。係專指高寶被衝處而言。以全局而論。實較七年為輕。且七年被水在積歉之餘。今歲被水在麥收之後。所以民情尚屬安帖。至散賑以銀。停止採買。自應遵諭奉行。得旨。覽奏俱悉。○又諭。曰。圖爾禪奏報。馬蘭口禾稼情形一摺。內稱六月。盡間有蝗蟲從東飛來。隨即打滅。在田禾長成之後。無傷籽粒等語。該處所落飛蝗。係在六月。彼時即應奏聞。乃遲至此時。始僅以無礙田禾奏報塞責。殊屬玩視。著傳諭申飭。○乙未。

萬壽節

上詣

奉先殿行禮○遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵○遣官祭

顯佑宮

東嶽廟

城隍廟

上詣

皇太后宮行禮○御太和殿王以下文武各官

進表行慶賀禮○丙申

上詣

皇太后宮問安○奉

皇太后御暢春園○幸圓明園○丁酉

上詣暢春園問

皇太后安○遣官祭

關帝廟○遣官祭昭忠祠

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十四

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十五

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部主事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄四次臣德瑛經筵講官太子少保工部尚書紀錄六次臣曹振鏞等奉
敕修

乾隆十八年癸酉八月戊戌

上以秋獮木蘭奉

皇太后自圓明園啟鑒○詣

皇太后行宮問安○諭行在兵部祇有侍郎觀

保一人著阿里衮暫行兼管○是日駐蹕南

石槽行宮○己亥

上詣

皇太后行宮問安○遣官祭賢良祠○諭此次

巡幸木蘭所有經過州縣著加恩蠲免本年

應徵地丁錢糧十分之三總督方觀承照例

查辦該部即遵諭行。○是日駐蹕密雲縣行宮。○庚子。

上詣

皇太后行宮問安。○諭軍機大臣等南河此番發覺之案殊出意外。當富勒赫奏到時朕意高斌張師載渾厚易欺。為屬員蒙蔽。咎止失察耳。乃據高斌所奏九萬餘兩之數既經查出。仍不行參奏。而聽河員之自為彌縫。是竟成通同故縱。雖高斌張師載身無染指。而明

實錄卷四百五十三

二

知侵冒。其罪非僅失察公過而已。今全河積年陋弊盡行敗露。若不極力整頓。將來仍不過革職留任。勒限著賠。則國家之功令不行。不但河員視侵虧為分所當然。將各省督撫瞻徇屬員通同舞弊之惡習。何所底止耶。但俟策楞劉統勳逐一清查。具題著追。則虧空人員久不離任。將益肆侵虧。又一時不得如許接辦之員。亦非所以慎重河務。著傳諭策楞劉統勳就所查出及得之採訪者約舉大

數一面奏聞請揀發道府以下人員往南接辦。一面將虧空各員摘印看守。策楞暫行署理南河河道總督印務。并高斌張師載應得處分俱俟奏到日另降明旨。所有虧空之項竟不必行文原籍查產。蓋河員信息最速。一聞清查之信。隱匿寄頓。亦無所不至。其前任應賠之河道何煇等輩。欽差甫出都門。其貲財先已密為運寄。即照例行文查產。亦復何益。將來惟予限一年。限內不全完者。無論本年勾到不勾到。即行正法。庶河員稍知敬畏。嗣後工料尚不至全歸子虛。朕意如此。將此一并諭策楞劉統勳知之。又下河災務時切朕懷。何不速奏以慰懸念。尋奏下河被災等處業經委司督率各員查賑。其結茆就隄栖止者均已撫卹。餘戶現在挨查。分別極貧次貧。尚未得有確數。所有疏洩積水。借給籽種各條亦已行司查案。分別定議報聞。○是日駐蹕要亭行宮。○辛丑。

上詣

皇太后行宮問安。○諭湖廣總督永常出差事竣前已降旨令其由安西順道回任。俟伊到楚後開泰即仍回貴州巡撫之任。定長著來京陛見。○是日駐蹕兩間房行宮。○壬寅。

上詣

皇太后行宮問安。○諭兩淮鹽政普福奏稱兩淮商人共望翠華載莅。願捐銀二十萬兩。建造臨江等處行宮等語。此奏錯謬已極。上次南巡時該督黃廷桂等以

聖祖仁皇帝巡幸所建行宮。歷年已久。兩淮商人情願捐貲修葺。事屬可行。是以允其所請。後見其增飾過華。甚非朕本意。曾經降旨申飭。上年為偽稿事。尹繼善來京。常同軍機大臣等入見。伊乃奏請南巡。朕面諭以甫經歷覽。無事重巡。即閱數載。有展義之舉。亦必絲毫不令商捐。一椽不令增置。朕方允爾之請。如竟以商捐建置為例。事是乃不欲朕南巡

耳。此旨衆所共聞。今普福忽有是奏。殊屬不解。朕之巡幸。原以省方問俗。豈遊觀是務。此在平時尚所不可。況現在江南淮揚等處被水成災。朕心軫念。截漕拯救。議賑議蠲。日夜焦勞。惟恐一夫失所。更何心問及懷居。所有商人捐項。即著增備淮揚賑濟之需。斯商人之忱已効。而仍以為惠彼桑梓之用也。普福著交內務府大臣嚴行議處具奏。○諭軍機大臣等。江南淮揚一帶被水成災。賑卹需米。朕恐於隣近省分採買。轉致市僧聞風居奇。為隣省之累。是以特降明旨。不令齋帑採買。今據黃廷桂奏稱。本年川省豐收。米價處處皆賤。則以豐補歉。乃理所當然。著將該省現貯倉穀酌撥二三十萬石。即著黃廷桂委賢員運往江南。以資接濟。該省於秋成後陸續買補還倉。則川省米價既可致一時騰貴。而川米由江運下江省。亦緩急有賴。於賑務甚為有益。前者恒文聞川省豐收。籌撥溢穀

運楚該督未允彼為倉儲起見非所急需不允為是此則助賑卹災非楚省還倉可比該督其詳悉妥協辦理副朕軫念如已經運米若干石即於數內扣除知會恒文由楚運赴江省○又諭曰班第等奏稱准安南國王咨解匪犯梁行修係廣東增城縣人俟進關訊明即轉行遞解東省究擬等語安南素稱恭順今內地民人潛入其境助行叛逆該國不敢專殺復解送內地究處此等匪犯解到時即應正法以示天朝法令若照例轉解廣東按律定擬該國人等未曉律例且不能深悉中國辦理情形未為妥協可傳諭該督等將梁行修一犯於該國交界地方即行正法如此辦理則該國自益懷德而內地民人亦不敢越境滋事方足昭懲奸柔遠之意○又諭據總督黃廷桂奏稱審辦私造無名揭帖擅裝遞送封套內控告遊擊邵建侯之臺站兵丁吳重義揚題年等解送藏內一摺臺站兵丁

膽敢私造無名揭帖控告本官情殊可惡此等惡習斷不可長伊等所犯亦係死罪如審明後照例解送內地治罪不惟彼處人不知微懼即唐古特等亦不得知內地國法著寄信多爾濟舒泰將吳重義揚題年解送到藏審明如係情實將此二人在彼絞決示眾使藏內人等亦得知我內地國法之嚴○又諭從前遣往拉林種地之滿洲等經年已久今伊等生計如何有無裨益之處著寄信傳森滿福將種地之滿洲等景況及現居拉林人等外尚容添駐數千之處此時即留心籌畫於今歲封印後伊等來京陛見以便奏聞朕再酌定辦理○是日駐蹕常山峪行宮○癸卯

上詣

皇太后行宮問安○戶部議准福建巡撫陳宏謀疏稱晉江南寧二縣勘實被災八分民屯田畝除應免外尚應徵銀一百三十兩六錢

零。勻丁銀一十五兩一分零。分作三年帶徵。又被災七分六分五分。民屯寺學田畝除應免外。尚應徵銀一千三百八十六兩六錢零。勻丁銀一百七十六兩三錢零。分作二年帶徵。請於十七年起限。分年帶徵。從之。○是日駐蹕喀喇河屯行宮。○甲辰。

上詣

皇太后行宮問安。○調湖北布政使德福。為廣東布政使。以湖南按察使沈世楓。為湖北布政使。湖南辰沅永靖道夔舒。為湖南按察使。○是日駐蹕避暑山莊。至丙午皆如之。○乙巳。

世宗憲皇帝忌辰。遣官祭

泰陵。○諭江南淮揚一帶。被水成災。前已降旨截留該省漕糧四十萬石。以備賑糶之用。但該處被災甚廣。亟當多方籌畫。以資接濟。昨據署四川總督黃廷桂奏稱。川省今年收成豐稔。米價處處減賤等語。蜀江直達維揚。舳

舻易致。漢時下已蜀之粟。以賑江南。若借川省倉儲額穀。助江南賑卹。俟秋成後。該督再行酌量買補還倉。則採買亦不至騰價。實為兩得。著黃廷桂於該省倉穀內。酌撥二三十萬石。遴委賢員。作速運往。俾災黎餬口得有倚賴。江南無事。採買庶鄰省不致踊貴。該部遵諭速行。○諭軍機大臣等。向來河工最為弊叢。久被不肖工員。相沿朦混。特未經發覺耳。今南河積弊。甫一查覈。立即敗露。是其明驗。其河東及直隸各工。此等虧料侵帑情弊。舉所不免。不但顧琮易於欺蔽。大槩有工即有弊。不可不逐一徹底清查。庶嗣後可使帑歸實用。已降旨令舒赫德。俟劉統勲差竣之後。前赴山東直隸地方。會同查辦。可密行傳諭劉統勲。於南河查勘清楚。及災賑辦有頭緒。即將何日可到山東之處。先行知會舒赫德。令其前往。又此事應嚴密辦理。不可先露風聲。致有補苴之弊。○又諭曰。楊應琚奏莊

有恭因淮揚各屬被水成災。咨商撥協東省倉穀。並代買米麥。東省止可撥運現存穀麥十萬石。不便採買等語。一摺。所見甚是。從前被災省分。輒赴隣境採買。以致市僧聞風居奇。頓昂價值。一省被災。而各省俱有食貴之虞。此向來督撫辦理不善。今年淮揚等處被水成災。賑濟亟需米石。業經截漕四十萬石。並現在飭撥川米二三十萬石。運江接濟。加以銀代賑。江省舟楫可通。商販四集。災民得銀買食。該撫自可籌辦。即有不敷。亦應奏請再為籌酌。前此恐該撫等以採買為常例。是以特降明旨停止。今果四出咨商採買。莊有恭所辦。又未免太涉張皇矣。東省現有被水州縣。亦需賑濟。楊應琚所奏碾運穀麥十萬石之數。著與莊有恭會商。如江省遵照前旨。以銀代賑。東省無庸撥給。倘萬不得已。亦止可如此。所有截留漕糧。及撥運川米。是否敷用。著莊有恭速行據實奏聞。尋奏。臣前因

淮揚等處被災較重。江蘇倉貯無多。恐或不敷賑糶。而先事多為之備。是以移咨山東。河南。兩湖。浙江等省。有無可以撥協。并代為籌買。嗣據各省先後覆到。共可撥協倉穀六十餘萬石。并可代買二十五萬石。臣以業經截漕備賑。俟來春酌看情形。另咨商辦。皆未經徑請撥運。今蒙復撥川米二三十萬。并截留漕米四十萬。查今冬賑濟。俱可折給銀兩。來春始給銀米兼放。約計已足敷用。各省無庸協撥。得旨。太屬張皇矣。○又諭。舒赫德奏請裁撤北路軍營叅贊大臣。及巡視邊卡牧場水草侍衛。再達瓦齊既為台吉。必遣使來告。我亦遣使往報。請定修好之議。一摺。軍營無事。伊欲奏撤叅贊大臣。及巡視邊卡等處侍衛。所見尚是。朕亦知其無用。但事行已久。未便遽行裁撤。至所稱遣使修好。殊為不曉事體。前之止兵修好。是與噶爾丹策零修好而已。至達瓦齊本係別支。膽敢作亂。弑君。自

為台吉。若係屬國。尚當與師問罪。但我大國。無乘亂興師之理。今若遣使前往。不惟於體制未協。反謂我國畏彼。每立台吉。必皆遣使任意干請。况準噶爾之性。無事尚欲捏造妄言。若欲定議修好。彼必遣使往返。言之不已矣。將此寄信舒赫德知之。再朕前令舒赫德不必趕來者。謂彼必於九月初始能到京。彼時朕已進哨。是以諭其中止。今伊於二十日即行進京。朕尚未到熱河。伊若取道前來。儘可馳赴該處。陞見伊非他人可比。數月未見朕躬。豈果念不及此耶。然伊不必因此趕來見朕。京城步軍統領事務。尚屬緊要。此際惟將一切事務。留心辦理。現在南河工程事務。遣策楞劉統勳查辦。虧空弊竇。河東直隸河工。恐亦有未清之項。劉統勳查完南河工程。回京時。派舒赫德前往會同詳悉嚴查。汝等可密寄信詢問劉統勳。彼處事竣。於何時起程。何時可至河東之處。令其豫行札約舒赫

德計程自京馳驛前往。劉統勳甫查南河而還。即照伊查辦可也。舒赫德不必前來請訓。起程時。伊所管事務。仍交從前署理之人兼署。此事所關甚要。惟伊一人知之。毋令他人知覺。且史貽直之子在彼。尤不必令彼知之。

○丁未

上自避暑山莊奉

皇太后啟鑒。幸木蘭。○詣

皇太后行宮問安。○諭新駐巡查圍場兵丁。雖

與以地畝。尚未耕種。於明歲秋收為期尚遠。此時恐難接濟。著交熱河道就近將倉穀借與半年口糧。作五年扣還。○諭軍機大臣等。策楞劉統勳奏河工陋弊一摺。所稱本任調任陞任。及緣事各員。其經手錢糧。大都牽前扯後。以致多有侵虧。看來此等俱係向來積弊。高斌張師載久任河臣。非漫無知覺者。特延玩瞻徇。遂致國家正帑久肥若輩之橐。而莫之禁。即如今歲桃源廳孫廷鉞陞任梧州。

交代時高斌勒令通完欠項始准赴任。此不過因富勒赫在工乃不得已如此辦理。若係高斌於虧空人員俱如此辦理則伊等亦何至積至九萬餘兩之數乎。此番徹底清查若不重加懲治無以力挽頽風。此必非僅予革職著追可以了事者。前已降旨令策楞劉統勳就所查出約舉大數一面奏聞請揀發人員接辦。一面將虧帑各員摘印看守。策楞等想尚未奉到。今所奏僅屬查訪陋弊大概其實在侵虧之員尚未逐一查奏。所奏高斌一節亦屬牽就。但高斌等此時現在堵築漫口尚未竣工。將來策楞等逐一查清得實具摺奏聞後則漫口亦當堵閉。自當明降諭旨著傳諭策楞劉統勳令其仍遵前旨確查據實具奏。○又諭據策楞等奏稱淮海被水情形視七年較輕與十一年相等應賑各戶現在清查但積水早消始秋麥可種已將宣洩積水廣借籽種事宜札致撫臣查辦等語辦理

災賑惟在實心實力既不可稍涉張皇亦不可豫存被災較輕之見。庶災戶均霑實惠不致失所。近因川省收成豐稔復於截留江省漕糧四十萬石之外特降明旨酌撥川省倉穀二三十萬石運江南備賑其莊有恭所借東省米麥亦傳諭楊應琚如在必需則以十萬石之數酌量借給是備賑之米已不下八十萬石矣。况前已屢諭莊有恭令以銀代賑商販聞有此旨自必踴躍運糶災戶得銀不難買食。如此從容辦理使閭閻餬口有資即為救災善策。無事多方措置輾轉借糶也其借給籽種為來年之計亦成例應行之事。目今水未消涸亟宜設法疏通上緊宣洩使秋麥得及時播種則被災地方既得銀米接濟而秋麥播種齊全之後來歲春熟可期元氣亦庶幾早復將此傳諭策楞劉統勳知之。○旌表守正捐軀之河南長葛縣民宋經年妻李氏○是日駐蹕中關行宮○戊申

上詣

皇太后行宮問安。○是日駐蹕波羅河屯行宮。

○己酉秋分夕。

月於西郊。遣和碩裕親王廣祿行禮。○

上詣

皇太后行宮問安。○賜蒙古王公額駙台吉等

宴。○諭曰。親王成袞扎布。所予伊子官爵。將

二子俱送前來。請朕酌定。所奏係出誠心。看

二子之中。三子占扎布多爾濟。聰俊有成。著

予以應得公爵。伊次子敏珠爾多爾濟。亦施

恩賞給公銜。○又諭原封貝子達爾瑪達都

人甚誠謹。伊在日劾力多年。今若將貝子減

等承襲。朕心不忍。伊子班珠爾。著加恩仍封

貝子。○又諭據廣東巡撫蘇昌等奏稱瓊州

為海外瘠區。貧民生計維艱。查有可墾荒地

二百五十餘頃。請照高雷廉之例。召民開墾。

免其升科等語。著照該撫等所請。查明實係

土著貧民。召令耕種。免其升科。給與印照。永

為世業。仍督率所屬妥協辦理。庶土無遺利。

俾該處貧民得資種植。○諭軍機大臣等。蔣

炳奏准莊有恭咨撥豫省倉儲。協濟淮徐各

屬。因酌動開歸等屬。貯麥七萬石。抵穀十萬

石。聽江省委員領運等因。一摺。看來莊有恭

此番辦理。實屬張皇。今年淮揚等屬被災。雖

重。然截留漕糧。撥運川米。計共七八十萬石。

加之以銀代賑。災民買食甚便。何至因一省

中數處偏災。遂爾四出告濟。前因揚應琚摺

奏。碾穀運濟江省。已疊經傳諭。莊有恭。此次

蔣炳所奏。雖豫省各處收成豐稔。尚可不慮

一時昂貴。著再與莊有恭會商。若江省米石

已足敷用。仍可無庸動撥。否則令其酌量於

此十萬石內。或再為酌減撥運可也。○是日

駐蹕張三營行宮。○庚戌。

上詣

皇太后行幄問安。○

上行圍。○諭曰。嵇璜著回京辦事。兼署兵部侍

郎事務。○又諭曰。策楞劉統勲查叅河員虧帑誤工一摺。閱之竟致駭然。高斌深受恩遇。委以全河重任。張師載因其歷任河員。加恩擢受巡撫。協辦河務。道廳各屬。自應釐剔夙弊。方無忝委任。富勒赫初奏時。意高斌等為屬員所朦蔽。咎在失察。及閱高斌摺奏。竟屬故縱。今據策楞等查出浮冒朦混。種種滋弊。如外河同知陳克濬海防同知王德宣。虧缺皆至二三萬。高斌等豈竟毫無覺察。乃置之不問。其視虧帑為應然。彌補為故智。二人之罪。其可逭乎。至通判周冕。應辦物料。全無貯備。以致二閘被衝。束手無策。仍不據實題叅。等問。僅稱誤事。撤回。另委接辦。此尤其乖謬之甚者。若非策楞等前往。則該員竟致漏網。高斌等之居心。尚可問乎。富勒赫來京。陛見朕意。其尚可隨高斌學習河務。初無成見。令其前往釐剔也。乃富勒赫到工後。高斌等內不自安。始拮据查辦。逮富勒赫奏聞。方稱有

查出虧空九萬之多。亦並未指名彈劾。今經策楞等徹底查出。而高斌等負恩溺職。捏飾徇縱。竟為天道所不容。其敗露有不期然而然者。此而從寬。則各省督撫。孰不效尤。政令其可問乎。高斌、張師載俱著革職。留工効力贖罪。策楞著署理南河總督。富勒赫著照張師載之例。協辦河務。衛哲治著補授安徽巡撫。李奇齡著革職。嚴審定擬。其餘侵帑各員。俱著革職。等問。亦不必查抄家產。所有侵虧銀兩。勒限一年完項。周冕著革職鎖押。二閘漫口。虧空物料。勒限半年完項。其有限內不能全完者。俱即於該處正法。其欠項著高斌、張師載及各上司分賠。再督臣統轄全省。有辦理河防之責。河員虧帑玩工。不得委為不知。黃廷桂到江未久。即辦大差。旋經調任。尚未暇查及。至尹繼善則前後在江。歷有年所。且曾任總河。積弊自所稔悉。伊若早為舉出。即可及早辦理。乃從無一字奏聞。是豈國家

委任封疆大臣之意。尹繼善著一併交部嚴察議處。○是日駐蹕十八里臺大營。○辛亥上行圍。○諭軍機大臣等。據莊有恭稱。辦賑章程。開捐事宜。現在會同策楞劉統勳鄂容安酌商具奏等語。此番淮揚被災之處。據策楞等及莊有恭前後奏到。其情形實較乾隆七年為輕。將來賑卹諸費。自不至如七年繁重。開捐一事。原非得已。況現當府庫充裕之時。若賑卹需費無幾。即不應過於張皇。必所費不貲。始可暫開捐例。著傳諭策楞等會同通盤籌酌。覈計需用銀米之數。以二百萬為率。如必三四百萬。方可題請開捐。若在二百萬以內。竟不必為此一舉。可速行諭令知之。再莊有恭摺內有與署督另行具奏之語。其另封一摺。封套與督臣鄂容安聯銜並列。意其有即為辦災奏聞之事。及拆閱乃係米糧價值。此不過幕賓照例書寫。該督何曾與知。似此殊屬故套。將此一併諭令知之。尋策楞劉

統勳鄂容安莊有恭等奏。臣等察查各屬成災情形。約計應賑戶口。即照例辦理。已在二百萬之外。再查歷年被災。每屆新春。皆蒙格外加賑。今歲被淹田地。不能全涸。以種秋麥。則來春青黃不接時。窮民更需接濟。臣等通盤籌酌。需用銀米之數。統計三百萬之外。捐例實屬應開。報聞。○又諭南河總督事務。已降旨令策楞署理。看來南河光景。自高斌。張師載。因循滋弊。沿習已深。經此一番查辦。在工各員。掩飾周張。情態百出。策楞當此積玩之餘。必當極力整頓。嚴肅澄清。使頽風一變。畫定章程。俾屬員有所遵守。方為實有裨益。總河一官。究以辦事為主。貴能察屬積弊。不專在通曉河務。即如高斌。乃素稱通曉河務者。而比年以來。衝決漫淹。何嘗不水災疊見。藉非高斌在彼。其衝決豈更有加於此乎。惟其不能督察稽覈。則工非實工。料非實料。冒銷浮混。無所不至。策楞稽弊。是其所長。而於

河務未經留意。劉統勲向曾學習。可相助為理。一切熟為籌酌。俟規模畧定。再行遵旨前往河東。直隸查察河務。至南河虧帑各員。除叅劾之陳克濬。王德宣外。凡經查出者。俱照前旨辦理。但伊等領帑入手。隨意花銷。此番著賠。是否力能依限完繳。策楞當留心察訪。并詢問高斌。張師載。自能深知。如虧帑各員。自知獲罪深重。縱酒行樂。逮一年期滿。自戕軀命。倖逃顯戮。朕必於策楞是問。如將來有更代策楞之人。并將此旨詳悉告之。再傳旨詢問高斌。張師載。伊等平時捏飾徇縱。以致屬員俱陷法網。伊等轉以罷斥自便。竟得蕭然事外而已乎。再前所降諭旨。策楞等何時接到。伊等現在所辦。似悉遵前旨。而何日奉到之處。未經奏及。一併傳諭知之。尋策楞。劉統勲。奏臣等前劾陳克濬等。及請揀發人員二摺。即係遵照八月二十二日諭旨。緣臣等以應請交部之摺。故未敢將廷寄諭旨日期。

敘入。得旨覽。又批。此處汝二人畧屬取巧。蓋始則觀望。朕未必即肯如是處置。高斌是尚未深知朕之乾斷耳。○是日駐蹕布敦昂阿大營。○壬子。

上詣

皇太后行幄問安。○

上行圍。○諭軍機大臣等。刑部查審黑龍江披甲達爾什等潛逃來京一案。據稱若仍遞回本處。無以懲儆。請發西安等處當差。照例鞭責等語。辦理非是。達爾什等擅自潛逃。實屬不法。即應從重治罪。以示懲戒。乃僅予鞭責。轉發他處。使得仍食錢糧。則與在黑龍江當差。又何異乎。此摺著發回另議。發往拉林與官員為奴。并傳旨申飭。○是日駐蹕呼魯蘇臺大營。○是月。欽差署侍郎李因培奏報灤州蝗孽。原報二百二十二村。於七月二十五後全行撲竣。又據叅革通永道及各州縣陸續查報零星段落。共計二百七十七村。俱於

七月二十八、九等日。全數撲捕告竣。現節近白露。已屬蟲孽垂盡之時。即間有一二竄伏。亦可無慮。報聞。○欽差尚書策楞、劉統勳奏。臣等奉諭。命臣與高斌會同清查河工。臣等商酌查辦之法。先將高斌所稱從前覈減已定。未及叅出之銀九萬餘兩。逐案行查。一面調取總河衙門奏銷清冊。一面飭取河庫道。自十七年覈減定數後。所有發給各廳。及現存道庫錢糧實冊。並飭委各道。飛飭各廳。將今歲工程段落。迅詳該道。照例覈減。加結具報。以憑查覈。臣等帶同藩司富勒赫。就近南下。將江南河道總督所轄之十七廳。徧歷查勘。庫則逐平彈兌。料則赴廠盤驗。斷不能絲毫掩飾。得旨。覽奏俱悉。一切如朕所諭。平情度理。勿枉勿縱。為之。看來爾等查辦此案。及順查賑卹之事。頗需時日。惟應據實奏聞。如朕親歷。方慰朕懷。正不必以早回隨圍奔走効力為急也。○江南河道總督高斌奉命會

同辦理河工。具摺謝恩。得旨。此未必非因朕用富勒赫前往。方如此拮据辦理也。汝平日所云不欺躬行者何在。問罪著賂。猶其小者。應懷慙。無顏對朕耳。○署兩江總督江西巡撫鄧容安奏。查下江被水州縣。就現在所報銅山、宿遷、睢寧、安東、桃源、清河、阜寧、高郵、寶應、甘泉、海州、沐陽等十二州縣。成災較重。業經飭司道等查辦。乏食貧民。先給一月口糧。坍房貧戶。給修葺銀兩。損傷人口。並給殮埋之資。貧生兵丁屯軍。一體照例撫卹。至上江所屬。除溪漲起蛟。被水之太平、歙縣、貴池、太湖等縣。俱經分別撫卹外。其餘鳳、潁、泗一帶州縣。因淮河水漲。淹及田廬。經臣查勘。該地向本瘠薄。又係積歉之區。將本年錢糧停緩。並節次催令分別查勘。又沿江安慶府屬之望江、宿松、池州府屬之東流、涇州所屬之全椒。雖被災較輕。俱經分別撥飭查辦。得旨。覽奏俱悉。又批。大約上江尚易為。下江則實應

妥辦耳。○署山東巡撫楊應琚奏查沂州府屬之蘭山。郯城。二縣。地勢窪下。積水難消。於七月二十一。二。三。四等日。淫雨連綿。宣洩不及。前據府縣稟報。隨委濟南府知府。馳往查勘。據稱蘭山高阜。地畝秋禾。尚無妨礙。窪下之處。多被損傷。郯城更當下游窪地。秋禾豆穀等項。盡被淹沒。一面飛飭設法疏消。一面確查乏食貧民。先行撫卹。俟飭查成災分數。照例題報辦理。得旨覽奏俱悉。督率屬員。加意妥行撫卹。毋致失所。○署山西巡撫侍郎胡寶瑤奏查馮進京一犯。係邪教首惡。已經監斃。餘杜三。司禮曹茂臣等三人。因臣緣類訪拏。與本案無涉。但該犯等曾經引入張進斗教內。難以輕縱。應照違制律枷責。至馮進京父馮獻光。年逾七十。照例擬杖收贖。犯妻楊氏。雖屬知情。尚無在外傳教。念係女流。槩行省釋。并令地方官嚴加管束。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之四百四十五

大清高宗法天隆運至誠先覺體元立極敷文奮武孝慈神聖純皇帝實錄卷之四百四十六

監修總裁官經筵講官太子太傅文淵閣大學士文淵閣閣學領侍衛內大臣稽察欽奉 上諭事件處管理

吏部理藩院事務直隸總督前據滿洲副都統世襲騎都尉軍功加七級隨帶加一級等當加二級軍功紀錄一次臣等杜

總裁官經筵講官太子太傅大學士文淵閣閣學領侍衛內大臣稽察欽奉 上諭事件處管理刑部主事等

世襲騎都尉軍功加十九級隨帶加二級人加二級臣等謹將內大臣戶部尚書理藩院滿洲副都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

較修

乾隆十八年癸酉九月癸丑朔

上詣

皇太后行幄問安○賜蒙古王公台吉等宴○

上行圍○是日駐蹕木壘喀喇沁昂阿大營○

甲寅

上詣

皇太后行幄問安○

上行圍○以印務叅領王士儀為鑲黃旗漢軍

副都統○是日駐蹕噶海圖大營○乙卯

上行圍○諭今日於圍場中拏獲之漢人著交

刑部審辦總管扎什泰專司巡查圍場之責而容留漢人於圍場之中不能查出經朕來時始行拏獲其平日之懶惰可知扎什泰著交部察議○是日駐蹕布扈圖大營○丙辰

上詣

皇太后行幄問安○

上行圍○是日駐蹕準烏拉岱大營○丁巳

上行圍○是日駐蹕敦達烏拉岱大營○戊午

上行圍○諭各省營驛及駐防標營馬匹向例

俱令出口採買送部印烙蓋因口馬善於馳

驟於營伍為宜但南省地土卑濕天氣炎蒸

且飼餵草豆各殊口馬性不相習每致倒斃

即有存留亦不能經久是於口外馬匹有損

於內地營伍無益徒滋商販中飽上年湖廣

總督永常奏請於本省及附近省分購買土

馬業已准行嗣後除直隸等北五省仍照舊

例出口採買外其江浙各省營驛需馬即著

就近在本省及鄰省買補所有購買口馬之

例著停止。其本省馬價將來應作何分別准銷之處。著該部查明定議具奏。○諭軍機大臣等。據德爾敏四格等奏。妙應寺失火。延燒塔架。佛殿僧房一摺。寺院寬濶。不應無端被火。且架木粗大。豈易燃燒。看其情節。此或有人與工員素不相協。潛行放火。亦未可定。著傳諭舒赫德。令其密為查訪。如有蹤跡。即行嚴拏究訊。並具摺奏聞。尋奏。查妙應寺東有小廟一所。中有空院。緊連妙應寺塔座。修塔所搭之架。直跨空院內。逼近佛殿窗櫺。架下又有南木匠搭蓋席棚一所。堆積木屑刨花。是晚僧人在佛殿西間上香。將火紙插於鑪內。火起。燃至窗紙。以致延燒塔架席棚。再塔院前係值宿工員住宿。後係匠頭一二人住宿。並無閒雜人等。臣將僧枷示。並細加察訪。實無放火情弊。報聞。○又諭曰。喀爾吉善等奏。分別採買倉穀一摺。所辦非是。該省從前擇穀多之家。豫先給價。冬成交穀還倉。辦理

原屬錯誤。蓋給價時。願領者未必即係穀多之家。貧民冒領價值。隨意花銷。必致逋負。迨積欠纍纍。追呼滋擾。此與青苗弊政何異。今倉貯既多。缺額即勒限完納。著落分賠。亦終成紙上空言而已。於倉貯有何裨益。該省本非產米之區。該督自應於臺灣及暹羅採買兩處之米。如尚不足。亦應照例於豐收州縣買補足額。至臺穀原定價值。設於該處現在情形。實有不敷。自不妨據實聲明。量為增價。今乃奏請依內地時價酌量買補。是全無限制。徒資胥吏侵蝕。殊非調劑倉貯之道。不但部臣按例議駁。即特行陳奏。朕亦不能從也。將此諭令喀爾吉善等知之。○是日駐蹕巴顏布爾噶蘇台大營。○已未。上詣皇太后行幄問安。○上行圍。○是日駐蹕巴顏溝大營。至辛酉皆如之。○庚申。

上詣

皇太后行幄問安○

上行圍○諭曰策楞劉統勳奏到查出南河河員積年虧空未完工料銀兩數盈鉅萬已降旨將高斌張師載革職留工効力贖罪虧帑之員革職拏問勒限一年如限滿不完即行正法今又續據查出覈減未完辦料未交各廳員多至十餘萬此皆高斌張師載積年徇縱不行實力清查所致由此觀之各省督撫之徇縱屬員者當不乏人其謂功令森嚴並無虧空者尚可信耶論高斌張師載之罪即拏問重治其罪亦所應得但高斌尚屬舊人其在河工久經出力張師載恂謹自守素無劣蹟且係隨從高斌是以姑從寬典其應賠之項必不再寬至各省督撫若效尤試法朕自不得不盡法繩之勿謂教之不豫處之不公也其查出虧帑河員例應於任所原籍抄查貲產朕見邇來人心日壞平昔糜帑縱欲

自知無所逃罪輒先期密為運寄嘗見虧帑累累貲財無幾上司因巧為開脫甚或所虧雖自無多而因力難彌補知必敗露遂肆意侵欺別為寄頓者此固由心習澆漓而實上司之徇縱有以啟之是以此番概不必抄查貲產惟以奉旨之日為始勒限一年全完者據實請旨限內未能全完者該督撫於限將滿之前請旨即於該處正法虧帑著落上司分賠此次續叅各員著即拏問遵照此旨辦理朕於此案實為寒心不惜三令五申各督撫其咸知所儆○諭軍機大臣等策楞等查辦南河工員虧空續據查出十一萬五千餘兩此悉由高斌張師載平時捏飾徇縱以致不肖之員肆無忌憚竟以誤工虧帑視為尋常積習相沿牢不可破論高斌等之罪即拏問抄家亦所應得但念高斌尚屬舊臣久經出力而張師載亦拘謹自守尚素無劣蹟是以僅予革職尚令在工効力贖罪此出朕格

外之恩。伊等若反以罷斥為幸。自謂可以蕭然事外。則罪滋甚矣。現在虧帑各員。雖經降旨勒限一年。追賠還項。但各員力量能完與否。高斌等自所深知。可傳諭策撙。劉統勳著詢問高斌。張師載從前既已不能實力稽查。因循徇隱。致使屬員俱罹法網。至於此極。將來限滿之日。虧空是否俱能全完。高斌等當如何設法分賠之處。令其據實詢明具奏。若彼二人亦於此際。即先設法寄頓。使錢糧歸於無著。則彼二人自知之。尋奉旨詢問。據高斌。張師載稱。虧帑各員。平時既不查察。事後又不參追。皆高斌等之罪。倘有未完。自當竭力設法盡數賠完。斷不敢使帑項無著。報聞。○湖北巡撫恒文奏。續據潛江。天門。沔陽。三州縣具報。於八月十二。十三。十六。等日。襄河水漲。風雨交加。水勢洶湧。垸隄衝決。該處田地多被淹浸。經臣與署督臣分路委員。協同該州縣親詣查勘。被災軍民。加意撫卹。一

面將潰隄搶築完固。其是否成災。統俟勘報到日。遵諭善為料理。得旨。覽奏俱悉。○辛酉上詣

皇太后行幄問安。○

上行圍。○賜扈從王公大臣。及蒙古王公台吉等宴。○補行直隸省十七年分軍政卓異官十員。罷軟官一員。有疾官一員。浮躁官一員。分別陞賞處分如例。○豁免陝西邠州。華陰朝邑。三州縣。乾隆十一。二。三。四等年。被水衝

決荒地額賦。○壬戌。

上行圍。○諭據漕運總督瑚寶奏稱。新漕伊邇。需人孔亟。請揀發衛守備四員。學習差遣等語。從前因遇朕巡幸。各省請發人員。不及引見。俱交在京總理事務王大臣揀選發往。曾經降旨令各省督撫。不得於巡幸時。輒請揀發。以示慎重。今新漕到淮。為期尚遠。該督亟行奏請。甚屬不合。著傳旨申飭。其所請衛守備著該部照例揀選。候朕回鑾後帶領引見。

○又諭據河南巡撫蔣炳奏稱豫省黃河秋汛水漲於八月二十五日原武一帶漫灘之水下注陽武漫過月石隄三壩格隄將十三堡大隄漫決臣聞信即馳赴陽武隄工查看一面委員堵塞上游一面委員查勘被水居民隨宜撫卹其疎防之該管河員及地方官會同河臣查明另行嚴叅外臣不能先事豫防請飭部嚴加議處等語本年豫省沁黃並漲以致陽武隄工漫溢蔣炳聞信即親往該工查辦撫卹尚屬毚勉其自請交部議處之處著加恩寬免餘俟查明叅奏到日俱著交部察議具奏○諭軍機大臣等今歲淮揚等處水災朕經節次降旨截留漕糧四十萬石又撥運川米二三十萬石并令豫東二省酌量撥給漕米以資賑濟昨日又據鄂容安奏撥穀二十萬石碾米運濟統計不下百萬為數已多今據布政司郭一裕奏請再行截漕三四十萬石蓋不知有各省協濟之穀也朕

於賑卹災黎原所不惜但漕糧關係天庾亦不可過多截留著將此傳諭策楞劉統勳鄂容安莊有恭等公同籌酌現在情形所撥米石是否已足敷用如必再為截留據實奏聞另行降旨再據富勒赫奏稱淮徐兩府印官多係委署而協辦之員寥寥無幾該管道府亦未上緊督催以致將及九月賑務尚無頭緒等語災民亟須賑卹自不容刻緩淮徐於七月被災該撫已委許松佑前往查辦何以迄今尚無頭緒著策楞等即將該處賑務情形速行查明具奏並一面上緊督催查辦無致災黎或有失所以慰朕軫念之意尋奏淮揚被水災區臣等酌定規條委員協辦據該管道府及各州縣陸續詳稟被災頃畝已經查竣冊報應賑戶口清查已及八分是今歲辦理災務實較每年俱早並非漫無頭緒惟是印委各官分投查災富勒赫經過未及迎接亦未將辦理本末報知故有漫無頭緒之

語查被災正賑例止四月來年五月始有麥收為日正長是以除先行撫卹一月外餘俟秋盡冬初再給得旨所見雖是但未免有與富勒赫私較是非之意○是日駐蹕巴顏木敦大營○癸亥

上詣

皇太后行幄問安○

上行圍○是日駐蹕英圖昂阿大營○甲子

上行圍○諭曰何聖烈等潛附徭匪謀為不軌

一案從前失察地方文武各員將錫壽等著交部分別議處現在拏獲逆匪及查審辦理文武各員徐鐸等著交部分別議敘總督碩色巡撫愛必達著一併交部察議○又諭內廷行走之縣丞張宗蒼監生徐揚楊瑞蓮効力皆已數年甚屬黽勉安靜張宗蒼年已及暮著加恩賞給戶部額外主事徐揚楊瑞蓮著加恩賞給舉人一體會試○吏部議覆署湖南巡撫范時綬奏岳州府屬巴陵縣東北

楊林街居萬山之中人民散處該縣查察難周必須專員巡緝請將同城縣丞移駐楊林街又沅州府屬芷江縣榆樹灣為黔楚水陸通衢苗民錯處每易藏奸該處離縣城九十里勢難稽察亦應將同城縣丞移駐榆樹灣應如所請從之○兵部遵旨議覆署陝甘總督尹繼善疏稱查保安營遠處口外向隸附近之循化營管轄嗣因改守設都與遊擊銜次不遠是以隸於鎮轄但保安距河鎮遙遠凡有文報必須經過循化而後達河州紆迴數百餘里往返稽遲請將保安營改歸循化營遊擊兼轄應如所請從之○以翰林院侍讀學士程景伊侍講宋邦綏充日講起居注官○命詹事府少詹事陳澧提督湖北學政○散秩大臣公伊通阿故派散秩大臣一員帶領侍衛十員往奠茶酒賞銀五百兩治喪○是日駐蹕伊遜薩爾巴里哈達大營翌日如之○乙丑

上詣

皇太后行幄問安。

上行圍。○丙寅。

上詣

皇太后行幄問安。

上行圍。○是日駐蹕安巴趙大營。○丁卯。

上行圍。○諭今日行圍。隨從侍衛等率多怯懦。

甚或有畏縮不前者。身為侍衛。於行走之處。理宜爭先奮勉。不失滿洲舊習。今徒步山林。

即如此怯懦。若遇軍陣。尚何足觀。豐安係揚

古利額駙之孫。朕因念及伊祖。屢經施恩。用

至領侍衛內大臣。當感朕恩。法祖効力。且身

任管轄之責。不能以身表率侍衛。反畏縮不

前。朕前尚且如此。則平日又何能管轄侍衛

耶。豐安著革去領侍衛內大臣副都統公爵。

作為三等侍衛。効力贖罪。再楊桑阿。朕念伊

父。用至侍衛班領副都統。伊係隨護之人。並

不奮力前進。尤屬非是。著革去侍衛班領副

都統。作為藍翎侍衛。効力行走。隨從侍衛田

國恩。著革去侯爵。○諭軍機大臣等。策楞等

覆奏。現在道廳各官。更易者多。看守錢糧。經

理案卷。在在需員等語。此番清理南河積弊。

業已剔除其既往。尤當慎重其將來。現在道

廳各員。俱係新手。從來新舊更代之時。弊端

百出。河工一切備防事宜。自屬各員分理。而

提綱挈領。則係策楞之責。務當精密周詳。不

可稍有疎畧。尤宜出之鎮靜。以為善後經久

之計。倘有不能妥協。以致宿習未能淨盡。并

別滋流弊。將惟策楞是問。至另摺所奏高斌

贖罪之處。錯謬已極。前因高斌。張師載在工

日久。虧帑各員。是否能於限內全完。伊二人

必深悉其底裏。是以傳諭詢問。要知各員之

虧空。即係伊二人之虧空。如各員限內不能

全完。則該員固應正法。而未完之項。即應著

落伊二人。如亦不能完。即將伊二人正法。朕

法在必行。非空言也。試思高斌等平日受朕

深恩而獲咎至此此何等罪而乃謂捐貲可贖耶即高斌等糊塗而策楞劉統勲所辦何事乃即具摺代奏著嚴行申飭現在二關尚未堵塞即當令高斌張師載駐工上緊勒限完竣方與留工効力之旨相符何以並不如此辦理致下河尚不能斷流災民靡有寧居朕心深為軫惻將此一併傳諭策楞等知之○又諭曰開泰范時綬奏酌籌接濟江省米穀兩摺莊有恭辦理災賑殊屬張皇今年淮揚被水不過數府偏災何至四出告借紛紛不已此特莊有恭借此以見其留心災賑令人稱頌其德耳江省備賑米石屢經朕降旨截漕并傳諭四川山東河南等省撥運米麥接濟覈計不下百餘萬石當已儘足敷用所有湖廣代買之米可以不必即或江省尚在必需亦祇可各以十萬為率其多餘米石即留楚省以補倉儲至莊有恭辦理如此張皇殊屬不識大體有意沽名著傳旨嚴行申飭

○盛京刑部侍郎吳達善奏請定告病開缺之例查盛京五部司員有因病開缺者該部並未將告假月日先行咨部註冊迨至開缺時祇於文內聲明該員病逾六月應行開缺與在京官員告病豫行咨部註冊之例不符不無容隱廢弛之弊請嗣後盛京五部官員除偶爾患病酌量給假外其有調理須經數月者應照在京各部之例查明患病屬實豫將告假月日行文盛京兵部咨部註冊限滿未愈照例取結移咨盛京兵部轉咨吏部開缺下部議行○賑貸山東蘭山郟城二縣水災飢民并予緩徵○是日駐蹕僧機圖伯勒齊爾大營

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十六

實錄卷之四百四十六

十六

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十七

監修總纂官總纂講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉九月戊辰月食

上詣

皇太后行幄問安

上行圍○諭各省學政已屆差滿浙江學政著

雷鉉調補江蘇學政著夢麟去山西學政著

歐堪善調補貴州學政著李師中調補雲南

學政著葛峻起調補四川學政著王成調補

順天學政著徐以烜去江西學政著張映辰

去福建學政著汪廷璵去湖南學政著莊存

與去山東學政著于敏中去陝西學政著張

拜賡去。廣東學政著陳桂洲去。廣西學政著許道基去。安徽學政良誠。湖北學政陳浩。河南學政孫灝。俱著仍留原任。○調工部侍郎張泰開為禮部右侍郎。轉禮部右侍郎鄒一桂為左侍郎。調禮部左侍郎董邦達為工部右侍郎。○是日駐蹕齊爾伯庫昂阿大營。已巳定甄別教諭訓導例。諭向例各省教職六年俸滿。該督撫學政公同甄別。堪膺薦舉者。保題送部引見。其年力衰邁者。咨部休致。但督撫陋習。既不肯輕保舉。亦不肯多咨。草是以保題者固屬寥寥。而休致者亦不多見。惟使龍鍾衰老之輩。濫竽戀棧。無所區分。蓋視教職為無足輕重。初不計及為造士之根本也。前以選拔貢生為教職之階。曾降旨訓諭各督撫學政。令其加意慎重。嗣後教職除有劣蹟者。隨時叅劾外。至六年俸滿。堪膺民社者。保題。其年尚強壯。精力未衰。可以留任者。出具考語。送部引見。若准留任。俟六年再

滿。仍如是甄別。如年老人員。即著咨部休致。有願來京引見者。照太計之例。該督撫聲明。給咨引見。至訓導一官。例止得陞縣佐。該上司尤多忽畧。嗣後甄別之例。與教職同。著為令。○又諭曰。阿里衮此次於朕前未能騎射。不勝領侍衛內大臣之任。此缺即著簡親王奇通阿兼管。其正白旗領侍衛內大臣員缺。著弘昇補授。所遺前鋒統領員缺。著努三補授。○以鑲黃旗副都統保平為正藍旗護軍統領。兼副都統。○是日駐蹕博里哈達大營。○庚午

上詣

皇太后行幄問安。○遣官祭

歷代帝王廟。○遣官祭

都城隍之神。○諭曰

皇后至盤山。海望不必隨往。著舒赫德為領侍衛內大臣。管理內務府大臣事務。隨往。○又諭。江南揚徐各屬被水成災。屢經降旨加

意撫綏。截留漕糧。撥運川米。以資賑卹。又恐撥運過多。致各省米貴。並令銀米兼賑。但照定例。又慮災地不敷糴食。著加恩每石增給銀二錢。俾災民買食寬裕。該部即遵諭行。○又諭。據鄂容安奏。九月十一日。銅山縣張家馬路隄工。衝決內隄七八十丈。外隄四五十丈。現駐工督辦。並請交部嚴加議處等語。目今秋汛已過。何致衝決河隄。其中顯有情弊。該管同知李煒。著革職拏問。交該署督策楞等嚴查。據實具奏。鄂容安雖署督。河工非其專責。免其交部。高斌。張師載。身任南河日久。不能留心查察。致該處隄身卑薄。疎鬆一時潰決。漫延數邑。其罪實無可逭。伊二人現在留工効力。如邵伯二閘決口已塞。即著同往銅山工次。上緊堵閉。若尚未完。即令高斌速赴銅山。勒限堵塞。如不能刻期告竣。即行嚴奏治罪。其疎防賠修之處。著策楞照例辦理。所有被災戶口。該署督查明撫卹。無致失

所。○諭軍機大臣等。李因培所叅涿州知州李鍾。俾虧空一案。據稱一面親赴該州查明。著傳諭李因培。秉公據實逐一清查。不得稍存瞻顧。總督之見。至所稱新舊輾轉交代之處。是否該督明知虧缺。示意接任彌縫。著一併查明。據實速奏。尋奏覆臣風聞州縣中有因臣既兼府尹。慮必盤查虧空。多極力設法彌補。而知州李鍾。俾向來虧空之名最著。臣正在留心密訪問。適督臣以不宜涿州之任。奏請撤回。查該員在任四年。從前何以不行奏請。獨至臣為府尹。而急於撤回。使另補他府。況該員素有虧空。道路之人皆知。督臣不應獨無聞見。至其居官之卑鄙。驛站之廢弛。不行叅革。僅請撤回另補。其中顯有情弊。得旨。所奏甚當。○又諭據莊有恭摺。奏揚徐各屬。今冬賑濟。俱可折給銀兩。來春始需銀米。魚放。而截留漕糧。撥運川米。共得六七十萬。已足敷用。所有前次密咨東省及各省米穀

俱可無庸撥協等語。看來下河災賑米穀已足敷用。但徐州銅山隄工於九月被水衝決。又復漫淹。睢寧靈璧虹縣等處災民亦亟須賑濟。所有湖北米十萬石。江西碾米穀二十萬石。應仍准其運往江蘇。以備將來賑卹之需。并諭鄂容安恒文知之。○又諭據鄂容安奏。銅山縣張家馬路隄工於九月十一日留勢猛急。風雨大作。衝漫內外隄壩七八十丈等語。目下秋汛已過。何至尚有風濤衝決之患。看來必係在工之員。自知河工弊竇。現在徹底清查。將來萬難掩飾。故令隄工漫決。希冀工料無從查覈。以為巧於脫卸之計。果爾則人心之壞。更為可恨。著傳諭策楞劉統勳嚴行查察。如上年銅沛同知即係李煒。曾經承辦隄工。則情弊更屬顯然。李煒現已降旨革職。拏問。若果有此種情弊。即一面奏聞。一面將李煒於該處先行正法。以為虧空誤工者戒。該處河工漫溢。則附近被災地方必且

物議沸騰。一加密訪。情偽畢現。縱鬼域之輩。工於自全。亦斷不能彌縫衆口。如策楞不實力查出弊竇。則將來屬員必競為欺蔽之術。其何以安於總河之任耶。凡此皆高斌等平時姑息徇縱所致。昨已降旨令高斌張師戴住二開工所堵築漫口。如該處尚未工竣。可令高斌先往銅山縣上緊搶護。勒限完工。一併傳諭知之。并傳諭鄂容安。令密行訪查。尋奏。臣遵旨親到工所細加察訪。所有隄工漫決。實係秋汛異漲。並無他故。并查淮徐各廳錢糧尚無侵虧。而附近居民亦未聞有人盜決之語。得旨已有旨了。欽差尚書策楞劉統勳署兩江總督。江西巡撫鄂容安江蘇巡撫莊有恭。議奏籌辦賑卹事宜。一勘災查賑。責成道府大員。督率稽查。一成災扁圖。應賑戶口。宜覈對順莊烟戶各冊。以杜捏冒。一撫卹修費。分別緩急酌給。一今冬普賑。應遵旨全以銀折。一淮徐海歷年帶徵漕米。懇酌留

奏用一隆冬寒沍酌量設廠煮粥一積水宜急籌宣洩貧民宜酌給工本一民間圩岸隄埝宜飭及時修整一越境謀食貧民應聽自便得旨著照所請行命陝西道監察御史蔣元益提督山西學政是日駐蹕碩龍哈達大營辛未

上詣

皇太后行宮問安是日駐蹕波羅河屯行宮
壬申諭曰尚書舒赫德差往江南仍著阿

里衮為領侍衛內大臣隨護

皇后前往盤山又諭前命策楞查察南河積弊即令接辦河道總督原係暫署其於河務究非素習所有江南河道總督著尹繼善補授河工廢弛已極此番清釐之後尹繼善務宜加意督率實心辦理俾弊竇肅清工程堅固以副委任若仍舊習不除一味模稜將循高斌之舊必且加倍治罪陝甘總督著永常調補不必來京請訓即赴新任尹繼善俟

永常到陝即赴南河開泰著補授湖廣總督黃廷桂著實授四川總督貴州巡撫員缺即著定長補授胡寶瑔著實授山西巡撫鄂容安著實授兩江總督江西巡撫員缺著范時綬調補楊錫紱將次服闋所遺湖南巡撫員缺仍著楊錫紱補授策楞著補授兩廣總督班第俟策楞到粵交代後回京又諭德保文既平庸射箭亦復生疎全無滿洲舊風不勝侍郎之職著革去侍郎專在內務府總管行走其工部侍郎員缺著三和調補所遺戶部侍郎員缺著阿里衮補授又諭據尚書劉統勲奏稱徐州銅山縣黃河衝開縷隄越隄一百四十餘丈溜勢全行掣過奪河之形已成督臣鄂容安住工率領員弁搶護此處河形直趨靈璧虹縣睢寧俱係七月間報災之處已分遣人員即行撫卹等語昨據鄂容安奏報即經降旨令該督等加意撫綏毋使災黎失所策楞劉統勲鄂容安現駐銅山辦

理。但此番查辦南河弊竇。糾紛旁午。加以堵禦決口。稽察散賑。諸務叢集。而在工員弁。及地方官新舊更易。又多生手。著尚書舒赫德。帶同白鍾山。即行馳驛前往。協同辦理。今年江南黃河漲溢。雖屬天災。然果平時工程堅固。何至於此。皆由高斌等徇縱屬員。經理不善所致。即將伊等拏交刑部。重治其罪。亦所應得。但伊等轉得脫離工次。且亦由朕之誤加任用。數年來為伊所欺。轉行自咎耳。著即令高斌。張師載。將漫決各工。勒限堵築完竣。其疎防賠修之處。仍照例辦理。高斌素稱諳練河務。今雖離任。其一切舊有工程。悉其調度。若悠悠之口。謂因釐剔弊端。更易新督。以致工員解體。是覈實稽弊。竟不可行。轉使劣員得肆其狡獪伎倆。國家功令。尚可問乎。現據劉統勲奏。稱該處於九月初間。水勢已十分險急。該管員弁。並不速報。直至漫決已成。始行具稟等語。明係積年冒銷。隄工本屬卑

薄。及見清查積弊。遂乘此漲漫。不復上緊搶救。聽其潰決。轉可彌縫。如此幸災樂禍。亟應置之重典。所有該工員弁。俱著革職拏問。該督等遵照前旨。查明從重辦理。○諭軍機大臣等。前經降旨。令舒赫德。隨護皇后前往盤山。稽察隨從官兵沿途需索。但事所關甚細。河工正在清查積弊。諸務糾紛。加以河工屢被衝決。在在皆須堵築撫卹。且在工人員。悉更生手。策楞。劉統勲。鄂容安。俱駐銅山縣搶築。尚恐照料未徧。已降旨。令舒赫德。帶同白鍾山。前赴江南。協同查辦。可傳諭舒赫德。令其實力稽查。務使南河積弊。從此肅清。其各屬賑務。亦同劉統勲。時加體察。俾被災窮黎。均霑實惠。步軍統領印務。仍遵前旨。著雅爾圖署理。所有交令查辦事件。如尚未完。亦即交雅爾圖接辦。至白鍾山久任河工。一切自所素悉。前已獲譴。復加錄用。若不知匍匐出力。稍有欺隱。使弊端不能廓除。

則惟白鍾山是問并令舒赫德傳諭知之

又諭曰劉統勲奏徐州下游南岸漫決情形一摺內稱漫水半由五壩洩入高寶諸湖過運河西隄東注下河此時不應堵閉二閘等語所見甚是水勢趨下若先塞其去路則泥濘衝激何能堵禦即使施工亦必不能堅固此時策楞當已到徐著傳諭劉統勲策楞等令其詳悉熟籌先將徐州南岸現決處所即行督率工員上緊堵閉務期速竣其前次二閘決口且勿急於堵閉俟上游堵築完工再行趕辦再次漫決隄工恐係河員素有侵虧因而乘機盜決希冀無可查覈若有此等情弊必將該員在工正法方足蔽辜著策楞等仍遵前旨密加訪察務得實奏聞又諭曰李錫秦奏貼寫匿名揭帖之李維茂一案據稱俟訊明例擬具奏等語該犯託名馬朝柱書寫匿名揭帖誣陷良民情殊可惡自應按律定擬以儆刁風但逆犯馬朝柱至今尚

未弋獲而借名陷害之案悉按定例明正典刑是不揣其本而齊其末矣可傳諭李錫秦將該犯立予杖斃不必題達并傳諭各省督撫知之○豁免浙江建德縣被水衝塌田畝額賦○是日駐蹕中關行宮○癸酉

上詣

皇太后行宮問安○諭軍機大臣等李因培奏奏涿州知州李鍾俾虧空一案李鍾俾係福建大族在直隸居官二十餘年何至虧缺之項數盈鉅萬必有巧為寄頓之處若聽該地方官照例咨查必以具文了事使帑項終歸無著可傳諭喀爾吉善令其速行據實嚴查毋任稍有隱匿尋奏臣遵諭即札致署泉州陸路提督富海并遴委員弁馳往泉州會同地方官嚴謹查辦旋接署提札并文員稟報李鍾俾係告休刑部主事李光型之子原籍安溪縣妻子隨任涿州父光型并其弟必甲長慶等現居泉州即日分派文武分頭搜查

封貯今查郡城李光型所有房屋田地以及衣飾資財。估值不過三千金。再安溪縣有李光型故父總兵李日烜公祠。係光型十房兄弟公產。其田房在安溪本籍者無幾。餘皆坐落臺灣鳳山等縣。并漳州府屬。是否公產。現俱飭查。未有定數。至現隨李鍾俾任所之妻舅王山王江二家。亦經搜查。並無寄頓財產。臣現密飭兩司。俟統行覈查後。再將緊要親屬逐細究追。得旨寄頓固不可波及。亦不必

○是日駐蹕避暑山莊。至己卯皆如之。甲戌。賜扈從王公內大臣等宴。諭軍機大臣等。策楞奏張師載回奏情由一摺。殊屬錯謬。前以高斌張師載在工日久。其於現在查出虧帑各員。是否能依限全完之處。必所深知。是以傳諭詢問。若論伊二人徇私縱屬。誤工虧帑。深負朕恩。乃至此極。按律以繩。果應何罪耶。各員所虧。即張師載等應賠之虧。空該員限滿不完。正法後。張師載等其奚所逃罪。

此豈捐貲可贖者。而策楞乃為具摺陳奏乎。前代高斌覆奏。已降旨嚴行申飭。著將此再行傳諭知之。○兵部尚書步軍統領舒赫德。叅奏查給事中特忒職司給諫。自巡城以來。凡伊所屬富戶。無不往來。又往來通州。常與大春班唱旦戲。子劉三同舟起坐。再查捐納員外郎劉裕泰。出身不正。倚藉特忒忒交好。巧為鑽營。又代請都察院堂官。贈給好善可風扁額。應將特忒忒劉裕泰。交部嚴議治

罪。都察院堂官一併交部議處。得旨這所叅特忒忒著革職。其行止卑污。及劉裕泰鑽營不法情由。交與刑部一併嚴審定擬。具奏都察院堂官著交部議處。尋議都察院左都御史木和。林梅。殷成。左副都御史廣成。陳惠華。俱降三級調用。查木和林有加四級。應銷去三級。免其降調。梅殷成。廣成。陳惠華。俱係革職留任之員。無級可降。應請革任。得旨特忒忒卑污狼籍。乃梅殷成於召見時。在朕前屢

次稱薦。且倡議給扁劉裕泰。又復自行書寫。是此案皆起於梅穀成。况伊年已衰老。著以原品休致。木和林著銷去。加三級。免其降調。仍罰俸一年。廣成陳惠等原屬旅進。旅退之徒。從寬免其革任。仍註冊。○豁免廣東沿海虛缺沙田額賦。○乙亥。諭曰。御史魏涵暉條陳科場事宜一摺。內有鹵字號人數不敷。不必另編中額一節。已交部議。而查進泰所奏。竟與相符。看來查進泰原無所見。不過勦襲人言。以博士子感誦。甚屬卑鄙。且滿洲職官言事。久經降旨。令用清文。即或因事關科場。亦當清漢兼用。今查進泰不守成例。竟以漢文繕奏。俱屬不合。著交部察議。原摺擲還。○諭軍機大臣等。據舒赫德奏。稱現奉差往江南。所有西中二倉餘米。丈量盤驗。應否即交李元亮雅爾圖辦理等語。前因通倉米石虧缺。特派大臣盤量。乃抽盤之時。俱有短少。及經支放。遂見有餘。可見盤量之法。未足憑準。

其通倉應放未完。即交李元亮接辦。至西中二倉。米既有餘。可以無庸盤驗矣。將此傳諭李元亮雅爾圖知之。○又諭曰。把總王騰蛟。因求糧未遂。挾嫌圖殺本管大員。兇惡已極。新疆重地。豈容武弁橫行逞兇。可傳諭定長。令其將該犯即行正法。以示懲儆。○河南河北鎮總兵米世泰。因病解任。以安慶營副將馬乾。宜為河北鎮總兵。○丙子。上御依清曠。勾到廣西四川雲南貴州情實罪犯。停勾貴州斬犯一人。餘五十人。予勾。○諭策楞等奏。銅山縣小店汛。七月間溜逼南岸。曾經淮徐道張宏運查勘下埽。後溜勢無定。至九月初間。隄外柳灘全行刷去。大溜直逼隄根。該管同知李煒。守備張賓。並未及時分報。直至隄頭坍塌。始行具報。以致漫溢貽誤。疎防罪無可寬。請將李煒張賓。一併革職。拏問。并請將淮徐道張宏運。交部嚴加議處。遊擊張吉。解任効力等語。銅山南岸隄工潰決。

前經鄂容安等奏報已降旨將李燾張賓革職拏問但該處本非頂衝險工且曾經查勘下埽乃該同知等以平日侵蝕既多隄工不能鞏固現奉清查將來獲罪必重幸乘水漲遂任其衝決不加搶護意謂即以誤工革職拏問亦事屬因公未必遽正典刑不思歷年來之公帑付之波臣數郡之田廬俱遭蕩析現在堵禦工程糜帑復數十萬是豈尋常貽誤工程可比若不嚴加治罪何以蔽厥辜而

昭國憲李燾張賓著即於該工正法使在工人員知所懲戒然此皆高斌張師載負恩徇縱實無可貸但朕究念高斌尚係舊人不忍即置重典高斌既得邀恩張師載因並寬宥然國有常刑雖朕於法外矜全曲宥亦不可不使知警畏著將高斌張師載一同綁赴行刑處所令其目覩李燾張賓行刑訖再行宣示恩旨釋放使伊二人知罪實自取而李燾張賓亦知孽由自造雖死無怨也如此處分

既以正高斌等平時負恩玩縱之辜亦以洩下游數郡被災者之恨然朕於伊二人姑息已甚亦惟高斌施此格外恩耳朕已誤用於前復曲宥於後將使天下督撫議朕用刑不當朕心實有愧焉今年南河固屬天災然亦因年來工非實工料無實料遂至於此高斌平時豈不料及第以官至大學士自分眷遇尚優未必即重治其罪不過賜予罷斥猶得優游林下安富尊榮舉泛濫巨災皆可置諸

度外居心如此實為天地鬼神之所不容遂至潰敗決裂一至於此而議者轉謂高斌節省工程覈減過刻致使一切隄防舉無足恃為此言者非以摘高斌之短亦非欲解高斌之罪不過冀幸接任督臣為所搖惑任其浮銷肆行侵蝕耳不知此等不肖之員覈之愈寬誤工愈甚河工督臣苟能察屬精明豈致為所欺蔽若更上下相蒙則將來獲罪必更甚於高斌張師載矣遊擊張吉著革職留工

効力贖罪。其叅革道員張宏運曾經查勘下埽。即與該工員弁同有責成。李燁張賓既已正法。豈可獨使漏網。著交策楞等將該員從前如何督看下埽之處。另行查明續叅。從重治罪。策楞富勒赫俱係新任。本無應得之罪。著免其交部。○諭軍機大臣等。劉統勲等奏籌酌堵閉漫口事宜一摺。內稱黃水入湖。挾清水東入河道。清江以下河底可冀刷深。此亦無聊之極思耳。黃水下注洪湖。其流漸緩。湖身必且停淤。日積下游河底。豈能借以刷深。治河之道。究以多方設法導歸正溜為是。固不可使湖河併勢。又不可急於堵塞漫口。蓋當此波濤猛急。苟非正溜順流。即築壩進埽。亦祇虛糜工料。終屬無益。且工料未集。何能徒手以禦洪流。此時自應廣為辦料。待水勢稍落。相度機宜。隨方疏濬。使正溜仍歸故道。則堵築之處。奏功亦易。著於圖中硃筆畫處。開挖引河。則離南岸頂衝既遠。去灣取直。

乘勢而東。趨下暢洩。使復故道。較之從張家馬路。河身迂曲灣繞者。似為便捷。可傳諭劉統勲策楞鄂容安。令其悉心籌畫。妥協辦理。至所奏毛城舖石林口兩處。果能分減大溜。亦權宜補救之一法。伊等若詳加斟酌。能減大溜。無礙正流。不妨隨宜疏導。至現在該處物料不能充裕。須豫東二省接濟之處。已諭令蔣炳楊應琚代為購買。可一併傳諭知之。○又諭據劉統勲等奏稱江南應堵漫口工程。當今歲被水之後。且道路泥濘。輓運維艱。所需稽料椿樁等項。徐屬所產。勢不敷用。現咨豫東二省購辦等語。該處漫缺處所需料孔殷。可傳諭蔣炳楊應琚。令其轉飭附近江南州縣。速為購買。運往應用。俾該處物料廣儲。庶工程可以尅期告竣。○又諭銅山縣隄工潰決。已降旨將遺誤工程之同知李燁守備張賓於該工即行正法。高斌張師載特加曲宥。此旨尚未明發。可傳諭策楞等將高斌

張師載與李煒張賓一同綁縛。詢問高斌等二人有何回奏之語。并詢以河工弊竇叢生以致在在衝決。此皆由伊二人平時負恩徇縱之故。久宜自知罪戾。及聞銅山隄工漫決。亦當恐懼惶悚。何以並無一言。竟若全視為策撈富勒赫之事者。然在朕雖已委曲加恩。伊等未必不反謂處之過當也。二人有何回奏。著即記明。俟押赴行刑處所。令其目覩李煒張賓行刑訖。再宣旨。仍將伊二人釋放。並問伊二人有何回奏言語。一一據實奏聞。其明發諭旨。俟一二日後再發。若稍露惟策撈是問。此旨已到。即先處分。尋策撈劉統勲奏臣等於二十九日。傳齊高斌等一面綁縛。一面傳旨詢問高斌。張師載俱稱分應處死。無辭回奏。臣等一同押赴隄旁。將李煒張賓斬決。後始傳旨將高斌張師載釋放。即問伊有何回奏。二人昏迷在地。醒後奏稱。我二人悔已無及。此時除感恩圖報。心中並無別念。報

聞。○丁丑。賜扈從王公大臣等宴。○定上年情實未勾人犯敘案。請旨入緩決例。諭各省由立決改監候人犯。情罪本重。歷次秋審。仍列入情實。上年四十起內。未勾者二十三人。此次已勾矣。祿一起。但節次存留監禁。將積而愈多。是因緩死而屢次綁赴市曹。亦非所以重刑章也。嗣後此項除本年未勾人犯下次仍入情實外。其餘著大學士會同刑部堂官將招冊覆加詳勘。其有實在情節可寬。如弟歐兄斃。或果因其兄干犯父母。迫於親命。或素有瘋疾。一時病發。凡似此類酌量分別敘述案情。確加看語。請旨即入緩決。蓋倫常所係。不厭周詳。朕於勾決冊內。已再三審量。更加一番公同勘酌。則情節益明。庶協明慎用刑。矜卹民命之意。著為令。○又諭據劉統勲等摺奏江南銅山縣應堵漫決隄工所需秫稻槁榮等項。徐屬所產勢不敷用。現咨豫東二省購辦等語。已降旨蔣炳楊應琚令飭

附近江南州縣速為購運該處隄工甚屬緊要若僅委之屬員恐未能趕辦迅速著蔣炳揚應瑒即親赴毗連江省之處督率委員尅期購辦運往以濟急需其各本省應辦事務仍可帶往辦理不致有誤該部即傳諭知之○諭軍機大臣等御史王顯緒奏周學伋我領俸米一摺周學伋先經革職擬絞旋加恩釋放回籍已隔數年何以復有特票赴倉領米之事果否即係本人抑係何人代領其中顯有情弊著在京總理王大臣將實在情節嚴查奏聞尋奏查周學伋於十三年八月革職所有俸米該革員並未具領其米每年存記因支領無人亦未給放並無有人代領之處報聞○戊寅

上詣

皇太后行宮問安○

上御依清曠勾到奉天陝西福建廣東情實罪犯八十一人予勾○諭福建秋審案內聚眾

械鬪致斃人命之陳茶張抗陳質及另案之施教施孔施錢等六犯詳閱案情實係各斃一命乃該督撫止將已正法之蘇伯侯施珍以為首問擬情實立決陳茶等俱以聽從僅擬緩決此皆捏敘案情舞文開脫本非信識實為外省相沿陋習不知人命至重此種聚眾械鬪互斃數命若祇以一人抵償則情重法輕人不知畏將來械鬪之事必多是所全者目前之兇犯而所害者日後之良民非所以除奸惡而昭懲創也以上案犯經九卿改擬情實俱已予勾嗣後各省督撫遇此等案件俱應執法辦理務必研究兇犯一命一抵不得有意姑息縱惡養奸並出示通行曉諭俾愚民知殺人者死無可倖免則兇頑有所警惕不致輕罹法網亦辟以止辟之意著傳諭各督撫知之○調兵部左侍郎裴曰修為吏部右侍郎吏部右侍郎彭啟豐為兵部左侍郎以署刑部侍郎李因培為兵部右侍郎

郎。仍署理刑部侍郎事務兼管順天府府尹。
○已卯。

孝慈高皇后忌辰遣官祭

福陵。○諭軍機大臣等。川東道積行在蜀數載。其居官如何。是否實係出色之員。抑僅在川省道員中稍優。策撈必所深知。雖經伊保舉卓異。但其實在居官行事及歷年政蹟何如。并將來能勝藩臬與否。著傳諭詢問策撈令其據實具奏。尋奏查川東道積行自蒞任以來。一切奮勉辦事。明白詳慎。是以列入附薦卓異。臬司專理刑名。其人儘能勝任。但器局不能擴充。難勝藩司之任。報聞。○庚辰。

上詣

皇太后行宮問安。○奉

皇太后自避暑山莊迴鑾。○是日駐蹕喀喇河屯行宮。○辛巳。

孝敬憲皇后忌辰遣官祭

泰陵。○是日駐蹕常山峪行宮。○是月署兩江

總督鄂容安。江蘇巡撫莊有恭奏報據徐州

府詳報。八月二十二。三等日。大雨霑注。黃水

長至丈餘。銅蕭沛邳宿睢六州縣。從前已涸

者復淹。現飛飭蘇糧道督員相度疏洩。仍清

查飢民戶口。併案普賑。再查高寶興泰。四州

縣。因車邏二閘漫溢。積水難消。臣等公同商

酌。隨開挖十五處。因勢順導。高寶等處積水

漸涸。可以趕種二麥。得旨覽奏俱悉。○閩浙

總督喀爾吉善。福建巡撫陳宏謀奏臺灣府

屬前次樹旗陷害。如大浪泵之劉和林。大肚

社之趙悖。鳳山崎之胡通等。業經節次奏明

在案。詎八月內。復據鳳山縣拏獲阿猴溪樹

旗之張鳳喈到案。旗內開列李智等五十餘

名。并有李開花在內地。擇日攻廈門等語。隨

據該縣查訊。李智等俱係耕種良民。並無為

匪蹤迹。訊張鳳喈供因瞞墾荒地。被李智佃

戶張炘等阻止。挾讐誣陷屬實。臣等細覈臺

郡樹旗陷害四案內。鳳山崎大肚社二案。旗

內所開尚無悖逆情詞。臣等以絞候定擬。至大浪泵劉和林旗內有統領八社番民。以翦貪官等字。阿猴溪張鳳咭旗內有李開花協同攻打厦門字樣。尤屬狂悖。此二案臣等審擬確實。應照捏造悖謬言詞。匿名揭帖例。擬絞立決。一面飭令就臺郡正法。一面照例具題得旨。是應如此辦理者。○河東河道總督顧琮。河南巡撫蔣炳。奏報。八月二十一。二。三等日。雨水連綿。沁黃交漲。匯注陽武五堡民埝。窪處俱被漫淹。今五堡民埝三壩。臣蔣炳馳赴搶築。已於前月三十日斷流。本月初二初三等日。復遭淫雨。黃河又長三尺五寸。壩南之曹家莊灘地。又復漫水。直逼新築壩根。臣等親率道府各員。搶護平穩。其十三堡大隄漫口。臣等公同商酌。於隄外探量水淺處。督員圈築隄工。今於九月十二日堵閉合龍。現已加高培厚。各隄壩工程。亦經次第修復。又查五堡壩外。地勢極窪。灘水匯聚。現於壩

東開挖引渠一千餘丈。以分水勢。得旨覽奏俱悉。○署山東巡撫楊應琚奏報。武定府之雷化海豐利津等縣。及西縣等場。於八月二十三。四等日。連遭淫雨。又值東北風大作。以致該縣場沿海一帶潮水。漫入民竈。田穀被淹。兼有浸坍民舍。淹斃人口。又萊州府之昌邑縣。亦被潮水漫入。民房人口。間有損傷。臣即委員將被潮民竈地畝。確勘成災分數。照例辦理。其房舍人口被傷之處。先行撫綏。得旨。按例撫卹。毋致失所。○湖北巡撫恒文奏報。潛江。天門。沔陽。三州縣被災田地。經臣委員分路查勘。茲據各員勘報。潛江。天門。二縣因襄河秋汛漲溢。該處居民共淹斃八口。房屋共倒塌八十餘間。臣飛飭委員前往該二縣被災處所。動項分別撫卹。其沔陽州實未成災。無庸撫卹。得旨覽奏俱悉。○雲南布政使彭家屏奏。各省積貯倉穀。向有定額。其加貯各穀。例應裁減平糶。但滇省民俗淳樸。每

年至青黃不接時。悉向官借。及屆秋成。如數繳還。並不拖欠。實與別省不同。無須平糶。且查滇省跬步皆山。舟楫不通。背負維艱。設有緩急。顆粒均關實濟。今年歲屢豐。米價平賤。前所貯溢額十萬石之穀。糶之民間。未見其必需。而儲之官府。實堪為蓄備。請將此溢額之穀。仍額外存貯。以備有用。得旨。告之督撫。如所議行之。

大清高宗法天隆運至誠先覺體元立極敷文奮武孝慈神聖純皇帝實錄卷之四百四十七

大清高宗法天隆運至誠先覺體元立極敷文奮武孝慈神聖純皇帝實錄卷之四百四十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總校官經筵講官太子太傅文學殿大學士文淵閣領閣事稽察欽奉 上諭事件處管理刑部 都察院掌印

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉冬十月壬午朔享

實錄卷之四百四十八

太廟遣怡親王弘曉恭代行禮○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵○遣官祭

孝賢皇后陵。

端慧皇太子園寢○

上詣

皇太后行宮問安。○頒乾隆十九年時憲書。○

順天府行鄉飲酒禮。○諭。據策楞等奏。江南

河工費用浩繁。請酌撥銀三十萬兩。以濟急

需等語。該處漫口工程緊要。一切修防搶築。

三十萬恐不敷用。著於浙江藩庫撥銀一百

萬兩。協濟急工。雅爾哈善。速即委員解交策

實錄卷四四八

三

一

楞等備用。該部遵諭速行。○又諭。現在南河

工程緊要。已命舒赫德前往。與策楞。劉統勲

協同辦理。即將來尹繼善到江之後。策楞亦

不必急於赴粵。著伊等會同籌辦。俟徐州工

程就緒。舒赫德。劉統勲。可以回京時。策楞再

行起程。倘河工官員。因策楞已經調任。稍有

怠玩。不實力承辦者。著策楞據實嚴叅治罪。

其廣東應辦事務。班第現在署理。亦不得因

策楞調任。少存觀望之意。○諭軍機大臣等

策楞所奏黃河漫溢情形。看來現在高寶隄

工。既皆危險。東省山水復發。以致運河驟漲。

高堰石工。倘有疎虞。則災傷更不可問。朕心

極為焦勞。其所稱拆開清口東壩。及啟放高

郵南關壩。以洩水勢之處。悉可隨勢相度。權

宜辦理。但正溜已經全掣。究以亟開引河為

要。徐屬災民。嗷嗷待哺。或即令伊等開挖。以

寓以工代賑之意。可仍令策楞等遵照前旨。

一面酌量辦理。一面奏聞。併將日內水勢消

實錄卷四四八

三

一

長。河溜光景。及如何宣導情形。速行具奏。至

今年水患。固屬天災。亦由隄防不固。誤於高

斌。張師載二人之手。今閱策楞代奏之語。仍

屬含糊支飾。然則高斌等。竟終不自知其罪

重。尚謂朕處之過甚耶。即如銅山隄工漫決。

情由。據稱實係李煒。張賓。庸懦誤工。非高斌

等平時之姑息玩縱。何至於此。李煒等。實乃

孽由自作。其從前下埽搶護。所有工料。是否

全係實用。安可遽保。竟無侵冒。策楞等。仍當

據實嚴查。不可因其已經正法。置之不問也。至其餘查出虧空各員。雖有查明實在不能即行全數追賠者。亦當酌量分別嚴立限期。使各員上緊完繳。不致令帑項全付子虛。即著策楞富勒赫。以已意明切開諭各員。限以分數。屆期視其完納如何。再為奏請。若此中尚有不肖之員。明知必難完項。遂飲酒縱欲。不以完帑為急。則朕前已有旨。惟策楞是問。此處仍當告之尹繼善。可將此速行傳諭。伊等知之。○署江南河道總督策楞奏。嚴禁大工通融。據實報銷事宜。一。在工員弁兵丁。向給飯食銀兩。於工料內捏報。查文武佐雜汛弁。各有養廉俸銀。効力官員。例應自備資斧。俱不准支給飯銀。兵丁仍給一。守工官兵。並堆積物料。棚廠向無成數。易致浮銷。今酌定兵十名。棚一間。堆積物料。棚二百間。每間給搭蓋銀一兩。一。糴餉例價銀一分一釐。近因市價昂貴。俱行折收。應確查實價收買。一。稽

料。徐淮各工。本地採買。原無水脚。今分派各縣並鄰省採買。除本地仍照舊例外。餘應分別程途。量給脚價。一。堵閉口門。向用燈燭。多至數千兩。任意混冒。今酌定數目。專員稽查。下部知之。○是日。駐蹕兩間房行宮。○癸未。上詣

皇太后行宮問安。○諭。今年七月間。河湖盛漲。高寶一帶。下游民居被水。該撫莊有恭。即行咨商豫東兩楚。及江西浙江等省。撥協米石。以備賑卹。及朕降旨截漕。撥運川米。率已足用。不欲以一省被災。而致各省皆食貴米。故曹降旨。謂莊有恭所辦稍涉張皇。而莊有恭旋復奏稱。賑濟已足敷用。所有各省。俱可無庸撥協等語。蓋其始則未經審酌實在情形。其繼則又矯枉過正。所辦皆為未協。故於其奏到。即仍令江西湖北各撥米十萬石。運往應用。但銅山隄工。復又漫決。數邑被淹。災黎無所得食。朕心軫念。日夜焦勞。其令河南山

東。湖南仍照前議各撥米十萬石。浙江量撥米五萬石。速即委員運交該撫。以備賑濟之用。該部遵諭速行。○諭軍機大臣等。銅山縣黃河泛溢。掣入洪湖。雖前據策楞等奏稱。半出清口入河。半由范公隄東注。但湖河相滙。勢必漸緩。豈能疾趨暢洩。將見湖身停淤。日增漲漫。更易。其為下游淮揚一帶患者。奚可勝言。朕日夜焦勞。按圖籌畫。為今之計。惟有從斷流處所。去灣取直。開挖引河。使正溜由故道而東。庶奪溜之勢稍減。堵閉決口。亦易施功。不然。則專勤堵禦。恐徒妄糜工料。未必能當巨浪之衝擊也。昨已傳諭策楞等。令用以工代賑之法。以徐屬災民鳩工開挖。看來治河機要。實應如此。但日內溜勢究竟若何。可否望其旋轉。該處及豫東二省所購物料。能否源源接濟。足敷堵築隄工之用。朕心深為軫念。可再傳諭。令其廣為積料。相機疏導。併令將現在情形。及如何遵辦之處。速行奏

實錄卷四四八

六

一

聞。餘交舒赫德面傳諭旨。尋舒赫德策楞奏。日內溜勢。直下南趨。舊河淤墊。幾與水面相平。俟將來下埽。束水逼高。下注引河。始可望其旋轉。現派員將各工內。何處原有河身。何處須挖引河。據實確查。即令白鍾山親勘。相機開挖。所辦物料。俱係饒裕報聞。○又諭前莊有恭咨。豫東兩楚及江西浙江等省。撥米備賑。彼時原僅高寶一帶被水需用。其辦理之初。實屬張皇。是以降旨。令酌量果有不敷。再為奏請。乃伊覆奏。以現在截漕并撥運川米。已足敷用。毋庸更為協濟等語。又屬矯枉過正。朕已令江西湖北兩省。協撥米石運往矣。今銅山隄工。復又漫決。淮徐各屬。疊次被災甚重。賑濟需米必多。特諭令山東河南湖南各豫備米十萬石。浙江豫備米五萬石。運往備用。蓋其先不過下河被水。自當審酌情形。現今水勢盛漲。數邑嗷嗷。則雖該撫未經籌辦。亦當多為撥濟。先後辦理情節如此。

實錄卷四四八

七

已明降諭旨。朕於災黎。日夜焦勞。惟恐一夫失所。策楞等。可將此明白曉諭。使咸知朕意。再策楞等奏請徐州所屬長淮。大河。二衛。漕米五六萬石。截留備賑等語。徐屬疊被水災。長淮。大河。二衛地方。是否未經被淹。如該處漕米。不在應蠲數內。著即准其所請。截留備賑。該署河督等。查明酌量辦理。將此一併傳諭知之。○吏部議准。廣東巡撫蘇昌疏稱。廣州府新安縣捕巡兩員。管轄洋面。請各設巡船一。巡丁十二。從之。○兵部議覆。直隸總督方觀承奏稱。八溝塔子溝。二廳。向設弁兵。係河屯協兼轄。請改歸同知通判專管。統隸督標等語。查二廳地處邊疆。民人錯雜。該督請將原設弁兵。改歸該廳管轄。應如所請。再稱八溝所屬喀喇沁王旗下卧佛寺地方。應添設經制把總一員。馬兵五名。步兵十名。塔子溝所屬土默特教漢等旗。應添設外委一員。並分撥該廳管轄。亦應如所請。從之。○是日。

實錄卷四百四十八

八

一

駐蹕要亭行宮。○甲申。諭今年黃河盛漲。淮徐被災。雖於截漕之外。復降旨撥運各省米穀。以備賑卹。但災地既寬。且撥運之米。亦恐緩不濟急。著將江省本年漕糧。再截留二十萬石。俾災黎可以即資餬口。不致失所。該部遵諭速行。○又諭。據休致侍郎魏定國奏稱。伊子魏允迪。犯罪充徒。尚未限滿。懇恩釋放等語。魏允迪著加恩釋放。回籍侍養。○諭軍機大臣等。莊有恭奏稱。揚屬上下兩河積水。歲內難望涸復等語。現在徐淮漫決。水勢未平。隄防俱難堵閉。揚屬正受水之區。災黎生計。深繫朕懷。已明頒諭旨。將該撫從前咨借鄰省之米。令各該省運往備賑。并將江省漕糧。再行截留二十萬石。莊有恭可督率所屬。分別災地輕重。實力妥協辦理。此番積水一時未即消涸。明年春月播種。有無妨礙。倘於種藝有妨。則自今冬以至明年春夏為時甚久。當如何豫為籌畫。可傳諭莊有恭會同鄂

實錄卷四百四十八

九

容安。悉心商酌。速行奏聞。至摺內有米價未增之語。江南經如此異災。即有豐收州縣。見鄰郡災傷。亦必且居奇擡價。若果如所奏。則是不成災矣。莊有恭此奏。顯有粉飾。即如被水地方。朕聞所傷人口甚衆。何妨據實入告。乃前後所奏情形。俱稱並無傷損。殊未能體朕軫念災黎之意。可一併傳諭。令據實覆奏。尋鄂容安。莊有恭。覆奏。淮揚徐海等屬。被水成災。已督率所屬。分別妥辦。至災地情形。有地先涸而麥已種者。有水雖涸而仍泥濘者。有積水仍深。涸復難定者。除江寧。江浦。六合。係偏災賑卹外。所有最重次重各州縣。衛。明。歲。自春徂夏。民食必艱。查乾隆七年。十年。十一。十二。十五。十六。等年。淮。徐。被水各屬。均蒙加賑。則為明歲災黎之計。亦惟懇恩再沛深仁。又查乾隆七年。因次年四月逢閏。復加賑一月。明歲四月亦逢閏。可否加賑。並懇先頒諭旨遵辦。得旨。覽。早憶及此。已令軍機處記。

於明歲初正。降加賑之旨也。莊有恭又奏。前奏米價未增。實因上年揚屬豐登。今蘇。松。常。鎮等屬。貯看晚稻登場。舊穀既須出糶。而官又不採買。是以糧價不昂。至被災地方。前據高郵州報。傷損人口。業經據實奏聞。餘屬未報者。臣屢飭員弁嚴查。並親身確勘。實無損傷。得旨。覽。奏稍慰。○又諭。日。某。楞等摺。奏湖水情形。自九月二十六日後。天宇晴霽。氣候收斂。霖潦之象。全已消除。可望有減無增等語。朕心稍慰。其所稱現在幫築壩臺。催集物料。以便進埽堵築之處。看來堵閉決口。固屬緊要。但河水正溜直趨。力勢甚大。向有舊隄尚經衝決。今於洪流奔放之中。進埽堵禦。正恐未易奏功。揆厥情形。究不如開挖引河。去灣取直。務求深廣。俾河流漸引而東。復歸故道。即修築隄防。亦易為力。劉統勲。某。楞等身在隄工。相度形勢。其可開引河與否。自必稔悉。前經於圖內指畫。并降旨傳諭伊等。想此

時當已奉到。即著將可否開挖。并如何籌辦之處。速行覆奏。以慰朕懸注。再策楞等。綁縛高斌。張師載。又傳旨釋放後。高斌現在如何奮勉出力。該處百姓目覩此事。是否輿情。以為處置允協。事後公論若何。著策楞等訪察一併據實奏聞。尋舒赫德。策楞。覆奏。開挖引河。有裨堵築。現將河身北股一段。先行開挖。再差白鍾山查明應開處所。即行妥辦。高斌。張師載。蒙恩釋放後。分駐兩壩工旁。同將備人等。料理下埽壩臺。實屬知罪奮勉。事後公論。皆謂高斌一味姑息。張師載事事隨同。均應受此處分。輿情允服。報聞。○又諭。准徐被水。辦賑需米。朕疊經降旨。昨又撥運山東。河南。湖南。浙江。米三十五萬石。協濟備賑。今據伊等奏請截漕。其時原尚未奉到撥運之旨。但恐需米必多。仍著准其所請。截留二十萬石。如有不敷。著再行據實具奏。可傳諭知之。尋舒赫德。鄂容安等覆奏。江南被水成災。既

將本省漕糧。先後截留。又將河南。山東。湖廣。浙江。四川。江西。等省米。撥運協濟。共一百數十萬石。各處協撥備賑銀。又不下五百萬兩。自目前以及明春。銀米兼放。均屬有備。報聞。○是日駐蹕密雲縣行宮。○乙酉。諭曰。劉統勲。策楞。續查羅倫。黃煊。虧缺工帑。著革職。拏問。勒限一年完繳。蔣尚憲。陳大壯。王連璧。未完之項。雖係本年裁減。但本年未完。明歲即成舊欠。均屬浮銷。著革職。勒限一年半清完。如各員逾限不完。俱照陳克濬之例辦理。○以故翰林院五經博士程周錫子漢襲職。○是日駐蹕南石槽行宮。○丙戌。諭曰。著江南河道總督策楞摺奏。淮揚道吳嗣爵。現在丁憂。昨因河員諸弊叢生。是以特由運使調用。况目今河防緊要。一應堵閑漫口工程。稽覈工料。正資人料理。在任守制之例。朕從未開。但河工與地方官員不同。實不得已。吳嗣爵著給假兩個月治喪。其承辦諸務。交與胡文

伯暫行署理。吳嗣爵事畢。著即赴淮揚。照例在任守制。○諭軍機大臣等。策楞等奏清查南河工料。及善後事宜諸摺。河工積弊。相沿已久。自高斌等辦理不善。其弊益甚。如本年歲修搶修工料銀五十六萬。應覈減者。乃至八萬餘兩之多。與其事後減銷。使各員先已侵蝕花費。及至覈減一定。總不能按數完交。何如當估修之始。撙節支給。俟完工找領。此皆高斌不肯實心稽覈。是以誤縱於前。滋弊於後也。且准銷之項。四十餘萬。已不為少。而河從淮漲。何能救於萬一。河工弊竇。一至於此。苟非極力振刷。難望肅清。但現在漫決要工。尚未修復。下游災民。日在昏墊。尤當以搶築決口。開挖引河。導歸正溜。為目前急務。著將此旨傳問高斌等。伊等更有何說也。至於工程善後。尚未暇議。及俟尹繼善到日。再議定章程。從容整頓。計尹繼善到時。所有要工。諒已就緒。再將此議。公同熟商。次第查辦。庶

查察詳明。可以剔除諸弊。若目今即汲汲以善後為事。而黃河正溜。反不能令速歸故道。殊失緩急之宜。著傳諭策楞等。令將現在河溜情形。及如何疏導。速行詳悉覆奏。至羅倫黃煊。虧空。已有旨諭部。照陳克濬之例辦理。其蔣尚憲等。所虧銀兩。既係本年覈減之項。著勒限年半。較陳克濬等限期已寬。如仍不竭力完繳。則法在必行。定一體正法。再所有應查次年歲搶各工。雖係河督承辦之事。但策楞現駐銅山工次。可令舒赫德。劉統勲。酌量。或同尹繼善。或同富勒赫。遍歷勘估。將此一併傳諭舒赫德等知之。尋舒赫德策楞覆奏。南河積弊。當即遵旨辦理。現在張家馬路。已開挖引河疏導。蔣尚憲等。虧空銀兩。飭於限內完繳。次年歲搶各工。於十月初。十一月。初查估。屆期臣等酌定一人。同往妥辦。得旨覽奏俱悉。○是日。駐蹕盤山行宮。至庚寅。皆如之。○丁亥。

上詰

皇太后行宮問安。○諭曰。署步軍統領雅爾圖。因查辦劉裕泰。鑽營御史特吞公一案。奏稱京城富戶。因親及友。交結大員科道。遇事鑽謀。百弊叢生。請嗣後九卿有犯。科道糾參。科道有犯。都察院大臣查叅等語。豪富賁緣。倚勢不法。自當嚴加治罪。至大臣科道。廉隅不飭。亦惟有犯必懲耳。不必因偶有一二無恥之人。另頒禁令。且亦不過具文。其刑部現在審擬特吞公一案。平日交結者。多係京城富戶。然自因特吞公。卑污敗檢。招致往來。伊等無祿之人。犯止輕罪。傳訊明確。即應先行釋放。不必拖延羈禁。滋胥役需索。如有此等弊端。惟李元亮及承審諸員是問。至劉裕泰出身卑賤。違例捐官。鑽營多事。固孽由自作。其已分居之胞兄劉裕德。無庸旁及。所有財產。著即給還。再劉裕泰家內。查出借券及白契典雇家人。亦均免其查究。○戊子。

上御行殿。勾到江蘇江西安徽浙江湖廣情實罪犯。停決安徽斬犯一人。湖廣絞犯一人。餘九十一人予勾。○以詹事府詹事李清芳為內閣學士兼禮部侍郎。○以戶部侍郎阿里衮兼鑲黃旗滿洲副都統。右翼前鋒統領努三兼正白旗滿洲副都統。○以頭等侍衛福祿為正黃旗蒙古副都統。○調正紅旗滿洲副都統莽阿納為正紅旗蒙古副都統。○旌表守正被戕之廣西武宣縣民黃顯武女黃氏。○己丑。諭軍機大臣等。據策楞奏稱。洪澤湖滾壩水長至六尺一寸。工程危險。堪虞。星往高堰一帶。相機辦理等語。銅山南岸黃河漫決。未及施工。淮揚保障。全賴高堰石隄。現在隄工危險。朕心深為懸切。未知水勢日內如何。隄堰工程。是否足資防護。可速行奏聞。又據舒赫德等奏。漫口北岸新灘地形較高。且掘試三尺。即係淤泥。難以施工。俟冬令水消。酌看地勢。多挖引河。俾歸故道等語。前次圖中硃

筆所畫。乃就圖中形勢而言。初無成見。據奏北岸新灘地形。高於漫口。掘試難以施工。原不必過於拘泥。惟有詳細相度情形。或於開口上下附近。可以酌量施工之處。開挖引河。總以取直能順水性。俾河溜早歸故道為主。庶施工較易。不致久漫。洪湖淤沙日積。所奏冬令水落。可以竣工。此時水勢方張。自不得不為少待。但冬令必須奏績。運道方可無阻。下游漸獲寧居。是所望於在工諸臣竭力籌辦耳。前令舒赫德帶同白鍾山前往。原因白鍾山久任河工。河務是所深悉。現在銅山堵築大工。需人辦理。高斌、張師載獲罪之餘。益加昏憤。舒赫德、劉統勳、策楞於辦事為優。而練習河務。講明有素。白鍾山較為熟悉。是當用其所長。所有一切宣洩堵築機宜。舒赫德、劉統勳、策楞當鼓勵白鍾山。就其所見。妥酌熟籌。諸臣和衷商確。總期河歸正道。竣此大工。即將來尹繼善到工。亦當告知。令與白鍾

山協恭共濟。俾順軌有期。河流可復。不論誰之見解合宜。皆汝衆人之力。若此時尚存一彼此之見。則大非矣。至前降旨令舒赫德等順路查辦河東。今南河工程緊要。若又赴河東。未免顧此失彼。未合緩急之宜。應仍駐銅山。協同商辦。俟工程稍有就緒。於可去時再行起程。此時不必汲汲前往。一併傳諭知之。尋舒赫德、策楞奏堵築漫口。事關運道民生。一切疏導機宜。臣等與白鍾山妥商。並鼓勵在工官員兵役。奮辦以期迅速。奏績得旨。決口尚未有頭緒。朕懷安能釋耶。○庚寅。上御行殿。勾到直隸河南山東山西情實罪犯。停決山東斬犯一人。絞犯一人。河南絞犯一人。餘百人予勾。○諭河南陽武封邱延津及武陟等縣。疊經被水。民力拮据。所有陽武封邱延津三縣本年帶徵倉穀及應還籽種銀兩。并武陟縣民欠未完籽種銀穀俱著緩至明年麥後徵收。以紓民力。該撫仍加意撫綏。或冬春

之間。尚需接濟。著照例借給籽種口糧。務實力查辦。無致失所。該部即遵諭行。○又諭曰。總督喀爾吉善奏。譚行義現患風疾。難以速痊。又據譚行義自行具奏。請解任調理。譚行義久歷海疆。尚能黽勉出力。著准其回籍調理。加恩仍食原品俸。福建陸路提督員缺。著馬負書署理。吳進義著補授直隸古北口提督。所遺宣化鎮總兵員缺。著福祿補授。○又諭浙江杭州乍浦滿漢兵米。及織造匠役月

軍機處存

二

糧。向於地丁米折銀內動支。赴江南蘇常等處採買。今年淮揚被水成災。賑卹需米甚多。若仍照例購辦。恐於本地民食。益致匱乏。所有此項應需米石。著於浙江今歲漕糧內。截留五萬石。抵充兵匠口糧。該部即遵諭行。○諭軍機大臣等。各省由立決改監候。入於秋審情實未勾各犯。朕念其中尚有情節可寬者。既已緩死。而又屢次綁赴市曹。殊為可憫。特命大學士會同刑部。覆加詳勘。今據將兩

次未勾各犯內。滕昌榮等八名。仍入情實。候正興等十三名。改為緩決。分別請旨。今番勘定之案。允為刑名準式。著將原奏簡明案情。鈔寄各督撫。人命所係。誠不厭詳慎。但必實有可原。始貸其死。方不失弼教之意。向來督撫陋習。以死者不可復生。遂一任俗吏舞文。曲繪案情。多謂事由死者起釁。豫為兇徒設一開脫之地。明知法司必駁。亦寧可為失出之談。此皆婦人之仁。適以縱惡而不足示懲。

軍機處存

二

現在各案。經朕於勾到時。再三審量。復命大學士等。公同斟酌。實為無枉無縱。嗣後各督撫。必悉能實得其情。朕始可酌量予以矜宥。倘因有此番緩矜。又誤體朕意。一味仍前姑息。附會案情。轉致實在情節不明。則朕將求其生而不得。大非明慎用刑之本意矣。朕必於該督撫是問。可通行傳諭知之。○又諭曰。雅爾哈善覆奏地方雨水情形一摺。殊不明晰。各省雨暘。時繫朕心。雅爾哈善奉到詢問。

諭旨。即應將未經得雨之處。曾否得雨。未經
霑足者。曾否續沛甘霖。及中晚禾苗。有無妨
礙。作速馳奏。乃遲至九月十五日始行具奏。
猶稱各處災傷。道府尚未勘竣。豈所以體朕
軫念之意。且摺內既稱九月初旬。風日乾燥。
無異大暑。是富陽等邑。早象已成。又稱八月
下旬。九月初間。各屬陸續得雨。禾稼盈疇。人
民樂業。所奏前後互相矛盾。雅爾哈善或因
見江南現在湖河漲漫。而該省早乾。亦祇數
邑。恐涉張皇。遂有意支飾。不知一夫失所。朕
即怒然於懷。地方水旱。皆當加意撫綏。豈因
江省已被重災。他處遂可置之不問乎。該省
被旱州縣。計此時查勘已竣。可傳諭雅爾哈
善。令其督率所屬。實力撫卹。仍將實在情形。
及如何查辦。速行奏聞。不得再有絲毫粉飾。
至其所請截留漕糧。抵充兵米一摺。於調濟
之道。頗為合宜。已降旨准行。可一併傳諭知
之。○又諭。本日勾到河南情實人犯各案內。

因姦致死之案。較他省獨多。看來鄭衛淫風。
積習深重。於風俗人心。大有關係。所有各犯。
悉已予勾。但恐閭閻未能盡曉。惡習未能頓
除。著傳諭蔣炳。令明白剴切。遍行出示曉諭。
俾人人知法不可犯。漸致革心。以示維持風
化之道。○又諭曰。喀爾吉善等奏蘇祿國復
遣使臣。齎表文方物。來閩入貢。閱其咨。未情
詞狡譎等語。前因該國王遣使臣來閩。請示
貢期。儀文草率。是以令其齎回國書。如果誠
心向化。另行遣使來閩。今該國使臣復來。文
詞恭謹。輸誠效順之意已見。自應准其入貢。
至所奏願以疆土人民戶口編入圖籍之處。
該國遠隔重洋。原可無庸准其內附。但若因
此又行駁回。令其遠涉波濤。非國家柔遠之
道。此時且不必拒絕。第照例料理來京。俟嘮
獨萬喳喇到後。交與部臣定議。再降諭旨。○
辛卯。

上詣

皇太后行宮問安。○諭軍機大臣等。現在銅山決口。黃水入湖。策楞等在工辦理。尚未得有端緒。屢據伊等摺奏。該處水勢情形。雖可想見大概。然終屬紙上空談。其實在形勢。究竟如何。未能詳悉。朕心深為懸注。著劉統勲。於奉到此旨之日。即起程馳驛來京。面陳一切。再行前往。其現在事務。交與舒赫德。策楞。應奏聞者。隨時馳奏。應辦理者。速行辦理。亦不必待劉統勲得旨回南。庶不致誤事機也。○

實錄卷四百八

三

兵部議覆直隸馬蘭鎮總兵圖爾禪奏稱。左營設有遊擊守備二員。右營止設守備一員。營制未協。請改設都司等語。查該鎮中營遊擊。兼管左營。右營。向不兼轄。請照泰寧鎮標中營遊擊例。令其兼轄右營。不必改設。從之。○欽差尚書劉統勲奏。遵旨開挖引河。遣副將朱一智等。同本地河兵確查。並詢問高斌。均稱開河引溜。有益無損。已將河身北股開挖。至淮揚等處工程。俱札知舒赫德。策楞據

實陳奏。得旨覽奏俱悉。今命卿來京。以便面陳情形。較之來往問對。更為親切。可量力而來。亦不必疲於道路。至催積物料。亦屬要務。可告之舒赫德。策楞。又稱。俟北岸淤泥稍堅。當於圖內御筆指示處。對准漫口上下。大開引河。逼溜東趨。自易合龍。又批。此處恐有遷就遵旨之意。總之面陳指圖而言。朕即悉矣。朕從不執己見。汝等宜早知之。○旌表守正捐軀之河南西平縣民王建章妻于氏。○是日。駐蹕蟠龍山行宮。○壬辰。

實錄卷四百九

三

上詣

皇太后行宮問安。○諭曰。安徽巡撫衛哲治摺奏。本年九月。徐州隄工漫決。上江所屬宿州。靈璧。虹縣。泗州。盱眙。一帶地方。俱經被淹。現在積水不能宣洩。二麥難以播種等語。前此上江各處。僅報偏災。今宿靈虹。泗等七州縣。衛。被災甚重。不得仍照偏災之例辦理。著該督撫等。將被災戶口。詳悉查明。照淮徐例。銀

米兼賑所需銀兩。戶部前奏秋撥案內。雖撥四百餘萬。未經議及安徽。著另行速議酌撥。以備該處賑卹之用。其前撥安省協濟淮。徐備賑米石。本省既被重災。毋庸復撥。該督撫體朕如傷之意。無使一夫失所。該部遵諭速行。○是日。駐蹕三家店行宮。○癸巳。

上詣

皇太后行宮問安。○豁除山東壽光掖縣平度昌邑濰縣等五州縣。乾隆十六年分海潮衝塌地畝額賦。○署湖南巡撫范時綬疏報。鄆縣武陵會同。綏寧湘陰益陽等六縣。乾隆十四。五。六年分。首墾額外田四十三頃二十一畝有奇。○是日。駐蹕湯山行宮。○甲午。

上迴鑾奉

皇太后居暢春園。問

皇太后安。○詣

安佑宮行禮。○幸圓明園。○諭朕巡幸經過地方。所有道路橋梁。自應照例辦理。至道旁茶

棚一項。隨從官員。原無暇憩息。徒供僕隸人等蹂躪作踐。而地方官又多此一番豫備。甚屬無謂。嗣後俱著停止。○乙未。

上詣暢春園。問

皇太后安。○諭今年各省秋審人犯招冊。該督撫本擬緩決。經九卿改情實者。四川四案內。何文錦。雖係鬪毆。而連斃二命。陳剛。則以竊匪拒捕。截死協捕之人。陳文仲。則因爭贓連斃二命。沈學璽。則因誣姦故殺。皆情法所不

實錄卷四百四十八

三

容。乃該督僅擬緩決。何以懲兇頑而挽頹俗。黃廷桂素常辦事。不至如此寬縱。該省臬司周琬。由西曹外補。自應熟悉刑名。乃染外官陋習。一味姑息。俱著飭行。福建四案。陳質。陳茶。張抗。及施孔。施教。施錢。二案。聚眾械鬪。各斃一命。該撫止將蘇伯侯。施珍。以為首於上次擬入情實予勾。而陳茶等俱以為從。於此次仍擬緩決。此而獲宥。則鬪狠之風。如何可息。所辦殊為未協。前已降旨曉諭各督撫。嗣

後械鬪之案。必當一命一抵。庶不失辟以止
辟之義。至周魁盛一案。唆訟造謀。殘害番社。
拖累無辜。致斃二命。莊銓一案。雕刻假印。詭
收錢糧。其情罪均屬重大。何得僅擬緩決。浙
江三案。蔡太。砍人落水。淹斃人命。李五。行竊
拒捕。斃死事主。周茂瑞。恃強逞惡。手刃服兄。
江西三案。柴林。因砍柴被阻。立斃人命。胡申
九。胡茂八。聚眾械鬪。各斃一人。馬烏子。爭開
水洲。持械殺人。江蘇三案。盛元。挾忿故殺人。

實錄卷四十八

三十八

戴彭。恨伊嫂索欠。立加毆斃。朱松。拷打人致
死。以上各省所辦。以重罪擬緩。各至三四起。
經九卿覈實改正。朕詳閱無可寬宥。俱已予
勾。夫法寬則犯者愈衆。尤惡苟免。動相殘殺。
其何以乂安善類。督撫牧養斯民。臬司為刑
名總匯。豈得姑息邀譽。飭法市恩。所有承辦
案件之福建。江西。江蘇。浙江。各巡撫及臬司。
俱著飭行。○諭軍機大臣等。策楞富勒赫奏。
勘估南河歲搶各工。給發銀兩。採辦物料一

摺。歲搶工程。分別勘估。此常年照例辦理之
事。前經降旨。令舒赫德。劉統勳。會同尹繼善
或富勒赫。遍歷查勘。但此時銅山漫決。水勢
未平。高堰隄工。在在危險。所有工程。孰急於
此。目前光景。當併心積力。專以堵築漫口。保
護高堰。為第一要務。至所需物料。稱於附近
州縣及時採辦之處。現在淮揚一帶。積水汪
洋。蘆葦柳栽。淪胥巨浸。何從購覓。地方官辦
理不善。或竟將民間薪芻。強索充數。更多滋

實錄卷四十八

三十九

累。但物料不敷。則緩急何恃。應於無災處所。
廣為購備。庶料易集。而閭閻亦不至滋擾。務
須實領實辦。方為妥協。非可規規成例。依樣
行文可也。將此傳諭策楞等知之。○賑卹山
東海豐。利津。霑化。掖縣。昌邑。濰縣。等六縣。本
年被潮災民。並予緩徵。○蠲緩山西助馬口
外。本年被霜成災莊頭應交糧。○丙申。諭軍
機大臣等。尹繼善已授為江南河道總督。原
令侯永常到日赴江。現在下河漫水未消。銅

山決口未塞。全河經理。甚為緊要。可傳諭尹繼善。即由彼速行赴任。不必來京。如永常尚未到陝。其總督印務。即交鍾音暫行署理。○賜故湖北沔陽州知州禹殿鰲。山東新城縣知縣崔懋。范縣知縣後陞浙江巡撫黃秉中。山西河東道吳自肅等四人。入祀各該地方名宦祠。江蘇金壇縣翰林院檢討王步青。溧陽縣翰林院編修史鶴齡。詹事府詹事史夔。長洲縣天長縣教諭張映蓂等四人。入祀各該籍鄉賢祠。

實錄卷四四十八

三十

大清高宗法天隆運至誠先覺體元立極敷文奮武孝慈神聖純皇帝實錄卷之四百四十八

實錄卷四四十八

三十一

大清高宗法天隆運至誠先覺體元立極敷文奮武孝慈神聖純皇帝實錄卷之四百四十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正副旗滿洲都統世襲騎都尉軍功加七級隨帶加 級尋常加二級軍功紀錄一次臣履桂

總裁官經筵講官太子太傅文學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉十月丁酉

實錄卷之四百四十九

上御勤政殿聽政。○諭軍機大臣等。前據舒赫德策楞奏。前赴高堰閱勘保護。此時水勢有減無增。但銅山漫口未塞。一應堵築疏濬事宜。正在緊要。必得欽差大臣二人。在彼協同督率經理。併力專辦。劉統勲現令來京。往返亦須經月。其高寶興泰一路。因二閘不能即堵。積水汪洋。莫若先疏下游。使早涸一日。則居民早享一日之安。所有宣洩機宜。相度通江入海之路。自應及時籌畫。若俟銅山工竣

再行議及。勢必多遲時日。於農務民生。深有未便。舒赫德等勢難分身兼顧。鄂容安兩省事繁。莊有恭專力辦賑。不知舒赫德等能分身兼及否。朕為此事。日夜繫念。若另遣大臣前往。專司下游之事。在舒赫德等。自能深悉朕意。而在工人員。見另派欽差。轉似分舒赫德等之事權。不無觀望。亦於要工無益。可將此旨詢問舒赫德等。將應否另派大臣。或伊等此際。已如何籌及下游疏通之處。即行具

實錄卷之四百四十九

摺奏聞。○豁除雲南劍川州。乾隆十七年分。被水衝塌地畝額賦。○戊戌。諭據尹繼善奏。涼州鎮總兵員缺。為西陲重鎮。關係緊要。現在總兵徐啟新年已七旬。精力漸衰。恐滋貽誤。請勒令休致等語。徐啟新著休致。所遺員缺。著該督於通省總兵內。揀選調補。所遺缺著李中楷補授。○又諭。前因銅山隄工漫決。上江之宿靈虹泗。盱眙等屬。被水成災。已降旨令該督撫查明。照淮徐之例。銀米兼賑。但

恐賑卹所需米石。尚有不敷。應廣為籌備。著將徐州受兌之長淮大河。二衛漕糧五萬石。截留安省備賑。再前令江西撥往江蘇米十萬石。現在淮徐一帶截留運濟為數已多。著將此項。一併就近運往安徽。以備賑濟之用。該部遵諭速行。○諭軍機大臣等。衛哲治奏請加展勘災限期一摺。所見非是。本年安省被水成災。鳳潁等屬數十州縣。衛田廬淹沒。貧民餬口無資。嗷嗷待哺。全賴地方官確勘分數。加緊賑卹。庶可稍甦民困。若如所奏。俟銅邑決口堵築完工。下游水勢定日。再行起限勘報。豈此時竟可置之不辦耶。此不過為題本交部起見。試思限期之與賑務。孰輕孰重。而必拘拘於成例。將乏食貧民。流移轉壑。不知凡幾矣。著將此傳諭衛哲治知之。○又諭江南銅山縣應堵漫口工程。需豫東二省辦料接濟。曾降旨令蔣炳楊應琚親赴毗連江省之境。尅期辦運。今該處漫口需料孔急。

實錄卷四百四十九

三

刻不容緩。所有豫東二省物料。著再傳諭該撫等。令其上緊購辦。星速運往。以濟急需。其已經運往若干。現在陸續辦運若干。仍一面即行奏聞。○賑卹山東濰縣霪化二縣永阜永利官臺西縣富國五場潮災竈戶。○己亥上詣暢春園問。

皇太后安。○幸靜宜園。駐蹕。至辛丑皆如之。

諭曰。署兩廣總督班第。奏廣南韶連道現委署布政司事楊滙。玩忽性成。一切公務。任

實錄卷四百四十九

四

憑書役捺摺遲延。所辦諸務。類多偏執意見。怠惰因循。牢不可破等語。楊滙以罷廢道員。經朕棄瑕錄用。復由知府擢任監司。現攝藩篆。乃全無感激奮勉之意。一味怠惰因循。闕冗溺職。深負朕恩。僅予罷斥。不足蔽辜。著革職發往軍台。効力贖罪。○諭軍機大臣等。李永標奏管理粵海關監督期滿。請差員接管一摺。此本係循例具奏之事。而摺內乃稱得免隕越。仰荷成全之德。於生生世世等語。殊

屬紕繆。如李永標意在接管關務。姑飾詞以奏。固涉詐偽。即實欲更換。而似此言過其實。亦屬虛文。李永標係內務府世僕。於陳奏事件。不應為此浮偽之詞。著傳旨申飭。○又諭。據瑚寶奏稱。十月初二日。運河口頭草壩。衝損南岸。約有十丈。現經廳汛各員。搶修辦理。其下游惠濟通濟福興三閘。封閉三日。民船漕艘。俱未放行等語。南河漫決。朕心為之寢食不寧。所有草壩衝損之處。策楞等屢次摺

臣等謹將

奏

摺

內。俱未奏明。或因非緊要處所。抑或因現在辦理。俟辦竣入告耶。但惠濟等閘。為南北經行河道。其至封閉三日以後。曾否搶修完竣。漕艘民船。是否已無阻滯。傳諭舒赫德策楞等。令將現在情形。據實奏聞。再銅山決口。及高堰隄工。現在水勢情形若何。連日未據伊等奏報。並傳諭舒赫德等。令不時馳奏。以釋懸注。尋奏頭草壩衝損各工。臣等親勘。飭各廳汛員弁趕修。四五日即可完竣。惠濟等閘

前因下游運河東隄通鹽河涵洞。經急溜衝壞石工。難以修整。從外加築越壩堵閉。恐上游水溜衝激。故將三閘暫行關閉。嗣即照例啟放。現在公私船艘。並無阻滯。至銅山漫工。水勢已減四尺。東西兩壩水淺處。業修築四十餘丈。高堰隄工。湖水亦消數寸。各工平穩。得旨覽奏稍慰。目下急務。惟有堵築缺口。餘方可次第施行。爾等勉為之。○又諭。班第奏。廣南韶連道楊滙。怠玩偏執。一摺。已降

旨革職發往軍臺効力

地方司道大員。關冗

貽誤。該督據實糾劾。毫無瞻徇。甚得整飭吏治之道。但既經摺奏。又復具題。而摺內並未將另疏糾參之處。聲敘殊不明晰。可傳諭班第知之。○命禮部侍郎張泰開。在尚書房行走。○賑卹山東海豐縣。本年水災。竈戶。○蠲緩山西渾津黑河。本年旱災。莊頭應交糧。○庚子。諭前因江南揚徐被災各屬。銀米兼賑。恐照例價給銀。不敷糴食。加恩每石增給銀

二錢。今上江鳳泗各屬被災亦重。其折賑銀兩亦著照下江之例加給。俾災民買食寬裕。均霑實惠。該部遵諭速行。○又諭曰。白鍾山著照富勒赫之例。以按察使銜協辦南河事務。○諭軍機大臣等。永定河道白鍾山已降旨照富勒赫之例。協辦南河事務。白鍾山諳習河務。朕所稔知。前令舒赫德帶往江南時。原因將來豫東三省工程。尚有須清釐整頓之處。設河臣必應更換。一時難得其人。即可

平定縣志卷之七

三

令伊代任。是以未即降旨。且白鍾山若與富勒赫共事南河。尹繼善到江後。辦理一切事務。自必與白鍾山多所投合。如此則富勒赫將何以處之耶。若伊等或竟致意見參差。更於公事無益。但現據舒赫德等奏疏築事宜。及歲搶工程。勢必須分任專辦。是此時實資其用。而以直隸道員在彼任事。恐呼應不靈。業已暫照所請。將來如有應行酌量更調之處。朕臨時自有裁奪。可將此並行傳諭舒赫

平定縣志卷之七

下

德等知之。○又諭據貴州提督丁士傑奏稱。古州等處苗疆。經理各員半易生手。因苗人易於反側。恐生事端。專以姑息為能。苗人竟有官司傳喚不至。因公役使不從者。恐日漸效尤。養成驕抗。請飭苗疆文武。無事不得擾累。有犯法在必懲等語。丁士傑所奏亦是。著傳諭碩色定長轉飭文武各員。於所屬苗獮。當斟酌情事。隨宜彈壓。以靖邊徼。但苗性難馴。惟在地方官善為撫御。平時不以煩苛滋擾。有事不以姑息長奸。務於懷德之中。使知畏法。方為撫御得宜。若因一二細事。輒事深求。繩之過急。未免轉滋事端。亦非輯綏之道。著一併傳諭知之。○蠲緩山西清水河托克托城善岱歸化城等四廳。本年被旱災民額賦。○辛丑諭現在南河工程浩大。且時值冬令。所有在工効力之雜職千把等。晝夜巡防辛勤。可憫。著加恩賞給飯食銀兩。該督等酌量按月支給。俾得專意辦工。以期速竣。該部

導諭即行。○諭軍機大臣等。今歲淮揚一帶被水成災。而銅山縣黃河又復潰決。數邑被災。民居蕩析。非尋常偏災可比。普福安寧高恒身在江南。平時原不應干預地方事務。但目擊如此災傷。現在興舉大工。籌辦賑務。朕心日夜焦勞。伊等豈有不知。乃從無一字奏及。且河工潰決。災及民生。皆高斌貽誤所致。高恒自應更切悚懼。據實入告。乃亦置若罔聞。尤屬不合。著傳旨嚴行申飭。并令將現在河工水勢若何。及辦理賑務是否妥協之處。據實奏聞。尋普福安寧高恒先後覆奏。均稱銅山決口。經欽差大臣暨河臣督率在工員弁陸續進埽。水勢漸減。料物源源到工。足資接濟。賑務係督撫專委。按察使許松信總理。並飭道府各員督察給散。災黎安帖。俱報聞。○又諭。據衛哲治奏。災地飢民外出者。飭行所至州縣。照例留養。一俟春暖。資送回籍。俾令各安本業等語。此雖係循照從前辦賑舊

例。其實辦理流民之道。惟應各聽其便。蓋窮黎避災他出。或因有戚友可倚。或因鄰邑豐收。可以傭工餬口。若必令地方官逐一稽查。分佈安插。未免於伊等謀生之計。轉致拘礙。且不肖奸民。聞有留養之例。勢必乘機混冒。而愚民輕去其鄉者。亦恐因此益衆。是留養資送。不特有名無實。更易滋弊。匪曰愛之。其實害之。國家亦無此政體也。可傳諭衛哲治知之。○工部議准。兩江總督鄂容安奏請。以舊裁儀徵衛守備衙署。改為淮南儀所添設監掣廳衙署。從之。○以湖南巡撫楊錫紱為都察院左都御史。○調盛京刑部侍郎吳達善為兵部侍郎。盛京禮部侍郎蘇章阿為盛京刑部侍郎。以內閣學士世臣為盛京禮部侍郎。○調山西巡撫胡寶瑒為湖南巡撫。湖北巡撫恒文為山西巡撫。以陝西布政使張若震為湖北巡撫。山西按察使唐綏祖為陝西布政使。陝西漢興道蔣洲為山西按察使。

○壬寅

上詣暢春園問

皇太后安○迴圓明園○諭據舒赫德策楞奏

稱洪澤湖隄磚石各工坍卸三千餘丈必須

修理完整以資保障請簡派熟諳工程之大

臣酌帶工員速行估計分頭董理等語著侍

郎嵇璜德爾敏前往會同該總河督辦於六

部司員內揀選數員帶往差委俱著馳驛其

舒赫德從前帶往之司官等一併聽其通融

調度俾工程速竣以收捍衛之益○又諭曰

河東河道總督顧琮奏稱現住陽武催辦工

程東省運河大挑事宜請簡發巡漕御史早

赴濟寧督率查辦等語巡視山東漕務著伊

靈阿速行前赴○禮部議覆御史魏涵暉奏

稱本年順天鄉試鹵字號終三場者四名例

不取中雖有佳文未免棄置請將商竈籍入

學者一體編入北貝取中無庸另立字號應

如所請飭令該學政鹽運使遵辦從之○刑

部議覆四川按察使周琬奏稱軍流人犯向

例由犯事地方注定程途至遣地解知府衙

門分撥安置四川西陲番苗雜處與內地不

同如寧遠府會理州茂州及松潘衛打箭爐

等地各省解到烟瘴遣犯俱發該處未免歲

積人多若輩本非良善與苗民羣處恐滋事

端請嗣後發遣四川人犯統解總督衙門按

地通融派撥應如所請從之○癸卯諭曰嵇

璜德爾敏現在出差其戶部侍郎事務著裘

曰修署理工部侍郎事務於哈達哈未到部

之前著阿里衮暫行兼管○諭軍機大臣等

尹繼善等奏拏獲匪犯馬自道一案據稱咨

緝夥黨嚴訊確情究擬題報等語此等托名

馬朝柱書寫匿名字帖之案前經傳諭各省

督撫令其審訊明確即予杖斃不必題達今

此案據供現有同謀為匪之人及聞查拏復

通信竄匿或黨羽尚多實有圖謀搶劫情罪

即應盡法處治以儆奸民著傳諭永常鍾音

令其查拏嚴審如係恐嚇鄉愚強劫為匪律應正法者即行正法如審無此等情節即遵照前旨杖斃完結不可因有前旨使克惡之徒得以漏網○又諭曰舒赫德等奏湖水情形一摺看來高堰各工已俱危險經舒赫德等晝夜搶護雖間有汕刷然大勢已可無虞即屬萬幸惟閱圖內所繪情形似於蔣家閘及束水隄等處若早求一宣洩之方或積水尚可稍減不致衝刷隄身如此之甚蓋洪河未復故道則漫溢之水必當使有所歸宿若更壅阻則潰決滋甚矣其石工衝汕之處應於挑伏大汛之前急為修理完固已如所請著嵇璜德爾敏揀派司官帶同馳驛前往督辦此時已經發帑購辦石料務先期催集俟欽差到日即可星速鳩工早收捍禦之益○又諭朕因知府缺出一時不得其人特命各督撫保舉堪任人員以備簡用必得才品出眾之員方可列名薦贖今日引見之浙江知

縣瞿天翱一員看其人甚平常難勝知府之任其曾曰理等三員亦非出色者該督等濫舉塞責殊屬不合著傳旨申飭○戶部奏江蘇巡撫莊有恭疏請本年江南被水災重之阜寧清河桃源安東高郵寶應甘泉興化銅山邳州宿遷睢寧海州沐陽并鎮江淮安大河揚州徐州等衛共十九州縣衛稍次之山陽鹽城泰州沛縣蕭縣礪山贛榆等七州縣本年災田應徵地丁銀米應按分蠲免蠲剩銀米按被災輕重分三年二年帶徵至熟田應徵漕糧漕項俱請緩至來年麥熟後徵收舊欠漕糧漕項緩至明冬帶辦其乾隆十年前各款錢糧應請豁免被災較輕之上元江寧江浦六合江都等五縣熟田應徵各項照常徵收災田應徵漕項銀兩請緩至來年麥熟後徵輸漕糧緩至明冬帶辦得旨依議速行其被災之阜寧等三十一州縣衛所有本年應徵及舊欠漕糧漕項俱著照該撫所請

分別蠲免緩徵。甲辰諭銅山河隄漫決。東注洪湖。不特靈虹雕宿等州縣俱遭淹浸。而洪河受漲。高堰下游束水隄亦被衝決。決口一日不塞。則湖水一日不減。下游東隄二閘不能堵築。且洪湖日益淤澱。每歲盛漲。皆屬可虞。是堵禦銅山決口。為目前第一要務。舒赫德劉統勳策楞等。現在工次。所有籌畫疏濬堵閉之處。即係伊等與該總河專責。豫東兩省物料。現已陸續趲運。應乘此冬令水消。及時施工。務於桃汛以前。刻期完竣。使河湖各循故道。安瀾順軌。以副委任。若在工人員稍有怠玩疎虞。朕必於舒赫德是問。其工次員弁夫役。奔走効力。晝夜勤勞。露立風霜。朕心深為軫念。著撥河庫銀二萬兩。交舒赫德等視其出力等次。隨時獎勵犒賞。以示鼓舞。該部即遵諭行。○諭軍機大臣等。陳世倌奏黃河入海。向祇六套六巨。今增至十套十巨。海口壅塞等語。此亦不過撫拾浮言。究非確

論著。交與舒赫德等。將何時增漲。於現在河流入海。有無阻遏。及應如何設法疏濬之處。俟工竣後。一併勘明議奏。○軍機大臣等議。覆戶部侍郎嵇璜條奏河工事宜。一。歸仁隄臨河石工宜修。查歸仁隄分隔睢湖諸水。設開啟閉。今黃水漫漲入湖。自多塌卸。但黃河未歸正溜。應否施工。請交在工大臣查勘。一。黃河兩岸閘壩宜修。查設立閘壩。原以分流減水。保固隄工。應交在工大臣相度興修。一。下河宜設專員經理。查下河一帶。黃運江防。向係淮揚道管理。今該道既難兼顧。或另添道員。或就近令兩淮運使兼管。請交在工大臣定議。一。堆積土牛之制宜嚴。查河工向令夫役積土備用。原期搶險有資。應交河臣嚴飭各廳汛員弁督率夫役。隨時畚鍤。不得於近隄處取土。至該侍郎所稱五壩蓄洩。及南關等壩蓄洩之處。應交欽差大臣相度情形。悉心經理得旨。依議。高斌久任南河總督。惟

事姑容。受工員欺蔽。虧帑誤工。情狀顯著。經朕特派劉統勲策楞前往清查。而工員等不思侵冒之當釐。轉因畏疑而解體。迨二閘疎虞。欽差同總河到工督率堵禦。而顧此失彼。將銅山兵役徹往。併力搶修。張家馬路隄工。竟諉之衰老無能之同知守備。溜勢南徙。尚坐視不報。以致潰敗不救。靈虹睢宿一帶。胥受其災。而二閘決口。亦不可復塞。河徙雖屬天災。而人事實相湊合。朕之重治高斌之罪者在此。語云。耕當問奴。織當問婢。高斌在河工二十年。專以工務為事。習見熟聞。孰得孰失。其所見究與按圖懸揣者迥異。大學士等雖按形勢定議。但未身歷其境。其於現在情形。是否允協。尚宜再加詳酌。著將此摺交舒赫德等與尹繼善高斌等逐條細閱。其是否悉合機宜。及此外有無未盡。一一指陳。高斌身獲重罪。凡從前經理不善之處。寧無追悔。即應就此改圖。豈容固執已見。如自謂已經

平定回疆方略卷一百一十七

七

誤工。不過含糊認罪。不能細心參酌。冀贖前愆。則伊從前居心。真不可問。且益滋罪戾。無可復追矣。尹繼善夙任南河。胸中自有所見。且即伊本任之責。務各屏去成見。妥協詳酌。使黃流淮瀆。從此順軌安瀾。以慰朕懷。總之治河貴得機要。其調度祇在瞬息之頃。即如車邏等壩。原以減洩運河漲水。而高斌當乾隆十一十二等年。水盛之時。盡力謹守。僥倖無事。下游竟獲豐收。遂固執以為已有成效。竟可不開。而卒以釀成壅潰之患。而數年所得。實不償此番所失。是高斌既誤於前。若尹繼善將來鑒於前轍。矯枉過正。遂以洩水保工為上策。而安心以高寶為壑。則早放車邏等壩。可以年年無事。而令下游歲歲被災。朕必將重治其罪。又如浮言咸以開毛城舖為高斌之罪。不知毛城舖乃自高斌而開。昨劉統勲面奏。謂此高斌數年來不白之冤。益可見浮言之不足信。惟身歷者能知之也。今又

平定回疆方略卷一百一十七

八

有稱黃河減水諸閘應修是遵開毛城鋪之說耳而不知溜勢既分恐無以刷沙將又有議其後者從來為政不在多言朕因河患宵旰憂勤日召在廷諸臣詳悉講求其欲復黃河故道使北流者既迂遠難行至謂蓄洩宜勤閘壩宜固隄埝宜增海口宜濬則河員足任。徒事撝拾空言無難編成巨帙昔人云議禮如聚訟議河者亦如聚訟。嘵嘵不已甚無取焉此後仍有以治河奏者必將原摺發還。

○旌表守正捐軀之貴州貴定縣民阮洪選妻吳氏。○乙巳。

上詣暢春園問

皇太后安。○還宮。○諭軍機大臣等據班第等奏審擬李維茂匿名揭帖一摺此案前據該撫奏到即經降旨傳諭令將該犯立予杖斃不必題達想該督撫尚未奉到耳今摺內審訊情節亦不過託名誣陷與馬朝柱逆案無涉著仍遵照前旨辦理不必律擬題達著傳

諭知之。○賑卹安徽太湖宿松歙縣太平貴池東流壽州宿州鳳陽臨淮懷遠虹縣靈璧鳳臺阜陽潁上霍邱亳州泗州盱眙天長五河滁州全椒和州來安并長淮宿州泗州滁州等衛三十州縣衛。本年被水災民。○廣東巡撫蘇昌疏報乾隆十七年分吳川海康徐聞欽州瓊山等五州縣墾復額內田一十一頃六十四畝有奇保昌四會合浦文昌等四縣墾復額內田二十二頃九十畝有奇新會惠來陽江恩平遂溪等五縣首墾額外田二十四頃六十五畝有奇。○丙午諭據碩色愛必達奏稱雲南開化鎮總兵張凌霞自到任以來不知夷疆以鎮靜綏輯為主越俎民事縱容所屬弁員濫差滋擾於一切營伍事宜紛紜變更議論舉動俱甚荒唐乖戾等語。各省督撫以總兵為大員率不經意查察碩色此奏甚是張凌霞既不勝總兵之任著革去總兵在藍翎侍衛上行走其雲南開化鎮總

兵員缺著呂九如調補。所遺員缺著傅魁補授。○賜故奉恩輔國公興寧諡勤僖。○丁未上御乾清門聽政。詣暢春園問。

皇太后安。○幸圓明園。○諭軍機大臣等前因銅山堵築大工。急需物料。飭令豫東二省撫臣親往督率。速為購辦。復經降旨令將採辦若干。運往若干之處。即行奏聞。嗣據楊應琚兩次奏報其運往數目亦已奏明。而蔣炳僅奏報起程。以後未見續奏。豫省至徐由黃河順流而下。運往較易。乃奏報遲遲。看來豫省辦理不及東省之迅速。著傳諭該撫令其將現在如何辦理及採運數目。即速具奏。尋奏督辦物料。臣住省東水次。已辦運糶一百九十餘萬觔。稽一百八十餘萬觔。現又辦稽二千五百萬觔。內運到工所六百七十餘萬觔。運到江南礪山水次五百餘萬觔。餘俱嚴催督運。至需用樁木。豫省分辦五百根。現在江省委員未到。亦飭紮筏徑送工所。得旨是以

後勉力督催速辦。毋自取咎。○又諭臺灣兵丁胡勝喜行刺該鎮陳林每一案。前經降旨該督從嚴辦理。乃歷時已久。未據奏覆。著傳旨詢問。令其將現在審擬情由。並陳林每有無審實罪款。速行詳悉奏聞。○以翰林院侍讀學士程景伊為詹事府詹事。○以都察院左副都御史麒麟保為正黃旗蒙古副都統。仍兼都察院左副都御史。○調蒙古正紅旗副都統介福為滿洲正紅旗副都統。以頭等侍衛鄂實為蒙古正紅旗副都統。○戊申。諭軍機大臣等前因舒赫德等奏請欽派大員督辦高家堰石工。已降旨令嵇璜德爾敏前往。今據舒赫德等復奏請再遣大臣二人。一會同總督鹽政專司下游疏濬之事。一會同富勒赫覈估歲搶修各工。現在南河已有舒赫德等在彼經理。今又派嵇璜等二員。且此時物料尚未齊備。若再復行派遣恐人數太多。事權不一。轉致掣肘。可即令嵇璜會辦疏

濬諸事。德爾敏會估歲搶修工程。即將來石工興舉之後。原可令一人在工。一人往來督率。亦可輪流辦理。業已傳知嵇璜等。并寄諭舒赫德等知之。○軍機大臣議。覆京城八旗增添馬甲一千名。歸健銳營居住操演。查健銳營額兵。俱係前鋒增添馬甲。請均作為委前鋒。酌給烏鎗五百桿。火藥等項。照例由工部支領。每二人合給馬一匹。共需馬五百匹。請由京城八旗揀養官馬內撥給。每旗增添

實錄卷四百四十九

二十二

委前鋒參領各二員。委前鋒校各五員。管束即由健銳營揀選補放。再健銳營既經添兵。靜宜園官兵值班等差。應請徹停。查從前官兵俱例給移居銀兩。現議添之委前鋒參領。委前鋒校。俱由本營揀放。均可無庸賞給。至新添之馬甲一千名。其移居銀兩。請照前鋒護軍十兩之例稍減。各與六兩。從之。○免浙江錢清場。西興之永盈園。乾隆十七年被潮坍沒。竈地額賦。○已酉諭。向來外省辦理刑

名。每存姑息之見。即有關倫常。亦多遷就。謂釁由死者。率作兇徒。以無心架格。或兩相湊合。用力過猛。此婦寺之仁。以救人一命為造福。究之輾轉達部。仍歸按律定擬。空留此不近理之談。而實乖弼教之義。甚無謂也。近雖降旨訓飭。至再至三。而積習牢不可破。即如山西省陸三傑。因授分田產。蕩賣無餘。乘父病垂危。仍索分田地。伊叔陸應唐忿責。用小刀扎傷陸三傑額顙。陸三傑奪刀回扎。致斃

實錄卷四百四十九

二十二

胞叔陸應唐。悖倫滅理。莫此為甚。乃該撫本內所叙案情。則云陸三傑用刀恐嚇。陸應唐搶刀勢猛。以致扎傷等語。是陸應唐反為應死之人矣。似此滅絕倫紀之事。人人所共憤。而仍為委曲捏叙情節。承辦之府縣臬司。以至該撫。亦豈不知陸三傑罪在不宥。而習慣自然。以書吏取供故套為當然。不知改正。則實有可矜情節者。將致魚目不明矣。著嚴飭行。嗣後如仍有似此者。刑部即聲明駁正。將

承審各官。從重議處。以正倫理。申國憲。○甘肅涼州將軍七十五等奏。西寧關外。伊克察達木。德布特爾。卡座。向由京派員巡察。自乾隆二年。莊浪添設滿兵駐防。經軍機處議裁京員。就近派委莊浪官四員。兵二十名。巡察查巡卡事關緊要。須多派幹練員弁防守。請於明歲添派涼州官二員。兵十名。與莊浪官弁一體巡察。得旨。如所請行。○以太僕寺卿陳兆崙。為續文獻通考館副總裁。○賑卹湖北潛江。沔陽。天門。三州縣衛。本年被水災民。○庚戌。

上詣暢春園。問

皇太后安。○諭。據舒赫德奏。上下江辦理賑務。微有互異。下江按月照三十日全給。上江則遇間曠扣除等語。夫按日給賑。例應扣除間曠。是上江合例而下江非。但江南此次被災甚重。非尋常偏災可比。朕心為之宵旰靡寧。其上江賑銀。著照下江所辦。按月全給。不必

扣除間曠。以示優恤。嗣後如遇有偏災。仍照定例辦理。該部即遵諭行。○蠲緩浙江錢塘富陽。臨安。新城。於潛。象山。諸暨。新昌。嵊縣。臨海。寧海。天台。仙居。東陽。永康。西安。江山。桐廬。永嘉。樂清。瑞安。平陽。玉環。杭州。台州。衢州。嚴州。玉泉。二十八州縣廳衛所。本年被旱災民額賦。並借給籽種。○予故湖北荊州左翼副都統圖仲。半葬如例。○辛亥。

上詣

安佑宮行禮。○是月。欽差尚書舒赫德奏。查勘運河淮揚一路。水勢甚大。村落均在巨浸。田畝未盡涸出。運河隄岸。磚石各工。風浪刷擊。塌陷殘缺者甚多。自高郵州起。迤南數十里。湖河相連。將來黃河漫口堵築後。急須修整。報聞。○又奏。沿途查看災民。高寶一帶。水陸通區。兼今歲湖廣。江西豐收。商販雲集。米價平減。但漫田未涸。春麥既難播種。商販米。冬三月勢亦糶完。明春價必騰貴。臣意將高寶

等處。冬月以銀折賑。截漕米石留備來年青黃不接時開放。下游之興化、泰州、阜寧、鹽城等處被災實重。舟販亦艱。請自十一月起。通以米散給。如截漕之米未辦。即以該州縣並鄰近州縣倉穀先賑。統於漕米內補額。再淹塌房屋。例賞搭蓋銀兩。現在高阜處搭棚棲止者甚多。州縣官以房基積水未涸。將此項緩支。但轉瞬嚴寒。應飭及早分散。至淮屬之山、鹽、徐屬之睢、邳、宿遷等邑。續被淹浸。該州縣多以俟確查實數申報。辦理殊緩。通飭一面查勘。一面撫卹。得旨覽。但廿一廿二日連發兩摺。雖急於賑務之意。却未計及朕之憂惕耳。兩摺原一齊到。開看後。心始稍釋也。直隸古北口提督吳進義奏。烏鎗為軍器。利用先資。進步連環。右出左進。始能捷便。今古北營鎗兵俱由左手出。右手進。臣前在宣化較驗。原係右出左進。兩標既不合。一則通省參差可知。請通飭遵行。得旨與方觀承商酌。

實錄卷四四九

三

徐徐整頓。畫一可也。○安徽巡撫衛哲治奏。鳳潁等屬九月內陰雨連綿。淮並漲兼以全河之水匯入。洪澤湖濱河州縣衛被淹愈甚。現親身查勘。並飭司道府州縣分路撫綏。得旨是。督率屬員極力妥協撫卹。毋致災黎失所。○江西按察使范廷楷奏。剪邊制錢向例分別十千上下定擬。竊思十千以下或因發覺日早。為數無多。或因問官草率。任其狡飾。法輕易犯。不足杜奸。臣現審崇仁縣鄧集風私鑄一案。究出剪邊情由。將該犯即照私銷例定擬。並請勅部通行各省照辦。得旨是。○閩浙總督喀爾吉善福建巡撫陳宏謀奏。彰化縣民趙悻。樹旗陷害趙新一案。據臺灣府知府曾曰瑛稟稱。趙悻趙新皆無賴棍徒。趙新強橫專利。趙悻屢被欺凌。密商同居王興。樹旗洩忿。經鄉保稟報查緝。畏懼自首。查此案樹旗陷害。書寫行惡等字樣。刁風惡習。實難寬縱。未便照自首減等辦理。得旨速行。

實錄卷四四九

三

嚴審定擬日久正法人不知畏何以懲刁風
○署山東巡撫楊應琚奏濟寧魚臺滕嶧等
州縣窪地積水與河湖相接宣洩無由冬春
二麥恐難播種定例雖無不能種麥作何拯
濟之條但災民粒食所關應及早設法補救
現飭地方官勉力疏消倘今冬不能涸出臨
時再行奏辦得旨所見甚是○又奏遵旨親
赴毗連江省之處購辦銅山工料林稻已派
曹州府屬照漕規例動項採買榮勛派兗州
濟寧東昌所屬動項購辦現接江南委員解
銀已令各屬歸還原款俱飭由曹單水口運
往得旨總不必拘於常例速行辦理以濟要
工似此奏猶覺迂緩也若致誤事惟汝是問
○陝西巡撫鍾音奏上年查出商囤麥石奏
明於西安同州鳳翔三府屬收買分撥歉收
之區平糶運貯省城者借給九營兵照原本
扣餉歸款茲各屬貯麥糶完除歸還麥本並
運費外尚有盈餘銀兩因思兵丁借項在散

實錄卷四百四十九

三十九

給時青黃不接故照成本定價今市糧已賤
動款復清請將兵丁應扣原價酌量減免報
聞○四川總督黃廷桂具奏謝恩並陳整理
地方情形請旨遵行得旨此係汝駕輕就熟
之處至於整頓實所優為不煩朕諭也

實錄卷四百四十九

三十九

大清高宗法天隆運至誠先覺體元立極敷文
奮武孝慈神聖純皇帝實錄卷之四百四十九

大清高宗法天隆運至誠先覺體元立極敷文奮武孝慈神聖純皇帝實錄卷之四百五十

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子太保工部尚書紀錄六次臣曹振鏞等奉

教修

乾隆十八年癸酉十一月壬子朔禮部奏本

月二十五日

皇太后聖壽節適逢冬至齋戒日期請於二十

三日行慶賀禮得旨是照例行禮奉

皇太后懿旨今年停止筵宴○諭會典館進呈

纂修詹事府會典則例多沿襲舊文未加更

定詹事府乃東宮僚佐儲貳未建其官原可

不設第以翰林叙進之階姑留以備詞臣遷

轉地耳古稱建儲為國本大計朕酌古準今

深知於理勢有所難行載在史冊者姑置弗

論即如理密親王當

皇祖聖祖仁皇帝時

聖慈鍾愛初無間言嗣以東宮既建狎昵匪人

陷於失德再致廢黜其先所置宮僚何嘗非

一時之選如湯斌即所稱當代醇儒然亦何

裨萬一蓋別立官府則僚屬多人賢否叅雜

斷難保其不滋事端夫以

聖祖之包含宏大尚迫於

宗社之重必不可容可見建儲一事亦如封建

井田固不可行之近世也是以

皇考鑒於前事默定

宸衷不事建儲分府惟擇老成宿望大臣如朱

軾鄂爾泰傳敏張廷玉蔡世遠等勸讀內廷

聖謨深遠

慈覆如天朕繼承以來恪遵

家法令皇子等讀書內廷亦惟慎簡師傅俾之

薰陶德性讀習經書日有程課其視出閣就

傳有名無實者相去為何如耶要之豫教固

所當重。實亦存乎其人。此則

蒼穹之數祐。

宗社之貽庥。景運靈長。有非人力所致者矣。會典載春秋進講。虛文縟節。甚為無謂。又如皇太子賀筵。論體制當由內閣撰擬。乃由詹事府頒發。此亦前明坊局閒曹。借以招事示權已耳。果爾。則賀

皇太后

皇后表箋。亦當由內務府頒發耶。此皆沿襲

之謬。著該總裁官改正進呈。○又諭元昊長至。萬壽三大節。外省文員臬司以上。武員副將以上。例得隨進表箋稱賀。朕思督撫提鎮封疆大員。事皆專達。表賀為宜。藩臬副將既不得專達章疏。其由督撫附進表箋。亦可不。且不過由部送閣存貯。並不呈覽。此亦向來虛文陋習。甚無取焉。其概行停止。○軍機大臣議覆甘肅提督豆斌奏稱。牧廠窄狹。請酌撥孳生一摺。查甘涼西肅。乾隆元年。議各

設馬一千二百匹。擇廠牧放。三年均齊一次。

以備撥補營馬之用。甘州歲久蓄息。除撥補營缺。現存馬八千九百餘匹。自應設法牧養。今該提督既稱札商陝甘督臣。於延綏寧夏固原河州等鎮。飭查草廠。撥分牧放。俟三年均齊。仍照原議考成。應如所請。行令督臣遵辦。從之。○癸丑。定丞倅州縣閱俸十年引見。例。諭前令各省督撫。保舉堪勝知府人員。送部引見。其劣者即行駁回。優者已不次擢用。至勅部記名者。不過備數充用。各省府佐州縣。千有餘員。其中悃愾無華者。不見知於上司。或有十年不調之數。而庸才幸膺簡缺。無他劣蹟。督撫亦未免苟且姑容。殊非澄叙官方之道。其各省同知通判及知州知縣內。有本任歷俸十年以上者。該部查明行文該督撫。出具考語。陸續送部引見。著為例。○又諭各省六年俸滿千總。經保送引見。分發本省隣省以守備題補。及發回本省隨營候推之。

員逐年積累。人數甚夥。雖有三年再加甄別之例。率皆視為具文。多有以守候壅滯為言者。然使但嚴其甄別。而不稍為疏通。亦無以示鼓勵。嗣後候題候推人員。屆三年甄別之期。該督撫提鎮等。各宜實力奉行。不得姑息濫竽。其有實在行走勤勞。人材出眾者。准其再行保舉引見。交該部即用。若原應題補。而非實在出色。年力又未至衰老者。即咨部降為候推。至候推人員內。有應拔置題補者。亦准其一體保送引見。其不在保送之列。而人材尚屬可留者。仍令隨營候推。哀庸懶惰者。即行咨部休致。如此庶候缺各弁。均得及時効力。營伍可收實用。而需次亦不致久壅矣。其應如何酌定班次。分缺錄用之處。著該部定議具奏。尋議。嗣後保舉即用之千總。引見奉旨後。毋庸另立班次。應歸單月後輪用一人。至各省候推千總。既可拔置題補。則候推人員。將來漸自疏通。所有原應題補降為候

推者。亦毋庸另立班次。請即歸候推千總。應用班內一體較其奉旨俸滿日期選用。從之。○諭軍機大臣等。御史魏涵暉條陳河工効力人員。應照各省之例。揀選引見發往。所奏甚是。南河効力定額百二十員。其一切工程。則各有廳員專管。即分防大汛。及遇缺委署。間亦需人。祇須足敷差遣而已。何必如許之多。此等人員到工之後。自備資斧。無所獲利。勢必競事欺朦。指平為險。惟冀添築工程。恣其浮冒。是誤工虧帑。皆若輩為之。歷來河臣。徇於陋習。不察其弊。殊不思各省州縣。刑名錢穀。頭緒紛繁。何嘗不一人兼理。未見於正印之外。概委多人。紛紛協辦也。嗣後河工亦應照各省之例。按其額設員缺。陸續酌量奏請發往。以備委署。或有緊要工程。萬難兼顧。必資分辦者。亦應限以數目。不得仍前濫請。徒使有名無實。著傳諭舒赫德。劉統勲。策楞。尹繼善。令其詳悉酌議奏聞。尋奏南河効力

人員向係任意收錄雖經減定一百二十人仍屬過多查估驗工程物料應河臣暨該管道員親身督率修防工程係廳員專責均不應委之効力人員現在河工額設同知通判及巡檢閘官共九十五員効力人員差遣備用應請以六十人為率如遇緊要工程數不敷用再請揀發但効力廳員必明白幹練方收實用嗣後需用同知通判應飭部於候補及曾任河員內請旨揀發下部議尋吏部議

河工効力定額江南一百二十員直隸七十員河東六十員人數過多應如所奏江南定以六十員直隸裁為三十五員河東三十員於候補及曾任河員內揀發從之○甲寅遣官祭先醫之神○河南巡撫蔣炳奏密縣禁卒陳得魁受賄縱絞犯申玠越獄審明照律擬絞監候仍照例候逃囚獲日審豁得旨三法司覈擬具奏禁卒典守監獄乃於斬絞重犯受財故縱此非尋常因事受財者可比自應

按照本律與囚同罪但則例又載有擬絞緩決候逃囚得獲審豁之條未免法輕易犯嗣後監犯脫逃該督撫審出禁卒得賄情節即視其所縱囚犯之罪全律科斷如本犯應入秋審情實者亦入情實應絞決者亦擬絞決應斬決以上者亦即擬以斬決著為例并通行傳諭典獄官役知之○乙卯

上詣
大高殿。

壽皇殿行禮○奉

皇太后還宮問

皇太后安○還宮○諭朕每歲親耕耤田而

先農壇年久未加崇飾不足稱朕祇肅明禋之意今

兩郊大工告竣應將

先農壇宇修繕鼎新即令原督工大員等嚴謹將事其外墻隙地老圃於彼灌園殊為衰瀆理應多植松柏榆槐俾成陰鬱翠庶足以

昭虔妥靈。著該部會同該衙門。查明繪圖具奏。○軍機大臣議覆。八旗世職獲罪。恩詔不赦者。應令別支承襲。三世後缺出。請於伊後裔擇聰秀者。列名引見。應赦者。遇有恩詔。即以伊子列名。不過至伊孫再准列名。若罪止革職。子孫於承襲例相符。或奉特旨革職。未令伊子孫承襲。或該旗未經題請者。均仍令列名引見。並聲敘情節具題。得旨。著交八旗。即照所議辦理。此朕額外施恩。若滿洲世僕。仍復不安本分。意存微倖。非惟斷不准行。必且從重治罪。○丙辰。諭曰。御史魏涵暉。因淮徐等處被水。奏請飭諭江南隣省督撫。照舊例留養流民。春融資送回籍等語。留養流民之法。從前曾已行之。不過有名無實。轉滋多事。且於災民實無裨益。導之使輕去其鄉耳。近日巡撫衛哲治。已經摺奏。故未准行。蓋與其留養於異方。何如厚加賑卹。使不致流移轉徙之為愈。今年淮徐等處被水。朕疊次降

旨。多方籌濟。截漕撥餉。不惜數百萬帑金。加恩撫卹。以留養資送之費計之。何啻百分之一二。豈有愛焉。若以留養資送所需。增為本地賑濟。豈不更需實惠乎。且災地賑務。俱令該督撫親行查辦。又特派大臣前往督察。小民雖一時艱食。原可靜待賑濟。其扶攜四出者。大率無藉之徒。必非安分良民。且自山東聞賑而歸者。屢過於南來之人。此近日問之董邦達而知者。夫以災地派委多員。挨戶查賑。尚恐不能一無遺濫。隣省州縣各有本任。應辦事務。又何從辦其是否災黎。徒滋奸民在本地則乘機混冒。及資送則聚眾強搶。去而復返。日不暇給。而實在被災流民。或依傍戚屬。或傭工餬口者。又必逐一稽留安插。於伊等生計。益致拘礙。此臨政日久。閱歷而知之最切者。故停止此例。魏涵暉原摺著發還。并宣諭中外知之。○旌表守正捐軀之河南襄城縣民馮勇妻牛氏。○丁巳。戶部議覆雲

南巡撫愛必達奏稱。祿勸廣通等州縣多寶金雞各廠。出產黑鉛。請動項分別收買。並照例抽課。應如所請。至所稱運省發賣。收息公用。查廠鉛既經動項收買。自應交局鼓鑄。歸還成本。無庸加息。如發鑄有餘。再發賣通商。所獲息銀。覈數分晰造報。從之。○改直隸文安營武安營龍泉關遊擊缺為守備缺。從總督方觀承請也。○予故一等承恩公伊通阿半葬如例。○戊午

上御懋勤殿。勾到朝審情實罪犯。停決絞犯三人。餘二十九人予勾。○己未

上御乾清門聽政。○諭今年山東掖縣濰縣昌邑等屬。猝被風潮。間有淹傷處所。其應徵欠項。若一體徵收。民情未免拮据。著將掖濰昌三邑被水各村莊。應追舊欠錢糧借穀。俱緩至明年麥熟後徵收。以紓民力。至昌邑一縣。被傷較重。雖例不邀賑卹。但現今時屆寒冬。窮黎待哺。情堪憫惻。著該地方官查明實在

乏食貧民。加恩賞賑一月口糧。以示軫卹。該部遵諭速行。○又諭曰。楊應琚奏稱。江南洪澤湖隄需用石料。東省現在協力開採運送。必需諳悉幹練大員。督率辦理。方可不致遲延。請將史奕昂暫留運河道。以資料理等語。採運石料。以濟急工。甚屬緊要。若將該員暫留辦理。恐呼應不靈。轉致掣肘。史奕昂著仍留山東運河道。其直隸永定河道員缺。即著邁拉遜補授。○調廣東巡撫蘇昌來京。以倉場侍郎鶴年為廣東巡撫。內閣學士雙慶為倉場侍郎。○減江蘇寶山縣蘇州衛瘠田則賦。○庚申。諭各省武職大員。有任所置立產業。身故後子孫不能回籍。該督撫代為具奏。請旨者。多即准行。及按之定例。則武職原不許在任所置產入籍。康熙年間。曾通行查辦。予以半年之限。勒令回籍。隨降旨。設有身故者。准令代奏請旨。此蓋查辦之初。加恩寬卹。而其後遂相沿成例。乃該部濫觴。非初制也。

武員雖無民社之寄。然於在任時。憑藉威勢。安保無營私侵占諸弊。且以建旄擁節之大員。求田問舍。多方為子孫計。又何望其能整飭營伍。彈壓地方耶。苟非生前置產。則身故以後。子孫當經營歸殯。又何暇置產。其有產者。率在任時。違制所置。督撫不行叅出耳。嗣後武職大員。仍照舊例。不許在任所置產入籍。督撫亦不得代為奏請。該部通行傳諭知之。○諭軍機大臣等。今日刑部進呈議覆河

南巡撫蔣炳訪獲私鑄一本。蔣炳因訪拏私鑄。究出私銷。將聽從銷鑄之李紹臣。依銷毀制錢為從例。擬絞立決。所解甚為合宜。從來錢文私銷之弊。甚於私鑄。然私鑄易於發覺。而私銷非實心訪察。難以根尋。前經降旨。令各督撫飭屬嚴查。而近年來。拏獲私鑄。不過就案完結。未有能實力根查。於私鑄之中。究出私銷者。積習因循。徒使奸徒漏網。何以示懲。嗣後各該督撫等。均應照蔣炳所辦。嚴飭

各屬實力奉行。務須究出銷燬確情。按律定擬。不得混行結案。可於伊等奏事之便。再行傳諭知之。○又諭。今年淮徐等處。疊次被水。河隄潰決。實乃非常之災。欽差大臣。及該督撫總河等。悉心協力。上緊籌辦。將物料湊集。迅速施工。則銅山漫口。自可尅期告竣。其下游各處。積水汪洋。田廬尚在淹漫。朕心深為懸注。看來明年春收。已屬失望。目今水落之際。正當乘時設法疏消。若及早涸出。俾得播種早禾。以待秋成。則災黎猶可接濟。此實目前第一要務。宜豫為之計者。至濱湖傍港之地。向來居民墾種殆盡。以致水無所容。非昔人不與水爭利之意。其中或本係湖身。或水所匯集。應乘此時相度查勘。或當開除豁免。竟為棄地。猶可收蓄洩之益。但恐愚民無知。徂目前所得。仍復潛行占墾。及吏胥舞弊。終於有名無實。此非懸揣所能知。舒赫德等。身履其地。可隨處留心。乘機酌辦。著傳諭伊等

令其通盤籌畫。從容辦理。務於地方實有裨益。庶足慰朕懸切之意。其現在曾否涸出情形。並當如何辦理之處。伊等會同詳悉查明。據實具奏。○以鴻臚寺少卿塔永阿為內閣學士兼禮部侍郎。○辛酉。諭據舒赫德等奏。銅邑現在開挖引河。並上游疏濬之處甚多。必須相度測量。著侍郎三和帶領通曉測量之人。馳驛速往。諭軍機大臣等。據鄂容安奏。稱淮河水勢消落丈餘。自宿州至臨淮數十里。俱已涸出地面。種麥早者半已出土。田間每日俱尚有耕種者。土地不致拋荒等語。昨曾降旨詢問伊等。現在水涸情形。若果如所奏。深慰朕懷。但不知涸出耕種地畝。在該州縣中。約有幾分。著傳諭舒赫德等。令其速行約畧繪圖具奏。至江省一應尋常公事。當酌量緩急。所有未被災州縣。自應加意整飭。其被災之地。則以辦災為重。地方官分身無術。且不必嚴其責成也。又高堰石工需料孔

亟。據鄂容安所奏。此時方議採辦。恐需遲時。日不能及時敷用。可速飭妥辦。以濟急工。再舒赫德等所請發算法館熟悉測量之人。現在算法館亦無精曉測量者。已著三和揀選工上一二人。帶同馳驛前往。指示明晰。即留該工効用。三和亦可就近閱看情形。即行回京詳悉面奏。以紓懸切。可一併傳諭知之。尋舒赫德等覆奏。被淹地方。積水漸加消退。現據徐淮揚鳳泗海等府州。將涸地種麥情形繪圖詳報。臣等彙畫總圖。積水未消者。青色作記。已涸未種者。黃色作記。涸地已種者。記以綠點。總計涸出地畝。約在六七分以上。得旨覽奏稍慰。○緩徵直隸大城。涿州。青縣。靜海。滄州。延慶。保安。宣化。懷安。懷來。張家口。遵化等十二州縣。本年水電災民額賦。○壬戌。停止五經中額例。大學士等會同禮部議覆。貴州巡撫定長奏。稱黔省士子三科五經缺額二名。與乾隆九年酌減定數不符。應否

定為三十八名。或請改歸專經。照原議仍取中四十名等語。查五經士子。果其淹通經術。專經尤易見長。若無實學。惟事勦襲。轉滋倖進。應如該撫所請。嗣後各省五經中額。概行停止。所遺額數。令該各督撫查明。歸入卷多文佳之專經內取中。副榜一併照解。從之。○吏部議覆御史錢士雲條奏吏治事宜。內稱委署印務。知府缺出。先於府佐內委署。乏員再於隣郡知府內酌委。不得竟用相隔太遠之知府。州縣缺出。先於試用人員內委署。乏員次於州縣佐貳內酌委。又乏員再於同府州縣內委署。不得竟用隔府之州縣。查丞倅本係閒曹。試用人員原供差遣。缺出需人。自宜遴選委署。若用相距太遠之員。勢必顧此失彼。應如所請。至地闊緊要。人地相宜者。仍聽督撫酌用。又稱官場陋習。借名議公。聚飲連宵。玩誤公事。請一概禁絕。查官員聚飲。例禁本嚴。應如所請。行令各督撫飭禁。干犯者

叅從之。○癸亥。

上詣

皇太后宮問安。諭曰。調任湖南巡撫范時綬奏稱。江西金谿縣生員劉震宇。呈稱。送所著治平新策一書。求為進呈。訊據供稱。曾經前任江西巡撫塞楞額批示嘉獎。遂刻印售賣。其書內更易衣服制度等條。實為狂誕。應照生員違制建白律。黜革杖責。解回原籍等語。劉震宇自其祖父以來。受本朝教養。恩澤已百餘年。且身列黌序。尤非無知愚民。乃敢逞其狂誕。妄訾國家定制。居心實為悖逆。塞楞額為封疆大吏。乃反批示嘉獎。喪心已極。若此時尚在。必當治其黨逆之罪。即正典刑。則其身遭重譴。未必不由於此。此等逆徒。斷不可稍為姑息。致貽風俗人心之害。劉震宇既經解回江省。著交鄂容安將該犯即行處斬。其書板查明銷燬。范時綬僅將該犯輕擬。杖甚屬不知大義。著交部嚴加議處。○諭軍

機大臣等據湖南巡撫范時綬奏江西金谿縣生員劉震宇所著治平新策。謗議本朝服制居心甚為悖逆。已明降旨將該犯解江西正法。著先行鈔錄寄鄂。客安一得此旨。即予施行。明旨遲一二日再發。看來江西一省士習民風俱屬薄惡。不可不加意整飭。范時綬新調該省。於轉移風俗似非所能。可傳諭鄂客安。令其留心化導。務令革薄從忠。一洗向來惡習。此亦地方大吏職分應辦之事也。

又諭曰。范時綬奏盤獲面生乞人。訊據認係馬朝柱。但係供修改無可質証。北省多有認識馬朝柱之人。解交督臣就近審究等語。該犯狀貌既與通緝所開多屬相符。則情節實有可疑。但供詞閃爍。必當訊對確實。方可明正典刑。昭示天下。著傳諭開泰令其細心體察。倘係畏刑誣認。固不可草率附會完結。重案然使僅委之馬朝柱。認識之人令其辨別。則其人平日既與相熟。非親即黨。必多懷瞻

顧不肯據實指認。轉使奸宄漏網。此等處更宜加意研究。務得確情。該犯竄匿游魂。逋誅日久。果經弋獲。當信天網難逃。但不可存了案之意耳。旌表守正捐軀之江蘇金壇縣民楊受。何妻葛氏。甲子

聖祖仁皇帝忌辰遣官祭

景陵

上詣

奉先殿

壽皇殿行禮。○諭軍機大臣等。雅爾哈善覆奏錢塘等處被旱成災一摺。內稱通省一隅被旱。共計錢塘等二十八廳縣衛所輕重不等。請分別酌借穀種。新舊錢糧照例蠲緩等語。所奏甚不明晰。前因該撫奏報地方雨水情形。是否成災。未能詳確。是以降旨令其速奏。乃此次摺內所請酌借穀種。蠲緩錢糧等事。是否已經辦理。或係現在奏請。尚須候朕頒發諭旨。遵行抑係業已繕本具題之處。並未聲明。迨

查該撫原題及部覆各本始知已經題請覆准之事。朕日理萬幾。隨事批諭。似此糊塗奏請。豈能逐事詳查。始行辦理耶。將此傳諭該撫知之。○豁除福建臺灣鳳山彰化等三縣乾隆十五年分。衝塌地畝額賦。○賑貸甘肅皋蘭狄道渭源河州金縣靖遠環縣安化鎮番平番靈州寧夏中衛平羅西寧寧朔隴西安定會寧靜寧崇信華亭合水秦州清水徽縣武威碾伯大通等二十九州縣衛。本年水電災民並蠲緩額賦有差。○乙丑諭曰。御史王顯緒所奏籌劑兩淮鹽引。通融辦理一摺。竟欲壞數省鹽法。斷不可行。朕意以為王顯緒未必見及於此。伊父王柔素稱多事之人。此奏必其授意指使。及經召問。據奏曾經告知伊父。果不出朕所料。御史職司言路。於國政民依何事不可陳奏。而必以離務為言。今歲淮安雖被水災。朕已多方賑卹。昨據普福奏稱現今四省綱食口岸存鹽及在途運往。

絡繹接濟。俱屬充足。王顯緒此奏。若意在為商。則商人現在安享太平。身擁厚利。並無竭蹶情形。若意在為民。則民間本無食淡之虞。而一經騷擾。匪愛實害。向來言鹽務者。非市恩商人。欲見德而使知感。即借此恐嚇。令畏憚而求納交。無非卑鄙之見。且王顯緒向即多事不安靜。不宜御史之任。著以六部主事用。以為言官挾私妄奏者戒。○丙寅上御太和殿視朝。文武陞轉各官謝恩。○諭曰。吉慶著補授京口副都統。兼管兩淮鹽政。來京請訓後。即馳驛赴任。京口副都統范宜謙著來京。仍以副都統用。普福著調補長蘆鹽政。直隸天津總兵員缺。著苗國琮調補。所遺浙江黃巖總兵員缺。著黃士俊補授。普福俟吉慶到任交代後。再起程赴任。其長蘆鹽政及天津總兵印務。普福苗國琮未到任之前。著倭赫暫行署理。○大學士等議奏。文職官員內太常寺所屬之奉祀。祀丞贊禮。即協律。

郎讀祝司樂提點禮部所屬之各贊禮郎讀祝官鑄印局大使會同四譯館大使序班及六七八品高麗通事鴻臚寺所屬之鳴贊序班欽天監所屬之五官正春夏秋冬中等官正及博士司書靈臺郎五官監候挈壺正司晨太醫院之院使院判及所屬之御醫額外吏目等官向屆京察俱照舊例填註守政才年四柱考語查此等官員與各部院衙門辦理案件者不同嗣後如奉祀等官則但論其禮儀是否嫻熟行走是否敬謹鳴贊等官則但論其舉止是否安詳音節是否宏暢欽天監等官則但論其數學是否精研太醫院等官則但論其醫理是否通曉令各衙門堂官於京察時查覈填註切實考語其守政才年等字不必填入武職內綠營千總向俱不入軍政惟巡捕營門千總及衛所千總隨軍政一體考覈查衛所千總有錢糧之責應仍聽其考覈門千總職司看守祇應覈其弓馬是

否嫻熟亦無庸填註守政才年等語從之予故鑾儀衛使傅拉納半葬如例

大清高宗法天隆運至誠先覺體元立極敷文奮武孝慈神聖純皇帝實錄卷之四百五十

大清高宗法天隆運至誠先覺體元立極敷文奮武孝慈神聖純皇帝實錄卷之四百五十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級入加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆十八年癸酉十一月丁卯。

上詣

皇太后宮問安。○諭軍機大臣等。據班第奏。增城逆犯王亮臣等家產估變銀四千餘兩。為善後案內衙署兵房之用。一摺。叛產入官。即以充善後公用。自應如此辦理。但叛逆重罪。大抵皆無藉之徒。借此哄誘愚民。誑騙財物。或因飢寒切身。迫於萬不得已。乃鋌而走險。今逆犯等家田產。既有四千餘金。以中人之產計之。尚可為溫飽之家。何至相率作賊耶。

此案辦理固無可疑。而案犯挾仇誣扳。承審官以事關重大。不敢遽為昭雪。因而波及無辜。亦事之所有。惟在該督撫等詳細體察耳。封疆大吏。除暴安良。是其專責。倘有叛案。斷不可不辦。朕非惡聞其事。特以案情既重。承辦官員。尤宜加意詳慎。若意在根求。而或不免於株累。則於整頓地方之道。失之遠矣。近年江、廣、閩、粵。皆有此等案件。閱班第摺。因念及此。可通行傳諭各督撫知之。○又諭。據黃廷桂奏。抵川督任後。檢閱卷宗。塵案累累。殫力清釐。半載以來。先將舊日叅案。全數辦竣。外。其命盜搶奪等事。一併飭催。已經咨題者。計二百二十餘件。尚有乾隆十三年。至十七年。未結之案。八十餘起。現在勒限嚴催。題審等語。川省數年以來。案牘塵積。何至如此之多。若係前任怠玩。則策楞向來辦事。尚屬黽勉。並非懈惰之人。應不至此。黃廷桂久歷封疆。亦非新履外任。誇詡見長者可比。其數數

入奏亦必不至捏辭取巧。著將此詢問策楞令其據實覆奏。尋奏。川省自瞻對金川用兵。吏治積疲。遇刑名錢穀案件。每以軍需緊要。咨部展限。臣於乾隆十四年。由軍營回任。檢查卷案。應咨題及應覆部者。統計數千餘件。其餘積件更多。再湖廣江西廣東等省。入川民人。自兩次用兵後。多失業流寓。因致命盜竊案。歲至數百餘起。應入本年秋審者。多至二百餘件。州縣官復意存開脫。案多駁詰稽延。臣四年在川。竭力清釐。自乾隆八年。至十二年。積案已結。十三年以後。雖辦有十之七八。實不能全無留滯。報聞。○戊辰。

上幸圓明園。○已巳。諭原任臺灣鎮總兵陳林每著該部調取來京引見。○閩浙總督喀爾吉善等奏。遵旨嚴訊臺兵謀刺鎮臣。緣兵馬忠。胡勝喜。陳元。蔡士芳。因受責私恨。於聚飲時。各言被責情由。馬忠倡議刺死總兵洩忿。又以胡勝喜向有癲症。囑令行刺。不成。可推

作癲發。又有旗牌兵袁亮管門兵周勇與胡勝喜等聚談。袁亮言該鎮待兵刻薄。周勇言該鎮鄉親到門直入。屢因攔阻被責。馬忠即告以現謀行刺。囑令幫同下手。嗣窺陳林每在花廳演戲祀神。蔡士芳遂領胡勝喜進衙。馬忠。陳元密約侍立該鎮身旁。潛扯衣袖。袁亮周勇將胡勝喜推入花廳。該鎮見胡勝喜持刀直上。用棹打倒。呼袁亮等拏住。發轅責革。查馬忠等。均係轄下戍卒。總兵如果袒護

酷虐。應赴各衙門告理。乃聚謀行刺。罪大惡極。請按律分別嚴辦。得旨。馬忠。胡勝喜。蔡士芳。陳元著即處斬。袁亮周勇著監候。秋後處決。三法司知之。又諭軍機大臣等。喀爾吉善等另摺奏審明臺兵行刺鎮臣情由。請將陳林每革職一摺。看來此案。陳林每辦理尚不致十分錯謬。兵丁行刺鎮將大員。兇惡已極。方馬忠等。扯住陳林每衣袖。胡勝喜持刀直入。陳林每若稍聲張。必致激成事端。反中兇

兵之計。即袁亮等拏住胡勝喜之後。若遽拏交有司。則其同謀情罪。未必悉行吐露。或致畏罪潛逃。又或倡謀激衆。益滋蔓延。其僅指胡勝喜為瘋兵。發轅責革。陳林每或另有深心。至其平日過於苛細嚴急。以致兵心各懷不平。伊係武夫。不知大體。是以有此尚屬常有之弊。未可因此黜退。益長刁風。現已降旨。令來京引見。俟引見後。朕當再行酌量。可傳諭喀爾吉善等知之。○庚午。

上詣

皇太后宮問安。○還宮。○貴州巡撫定長奏武闡鄉試。原以拔取本省武生。其兵丁及外委千把一體考試。原屬廣搜英俊之意。今歲貴州武鄉試。馬步守兵入場者。臣密記於馬兵內。取中三名。又有現任武職子弟。頂冒兵糧入場者。俱暗記不錄。查營兵入場。例無馬步守之分。未免太濫。請嗣後將步守概停咨送。馬兵內才技優嫻。文義通曉者。由該營送考。

至現任武職子弟頂冒入場。本干功令。向例於中式後察出。止將保送各員議處。似未周備。請嗣後將保送各員。及現任武職一併分別嚴加議處。督撫提鎮失察徇縱。分別議處。下軍機大臣會同兵部議行。○旌表守正捐軀之河南鹿邑縣民耿山妻葉氏。○辛未。

上詣

壽康宮侍

皇太后宴。○諭軍機大臣等。舒赫德等奏稱。銅山漫口。輦鑲堅固。日進二埽。月餘可以合龍。先開引河二道。試加引放。日來分溜暢流。差人探視百餘里。俱源源接續等語。看來挑河引溜。漸可奏功。但此時北岸大引河。尚未穿成。即行試放。得無過早。所有已成之引河。寬僅數丈。深僅數尺。水勢微弱。不能冀其湍迅衝刷。使大溜全歸中泓。不如於將近合龍時。再行開放。俾併力東注。庶可望掣溜歸舊河耳。但此乃懸揣之詞。舒赫德等親在工次。目

覩情形自必籌之已熟可傳諭伊等令其悉心妥酌據實奏聞再兩壩輒鑲各埽雖皆堅固平穩但至合龍之時全河奔注勢甚湍急徑直鑲埽驟加防遏恐難奏功不如迂迴之以殺其勢朕意若於合龍時將東西埽工左右交互令口門溜勢稍緩然後南北斜對進埽合龍如此辦理不過多下數埽多遲數日而堵禦迴溜較之遏截奔流實為省力可將朕硃筆一併寄發舒赫德等令將是否可行

及現在是否即係如此辦理抑或別有成算可剋期迅速堵閉之處即行奏覆○賞卹福建臺灣運餉沉溺官兵如例○旌表守正捐軀之河南桐柏縣民賀良甫妹賀氏○壬申上御乾清門聽政○軍機大臣議覆貴州巡撫定長覆奏黔省不便會哨情形查本年四月內經調任湖廣總督永常以兩湖地方遼濶接壤江南江西河南陝西四川貴州廣東廣西八省內多邃谷深林崇山疊嶂奸匪易匿

奏請就所轄地方與隣省訂期會哨曾降旨傳諭江南等省督撫商辦不能如此者令其覆奏今定長以該省與隣省聯界之地苗夷居住甚多從前未加兵威平日絕少出入若與隣省會哨恐苗人猜懼致滋事端但會哨一事前旨原專指湖南北地界毗連之處並非令各省概行會哨若誤會諭旨每歲遣官兵深入苗寨會哨必致驚駭滋事再查乾隆十一年據雲南等五省督撫定議將各處接壤要路添設臺汛並每歲巡哨已自嚴密應請交與該撫定長除與湖南靖州接界之開泰縣等處查明並無苗寨地方仍遵前旨與楚省督撫酌量辦理其餘苗地無庸分咨鄰省會哨四川等省一體遵行至所稱道府將領等官分別歲巡季巡事宜應飭交各督撫按照該省情形妥辦從之○以吏部右侍郎裘曰修充經筵講官○以詹事府詹事奉寬為內閣學士兼禮部侍郎○旌表守正捐軀

之浙江長興縣民楊某妻蔣氏河南長葛縣民鮑承恩妻張氏○癸酉諭軍機大臣等今據進呈福建武鄉試題名錄內武舉李邦石開弓二十二力朕思歷科武殿試舉子開十數力之弓尚多竭蹶從未有如此膂力者此或係繕寫之訛亦或出於粉飾可於喀爾吉善陳宏謀奏事之便傳諭詢問令其據實覆奏如李邦石果能開弓至二十二力則其技勇必有可觀著即咨送來京候朕親試尋奏武闈校士弓力俱照例較准李邦石係將十力十二力兩弓並開雖覺勉強合計實二十二力但閩省風土潮濕弓力雖準究不能如北地強勁現已調取來省給咨送部報聞○吏部議准浙江巡撫雅爾哈善奏歸安縣主簿已奏准移駐菱湖鎮請建衙署從之○甲戌

上以二十五日記

天齋戒豫行慶賀

皇太后聖壽節遣官祭太廟後殿

上詣

壽康宮行禮王大臣於

慈寧門衆官於午門行禮奉

皇太后幸靜怡軒侍宴諭前因堵築銅山決

口需料孔殷降旨令豫東二省購運協濟署

山東巡撫楊應琚督率所屬迅速辦齊甚屬

奮勉可嘉又因船隻稀少加意籌畫借用徐

州回空停泊漕船接運工次濟用亦甚得輕

重緩急之宜楊應琚現在將次服闋著即實

授山東巡撫仍交部議叙○又諭前因上江

宿靈虹泗盱眙等屬被水成災降旨將徐屬

之長淮大河二衛漕糧五萬石截留安省備

賑今據衛哲治奏長淮大河等幫本年均被

水災現議緩徵請即於鳳潁泗三屬未被災

田應徵米石及安廬等屬漕糧內截留五萬

石以抵蘇省應派之數至上江已截留五萬

石則下江只應截留五十五萬石等語。長淮大河。二衛漕糧。既被水緩徵。著照所請。即於安廬鳳潁。泗等屬。應行起運漕糧內。截留五萬石。以備安省賑卹之用。至下江著仍遵前旨。截留六十萬石。不必因上江另經撥截。遽議扣除北運。今歲淮揚徐海各屬。被災甚重。災黎嗷嗷待哺。朕心深切軫念。雖已多方籌濟。但使有資民食。朕無所愛。該部遵諭速行。

○諭軍機大臣等。定邊左副將軍成衮扎布等奏報。準噶爾杜爾伯特台吉車凌車凌烏巴什等。率所部三千餘戶來降。暫駐於額克阿喇勒。遣使相聞。已將軍營豫備各游牧之兵。調遣防範。朕觀車凌等來降。似非叵測。何也。達瓦齊與訥默庫濟爾噶爾。構兵不已。俱令車凌等相助。兩家勝敗。既難豫定。即幸而所從者勝。亦仍受其約束。自不若歸降大國。冀得安生。伊等既經來至邊卡。將情事實告。應即令其入內休息。可速傳諭成衮扎布。即

遣軍營明白歷練大員前往曉諭。告以爾等率眾投誠。業經奏聞大皇帝。大皇帝念爾等俱準噶爾台吉大員。率領部眾。輸誠向化。甚可嘉憫。今所駐額克阿喇勒。乃我邊卡外地。倘有追兵至此。未便應援。或有所失。朕心深為不忍。即可移入卡內駐劄。今冬將軍成衮扎布來京。伊等自必懇求赴京。瞻仰朕躬。即將車凌車凌烏巴什及其頭目。酌帶數人同來。從前準噶爾台吉阿喇布坦。丹濟拉等投誠。俱封以顯爵。優加賞賚。其宰桑及部落人等。皆授官分產。至今安居樂業。伊等入見後。朕自格外加恩。此時先令成衮扎布。動用官項牛羊。賞給伊等。以為接濟。其駐牧處所。另行酌定。至準噶爾素稱狡詐。固宜派兵防範。但伊等天性好疑。亦不可啟其猜嫌。倘車凌等願留卡外居住。我雖豫備。無庸宣露。若已入卡內。則更無可疑。不須過為防範。今特遣侍郎玉保馳驛前往。並加恩將朕所用元狐

帽賞給車凌車凌烏巴什各一頂端罩各一件成衮扎布可即遵旨辦理○又諭朕聞準噶爾小策凌端多布之孫訥默庫濟爾噶爾與達瓦齊互相征戰是以台吉車凌等率所部來降可寄問薩喇勒訥默庫濟爾噶爾是否即係小策凌端多布之孫其識見力量果否能與達瓦齊相持並令將伊所知車凌車凌烏巴什之處明白具奏○乙亥調兩淮運判楊重葵來京引見○是日起

上以冬至祀

天於

園丘齋戒三日○丙子諭據溫州總兵施廷專奏稱所屬早稻收成均有八分惟玉環山畧非係高坡即屬沙灘被曬日久收成僅有二分等語玉環乃海疆斥鹵之區災至八分實非他邑偏災可比亟宜確按情形豫籌接濟從前該督撫奏報摺內雖稱旱災稍重但未奏及成災分數且喀爾吉善奏蠲緩錢糧借

給口糧籽本係指通省大局而言而雅爾哈善亦祇稱運米備用均未將玉環災地現應作何辦理之處分晰聲明著該督撫等將該處實在成災分數及應如何籌畫撫卹一面據實覆奏一面督率所屬妥協辦理毋使失所該部速行傳諭知之○諭軍機大臣等舒赫德等奏稱山盱高堰磚石等工亟需辦料興修茲聞山東江南所辦石料輸運亦屬艱難似應仍於徐州雲龍山等處開採現在飛咨兩江督臣會商江蘇山東撫臣作速派員前赴徐州採運等語雲龍山呂梁等處採辦石料由黃入湖可以直抵工次若如所奏自屬便捷但山東所辦石料現據楊應琚奏到已經雇集工匠開山採運若將東省辦料官員派往徐州則伊等從前所費帑金恐將來不准銷算不能無所瞻顧轉致掣肘其江南想亦辦有頭緒矣可令鄂容安楊應琚等公同速為商酌不必拘定何省惟以能濟急工

為妥。若江南東省現在所辦。果能源源接濟。不致貽誤。則不妨仍於本處採運。如徐州實較近便。則兩省開山所需帑項。將來仍著准其報銷。總之此次辦理工料。非常時可比。即稍多費用。朕亦不惜。惟不可聽其浮冒耳。兩省督撫。斷不必少存彼此之見。務期迅速濟用。無誤要工。以慰朕南顧懸切之念。鄂容安、楊應琚等。會商妥協。一面即行辦理。一面再將辦理情形奏聞。不必具奏候旨。以致往返稽緩。可一併傳諭舒赫德等知之。○又諭曰：舒赫德等奏。現今堰盱一帶五壩俱已斷流。二閘水勢消落。已咨河臣飭催派員集料。次第堵閉。以期下河田畝漸涸。無誤春耕等語。前因五壩水勢盛長。若將二閘堵閉。恐轉致漫溢。是以暫停堵築。俾資暢洩。今五壩既已斷流。該處水勢消落。則二閘決口。於下河民田實關緊要。急宜乘時堵閉。現在銅山張家馬路。有舒赫德、劉統勳分駐漫口東西。督率

進埽。諒可不日竣工。其邵伯二閘。即著策楞帶同高斌前往。速行堵築。務期合龍。庶下河田畝得以漸涸。明春耕種無誤。於災黎實為有益。○又諭據成衮扎布奏。台吉車凌車凌烏巴什已入邊卡。朕昨遣玉保撫慰。此時尚不能到。觀伊等急求入卡。其誠心愈益可見。著傳諭成衮扎布。令其即派大員接應。至來降之台吉。自宜暫緩來京。約東部眾。先將伊等大員。輕騎減從。帶領前來。其餘仍遵朕前旨行。○丁丑。

上詣

南郊齋宮齋宿。○戊寅。冬至。祀

天於

圜丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○

上詣

皇太后宮問安。○諭銅山漫口工程。堵禦甚關緊要。兵弁人等。俱甚毘勉出力。所有在工兵丁。著加恩賞一月錢糧。各員弁中奮勉急公者。著舒赫德等記明。於工竣日奏請分別議叙。以示鼓勵。○又諭曰。孫嘉淦現在患病。不必管會典總裁事務。吏部侍郎義曰。修著充會典館副總裁官。○諭軍機大臣等。按察使楊廷璋所奏請定承追贓罰之限期處分一摺。承追贓罰。原係臬司衙門專辦之事。果能實力查辦。塵案自可早結。即如粵西舊欠。楊

廷璋一經辦理。遂已無多。可見原係一臬司足任之事。不必另立章程。即使交部定議通行。而所司不能實力奉行。仍不過視為虛文故事。亦屬無益。著於各督撫奏事之便。將楊廷璋原摺鈔寄。令其各飭所屬臬司。實心整頓。無使年復一年。徒繁案牘。○又諭前據舒赫德等奏。銅山漫口進埽情形。朕意當合龍之時。堵禦迴溜。與遏絕奔流。難易較殊。因硃筆畫出。並傳諭舒赫德等。迄今未見覆奏。茲遣額爾登額前往賞資什物。令其順便詢問。現在如何辦理。並將三和回京所進圖幅。畫出指示。亦不過約畧情形。初無成見。今思合龍之時。兩埽對面鑲入。則溜走中泓。雖一面受衝。猶易為力。若交互進埽。則迴溜迫束。水勢旋激。左右均有衝動。轉恐不能搶築穩固。伊等親在工次。自必籌之已熟。不必拘泥前旨。稍有遷就。總期悉心相度。務合機宜。俾成功迅速。若少存附會之見。於要工無益。轉非

委任之意。可傳諭舒赫德等知之。尋奏前試放引河。相機宣洩。日來水勢大順。兩河串成一河。源源東注。已達清口。惟張工口岸。溜勢尚未湍激。俟北岸大引河告成。月初開放。可奪大溜十之五六。至臨時合龍。兩壩左右交互。斜對進埽。必須長出數丈。且溜勢夾激。恐難施力。臣等商辦埽壩。係用月灣挑溜式。現在溜水和平。又得大引河分流奪勢。自可指日成功。得旨。所奏是。○又諭泉州府蔡攀。覲覲伊弟家貲。捏寫逆詞。誣陷一案。前據該督奏。此案人犯已齊。別無疑竇。現飭按察使再加嚴訊定擬。解省審明具疏等語。比來奸民挾仇誣陷。發覺之案甚多。前已降旨各督撫。凡遇此等案件。研審明確。即行杖斃。以息刁風。今蔡攀雖欲借詞陷害他人。而帖內言詞不法已極。其下筆時。即屬身為叛逆。何以該督等前奏。並不將逆詞詳悉叙入。著傳諭詢問喀爾吉善。陳宏謀。並令其提犯審明。或先

行正法。或即杖斃。俾奸民知所懲儆。庶刁風可以少息。○又諭曰。顧琮所奏東省河湖水勢情形一摺。其所稱運河現在水深一丈有餘。須俟臘底正初。水勢大退後。實力撈浚等語。所見未免膠柱鼓瑟。挑濬運河。原因河身淺隘。有礙糧艘過行。不得不加籌辦。現在既水深一丈有餘。何必更事挑濬。且看此情形。即將來水退後。亦必不致十分淺阻。乃以今冬輪屆大挑。遂仍一例辦理。殊非因時籌酌之道。況改挑為撈。土方工價。需用較多。此乃向來河員循例開銷之一端。實徒滋糜費耳。嗣後如運河水勢。實在淺阻。不得不行挑濬者。自當按原定年分酌量籌辦。若水長河深。通行無滯。即遇應挑年分。亦當停其挑濬。方為合宜。今年即著照此辦理。並著為例。顧琮向來辦事。多有似此糊塗拘泥之處。可傳諭知之。○又諭。據鄂容安奏。高堰隄工。所需石料。現在山東分辦一半。路途稍遠。或不能如

期速到江寧蘇州常州三府共有六處可採俱發銀委員採鑿等語石料為隄工急需前經降旨令兩省無分彼此協力採辦今既據該督奏稱於江南江寧等府產石之處發銀委員開採自於要工有裨但恐開採處多頭緒紛繁難於照料著仍遵前旨惟於產石多而夫匠易集者不拘何處迅速趨辦以濟急工即東省路途稍紆如已經開採亦可陸續接濟或應停止其所費工料亦一體准令報銷總不必拘拘常例但勿令屬員乘此冒銷可耳將此一併傳諭楊應琚及在工大臣等知之至劉震宇係悖逆重犯應遴委幹員即往提拏至江西正法乃稱俟楚省解到設令中途疎脫豈不竟成漏網所辦殊未周密如此時尚未解到著遵旨委員提拏一併傳諭知之○己卯

上以冬至節詣壽康宮行慶賀

皇太后禮王大臣於

慈寧門眾官於午門行禮○御太和殿受賀○諭向來外省辦理一切事務類多因循怠玩緩不濟事蔣炳楊應琚等前在京時屢經朕訓諭指示稍知急公之義此次堵築銅山漫口豫東三省購運工料該撫等俱能實心經理蔣炳於辦理之初猶不免仍循舊習迨經訓飭即能上緊趨辦剋期濟用亦屬黽勉楊應琚前已加恩議叙蔣炳亦著交部議叙山東兗州鎮總兵成元震身係武員並無承辦之責而往來河干催督趨運亦能奮勉出力著一併議叙豫東兩省辦料員弁並著該撫等查明奏聞交部分別議叙以示鼓勵○庚辰諭曰安徽巡撫衛哲治奏奏革池州府知府王岱任內虧空倉穀覈減分賠等項照例看守追繳乃抗不完解竟自潛逃經貴池縣知縣邵隨龍等聞信追趕復將典史施峻及該縣家人等用鞭毆打眾百姓見其辱官肆

橫。齊行阻回。實屬狂妄玩法等語。王岱係叅革知府。因虧帑照例看守。乃敢私自潛逃。肆行拒捕。乖張藐法。莫此為甚。方今海宇一家。即伊逃脫。亦不過隱匿姓名。潛身方外。斷無不可蹤跡。設如古列國時。竟將叛而他往耶。官常中有此異事。實駭聽聞。在虧空未清。尚可按限著追。惟藐法潛逃。則自來叅革看守官員。所未嘗有。若不嚴治其罪。刑章安在。且恐漸開其端。王岱著交該督鄂容安。即於該地方處斬。該撫衛哲治於此等不法之徒。即應請旨正法。乃摺內僅稱現在嚴加禁追。並未奏請治罪。殊屬不知輕重。著交部嚴加議處。知縣邵隨龍。聞逃即行追趕。尚屬勇往。能明大義。且觀衆百姓齊行攔阻情節。其平日居官尚得民心。著交部議叙。並行文調取來京引見。○諭軍機大臣等。據郭一裕奏。按察使許松估。辦賑公出。十一月初十日五更時分失火。燒燬科房六間。文卷搶救不及。間有

燒燬等語。衙署失火。雖亦間有之事。但臬司為刑名總匯。而科房係收貯文卷之地。甚關緊要。今失火延燒。在許松估辦賑公出之時。此必有書吏人等。因本官出署。欲乘機舞弊。銷燬卷宗。必當嚴行訪察。已批諭郭一裕。令其細訪情節。告知督撫。從重治罪。可傳諭鄂容安。莊有恭嚴密查訪。如有前項弊端。務須究出情節。重治其罪。以示懲儆。著於奏事之便。傳諭知之。○又諭曰。張若震以擢授巡撫。具摺謝恩。併請陞見。已於摺內批諭。令其不必來京。即赴新任矣。張若震久歷外任。於吏治尚能熟練。且各省藩司中資俸之深。亦無有過之者。湖北巡撫缺出。一時不得其人。是以特加擢用耳。此番擢用。雖出於伊之望外。但朕於用人行政。一秉至公。決不因其為張廷玉之姪。而遂稍存意見。不加倚任。然張若震若因此而妄自滿假。又或自揣才分得此已足。以為外而總督內而尚書大學士。非所

敢望。遂一切模稜了事。以為保守官職之計。則將來獲罪更重。此等均不能逃朕洞鑒。張若震當益加奮勉。國家恩澤。必當善為承受。亦即伊勉圖報効之地也。可再傳諭張若震知之。○又諭曰。喀爾吉善奏稱浙省被旱成災州縣。經撫臣會疏題請。分別給與籽本口糧。照例蠲緩等語。浙省被旱州縣內。玉環一廳。災至八分。受傷最重。所當格外撫恤。而該督撫從前並未分晰聲明。經朕特降諭旨。令其加意查辦。並一面辦理。一面覆奏。喀爾吉善尚未奉到此旨。是以摺內所奏。仍係通省大局。至玉環災地。如何撫綏。究未分晰。可再行傳諭。令其遵照前旨。督率所屬。實力妥辦。務使災重之區。得霑厚澤。毋致一夫失所。以慰朕懷。尋喀爾吉善等奏。玉環被災雖重。現飭道府查勘。據稱。近水田畝。收成實有六分。惟高坡沙鰾。成災自五分。至十分不等。並非通島全荒。查玉環係新開孤島。豐歲亦資平

糶接濟。臣等現撥運附近府縣米穀糶濟。再照通省題定之例。分別被災輕重妥辦。並於明春酌借口糧。得旨覽奏俱悉。○又諭曰。喀爾吉善所奏審擬諸羅縣奸民吳典等。糾眾圍逼知縣。打傷差役。搶奪案犯一案。知縣徐德峻當眾犯圍逼之際。尚能屢次叱罵。不肯少為遷就。並諭吳姓速將賊犯解縣。隨仍乘輿出莊。閱其情節。尚屬能知大體。且亦具有膽畧者。可傳諭喀爾吉善等。令將徐德峻平日居官之處。秉公據實奏聞。尋奏。徐德峻明白謹飭。遇事奮勉。居官數任。政務無誤。報聞。○又諭曰。瑚寶奏邵伯決口處。湖水消退二尺九寸。河水消退三尺。均有淺深不一。幫船行走。未免阻滯等語。所奏殊不明晰。目今當湖河漫溢之後。即使水勢全消。亦何至頓虞淺溢。有礙糧艘通行。但高郵二閘。及車邏等壩。原以瀦蓄運河。若因上游決口。尚未合龍。遂遲回觀望。使宣洩過多。則異日又將何以

濟運。今觀水勢甫減。而瑚寶即有此奏。可見二閘之工。實不容緩。不然。則明年且必有以湖水太弱為言者矣。前已降旨。令策楞督率高斌。前往堵閉。今尹繼善又奏稱。現在親往該處查勘情形。設法趕築。所見甚是。銅山隄工。既有舒赫德。劉統勳。二人在彼。足敷督辦。尹繼善可即留高郵。會同策楞等。上緊催築。至舒赫德等。亦即專以堵塞決口為事。不必往來其間。反致有顧此失彼之患。將此速行傳諭伊等知之。併鈔寄瑚寶奏摺。令伊等閱看。將何處淺阻緣由。詳悉奏聞。尋策楞等奏。今歲洪湖盛漲。二閘被衝漫口。高斌以湖河相連。難以施工。在運河內圈築埽壩。水落漸次露灘。原築廢埽。橫截運河。回空漕艘。俱由二閘上游。走湖面數里。繞至邵伯口。從小港入運。多有淺灘。臣等現飭員弁。將南壩廢埽拆毀數丈。漕船已由運河通行無礙。報聞。○兵部議覆。山西布政使多綸奏請停年老武

舉會試一摺。查武闈例重外場。弓馬技勇。必年力盛壯。始克嫻熟。乾隆九年。部議武生年屆六十。不准應試。會試自當一體照辦。應如所請。行令各督撫。於會試時。轉飭地方官。確查武舉年歲。逾六十者。停其咨送。從之。○是月。兩江總督鄂容安奏。安省鳳。泗等屬。九月雨水連綿。淮漲河溢。成災加重。飢民先經撫卹。現已開賑。但安省災重。祇此數處。歲內賑項。俱可折給。前江西撥協下江米石。奉旨改撥上江。明春足敷接濟。下江災重地寬。酌用銀穀。當與莊有恭親身督辦。安撫衛哲治現駐鳳陽。臣亦面商妥辦。得旨。覽奏俱悉。又批。此人不患其過嚴。而患其過寬。莊有恭。不患其過寬。而患其過嚴。而下江之災。實又重於上江。是宜留心調劑也。又稱。地方公事。官吏每藉端耽延。當身先辦理。不致遲誤。又批。此當論其緩急。災傷既重。亦恐地方官實乏分身之術。但不令其偷安可耳。○又奏前摺

訓示周詳。撫臣衛哲治。莊有恭性情質地。誠如睿鑒。辦災一事。衛哲治意在寧濫無遺。臣思卹災捍患。朝廷固不惜千百萬帑金。然愚民奢望無窮。國家經制有定。外省習氣。專事揣摩。意指。若屬員知上司意在於寬。則沽名邀譽。假公濟私。何所不至。且冒濫一開。不特虛糜帑項。更恐實在災民。反致遺漏。已就所見。向衛哲治剴切言之。莊有恭意在整飭。居心原非刻覈。臣每與言論。竊謂姑息非以立

書錄卷四五一

三十一

愛。振作不在立威。若平時教誡不先。有事徒繩以法。是屬吏獲罪。上司成之。惟嚴憚於外。不取浮名。體卹於中。使得展布。庶收實用。目下辦理賑務。州縣或有心苛刻。罔卹災黎。或故意市恩。虛糜帑項。以及縱容胥役。侵漁中飽。皆所當劾。若偶爾疎忽。或尚未諳練。止應分別申飭。遽行叅革。另易生手。未必即能勝任。且於賑務轉恐紛更遲誤。伊深以臣言為然。至臣等同受封疆重任。若扶同遷就。止博

書錄卷四五一

三十一

和衷之名。不顧公事之實。誠為上負殊知。若急自見長。矯情立異。必致意見參差。有乖政體。臣等面論及此。遇事並期熟商妥辦。共相檢點。得旨。所見正大可嘉。○江南河道總督尹繼善奏報到任日期。並稱馳駐銅山漫口。趕辦堵築。清釐積弊。得旨。覽奏俱悉。一切恩怨莫修。積習盡改。則不患汝不能勝此任也。○江蘇按察使許松估奏。勘定淮揚徐海各屬。成災分數。嚴飭地方官。挨戶給賑。並親身督率。派員查察。得旨。汝辦賑向稱盡心。茲更宜勉力。○安徽巡撫衛哲治奏。接印後查災辦賑。所有前撫臣未題勘案件。現於鳳陽行署覆覈提勘。並飭司道等。遇一切文冊。隨時辨結。不必拘牽駁詰。俾州縣盡心實政。得旨。惟在汝實心妥協辦理。好名之習。切不可存。○閩浙總督喀爾吉善。福建巡撫陳宏謀。奏據泉州府惠安縣知縣邵應龍詳稱。該縣糧戶疲頑。每年秋成後。縣令赴鄉親徵方納。十

月內循例赴鄉。玉山鋪。山尾村莊。頑抗不理。嗣復親往催徵。詎糧戶不服拘比。爭持棍石毆傷差役三名。並向縣內擲石。當場獲犯何獻。何篤。衆始分散等情。臣等即差弁飛諭泉州府知府。並城守叅將。帶兵役搜拏。據報。續獲犯十八名。均係何姓。餘未獲奸民。並分路嚴緝。查抗糧拒捕。聚衆毆差。强悍已極。現飭將已獲各犯解省。并俟餘犯拏齊。逐一從重定擬。得旨。此風甚不可長。必應從重多處數

實錄卷四十五

三

人。庶令知畏。仍一面辦理。一面奏聞。○署福建陸路提督漳州總兵富海奏報巡查營伍情形。并稱防範地方。匪徒斂跡。得旨。覽奏俱悉。漳州風俗强悍。一切汝應留心。安輯地方。勉之。慎之。勿圖苟且塞責而已。○署湖南巡撫范時綬奏。辰州府屬之鎮草鎮。民苗雜處。隸鳳凰廳通判管轄。該廳原貯穀七千石。續於乾隆十四年。額增至一萬石。倉廩舊建鎮東南二十餘里石羊哨。山路崎嶇。每遇借糶。

附城兵民挑運甚艱。查石羊哨。現貯穀較續定額數。尚缺三千石。請以現應買補穀。分貯鎮城。以便就近動支。得旨。如所議行。○甘肅巡撫鄂樂舜奏。外邊防要地。積貯最重。查沙州衛。貯糧七萬石。安西。柳溝。靖逆。赤金。四衛。止貯一。二。三萬石不等。未甚充盈。請採買小麥。撥交西衛三千石。柳溝。靖逆。衛各五千石。赤金衛六千石。價銀於續辦夷使熬茶款內動支。報聞。

實錄卷四十五

三

大清高宗法天隆運至誠先覺體元立極敷文奮武孝慈神聖純皇帝實錄卷之四百五十一

大清高宗法天隆運至誠先覺體元立極敷文奮武孝慈神聖純皇帝實錄卷之四百五十二

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加二級軍功紀錄一次直隸

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級直隸內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉十二月辛巳朔

上諭

大高殿行禮。○壬午定外任武職借支養廉例。諭前因文職官員自京赴任盤費維艱往往重利借貸是以准其預借養廉武職官員未經議及嗣後副將以下著加恩照文員之例一體准其借給其應作何酌量省分及扣除歸款之處交該部分別定議尋議除八旗駐防官員例支廩給路費及不由部選之衛所守備千總各省在外拔補之千把均毋庸議

外其副將以下等官應按省分職銜定議雲南副將借銀四百兩叅將二百四十兩遊擊二百兩都司一百五十兩守備一百兩貴州副將借銀三百六十兩叅將二百二十兩遊擊一百八十兩都司一百三十兩守備九十兩均限二年扣繳四川廣東廣西福建甘肅湖南副將借銀三百二十兩叅將二百兩遊擊一百六十兩都司衛守備一百二十兩營守備八十兩衛所千總六十兩營千總四十兩江西浙江湖北江蘇安徽陝西副將借銀二百八十兩叅將一百八十兩遊擊一百四十兩都司衛守備一百兩營守備七十兩衛所千總五十兩營千總三十五兩均限一年半扣繳河南山東山西副將借銀二百四十兩叅將一百五十兩遊擊一百二十兩都司九十兩衛守備八十兩營守備六十兩衛所千總四十兩營千總三十兩直隸副將借銀二百兩叅將一百二十兩遊擊一百兩都司

七十兩。衛守備六十兩。營守備五十兩。千總二十五兩。均限一年扣繳。統於引見得缺後。兵部彙知戶部。盤費缺乏者。令該弁持劄赴部具領。不願者聽。仍知照各省。俟該弁到任後。於名糧養廉內。按限扣歸。從之。○諭軍機大臣等。舒赫德等奏稱。豫東兩省協濟稽料。河南船運尚易。山東船少路遠。挽運實屬拮据。今兩壩現存及豫省未完稽料。足濟工需。其東省已起運者。照舊交廠。未起運者。應即

停止。以蘇民力等語。此所謂知其一。未知其二。東省稽料。業經由官給價採辦。若遽行停止。則在百姓已交復領。恐領回者十不及五。而原給價銀。轉應按數追繳。非所以蘇民力。乃適以滋民累耳。但現在工需已足敷用。而東省挽運。實屬艱難。則不妨令其陸續緩緩運交。其於民力似亦可稍紓。若其官尚未發價者。照伊等所議。即令停辦。總在不擾民。不滋弊。諸凡皆可權宜辦理。可傳諭舒赫德等

酌量緩急。妥協辦理可也。○癸未。調甘肅寧夏鎮總兵韓錡為涼州鎮總兵。○旌表守正捐軀之湖北長陽縣民楊開信妻周氏。○甲申。諭纂修會典。開館已屆七年。而所纂之書。尚不及半。每次進呈諸帙。多經朕親加改定。是時既遲延。書復草率。該館總裁官。所司何事耶。著交部察議具奏。定限一年告竣。如屆限不完。必將伊等嚴加議處。其表曰修甫經到館。不必交部。○乙酉。

上詣

皇太后宮問安。○諭軍機大臣等。據方觀承奏稱。本月初一。初三。等日。省城得雪。積地六寸。麥田資潤。蟲孽可冀。潛消等語。李因培亦奏順屬同日得雪。但豐潤。玉田。得雪較少。向東灤州一帶。未知何若。今年京東蝗蝻。最為蔓延。至八九月間。其勢猶熾。後因秋深消滅。乃時令節氣為之。非關人功撲捕之力也。現在彼地雪既稀少。恐明年蝻孽。或致復萌。不可

不豫思消弭之道。可傳諭方觀承。令其及此冬春之際。先事綢繆。以杜來年之患。○又諭曰。護理江西巡撫王興吾奏報銅船過境摺內稱。據布政使王興吾詳稱等語。外省辦理案件。雖以一人兼署。亦必彼此批詳。以備案牘。而題達時。率亦輾轉聲叙。此各省相沿故套。實陋習也。乃王興吾於奏摺內。亦如此措詞。可見其拘泥而不達於事理矣。著飭行。○又諭曰。楊應琚奏東省辦運稽料全數完竣一摺。所辦甚為迅速。前因舒赫德等。以豫省稽料足濟工需。奏欲停止東省未經起運稽料。朕即降旨傳諭。以既經官辦。難於中止。今據奏俱已辦齊。若令發還稽料。追繳原價。豈不重為民累耶。但東省船隻實少。未免運赴維艱。著仍遵前旨。陸續緩運可也。將此再行傳諭舒赫德等知之。○又諭曰。范時綬請嚴礦廠容留匪類一摺。內稱寧鄉縣斬犯胡正乾。越獄脫逃。改名謝沛天。逃往廣西慶遠府

南丹廠。訊係伊兄胡正選供出。始行選差查緝。果於該地拏獲。礦廠之內。似此改易姓名。藉貫潛逃藏匿者。難保其無人。現在馬朝柱等。各案要犯。恐有窩藏。請將在廠各項人夫。按照姓名年貌。住址籍貫。行文各原籍地方。確查相符。方准留工等語。各省礦廠。聚集人多。類皆無賴匪流。易為遁逃。淵藪。現在逆犯馬朝柱。遠颺無蹤。安知不於礦廠人夫。厯雜處所。易名藏匿。似此設法查拏。亦屬辦理之一法。但因查拏馬朝柱等要犯。偶一行之。則可。若循以為例。則日久懈生。未免視為故套。仍屬有名無實。將此傳諭各該督撫知之。○軍機大臣等議覆。閩浙總督喀爾吉善等奏。買補倉儲一摺。查閩省環山濱海。產穀無多。臺灣素係積米之區。挹注較易。今該督等以臺郡戶口日繁。倉欠亦多。請就近買補。俟臺穀補足。遇內地歉收。再赴臺買補。應如所請。又稱臺穀每石。例價不敷採買。請酌量加增。

並暹羅每年餘米多寡難定。應聽商自販。均應如所請。至所稱採買穀石。於秋成後。照市價給發。限歲內交倉。易滋情弊。應行令該督等。轉飭地方官。隨買隨交。無庸豫給。從之。○吏部議准。雲南按察使沈嘉徵奏。稱私鑄案犯。定例既分別首從。擬請嗣後。拏獲首犯。並各犯者。照例議叙。若任首犯脫逃。及不實力躡緝。請將該地方官。扣限查叅。從之。○諭除山東官臺。西縣二場。平度掖縣二州縣。乾隆十六年分。蠲廢地畝額賦。○旌表守正捐軀之河南商邱縣民劉赫翰妻吳氏。○丙戌孝惠章皇后忌辰。遣官祭。

孝東陵。○諭軍機大臣等。普福覆奏災地情形一摺。又屬迴護取巧矣。災地情形。伊從前未經入告。自是伊糊塗之處。既經申飭。惟應據實引咎。乃既云傳聞大概。未敢瀆奏。又云於十月內附摺陳明。為此影射之談。其不合處。又不但前此之疎忽不奏矣。此番調任。原因

兩淮現有災務。伊之才力不能辦理。是以仍令吉慶前往。伊抵長蘆後。若不能循守吉慶章程。又致諸事廢弛。朕必當重治其罪。可一併傳諭知之。○又諭曰。普福奏續勘被水情形一摺。據稱富安。安豐梁垛。東臺等四場。成災六分。河垛丁溪二場。低窪之處。成災六分。小海草堰劉莊伍佑新興等五場七分。先報成災八分之廟灣一場。增至十分以上。富安十一場。被災六七分。請照例分別賑給。至廟灣一場。已經賑過兩月一月者。請再增賑兩月。各場應徵折價及借欠未完等項。分析蠲緩。所需賑恤銀穀。在於鹽義倉及本年商捐項下動支等語。吉慶此時已經抵任。將此速行傳諭吉慶。令其會同鄂容安。莊有恭查明妥協辦理。務使場竈被災各戶。均霑實惠。毋遺毋濫。以慰朕懷。○又諭向來治河有用混江龍之法。臣工中屢有以此為言。且謂靳輔亦曾用之。朕意前人雖有此法。恐亦紙上空

談未必實能奏效。株守陳編者。或見為新奇可喜耳。尚書蔣溥又稱。明人亦云。混江龍殊不可行。前河臣靳輔疏。濬河淤之鐵埽。似較便捷。其法於二里半一墩。每墩一船。船尾各繫鐵埽。第二令河兵往來疏刷等語。是二里半之長。以河面兩岸相距之廣。僅船二隻而一月又僅有三日之期。彼弁兵之用力與否。尚難期必。豈能望其一律深通。看來亦未必大有裨益。即如今日普福摺內。以泰州之斗龍王家二港。現在淤淺。委員攜帶混江龍前往分頭疏導。漸獲通流。此以施之於支河小港。或易於見功。非所論於挾沙奔注之黃河也。但亦不妨姑一試之。試之而效。固為有益。即行之無效。亦非有大損。不若開濬黃河北流故道。諸說之迂遠難行也。且嵇璜亦主此議。著傳諭舒赫德等。於合龍後諸事告竣。會同奉命諸人查勘。混江龍鐵埽之法。均不妨試一行之。其適用與否。不過一二日即

可立見如不可行。亦可釋羣疑而息異論矣。再北岸大引河。現在已告成。未並近日埽工情形若何。仍不時據實奏聞。以慰懸念。尋舒赫德等奏。連日進埽大溜一半迴趨。正河過行迅速。已開放北岸大引河。更無阻滯得旨。欣慰覽之。劉統勲等奏。試放混江龍鐵埽。往來多時。僅刷深寸許。黃河急流奔注。旋疏旋淤。斷難恃此深通。得旨。足見浮言無資實濟。然不如此試看。其執書以說者。猶以為可行也。○又諭朕昨遣侍郎玉保往諭車凌等。今思伊等曾否出痘之處。未經諭及。可傳諭成衮扎布。俟車凌車凌烏巴什到軍營時。即行傳諭。伊等遠來歸誠。必急於瞻仰朕躬。但蒙古部落中。未經出痘者甚多。京城氣候與邊塞不同。伊等到此。即傷一僕從。朕心亦為不忍。著將伊等及所部詳悉詢問。曾否出痘。再行酌量同來。不可忽畧。况明年夏令朕巡幸熱河。其地較京城涼爽。若今冬未得前來。

將來自可於彼處瞻仰。更與入京無異。斷勿
汲汲赴京。轉負朕矜恤之意。將此明白曉示。
至伊等現駐烏里雅蘇台。俟來年移居呼倫
貝爾。一應事宜。著成衮扎布來京之日。會同
軍機大臣定議具奏。○賜欽差尚書舒赫德
劉統勲。總督策楞。及奉差出力各員。銀兩有
差。○丁亥。

上御乾清門聽政。○協辦大學士吏部尚書孫
嘉淦遺疏聞。諭曰。孫嘉淦老成端謹。學問淵
醇。宣力有年。勤勞懋著。前因患病。即遣太醫
調治。並命皇子前往看視。尚冀速痊。今聞溘
逝。深為軫悼。著派散秩大臣一員。侍衛十員。
往奠茶酒。賞銀一千兩。辦理喪務。所有應得
卹典。該部察例具奏。○諭軍機大臣等。據成
衮扎布奏稱。準噶爾宰桑瑪木特來追車凌。
既經阻止。復強入我邊卡。其後噶爾藏多爾
濟等。又有來追之信。已就近調遣豫備兵丁。
先以理曉示。再為相機辦理等語。所辦尚合

機宜。但準噶爾人等。若遵行和好。應在卡外
聲明緣由。靜候處置。乃我卡上人等阻止。瑪
木特並不遵行。直入內地。是太輕視我兵。如
入無人之境矣。不惟國家大體攸關。亦眾喀
爾喀部落聲名所係。理應相機擒勦。又何必
以和好為言。夫卡座乃邊陲定界。彼此不可
相踰。今瑪木特既直入無懼。倘仍聽其自行
回巢。則將來準夷得志。必至漸生覬覦。出入
無忌。近日準夷內亂。堂堂天朝。固不肯乘釁
發兵攻取。若窮蹙來降之人。朕為共主。豈忍
不容留養育。使車凌等在卡外為瑪木特追
及。尚可不必往援。今已入卡。而瑪木特冒昧
恃強。儼然挑釁。豈可輕縱。成衮扎布等。既經
派兵策應。伊等或知斂跡。尚可徐觀動靜。倘
恣肆妄行。自當以逸待勞。盡為勦絕。且瑪木
特帶兵二百。直入之時。若果即為擒獲。羈候。
則續來之人。自不敢逞。此時作何辦理。速行
具奏。侍郎玉保。頗悉準夷情事。著在叅贊大

臣上會同將軍等相機酌辦。前鋒統領努三散秩大臣薩喇勒並著在叅贊大臣上行走。速行前往協同辦理。○吏部議覆兵部右侍郎李因培奏稱外省會稿積習往往主稿衙門事已題咨始送兼轄衙門會畫請通飭各省遇應會事件必所會衙門畫覆後方准題咨事關緊要尤當豫為札商俟意見符合然後具稿會送沿舊習者叅處應如所請凡緊要事件須商辦者令主稿衙門札商俟畫覆後題咨至照例事件應聽主稿衙門一面題咨一面知照存案毋庸會銜行令各督撫分別辦理從之。○命尚書舒赫德赴鄂爾坤軍營辦理軍務。○以翰林院侍講學士富德充日講起居注官。○以翰林院侍講學士溫敏為詹事府詹事。○戊子。

上詣

大高殿行禮。○幸瀛臺。○諭軍機大臣等據貴州巡撫定長奏營員積習未除遇有地方公

事大率假公張皇自謂留心汛守更堅執嚴繩苗夷停止礦廠之成見請特頒諭旨嚴加訓戒刊榜豎立俾積習頓除實於苗疆有益等語定長所奏亦是但此事毋庸特頒諭旨黔省撫臣向來俱經加銜節制通省武弁在均歸管轄嗣後惟應加意體察凡係向來相沿陋習務必留心振刷庶營員漸知循分守職不致妄生事端遇有地方公事彼此和衷商辦自無掣肘之虞庶於邊地民苗均有裨益可傳諭定長知之。○戶部議覆船廠將軍傅森奏稱寧古塔地方丈出裁汰泰寧縣交糧地畝及開散民地並寄入旗人名下開墾地共一萬六千七百四十四畝請入船廠民冊內耕種交租查裁汰泰寧縣並開散民人地畝接年自有承種之人應照舊令其耕種交租其寄入旗人名下開墾地畝應徹出歸公招佃令該將軍將承種人戶逐年報部至所稱租銀應照船廠地丁錢糧徵收之處

查從前船廠寧古塔等處。丈出民人餘地。分別上中下。則徵收。應照例辦理。從之。○已丑。諭軍機大臣等。準噶爾瑪木特。以二百人闖入邊卡。甚有輕視我兵之意。若不加以懲創。將來噶爾藏多爾濟。阿睦爾撒納。必愈加恣肆。如入無人之境。是邊界駐劄兵丁。徒有虛名。何以保護喀爾喀耶。在守卡兵丁。僅二三十名。豈能以理曉諭。阻止二百之衆。成衮扎布。達清阿等。即應派兵擒剿。何以姑息玩愒。至此。可將現在如何辦理之處。速行具奏。將來瑪木特。即束手就擒。告求歸順。亦非車凌等可比。仍應看守請旨。或伊自度兵力微弱。逸出卡外。亦必盡為搜捕。不得寬縱。至噶爾藏多爾濟等。倘或繼來。諒成衮扎布等。自必豫為籌備。看此情形。事已不可中止。非應虛言和好之時。我卡座遊牧。必須速移內地。使賊毫無所犯。其新來歸降之人。一切安撫事宜。更為切要。可傳諭成衮扎布等知之。○戶

部等部議。覆前署兩廣總督班第。廣東巡撫蘇昌奏稱。濱海地方。漲出沙灘。每處多至萬餘畝。少或數百畝。廣州府之南海。番禺。東莞。順德。新會。香山。尤多。盡開成田。於民食有濟。但南海等縣。地大事繁。於報墾案。俱委典史巡檢查勘。不能彈壓。請專交廣州府海防同知管理。遇開墾爭控事件。查勘詳報。並於該同知關防內。添入兼理沙政字樣。應如所請。從之。○山東巡撫楊應琚。覆奏高堰隄工。需用石料。東省現有開熟山廠。若往徐州開採。隔省呼應不靈。請仍在熟廠採運。高堰動工。先用江南就近開採之石。東省待運石料。一俟開壩。即速運往。得旨。諸凡妥協。但速運石料。毋以可緩致誤。尤佳。○庚寅。諭戶部尚書蔣溥。著協辦大學士事務。吏部尚書員缺。著黃廷桂補授。仍管四川總督。不必來京。其吏部漢尚書事務。著鄂彌達署理。○諭軍機大臣等。高晉以伊叔高斌。獲罪寬宥。具摺謝恩。

高斌債事獲罪。經朕格外矜宥。舉家宜如何感激。伊若以為不必奏謝。即可無庸具摺。乃遲至兩月後始行奏謝。而摺內詞語又皆浮泛通套。竟與尋常加級紀錄照例謝恩者無異。是全不知感戴朕恩者矣。著傳旨申飭。○又諭。各省六年俸滿教職。前經降旨令該督撫酌量甄別。應保題者保題。應休致者休致。其留任者則概令送部引見。此係九月內頒發之旨。近據陝西巡撫鍾音將所屬俸滿教職甄別具奏。陝省距京較遠。尚已遵旨辦理。直隸山西等近省。何以轉未奏到。著傳旨詢問。尋直隸總督方觀承奏。俸滿教職前接准部文。已飭由司出考詳驗。嗣思由司行查。不若該管道府州見聞確實。現因清查各屬倉庫。責成各道府州挨查。即令就近將各教職確察出考送驗。俟赴省齊日。當即分別遵辦。得旨。所辦實屬遲延。調任山西巡撫胡寶瑤奏。遵旨甄別教職。已飭布政司詳查。緣新任

學臣蔣元益於十月終到任。始會同商辦。現將應保題者疏題。應引見者已先有送到之平遙縣教諭郭名京等。餘俱嚴催到省。陸續咨送報聞。○又諭曰。瑪木特來追車凌。闖入邊卡。卡上官兵雖少。但成衮扎布已遣貝子車木楚克扎布。公密什克。領兵駐於巴顏珠爾克等處。防禦追兵。若遇瑪木特等。何難擒。勦。又成衮扎布奏稱。達清阿與車登扎布已領兵前往庫克嶺等處。相機戰守。果否親往。及與瑪木特相遇。如何辦理之處。可傳諭伊等速行奏聞。○兩江總督鄂容安覆奏。隄工石料。前於江寧蘇州常州所屬。委員採鑿。業經奏聞。現查上江宿州下江丹徒亦可開採。已飭廬鳳道督辦。今決口即日合龍。徐州雲龍山。呂梁所產石料。更可就近採運。得旨。覽奏俱悉。○加賑山東蘭山。郟城二縣。本年水災飢民。○辛卯。諭據定長奏。提督丁士傑。致書囑託。欲將普安縣知縣馬中驥。調補普定。

縣缺一摺。提督為封疆大員。惟應整飭營伍。綏靖邊圉。至州縣官之遷調。自屬督撫專責。武員何得干預。乃致書囑託。越俎行私。此風斷不可長。丁士傑著來京候旨。定長據實陳奏。頗為持正得體。摺並發。○諭軍機大臣等。據定長奏貴州提督丁士傑居心行事偏袒。膽徇。不知大體。營員之積習未除。兵丁之驕縱有漸。近又有私書囑託。將普安縣知縣馬中驥調補普定一事。已有旨諭部。令其來京候旨矣。丁士傑徇私多事。必不自定長抵任之後始開泰在黔為時已久。何以並未奏及。看來不無膽徇容隱情節。抑或定長與丁士傑別有意見不合。藉事挾嫌之處。俱著開泰據實具摺奏聞。尋奏。丁士傑語言舉動。貌露蒼猾。然諳練營伍。於有關考成事件。尚不廢弛。至黔地官員賢否。亦未見有徇私之處。即如普定縣。係該提督駐劄地方。臣在黔先後縣令疊易。丁士傑從無隻字干預。至定長與

丁士傑是否別有不合。實無所聞。報聞。○以貴州古州鎮總兵宋愛為貴州提督。調貴州鎮遠鎮總兵唐開中為古州鎮總兵。雲南普洱鎮總兵吳三傑為鎮遠鎮總兵。○調福建臺灣水師副將張勇來京引見。○壬辰上詣。

皇太后宮問安。○諭軍機大臣等。策楞尹繼善同於本日奏到二閘漫口工程。原估時水止深二丈。今已加倍刷深。料物多不敷用。又經發銀採辦等語。此項物料。必採之該處民間。但策楞另摺。又稱積水之後。柴草稀少。民間買用頗艱。今復加採買。則柴草必益致昂貴。殊與民未便。因思現在銅山稽料。既已足用。山東代購之料。前因已經發價。降旨令仍陸續運往江南。以備將來之用。計此時尚未全抵工次。可傳諭劉統勲等。查明何處水次較便。作速運往二閘。以濟工需。其新發價採辦者。若已發價購定。則仍以濟工。若未經買足。

者不妨留作民間薪蘇之用。總之不誤工。不擾民。權宜辦理。仍即奏聞。尋奏二聞。續辦物料。現已敷用。山東代購之料。亦全數運完。銅沛又有餘存稽料。柴價較前雖昂。淮揚一帶。素產蘆葦。民需尚不缺乏。惟徐州向係就近採辦。易至昂貴。今銅沛餘存稽料。足敷工用。少此採辦。實於民用有裨。得旨。覽奏俱悉。○又諭曰。衛哲治奏稱。外省承准廷寄事件。至離任時。只將原奉諭旨。移交後任。其曾否查辦覆奏。無由悉知。每致沉擱稽遲。宜於內署設立印冊。隨時註明。已未覆奏緣由。離任時一併密交後任。俾有稽覈。其有轉行司道者。俱用札。屬員申覆。則用稟。以昭慎密等語。凡傳諭各省督撫查辦事件。俱關緊要。屢經傳諭。令其不得叙入題本。即具摺覆奏。若應交部議者。亦不得叙入。本屬慎密之意。司道申詳立案。固為不可。但無交代稽查。則不免遲延沉擱。衛哲治此奏甚是。各督撫等。俱應照

此辦理。著於奏事之便。傳諭各督撫將軍提鎮等知之。○又諭曰。成袞扎布等奏稱。瑪木特闖入邊卡。近又畏我有備。潛行逸出等語。前據達清阿等。因防範追兵。已派貝子車木楚克扎布。公密什克。帶兵三百名。往巴顏珠爾克。博托和尼溝中間堵截。續經成袞扎布派格勒克。巴木丕勒兵一千名。前往策應。又就近派兵一千名協助。是現在兵力。不為不多。瑪木特如此任意出入。既未曾擒勦於前。又不能追逐於後。視同烏有。殊為駭異。達清阿現駐邊卡近地。何不相機辦理。夫邊卡如門戶然。豈容闖入。今瑪木特又經回巢。聽其出入。不加懲創。可乎。此時準夷內亂之秋。尚如此恣肆。數載後。或養精蓄銳。侵犯邊卡。其何以保我喀爾喀耶。達清阿等。既曾領兵防範。既著迅速前往。或以計取。或以力攻。若不能擒獲瑪木特。伊尚何顏復返。其駐防烏里雅蘇台。著烏勒登前往。至成袞扎布。於瑪木

特出入之際並未籌及擒勦方畧然則將軍職掌但須查取信息據文奏報已乎著嚴行申飭今命尚書舒赫德前往軍營一應機宜與伊等商酌辦理○禮部議覆國子監祭酒陸宗楷條奏科場事宜內稱順天鄉試錄科直隸生員向由學臣錄送貢監由監臣錄送近科有赴監錄考者亦有從學臣錄送者請飭部畫一查直隸貢監在國子監肄業者應令監臣錄送其餘在籍者嗣後請均由學臣

實錄卷四十二

三

申送從之○以故鎮國公丹津子托克托瑚襲職以故雲南姚州土州同高宗禹子禹治襲職○旌表守正捐軀之河南祥符縣民郝盧妻朱氏○癸巳諭軍機大臣等尹繼善奏堵築二閘漫口情形一摺內稱高斌從前堵口之時所築廢埽橫亘河身既礙河道復阻水勢俱應拆毀等語所奏尚未明晰高斌因堵口築埽何以令其橫亘水中轉將河水逼趨漫口以致愈刷愈深且目今應行拆毀

則前此何故鑲築著尹繼善等將現議拆毀之埽在於何處其南北壩口現行鑲築柴土處所一併速即詳細繪圖貼說呈覽至尹繼善策楞等現往二閘督辦工程尅期二十內外可望告竣甚為妥協降此旨日已為期近朕屈指待之可努力如期堵禦俾下河田地早得涸出以慰懸注此旨何日到即令回奏尋奏二閘決口高斌因湖河水盛於河身畧淺處向西下埽兩頭圈築意欲西岸開河未

實錄卷四十二

三

及合龍被衝南壩剩廢埽二十餘丈北壩剩廢埽十餘丈水退廢埽橫亘河中水勢阻攔全注漫口臣等將西邊河岸開寬拆毀兩壩廢埽並將直衝漫口之鰍魚港堵塞即從原決口處南北直接鑲築水勢平緩報聞○以故奉恩輔國公興寧子崇尚襲爵奉恩將軍赫勒布子巴啟納襲職○賑卹福建鳳山臺灣三縣本年旱災飢民○甲午諭軍機大臣等近聞江浙地方胥役舞文作弊該管官聞

有約束不嚴。足為吏治之累者。胥役等憑藉公牘。遇事輒思。因緣為奸。勢所不免。此亦不獨江浙二省為然。然使州縣官果能加意振刷。有犯必懲。伊等自無從售其伎倆。至如白役一項。向來例禁本嚴。而地方有司。或因經制衙役。不敷遣用。不得不資以分頭幹辦。遂致無藉遊手之人。竄身其中。十五為羣。雖尋常案件。亦復恣意需索。實為滋擾。著於該督撫等奏事之便。詳悉傳諭。令其留心體訪。嚴加懲治。通飭所屬實力禁止。毋任因循舊習。亦察吏安民之一端也。○補行江西乾隆十六年分大計卓異官八員。不謹官三員。罷軟官三員。年老官四員。有疾官一員。才力不及官一員。浮躁官一員。分別陞賞處分如例。○旌表守正被戕之湖北鍾祥縣民王金山妻沈氏。○乙未諭曰。劉統勲等奏報徐州張家馬路隄工。於十二月十二日辰時合龍。堵閉斷流。黃河大溜。全復故道等語。今年江南因

秋雨過多。河湖異漲。銅山決口。奪溜南趨。非尋常漫溢可比。朕夙夜焦勞。特命大臣協力堵禦。仰賴

上蒼垂佑。迅速奏功。河流順軌。從前河工積弊。因循怠玩。牢不可破。此番若非專遣重臣。到工督率。將恐曠日經年。未克奏績。今在事諸臣。俱能體朕宵旰之心。實心奮勉。晝夜急公。而員弁等遂各知踴躍趨事。工成不日。可見事在人為。此於政治實有關係。朕心深為喜

悅。舒赫德。劉統勲。策楞等。在工專辦日久。宣力居多。著從優議叙。向來外省辦理災賑。亦率視為奉行故事。非失之過嚴。使澤不下逮。即失之過濫。俾吏書土棍。侵漁中飽。鄂容安。莊有恭。衛哲治。不辭勞瘁。身親董辦賑卹事宜。俱屬妥協。復往來催辦物料。以副大工之需。俱著交部議叙。所有在事員弁。著劉統勲等。分別等次。送部議叙。該部即遵諭行。○諭軍機大臣等。劉統勲等奏報徐州張家馬路

隄工於十二月十二日辰時合龍。堵閉斷流。黃河大溜全復。故道等語。朕心深為嘉悅。已有旨諭部。至該處善後事宜。劉統勲駐工指示數日。即可交與白鍾山接辦。劉統勲著即帶領善於鑲埽之員弁兵役。前往二閘併力堵築。尅期竣工。俾下游積水早涸。毋誤春耕。以慰朕懸念。○又諭曰。王興吾奏。上猶等縣民人周華語等被穿馬褂高長漢砍傷。又劉茂江被人砍死。並揭有匿名揭帖一案。已降旨傳諭王興吾。令其速緝正兇。即行正法。以彰國憲。鄂容安現在江南查察賑務。事關緊要。未便分身兼顧。且該犯傷人帖揭跡類瘋狂。尚非馬朝柱等可比。可傳諭該督。令其遴委幹員。前往嚴拏。務獲正兇。毋使漏網。不必親自前赴江西督辦此案。若其中更有別故。或致聚眾成事。則又當酌量行之。蓋范時綬尚未到任。而王興吾又非能任大事者也。

大清高宗法天隆運至誠先覺體元立極敷文奮武孝慈神聖純皇帝實錄卷之四百五十二

大清高宗法天隆運至誠先覺體元立極敷文奮武孝慈神聖純皇帝實錄卷之四百五十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事件處管理刑部副都統事務

世襲騎都尉軍功九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十八年癸酉十二月丙申

上詣

皇太后宮問安。○諭曰策楞等奏二閘漫口於本月十二日卯時合龍運河之水暢流南注。工甚平穩等語。昨據劉統勳等奏報銅山漫口合龍。黃河復歸故道。今二閘漫口適又同日告成。奏績之神速。若有點相。而諸臣之克體朕懷。協力同心。亦於茲可見。從此運道民生均資利賴。朕心實為嘉悅。舒赫德劉統勳策楞昨已降旨。交部從優議敘。尹繼善富勒

赫白鍾山著交部一體議敘。所有堵閉二閘漫口。在工員弁。如參將厲鐸等。俱能奮勉出力。并著策楞等分別等次。送部議敘。以示鼓勵。○諭軍機大臣等。據策楞奏現在兩處漫工告成。又值封印之期。懇請赴京陛見等語。兩處漫工。已經同日合龍。雖大局已定。而善後之策。尚須相度妥辦。庶可永慶安瀾。前曾傳諭舒赫德劉統勳。令於南河事竣。即由河東直隸一路。查察河務。今舒赫德已別有差遣。策楞即會同劉統勳。應俟南河籌辦善後事宜妥協就緒。由河東直隸一帶。查覈河工。進京復命。不必以時屆封印。亟亟來京也。可傳諭劉統勳策楞知之。○又諭曰策楞等奏報二閘漫口。於本月十二日卯時合龍。朕心深為欣慰。但前據策楞尹繼善先後奏稱。原估時漫口只深二丈有餘。後因湖河兩水並發合流。愈刷愈深。至四丈六七尺不等。按其形勢。施功匪易。今奏績乃如此之速。伊等籌

畫辦理實合機宜。其如何減洩急溜。如何加鑲橋埽之處。可傳諭策楞等。令將前後酌辦情形。詳悉奏聞。尋奏。一聞漫口。與高郵湖鰵魚港口相對。前因廢埽橫亘河中。湖河水直注漫口。致口門刷深四丈餘尺。尹繼善到工。將鰵魚港堵閉。盡拆廢埽。減洩急溜。即於十二月初一日興工。壩臺加橋。初六日加鑲至十二丈。河流南注。漫口平緩。臣等分守兩壩。官兵分為兩班。用大船兜攬加鑲。每日兩壩築至三丈餘尺。遂得迅速合龍。得旨。如此。則實係尹繼善調度得宜。可嘉。朕於人之是非。從來功過不令相掩。○以故一等公伊通阿弟伊松阿。二等子安崇阿。子四保。二等子王淳子王條。三等男章武子王保。各襲爵。○頭等順義侯田國恩。三等男趙連璧。緣事削爵。以其弟田國榮趙連彥襲封。○丁酉。上御乾清門聽政。○諭軍機大臣等。開泰所奏藍山縣盤獲面生乞人一案。據稱反覆研鞫。

實錄卷五十三

三

實非馬朝柱等語。既非首逆要犯。何必急遽入告。乃查對報封。竟係每日限行六百里之件。似此昧於事理輕重。與驛遞定例有違。甚屬不合。著傳旨申飭。○改江西贛州府大濟倉大使缺。為贛縣縣丞。興安縣縣丞缺。為寧都縣縣丞。從總督鄂容安請也。○移廣西懷集縣武城鄉巡檢。駐鳳凰觀。永淳縣武羅鄉巡檢。駐甘棠墟。南里鄉巡檢。駐小黎墟。羅城縣莫離鎮巡檢。駐和睦墟。武緣縣高井寨巡檢。駐羅墟。從巡撫李錫秦請也。○以故一等子楊桑阿弟舒崇阿襲爵。○加賑江南淮安屬板浦。徐濱。中正。莞瀆。臨洪。興莊。泰州屬廟灣等七場。本年水災。竈戶並予緩徵。○戊戌。諭軍機大臣等。顧琮等奏稱。祥符縣盧家莊前。請建築支河壩。榮澤。陽武。一帶隄內。應行加築土壩。並估挑引河等工。兩摺皆屬先事綢繆。豫為明歲之計。現在南河漫決處所。悉已合龍。劉統勳策楞將次來京。可俟伊等順

實錄卷五十三

四

道前往豫省會同查勘熟籌安酌再行興築如彼處情形必須乘此冬令水弱及時趨辦目下業已估計興工可即照所請令其上緊辦理仍著劉統勳等於回京之便赴彼詳加審視務使議建各工悉協機宜足收捍禦之益而無無益之作可耳將此傳諭顧琮蔣炳及劉統勳策楞等知之令其彼此咨商○吏部議准四川總督黃廷桂奏稱舊保縣地方漢番及校磨大金川等各土目請歸新設理番同知管轄再舊保縣城內漢民滿溪十寨熟番及竹克基松岡小金川沃日等地方並請歸該同知兼轄從之○貸直隸滄州嚴鎮場本年水災竈戶籽種○旌表守正捐軀之河南永寧縣民王玉妻趙氏○己亥諭各省奏報關稅盈餘數目較上屆短少部議俱交督撫查明情由該督撫不過據監督及管關委員所報取結聲明具覆從未有察出侵蝕情節據實查叅者章奏往返竟成故套甚屬

無謂朕思關稅時贏時絀勢所不免若該監督等無故短少或任意侵肥該督撫自應隨時查察奏聞治罪如其果無情弊何必重復聲明徒滋繁牘嗣後各省奏報關稅盈餘數目該部覈覆時無庸復交督撫查奏○諭軍機大臣等從前哈密賽巴什達里雅屯田給令該處回子耕種所收穀石以四分交官六分給與回子今聞伊等生計稍艱著加恩將每年耕種所獲穀石不必交官全行賞給○以盛京兵部侍郎卞塔海盛京戶部侍郎德爾格對調○庚子

上詣

皇太后宮問安○諭軍機大臣等雅爾哈善奏杭州駐防兵丁七達兒等與民人翁岐周等互毆一案各省駐防旗民皆同城居住從未
有爭忿互毆之事惟杭州近年屢經犯案此風斷不可長旗民同為國家臣庶各應安分守法何致動輒相爭乃鬪很成風呼朋引類

隱分黨羽。袒護助毆。此所關於風俗人心者甚大。非重加懲儆。無由力挽頽風。七達兒等一案。該撫僅擬照常辦理。不足示懲。著將在場爭毆人犯。不論旗民。按名拘提。研訊確實。俱行發往吉林烏拉當苦差。嗣後該處旗民互毆之案。無分曲直。俱著照此辦理。并將此明切傳諭。務令人人共曉。庶伊等知所畏懼。永息爭端。各安本業。亦挽回風俗之一道也。○又諭曰。永常奏稱準夷貿易之期將屆。請仍舊暫為官辦。照例動帑豫備等語。看來可不必先期豫備。此時達瓦齊與訥默庫濟爾噶爾。彼此構兵。應無暇計及貿易。但夷人有利必趨。或仍循往例。遣使前來哈密。亦未可定。可傳諭永常。令其即行却回。并曉以從前加恩噶爾丹策零。是以准其按年貿易。嗣策妄多爾濟那木扎勒暨喇嘛達爾扎。乃噶爾丹策零之子。今達瓦齊非其族類。且由弑奪而得。又並未遣使請安。何得仍循往例。况近

日瑪木特前來北路。闌入邊卡。繼復畏懼逃回。現在遣人前往究問。若達瓦齊知犯界非理。縛獻自贖。並遣使奏明。或可仍准貿易。此時不當遽許。如來使不肯即回。宛轉求請。即應剴切曉諭。俾知恩不可以倖邀。倘在邊生事。即與賊人犯境無異。自當相機擒捕。不得聽其猖獗。著傳諭永常妥協辦理。務合機宜可也。○兵部等部議准。河南巡撫蔣炳奏稱。襄城營守備准部議改汝寧營守備。移駐商城。並新設商城縣牛食畝巡檢。外委羅山縣大勝關巡檢。請各鑄給印記。牛食畝至水東寨八堡。大勝關自仙花店至九里關十三約。悉歸該巡檢管轄。設皂隸二名。弓兵八名。由該縣民壯內撥隸。商城守備。大勝關巡檢。衙署。動項興修。牛食畝巡檢。外委。現議租住民房。不必設署。租費於公費銀內支給。均應如所請。從之。○又議准。四川總督黃廷桂疏陳。雜谷腦善後事宜。一。移駐官兵。查威茂副將

轄十三土目。額設官兵一千二百餘員名。駐茂州。今雜谷改土歸流。梭卓松岡大小金川沃日等處。接連舊保。請將副將並左營中軍都司。移駐舊保彈壓。茂州增設都司一員。於協標原額官兵內。撥經制千總一員。把總三員。馬步兵四百名。外委千把三員。餘官兵八百員名。應派經制千總一員。把總二員。馬步兵三百名。外委千把三員。歸右營都司。駐雜谷。餘官兵五百員名。應隨副將并左營中軍都司。移舊保。一分駐弁兵。查雜谷官兵三百餘員名內。撥把總二員。分駐維關。卜頭。外委一員。住丹占木。雜谷留都司一員。千總一員。馬步兵各按營分撥。茂州官兵四百餘員名內。千總一員。駐保縣。把總三員。分駐汶川。茶關。通化。馬步兵亦各按營分撥。新移威茂副將改維州副將。茂州新設都司。改茂州營。仍歸維州協管轄。均給關防。一移貯倉糧。查瀘寧營原貯米二千石。裁移官兵後。止存官兵

三百餘員名。請以五百石。歸并冕寧縣存貯。備該營之用。以一千五百石。改貯理番同知。資兵民之用。雜谷保縣。現存剩軍米雜糧。足敷存貯。估建倉房。並斗級書役。應需銀兩。統於瀘寧廳裁剩鋪司工食內撥給。一安設文員。查理番同知。駐劄舊保。催徵夷賦。聽斷詞訟。應需通事。譯字各一名。工食請於嘉定寧遠雅州敘州四府通判衙役內裁給。順慶府司獄裁改理番同知照磨。原設門皂各一名。不敷差遣。請於松潘。打箭爐敘永。照磨內裁撥。一修葺衙署營房。查舊保移駐。副將有都司衙署可改。都司有千總衙署可改。千總衙署。並存城兵營房有舊基可修。分駐兵營房。應估造。均動項興修。一嚴禁漢奸。查雜谷番民錯處。外商貿易。令向本地方官領照。至舊保。赴理番同知衙門繳換漢夷印票。到雜谷。送都司驗准貨買。貨完帶原照層次繳銷。並令各衙門按次知會。均應如所請。從之。○以

盛京工部侍郎吳拜。盛京刑部侍郎蘇章阿對調。○以廣東右翼總兵官畢暕為鑾儀使。○旌表守正捐軀之直隸蔚州民武興妻周氏。○辛丑。

上詣

皇太后宮問安。○諭軍機大臣等。昨因永常奏請豫備準夷貿易一事。已降旨傳諭。不必豫備。但現在北路情形。永常未能稔悉。可將成衣扎布前後奏到諸摺。及所降諭旨。一併鈔

字樣卷五十三

十一

寄令其閱看。此時達瓦齊方與訥默庫濟爾噶爾爭持未決。現又因車凌等投誠。瑪木特追截擅入邊卡。正在究問。斷不應准其照常貿易。若係遣使請安奏事。自不妨令其來京。計彼中即有人來。亦必須明歲春夏間。倘有夷人到哈。即令通事向夷使云。汝等如係請安奏事之人。即准入京。並傳諭正欲詰問北路犯卡情事。汝等若係照常貿易之人。則達瓦齊構釁自立。並未奏准。况瑪木特犯我邊

界情由。現在究問。應俟查問明白。達瓦齊遣使奏懇之時。再行酌量加恩。此時未便代為瀆奏等語。諭令回巢。彼若宛轉懇求。亦當諄切曉諭。即交易夷商等。俱應令之共曉。俾知從前貿易。本是加恩。並非需用伊等貨物。以杜其冀倖之心。倘或強入邊圍生事。即遵照前旨。相機辦理。此中輕重緩急機宜。恐非王進泰。治大雄等所能體會。可令永常審時度勢。悉心籌酌。明年約計貿易。夷人應到之時。

字樣卷五十三

十二

不妨借巡邊為名。先期前往哈密。更可就近隨宜妥辦。○刑部議覆廣東巡撫蘇昌奏。解役陳瑞。將秋審情實。絞犯蔡王興。受賄故縱。請依新例。將該犯役陳瑞。擬絞監候。入本年秋審情實正法。得旨。蔡卒得賄故縱。重囚。律載與囚同罪。如所縱之犯。應入秋審情實者。將該犯亦即入於情實。前經降旨通飭。著為定例。此案差役陳瑞。將應入情實之絞犯蔡王興。中途賄縱脫逃。刑部比照此例。將陳瑞

擬絞監候。並入本年秋審情實。奏請行文該省。即行正法。所辦甚是。但朕詳閱原案。該犯得賄故縱。事在未奉諭旨之前。定例通行。尚未知悉。其情節似稍有可憫。陳瑞一犯。依擬應絞。仍著監候。秋後處決。若於奉旨後。有敢以身試法。悍然不顧者。即當遵旨定擬。斷不容少寬矣。並將此通行曉諭知之。○壬寅。諭軍機大臣等。據富勒赫奏。南河從前工程告竣。而案件尚未完結者。乾隆三四等年。興修水利。部駁未銷之案六七案。乾隆八年。有五十餘件。請勅交劉統勲等。逐案清查。勒限完結。再從前水利動用錢糧。工程告竣後。尚有存剩平飯銀五萬六千餘兩。存貯河庫。前任道員何燭。朦朧具詳。咨部充公。數年來任意開銷。絲毫無剩。不無混冒情弊等語。水利工程。久經完竣。其所用款項。經部駁查者。應銷應賠。自應速為查辦。何至歷年沉擱。累積如此之多。此即係向來河工玩弛之積弊。劉統

勲策楞現在南河。著交與伊等。就近察覈。逐案清查速結。至平飯一項。歷任道員何燭等。果否影射侵蝕。劉統勲等。一併查明辦理。○癸卯。諭軍機大臣等。蔣炳奏稱。顧琮足疾復發。起坐甚艱。精神日減等語。看來顧琮病勢。自屬較重。但不知於一切河務。尚能勉強辦理。抑或竟屬不能辦事。著傳諭蔣炳。令其據實速行奏聞。○調原任直隸大同鎮總兵張乃義來京引見。○甲辰。諭軍機大臣等。豫省河員經管錢糧工料。前據顧琮蔣炳奏明。委員徹底清查。經朕明切批諭。以此皆因南河而起。足見顧琮蔣炳。素不留心。然能設法彌補。不致成大案。則汝之幸耳。今據顧琮等奏稱。查出各員折耗稻草銀。自一二百兩。至數千兩不等。俱經著令賠補。現已照數交收貯庫。此外並無虧折等語。豫省折耗稻草銀兩。果否彌補全完。此外有無虧折。俱交與劉統勲策楞於南河事竣。前往河東查勘河務時。一併

查明據實具奏○乙巳

孝莊文皇后忌辰遣官祭

昭西陵○

上詣

皇太后宮問安○諭軍機大臣等王進泰奏哈密毗連夷壤北路既有準夷大隊逃來倘再有向西路逃來夷人或準夷追逐抵我邊卡均未可定現飭各弁兵嚴加防範如遇大隊逃夷即阻留卡外詳辦真偽倘有追

兵自當宣我皇上施恩和好不便收留之處明白曉諭聽其自便若無人追趕查詢屬實務須安置僻處拘其器械馬匹等語此奏所見甚小撫馭外夷之道原在隨時籌酌相機辦理從前策妄多爾濟那木扎勒及喇嘛達爾扎先後襲為台吉念其皆係噶爾丹策零之子是以加恩准其遣使入覲今彼中現在紛爭構釁皆篡弒之人達瓦齊又非其族類何屑以和好為言其所屬夷人避亂投誠到卡乃窮

蹙來歸天朝自當收留安置何必阻留卡外絕其內附之心如或追兵來趕即當守我邊卡無令闖入彼若闖入即當拘執方為正理且投誠人等有向不便收留奏中又稱拘其器械馬匹此向來綠旗小見飾詞既許其內屬更不當示以猜疑使之駭懼非推誠布公之道現在瑪木特藉詞追趕直入北路邊卡不得不遣人前往究問已令舒赫德等赴彼相機辦理所有先後情節王進泰未能稔知著將北路節次奏摺并所降諭旨一併鈔寄閱看再王進泰摺內有偷竊牲畜賊夷字樣初閱疑為準夷及詳視始知其指北路喀爾喀等蒙古而言蒙古為內地部落偶有偷竊牲畜之事雖當照例緝拏然豈可竟以賊夷名之準噶爾夷人又將何以名之措詞亦未得體將此一併傳諭王進泰知之又諭曰王進泰不過小心謹慎之人平時尚可辦理若遇此等邊防重務未能仔肩鉅任悉協機宜

且伊於北路情形未能稔悉已將前後所降諭旨及節次奏摺鈔寄閱看著傳諭永常明歲夏秋間令其親往安西一帶悉心籌畫節制調度務協機宜庶於邊備夷情均有裨益○又諭曰喀爾吉善雅爾哈善奏浙省捐監一項藩庫收捐折色接准部咨停止其各屬倉儲皆不足額除折色赴部捐納外所有願捐本色者仍在本地方收捐以實倉儲等語已允准所請於摺內批示矣但思浙省各屬應補倉貯為數不少所有報捐本色生俊是否踴躍輻輳足敷補額之用著傳諭該督撫等令其於明年冬底將該省歲內各屬通共收捐本色若干彙數奏聞○丙午諭軍機大臣等據尹繼善奏稱河工虧空各案該參員等因虧空數多思圖狡展應追應抵款項多有牽混現在按款研鞫等語看來此又係尹繼善舊習未除不覺自然流露矣河員虧空總以一年為限如限內不完即行正法從前

所降諭旨甚明其款項細瑣舉所不論尹繼善摺內故用狡展牽混等字樣以見其查辦甚嚴而實則為虧空各員豫存地步不過欲一年限滿時仍以牽混未清未便即行正法搪塞耳此等伎倆伊自問豈能於朕前嘗試耶伊如欲為該參員等狡展惟肯以一己之首領代之則亦聽其自為計耳前者高斌張師戴陪鄉河干未即正法看此光景將來必至以現任總河真之重典而後已耶南河惡習至此不加顯戮何能痛革朕辦理庶政言出法隨務在必行著傳諭尹繼善令其知所自處再所有各參員內如防範不能嚴密或有畏罪自戕冀逃憲典者尹繼善即欲覘顏見朕其可得乎此處向已嚴諭策楞令其轉告新任今策楞之責已卸不知曾告尹繼善否耶亦令據實具奏尋奏虧空各案自當依限嚴追各參員不使畏罪自戕之旨前策楞於臣到江時已詳細告知現俱派妥役看守

仍不時密察報聞。又諭曰：劉統勲等奏稱運河兩岸土隄。今歲風浪衝刷。處處危險。磚石各工。坍塌甚多。現在確估題修。但此時高堰興舉大工。同時辦石。未免艱難。應將土磚各工。先行趕辦。其石工俟高堰石塊辦竣。再次第興修等語。所辦非是。前經鄂容安查明江南本地。現在石料儘有可採之處。毋庸山東代購。朕即降旨傳諭。高堰所需石料甚急。山東如已購辦。即仍照舊運往濟用。以山東代購之料。合之該督等江南本地所購。當已足敷各工之用而有餘。况現據嵇璜奏。山東初運石料。船隻已入江南境。則江南各處所辦。正可剋期抵次。分濟各工。又何事先趕磚土工。而石工直遲至高堰工竣始辦。前後所奏。殊屬矛盾。可傳諭劉統勲。嵇璜。尹繼善。鄂容安。查明現在已未到工石料。酌量運發各工。使得及時贖築。以收隄防之益。又如劉統勲等奏稱。現在銅沛餘存稽料三百餘

萬束。酌留本工。並撥給各廳備用。而尹繼善摺內。則又稱清口東西束水二壩。需用物料。現在上緊採辦等語。所奏亦未明晰。准徐當積水之後。柴草本自短少。民間需用薪芻。尚虞缺乏。銅沛所餘物料。即可取給。何以復採之於民。勢必益致有礙。所辦尚未妥協。可一併傳諭劉統勲等。令將各工現在實應需料若干。及銅沛大工所餘之料。是否足濟該處工需。一面奏聞。一面辦理。務在不誤工。不病民。斯為合宜耳。○是日起。

上以歲暮禘祭

太廟。齋戒三日。○丁未。諭軍機大臣等。德爾敏。富勒赫。奏高寶一帶。臨湖石工。塌卸殘缺者。現在一律修補。高堰原約估石料二十萬丈。嗣實估需十六萬餘丈。所餘三萬餘丈。請運高寶石工應用等語。辦理屬是。所奏亦甚明晰。昨因劉統勲。尹繼善等奏報採石維艱。應先辦甄土各工。即經傳諭。令將東省石料分

運濟用。今據德爾敏等所奏高堰隄工。既餘石三萬餘丈。自應運往高寶應用。且現經鄂容安莊有恭等各處分員採石。則石料自必更多。況高堰石工。並非一二月即可全竣。自必陸續用石。與其堆積候用。何如即分濟各工。可傳諭劉統勳。策楞鄂容安。楊應琚。將山東採辦。及江南本處所購石料。分運高堰高寶一帶。以副工需。不必俟高堰所需全行運竣。餘剩始行撥運高寶也。至嵇璜。德爾敏。現在專辦高堰石隄。高寶一帶。自不能分力照察。尹繼善總理全河。所有運河兩岸各工。可交富勒赫在彼專司督辦。務於明年春夏之間。剋期完竣。再白鍾山所奏張家馬路存剩物料。酌撥別廳數目一摺。亦頗明晰。所有附奏清單一件。鈔寄鄂容安等。將所需稽料。即於此內取給。不足。然後採辦。一併傳諭知之。○又諭福建惠安縣民何獻等。抗糧拒捕一案。奸民聚衆。拒捕辱官。此種刁頑惡習。斷不

可長。此案前於喀爾吉善奏到時。已經批諭從重多處數人。令知儆畏。該省漳泉一帶。民情刁悍。屢有此等聚衆抗官之事。所當嚴示創懲。俾人人知惕。不致輕犯。可傳諭喀爾吉善。陳宏謀。令其遵照前旨。速行審明。從重歸結。仍一面辦理。一面奏聞。○又諭曰。玉麟奏侍郎李因培。令知州誇喀。向兩司囑託衡水。令劉士玉一案。現令來京質對。誇喀將李因培囑託言語。同時告知玉麟。永寧等。既係屬實。何以玉麟據實奏聞。而永寧並無摺奏。著傳諭永寧。令其將實在情節。速即明白回奏。○戊申。以歲暮。裕祭。遣官祭太廟中殿。後殿。○諭軍機大臣等。左副將軍成衮扎布等。奏稱。準噶爾瑪木特。追車凌直入邊卡。旋即畏懼退回。若即用兵追擒。伊等無知之輩。必以我乘彼內亂。意存攻伐。恐陸續來降人等。反致游移觀望。請將瑪木特罪狀。降旨曉諭。

彼處頭目等語。所奏甚屬乖謬。從前康熙年間。衆喀爾喀等困於準噶爾。噶爾丹我

聖祖因伊投降。殄滅噶爾丹。將伊等照舊安插。設兵駐防。保護周至。今瑪木特帶兵出入邊卡。該將軍大臣及衆喀爾喀並未擒擊賊匪一名。及朕降旨遣達清阿追剿。仍復故意逡巡。乃云瑪木特畏懼退回。果誰欺乎。如謂阿爾台等處兵馬不能得力。豈賊匪可行。我兵反不可行。有是理耶。又云降旨於彼處頭目

人。則瑪木特可擒。試思伊等互相征戰。勝負未定。將以誰為頭目而降旨乎。總之此事自將軍大臣以至兵丁。皆意存推諉。喀爾喀等又無奮勉之心。朕實忿然。成衮扎布係醇謹之人。此奏必係努三起意。著交舒赫德秉公查問。○軍機大臣議覆。遵旨傳訊玉麟所奏李因培令誇喀囑託叅革知縣劉士玉一案。訊據各供。並無實據。查知州誇喀與府尹藩司俱係屬員。若非李因培實有令其轉致之

語。斷不敢憑空捏撰。今李因培止稱信口談說。並未囑其向兩司轉致。但據誇喀供稱。李因培論及劉士玉係伊同鄉。案情恐有冤枉。誇喀欲作自己意思。稟知兩司。或說大人亦曾問及李因培。並未叱阻。明有徇私囑託之意。應請交部嚴加議處。誇喀承上司意指。遽為轉致。亦屬不合。應一併交部議處。從之。○已酉。裕祭

太廟

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵

端慧皇太子園寢○遣官祭

太歲之神○詣

皇太后宮問安○欽差尚書劉統勳等覆奏查勘
黃河入海巨套據沿海兵民稱海口舊在雲梯
關近因海水漸退河身兩岸生淤增長百餘里
臣等查巨套均在七曲港之上巨一里十巨
僅十里套則七八里十里不等十巨去海口甚
遠河流通塞與增巨無涉即十套之下河身數
十里分流入海亦無阻遏無庸疏濬報聞○庚戌
上詣

皇太后宮問安○御保和殿筵宴朝正外藩左
翼科爾沁和碩土謝圖親王阿喇布坦多羅
貝勒特固斯額爾克圖固山貝子和碩額駙
達爾瑪達都鎮國公索諾木色楞輔國公策
旺諾爾布多羅額駙多爾濟巴林多羅郡王
琳沁和碩額駙德勒克喀喇沁固山貝子多
羅額駙扎拉豐阿鎮國公瑚圖靈阿輔國公

敏珠爾喇布坦丹津公銜一等台吉垂扎布
喀爾喀多羅貝勒丹津土默特固山貝子哈
穆噶巴雅斯呼朗圖阿巴噶固山貝子齊旺
烏喇特輔國公恭格喇布坦教漢和碩額駙
朋蘇克喇錫翁牛特二等台吉諾爾布扎木
素右翼喀爾喀和碩親王成袞扎布額琳沁
多爾濟多羅貝勒車布登納木扎勒車蘇隆
固山貝子車木楚克扎布輔國公恭格敦丹
蒙固多爾濟車登一等台吉成袞扎布三都
布羅布藏喇布坦喇布坦遜都布格扎布達
爾濟都巴扎布郭爾羅斯扎薩克一等台吉
都噶爾扎布喀喇沁一等塔布囊丹津達爾
扎茂明安二等台吉德木楚克拉旺及領侍
衛內大臣大學士等召科爾沁和碩土謝圖
親王阿喇布坦巴林多羅郡王琳沁科爾沁
多羅貝勒特固斯額爾克圖喀爾喀多羅貝
勒丹津喀喇沁固山貝子多羅額駙扎拉豐
阿鎮國公瑚圖靈阿輔國公敏珠爾喇布坦

喀爾喀和碩親王成衮扎布額琳沁多爾濟
多羅貝勒車布登納木扎勒車蘇隆固山貝
子車木楚克扎布等至

御座前賜酒成禮○是月欽差尚書舒赫德劉統
勲等奏堵築漫口員弁俱極黽勉向例無所懲
勸現酌定章程派部員會同道協董率工次臣
等日夜分守兩壩輪察得旨此次乃非常之災
自不宜照常例料理爾等不辭辛苦諸事留心
朕實嘉慰但願常堅此志速成鉅工以慰懸切

實錄卷四十五

三

耳○又議覆嵇璜條奏河工事宜一黃河兩岸
開壩宜修查黃河入江南地狹水急康熙年
間河臣靳輔於碭山縣毛城舖創建減水石
壩後因開放太早下游被淹前高斌奏定以
徐城水誌長至七尺開放今請以此為準至
王家山天然閘非異漲不得輕開峯山四閘
請仍照舊堵閉不必更張一河身宜設專員
經理查東臺同知管理閘座工程歸淮揚道
轄下河一帶並海口各閘半由場員兼管請

將下河水利即令兩淮運使協同淮揚道會
辦一堆積土牛之制宜嚴查南河額設堡夫
例於霜降後積土備搶應令總河委該管道
員參遊隨時查驗一南河五壩蓄洩須合機
宜查前高斌奏洪湖異漲三滾壩洩水過多
請將南關車邏等壩啟放又奉旨仁義禮三
壩過水三尺五寸始准開放智信二壩今酌
定以水高壩脊三尺先開車邏壩三尺以外
再將五里南關等壩次第啟放又高斌稱高
寶一帶運河東隄宜再加厚東西灣壩脊宜
稍落低此時高堰興工同時辦石未免艱難
請俟高堰工竣後興修再江蘇按察使許松
佶奏河工事宜內廳員交代宜出結咨部查
廳員交代向因查覈需時未有定限致款項
牽混不清應如所請嗣後定限三月內將經
手錢糧工程結報倘有虧缺逾違分別揭叅
道員督催不力叅處又河庫宜添設庫大使
查河庫錢糧係河庫道詳委佐雜等官收放

實錄卷四十五

三

淮安府首領官五員原可酌裁應如所請河庫道衙門准其添設庫大使一員即以淮安府照磨裁改得旨辦石工之處另有旨諭餘如議行○直隸總督方觀承奏保定雄縣駐防官兵歲需俸餉米向係清苑等縣秋收時按定價採買米貴照例奏請加值今歲米價太昂未便援例再增來年駐防應支米請於津倉存貯本年截留南漕米內撥運原撥採買銀仍扣存庫得旨如所議行○兩江總督

實錄卷五十五

五

鄂容安奏兩江數省通衢驛站最要查驗各驛馬匹類多疲乏緣驛丞微末窮員錢糧到手易歸消散州縣官因責不在己漠不關心弊孔百出從前參員逋欠雖監追終歸無著請將驛站錢糧並買馬辦料給支等事總歸州縣官經管驛丞止令應承差務照料餵養倘馬匹疲乏州縣不能先事查察即著賠補驛丞誤差濫應照例參處報可○山東巡撫楊應琚以實授奏謝並稱督辦銅山料物幸

無遲緩得旨毋自滿常如此勤慎急公自然永受恩遇矣○貴州古州鎮總兵宋愛奏前提督丁士傑奏古州等處苗人有因公役使不從恐漸成驕抗降旨飭文武各員隨宜彈壓在案臣兩守新疆如意拊循苗情俱屬寧帖至古州苗民於應備夫役一呼即至亦未見有遲誤得旨丁士傑此奏不無見長之意今以其多事調來京候旨放汝為提督汝宜仍前勉力即新疆亦不時查察可也○是年

實錄卷五十五

十

旌表孝子直隸等省張如椒等二十三名孝婦王氏等三口守節合例八旗滿洲廣壽妻鮑氏等一百四十六口蒙古三哥妻于氏等四十口漢軍劉繼志妻胡氏等十口西安等處駐防希柱妻蒙古爾照氏等九十一口直隸等省劉福銀妻李氏等七百十八口夫亡殉節直隸等省范彬妻郭氏等三十六口未婚守志江蘇等省陳聖章聘妻何氏等二十口○百歲壽民婦安徽等省段進國等三

—

清實錄
乾隆十九年正月上

—

九一五

子

上詣

皇太后宮問安 諭江南淮揚徐海及靈虹睢宿一帶地方上年被災甚重經朕降旨截漕撥帑增給賑銀多方籌辦并勅地方官加意撫綏災戶俱已得所其積水漸消之地亦皆次第補種二麥可望有收惟是今年閏月節候較遲麥秋尚早例賑之期已將屆滿窮黎餬口之資更宜豫為區畫著該督撫等就各州縣衛災地重輕查明極次貧戶再行分別加賑一月兩月其毋庸加賑者仍酌量平糶以濟民食一面督率所屬實力查辦一面奏聞該部即遵諭行尋兩江總督鄂容安奏上江災重之宿州鳳陽臨淮懷遠虹縣靈璧泗州盱眙五河并長淮鳳陽泗州十二州縣衛無分極次俱加賑兩月次重之壽州鳳臺天長潁上霍邱五州縣無分極次俱加賑一月貧生兵屬一體加賑下江災重之阜寧鹽城

興化海州沭陽五州縣無論分數極次俱加賑兩月次重之山陽清河桃源安東高郵泰州甘泉寶應銅山沛縣邳州宿遷睢寧十三州縣九十分災極貧加賑兩月次貧加賑一月七八分災極貧加賑一月稍輕之江都蕭縣碭山豐縣贛榆五縣無論分數極貧俱加賑一月鎮江淮安大河揚州徐州五衛災軍及貧生兵屬俱隨坐落州縣一體加賑得旨如所議行又諭上年江南浙江前後降旨截留漕糧共七十萬石其被災州縣復經分別蠲緩漕糧所有減存幫船甚多該旗丁等所需苦蓋日用之資若照例給與一半月糧未免拮据著將各該省截留蠲緩減船各丁於例給折半之外再加恩賞給二分以卹丁力該部即遵諭行 諭軍機大臣等現在隨同車凌車凌烏巴什投回之滿洲蒙古漢軍人等皆累世受恩之人從前被車凌等擒去竟不投回今始隨衆求降此輩並非觀常保

雅爾哈乘間投出者可比。著不論滿洲蒙古漢軍。仍交車凌等收留管束。其有向被他人擒去。今附車凌等來歸者。著另行具奏請旨。舒赫德成衮扎布。可傳旨曉諭台吉車凌等知之。至此項人內。有無官員之處。著一併查明具奏。候朕另降諭旨。○又諭曰。成衮扎布等奏稱。聞準噶爾台吉等。自相攻擊。其烏梁海宰桑圖布慎等。以其台吉不睦。勝負難以豫定。俱望車凌車凌烏巴什等復往搶擄。乘便投入天朝。又聞達瓦齊飭令烏梁海等豫備器械前來。帶同追捕逃人等語。朕曾降旨。命薩喇勒達清阿等帶兵前往查明。瑪木特入卡情事。令其乘便招降。今思準噶爾台吉等互相爭持。而達瓦齊棄其游牧。前來追捕逃人之語。殊不可信。至烏梁海如果意在歸降。誰其阻之。寧必俟車凌等復往搶擄。始行乘便投順乎。此或因烏梁海等從前追趕車凌冒入我卡。今恐我兵問罪。造言以冀緩師。

或記恨車凌等搶其游牧。設法以圖報復。均未可定。車凌車凌烏巴什薩喇勒等。俱由準噶爾來降之人。必熟悉其情形。舒赫德成衮扎布等。可明白詢問。再行辦理。至烏梁海無論有無謀取車凌車凌烏巴什游牧之意。現在既有浮言。莫如將車凌等妻子及游牧人衆量令內徙。俾得安居。並將此曉諭車凌等知之。 癸丑。

上詣

雍和宮行禮。○諭據鄂容安奏。江省驛站。每馬一匹。日給銀六分。現在草料昂貴。請循照七。年成例。加給等語。上年鳳。穎。淮。徐。各屬被水。驛站情形。不無拮据。著照所請。准其加給二分。俟本年秋收後停止。○又諭據衛哲治奏。稱安省現貯倉穀無幾。各州縣捐監生俊。除在部報捐外。有願交本色者。請在本地收捐。其應交穀數。悉照乾隆十二年事例辦理等語。著照所請。安省生俊捐監。在部報捐折色。

外有願交本色者准其在本地收捐以實倉儲仍著該督撫於歲底將各屬共收若干之處彙數奏聞該部即遵諭行○又諭本年五月朕駐蹕避暑山莊後自準噶爾來降之台吉車凌車凌烏巴什等朝覲筵宴時蒙古扎薩克等亦著入宴朕巡幸吉林盛京經過之東路三盟扎薩克等俱有應辦事件著不必來覲其西路三盟內之烏蘭察布錫林郭勒二盟距避暑山莊較近該扎薩克等著令其一併與宴俟有筵宴定期該部豫行傳諭知之○諭軍機大臣等鄂容安奏請將降調開封府知府邵大業發往江省一摺看來邵大業為人辦事尚屬明白但不能實心奮勉頗蹈巧滑習氣前在蘇州府任內黃廷桂亦曾奏及追發往豫省以知州補用或因鄂容安董率屬員不肯假借伊遂不敢復蹈前轍耳至蔣炳抵豫以來該員又不免故智復萌今請發往江省自屬相宜應俟其引見時再降

諭旨著先行傳諭鄂容安於該員將來到任後務須留心察看加意驅策如仍不能黽勉出力即當據實奏奏不可稍為徇隱○甲寅諭軍機大臣等朕閱成衮扎布與達清阿所奏二人意見彼此不合夫為將軍者必須和上下一衆志然後指麾士卒可冀致身奮勉有獲罪者將軍難免其咎有樹績者將軍功居首列至叅贊佐理將軍亦關緊要現在達清阿一人帶兵駐劄烏里雅蘇台其職甚重若一切事務必待將軍指麾而行何事不誤準噶爾追逐車凌入卡復出一事伊等前後辦理不合大失機宜奉到訓飭之旨又復互相推諉希圖輕卸已罪尤屬不合成衮扎布等措置失宜其過尚小若將軍叅贊不和各執意見以致誤公尚復成何事體伊等誠能覺悟前非諸務勇往和衷共濟以期成事則功罪相抵朕容或加恩寬宥如不能遵奉諭旨奮力自贖則獲罪益深矣此時達清阿業

將帶領烏里雅蘇台之兵起程。尚屬勇往。然達清阿車木楚克扎布等。恐不能相機籌辦。著薩喇勒。仍速行前往烏梁海。查明辦理。○乙卯。享。

太廟。遣誠親王允祕恭代行禮。○遣官祭

太歲之神。○諭軍機大臣等。楊應琚所奏。議叙東省採辦河工物料人員一摺。單內史奕昂並未列名。史奕昂係該撫奏留該省辦料之員。如因其督辦平常。不得概邀議叙。即應聲明陳奏。若謂前降諭旨。乃專指辦運銅山稽料各員而言。而於採辦高堰石料之員。遂不得一體敘入。則稽料石料。同為河工急需。豈事同一例。猶必欲候朕一一降旨耶。該撫亦不應拘泥如此。著傳詢楊應琚。俟其覆奏到日。再將此摺交部。尋奏。臣奉辦稽料在前。石料在後。稽料已竣。石料必須加工鑿鑿。甫將及半。運河道史奕昂。承委督辦。敬謹小心。臣欲俟採辦齊全之後。奏聞。前摺未聲明。原

屬疎漏。報聞。○丙辰。

上詣

皇太后宮問安。○盛京將軍阿蘭泰奏查

福陵

昭陵掌關防官缺出。例由

兩陵官員補放。惟

永陵事件。向歸盛京禮部承辦。其掌關防官缺。由五部郎中揀補。尚膳正。內管領缺。由該部贊禮郎揀補。辦理殊未盡一。請嗣後掌關防

官缺出。將

三陵尚茶尚膳正。內管領。一併揀選題補。尚茶尚膳正。內管領。缺出。將

三陵副管領。一併揀選題補。其補放

永陵官員事件。盛京禮部不必兼理。下軍機大

臣等議行。○丁巳。

世祖章皇帝忌辰。遣官祭

孝陵。○戊午。軍機大臣等議覆盛京禮部侍郎蘇章阿奏稱。養息牧牛羊。共四十場。向由京

城蒙古官員內。挑選四品總管一員。五品副總管二員。俱非本處人。不諳孳生之道。請裁去總管。副總管三缺。令本處翼長二員管理。再於四十場內。每場各放牧長一名。翼長。每人月支餉銀二兩。牧長支一兩。如有倒斃及孳生不足。即由該員等俸餉內。坐扣賠補等語。應如所請。惟查牧場雖分四十處。儘可就近兼管。臣等酌議。由牧場蒙古內。共挑放牧長二十名。每人管理二場。分隸本處翼長總理。從之。○是日起。

上以祈穀於

上帝。齋戒三日。○己未。諭軍機大臣等。喀爾吉善查辦。叅革知州李鍾俾原籍家產一摺。所辦未免過嚴。李鍾俾虧空銀兩。如果竟係侵蝕入已。則伊族中既出此不肖敗類。即搜查代補。亦所應得。但李鍾俾在直年久。前後所虧之項。既非全屬侵貪。若照該督查辦。波及族衆。殊非情理之平。著傳諭喀爾吉善。令祇

將查出本房田產。飭屬估變抵補。如此外實無寄頓。而虧項尚有不敷。則失察各上司。原有著落分賠虧項之例。即咨明直隸。照例辦理可也。○庚申。

上詣

南郊齋宮齋宿。○辛酉。祈穀於

上帝。

上親詣行禮。○詣

皇太后宮問安。○奉

皇太后居長春仙館。○辛圓明園。○壬戌。諭軍機大臣等。朕已降旨。命薩喇勒統領達清阿等前往查拏八卡之烏梁海。薩喇勒諳練行陣。熟知準噶爾性情。達清阿固遠遜於彼。即以階級而論。薩喇勒係御前行走散秩大臣。達清阿係乾清門行走副都統。品秩亦有等差。今二人合隊前往。即應視為一體。和衷籌辦。達清阿或昧於此。以薩喇勒身係蒙古。中懷不足。高自位置。諸事不與相商。或從中阻

撓牽掣。朕必將達清阿從重治罪。如二人彼此不肯相下。不能同心共濟。以致債事。必將二人俱行治罪。可即傳諭知之。○欽差尚書舒赫德奏。臣於正月初三日至軍營。會同將軍成衮扎布等。將烏梁海闌入卡情形。與卡上侍衛前後呈報文書。細加查看。始知闌入卡者。非止烏梁海。尚有準噶爾厄魯特得木齊烏巴什。赤倫。哈什哈等。應盡行查拏辦理。查厄魯特與烏梁海等。原從兩處邊卡而入。合於一處。今我兵亦分兩路。令努三。薩喇勒等帶兵五百名。查拏烏梁海瑚圖克等。并行文達清阿等。將現帶兵一千名內。挑選五百名。查拏厄魯特瑪木特。得木齊烏巴什等。又派叅贊大臣烏勒登喀爾喀副將軍車登扎布帶兵五百名。出卡接應。叅贊大臣安崇阿帶兵五百名。於附近邊卡接應。現今邊上駐兵三千。兩路共調兵二千。僅餘一千。放牧馬匹。看守營寨外。其勢稍弱。臣等於鄂爾坤豫

備之貝勒車布登。所領兵一千。西喇烏蘇地方豫備之副將軍德親扎布。郡王齊巴克雅喇木丕勒。所領兵一千。盡行調至。與貝勒車布登等。帶往烏里雅蘇台。就近助威駐劄。諭軍機大臣等。查拏入卡之烏梁海人等。疊經降旨著薩喇勒督師前往。方為妥善。今舒赫德奏。仍著努三。薩喇勒為一路。達清阿為一路。大屬不合。邊卡之外。非山則為曠野。不過由二卡出入。並無逼近賊巢。直抵伊犁之處。何必分為二路三路。若仍合兵一處。則整齊有力。易於制勝。著舒赫德遵照前旨。令薩喇勒統領烏勒登達清阿等。整齊兵力。由一路前往可也。○癸亥。

上御山高水長幄次。賜外藩蒙古王公等。暨準噶爾使臣宴。○欽差尚書劉統勲等奏。河庫錢糧。各有款項。絲毫難容侵那。而庫道係專司出納之員。更宜慎重辦理。查十餘年來。該道等。或擅行私動。數至盈千累萬。而不報部。

或任屬侵虧。竟至無著。亦不查揭。殊屬玩愒。徇縱。請將十年以後之河庫道姚廷棟葉存仁。何燭。李宏等。一併革職。交部從重治罪。得旨著照所請行。○是日立春。順天府進土牛春山寶座。○甲子。

上奉

皇太后幸同樂園。侍早晚膳。至丁丑皆如之。

御奉三無私殿。賜皇子諸王等宴。○乙丑

上詣

安佑宮行禮。○奉

皇太后幸山高水長。○御正大光明殿。賜朝正

外藩及大學士。內大臣等宴。召科爾沁和碩

親王阿喇布坦。色布騰巴勒珠爾多羅郡王

齊默特多爾濟多羅貝勒特固斯額爾克圖

喀喇沁多羅郡王喇特納錫第固山貝子扎

拉豐阿。教漢固山貝子垂濟扎勒哈密固山

貝子玉素布。烏喇特鎮國公索諾木扎木三

厄魯特鎮國公衮楚克青海扎薩克一等台

吉旺舒克喇布坦。一等台吉薩喇喀爾喀扎

薩克圖汗巴勒達爾多羅郡王桑寨多爾濟

固山貝子羅布藏車凌巴林多羅郡王琳沁

翁牛特多羅郡王布達扎布茂明安多羅貝

勒裕木充鄂爾多斯固山貝子喇什色稜郭

爾羅斯鎮國公多爾濟扎魯特鎮國公察罕

齡華吐魯番輔國公額敏和卓等。至御座前

賜酒成禮。○諭山東兗州府屬之滕縣嶧縣

魚臺縣。濟寧州。沂州府屬之蘭山縣郯城縣

東昌府屬之聊城縣東昌衛臨清衛等處窪

地積水。未盡消涸。春麥難以佈種。所有貧乏

之戶。著該撫查明。於青黃不接之時。酌借口

糧。以資接濟。其節年帶徵。及乾隆十七十八

等年。應徵地丁等項銀兩。若照常催徵。未免

拮据。著一併緩至明春開徵。以紓民力。該部

即遵諭行。○又諭。移駐投降台吉車凌等屬

下人等。沿途照料護送。及駐定後。編立旗分

佐領事宜。著麒麟保。馳驛前往經理。玉保至

彼之時。一切應辦事件。著會同麒麟保。妥速辦理。將來仍著玉保帶領車凌等。前來避暑山莊。○欽差尚書劉統勳等奏。遵旨查辦河工積弊。擬定條款。一。河工次年料物。向係上年發銀購辦。以致各廳庫年積月累。那新掩舊。臣等酌議。如上游鹽河二項。應於開閘時。購買蕩柴。請嗣後定於七月內。按照工程酌量給發。限十月內。運料到工。其頭關。十月內給發。冬底辦料到工。二關。十一月內給發。次

平奉直書

下

年二月辦料到工。刀草雜料等項。隨時請領。勒限到工。一。河工有歲修搶修之分。請嗣後每年秋防告竣後。各廳營將所管工程查勘。以逼臨大溜當衝最險者。為一等。次險者。為一等。並將應用工料確估。冊送該道覆覈。限十月底彙齊。轉詳河臣。委該管河道。參遊。照冊踏勘。覈實飭辦。限正月內興工。三月內完竣。其運河工程。向無歲修。有應豫為修築者。亦照此辦理。至伏秋搶護。難以豫定。應令該

管文武大員。不時巡查。遇有搶修工程。廳營一面動料修築。一面覈實具詳。該管大員。親行查驗。再黃河水勢。變遷靡定。如係新生大工。不在歲搶修之內者。必須該管道員。會同參遊。確估。河臣親行覆勘。一面題估。一面動支庫銀。委員趕辦。工竣。覈實造冊題銷。一。廳員辦運料物。修築工程。出入數目。向雖按月申報。然必俟料齊工竣。方行驗收。請嗣後令該營守備汛弁。一體稽查。將運到料物若干。

平奉直書

下

按十日一次。所做工程若干。用料若干。按月一次。分晰據實摺報。一。各廳銷算錢糧。向係河臣按照水大水小。約計准銷。其覈減之項。仍令辦下年工程料物。請嗣後銷算時。有經河臣覈減者。定限年內完交。年清年款。如限滿不完。查叅得旨。不過如此定法。行之則在人。若更滋弊。不妨有尹繼善在。○順天府行鄉飲酒禮。

大清高宗法天隆運至誠先覺體元立極敷文奮武孝慈神聖純皇帝實錄卷之四百五十四

實錄卷之四百五十四

太

大清高宗法天隆運至誠先覺體元立極敷文奮武孝慈神聖純皇帝實錄卷之四百五十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌正月丙寅

實錄卷之四百五十五

一

上御正大光明殿賜大學士尚書侍郎及內廷翰林等宴以冰鐙聯句○丁卯諭外省動用錢糧及工程報銷應駁應准俱有定例乃督撫往往於部駁後展轉行查不即尅期辨結或據屬員詳稟疊次聲覆請銷而該部仍復往返駁詰以致塵案疊積迨歷年久遠官吏迭更迭滋拖累此向來相沿陋習殊非敬事勤政之道現據劉統勳策楞查奏江南興修水利以來有歷十餘年至二十餘年未結之案自雍正四

五年間。塵案尚有懸擱者。此等案件。如果有浮冒。自當據實查明。催追完款。何至任意遲延。歷久不結。如果無情弊。亦當請豁免累。嗣後報銷之案。符例者。該部不得漫行駁詰。例應駁查者。至三次後。該部即具摺聲奏。按例覈減。飭交該督撫查明經手官員。照數追賠完案。或據情酌予豁銷。務令尅期速結。仍著於歲底。將未完各案。彙摺奏聞。其現有從前未結各案。著予限一年。令戶工二部。通行查

實錄卷四十五

明。分別辦理完結。○諭軍機大臣等。永常奏北路軍營。相距遙遠。凡有關係邊要之信。示諭臣知。隨時酌備等語。西北兩路。邊防事務。原屬一體。上年十二月。已將前後所降諭旨。及成衮扎布節次奏摺。鈔寄永常閱看。其續降諭旨。及奏報事件。著即鈔寄閱看。嗣後仍每月鈔寄一次。令其稔悉情事。隨時籌辦。將此傳諭知之。○調湖南布政使周人驥為浙江布政使。以湖南辰沅靖道湯聘為湖南布

政使。○已已。

上奉

皇太后幸山高水長。○庚午。諭朕於五月初六日。啟鑾前往熱河。於七月初五日。自熱河啟鑾。由吉林詣盛京。所有一切事宜。著各衙門照例豫備。○又諭。前經降旨。禮部頒發僧道牒照。復令各督撫。歲終將所減實數。具實奏聞。此原欲啟游手為良農。畧示沙汰之意耳。乃十餘年來。各省奏報。不過具文從事。且若

實錄卷四十五

輩。即盡令歸農。安得餘田而與之。轉不免無藉為匪耳。據實嚴查。或滋擾。有名無實。甚無謂。此綜理日久所悉。正不必襲復古闢邪之跡也。著停止。○總理行營事務王大臣等。奏據哲哩木等五盟長。科爾沁土謝圖親王。阿喇布坦。達爾漢親王。固倫額駙色布騰巴勒珠爾。巴林和碩齊郡王琳沁。固山貝子齊旺扎薩。克公瑚圖靈阿。恭格喇布坦等。呈稱。本年恭遇駕幸盛京。經由蒙古游牧地方。願共

備馬一萬匹。駝四百隻。車六百輛。聽候指撥應用。再請每一大營備柴炭三百車。掘井二十。尖營備柴炭五十車。掘井五。其修理道路。橋梁等事。由哲哩木卓索圖。昭烏達三盟備辦。仍曉諭蒙古等。務使商人將牛羊米麪草料柴炭。寬為豫備。由三盟派台吉官員。按價平買等語。查乾隆八年。駕詣盛京。沿途更換馬駝。皆係動項買撥。所換馬。賞給蒙古在案。今內扎薩克之五盟王。貝勒。貝子。公。台吉等。

平定錄卷四十五

四

恭進馬駝。情詞懇切。應准所請。指地撥回。備用。將來沿途換剩馬。仍請照例賞給。車輛不必豫辦。至尖營。只須柴炭十車。掘井二。儘可敷用。請派理藩院能事章京二員。會同該盟長等妥協辦理。從之。○又奏。本年駕詣盛京。自京至熱河。沿途行宮。俱有該處官兵。毋庸由京多派。請酌派侍衛二班。前鋒護軍三百名。沿途隨扈。自熱河啟鑾時。仍照八年例。另派侍衛三班。前鋒護軍一千名。隨往。其健銳。

平定錄卷四十五

五

營官員。照例派出。再自京至伊屯邊。安立臺站。照兵部。理藩院所奏辦理。自伊屯邊至吉林。英義邊。盛京。山海關。安立臺站。令該將軍。交盛京兵部辦理。其隨往熱河人員。給兩月路費。隨往盛京人員。給四月路費。所有隨往大臣。侍衛。章京等。本年秋俸。及兵丁。拜唐阿等錢糧。如有應扣之項。請寬限一季。暫全支領。經過哲哩木。卓索圖。昭烏達等盟。其扈從之官員。兵丁。應照八年所派之數減半。每盟一百五十名。同滿洲兵丁。各於本境隨扈。科爾沁。察罕諾海。巴彥。和莫爾。和地方。行圍二次。請備兵一千名。喀喇沁之哈瑪爾。三十名。隨往盛京。圍場行圍。畢即散。蒙古扎薩克等。俱在本盟境內迎送。御前乾清門行走。蒙古王。公。台吉等。至盛京後。照例各回游牧。自盛京至山海關。隨扈人員。請較八年裁一半。只用前鋒護軍五十名。兵二百名。再黑龍江。無庸多調兵。請飭該將軍。選帶漢仗好者。

五十名伺候行圍至賞給蒙古東三省人等
緞疋鞍轡腰刀弓箭等項交內務府武備院
分路豫備沿途需用賞銀交戶部具奏備用
得旨依議其隨往盛京王公文武大臣官員
及王公等護衛官員仍照八年之例准其借
俸○辛未諭軍機大臣等白鍾山奏稱銅山
新工應修月隄內有九十餘丈尚有積水必
須外放防風攔水方可施工等語銅山漫工
合龍後現今凌汛已過工程雖屬平穩但月
隄原以防護正隄而月隄內積水尚深至七
八尺至一丈八九尺不等未免浸潤隄根至
夏秋盛漲仍為可慮務宜設法疏洩導其出
路使積水消退方無後患不可但保目前而
不為久遠計也至黃河大溜灣曲南趨新隄
受其頂衝水勢甚為迅急應於引河兜水壩
以南自西至東再開引河一道分溜直流庶
新工不受衝激之險倘由此河身北徙化險
為平豈不更為妥善現在淮徐災黎待賑尚

多俾就引河工作得謀口食更兩有裨益恐
傳寄諭旨未能一一詳悉已命軍機處行走
郎中阿思哈帶圖馳驛前往可傳諭尹繼善
即至銅山俟其到日按圖詳議妥協商酌一
面辦理一面即速奏聞並諭白鍾山知之尋
尹繼善白鍾山奏大隄合龍之後奏明趕築
裹餞業已做成底牽寬四丈五尺頂牽寬二
丈二尺但較石林工幫築餞寬十餘丈之式
尚屬單薄應再加寬六丈於隄根處再鑲做
防風攔護則大壩後有餞隄可靠餞隄又有
防風可衛夏秋盛漲亦可捍禦至兜水壩東
南引河內應將南岸再加開寬六丈其河頭
向北再展寬十餘丈庶河頭更有納溜吸川
之勢而河身寬濶條直大汛水漲一經開放
可望北徙化險為平報聞○又諭據黃廷桂
奏稱川省產銅旺盛積存甚多請復設鑪鑪
增鑄一摺已交部速議矣此項銅觔與其積
久堆存誠不如增鑪鼓鑄以利民用但所利

僅在川省。近來京師錢價較前雖覺漸平。若更增鑄錢文。其用益溥。著傳諭黃廷桂。令其詳悉籌酌。如解銅來京。於運腳不致糜費。可於此項積存銅內酌量撥解。運送京局。以供加鑄之用。是否可行。據實即行奏聞。○軍機大臣等議准。護理江西巡撫印務布政使王興。奏。州縣關提人犯。應將何項緊要及關查月日通報。准關之州縣將何月日起解。及不能解送緣由。一體通報查覈。如遲延不解。該督撫照例按限查叅。至審結題咨時。亦將關到日期。扣限有無遲延。聲明聽候部議。如承審之州縣將案件不行速審。臨期諉卸。及將並非緊要案犯。藉稱關提不到。希圖掩飾者。亦即嚴叅。分別議處。從之。○壬申。諭廣東瓊州府屬儋州。萬州。地近烟瘴。水土惡劣。該處武員。已定有五年俸滿陞轉之例。而文員未經議及。所有該二州知州。及教雜等官。著加恩一體准其五年報滿候陞。以示體卹。○

甲戌。諭軍機大臣等。據喀爾吉善等奏。辦彰化縣兇番焚殺內凹莊柳樹浦兵民一案。摺內稱自上年四月。托穆齊圖到臺密訪。確係通事三甲等。又山勾引情由。節經批飭該道府審鞫數月。始得三甲等奪地起釁。及要結土目。轉糾焚殺等情。復委員研訊。而供情游混。終難定案。現在調集在臺原審各員。並原證屍親。赴省推鞫。務得實供等語。此案情節。看來確係熟番因奪地起釁。入山勾引生番。逞兇焚殺。但歷時已久。頭顱早經毀滅。何由得其確據。即如入山勾引之語。出自番目麻丹。則麻丹為案內要證。而彼係生番。必須調取質對。如或抗不聽調。未免又成一事矣。設或原證屍親。供情又復游移。將此案如何完結。豈有二十二命之重案。終歸懸宕之理。此奏雖督撫聯銜。稱現調原審各員。赴省研鞫。似屬慎重案情之意。究由陳宏謀。好名習氣。終不悛改。欲以疑獄了事耳。喀爾吉善已奏

明由浙來京陛見。所調臺員到省時。不能親自督審。著將軍新柱。會同陳宏謀。嚴審從重定擬具奏。○又諭。據喀爾吉善等奏。到審結蔡攀等匿名誣捏一摺。朕已批示。該省匿揭樹旗等案。去歲奏報者。不一而足。已屢經傳諭。令其從嚴查辦。但思犯案之多。由於人心之不靖。閩省風氣刁悍。固積習使然。然該督撫及地方官。均有化導之責。非平日諄切訓諭。俾人人知法不可犯。刁風何從而息。著再傳諭該督撫等。嗣後凡遇此等案件。俱當遵照前旨辦理。並即明白剴切。通行出示曉諭。使知犯此者罪在不宥。務令家喻戶曉。庶有所畏而不敢為。可漸收革心之效矣。○乙亥。諭曰。鄂彌達年近七旬。辦理部旗事務甚多。不必兼管尚書事務。其吏部漢尚書員缺。著左都御史楊錫紱署理。○諭軍機大臣等。刑部議覆范廷楷奏。外省州縣親友長隨。因本官離任及身故子幼。乘機偷盜錢糧計贓四

十兩以上。問擬實流。實絞一摺。該部仍照乾隆十四年定例科罪。已降旨依議。州縣遠宦各省。隨任親友長隨。本係萍蹤。尤工舞弊。其乘機串通胥役。盜蝕公帑。事所必有。但亦不必專立科條。且即從重立法。而奉行不力。則奸徒得售其技。肥橐遠颺。本官妻孥。仍受追賠之累。宿弊何由悉除。惟上司能實力查察。盡法懲治。庶宵小不致攫金恣橫耳。可傳諭該督撫等。於所屬州縣。不時加意稽察。遇有此等幕友長隨勾通侵盜之弊。務即時察出。嚴行追究。勿令僥倖漏網。斯比之空言定例。較有實際。○兵部侍郎兼管順天府府尹李因培。緣事革職。命戶部侍郎劉綸兼管順天府府尹事務。○丙子。諭涼州將軍七十五。現在患病。著賞給人參一觔。並派御醫一員。馳驛前往診視。○丁丑。欽差尚書舒赫德等奏。叅贊大臣達清阿往拏擅入邊卡之賊瑪木特。先遣侍衛齊克慎。蒙固勒等偵探信息。於

正月十六日。遣人誘至瑪木特。達清阿設計。令護軍校德明。侍衛布雲布等。於瑪木特來路。安設二卡守候。令公密什克。護軍伊靈阿等。各帶領馬步兵埋伏。齊克慎等。帶領瑪木特。在薩拉布拉克邊卡之外。引至達清阿住處。遂將瑪木特等三十五人。悉行擒獲。臣等查問明白。即行押送赴京。但瑪木特係準噶爾守界之人。被我兵擒獲。伊等不知瑪木特擅入邊卡情由。或遣人索取。亦未可定。現今烏勒登。將原帶兵五百名。在邊卡附近緊要地方防範。將達清阿等撤回。得旨從前降旨。原令達清阿領兵前往。詢問瑪木特入卡情由。應以理責其入卡之罪。倘呼之不至。或至而心懷不服。有所抗拒。即以兵力擒拏。今但遣一使曉諭。而瑪木特即親身前來。並無抗拒情形。達清阿設計誘擒。辦理非是。且蒙古人內。名瑪木特者甚多。並不詢其孰假孰真。更極舛錯。達清阿著來京候旨。瑪木特恭順。

聽命。著從寬免其從前冒昧入卡之罪。賞給盤費。釋放回巢。○琉球國中山王世子尚穆。遣使奉表入貢。頒敕宴賚如例。○戊寅。

上奉

皇太后居暢春園。○吏部議准。光祿寺奏稱。滿署正四缺。向例俱歸部選。每致更易生手。請將大官珍羞滿署正二缺。作為本寺題缺。其良醞掌醢二缺。仍歸部選。從之。○戶部議准。吏部尚書管四川總督事黃廷桂奏。川省寶川局。原設鑪三十座。嗣裁七座。現在存局銅已至一百四十餘萬。建昌所屬迤北。沙溝。紫古喇等廠。未運銅尚有八十餘萬。並建昌樂山等廠。產銅日多。每年不下百十餘萬。各廠鉛亦旺盛。請將舊鑪七座。照舊復設。以增鼓鑄。搭放兵餉俸工多餘錢文。酌中定價。設局出易。從之。○乙卯。

上詣暢春園問

皇太后安。○軍機大臣等議奏。新降之台吉車。

凌車凌烏巴什。車凌孟克等。昨已有旨令玉保帶赴熱河朝覲。其隨行人數約一百五十餘名。查自軍營至熱河。計程六千餘里。請交沿途扎薩克等安設二十四站。每站備馬一百六七十匹。駝二十四隻。羊二十隻。在附近蒙古內徵調備用。應行賞給價值。交玉保登記明確。令該扎薩克等覈實支領從之。○兩江總督鄂容安。疏奏興化縣知縣劉霖辦賑米色不純。短少升合。又虧空帑項二千餘兩。

請革職發審。得旨劉霖承辦賑務。將米攪和糠粃。短缺升合。此與尋常侵欺帑項不同。災民嗷嗷待哺。為民父母者。即實心辦理。如數給發。尚恐其不免飢餒。而乘機侵剋。罔恤民命。此豈有人心者。該督撫訪查確鑿。自應嚴參。照例請旨革職拏問。若僅照常題參審訊。何以懲儆貪邪。劉霖著革職拏問。所有攪和米色及虧缺帑項。一併嚴審究追。按律定擬具奏。嗣後有似此。而該督撫仍視為泛常。不

照例革職拏問者。該部即治督撫以徇庇之罪。○以山東登萊青道沈廷芳為河南按察使。○旌表守正捐軀之山東齊河縣民張學禮妻馬氏。○庚辰諭朕此次恭謁

祖陵。著莊親王履親王大學士來保史貽直在京總理事務。○又諭今年朕詣盛京。所有隨從之王大臣等著分為二起。一起於五月初隨朕啟行。其隨往盛京之一起。著於六月底起程。前赴熱河。至筵宴新降之台吉車凌等除留京總理事務王大臣外。其餘王大臣等俱著屆期前往熱河。一體入宴。俟朕由熱河啟鑾之次日。伊等即可回京辦事。○又諭京師為萬方輻輳之地。街衢廬舍。理應整齊周密。以肅觀瞻。乃近來京城內外。多有拆售房屋者。行戶等亦藉以居奇射利。此陋習也。現因八旗人眾。居住不敷。特發帑金增置以資棲止。該管大臣祇圖已便。率購舊料。至將已成之屋。輾轉拆蓋。料物必多耗折。是因增而

轉減於生計亦屬無益著工部步軍統領順天府尹五城御史出示嚴行禁止再五城街道泥土歲久填積增高行路居人均屬不便并令會同管理河道溝渠大臣等詳悉查勘量其修理之費動支官帑挑去積土堆置就近城外隙地此番官辦後隨時畚除自易為力并令該管衙門著照從前煤車回空攜帶沙土之例善為經理勿仍壅積但不得任聽兵役抑派滋擾將此通行傳諭知之○又諭罪人妻子分賞功臣子孫為奴以供差遣即資約束如遇陞遷外任或駐防外省應將此項人等隨帶前往不可聽其留京閒住著通諭八旗令將此等賞給之人善為約束勿離左右如有縱放以致滋事者朕必嚴治其罪○諭軍機大臣等據范時綬奏稱長沙府知府雷暢以伊母年老懇請回籍終養等語雷暢在知府中尚屬可以出力之員若因侍養就閒轉不得及時驅策伊前任山西時伊母

曾經迎養在署已降旨將伊調補陝西漢中府知府俾得就近迎養以全人子至情著該撫胡寶瑤將此傳諭該員知之○兵部議聞浙總督喀爾吉善奏浙江溫州鎮總兵施廷專收受呂宋難番饋送應照例革職得旨施廷專著革職○是月直隸總督方觀承奏查鳳河隸永定河道而東隄並韓家樹北埝坐落天津縣地方凡有工作該縣承辦由天津道報銷以一處河隄分隸兩道難免歧誤請將鳳河東隄并韓家樹北埝改隸永定河道管轄至東隄長二十六里應設堡房十三處每堡撥兵二名在南北兩岸河兵內酌派並移永定河水關外委把總令駐劄東隄適中之地專管鳳河東隄及韓家樹北埝得旨如所議行○欽差尚書劉統勳等奏查高堰等處石隄之外向有草壩積年俱已停修去歲潮水盛漲石工險要處風浪衝擊坍塌受險者惟高堰高潤龍門古溝四處為最該處

形勢兜灣。俱為頂衝險要。必須修復草壩。方資鞏固。現在詳細確估。乘時辦理。報聞。○又奏。遵旨議覆給事中朱若東奏。加挑東省河道一摺。臣等由濟寧乘船至安山等處。訪察情形。每年重運經過時。水深四尺。即可通行。科臣朱若東。因十八年夏旱。泉源微弱。請將安山長溝一帶。加倍挑濬。伏查此段河道。安山在北。長溝在南。中為南旺分水口。汶水入運之處。每歲發水時。深二三丈。挾沙而下。南北分流。地勢較高。淤沙不免。是以有歲挑大挑之例。今兩岸累年所挑之沙。已成重岡複嶺。而河身仍不免淤塞。可見此種淤沙。有隨時疏通之法。無一勞永逸之計。惟在司河官員。每年探量河形。實力疏濬。無需多糜錢糧工費。得旨依議。似此條陳者。不過以所費者國家之帑金。而已獨得美名。其心真不可問也。○兩江總督鄂容安奏。酌議江西按察使范廷楷條奏江西命案。印官公出。仍令鄰邑

印官驗報。佐雜不得濫委一摺。查州縣公出。本邑佐雜。因有許其驗立傷單之例。或不分遠近。俱自行往驗。不無滋弊。請嗣後報驗命案。務令印官親驗。印官公出。相隔實遠者。務責之鄰邑印官。不許佐雜徑驗。其兩邑寫遠處所。應令各府查明相距里數。豫行造冊報明院司備案。遇相驗。印官公出。方許佐雜驗傷立單。印官公回覆覈。仍將因何事公出。屍所距鄰邑若干。或鄰邑印官現在之員緣由聲明。得旨如所議行。○安徽巡撫衛哲治奏。向來外省案件。應取冊結之處甚多。各屬恐訛錯舛混。遂有令經承齋帶空白之弊。又如營員赴領錢糧。每用空白領狀。赴該管衙門詢問數目填寫。請嗣後凡有冊結不符者。該管司道。即於原文內改正發回。照繕申送。應送部者。聲明補咨。至於赴領錢糧領狀。如有不符。一面照實支之數放給。一面飭取確領存案。得旨好。○廣西巡撫李錫秦奏。鎮安府

係改土歸流土司向有役田一項共九百三十五垧除完正賦外每年繳租銀一千八十六兩零以為地方辦公之用名曰公堂銀兩自改流以來如各書役工食及修理犒賞并幫貼天保縣辦公等項經臣酌定共需銀七百零六兩查該府首邑天保縣屬有鑒隘倫隘旺崗忙村甘沙并向武土州通凍等六塘號書舖司每年應給工食一百二十六兩向係天保縣土民及下雷湖潤上暎都康西土司按年公捐解府支給未免苦累應將此項公捐銀兩永行革除其工食亦於該府役田租內支給餘剩銀二百五十餘兩將領田少而納租多者查明公平酌減報聞○又秦慶遠府屬宜山縣境內荒地可引洛潢之溪水灌注成田惟築壩建隄工程浩大乾隆十五年經前撫臣舒輅奏准酌借司庫銀二千四百兩給各墾戶以為工本茲隄壩石工俱已告竣實丈得可墾田六千二百餘畝照原報

墾戶給予印照管業升科所借銀分兩年完繳得旨覽奏俱悉

大清高宗法天隆運至誠先覺體元立極敷文奮武孝慈神聖純皇帝實錄卷之四百五十五

大清高宗法天隆運至誠先覺體元立極敷文奮武孝慈神聖純皇帝實錄卷之四百五十六

監修總裁官經筵講官太子太傅大學士文淵閣領閣事領侍衛內大臣稽察欽奉

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次謹奏

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加十九級隨帶加二級又加二級臣謹跪內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌二月辛巳朔諭軍機大臣

字子錄卷之四十二

等據舒赫德奏遵旨將車凌等營中投出之滿洲蒙古綠營兵丁等仍交伊等安置據車凌等呈稱此項人等俱係陣前得傷被獲因未能逃出存留彼處伏懇轉奏將伊等仍撥回內地安置等語車凌等輸誠懇請甚屬可嘉但我滿洲向來行軍時不惜身命所向無敵堪之不動伊等彼時雖因受傷被獲後豈不能乘間而出如前此逃出之觀常保朕尚施恩賞給侍衛伊等既不能臨陣捐軀且在

準噶爾地方已閱多年又未能隨時投出似

此貪生無用之人照例俱應治罪斷無收回

養育之理況此內有曾受官職之人獲罪更

重若一槩收回內地礙難辦理此時車凌車

凌烏巴什車凌孟克等業經誠意來降伊之

臣子即朕之臣子著遵朕原降諭旨留於彼

處聽其任使此內護軍保全逃出後路遇車

凌等同來與衆有間保全著准其來京照例

辦理至蒙古喀爾喀非內地兵丁可比此內

字子錄卷之四十三

喀爾喀台吉包瑪扎布訥默庫俱係年幼被

獲已圖係彼處生養情殊可憫伊等身係台

吉亦留彼處朕心深為不忍此三台吉每人

著賞給贖銀五十兩贖回各交原處安置

若係蒙古喀爾喀之屬下人著行文各該主

有願贖回者給車凌等身價銀贖回舒赫德

等可將此旨明白曉諭車凌等及被獲之滿

洲蒙古漢人等知之○壬午諭軍機大臣等

近據劉統勳等奏高斌動用正項交朱一智

採買備建行宮木植。已運到工。基地亦已買就。一併交尹繼善查收等語。南巡所過之地。原不宜多建行宮。至因閱看高堰駐蹕。另為構造。尤可不必。前此南巡行營。幔城壇殿。足供止頓。何煩別事營建。如使河務修舉。出納精詳。以其餘力。儲侍供頓。未為不可。今奉職無狀。若此。而欲以營建求悅。所謂悅不以道。朕奚取焉。尹繼善接受之後。必謂已有成局。事不容已。著傳諭尹繼善。將此項木植送京。交工程處備用。運河一水可達。並無勞費。其已買基地。或聽原業人贖回。或存作公地。取息充用。聽其酌量辦理。○旌表守正被戕之河南汝州民曹維士妻孟氏。○癸未。諭。本年朕詣盛京。較前次路程稍遠。日期亦多。且滿洲近日習尚。頗不似從前淳樸。其隨從行圍各員。雖照例給予幫貼銀兩。仍屬不敷。未免借貸補苴。愈形拮据。此次五月初隨往熱河各員。較七月初隨往盛京之侍衛章京等多。

有兩月差使。著如恩賞給御前侍衛乾清門侍衛等銀一百五十兩。侍衛護軍叅領等一百兩。牽駝章京上行走之閑散官員等六十兩。護軍校驍騎校等五十兩。前鋒護軍等四十兩。該管王大臣點派時。務擇素日勤勉。騎射精善者。不必拘泥資格。所有恩賞銀著交該管大臣等督令親身支領。製備衣裝要件。不得浪費。至拜唐阿馬甲工匠各項人等。應如何賞給之處。著總理行營王大臣等詳議。請旨。併著將應往人員酌量指派。毋缺毋濫。○又諭曰。七十五現在患病。著來京調理。其涼州將軍員缺。著保德補授。○命工部侍郎董邦達暫署刑部侍郎事務。○以內閣學士于敏中為兵部右侍郎。○命翰林院侍講學士富德提督山東學政。○以廣西慶遠協副將陳廷桂為廣西右江鎮總兵官。○甲申。上詣暢春園。問皇太后安。○還宮。○遣官祭。

先醫之神。○諭曰。達清阿現令來京。所遺叅贊大臣員缺。著副都統努三補授。努三所遺右翼前鋒統領員缺。著清保補授。清保所遺正黃旗護軍統領員缺。著塔勒瑪善補授。○諭軍機大臣等。喀爾吉善奏。臺灣道托穆齊圖未習舉業。難兼學政事務。請與興泉道白瀛對調等語。臺灣各案。雖均已辦理完竣。但該處民情刁悍。必得諳練熟手。方足以資彈壓。學政事務。原可一身辦理。至偶遇考試。則該處知府丞倅。及知縣各官內。不乏科目出身之員。皆可調令入署。協同校閱。不必因此更調。著傳諭喀爾吉善知之。○以原任廣西右江鎮總兵官丁大業。為廣東右翼總兵官。○以原任青州將軍納延泰。為鑲白旗蒙古都統。○調福建諸羅縣知縣徐德峻赴京引見。○豁除直隸張家口。乾隆十七年水衝地一十五頃有奇額賦。○禮部題朝鮮國王李吟遣使表賀。

萬壽冬至元旦三大節。及進歲貢方物。賞筵宴。如例。○乙酉。諭朕今歲巡幸盛京。自京啟鑾至熱河時。著莊親王。恂郡王。大學士來保。史貽直。協辦大學士阿克敦。在京總理事務。其自熱河啟鑾至盛京後。莊親王。阿克敦。已派隨駕。著履親王。裕親王。大學士來保。史貽直。尚書劉統勳。在京總理事務。其月選之文員內。通判州縣等官。武員內。八旗護軍校。驍騎校。及外省送到之補放水手官。驍騎校。并年滿千總等官。俱著王。大學士。照從前之例驗看。其應俟引見之文武官弁。統於駐蹕熱河未啟鑾以前。著在京吏兵二部滿侍郎。各去一人。帶至熱河引見。至外省督撫提鎮等奏摺。著照例自京啟鑾之日為始。俱齎赴在京總理處。加封。交內閣隨本呈送行在。候朕批示。隨本發回。仍於總理處。交付齎摺人祇領。該部通行傳諭知之。○又諭。湖廣總督開泰奏。截取舉人李兆龍看其年力。不特不堪知縣。

之任。即改補教職。並恐難司訓迪。已勒令休致。咨部等語。知縣為舉人應選之缺。具有衰邁濫等者。自應慎重甄別。但改補教職。已屬降等。如改教後。該員自委授閒。志氣頹隳。原可隨時咨叅。即其始尚堪訓士。而遇俸滿及大計時。量其年力更衰。不妨再令休致。今開泰於截取之日。未試以教職。即行淘汰。雖曰加意甄別。然若輩讀書上進。即年力才分。各有所限。而窮年苦志。竟不獲一登仕版。揆諸情理。未免過當。此正所謂過猶不及也。朕綜理庶政。務在持平。未嘗稍有畸重畸輕之見。若各督撫見有開泰此奏。轉相倣效。則又非造就人材之本意矣。可通行傳諭知之。李兆龍。既不勝知縣之任。仍著以教職用。○以內閣學士塔永阿。為正白旗滿洲副都統。仍兼內閣學士。○以故杜爾伯特扎薩克固山貝子丹珠爾嗣子納木扎勒多爾濟襲爵。○調安徽太平府知府朱肇基赴京引見。○是日

起。

上以祭

社稷壇。齋戒三日。○丁亥。祭

先師孔子。遣履親王允禔行禮。○諭前鋒統

領清保。護軍統領塔勒瑪善。俱著仍兼副都

統。○以舍圖肯為正藍旗蒙古副都統。○準

噶爾部人伯勒克率屬來降。命賞給安插如

例。○戊子。祭

大社。

大稷。

上親詣行禮。○詣暢春園。問

皇太后安。○幸圓明園。○己丑。

上御勤政殿聽政。○諭曰。顧汝修著來京。該部

帶領引見。○諭軍機大臣等。舒赫德等奏稱

烏勒登呈報。準噶爾之扎努噶爾布遣人移

咨伊等。烏勒登回稱。爾等內亂。難以容身。爾

達瓦齊。如果遣使請平定。準噶爾聖主必然

惻念。照所請行。爾等方可永遠安生。如果遣

使。毋再遲滯等語。又奏成衮扎布等致書達瓦齊。以數年未斷兵旅。皇上常憫然憐念。現在爾又為台吉。自此可享太平。爾等杜爾伯特台吉等。因慕聖君仁化投降。爾等扎哈沁瑪木特。及烏梁海宰桑得木齊瑚圖克等。師衆追入邊卡。因此我已遣人將瑪木特等查拏。爾等之扎努噶爾布。反謂為何將瑪木特設法拏獲。夫我不遣兵。第設法拏獲者。特以罪在瑪木特一人。與衆無涉。如復遣兵。爾等必又謾言大兵來討。妄自驚亂。且使無辜受傷。如此酌辦行文等語。此事前後辦理。殊覺違礙。瑪木特雖宜拏獲。但不應用計誘擒。其扎努噶爾布帶兵五千。越嶺阻截車凌等。及達瓦齊現為台吉等語。皆不可信。烏勒登不審虛實。即與伊使者言。達瓦齊如欲遣使投降。天朝必與伊恩典。亦殊太過。成衮扎布等並不酌計。即咨行回文。又太懦弱。如此。豈不令準噶爾人等笑我處無人乎。爾等將此急

速移咨玉保。倘準噶爾瑪木特。尚未釋放。可在瑪木特前。將烏勒登呈報扎努噶爾布所寄之信。烏勒登回答之言。成衮扎布寄與達瓦齊之書。伊已一一奏聞。皇上洞鑒一切。知爾等皆因準噶爾內亂。互相戕害。值我大國未即加兵之際。聲言如此。以欺我駐邊將軍大臣而已。豈知我大國之例。伐有罪而撫善良。他人被逼來降。斷無不留養之理。乘人亂而急稱兵。無是理也。爾處之人。如有來降者。在爾境內。或可追迫。我之邊卡。斷不可入。嗣後爾等。惟當在游牧處。安靜守法。倘不嚴束。爾等屬下之人。有妄入我之卡者。一有所獲。即行正法。決不寬宥。此因誘汝擒執。故釋放遣回。爾等如有傳喚不來。或拏獲抗禦者。必嚴加懲治。斷不釋放。再阿爾台邊境地方。原不許人居住。今將邊境分晰明白。另行經畫。如此明白曉諭瑪木特知之。若此時已將瑪木特釋放。玉保可即親赴邊卡。遣人將瑪木

特喚回。宣旨曉諭。並傳諭舒赫德等知之。○又諭薩喇勒領兵前往科布多地方。擒獲準噶爾烏梁海得木齊扎木叅。凌伯克。博羅特等。努三亦將得木齊瑚圖克擒獲。薩喇勒感戴朕恩。遵奉指示。領兵前往烏梁海。擒獲扎木叅等。無忝任使。甚屬可嘉。若如達清阿誘擒瑪木特。則甚虧大國體統矣。薩喇勒著加恩補授內大臣。努三去時。原有畏蒞之意。曾降旨訓飭。此次擒拏瑚圖克。尚屬奮勉。自可寬宥前愆。貝勒額琳沁。公恭格。敦丹。車登薩木丕勒等。協同効力。亦屬可嘉。著交部議敘。○庚寅。

皇后千秋令節。停止行禮筵宴。○欽差尚書舒赫德等奏。正月二十五日。薩喇勒。努三等。拏獲擅入邊卡之烏梁海得木齊扎木叅。瑚圖克等。於三十日解至大營。臣等即交與侍衛陽格等解送京師。於二月初一日。自扎布堪起程。得旨。舒赫德所辦。甚屬錯謬。前者瑪木

特。乃係達清阿誘執。並非兵力所擒。是以朕施恩放回。若達清阿亦如薩喇勒等奮勉前進。拏獲瑪木特。亦無放回之理。今扎木叅。瑚圖克。既被我擒獲。豈得與瑪木特一體辦理。舒赫德見不及此。謬誤已極。朕實不意舒赫德竟至如此。朕甚愧之。薩喇勒現在科布多地方。守候收服烏梁海等。信息甚為得當。而舒赫德等。又命薩喇勒能服烏梁海。則服之。倘事機未甚順利。不必勉強。如此責成。使人何以遵行。朕信任舒赫德。而伊反豫存畏蒞之心。諸凡怯餒。而又牽制於成衮扎布。朕實不解。今伊等以為答書達瓦齊。即解人疑。可以罷兵。一面遣人收服烏梁海。不知掩耳盜鈴。非徒不解人疑。適足貽誚於人耳。朕今遣兆惠。往迎扎木叅。瑚圖克。傳諭伊等。妄進邊卡之罪。無可寬宥。即將扎木叅等。解回軍營。牢固監禁。俟烏梁海事定。再行請旨辦理。如有逃脫等事。惟舒赫德。成衮扎布等是問。○

辛卯。

孝康章皇后忌辰遣官祭

孝陵。

上詣暢春園問

皇太后安。○還宮。○諭軍機大臣等近聞江蘇地

方優伶中竟有私自蓄髮者伊等雖身居下賤而本朝制度所關豈容任其干禁妄為且似此則男女無所分別安知非奸偽之徒欲借以蠱誘生事尤足為人心風俗之害該督撫應密飭

地方有司留心訪察嚴行懲禁以挽惡俗亦不必張皇其事致駭聽聞可於鄂容安莊有恭奏事之便傳諭知之○又諭曰黃廷桂奏拏獲逆犯陳琨等倡立邪會散布逆帖一案該犯等造為圖帖糾集多人克頑已極急當嚴究黨羽速示創懲以為悖逆作奸者警著傳諭黃廷桂令將逃竄各犯上緊緝拏務期弋獲其現在已獲者作速訊取確供不分首從立正典刑一面辦理一面奏聞庶使此等

奸民知法在必誅不得稍緩其死不必俟奏達往返致稽時日也○以戶部右侍郎劉綸充經筵講官○以翰林院侍讀學士王際華充日講起居注官○壬辰

上啟鑒謁

東陵○諭挑選山海關供交馬匹時據察馬大臣奏稱除去鼻濕癆馬所交俱係好馬當令奇通阿覆加查察而奇通阿並不詳細查明惟冀苟且了事巧詞具奏顯有迴護察馬大

臣之意八旗人等惡習皆由此類不肖之徒釀成殊負朕簡用之恩奇通阿等俱著交部嚴加議處今年正當用馬之際著該部於挑選自京騎赴熱河馬匹時仍派伊等查勘臨期若有疲瘦殘疾馬匹朕惟伊等是問○諭軍機大臣等據尹繼善奏革職通判周冕應追虧空銀兩已於半年限內全完但誤工屬實應否於該處正法請旨遵行等語此奏又用伊巧偽故智周冕之罪若所重在缺料誤

工則從前二閘漫口時。即應照李煒張賓之例正法。虧空帑項。自不難著落。各上司分賠。若罪在虧帑。則彼既限內全完。祇應將伊誤工應得之罪。按例辦理。豈得復請於該處正法。試問該督本意。果見為周冕必應請旨正法耶。抑明知其罪不至正法。而姑為此奏。以見其執法耶。此等伎倆。屢施無益。亦何必乎。伊既兩請。朕亦不能定此。仍令尹繼善將周冕應否正法之處。係治伊虧空之罪。抑係治伊誤工之罪。定議覆奏。○軍機大臣等議奏。臣等現查以俸餉坐扣贖出地畝。及買得公產地畝。共九千八百十三頃八十二畝。除租佃與民。及典賣在旗外。其餘典賣與民人地畝。共七百二十五頃二十八畝。伏思此項地畝。係特恩動帑。向民贖回。將伊等俸餉坐扣。俾各得原業。不許私行典賣與民之處。例禁甚嚴。乃竟有不肖旗人。圖利私典與民。民人違例私典。均屬不合。請將此項七百二十五頃

有零地。盡行徹出。照戶部原奏收取租銀。年終彙奏賞給旗人之例辦理。再查旗人原圈地畝。及自置地畝內。從前清查時未報。此次報出典賣與民。共一萬四千七百五十九頃零。既據自行報出。照議免其治罪。應交與各叅佐領清查原業主。如能交銀回贖者。令其回贖。如不能回贖者。將此項地官贖。所得租息亦照部議辦理。並請將八旗地畝冊檔。咨送戶部。轉行直隸總督。除現納錢糧民地外。挨村清查。有無遺漏隱匿之旗地。勒限一年。據實造冊咨部。戶部即令各該旗造冊鈐印。收貯備查。如有再行違例私典與民。及民人私自典賣。或被查出。或被首告。從重治罪。將地畝價銀盡行徹出。交與該旗照定例辦理。并將該管大臣。地方官嚴加議處。從之。○是日駐蹕烟郊行宮。癸巳。駐蹕白澗行宮。○甲午。諭從前賞給孫嘉淦住房一所。著賞尚書汪由敦居住。並飭內務府大臣等於官房

內酌擇一所給孫嘉淦之子孝愉居住尚書
劉統勲亦著賞給住房一所○是日駐蹕隆
福寺行宮○乙未

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

實錄卷四十六

寶城前行禮躬奠哀慟王以下文武大臣官員

隨行禮○至

孝賢皇后陵奠酒○是日駐蹕桃花寺行宮

大清高宗法天隆運至誠先覺體元立極敷文
奮武孝慈神聖純皇帝實錄卷之四百五十六

實錄卷四十六

大清高宗法天隆運至誠先覺體元立極敷文奮武孝慈神聖純皇帝實錄卷之四百五十七

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣等謹將
總纂官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣等謹將內大臣戶部尚書錢謙益滿洲都統軍功紀錄五次
尋常紀錄十四次臣等謹將經筵講官太子太傅工部尚書紀昀六次臣等謹將尋常

敕修

乾隆十九年甲戌二月丙申諭曰張泰開將

御製詩集卷之二十二

一

一

鄒一桂之子保舉學正顯係瞻徇已降旨交部議處鄒一桂之子若出自他人保舉容可諉為不知張泰開既係同官日與共事豈有不知之理鄒一桂自應一併交部議處著吏部詢明察議具奏○加賑山東蘭山縣乾隆十八年水災貧民並緩帶應徵額賦有差○以福建澎湖協副將林洛為浙江溫州鎮總兵官○旌表守正被戕之直隸平山縣民楊二小妻商氏○是日駐蹕盤山行宮至辛丑

皆如之○丁酉諭曰岳鍾琪奏伊子岳濬巡撫任內未完庫項銀八千八百餘兩除已經交抵外尚有未敷請將伊所食公俸按年扣還等語此項未完銀兩原係岳濬名下應追之款若使岳濬尚在自應按數追完今伊子既已物故岳鍾琪尚屬舊人從前曾經出力著將岳濬未完銀四千九百餘兩加恩免其追繳○又諭曰岳鍾琪著賞給人復二觔○又諭據舒赫德等奏準噶爾達瓦齊復作台吉烏梁海等不願歸順一時難以收服已令薩喇勒暫住卓克索地方宣揚兵勢另籌辦理等語舒赫德等前後所奏情形竟未喻辦理此事之旨朕不解舒赫德何以至此前令將烏梁海收降招服者非因達瓦齊謁默庫濟爾噶爾彼此構釁乘亂而始辦也特因烏梁海等追逐車凌直入我卡若不懲治必致肆意妄行且烏梁海等亦緣近處阿爾台之內故得侵犯我卡若驅之於阿爾台之外雖

欲侵犯。豈能猝至。是以令於此時。或許歸降。或行驅逐。一經辦定。於地方長久有益。原與達瓦齊之復作台吉與否。全無關涉。無論此時達瓦齊與訥默庫濟爾噶爾內亂之時。即使噶爾丹策零尚在。遇此機會。亦當為廓清地方。從長辦理。更有何疑。朕曾降旨軍營將軍大臣。毋得偏執已意。致令薩喇勒辦理周章。今觀此奏。豈非故掣其肘乎。若謂薩喇勒馬力疲乏。即令其在駐劄處。暫為休息。未始

實錄卷四十五

三

一

不可。達瓦齊復作台吉之處。何必齒及。此尤朕所不解也。再瑪木特已經釋放。伊若感恩。自必來歸。如不歸誠。必將此事告知伊台吉。其台吉豈肯晏然即已。勢必遣使前來索取。逃人車凌等。彼時非發兵征討。更無善策。在舒赫德等。以為既將瑪木特釋放。若扎木泰等。亦照此釋放。便可無事。獨不思堂堂天朝。有如是辦理之法乎。今準夷正值力弱。舒赫德尚如此畏怯。若遇彼猖獗時。伊等不過歸

入喀爾喀。一籌莫展而已。俟烏梁海辦竣之後。瑪木特若不來歸。亦必一律辦理。今應如何防範瑪木特之處。亦宜豫為留心。此時惟遵朕屢次所降諭旨。飭諭薩喇勒悉心妥辦。舒赫德倘再行從中阻撓。決不寬恕其罪。○諭軍機大臣等。據蔣炳奏。泌陽縣拏獲馬朝柱案犯親戚謝鳳玉等三名。一摺。供詞閃爍。謝鳳玉等果係案內要犯。即應質訊明確。解楚審結。乃該縣含糊訊問。未得實情。淹禁圖

實錄卷四十五

四

一

圖。三犯連斃其二。馬知此二犯。非無辜被獲。含冤瘐死。不然。則係看守不嚴。以致要犯自戕。以減口。該撫不將該縣叅處。僅以一奏了事。摺內亦甚未明晰。著傳旨申飭。仍著查明叅奏。尋奏。該犯等事發同逃。似非無辜被獲。至謝鳳玉。謝耀奇。實係病死。並無自戕減口情事。惟是該犯既為逆黨親屬。知縣顏懋倫含糊訊問。未得實情。以致稽遲瘐斃。現已另摺叅奏。報聞。○又諭。向來軍營大臣等。皆得

專摺奏事。其後因軍務無多。皆報將軍轉奏。今當有事之秋。任事大臣等。若將所辦之事。自行具奏。則諸務可得詳盡。而伊等所辦之是非。及意見之合宜與否。朕亦可相機指示。夫不令軍營大臣等奏事者。特恐傾陷將軍大臣耳。朕辦理庶務。一秉至公。即如舒赫德等。謬誤餒弱。朕屢次降旨申飭。此豈有人在朕前讒謗具奏乎。現在薩喇勒。勞三。駐劄烏梁海辦事。伊等身臨其境。形勢機宜。自必熟悉。隨時奏報。朕亦易於辦理。軍營任事大臣等所奏之事。將軍總可得知。此有何隱瞞之處。著寄諭舒赫德等。令彼處領兵各大臣。於應奏事件。即各自行具奏。○以故科爾沁扎薩克輔國公喇嘛扎布子布彥德勒格爾襲爵。○戊戌。禮部議覆福建巡撫陳宏謀疏。稱蘇祿國蘇老丹嘛喊味安柔律噶遣使附搭閩人楊大成船隻入貢等語。查該國於雍正五年始奉表通貢。至乾隆七年。復修貢職。茲

該國王遣使勞獨萬喳喇等。齎捧表文方物來閩。應如所請。給夫馬勘合。委員伴送來京。所帶土產貨物。聽該夷照例貿易。免徵關稅。惟查該國以楊大成為副使。楊大成。即武舉楊廷魁。緣事被斥。復藉出洋貿易。冒充該國副使。若不嚴加懲儆。恐內地民人。習以為常。出洋滋事。不應如該撫所題。僅交原籍管束。請照例改發黑龍江充當苦差。並行文該督撫。知照該國王。嗣後凡內地人在洋貿易之人。不得令承充正副使。至該國王願以地土丁戶。編入天朝圖籍。伏思我朝統御中外。荒夷向化。該國土地人民。久在薄海臣服之內。該國王懇請來年專使齎送圖籍之處。應毋庸議。從之。○補行江蘇省乾隆十六年大計。年老官六員。有疾官一員。才力不及官三員。浮躁官一員。分別處分如例。○緩徵山東昌邑海豐利津霑化掖縣濰縣等六縣。乾隆十八年潮災。應徵新舊額賦。其昌邑海豐利津

霑化等四縣。並予加賑有差。○己亥。賜扈從王公大臣並直隸總督官員等食。○遣官祭關帝廟。○庚子。以江西九江協副將王三賓為山東兗州鎮總兵官。○旌表守正被戕之山西寧武縣民王廷官妻祁氏。○辛丑。遣官祭黑龍潭。

昭靈沛澤龍王之神。王泉山

惠濟慈佑龍王之神。諭吏部議張泰開鄒一桂均與以降調甚屬徇庇。蓋二人罪不同

科。如該部嚴詢鄒一桂。果有請囑情弊。則二人之罪。豈降調斥革所可了事。今既稱止於不行阻止。則其罪自應分輕重。且張泰開之心。以按例保舉。朕未必即知其為鄒一桂之子。故朦朧薦剡。瞻徇行私。此而不罰。則黨援門戶之漸。將自此啟。是以特令嚴加議處。今該部之議。所謂嚴者何在。且既為二人開脫。又俱議以降調。朕能聽大臣之曲庇專擅乎。此本擲還另議。吏部堂官著交都察院嚴察。

議奏尋都察院議署吏部尚書楊錫紱侍郎鄂彌達歸宣光慧中表曰修均應照溺職例革職。得旨俱著革職從寬留任。○諭軍機大臣等。今日吏部議處張泰開鄒一桂二本甚屬瞻徇。已降旨發還另議。著交與在京總理王大學士詢問該部堂官。此本係何人創議定稿。彼此如何講論。如何更改。誰人立說。即係公同畫押。亦必有一人先出意見。務著詳悉查明具奏。斷不可聽該堂官等以公同酌定意見相同之說含糊覆奏。尋奏臣等遵旨逐一詳細詢問。此案創議始於楊錫紱。而鄂彌達表曰修慧中歸宣光等亦遂隨同附和。將奉旨嚴加議處之人與察議者一例議以降調。殊失輕重。實有瞻徇之處。報聞。○壬寅。予故福建提督譚行義祭塋。諡恭愍。○予故墨爾根城副都統莫爾泰祭如例。○賜卹押運漂溺之福建臺灣北路左營守備蘇進德如例。○加賑山東永阜永利富國官臺西繇

等五場乾隆十八年潮災貧竈有差○旌表
守正被戕之山東莘縣民趙小妻陳氏○是
日駐蹕盤龍山行宮○癸卯遣官祭昭忠祠
諭軍機大臣等內大臣薩喇勒向尚書舒
赫德寄信轉奏請派厄魯特兵五百名或一
千名發往軍前調遣此次薩喇勒辦理招諭
驅逐烏梁海事務頗屬奮勉但軍營將軍大
臣等劄付不合機宜以致薩喇勒等辦理掣
肘亦未可定厄魯特車凌等新降之人即行
調遣亦無不可然其游牧尚未指定伊等內
倘有無知小人或致逃竄於事無益著舒赫
德會同薩喇勒車凌車凌烏巴什等商議將
伊屬下最可信之色布騰等台吉宰桑酌派
數員領兵一二百名再令御前侍衛永柱會
同總管阿敏道揀派察哈爾八旗兵五百名
帶領交與薩喇勒為招諭驅逐烏梁海之用
今春馬匹贖欠之時雖不可急行但薩喇勒
係熟悉此路之人相機行事務期迅速成功

不必照將軍大臣等所飭固執而行將此傳
諭薩喇勒知之○又諭直隸河工事務查勘
俱已就緒劉統勲一人足資辦理可傳諭策
楞即速來京另候簡用○戶部議准廣東巡
撫蘇昌疏稱豐順縣之南溪山坪黃硃坑鐵
鑪二座委係山童木盡鑪燬停煇餉銀無著
請豁免從之○又議准四川總督黃廷桂疏
稱樂山西充南部閬中鹽亭綿州萬縣忠州
資州內江等十州縣鑪民開淘鹽井一百四
十六配增水陸二引七百二十張請自十八
年為始配地行銷納課徵稅從之○是日駐
蹕湯山行宮○甲辰

上迴鑒 詣暢春園問

皇太后安○幸圓明園○吏部議准盛京將軍
阿蘭泰等疏請嗣後看守大政殿六品官缺
出准其作為公缺該將軍會同該侍郎於盛
京各部衙門滿洲漢軍筆帖式內揀選送部
引見補放從之○又議准陞任江西巡撫鄂

容安奏。上猶縣離城八十里之外。大半粵民寄居。其浮龍司巡檢微員不足彈壓。請改為上猶縣縣丞。仍駐營前巡察。其衙署即建於營前城內。並請換鑄上猶縣分駐營前縣丞關防。又崇義縣上堡司巡檢。駐劄過埠衙署傾圯。請改駐金坑。仍兼管過埠一帶事務。即於金坑建造衙署。又龍泉縣城南禾源司巡檢。請改駐龍猶接壤之左安村。仍兼管禾源一帶地方事務。將原有巡檢衙署舊基清出蓋造。從之。○乙巳。遣官祭賢良祠。○準噶爾烏梁海庫本來降。命賞給安插如例。丙午。孝昭仁皇后忌辰。遣官祭景陵。○丁未。上詣暢春園問皇太后安。○戊申。春分。朝日於東郊。遣恒親王弘旺恭代行禮。○吏部議准直隸總督方觀承疏稱。天興閘閘官應裁。其現存雲津閘座。就近歸併柳村閘。閘官經

管從之。○己酉。諭前以知府需人。降旨令各督撫遴選保送。並飭部查明歷俸十年以上之府佐州縣。均令送部引見。蓋恐有用之材。或以憊懣無華。不事奔競。因而見屈長官。久羈下吏。今各省雖未到齊。而就直隸各員。均經朕親覽。即百里之任。尚有未可姑容者。況求其堪勝知府。豈可得乎。例之各省。已可概見。則知中材藏拙。簡任者多。而脫穎者早登薦剡。各督撫原未致屈抑人材。朕用以慰而數十年不調者。非不自量。則旁觀好事者。流為之嘖嘖稱屈耳。以朕觀之。各督撫尚屬包荒而非蔽賢。嗣後更宜不時查察屬吏。毋事姑息。范文正之言。甚可味也。著再通行傳諭知之。○又諭前據班第等奏。廣東濱海沙地。因南海等縣地大事繁。知縣不及分身勘丈。請歸駐劄澳門之海防同知管理。經部議覆。准今策楞來京。據奏南海番禺東莞順德新會香山等六縣沙地案件甚多。最難清理。若

歸澳門同知專管。則六縣道里遼濶。不特地方官藉端推諉。吏胥乘機舞弊。且紛繁拮据。於該同知管理洋船事務。轉恐有誤等語。在班第等原奏。意在就簡。但於該地情形。既有未便。自當隨時籌酌。不可拘於成議。著將南海等六縣沙地。仍歸各該縣照舊管理。其改歸澳門同知專管之處。不必行。○吏部另議張泰開。照溺職例革職。鄒一桂。照不應重私罪律。降三級調用。得旨。張泰開著革職。鄒一桂著降三級從寬留任。○命兩廣總督公策楞赴軍營辦事。以叅革貴州甕安縣草塘司土縣丞宋承烈堂弟承勳襲職。旌表守正捐軀之河南扶溝縣民黃成玉妻高氏。庚戌。

上詣暢春園問

皇太后安。○還宮。吏部議准。兩廣總督班第等疏稱。新會縣大瓦司巡檢應裁。改設新寧縣縣丞。駐劄該縣寨門大澳。鑄給廣州府新

寧縣縣丞關防。從之。○是月。盛京戶部侍郎管威遠堡等六邊事務。卞塔海奏請嗣後每遇京察之期。將熊岳錦州等各城各邊門。筆帖式三十餘員。照盛京五部將軍衙門之例。令該管之將軍副都統詳細考察。其威遠堡等六邊門司員筆帖式。令管理六邊之將軍侍郎詳細考察。分別等第去留。咨送吏部。從之。欽差侍郎嵇璜等奏。堰肝石工。從前約估石料十六萬四千餘丈。今因積水漸涸。將坍卸舊石。儘數選用。覈計止需新石十二萬九千餘丈。較原定數目。可減四萬餘丈。當即移咨江南山東督撫。將業經採辦多餘之石。仍陸續運送堰肝工所。以備將來隨時修砌之用。其尚未採辦者。即行停止。以免繁費。得旨甚妥。○京口副都統兼管兩淮鹽政吉慶奏。高堰鉅工。石料最為緊要。現據莊有恭札稱。淮安城南楊家廟至武家墩。向有舊河一道。今自武家墩至周橋七十五里。年久淤墊。

應趕緊挑濬。俾運石無誤。而於鹽運亦屬有益。並據淮北各商稟稱。願將周橋以下數里之河。一併接連挑深。至古溝而止。令鹽船從武家墩直達古溝。盤壩入湖。更覺便捷。所需工費銀三萬二千餘兩。應如該商所請。准其帶捐還項。報聞。○福州將軍新柱奏。廈門所轄玉洲一口。係查驗漳州等處船運貨物。給單照驗。舊有館舍。派撥差弁一名。巡役十一名。哨船一隻。堵緝巡查。近因該處港道淤。船不到口。俱停泊石美地方候驗。應將弁役移駐石美。就近稽查。得旨覽。○兩廣總督班第奏。廣東合浦縣永年司巡檢所轄地方。距縣三百六十里。周圍亦三百餘里。與廣西橫州。貴縣。興業。鬱林。博白等州縣。壤界相接。為獐獍出沒之所。明成化年間。令狼獍兵丁分守要隘。撥田耕種。蠲徭薄賦。名曰狼田。獍田。各兵後人承田充兵。糧餉不費。足資捍禦。本朝初年。尚存狼獍田一百四十四頃一十八

畝。零存兵二百四十二名。閱年久遠。稽查有疎。致田畝多被土人誘騙典當。兵數漸缺。現在覈對賦役全書。清出田畝坵段。並查出私典數目。授受姓名。勒限分別定價取贖。并酌議章程。自本年為始。如有民人向狼獍私典授受。照盜買盜賣官田例治罪。倘狼獍內有貧不能守業者。田歸本族本地之狼獍承買。務令按田當兵。不得外售與民。仍飭地方官不時考驗技藝。操演訓練。得旨覽。奏俱悉。

大清高宗法天隆運至誠先覺體元立極敷文奮武孝慈神聖純皇帝實錄卷之四百五十七

大清高宗法天隆運至誠先覺體元立極敷文奮武孝慈神聖純皇帝實錄卷之四百五十八

監修總裁官經筵講官太子太傅文淵閣大學士文淵閣領閣事領侍衛內大臣侍衛處管理

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣謹將內大臣戶部尚書鑲黃旗滿洲都統軍功紀錄五次

尋常紀錄十四次臣謹將經筵講官太子少保工部尚書紀錄六次臣謹將鑲黃旗

校修

乾隆十九年甲戌三月辛亥朔

上詣

中華書局影印

雍和宮行禮。○幸履親王第視

定太妃疾。○軍機大臣等奏。現在遣往軍營

兵沿途臺站需馬五千餘匹。臣等行查各牧

場及科爾沁喀喇沁土默特馬數。所有內扎

薩克買存馬。乾隆八年調用後。業將選剩之

馬賞給伊等。毋庸查辦。惟伊克昭尚有馬七

千餘匹。檢查舊案。此項馬當時扎薩克等解

送軍營。全行倒斃。議令伊等賠補。雍正十三

年七月。因大兵既徹。暫免追賠。令其孳生。豫備將來撥用在案。乾隆八年。未經調用。是以未入豁免數年以來。該扎薩克屢報被災。不能賠補。俱經理藩院議駁。伏思內扎薩克馬。因動用一次。是以賞給。至伊克昭馬。今雖不能按數著追。亦未便概行豁免。請令派出之侍衛等於伊克昭應賠馬內。選擇五千匹。送往各臺站豫備應用。不能如數。再行動項採買。其選剩馬。懇恩免追。以結積年未結之案。

中華書局影印

從之。○又奏。北路軍營。本年防秋緊要。遣往

兵應用馬駝。俱宜寬為豫備。查自張家口至

北路軍營。計四千四五百里。應令口外蒙古

扎薩克。共採買馬二萬匹。分為四起。以備官

兵更換騎用。駝二千隻。以備馱載。再於張家

口買馬二千匹。駝三百隻。多倫諾爾買馬三

千匹。駝五百隻。歸化城買馬五千匹。駝八百

隻。喀爾喀土謝圖汗扎薩克圖汗部落買馬

五千匹。駝四百隻。伊克昭前有購備軍需存

貯馬七千餘匹。即於此內選用五千匹。此次採買馬價不得過八兩。駝價不得過十八兩。俱令戶部覈計數目。籌撥支發。並行文該大臣及各扎薩克等。將此項採買馬駝。派出賢能官兵。加意牧放。如能妥協無誤。量加賞賚。倘有倒斃疲瘦。將該大臣扎薩克官兵。一併叅處。至軍行沿途需用口糧。查慶豐司三旗牧廠。現有羊二十一萬五千餘隻。達里岡愛牧廠。現有羊八萬三千二百餘隻。應於此內。

軍機處
卷一百一十八

三

以三萬隻為遣往軍營官兵口糧。其七萬隻派員陸續送赴北路軍營。交將軍成衮扎布等備用。從之。○吏部議覆。據欽差尚書劉統勲等叅奏。自乾隆十一年後。歷任河員。動支河庫辦公銀項。較從前達部數目。每年多用五七千兩。至一萬九千餘兩不等。又將存庫水利餘平銀五萬七百餘兩。全行支用等語。除高斌張師載何燭李宏業經革職外。應將前任江南河道總督。今調河東河道總督顧

琮。照存心浮冒。例革職。得旨。顧琮著來京候旨。其員缺。著白鍾山補授。○貸浙江錢塘富陽臨安新城。於潛象山。諸暨寧海。天台。永康。西安。江山。桐廬。永嘉。樂清。瑞安。平陽等十七縣。玉環廳。杭州。台州。二衛。衢州。嚴州。二所。玉泉場。乾隆十八年旱災。貧民電戶籽本。並分別蠲緩。應徵額賦有差。○壬子。

軍機處
卷一百一十八

四

上御乾清門聽政。○諭。河東河道總督已降旨。著白鍾山補授。白鍾山未到任之前。著山東巡撫楊應琚暫行署理。○又諭。據舒赫德奏。稱準噶爾烏梁海等。已遠過唐努山。徙至俄羅斯接壤地方居住。再阿睦爾撒納。與達瓦齊構釁。阿睦爾撒納。同訥默庫等。俱欲前來投順。現在阿爾台雪大。阿睦爾撒納。未得前來等語。烏梁海等。現在被逐。在阿爾台以外。而又遇堵禦來投之阿睦爾撒納。無處容身。前往潛避。至唐努山。阿勒坦諾爾等處。已屬窮困。烏梁海人。惟恐令伊遷徙耳。今如准其

投順後。每年進貢減半。不令遷徙。自必傾心歸順。前已降旨令薩喇勒辦理。著將此旨仍交與薩喇勒等遵照曉諭。妥協辦理。○以內閣學士徐以烜為禮部侍郎。仍留順天學政之任。○癸丑。

上詣暢春園。問

皇太后安。○幸圓明園。○諭軍機大臣等。據班第奏稱。何廷琚挾嫌誣揭周紹華雕刻假印二案。於封印期內。嚴督趕辦。即行覈題。俾奸徒各知警戒等語。所辦甚好。已於摺內批諭矣。但粵省僻處海嶠。民風刁惡。必宜加意整飭。從前班第在粵。尚不過暫令署理。今策楞又經差往軍營。俟差竣回京。方能往代。可傳諭班第。於一切地方事務。仍須實力查辦。不得視為五日京兆。稍存將就了事之見。以致懈弛也。○又諭。據舒赫德等奏稱。投誠車凌等馬駝俱已疲乏。而帶來牛羊亦屬無幾。應令就近在推河拜達里克庫爾奇勒等處暫

行種地游牧。令麒麟保等於通肯呼裕爾等處。可否居住之處。查明再行移住等語。車凌等始從遠處投降。所有駝馬俱已疲乏。若遽令遷移遠處駐劄。殊非體卹之意。應如舒赫德等所奏。本年車凌等在推河拜達里克等處。可以種地之處居住。應需種地籽種。令玉保麒麟保酌量向歸化城地方取用賞給。至通肯呼裕爾等處。應否可以居住之處。俟查明具奏。再行酌定。並著賞給車凌車凌烏巴什羊各五千隻。車凌孟克羊三千隻。以資養贍。○又諭。據張若震奏稱。歷俸十年知州舒成龍。知縣劉育杰。於上年保舉堪勝知府。劉育杰又於大計附薦卓異。通判王瑄。上年大計。奉旨不准卓異。以上三員。甫經引見。應否毋庸送部等語。朕因直省地方有司。或有中材。藏拙簡任。乃苦不自知。轉以久處下僚。自傷屈抑者。是以降旨調取十年以上人員。來京引見。今舒成龍。劉育杰。已於上年交部記

名以備簡擢即可毋庸再行送部。至王瑄一員雖大計時曾經保舉。但既未准其卓異。仍著送部引見。傳諭張若震知之。○欽差尚書舒赫德奏報薩喇勒現在卓克索招降烏梁海。今於二月二十四日。臣舒赫德等亦赴卓克索會辦。臣玉保往台吉車凌等游牧處。辦理分立旗分。編設佐領事務。報聞。○以詹事府詹事程景伊為內閣學士。兼禮部侍郎。○甲寅。諭上下兩江上年被水地方。經朕多方籌畫。加意撫綏。但成災甚重。積水消涸先後不齊。或尚有未盡耕耨之處。今年遇閏。麥秋較晚。青黃不接。為日更長。嗷嗷小民。良深厯念。著傳諭該督撫等。將被災州縣。再行詳查。應如何再加分別賑糴之處。一面奏聞。一面酌量辦理。俾未盡涸之區。得資餬口。該部遵諭速行。○又諭。據總督喀爾吉善等奏稱。浙江糧儲道善德到任兩年有餘。雖無別項劣蹟。於漕儲事務亦留心學習。而限於才力。實

屬竭蹶。即稽察屬員。約束丁役。均不能周到妥協。浙江連年截漕停運。幫疲丁困。若不及早整頓。且恐貽誤等語。善德著送部引見。浙江糧儲道員缺。著德文調補。所遺杭嘉湖道員缺。著許宗智補授。○諭軍機大臣等。上年江南水災甚重。積水消涸先後不齊。恐尚未盡能耕耨。且今年閏月。節候較遲。成熟尚遠。照常平糶。未必即敷接濟。已明頒諭旨。令該督撫等再行查明酌量分別辦理。可傳諭鄂容安。莊有恭。衛哲治。務令督率所屬。實力詳查。毋遺毋濫。一面奏聞。一面辦理。俾災黎均霑實惠。以慰朕懷。○又諭。據尹繼善覆奏。周冕全完虧空減流一摺。所辦仍屬非是。南河虧空之員。不止周冕一人。周冕既已依限完繳。自不必即行正法。至其應得之罪。應仍監禁。統俟此案最後之人。限滿歸結之日。未完者。次第各依限遵前旨。一面正法。一面奏聞。所餘已完者。再行覈其情罪。請旨分別辦理。

此時何必汲汲為一周冕。辦理完案耶。又莊有恭奏。查審涂士炳等。勒追銀兩一摺。據稱惟將辦料有據之項。准其抵銷。餘不准作抵等語。河工積習相沿。流弊已極。此番特示創懲。不可不從嚴辦理。令知自作之孽。不可稍逭。不惟房產借項。不應官為追變。即辦運之項。亦總應聽自行清理。不得准其作抵。使得指以藉口。輾轉遷延。騰那時日也。總之此番法在必行。不僅為帑項起見。將此一併傳諭尹繼善。鄂容安。莊有恭知之。○乙卯。諭軍機大臣等。北路軍營。往返差人送事。驛馬不敷。例應就附近蒙古等馬匹應用。此時差往軍營之人稍多。臺路附近蒙古等。各備馬匹。供應公事。勤勉可嘉。應加恩鼓勵。著派副都統富德。往返巡查。戶部派員。備持布疋茶葉。酌量加恩賞賚。以示優卹。○移廣東東莞縣中堂司巡檢。駐麻涌。並建衙署。從署總督班第請也。○丙辰。

上詣暢春園。問

皇太后安。○諭曰。奉天府府尹鄂寶奏。稱題陞

承德縣富昌。現在丁憂。承德為奉天首縣。現

值大差。尤關緊要。奉省實無合例勝任之人。

請將富昌留奉任事。俟服闋再行送部引見

等語。丁憂人員。自應遵例回旗守制。非勢不

得已。不當因係旗員。稍存歧視。今奉天現有

大差。一切錢糧事務。既均係該員經手。姑照

該府尹所請。准其在任守制。非因旗員回京。

例得分部。遂可通融辦理也。嗣後不得援此

為例。○又諭黑龍江近年收穫歉薄。莊丁等

歷年借欠穀石。若全行催徵。丁力不無拮据。

著加恩將乾隆十六年分。借出口糧一千四

百餘石。暫停催徵。其雍正十三年分。舊欠穀

九百餘石。乾隆十八年分。舊欠穀一千九百

三十餘石。俱著全行豁免。俾莊丁生計。益臻

充裕。○軍機大臣等議奏。八旗滿洲等考試

繙譯滿文。定例三年考取生員二次。舉人一

次進士一次。查曉習繙譯之人。皆可考取內閣中書及筆帖式。庫使等項。原不藉鄉會試為進身之階。請嗣後除繙譯生員。仍照舊考試。留為考取中書筆帖式之地。其鄉會二試。及繙譯進士陞轉翰詹官員之處。應停止。至將來考取繙譯生員時。但令專作清字文論二篇。不必仍取繙譯。徒滋記誦陋習。從之。○命禮部左侍郎鄒一桂。為會試知貢舉。大學士陳世倌。為正考官。禮部左侍郎介福。內閣學士錢維城。為副考官。○命侍郎兆惠。協理軍營事務。舒赫德。成袞。扎布。薩喇勒。來京面領諭旨。喀爾喀親王額琳沁。多爾濟。管理喀爾喀兵丁事務。貝子車木楚克。扎布。公齊旺。隨同策楞等辦事。○丁巳。鑄給江蘇華亭縣分駐管塘縣丞關防。寶山縣管塘鹽巡主簿鈐記。從巡撫莊有恭請也。○戊午。諭曰。三姓副都統德寧。著差往軍營。所遺員缺。著副都統三格暫行兼署。○己未。

上詣暢春園問

皇太后安。○遣官祭

歷代帝王廟。○庚申。諭。據黃廷桂奏。提督岳鍾琪。因逆匪陳琨一案發覺。力疾前赴重慶督緝要犯。擒獲過半。始行回蜀。中途病故等語。岳鍾琪宣力有年。勞績懋著。茲以督緝匪犯。力疾親往。奮勉可嘉。患病溘逝。深為悼惜。前伊子岳濬巡撫任內。應完庫項。不敷銀四千九百餘兩。已降旨加恩。免其追繳。其已經抵交估變之產。著再加恩。悉予給還。所有應得卹典。仍著察例具奏。○諭軍機大臣等。據舒赫德奏。稱遵旨傳諭軍營大臣。所辦事宜。令其自行奏聞等語。朕諭令伊等自行具奏者。專指有關軍機要務而言。伊等若不諱其緊要與否。以為有此諭旨。於謝恩請安等事。亦皆自行具奏。徒勞驛站。且與朕降旨之意不符。即如安崇阿。徹令駐劄塔密爾城。伊又有何應奏之事。可令舒赫德等明白曉諭。伊

等如實有應奏緊要軍機。一面呈報將軍。一面自行陳奏。餘著照前遵行。○吏部議准。署兩廣總督班第奏。廣東新會縣地方。有潮連江門二處。向設潮連司巡檢一員。駐劄潮連。兼轄江門。嗣因江門地更衝繁。將巡檢改駐江門。但距潮連較遠。未免顧此失彼。查新會原有縣丞一員。應請移駐江門。其潮連司巡檢。仍請回駐潮連。又東莞縣地方。有京山司巡檢。所轄石龍茶山各處。地廣難以兼顧。應將東莞縣縣丞。移駐石龍。京山巡檢。移駐茶山。從之。○調廣西提督岳鍾璜。為四川提督。甘肅提督豆斌。為廣西提督。以陝西延綏鎮總兵官武進陞。為甘肅提督。調江南狼山鎮總兵官傅魁。為陝西延綏鎮總兵官。○加賑湖北潛江。沔陽。天門。三州縣。沔陽衛。乾隆十八年水災。飢民並分別蠲緩。應徵額賦。○辛酉。

孝賢皇后忌辰。遣官祭。

陵寢。○諭軍機大臣等曰。方觀承所奏。流犯李季夏。援例贖罪一摺。已勅部議奏。但該犯之兄李時中。既有力代弟捐贖。則該犯諒亦非赤貧之人。何至因欠錢細故。與債主扭毆。致斃人命。獲此重罪。則其當日案情。或尚有未確之處。可傳諭方觀承。令其查明。據實覆奏。尋奏。節經研審。委無別情。報聞。○以原任福建臺灣鎮總兵官陳林。每為江南狼山鎮總兵官。○壬戌。軍機大臣等議奏。兵丁著有功績。現經歸伍食糧者。既得邀章服之榮。其隨征出力者。應酌籌鼓勵之道。臣等酌議。嗣後兵丁在軍前初次立功。註明檔冊。其有立功最多。向例應給何項職銜者。即照應得品級。給與頂帶服用。以示鼓勵。再有功兵丁。事竣後。除中等勞績。僅得把總頂帶者。仍令歸伍食糧。該督撫等。照例酌量拔補外。其有累著功績。加至千總以上頂帶者。統令陸續咨送兵部。帶領引見。候旨遵行。從之。○癸亥。清明。

節遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○

上詣暢春園問

皇太后安。○詣

壽皇殿行禮。○還宮。○諭江蘇學政夢麟奏

建德縣知縣董豐垣徇私請託一摺。董豐垣

馮國霖倚託師生。夤緣干請。其書函又即係

馮國霖自行呈遞。顯有情弊。董豐垣著解任

馮國霖著革去生員。交與該督鄂容安查審

實錄卷四十二

十三

具奏。○吏部右侍郎慧中年老休致。以原任

廣東巡撫蘇昌為吏部右侍郎。○蠲直隸大

城涿州青縣靜海延慶宣化懷安懷來張家

口理事廳遵化等十廳州縣。乾隆十八年水

雹旱災。應徵額賦有差。○甲子。諭軍機大臣

等。新補江南徐州府知府傅梅。看來才具中

平。未必能勝繁劇之任。况徐州府屬當水災

之後。一切勞來安集。尤需幹員加意料理。可

傳諭鄂容安。令於通省知府內。另行揀選一

實錄卷四十八

十六

員調補。將傅梅量移簡缺。如該員調簡之後

仍不能勝任。再行奏聞請旨。毋稍姑容。貽誤

公事也。○補行江蘇省。乾隆十六年大計。卓

異官七員。陞賞如例。○以故五經博士孟衍

泰孫毓瀚襲職。○旌表守正被戕之四川儀

隴縣民苟學美妻王氏。○乙丑。月食。○

上御太和殿視朝。文武陞轉各官謝恩

大清高宗法天隆運至誠先覺體元立極敷文
奮武孝慈神聖純皇帝實錄卷之四百五十八

實錄卷四百五十八

十七

大清高宗法天隆運至誠先覺體元立極敷文
奮武孝慈神聖純皇帝實錄卷之四百五十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣廣桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣 董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌三月丙寅吏部議准山東

巡撫楊應琚奏稱六年俸滿之教職向係陸

績報到撫學二臣不能會同考驗嗣後定於

每年歲底學臣試竣回省時公同考驗分別

題咨辦理從之○戶部議覆前任廣東巡撫

蘇昌疏稱豐順縣屬李樹灣東邊角二處鉛

山礦砂旺盛准商開採從之○禮部議覆江

蘇學政夢麟奏稱學政思欲竭力懲創而稽

覈無權勢難整飭臚陳提調官諸弊請嚴立

科條以專責成等語臣等酌議嗣後請令各

省學政。約束幕賓親友。胥吏家人。凜遵法度。務正本清源。以絕造言之端。至頂冒鎗手。招搖影射。妄傳線索。顯造飛語。匿名揭帖等事。關係風俗人心。學政當關防考試時。誠不及周知。及試畢開門。一有見聞。即嚴飭提調官密訪拏審。提調官如容隱私結。輕為出脫。即據實叅奏。請旨勅部。按律例處分。若提調借無根之言。挾制學政。冀其畏禍隱忍。經學政陳奏。勅下督撫。審實從重治罪。倘學政自以無權無責。苟且自全。別經發覺。除提調官治罪外。將學政一併嚴加議處。其原奏比照立例之處。毋庸議從之。○以太常寺卿金德瑛為內閣學士。兼禮部侍郎。○旌表守正捐軀之山西河津縣民趙金柱妻胡氏。○丁卯上幸南苑行圍。○諭軍機大臣等。據喀爾吉善等奏稱。告病海鹽縣知縣舒瞻。未曾回旗。今已足疾全愈。該員明敏幹練。在浙多年。熟悉風土。請留浙差委。遇相當缺。出題補等語。所

奏非是。舒瞻係例應病痊引見。坐補原缺之員。即其才具明幹。於浙省知縣內。實屬出色。亦應俟引見時。奏請仍發浙省。免補原缺。候朕酌量准行。今乃遽請留浙。以他缺題補。恐啟僥倖規避之漸。在喀爾吉善等。雖為地方起見。但該督撫均係滿洲。而舒瞻又係滿員。將使旁觀者議其不公。亦非遠嫌之道。可將此傳諭喀爾吉善雅爾哈善知之。舒瞻著照例送部引見。○是日。駐蹕舊衙門行宮。○戊辰。諭軍機大臣等。前因軍營無事。額駙策凌年老。就近以塔密爾作為軍營。今有辦理烏梁海之事。軍營應移駐烏里雅蘇台。以塔密爾作為內地。從前驛站。設自推河至塔密爾。今軍營既移至烏里雅蘇台。自推河直抵烏里雅蘇台為便。著傳諭舒赫德成衮扎布。將遷移驛路。自推河直抵烏里雅蘇台之處。定議辦理。再軍營現貯米石。亦著查明。若添兵二三千名。酌量支給。足敷幾年之用。一併具

奏嗣經舒赫德等議於塔密爾鄂爾坤二處所存銀米軍器等項將應運之物派叅贊大臣安崇阿原任巡撫永貴運至烏里雅蘇台鄂爾坤塔密爾所有綠營叅將守備千總各一員把總三員兵三百名俱移駐烏里雅蘇台大營再查前因以塔密爾為軍營派叅贊大臣一員給與印信駐劄烏里雅蘇台今大兵既駐烏里雅蘇台所有叅贊大臣印信應暫貯俟辦理諸務既畢將叅贊大臣移於卓克索等處展界駐劄另行定擬辦理至遷移軍臺查自張家口至鄂爾坤西十四臺自鄂爾坤至烏里雅蘇台設喀爾喀臺站十八處今軍營既在烏里雅蘇台臺站可直抵軍營道里較捷自張家口至烏里雅蘇台道路今計現設臺站數目與應移臺站正足相當現派侍衛六格等及喀爾喀臺站台吉等查明舊設臺站地方及移設臺站由何處安臺應添喀爾喀官兵若干之處詳細查酌辦理再

查軍營現存米一萬五千餘石大麥四千九百餘石臣等現議喀爾喀官兵停其支米全給羊價銀兩約計添兵三千名尚足敷一年有餘支用報聞○是日駐蹕南紅門行宮○己巳

上行圍○祭

先蠶之神

皇后親詣行禮○裁廣東肇慶協左右兩營馬兵三十名改設戰兵三十名於額設守兵內改拔戰兵三十名從署總督班第請也○旌表守正捐軀之河南鄆城縣民張五敦妻郭氏○是日駐蹕新衙門行宮翼日如之○庚午

上行圍○賜扈從王公大臣等食○諭曰良誠題叅當塗縣知縣李允升一本所見甚屬錯謬學政職司課士整飭士習是其專責至於紳士爭控細事原非所當與即使有司審斷不公或其中別有情弊亦應咨明督撫聽其

查辦。乃遽以凌辱士子為辭。具疏參奏。殊於體制未協。且江南士習浮囂。倚恃學政為之申理。將益致滋事。其漸更不可長。良誠甫任學政。不惟不能加意整頓。轉偏護邀名。染讀書無識者陋習。且本內一則稱議處。一則稱嚴審。尤屬不合。著嚴行申飭。原本擲還。○諭軍機大臣等。良誠題參當塗縣知縣李允升徇私妄斷一案。據稱監生王自橈等與候選州同吳懋學控爭草場。該縣並不秉公確審。

將王自橈等送學扑責。後經控告批府審明。仍行斷回。王自橈執業等語。地方紳士爭控細故。原非學政所應干與。已傳旨申飭。至此案該縣從前因何審斷失宜。及有無囑託受賄情弊。著傳諭鄂容安。秉公查審。據實奏聞。尋奏。此案李允升於兩次集審後。因場地界址年久無案可憑。令原中公議。審而未斷。尚無偏徇。王自橈等不候官斷。恃符逞強。送學戒飭。亦非過舉。再三嚴詰。實無別項情弊。但

究因該縣辦理遲延。以致頻頻呈控。應請議處。得旨。如此則李允升亦不必議處。○刑部議覆雲貴總督碩色等奏。安南徭匪盤道鉗勾結內地。已正法匪犯何聖烈等。招人不法一案。遵旨照會安南國王。追捕殲除。旋據交趾八寶夷目兵三等將盤道鉗鄧盛王二犯誘獲解送。訊明在交稱王并勾結內地民夷散剽招人屬實。應如所請。將該二犯照例分別正法。從之。○蠲緩安徽太平壽州宿州鳳

陽臨淮懷遠虹縣靈璧鳳臺阜陽潁上霍邱亳州太和泗州盱眙天長五河滁州全椒等二十州縣。新安鳳陽長淮泗州滁州等五衛。乾隆十八年水災應徵額賦。並予加賑。其應徵漕項銀米。除被災較輕之太平滁州全椒三州縣。新安滁州二衛外。分別蠲免。緩帶有差。○辛未

上詣暢春園。問

皇太后安。○迴圓明園。○壬申。準噶爾烏梁海

額楞塞爾來降。命賞給安插如例。○癸酉。

上詣暢春園。問

皇太后安。○還宮。○諭軍機大臣等。昨經降旨

揀選察哈爾八旗兵五百名。令侍衛永桂。總

管阿敏道。帶往軍營調遣。看來尚不敷用。著

再派侍衛薩木都布。前往察哈爾地方。會同

總管等。於八旗兵內。再行揀選五百名。即令

薩木都布帶往軍營。○甲戌。諭朕於五月初

六日。啓鑾往熱河。七月初五日。由彼啓鑾巡

幸吉林。所有軍營應奏事件。若照舊例。仍進

張家口出古北口。行走紆迴。徒勞驛站馬匹。

著派富德。達松阿等。自張家口外第三四站

起。察看情形。酌量定議。安設臺站。直抵熱河。

以便馳送軍營事務。○諭軍機大臣等。據廣

東巡撫鶴年奏稱。向來幕客盤踞省城。挾有

餘貲。或貿易行鹽。或經營置產。娶妻買妾。流

寓為家。因而交結官長。聯絡胥吏。且既有家

室。署內難於關防。不時出入。滋弊無窮。現與

督臣徹底清查。凡有眷屬者。或令其自行回

籍。或任其另行遠館。並嚴飭所屬。毋得私相

容隱。倘知而故犯。即與失察之上司。一併叅

處等語。幕友交通作弊。實為害政之端。自應

設法清釐。嚴行禁飭。但此種積習。相沿已久。

他省必尚有似此者。可於奏事之便。傳諭各

省督撫。留心體察。實力查辦。亦剔除積弊之

一事也。○命製

郊壇大祀齋戒勅諭牌。軍機大臣等。遵旨議奏

凡有事於

園丘。

方澤。

祈穀。

雩祭。應陪祀各官。向例於前期四日。齊集午門

外。聽宣勅諭。行之日久。徒存具文。嗣後請令

在京大小各衙門。赴內閣恭錄勅諭。製牌繕

寫。敬謹收貯。每遇

兩郊大祀。於致齋日期。敬謹安設。俾仰瞻之下。

時凜恪虔。較之宣讀一過。更為親切。其宣讀勅諭儀注。即可停止。得旨是。○欽差尚書舒赫德等奏。準噶爾頻年內亂。至今阿睦爾撒納等相爭未定。雖無力侵犯喀爾喀地方。而防守不可稍疎。臣等公同詳議。現今烏里雅蘇台地方。駐兵三千名。俱經遴選。現又發察哈爾兵五百名前來。由此項兵內。及新到察哈爾兵。揀選二千名。於五月初十日內外。每人給馬三匹。令薩喇勒。努三。貝子車木楚克。扎布。沙克都爾扎布。公青滾雜卜。恭格敦丹等。與薩木都布。公同帶領。由控圭一路。緩行牧放。進至卓克索。查驗準噶爾烏梁海。如來至阿爾台以內。舊游牧地方。即速前進。或招降。或驅逐。遵奉屢次諭旨。悉心辦理外。計烏梁海事竣後。正防秋緊要之時。卓克索等處當庫列圖要路。將此二千兵。即於卓克索以內。控圭等路。駐劄防秋。再派叅贊大臣安崇阿。副將軍貝勒車登扎布。領兵一千名。駐劄

庫克嶺等處。防守索勒畢嶺。布拉罕路。其餘兵五百名。並常駐劄烏里雅蘇台兵一千名。令叅贊大臣烏勒登。帶領輪班喀爾喀大員。總辦兩路一應邊卡事務。其每年應派防秋兵三千名。停止駐劄鄂爾坤等處。臣舒赫德。成衮扎布。親率喀爾喀郡王桑寨多爾濟。貝勒車布登。車蘇隆。公齊旺等。駐劄塔密爾烏里雅蘇台中間鄂爾海。喀喇烏蘇等處。接應各處之兵。相機而行。此項兵。俱於六月初旬。齊赴軍營。務選人才精壯。器械整齊。倘有草率塞責者。即行嚴叅。令各扎薩克。明白通諭四部落外。並將喀爾喀協理台吉章京等員。內揀選才能出衆者。以備差遣。嚴傳各卡侍衛台吉等。加意瞭望探聽。於七月底。差哨探兵。往阿爾台山梁。根尋蹤跡。俟雪降後。將備調兵。酌量撤回。其每年保護四部落游牧兵。仍照舊豫備。得旨。此次車凌等既來投誠。又辦理烏梁海事務。防秋尤為緊要。是以朕昨

降旨於察哈爾兵內再添派五百名發往。現今舒赫德成衮扎布來京陛見。俟至京時諸務再行面諭。至伊等另摺所奏喀爾喀兵丁軍器挑選好者留用。其平常者俱行駁回。辦理甚是。但器械為武備要項。何至軍前始行挑出駁回。明係喀爾喀風俗弊壞。平日漫不經心。苟且塞責所致。著將此嚴行曉諭各扎薩克。嗣後有似此者。必將該副將軍及扎薩克等從重治罪。斷不寬宥。再庫克嶺惟安崇阿與車登扎布二人駐劄堵截。尚屬不敷。現在已令副都統德寧前往軍營。至防秋時即著德寧與安崇阿、車登扎布等在庫克嶺駐防。○乙亥。

上耕藉詣

先農壇行禮。更服至耤田所。

躬耕三推。復加一推。

御觀耕臺。命康親王永恩、裕親王廣祿和親王弘晝各五推。吏部尚書達勒當阿協辦大學

士戶部尚書蔣溥、禮部尚書王安國、兵部左侍郎彭啟豐、刑部左侍郎秦蕙田、工部右侍郎三和、左都御史楊錫紱、通政司副使涂逢震、大理寺卿羅源漢各九推畢。順天府府尹率農夫終畝賞賚耆老農夫如例。○諭軍機大臣等。據麒麟保奏稱。車凌屬人葉爾都因尋覓馬匹。為喀爾喀人射死。車凌烏巴什屬人已啟齊倫率領其子潛逃。現在嚴行緝拏。其防護車凌等游牧。乞調取鄂爾坤兵丁。及扎薩克一員前來辦理。喀爾喀人等偷竊牲畜。甚至將人射死。目無法紀。應痛加懲治。著舒赫德策楞等嚴行查拏。訊明正法。並著派巴勒達爾總統照看。扎薩克達什丕勒領兵一百五十名。住於車凌等游牧。用心巡查。務使盜賊肅清。其車凌等屬下有逃竄者。亦著舒赫德策楞遍行各卡扎薩克。令其嚴行查緝。拏獲之日。即當訊明正法。并將此傳諭車凌等知之。○加賑兩淮富安、安豐、梁垛東

臺河梁。丁溪。小海。草堰。劉莊。伍佑。新興。廟灣等十二場。乾隆十八年潮災竈戶。○丙子。諭前經降旨。每屆巡幸時。各督撫不得以尋常委用需員。奏請揀選。蓋以試用人員。應俟引見候朕裁奪簡發。本慎重地方之意。今年朕詣盛京。恭謁

祖陵。巡閱東輔。計程稍遠。適準噶爾之台吉車凌等。率所部萬餘人。款塞內屬。瞻仰情殷。朕念其俱未出痘。不便來京。令俟駐蹕熱河時。就便召見。撫諭賞賚。頗需時日。是以於五月初。即啟蹕至熱河。賜宴新歸誠人。七月。啓鑾。吏兵二部。應行引見人員。前赴熱河引見。各省所有應請簡發人員。若俟回鑾奏請。為日稍遲。恐地方需員。不能久待。此次不必拘例。可隨時奏聞。或於熱河引見。或令在京總理王大臣。驗看發往。至各督撫有應行具奏之事。俱令照常奏請。不必有意簡省。致滋叢脞。該部可通行傳諭知之。○又諭。據鐘音奏。稱

延綏鎮標。歷任遊擊袁士林等。浮開公費一案。審明實無侵蝕情弊。而造冊朦混。例有處分。又另摺奏稱。現有波羅協及沿邊各營堡。節年亦多浮開。皆據自行首報更正等語。武職人員。會計文移。或有未諳。歷年既久。款項繁多。以致重複舛混。現在各案既經查明。實無侵蝕情弊。即可據實更正。免其叅處。至各省營伍中。或有似此者。亦未可定。並著該督撫。逐一查明更正。若此番更正之後。仍有相沿陋習。舛錯造報者。必當照例叅處。不可稍為徇隱。○欽差尚書舒赫德等奏。據薩喇勒告稱。準噶爾烏梁海宰桑圖布慎之鄂拓克。聞已擒瑚圖克之信。懼我兵威。越過阿爾台海喇圖嶺。往額爾齊斯地方。雅爾都車根。赤倫察達克。四鄂拓克人等。越過索郭克察罕烏蘇。前往汗哈屯地方。已於吹阿爾呼特。阿寶哈布齊海等處游牧。宰桑瑪濟岱。越過阿爾台。唐努山間雅木圖嶺而去。臣等看得烏

梁海等業已紛紛遠遁。時方春令。我軍馬力疲乏。難以遠行。且大兵若駐卓克索地方。烏梁海聞知。必堅守自固。臣等公同酌議。奏請暫行撤兵。至夏季烏梁海等貪戀故土。必仍回游牧。彼時整兵速出。易於收服。再阿睦爾撒納來投之信。聞之已久。但係傳言。尚無確信。若遲至五月內。其時阿睦爾撒納與達瓦齊相持既久。勢難中立。其來降之計必決。臣薩喇勒與努三留心察看情形。相機酌辦。從

之。○禮部以會試中額請得旨。這會試滿洲蒙古取中六名。漢軍取中一名。直隸取中十二名。奉天取中一名。山東取中十四名。山西取中十六名。河南取中十一名。陝西取中十三名。江南取中三十二名。浙江取中二十九名。江西取中二十五名。湖北取中十一名。湖南取中四名。福建取中十四名。廣東取中十五名。廣西取中五名。四川取中八名。貴州取中七名。雲南取中七名。○以故雲南鶴慶

州觀音山土巡檢王天受嗣子元順襲職。○丁丑諭八旗奴僕受國家之恩。百有餘年。邇來生齒甚繁。不得不為酌量辦理。是以經朕降旨。將京城八旗漢軍人等聽其散處。願為民者准其為民。現今遵照辦理。至各省駐防漢軍人等並未辦及。亦應照此辦理。令其各得生計。所遺之缺。將京城滿洲派往。而京城滿洲亦得稍為疏通矣。著交總督喀爾吉善會同福州將軍新桂將彼處漢軍人等。或亦照京城漢軍之例。各聽其散處經營。或將軍標綠旗營兵缺出。將伊等轉補。所出之缺。即將京城滿洲兵派往頂補。則京城滿洲既得以疏通。而本處漢軍等於生計之道亦得自由。誠為兩便。喀爾吉善新桂熟籌妥議具奏。○又諭從前各省尋常鬪毆情罪稍重之案。經部定議不准留養。後因此等人犯秋審時原不至入情實。徒使淹禁囹圄。而窮老孤孀無所倚賴。於乾隆十五年特頒諭旨。令各該

督撫秋審時另冊辦理。但十五年前此等親老丁單之犯間有原題內未經聲敘者遂不得一例邀恩情亦可憫。著該部傳諭各該督撫將從前雖未附疏聲明確有成招原案可憑者據實查明准其一體入於另冊量予末減以示矜卹。○是日起。

上以孟夏享

太廟齋戒三日。○戊寅諭前因來謙鳴陛見時奏及任內裁革陋規一事其意以為朕前獨對之語亦未必遂加詳察乃詢問策楞始知其盡屬子虛是以將伊革職以為奏對不實者戒。所有知府任內未完之項押往滇省追繳完日令該督撫具奏請旨。今據愛必達奏報已於限內全數完繳來謙鳴係小有才之人其所犯誑奏之罪蓋初不止於伊一人也。藩臬之任固非所宜若以道府等官棄瑕錄用猶可以備驅策來謙鳴著送部引見再降諭旨。○諭軍機大臣等從前定議原欲使烏

梁海歸順准在原地居住如不歸順則逐出阿爾台以外今烏梁海等既由原處移於海喇圖嶺唐努山外阿爾呼特等處地方居住阿爾台以內皆成空地著即於此處增設卡座地方愈可鞏固如烏梁海思念故土復來歸順仍准居住否則亦易於驅逐現今軍臺侍衛員少不敷委用著再揀選侍衛四十員發往駐卡將現在卡上侍衛兵丁移於新設各卡居住其發往侍衛俱令住於舊卡巡查看守再辦理烏梁海事既有頭緒即當將瑪木特亦飭令移徙著交與舒赫德成衮扎布不必發兵只遣一諳事之人往諭瑪木特因伊等上年擅入我卡所以將烏梁海驅逐展設邊卡伊等游牧亦勒令遷移瑪木特聽從則已倘逾限不移即發兵驅逐現在兆惠亦起程往卓克索商辦事務著會同舒赫德成衮扎布遵奉朕屢降諭旨悉心辦理但須通盤計算現在兵馬力量果否可以進兵或須

候察哈爾兵到時再定進止。倘兵力尚在不
足。則俟舒赫德成衮扎布。陸見後熟籌一切。
再行辦理。○蠲江蘇上元江寧江浦六合山
陽阜寧清河桃源安東鹽城高郵泰州江都
甘泉興化寶應銅山豐縣沛縣蕭縣碭山邳
州宿遷海州沭陽贛榆等二十六州縣鎮江
淮安大河揚州徐州等五衛。乾隆十八年水
災。應徵地丁漕項銀三十萬三千兩有奇。米
麥豆十二萬五千石有奇。○已卯。以故禹陵
奉祀八品官。似恒甸弟恒畿襲職。○是月。直
隸總督方觀承奏。天津北倉在縣北二十里。
凡遇截留漕米。並奉天等處採買由海運津
米。俱貯倉內。向歸天津縣管理。查此項存貯
漕米。非州縣常平可比。天津縣恐不足彈壓。
請嗣後責成天津道率同該縣管理。得旨。如
所議行。○長蘆鹽政普福奏。飭屬於向年曾
有蝗蝻等處。逐一根尋。加意搜捕。得旨。此乃
遵朕旨令。汝照吉慶先事豫防辦理之事。而

閱此摺。不知者乃似目下已有蝗蝻。又似汝
始勉力辦理之事。真是糊塗。一無可教導也。
以此觀之。汝必不能辦理實心妥貼。仍不過
具文了事而已。○兩江總督鄂容安奏。查閱
江蘇各屬標營。分別獎賞糾叅。就目前情形
而論。先當修葺械具。訓練技勇。使缺壞者漸
次完全。生疎者俱歸嫻熟。則整頓有漸。紀律
易臻。若徒事紛更。恐頭緒既多。轉無實際。得
旨。所見是。實力整頓而不必欲速。斯得矣。○
安徽巡撫衛哲治奏。徽州府屬山多田少。所
出米穀。即豐年亦僅供數月民食。全賴江西
浙江等處販運接濟。而溪河逆險。艱於輓運。
六邑中產糧少。而距江浙遠者。又惟歙縣為
甚。乾隆十七年間。有該縣商人程揚宗等。樂
輸銀六萬兩。以一半買穀積貯。一半交與生
息。為將來增貯之計。建立惠濟倉。詳請奏明
立案。以垂久遠。報聞。○浙江巡撫覺羅雅爾
哈善奏。玉環孤懸海面。自雍正五年題請展

復。以該處地土出息。供支各項經費。迄今二十餘年。漁鹽耕稼之利。逐漸加增。應照內地之例。將存積餘銀。酌撥充餉。歲收租穀。額定積儲。查玉環賦役。原議不徵條銀。止徵租穀。糶出價銀。藉充經費。又該處環山皆海。刮土煎鹽。儘收儘賣。以充民食。近年穀價鹽價。除支給歲需公項外。約可餘銀三千兩。覈算現積盈餘。已至三萬四千餘兩。請酌留一萬二千兩。存廳庫。其餘歸入本年奏銷案內。儘解司庫。嗣後每年盈餘。悉解司報部。聽候撥餉。再該處向未額定存留積貯備用。請於該同知衙門。照內地常平倉例。定額貯穀一萬石。每年存七糶三。依時出易。即從本年為始。於所收租穀內。陸續撥貯。得旨。如所議行。咨部知之。○湖南巡撫胡寶瑤奏。辰州府屬之乾州。鳳凰。永綏。三廳。所轄紅苗。與黔省古州。銅仁。接壤。該苗等服食各殊。若聽其安居耕鑿。亦不敢出而滋事。多因近地漢奸。潛入苗寨。

實錄卷五十九

三十一

誑誘財物。兵役挾勢欺凌。致生事端。現在諭令文武各員。嚴切飭禁。並查所設營汛。碁布星羅。地方俱獲安帖。得旨。覽奏俱悉。○又奏。湖南舊習。每於濱湖老圍之外。增置新圍。致湖身日狹。儲水漸少。當漲發時。即有倒流橫溢之患。臣現在親往湘陰等縣。履勘緊要隄垸。就近稽察私圍。報聞。

實錄卷五十九

三十二

大清高宗法天隆運至誠先覺體元立極敷文奮武孝慈神聖純皇帝實錄卷之四百五十九

大清高宗法天隆運至誠先覺體元立極敷文奮武孝慈神聖純皇帝實錄卷之四百六十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄五次發

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌夏四月庚辰朔享

太廟

上親詣行禮○詣暢春園問

皇太后安○幸圓明園○諭國學以訓課士子

為職現任國子監祭酒武極理係繙譯進士

出身不宜司教之任著以對品京堂缺補用其

國子監祭酒員缺著良誠補授○又諭曰尚書

劉統勳汪由敦總督方觀承鄂容安喀爾吉善

開泰永常黃廷桂碩色宣力中外夙夜靖共嘉

乃純勤宜加顯秩劉統勳汪由敦俱著加太子

太傅方觀承喀爾吉善黃廷桂俱著加太子太保鄂容安開泰俱著加太子少傅永常碩色俱著加太子少保○諭軍機大臣等來降台吉車凌等一百六十餘人各求前赴熱河瞻仰朕躬但此內有台吉色布騰現在軍營辦理招服烏梁海事台吉色布騰人明白有材具朕早知之著於今年暫留軍營辦事令在叅贊上行走俟明年朕巡幸木蘭之時令伊再來至車凌車凌烏巴什等遵旨於所屬

人內選兵二百名令宰桑和通瑪什等率領

俱交與色布騰帶赴軍營調遣○調山東登

州鎮總兵官李繩武為甘肅河州鎮總兵官

以山東沂州協副將楊贊為登州鎮總兵官

○辛巳諭朕聞諸王內有將伊府護衛官員

因過罰俸者甚屬非是旗下臣僕均資俸餉

為生計是以各旗官員侍衛有應罰俸之咎

朕意欲以家法懲抵俾於生計差役不致有

礙但思官員以懲責抵罪非惟不合體制且

將以受辱為故常。轉致寡廉鮮恥。是以未經施行。且官員侍衛。俱有加級紀錄。可以抵銷王府護衛。向無紀錄。若罰其俸。則窮乏者度日無資。況伊等所得之俸。均出國帑。並非該王所賜。所罰俸銀。又不由部坐扣。不過剝取以為自奉之計耳。殊屬卑鄙。嗣後王府護衛官員內。如有過失。輕則懲責。重則革退。不得罰俸。將此通行曉諭各王知之。○又諭鑲黃旗奏請旗人所典房產。俱令過契上稅一摺。

實錄卷四百六

三

內有請將私行典賣房產地畝入官之語。甚屬非是。朕臨御以來。每念旗人生計維艱。撥出官地一萬餘頃。作為公產。又將典賣於民地畝贖出。亦作為公產。無非欲有裨於旗人生計之意。此項贖出地畝內。或有不肖之徒。復行典賣於民者。官又為之辨出。仍作公產。今伊等私用白契典賣房產。若令入官。非惟不副朕惠愛旗人之意。且令不肖之徒。得以藉口。謂朕借端將房產入官矣。況入官之例。

原為己身獲罪。或有虧公項者而設。若私行

典買房產。未經稅契。非此可比。即欲懲治。亦

不過不准復歸本主。作為公田濟眾而已。請

入官可乎。朕所賞旗人萬餘頃地。即此入官

之地也。此項尚且賞回。私行典賣之房產。該

旗奏請入官。甚屬錯誤。將此通諭知之。○廣

西巡撫李錫秦疏報乾隆十七年分歸順遷

江三州縣墾過水旱田地共一十二頃六十

三畝有奇。○命翰林院侍講學士金甦提督

安徽學政。○壬午。

上詣暢春園。問

皇太后安。○還宮。○調安西提督王進泰為甘

肅提督。廣西提督豆斌為安西提督。浙江提

督史宏蘊為廣西提督。甘肅提督武進陞為

浙江提督。○是日起。

上以常雩祀

天於

園丘。齋戒三日。○癸未。諭軍機大臣等。豆斌已

降旨調任安西提督。安西邊陲重地。現在一切防範籌備事宜。更關緊要。豆斌甫經調任於該處情形。多有未悉。可詳悉詢問永常。王進泰務當處處留心。妥協辦理。再伊前任廣東提督時。曾有人奏伊雅慕清客。終日燒香作畫。恐有偷安逸樂。有妨軍政。已於陞見時面加訓誨。著再行傳諭豆斌。令其實力奮勉。整頓營伍地方。不得仍蹈故習。以致有負委任。○甲申。

上詣

南郊齋宮齋宿。○諭軍機大臣等。今歲朕巡幸吉林。副都統達色奏請接駕。現在準噶爾台吉車凌等來降。防秋最為緊要。恐軍營須調黑龍江兵。即於索倫中派出一千名。達色帶領前往。著寄信令伊照前歲所降諭旨。於文到二三日。即酌量起程。不可絲毫洩漏。不必前來接朕。○以二等侍衛富僧阿為成都副都統。○調浙江衢州鎮總兵官高琦為四川北鎮總兵官。以

海澄公黃仕簡為浙江衢州鎮總兵官。○乙酉。常雩祀。

天於

園丘

上親詣行禮。○諭覽內務府所奏。

堂子內安立神杆圖樣。王公等並無次序。且前後不齊。甚屬不成體制。理宜各按爵位。齊整分排。以壯觀瞻。今著每翼分作六排。每排分為六分。未得封號之阿哥等在前。其次親王郡王。貝勒。貝子。公等。挨次安立。阿哥內如得封號者。視其封號神杆各按次序更移。座石不必移。著交禮部會同內務府大臣等察勘繪圖具奏。著為定例。○諭軍機大臣等。倉場侍郎雙慶等奏稱。參革漕運通判陳克大。現在提解送部候訊。據伊子陳思本供稱。伊父已經進京。接有親筆家信。有投金魚池并自盡之語。但現今尸身未獲。其是否畏罪自盡。抑或躲避潛逃。難以懸定等語。該犯短發夫

價。交部審明。自有應坐本律。並非罪大惡極。分無生理者可比。何至情極自戕。即云畏罪希圖自盡。亦何必遣人寄信回家。輾轉告知。其為詭計逃竄。事屬顯然。該犯身為職官。乃事覺潛遁。行同賊盜。此風斷不可長。亦未必即能遠颺。可傳諭普福。苗國琮。於附近地方嚴速追拏。再該犯係泰州人。或即潛身本籍。亦未可定。并令鄂容安。莊有恭。密行查辦。務期弋獲。毋使狡譎之徒。得以僥倖漏網。於何處捕獲。即速鎖解刑部。仍即奏聞。尋雙慶等奏。詭稱自盡之漕運通判陳克大。已於天津拏獲。得旨。著交與刑部嚴行查審。陳克大扣剋淺工夫食。係應交部審擬之犯。該倉場侍郎於參奏時。即當照例摘印看守。乃防範不嚴。致令該犯詭計逃竄。深屬不合。雙慶。彭樹葵。著交部嚴加議處。○又諭。方觀承奏。清查宣化等屬庫項一摺。內稱未准銷銀兩。應俟准銷領解歸款等語。此即為浮冒之員。留一

地步矣。地方辦差辦公。俱有應銷成例。乃積習相沿。每輾轉不結。而承辦之員。亦遂得藉口尚未准銷。掩其侵蝕。前因塵案累累。特頒諭旨。令各督撫將未完各案。剋期速結。並予限一年。令戶工二部通查。辦理完竣。今方觀承猶為迂迴寬緩之詞。是使侵冒之員。仍得行其故智。豈設法清釐之本意乎。已交戶工二部。遇有此等案件。不得往返駁詰。隨時覈查。分別完結。可令方觀承將所有未完各案。作速查明。如果係例應准銷者。即據實報部請銷。其不應准銷者。即嚴行勒限追繳。著戶工二部。於原定一年限滿之日。已未完結緣由。聲明奏聞。還款如此。則積案既清。而劣員亦無從售其侵那之計。將此傳諭知之。○又諭。副都統薩喇善派往駐藏辦事。換多爾濟來京。將此寄知薩喇善。著不必來京請訓。速即前往。富僧阿。未到之前。副都統印務。著暫交黃廷桂。并寄知多爾濟。令其速即豫備。薩

喇善一到。即便起身前來。○四川總督黃廷桂疏報。乾隆十八年分。大寧。綿州。彭水。西充等四州縣增竈。歲產鹽二百一萬六千六百觔。○調鑲白旗蒙古副都統三格。為三姓副都統。以四川北鎮總兵普慶。為鑲白旗蒙古副都統。○丙戌。

上詣暢春園。問

皇太后安。○辛圓明園。○以光祿寺卿熊學鵬為太常寺卿。○戊子。諭軍機大臣等。衛哲治

奏稱。定例官員離任。署內一應物件。俱移交接任。而外省並未遵行。每遇新任。必須另行備辦。或勒令屬員賠墊。或派累行戶。且胥役乘機盜竊。捏稱新製。冒銷領銀。此等弊端。勢所必有。請旨再加申飭等語。所見甚屬瑣屑。官員在任。久暫不同。接授前任物件。豈能保其盡無損壞。一概責以移交後任。於情事亦所難行。但胥役以舊作新。任意冒銷。及派累滋擾。自應查禁。從前既定有成例。即屢頒禁

令。亦祇屬具文。於政體未見有益。可傳諭衛哲治。令其遵照成例。酌量辦理。並於奏事之便。將此傳諭各省督撫知之。○是日。皇后詣桑壇位。行躬桑禮。

妃。

嬪二人。王。貝勒。貝子。公。福晉夫人三人。三品以上文武大臣命婦四人。以次採桑。供蠶事。○己丑。蠲緩長蘆滄州嚴壩場。乾隆十八年分旱災額賦。○庚寅。

上詣暢春園。問

皇太后安。○諭場屋制義。屢以清真雅正為訓。前命方苞選錄四書文頒行。皆取典重正大。為時文程式。士子咸當知所宗尚矣。而浮淺之士。競尚新奇。即如今科放榜前。傳首題文。有用九迴腸之語者。其出自漢書。腸一日而九迴。大率已莫能知。不過勦襲纖巧。謂合時尚。豈可謂非法不道。選言而出者乎。不惟文體卑靡。將使心術佻薄。所關於士習者甚大。

朕曩言言孔孟言大是難。職是故也。著將欽定四書文一部。交禮部。順天府存貯內簾。令試官知衡文正鵠。再策問時務。用覘士子學識。主試官不當以己見立說。上年順天鄉試。問黃河北行故道。今春會試。問黃河下流。皆孫嘉淦陳世倌。一己私見。究亦空言無補。若以此為去取。將啟士子窺探迎合附和之弊。其漸尤不可長。即如宋元以來。辭析朱陸異同。初因講學。而其後遂成門戶。標榜攻擊。甚

為世道人心之害。嗣後有似此者。必治其罪。○又諭陳克大原參情罪。本不至死。而身為職官。竟敢藐視法紀。負罪脫逃。行同鬼域。推其逃竄之心。若在邊疆山海之地。何所不往耶。此等敗類。斷不可稍為寬貸。陳克大著照部議。即行處斬。○又諭舒赫德等奏覆調遣額琳沁。格勒克巴木丕勒。往達清阿隊內。額琳沁前至博爾和濟。因腿疾告存。格勒克巴木丕勒前至西爾哈戈壁以內地方告存。奉

諭查訊緣由。伊等實無可置辯。但格勒克巴木丕勒在薩喇勒隊。始終奮勉。額琳沁同努三。擒拿瑚圖克。亦為奮勉。懇請贖罪等語。舒赫德。成衮扎布。此奏甚屬錯謬。朕前此因二人調往達清阿隊內。未經前往。是以降旨將額琳沁革去貝勒。仍給公爵。格勒克巴木丕勒。罰俸三年。此亦因係糊塗蒙古。非內地人員可比。是以格外寬貸伊等。若係內地之人。必且明正典刑。豈有如是結局之理乎。且此

事舒赫德。成衮扎布。早應參奏。參奏後或治罪。或寬免。皆在朕耳。乃竟為姑容。及朕飭令查問。又指稱二人奮勉之處。代為奏請贖罪。試思軍務獲罪。豈有准贖之例乎。今正值軍興有事。賞罰嚴明之時。伊等屢屢蒙昧姑息。朕竟不知何故。且成衮扎布自授將軍以來。辦理諸務。萎靡懦弱。致使喀爾喀等藐視。眾志不服。夫定邊左副將軍之職。初係由內廷大臣中簡放。前因額駙策凌人明白勤勉。特

授為定邊左副將軍。額駙歿後，朕以成袞扎布人尚去得，又已徹兵，即令居此職，辦軍營事務。今值有事之秋，非懦弱所能勝任。成袞扎布著革去定邊左副將軍，令公策楞補授。成袞扎布著授為喀爾喀副將軍，効力贖罪。伊若能改過，事定之時，將伊仍復補授。或由他喀爾喀之中簡放。臨時朕另降諭旨。今成袞扎布業經革去將軍，即應銷其以前錯辦之罪。著從寬免其交部。○又諭舒赫德等奏

稱此次擒拏瑪木特、扎木叅、瑚圖克出力人員，應如何施恩之處。著軍機大臣等分別議奏外，其擒拏扎木叅之馬甲滿楚擒拏瑚圖克之護軍阿玉錫等，俱係薩喇勒帶往之新厄魯特，直入扎木叅瑚圖克家內擒獲，極為出力。著加恩拔為前鋒，賞給藍翎。○又諭崔傑看來人糊塗，不勝總兵之任。貴州安龍鎮總兵員缺，著楊鐸調補。直隸正定鎮總兵員缺，著田英補授。所遺河間協副將員缺，著崔

傑補授。○軍機大臣議覆據副都統富德等奏稱：軍營馳奏事件，取直路遞送熱河。張家口外自第四站分路，至獨石口外張麻子井，計程四百餘里。自扎噶蘇臺腰站至頭站，此六站每站有馬三十五匹，請各徹二十五匹。安臺馳遞等語。應如所請。遣驛站員外郎傅鼎通、融臺馬安設，自獨石口至葛家屯，自葛家屯至熱河，取直接設驛站之處，即令傅鼎會同獨石口、張家口、臺站官員，亦照此辦理。所有接設驛站，即交富德、達松阿等管理。俟應徹時，一面報部，一面徹回各原站。從之。○又議覆副都統富德奏請酌定附近臺站蒙古供給烏拉口糧則例，查定例奉差馳驛大臣官員例，應官給羊為口糧。騎烏拉者，理藩院給票所需馬羊，悉由蒙古供用。後因徹兵，每站馬駝仍舊，現今每站備差馬各二三十匹，尋常奉差人員尚敷乘騎。若人數較多，臺馬不足，准令徹調附近蒙古烏拉馬乘用。但

不明定規制。臺站人等。或令蒙古加倍豫備。或竟不出臺馬。止用蒙古馬。均未可定。應如所奏。嗣後尋常奉差人員。仍照舊例騎烏拉外。其應馳驛大臣官員。需馬數目。由兵部先期行文該總管。照數豫備。其馳遞報匣事件。遇有二三十匹馬數臺站。准用一半。其一半准令馳驛人等騎用。所需若逾此數。再令扣數酌調烏拉馬。再蒙古協濟之烏拉馬。乘騎過站。其馬本人領回。口糧羊。亦不准向蒙古取用。所有應馳驛者。止令蒙古協濟烏拉馬。所需口糧羊。均照例官給。其例應騎烏拉者。馬羊仍照例取給蒙古。從之。○吏部等部議准。署兩廣總督班第咨稱。查增城縣屬之新塘。與裁汰之烏石司巡檢。原轄各地方。相去不遠。今添設主簿一員。駐劄新塘。所有管轄村莊。應將烏石司巡檢。原管之甘泉清湖。綏寧三都。共計一百餘處。統歸主簿管轄。又龍門縣屬之藍汾山廟子角。添設巡檢一員。查

該縣原設把總一員。管轄全縣村莊。雍正九年。添設永清汛千總一員。將縣屬之鰲溪等處。割歸該千總管轄。今永清汛移駐廟子角。亦應將鰲溪東埔。河東。大坡。上龍門。白茫。桂村。到灘。香溪。功武。穆雙。下尚賢。學道。鎮崗。烏石。歸仁。新坡。黃垌。歸善。下龍門。油田。橫槎。高沙。馬嘶。上林。西溪。上石泉。下石泉。上馬鞍。中馬鞍。下馬鞍等處。分撥該巡檢管轄。再增城添設主簿。應照佐雜衙門例。額設攢典一員。從之。○予原任福建巡撫潘思渠。入祀閩省賢良祠。辛卯。

上御勤政殿聽政。諭班第著即馳驛回京。兩廣總督印務。著楊應琚署理。山東巡撫員缺。著郭一裕署理。雲南布政使彭家屏。著調補江蘇布政使。所遺員缺。著納世通補授。楊應琚著即來京請訓。再赴粵省。班第起程後。所有兩廣總督印務。著鶴年暫行護理。彭家屏著即赴江蘇新任。不必回滇交代。郭一裕俟

彭家屏交代後。前往山東。郭一裕未到之前。山東巡撫事務。著白鍾山暫行署理。○又諭曰。張泰開著賞給翰林院編修。在尚書房行走。○命賞給附近臺站供應烏拉馬匹。蒙古王公台吉等。緞疋有差。○戶部議准漕運總督瑚寶疏稱。江南太倉衛後幫旗丁陳聰。漕船行至清河縣新莊鎮。黃河遭風漂沒。漕米無存。請照例豁免。淹斃副丁陳雲俊。照例撫卹。從之。○以翰林院侍讀學士王際華為詹事。原任兵部右侍郎李因培。為光祿寺卿。○以翰林院侍講劉星煒。充日講起居注官。壬辰諭京師二三月間。春雨未得霑足。現今麥秋將近。待澤甚殷。朕心深為軫念。宜申虔禱。著禮部即查照定例。敬謹舉行。○又諭御史歐陽正煥奏稱。現在各省澄汰教職。出缺甚多。今選拔貢生。朝考揀選引見者。每省不過十餘名。少者數名。除以知縣等官錄用外。餘人無幾。不敷補用。請將考列一二等之選

拔貢生。一體帶領引見等語。此其意不在慮補教職之乏人。而在未經揀選者。一概引見。或得僥倖用。知縣耳。選拔貢生。經大臣等揀選引見。其足膺知縣之任者。原不過屈指數人。其餘除願就佐雜外。皆得以教職即用。合計三次考試揀選之數。應用教職者。當亦不下百餘人矣。況有現在需次之進士。舉人。及各項貢生。又知縣改用之教職。已覺缺少人多。又何致不敷補用。該御史意中。必有希以知縣錄用之人。適考列優等。而未經入選。故為此奏耳。御史職司言路。如揀選大臣。或有徇私受託。揀選不公。按有確據。即可據實叅奏。若但欲取悅衆人。奏請通行引見。豈朕日理萬幾。必一一躬親遴擇。而派出之大臣。皆不足信。即如鄉會試中者。自服其公。不中者。必皆含怨。亦必盡令朕一一搜落卷耶。若如所奏定例。將未入揀選一二等之人引見。概用教職。則伎倆不行。亦未為不可。但歐陽正

煥之託言行私。不可不明示。著傳旨嚴行申飭。原摺擲還。○又諭副都統卓鼐請於乍浦滿洲兵丁。應補水手缺額內。扣留三十六缺。挑選綠旗兵丁等因。繕寫漢摺具奏。朕從前屢經降旨。滿洲大臣俱著繕寫清摺。卓鼐係滿洲大臣。所管皆係滿洲兵丁。伊別項陳奏。俱用清摺。獨此一件用漢摺。明係令漢人聞知感激之意。況滿洲生齒日繁。如有缺出。自應通融挑補滿洲。豈有將滿洲應補之缺。反補綠旗之理。若謂撐船一役。滿洲不及漢人。則乍浦空設水師營何用。且又非廣東福建海外可比。滿洲何嘗以水戰為事。所奏甚屬糊塗。著交軍機大臣議奏。卓鼐著嚴加申飭。○兵部議覆江蘇巡撫莊有恭等疏稱奉裁金山衛。歸併鎮海衛。所有軍船。遵改為鎮海衛金山幫。又金山衛屯糧。向係衛備在周浦鎮徵收。今歸併鎮海衛。應仍其舊。金山幫運隨各弁。照舊駐劄松江府。至儀徵衛離揚較

近。屯糧既歸揚州衛額。應令各丁赴揚完納。儀徵幫各弁。雖照舊駐劄儀地。其餘丁事宜。亦應赴揚辦理。又鎮海衛。向係蘇州府管轄。金山衛。向係松江府管轄。今金山衛已并鎮海衛。其督催考成。未便分隸兩府。應將奏銷盤查交代。編審屯田。報升報冊。一切年例兌運修造事件。專歸蘇州府督辦。又金山衛僉丁。向係松江府驗看加結。今并鎮海衛。凡幫弁填考。及旗丁僉換。應歸鎮海衛驗勘結報。悉由蘇州府暨清軍同知。覆覈加結。至揚儀二衛。均屬揚州府管轄。所有裁并儀徵幫各項事宜。悉照揚州衛原轄各幫辦理。又金山衛屯田。坐落金山南漚等縣民田內。軍丁住居四散。一切催糧等事。需人傳喚。應將金山衛原設快役三名。照舊存留。又各衛屯田。係分散各縣地方。若佃戶隱占抗租。或盜賣脫籍避運等弊。向係衛備管理。今應除軍丁詞訟。有干命盜大案。及戶婚田土事件。歸州縣

辦理外。至一切租種運造案件。及有關屯政之詞訟。應照舊歸衛查辦。又各衛年額養廉。原定繁缺五百兩。簡缺四百兩。今揚州衛養廉。已照繁缺例。毋庸加增。其鎮海衛養廉。年額四百兩。今歸併金山衛。事務較繁。亦請照繁缺例。增銀一百兩。又儀徵衛編支泰州所門軍口糧。并儀邑四門門軍口糧。原有支給本款。應照舊存留。歸入揚州衛額內。按年支解。又金山衛衙署。即在金山縣地方。係丁買民房。借為官署。金衛雖裁。鎮衛仍須不時到金辦事。應請留為辦公之所。至儀衛屯糧。已令各丁赴揚完辦。所遺衙署。已議改儀所監掣廳衙署。又金山衛學。現有該處生衿原設文廟。應仍其舊。社屬二壇。建設已久。亦未便議裁。至應祭之期。即令鎮海衛守備主祭等語。均應如所請行。從之。○以故廣西太平府屬都結土知州農世元弟世卿襲職。○癸巳上詣暢春園問。

皇太后安。○諭會試榜後。下第舉人。歷科以來。間有格外加恩之典。今科會試。所有下第舉子。亦著加恩。於薦卷內取文理明通者。驗看揀選。帶領引見。畀以司鐸之任。其奏請簡派大臣閱卷驗看。及按省酌定員數。分班選用之處。該部察例具奏。至年七十以上者。並著該部帶領引見。酌量給予職銜。以示優惠。○又諭高堰隄工需用石料。辦運船隻甚多。俱官為雇覓。已按給水腳銀兩。其例徵船料。自應照數完納。但此番工程緊要。各船更番迭運。無誤工需。加以石質粗重。挽載維艱。現今將次完竣。所有從前運石過關船隻應徵料稅。著加恩免其追繳。以示優卹。該部即遵諭行。○諭軍機大臣等。莊有恭奏請免徵運石船料一摺。已降旨加恩豁免矣。船隻過關。例應納料。但此番工程緊要。若關口按徵料稅。不無阻滯。必隨到隨放。方可無誤工需。該撫從前既經籌及。即當具摺奏聞。請旨豁免。乃

牒移高恒咨請部示。至今始行請豁。且以船戶散處。行追恐滋紛擾。為詞。此奏既甚遲緩。又屬取巧。如謂必應追繳完額。不當按數向遲奏之。該撫追繳耶。著傳諭申飭。○又諭前者。卞塔海以牛莊應運豆石。業經阿蘭泰奏請停止。而德爾格仍行辦運。將德爾格並官員等參奏。朕以此事若阿蘭泰豫先告知德爾格。德爾格仍將豆石辦運。自係德爾格之咎。如德爾格並未聞知。仍照例辦運。不過未能想到。尚無不合。曾降旨令阿蘭泰查奏。今據阿蘭泰奏稱。伊於途次見豆價稍長。到京後因將此項豆石奏請停運。並未豫先告知德爾格等語。看來德爾格並無不合。卞塔海所參殊屬過刻。著寄信令卞塔海知之。○甲午。

上詣黑龍潭祈雨。○免直隸滄州。保安。二州。乾隆十八年分。水災額賦有差。

大清高宗法天隆運至誠先覺體元立極敷文奮武孝慈神聖純皇帝實錄卷之四百六十

大清高宗法天隆運至誠先覺體元立極敷文奮武孝慈神聖純皇帝實錄卷之四百六十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌四月乙未補行乾隆十七

年江南軍政不謹官一員罷軟官一員年老

官二員才力不及官二員浮躁官一員分別

處分如例○丙申。

孝端文皇后忌辰遣官祭

昭陵○軍機大臣議覆山西巡撫恒文等奏稱

前軍機大臣奏准令於綏遠城所轄倉貯米

內碾米三萬石運送軍營查托克托城等處

倉貯米碾運需時且費腳價請於綏遠城倉

貯內動撥運往等語應如所議行至所稱即

雇歸化城商人駝車運送查雍正十三年原

任尚書通智雇商駝車運送並無遲誤此次

亦應如所議又稱現在軍營移駐烏里雅蘇

台較前稍遠酌量地方給價查雍正十三年

鄂爾坤運送米每斛共給銀七兩今運送烏

里雅蘇台加增十三站應每斛共給銀九兩

八錢零查雍正年間需用蒙古牲畜甚多脚

價稍昂今非雍正年間可比照前計算未免

過浮其作何節省之處應令斟酌近日實在

情形再行裁減又稱此次運送米照雍正十

三年派副都統一員地方大員八員微員十

六員兵一百名查綏遠城歸化城副都統各

有應辦之事難以久懸請欽點在京大臣一

員照管運糧其撥派官兵即由該處滿洲土

默特內派出亦應如所請至歸化城與烏里

雅蘇台相距窵遠水草不足難免牲畜倒斃

須豫為籌畫亦應如所請撥銀二萬兩交派

出大臣帶往備用得旨依議著派台柱辦理

運糧事務。侍郎兆惠總理照看。○丁酉諭軍機大臣等。現調察哈爾兵陸續俱至軍營。若令其在大營住宿。由烏梁海前來送信之克木波爾望見。必云我調內地兵來。伊等不免豫為防守。著寄信策楞等。於軍營之次。或一日路程。或半日路程。擇附近有水草處。察哈爾兵到時。均著在彼住宿。不可洩漏於厄魯特烏梁海等。亦不准令見蹤蹟。再此旨一到。永柱若仍在軍營。令其前往扎克拜達哩克。會同麒麟保辦理事務。暫住數日。以候諭旨。○河南巡撫蔣炳疏報乾隆十七年分內鄉裕州確山三州縣開墾水旱田地共三十三頃五十四畝有奇。○戊戌。

上詣暢春園問。

皇太后安。○署江西巡撫王興吾疏報乾隆十七年分新建萬安二縣開墾地田山共一十六頃三十畝有奇。○豁除江西鉛山縣水衝田三畝有奇額賦。○予故四川提督岳鍾琪。

祭墓如例。謚褒勤。○己亥。

上詣黑龍潭祈雨。○諭曰。舒赫德此次差往軍營辦理一切錯謬。從前行文準噶爾達瓦齊一事。自應奏聞請旨遵行。乃一面具奏。一面即行擅發。甚屬錯誤。曾將應行察議之處。暫令存記。今令伊查奏原任貝勒額琳沁公格勒克巴木丕勒未至調遣地方一案。伊等公然為之奏請寬免。此等奉調遲誤之罪。軍務攸關。豈得因其曾効微勞。即從寬宥乎。況此原係應行查叅之事。乃並未叅奏。已屬寬縱。及朕諭令查奏。復巧為開脫。舛錯已極。著交部將伊前次存記之案。一併嚴察議奏。尋議革職。得旨。舒赫德著將從前所有加級紀錄盡行銷去。從寬免其革職。○又諭。玉保奏喀爾喀屬下人盜取新降厄魯特馬匹。若照蒙古例。將數人正法。伊等方知警懼。迺將軍成衮扎布辦理此事。因貝勒車登扎布所住地方與厄魯特相近。即令車登扎布出馬。如數

抵償厄魯特。並未將盜馬之人緝捕治罪。甚屬不合。前因成衮扎布諸事辦理錯謬。革去定邊左副將軍之職。餘罪俱加恩寬免。今復有心袒庇喀爾喀等。甚負朕恩。著交部將從前登記錯謬。一併入案嚴加查議具奏。○諭軍機大臣等。前經降旨。交額琳沁多爾濟購買馬匹。今據將軍策楞等奏稱。額琳沁多爾濟云。吾等喀爾喀。比從前王丹津多爾濟購買馬匹時。生計較難。但交買數目不甚多。購買可得等語。從前初次購買馬匹時。因久無兵事。蒙古等並不用馬。滋生愈多。購買自易。至雍正九年十年。連次用兵。當時如何購買。而今大兵撤回二十餘年。馬匹滋生較多。何至反形拮据。額琳沁多爾濟購買馬匹。若謂比先年未用兵時。稍覺艱難。尚是實情。至謂比雍正年間用兵時尤難。甚屬非是。况額琳沁多爾濟係朕擢用之人。理應感戴。將所交之事。勤謹奮勉辦理。乃為此推託之語。殊屬

不合。著寄信額琳沁多爾濟。此事朕已經交派伊當盡心辦理。如數購買。倘有遲誤。惟額琳沁多爾濟是問。○吏部等部議准。江蘇巡撫莊有恭疏稱。蘇州海防同知。復設案內。議駐福山。巡防海口。嗣又兼管船政。查船廠設蘇州。劉河兩處。往來不便。今請改駐常熟。於廠所往來既便。而巡緝各口。四面皆宜。至福山現有駐防遊擊千把各員弁。足資巡查。毋庸同知專駐。從之。○直隸總督方觀承疏報。遵旨勘實乾隆八年分。保定廣平等府。共墾過旱荒地。五十四頃九十七畝有奇。庚子。諭海昌等奏稱。京口旗兵恩賞銀兩。比綠旗之數較少。懇請加賞。並請將驍騎校暨已退兵孤寡。另記檔案之閑散人。一併賞給等語。各處兵丁紅白事恩賞。乃國家格外恩施。當初俱各按處定數。並非一例。况滋生銀兩之事。與別項不同。今若將京口加賞。倘各省復行援請。必至辦理紛煩。如果必須加增。前任

大臣何以未經議及。必待吉慶到彼始行奏請。明係市惠沽名。此事除交軍機大臣並該部議奏外。海昌吉慶等著嚴行申飭。○降貴州提督丁士傑為廣西左江鎮總兵官。○蠲緩山東海豐縣竈戶。乾隆十八年分水災額賦。○辛丑。

上御勤政殿聽政。○諭戶部議駁愛必達等題請增給湯丹等廠銅價一摺。自屬按例。但該處銅廠開採日久。硃深礦薄。食物昂貴。該督撫等題請增價。亦係目擊情形。隨宜籌辦。著加恩照請增之數給與一半。餘廠不得援以為例。○壬寅。

上詣暢春園。問

皇太后安。○御史陳大化奏。查向例國子監學正學錄等官缺出。九卿保舉科目出身人員。帶領引見。記名補用。但日久弊生。鑽營徇私。實所不免。嗣後請學正學錄等官應補人員。漸次用完時。照考取中書例。吏部請旨。令進

士舉人一體考試。特派大臣閱卷呈覽。該部將錄取人員帶領引見。記名簡補。至經解時藝。所以覘學識。其考試時應如何兼用之處。臨時請旨。著為定例。得旨著照所請行。○癸卯。諭上下兩江被災州縣。已疊次加恩。前因今年遇閏。恐青黃不接之日。民食拮据。傳諭該督撫查明酌量再加賑恤。今據鄂容安按照各屬輕重情形。奏請分別加賑平糶。著照所請。將上江之宿州鳳陽臨淮懷遠虹縣靈璧泗州盱眙五河等九州縣。長淮鳳陽泗州等三衛。下江之阜寧鹽城興化海州沐陽山陽清河桃源安東高郵泰州甘泉寶應銅山沛縣邳州宿遷睢寧等十八州縣。鎮江淮安大河揚州徐州等五衛。無論極次貧戶。俱再加賑一月。其餘災輕州縣。仍及時平糶。以資接濟。該督撫等其督率所屬。加意拯恤。務使災黎均霑實惠。毋致向隅。該部遵諭速行。○禮部帶領浙江江西福建湖北湖南陝西等

省選拔貢生引見得旨楊興邦談恕行孫賢相顏煌鍾旭朱堦何澤著程繼萊王用鑑黃立隆馬文炳等十一名以知縣試用金學超吳條高大爵王誥陳文組方卓然朱大勲李文藻程兆鏗韓修鳳尹榮世任文溥王宣邵張拱辰熊榕饒夢銘陳繼鎮黃宏泰鍾正人蕭炳馨李大烈傳其瑛林紹裕林虎榜周凝光龍鎬阮文璵盧儒羅治左士望舒才博黎樂生易祚坤李道一王杰葉長賡藍衣經高其志曾一貫楊本立黎廷梅等四十一名著交吏部詢問願以佐貳等官用者以佐貳等官用願以教職用者以教職用○甲辰戶部議准四川總督黃廷桂奏各廠現餘銅百四十萬觔請分七運解京從之○命大學士來保史貽直陳世倌協辦大學士刑部尚書阿克敦戶部尚書蔣溥刑部尚書劉統勲侍郎蔡新吏部侍郎楊錫紱裘曰修禮部侍郎介福兵部侍郎吳達善工部侍郎董邦達內閣

學士錢維城李清芳充殿試讀卷官○以故輔國將軍宗室儀啟子敏惠襲封一等奉國將軍○乙巳策試天下貢士胡紹鼎等二百四十三人於太和殿前制曰朕繼承鴻業勤思上理緬惟自古帝王上畏天命下凜民若秉道以揆幾窮理以制事凡所以建用皇極為表正萬邦之本也朕宵衣旰食於天人感應之際理道制治之原整躬以率物勸學以興賢念茲在茲未得其要茲當臨軒發策佇爾讜言易曰先天而天弗違後天而奉天時書曰惟天聰明惟聖時憲惟臣欽若惟民從乂天人合一之理前聖蓋昭著言之顧天日在人之中而人不知故先儒曰天即理也董仲舒以為善言天者必有驗於人又謂道之大原出於天天不變道亦不變夫元亨利貞仁義禮智皆配四時言之在天之天虛而難索在人之人天近而可求然在人之人天即在天之天無二理也無二道也人無一日不在理道

中。本無理道之可名。自宋諸儒出。於是有道學之稱。然其時尊德性。道問學。已譏其分塗。而標榜名目。隨聲附和者。遂藉以為立名之地。而大道愈晦。今欲使先聖先賢之微言大義。昭如日星。學者宜何所致力歟。朕勅幾筵治。蓋無日不奉天以乾乾。五經四子書而下。濂洛關閩之學。亦嘗深究其源流。而微窺其得失矣。其粹言可以幾道者。可得切陳歟。古言孟圓則水圓。孟方則水方。上之所視嚮。下之所效法從之。故曰。正朝廷以正百官。正百官以正萬民。朕臨御十有九年於此。勤勤求治。罔敢暇逸。而民風未盡淳。俗尚或即於偷者。其咎安在。夫為政不在多言。顧力行何如耳。虛張治具。粉飾文為。非所以為治也。條教號令。懸諸象魏者。求治之跡。而非致治之原也。所與朕共理天下者。內而公孤卿士。外而牧民長伯。皆儼然臨於民上。而或者視自治治人為二事。毋乃闕於理而闇於事歟。深宮

燕閒之地。朕弗敢康。所賴以輔予治理。左右有民者。其省身克己之道何若。夫實心實政。夫人能言之。然必返寤寐而無慙。而後對大廷而不愧。朕念此至切矣。多士來自田間。且分治人之責。宜有敷陳。用覘素蘊。國家設科取士。首重制義。即古者經疑經義之意也。文章本乎六經。解經即所以載道。易曰。修辭立其誠。書曰。辭尚體要。文之有體。不綦重歟。朕於場屋之文。屢諭以清真雅正。俾知所宗尚久矣。乃者或逞為汗漫之詞。徒工綺麗。甚至以漢唐詞賦。闌入其中。律以大雅之言。甚無當也。文之浮薄。關於心術。王通論之詳矣。今欲一本先民。別裁偽體。豈惟文治廓清。抑亦所以明經術而端士習也。陸機云。固無取乎冗長。韓愈言。約六經之旨而成文。皆聖人辭達之義也。司衡之去取。其可不黜華崇實。以加之釐正歟。記曰。官先事。士先志。士也者。養之於庠序之中。登之於廟廊之上。以備馳驅

之用。而收任使之效者也。民俗之厚薄。視乎士風之淳漓。士習之不端。由於士志之不立。榮進素定。干祿之學。聖人弗許。志一不立。而寡廉鮮恥。卑污之行隨之。居家或不免武斷之習。應試或尚懷干進之私。浮薄流傳。競相仿效。士習將何由而正乎。國家百餘年。養士之典極隆。邇者復命各省學臣。舉行選拔。於其來也。行廷試之典。慎遴選之方。分途擢用。所望於士之鼓舞奮興。至深且渥矣。太學者。賢士之所關也。其貢入成均者。宜何如其陶淑而樂育之。無俾虛糜廩餼。歟。師儒之官。教化所出。鄉國學中。皆於下第內採其遺珠。畀以秉鐸。將內則陳敬宗。李時勉。外則胡瑗之。蘇湖教法具在。或亦有用以端飭士習者歟。凡此數端。內而天德。外而王道。文章者性道之華。學校者風化之本。載籍所傳。講肄所及。爾多士其詳著於篇。朕將親覽焉。○戶部議准。福建巡撫陳宏謀疏。稱臺灣兵米船戶陳

永盛等。外洋遭風漂沒。人米無存。請照例豁免。從之。○丙午。諭軍機大臣等。自今首夏禾苗插蒔之時。亟需雨澤霑沛。前方觀承奏。保陽一帶。於本月十七八日。已得透雨。而河間景州等地方。聞其得雨尚未霑足。可傳諭該督。令其查明。曾否得有透雨。現在情形若何。即速奏聞。尋奏本月十七八日。河間府屬各縣。及景州。阜城。肅寧。東光等州縣。得雨四寸至一寸不等。保定省城。亦於二十八日得陣雨。寸許。大勢全無旱象。得旨。總之。不可存諱飾之心。戒之。京城左近。則實足慰目前矣。○命副都統德寧。為叅贊大臣。馳驛前往北路軍營。○丁未。諭軍機大臣等。昨降旨。麒麟保。永柱等。玉保。若傳旨。派車凌之人出兵。曉諭色布騰。令永柱親自帶色布騰前來。於何日起程。何日可到張家口外。作速奏明。今據玉保奏。已以色布騰為叅贊大臣。派車凌等出兵。此時永柱若在扎克拜達哩克。想遵朕前

旨。已領色布騰。起程前來。如永柱因迎接察哈爾兵丁。道路舛錯。未到彼處。恐致太遲。著寄信麒麟保。即將朕先降諭旨。曉示色布騰。派本處章京一員。照料色布騰前來。一日行幾里。量何日可到張家口外某站。急行奏聞。但勿過急。致勞色布騰之力。并寄信永柱。到扎克拜達哩克時。即行趕緊前來。○賑卹甘肅省皋蘭狄道。河州。渭源。金縣。靖遠。環縣。鎮番。平番。寧夏。寧朔。靈州。中衛。平羅。西寧等一十五州縣。乾隆十八年分。被旱災戶有差。戊申。

上詣暢春園。問

皇太后安。○還宮。○湖廣總督開泰等議覆。調任湖北布政使德福奏。請裁汰驛丞。添設巡檢各事宜。查黃州府屬之李坪等五驛。並非衝衢孔道。不須專員管理。應如所奏。將李坪驛務。并歸團風鎮巡檢兼管。陽邏驛務。并歸陽邏鎮巡檢兼管。巴水。歸蘄水。縣知縣兼管。

西河。歸蘄州知州兼管。雙城。歸廣濟縣知縣兼管。又稱。鄖陽府屬之鄖縣及鄖西縣。距省二千餘里。各僅知縣一員。典史一員。鄖縣之江峪塘。鄖西縣之上津堡地方。各距城百餘里。奸良混雜。亦應如所奏。於該二處。各添設巡檢一員。再查襄陽府屬穀城縣馬腦觀地方。離縣窵遠。接連川省。尤為緊要。該縣亦止知縣一員。典史一員。應請添設巡檢一員。下部議行。○四川總督黃廷桂疏報。各屬補首。乾隆十七年分。墾過水旱田地。共一百頃八十九畝。有奇。○豁除陝西扶風縣屬水衝沙壓地。一十八畝。額賦。○已酉。

上御乾清宮。召讀卷官入親閱。定進呈十卷。甲第。○諭軍機大臣等。滇黔等省。委員押運京局銅鉛。所過之處。前令該督撫隨時奏報。自應加意查察。但不肖員役。往往乘機盜賣。飾詞捏報。沉溺。不特外江巨浸。即內河曲港。時有之。地方官未能詳勘。固已不免。售其說。

計。即使沉溺屬實。而銅鉛採自礦廠。長途轉運。所費甚多。一旦付之水濱。豈不可惜。著傳諭該督撫等。務行嚴飭委員。小心僭運。並督飭經過汎地文武各員。留心查察。毋任盜賣。謊報。其有在內河沉溺。必使委員守候打撈。足數。不可聽其詭飾。至江湖波濤險惡之區。該督撫或先期酌派員弁。豫為防護搶救。免致疎虞。尤為妥協。○吏部議准。江西巡撫范時綬奏。贛州一府。管轄十二縣。地方遼闊。查察難周。請改寧都縣為直隸州。分管二縣等語。應如所請。寧都縣知縣。准其裁汰。改為直隸州知州。縣丞為州判。典史為吏目。教諭為學正。贛州府屬之瑞金石城二縣。撥歸該州管轄。從之。○兵部議准。兩江總督鄂容安疏。稱蘇鎮右營遊擊所管汎地。現有守備分防。為事甚簡。可改為都司。壽鎮左營遊擊。較城池關廂。亦可改為都司。壽鎮左營遊擊。較簡於駐防宿州之守備。請改遊擊為都司。移

駐宿州。即以原防宿州之守備。移駐壽州。仍為都司中軍。廣德營遊擊。兵少事簡。漕標左營遊擊。僅司催漕。均改為都司。從之。○豁除直隸滿城。唐縣。易州。涑水。宣化。固安。六州縣水淹屯地。共一百二十六頃九畝有奇。河南陽武。原武。二縣。水衝沙壓田。地共一百六十六頃十畝有奇。額賦。○是月。兩江總督鄂容安等奏。奉諭嚴禁優伶中蓄髮之人。徧查蘇城優伶。所帶網巾。以髮編成。如真髮。實無蓄髮之事。惟聞閩省間有之。得旨。朕既有此諭。必非無因。或者汝等訪查未盡悉耳。其人姓名偶忘之。有一人。則不止一人矣。但不必滋擾。且朕之意。正不在此。即如引見綠旗武弁中。有公然留鬢者。當時即令剃去。此豈戲旦哉。若果戲旦留髮。不過盡感覓利之計。正不必問及。爾等為大臣。當思大者遠者。調任江蘇布政使彭家屏。奏謝恩。請訓。得旨。一切盡心實力辦理。不必猜疑。用汝繁劇之任者。

以汝能辦事也。汝既不能奈人何。人亦不能奈汝何。但自己信得及。恩怨置之度外可也。若有退縮顧望。轉關求媚之意。則失之遠矣。江西巡撫范時綬奏請飭部定議。通行各省。嚴禁私錢。得旨不但各省不必。即汝江省亦尚在可緩之事。使官錢充裕。何必使私錢。若不充裕。並此私錢亦不令使。則民將使何物。大凡錢之一事。越辦理越見貴。今直隸不辦理而惟查囤積。乃大減價於前。若不查囤積及私鑄私銷。而惟禁私錢。是不治其本而治末之見。大不可者。福建漳州鎮總兵官富海奏整頓地方惡習。營伍廢弛情形。得旨惟應實力。亦不可欲速。若日久而惡習仍然。則汝之咎也。

大清高宗法天隆運至誠先覺體元立極敷文奮武孝慈神聖純皇帝實錄卷之四百六十一

大清高宗法天隆運至誠先覺體元立極敷文奮武孝慈神聖純皇帝實錄卷之四百六十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌閏四月庚戌朔

上諭

上御太和殿傳臚賜一甲莊培因王鳴盛倪承

寬三人進士及第二甲汪永錫等七十人進

士出身三甲彭良騫等一百六十八人同進

士出身○

上詣

大高殿行禮○辛亥諭戶部議覆甘肅巡撫鄂

樂舜奏請估變西寧縣庫收貯緞疋一摺此

案先經該撫咨請部示戶部以不便據咨遽

議駁令具奏到日再行辦理一切政務惟論

其事之可行與否。若事在可行。督撫業已咨部。該部復行令具奏。及奏到之時。原不過照議覆准。徒多往返案牘之煩。甚屬無謂。况部臣奏准與督撫自行陳奏。又有何區別耶。嗣後督撫咨商各部事件。著該部將應駁者即行咨駁。應准者亦即定議奏聞。毋得沿襲陋習。仍以具文從事。將此傳諭各該部知之。○直隸總督方觀承疏報。乾隆十七年分。霸昌熱河兩道屬。開墾旱荒地。七十七頃四十四畝。有奇。通永道屬。首墾荒地。五頃二畝。有奇。

○壬子。

上御乾清門聽政。○諭軍機大臣等。范時綬奏請查禁攬用私錢一摺。可謂不治其本而治其末。所見非是。錢法之弊。以有餘者囤積居奇。犯法之徒。復私銷私鑄。希圖漁利。錢價之昂。率由於此。若地方官實力嚴行查辦。則錢價自漸平賤。前者朕降旨查禁囤積。順天直隸地方。經方觀承遵旨查辦之後。錢價已大

減於前。即其明驗。總之官錢充裕。民間自無須更用私錢。不然。則私錢之禁愈嚴。錢價之增。必且日甚。於調劑本意。未見其有當也。頃各省錢價。未必盡平。恐其辦理之方。或尚有未得宜者。可於各省督撫奏事之便。將范時綬原摺鈔寄。令其閱看。並將此傳諭知之。○

癸丑。

上詣暢春園。問

皇太后安。○幸圓明園。○諭軍機大臣等。前聞

江蘇地方。優伶中竟有私自蓄髮者。朕因係本朝制度所關。降旨傳諭該督撫等。令其嚴行懲禁。今據鄂容安等奏稱。留心訪問。聞福建間有之。請勅閩省督撫。一體禁約等語。優人本屬微賤末流。計圖覓利。幼童蓄髮。尚非有心違禁。然亦足為地方風俗之害。閩省既有此習。著傳諭喀爾吉善。陳宏謀。令其留心嚴禁。以挽惡俗。但亦不必張皇其事。出示騰告。致駭聽聞。轉屬具文也。○又諭曰。永常王

進奏。同日奏到夷人到境情形。摺內俱未明晰。向來準夷貿易。及請安奏事。俱於夷人到東打坂地方時。詢明言語情形。人畜貨物多寡數目。詳晰奏報。今永常摺內。既稱目兵瞭見人馬牲畜。則必距卡已近。不難根問來情。乃又稱細繹稟詞。似係貢使。而王進泰亦稱或係請安進貢。或係貿易先到之人。尚未詢明等語。豈守卡營弁。失之張皇。望見蹤跡。即速馳稟。永常等急於入告。遂不暇細詢耶。抑夷人行過之處。離卡尚遠。故尚未遣人查詢耶。可傳諭永常王進泰。令將是否夷使入貢。及到卡情形。即行據實奏聞。若實係請安夷使。可令永常傳示哈密照看夷使來京之部員。令其迅速兼程來京。毋致延緩。尋永常奏臣於四月二十四日。途次布隆吉地方。接駐哈鎮臣治大雄稟稱。差弁探得前次飛塵。原是進貢夷使等語。本係卡外瞭見蹤跡具稟之詞。嗣接提臣王進泰鈔寄奏藁內。有或係

請安。或係貿易先到之人等語。詞屬兩歧。臣細覈駐哈鎮臣稟內情形。來夷人數無多。又帶有牛羊駝馬馱子。斷非貿易先來之人。確係貢使無疑。當即奏聞。因途次匆迫。措詞實未明晰。現已遵旨密札照看。夷使赴京之理。藩院主事索諾穆。令渠作為己意。催令該夷使迅速赴京。不使稍緩。亦不得張皇得旨。知道。足見王進泰辦事不妥。○以健銳營右翼翼長額爾登額。為吉林副都統。○甲寅。諭軍機大臣等。今日鄂容安等。及雅爾哈善奏摺內。俱有拏獲傳播西洋邪教之案。西洋所奉天主教。乃伊土舊習相沿。亦如僧尼道士。回回。何處無此異端。然非內地邪教。開堂聚眾。散創為匪者可比。若西洋人在廣東澳門。自行其教。本在所不禁。原不必如內地民人。一一繩之以法。如其潛匿各省州縣村落。煽惑愚民。或致男女雜處。自當嚴為禁絕。今該督撫等既經查辦。著傳諭鄂容安喀爾吉善

莊有恭。只可就案完結。毋致滋蔓。將江南現獲之張若瑟。福建現獲之馮大千等。解回澳門安插。并諭令廣東督撫。嗣後不時留心稽察。毋任潛往他省。教誘滋事可耳。○乙卯。諭軍機大臣等。據左副將軍公策楞奏。貝勒車布登之子齊旺多爾濟等眾。呈稱情願自備資斧。在軍前効力等因。著寄信策楞等。現在具呈人內。若帶在軍營調遣。非駐防游牧可比。著不必自備資斧。仍照例賞給盤費。○兵部議准。廣州將軍錫特庫疏稱。虎頭門附近之纜尾河。亭步港。二處地險境遼。應增兵船巡防。請派撥綠營。船二隻。海船二隻。繒船。派官一員。兵四十名。艍船。官一員。兵三十名。分發二處貼防。再廣州城逼近海口。支河叢錯。最易藏奸。請撥櫓槳船二隻。隨同軍標四營。船。協力巡查。再撥櫓槳船二隻。貼巡南海縣之佛山。順德縣之陳村。二處河道。從之。○豁除甘肅各屬乾隆元年至十年。水衝地畝額

賦銀一萬六千九百兩有奇。糧一十五萬九千一百七十六石有奇。○丙辰。豁除江蘇如皋縣蘆洲水衝田四萬七千九百畝有奇額賦。○丁巳。

上詣暢春園問

皇太后安。○江西巡撫王興吾疏報。乾隆十七年分南昌府屬勸墾老荒續荒田地。山蕩共一十五頃九十八畝有奇。○旌表守正被戕之山西陽高縣民鄧廷彥妻趙氏。○戊午。諭

軍機大臣等。鄂樂舜議覆撥運甘省庫貯茶勛一摺。已交軍機大臣速議矣。該撫辦理此事。殊屬遲緩。伊於四月初三日。接到軍機處移咨。即應作速查議奏覆。何以至十八日始行繕摺。又不由驛馳遞。仍遣家人齎奏。以致轉稽時日。前令外省督撫摺奏事件。不得擅用驛遞者。原指地方尋常事件而言。至此等事關軍務。既經查明酌議。自應即速馳奏。何必如此拘泥。著並傳諭知之。○己未。諭曰。興

化縣知縣劉霖。前經該督鄂容安。以承辦賑務侵蝕米石。攙和糠粃情由。題請革職。朕念國家發粟。以救待哺之災黎。而貪吏忍於奪之民口而自食。若照常題參審訊。何以懲儆貪邪。因降旨革職。拏問。以為罔恤民命者戒。今據莊有恭審明。散賑斗斛。實未短少。其米色不純。係家人書辦。乘機侵扣。劉霖並無通同侵蝕情弊。應照例革職等語。朕辦理庶政。一秉至公。不存成見。劉霖如果剋民入己。即應於該處正法。既經審明。止係失於督察。應照例治以應得之罪。著一併議奏。○諭軍機大臣等。前據方觀承奏。河間。景州等處。得雨俱未深透。現在祈禱。順德府屬亦尚在望雨。本月初八日。京師得雨。看來雲勢濃重。頗廣。該督前奏。直屬望雨之處。曾否普被甘霖。現在未據奏報。著傳諭詢問該督。即速查明。據實奏覆。以慰懸念。尋奏保定省城。及河間。景州一帶。於初八日。得雨寸許。十一日。保定又

得雨三寸。河間所屬報到。得雨相同。二麥結實飽滿。禾苗長發。其餘各州縣收成並可得七八分。惟沙河內卽得雨未透。大田未種者十分之二。得旨覽奏稍慰。但恐有諱飾之意耳。至沙河內卽若再不得透雨。則將成災。撫卹之事。宜早加之意也。○免湖北潛江。沔陽。天門。三州縣。并沔陽衛。乾隆十八年分水災額賦有差。○庚申。冊封。

忻嬪。命大學士來保為正使。禮部左侍郎介

福為副使。持節。冊封戴佳氏為

忻嬪。冊文曰。朕惟宮闈敷化。聿資淑慎之儀。綸綍宣恩。式表溫恭之德。徽章榮賁。茂典攸昭。爾戴佳氏。秀毓名門。早嫻懿範。垂芳型於圖史。著燬中閨。叶雅度於珩璜。敬修內職。茲仰承

皇太后慈諭。冊封爾為忻嬪。爾其祇膺象服。懋恭儉以承庥。永迓純禧。履謙和而衍慶。欽哉。○諭。據班第等奏稱。廣東雷州府之海安一

營。歲支本色兵米。不及一成。此外俱係折色。近年米價稍昂。兵丁不敷買食。查有高州府屬之化州。石城。二州縣。官田租穀。每年可得三千餘石。例須變價充公。請以此項穀石。碾米撥運。添給本色。於兵丁甚為有益等語。海安為外海水師。有巡查洋面之責。歲支本色兵米。不及一成。於兵丁生計。未免拮据。著照所請。將化州。石城。二屬官租穀石。碾米撥運。添給本色。以資巡防。其應作何分別支領。俾濱海窮兵。均沾實惠。及一切碾運事宜。并交與該督撫妥協辦理。○諭。軍機大臣等。軍機大臣議覆。鄂樂舜請將庫貯官茶。由黃河裝載。順流至歸化城。運往北路軍營一摺。鄂樂舜原奏。不特道路紆迴。且有委卸之意。著傳諭申飭。至議覆中所稱。動撥標營駝隻之處。撥運官茶。原為備賞之用。非刻不可緩。此項拴養備戰駝隻。軍行在所必需。若以馱運茶餉。則緩急需用。轉恐貽誤。不應如此辦理。此

事原當鄂樂舜親身前往出力處。但有巡撫地方責任。且彼及該省藩臬亦俱非能辦此事之人。其兄鄂昌現在軍臺効力。即令其前往甘省。帶同甘肅道公泰承辦。除不得動用官駝外。其應如何陸續辦運。能運幾何。著動用官項。伊等自行酌量辦理。至鄂昌自己用度。著伊二人自備。仍著該撫具摺奏聞。○又諭黃廷桂所奏審擬陳琨案內之逆犯陳子學等一摺。內稱現在具疏題結。其失察之文武各官。於本內附參。並自請議處等語。該督辦理此案。甚為妥協。不特無可議處。且當加恩優敘。以為實心辦事者勸。俟題本到時。另行降旨。可即傳諭黃廷桂知之。○又諭鐘音所奏陝省節年錢糧。已未完數摺內。有並無官侵。亦無吏蝕。其各年未完數內。除帶緩外。俱係貧民輸納不前等語。甚為錯謬。錢糧之不能年清年款。大抵不出官侵吏蝕紳衿抗欠。三端。第借民欠二字。以相隱射耳。若果係

被災貧民。必早已加恩重則蠲免。次則緩徵帶徵。其不在此數者。皆安居樂業。耕鑿輸將。維正之供。古今通義。何得概以貧民為詞。如謂貧民即當抗欠。何如直不徵收。國家俸餉。將何所出耶。鐘音摺內。不過欲揜其徵輸不力。未能全數通完之咎。而不自知立言之錯誤也。著傳諭知之。○又諭據策楞奏稱達瓦齊與阿睦爾撒納業經和好。阿睦爾撒納已往見達瓦齊。其助阿睦爾撒納之哈薩克兵五萬名。俱已撤回等語。朕思此等俱屬荒唐。全不可信。哈薩克各為生理。並無總統之人。無論不能聚兵至五萬之多。即所謂阿睦爾撒納與達瓦齊業已和好。亦非實語。此明係準噶爾烏梁海懼我進兵驅逐伊等。妄言伊內業已安定。並無事故。以緩我師耳。可傳諭策楞勿遽以此為真。惟當設法。冀得實信。留心辦理。○湖廣總督開泰。湖南巡撫范時綏。條奏寶南局添鑄鼓鑄各事宜。一添鑄五鑄

應照乾隆七年題定銅鉛錫觔兩配用。一原設五鑪。今添五鑪。歲共需正耗銅一十九萬六千餘觔。遇閏加增銅一萬六千餘觔。請將榔桂兩廠所產銅。除抽稅外餘銅。照部定價動支。地丁銀收買。又歲需白鉛一十六萬餘觔。遇閏加增一萬三千餘觔。除榔廠照舊收買稅餘供用外。應令桂廠委員。亦於稅餘白鉛內。照部定價請領地丁銀收買。至運局水腳銀。均照例於砂稅內動支報銷。鑄出錢文。搭放兵餉及發局兌易。俱扣除成本歸還司庫原款。一寶南局自開鑄以來。配用點錫。係動項採買。並榔桂等處創試存局稅錫四萬餘觔。搭用。皆照每百觔腳價銀一十六兩二錢合計成本。查前項錫將次用完。今有存局榔州柿竹園錫礦。所抽稅錫。應請動用。查稅錫每觔價銀一錢五分七釐。水陸腳費銀一釐九毫零。應照每觔價。腳銀一錢五分八釐零。合計成本造報。一設鑪十座。共歲需黑鉛

二萬五千四百餘觔。遇閏加增二千餘觔。應將榔桂兩廠抽稅黑鉛。除領解顏料并搭解京鉛外。儘數解局備用。一添設五鑪。應照前議均攤。安設三鑪。尚有二鑪。須添蓋房屋六間。又銅鉛庫房。現止大堂東西各一間。不敷堆貯。應添建庫房三間。一定例每鑄銅鉛錫百觔。給工料錢一千六百二十九文。請照例辦理。惟鑪匠關係緊要。應飭局員遴選充役。一鼓鑄器用繁多。工匠無力措置。請照例動項代置。仍於各匠應得火工錢內。扣還歸款。一添設五鑪。鑄錢增倍。請按每觔銀一兩。搭錢一百文。除本年搭放兵餉外。餘錢俟積有成數。發局兌易。再查局內舊存滇銅一十萬觔。耗銅四百九十五觔十兩。貯久難免鏽蝕。請先行配用。查此項銅。原准滇省來咨。每百觔計價銀一十一兩。自尋甸運永寧。腳銀二千一百七十三兩三錢二分零。共價。腳銀一萬三千七百一十三兩零。又自永寧委員接

運回楚水脚等銀四百三十兩七錢六分零。今請配搭供鑄。應照原定每劬價銀一錢一分。脚銀三分一釐零。覈算成本報銷。下部議行。○辛酉。

上詣暢春園問

皇太后安。○諭軍機大臣等。寄信熱河副都統李侍堯。道員富勒渾。準噶爾來降台吉車凌。車凌烏巴什。及台吉宰桑隨從人等。皆未出痘。前降旨著伊等至避暑山莊。瞻仰朕躬。第思避暑山莊。雖係口外。聚集人多。難免有出痘之人。蒙古等甚懼出痘。將來或有傳染。朕心深為不忍。將此交與李侍堯。富勒渾。山莊左近。如有出痘之人。暫令移於廣仁嶺西邊遠處迴避。俟車凌等回去後。再行移回。又諭據永常等所奏。準噶爾夷使敦多克等到卡情形一摺。其遵旨辦理之處。尚屬妥協。但所奏甚為遲緩。前次初報。瞭見蹤跡一摺。並未詢明來由。已與向來所報不同。或因急於

上聞。擬俟詢明。再行續奏。亦當於一二日內。即行馳達。何以遲至八日之後。豈以王進泰已經調任。遂未免觀望遲回耶。此甚非是。其夷使敦多克等。應即遵照前旨。令所派司員。帶同迅速兼程來京。不可循照往例。又致遷延時日。可即傳諭永常。王進泰知之。○內閣翰林院。帶領壬申恩科散館。修撰。編修。庶吉士。引見。得旨。修撰秦大士。編修范梈。士。盧文弨。已經授職。清書翁方綱。鞠愷。甘立功。吳以鎮。梁同書。吉夢熊。俱授為編修。鄭岱鍾。授為檢討。戴天著。以部屬用。漢書邵嗣宗。陳齊紳。謝墉。張坦。紀復亨。錢載。陳荃。王懿德。德保。博明。俱授為編修。李兆鵬。金維岱。王猷。馬錦文。盧穀。苟華南。俱授為檢討。平太。著以宗人府主事用。馬騰蛟。張模。鄭忬。趙瑗。王協和。俱著以部屬用。萬廷蘭。江聲。王政義。賈煜。范泰。恒。俱著以知縣即用。龍煜岷。熊恩紱。著歸進士原班銓選。○壬戌。諭軍機大臣等。方觀承奏

順德府屬之沙河內邱二縣積沙之地雨未透足大田未種者十分之二等語節候已屆芒種急需透雨方可佈種大田是宜設法祈禱以求

上天福佑蒙古侍衛巴雅爾祈雨有應已降旨於噶爾錫令其差員送往保定可傳諭方觀承即派地方官一員照看伴送馳往順德虔誠祈禱○以故雲南景東府屬三岔河土巡檢楊傳之子起彤襲職○旌表守正捐軀之

湖北東湖縣民覃正仁女覃氏○癸亥旌表守正被戕之陝西武功縣民魏大緒妻孫氏○甲子諭盛京戶部銀兩自足賞賜之用不必隨帶於途但今歲有新歸附之人著於部庫內撥銀十萬兩先期送往熱河交貯兵備道庫以備賞賜之用○又諭貴州巡撫定長所奏審結平遠州民陳新序等闕堂辱官一案辦理非是陳新倫既充戶書當知法紀乃欺隱田糧抗不服官審訊之時伊之子弟婦

女入衙闕鬧伊何不阻止實為此案罪魁至欺隱田糧反屬輕罪矣何得稱另案歸結至兵丁康洪義現食名糧遇刁民不法即應向前拏犯乃隨同觀看應從重問擬以整戎伍該撫所擬未足蔽辜至生員陳以善等先後闖入公署雖畏事先回但隨眾往觀於士風有玷不應僅以發學戒飭完結此案著三法司另行定擬具奏該知州潘廷權平時不能彈壓地方以致胥役藐法營私及經研訊又致家屬闕鬧公堂不即嚴拿懲治輒將陳新倫鬆刑已且上樓畏走怯懦縱長刁風此與高時農之跪兵何異著革職拏解刑部治罪以為有司惜身命而無氣節者戒至此案辦理甚屬刺謬皆出於署撫溫福定長回任後依違定案不行改正著交部議處溫福因係護篆於此重案竟苟且從事且當發覺之始並未奏聞設署篆之員盡如此草率則封疆重任其誰倚溫福著嚴加議處摺併發○諭

軍機大臣等。貴州巡撫定長奏。審結平遠州陳新序等。閩堂辱官一案。據稱平遠州知州潘廷權。若因此案一併題參。轉恐滋長刁風等語。所見甚屬錯謬。從前曾經傳諭督撫。令遇地方聚眾案件。不必將該州縣官附疏題參。恐長刁頑之習。此指甫經發覺。事尚未定。或未顯著者而言。今此案潘廷權一見喧鬧。即畏懦鬆犯。不行彈壓。以致各犯無所忌憚。釀成事端。更至登樓蹉跌。庸劣無能已極。尚

平遠州知州

七

可令其覲顏司牧耶。若另尋款蹟糾參。而事蹟昭著。早為地方百姓所恥笑。即少緩彈章。原不足以懲儆刁風。徒多留一劣員。以貽地方累耳。實乃膠柱鼓瑟之見。昧於事理。輕重著於奏事之便。將此通傳各督撫等。共知此意。又諭鄂樂舜奏報甘肅已未完錢糧數目內。有未完胥役侵蝕一項。據稱現議於失察各官名下分別賠補等語。此項錢糧。乃民間正供。從前經徵各官。漫無覺察。竟令奸胥

蠹役。從中飽其欲壑。今積年既久。尚無著落。自應於從前失察各官名下著賠。以清帑項。但須上緊催繳。毋任拖延。仍以往返咨行。具文了事。可傳諭鄂樂舜知之。○又諭我內扎薩克與外四部落。及眾喀爾喀扎薩克地方。各按旗分部落。設立正副盟長。管理游牧事務。今將新來投誠之厄魯特台吉車凌等。帶來戶口。俱編設旗分佐領。既與內扎薩克喀爾喀扎薩克等相同。應將車凌。授為盟長。車凌烏巴什。授為副盟長。台吉色布騰協辦盟長事務。其盟會著賜名為杜爾伯特賽音濟雅哈圖部落。○授一甲一名進士莊培。因為翰林院修撰。一甲二名王鳴盛。一甲三名倪承寬。為翰林院編修。

平遠州知州

三

大清高宗法天隆運至誠先覺體元立極敷文
奮武孝慈神聖純皇帝實錄卷之四百六十二

實錄卷四百六十二

五

大清高宗法天隆運至誠先覺體元立極敷文
奮武孝慈神聖純皇帝實錄卷之四百六十三

駐劄總督官經筵講官太子太傅文淵閣大學士文淵閣領閣事領侍衛內大臣稽察欽奉 上諭軍機處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭軍機處管理刑部戶部理藩院

世襲騎都尉軍功加九級隨帶加二級又加二級臣等謹將內大臣戶部尚書領蘇滿洲都統軍功紀錄一次

尋常紀錄十四次臣等謹將經筵講官太子少保工部尚書紀錄六次臣等謹將等奉

敕修

乾隆十九年甲戌閏四月乙丑

上詣暢春園問

皇太后安○諭軍機大臣等鐘音奏請修築興
安州護城隄工一摺所言甚覺前後矛盾既
稱夏秋水發萬一漫決一城民命所關急應
及早修防又云如蒙允准即委員再往相度
於農隙時動帑興修由前言之實有刻不可
緩之勢由後言之農隙乃在秋冬並非即速
興修則今夏設有疎虞何以待之何自相刺
謬若是耶若謂目下尚屬無妨則又不必張

皇其詞矣。披閱之下。殊不可通。著傳旨申飭。至此項隄工。究竟是否實關緊要。急宜興修。抑或尚可姑待之處。仍著該撫速行查明覆奏。或刻不可緩。則一面興修。一面覆奏。不可回護前非。尋奏興安州舊有四隄。惟在東之惠壑隄。外通江流。內闕廬舍。實不可緩。現委漢興道魏崢往督興工。其餘三隄。離水稍遠。亦不逼近民居。尚可防護。請俟農隙。依次興修。報聞。○豁除直隸宛平縣水衝沙壓地九頃額賦。○丙寅。吏部議准。陝西巡撫鍾音奏稱。漢中府廣積倉儲穀無多。大使一缺請裁。倉歸南鄭縣經管。從之。○丁卯。諭開泰奏鎮軍鎮總兵王廷極年力就衰。可否令以原官休致等語。王廷極著調取來京引見。其鎮軍鎮總兵員缺著邱策普調補。南陽總兵員缺著董孟補授。○諭軍機大臣等。宛縣民劉洪謨叩閭一事。著鈔錄供詞。將該犯遞解保定。交方觀承於原籍確查。並傳伊兄弟訊取該

犯平日行為。此次來京妄訴。是否另有別情。據實奏聞辦理。如無別項情節。不過希圖僥倖。即按例加責發落。地方官嚴行約束。無令出境滋事。原狀并發。尋奏現委派保定府知府張紹渠馳往完縣。同該縣拘到劉洪謨之父劉義。並伊兄劉洪典。訊明實係守分貧民。劉洪謨平日傭工度日。亦無為匪事蹟。素有痰症。病發赴京妄為。希圖僥倖。委無別情。現經發縣加責。滿日仍交地方官嚴管。報聞。○議政大臣來保等議覆。閩浙總督喀爾吉善等奏稱。浙省海塘現在沙漲。每日兩潮。並不到塘。與塘工無礙。無需道員專管等語。應如所請。將海防道裁汰。仁和。海寧。海鹽。平湖。四縣塘工。歸并杭嘉湖道兼管。蕭山。山陰。會稽。三縣塘工。歸并寧紹台道兼管。各加養廉銀五百兩。即在裁去海防道養廉內動給。從之。○旌表守正捐軀之河南項城縣民楊國勇妹楊氏。四川通江縣民張仲義妻周氏。○戊辰。

上御勤政殿聽政。○內閣翰林院帶領新進士引見得旨。新科進士除一甲三名。莊培因王鳴盛。倪承寬。已經授職外。汪永錫。汪致和。汪存寬。平聖臺。朱筠。朱蔡元。田玉。周升。桓鼎郎。阿。阿肅。紀昀。沈業富。錢大昕。秦泰鈞。蘇綬。衛肅。胡紹鼎。王士禛。徐維綸。林誕禹。柯瑾。莊元曾。承唐。李封。陳夢元。陳聖時。林學易。尹均。曹學閔。于宗瑛。毛式玉。譚世燾。劉天成。張鶴雲。史珥。俱著改為庶吉士。葉佩蓀。王林。秦雄飛。于雯峻。查虞昌。王又曾。孫際清。倪高。甲。范家相。孔毓文。錢策。李昌煜。吉郎。阿。俱著分部學習。照例試用。顧鎮著仍留助教之任。常桂著以理藩院筆帖式用。蔣學鏡。孫枝。金忠。濟。吳視。張宗崑。李天墀。吳宜燮。王嵩。誕。曾忠。俱著以知縣即用。王大經。狄棟。馮履咸。戈源。毛萬銓。楊士璣。鄧正琮。周天柱。張映台。侯乾元。王元位。劉侑。嚴文典。崔一元。李夔。班。方延禧。七十一。嚴天召。邱大英。高兆煌。吳振域。杜憲。張

鵬九。史班。余介祚。蔣良翼。盧世昌。王本燾。王以寬。曹師聖。陶金諧。俱著分發各省。以知縣用。周翼洙。李舟。胡璫。王希旦。苗輪。寶。馬。雯。鄒承穎。王克勤。謝得懷。俱著以教職即用。餘著歸班銓選。○予故領侍衛內大臣宗室弘昇祭葬。儀如貝勒。謚恭恪。○已已。

上詣暢春園問

皇太后安。○諭侍郎嵇璜等奏報堰圩隄工已於閏四月十五日完竣等語。高堰為全淮保障。所關甚鉅。上年異漲衝刷。間段殘缺。朕心深切焦勞。念係石工。鳩役庀材。辦理匪易。今自興修以來。未逾半載。剋期告竣。俾運道民生。均資利益。諸臣各能體朕宵旰憂勤之意。協力同心。克副委任。宜加優敘。以獎勤勞。除東省辦料官員。已經降旨敘錄外。侍郎嵇璜。德爾敏。總河尹繼善。總督鄂容安。巡撫莊有恭。衛哲治。俱著交部議敘。嵇璜等帶往督修之司員。及江省辦料在工効力人員。俱一併

查明分別等第請旨議叙。諭軍機大臣等南河工員陳克濬等侵帑誤工上年先後查出虧空多者至數萬兩任意侵蝕貽害民生此等劣員即於各該地方立行正法亦不足以蔽辜其勒限嚴追已屬法外之仁今限期將次屆滿各犯名下應追帑項現在曹否完繳及完欠分數若干並各該員於被叅後有無畏懼勉力設措交納抑或甘心延玩以身試法情形及尹繼善如何設法勒追之處即速詳悉奏聞其限內全完者俟通案完結之日再覈定其應得之罪若逾限不完定即於各該處明正典刑屢次所降諭旨甚明朕法在必行斷不能少容僥倖但將來本犯既已正法未完之項著落伊等家屬完繳其終不能完繳者即當於高斌張師載二人是問高斌張師載上年皆有交銀二萬兩以希贖罪之請此何等罪犯可以言贖伊二人從前捏飾容隱訛法養奸釀成錮習是屬員之虧空

皆伊二人之虧空著落賠補作何定以限期如逾限不完又應作何治罪亦當令尹繼善於此時擬定奏聞至現在監追限期將滿各犯如有畏罪情急別生事端及自戕殞命致逃顯戮者恐尹繼善不能代伊等擔任也尹繼善之能辦此事與否及嗣後尚能承受恩典與否皆於此案此時為斷可一併傳諭知之尋尹繼善奏侵帑誤工一案現在極力催追宋應麟業經全完王連璧于鰲可於限內全完其陳克濬等十一人飭令極力設措如限滿未完即行正法至高斌張師載徇縱工員侵帑是屬員之虧空即伊二人之虧空各犯中終不能完者請勒限一年著落二人代繳逾限不完即將高斌張師載請旨正法得旨知道了諒汝於此案亦不敢復蹈故智耳又諭據定邊左副將軍公策楞等奏喀爾喀扎薩克公台吉等呈稱情願往軍前効力人內將公車登薩木丕勒等十五人令至軍

營以備調遣。多岳特多爾濟等九人令不必前來等語。喀爾喀扎薩克公台吉等感戴朕恩。情願前往軍營効力。甚屬可嘉。但今年烏梁海等之事。暫且不辦。欲俟機會。所奏十五人。即令至軍營。亦並無調遣之處。恐伊等虛糜路費。著寄信策楞等將公車登薩木丕勒等十五人。前往軍營之處。暫行停止。令各住本處游牧。以俟將來酌量調往軍營。并諭台吉等知之。○軍機大臣奏。喀爾喀一等台吉齊旺多爾濟呈進驕馬三百匹。以備臺站應用。照舊例應紀錄一次。賞大緞二匹。官用緞二匹。得旨。齊旺多爾濟著施恩賞給公銜。餘依議行。○庚午。諭。福建巡撫陳宏謀奏。稱諸羅縣奸民吳興等。糾衆奪犯。及同安縣賊犯林對等。糾衆拒捕。兩案內。為從各犯。俱已擬絞候具題。尚未准部覆。例應入於下次秋審。但此二案情罪重大。已令臬司歸入秋審會勘等語。兇頑之徒。糾黨抗官。肆行不法。自應

明正典刑。以示懲創。著照該撫所請。入於本年秋審情實具題。并傳諭各該督撫。凡遇此等案件。俱照此辦理。再停止勾決之年。情實案內。有糾衆聚匪。刦犯辱官。及侵蝕虧空各犯。與尋常謀故鬪殺等犯不同。若輩予以監候。已屬法外之仁。使更久稽顯戮。地方百姓日遠漸忘。非所以肅刑章而示炯戒。嗣後停勾年分。著刑部將情罪重大案犯。開具事由。另行奏聞。請旨正法。○辛未。

上詣暢春園。問

皇太后安。○諭。侍衛永柱。新降台吉色布騰。已令在叅贊上行走。帶兵前往軍營辦事。今年不得前赴熱河。瞻仰朕躬。加以封爵。若令其來京。陛見。伊未經出痘。不便前來。著永柱帶領色布騰。至張家口。至時著大學士公傳恒。往彼接見。轉傳諭旨。尋永柱遵旨帶領前來。命大學士公傳恒。至張家口。傳旨迎勞。並封色布騰為貝勒。壬申。

上幸靜宜園駐蹕。○諭曰。班第等奏。審擬周紹華。私雕假印一案。所辦失之過當。私雕假印。固屬藐法。但所犯止於撞騙財物。按律定擬斬候。已足蔽辜。即使其情罪可惡。亦祇應入於秋審情實候勾。猶以為宜重。或值不勾到之年。附疏聲明處決。斯亦足矣。乃該督等。將周紹華照光棍為首擬斬立決。此蓋見朕近日有特旨從重辦理之案。遂心存觀望。大失輕重之宜。朕明慎用刑。惟期平允。從無畸重畸輕之見。如糾眾聚匪。刦犯辱官。及貪官侵蝕。限內仍不完贓等案。因其為人心風俗所關。不得不嚴示懲創。真之重典。并非於尋常案件。一概從嚴科斷也。此案著刑部於題到時。按例定擬。班第鶴年。著傳旨嚴行申飭。總之一存成見。即屬私心。如因有此旨。復謂朕意近在從寬。以姑息為迎合之術。於不宜寬者。概從寬。則又失之遠矣。通行傳諭各督撫知之。○諭軍機大臣等。京師於二十日得雨。

自夜及晝。已甚霑足。且陰雲密布。雨勢頗寬。前方觀承奏報河間等屬。得雨情形。看來尚未透足。其沙河。內邱。一帶。正在望雨。特降旨令巴雅爾前往祈禱。今距京師得雨。已閱三日。直隸所屬缺雨地方。是否亦得透雨。尚未據方觀承奏到。朕心深切懸念。著傳諭方觀承。令將各屬得雨遠近分數。作速奏聞。尋奏查河間府屬景州。阜城。交河。等處現得雨一寸。順德府屬沙河南和。平鄉各得雨一二寸不等。內邱尚未得雨。其餘霸州。順義。房山。得雨八寸。涿州。良鄉。永清。固安。通州。文安。涞水。平谷。武清。香河。易州。昌平。密雲。三河。懷柔。東安。廣昌。得雨七寸至五寸不等。寶坻。延慶。定州。并正定府屬之無極。行唐等縣。得雨二三寸不等。惟河間以南。并順德。廣平。一帶。雨水未足。細加訪問。此時正在穫麥。遲至十日後。麥已登場。而晚秋適種。亦屬應時。報聞。○又諭范時綬奏降調知縣李其昌。現在赴部引

見可否仍用為新建縣知縣等語。凡因公室誤降旨送部引見之員。如其才具果為地方之所必需。祇應具摺聲明。候引見時。朕酌量錄用。不應遽請原缺補用。為屬員留地步也。上年因高斌為河工同知。孔傳樞留缺所降諭旨甚明。范時綬何以復為此奏。李其昌著俟引見後再行定奪。其另摺奏請揀選之處。亦停其交部。可將此傳諭。范時綬知之。旌表守正捐軀之江蘇甘泉縣民張添佑女張

氏。癸酉。

上還宮。○四川總督黃廷桂奏。拏獲捏造妖言為首之陳子學。即行正法。餘犯分別定擬得旨。奸匪之徒。倡立邪教。煽惑愚民。地方大吏少存姑息。以致滋蔓深為風俗人心之害。黃廷桂於此案一經發覺。督率所屬迅速查拏。嚴密辦理。甚屬可嘉。其從前失察之咎。毋庸置議。仍著交部議敘。以為實心任事者勸。予故甘肅河州鎮總兵楊大立。祭一次。給與

半莖。豁除直隸寬城站水衝沙壓地。四頃十一畝。有奇。額賦。甲戌。

上御太和殿視朝。文武陞轉各官謝恩。○諭。據副都御史麒麟保奏。車凌烏巴什之母。差人來云。我等屬下人。屢受皇上厚恩。毫無効力之處。今伊等又至乏食。或恐妄為盜賊。現交宰桑等嚴加約束。但牲口盡絕。生計甚屬艱難。求如何酌辦等因。看來厄魯特等生計。實係困苦。扎薩克圖汗巴勒達爾情願助給羊五千隻。親王德沁扎布之子一等台吉齊旺多爾濟助給羊三千隻。大牲口五百。此等所助牲口。可否請旨賞給厄魯特等語。扎薩克圖汗巴勒達爾。台吉齊旺多爾濟等。知厄魯特困苦。感戴朕恩。情愿助給。甚屬可嘉。但伊等之物。朕亦不肯徒取。著交策楞照例折價賞給。將此項現有牲畜。交麒麟保接收。一面散給厄魯特外。餘者速行放賑。將此情節。詳細告知車凌烏巴什之母。并令伊將屬下人

仍交宰桑嚴行管束。○湖北巡撫張若震疏報乾隆十七年分嘉魚均州二州縣首墾更名地共五十二頃二畝有奇。○乙亥上詣暢春園問

皇太后安。○幸圓明園。○諭軍機大臣等前因新降台吉車凌等屬下人口糧困絕朕心深為不忍。雖將扎薩克圖汗巴勒達爾等助給大小牲口賑給。然猶恐不足。今軍營倉內存貯大麥四千餘石著寄信麒麟保現在出青牲口已肥同色布騰會議多帶駝隻由軍營運來散給車凌屬下人等并寄知定邊左副將軍策楞。○丙子諭兆惠未回京以前。袁曰修著仍兼管戶部侍郎事務。○又諭王三賓看來不勝總兵之任著以副將用。所遺山東兗州鎮總兵員缺著許仕盛補授。○諭軍機大臣等近有人奏各省有漕州縣書吏斗級人等勒索浮收弊竇復萌請飭該督撫查禁等語。漕糧積弊久經釐剔該督撫自應隨時

嚴密稽查使漕政永遠肅清乃日漸因循不肖官吏乘機舞弊所言未必無因著鈔寄各督撫令其實力查察嚴行禁革毋視為具文以開廢弛之漸。○丁丑

上詣暢春園問

皇太后安。○詣

大高殿

壽皇殿行禮。○還宮。○諭軍機大臣等直隸順

德廣平等屬前有缺雨地方朕心深為厯念

昨於二十六日據方觀承奏到河間以南順德廣平一帶雖已得雨但尚未霑足今又閱三日矣曾否續得透雨並沙河內邱等處佈種大田有無妨礙著傳諭方觀承令其作速查明據實詳細奏聞尋奏河間以南一帶雨雖未足大田早已乘潮播種順廣二府屬雨澤不勻沙河內邱尤覺短少大田未種者十分之二至二十日沙河縣得雨一二寸未能透勻現在巴雅爾設壇祈禱前聞巴雅爾在

天津求雨。蒙頒發扎達石。用以祈禱。著有靈應。仰懇將此石賞交巴雅爾。敬謹祈求。得旨已賞去矣。用畢。即速送來。○軍機大臣議奏。國子監八旗教習。乾隆八年奏准。列在一等者。仍留教習三年。再行引見。以知縣即用。其二等。分別以知縣教職用。但二等以知縣用之員。現既投供。遇有挑選。轉得先膺錄用。而一等得官。轉在二等之後。誠如

聖諭。殊非分別等次。以示鼓舞之意。請嗣後一等仍留教習人員。遇有揀發之處。准其一體報名赴挑。從之。是日起。

上以夏至祭

地於

方澤。齋戒三日。○戊寅。

上詣

雍和宮行禮。○諭軍機大臣等。從前江西監禁之西洋人李世輔。已閱九年。著加恩釋放。交與該督撫等。解往廣東澳門安插。其跟隨之

將相臣。伊得志。二人。著發回原籍。交地方官管束。○軍機大臣議覆。福建巡撫陳宏謀奏。稱福州。漳泉等府。地狹民稠。半藉海船為生計。查康熙五十六年定例。出洋之人。勒限三年。准回原籍。逾限不准復回。至雍正五年以後。洋禁已開。似不應仍拘舊例。況出洋之人。或因貨物未清。守候愆期。不能依限回籍。情有可原。且此等人。稽留外洋。保無滋事生釁。今請久稽番地人等。果因貨物拖欠等事。以致逾限不歸。及本身已故。遺留妻子女。願歸本籍者。無論例前例後。均准回籍等語。臣等酌量。似此辦理。於洋面既無妨礙。而貿易良民。不致屏之番地。事屬可行。至所奏向後販洋之人。仍定以三年為限。三年後不聽再歸等語。竊思海洋風信不常。帳目守候非易。此番定例之後。或仍有逾限之人。既不忍悉行擯棄。勢必又須籌辦。轉滋煩瑣。請交該督撫。妥定章程。俾此等出洋之人。得以均歸故

土。并請飭下廣東督撫一體遵行。從之。○是月。盛京戶部侍郎管理威遠堡等六邊事務卞塔海奏。戶部所屬開原。遼陽。牛莊。蓋州。錦州。寧遠。鳳凰城等七倉。每倉設外郎一員。辦理糧務。除陞選離任外。從無論年調補之條。以致外郎在倉。竟有二十餘年之久者。若不酌量變通。不無滋弊。查各城倉官。由筆帖式補放者。俱係三年任滿。揀選調補。今盛京各部衙門外郎。不下二十餘員。以之揀選調補。

實錄卷四百六十二

十八

足敷所用。請嗣後開原等倉外郎。行走滿五年者。照倉官年滿調補例。報部註冊。以次陞調。臣等會同盛京將軍。各部侍郎。揀選辦事勤慎之外郎。咨報吏部。調補倉缺。報可。○京口副都統兼管兩淮鹽政吉慶奏。查場下一帶。舊有范隄。外禦海潮。內抵河水。向設堡夫。商捐工食。令其挑積土牛。以備修補。責成各該地方河員查覆催督。但該汛河員離隄遙遠。積土並無實效。今請令各場大使就近管

理。按夫計日。挑積土牛。倘不實力查辦。即行揭參。報聞。○浙江巡撫雅爾哈善奏。遵旨查勘浙省湖河灘地。查慈谿縣之孫湖。會稽縣之鑑湖。灌溉甚廣。無庸剷挖。餘姚縣之汝仇湖。積久成淤。里民就淤開墾。於雍正七年。乾隆三年。兩次升淤田一百七頃有奇。又陸續首報。墾田二十六頃三十畝有奇。蕩八十七畝有奇。又上虞縣夏蓋湖。淤漲處所。開墾水田二百一十五頃餘畝。惟餘杭縣之南湖。界址未清。田糧淆混。現在確勘。各里首報開墾田地。蕩二十六頃六十畝有奇。但地土肥磽不同。應分上中下三則科徵。前項報升內有民額地。山蕩改田二頃三畝有奇。又杭州衛坐落餘杭陶村。草蕩改田三頃九十七畝有奇。今既改徵。田糧應豁除。至南湖原分上下兩湖。上南湖地高。久經開墾。惟下南湖為蓄水要區。請嚴立四至界限。不許居民私墾。得旨。覽奏俱悉。○又奏報蠶麥豐稔情形。得旨。

實錄卷四百六十三

十九

聞得浙省春雨過多。蠶麥不無傷損。何稱豐裕。豈欲諱飾耶。山西巡撫兼管提督恒文奏請將大同一鎮。照陝甘例。於該鎮各協營路內。挑取勇健馬步兵一二千。並揀選曉暢行陣。技勇優嫻之將。備千把。俱指名派定。立為備戰官兵。以備調發。得旨。此非目下急務。辦理徒滋訛傳。且綠旗兵亦非緩急可恃之物也。且緩二三年再看。

實錄卷四百六十三

字

大清高宗法天隆運至誠先覺體元立極敷文奮武孝慈神聖純皇帝實錄卷之四百六十三

大清高宗法天隆運至誠先覺體元立極敷文奮武孝慈神聖純皇帝實錄卷之四百六十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉 敕修

乾隆十九年甲戌五月己卯朔

上詣

北郊齋宮齋宿。○諭軍機大臣等。瑚寶前奏淮安山陽地方四月十二日得雨情形。殊不明晰。業經批示詢問。今覽覆奏摺內稱。十至二十一等日。又得雨五分。及一寸二分。高阜麥苗現在含苞吐秀。低田二麥倍覺茂盛。又另摺內稱。閏四月十一、十二及二十二等日。連得甘霖。入土二、三寸不等。二麥現在刈穫等語。所奏終屬糊塗。麥苗既在望雨之際。則此寸許之雨。何能霑足。

乃稱二麥含苞吐秀。漸次登場。前後更為矛盾。可傳諭鄂容安。令其將淮北之山陽清河桃源宿遷邳州等處。麥收雨澤。并有無旱象情形。查明據實覆奏。尋奉入夏以來。各屬連得暢雨。麥禾加倍滋長。糧價平減。淮北一帶相同。得旨欣慰覽之。○又諭。此數次策楞等奏摺內。並無王成袞扎布之名。此際伊或已至軍營。或尚未至之處。著寄信策楞。遇便奏聞。再德寧起程之日。朕問伊何時可趕及大學士傅恒。伊奏稱本日

夜間即可趕及。今傅恒等已至。問及德寧。是日非特並未趕及。即至見車凌車凌烏巴什等時。伊俱未及趕上。德寧起程。不過比傅恒等畧遲二三時。何至落後數日。平日行走。謂伊年老不能兼程。尚可容恕。及至領兵。亦復如此。朕必不輕縱。德寧著傳旨申飭。再前往軍營之滿大臣俱係特派。當念身係滿洲。尤宜奮勉。與喀爾喀等爭先行走。始不負欽派滿洲大臣之意。若但圖安逸。不能忍耐勞苦。不惟見譏於喀爾喀等。又

何以服兵丁之心。嗣後倘有似此者。經朕聞知。必當從重治罪。斷不寬恕。著策楞轉諭軍前衆大臣等知之。○庚辰夏至。祭

地於

方澤。

上親詣行禮。○詣暢春園。問

皇太后安。○幸圓明園。○諭。據協辦河務富勒

赫奏稱。高寶運河兩岸磚石各工。於閏四月

二十二日。均已照估一律如式完竣等語。高

寶運河兩岸工程。前經降旨。交與協辦河務富勒赫專司督辦。今自興工以來。甫逾兩月。悉能如式告竣。淮揚二郡運道民生。均資利益。甚屬迅速可嘉。富勒赫著交部議敘。其在工文武員弁。並著查明等次。奏請交部分別議敘。○諭軍機大臣等。愛必達以貴州提標中軍李現祥等侵那生息利銀一案。將失察之前任提督丁士傑具摺參奏。已降旨交部察議矣。但丁士傑之在貴州提督任內。其居

官行事。究竟若何。其於此事。有無通同捏飾之處。抑或僅止失於查察之咎。愛必達此番叅奏。是否實因李現祥之事起見。抑或因上年定長曾奏其致書囑託。遂不免有附和定長之意。可傳諭碩色。令其不可瞻徇。亦不可苛求。秉公詳悉查明。據實覆奏。尋奏查丁士傑在貴州提督任內。尚能熟悉營務。勤於操練。其居官行事。未得深知。近抵黔省。訪知一二年來提標馬匹。遇有倒斃。不即買補。竟係丁士傑將馬價銀。統交中軍叅將衙門收存。匿倒不報。侵尅草乾等項銀。上下任意取用。約有八九千兩之數。至李現祥。侵隱生息利銀三百餘兩。丁士傑並不確查月報。及當舖實數開造。乃聽李現祥另呈樣冊照造。顯係通同捏飾。愛必達此番因新任提督宋愛查出李現祥侵那事。咨揭會叅。不得不照例辦理。似無附和定長之意。報聞。○辛巳。

孝誠仁皇后忌辰。遣官祭。

景陵。○諭曰。甘肅布政使吳士端著來京。其員缺著史奕昂前往署理。○兵部議准。原署兩廣總督班第奏稱。廣東廉州營。分防合浦靈山二縣。內合浦縣之永平司屬地方。毗連西省。為猺獞出沒之所。周三百餘里。並無臺汛。僅設東界一塘。安兵三名。且離廉州郡城數百里。查東界塘之東十五里。地名九叉河。為諸山扼要之所。請添設一汛。派撥外委一員。帶兵十六名。駐劄防守。其東界塘亦屬單弱。再添兵五名。共足八名。改塘為汛。又靈山縣屬陸屋地方。水陸交衝。上通廣西南寧。下達交趾江坪。前設陸屋一塘。僅兵二名。今應添設六名。共足八名。改塘為汛。再自廉州郡城直至靈山。原設石康多蕉車板。廣榔。嚮水官橋。力背水山心。高橋等塘。暨豐塘。共十塘。每塘止安兵二名。各應添兵一名。以上計共添兵三十七名。俱於該營內酌量抽撥。查該營原設府城頭塘兵三名。靈山縣頭塘兵二名。

係遞送公文。可以歸併看守城門之兵代遞。兩塘兵五名全裁。又該營分防福祿。蜜蘿。火燒橋。平鴨。武利。潭壩。佛子。山下。公館。清湖。吳屋。等十一汛。每汛原安兵七八名。至二十餘名不等。應於福祿汛。抽兵一名。蜜蘿。火燒橋。平鴨。武利。潭壩。五汛。各抽兵二名。佛子。山下。公館。三汛。各抽兵三名。清湖。吳屋。二汛。各抽兵六名。以上裁抽兵已足三十七名之數。其九又汛外委。亦毋庸另設。統於該營城汛外委內酌撥前往。至營房應分別添建。除石康等十塘。每塘僅添兵一名。應於舊塘房內通融居住。其新設九又汛。派外委一員。兵十六名。應建營房十三間。東界汛添兵五名。陸屋汛添兵六名。應建營房六間。從之。○蠲緩福建臺灣鳳山二縣。乾隆十八年。旱災額賦有差。被災較重者。賑卹一月。以故五經博士卜科姪玉柱。襲職。壬午。諭貴州布政使員缺。著吳士端調補。俟來京陛見後。再赴新任。

○諭軍機大臣等。向來督撫養廉。任事後另有別員署理者。正署均支其半。若未經到任。則正員不行支領。今策楞雖未到任。現在軍前辦事。與奉差他處者不同。且伊曾任廣督。其總督養廉。著照已到任之例辦理。將此傳諭楊應琚知之。○又諭齊齊哈爾副督統達色。奏遵旨於索倫兵內。備派一千名。請帶領驍騎校。領催披甲。十六人。以備統領官兵進發時。往來遞送文移等事。照例給與鹽菜銀兩等語。著照所請行。至西北兩路。本年冬季。彼處之兵。又添派數千名。現在前鋒統領清保。已授為黑龍江將軍。俟伊到時。添兵一切事宜。會同清保。公同商議辦理。此時宜加意慎密。毋致洩漏。○又諭御史陳作梅奏。海船應速竣工一摺。著交該督撫鄂容安。莊有恭。詳悉查明。定議具奏。尋奏。勘得自太倉土塘連界之鑑腳港。至耿涇。係昭文縣所轄。約長一萬一百餘丈。自東至西。地勢漸高。內地高

於水面二三尺。至八九尺不等。向無塘工。亦無民修隄埝。乾隆十二年風潮案內。常昭一帶。衝損田廬人口甚多。賑卹費至鉅萬。亟應建築。照上年太倉土塘。高八九尺。底寬三尺六寸。面寬一丈二尺。勘估需銀五萬餘兩。自界浮至巫山港。共長五千九百五十餘丈。地勢漸高。向有民築隄岸。自巫山港西至江陰縣之黃田港。岡阜連屬。間有斷續。亦有民築隄圩。此二處止須就現在民築隄埝。令地方官督率。培厚加高。無庸另行築塘。至白茆河長九十餘里。自昭文縣至支塘。計五十餘里。現在水勢尚深。無庸議濬。惟自支塘至海口。計四十餘里。悉皆淤淺。現在照該縣紳士議估。面寬六尺。底寬三尺。深八尺。兩岸築壩。俾內水常清。海潮不入。不致淤墊。或遇內水異漲。又可開壩洩水。逐段勘估。需銀三萬有奇。通計築塘濬河。請兵借給銀八萬兩。得旨。如所議行。○又諭。據永常奏。準噶爾夷使。已抵

橋灣。現在即可入關。且據該夷使言。於起程時。業已派出貿易頭目。亦於六月間可到等語。從前準夷部落。准其通貢貿易。原係加恩。噶爾丹策零。其後策妄多爾濟那木扎勒喇嘛達爾扎繼立。因係噶爾丹策零之子孫。是以仍前辦理。至達瓦齊篡立。則係伊之僕屬矣。今伊貢使前來。若仍前相待。我朝當全盛之時。國體攸關。不應委曲從事。以示弱於外夷。若少示貶損。準夷素性猜疑。陰懷叵測。將來必至搆釁滋事。不得不先為防範。況伊部落數年以來。內亂相尋。又與哈薩克為難。此正可乘之機。若失此不圖。再閱數年。伊事勢稍定。必將故智復萌。然後倉猝備禦。其勞費必且更倍於今。況伊之宗族車凌。車凌烏巴什等。率衆投誠。至萬有餘人。亦當思所以安插之。朕意機不可失。明歲擬欲兩路進兵。直抵伊犁。即將車凌等分駐游牧。衆建以分其勢。此從前數十年未了之局。朕再四思維。有

不得不辦之勢。所有明歲軍興。一應糧餉兵丁馬駝。均應豫為籌畫。其西路所調兵丁。約需二萬。此內欲撥甘涼綠旗兵八千。及西寧涼莊。西安。歸化城。土默特。察哈爾。以及新降之厄魯特兵。共合二萬之數。如此辦理。似已足敷調遣。或有另行辦理之道。著永常詳細籌議。速行具摺馳奏。候朕酌定。將來十月內。朕另降諭旨。令永常策楞等來京。將一應機宜。面加訓諭。至陝甘現辦軍需。鄂樂舜恐不能辦理裕如。已特派鄂昌前往。並令史奕昂署理甘藩。以資協助。可一併傳諭知之。尋奏查歸化城。土默特。察哈爾。及新降之厄魯特。習知口外道路情形。自應派撥。再索倫兵騎射素強。尤諳草地路徑。亦應派入。請於臣標暨固原。甘州。安西。三提。西寧。寧夏。涼莊。四鎮綠旗兵。派撥一萬。其西寧。寧夏。涼莊。歸化城。土默特。察哈爾。厄魯特。派兵九千。再將索倫兵派入一千。共合二萬之數。又查瓜州。扎薩

克公額敏和卓。人極勇往。深悉夷情。應將哈密。瓜州。經頭。派撥二百名。使額敏和卓帶領隨營進征。如遇夷境。左近之經頭。令其曉諭招順。至一切軍裝器械。現有備戰。備貯之項。可以動用。糧餉馬駝。查照出征西路籌畫。奏聞辦理。下軍機大臣議行。○吏部議准。兩廣總督班第咨稱。查新寧縣屬之那骨堡。新設縣丞。應將新寧縣屬之土岡。石井。那骨。北邑。允泊。陡門。陡門下崗。北微。圓山。大湖。深井。富坑。牛欄。牛欄嶺。背龍圖。土灣。那扶。水隆。小凹。轉水。等各村莊。二百五十七處。統歸縣丞管轄。又大澳地方。添設礮臺一座。應將省局現存一千觔鐵礮一。四百觔鐵礮三。運至大澳礮臺安置。從之。○以編修劉墉充日講起居注官。○旌表守正捐軀之安徽亳州民顏八妻李氏。○癸未。

上奉

皇太后章萬方安和。仍還暢春園。○調革職總

兵施廷專。遊擊王安國。陳旺。劉緒。守備黃鉞。來京引見。○甲申。

上奉

皇太后巡幸盛京。自圓明園啟鑒。○詣

皇太后行宮問安。○是日。駐蹕南石槽行宮。

乙酉。

上詣

皇太后行宮問安。○諭。此次由熱河前往盛京。

恭謁

祖陵。所有經過直隸奉天州縣地方。加恩蠲免。本年應徵地丁錢糧十分之三。著方觀承。郭寶。照例查辦。該部即遵諭行。○諭軍機大臣等。據喀爾吉善奏。革職總兵施廷專。在溫鎮數年。尚屬實心。遊擊王安國等。皆出色之員。等語。已降旨交該部調取引見矣。施廷專等收受禮物。喀爾吉善當時查出實情。只應詳悉曉諭該番。以果係總兵等勒索餽送。不但追還物件。並當嚴參治罪。今乃爾等感其照

料情好贈遺。無可查辦。敘述緣由。密行奏請戒飭足矣。既經叅劾。自不得不嚴以處分。該督上年辦理此案。未免過當。今將伊等居官之處。據實奏聞。尚無迴護。然已覺多此一辦。并傳諭該督知之。○又諭。前令由張家口多倫諾爾。歸化城。伊克昭。及喀爾喀之土謝圖汗等部落採買馬二萬。駝二千。今尚無需。不若暫解軍營。加意牧放。以備應用。著派莫爾渾總理其事。歸化城所買駝馬。即交彼處官兵解往。其張家口。伊克昭。喀爾喀所買駝馬。就近送至何地。及作何分起解往之處。令莫爾渾酌妥。一面移知約會。令各該處大員。統領本地官兵解送。其駝馬解至軍營。交將軍策楞另派官兵。妥為牧養豫備。原解之官兵。俱令撤回。著寄知莫爾渾。沿途不必急行。務覓豐美水草牧放。緩緩護解前行。勿令疲瘦。再軍營現在需人。莫爾渾到彼時。著在叅贊大臣上行走。并寄信策楞達松阿惠色等知。

之。○又諭軍機大臣議。歸化城撥米六萬石。分兩年解往軍營。所辦甚好。著寄信恒文。富昌等。於次年運米三萬石之時。再增添一萬。運解四萬。○是日。駐蹕密雲縣行宮。○丙戌。駐蹕要亭行宮。○丁亥。

上詣

皇太后行宮問安。○是日。駐蹕兩間房行宮。戊子。

上詣

皇太后行宮問安。○是日。駐蹕常山峪行宮。已丑。諭軍機大臣等。歸附之厄魯特台吉車凌等所屬。因生計困苦。朕降旨施恩。將喀爾喀汗巴勒達爾等所進羊隻牲畜。給價收存。賞給伊等。又將軍營所貯大麥。接續賞去。此際伊等生計如何。麒麟保尚未具奏。著寄信麒麟保。詢問伊等現在所食。接濟與否。再所賞籽種已到。現仍耕種與否。及可以耕種與不可耕種之處。即行奏聞。○蠲緩安徽屬太

平。壽州。宿州。鳳陽。臨淮。懷遠。虹縣。靈璧。鳳臺。阜陽。潁上。霍邱。亳州。太和。泗州。盱眙。天長。五河。滁州。全椒。并新安。鳳陽。原鳳。中右。長淮等二十五州縣衛。乾隆十八年分。水災額賦。○是日。駐蹕喀喇河屯行宮。○庚寅。

上詣

皇太后行宮問安。○加杜爾伯特台吉車凌等封號。諭曰。杜爾伯特台吉車凌。車凌烏巴什等。皆準噶爾渠帥。嚮慕德化。率領萬衆。傾心來歸。甚屬可嘉。應施恩賞。給封號。以示懷柔。至意。其台吉車凌。封為親王。車凌烏巴什。封為郡王。車凌孟克。色布騰。封為貝勒。孟克特穆爾。班珠爾。根敦。封為貝子。剛巴圖孟克。瑪什巴圖。封為公。達什敦多布。恭沙喇巴爾。封為一等台吉。均授為扎薩克。其所部人戶。如何編次旗分。佐領補放官職之處。俱已降旨。令玉保。麒麟保等辦理。著該部照例遵行。車凌等受朕厚恩。務將所屬人等。約束教養。安

分謀生。果能仰副朕心。遵循訓旨。則永沐朕恩於無既矣。慎之無怠。○是日。駐蹕避暑山莊。至七月辛巳。皆如之。○辛卯。遣官祭關帝廟。○

上御澹泊敬誠殿。召見新封親王車凌。郡王車凌烏巴什等。賜宴。賞親王車凌銀五千兩。郡王車凌烏巴什銀四千兩。貝勒車凌孟克。色布騰各三千兩。貝子孟克特穆爾。班珠爾。根敦各二千兩。公剛巴圖孟克。瑪什巴圖各一千五百兩。一等台吉達什敦多布。恭沙喇巴爾各一千兩。閑散台吉巴雅勒當托布。沁丹巴和通曼都伯勒克曼堆。額布根各二百兩。管旗章京敦多布車凌丹巴。根敦阿納達各一百兩。副管旗章京尼拉八十兩。宰桑巴桑巴朗達克巴圖孟克。拜音珠爾巴爾拜音珠爾。車凌達什各六十兩。宰桑烏魯布珠爾布布達達什扎布。蘇珠克喀木圖各四十兩。隨從人等一百一十七名。每人十兩。○壬

辰。

上詣

皇太后行宮問安。○諭軍機大臣等。倉場侍郎雙慶等奏。自閏四月二十五日。紹興幫過天津後。湖北頭等幫。俱皆脫空。查據旗丁口稱一路讓運石船。因此脫空。其寧波衛等幫。亦未跟艖。飛咨漕臣嚴查等語。江南。山東。一帶採運石料。久已辦竣。何至阻礙糧艘進行。況同日現據瑚寶奏。各開水足。催趲漕船。飛輓前進等語。其尚未抵通各幫。何以行走參差。或係沿途催趲不力。旗丁藉口耽延。著傳諭瑚寶。令其嚴行覈查。據實覆奏。尋奏。查湖北頭幫。在白洋河脫空四日。二幫。在古城溜脫空二日。因東省採石船。其時尚未運竣。以至阻礙稽遲。三幫。在沙溝營汎守風。脫空一日。俱在閘河阻隔。事屬有因。請毋庸置議外。惟查湖北頭幫。經由臨清。德州。一帶。脫空五日。二幫。經由南河。脫空一日。三幫。經由南河。脫

空二日。領押各官。並不嚴督趨行。均請交部議處。得旨。該部察議具奏。○又諭。策楞等具奏。扎薩克台吉達什丕勒。進羊一千隻。協理台吉巴勒達爾之子。衮布多爾濟。進羊一千隻。馬一百匹。伊等努力辦公。甚屬可嘉。所獻馬羊。俱著收存。并寄信策楞等。仍前折價賞給。○以厄魯特公巴圖孟克。為北路軍營叅贊大臣。瑪什巴圖。為西路軍營叅贊大臣。癸巳。理藩院尚書納延泰。左侍郎玉保。帶領達瓦齊使臣敦多克進見。

上曰。汝台吉達瓦齊之事。朕已盡知。今遣汝來。一切推誠實言。為是。今乃以欲如噶爾丹策零。闡揚黃教。安輯羣生等語入奏。殊屬無謂。達瓦齊弑噶爾丹策零之子喇嘛達爾扎。奪取台吉之位。又與訥默庫濟爾噶爾等構釁。糜爛準部生靈。又將喇嘛等破戒還俗。有如此闡揚法教。安輯羣生者乎。從前喇嘛達爾扎。殺其弟而代之。朕即不以為是。然以彼終

係噶爾丹策零之子。是以弗替舊恩。今達瓦齊殘害喇嘛達爾扎。奪其基業。是噶爾丹策零之仇讐也。又安得以法教羣生為辭乎。又云。欲為策妄多爾濟那木扎勒等遣人赴西方念經。從前喇嘛達爾扎奏請遣人赴西方。朕尚未允行。今反允達瓦齊之請乎。諒達瓦齊亦知所請難行。一則自占身分。欲照前例通行貿易。二則遣使請安。藉此窺探意指。若允其請。漸且奏請別事耳。伊若推誠祈恩。或

可再議。若似此狡飾具奏。於伊事無益。爾等歸時。將此旨曉諭達瓦齊知之。敦多克奏言。前大皇帝降旨。永守和好。不渝舊盟。噶爾丹策零將準噶爾法教。付之策妄多爾濟那木扎勒。喇嘛達爾扎。分非應立。僅以百戶安置邊徼。乃殺其弟而代之。干犯法教。是以達瓦齊不服。統衆而居其位。臣奉使來時。命臣云。大皇帝若詢及此事。宜明白陳奏。至喇嘛還俗。乃一二不肖之人。讒間衆諾顏等。干犯法教。

因而治罪。並非盡行還俗也。

上曰。汝處令喇嘛等還俗。衆莫不知。爾不必諱言。再汝等此次至我邊卡時。曾稱有口奏機密之語。及理事官索諾木詢問爾等。乃云。並無口奏之言。而疏內又稱尚有數語口奏。何乃自相矛盾。果有欲言。可於朕前實奏。敦多克等奏言。疏內所稱有數語口奏者。乃謂大皇帝若摘問疏中之言。命臣明白陳奏耳。疏外實無另行具奏之事。

上曰。據汝稱疏外並無另行具奏之言。疏內又無他語。無庸詢問。然則遣汝等至此者。明係命汝等窺探情形。若易於進言。則索取新降之杜爾伯特車凌等。若事覺難行。即止耳。敦多克奏言。

大皇帝若俯賜矜全。此等情節。亦曾命臣等提及。

上曰。達瓦齊從前為喇嘛達爾扎所迫。欲求歸附。為車凌烏巴什之兄達什所阻。逃奔哈薩

克。達瓦齊自纂為台吉後。將達什執而囚之。彼時達瓦齊若歸降於朕。朕亦如車凌一體施恩。豈有歸之準噶爾之理乎。杜爾伯特車凌等。乃達瓦齊一體之人。既已投誠於朕。達瓦齊安得索之。此斷不能行。況達瓦齊係辜負噶爾丹之恩。絕其嗣續。奪其基業之仇讐。朕尚為不平。汝等皆其臣僕。世受深恩。乃絕少悼懷之意。寧無愧於心乎。敦多克氣沮詞屈。奏言。

大皇帝諭旨。明如皎日。無微不照。洞悉隱懷。臣等復有何言。

上曰。達瓦齊疏內所奏。朕已明白降旨。汝等回時。自有諭旨齎去。今筵宴新降之杜爾伯特車凌等。汝等一同入宴。共觀百戲。敦多克謝恩而退。蠲緩兩浙廟灣場。及小海。劉蔣伍佑。新興草堰等五場。富安。安豐。梁梁。東臺。河梁。丁溪等六場竈戶。乾隆十八年分。水災額賦有差。其被災較重者。賑卹兩月。房屋倒塌。

三

清實錄
乾隆十九年五月下

一〇二五

姓副都統三格著調補黑龍江副都統。現今派出索倫巴爾虎兵及黑龍江等處之兵帶領行走。著寄信三格。即料理行裝前往。到彼時一切事件俱著盡心。會同該將軍公同商議。不可宣露於衆。詳密辦理。并寄信將軍清保知之。乙未。

上奉

皇太后御勤政殿侍膳。至庚子皆如之。丙申。

御史九成等奏。八旗甲米請於放完一月以

前呈報。查倉大臣查明應接放之倉。豫為指
定奏開。知照戶部倉場。庶關領不至逾限。得
旨著照所請行。命禮部左侍郎介福內閣
學士錢維城教習庶吉士。丁酉。蠲緩長蘆
屬永阜永利富國三場竈戶。乾隆十八年分
水災額賦。○戊戌。諭陳宏謀有交辦事件。著
馳驛即速來京。其巡撫事務著總督喀爾吉
善兼理。○又諭永常現有交辦事件。不能專
辦。陝甘總督事務著刑部尚書劉統勳馳驛

前往協同辦理。阿克敦著總理在京事務。不
必隨往盛京。諭軍機大臣等可寄信麒麟
保令其告知貝勒色布騰伊等從前所派厄
魯特兵二百名。原以備收納阿睦爾撒納來
降。並驅逐烏梁海人等而設。今車凌車凌烏
巴什等來到。問其情形。及準噶爾來使敦多
克等光景。彼處人心不一。甚屬乖離。乘其不
備。議定明年由阿爾台巴里坤二處進兵。此
時必須慎密。前所派兵二百名。但告以彼處
現有來使。無須用兵。且令解散。俟明年再行
歸額出派。至差往通肯呼裕爾地方相度伊
等往剉推河等處。必致占據喀爾喀游牧。且
地偏難容。明年用兵事竣。即令伊等回原游
牧。額爾齊斯等處居住。毋庸他徙。先將所定
大局告知色布騰。俟策楞到時。一切機宜。自
必告知。切宜慎密。不可洩露。所備籽種。此際
如已得雨布種則已。如未布種。即令散給伊
等。○調陝西巡撫鐘音為福建巡撫。福建巡

撫陳宏謀。為陝西巡撫。並理軍需。○已亥。諭曰。雅爾哈善著即行來京。另有用處。浙江巡撫員缺。著鄂樂舜調補。甘肅巡撫員缺。著鄂昌補授。○諭軍機大臣等。從前用兵之時。西路將軍兵丁。俱係漢人。是以軍前一切事宜。均用漢字摺奏。現在辦理準噶爾之事。永常等俱係滿洲大臣。且派出之兵。亦係滿洲蒙古。較前迥異。即如綠營兵丁。亦不甚多。軍前事件。如仍以漢字繕奏。於情理反不能盡。亦且見譏於蒙古人等。可寄信永常。此次辦理如係糧餉等事。仍用漢字外。所有關係軍機事件。俱用清字具奏。○軍機大臣奏查西北兩路派兵。臣等公同商議。北路派兵三萬。西路派兵二萬。擬派京城滿洲兵四千。黑龍江兵二千。索倫巴爾虎兵八千。綏遠城右衛兵二千五百。西安滿洲兵二千五百。涼州莊浪滿洲兵一千。寧夏兵一千。察哈爾兵四千。新降厄魯特兵二千。歸化城土默特兵一千。阿

拉善蒙古兵五百。哲里木兵二千。昭烏達兵二千。喀爾喀兵六千。和托輝特兵五百。宣化大同綠旗礮手兵一千。甘肅各營安西綠旗兵一萬。共兵五萬。分兩路遣往。計每兵需馬三匹。共馬十五萬。除現在北路軍營所有馬六千餘匹。及交額琳沁多爾濟採買馬一萬。莫爾渾解送二萬外。再令額琳沁多爾濟。動軍營餉銀。於喀爾喀四部落買馬三萬。車凌等帶來馬甚多。著將官羊換馬一萬。於內扎薩克六會盟處。買六萬。尚不敷一萬四千。應令永常於綠旗營並孳生牧廠內。照數揀派。其北路所需駝。約計一萬。除現在官駝三千外。交額琳沁多爾濟亦動軍營餉銀。再買二千。於內扎薩克六會盟處。買五千。其口食羊亦於內扎薩克六會盟處。採買二十萬。西路兵應需駝六千。羊十萬。除各營現在備戰駝三千二百餘。近經寧夏滿洲營交鄂爾多斯等旗。餵養官駝八百。與孳生駝。一併取用外。

若仍不敷。交永常動餉採買。其口食羊。甘肅所管番子地方產羊甚多。且薩爾楚克海努克等處牛。亦可應用。亦交永常動用餉銀。或羊或牛。酌量共採買十萬豫備。其採買內扎薩克馬駝羊。仍照前於御前乾清門行走之王公額駙內。分派數員前往。會同各盟長採買。其價值每駝一銀十八兩。馬八兩。羊七錢。不得浮用。所有應派蒙古王公等職名。伏候欽定。得旨。依議。著派齊默特多爾濟。索諾木喇布坦。阿喇布坦。多爾濟。裕木克。扎拉豐阿。哈穆噶。巴雅斯瑚朗圖。班珠爾。喇什塞楞齊旺班珠爾。喇什納木扎勒。德里克旺舒克。拉里達外。派派鄂實。白衣保。哈清阿。誠林。永興。巴爾品。前往辦理採買馬駝事務。○兵部議覆安徽巡撫衛哲治奏。稱查三流道里表內。各省通發。惟不載直隸府分。緣畿輔之地。非可為外省流所。而軍衛道里表。尚沿舊載順天。保定。河間。天津。等府名目。茲值纂修會典。

可否刪去四府名目等語。應如所請。移知會典館照辦。并請將外省軍犯。編發直隸府州之處。長行停止。從之。○補行安徽省乾隆十六年大計。卓異官七員。陞賞如例。○豁除河南商邱。永城。夏邑。三縣。隄壓河占地共七十頃二十九畝。有奇額賦。○旌表守正捐軀之湖北公安縣民李澤英妹李氏。甘肅寧夏縣民婦王氏媳張氏。廣東龍川縣民羅開泰妻邱氏。○庚子。諭軍機大臣等。陳宏謀奏。嗣後截取舉人。督撫驗看。有不堪作縣者。分其年力已未衰老。或准予知縣銜休致。或照月選官改教例。歸即用銓選。據稱與其改教於得缺之後。何如改教於赴選之時等語。截取舉人。原有外省先行驗看之例。究屬故套。現在月選知縣。何嘗不由督撫咨部銓選。及得缺後。朕特派大臣驗看。屢有以不堪作縣扣除。另行銓補者。伊等既不肯自量衰老。願就教職。督撫驗看。未免視為具文。即使增設科條。

豈能實力奉行。今月選各官。經大臣等驗看甄別。朕於引見時復親加酌量。已於人材可覈其實。何必復議紛更。將此傳諭陳宏謀知之。○又諭內扎薩克喀爾喀衆蒙古王貝勒貝子公台吉等。今準噶爾達瓦齊遣使乞恩。朕思達瓦齊係篡奪噶爾丹策零之子之人。朕君臨天下。似此悖逆之徒。豈能施恩格外乎。是以前經降旨。明責其罪。并將看待其使臣之例。亦較前裁減。其準噶爾之杜爾伯特台吉車凌等。大台吉等。屬下數千戶人。並來歸附。并冒入我卡之瑪木特宰桑等。已經拏獲。此際達瓦齊力窮失據。且內難相尋。衆心不服。失此不圖。數年後伊事務稍定。仍來與我為難。必致愈費周章。且於爾扎薩克蒙古等亦多未便。是以議定。次年由阿爾台。巴里坤。兩處進兵五萬。除此處派出之兵。將歸附之厄魯特兵二千名。并哲哩木盟十旗。昭烏達盟十一旗。亦各派兵二千名。需用馬駝甚

多。於內扎薩克六盟。派蒙古王御前行走額駙台吉等。差侍衛官員。隨帶錢糧。會同該盟長扎薩克等。公議採買。現在新附人等。尚且爭思効力。爾等世受國恩。尤宜出力。其各選所屬精兵。採買馬駝。諸事盡心。妥為辦理。且準噶爾部落。與爾衆蒙古。世為敵仇。不時興戎。擾害生靈。衆皆知之。今乘伊內亂。我與爾同力戡定。則蒙古部落。永遠寧謐。勿貪小逸而忘大利也。并通行曉諭喀爾喀部落知之。

辛丑

孝恭仁皇后忌辰遣官祭

景陵。諭令戶部將山東。山西。河南三省耗羨銀查有餘存若干。撥解直隸。為修城之用。又諭前經降旨。令兆惠俟舒赫德到時。再來歸化城辦理運米之事。今於次年北路派兵三萬。過阿爾台。議定前進之處。運米之事。關係甚要。且現在軍營亦無多事。兆惠毋庸俟舒赫德。即來歸化城。將本年及次年運米之

事悉心備辦。壬寅。旌表守正被戕之陝西興安州民吳忠妻惠氏。癸卯。諭軍機大臣等。現在辦理出兵買馬之事。京城之人盡皆聞知。若令準噶爾來使知之。多有關係。可寄信來保。令伊等詳慎秘密。即使令之人並宜留心嚴束。但不可因有此旨。過於嚴密。反至形跡可疑。但一切照舊看待伊等。潛行防範。王保隔數日。前往一次。探視伊等情形。於閑談之次。察其行止可也。○又諭。據策楞等奏稱。現在烏梁海等。暫且不必辦理。仍遵原旨。令烏勒登領兵一千。駐扎卓克索等語。次年調領大兵已定。現在軍營無事。我兵進次卓克索。反令準噶爾生疑。豫為防備。可寄信策楞。倘阿睦爾撒納。瑪木特等。大衆有來歸之信。令其迎接保護。退止追兵。俟需用兵之時。不惟進次卓克索。且將前進開展邊卡。此時且不必也。阿睦爾撒納等歸附之後。料理進兵。其運米盤費一切事宜。著寄信策楞等。豫

為辦理。○甲辰。諭軍機大臣等。吏兵二部。凡應俟引見人員。著陸續送至熱河行在。堂官帶領引見。不必候至啟鑒以前。亦不必更令滿侍郎前來帶領。再各衙門筆帖式。各省送到。歷俸十年以上之府佐州縣等官。及俸滿教職。俱令隨到隨送至熱河引見。庶不至守候需時。將此傳諭吏兵二部知之。○軍機大臣議覆。直隸提督吳進義奏稱。各處交商營運銀。每月一分。及一分五釐起息不等。惟古北標營。原本銀一萬兩。兵丁紅白二事較多。息銀若僅照各處。不敷恩賞。是以二分起息。今閱年已久。現除徧賞外。尚餘息銀四千餘兩。合本銀共一萬四千餘兩。請照各處交商例。每年一分五釐起息等語。查原本既多於前。即稍減息銀。每年所入足敷賞賚。應如所請。從之。○又奏。查明歲所用駝。稍有不敷。請交直。晉豫省督撫。採買商駝。送張家口備用。從之。乙巳。諭軍機大臣等。近有瑪木特。約

會阿睦爾撒納投誠之信。伊等如來投誠。即當安插在阿爾台以內。將我邊卡向外展放。軍營向前安設。一則易於收受投來之人。查管伊等游牧。二則明年進兵。路亦較近。著傳諭策楞等。妥協辦理。至明年進兵時。如有從彼投來之人。應將四衛拉特。議編四部。封汗另居之處。且勿向彼說知。只將各按伊等品級。分別封爵。安居本地。俱為大皇帝臣僕等語。曉諭。再朕聞阿睦爾撒納之為人。詭詐反覆。全不可信。若果率伊妻子前來投誠。詭計亦無所施。但防範不可不周。策楞等務須留心覺察。謹慎辦理。仍勿令其知覺。○定邊左副將軍策楞等奏。臣等公同商議。除庫克嶺卓克索。二處各派兵一千駐防外。烏里雅蘇台。尚存察哈爾兵一千。喀爾喀兵三千。並繼至之防秋喀爾喀兵三千。共兵七千。若令一處屯駐。不但水草不敷。且庫克嶺等處。去烏里雅蘇台甚遠。緩急策應。殊多不便。臣等計

其適中之地。派兵一千。屯駐布爾哈雅等處。以為庫克嶺應援。又派兵一千。屯駐西巴爾圖魯等處。以為卓克索控圭之應援。即令各台吉帶往。餘察哈爾兵一千。喀爾喀兵四千。令於烏里雅蘇台附近舒魯克河。哈克諾爾等處。屯駐備調。從之。○丙午。

上詣

皇太后行宮問安。○諭軍機大臣等。阿里衮奏商人王至德父子。匿課行私。一銀兩抵一案。看來此事尚易於查辦。著阿里衮。劉統勳。會同戶部堂官。秉公查審。即行具奏。劉統勳俟此案審定後。即行起程。不必候奏。○又諭登州總兵楊贊。奏榮城縣汛守備王爵。廢弛水師事務一摺。總兵統轄標營。果所屬弁員。不能操練營伍。自應據實查叅。但楊贊並非久歷封疆之員。甫由副叅擢授總兵。初到登州鎮任。其所叅情節。是否據實。秉公於該備毫無枉抑。恐其中另有別情。或懷挾宿嫌。俱

未可定。著傳諭白鍾山令其密行查察。王爵果否廢弛營伍。楊贊有無挾嫌情節。秉公確訪。據實奏聞。尋奏查楊贊到任後。於五月初八日至榮城縣考驗營兵。見其毫無紀律。技藝生疎。未閱操以前。王爵因有服制。不穿公服。楊贊狀頗不悅。王爵被參後。即委伊戚千總解策署理。以致公論未協。查王爵與楊贊從前並無嫌隙。至其所參水師事務廢弛之處。尚非虛誣。報聞。○又諭據登州總兵楊贊參奏榮城縣汛守備王爵廢弛水師事務一摺。王爵在榮城縣汛已經五載。其平日勤惰何如。能否操練士卒。李繩武自所稔悉。如果於營務一切廢弛。李繩武何以不早行參奏。是何緣由。著據實即行覆奏。不得稍存迴護之見。尋奏查東南兩汛相隔登鎮五百里。向例委兩協副將按季操演。其水戰是否純熟。止據協將結報。今楊贊參奏。王爵廢弛水師事務。臣未能早為覺察。咎實難辭。得旨已有

旨了。○軍機大臣等奏明年進兵西路所派兵二萬名。俱於明年四月內令至軍營。方於進兵日期無誤。但所派兵遠近不等。明年春草未生時。勢難趲行。其索倫巴爾虎兵三千。應交該將軍令於明年正月初十內至京師。自京師送至軍營。應交直隸等省各督撫照往金川兵例。或用馬。或用車。自正月十五日起。間三日起程一次。其由嘉峪關送至軍營如何備馬之處。交永常辦理。其察哈爾兵二千。應令總管固穆扎布帶領。會同京師派出侍衛各員。帶四十日口糧。來今年秋令起程。沿途牧養馬畜。前至推河等處時。令將軍策楞等。自軍營差人換給馬匹。酌辦口糧。送至西路。駐劄哈密軍營。其口糧由永常處辦給。新降厄魯特兵一千。即令車凌烏巴什帶領。於四月內赴西路軍營。其阿拉善兵五百名。交永常鄂昌派員照例辦理。令公衮楚克帶領。於四月底至軍營。至西安涼州莊浪滿洲

兵及甘肅各營安西綠營兵俱離軍營甚近。應令該將軍等會同永常照例支給行裝口糧如期調集得旨依議。索倫巴爾虎兵著派三格納木球帶領西安滿洲兵著派都賚豐安帶領涼州莊浪滿洲兵著派納邁齊努渾帶領甘肅安西綠營兵著派豆斌李中楷傳魁馬得勝帶領。○又奏調往北路兵三萬名務於明歲四月內俱至軍營方不誤進剿之期。臣等酌議京兵四千於明歲二月初旬起程黑龍江兵二千於明歲二月十五內至京起程前往列於京兵之末以五百名為一隊間三日起程一次其索倫巴爾虎兵五千或於今年秋間起程或俟明年起程應令該將軍速籌定議具奏辦理。察哈爾兵二千賞給兩個月口糧令於二月初間起程四月內未必能到。蒙古兵習於游牧不如乘今年秋間水草即令起程沿途游牧緩行擇暖燠處過冬再行前往不但不誤進剿之期馬亦不致

疲乏。應交各盟長妥辦其綏遠城右衛兵二千五百寧夏兵一千歸化城土默特兵一千及宣化大同綠旗兵一千均令該將軍都統督撫等照例辦理起程均限於四月內齊到和托輝特兵五百交將軍策楞行令該扎薩克等辦理新降厄魯特兵一千亦令策楞處辦給賞賚交親王車凌帶領得旨依議。黑龍江兵著派達色鄂博什帶領索倫巴爾虎兵著派清保鄂爾袞察溫布帶領綏遠城右衛兵著派郝善哈寧阿帶領寧夏兵著派和海福帶領察哈爾兵著派五十六帶領歸化城土默特兵著派阿爾賓帶領哲哩木兵著派色布騰巴勒珠爾齊默特多爾濟拉里達帶領昭烏達兵著派額琳沁阿咱喇朋蘇克帶領宣化大同綠旗兵著派福祿帶領。○又奏查從前出師人等賞給治裝銀兩大臣官員各賞俸二年京師前鋒護軍各賞銀四十兩駐防滿兵各三十兩綠營兵各二十兩官

兵跟役各二兩。明歲進兵。派出各處大臣官員。及滿洲蒙古兵。俱照舊例賞給。其厄魯特兵。係初次派令出師。臣等酌議。管旗章京。各賞銀二百兩。副管旗章京。各一百五十兩。叅領。各一百兩。佐領。各八十兩。驍騎校。各六十兩。兵。各三十兩。再從前出師蒙古王公扎薩克等。俱係候旨。按照伊等爵級。分別賞賚。此次出師蒙古王公扎薩克等。恭候訓示遵辦外。其派出哲哩木。昭烏達。阿拉善蒙古官兵。賞賜。臣等酌議。台吉。各一百五十兩。管旗章京。一百兩。副管旗章京。八十兩。叅領。六十兩。佐領。五十兩。驍騎校。四十兩。兵。二十兩。所有駐防滿兵。綠旗兵。賞銀。由各該處庫內撥給外。其哲哩木。昭烏達。兩盟官兵。賞銀。由各該處覈明報院。派戶部。理藩院。司員各一員。由戶部領出。解往賞給。其阿拉善官兵。賞銀。就近向寧夏地方官。領出賞給。厄魯特官兵。賞銀。由將軍撥解賞給。報聞。○又奏。查北路軍

營前經撥銀一百五十萬兩。今調兵及賞厄魯特。皆由此項動用。似尚不敷。請交戶部派員。再解送一百五十萬兩備用。報聞。○刑部議覆。大學士傅恒等奏。稱查定例內。僧尼毆弟子至死者。照毆殺堂姪律。杖一百。流三千里。故殺弟子者。照故殺卑幼律。擬絞監候。辦理未為允協。嗣後僧尼道士匠藝人等。遇有故殺弟子案件。應如何定擬之處。請飭交刑部另行定擬等因。臣等伏思僧尼道士。師徒名分。原非天倫服屬可比。如果弟子違犯教令。責處時。失手致死者。情尚可原。自應仍照舊例辦理。如因姦盜等情。致有謀殺故殺重案。師弟之義已絕。未便照舊例。僅擬絞候。其或挾怒逞兇。執持金刃。毆有致命重傷至死者。實與凡人無異。亦未便照舊例。僅擬滿流。請嗣後僧尼道士。如有謀殺弟子。無論已傷未傷。已殺未殺。悉以凡人例。分別定擬。其有挾怒逞兇。故殺弟子。及毆殺內執持金刃兇

器疊傷致命重傷至死者亦俱以凡論其匠藝人等照僧尼道士例一體問擬從之○丁未諭軍機大臣等從前派出兵之喀爾喀王公扎薩克等俱未經賞賜因出兵一事原為保護喀爾喀而起且與伊等游牧甚近無需賞賚此次派出喀爾喀兵六千名和托輝特兵五百名現因準噶爾投誠人等令於喀爾喀部落內採買羊隻牲畜接濟尼魯特口糧雖經給價恐於蒙古生計稍艱著傳諭將

軍策楞等將派出喀爾喀王公扎薩克等職名開列奏聞照依內地扎薩克施恩一體賞賚○戊申旌表守正捐軀之直隸蔚州民李富猷妻宋氏四川德陽縣民婦廖氏媳蕭氏○是月在京總理事務和碩莊親王允祿等奏報京城現在雨水調勻米麥價減民情寧帖情形得旨此間亦復如是諸事皆順適都爾伯特台吉等甚誠敬可嘉準噶爾夷使甚覺氣沮慙報至於農田光景實應欣慶也○

直隸總督方觀承奏直屬公務繁多歲有墊用州縣庫內必使有存貯可動之項懇恩准各州縣廳衛量其道路之衝僻差務之多寡酌撥銀分貯備用除太宛三縣久經定有章程外其餘一百四十二州縣衛並口北熱河二道所屬八廳應分別衝繁簡僻貯銀自二百兩至四百兩不等一切年例支應數

在二百兩以下即於該州縣廳衛分貯項內動用如遇倉猝急需為數較多不及赴司請領者並應於道府庫內撥項存貯俾得就近詳支今酌量霸昌道貯銀四千兩通永清河天津熱河四道各三千兩大名道二千兩口北道庫雖貯有軍需銀兩未便移為別項之用應於道庫另貯銀四千兩其各府內除保定天津大名宣化四府與道員同城毋庸再貯外永平河間正定順德廣平等五府應各貯銀二千兩其分貯之項如墊缺已多不敷備用准該道府覈明申請仍於司庫原動款

內。詳明添撥。通計道府州縣廳衛分貯之項。共需銀八萬兩。查直省驛站項下。有留二銀一款。係在夫役工食內。每十分扣留二分。以為添雇夫馬應差之用。除節年餘存報部入撥外。現在司庫存銀一萬八千五百三十兩。扣存各州縣驛借墊。應歸銀四萬二千二百七十兩。又驛站餘剩廩糧銀一萬六千五百八十兩。小建銀六千七百四十兩。共銀八萬四千餘兩。應請於此內撥貯。並經飭司嗣後留二一項。不必由州縣驛扣解。即於給發驛站工料時。按數扣存司庫報部。至各州縣驛借墊留二之項。尚未准銷歸款。今議分貯之銀。不敷動撥。應令該司另籌。詳明報部。暫行借撥。一俟留二墊款准銷。即照數還項。得旨如所議行。○河東河道總督白鍾山奏。四月初四日。承准廷寄。陞任山東撫臣楊應琚。奏請於運河東岸添建閘座。並請酌開水口。分洩兩岸窪地積水等因。奉旨。交臣查議。勘得

東省運河。惟壽張縣之張秋鎮。地勢低窪。西岸上承趙王河。沙河來水。暨濮范等各邑窪地坡水。由積水閘及道人橋。分洩入運。運河有餘之水。向由東岸三空橋。五空橋。洩入鹽河。由大清河歸海。近因上游各州縣疏通民便等河。宣導坡流。較前倍多。悉匯注入橋。宣洩不及。以致西岸窪地。積潦難消。今查橋內鹽河。東北至大清河。六十餘里。河身寬濶。愈東愈低。下游入海。去路並無阻塞。請於三空橋迤北。五空橋以南。近對西岸諸河進水之八里廟後。建減水閘三座。每座出水金門。各寬二丈。閘底應高運河底一丈。高鹽河底五尺。在運河留此一丈底水。足敷濟運。而鹽河較低石閘五尺。亦足容納達海。西岸一帶窪地。可免淹浸。再查東岸添建三閘。儘足宣洩積水。楊應琚所請酌開水口之處。應毋庸議。得旨如所議行。○廣西巡撫李錫秦奏。義寧縣屬安鑑等里田畝。屢經被水。查安鑑向有

老河一道洩水。乾隆十二年。水衝沙石。將老河壅塞。衝新河一道。今又另衝支河一道。水勢橫流。請將老河挑濬。并於決口處築壩。使老河流通。則田可復業。即近河各村。亦得藉以灌溉。估計建築決口堰壩。長五十二丈。寬一丈八尺。高五尺。水深處高八九尺。連挑濬老河。需人夫六千工。應動支倉穀碾給。每工給米一升。六千工。共給米六十石。報聞。

實錄卷四百六十五

帝

大清高宗法天隆運至誠先覺體元立極數文奮武孝慈神聖純皇帝實錄卷之四百六十五

大清高宗法天隆運至誠先覺體元立極數文奮武孝慈神聖純皇帝實錄卷之四百六十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年。甲戌。六月。己酉朔。吏部議准。廣

東巡撫鶴年疏稱瓊州府屬之儋州。萬州。水土惡劣。請將二州知州吏目。學正。訓導及簿沙司。龍潭司。兩巡檢各缺。均准其以烟瘴要缺注冊。五年後另選能員往代。俸滿之員。回該省內地。分別題陞。從之。○以詹事溫敏。充日講起居注官。○庚戌。

上詣

皇太后行宮問安。○辛亥。戶部議覆四川總督黃廷桂疏稱。前任督臣策楞題准。雜谷善後

事宜案內。以各番改土歸流。應照內地編連保甲。牌頭保正。其各寨舊有之寨首。改為鄉約。派差之中書科。改為差頭等因。番民一寨之中。立有守備千把。外委今復設鄉約。差頭各名目。俱得免徭。是在官人多。應差人少。番民稟稱不便。至舊有寨首。半係蒼旺私人。百姓素不悅服。今若改為鄉約。令其管束眾人。未免大失民望等語。應如所請。將寨首仍循其舊。止令催納糧賦。遣派差事。另選素為眾番悅服之人。拔為鄉約。教化番民。調處詞訟。舊有之外保。改為甲長。令其稽查奸匪。寨首鄉約。甲長。均聽撫夷掌堡管束。其差頭牌頭保正等名目。請一併裁汰。從之。○壬子。諭據新柱陳宏謀等奏。漳州府屬之龍溪漳浦海澄南靖長泰平和詔安等縣。泉州府屬之同安縣。及雲霄南勝等處。於閏四月十七。公等日大雨。山水驟發。一時宣洩不及。房屋間有坍塌。人口亦有淹斃等語。貧民猝被水災。田

廬漂損。深堪憫惻。著該督喀爾吉善。即速查明。加意撫恤。給予一月口糧。無令失所。衝坍房屋。損傷人口。照例速行辦理。其田禾淹浸處所。民力艱難。所有本年應徵錢糧。俱著加恩緩其徵收。至城署營房祠宇坍塌之處。一併勘明。分別修理。該督等董率屬員。即行實力查辦。務俾災黎均沾實惠。毋致胥役中飽。該部遵諭速行。○諭軍機大臣等。阿克敦等查審王惠民父子賠帑銀兩。牽混抵扣一案。據稱從前短繳銀數。尚無營求情弊。可否從寬暫免治罪。并分年完繳等語。所辦尚未妥協。此案初經阿里衮奏時。以為必無其事。豈有一銀兩抵隱瞞至數十餘萬之多。今查審確實。殊出尋常意料之外。若非營求囑託。必不至此。使果親王慶復等。此時尚在。定當重治其罪。今伊等雖經物故。而海望彼時身任侍郎。漫無查察。縱不便將伊一人治罪。豈失察之咎。亦不當議及耶。至王惠民係內府

僕人應完帑項。不應朦混牽算。希圖漏繳。此等必應從重治罪。今即幸邀寬免。亦應著加數倍完繳。以示懲儆。且此係王惠民之事。王慎德與王至德均係伊子。何以不一併議及。此摺著發還另議。至呈首此案之潘濬。如係虛捏。即應治以誣告之罪。既經審實。自應加恩獎賞。著將如何獎賞。或酌量給予職銜。以示鼓勵之處。於摺內一併定議具奏。○又諭寄信策楞等德寧前往軍營。自第十四站托里布拉克行一月始至。過於遲緩。德寧舊在軍營。目擊彼時大臣所為。積習未改。從前軍前大臣。祇求安逸。蓋造房屋。恣食甘旨。甚或演戲聽曲。無所不為。自策楞到彼以來。一切頗能整飭。但不行嚴禁。或致仍蹈故轍。均未可知。即如德寧宴崇阿之類。勉強在領隊上行走。其實一無所能。德寧更不耐勞苦。軍前大臣若盡如此。不惟見譏於喀爾喀等。於軍務亦大有關係。況一二年間成功後。安逸之

日頗長。何不於此時稍習勞苦乎。策楞舒赫德等。朕知其斷不出此。眾臣中有如此者。務宜據實參奏。朕必即行正法。斷不寬宥。伊等倘有瞻徇。經朕聞知。惟策楞等是問。○乙卯上詣

皇太后行宮問安。○諭軍機大臣等。衛哲治奏廣東四會縣所拾李捷三逆稟一案。由肇羅道鈔寫逆詞。關移隣省。展轉接遞。恐啟滋事之端等語。此案粵省旋已緝獲捏造之楊德陳瑞翎等。奏明照例杖斃。該地方官於初發覺時。即關移各省。密為蹤跡。但不應將逆詞鈔寫知會。以致各營縣驛展轉接遞。致滋傳播。而獲犯後。亦應知照原行該衙門銷案。此乃粵東辦理疎忽。衛哲治此奏。亦有所見。可即飭知各屬。將原鈔銷燬。並傳諭各督撫。似此愚民。譸張為幻。原屬常有之事。嗣後祇將原詞鈔錄呈覽。無庸該督撫添入大逆不道。令人髮指等虛詞。其應緝重犯。止將事由。及

捏造名姓密行移知各處一體訪緝無得鈔寫書詞。徧為接遞。然不可因有此旨。矯枉過正。或至過縱。或至隱匿不奏。則發覺之後。惟該督撫是問。○軍機大臣奏查雍正年間。阿爾台路軍臺。每站馬八十。駝二十。應差章京驍騎校。領催等各六十員名。羊各百隻。戈壁六站。有騎駝各五十。嗣因大兵撤回。陸續裁汰。自首站至十站。大腰站十七站。每站僅留人二十名。馬三十。由十一站至二十九站。大腰站二十七站。每站留人十七名。馬二十。戈壁六站。留駝二十。每站留羊五十。去年以來。因驛遞紛繁。每站添馬五。戈壁塘站。每站添駝五。又騎載需用馬駝較多。由附近蒙古徵調烏拉供應。蒙恩量賞綢緞布疋茶葉等物。所需羊。俱照例官給。合計各臺站牲畜。及徵調烏拉牲畜。足可供應來往差務。但用烏拉牲畜。仍需賞給。蒙古等。尚不免嘖有煩言。臣等公議。不如將此等臺站。酌量增添。每站馬

五十。駝二十。人四十名。戈壁六站。騎駝各四十。交割都統富德達松阿惠色等。於各站馬駝外。如再須加添。照官價採買。其徵調烏拉之處。請禁止。應添驛站蒙古。著富德等查明。於附近臺站之蒙古內。挑取所有倒斃牲畜。及驛夫工食。俱照例辦理。其採買應添馬駝銀。就近令口北道。由部支給。並行文將軍策楞等。所有前赴軍營設立喀爾喀驛站。增添馬匹牲畜之處。亦照此辦理。事竣後照舊裁汰。從之。○旌表守正捐軀之安徽宿州民李睿妻陳氏。○丁巳。陝甘總督永常奏。此次進剿準夷。自哈密至伊犁。三千餘里。全資馬力。若照廷議。按二萬兵備辦。內綠旗兵八千。需馬一萬六千。滿洲兵例。係一兵四馬。需馬四萬八千。加以領兵大員。及隨帶餘丁。共約需馬七萬餘。兩省營馬。及駐防各處馬。全調方足此數。若再辦理分站設撥。則兩省驛馬。可調者不過一二千。計潼關至哈密四千六百

餘里併站安設亦需馬一二萬僅及十分之一二請將歸化城土默特察哈爾黑龍江京城滿洲兵及新降之厄魯特兵仍令各騎原馬前來沿途皆有供支便於飼餵騎來之馬到甘省後就近分撥各營以備摘撥之數得旨軍機大臣議奏尋議臣等現議西路進勒兵二萬名內察哈爾兵於本年秋起程新降厄魯特兵及阿拉善兵俱於明春起程由口外行走其西安涼州莊浪駐防兵均騎本營馬及甘肅安西綠旗兵俱近在該省并令料理車驛前往惟哲哩木兵一千索倫兵三千係由直隸河南陝甘一路令照金川之例每五百名一起陸續行走各該省於經由道路安臺設撥逐站更替永常尚未接閱臣等今議以為滿洲蒙古索倫兵一萬二千俱由陝甘行走是以不免周章今據稱兩省營馬約四萬餘驛馬共二千餘若於明年二月內將附近馬調集按站更替撥送則兵數不過四

千分送僅止八起料理原屬從容所有議令各騎原馬之處應毋庸議惟是備戰兵丁馬匹關係緊要現議西路用兵二萬約共需馬五萬臣等原議於各處採買馬十六萬內撥給該處馬三萬六千并於兩省營馬內挑撥二萬四千共足六萬之數已極寬裕應令仍照原議備用現在料理哲哩木蒙古索倫兵設撥遞送自明春至四月時日較寬可以從容辦理並於道路寬濶之處添雇車驛俾按次進發無誤營驛馬力儘可節省再現議於喀爾喀及內扎薩克等處採買馬匹恐尚不敷查青海一帶及附近洮岷莊浪等處各番部落俱係產馬之地並令設法購備從之○軍機大臣奏請添派帶領西路索倫巴爾虎兵大臣得旨著派呼倫貝爾總管畢里渾○戊午

上詣

皇太后行宮問安○諭雅爾哈善奏葉存仁於

前河庫道任內應追銀七兩零已全數繳完等語。前劉統勳等查叅歷任河庫道侵欺錢糧數目甚多。原未逐員分晰聲明。但在道員如果自有侵染。或一任屬員侵隱。至盈千累百。自應草職著追。今葉存仁名下應賠之款。為數甚少。則其失察之咎。亦不至褫職。著該部即行調取來京引見。至此案內。或尚有似此者。著尹繼善查明據實具奏。○諭軍機大臣等。盛京刑部審擬俄里克等搶奪殺人一案。刑部以顯有圖財害命情形。雖據律文指駁。但搶奪殺人與圖財害命。其為從之犯。罪雖有不同。其實首犯不過均應斬決。將來即遵部駁審。係實在圖財害命。究於首犯之罪。無所增減。徒使克惡之犯。因往返駁詰。轉得多延時日。意止欲與律文相合。而首惡不能即正典刑。此端一開。必有故留指駁之地。為該犯緩死者。著傳諭刑部堂官。嗣後遇此等案件。果能確覈情形。或即行改正。或議將首

犯先行正法。將為從之犯駁審。不得籠統議駁。此本著發還另議。○又諭據宋愛奏現今秧苗出水。夏至前後。即可栽插。若得甘霖普沛。雨水充足。更於農事有益等語。夏至前後雨澤甚關緊要。看來該處雨水尚未充足。前於定長奏報摺內。已經批諭。詢其望雨之處。曾否霑被。著再行傳諭該撫。令將各屬曾否得雨霑足。其少雨之處。是否於農田有礙。著即詳悉查明。據實速奏。尋奏查貴陽等十三府屬。高低田畝。於閏四月二十六日等日。暨五月初旬。疊沛甘霖。上下兩游。普徧優渥。即安平一帶。從前少雨之處。亦已霑足。田禾並皆暢茂。報聞。○又諭據鄂樂舜奏。皋蘭金縣會寧靖遠四縣。得雨未能普遍。業有受旱情形。靜寧通渭鎮番各州縣。山地亦現在望雨等語。時當盛夏。農田望澤甚殷。所有甘省缺雨州縣。如旱象已成。該撫等即當豫為籌辦接濟。況該省現有應備軍需。正資民力。尤當

加意培養。毋令拮据。斯辦理一切。不致張皇。著傳諭鄂昌實力查明。令將缺雨處所。曾否得有雨澤。是否成災。并作何料理撫卹之處。一面妥協辦理。一面速行奏聞。尋奉。查會寧。靜寧。通渭。鎮番。四州縣。自五月二十四五日。得有透雨。二麥雖稍減分數。不致成災。惟皋蘭。金縣。靖遠。三縣。暨狄道。渭源。二州縣。二麥大半枯槁。現借給籽種。翻種晚秋。其被災較重處。分別賑卹。至於備辦軍需。雖地方偶被偏災。毫不累民。查軍需案內。運糧腳價。河東。每京石。每百里。給銀一錢六分。河西。每百里。給銀二錢。災民領運腳價。儘可營生。不但不致拮据。且甚有益。得旨覽奏稍慰。○又諭。丁士傑於馬中驥案內。前據定長叅劾。及來京。陞見時。面奏為地方起見。冒昧致書酌調等語。朕以丁士傑尚係舊人。且稱為地方起見。情尚可原。因將伊降補總兵。迨李現祥一案。據該署督以扶同侵隱等情。具摺叅奏。該部

照例議以降調。朕猶以其失察之咎。或出無心。是以未即降旨。今據碩色。宋愛。同日奏到。丁士傑侵尅草豆等銀。私用存公款項。則伊前次奏對。全以虛詞矯飾。尤屬欺詐。似此身為大員。而營私狡詐。豈可姑容。丁士傑著革職。解交貴州。俟伊應追應賠各項清楚之日。該督撫再行請旨。○己未。諭軍機大臣等。將軍策楞等奏稱。瑪木特所遣鄂勒哲依哈什。哈來至邊卡。向侍衛六格等告稱。達瓦齊使沙克都爾曼濟台吉為首。領兵三萬。往征阿睦爾撒納。訥默庫已將伊等游牧劫奪。又使名塔爾巴什者。由烏梁海調兵三千。將阿睦爾撒納。訥默庫。牧羣收取。阿睦爾撒納。訥默庫。帶領千人。在額爾齊斯。夔博和。碩地方固守。此際不識如何。阿睦爾撒納。如在。必來投順。天朝等語。阿睦爾撒納。等如來歸附。所有聲援接應。以及迎禦。準噶爾。追兵。在在所關緊要。杜爾伯特。貝勒。色布騰。內大臣。薩喇勒。

於伊等性情。及彼處事宜。均為熟悉。著將策楞所奏之摺。以蒙古語譯出。發給伊等。薩喇勒看畢。即行起程來赴熱河。俟朕面問情形。訓飭後再行前赴軍營。色布騰之游牧。既與軍營相近。接見此書。一面奏覆。繕寫蒙古文。由驛馳送。一面即行起程。會同將軍策楞。公同商議辦理。即由彼前赴邊卡。相機而行。色布騰此行。將伊親信之人多帶。以備差委。此項帶往之人。著策楞務將路費等項。寬為辦給。無事之時。再各回原處。將此亦寄信策楞知之。○庚申。諭軍機大臣等。今年春。薩喇勒等帶兵驅逐準噶爾之烏梁海等。俱已遠避前去。我兵既徹。正青草發生之時。烏梁海等。或仍在遠處逃避。或即潛回舊游牧居住。未經查辦。若仍回原處。明年大兵進剿時。伊等或暗行送信與準夷。或在大兵之後尾行。乘間擄竊。俱大有關係。應即遣兵先為辦理。著傳諭策楞等。先遣卡上人等。查驗確實。俟薩喇

勒。色布騰等。到軍營時。公同商酌。應如何辦理之處。詳悉具奏。○又諭貝勒羅布藏多爾濟。統領所屬阿拉善蒙古兵五百名。前赴巴里坤。羅布藏多爾濟。著賞銀五百兩。○辛酉。諭此次考試甘肅等省拔貢。若候至回鑾後。帶領引見。未免守候需時。著交在京總理王大臣等。驗看揀選。其應行引見者。即送至熱河行在。帶領引見。○諭軍機大臣等。方觀承奏。本月初七日。永定河盛漲。隨飭將舊河身內穿隄引河頭開放。分流北注。工程均各平穩。再河身內。舊有董家務惠元莊。居民瓦土草房。悉被淹溺。懇量為賞給。每戶倉穀一石等語。穿隄引河。惟藉分減盛漲。此次開放。自因水勢陡漲。一時難以宣洩。但祇可偶一行之。今盛漲既消。即仍應堅固堵閉。令大溜由南隄行走。方為妥協。至董家務惠元莊。二處居民。從前屢經曉諭。雖伊等不願遷移。亦彼時經理各員。未能周妥。因循貽害。此番既被

淹浸。宜乘此時。給予搬移之資。務令遷徙隄外。不可姑息。若有仍行廬處河身。藉稱不願遷移者。將來惟該督是問。著將穿隄引河。於何日堵閉。董家務等處居民。如何遷移之處。仍具摺奏聞。至所請每戶賞給穀一石。著准其賞給。尋奏。河水自十五日以後。漸次消退。可免出槽。至兩岸村莊。共十八處。現飭地方官查辦。於隄外指給村基。給予移資。悉令遷徙。再永定舊河身內穿隄引河。奉諭仍應堅固堵閉。俾大溜由南隄行走。今遵於引河頭舊南隄堵築攔河橫埝一道。長九丈。頂寬一丈。底寬三丈。高六尺。於六月十九日完工。報聞。○又諭尹繼善奏。沿河隄壩工程一摺。內稱大局似有效驗。但原估寬深丈尺。不容稍有短少。不特未竣者尚應補挑。即已完之工。亦須秋汛後通行量驗等語。該督等以為汛後量驗。可免偷減弊端。不知滋弊之處。正在於此。蓋工程一經汛後。非刷汕較深。即漸多

淤墊。所有土石各工。必全失其本來形蹟。若於此時查勘工程。或以汕刷為挑深。或藏偷減於淤墊。弊實不可枚舉。否則以淤墊為未經挑深。以致工員屈抑。在不知工程者。或可以此言朦混。其實至易明曉耳。著傳諭尹繼善等。令其另行籌辦。不得稍有弊混。將來徒貽自悔。○又諭鄂容安等奏。審辦張若瑟等傳行天主教一案。據稱應將張若瑟等照從前江西拏獲夷人李世輔之例。暫行監禁。其會長季類斯等。指引夷人潛入內地滋事。實為不法。懇勅下廣東督撫查明辦理等語。此案前經傳諭該督撫等。令其就案完結。無致滋蔓。今據伊等奏到審擬情形。著照所擬。張若瑟等暫行監禁。至廣東亦無可復行辦理之處。著該督撫等。明切曉諭季類斯等。禁戢夷人。不許潛入內地可耳。將此傳諭知之。○調雲南永北鎮總兵官馬化正。來京引見。○癸亥。諭軍機大臣等。方觀承奏永定河下汛

隄埧漫水一摺。據稱此處埧外名線兒河。悉係水草一望瀰漫。並無村莊地畝等語。此時現在河水盛漲。漫口既屬埧尾。又其外俱空濶處所。無田廬民舍。似可任其流溢。但恐或致於高淀底。以致倒漾之患耳。若無此患。似可聽其合流。使下口益暢。該督今既飭汎員調集袋船。撈泥割草。以圖堵閉。蓋為恐致於墊耳。著詳悉查明具奏。至所稱漫口在鳳河下口之上。因上游之水暢消。下注鳳河。宣洩不及。屯積埧根。以致漫溢。則何不於鳳河受水之處。量為開寬口面。俾得暢洩。則上游之水亦可速即消滅。當有裨益。將此傳諭該督知之。尋奏查永定此次伏汎。長水至一丈四寸。鳳河宣洩不及。致有埧尾之漫。此處西距水窖下口七十里。東離鳳河口門十餘里。若鳳河口內一處難資宣洩。則此處漫口。任其流溢。可使下口益暢。臣至漫口。見水勢已於十一日漸退。河水至此有輕泥而無濁沙。不

至於淀。惟埧外淀水。逢秋加長。若外水高於內水。由漫口灌入。難免倒漾。擬於秋前堵閉。使之隔別。斷流至鳳河長二十六里。上半順隄成河。下半與隄東西相距漸遠。當出口處距東隄已五六里。乃鳳河下口之東灘。請於汎後用袋船挑濬浮淤之時。將鳳河口面開寬。則下流之水。益得暢達。得旨覽奏俱悉。○豁除甘肅大通川城。西古邊牆等四處試種無效之石灘地畝。共六十九段額賦。

大清高宗法天隆運至誠先覺體元立極敷文奮武孝慈神聖純皇帝實錄卷之四百六十六

大清高宗法天隆運至誠先覺體元立極敷文奮武孝慈神聖純皇帝實錄卷之四百六十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌六月甲子

上詣

皇太后行宮問安。○諭朕前往盛京恭謁

祖陵。所有今科武進士。若俱候回鑾親試。未免

多人遲待。著於殿試策論後。即交與在京總

理王大臣。及和親王。恂郡王。阿里衮。袁曰修

會同該部。酌量揀選二三十人。候朕回鑾考

閱。○諭軍機大臣等。尹繼善等奏。五月十七

八。九。等日大雨。運河水勢陡漲。二閘柴工間

段平墊。揚糧。江防。兩屬工程。多有汕刷。淮楊

所屬。及下河低窪地畝。亦被雨水浸淹等語。

下河河道。上年經嵇璜。會同該督等。相度疏

濬。以備水患。該督昨奏。報水利工程。摺內稱

現今水勢暢流。大局似有效驗。何以今次奏

到。復有間段平墊。汕刷。以致田禾被淹。著鄂

容。岑。尹。繼善等。查明。詳晰覆奏。至淮揚一帶。

上年已經被水。此次被淹窪地。如仍係上年

淹浸之處。則民力艱難。更非初次浸淹可比。

著該督等。即速查明。是否成災。如有應行賑

卹。務須速行豫備。實力查辦。毋致稍有失所。

尋奏。淮揚一帶。前經侍郎嵇璜。會勘挑濬。因

下河工段繁多。分別緩急。先後辦理。除將緩

修之河道。於本年秋後挑濬外。惟將急修之

山。寶。高。泰。等四州縣。所屬下河河道。先令挑

濬。挑濬後。水勢消退。窪地涸出。得以佈種。彼

時頗有效驗。但下河形如釜底。如遇雨水過

大。一時宣洩不及。未免受淹。五月內連日大

雨。低地間有被水。而高阜仍屬無妨。至揚糧

江防二廳所屬運河閘工。係去冬所築。尚未
墊實。前因雨大。間段平墊。當經培厚加高。是
以運河水勢雖長。工程俱極完固。並無旁溢
淹及民田之處。得旨。覽奏稍慰。○命翰林院
侍講劉星煒。提督廣東學政。○以直隸督標
副將段起賢。為廣西左江鎮總兵官。○乙丑
諭據莊有恭等奏。沛縣之千三十六等里。因
下游淤墊。積水未消。窮黎糴食維艱。仰懇再
借給兩月口糧。俟來歲秋收後。照例免息徵
還等語。該處災黎麥秋無獲。雖屢經賑卹。而
待哺情殷。殊屬可憫。著照所請。查明該地未
涸村莊。將各里貧民。再加借兩月口糧。以資
接濟。該部即遵諭行。○丙寅。諭軍機大臣等。
方觀承所奏永定河下口。南埝以內。武清縣
屬之王慶塚。東沽港。二村。其窪處被淹。現有
九百四十餘戶。此等居民。例無賑卹。但此次
被水較甚。可否恩准借給口糧等語。隄內居
民。屢經傳諭該督。令其移徙。王慶塚東沽港

二村。人民稠密。且有苫蓋瓦房。歷有年所。雖
不能遷徙。然亦應有界限。不可再令附村居
民。占居河地。其猝經被水之戶。情堪憫惻。著
加恩。令該督按戶查明。借給米糧。以資接濟。
至隄內零星各戶。不過草土房間。原非必不可
徙。該督務遵前旨。逐一查明。於此次被水
後。給與搬移之資。令其遷徙隄外。不可姑息。
至所奏永平府屬之樂亭縣等處。禾苗淹損。
如勘有成災之處。即速照例賑卹。一面辦理。
一面奏聞。毋致災黎稍有失所。○吏部議覆
准刑部咨稱。福建按察使劉燧奏。請嗣後臺
地充番殺人者。照內地命盜承緝之例。酌給
年限等語。應如所請。初叅之時。將地方文武
官。議以降一級留任。勒限一年緝拏。限內拏
獲。准其開復。不獲。即照所降之級調用。從之。
○兵部議准。直隸總督方觀承疏稱。河間協
連鎮汛。設千總一員。迤北十里。至大龍灣。外
委一員。又十里至東光縣。外委一員。共墩撥

四處過於稠密。而東光縣迤北三十餘里。至十二里口。轉無墩撥防兵。又連鎮東北一帶村莊。相距連鎮一百六七十里。離東光縣亦五六十里。其間有大路一條。北通天津。南達山東登萊青境。中有燈明寺一村。居民稠密。往來行旅不絕。未設墩鋪防兵。該汛千總駐劄連鎮。距該村五十餘里。請將東光縣之大龍灣外委帶原兵五名。移駐燈明寺。并連鎮至東光縣原設墩撥四處內酌留二處。其餘二處改移縣北之油房口。南夏口適中之地。從之。○丁卯。諭厄魯特公職銜丹拜著派往軍前。於伊屬下兵內視其漢仗好去得者。挑取一二百名。帶往車凌烏巴什游牧。一同前赴巴里坤。一切應行賞給等項俱著照例給與。○戊辰。諭軍機大臣等。據麒麟保奏稱車凌孟克之子巴朗帶領二百人逃竄。伊等甫經投順。復又逃亡。情殊可惡。伊父車凌孟克方赴熱河未回。巴朗即背父潛逃。其中必有

別情。著即傳諭策楞等速派弁兵堵截各卡路徑。即時擒獲。詢明實情。將巴朗及同逃之台吉等押解來京。其隨從同逃之屬下人等不必治罪。仍交與車凌孟克加意約束。車凌孟克等前赴熱河原令色布騰照看游牧。今適因色布騰前往麒麟保駐劄處議事之際。伊等即行逃竄。看來伊平日管轄衆人尚知法紀。今又前往軍營。著策楞等將朕此旨曉諭色布騰。令其領兵追擒。務期弋獲。○又諭寄信策楞等。薩喇勒現在由此起程。前赴軍營。色布騰大約先已至彼。薩喇勒未到之先。如遇阿睦爾撒納來降。一切應辦事件。伊等即行酌辦。如無要事。且俟薩喇勒到彼。公同商議更妥。此間現議接援阿睦爾撒納投降之事。俟薩喇勒到後。若瑪木特所遣之鄂勒哲依哈什哈復至。令薩喇勒見伊等。詳細詢問。一切務得其虛實。但薩喇勒係軍營叅贊大臣。若令前往邊卡。接見鄂勒哲依哈什哈。

似未得體。著薩喇勒在卡內五六十里許坐待。俟鄂勒哲依哈什哈等到時。六格等將伊引至薩喇勒前相見。伊等或有游移。薩喇勒再到彼處見伊等可也。○軍機大臣奏查牛羊牧羣所存羊隻無多。請交割都統富德達松阿總管惠色採買羊十萬隻備用。價由口北道庫支領。報聞。○己巳。

上詣

皇太后行宮問安。○辛未遣官祭

火神廟。○壬申諭曰。兆惠現在出差。其戶部侍郎事務著雅爾哈善署理。在軍機處行走。○軍機大臣議覆陝甘總督永常奏稱。興師進剿。利於火器。擬每百名用鳥鎗手七十五名。每名於向例帶鉛藥五百出之外。再加帶鉛藥三百出。礮手五名。帶新鑄威遠礮一位。弓箭手二十名。各佩弓二張。梅鉞箭五十枝。隨身插帶戰箭數十枝。查現今各處挑選兵丁。奉旨俱令學習馬上長鎗。該督按照馬六

步四之例。於各標鎮營揀選驍健。令其學習長鎗擊刺之法。其弓箭器械。雖應豫備。但隨身佩帶。總宜輕捷便利。期於有濟實用。至礮位一項。舉動輒費馱載。曠野殊不適用。無庸備帶。鉛藥亦無庸加添。仍照例用五百出為率。又奏稱。領兵官員及進剿兵口糧。俱以六個月計算。應備粳米一萬一千二百餘石。炒麪二百二十五萬觔。白麪七十五萬觔。羊三萬隻。又領兵官員跟役及滿漢兵跟役餘丁等口糧。應備粟米六千七百石。炒麪及青稞麪一百萬觔。白麪四十萬觔。羊七千八百餘隻。再滿漢官員及跟役餘丁亦以六個月計算。應支鹽菜銀一十七萬九千六百兩等語。查此次進剿與前不同。攜帶食物簡省。則進攻輕捷。行走便利。現奉諭旨北路兵進剿。應帶牛羊肉乾炒麪棋子。可以隨身備用。不必多需馱載。交策楞酌量辦理。今西路官兵即有應行豫備之處。亦應簡便攜帶。不礙行程。

方為妥協。應令永常、劉統勲另行籌辦。具奏再議。得旨。永常議奏進剿官兵器械糧餉摺內。裏帶官兵跟役口糧。至米麵數百萬觔。此係從前岳鍾琪所辦。乃相沿綠旗陋習。已屬失策。況此番情形。與前更自不同。現在進夷內亂相尋。人心離畔。以天朝餘力。乘機進取。正所謂取亂侮亡之時。若裏帶米麵數百萬觔。馱載前往。則兵丁防獲不暇。何能輕騎進剿。且與蒙古交戰。惟應仍用蒙古行走之法。加以官軍節制足矣。若輜重為累。不得鼓勇直前。反啟準夷窺伺攘奪之心。豈非轉資盜糧耶。已據軍機大臣等議。另行籌辦。可將此傳諭知之。○癸酉。調河南布政使圖爾炳阿為山東布政使。以原任浙江布政使葉存仁為河南布政使。○甲戌。諭軍機大臣等。據舒赫德奏稱。哲布尊丹巴呼圖克圖稟稱。情願將伊沙畢納爾等馬五千匹。駝三百五十隻。貢獻。不敢取值等語。呼圖克圖感激朕恩。將

馬駝貢獻。甚屬可嘉。但此項馬駝。特備軍前之用。朕斷不欲徒取。如再能多得更好。著寄信舒赫德。仍照例折價賞給。并諭呼圖克圖知之。○又諭。據舒赫德奏。現在車凌等游牧請將應辦之事。交麒麟保具奏。伊即趕赴軍營等語。車凌孟克之子巴朗。率領二百餘人逃走。色布騰領兵前往追趕。麒麟保亦領兵隨往。此時已將巴朗等拏獲與否。並無音信。車凌等屬下人。聞知巴朗等逃走。不免疑懼。所關甚要。朕頗費籌畫。現在軍營無甚應辦之事。著寄信舒赫德。令伊仍回車凌等游牧暫住。加意護守。俟拏獲巴朗。麒麟保一到。再赴軍營。再伊至車凌游牧後。車凌等聞知巴朗逃走。作何光景。車凌孟克情形如何。屬下人如何談論。留心詳察。即速明白奏聞。如有應辦事件。即一面辦理。一面奏聞。○又諭。據舒赫德轉奏。哲布尊丹巴呼圖克圖請瞻仰天顏。令其何時進京。俟命下之日。欽遵施行。

等語。呼圖克圖覲朕之念。頗屬真誠。但現在用兵。蒙古等。俱各辦理馬匹牲畜之事。呼圖克圖。如又來京。經過蒙古地方。未免有豫備之項。喀爾喀等力或不支。呼圖克圖。今年不必來京。次年或來多倫諾爾地方。或進京朝覲。臨時再降諭旨。著寄信舒赫德。轉諭哲布尊丹巴呼圖克圖知之。○軍機大臣議覆。署山東巡撫郭一裕等奏。稱東省撫標充登二鎮。共馬二千八百餘匹。按數勻派。約可撥七存三。河標可撥一百匹。共足二千之數。充登二鎮馬。分作四起。於七月初八。九。至十五。等日起程。撫河二標馬。並作一起。於七月十六日起程。等語。查此項馬。應解往陝西備用。東省由河南大路。迤西而行。一河之隔。直抵潼關。程途不遠。若如該撫所議。於七月起程。未免限於時日。不及餵養。必致臆分欠足。應令該撫。飭各營加意飼餵。兩月內。務令足臆。至八九月間。再行酌委弁兵。分程趕送。從之。○

予故厄魯特貝子巴音珠爾。祭一次。○乙亥。上詣

皇太后行宮問安。○丙子。諭。據總督碩色。查叅丁士傑。在貴州提督任內。侵欺公帑。歷任中軍牛射方。馮滙。王三元。張文標等。扶同舞弊。營私不法。等語。牛射方。馮滙。王三元。張文標。俱著革職。照丁士傑之例。押往貴州。俟應追款項交完之日。再行請旨。○諭。軍機大臣等。據將軍策楞等奏。稱厄魯特孟克特穆爾。亦同巴朗等潛逃。孟克特穆爾。乃台吉額默根之兄。今孟克特穆爾既逃。額默根。不便令其仍往游牧。著將其屬下人等。俱交與車凌等。用心照管。○又諭。孟克特穆爾等。逼伊屬下人翁郭爾同逃。翁郭爾不從。至於受傷。仍勇往擒拏。逃竄之密什爾。甚屬可嘉。翁郭爾著授為三等侍衛。章京剛領兵同翁郭爾等奮勇追趕。逃人擒其人口而回。亦屬可嘉。著賞戴花翎。並各賞銀五十兩。○又諭。據將軍策

楞等奏厄魯特孟克特穆爾巴朗等復率領三四百人出阿濟邊卡逃走。現在分路追往等語。孟克特穆爾巴朗等雖係由阿濟沁達穆尼邊卡逃往。即經各路兵緊追。無有不獲之理。前經降旨將巴朗等獲時嚴鎖解京。今據所奏情殊可惡。著寄信策楞。曉諭各路追兵。竭力往追務獲。如在何處拏獲。將為首之人。即行在彼正法。一名不可疎縱。倘有拒捕等情。即行勦滅。似此叛賊。多殺始知儆懼。其邊卡疎縱。追趕不力。觀望人等。查明叅奏。嚴加治罪。再此案出力人等。亦行查覈奏聞。事定後。另行加恩。○禮部帶領甘肅四川廣東廣西雲南貴州等省選拔貢生引見。得旨李炳姚世勳楊式慎何大璋王恒章純儒王承燾羅紳楊曰試楊東臨夏珍賀廷楠等十二名。以知縣試用。馮世經升實頤劉曉鄧在珩孫永寧鄧家瑑王知止李藩莫崇義胡經武黎文輝張兆魁阮大材謝祖錫李能發黃應

魁劉良濬許懷霍士塏何一鳴唐文灼王敬天。寶晟蔣夢璋楊如溥景殿颺徐詣坦等二十七名。著交吏部詢問。願以佐貳等官用者。以佐貳等官用。願以教職用者。以教職用。○軍機大臣議准。山西巡撫恒文等奏稱。添運本年軍營米二萬石。照前次於綏遠城倉內暫支。雇商人車駝。每石給腳銀九兩八錢。所需口袋繩索等費。即於腳銀內扣算。按照米數。出派滿洲土默特官兵護解。其官兵盤費。即於節省口袋繩索銀內動支。再於此項銀內。帶八千兩。以備沿途買補駝隻牲畜之用。餘銀著交軍營從之。○又議覆臣等前請行令恒文。豫撥炒麵六千石。解赴軍前。併備解軍營。銀一千三百疋。齒履二萬副。俱令恒文等順便附運。今據恒文等奏稱。運送軍營炒麵。每一石。需價銀一兩五錢三分。合計炒麵六千石。共需銀九千一百八十兩。炒麵分量較輕。每石半。作米一石。給腳銀九兩八錢。但

每駝一隻。駝載三石。尚覺輕便。今酌量將緞疋。舊履。即附炒麵內帶運。無庸另給腳價。應如所請。分兩起雇駝運往。所需價腳銀。即於同知庫貯軍需銀內動給。又據稱運送此項炒麵。由滿洲土默特官兵內。派出大小官各一員。兵十二名。照運米例。大員給銀一百兩。小員六十兩。每兵一名。盤費銀二十兩。分起解送。每起備帶沿途接濟商人銀一千兩有餘。仍交軍營。亦應如所請。即於節省銀內動用。從之。○丁丑。諭軍機大臣等。據麒麟保奏。帶領車凌人一百名。追趕巴朗等。今又由軍營令安崇阿。德寧。青滾。雜卜。努三。分路截追等語。著寄信麒麟保。不必一味追往。即至游牧地方辦事。安撫衆人。甚屬緊要。并詳悉察問巴朗等。因何逃走。輿情如何之處。即行奏聞。麒麟保至車凌等游牧後。舒赫德再赴軍營。再據策楞等奏稱。扎奇魯克齊剛等往追逃人。言殺二人。刃傷一人。擒獲兩戶八口。不

識虛實等語。著策楞等斟酌。如果屬實。將所獲之人。即賞給剛等為奴。俾衆聞知。益加奮勉。事畢之時。果有勞績。具奏請旨。將此并寄信舒赫德知之。○命甘肅道公泰。寧夏道孔繼洵。總理買馬事宜。○是月。直隸總督方觀承奏。五月以來。陰雨連綿。山水驟發。薊運河水高出隄頂數尺。東西兩岸田廬被淹。濟寧臨清。漂沒糧船三隻。淹斃男女四名。又還鄉河。被水各村莊。田禾多有淹沒。又渾沱河。連值大雨。滎城縣。趙州等所屬。秋禾被淹。現在委員查勘。得旨覽奏俱悉。看來薊州恐不無被災之處。應極力詳查妥辦。若尚可補種。則應速行借與籽種。○甘肅巡撫鄂昌奏。此次征兵。自肅州嘉峪關出口。前赴哈密。沿途戈壁水草。須先期料理。查從前西路軍興。派兵豫為開井。刈草。於官兵經過處。逐站分備。今應照例辦理。臣等現委弁員。帶領目兵。前往附近戈壁處所。多挖井眼。并諭各糧員雇夫

割草。曬乾後。解往各站分貯。得旨。諸凡盡心可嘉。○又奏。征兵出塞。路經沙磧無水之地。難免乾渴。查前此軍需。有辦給菓單一條。菓單能生津止渴。出口之兵。各帶一分。經無水處。所益殊多。此係甘州所產。名曰秋子。八月半後。菓熟時。可製成單。現飭甘州府。製二百觔。辦用。再北路兵。亦應須用。豫先辦就三百觔。於冬初解京。轉交北路軍營應用。得旨甚好。○又奏。奉諭辦運北路軍營茶。於六月初

八日抵蘭。自蘭州至寧夏。雇騾馱運。需騾一千餘隻。照供應例。每騾一頭。馱茶一百八十觔。每站給腳銀二錢。計茶二十萬觔。共十二站。需腳銀二千六百餘兩。自寧夏至北路軍營。用駝馱運。需駝八百三十餘隻。每駝一馱。茶二百四十觔。自寧出口至軍營。約行五十餘日。共需腳銀一萬三千七百餘兩。統計駝騾腳銀一萬六千餘兩。再茶運由口外行走。須派員押送。且駝隻衆多。並須分起前往。擬

分為四起。間日一行。派同知通判守備各一員。千把四員。佐雜四員。分起押送。令甘肅道公泰督率總理該道稟稱。情願自備資斧前往。其押運各員。自應酌給路費。令擬同通。俟臨行之時。酌量給與。餘員照軍需辦差例。守備跟役三名。千把佐雜各跟役二名。守備口內日給銀三錢。口外三錢七分五釐。千把佐雜口內日給銀二錢。口外二錢五分。至跟役每名口內日給銀六分。口外八分。并行文駐

寧管理蒙古事務理藩院郎中。雇覓能作漢語之蒙古人四名。沿途聽用。得旨。覽奏俱悉。○又奏。查由陝至甘。原有兩路。一由陝西沿邊一帶。自安邊靖邊。入寧夏之花馬池。由寧夏至涼。甘肅。一由陝西之邠州。長武。至甘肅之涇州。由涇州至蘭州。前往甘涼肅。但涇州一路。必經由鞏昌府屬之會寧。安定。二縣地處山隈。並無井口。鄉民俱食窖水。偶值天旱。即水無所資。難以行走。查西安之西南。有大

路一條。由陝省之隴州。進甘省之清水縣界。由秦州。伏羌。抵蘭州。一路水皆充裕。程途雖遠百餘里。路極平坦。惟中間隔一官山。然不甚險峻。上下頗便。是以從前官兵。亦由此路行走。得旨。軍機大臣議奏。尋議。據稱。由隴州。秦州。伏羌。一路軍行為便。應請交與總督。永常。及陝撫。陳宏謀。甘撫。鄂昌等。再行查明。此一路地方。應調撥何處營驛馬匹。設撥遞送。并派委官員。豫備供應。如何辦理之處。會商妥辦。再行奏聞。

大清高宗法天隆運至誠先覺體元立極敷文奮武孝慈神聖純皇帝實錄卷之四百六十七

大清高宗法天隆運至誠先覺體元立極敷文
奮武孝慈神聖純皇帝實錄卷之四百六十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務直隸滿洲都統世襲騎都尉軍功加七級隨帶加一級尋常加二級軍功紀敘一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級尋常加二級軍功紀敘五次臣曹振鏞等奉

尋常紀敘四次臣德瑛經筵講官太子少保工部尚書記敘六次臣曹振鏞等奉

數修

乾隆十九年甲戌秋七月戊寅朔享

太廟遣履親王允禔恭代行禮○已卯旌表守

正捐軀之河南裕州民宋欽妻楊氏○庚辰

兵部議覆御史張若淮奏稱定例千把總軍

功加銜遇因公降調者削銜一等抵降一級

守備以上任內雖有加銜向不抵銷降級蓋

緣守備以上照銜食俸優陞是以不與千把

一例議抵今刪加銜改以等次給劄若遇因

公降調不抵似未平允應如所奏嗣後守備

以上軍功加等遇降調俱照千把功加之例

准以功加一等抵降一級從之○辛巳諭軍

機大臣等據程巖奏薊運還鄉等河大雨傾

注河水漲發間有漫漬民捻之處薊州東安

永清寧河寶坻固安等州縣地勢濱河低窪

恐地方各官不即加緊疏濬或致有妨禾稼

等語薊州一帶地本低窪又值大雨水漲以

致濱河民捻漫漬於秋成甚有關係著傳諭

方觀承將附近永定薊運等河窪地現在水

長處所有無被淹成災應行撫卹之處詳行

查勘一面辦理一面據實速奏尋奏今年雨

水過多薊州之薊運河玉田之還鄉河間有

漫溢豐潤寧河三縣村莊亦被淹浸樂亭之

灤河晉州藁城束鹿之潯沱河亦多漲發出

岸淹及田畝惟薊州被水最重現查勘照例

撫卹其餘州縣是否成災查明辦理薊運還

鄉二河漫口現已趕緊堵築至永定河附近

窪地惟武清縣東南鄉報有積水俟查勘再

辦得旨覽奏俱悉以直隸通省計及究有幾

分災。速行奏來。○又諭曰。山西巡撫恒文。所題陽曲縣烈女韓開姐請旌一本。內稱開姐自幼聘與王朝藩為妻。夫死誓不再適。嗣伊父母以壻亡多日。央媒另聘。開姐遂自縊身死等語。閱其情節。開姐初志在於守節。本可不死。其死也。皆伊父母貪得另聘財禮。迫之使然耳。迨至其女自縊。又復具呈請旌。冀領坊價。所領尚浮於伊殯葬之費。且領價之後。建坊與否。均未可知。是國家綽楔之典。適以

飽伊不肖父母之慾索。於維持風化之道。未為有裨。而轉以滋弊。若謂未婚之女。能矢志靡他。捐軀就義。或該撫酌量。製給扁額。發交本宅懸掛。亦足慰貞魂於地下。不必專疏請旌。給與坊價。嗣後各省有似此者。即著照此辦理。此本著發還。毋庸交部。并傳諭各省督撫知之。○又諭曰。麒麟保奏。據扎薩克喇布坦告稱。貝勒車布登等。至哈布達克地方。將巴朗等全行拏獲。僅逃二十餘人。選兵五十

名往追等語。今日策楞奏到摺內。並無此語。此信或尚未報與策楞耶。著寄信策楞等速即查明奏聞。○壬午。

上奉

皇太后自避暑山莊啟鑒。詣盛京謁

陵。○詣

皇太后行宮問安。○諭軍機大臣等。王惠民父子於應賠帑項重複扣抵。至三十五萬餘兩之多。明有鑽營弊混情節。此雖果毅親王管理戶部任內專辦之事。而海望當日已為侍郎。不能持正。隨聲附和。豈謂無罪。使果毅親王尚在。朕必直窮到底。按其情罪。加以處分。乃吏部僅將海望議以革職。援赦寬免。抑思此等重案。豈尋常可比。若云按例。則一書辦足矣。設爾衆堂官何用。不然。朕豈不知事在屢次恩赦以前耶。看來此本主稿定議。又必出於楊錫紱之意。著嚴飭行。原本擲還。另議莫更糊塗。將此旨敘入本內。但持此帖與海

望看可耳。尋議戶部尚書海望應照例革職。雖在赦前。不准援免。得旨海望著革職。從寬留任。○刑部議覆吏部尚書管四川總督黃廷桂奏軍流人犯向按里數指定府分徑解知府衙門酌發嗣貴州四川湖南等省按察使條奏苗疆不便聚集軍流人犯俱改解省城交督撫分別安置查川省除寧遠雅州龍安三府屬及茂州酉陽敘永廳三屬外俱不與苗疆相近他省解川遣犯多有經過例指府州而不安插必越解到省轉發蜀省跬步皆山不獨人犯攜家往來跋涉且站遠程長多住村店尤恐疎脫請嗣後苗疆地方仍解省酌發其餘照舊徑解指定府州安插至貴州湖南等省情形相同請俱照此辦理應如所請從之○是日駐蹕中關行宮○癸未

上詣

皇太后行幄問安○諭曰護軍統領塔勒瑪善副都統扎勒杭阿俱著授為叅贊大臣前往

北路軍營每人賞銀三百兩○工部議准廣西巡撫李錫秦疏稱歸順州建城原議用磚該處土性鬆浮燒磚難成應改建石城從之○是日駐蹕寶音郭勒大營○甲申

上詣

皇太后行幄問安○軍機大臣等查奏坐臺廢員內原任奉天府府尹霍備到臺六年有餘原任浙江嘉興府知府楊景震到臺期滿因臺費未完估變家產留臺著追原任湖北應城縣知縣駱玉圖到臺三年有餘未完臺費甚多現在無從著追餘俱年限未滿得旨霍備在臺已久年亦衰老著加恩准其回籍楊景震未完臺費既有家產可抵免其留臺著追亦令回籍駱玉圖著改發吉林烏拉○又議覆甘肅巡撫鄂昌奏請酌撥餉銀一摺查西路應備糧餉馬駝各事宜先經陝甘總督永常具奏臣等議以此次進勦兵糧不須攜帶過多致行走遲滯請交尚書劉統勲總督

永常等另行籌辦鄂昌所奏大畧均照永常辦理計算甚多但該省軍興之際需用銀不妨寬裕備貯應於本年春撥內山東撥銀二十萬兩河南撥銀三十萬兩四川原有貯司庫銀六十萬兩又乾隆十五年備貯銀五十萬兩應於此二項內撥銀五十萬兩通共撥銀一百萬兩再於戶部撥銀二百萬兩交該撫備貯應用從之○是日駐蹕錫喇德伯大營○乙酉諭據方觀承奏六月二十九七月

軍機大臣等

初一二日晝夜大雨永定上游發水驟長一丈有餘漫開東老隄一百餘丈西老隄六十餘丈臣職司河務不能先事豫防乞交部嚴加議處等語此次永定河驟漲衝漫至一百餘丈既屬河身正隄非民埝可比所有疎防道廳汛各員著交部查明嚴加議處以為不能慎重河防之戒方觀承著交部察議具奏○準噶爾部人呼濟雅爾來降命賞給安插如例○是日駐蹕二道營大營○丙戌

上詣

皇太后行幄問安○諭曰貝勒車布登與安崇阿德寧同駐庫克嶺專為防範逃衆乃已朗從此脫逃伊等率兵尾追並不奮勇前進即行退歸安崇阿德寧二人著即正典刑車布登著革去貝勒降為貝子仍留軍營効力贖罪○諭軍機大臣等定長叅奏前任糧驛道朱續暉查出歷年運米腳價缺存及多領銀兩陸續追補貯庫乃並不詳明立案造冊蒙混請交部議處等語此項缺存銀二千一百餘兩經朱續暉查出又將各屬浮領腳價覈算追繳補還缺少數目外尚餘存銀一千餘兩是此案皆係從前歷任道員辦理不清之咎朱續暉交代冊內未經註明該撫只應查明改正足矣乃摺內將從前混支混給各道員以屢奉恩詔以前俱請邀恩寬免而清查追繳之朱續暉轉請交部議處似此輕重失宜何以令屬員心服定長所辦非是著傳旨

軍機大臣等

六

申飭○又諭據貝勒允祁等以永濟庫地租拖欠不完將經徵之該州縣官等參奏一摺此項地租從前屢經拖欠及定議分別徵收又不實力奉行以致仍前逋欠自應按例參奏但摺內云內帑攸關措詞甚屬非體此等租銀徵解貯庫原不過以備該處賞需用馬得指為內帑允祁等特欲張大其說以見經徵官員之必應從嚴辦理而不自覺其言之錯誤將此傳諭知之○又諭曰方觀承奏

永定河七月初一。二等日。雨大水發漫開東西老隄共一百六十餘丈。應將口內舊河身開挑七八里。使全河之水掣入新河。再將下口堵築。接還原隄。俟開挖成河之後酌量水勢開放等語。永定河流原屬無定。但既經築有隄防。一遇盛漲。自應極力搶護。以禦淹田淤淀之患。今漫口汕刷已深。口外淤灘又難開挖。只可如該督所議。上緊辦理。務令開挖之處。比河底較深。速掣漫流。以便施工堵築。

其被水戶口有成災者。即速查明。加意撫卹。至河防關係緊要。該督自應將該道廳等據實嚴參。或可邀恩寬免。乃為迴護之詞。何以為有乖職守者戒。朕轉不為寬宥矣。將此傳諭知之。○是日駐蹕大寧城西大營。○丁亥。孝懿仁皇后忌辰。遣官祭

景陵。○諭曰。公車布登扎布著馳驛前赴軍營。

○諭軍機大臣等。尹繼善等奏稱。南河虧空人員限期將滿。兩月以來。竭力追比。多有力

不能完者。陳克濟等八犯。應於七月二十八日正法。羅綸等二犯。應於九月初五日正法。其未完銀兩。著落各家屬追繳。並查家產變抵。倘不足數。仍著落高斌。張師載。賠補等語。已於摺內批示矣。可著尹繼善嚴行傳諭高斌。張師載。南河虧空之案。實由伊二人所致。陳克濟等。雖經正法。而未完帑項。尚有十數萬之多。不於高斌。張師載。是問。而誰問。使各犯家貲尚可措繳。自必依限完納。以冀保全。

首領。今該犯等既伏厥辜。即嚴比家屬。查變家產。亦屬有名無實。是此未完之項。豈可終歸無著耶。伊二人上年曾有以二萬金贖罪之請。此何等罪。可以言贖。且亦思各犯虧空至十數萬金。是即伊二人之虧空。而乃欲以二萬金贖罪。是何言耶。伊二人係上年即應正法之人。朕格外加恩。特予寬宥。苟有人心。自當感愧奮勉。力為籌度。俾各犯虧空早完。且各犯之力能全完與否。及完至若干分數。伊二人自所悉知。乃一年以來。安坐南河。毫無措置。竟若與己無涉者。不知伊二人尚何所待。必待至與各犯相繼正法耶。如謂陳克濬等。已罹大戮。伊二人即更拖延。尚復希冀倖免。豈國家憲典。獨為陳克濬等數微員而設乎。勿致後悔無及也。尹繼善傳諭後。看其言語情形。據實具摺奏聞。尋奉據高斌等稱。陳克濬等未完帑項。現在趕緊清完。羅綸等帑項。如限內不完。亦即照數完繳。報聞。○是

日。駐蹕額貝郭勒大營。○戊子。上詣皇太后行幄問安。○諭曰。已故科爾沁達爾漢親王羅卜藏衮布。教漢貝勒羅卜藏。皆係舊臣。曾經効力多年。今朕親詣盛京。恭謁祖陵。經過伊等游牧。追想前勞。愈增悼惜。貝勒羅卜藏之墓。在御路附近。朕親臨奠醑。達爾漢親王羅卜藏衮布之墓。去御路較遠。俟到時。著果親王往奠茶酒。○諭軍機大臣等。永常奏。準噶爾貿易夷目阿濟伯克等到卡。辦理情形。甚屬妥協。此時敦多克。已將回至安西。可即傳諭敦多克。伊在熱河時。大皇帝親降諭旨。已甚明晰。並非不令伊等貿易。但此番貿易。出自達瓦齊。乃欲自比噶爾丹策零。是以大皇帝不允。須俟敦多克回巢傳諭後。達瓦齊果能一一遵旨。恭順懇恩。亦不妨仍准貿易。即敦多克在熱河時。加恩賞賚。亦係念從前台吉噶爾丹策零。並不因達瓦齊遣

來之故。今伊等貿易夷目。或即回巢。或在哈密候信。聽其自便。若留此守候。所需米麵口糧。准以羊馬換易。此亦憐憫伊等衆人。皆噶爾丹策零舊屬。不忍令其飢餓。是以格外施恩。即令敦多克。將熱河所降諭旨。宣諭於阿濟伯克等。若敦多克業已回巢。則但將此旨曉諭。著傳諭總督永常。提督豆斌。其如何回奏情形。作速馳奏。並將該夷目等各自居住。不得與內地兵役稍有交涉。該督提等務期

加意防維。妥協辦理。○又諭。據策楞等奏。努三等往追已朗未及。其餘扎薩克等。亦未追獲等語。已朗不過二百餘人。努三等如果竭力窮追。自能擒獲。今但以接援安崇阿等為名。聞其退回。亦即徹兵。安崇阿、德寧等領兵五六百名。追趕逃人。何須接援。伊二人疎縱已經正法。努三等如在安崇阿等之前。亦不過苟且退縮而已。朕惟自悔用此庸懦之人。無益國事。亦不復治努三等之罪矣。至扎薩

克等。但以往追塞責。并不竭力追擒。實屬深負國恩。著寄信策楞。嚴行曉諭。追已朗之扎薩克等。倘明年出兵。仍敢如此畏葸不前。朕必從重治罪。○是日駐蹕蘇巴爾罕額波爾大營。○己丑。諭。前登州總兵楊贊。以榮城縣汛守備王爵。廢弛水師。具摺參奏。而署巡撫白鍾山。亦旋將該弁題參革職。王爵在任。已及五年。李繩武前任登鎮時。何以並不早行參奏。今始奏稱。王爵廢弛水師事務。臣實未

經查閱。不能覺察。實屬昏昧等語。李繩武著交部議處。尋議。李繩武照例降二級調用。得旨。李繩武著降四級從寬留任。○又諭。麒麟保。照看車交等游牧。諸事不能盡心。適因色布騰達什丕勒。暫離游牧地方。麒麟保即漫無約束。致令已朗等脫逃。又冒昧陳奏。已朗等已經拏獲。希圖掩飾。情節可惡。著革職。仍留章京上効力贖罪。○諭軍機大臣等。方觀承奏。永定河東西老隄漫決處所。現在情

形一摺。殊不明晰。前據該督具奏。應將口內舊河身開挑七八里。使全河之水。掣入新河。再將下口堵築。接還原隄。已經傳諭該督。即行辦理。雖尚未接到。但開挑舊河。掣溜歸流。以便施工堵築。今又奏稱。水道初經汕刷。乍淺乍深。迄無定形。如此。則於何時可以開工挑挖。漫口何時可以堵築。著該督詳悉覆奏。○又諭。臬楞等奏。據烏梁海宰桑都塔齊稟稱。達瓦齊與阿睦爾撒納。互相攻擊。將阿睦爾撒納游牧搶奪。阿睦爾撒納。帶領妻子。奔入博勒博勒濟蒿。據險居住。隨令烏勒登。藉稱行圍。帶兵前往喀喇阿濟爾罕等邊卡。為阿睦爾撒納聲援。並令坐卡侍衛。有信即行呈報等語。阿睦爾撒納。乃最要之人。伊若來降。明年進兵。大有裨益。想薩喇勒此時亦至軍營。將如何接援之處。著傳諭臬楞等會商妥協辦理。○戶部議准。江蘇巡撫莊有恭疏稱。通州所轄之任家港。向為江海關口岸。狼

山港。係設巡處所。今二港沙漲路紆。請移於大汛港。設役分查。從之。○又議覆廣西巡撫李錫秦奏。稱。不在省會各營俸餉。向俱就近發給府廳州縣存貯。按月會放。其截曠銀兩。未議及截扣遲速。請嗣後令營員將第一月截曠。於第二月冊移文員。文員於第三月照冊扣發。應如所請。從之。○旌表守正捐軀之福建南靖縣民吳寒妻張氏。河南洛陽縣民晉二舉妻邢氏。虞城縣民范源洞妻李氏。山東蒲臺縣民陳子龍妻張氏。○是日。駐蹕多倫。瑚圖克大營。○庚寅。

上詣

皇太后行幄問安。○諭軍機大臣等。據舒赫德奏。稱。換取車凌馬匹一事。請暫行停止。俟伊屬下人安定後。令麒麟保與車凌車凌烏巴什等商議。挑馬六千匹。給厄魯特兵丁騎用。視馬之等差。換給羊隻。或搭放半價。至十月伊等口糧不敷時。令麒麟保酌量散給等語。

現當巴朗逃走之際。暫停與伊等交易馬匹。甚是。但換馬原為進兵需用。今由游牧起程。將伊等所騎馬。即以羊銀易換。將來抵軍營進兵時。又將如何辦理。至養贍伊等家口。應另施恩。若以換馬為名。伊等仍不知感。且所換六千匹馬價。亦未必即能敷用。兵丁起程用馬尚早。麒麟保亦不能辦理此事。著寄信舒赫德。換馬之事。至軍營後。或用伊等原騎馬。或另行辦給。今冬明春。應如何施恩接濟養贍伊等家口之處。著悉心妥議具奏。○又諭調赴北路軍營昭烏達兵二千名。哲哩木兵一千名。現今帶兵王扎薩克等。議於八月起程。前赴軍營。雖係伊等自備資斧前往。但路遠有需時日。所有王公台吉官兵等。著加恩照軍營例。各賞給兩月路費。○命鑲藍旗漢軍副都統納木扎勒往軍營。辦理車凌等游牧事務。○是日駐蹕吉倫郭勒大營。翼日如之。○辛卯。

上奉

皇太后御行幄。貝子扎拉豐阿等恭進早膳。

上侍膳。○賜扈從王公大臣並外藩蒙古王公

台吉等食。○幸教漢固山貝子垂濟扎勒第。

○臨奠教漢貝勒羅卜藏墓。○壬辰。中元節。

遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。

上詣

皇太后行幄問安。○工部議准廣西巡撫李錫

秦疏稱。思恩府遷江縣。添設平陽司巡檢衙署。動項建造。從之。是日。駐蹕噶察南大營。

大清高宗法天隆運至誠先覺體元立極敷文奮武孝慈神聖純皇帝實錄卷之四百六十八

大清高宗法天隆運至誠先覺體元立極敷文奮武孝慈神聖純皇帝實錄卷之四百六十九

欽此。總管經筵講官太子太傅文淵閣大學士文淵閣領事領侍衛內大臣稽察欽奉。上諭事件處管理。吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次。臣慶桂。總管經筵講官太子太傅文華殿大學士文淵閣領事稽察欽奉。上諭事件處管理刑部戶部工部事務。世襲副都統軍功加十九級隨帶加二級又加二級。臣董誥內大臣戶部尚書鑲黃旗滿洲都統軍功紀錄五次。尋常紀錄十四次。臣德瑛經筵講官太子少保工部尚書紀錄六次。臣曹振鏞等奉

敕修

乾隆十九年甲戌七月癸巳

實錄卷四百六十九

上行圍。○諭軍機大臣等。永定河漫缺隄工。據方觀承奏請開挖舊河身七八里。今復奏挑濬舊南隄內外引河。酌看水勢施工。又稱勝芳河一名徑直河長三十里。水深溜急。一如鳳河等語。漫水現歸勝芳舊淀。而徑直河又溜急不患停淤。如此則鳳河徑直兩路轉輸儘可宣洩漫水。其東西老隄漫缺之處。何不聽其自然。乃復亟營堵築。其情形究係若何。著將現在水勢經流方向。及勝芳河去老隄

幾許之處。詳悉繪圖貼說奏聞。尋奉永定河漫口水勢南越津水窪。入勝芳舊淀。其徑直河即界勝芳淀之中。西北距東老隄三十餘里。其地低窪。由此宣洩漫水。於勢自順。但水歸勝芳舊淀。由徑直河為轉輸。在秋後水弱沙稀。河大能容。若遇三伏盛漲。沙泥稠濁。恐致漫溢。臣觀舊南隄。淤少地寬。可令暢流。是以議請將南隄內外引河挑濬。洩水仍將漫口堵築報聞。是日駐蹕察布齊勒臺大營。

軍機處奏

二

○甲午軍機大臣等議覆閩浙總督喀爾吉善福州將軍新柱等會奏改補福州駐防漢軍各事宜。一。漢軍願為民者。令指定所往省分州縣。呈明出旗入籍。子弟與民籍一體應試捐納官職貢監。呈地方官換照。男女聽與民婚配。一。漢軍仍願食糧者。分派綠營改補。於督標陸路撫標福協軍標各營內。遇有糧缺四缺中。補漢軍三人。其子弟曾習弓馬者。入餘丁內考拔。俱准在食糧地方入籍應試。

軍機處奏

一

一。漢軍甲兵應先儘馬甲改補一千名。於省會各營馬糧內坐補六百名。其餘遇有綠營馬糧。即補馬缺。如無。即以步戰糧通融酌補。一。漢軍原住房屋。無論官房自蓋。均留給滿兵駐劄。自蓋者。按間給價。於住屋之滿兵餉銀內扣繳。一。漢軍水師兵暫留。令滿洲壯丁隨營學習。遇缺漸次頂補。俟滿兵熟習後。再盡數改補。一。京城撥駐滿兵。俟閩省漢軍改補綠營後。酌量數目。隨時請撥。分起行走。每百名為一起。五十名由仙霞嶺至福州。五十名由常山光澤至福州。各等語。均應如所請。至願為民之漢軍。有應襲世職。臣等酌議應准其隨帶出旗。其承襲錄用。及分發標營學習。即照漢人世職辦理。又奏稱改補綠營之漢軍。綠營原有兵房。每名給搬移銀二兩。無兵房。給賃屋銀六兩。其移居他處之窮戶。每戶給資本銀八兩。所動餉銀。於曠缺項內扣還。又奏稱駐防既換滿洲。請挑選在京滿員。

帶領每兵百名。派防禦一員。驍騎校一員。三百名。派叅領一員。五百名。派協領一員。分次來閩。與漢軍人員交替任事。至四旗悉換滿員。遇缺照駐防舊例辦理。筆帖式三缺。應於駐防滿洲內考取各等語。亦應如所請。至該處現任漢軍人員。臣等酌議。除願出旗者聽其告退外。其餘大小各官。均令出具考語。送部引見。或以旗員補用。或以營缺改補。或休致。統俟欽定。其改補營缺之員。仍發閩省補用。現在考取未補之筆帖式及記名領催。如願改綠營。分發通省各營。以外委千把用。從之。又奏福州駐防漢軍兵。經該督等奏請聽其散處為民。及改補綠營糧缺。所遺甲缺。以京城滿洲派往坐補。所有京口。杭州。廣州各駐防漢軍。似應照此辦理。請令各該總督將軍。按各處情形。詳悉妥議。奏到再行定議。得旨。不用將來再看。若要辦從京口起。○是日。駐蹕庫坤郭勒大營。○乙未。

上詣

皇太后行幄問安。○諭曰。哲庫訥著賞給副都統銜。與納蘭圖同管圍場事務。○是日。駐蹕甘珠爾村大營。○丙申。

上行圍。○諭曰。鄂爾多斯貝子齊旺班珠爾前於公事頗為奮勉。人亦去得。今辦買軍需馬匹。竭力趕辦。甚屬可嘉。著加恩晉封貝勒。○又諭川省郭羅克窮番三百餘戶。從前所借牛羊籽種。原議收獲孳生後。照數繳還。但念

中興九年

五

該番等僻處徼外。生計維艱。若勒限催追。愈致拮据。著加恩將乾隆九年。借給窮番牛羊籽種銀二千九百餘兩。槩行豁免。以示體恤。著該督黃廷桂即行曉諭知之。○定邊左副將軍策楞等奏擒獲準噶爾逃人巴啓齊倫瑚雅克圖。庫本等。請按首從分別斬絞。即行正法。從之。○是日。駐蹕舍哩河源大營。○丁酉。

上詣

皇太后行幄問安○

上行圍○諭曰喀爾喀扎薩克台吉達什丕勒於一切事件頗屬奮勉近日照料車凌游牧諸事盡心辦理一聞巴朗等逃走之信即帶兵追趕甚屬可嘉著加恩封為公爵○諭軍機大臣等據策楞等奏輝特台吉阿睦爾撒納等移帶眷屬四千餘戶前來投誠阿睦爾撒納係準噶爾大台吉今與達瓦齊離異輸誠歸順深可嘉慰著貝子扎拉豐阿帶乾清

門侍衛德善集福等齎賞賚之物前往降旨再令薩喇勒自軍營前往迎勞阿睦爾撒納頒以恩賞將來冬令朕自盛京回鑾時仍派玉保照管阿睦爾撒納帶至熱河令彼瞻仰乘此便道將色布騰亦帶至熱河並傳諭玉保前往軍營迎勞阿睦爾撒納時暫在彼處照管游牧辦理事務俟應來時候諭旨遵行阿睦爾撒納係何等人相見有何言辭應詰問之處俱著詳細詰問具奏○又諭曰策楞

奏喀爾喀地方寒冷且無貿易請將車凌等游牧移在歸化城大青山以內居住現今巴朗在逃若再如此辦理不但使新降之人驚疑恒擾亦非辦理準噶爾之本意著傳諭策楞令車凌等仍在扎克拜達里克居住毋庸向內遷移○是日駐蹕養息牧河東大營○戊戌

上行圍○諭軍機大臣等阿睦爾撒納從前兩次遣來之人俱被準噶爾烏梁海阻回甚屬可惡或今年即發兵勦滅或俟明年進兵時攻擄以充口糧并包沁扎哈沁人等應如何辦理著策楞舒赫德等會同悉心妥議具奏再阿睦爾撒納輸誠來歸即為朕之臣僕所有進兵之事伊有所見俱著告之軍營將軍大臣等公同商酌妥協辦理至其帶來之厄魯特若俱係舊屬諒無可慮或有新近擄來之人良莠不一疑畏潛逃洩我軍情似宜將此項人等移在卡內派親信宰桑照管應否

如此著會同將軍大臣等酌量妥辦可即傳諭將軍策楞等知之。○命賞員外郎唐喀祿副都統銜會同侍郎玉保前往軍營辦理阿睦爾撒納等安插游牧事務。○是日駐蹕彰武臺河東大營。翌日如之。○己亥。

上奉

皇太后御行幄。額駙色布騰巴勒珠爾等恭進早膳。

上侍膳。○賜扈從王公大臣並外藩蒙古王公

台吉等食。○軍機大臣等奏西北兩路需用馬應將各處採買者酌量分送西路應豫備馬六萬匹。除由該省營馬及山東山西并青海等處採買解送外。應解馬二萬五千匹。伊克昭烏蘭察布兩處與西路相近。所買馬二萬匹。交該盟長等即派官兵陸續起解。西路餘俟錫林郭勒買得時於西南交界就近選五千匹。交解送伊克昭馬匹之扎薩克官兵送至寧夏橫城等處。交至駝該處現有七千

餘隻約已敷用。永常所奏須用數萬之處。經臣等議駁。應俟永常覆奏到時另議。北路所用馬十萬餘匹。駝一萬隻。除軍營現存馬駝及交額琳沁多爾濟莫爾渾兩處採買外。現在昭烏達卓索圖兩處所買馬二萬一千餘匹。并哲哩木所買馬一萬匹。亦令陸續起解北路。其由內扎薩克各處採買駝羊俱解北路備用。每一會盟處派扎薩克一員同官兵加意牧養。如有疲瘦倒斃。責令賠補。若能妥協解送。奏明交部議叙。報聞。○實授馬負書為福建陸路提督。○庚子。

上詣

皇太后行幄問安。○諭據策楞等奏喀爾喀台吉丹巴扎布聞知巴朗等將欲逃走。並不親往查驗。既逃之後。又復推故不前。以致巴朗逃脫。請將丹巴扎布在軍營正法。示衆等語。喀爾喀人等素畏厄魯特。比年以來。並無軍務。朕念伊等俱係蒙古。凡事寬恕。以致喀爾

喀等相率玩愒。方今用兵之際。非平時可比。此等違誤軍機。選懦無能之人。若不明正典刑。何以肅軍紀而勵戎行。丹巴扎布著照策楞等所請。即在軍營正法。將此旨通諭喀爾喀各王公扎薩克台吉官兵等知之。○諭軍機大臣等。安徽固鎮等四驛馬匹疲瘦一案。尤拔世等不行揭報。若按例處分。原不過降二級調用而止。且係公罪。原可加恩從寬留任。乃尤拔世於事後捐級。以為抵銷之地。現經該部查出。議不准抵。該員如此用心取巧。不離內府習氣。朕轉不為加恩矣。尤拔世已降旨革職留任。著傳諭申飭。○又諭據策楞等奏七月初八日。阿睦爾撒納已進邊卡。共兵五千餘名。婦女人衆約共二萬。請簡派大臣帶領蒙古王等照看辦理等語。昨聞阿睦爾撒納歸順。已特派侍郎玉保並賞給唐喀祿副都統銜。同往料理。伊等游牧事務。俟玉保到時。令同努三德沁扎布等悉心經理。阿

睦爾撒納領兵至五千餘名。人口衆多。口糧必至不繼。著將軍營所有牲畜及歸化城運到米石。併軍營存貯糧餉內酌量動用賞給。若必俟奏聞後賞給。恐已緩不濟事。策楞等即曉諭朕嘉惠伊等遠方輸誠納款之意。一面給發一面奏聞。再阿睦爾撒納等帶來牲畜馬匹。自必疲乏。策楞等亦應善為曉諭。令其加意牧放。以備明年進兵之用。其食用所需牲畜。另於軍營豫備。羊隻內給發。亦於軍務有益。著將此傳諭策楞舒赫德。公同商酌辦理。○又諭曰。策楞舒赫德色布騰薩喇勒著於十月間來京。商議明年進兵之事。軍營不可無總統之人。額琳沁多爾濟人尚去得。辦事勤慎。策楞來時。將軍印務著額琳沁多爾濟暫行署理。兆惠著授為叅贊大臣。協同額琳沁多爾濟辦事。阿睦爾撒納來時。策楞等一同起程赴熱河。陛見兆惠。將本年所運糧米起運後。即赴軍營著寄信策楞舒赫德

兆惠等知之。戶部議覆兩淮鹽政吉慶奏稱兩淮鹽俱係淋瀝煎熬全資蕩草草有紅白二種白者力大紅者稍次產草極豐之年向亦聽竈戶將紅草轉售乃地棍奸竈每將白草私販出場轉致煎鹽無資應嚴禁至該管官於蕩草出場向無處分必須明定條例應如所請嗣後如有私販蕩草將不行查禁之場員罰俸一年分司州縣罰俸三箇月從之。調右衛副都統郝善為綏遠城右翼副都統仍領兵前往軍營綏遠城右翼副都統六格為右衛副都統。是日駐蹕邁拉河西大營。辛丑。

上詣

皇太后行幄問安。

上行圍。諭曰清保早經補放黑龍江將軍朕起鑾後伊在家住逾半月始行起程途中又復耽延甚屬非是似此行為明歲進兵時何能奮勇出力若不力圖振作德寧即伊前車

之鑒也著嚴行申飭。諭軍機大臣等現今輝特台吉阿睦爾撒納等帶領人戶來降賞給伊等口糧需用米石著寄信恒文等將米黍蕎麥等項上緊措辦陸續運至軍營仍將可得幾萬石幾時可以起運完畢之處先行奏聞。定邊左副將軍策楞等奏現在阿睦爾撒納等來降若即安插在烏里雅蘇台附近地方軍營糧餉軍器馬匹牲畜俱在週圍近處又係通準噶爾大路恐將明年進兵之事向準夷洩漏且投誠人現有二萬即明年準夷事定後令其仍回舊處游牧此一年內若照辦理車凌車凌烏巴什等之例支給牛羊等項則喀爾喀地方不能有此寬餘牲畜欲給米石則現今存貯及輓運之米尚不敷明年軍需之用臣等公酌若安插在喀爾喀王車凌拜都布游牧之南蘇尼特與四子等旗接壤地方則距歸化城張家口獨石口甚近伊等以賞給銀兩就近兌換食物甚便請

俟阿睦爾撒納到軍營日。諭以照車凌等初到接濟口糧之例。分給騾馬牛羊。挑其可用之兵。將阿睦爾撒納等大台吉。一併留在軍營候旨。其老少子女。俱令攜帶接濟口糧。移至所指地方。祈另派通曉蒙古事務大臣。前往照管安插。似此大事。臣等理應恭候諭旨。但蒙古地方。霜雪甚早。若水草一枯。又至遲滯。臣等商酌已定。一面陳奏。一面俟阿睦爾撒納等進卡後。即照此辦理。得旨。策楞等辦理此事。甚屬錯謬。阿睦爾撒納等係遠方新歸之人。豈有將伊妻子如此分散之理。此必舒赫德意見。策楞從而附會耳。此旨到時。無論阿睦爾撒納等妻子。已經起程與否。著即行撤回。令其會集一處。在烏里雅蘇台附近地方游牧居住。又諭曰。策楞等請將新降阿睦爾撒納等眷屬。分駐於戈壁以內。留其為首台吉及兵丁等於軍營。以備遣用。已將辦理錯謬之處。指示斥駁。此事策楞舒赫德不

知是何居心。乖張謬戾。實為朕所不料。即云一時錯誤。亦不應出乎情理。至於此極。試思遠方歸順之人。尚未知內地作何安插。乃甫經歸命。即將其父母妻子發遣。留伊本身於軍營。伊心豈有不生疑懼。不知將伊眷屬作何發落。今策楞舒赫德等。辦理軍營重務。其意只欲安居無事。若將此等新降之人。未經承受朕恩以前。即如此處置。倘或心生怨望。激成事端。伊二人又將如何辦理。即為籌畫。伊等口糧起見。亦當請旨暫為酌撥。若因口糧一時難至。則遷移如許戶口。又豈能不支給牲畜行糧。現在更如何辦給乎。即或不然。俟阿睦爾撒納到卡以後。公同商議。再行奏請。亦不為遲。乃亟亟奏聞。且云一面已經辦理。聞之實可駭異。總因策楞舒赫德全無勇往辦事之心。一味畏葸怯懦。必欲壞國家大事。其居心尚可問耶。伊二人究係何人主見。著即明白回奏。若以公同商議含糊掩飾。斷

難逃朕洞鑒。又秦臣等與色布騰薩喇勒等商辦追趕巴朗及驅逐烏梁海之事。據色布騰稱今距進兵時尚有一年。倘將烏梁海即行辦理。達瓦齊得信豫備於進兵時轉無裨益。今即置烏梁海不辦。至我兵到日。伊等亦不過各自逃遁。斷無幫助達瓦齊及為送信之事。現在似可暫緩。至巴朗已潛逃一月有餘。定已回至伊犁達瓦齊處。可不必前追。薩喇勒亦稱巴朗在逃已久。追亦無及。報聞。

是日駐蹕阿木薩爾河東大營。○壬寅。

上行圍。○諭軍機大臣等。昨策楞等奏阿睦爾撒納來降一摺。已將朕前降諭旨鈔寄永常矣。朕於十一月初九日大祀禮成後。幸熱河。令阿睦爾撒納陛見賜宴。商議明年進兵之事。可寄信永常。令其於十一月二十九日之前到京。屆期再行兼程前來。彼處事關緊要。不必豫先起程。○大學士公傅恒等奏本年皇上駕詣盛京恭謁。

祖陵。應請於駐蹕額勒赫和羅日。即詣

永陵。行恭謁禮。次日於

永陵啟運殿讀文致祭。駐蹕毛軍屯日。即先詣

福陵。次詣

昭陵。行恭謁禮。次日先詣

福陵。隆恩殿。次詣

昭陵。隆恩殿。讀文致祭。所有致祭俱照大祭禮

舉行。報可。○是日駐蹕漢瑚圖克大營。○癸

卯。

上詣

皇太后行幄問安。○諭據策楞等奏稱。貝勒青滾。雅卜之子。車蘇隆多爾濟。請進獻牛隻。並留軍營効力等語。著照所請。將所進牛隻。收養備用。即將伊留於軍營効力行走。仍照例賞給貲費。○諭軍機大臣等。據策楞等奏。阿睦爾撒納見努三。青滾。雅卜。告稱。同伊投降。人內有落後千餘戶。懇求遣兵迎接。策楞等聞知此語。即應速為辦理。乃奏請俟明年大

兵進勦時再行籌辦。所見甚屬舛謬。此等落後之人。俟至來年安能保其無意外之事。阿睦爾撒納懇切求救。情實可憫。策楞等縱不能即行迎出。亦應將即往迎接。抑俟明年辦理之處。具奏請旨。乃竟顯言推諉。一味畏難。何以示懷柔遠人之意。此又必係舒赫德之主見。策楞諸事隨聲附和。伊二人深負朕簡用之恩。殊出情理之外。不勝憤恨。業經降旨令薩喇勒領兵迎接。著速傳諭策楞等將此旨令阿睦爾撒納。薩喇勒。公同觀看會商。或即帶領阿睦爾撒納之兵給以馬匹口糧。一同前往。但不必令阿睦爾撒納親行。並傳諭阿睦爾撒納。大皇帝念爾初到勞苦。暫為安息。且已遣侍郎玉保。前赴軍營。帶往熱河召見。封爵筵宴諸事。俱照車凌等之例加恩。若親往迎接。即不能如期瞻仰。惟令其差親信。台吉宰桑等。會同薩喇勒前往。速為迎接。其如何議辦之處。即行奏聞。策楞舒赫德辦理。

畏怯不堪。著嚴行申飭。○是日駐蹕盒子村大營。○甲辰。兵部議准。湖廣總督開泰奏稱。湖北鄖陽協副將及所屬之竹山。竹谿。二營。距襄陽鎮駐劄地方較近。請改隸襄陽鎮兼轄。從之。○是日駐蹕克什克村大營。○乙巳。上詣

皇太后行幄問安。○

上行圍。○諭前據策楞等奏。賞給杜爾伯特貝勒色布騰馬匹。朝珠。時辰表。侍衛永柱。向色布騰索取帶回等語。朕以永柱滿洲世僕。且係御前侍衛。膽敢如此。卑鄙無恥。殊堪髮指。今日永柱差旋在途。接駕朕面。加審訊。其侵留賞給色布騰物件之處。尚復隱匿。祇將此次收受恒文銀兩之處供吐。朕復加窮詰。方供認實情。永柱奉命出差。輒向地方官索取銀兩。甚屬無恥。狂悖已極。更敢將賞給甫經投誠之夷人馬匹物件。帶回侵留。實世所未有之事。廉恥喪盡矣。其向恒文索取銀兩之

事尚足道乎。不意朕滿洲親信之人。膽敢如此。辱命貽笑新附外夷。朕深忿恨。此後將如何用人。耶永柱即著於此處正法示衆。將伊妻子發往黑龍江給索倫為奴。交阿里衮將伊家產查抄。將此通行曉諭八旗人等知之。○又諭從前欽差人員。朕屢經降旨曉諭。不可於地方索取銀兩物件。孰意今復有此等私行餽送收受之事。永柱固屬卑鄙無恥。朕然干求而恒文即行餽給。亦屬不合。恒文著交部嚴察議奏。尋議恒文應照違制律革職。得旨恒文著革職從寬留任。○以故三等奉國將軍蘊清子淑衡照例降襲奉恩將軍。○詔免湖北運川遭風漂沒米二千二百六十石穀一千三百七十石。○是日駐蹕訥訥赫大營。丙午諭曰舒赫德自去年命往北路軍營所辦諸事。動輒乖張。其查拏瑪木特擅入邊卡一案。有準噶爾扎努噶爾布差人投書詢問。舒赫德並不奏聞。請旨竟擅自致書

達瓦齊。其舉動冒昧。實出意外。朕彼時降旨嚴行申飭。及來京時。面加訓諭。伊亦自知錯謬。因未行治罪。嗣車凌車凌烏巴什歸誠。知準噶爾篡奪相仍。人心離散。實有可乘之機。特命策楞為定邊左副將軍。並令舒赫德協同辦理。舒赫德在熱河。面領訓誨。指授極為詳明。伊二人自到軍營。畏葸猜疑。毫無籌畫。凡所部署。事不合機。宜即如準噶爾輝特台吉阿睦爾撒納與達瓦齊結釁攻擊。率衆四千戶。約二萬口。投誠內向。自宜加意撫綏。以示懷柔之義。乃策楞舒赫德於阿睦爾撒納尚未接見。即議令將伊兵壯屯駐軍營。同來眷屬悉移置於戈壁之南。相距數千里。使其父母妻子分析離居。此豈在天理人情之內。在阿睦爾撒納等甫經歸命。焉知天朝之將伊等分遣安插。究屬何意。斷不能不生疑畏。且並不候旨。竟稱一面奏聞。一面辦理。此何等重大事。而率意妄行。乃爾耶。至阿睦爾

撒納稱有德濟特台吉率衆一千戶亦傾心向化。因為水所阻。又阿睦爾撒納之胞兄并其親子為瑪木特拘留。及求給與口糧馬匹。前往救應。接取青滾雜卜薩喇勒等三俱以爲可行。而策楞舒赫德悉堅執不允。薩喇勒係熟悉彼處情形之人。既以爲可行。伊二人必欲執拗。不知其出何肺腑。方今準夷疊遭內亂。所屬部落叩關內附者接踵而至。此正可以大示懷柔。永救邊境之時。策楞舒赫德身膺重寄。何顛倒舛繆。至於此極。蓋舒赫德因朕有十月間令伊等進京之旨。遂一切苟且辦理。其不肯接濟阿睦爾撒納者。恐致遷延不得歸家之故。且前次致書達瓦齊一事。朕未加重譴。又自以同列大臣才具大率與彼相若。而伊親信已久。即辦理不當。不過申飭議處。未即有可代其任者。策楞雖素性粗率。胸無定見。乃亦竟每事附和。毫不顧事理之輕重。國家簡用大臣。寄以專閫重任。而乖

戾債事如此。實為深負朕恩。策楞舒赫德俱著革職。若即令回京轉得悠然事外。適合本心。著以閑散在叅贊上効力贖罪。所有家產俱著抄沒。其子特通額舒常俱著革職。發往黑龍江披甲在京諸子著拏交刑部。以爲大員負恩者戒。班第著補授兵部尚書。馳往軍營署理定邊左副將軍印務。步軍統領員缺即著阿里衮補授。諭軍機大臣等準噶爾台吉阿睦爾撒納赴軍營投誠。所部約二萬人。其所需口糧應豫為料理接濟。即將軍營備貯暫行那用。亦當豫籌抵補。山西歸化城一路現在巡撫恒文辦運軍需糧石。此項需用口糧。若由直隸另行辦運。較為省便。著傳諭方觀承於宣化各屬產糧處所。或招商承運。或官為採辦。即由張家口陸續運赴軍營。以二萬四千石為率。其如何酌籌辦運之處。該督即行妥議奏聞。尋奏現撥銀二十萬兩。交口北道良卿同南路同知范清曠赴張家

口籌辦俟該員等查覆到日奏聞請旨得旨應即一面辦理一面奏聞何云候旨也○是日駐蹕固爾班格爾大營○丁未

上詣

皇太后行幄問安○諭據江南總督鄂容安巡撫莊有恭奏稱淮揚所屬之興化泰州高郵寶應阜寧鹽城清河桃源安東等處因雨水過多積水一時不能消涸其最窪之地秋成已致失望等語該處上年被災甚重今夏疊被水災閭閻餬口無資朕心深為軫惻著該督撫等加意撫綏查明應賑戶口著動倉穀分別賑卹並飭屬員實力辦理務使災民均霑實惠其餘各屬如有積水不能補種之處著一併查明照例妥辦毋致失所該部即遵諭行○是日駐蹕德爾班格爾大營○是月直隸總督方觀承覆奏直隸本年雨水雖多並未成澇惟濱河窪下之區間有積水致成偏災通計不及二十州縣除薊州被災稍重

其餘在一州縣不及十分之一在通省不及百分之一得旨覽奏稍慰○河東河道總督白鍾山奏祥符黃河全勢側注北岸平家寨以下搶築埽壩今春壩南長出淤灘愈覺逼溜趨北亟將淤灘挑切順導七月初旬連次大雨河水陡長於挑切南灘處忽闢引河一道約長七百七十餘丈壩工藉以平穩第引河頭有膠泥一段攔遏水勢不能暢流須挑挖深通引河尾出水之處與大河水勢頂阻須將逼溜北趨之南灘挑切直順使大河引河之水併力趨中得旨甚應為者○湖北巡撫張若震奏湖北原定養廉六百兩之州縣內遠安南漳光化均州鄖縣鄭西房縣保康竹山竹谿興山長陽巴東建始當陽等十五州縣地要事繁實不敷用應各增銀二百兩擬於原定一千三百兩之漢陽黃陂孝感荊門江陵二千二百兩之興國蘄州一千一百兩之黃岡蕪水沔陽天門等十一州縣各減

二百兩一千兩之監利武昌黃梅大冶蒲圻嘉魚麻城等七縣并九百兩之廣澤縣各減一百兩加給不敷州縣得旨減有餘補不足可行之事也○陝甘總督永常奏哈密防所駐兵二千向派叅遊二員一駐三堡一駐哈城協理防務明歲大兵齊集哈密一切軍務皆應豫為料理哈密應添派遊擊二員於甘肅揀選派往駐防官兵例係二年一換明歲四月適值換防之期大兵齊集未便盡易新兵請將明歲應換之兵暫留一年將弁兵丁照出防之例酌半賞給俸餉得旨如所議行○吏部尚書管四川總督黃廷桂等奏松潘鎮總兵曩例三年一次攜帶賞銀赴番部化導查口外各土司彼此從不往還今因化導調集一方互相猜疑轉啟控爭之漸且來者大都附近土司貪圖賞項其遠者則以往返口糧較多所得不償所費往往藉病不來化導一事有名無實應停得旨所見是○署兩

廣總督楊應琚奏瓊州府山多田少惟藉商販流通但海中風信不常市價多致騰貴請嗣後瓊州各屬倉穀凡遇風阻無船米穀昂貴即開倉平糶風定船來即停仍令地方官於價平時速行買補得旨如所議行○雲貴總督碩色奏猛梭土司刀正民被沙匪攻破占住城寨現調撥官兵及附近猛梭之猛喇猛賴等處土練協同該土司刀正民前往驅逐所經道路盡係瘴鄉七八月間尤甚應俟霜降後起程九月二十日會集猛喇前進再口糧運送維艱請發給折色在鹽餘項下動支報聞

大清高宗法天隆運至誠先覺體元立極敷文奮武孝慈神聖純皇帝實錄卷之四百六十九

實錄卷四百六十九

三六

大清高宗法天隆運至誠先覺體元立極敷文奮武孝慈神聖純皇帝實錄卷之四百七十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總辦官經筵講官太子太傅文學殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄六次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌八月戊申朔祭

大社

大稷遣和親王弘晝恭代行禮○諭淮揚所屬高寶等處因雨水過多窪地居民又復被淹已飭該督撫查明被災處所加意撫綏所有應行賑卹戶口需用米糧著於乾隆十九年江蘇省應運新漕內截留十萬石就近存貯以備賑卹之用該部遵諭速行○又諭將軍阿蘭泰著暫在軍機處行走○諭軍機大臣等今春朕謁

東陵一切軍營奏報俱由昌平通州一路安臺接遞。竟達行在不令繞道入京。以致稽延時日。此次恭謁

祖陵。現已將抵吉林。著傳諭方觀承所有軍營奏報。可即照今春之例。徑由昌平通州出山海關一路安臺接遞。俾按程計刻速行馳遞。以免稽遲。○又諭上年淮徐各屬。因河湖異漲。以致隄工潰決。已重治高斌之罪。但前此數年高斌力持封壩。不肯開放過水。下河一帶頗獲有秋。去歲則持之太過。不合機宜耳。今車邏南關兩壩。又復過水數尺。高寶興泰各州縣屬。現俱成災。雖高堰隄工可保無虞。而竟以下游為壑。以此為河臣自全之善策。則得矣。下河億萬災黎。其何以堪。將此傳諭尹繼善。令其因時酌量。妥協辦理。勿使窪地居民偏受其害。並將此次車邏等壩。如何開放過水。及高寶各屬。現在被災緣由。查明據實奏聞。尋奏高寶境內運河東隄。建車邏南

關五里三壩。宣洩湖河漲溢之水。由下河以歸於海。前經奏定水高壩脊三尺。先開車邏壩。至三尺以外。再將南關五里二壩開放。今年五月間。晝夜大雨。河水陡長。至七月內。大雨疊沛。湖河并漲。河水已高壩脊三尺以外。因將車邏南關二壩開放。今湖水日消。當相機堵閉。至高寶各屬未開壩之先。已被淹浸。實陰雨過多所致。得旨。覽奏俱悉。○又諭淮揚所屬興泰各處。現今被水成災。該督撫等

查勘辦理。分別賑卹。但上年鄂容安等疏濬下河。原以宣通水道。期窪地居民得免淹浸之苦。今該處被水。雖因雨澤過多所致。然使河道深通。流潦得所歸宿。亦何至汎濫阡陌。前據該督撫及欽差經理之員。僉稱河流通暢。何至工作甫竣。水災即已復見。則此番經理所為。禦患弭災者何在。著傳諭鄂容安尹繼善。莊有恭等。將此次被水緣由。及疏濬下河。是否有益之處。詳悉查明具奏。尋奏。下

河地勢低窪。衆水所歸。上年奏請濬疏河道。十七處。建閘三座。原止可洩中等漫水。以保次窪之地。嗣因時迫農忙。不能一時并挑。先就淤淺尤甚者。開濬七處。乃工程未竣。適大雨連旬。田間積潦。宣洩不及。致復淹浸。今擬將下河未竣諸工。仍行疏濬。庶數州縣次窪之地。不致盡成廢棄。得旨。如此。則所謂循名了事之舉耳。既出於勢有不能。又合以人亦如故。則朕亦無如何矣。○予巡哨被風漂沒之廣東龍門協把總符元。祭奠如例。○是日。駐蹕布達朗郭勒大營。○已酉。

上詣

皇太后行幄問安。○是日。駐蹕亥河洛大營。○

庚戌。駐蹕赫圖畢爾罕大營。○辛亥。

上行圍。○實授楊應琚為兩廣總督。○是日。駐

蹕伊拉瑞河大營。○壬子。

上詣

皇太后行幄問安。○諭軍機大臣等。據都賚奏。

稱此次派往出兵各員。皆係素有勞績之人。若遇有缺出。將未曾出兵之員補放。則出兵人員。未免陞轉無階。請嗣後旗員缺出。除將記名者。按名奏補外。其餘暫行委署。俟凱旋後。將軍營出力人員。揀補等語。所奏雖是。而未知大體。明年進兵。原為定準噶爾之亂。成功後。即行撤兵。非頻年用兵可比。況軍前奮勉。皆我滿洲分內之事。伊等果能出力。朕自格外施恩。今於未進兵之先。豫擬陞轉之例。殊失伊等効力戎行之意。是我滿洲。皆為圖利之輩矣。將此可寄信與都賚。及將軍大臣等。曉諭知之。○是日。駐蹕伊拉齊村西大營。○癸丑。賜扈從王公大臣。並盛京吉林將軍官員兵丁等食。○諭曰。朕躬奉

皇太后詣盛京恭謁

祖陵。道經吉林。念此地為我朝肇基所自。風俗純樸。官兵弓馬可觀。尚能不忘舊習。途次迎鑾者。踴躍趨事。具見尊君親上。忱悃篤摯。予

用嘉悅。車駕肇臨。所有將軍大臣。並官員兵丁人等。應如何分別加恩賞賚。著總理行營王大臣速議具奏。尋議。吉林將軍副都統等。應分別賞給撒袋腰刀蟒緞大緞官緞。有執事官員。賞大緞官緞。無執事官員。賞官緞。彭緞。有執事兵。賞三月錢糧。無執事兵。減半賞給。驛丁屯丁等。每名賞銀一兩五錢。從之。○又諭。將軍阿蘭泰著赴軍營帶兵。盛京將軍事務著清保署理。達勒當阿著授為黑龍江將軍。亦令帶兵前往軍營。○諭軍機大臣等。朕前以清保為滿洲內勇敢之人。尚可領兵。是以授為黑龍江將軍。派令出兵。今觀清保諸事耽延。即遣赴軍營。亦無裨益。是以降旨。將達勒當阿授為黑龍江將軍。令其帶兵前往。阿蘭泰所遺盛京將軍事務著清保署理。阿蘭泰亦派令出兵。伊將軍任內應得各項。仍著阿蘭泰支領。清保著自備資斧。効力贖罪。若仍不知奮勉。痛改前非。朕必從重治罪。

決不寬恕。可寄信與清保知之。○又諭。據策楞等奏稱。新降台吉阿睦爾撒納等屬下之人。有衣服缺少者。請於張家口等處採辦皮襖二三千件。運送軍營等語。現在晉省辦運米石。事務繁多。著傳諭方觀承。令其在張家口等處儘數採買。如一時買不足數。即速行製備。隨得隨運。務於嚴冬以前陸續由臺送至軍營。以應急需。○又諭。據策楞等奏稱。投誠之輝特台吉阿睦爾撒納。訥默庫等。於明歲進兵時。願將伊等屬下人內派兵二千三百餘名等語。著照所請。准其派出。所派喀爾喀兵原定為六千名。著裁去三千五百名。令其看守游牧。○又諭。準噶爾之瑪木特。前因衝入邊卡。經達清阿拏獲帶回軍營。朕以非軍威所獲。特施恩放回。瑪木特應即感恩歸降。否則亦宜安靜居住。乃遣鄂勒哲依哈什哈等來告卡上侍衛等。瑪木特必來歸降。又約阿睦爾撒納同來。今阿睦爾撒納業已歸

降而瑪木特反據掠阿睦爾撒納游牧殊為狡詐。即應以此稱兵問罪。可寄信薩喇勒。即會同阿睦爾撒納定議擒拏。此時瑪木特若來歸降。尚可施恩。若再觀望。定當擒拏治罪。但阿睦爾撒納若去。十一月有誤入覲。令薩喇勒與眾台吉同往。此次策楞舒赫德斷不可去。彼二人業以退縮誤事。若有一人冒昧同行。朕必將其即正軍法。要之瑪木特罪雖應問。但時已稍遲。今可否進兵之處。薩喇勒阿睦爾撒納會同酌議。惟期於事有益。勿拘朕旨。○工部議准。江南河道總督尹繼善等疏稱。外河廳屬清河南岸汛。應加砌石工。從之。○太常寺奏。望祭長白山神。應設立神牌。並請於祭祀後。安奉殿內。令將軍都統一員。每月朔望拈香行禮。報可。○原任定邊左副將軍策楞等奏。臣等於七月二十日。至扎布堪地方。見阿睦爾撒納等。公議明歲進兵之事。據阿睦爾撒納等

告稱。現在準噶爾內亂。人心離散。黃教頽廢。若乘此機會。領兵前進。先將包沁扎沁人等收服。兵威遠揚。使準噶爾聞風。有願投誠者。即行收納。且可乘便將我等同來落後。及被擄之人。全行救出。並搶奪牲畜。為我屬下人口糧。臣等諭以爾等誠心向化。今始從遠方來歸。尚未入覲。爾等屬人未免窮困。急須安撫。今時已七月。即領兵前往。亦不能直至伊犁。自應欽遵諭旨。於明歲進兵。方為盡善。阿睦爾撒納等咸無異辭。臣等細觀阿睦爾撒納之意。全欲向包沁扎沁地方。乘機搶奪。不但可以揚威。兼可擄其牲畜。散給屬下人等。是以言之太易。若遽允其請。恐今歲不能竣事。徒令準夷聞知。豫為防備。於明歲進兵。大事有礙。是以公酌。今年先將阿睦爾撒納等。辦理安插。仍俟明年各處兵馬齊集。再行進兵。報聞。○是日。駐蹕阿濟格綏哈西大營。○甲寅秋分夕。

月於西郊遣恒親王弘晔恭代行禮○
上至吉林城以將軍署為行殿○詰

皇太后行殿問安○賜扈從王公大臣等食○

諭曰尹繼善有交辦事件著馳驛速赴行在

江南河道總督印務著白鍾山署理河東河

道總督事務著蔣炳兼管○諭軍機大臣等

今因準夷內亂且屢有大隊來降欲籌一舉

永定而策楞舒赫德在軍營辦理諸務舛謬

乖張現已降旨革職北路軍營關係緊要尹

繼善歷任中外練達機宜尚可前往辦理著

即馳驛速赴行在面領訓誨其南河總督已

有旨令白鍾山署理尹繼善接到此旨即日

起程速來若自謂不能勝此任或謂準夷之

事可以不辦不妨直奏將此傳諭知之○以

江南鎮海將軍標副將劉康為廣東高雷鎮

總兵○是日駐蹕吉林城行殿至丙辰皆如

之○乙卯

上詣溫德亨山望祭殿望祭

長白山神○至松花江岸祭

江神○賜扈從王公大臣等食○諭軍機大

臣等據策楞等奏將同阿睦爾撒納入覲之

台吉二十人繕名具奏策楞等於應辦事件

並未審度機宜辦理急將入覲之台吉姓名

具奏策楞舒赫德惟期與阿睦爾撒納同來

陛見得以置身事外豈能逃朕洞鑒今年十

月舒赫德不必前來策楞或來與否臨時另

降諭旨舒赫德著會同唐喀祿照管阿睦爾

撒納游牧事務伊若不實心妥協辦理朕如

何治罪之處舒赫德諒必自知毋庸再諭可

寄信策楞等知之○又諭曰恒文奏稱賞給

阿睦爾撒納口糧除已經起運外所有撥運

米二萬石炒米六千石若於年內辦齊即行

起運如或不能明年正月即行起運等語賞

給阿睦爾撒納口糧曾交軍機大臣計算數

目若有二萬四千石足敷一年之用前朕已

諭方觀承令其由張家口運送恒文請運米

二萬石。炒米六千石。若於今年運到。甚妥。如不能運到。先將軍營現存兵米。撥用接濟。阿睦爾撒納。俟明年運到抵還。再兆惠已授為叅贊大臣。遣赴軍營。今只有恒文一人承辦運糧事務。最關緊要。可寄信與恒文。令其盡心妥辦。不可稍有懈怠。○旌表守正捐軀之四川涪州民李文惠妻姚氏。○丙辰。

太宗文皇帝忌辰。遣官祭

昭陵。○

上奉

皇太后御舟。渡松花江。○幸龍潭。○諭曰。策楞之子特清額。特成額。特嵩額。舒赫德之子舒安。俱未及十歲。著加恩免交刑部。○刑部等衙門會議。雲南巡撫愛必達疏稱。叅革開化鎮總兵張凌霄侵蝕俸餉銀九百八十兩。照例擬徒五年。應如所請從之。○工部議准。江南河道總督尹繼善等疏稱。外河廳屬黃河南岸周家莊一帶。縷隄不時塌卸。應建埽壩。

工一百五十八丈。從之。○丁巳。祭先師孔子。遣大學士史貽直行禮。○諭曰。鄂容安著馳驛速赴行在。尹繼善不必前來。所有兩江總督事務。即著尹繼善兼署。白鍾山著仍留河東總河之任。○諭軍機大臣等。年來準夷內亂頻仍。人心離散。屢有大隊輸誠內嚮。正可乘機辦理。永收邊境。而策楞舒赫德二人。遇事乖張怯懦。深負委任。已降旨革職。一時未得更替之人。因命尹繼善速赴行在。欲令其前往北路。今思尹繼善年逾六旬。且此事亦恐非其意所欲辦。徒致勉強債事。又且可惜失內地一因循有名解事之人。因思鄂容安年力壯盛。深感朕恩。勇敢有為。於一切緊要機宜。或尚能曉暢。克勝此任。現已有旨諭部。著速赴行在。所有兩江總督事務。即著尹繼善兼署矣。鄂容安奉到此旨。即刻馳驛速赴行在。面領指授。將此并諭尹繼善知之。○戶部議覆安徽巡撫衛哲治奏稱。本

省承追覈減分賠代賠各項。并外省咨追各項銀兩。均請照承追侵那自理贖銀兩之例。統於年底彙冊題報等語。應如所請。自乾隆十九年為始。如係戶部行追者。即將完欠數目。年底彙報戶部。工部行追者。亦即彙報工部。仍照向例。數在三百兩以下者。定限六個月。三百兩以上者。定限一年。按限嚴追。限滿不完。照例查叅。年終彙報時。并將承追不力各員。曾經初叅或二叅三叅。分晰聲明。至由任所咨回原籍確查。無追取結。咨覆任所者。應於任所彙報。再八旗外任各員。遇有應追銀兩。咨回旗籍者。除限滿不完。照例查叅外。年底亦令該旗彙報戶部。一體辦理。從之。

○是日。駐蹕喀木尼莊大營。○戊午。

太祖高皇帝忌辰。遣官祭

福陵。○

上行圍。○諭軍機大臣等。據永常密奏。敦多克回巢達瓦齊。如再遣人來。豫籌辦理一摺。前

敦多克等。面領諭旨。并齋回詔書。達瓦齊奉到後。自必復遣人來。藉以窺探動靜。計其時日。應在冬底。去進剿之期尚遠。所有先派出之甘涼等處綠營官兵。若即往哈密。則與彼處邊卡漸近。恐不無宣漏情形。應且令其屯劄安西以內。該督即將夷使。照舊護送來京。攜帶貨物。亦且照常辦理。但須嚴飭兵役人等。慎密周防。至夷使來京進摺後。應作何辦理。須臨時酌定降旨。該督候旨遵行。若達瓦齊所遣夷使。於明春二三月到哈。則大兵既集。竟將該夷使護送來京。亦不慮其漏洩矣。即明告以興師安撫彼地。但罪在達瓦齊一人。與眾無涉。即達瓦齊誠心歸順。亦且恩撫。但不可令其即行回巢報信可耳。○是日。駐蹕庫勒訥窩集昂阿大營。○己未。

上詣

皇太后行幄問安。○

上行圍。○遣官祭

關帝廟。○諭。據清保等奏稱。齊齊哈爾。黑龍江。墨爾根等處。本年雨水過甚。濕窪之地。不能耕種。已種田禾。被水淹沒等語。著交與將軍達勒當阿。速委賢能官員。分路詳細查明。乏食戶口。即行動用倉糧接濟。勿致失所。○是日。駐蹕扎拉芬阿林大營。至辛酉皆如之。

○庚申。

萬壽節。遣官祭

太廟後殿。○遣官祭

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。○遣官祭

顯佑宮。

東嶽廟。

城隍廟。○

上詣

皇太后行幄行禮。○御行幄。扈從王公大臣官員等。及蒙古王公台吉等。行慶賀禮。○賜扈從王公大臣蒙古王公等宴。○吏部遵旨議覆。御史王應綵條奏。凡官員處分。宜歸畫一。買物不給價值。除竟不給者。吏部則例原有革職正條。應照舊例辦理外。其不即行支價者。應照不速給價例。罰俸。給價有減少者。應照半不給例。降級調用。一。檢驗傷痕不實。除官員受財故驗。致罪有增減。以故出入人罪論者。聽刑部依律問擬外。其罪雖有出入。並無受財故驗情弊。俱送吏部照例分別降級罰俸各等語。均應如所請。從之。○原任定邊左副將軍策楞等奏。伯克增特。與巴朗等。同逃。旋經擒獲。臣等審訊。據供出從前巴朗等。隨車凌孟克投誠時。行至中途。即與伊弟巴雅爾當

及宰桑濟爾哈朗達爾扎達瓦那木凱贊卜。尼瑪齊崖等潛謀脫逃往投達瓦齊後車凌孟克入覲時欲將巴朗巴雅爾當一同帶往巴朗不願同行是以未去車凌孟克恐伊等脫逃因將巴雅爾當及宰桑濟爾哈朗達爾扎達瓦齊崖等帶往臨行時巴雅爾當將馬二十匹人五戶託巴朗帶領居住且約欲往何處即行帶往明年必來尋覓同居至巴朗逃後囑伯克增特回告巴雅爾當濟爾哈朗

等。我現由哈卜塔克拜塔克逃往巴雅爾當等可即遇便尋來等語伯克增特本與巴朗同逃又為送信勾引他人情殊可惡請將伯克增特在軍營正法其巴雅爾當等既有商議同逃情事已密咨麒麟保等加意防範從之。○以正黃旗漢軍印務叅領祖尚德為正紅旗漢軍副都統。○賑恤甘肅皋蘭狄道金縣渭源靖遠等五州縣本年旱災飢民并予緩徵。○裁浙江廣豐倉大使缺從護理巡撫

周人驥請也。○辛酉。

上行圍。○壬戌月食。

上詣

皇太后行幄侍早膳。○

上行圍。○諭軍機大臣等北路進剿官兵原派三萬名今該處又有新降厄魯特等咸願出力報効合計兵數已屬有餘所有寧太兩鎮鐵手兵一千名著停其派往。○是日駐蹕布爾罕大營。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十

大清高宗法天隆運至誠先覺體元立極敷文奮武孝慈神聖純皇帝實錄卷之四百七十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄六

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌八月癸亥

上行圍。○諭曰。莊親王福晉薨逝。著三阿哥往奠茶酒。即派三阿哥穿孝。○諭軍機大臣等。副都統納木扎勒奏。據杜爾伯特貝勒色布騰告稱。車凌孟克與伊子已雅爾當商議。欲與色布騰同逃。臣令色布騰密為防守。勿露形跡。並知會策楞。舒赫德。密令庫克嶺喀喇阿濟爾汗之駐防大臣。與扎薩克等妥為防範等語。納木扎勒辦理此事。甚合機宜。若稍露風聲。於新舊降來之厄魯特。大有關係。可

寄信班第策楞。舒赫德等。於應防守之處。豫先防備。倘果有其事。即行追趕。不可稍有疎縱。亦不可稍有泄漏。○又諭曰。朕前降旨。令薩喇勒於十一月前來陞見。今日據納木扎勒奏稱。車凌孟克與伊子已雅爾當欲同色布騰逃回等語。此事未知虛實。但已朗甫經逃叛。車凌孟克屬下之人。復有此言。不可不暗加防備。可密寄薩喇勒。令其嚴加防範。并酌量調派察哈爾喀爾喀兵丁豫備。十一月色布騰來陞見時。薩喇勒暫不必前來。俟色布騰回軍營後。薩喇勒再來陞見。○又諭。據納木扎勒奏。車凌等所種之地。歉收。現在於附近喀爾喀購買牛羊。如不能即得。請派人前往歸化城庫倫地方。購買等語。車凌等欲往歸化城等處購買牲畜。即派人照料前往交易。歸化城倉內存貯米糧。現有贏餘。可寄信納木扎勒。傳諭車凌等。令其自備駝隻馱運。朕加恩賞給。不必伊等購買。再車凌等去

冬跋涉而來。雖經朕節次施恩。賞給口糧牲畜。但一時難以安業。今冬明春。若仍需接濟。納木扎勒即請旨辦理。○天津都統瑪爾拜因病解任。以天津副都統噶爾錫為天津都統。張家口總管雅隆武為天津副都統。○是日駐蹕呼蘭河大營。○甲子軍機大臣等議覆前任黑龍江將軍清保等奏。派往西北兩路官兵軍行各事宜。一。現派出兵一萬名。以五百為一營。以總管協領副總管為營長。每五十名為一甲喇。每甲喇應給蠶一。畫角一。齊齊哈爾等處兵。令各帶現存單甲一副。巴爾虎官員各帶現存棉甲一副。打牲烏拉索倫達呼爾官兵向來未辦軍器。除各帶本身弓箭外。每人應給棉甲一副。腰刀一把。梅鉞箭五十隻。請交部備辦等語。查打牲烏拉索倫達呼爾官兵皆自有弓箭。今若交部另製梅鉞。不惟一時趕造不及。恐弓力亦多不合。應交新任將軍達勒當阿。令該處派出官

兵。將本身弓箭足數帶往。所需腰刀。於齊齊哈爾等城樓存貯。腰刀內撥給蠶旗。畫角。亦將本處現存者支給。至棉甲一項。原為鼓勵出力兵丁之用。並無派兵一名。即給棉甲一副之例。應請交內務府。工部。將現存棉甲解赴軍營備賞。毋庸另造。餘應如所請。一。火藥鉛丸。繩索。由京前往兵需用者。應由部撥給。由邊外前往兵需用者。由本處存貯項下支給等語。查火藥。鉛丸。繩索。俱係明年進兵時

始用之項。應俟伊等抵軍營後。由將軍酌量撥給。一。員弁例給跟役。除賞皮衣銀二兩外。應給鹽菜口糧。再每兵四名。合用帳房一。架。羅鍋一口。應折銀支給等語。應如所請。并行。知兩路將軍等。兵丁到營後。毋庸再行支給。一。由克魯倫赴北路兵五千名。各給馬二匹。每一匹折銀八兩。官員按品支給。跟役二名。合給馱馬一匹。亦折銀支給。由京赴兩路兵五千名。抵京時副都統給馬八匹。總管協領

副總管委營長六匹。佐領防尉四匹。驍騎校三匹。兵丁各一匹。兩兵合給牛車一輛。俱折銀支給等語。查由邊外赴北路兵五千名。各給馬二匹。折給馬價。應如所請。至由京赴兩路兵五千名。到京後。於張家口。直隸。河南。陝西等處。安設馬臺。轉行解往。非同由該處直抵軍營可比。應行令新任將軍達勒當阿。酌量支給車輛。車如不敷。再補給馬。一。各項軍需。約計用銀六十六萬四千兩。除現存儲備銀二十萬兩。額爾登額解來銀二十萬兩。尚不敷銀二十六萬四千兩。請由盛京戶部撥給支放。俟兵起程後。由京補領歸款等語。應如所請辦理。從之。○是日。駐蹕都林河大營。○乙丑。

上詣

皇太后行幄問安。○諭軍機大臣等。據策楞等奏。阿睦爾撒納進破九位。為明年進兵之用。阿睦爾撒納恭進破位。特欲表其誠悃。使我

不疑。乃策楞等即為收存。殊屬非是。可寄信班第等。將破位即行發回。仍傳諭阿睦爾撒納。明年進兵時。爾等軍器。如或不足。朕必施恩賞賜。此項破位。仍留在爾處備用。不必存於軍營。○是日。駐蹕鈕磨順河大營。○丙寅。上行圍。○閱輝發城。○吏部議准。湖北巡撫張若震疏稱。恩施縣縣丞移駐木貢村。應建衙署。并頒給恩施縣分駐木貢縣丞關防。從之。○兵部議。署兩廣總督楊應琚奏。左翼鎮總兵魏宗聖。於藉端規避。不肯移駐麻涌地方。之守備高懷。未經揭報。應照例降二級調用。從之。○以王府長史呼圖禮。為正白旗蒙古副都統。○是日。駐蹕輝發城西大營。○丁卯。

上詣

皇太后行幄問安。○

上行圍。○諭據策楞。舒赫德。覆奏。阿睦爾撒納來降。帶來四千餘戶。內有在游牧一千餘名。

因其可用。欲留在軍營効力。其台吉內有應來京入覲者。故亦欲留在軍營。並非有心分散伊等妻子等語。從前策楞舒赫德奏請將新降台吉及伊等之子留在軍營。又將伊等之老幼妻子移送蘇尼特地方。辦理乖謬。經朕嚴行申飭。乃復巧為奏辯。更屬可惡。朕前將策楞舒赫德之子。免其監禁。今伊等有意貽誤軍機。著將伊等幼子。仍交刑部監禁。○諭軍機大臣等。據策楞等奏。現在烏里雅蘇台地方水草漸枯。時亦寒冷。應照阿睦爾撒納等所請。交與努三德沁扎布。令伊等移至鄂爾坤塔密爾等處游牧。著照所請。即令移至鄂爾坤塔密爾等處居住。其照管伊等。毋庸派努三前往。即令舒赫德同德沁扎布前去照管軍營事務。舒赫德不必管理。○又諭。現在恒文於歸化城辦運米石。歸化城與推河地方相距不遠。該處現在需用米石。著恒文將所辦米糧。先撥一萬石。就近運赴推河。

地方應用。恒文接到此旨。速行如數運往。並將何時可抵推河之處。即行奏聞。○又諭曰。策楞等奏稱。明年大兵進剿時。阿睦爾撒納訥默庫等各帶伊等兵丁。効力行走。經朕降旨。照伊等所請行。阿睦爾撒納等屬下之人。新來投誠。生計艱窘。應賞給伊等辦裝銀兩。著即行給與。俾得從容備辦。阿睦爾撒納。照車凌之例。賞銀二千兩。訥默庫。班珠爾。照車凌烏巴什之例。賞銀一千八百兩。於軍營存貯錢糧內動支。即行給與。其餘台吉等。俟到熱河。派定出兵之人。再行賞給。○吏部尚書管四川總督黃廷桂奏。崇寧合江。青神。眉州。華陽等五州縣。請增茶引三百七十一張。自十九年為始。照例納課徵稅。下部議行。○原任定邊左副將軍策楞等奏。臣等商同阿睦爾撒納。擬派喀爾喀兵五千五百名。阿睦爾撒納。訥默庫。及車凌等。兵各五百名。共七千名。於九月二十日內。齊集烏里雅蘇台。十月

內到科布多探取信息。辦理烏梁海。若遇阿睦爾撒納之兄。及伊屬下人等。即迎接前來。若烏梁海遠遁。請在哈道里。海喇圖等處等候。相機辦理。得旨。策楞等前後所奏。總不相符。前稱七月內發兵。辦理烏梁海。回時恐為雪所阻。推諉誤事。今又奏稱於九月二十日齊集前往。何以與前互相矛盾。且辦理烏梁海。是何大事。何必用兵至七千名之多。種種錯誤。殊堪髮指。此時若已遲誤。不如竟俟至明年大兵進剿時辦理。著傳諭班第等。熟籌妥辦。○是日。駐蹕費雅塔喇庫河大營。○戊辰。

上行圍。○遣官祭黑龍潭

昭靈沛澤龍王之神。玉泉山

惠濟慈佑龍王之神。○賜扈從王公大臣並

盛京吉林將軍官員兵丁等食。○諭軍機大

臣等。黃廷桂奏。佟世表侵虧河工帑項。全數

通完等語。佟世表著從寬免其正法。其宿虹

同知任內。承挑引河一案。既當俟河臣尹繼善定議辦理。所有該員應行如何定擬發落之處。即歸彼案完結可也。○又諭。兵部奏。今年武會試揭曉以前。豫行奏請殿試日期。并開列讀卷官。并請欽頒策問。一同封交內閣等語。武場以弓馬技勇為先。策問究非所重。與文闈試士不同。今年武殿試。除豫行奏請考試日期。並開列讀卷官。仍密題辦理外。其策問題目。著停止奏請。於讀卷官宣旨後。即赴該處嚴密關防。撰發試題考試可也。將此傳諭來保知之。○又諭。昨策楞。舒赫德。見朕七月二十六日申飭之旨。將阿睦爾撒納。訥默庫。車凌等兵。並派七千。欲於十月內起程。征剿烏梁海等。策楞。舒赫德。何始終執迷。至於此極。初阿睦爾撒納求助時。正可進兵。乃策楞等阻止未行。至經朕嚴飭。伊等若即選精銳兵二三千名前往。尚不至誤。今明知時已遲誤。反欲派兵七千。於十月進剿。設照伊

等所請。不獨今日空勞兵力。於明歲進兵。更屬無益。伊二人之心。實不可問。且阿睦爾撒納。車凌。俱係甫經投誠之人。派阿睦爾撒納之兵。救伊親屬。尚屬可行。若訥默庫。係與阿睦爾撒納同來。亦應救助。今派車凌帶兵前往。何意。阿睦爾撒納。將來不過封親王。車凌。現係親王。肯為阿睦爾撒納所使乎。辦理實不可解。策楞。舒赫德。見朕二十九日所降之旨。若於此時帶兵二三千名前往。尚可。車凌之兵。斷不可帶。即已起程。亦令撤回。若未經啟行。即宜停止。可寄信班第等。專心籌畫。明歲進兵之事。妥為辦理。并傳諭阿睦爾撒納知之。○是日。駐蹕九河大營。○己巳。

上詣

皇太后行幄問安。○

上行圍。○遣官祭昭忠祠。○以正白旗滿洲副都統舒明。為左副都御史。仍兼正白旗滿洲副都統。○調原任江南河庫道姚廷棟。來京。

引見。○是日。駐蹕瓜齊顯鄂。佛羅大營。翌日如之。○庚午。

世宗憲皇帝忌辰。遣官祭

泰陵。○諭軍機大臣等。阿睦爾撒納等。款關內附。冀受朕恩。伊等初到。聞其生計艱窘。牲畜損傷。深堪軫念。著加恩賞阿睦爾撒納。牛馬一百匹。羊三百隻。訥默庫。班珠爾。各賞牛馬八十匹。羊二百隻。其餘台吉扎木叅等八人。俱各賞牛馬二十匹。羊一百隻。以資養贍。○

又諭曰。策楞等奏稱。明歲大兵進剿。令王額琳沁。多爾濟。貝勒。青滾。雜卜等。由四部落購備羊二萬隻。馬一千匹。以供軍需等語。自去年凡軍需所用牲畜。俱給喀爾喀等折價。此項牲畜。又何必勞喀爾喀等之力。令其購備。著班第等。仍照例給價。再策楞等奏稱。合計軍營現存米石。及未運到米石。至明年十月。放給大兵。大約不過三萬石等語。今運至米糧炒麵。已十萬石有餘。明年放給大兵。頗有

餘裕。著將給與阿睦爾撒納羊隻內。仍以米搭給。減去羊隻。既可少用喀爾喀等牲畜。亦可微省伊等工力。可寄信班第等。遵旨酌量辦理。○又諭。護軍統領長載。由車凌等游牧處回時。朕降旨詢問。據長載奏稱。厄魯特等生計較前稍愈。多不願移於通肯呼裕爾地方等語。如此情形。若將車凌移進歸化城等處。更為不便。自車凌等投誠。朕雖屢次加恩。伊等終屬始來投誠之人。未能深知朕意。且車凌孟克。因伊子巴朗逃走。不無疑懼。今若將伊內遷。伊等必更滋疑慮。納木扎勒始至彼處。尚未洞悉情形。可寄信納木扎勒。於厄魯特等。惟宜示以寬大。釋其疑心。妥為籌辦。今冬明春。若有需接濟之處。奏聞辦理。其應防守處。更宜嚴密。不可稍有泄漏。○辛未。上行圍。○是日。駐蹕六格山大營。○壬申。

上詣
皇太后行幄問安。○

上行圍。○遣官祭賢良祠。○諭軍機大臣等。永常奏明歲大兵齊集。自嘉峪關至哈密。應分路前往。所有沿途道路。并挑挖井泉。以及到哈密後。駐劄營盤。牧放馬駝廠地。均須及時酌辦。以免臨期貽誤等語。官兵經過。若遇戈壁水泉缺少之處。挖井應用。不過偶一為之。至於行走道路。駐劄營盤。牧放廠地。俱屬隨時辦理之事。若皆先事周章。則於軍行迅速之道。轉有未協。且入夷境之後。誰為豫先料理此事耶。向來綠營習氣。每於此等事宜。經營籌辦。騰口說而費筆墨。徒致行走迂緩。總非切要機宜。永常此番統率官兵。正宜一洗綠營積習。務為簡捷便利。一切隨時隨地。相機辦理。總以迅速遒行。方為允協。若仍蹈故習。必為厄魯特兵所笑矣。將此傳諭。永常知之。○是日。駐蹕小黃科大營。翌日如之。○癸酉。

上行圍。○諭軍機大臣等。從前降旨。令貝勒車

凌孟克。色布騰。同王車凌領兵一千。前往阿爾台策應。今思車凌烏巴什。訥默庫。俱屬年幼。車凌孟克。係舊人。經歷事務。若遣往西路。於事有益。著將車凌孟克。遣往西路。在叅贊大臣上行走。車凌烏巴什。訥默庫。著照車凌孟克一體。在叅贊大臣上行走。其從前西路派出綠旗兵一萬名內。著傳諭永常。即行裁減三千名。○又諭曰。車凌孟克之子巴朗。現在潛逃。聞伊所屬人等。尚有相約同逃之語。

不丁不密。行防範。著傳諭班第等。嗣後準噶爾來降之厄魯特等。當於接到時。詢明如係車凌。車凌烏巴什。及阿睦爾撒納等。所屬之人。即應給與各台吉識認。同往。倘係車凌孟克所屬之人。其中恐有別情。或係巴朗等。使人暗通消息。或係達瓦齊。假作車凌孟克之人。從中謀為詭詐。俱未可定。即應嚴加防守。遣人送至京師安置。不可仍令歸入車凌孟克部內居住。致生事端。尤須密為籌辦。毋令

車凌孟克知覺。班第等。務宜詳慎妥協辦理。○又諭。貝子扎拉豐阿。帶領阿睦爾撒納所遣宰桑烏巴錫等三人。於八月前來入覲。計於九月初四五日。可至行營。但彼時正值朕躬謁

祖陵之際。於行營見伊等不便。朕於十一日至盛京。是日即帶伊等接駕。以便宴賚。伊等俱係新附之人。不能急走。可令計程緩行。著寄與扎拉豐阿知之。○戶部議准。調任甘肅巡

撫鄂樂舜疏稱。赤金衛地氣潮濕。應添建倉廩五十間。從之。○甲戌。

上詣

皇太后行幄問安。○

上行圍。○諭軍機大臣等。范時綬奏。江西省各營伍情形。現在不能徧歷。倘調理少愈。即撐持前往。分途較閱。不敢延誤等語。前范時綬奏明於初秋巡閱該省營伍。原屬該撫應辦之事。但必實力整頓。方於地方有益。今既力

疾未愈。若僅勉強前赴。恐精力未逮。不能詳悉履勘。轉覺有名無實。著傳諭范時授。今年暫停查閱。俟痊可後。酌量前往可也。○又諭曰。喀爾吉善奏。馮大千。即馮文子。並非西洋番夷。潛至福安傳教。實係福安民人。應俟徒限滿日。解回原籍。交親族收管等語。此等不安本分之人。充徒內地。已不能保其不滋生事端。至限滿仍令解回原籍。勢必故智復萌。傳播煽誘。所云交親族收管。尤屬有名無實。該督不過按照律例辦理。於此案實在情罪。尚未允協。應將該犯酌量安置廣西等省烟瘴地方。嚴行管押。庶令知所懲儆。可傳諭該督知之。○又諭曰。朕近曾降旨。嗣後投誠人內。如係車凌。車凌烏巴什之人。仍送於伊等本處同住。係車凌孟克屬下人等。即解送京師。第思巴朗等逃回。恐準噶爾生疑。不肯認為車凌孟克屬下。詐稱車凌之名。即解送車凌處。查出詐偽。恐車凌孟克處已通信息。可

寄信班第。嗣後投誠之人。除實係車凌孟克之人。仍解送京師外。即稱係車凌之人。亦暫留軍營。俟詳查無疑。再送車凌處居住。如稍有可疑。亦著解送京師。斷不可疎懈。再帶領阿睦爾撒納來避暑山莊。曾降旨令舒赫德不必前來。即策楞亦不必來。伊等已畏怯誤事。有何訓飭。可一併傳諭知之。○是日。駐蹕伊勒哈雅。番北大營。翌日如之。○乙亥。上行圍。○諭軍營叅贊大臣太多。互相推諉。無益於事。除現在叅贊行走之蒙古王公等外。北路著達勒當阿。烏勒登。努三。兆惠。西路著薩喇勒。阿蘭泰。玉保。為叅贊大臣。其餘俱為領隊大臣。○諭軍機大臣等。據陝甘總督永常。甘肅巡撫鄂昌奏。西路一切軍需糧石。已經陸續購辦。將次到齊。可以轉運哈密等語。但思各處調遣之兵。明年三四月始陸續到營。為期尚遠。此時哈密巡防兵丁。僅止綠旗及回民人等。殊不足恃。若將一應軍糧。悉行

運往哈密堆貯。則守禦未免單弱。恐準夷狡
慧。或乘雪前來攘竊。轉足飽其所欲。雍正八
年前事可鑒也。永常等所辦軍糧。宜從容緩
運。分貯安西以內一帶地方。俟明歲大兵齊
集之際。再行運往哈密。則程途既不甚遠。儘
可源源接濟。而於防範之道。更為周密。○丙
子。

上行圍。○是日。駐蹕德里倭赫大營。○是月。署
奉天府府尹宮煥文奏。錦縣知縣徐寅在任

聞計。例應丁憂。但現當大差緊要之際。請令
該員素服任事。差竣再令回籍。得旨。此奏差
矣。素服任事。於辦差尤屬不宜。且不肯以清
塵灑掃之後。奪人子之情也。仍按例行。○直
隸總督方觀承奏。永定下口引河。已經挑竣。
乃溜勢漸近。河底又復刷深。必須將引河再
行挑挖。乃能掣溜。現在委員上緊趕辦。得旨。
為此懸念。何尚未堵築也。○又奏。挑挖永定
下口引河。已比河底挑深。但引河迤東二十

餘里至得勝口。尚有間段淤阻。應一律疏濬。
俟挑通後。再放水掣溜。得旨。亦不可太遲矣。

○湖廣總督開泰等奏。湖北寶武局加鑄錢。
本年應停。但湖北現有應修城工。請仍舊加
鑄。所得餘息。以為修理城工之用。得旨。如所
議行。○署山東巡撫郭一裕奏。東省節年民
借倉穀。請兼收雜糧。以一麥抵二穀。高粱黃
豆。照數徵收。所收高粱麥豆。明春平糶之時。
先行出糶。秋後易穀還倉。得旨。如所議行。○

山西巡撫恒文奏。軍需動用錢糧。款項繁多。
請辦竣一案。即將一案報銷。惟軍務未竣。具
本題銷。恐有泄漏。應改題為奏。以昭慎重。得
旨。甚好。○陝甘總督永常等奏。進剿官兵。需
用駝隻。前以六個月計算。估數太多。今臣等
酌議滿漢官兵。馱載軍裝。共需駝七千七百
四十隻。現在本省駝足數用。至官員兵丁口
糧。以三十日計算。需用駝六千三百餘隻。即
在現買駝內撥給。得旨。如所議行。○陝西巡

撫陳宏謀奏。明年進勦兵。由陝入甘。應設臺站。陝省自華陰廟起。至甘肅清水縣。共設十臺。需用車馬。照例豫備。橋梁道路。乘農隙時。趕緊修治。務期平坦完固。得旨。諸凡俱妥。○兩廣總督楊應琚奏。粵省水師人員。有由陸路呈請改調者。多不得人。請嗣後呈改水師人員。應發交出洋統巡之總兵副將大員。隨帶在船親試。不許轉發隨巡之員。致有徇混。如該員果能熟悉水性。操縱合宜。列為上等。准其改調。若止能幫同駕駛。應列為次等。令其再行練習。不准改調。至請改內河水師人員。亦照此例辦理。若改調後。仍不通曉水性。一經察出。將原驗之鎮協糾叅。照徇庇例議處。得旨。覽奏俱悉。惟在行之實力得宜耳。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十一

大清高宗法天隆運至誠先覺體元立極敷文奮武孝慈神聖純皇帝實錄卷之四百七十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌九月丁丑朔

上行圖○諭曰吉慶奏通分司所屬角斜拼茶豐利等場竈地方八月初一日偶被風潮草房間有倒塌人口間有損傷已照例撫卹並給修費棺殮等語前丁猝被水災情堪憫惻若僅按例撫卹一月口糧未免拮据著查明各場被淹處所無力煎丁於九月內再行加賑一月口糧以示軫卹該部即遵諭行○又諭據阿里衮奏稱德保差竣回京在家住宿一夜次日起程等語德保係御前侍衛差竣

回京先至其家住宿殊屬無恥著革去公爵作為三等侍衛在乾清門効力行走○諭軍機大臣等危祁等奏永濟庫失竊滋生銀兩一案據稱請交刑部派員前來嚴審究擬等語該庫被竊既據訊長庚倭合偏頭等并將該班行走人役逐加研訊是現在有可查究之人自應就近即速嚴加究問逐細根追即可得實在情節否則將長庚等並應行質訊要犯一并解部審擬乃遽請派部員前往審究所奏殊屬糊塗著傳旨申飭並令嚴行訊究務得實在偷竊之犯奏聞治罪毋得遲回觀望使奸匪乘隙遠颺以致無可蹤跡允祁等候此案審明後再行交部議處○戶部等部議吏部尚書管四川總督黃廷桂題覆樂山縣老洞溝廠開採撥運京局事宜一解運京銅一百四十萬觔於滇銅過川時分七次帶運其存局銅即供川局鼓鑄一解運京銅即在收買餘銅項下撥運所加耗餘銅在抽

課耗銅叢給。一。辦運京銅。自老洞溝廠至重慶。所需竹筐水脚。及差役飯食等項。照例支給。一。自重慶運交京局。水脚夫價等項。銀。照滇省運銅例支給。一。運銅應解坐糧廳車脚。剝載銀。照滇省動給各等語。應如所請。至運銅雜費。該督請照滇省運京之例支給。未免浮多。應照滇省帶運江西截留銅之例開銷。從之。○刑部等部題准。湖北巡撫張若震疏稱。安陸縣民吳太安。起意將伊故甥尹輝宸妻吳氏改嫁。吳氏不從。又令尹輝先強搶。送至陳長綸家。吳氏堅不成婚。投繯殞命。吳太安應發邊衛充軍。年逾七旬。照例收贖。尹輝先等分別杖徒。吳氏附請旌表。得旨。吳氏矢志守節。吳太安起意改嫁。又令尹輝先強搶。背送。以致投繯。則吳氏之死。實吳太安威逼所致。豈得以年逾七旬。照例收贖。夫收贖固屬定例。亦青災之謂耳。若不問所犯輕重。則一胥吏察例奉行足矣。拘牽墨守。何以慰幽

魂而發潛德。此本著發還另議。嗣後有似此者。當按其情罪核實請旨。尋議吳太安應不准收贖。餘俱如原議。從之。○以多羅平郡王慶恆。管理鑲紅旗漢軍都統事務。○以武備院卿保。常為正黃旗蒙古副都統。○以湖廣督標中軍副將諾倫。為貴州鎮遠鎮總兵。○是日。駐蹕烏蘇河大營。○戊寅。

上詣

皇太后行幄問安。○諭曰。策楞公爵著尚書達

勒當阿承襲。德保公爵著郎中德祿承襲。○

以察哈爾游牧總管多爾濟。為正藍旗漢軍副都統。○是日。駐蹕馬前寨大營。○己卯。遣

官祭

歷代帝王廟。○遣官祭

都城隍之神。○諭曰。朕恭奉

皇太后東巡。展謁

祖陵。所有經過地方。賜復蠲租。一循彝典。尤念今年奉天所屬州縣。秋雨過多。間被水潦。雖

高阜尚屬有秋。但朕巡歷所經。念茲貧民拮据。益當加意惠鮮。無令失所。著該將軍府尹等。查明被災地畝。於恩旨蠲免外。應作何分別優卹之處。即奏聞辦理。○又諭侍衛夔薩等。自軍營差旋。朕詢及德寧。安崇阿。畏怯情形。緣德寧明知巴朗等逃去未遠。乃僅追至準噶爾卡座。即為可以塞責。遂帶兵退回。按其情節。死有餘辜。德寧妻子。著發往黑龍江。○以正藍旗滿洲協領富當阿。為正藍旗滿

洲副都統。○是日。駐蹕油葫蘆村大營。○庚辰。

上詣

皇太后行幄問安。○諭軍機大臣等。昨曾降旨。令阿睦爾撒納等赴熱河入覲。色布騰亦令同來。但色布騰曾奏聞車凌孟克與伊子巴雅爾當有圖謀。色布騰之意。此事雖虛實未定。但不可不密為防範。倘色布騰入覲。車凌孟克乘其不在。游牧肆行侵擾。不惟於色布

騰家口有礙。於國家之事。亦大有關係。色布騰如在游牧。車凌孟克必不敢侵擾。即侵擾色布騰亦能辦理。此時可暫不必入覲。俟明年成功後來朝。承受朕無窮恩眷。可寄信玉保。密諭色布騰。令其在游牧密防。以期無事。此事朕如明降諭旨。止其入覲。恐車凌孟克等益生猜疑。色布騰臨時但稱患病。不必前來。衆人亦無所疑慮矣。○大學士公傅恒等奏。

皇上恭謁

祖陵。穿素服行禮。遇大祭之日。穿朝服行禮。盛京陪祭及執事大臣官員。俱穿朝服。隨駕王大臣等穿蟒袍補褂。報可。○陞任浙江巡撫雅爾哈善疏報麗水臨安富陽鎮海太平松陽雲和宣平等八縣十九年分開墾田地山塘一百八頃有奇。○是日。駐蹕尚家河大營。○辛巳。

上奉

皇太后率

皇后謁

永陵行禮祭酒舉哀如儀。詰

顯佑宮行禮。閱興京城。署定邊左副將

軍班第等覆奏剿辦烏梁海一事。叅贊大臣

薩喇勒等業已率領所派兵丁出卡前往。計

此時正與賊游牧臨近之時。若再諭令撤回。

恐賊衆知覺轉來堵截。殊多未便。現在薩喇

勒等於八月二十四日領兵前進。臣等亦於

二十五日自烏里雅蘇臺起程。前往卓克索

接應報聞。是日駐蹕額勒赫和羅大營。

壬午。

上詣

永陵行大饗禮。遣官致祭附葬之武功郡王禮敦恪

恭貝勒塔察篇古墓。暨附近之覺羅等祖塋。詰

皇太后行幄問安。二等宣義伯兼散秩大臣

果爾多故。賜祭如例。以故貴州新化蠻彝

長官司土官歐陽承宗子方旦襲職。是日。

駐蹕尚家河大營。癸未。諭軍機大臣等班

第奏據薩喇勒告稱阿睦爾撒納云。明年進

兵事關緊要。必須二人同赴行在。面聆聖訓。

方有裨益。如蒙俞允。薩喇勒於十月下旬隨

後趕往。亦可不誤等語。薩喇勒。阿睦爾撒納

所見甚是。如此實心為國家辦事。甚屬可嘉。

從前朕將薩喇勒留於軍營。原恐車凌孟克

有意外之變。令伊防守。此際諒未必有事。班

第又在軍營。可寄信班第。令薩喇勒於彼處

事竣後。即行趕赴熱河。陛見。班第於應行防

守之處。務密為防範。不可疎懈。署定邊左

副將軍班第等奏。明歲進兵。所需駝馬牛羊

等項。現在陸續送到。時際冬春。須擇水草好

處。善為牧放。以備臨時應用。現奉特旨。派出

舒赫德。經理。臣等復公同商議。仍令額琳沁

多爾濟。率同貝勒旺沁。札布等。各帶本部落

官兵。前往翁金達什和碩地方。查收送到馬

匹牲畜。護送緩行。其牧放地方。查札布堪控

圭等處冬令溫暖水草充足應令在該處牧放以收實用報聞○是日駐蹕蓮花套大營
○甲申

上詣

皇太后行幄問安○工部議准直隸總督方觀承疏稱滿城縣方順橋巡檢移駐三座塔地方應建衙署從之○蠲免甘肅皋蘭狄道渭源金縣靖遠環縣鎮番平番寧夏寧朔靈州中衛平羅西寧等十四州縣十八年分被災地一千六百二十七頃有奇額賦并豁免被水衝坍無徵地二十六頃有奇額賦又免西寧縣被雹地一千五百九十八段額賦○是日駐蹕撫順大營○乙酉

上詣

皇太后行幄問安侍早膳○賜扈從王公大臣并盛京將軍等宴○諭據班第等奏稱台吉阿睦爾撒納訥默庫班珠爾內訥默庫與車凌烏巴什骨肉同居應即用車凌烏巴什旗

分旗燾阿睦爾撒納班珠爾應實用何旗旗燾之處請旨遵行等語訥默庫著照所請即令用車凌烏巴什旗分旗燾阿睦爾撒納著賞用鑲黃旗旗燾班珠爾賞用正黃旗旗燾俟派定伊等兵丁數目之後交該部照賞給車凌旗燾式樣製造由驛解往○諭軍機大臣等據班第等奏稱差探烏梁海等處自阿布薩圖口起至垂博勒齊爾馬羣蹤跡相連因急行進兵攻掠烏梁海游牧等語所辦甚合機宜彼處既有烏梁海蹤跡一鼓而得足可接濟軍糧擒拿瑪木特即畏避移徙其所去亦不甚速我兵就此前進并可將阿睦爾撒納之兄及其妻子與其屬下被擄人口盡行救出俾得骨肉團聚甚有裨益救出後或移於內地或人口衆多難以移徙即著所遣兵丁並其妻子在額爾齊斯安置照管游牧之處酌量辦理可寄信班第令其傳諭班珠爾薩喇勒齊木庫爾惟期於事妥協不必拘

泥。陝西巡撫陳宏謀奏。西安府屬興平縣之店張驛。差務繁多。驛丞不能獨辦。應將店張驛馬歸醴泉縣經管。驛丞缺裁。得旨著照所請行。是日。駐蹕顏台尼魯村大營。丙戌謁。

福陵。

昭陵。如謁。

永陵儀。

上詣。

皇太后行幄問安。諭此次隨駕之拜唐阿。兵丁。太監等。著各賞給一月錢糧。諭軍機大臣等。永常十月間。即應起程赴京。陞見安西。止豆斌一人。達瓦齊。或於冬間遣使前來。需有大員在彼。酌量辦理。方得領要。著傳諭劉統勳。鄂昌等。永常起程後。劉統勳仍駐肅州。適中之地。辦理軍需。及兩省總督印務。鄂昌即前往安西。駐劄。其巡撫應行之事。一并帶往辦理。若夷使到卡。詞意恭順。自當遣人伴。

送來京。即有分外干求。當告以應行應止之處。汝可自往京師。叩見大皇帝。面陳一切。敬候諭旨。遵行。不便遽為代奏。亦即遣送來京。其接待輕重。分際。悉照敦多克之例。或該夷使帶有些須貨物。懇求變售。亦照敦多克例。告以候旨辦理。至於現在一切調遣軍機務。當周防慎密。勿令得窺見情形。并飭沿途官弁兵役。毋得稍有漏洩。大學士公傳恒等。議覆兩廣總督楊應琚等議。福建巡撫陳宏謀奏。內地販洋人等。定以三年為限。三年不歸。不許再回原籍。一摺。據稱。現在開洋貿易之民。源源不絕。如三年後。不准回籍。則少逾時限。即不得返歸故土。應仍令船戶查明緣由。出具保結。准其搭船回籍等語。臣等酌議。請交各該督撫等。凡出洋貿易之人。無論年分遠近。概准回籍。仍令於沿海地方。出示曉諭。令其不必遲疑觀望。至於責成船戶。出具保結之處。應如所議辦理。其自番地回籍。攜

有貨貨者如地方官役借端索擾該上司訪
叅治罪從之○是日駐蹕毛軍屯大營○丁
亥。

上詣

福陵

昭陵行大饗禮○遣官致祭

福陵

昭陵之

壽康太妃。

宸妃

懿靖大貴妃

康惠淑妃并公主園寢○遣官致祭克勤郡

王岳託武勲王揚古利宏毅公額亦都直義公費

英東墓○

上奉

皇太后入盛京駐蹕至癸巳皆如之侍

皇太后膳○諭曰朕恭謁

祖陵禮成所有隨駕之王公俱著紀錄一次文

武大臣官員俱著加一級○又諭盛京將軍
大臣官員兵丁及盛京居住之宗室覺羅姨
舅之子孫應如何賞賚之處著總理行營大
臣等議奏尋議盛京將軍大臣官員兵丁應
照吉林之例分別賞給撒袋腰刀緞疋銀兩
至宗室覺羅及姨舅之子孫亦應分別等次
照吉林官員之例賞給得旨將軍阿蘭泰著
加賞鞍轡一副火鐮小刀子鼻烟壺各一副
都統勒克雅圖那蘭圖著加賞火鐮小刀子
鼻烟壺各一侍郎卞塔海德爾格吳拜蘇章
阿府尹鄂寶著加賞火鐮小刀子各一餘依
議○吏部議准署山東巡撫郭一裕等疏稱
東平所與東平州駐劄同城東平州既改隸
泰安府而東平所仍屬兗州府體制未協應
改歸泰安府管轄又蘭山縣之元宵屯坐落
泗水縣境亦應改隸泗水縣管轄從之旌
表守正捐軀之四川巴縣民魏連雲妻羅氏
戊子

上以恭謁

祖陵禮成率王大臣等詣

皇太后宮行慶賀禮○

上御崇政殿受賀賜諸王文武大臣官員及朝

鮮國使臣準噶爾輸誠之宰桑等宴○御大

政殿賜宗室覺羅等宴○諭曰仰惟

列祖創業東土光啟萬年景運

山陵永峙

福佑靈長我

皇祖聖祖仁皇帝三詣陪京

躬親展謁禮成行慶典冊昭垂朕寅紹丕基時

深景慕緬自乾隆八年秋瞻仰

橋山迄今已逾十載追遠之誠常如一日本年

七月恭奉

皇太后安輿由熱河起鑾取道吉林巡歷遼瀋

車駕所至兵民各安本業風俗淳樸輦路歡

迎扶攜恐後具著忠愛悃忱仰見

先澤留貽久而益懋朕心深用欽慰茲於九月

初五等日謁祭

三陵大禮告成宜敷愷澤其將奉天所屬府州

縣乾隆十九年地丁正項錢糧通行蠲復經

過地方前旨所免十分之三及被水地畝應

蠲錢糧仍於明年應徵額內補行豁除自山

海關以外及寧古塔等處官吏軍民人等除

十惡死罪外其餘已結未結一應死罪俱著

減等發落軍流以下悉予寬免凡我留都士

庶尚其敬念根本重地益務敦龐毋忘先民

矩矱共享昇平之福永承樂利之休用稱朕

嘉惠優卹至意○又諭曰朕奉

皇太后鑾輿再詣盛京恭詣

祖陵所有直隸奉天及吉林等處辦差文武官

員俱著加恩各加一級其現有降級之案者

准以所加之級抵銷○又諭曰朕奉

皇太后鑾輿由吉林前詣盛京恭謁

祖陵所至地方多有年逾耄耋策杖歡迎者宜

沛恩膏以彰盛典其奉天吉林所屬旗民男

婦自年七十以上。悉照從前恩詔之例。分別賞賚。用示朕引年優老至意。○又諭曰。朝鮮國王李昉。敬遣陪臣。前詣盛京。接駕齋表貢獻。誠悃可嘉。著照乾隆八年之例。加恩賞賚。所遣陪臣。一併照例加賞。○又諭曰。宗室高年。因濫責民人革職。但現在宗室內。不但武藝無出色之人。即勤學弓馬者亦少。嵩年弓馬尚屬可觀。著加恩仍留其奉恩將軍。此係朕格外曲成。宗室內若騎射生疎。不得希冀如此寬典也。○又諭此次盛京禮部豫備一切祭器。俱甚潦草。且多錯誤。朕親詣尚且如此。尋常祭祀。尚可問乎。

陵寢事宜。所關甚重。世臣係專司大員。且係滿洲世僕。並不竭盡誠敬。草率辦理。殊失滿洲臣僕敬事之意。非尋常過失可比。世臣著革職。發往黑龍江。○諭軍機大臣等。方觀承奏永定河漫口合龍壩臺復行汕塌一摺。據稱所塌三丈。下埽即可堵閉。又云來年凌汛。匯

注。攔河埽壩堪虞。似應稍緩堵塞等語。引河果得暢流。何至積水漫注。壩臺果能堅築。何至復行汕塌。看來該督此番辦理。不免自為遷就。永定河原可無庸多設隄壩。但今既有隄壩。其漫口自不得不堅為堵禦。倘以來年凌汛堪虞為言。則黃河大於永定。去年之張家馬路決口。何以即時堵築。而今歲之凌汛。並無妨礙也。且春汛伏汛。繼至。何時始可施工。若該督以漫口實在不能堵築。意欲聽其自然。又何妨明白言之。乃為此隱躍之詞。欲待面為陳奏。耶。所奏甚不明晰。著傳諭方觀承。將該處應如何辦理。實在情形。即行詳悉覆奏。尋奏引河係就舊有河形挑挖。其寬不及正河四分之一。遇大汛水。可期汕刷加寬。今勢弱流緩。束水易高。以致正河之水。注積壩根。其壩貼近引河。攔築河中。水穿埽根。不及填土閉塞。若此時將壩口堵築。明春凌汛時。全河匯注。引河難容。恐仍溢注。擬俟凌汛

過後河水漸至斷流於攔河壩後堅築寬厚土隄再將引河挑挖寬深大汛一至全勢歸入引河汕刷益寬復循舊軌得旨總之此次所辦實屬遲緩不力○調盛京戶部侍郎下塔海為盛京禮部侍郎以盛京副都統勒克兼理盛京戶部侍郎事務○己丑

上詣

清寧宮祭

神○侍

皇太后膳○諭曰朕奉

皇太后鑒興再詣盛京恭謁

祖陵禮成奉天所屬府州縣乾隆十九年地丁

正項錢糧已降旨通行蠲復所有各莊頭及

旗地應納糧石草束等項自應一體加恩以

普愷澤著將盛京戶部各莊頭本年應交倉

糧一萬餘石概行蠲免盛京興京遼陽牛莊

蓋州熊岳復州金州岫巖鳳凰城開原錦州

寧遠廣寧義州等十五處旗地本年應納米

豆草束免徵一半其各壯丁應完本年丁米

亦著免其輸納俾旗民均霑嘉惠用昭慶典

○又諭今年秋審情實人犯著停止勾決○

命兵部侍郎于敏中知武舉戶部侍郎嵇璜

為武會試正考官工部侍郎董邦達為副考

官○予在洋遭風淹沒之福建海壇鎮標千

總陳益贈卹如例并蔭子弟一人○豁免長

蘆永利富國二場潮衝竈地二十八頃有奇

額賦浙江仁和富陽二縣潮衝田地七十四

頃有奇額賦○雲南巡撫愛必達疏報祿勸

馬龍嵩明永平廣西甯益元江鎮沅文山會

澤新興等十一府州縣十八年分開墾荒地

二十七頃有奇○庚寅

上奉

皇太后御迪光殿侍早膳○諭盛京為我朝龍

興重地自定鼎以來設立五部侍郎及奉天

尹丞等官分理庶政教養旗民責任綦重且

距京師僅千有餘里方今天下一家即在漢

人中猶不應稍存擇地之見。況滿洲世僕。豈可遂忘根本。世臣本屬庸材。粗通腐文。徒以資深擢用。至盛京禮部侍郎。乃其詩稿中。至有霜侵髻。朽歎途窮之句。幾自擬於蘇軾之謫黃州。自思以彼其品其學。與蘇軾執鞭將唾而簪之。且卿貳崇階。有何途窮之歎。又云秋色招人。懶上朝。寅清重職。自應夙夜靖共。乃以疎懶鳴高。其何以為度。寮表率。又云半輪秋月西沈夜。應照長安爾我家。獨不思盛京固我豐沛舊鄉耶。世臣居心不可問如此。則昨之革職發遣。尚屬輕典。夫縱情詩酒。最為居官惡習。以滿員而官盛京。尚抑鬱無聊。形諸吟咏。則從前漢人之以出關為畏途。又不足怪矣。此地風俗素淳。甚恐為此輩所壞。嗣後盛京各官。當深以此為戒。其有不思敬供厥職。妄以詩酒陶情。廢乃公事者。朕必重治其罪。可將此旨各書一通。懸之公署。令觸目警心。永垂炯鑒。○辛卯。

上詣

文廟行禮。○諭據哈密貝子玉素布奏稱。除伊旗派出兵丁一百名外。再行添派一百名。即親身率領。在軍營効力等語。著照所請。再添派兵一百名。令玉素布帶領。其一切應得之項。著永常照例給與。玉素布著賞銀三百兩。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十二

大清高宗法天隆運至誠先覺體元立極敷文奮武孝慈神聖純皇帝實錄卷之四百七十三

監修總裁官經筵講官太子太傅文淵閣大學士吏部尚書領侍衛內大臣高宗純皇帝 上諭事件處管理

吏部理藩院事務正黃旗滿洲都統世宗憲御前大臣七級恩加一級尋常加二級軍功紀錄一次臣等謹

經筵官經筵講官太子太傅文華殿大學士文淵閣領侍衛內大臣高宗純皇帝 上諭事件處管理刑部戶部工部事務

世宗憲御前大臣七級恩加一級尋常加二級軍功紀錄一次臣等謹

尋常紀錄十四次臣等謹經筵講官太子少保工部尚書紀錄六次臣等謹

纂修

乾隆十九年甲戌九月壬辰

上詣

皇太后宮問安○諭曰阿睦爾撒納之盟著賜號輝特額爾德尼諾顏部落班珠爾之盟著賜號和碩特清伊扎固爾圖部落訥默庫乃杜爾伯特台吉與車凌等同一部落著亦賜號賽音濟雅哈圖部落○癸巳

上御大政殿盛京宗室覺羅將軍官員等恭進御膳○諭兵部奏沿途倒斃馬駝進京後請照例著落賠補等語此次官兵騎用駝馬沿途

屢經換給而倒斃仍復如此之多此皆不知愛惜所致理應著落賠補但念路途較遠日期亦多前此倒斃者俱著加恩免其賠補嗣後如仍不加意餵養復致倒斃必令照例賠補○甲午

上自盛京奉

皇太后啟鑾回京師○詣

皇太后行幄問安○諭曰朕由吉林至盛京周覽山川形勝敬稽

實錄所載仰見

列祖締造艱難維時宗室諸王克奮忠勤功成百戰開國翊運之勲彪炳簡冊深切景念思盛京為龍興重地國初諸王功烈懋著如此並宜建祠以酬舊勲而示來許此地現有怡賢親王祠應將

太廟配享之通達郡王武功郡王慧哲郡王宣獻郡王及禮烈親王饒餘敏親王鄭簡親王穎毅親王一併崇祀即命曰賢王祠令所司

春秋致祭應行典禮該部詳議以開祠內碑亭可移於正中鐫勒此旨永昭我朝宗功元祀之鉅典尋議盛京怡賢親王祠正室五間請於室內分設三龕每龕安奉三位中龕中奉通達郡王左武功郡王右慧哲郡王左龕中奉宣獻郡王左禮烈親王右饒餘敏親王右龕中奉鄭簡親王左穎毅親王右怡賢親王每龕各設一案每案用羊一豕一果實五盤尊一鑪一鐙二每位爵三素帛一

欽定祠名

上諭碑文及神牌清漢字樣交內閣翰林院繕寫送盛京工部製造鐫刻移建碑亭及祠內所供龕案尊爵鑪鐙帳幔並交敬謹辦理每歲春秋二季令奉天府府尹承祭讀祝贊禮用盛京禮部人員神牌入祠日先期開列盛京五部侍郎職名奏請遣員讀文致祭從之○又諭曰鄂寶身為府尹修理御路草率尚可寬恕隨圍人等屢經降旨不許地方官稍

有餽送今知縣富昌復為嚮導人員豫備飯食馬匹此雖由嚮導處索取亦伊等有意逢迎鄂寶著交部嚴察議奏嚮導人等擅受地方供應物件嚮導大臣著一併交總理行營大臣察議具奏○調鑲藍旗蒙古副都統舍圖肯為白都訥副都統熊岳副都統雅圖為鑲藍旗蒙古副都統以副都統銜哲庫訥為熊岳副都統○以陝西按察使武忱為陝西布政使山東鹽運使吳士功為陝西按察使

○是日駐蹕舊邊東大營○乙未

上詣

皇太后行幄問安○諭軍機大臣等據恒文奏稱現在運送推河米糧一萬石已分起運送續運米石尚多請交納木扎勒等發給商人執照不准沿途將運米駝隻拏當差使等語運米一事所關甚鉅必使商人駝隻往返無阻始於轉運有益朕昨因軍興事繁驛站牲畜不敷特命添設何以仍拏運送官米駝隻

此或蒙古等惜其牲畜。而以運米駝隻代為當差。抑或商人憚於運送。託故規避。均未可定。可寄信兆惠查明。如有拏運米駝隻者。即指名參奏治罪。倘商人憚於運送。託故規避。亦當懲辦。嗣後運米駝隻。應如何辦給執照。使商人不至託故規避之處。即交兆惠妥辦。○是日駐蹕郭家屯大營。翌日如之。○丙申。賜扈從王公大臣盛京將軍官員等食。○丁酉。

上詣

皇太后行幄問安。○諭軍機大臣等。給事中色欽等。參奏戶部赴領單簿逾限。及御史九成等。參奏戶部戶科推諉遲延各情節。朕命軍機大臣秉公覈議。看來部科彼此執持。祇為磨對相符數字起見。甚屬無謂。部科均有查覈之責。若有差錯。必不以科臣已經聲覆相符。遂置該部於不問。且使果有不符。即當參奏。既無可參奏。即屬相符。字樣有無。何所關

繫。乃部臣必欲此二字為據。而該科又堅持不與。為此無益之煩擾。致延時日。徒使胥吏得以舞弊耳。色欽等以會典不載為詞。則會典固不能字字詳備。而向來題覆關稅紅本文移。立可取證。海望阿里衮嵇璜俱承辦堂官。即當一面辦理。一面聲明情節。何得一任司員往返遲延。不速行考覈。著在京總理王大臣傳齊詢問。倘其中另有別情。王大臣即行具奏。若不過如此。即照軍機大臣等所議。分別交部察議。○又諭據班第等奏。稱拏獲準噶爾烏梁海遣來二人。詢問伊等住處。命薩喇勒努三掩其不備。分路進攻。並詢問齊木庫爾所屬之烏勒木濟瑪木特現住奇蘭地方。已朗現住哈喇額爾齊斯地方。辦理烏梁海之便。應乘勢擒拏瑪木特。已朗。已令薩喇勒努三等疾速進兵等語。烏梁海於今春驅逐之時。詭稱來降。乃復搶擄阿睦爾撒納游牧。情殊可惡。班第命薩喇勒等掩其不備。

攻擄甚合機宜。巴朗瑪木特游牧地方俱不甚遠。於辦理烏梁海之便。如能拏獲。甚屬妥協。朕佇待捷音。再班第等奉朕今年暫停進兵諭旨。以冒昧進兵請罪。前因策楞舒赫德坐失事機。欲以七千人大隊並進。是以令其暫停進兵。今乘時進攻烏梁海。瑪木特巴朗所居地方俱相接連。可以一鼓成事。不必拘朕前旨。此旨到時。伊等諒亦成功。可仍令薩喇勒前赴熱河。著並寄班第知之。○是日駐蹕小白旗堡大營。○戊戌諭軍機大臣等。據納木扎勒奏稱。遵旨曉諭車凌等。令其遣派駝隻赴歸化城支領米石。但伊等上好駝隻俱已撥給兵丁。其餘恐不敷用。所有運米之事。俟與班第另議等語。前朕降旨令車凌等各派駝隻赴歸化城解運米石。原因伊等生計未裕。是以加恩接濟。今車凌等將上好駝隻俱撥給兵丁。實屬誠心為公。其餘駝隻不必撥遣。其屬下應行接濟口糧。著於前運阿

睦爾撒納等口糧米一萬石內支給。將此寄與班第舒赫德納木扎勒唐喀祿等知之。○是日駐蹕羅家屯大營。○己亥。

上詣

皇太后行幄問安。○諭軍機大臣等。前將新降厄魯特兵一千名。派往西路。已降旨令於原派綠旗兵一萬名內裁減三千。此外著添派健銳營滿洲兵一千名。命往西路。再將綠旗兵裁減一千。其所派官弁毋庸裁減。照舊遣

往以備調遣。○又諭前曾降旨。命永常於十一月初九日以前到京。今西路現無應辦事件。可寄信永常著即行起程來京。面聆諭旨。○兵部以武會試中額請得旨。這考試漢軍取中三名。直隸取中十二名。陝西取中九名。廣東取中四名。河南取中四名。山東取中四名。江南取中二名。山西取中四名。湖北取中二名。湖南取中二名。四川取中二名。廣西取中一名。福建取中四名。浙江取中四名。江西

取中二名。雲南取中一名。貴州取中一名。○調四川建昌鎮總兵董芳為松潘鎮總兵。以湖北施南協副將胡世榮為四川建昌鎮總兵。○以福州將軍標中軍副將王瑞為廣東左翼總兵。○減除直隸武清寶坻寧河天津等四縣額賦銀九千四百一十兩有奇。○是日。駐蹕廣寧城西大營。○庚子。

上詣

北鎮廟行禮。遣官祭

遼太祖陵。○諭曰。白鍾山奏河南管河道張奎祥庇屬徇私一摺。道廳通同舞弊。一氣聯結。最為河工惡習。張奎祥身為河道。有總覈工程稽查廳汎之責。乃種種庇屬徇私。玩誤公務。僅予罷斥。不足蔽辜。著革職。仍留河東差委効力。張廣基姜昱俱著革職。張廣基覈減銀兩。勒限著追。如不能全完。即於張奎祥名下照追賠繳。以為徇庇玩公者戒。○吏部議准。湖廣總督開泰等疏稱。湖北黃州等

府屬裁汰驛丞。添設巡檢。所有黃岡縣屬之李坪陽邏二驛。就近裁歸團風鎮陽邏鎮各巡檢兼理。應頒兼管字樣印信。鄖縣之江峪塘鄖西縣之上津堡穀城縣之馬腦觀。添設巡檢三員。應給印信。再添設巡檢三員。應給養廉銀一百八十兩。俸銀九十四兩五錢六分。額設阜隸六名。應共給銀三十六兩。弓兵一十八名。應共給銀一百八兩。奉裁五驛驛丞衙署。仍有差使往來住宿。其馬棚等項。亦需照舊應用。應請存留。聽兼管各員經理。從之。○工部議准。調任甘肅巡撫鄂樂舜疏稱。隴西縣縣丞改調平羅縣。移駐已裁之寶豐縣城內。應建衙署從之。○旌表守正捐軀之河南洛陽縣民許玉有妻胡氏。○是日。駐蹕五臺子大營。○辛丑。

上詣

皇太后行幄問安。○諭曰。班第著授為定邊左副將軍。鄂容安著授為叅贊大臣。協同班第

辦事○諭軍機大臣等。龍溪縣民周贊。誣首謝仲忽一案。已經該督喀爾吉善奏明。審係挾嫌誣首。將該犯杖斃示衆矣。富海因係伊鎮屬地方之事。繕摺奏聞。只應據實直陳。何必用其腐文。稱風俗刁悍。人心叵測。初覽之似又生一事。不知即是奏聞已結之謝仲忽也。富海既不通文。何必用庸腐字識之文耶。富海著傳旨申飭。○又諭。知府為司牧長。所以表率屬縣。開泰所奏呂肅高係朕所知之人。乃河南人。呂曾高之弟。本一謹慎庸材。前因不勝長沙之任。調任常德。仍復闕冗無能。不知奮勉。豈可仍事姑息。貽誤地方。著傳諭開泰。或應行叅劾。或應勒令休致。著即據實奏聞。毋得苟且姑容。○是日駐蹕雙楊店東大營。○壬寅。

上詣

皇太后行幄問安。○策試天下武舉顧麟等五十九人於太和殿前。○諭軍機大臣等。班第

等奏稱。拏獲烏梁海之宰桑車根等。及收服伊等屬下人。所獲牲畜數萬等語。可寄信於班第。令其詢問班珠爾。阿睦爾撒納等。所獲人內。有伊等屬下。及牲畜物件。俱令給還。其餘酌量賞與効力人等。駝隻馬匹。進兵需用。最為緊要。著用心牧養。以備來歲之用。至所獲臨時未曾抗拒之宰桑等。應向內移徙。或於軍營。或於車凌之游牧安置。惟期辦理妥協。抗拒之宰桑得木齊等。著即行正法。其餘屬下人等。著班第明白曉諭。仍令本處安置。其如何照管伊等之處。酌量辦理。今乘此機會。迅速往擒巴朗。瑪木特。如能拏獲。於明年大兵進發。大有裨益。從前朕以班第雖屬曉事。未必即能勇往辦理。今遵朕指示。諸事妥協。甚屬可嘉。班第已授為將軍。著將此次出力之王公台吉大臣官員兵丁等。查明具奏。交部議敘。新降之厄魯特等。甫經投誠。即如此効力。所有應赴熱河之班珠爾。扎木叅等。

俟事竣。即與薩喇勒一同前來。到時另行施恩。再喀爾喀等俱知改前非。鼓舞奮勉。貝勒青滾雜卜。公車布登扎布。恭格敦丹等。成功後。亦即與班珠爾。扎木叅。一同馳驛前赴熱河。再加恩賚。○是日。駐蹕高橋大營。○癸卯。孝慈高皇后忌辰。遣官祭

福陵。○

上詣

皇太后行幄問安。○諭。據班第等將應派領隊隨營等差之喀爾喀王。公。台吉等。繕名請旨。王。巴雅爾什第。貝子。車布登。車木楚克扎布。公。恭格敦丹。車登薩木丕勒。密錫克。巴圖孟克。達爾扎。齊旺多爾濟等。著在領隊上行走。王。齊巴克雅喇木丕勒。貝勒。旺沁扎布。貝子。沙克都爾扎布。公車布登扎布。多爾濟。車登。台吉。遜都布等。著隨營聽候調遣。兩路隨營聽候差遣之台吉。章京二十人。著照班第所請。派往。再車凌烏巴什。訥默庫。車凌孟克等。

遣往西路在叅贊大臣上行走。瑪什巴圖。巴圖孟克。亦遣往西路軍營行走。其屬下應派之台吉等。俟到熱河入覲後。再酌量派往。○諭軍機大臣等。已降旨。將此次所獲烏梁海之宰桑得木齊等。向內移徙。或於軍營。或於車凌等游牧安置。其餘仍令在本處居住。此亦因伊等屬下人數衆多。難以盡行內徙。但將宰桑得木齊內徙。其屬下人若無一人管轄。亦屬未便。著詢問宰桑等。令舉其可以約束衆人者。留於原游牧管轄。著薩喇勒。貝勒。青滾雜卜。總統伊等。不必在彼居住。遇有大事。知會辦理。可寄信班第。遵旨妥辦。並曉諭烏梁海宰桑等知之。○兵部等部議覆。湖廣總督開泰等疏稱。荊州滿營需用藥鉛。向係省局製造。嗣因造不合式。改歸荊州城守營配製。看守需人。請將看守省城四門之屯丁。抽撥四名。即令武左衛將每年原支屯糧解司移營雇募巡防。應如所請。從之。○是日。駐

蹕首山南大營○甲辰

上詣

皇太后行幄問安○諭曰。木和林等所奏漢軍開戶家奴王丙。投遞密封一事。王丙以開戶家奴。乃敢逞其妄見。以必不可行之事。肆意瀆陳。似此不安分之人。即應嚴拏治罪。木和林等。僅將該犯看守請旨。所辦非是。著傳旨申飭。王丙著於旨到日。鎖拏發往黑龍江。給披甲人為奴。以為妄誕多事者戒○諭軍機大臣等。據班第等奏。此次所獲烏梁海內。係阿睦爾撒納屬下。俱行給還。抗拒者正法。擒獲者賞給有功人為奴。歸順者安置。特等處居住。同舊烏梁海一體當差。所得馬匹。換給往擒瑪木特兵丁。其餘馬匹牲畜。賞給新厄魯特。以資養贍等語。班第將所獲烏梁海等馬匹。換給往擒瑪木特兵丁。向前進發。甚合機宜。至歸順之烏梁海。若皆留本處安置。恐有未便。可寄信班第。照朕前旨。令宰桑得

木齊內徙。其屬下人等。命伊等舉可以約束衆人者。留本處管束。否則安置卡座近處。亦可。但使其不至逃避而已。餘著照班第所請行○是日。駐蹕曲尺河堡大營○乙巳。

孝敬憲皇后忌辰。遣官祭

泰陵○刑部彙題議結流徒各案。得旨。旗人犯杖流等罪。例應枷責發落。在公罪及過誤。自可照例完結。至關人命。即當覈其輕重。七克登布。以酒醉細故。遂兇毆服孫九格致死。殊屬慘忍。著發往拉林阿勒楚喀。嗣後似此案。件該部照律定擬外。仍酌量情罪。請旨定奪。不必概入彙題○賞出兵之喀爾喀親王成衮扎布。額琳沁多爾濟。銀各八百兩。郡王齊巴克雅喇木丕勒。五百兩。貝勒旺沁扎布。二百五十兩。貝子車布登。車木楚克扎布。沙克都爾扎布。各二百兩。公車布登扎布。恭格敦丹。車登薩木丕勒。密錫克多爾濟。車登格勒克巴木丕勒。額琳沁。各一百五十兩。扎薩克

台吉遜都布一百兩。殿後之王巴雅爾什第
二百五十兩。公巴圖孟克達爾扎齊旺多爾
濟各七十兩。○是日駐蹕葉家屯大營。○是
月閩浙總督喀爾吉善等奏福州駐防漢軍
現令出旗為民。並將旗員改調。其出旗願補
綠營之兵。必俟綠營缺出。始可頂補。即旗員
亦必須漢軍陸續出旗後。始可更替。是滿洲
官兵不能一時即來。漢軍官兵應循次妥辦。
請將奏准先令出旗之漢軍甲兵一千名內

年老衰弱者。與閒散人等。概令出旗為民。其
強壯技嫻者。撥綠營食糧充伍。俟分別辦竣
再奏。請派撥在京滿洲官兵。分起來閩補額。
此一千名辦畢。其餘漢軍一體辦理。得旨是
但期其妥。不在欲速也。○又奏福州駐防漢
軍放出為民。所有漢軍自行扣存馬價。應照
事故開除之例。給予領回。此項銀現寄存藩
庫。仰懇准給得旨。甚是。○湖廣總督開泰奏
湖北各標營原領惠濟本銀三萬兩。除節次

歸還外。尚欠二萬一百有奇。現籌歸本。查湖
北鼓鑄設鑪二十座。原係每月二卯。前以修
理城工。奏准加鑄。以餘息完借項修城之費。
今營運本銀趕緊歸結。因思鑄局中每月正
卯加卯之外。尚可再加二卯。以加鑄餘息。歸
完全數。完後尚有餘息。再撥辦城工。得旨。如
所議行。○署山東巡撫郭一裕奏。東省撥解
營馬赴涼州軍營。須加料餵養。解馬各兵。於
十月起程。站遠天寒。須製皮衣。請於司庫曠
建銀內。先行借給。統以兩年在各該營餉乾
銀內扣還。得旨。如所議行。○甘肅巡撫鄂昌
奏。臣查辦軍需。自省城至涼州。今暫回蘭州
料理諸務。仍赴各屬督辦。得旨。有旨。令汝往
安西。為夷使。或有來信。須督理得宜也。即偶
有鼠竊之事。亦當鎮靜萬全。毋致驚張失措。
○兩廣總督楊應琚奏。廣西義寧協設左右
兩營。分駐龍勝廣南等處。歲需兵米。食用本
裕。而營兵中有眷屬者。仍須於本身月米外。

糴買接濟。該處係新闢苗疆。山多田少。兼乏商販。無從糴買。自應官為經理。請嗣後每年於秋收後。在龍勝通判衙門領貯該營秋冬二季月餉銀內。借銀五百兩。令兩營都司委員往鄰境買米存貯。來歲按月支放。仍於該兵月餉內。按月扣清歸款。得旨。覽奏俱悉。貴州巡撫定長奏。乾隆十年奏准。動項開通畢節縣之赤水河。直達川省重慶。以便鉛運。嗣因河道險阻。仍多由陸運。又將威寧水城應運鉛。俱運交畢節縣合辦。更屬周章。應請將水運鉛。改由白沙以下之魚塘為口岸。運至新龍灘起剥陸運。至二郎灘下船。直達川省。其畢節應辦之水運鉛。仍令就近辦運。威寧州及水城廳應運之鉛。照向例各由陸路分運永寧水次。就便省費。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十三

大清高宗法天隆運至誠先覺體元立極敷文

奮武孝慈神聖純皇帝實錄卷之四百七十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌冬十月丙午朔享

太廟遣履親王允禔恭代行禮○遣官祭

永陵○

福陵○

昭陵○

昭西陵○

孝陵○

孝東陵○

景陵○

泰陵○遣官祭

孝賢皇后陵○

端慧皇太子園寢○頒乾隆二十年時憲書○

上詣

皇太后行幄問安○順天府行鄉飲酒禮○

定邊左副將軍班第等奏九月初叅贊公車

布登扎布等自科布多河見有烏梁海蹤跡

分兵前進擒宰桑車根等及屬人三十餘口

叅贊烏勒登亦帶兵於索郭克地方接應叅

贊薩喇勒計擒四五十人獲馬牛羊甚夥又

叅贊努三等帶兵至赤倫所居吹地方捕獲

宰桑赤倫及所屬四得木齊家口又將雅爾

都所屬一得沁家口擒獲詢問瑪木特蹤跡

據稱八月間往額爾齊斯等語臣等現將所

獲烏梁海等解送內地投順者留其妻子給

牲畜居住所獲子女牲畜俱送入卡內其阿

睦爾撒納屬下被擄子女令奪回者即給與

報聞○是日駐蹕大石橋大營○丁未賜扈

從王公大臣盛京將軍並直隸總督等食。○戶部議准。江西巡撫范時綬疏稱。江省腹裏原額地內。有九江衛原報草坦泥灘地二項。變為草地。增課銀八兩二錢零。又彭澤縣原額地一項三十一畝。因坍塌過多。丈改濱江地內造報。其濱江地內。丈冊地六十三項六十二畝。減課銀一百二十五兩零。丈出新淤地一百二十一項七十四畝。增課銀九十九兩零。從之。○以甘肅中衛縣渠寧驛驛丞兼巡檢銜。管新舊寧安二堡事。從巡撫鄂昌請也。○緩徵福建臺灣鳳山二縣。乾隆十八年旱災額賦。○是日駐蹕文殊庵大營。○戊申上詣

皇太后行幄問安。○是日駐蹕于官屯大營。○己酉。諭宛平昌平三州縣及熱河一廳。乾隆十六年分被雹地畝。所有應徵未完銀七百餘兩。著加恩蠲免。該部即遵諭行。○諭軍機大臣等。雙慶等奏。北新倉前任監督德昌

實錄卷四十七

實錄卷四十七

等堆貯豆石一摺。此項豆石。據稱德昌等於停止貯豆後。從空出各廩之廩板上下。掃併堆積。既非正額。又不在盈餘數內。則是從前未有成例。其未經呈報。過失猶小。且貯倉交代。亦非有心侵蝕者比。今以不行報出。奏請交部。尚可謂為防杜弊端起見。乃稱變價不足。責令賠補。不知意令賠補何項。雙慶彭樹葵辦理如此。所見謂何。著傳諭詢問。令其覆奏。○吏部疏請河工効力人員。告假回籍。令該督先行咨部。部覆到日。方准回籍。從之。○以湖北按察使明德為四川布政使。雲南迤西道梁肅鴻為湖北按察使。○是日駐蹕永平府南大營。○庚戌上詣

皇太后行幄問安。○兵部議覆。兩廣總督楊應琚奏。各省召募兵丁。及拔補千把外委時。請照營童入籍考試例。查明入籍二十年。無籍可歸者。即在該地方就近取結。其未及二十

年者仍取原籍結方准投充等語應如所奏至兵丁拔補外委既取結送部其續拔千把時毋庸重造從之○是日駐蹕安格莊大營

○辛亥吏部等部議覆陝西巡撫陳宏謀奏稱州縣自理詞訟上司無案可查多致延擱請通行各省巡道每到州縣地方即將訟案號簿提查如有未完勒催有關積賊刁棍衙蠹等弊立即究治仍將未完幾件開單移司再有延宕詳參議處其知府直隸州未結詞

聖訓卷四十七四

五

訟照此辦理等語應如所請至巡道既有督辦之責倘瞻徇怠玩該督撫據實參處從之○吏部議覆江蘇巡撫莊有恭奏稱月選八品以下雜職文憑向交驛遞請照在外陞任司道以下及月選教職等官之例由部封固交提塘官遞送各省轉給應如所請從之○予故績順公署散秩大臣沈鐸祭一次○以故雲南永昌府隴川宣撫司多益善子有功襲職○旌表守正捐軀之江西建昌縣民劉

尚英妻程氏○是日駐蹕灤河堡大營○壬子

上詣

皇太后行幄問安○諭軍機大臣等碩色參劾宋愛邀譽沽名廢弛馬政各情由本應交部革職來京候旨但據定長同日奏到宋愛已經病故其該督所參各款無庸追究定長現署提督著將碩色原摺鈔寄定長閱看凡營伍馬匹宋愛從前辦理不善之處即隨時改

聖訓卷四十七四

六

正并傳諭碩色知之○以四川松潘鎮總兵董芳為貴州提督調河南南陽鎮總兵董孟為松潘鎮總兵以廣東南雄協副將魏文舉為南陽鎮總兵○是日駐蹕梁家店大營○癸丑諭軍機大臣等碩色參劾宋愛一摺已令鈔寄定長閱看矣除吳三傑病故宋愛於各營斂派奠分一款無庸議外其廢弛馬政沽譽邀名各情節碩色遠在滇南尚能留心查訪定長同在一省其見聞當更親切豈轉

一無覺察。該撫節制通省營伍。尤當加意體訪。何以並未奏及。或碩色訪查。有不盡確實之處。著傳諭該撫。令其據實覆奏。○又諭據納木扎勒奏。現在杜爾伯特之賽音濟雅哈圖部落。又增訥默庫等台吉十人。若仍為一部落。人數過多。請將車凌烏巴什訥默庫等另設部落。補放盟長等語。此奏雖見伊留心區畫。但訥默庫等皆係杜爾伯特台吉。與車凌等同姓。故前降旨將伊等亦歸入賽音濟雅哈圖部落。今思伊等同姓。固不宜另立部落。如同在一盟。令訥默庫色布騰二人專管。亦未合宜。且人口旗分衆多。更難統轄。莫若將伊等分為兩翼。以車凌烏巴什為盟長。訥默庫為副盟長。管理事務。尚屬可行。俟伊等至避暑山莊時。朕酌量情形。再降諭旨。彼時或將車凌孟克授為協理盟長。亦可。將此寄信納木扎勒知之。○撫卹山東惠民。陽信海豐商河濱州利津霑化蒲臺博興高苑樂安

平度昌邑膠州高密即墨等十六州縣衛。永利富國。永阜等三場。及海豐縣民佃竈地。本年水災飢民。並予緩徵。○予故奉恩輔國公成保祭葬如例。謚溫禧。○以故四川大定沙壩土千總蘇天福子文儀襲職。○是日駐蹕梯子山南大營。○甲寅

上詣

皇太后行宮問安。○諭軍機大臣等。北路聲援兵五千名。前已降旨。派令喀爾喀王扎薩克等管理。但大兵進發後。亦不可無統轄之人。著派成衮扎布塔勒瑪善策楞總理。將此寄班第等知之。○廣西巡撫李錫秦因病解任。調安徽巡撫衛哲治為廣西巡撫。浙江巡撫鄂樂舜為安徽巡撫。以浙江布政使周人驥為浙江巡撫。調河南布政使葉存仁為浙江布政使。以山東按察使阿爾泰為河南布政使。湖北荆宜施道盧憲觀為山東按察使。○是日駐蹕白澗行宮。○乙卯。諭旗員外補綠

營蓋以八旗管兵。素為嚴肅。而旗員嫻熟騎射。則訓練整飭。自足以表率士卒。乃近來外任武職旗員。來京引見者。弓馬率多平常。竟與綠營官弁舉動相似。即奏對履歷。清語亦覺生疎。是不獨不能振刷戎行。而轉濡染其陋習。此豈簡用之本意。嗣後務當各加奮勉。留心學習。倘仍耽於安逸。一膺外任。遂置弓馬於不問。以致平時技藝漸就荒廢。該督撫提鎮等。即行據實叅奏。兵部堂官。有本兵之責。於堂考時。亦當慎加甄別。不宜但如堂考綠營官弁。視為奉行故事而已。總之旗人騎射是其本務。不得與綠營比。况膺將領之寄。將為標營準則者乎。可將此旨通行傳諭。凡外任武職旗員。令其各錄一通。懸之公署。其部推新任者。即由兵部謄錄。俾領赴任。晨夕觀瞻。知所警戒。○諭軍機大臣等。副都統德爾素奏稱。王旺丹多爾濟帕拉木等呈請於官買馬駝內。進馬一千六百五十匹。駝五百

七十隻等語。伊等感戴朕恩。呈請各進馬駝。甚屬可嘉。伊等誠心。朕已洞鑒。向例內扎薩克等。採買馬駝。皆賞還價值。此次所進馬駝。亦仍照例給與。著將此旨交德爾素曉諭各扎薩克等知之。○又諭。現在薩喇勒辦理烏梁海事竣。且不必前赴避暑山莊。回至伊游牧處。休息數日。約計十一月初間到京。俟朕見伊詢問彼處情形。再令隨朕至避暑山莊。著齊木庫爾前赴鄂爾坤塔密爾。駐劄。照料伊等游牧。其班珠爾。扎木叅德濟特。普爾普。仍遵前旨。馳驛至避暑山莊。諒此際薩喇勒業經啟程。將此迎寄薩喇勒。並寄班第知之。○以山東布政使圖勒炳阿。河南布政使阿爾泰。對調。○賑卹安徽壽州。鳳陽。臨淮懷遠。鳳臺霍邱。泗州。盱眙。天長。五河。滁州。全椒。來安。和州。含山。等十五州縣。長淮。鳳陽。泗州。滁州。等四衛。本年水災飢民。並停應徵新舊額賦。及節年民欠籽糧。其本年應徵并舊欠漕

項銀米。除向無應徵漕米之全椒來安和州含山。滁州并衛外。概予緩徵。○撫卹山西馬邑縣本年電災飢民。緩徵太原清源徐溝太谷壽陽等縣水災額賦。○建浙江象山縣趙畧巡檢衙署。從巡撫周人驥請也。○廣東巡撫鶴年疏報乾隆十八年。廣惠潮羅四府州屬。共墾額外荒蕪稅十八頃二十七畝有奇。番禺連平等州縣。墾稅十七頃九十八畝有奇。又潮屬海陽揭陽二縣。歸併衛所。墾復屯田荒蕪稅十九畝有奇。○是日。駐蹕煙郊行宮。○丙辰。

上奉

皇太后還壽康宮。○詣

壽皇殿。

大高殿行禮。○詣

皇太后宮問安。○還宮。○丁巳。

上詣

皇太后宮問安。○御紫光閣。閱中式武舉騎射

技勇。○諭軍機大臣等。據蔣炳奏。河南汝州

盤獲馬朝柱案內要犯李正南一名。該犯始由漢中府南鄭營房盤住。捏名徐玉飛。在湖南湘鄉縣居住。及遞回湘鄉原籍。又無住址親屬。仍解回南鄭。路過汝州。該知州王如玖悉心窮詰。始據供吐確實姓名。實係逆案要犯。訊以馬朝柱下落。歷供不諱。等因。一摺。李正南一犯。既在南鄭地方盤住。即應窮究其實在來歷。乃該知縣僅據該犯混供。不過遞解回籍。及解回湘鄉之後。該縣若能實心體察。又何難得其實情。乃亦僅備關遞送。若非該州盤訊的確。則要案重犯。不幾覲面失之耶。可見外省州縣。於通緝要犯。總不能實力上緊嚴查。即遇行蹤詭秘之人。不過關移遞送。希脫干係。要犯之歷久不獲。皆此輩昏庸避事。有以致之。與故縱何異。著傳諭陝西湖南巡撫。令將南鄭湘鄉兩縣知縣。查其平日居官若何。若向日尚能辦事。當嚴加申飭。記

大過一次。以儆將來。如不過循分供職之員。即應指名題叅。毋得稍為姑息。其王如玖看來尚屬實心任事之員。交軍機處記名。以知府用。○又諭據蔣炳奏。河南汝州盤獲馬朝柱。案內要犯李正南一摺。該犯詭名徐玉飛。由陝西南鄭縣盤獲。據供遞解湖南湘鄉縣。查無住址親屬。復解回南鄭。路過汝州。經該知州王如玖研訊。始據供出真實姓名。并附逆情事。是李正南一犯。南鄭湘鄉兩地俱任其詭名混供。僅以往返移解了事。此皆外省因循推諉惡習。其河南汝州。乃押解經過之地。若非該州留心查訊。究出實情。竟將覲面失之。終成漏網矣。看來馬朝柱雖經免脫。究在六合之內。何至竟無弋獲。總由各省地方官。不過循名躐緝。即遇正犯到案。並未實心根究。率南鄭湘鄉者流。要犯之歷久未獲。皆此等昏庸避事之州縣。有以致之。可傳諭各督撫嚴飭所屬。凡通緝要犯。遇蹤跡可疑之

人。務令詳悉根訊。毋任捏供倖免。如仍蹈前弊。日後拏獲真犯。必於從前經過各地方官。及該督撫是問。若因有此旨。該地方官希冀邀功。任意煅煉。致累無辜。則案犯真偽究不能假借。其故入之罪。亦必不為曲恕也。○戊午。

上以恭謁

祖陵禮成詣

慈寧宮行慶賀

皇太后禮。王公大臣於

慈寧門行禮。○御太和殿。王以下文武百官行慶賀禮。○召見諸王滿洲大臣等。宣示辦理平定準噶爾事宜。並訓飭臣工。諭曰。今日召見爾等。特為曉諭。辦理平定準噶爾。及滿洲臣僕。昔年勇敢。邇來怯懦之故。準夷乃極邊小醜。從前台吉噶爾丹策零。眈然遣使奏請貿易。朕為中外共主。示以柔遠之仁。准其所請。俾獲微利。暨噶爾丹策零歿後。伊子策妄

多爾濟那木扎勒承襲台吉。頗肆兇暴。喇嘛達爾扎因弒奪之。然策妄多爾濟那木扎勒係噶爾丹策零之子。喇嘛達爾扎亦名為噶爾丹策零之子。朕於準噶爾初無利其土地人民之念。而彼又極恭順。朕是以置之度外。任其存留而已。今達瓦齊係噶爾丹策零屬下之人。獲罪於喇嘛達爾扎。逃入哈薩克。潛來原游牧處。戕弒喇嘛達爾扎。奪據台吉。朕果貪取其地。乘伊之亂。何難興師問罪。惟是

準噶爾究屬邊夷。達瓦齊誠能守分遣使乞恩。朕亦必加容恕。是以杜爾伯特台吉車凌等投誠。朕尚遣人於黑龍江等處。勘視通肯呼裕爾地方。安置伊等。並無用兵之意。不意達瓦齊今歲遣使敦多克等。以闡揚黃教。休養衆生。假辭陳奏。則其意竟欲與朕相埒。達瓦齊弒君悖亂。詎可以鄰國自居。且今歲輝特台吉阿睦爾撒納等。又領數萬衆投誠。朕以天下大君。焉有求生而來者。不為收養之

理。轉致被達瓦齊戕害。夫收之則必養之。若令附入喀爾喀游牧。非惟喀爾喀等生計窘迫。數年後。必有起釁逃避之事。則喀爾喀等轉受其累矣。況達瓦齊作亂之人。今即收其數萬衆。雖目前不敢妄舉。而日久力足。必又蠢動。侵我邊圉。與其費力於將來。不若乘機一舉。平定夷疆。將車凌阿睦爾撒納安置原游牧處。使邊境永遠寧謐。之為得也。然準噶爾之事。自

皇祖

皇考時。頻煩

聖慮。歷有年所。因機無可乘。故大勲未集。今事機已值。無煩大舉。以國家之餘餉。兩路並進。不過以新降厄魯特之力。少益以內地之兵。即可成積年未成之功。諸王大臣。宜各奮勵踴躍從事。在漢大臣等。原未與議。今滿洲王大臣內。惟大學士傅恒奏請辦理。其他盡畏怯退縮。恐生事端。即如策楞舒赫德當初因

不願辨理。是以於噶爾布來札。虛詞恐嚇。舒赫德遂張皇失措。擅自移文達瓦齊。與之講和。當阿睦爾撒納新來投誠時。策楞舒赫德即使伊等寒心。又令其妻子離散。內徙。男子留於軍營。及阿睦爾撒納請兵救援。後至之人。又妄為攔阻。彼時朕若不速降諭旨。將舒赫德策楞治罪。則新投誠之人。迫切變生。不特當時債事。而策楞舒赫德亦不能自保矣。策楞雖惑於舒赫德之言。然伊為將軍。咎有難辭。故將伊二人俱行治罪。因朕如此辦理。伊等始延餘生耳。此在怯懦諸臣。或妄以伊等為可矜者有之。無識之言。更何足據。朕此次恭謁

祖陵。臨幸故土。遍歷山河形勢。恭閱

實錄。仰見

祖宗創業維艱。而衆王貝勒大臣官員等輔佐亦為不易。總因彼時滿洲等勇於行陣。臨敵敢先。故由盛京龍興。統有天下。至今百有餘

年。受無窮之惠。爾等皆功勳後裔。盍思效法前人。報國立功。而惟守妻孥以求安逸。聞戰陣而甘退縮。朕於此。不無深憾焉。朕嘗觀明史。當其國勢衰微。蒙古宰桑額森率衆侵擾。明國受其挾制。凡額森所言。即勉強奉行。然額森自伊主布哈汗被弑後。額森欲自稱汗。遣使於明。明之臣工。率多附和。其中請仍稱額森為太師。毅然執奏者。僅二三人。前明君臣皆漢人。又值衰微之際。尚能持正。不稍寬於叛逆。況朕滿洲主后。統臨天下。當國家昇平強盛之會。滿洲臣僕。自應奮勉從事。何所畏憚。而餒怯若是。總之朕總理天下諸務。惟據理獨斷。應辦之事。斷不為衆所阻撓。如其不可。衆雖強為奏請。朕亦斷不允行。是皆爾等所共知者。此用兵要務。朕籌之已審。豈以衆人怯懦。即失機宜。半途而廢。但滿洲臣僕習氣。至於此極。朕若姑息因循。不速為整頓。振興舊俗。數年後。不知何所底止也。故召爾

等降旨開導。將此宣示八旗大臣官員以及兵丁等知之。○己未。以協辦大學士戶部尚書蔣溥。暫管翰林院掌院學士。工部尚書汪由敦。暫管刑部尚書。○庚申。

上御太和殿。傳臚。賜中式武舉一甲顧麟。徐渭。劉虎臣。三人進士及第。二甲梁聯科等五人進士出身。三甲延恂等五十一人同進士出身。○諭。新授貴州鎮遠鎮總兵諾倫謝恩奏摺。繕寫漢字具奏。諾倫滿洲世僕。又係武職。伊等任內應辦之事。除訓練所屬兵丁之外。並無如督撫有地方繁劇之事。至於訓練事件。儘可繕寫清字奏摺具奏。今用漢字奏摺。皆為綠旗習氣所染。似此則滿洲舊制。竟至廢棄。嗣後各省提督總兵官內。如係旗員補授者。除本章著照例。仍用漢字外。奏摺俱繕寫清字具奏。著交該部通行曉諭。

平定回疆方略卷一百七十四

下七

大清高宗法天隆運至誠先覺體元立極敷文奮武孝慈神聖純皇帝實錄卷之四百七十四

實錄卷四百七十四

三

大清高宗法天隆運至誠先覺體元立極敷文奮武孝慈神聖純皇帝實錄卷之四百七十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曾振鐸等奉

敕修

乾隆十九年甲戌十月辛酉

實錄卷四百七十五

上御乾清門聽政○詣

皇太后宮問安○軍機大臣等奏西北兩路應

派京兵各一千名現於健銳營內挑得一千

五百名餘五百名請在前鋒護軍內挑派此

項兵內將健銳營兵一千名即交副都統莽

阿納帶領同遣往西路索倫巴爾虎哲哩木

兵前往外其遣往北路京兵一千名遵旨派

副都統普慶帶領起程再遣往西路索倫烏

拉齊侍衛官員四十名臣等另選帶領引見

報聞○兵部議覆吏部尚書管四川總督黃

廷桂奏松潘鎮總兵馬良柱將營中公費

及生息銀私借千把兵丁及弁兵立碑稱頌

該鎮不加禁止拔補名糧專示私恩致標營

各肆蕩逸概置不問等語應將馬良柱照溺

職例革職從之○撫卹江蘇阜寧清河桃源

安東鹽城高郵泰州興化寶應山陽甘泉海

州沐陽沛縣等十四州縣併淮安大河二衛

本年水災飢民並分別賑貸蠲緩其本年應

實錄卷四百七十五

徵漕糧漕項按分蠲免蠲剩銀米及舊欠緩

漕漕項等項均予緩帶有差○壬戌諭曰朕

此次前往熱河著派莊親王誠親王大學士

來保史貽直在京總理事務○以雲南楚姚

鎮總兵王無黨為鑾儀使○以左副都御史

舒明兼正黃旗護軍統領○旌表守正捐軀

之直隸晉州民翟英妻王氏○癸亥諭現派

出征之健銳營兵及京城前鋒護軍官員等

著於本月二十一日以前在圓明園西廠操

演並加恩賞飯○諭軍機大臣等據玉保奏稱諭令阿睦爾撒納償行先至避暑山莊附近地方祇候駕臨等語阿睦爾撒納誠心歸順感戴朕恩急欲瞻仰之意朕甚嘉之朕亦急欲見其人但本年十一月初九日冬至南郊大祀為國家鉅典朕必親詣行禮是以初九日

天壇禮畢即於初十日起鑾前赴避暑山莊向來至避暑山莊須行六站今併作三站行走到彼後召見伊等施恩筵宴意欲多住數日復以二十五日恭逢

聖母皇太后萬壽聖節應行慶賀禮於回鑾時亦併站三日至京朕所以計日併站而行者無非急欲見阿睦爾撒納之意將此寄知玉保令其曉諭阿睦爾撒納知之再現在瑪木特私來附近邊卡之布拉罕察罕托輝游牧經班第等向瑪木特遣來之瑪什三音等詢問明確即行揀派精兵辦給馬匹口糧令薩

喇勒班珠爾率領齊木庫爾扎木叅德濟特普爾普等越索勒畢嶺抄其後路往拏俟拏獲瑪木特時查明阿睦爾撒納屬下被擄什物追出給領將此並諭阿睦爾撒納知之○左都御史楊錫紱奏五城司坊各員原為稽查彈壓辦理地方事務近因叅罰案多得缺後即捐陞離任請自本年十一月為始司坊官即有力能報捐者亦必到任一年方准報捐得旨照所請行○又奏各省大計年老者疾二項多以教職填註塞責查各省佐雜如經歷縣丞以下等官頗有衰庸老邁者向來該管道府因係末秩散曹不盡揭報而督撫見面時少每致倖居職任本年正舉行計典請勅各督撫將佐雜等官詳加考察除貪酷等條仍照例辦理外其年老有疾之員亦俱據實填註不得姑容得旨照所請行○甲子

上詣
皇太后宮問安○幸圓明園○諭軍機大臣等

永濟庫失竊銀兩一案該貝勒等於發覺時即應將失竊人犯迅速嚴行根究自得實情乃始則請派司員查審經朕訓飭仍輾轉遷延其專辦之員外郎關良既應查訊即當嚴加看守乃又懈怠疎防致令投井自盡所有失竊真情至今茫無頭緒節外又出旁枝該貝勒等所辦何事著傳旨嚴行申飭此案人犯著解交內務府總管大臣等審訊定擬具奏○軍機大臣等議覆吉林將軍傅森等疏稱駐防拉林等處滿洲兵賞給紅白銀經前任將軍等奏准展限五年停止現屆期滿仍請展限五年等語查此項賞銀節經展限十年仍不能立產即再展亦屬無益應令該將軍查其限滿即行停止得旨此項賞給銀兩業經展限期滿自應依議停止念伊等係初次居住一時停止未免艱難著再施恩展限五年減半支給此次限滿後斷不能展限著通行曉諭伊等知之○兵部議覆江蘇巡撫

莊有恭疏稱江省金江姑蘇二驛驛丞向屬府轄今驛站錢糧既歸州縣經理請將金江驛歸上元縣管姑蘇驛歸元和縣管其應支夫馬工料原編上元江寧長洲吳縣元和等縣徵解亦改歸該二縣支銷等語均應如所請從之○乙丑旌表守正被戕之直隸望都縣民李士林女李氏守正捐軀之河南淮寧縣民樂國柱女樂氏○廣東巡撫鶴年疏報乾隆十八年廣惠潮肇四府屬墾額外水田稅十九頃十七畝有奇新會等九縣墾稅十八頃六十八畝有奇又廣潮二府墾額外沙灘稅二十頃八十畝有奇番禺等二縣墾復遷移屯稅四十一畝有奇○丙寅上幸西廠閱出征兵賜健銳營官員兵丁等飯丁卯諭軍機大臣等據尹繼善奏下河應續行挑濬各工共估需銀七萬餘兩一摺已於摺內批示挑濬亦河道工程所不廢但當論其實有裨益否耳下河河道縱橫交錯迫

於外海水高。疏濬之水。無所容納。如使疏濬有濟。則民田不應年年被水。而今歲甫經大挑之後。尤不應被災如故。此理之易明者。此次工程。既據尹繼善奏請興修。姑即如所奏辦理。果有成效。無論估費止七萬餘兩。即三十萬。朕亦所不惜。著俟二年後。該督將修舉工程所益於下河民生者幾何。所益於運道者幾何。所益於國計者幾何。一一據實陳奏。朕將考覈以定司事者之功咎。其現在所

實錄卷五十五

修各工。如不實力稽查。使工歸實用。一任工員草率辦理。以圖侵冒。是該督自取罪戾。朕何能為之曲恕耶。可將此詳悉傳諭尹繼善知之。○又諭曰。衛哲治前奏酌定微員路費銀兩。及議給驛丞養廉兩摺。俱批交部議。今經該部議駁。其中如微員溢支路費。雖為數無多。但耗羨支銷。不得不為之節制。是以部定章程。不容前後牽混。豈可以所需無幾。暗為破越成規地耶。至驛務既歸州縣。則驛丞

乃應裁之贅員。何得不事其事而食其食。衛哲治此二摺。皆為市惠邀名起見。以博微員稱頌。此該撫故智。徒以鄂容安已經赴京。故乘間陳奏耳。使鄂容安尚在江省。必不為此奏也。朕令衛哲治調任粵西。早見及此。苗疆邊省。非可市惠之地。該撫倘不能痛改夙習。仍蹈前轍。有意沽譽。朕必重治其罪。亦必不能逃朕洞鑒也。○戊辰。

上詰

實錄卷五十五

皇太后宮問安。○還宮。○諭軍機大臣等。鄂容安現派往北路軍營。所有總督任內養廉。著與尹繼善各支一半。可傳諭尹繼善知之。○管理正黃旗漢軍都統多羅恂郡王允禔因病解任。命順承郡王台費英阿管理正黃旗漢軍都統。○調戶部左侍郎嵇璜為吏部侍郎。吏部右侍郎裘曰修為戶部侍郎。兵部侍郎吳達善為工部侍郎。署戶部侍郎雅爾哈善為兵部侍郎。○以江西袁州協副將陳益

為雲南楚姚鎮總兵。○己巳諭從前朕曾降旨滿洲人等不許照依漢人取名。今吏部帶領引見知縣甘珠爾身係蒙古名亦蒙古話祇應按滿洲語氣寫漢字。乃希圖成話穿鑿取甘露珠之意。寫以甘露。甚屬悖謬。著將甘露露漢字之名改寫。并交吏兵二部所有滿洲蒙古官員之名。於寫漢字時祇按滿洲字語氣寫。毋得似此混取漢字之義。希圖成話。反致將滿洲蒙古話所取之名廢壞。凡有如此者俱著改寫。○庚午禮部先期疏請十一月二十五日。

皇太后聖壽節。應行慶賀禮得旨是。照例行禮。奉

皇太后懿旨。今年停止筵宴餘依議。○正白旗滿洲都統奏捏造偽稿逆犯劉時達之子劉衍基。上年賞給公舒凌阿為奴。本年十月初四日乘舒凌阿隨駕未回潛行逃脫。現據舒凌阿呈報。臣等行文刑部步軍統領順天府

一體嚴緝。並請將舒凌阿交部察議得旨。劉衍基係捏造偽稿重犯之子。免死為奴。今復逃走情甚可惡。著交刑部步軍統領都察院順天府嚴緝務獲。舒凌阿本應照依所奏交部察議。但伊未到家以前劉衍基已於初四日脫逃。是舒凌阿既不在家又未隱匿。即行報出著從寬免其交議。至此等賞給為奴之人俱已身獲重罪。從寬免死賞給大臣非尋常家奴可比。自當嚴加管束。不時留心稽查。如有脫逃。即通行嚴緝。獲時即應杖斃。若平日不遵約束。伊主即加以杖斃。亦無不可。著通行八旗嗣後務遵諭旨行。再看來劉衍基脫逃。其他賞給人內有似此脫逃者亦未可定。著交八旗查明由值年旗彙齊奏聞。嗣後此等賞給為奴人內有無脫逃之處。值年旗每年年終彙齊奏聞一次。其賞給如有將軍大臣者。即令伊等每年年終自行奏聞一次。又諭軍機大臣等。劉衍基原籍廣東伊父劉

時達曾為江西守備。該犯或潛回原籍。或至伊父任所。依倚親故。俱未可定。著傳諭江西廣東巡撫。令其迅速嚴密稽查。務獲解京。再天津關口。係出京必由要路。并傳諭普福遴委幹役。即速密行查拏。毋任其遠颺無獲。并傳諭吉慶。令其留心訪緝。○以故貴州獨山司土同知蒙開顯子永熙襲職。○辛未。諭軍機大臣等。定長奏黔省銅廠一案。已將管理威寧州屬銅川。勾錄兩廠前署知州解韜。抽

平定縣志卷五十五

下

多報少售商舞弊。及接任知州海米納罔知釐剔。踵弊因循。叅劾究審。而另摺中乃隱躍其詞。稱當年張廣泗原題。以收買餘銅。不敷廠民工本。現飭設法。其所謂設法者。無非令其售商獲利。侵隱透漏。情弊其來已久等語。如此則從前歷任各員。俱所不免。解韜等不過因循陋習。而遽歸重於該二員。叅劾治罪。未免偏枯。轉致冤抑。若該二廠自開採以來。即係解韜一人經理。或通同爐頭。私相售賣。

從前並無此弊。實係始於解韜。而接任踵而行之。則藐法玩公。又必當重治二員之罪矣。著傳諭定長。令其查明實在情節。秉公詳悉奏聞。至此事如何。定案時。仍行明白回奏。尋奏威寧銅勛通商。起於乾隆十一年。知州謝國史。李肖先任內。十五年署州姚文光公然出示給票。但從前出銅有限。私賣尚少。自解韜到任。又開有新哈喇河子廠礦砂。頗旺。乃官銅日減。偷漏數倍於前。又私收銅稅。并每秤多收秤頭銅二勛。海米納接任為日。雖淺。亦踵積弊。俟提齊案犯研審。并根究累任知州。如何任其偷漏之處。奏明辦理。得旨覽奏俱悉。○軍機大臣等議。覆吉林將軍傅森等奏。稱前移駐拉林滿洲一千名。近年生計漸裕。現在阿勒楚喀附近。肥饒地畝。可鑿井者共荒地六處。計三千餘頃。可設村落四十。八處。足容三千戶。請於現駐一千名外。再派駐三千名等語。查東三省山澤地利。饒裕。應

平定縣志卷五十五

下

如所請。揀派遣駐。但一切墾荒建房掘井等項。有需時日。所派三千滿洲。請分六起。自丙子年起。至辛巳年止。次第安置。令八旗大臣。擇其族衆有眷屬者。揀派。應派年分。該將軍咨到辦理。其自京起程。及到彼安置。悉照前例。再原議賞銀一項。因初設並無恒產。每年賞銀五千兩。添補農具。俟數年後裁。今派往每起五百名。未便照舊。請每年賞銀二千五百兩。十年後減半。又十年停支。此內孀婦殘廢不能耕種者。令該副都統查明行文將軍。將發遣人內。揀派代耕。陸續遣派五起。照此辦理。至前次派往一千名賞銀。並無年限。其孀居殘廢俱賴糧餉度日。一時礙難裁汰。臣等酌議。自今年起限五年後減半。十年後停支。均照新例辦理。再從前移駐一千名時。並阿勒楚喀兵五百十二名。編設八佐領。均勻分隸。今增三千名。若仍附舊佐領。人衆地遠。管轄難週。且無兵額。新派之人。亦無報効之

途。請合舊有兵額。共添足一千五百名。應添兵。請於三姓。打牲烏拉兵內撥充。再三姓地方。除撥出外。尚有兵一千五百餘名。仍留協領管理。其佐領五員。防禦四員。驍騎校五員。隨兵移駐。至打牲烏拉地方。除撥出外。僅存兵五百名。請於該處二協領內。令一員隨兵移駐。併派往佐領五員。防禦四員。驍騎校五員。合拉林阿勒楚喀舊協領二員。佐領八員。防禦二員。驍騎校八員。將新舊兵勻派管轄。但協領三員。難以分隸。請添協領一員。再新舊兵較前增多。舊副都統一員。不足以資彈壓。請添設副都統一員。每起遣往時調一員。來京帶領。沿途約束。其新添副都統員缺。請交兵部。於明冬奏請補放。即令帶領丙子年頭起前往。得旨依議。俟挑選遣往滿洲時。該部請旨。朕另派王大臣挑選。○吏部奏嵇璜現由戶部左侍郎調補吏部右侍郎。例應以左侍郎管右侍郎事。至吳達善調補工部侍

郎。裴曰修調補戶部侍郎。應否將現任右侍郎三和劉綸各轉補左侍郎。或即以吳達善裴曰修補授之處請旨。得旨三和著轉補工部左侍郎。劉綸著轉補戶部左侍郎。其由五部左侍郎補授吏部右侍郎。仍以左侍郎管右侍郎之例。實屬繁文。著停止。並交會典館改正。直隸總督方觀承奏酌籌西北兩路兵行事宜。一西路自京至河南淇門驛設四大站。用兵部馬送至良鄉。按站換車。送至淇門驛。北路自京至張家口設兩大站。順天府備車送至懷來縣。換車送至張家口。給馬駝長行一兵二名。合一跟役。給大車一輛。行裝盔甲俱可攜載。其車價按馬騾一匹每百里給銀三錢計算。回空守候概不支給。一官兵沿途住宿。用各標營帳房。每二三名合給一架。領兵大臣官員亦用帳房安營。駐劄一良鄉清苑正定臨洺並懷來五站。車馬聚集草豆必昂。請於司庫動項。豫發各州縣備辦。事

竣歸款。下軍機大臣等議行。○以吏部左侍郎鄂彌達署吏部尚書。○貳三姓琿春地方本年水災飢民口糧。○壬申上詣

皇太后宮問安。○諭據富勒赫奏高斌張師載多用公項銀六萬餘兩。應著落前任河庫道何燭李宏名下追賠等語。何燭李宏職任河庫道專司錢糧。豈容蒙混開銷。擅動公項。借以彌補虧空。是高斌張師載為南河之罪人。而此二人者。又高斌張師載之罪人也。所有高斌張師載多用公項銀六萬餘兩。即著落何燭李宏名下追賠。著交與尹繼善將何燭李宏拏交工次盤追。予限二年。如逾限不能完繳。即照陳克濬等之例正法。○諭軍機大臣等。今日召見富勒赫。問以下河之事。據奏下游。即多開支港。亦不能暢流無滯。挑濬工程。恐無益於事等語。與朕昨批示尹繼善摺

之處正復相同。河工關係運道民生。尹繼善前奏估需工程共七萬餘兩。既已專摺奏請。而朕必謂不應興修。無知者必以為惜費。但使動項興修之後。下河民田。果不致年年被水。高寶一帶。果不致動輒被災。即多費帑金。朕亦所不惜。此事惟在尹繼善悉心自揣。從長計議。如一二年後。果可保其實有裨益。則此番續修各工。誠屬必不可緩。若伊意中亦不能確有成見。不過為此姑且嘗試之舉。則不如即行奏請停止。及今悔之。猶未為晚。毋致自貽伊戚也。此乃朕特恩。亦為國家惜一老蒼能事之大臣。著再行傳諭該督。令其熟思審處。倘伊意以為必應興修。保其實有成效。則朕亦聽之。如挑濬已行。而下河被災如故。其自取罪戾之處。恐難冀朕之曲恕矣。著仍令妥酌定議以聞。不必引入此旨。○刑部議覆河南按察使沈廷芳奏稱定例奴僕雇工勾引外人竊盜家長財物者。將起意之奴

僕計贓遞加凡竊盜一等治罪。至一百二十兩以上者。擬絞監候。勾引之外人。仍照竊盜計贓治罪。至勾引外人強劫家主財物。例無明文。問刑衙門往往比照卑幼將引他人強劫已家財物之例論斬。奏請定奪。究未允協。請勅下律例館酌定條款頒行等語。查奴僕雇工人之於家長。分嚴情疎。非卑幼親屬可比。而強劫尤重於竊盜。應如該按察使所奏。嗣後奴僕雇工人強劫家長財物。及勾引外人同劫者。悉照凡人強盜律定擬。毋庸比照論斬。奏請如有殺傷家長者。仍依例從重論從之。○閩浙總督喀爾吉善疏報閩縣等十三州縣及淡水廳首墾報墾民屯田地共二十七頃四十一畝有奇。○癸酉諭曰。班第自到軍營以來。辦理諸事。俱合機宜。奮勇果斷。是以先經進兵擒獲阿爾台以內居住之準噶爾烏梁海宰桑三人。收戶口千餘。今復遣兵由彼越索勒畢嶺。進至布拉罕之察罕托

輝額貝和碩地方將進噶爾宰桑庫克新瑪木特通瑪木特悉行擒獲收厄魯特兵一百五十餘名我兵並未傷損一人此皆班第實心奮勉調遣合宜所致深屬可嘉班第著賞給世襲子爵補授正黃旗領侍衛內大臣仍賞銀一千兩薩喇勒感戴朕恩遇事奮勇効力此次皆由伊首先進取克成此功尤當加以殊恩薩喇勒亦著賞給世襲子爵補授正白旗領侍衛內大臣至所賞世職或兼於本身或令伊子承襲之處令伊等自行酌定具奏○又諭此次辦理烏梁海及擒拏瑪木特諸事因策楞舒赫德有心畏縮阻撓軍務是以將伊等革職伊子俱交刑部監禁無知之徒尚有以幼兒為可憫者今班第到軍營以來遵朕諭旨相度機宜奮勉進兵收獲烏梁海二千餘戶詢知兩瑪木特居址奮勇衝寒而進不致一名漏網俱被擒獲則二人從前畏縮無能種種悖謬之處愈覺可恨伊二人

之罪俟班第審明具奏時再行定奪外策楞之子特英額著發往莊浪特昇額發往江寧特清額發往杭州特成額發往西安特松額發往青州舒赫德之子舒寧發往涼州舒安發往成都披甲効力贖罪○諭軍機大臣等據班第等奏稱薩喇勒帶兵將兩瑪木特俱已擒獲并獲扎哈沁噶勒雜特兵丁百餘名仍飭薩喇勒一面辦理收服扎哈沁包沁游牧人衆一面躡緝擒捕巴朗等語此皆

吳蒼默佑班第薩喇勒衆王公台吉共相奮勉之所致已降旨將班第薩喇勒俱賞給子爵世襲罔替其餘出力人員俟班第查奏到時再行加恩至喀爾喀官兵此次甚屬奮勉亦著查明賞賚其職分較大人員至熱河時朕另行加恩將此宣諭伊等至班第奏請此次擒獲噶勒雜特包沁之厄魯特一百五十餘名開示恩德釋放遣還所奏甚是此後伊等互相傳播準夷合部人衆必將感戴朕恩於

來年進兵事宜。大有裨益。班第等宜將朕憫其隻身被獲。不忍其父母弟兄妻子分離。是以釋回。令其骨肉完聚之處。明白宣諭。酌賞口糧遣還。再擒獲之得木齊達什敦多布。不必羈禁在彼。亦著同兩瑪木特解送前來。如已經派人解送兩瑪木特。達什敦多布著另行解送來京。至烏梁海宰桑都塔齊。一切差遣。無不奮勉。此次往說瑪濟岱之便。收服烏梁海十八戶。著不必另行查辦。可傳諭賞伊。

○刑部奏臣部題覆直隸任縣耿楊業踢傷李秀母喬氏身死一案。該督將耿楊業依鬪毆誤殺旁人律擬絞。復以該犯係孀母獨子。聲請留養。臣等照擬覈覆。查耿楊業與李秀爭扭。喬氏抱腰拉勸。被擊倒地。復因李秀擊毆。舉足亂踢。致傷喬氏殞命。實係鬪毆致死。並非誤殺旁人。且該犯毆死李秀之母。若因孀母獨子留養。是該犯殺他人之母而已。反得因母以免抵殊。非情理之平。現在仰蒙指

示。謹將原本改正進呈。再臣部司員題駁案件。向例主稿司員。每案議叙紀錄二次。今遇應駁之案。未經駁改。臣等亦未經查出。應請交部查議。其誤擬之按察使。及遽行題請之總督。一併查議。嗣後如有應駁之案。不行駁改。及擬議舛錯各該員。俱照此辦理。從之。○甲戌。

上詣

皇太后宮問安。○以準噶爾用兵事宜宣示中

外。諭大學士等。準噶爾本元朝臣僕。竄處西北。恃其荒遠。憑陵番部。我

皇祖聖祖仁皇帝三駕

親征。肅清沙漠。

皇考世宗憲皇帝時。策妄阿喇布坦父子濟惡。仍肆跳梁。是用

命將出師。聲罪致討。及朕嗣統。當

皇考降旨。徹兵之後。而噶爾丹策零遵守定界。遣使請安。求通貿易。朕特加恩俯准。以示懷

柔。迨噶爾丹策零物故。其子策妄多爾濟那木扎勒。為孽兄喇嘛達爾扎所弑。而喇嘛達爾扎。復為達瓦齊所弑。在喇嘛達爾扎。雖承緒不正。尚屬噶爾丹策零之子。至達瓦齊。則篡竊亂臣耳。乃今年夏間。遣使來京。仍請赴藏熬茶。覲然。以噶爾丹策零自處。試思堂堂大清。中外一統。而夷部亂臣。妄思視同與國。此其逆天悖理。為何如耶。上年杜爾伯特台吉車凌車凌烏巴什等。率眾來降。今秋輝特台吉阿睦爾撒納等。又舉部內附。斯均窮蹙來歸之人。朕為天下共主。兼覆並載。既無拒而不納之理。而喀爾喀內地。俾此輩數萬眾。仰食聚處。將來滋生蕃庶。亦豈久安善策。朕於達瓦齊。初無與師問罪之意。而事會所至。揆之理勢。實有不得不從長經理者。昔皇考初議撤兵。籌畫尚在未定。予蒙召同果毅親王等及軍機大臣。咨度再三。並諭以此時不罷兵。則成功尚未可

期。此時若遽罷。又恐後人以為隳已勞之功。彼時予議以當罷為請。

聖意乃定。二十年來。邊圉晏然。甲兵不試。固朕初心。即車凌等始至時。朕尚無意及此。奈達瓦齊眾叛親離。叩關踵至。此皆

上蒼默佑。有不期然而然者。我滿洲舊俗。尚義急公。一聞用兵。無論老壯。咸以不得與為恥。承平日久。習於晏安。櫟甲執兵。衝鋒陷陣。不免視為畏途。然以應行之事。值可乘之時。而牽於浮論。坐失機宜。朕亦斷斷不肯出此也。從前策楞舒赫德。辦理北路軍務。乖張怯懦。種種不合。皆由存畏難之見。思以退縮自全。是以重治其罪。今班第奉命前往。奮勇果斷。旬月之間。收獲烏梁海數千戶口。牲畜甚多。又將準噶爾宰桑庫克新瑪木特通瑪木特。悉行擒獲。又得戶口牲畜無算。使策楞舒赫德於七八月間。即能如此。其成功豈不更為迅速。亦必有不僅止於此者。班第薩喇勒已

俱授為領侍衛內大臣。並各賞給世襲子爵。以為大臣實心任事者勸。策楞舒赫德應得之罪。俟班第議奏到日。另行降旨。其在京諸子及歲者。俱發往各省駐防披甲當差。朕辦理政務。信賞必罰。一秉至公。毫無成見。亦並不為悠悠之論所奪。特將此番用兵始末。及在事諸臣功罪。宣示中外知之。○兵部等部議覆貴州巡撫定長疏稱。黔省上游驛路。經前撫臣開泰題准改設案內。臣等覆勘情形。阿都田雖係普安州屬地方。實與安南縣屬村寨毗連。應將原裁之烈當驛夫馬。移設阿都田。借地安驛。歸縣兼理。原移之毛口一站。官役夫馬。概裁。又罐子窰驛移駐之白沙關。亦普安州屬。距普安縣甚近。應將白沙關驛夫馬錢糧。亦借州地安設。歸縣兼管。并請鑄給普安州上寨驛驛記一顆。其毛口罐子窰二驛。丞均裁。至裁驛官俸役食。及烈當罐子窰。原設民壯各十名。各裁五名。至新路一帶。

應改汎防。請將毛口汎原撥千總及兵丁等。除撤回郎岱本營。撥防兵十一名外。實兵二十五名。移駐阿都田。罐子窰汎原撥把總一員。兵二十四名。移駐白沙關。又楊松汎原撥把總一員。兵二十四名。移駐上寨。並於新路之安黑地方。設一步塘。安兵五名。花貢設一馬塘。安馬兵二名。步兵三名。丁寨設一步塘。安兵五名。老鷹巖半坡設一步塘。安兵五名。即於烈當等汎應徹兵丁內。照撥。再撥兵十名。於罐子窰駐防。歸上寨汎轄等語。均應如所請。從之。○予故副都統職銜李楠。祭一次。○旌表守正捐軀之直隸河間縣民徐大黑妻孫氏。○乙亥。

上詣
奉先殿。

壽皇殿行禮。○是月。直隸提督吳進義奏請巡閱鎮屬營伍。查直隸五鎮。除馬蘭泰寧所轄營汎無多。應乘便巡閱外。其宣化。天津。正定。

三鎮請分為三年。挨次查閱。提督巡查之年。總兵停其巡查。報聞。○調任安徽巡撫衛哲治奏。前奉諭旨。以滇黔等省運京銅鉛過境。波濤險惡處。派員豫防。查銅鉛船行安境。由長江南岸順流而下。係安池太三府屬。其險惡處。則有貴池縣之欄杆磯。太子磯。銅陵縣之洋山磯等處。請嗣後船入境時。派該三府同知專司防護。如同知出差。即派通判。至沿江營汛。應飭安慶遊兵奇兵等營。酌派守備。或千總各一員。協同丞倅辦理。倘猝遇風暴及險磯。帶同沿江救生船。保護搶救。得旨。如所議行。○河南巡撫蔣炳奏。進勒準夷官兵經過豫省。所需飯食。業於住宿打尖之處。招募商民。開設店鋪。豫備聽買。再各兵例應支給廩糧。而領銀仍須易錢零用。現在豫省錢價甚平。擬將應發廩給口糧。按每銀一兩。給大制錢一千文。報聞。○湖北巡撫張若震奏。湖北寶武局鼓鑄。配用洋滇漢銅。近年洋銅

缺少。漢銅價值昂貴。川省產銅頗旺。價值平減。應酌買川銅。既有節省。而程途較近。得旨如所議行。○陝甘總督永常等奏。會議索倫已爾虎哲哩木等兵。入陝後。前赴肅州道路。查由涇州靜寧會寧等境為北路。由隴州秦州等境為南路。南路山多崎嶇。且大河攔阻。計程三十五站。較北路多四站。北路惟會寧安定兩縣缺水。今勘得自靜寧州稍南。取道易崗川馬營監。由鞏昌府渭源縣狄道州。而達蘭州。一路水足途平。最為妥協。報聞。○協辦陝甘總督尚書劉統勳等奏。西路明年備戰馬駝。及安設塘站各馬。日食草豆。為數浩繁。已派交涼甘肅三府州屬。分棚拴養。應需草束。業飭廣積供支。惟料豆一項。該地所產有限。採買不易。請將河東存倉常平豆。撥運三十萬石。分貯涼甘肅三府州屬。與各州縣採買豆。接濟供支。其河東運缺豆額。仍於捐監項下補足。得旨。如所議行。○甘肅巡撫鄂

昌奏肅州輓運出關軍糧。車戶口食繁多。現在關外糧價騰貴。查安西一廳五衛。共存小麥六萬八千餘石。應糶賣以平市價。除河州衛非軍糧行走之路。毋庸出糶外。其赤金靖逆。石柳溝安西四衛。并安西廳。酌糶小麥一萬五千石。得旨依議速行。○雲貴總督碩色等奏。據永昌府稟報。緬甸國王莽達喇被所轄之得冷子。攻破阿瓦大城。該國王逃避無蹤。茲訪得該國大和尚撒喇情。同大頭目捧奪藐等。辦事不公。得冷子怨恨。率眾將阿瓦大城攻破。該國王現避海濱。其國王二子。在所屬之猛迺地方。均未回國。報聞。○碩色又奏。臨元鎮兵糧。向於臨安。建水二府州倉支放。查臨城四面高山。天時炎熱。米易生蟲。多耗。易穀始堪耐久。請於每年青黃不接時。陸續糶借。秋成易穀貯倉。俟易齊日。照常平倉例。挨次出陳易新。將新穀支放兵糧。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十五

大清高宗法天隆運至誠先覺體元立極敷文奮武孝慈神聖純皇帝實錄卷之四百七十六

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲部統世襲騎都尉軍功加七級隨帶加一級尋常加二級軍功紀錄一次臣慶桂

總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲部統軍功紀錄五次

尋常紀錄十四次臣德瑛總纂官太子太保工部尚書紀錄六次臣曹振鏞等奉

敕修

乾隆十九年甲戌十一月丙子朔諭軍機大

臣等

臣等朕令海望圖畫車凌等像攜至避暑山

莊著寄信玉保即帶阿睦爾撒納至彼令其

識認仍曉諭伊等皇上憐念爾等投誠施恩

畫像現在圖畫車凌等像俟爾等回去之便

令訥默庫帶往賞給伊等傳之子孫再本月

內恭祀

天壇並慶賀

皇太后聖壽駐蹕避暑山莊亦無多日因欲加

恩照車凌等之例圖畫爾等形像特遣大臣

帶領畫工前來俟畫竣亦賞爾等帶回此旨

併寄海望○又諭著寄信班第等詢問通瑪

木特爾若誠心歸降宜將爾眷口併屬下人

等接取前來再說降嚙勒雜特不但許爾等

無罪大皇帝必當格外施恩一面將通瑪木

特庫克新瑪木特同解來京若已自軍營起

程扎拉豐阿即遵旨將伊如何登答之處作

速移咨班第辦理○命鑄定邊右副將軍印

○丁丑

軍機處

上御乾清門聽政○詣

皇太后宮問安○諭明年派往西路官兵經行

臺站關係緊要已令各督撫派委司道大員

於本省專司其事但自京抵哈密路經七十

餘站必得大臣經理屆期著派侍郎吳達善

往來查看以專責成○諭軍機大臣等陳宏

謀奏該省現設臺站責成知府不時查驗一

摺所辦甚是臺站關係軍行甚屬緊要自京

至哈密路經七十餘站必得大員往來督察

已降旨派侍郎吳達善屆期前往其專司本省站務亦應各就司道內揀派一二員不時彈壓巡查倘有辦理未善之處惟該員是問著該督撫等即行揀派奏聞又另摺稱此次征兵過站備飯既多不便給銀零星難使應每銀一兩折給錢一千文以資飽騰并將陝省餘錢借給甘省畫一散給等語如此方得大臣不分彼此之道所辦尤為妥協河南已如此辦理可將此傳諭各該督撫令其豫行籌辦此摺並著鈔寄○又諭胡寶瑔奏據蔣炳密咨盤獲馬朝柱案內要犯李正南押解楚省查辦除將不行詳悉查訊之湘鄉令李澎會疏題叅外其首逆蹤跡現俟湖督撫臣質訊根拏等語所辦甚是前蔣炳已將該犯押解湖廣嚴審根追計楚省督撫接據密咨並收到盤獲之犯自必速行查究該犯之是否果係李正南及所供馬朝柱下落是否根訊得實著傳諭開泰等令其即速具奏○實

授呂九如為雲南開化鎮總兵官○豁除廣西永寧義寧三州縣水衝額田一百四十四畝有奇額賦○戊寅上幸南苑行圍○還宮○諭喀爾吉善等奏臺灣澎湖等處颶風頓作沉失商漁船隻坍塌民房田禾間有刮損諸羅彰化二縣被災較重等語臺灣地居海外貧民猝被風災殊堪憫惻著該督撫查明被災戶口加意撫綏所有本年應徵地丁錢糧照例分別蠲緩乏食貧民酌借口糧妥籌接濟其坍塌房間擊沉船隻查明給與修費及掩埋之資仍督飭屬員實心查辦務使災黎均霑實惠至應行撥運內地補倉米穀并著暫停起運留備賑卹之用該部即遵諭行○蘇祿國王蘇老丹嘛喊味麻安柔律嚙遣官表進方物並請入附版圖得旨覽王奏進貢方物具見悃忱知道了爾國遠隔重洋輸誠向化良可嘉尚所請將疆土人丁戶口編入中國之處已允部議

毋庸齋送圖籍。已有旨了。○己卯諭嗣後每年自十一月初一日為始。凡遇祭祀朝集。俱穿貂鑲朝衣。端罩。著為令。○諭軍機大臣等。向來各省有建立生祠之處。原屬相沿陋例。聞川省有大學士公傅恒生祠數間。亦因金川告捷時。該處士民所建。但此本係陋習。虛文。且傳恒現日侍朕左右。而該省建祠供奉。尤覺無謂。著傳諭黃廷桂。令其於此處改奉佛像。或有扁額字樣。亦俱另行更換。可於奏事之便。將此寄諭知之。○又諭各省怡賢親王祠。設立已久。後浙江等省。有改為關帝廟者。所辦甚是。各省俱宜照此。於後殿安設神牌。而前殿或供神佛。或供奉關帝神像。俱可。此亦無關政要。不必張揚。行所無事可耳。著於各督撫奏事之便。傳諭知之。○又諭據班第等奏。稱同兩瑪木特來歸之克爾努特。台吉阿布達什。原同伊弟巴圖爾帶領戶口前來。因被哈薩克錫喇人等搶擄。暫居扎哈沁

地方。今因擒獲瑪木特。前來歸誠等語。阿布達什。原與阿睦爾撒納等。同來投順。因馬力疲乏不前。中途又被刦掠。今據輸誠款附。亦當加恩。著傳諭班第。酌賞阿布達什。緞疋。並照扎薩克台吉職銜。辦給行糧牲畜。歸於阿睦爾撒納部內。併居住。○庚辰。

上御太和殿視朝。文武陞轉各官謝恩。○禮部議准。安徽按察使李治運奏。直隸州知州。有屬縣審轉。及自行承審案件。請嗣後鄉試調取簾官。悉行扣除。從之。○加陝甘總督永常為內大臣。○以貴州都勻府獨山州屬豐寧。下司長官司楊統弟。授襲職。○賑貸順天直隸所屬武清。薊州。霸州。保定。永清。東安。灤州。昌黎。樂亭。高陽。萬全。懷安。懷來。豐潤。玉田。等十五州縣。本年被水被雹。飢民。及旗戶。竈戶人等。其本年應徵錢糧。及積年舊欠。分別蠲緩帶徵。○旌表守正捐軀之河南武安縣民李公妻齊氏。湖南嘉禾縣民李宗和妻張氏。

廣東順德縣民姚景華妻鄭氏○辛巳大學士等會議戶部議駁安徽巡撫衛哲治奏請添給驛丞養廉一摺查前經兩江總督鄂容安奏准將江南驛站錢糧改歸州縣經管驛丞惟承應差使照料餽養今衛哲治以驛丞係分草料之餘潤養贍家口若錢糧改歸州縣經理驛丞無餘潤可沾應行添給養廉等語伏思驛丞管理驛務其弊不止江南一省為然直省驛站錢糧應令均歸州縣經管而驛地止於應差餉馬似不必更設專員現在直省驛丞共二百五員若概行裁汰統歸地方官經理於體制更為畫一但州縣事繁令其兼管驛務倘離城稍遠勢必託之長隨吏役不能保其無弊臣等酌議凡驛站離州縣稍遠地方或量移佐雜照管其買馬辦料及一應驛務事宜仍責州縣官經理但直省各驛與州縣相隔道里遠近應否需用佐雜住守及各佐雜現駐地方可否移駐驛站或仍

應酌留驛丞在驛照料之處應交各該督撫按地方情形定議再福建一省並無馬驛現據總督喀爾吉善題請將驛丞專管驛務之大田等十五驛縣丞巡檢典史兼管驛務之水口等十四驛一併裁改統歸各縣管理并稱佐雜呼應不靈於緊要差務難免貽誤請令各該知縣派委丁屬常川住站督同驛胥料理等語查驛務改歸州縣自屬應行之事州縣勢不能親身在驛料理差使佐雜雖微究係地方職官若州縣派委親屬與驛胥通同作弊更為未便其水口等十四驛應照舊仍令佐雜兼管毋庸更議惟大田等十五驛應如該督所議行其如何酌派佐雜住站承辦之處並令該督撫妥議具奏從之○是日起

上以冬至祀

天於

圜丘齋戒三日○壬午軍機大臣等奏現派訓

練遣往西路綠旗兵丁臣等選得熟習長鎗之健銳營前鋒校五員藍翎長四十五名副前鋒叅領岱清阿一員令試用副將達吉等分起帶往陝西交協督劉統勳分派各營教演仍令達吉等照料再此項官兵俱係派往西路應交各該處將伊等應得之項照例辦給令馳驛先行起程到陝時應得口糧交該協督酌給從之○以太僕寺卿陳兆崙為順天府府尹○癸未

上詣

南郊齋宮齋宿○諭軍機大臣等據碩色等奏沙匪阮忠鎮等攻占猛梭寨城隨調土練八百名並派遊擊馬秉祥帶領兵弁相機驅逐該遊擊先令千把往探虛實詢據沙匪俱搬移慢毛地方現差土練前往查探等語沙夷互相攻殺亦常有之事但當相機曉諭彈壓原不必煩內地兵力該督等遽行調撥土練官兵至八百名之多已屬辦理失宜但既已

調兵據奏在猛沙匪不過三四十人何難迅速驅逐乃遊擊馬秉祥並不親往猛城僅令千把往探虛實及知沙匪竄往慢毛即應帶兵追逐復祇令土練前往查探似此遲迴退縮乃綠旗向來陋習貽誤軍機皆由於此該督等即當嚴叅治罪如係有心玩誤即以軍法從事碩色愛必達辦理此事殊覺寬縱著傳旨嚴行申飭○又諭策楞舒赫德俱係身受重恩之人乃自到軍營以來畏懦退縮辦事乖謬朕原降諭旨令班第取具伊二人供詞奏到日再行治罪今覽班第奏摺伊二人自認重罪俯首無辭若論軍法當即在軍營正法示衆但朕念其平日差遣奮勉在內廷行走有年著格外施恩免其正法仍留軍前効力贖罪至於明歲大兵進征之時策楞舒赫德俱不必同往所有糧餉事務著派永貴溫福隨同辦理○以收服烏梁海功加貝勒青滾雜卜郡王銜公車布登扎布貝子銜○

調河南河北道胡振組來京引見○甲申冬至祀

天於

圜丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○詣

皇太后宮問安○幸圓明園○乙酉

上啟鑾幸避暑山莊○是日駐蹕密雲縣行宮

○丙戌駐蹕常山峪行宮○丁亥輝特台吉

阿睦爾撒納杜爾伯特台吉訥默庫等率衆於廣仁嶺恭迎

聖駕是日國簿全設

上至避暑山莊駐蹕至甲午皆如之○御行殿

召見輝特台吉阿睦爾撒納等賜宴賞賚有

差○戊子

聖祖仁皇帝忌辰遣官祭

景陵○加輝特台吉阿睦爾撒納等封號諭大

學士等輝特台吉阿睦爾撒納杜爾伯特台

吉訥默庫和碩特台吉班珠爾等皆準噶爾

渠帥嚮慕德化率領二萬餘衆傾心來歸甚

屬可嘉應施恩賞給封號以示懷柔至意阿

睦爾撒納封為親王訥默庫班珠爾封為郡

王杜爾伯特台吉剛多爾濟巴圖博羅特輝

特台吉扎木叅齊木庫爾封為貝勒杜爾伯

特台吉布圖克森額爾德尼羅壘雲端輝特

台吉德濟特普爾普克什克封為貝子輝特

台吉根敦扎布固木扎布杜爾伯特台吉布

顏特古斯。孟克博羅特。和碩特台吉納噶察封為公。杜爾伯特台吉烏巴什。伯勒克輝特台吉伊什克什克特封為頭等台吉。均授為扎薩克。管轄所部人戶。其如何編次旗分佐領。補授官職之處。著該部照例辦理。阿睦爾撒納等受朕恩育。務將各該屬人等。慎加約束。教養。勉供厥職。安分謀生。爾等果能仰副朕心。遵循訓旨。則永沐朕恩於無既矣。慎之毋怠。○又諭。朕前因郡王訥默庫原係杜爾

伯特台吉。曾降旨令附入該部落。與王車凌車凌烏巴什等同居。但地方人衆。若不分設盟長。勢難統轄。所有杜爾伯特賽音濟雅哈圖部落。著親王車凌為左翼盟長。貝勒色布騰為副盟長。貝勒車凌孟克為協理盟長。郡王車凌烏巴什為右翼盟長。郡王訥默庫為副盟長。均令各轄所屬。○又諭。舒赫德。毋庸照料。阿睦爾撒納等游牧。著唐喀祿專行照料。舒赫德。即同永貴溫福。辦理糧餉事務。○

以輝特親王阿睦爾撒納。為北路叅贊大臣。杜爾伯特郡王訥默庫。為西路叅贊大臣。○已丑。

上御行殿。輝特親王阿睦爾撒納等率衆行謝恩禮。是日設鹵簿。鳴鞭奏樂。如大朝儀。○賜阿睦爾撒納等宴。○新降厄魯特台吉阿布達什。請在軍前効力。允之。○諭曰。劉統勲奏稱官兵奉派出征。其本任養廉。本兵月餉。例應照舊支領。請將陝甘出征滿漢官兵。明年

秋季應得養廉月餉。移於夏季起程之前支領等語。著照所請。陝甘二省出征官兵。明年秋季應得養廉月餉。俱准其移於夏季起程之前支領。以裕戎行。○又諭曰。班第等收取烏梁海。將曾經効力蒙古王公大臣官兵。查奏前來。班第薩喇勒等。此次收取烏梁海。實心奮勉。朕已加恩。將班第薩喇勒俱賞子爵。補授領侍衛內大臣。并賞給青滾雜卜郡王銜。車布登扎布貝子銜。其郡王班珠爾等俱

恩賞緞銀外。今加恩貝子車木楚克扎布賞給貝勒銜。總管阿敏道賞給副都統銜。努三烏勒登。公恭格。敦丹。巴圖孟克。扎薩克。台吉。三都布多爾濟。協理台吉。沙克都爾扎布等。俱交該部議敘具奏。再曾經効力台吉侍衛官兵人等恩賞之處。班第仍照近降諭旨遵行辦理。○諭軍機大臣等。班第等奏據接取通瑪木特眷口之巴顏岱回稱。前至包沁游牧處所。俱已逃竄。通瑪木特眷口。現在額爾齊斯地方暫住。俟包沁人等逃竄後。始行前來等語。著通瑪木特自往接取眷口。並寄知班第等。如欲帶庫克新瑪木特四五十人前往。或帶察哈爾兵。均無不可。著派厄魯特侍衛二三員。幫同接取。並令通瑪木特沿途遇有準夷人等。告知烏梁海扎哈沁人衆。現蒙大皇帝施恩收納。牲畜物件。絲毫不取。仍舊安插本處。爾等如肯投誠。亦照伊等例。得受重恩。倘有投誠者。即令通瑪木特與伊眷口

一同前來。如通瑪木特尚有躊躇。亦毋庸遣往。仍令同庫克新瑪木特來京。再此事曾交軍機大臣等詢問阿睦爾撒納。據稱大皇帝如此體卹辦理。諒彼處聞知。自必向化。著一併寄知班第等。仍速行覆奏。○又諭。據楊應琚。鶴年所奏。佛蘭哂國夷目。時噶。時。槍傷。啖。咭。喇。國。水。手。喳。啞。啞。啞。身。死。一。案。外。洋。夷。人。互相爭競。自戕同類。不必以內地律法繩之。所有時噶。時。一犯。著交該夷船帶回。佛蘭哂國。并將按律應擬絞抵之處。行知該夷酋。令其自行處治。該督撫仍嚴切曉諭各國夷船。嗣後毋再逞兇滋事。並不時委員彈壓。俾其各知畏法。安分貿易可也。○廣西提督史宏諱。奏。前經湖北巡撫張若震奏請。各營兵入伍。及拔補千把。取原籍印甘各結一摺。經部議准在案。查籍貫有遠近。即行查有難易。且文移往返紛繁。請嗣後募兵。仍照舊例。止令開報實在姓名年貌籍貫。取具保結存案外。

至拔補外委。實營員進身之階。應無論本省外省之人。必取原籍印甘各結。以備稽查。得旨。著照所請行。○庚寅

上御萬樹園。幄次。賜親王阿睦爾撒納等宴。豫宴宗室王公。蒙古王公台吉暨文武大臣等。各賜表裏有差。○諭軍機大臣等。前降旨。賞給車凌阿睦爾撒納等。上三旗旗色纛幟。但據阿睦爾撒納等。俱稱所用舊纛。每到準噶爾地方。彼處人衆。易於識認。投降甚便等語。明年進兵時。著仍用伊等舊纛。如有損壞。著班第等修補發給。其前賞給旗纛。著暫行收貯。俟有應用之處。再行取用。班第即遵旨辦理。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十六

大清高宗法天隆運至誠先覺體元立極敷文奮武孝慈神聖純皇帝實錄卷之四百七十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌十一月辛卯賜輝特親王

貴族世襲官

十

一

阿睦爾撒納等宴至甲午皆如之○諭軍機大臣等據班第奏收服扎哈沁人內查出隨同巴朗潛逃之沙拜等二十五名已咨送納木扎勒令同車凌等查明辦理沙拜等既已投誠又同巴朗潛逃情殊可惡亦不必查問即著押解來京發往廣東福建炎熱地方安插○又諭明年進兵時西北兩路最關緊要薩喇勒感激朕恩辦理諸務甚屬奮勉且於西路情形尤為熟悉是以派在西路軍營幫

永常辦事但不曉清漢語言而永常亦不諳蒙古語商議事務兩意不能曲達額琳沁多爾濟自到軍營一切事宜亦甚勇往擬即授為西路參贊大臣可寄信班第傳諭額琳沁多爾濟令回伊游牧暫行休息治裝豫備○又諭據班第等奏扎哈沁人眾俱係軍威收服若將伊等遷移內地令在扎布堪庫克嶺等處安插似屬妥協其所出得木齊收楞額之缺請以瑪木特保薦之人補授令齊齊克諾爾駐防兵丁在庫布克爾等處駐防就近照料令努三帶兵二千名駐劄庫布克爾地方令烏勒登等帶兵一千名駐劄薩爾托羅該地方等語今欲將扎哈沁人眾內徙者必係烏勒登努三意見且努三因奉派照管此項人眾愈為過慮所致何也今若恐哈薩克錫喇領兵前來此時正值嚴冬馬匹疲瘦之際彼如能來則我亦早進兵往擒巴朗况扎哈沁人眾如不可安置齊拉罕地方則薩喇

勒在彼時。果已籌算及此乎。今努三等稱與班珠爾齊木庫爾已公同商議。是伊與伊等索取憑據矣。班珠爾齊木庫爾俱係新降之人。伊等焉肯不計出萬全。但此次辦理準夷。雖應特重。然小心過甚。反恐於事有誤。著寄信班第。此次扎哈沁人衆既已遷移內地。著照伊等所奏行。明年大兵進時。祇宜揆之機宜。不可諸事過慮。著令伊等知之。再前曾降旨。遣通瑪木特接伊眷口。並寄信令班第詢問。今雖將伊等內徙。班第仍應問明通瑪木特。再行遣往。伊如去而復來。則我可知其心。即或不來。止少一人耳。於我何損。著寄與班第。即令照此辦理。○戶部議覆黑龍江將軍達勒當阿等覆奏齊齊哈爾等處。本年被水。將八旗水師營驛站官莊口糧不足人等撥糧接濟。查齊齊哈爾城需糧三萬一千一百餘石。黑龍江城三萬三千一百五十餘石。墨爾根城二萬一千一百九十餘石。均於本處

公倉及備存倉糧撥給。再呼蘭收成七分。間有被水官莊。業交該城守尉。於本處備存倉內。借給口糧一千四百七十餘石。來秋照還。其官莊籽種牛料。照例給予。再齊齊哈爾等四處被水成災官莊。不能滿交額糧。請照定例免交等語。查黑龍江墨爾根二處。所給糧數與例不符。應令照例辦理。餘均如所請行。從之。○壬辰。諭。今歲夏秋積雨。淮揚下河等處。復被水災。所有災地戶口。現已加恩撫賑。而在城無業貧民。以及鰥寡孤獨之人。當此歉歲寒冬。餬口維艱。實堪憫惻。著交與該署督尹繼善。該撫莊有恭。查明被災較重州縣。在於各城設廠煮賑。所需米石。即照上年之例。於截漕項下。不給丁五米內動支。該督撫等。其董率屬員。加意經理。務俾窮黎均霑實惠。該部遵諭速行。○諭軍機大臣等。逃人已朗。所在地方。詢問新降宰桑察達克。據稱。離我前者進兵之地。甚近。若未避去。給兵五百

情愿前往擒拿。已朗於進兵時。未必不遠避。今我兵已回。必仍回至原地。著派侍衛圖倫楚。帶同察達克。馳驛前往。由軍營揀派兵丁。急速前進。務期擒獲已朗。以彰國法。著傳諭班第等。就近選派精兵五百名。多給馬匹。駝隻。再派瑪木特屬下兵二百名。豫為整備。俟圖倫楚察達克到日。即行帶領起程。○又諭曰。班第等奏。請將收服之扎哈沁人等。遷至內地。扎布堪庫克嶺等處居住。此事斷不可行。伊等如此辦理者。特慮扎哈沁人內有存二心之人。潛行逃竄。又慮噶勒雜特。哈薩克。錫喇兵來搶奪之故。此皆未審事之機宜。所慮殊屬過當。我兵未收服烏梁海扎哈沁之前。或恐新降人等逃往送信。理宜防範。今車凌阿睦爾撒納俱已來降。又將烏梁海扎哈沁人等收服。準夷全部。早有見聞。不但一二不足信之人。逃往原不足惜。即使洩漏信息。彼知我收其屬部。明年兩路進兵。大加征勦。

不過愈加驚怯耳。更有何慮。若恐其遣兵搶奪。即達瓦齊發兵前來。若人數不多。我兵以逸待勞。儘堪勦滅。即能以大力搶回扎哈沁。不過如我未收扎哈沁而已。於我未為傷損。而轉可以試看達瓦齊之力量。明年易於進兵。今方欲辦理準夷。若將投誠之人。均如此遷居內地。明年進大兵時。收服各部。又將何以辦理乎。著班第等將扎哈沁人等。仍令居住齊拉罕地方。斷不必移至內地。○又諭著寄諭班第。令其來京。陛見。此際著阿睦爾撒納前往暫署將軍印務。令額駙色布騰巴勒珠爾協辦。阿睦爾撒納於本月二十日。即令由熱河起程。大約兩旬即可到彼。伊到後。班第酌留一二日。將彼處一切事務。明白告諭。即起程迅速來京。○又諭據開泰等奏。稱河南汝州拏獲之逆犯李正南。實名徐名取。並非實在李正南等語。李正南一犯。在豫省盤獲之時。自認鑿鑿。何以至楚悉行翻改。始將

原名供出。人雖至愚。豈不知謀逆罪重。乃因私賣伊妻。不敢回家。遂爾混認逆犯姓名。避輕就重。尤屬情理所無。總之外省習氣。往往推卸了事。該犯在豫。即或不免於畏刑。混供。然使實屬李正南正身。而聽其狡飾。又復覲面失之。則更不可。著開泰張若震等。再加確訊。所有川省解回。曾為李正南挑腳之周紹珍。不必解交安省。即傳諭蔣炳。令署汝州知州。王如玖。前赴楚省。提同在案各犯。逐一研訊。務將實情。據實奏聞。該督等。不可稍存迴護之見。亦不可勉強附會。使貌似之人。無辜受戮。而實在逆犯。轉得安然竄匿也。○調親王車凌等。帶兵一千名。同郡王車凌烏巴什等兵。前往西路軍營。郡王訥默庫等。帶兵一千名。同親王阿睦爾撒納。郡王班珠爾。及杜爾伯特等兵。前往北路軍營。○癸巳。軍機大臣等奏。從前鄂爾坤等處屯田。皆派綠旗兵。今額爾齊斯地方屯田。軍營現有綠旗兵三

百名。再於喀爾喀兵內。擇通曉耕種者七百名。共為一千。令其屯田。應令恆文富昌。撥大麥等項籽種五百石。務於正月內送到。並行文班第。將現有農具查出。令其領用。從之。○禮部以蘇祿國奉表入貢。奏請賞賚。得旨。著照雍正五年之例加賞。其緞匹。令該部豫備玉器磁器。由內給發。○甲午。遣官祭先醫之神。○以進勦達瓦齊宣諭準部。詔曰。誕告爾準夷有衆。昔爾台吉噶爾丹策零。祇服朕訓。恭順無失。朕嘉其誠篤。二十年來。疊沛恩施。俾爾有衆。各得休息。逮策妄多爾濟那木扎勒。承襲台吉。朕復加恩。悉如其舊。乃策妄多爾濟那木扎勒。賦性暴戾。不恤其衆。喇嘛達爾扎。因而篡弒。於時曾欲代申天討。殲此逆亂。念噶爾丹策零後嗣。惟有喇嘛達爾扎一人。用是恩施格外。未加勦除。達瓦齊以噶爾丹策零臣僕。敢行篡弒。致噶爾丹策零後嗣滅絕。且又殘害同人。酷虐其下。敗壞

黃教。悉令還俗。朕念噶爾丹策零恪恭敬順。事朕有年。安忍視其宗滅地亡。使枉席黎元。流歸左道。又值杜爾伯特台吉車凌車凌烏巴什。輝特台吉阿睦爾撒納等。不勝其虐。率屬投誠。朕君臨天下。一視同仁。車凌等滙誠祈請。朕焉有不收留撫養之理。是以特沛殊恩。悉皆加爵晉秩。其屬下宰桑。亦予官職。及銀緞產畜。俾得安居。然使安置於喀爾喀地方。不免侵占游牧。互相雜處。殊為無益。不若仍居舊地。為尤善也。今為爾衆兩路興師。北路命將軍班第。阿睦爾撒納。西路命將軍永常薩喇勒。率兵前進。平定準部。以為車凌阿睦爾撒納。人衆復業之所。爾夷衆有車凌阿睦爾撒納族屬。欲行內附者。朕亦一體施恩。其餘有衆。如謂達瓦齊既弒其主。又絕人嗣。思念大義。不甘為彼臣僕。慕朕德化。抒誠來降者。朕亦同車凌。阿睦爾撒納等。一體撫卹。使居原游牧處。不令他徙。總之先來者先受。

朕恩。後來者後蒙朕惠。即使達瓦齊能痛改前非。輸誠投順。朕亦一體封爵。不令失所。爾等如不曉朕憐念夷衆喪亡。弱於左道。拯諸水火之意。不知大義所在。仍懷觀望。或敢抗拒者。大兵所至。必盡殲除。爾等其詳求朕諭。熟思利害。善自裁擇。勿遺爾悔。為此誕告。○改湖南乾州鳳凰永順龍山保靖桑植芷江永定等八廳縣訓導以教諭銜管事。從巡撫胡寶琛請也。○乙未。

上自避暑山莊。啟鑾回京。○授喀爾喀副將軍額琳沁多爾濟為西路叅贊大臣。以郡王銜青溪雜卜。辦理軍營駝馬事務。○是日。駐蹕兩間房行宮。○丙申。諭軍機大臣等。著再寄信鄂昌。如噶爾丹多爾濟誠心投降。務將伊屬人衆。妥為安插。一面派駐劄哈密之章京索諾木。照料護送來京。仍將車凌阿睦爾撒納等。歸降後。蒙大皇帝施恩封賞之處。曉諭噶爾丹多爾濟。令其即速起程。並諭綠營護

送兵丁。勿得任意欺凌。致滋携貳。鄂昌即遵旨妥協辦理。○吏部等部議覆前任兩江總督鄂容安等疏稱。鳳陽府向未建城。於體制未協。應請添築。於鳳陽縣城內外舊存廢磚。拆運建造。又臨淮縣頻遭水患。城署衝坍。請歸併鳳陽縣轄。其臨淮縣知縣。縣丞。教諭。訓導。典史五缺。應裁添設巡檢一員。駐臨淮舊城。專司遞解撥護。及稽查地方。夫馬錢糧。仍歸縣管。並設立弓兵十二名。民壯十八名。皂役二名。門子馬夫各一名。鳳陽縣添設主簿一員。並設皂隸四名。門子馬夫各一名。至臨邑防汛弁兵。沿途鋪兵。及額設孤貧。應請存留。其縣前鋪司二名。並門皂馬快等役。均裁改設門軍八名。又新設主簿。巡檢。及向無衙署之鳳陽縣教諭。訓導。均應估建。鳳邑縣署亦應修理。至鳳邑監獄。如不敷酌估添建。至養濟院。鳳臨兩處。年久坍塌。向係散處寺廟空房。今請於鳳陽縣城內估建。再常平倉。鳳

邑原貯米一萬八千石。毋庸加增。其臨邑貯米一萬四千石。併入府倉為額。至二縣原定養廉各六百兩。今歸併一縣。應增四百兩。主簿。巡檢。各給養廉六十兩等語。均應如所請。至所稱兩邑入學。并廩增各數。仍留舊額之處。查鳳陽額取二十五名。臨淮十六名。若歸一學取進。於額制未協。應將原隸臨邑生童。另編為臨淮鄉學字樣。照數取進。其廩增出貢。悉依舊例。武童一體辦理。并將鳳邑訓導分撥臨淮。又稱鳳陽府屬宿州。地方遼濶。請添設州判一員。臨渙鎮添設一汛。於宿州各汛內撥馬守兵十名。並於就近各營內酌派外委一員管束。又潁州府屬亳州。回漢雜處。請於義門集添設巡檢一員。並建衙署等語。亦如所請行。從之。○戶部議覆倉場侍郎雙慶等疏稱。白糧經紀。并土壩車戶等剝船。已滿十運。例應另造。但聞河剝船。與漕船經涉江黃者不同。請嗣後行運十五年。方准更換

等語。應如所請。從之。○旌表守正捐軀之江西湖口縣民余廷賢妻段氏。廣東新寧縣民鄧亞長妻黃氏。○是日。駐蹕密雲縣行宮。○丁酉。諭軍機大臣等。前據納木扎勒奏。車凌孟克因伊子巴朗逃走。亦欲同逃。朕已傳諭班第。令其密飭邊卡大臣。妥為防範。阿睦爾撒納抵軍營時。班第可將此事告知。並曉諭車凌孟克。大皇帝欲信用爾。加恩授爾為叅贊大臣。並無疑爾之處。仍令阿睦爾撒納。留心伺察。○又諭曰。舒赫德奏。運解推河米石。除支給訥默庫等口糧。其餘運至塔密爾存貯一摺。此項米石。係接濟新降人等。甚為艱迫。何得尚稱有餘。再軍營大臣等奏事。應告知將軍代奏。現在阿睦爾撒納。護理將軍印務。伊等紛紛陳奏。使蒙古人衆。滋生疑慮。且於體制不合。嗣後軍營大臣。如有帶兵機務。仍著專摺具奏。若祇係尋常事件。俱著告知將軍。令其轉奏。可寄信班第。曉諭該大臣等。

知之。○又諭據班第等奏。將烏梁海人衆編設旗分佐領。著照所奏。宰桑車根赤倫。著授為三品總管。副都統銜察達克。著授為總管。喀喇巴圖爾阿玉錫。著授為扎哈沁四品翼長。侯庫克新瑪木特。到時。朕意欲授為散秩大臣。並補放總管。至庫克新瑪木特等。請令扎哈沁等。在扎布堪等處屯田。適據阿睦爾撒納奏定。明年二月進兵。即在額爾齊斯等處屯田。著瑪木特等。即往額爾齊斯耕種。應需籽種。著加恩賞給。○又諭。前降旨。令圖倫楚察達克等。帶兵擒拏巴朗。並令班第豫備兵馬。俟圖倫楚等到時。即令帶領起程。但伊等啟行甚速。著再寄信班第。令即豫備齊全。勿致臨時遲誤。若圖倫楚等去時。正值通瑪木特眷口到來。途次遇見。著派妥員護送。軍營。再阿睦爾撒納前去時。身體不適。已降旨令暫回游牧休息。並令色布騰巴勒珠爾。先赴軍營。署理將軍印務。班第來京時。順道至

彼處看視。并告知軍營一切情形。令其前赴軍營。署理將軍事務。方有裨益。○又諭。聞得臺灣米價甚貴。每石至二兩三錢。臺郡素為產米之鄉。即內地之漳泉諸郡。方且資其接濟。價貴如此。該處民番雜居。風俗刁悍。一切彈壓地方。尤當豫為留心。毋致滋生事端。可傳諭該督喀爾吉善。令將臺郡米價。現在有無平減。民番情形。是否安貼。並應作何設法調劑。及如何撫綏彈壓。以裕民食。以安海疆之處。一面辦理。一面作速據實奏聞。尋奏查臺郡商船。每歲帶運糶濟漳泉。餘米二十萬石。又北路社船十隻。帶穀回廈。糶賣。亦有數萬石。又徵收供粟。運赴內地。支給各營兵穀。八萬餘石。臣現將官穀停運。商船餘米減半。社船禁止。以裕臺屬儲備。至現在臺郡及鳳山。諸羅。彰化。等縣米價。每石二兩二錢及五錢不等。總由民間積穀之家。不肯廣糶。以致價未能平。至臺地災民。現在撫卹口糧。足資

民食。惟該處青黃不接。轉在隆冬。查各屬現積穀四十萬石。當批飭速於歲內開倉。分賑平糶。并密飭鎮道大員。董率稽查。節據稟覆。各邑被災後。民番寧帖。實無滋事。得旨覽奏。稍慰。臺穀既不撥運。則漳泉青黃不接之時。亦宜一併慮及。○是日。駐蹕湯山行宮。○戊戌。

上迴圓明園。○吏部議奏。湖南。湖北。雲南。貴州。等省。俸滿各員。請照兩廣之例。知縣以上等官。令該督撫確查政績。保題陞用。其州同以下等官。令出具考語。咨部候陞。從之。○兵部議覆。署兩江總督尹繼善疏稱。江浙太湖左營守備。現改為副將。中軍都司。兼管左營事。請鑄給江浙太湖營水師中軍都司關防。至左營守備。向在簡村。今改都司。移駐東山。原營汛地。另設千總分駐。都司已無專責。其左營千把。并右營守備千把員弁。應悉歸都司兼轄。副將統轄等語。應如所請。從之。○工部

議准河東河道總督白鍾山疏稱壽張縣張秋鎮一帶地勢低窪積潦難消應添減水閘三座從之○裁河南夏邑縣會亭驛武陟縣寧郭驛澠池縣義昌驛等驛丞三缺以驛務歸縣添設南陽縣賒旗店信陽州楊家堂等巡檢二缺從巡撫蔣炳請也○己亥

上詣

皇太后宮問安侍宴○還宮○諭曰班第奏稱都塔齊往說瑪濟岱所收服之十八戶烏梁海請毋庸賞給都塔齊等語從前朕以此項人等係都塔齊所收且人數無多是以降旨賞給今覽班第所奏從前都塔齊冀得此項人等於原報人數有意從少且伊等皆與都塔齊一體今將伊等賞與都塔齊將來降者聞知必致遲疑於事無益班第並未拘泥前旨所辦甚是此十八戶人口牲畜無庸賞給都塔齊即令察達克等兼管或該宰桑等隨後來降或將眾烏梁海人眾全數收服時再

行合併安插亦無不可○以直隸宣化鎮總兵福祿廣東右翼鎮總兵丁大業對調直隸正定鎮總兵田英雲南永北鎮總兵馬化正對調○庚子

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門眾官於午門行禮○奉

皇太后幸靜怡軒重華宮侍宴○諭軍機大臣等劉統勲等奏酌帶賞需一摺內稱準噶爾頭目如果有交納軍器實心向化者應酌予賞賚等語所奏非是準夷投誠人眾所需軍器若令其一一交納則是激之使反拒之使不來既阻其向化之誠復啟其疑貳之漸焉有如此辦理之法若果應行獎賞則當其率眾歸誠朕自有格外加恩之處如近日

北路之阿睦爾撒納等來降。何嘗不厚加寵錫。如其投誠交納器械。軍營將軍即行議賞。則是以我財幣。賄誘來降。幾似利其所有而為之矣。況橐載鉅萬而往。是啟賊人以搶掠之門也。此從前岳鍾琪等辦理錯謬。豈可復踵前弊。劉統勲原係漢人。軍務非所諳練。鄂昌外任年久。乃亦漸染綠營惡習。為此陳奏。甚屬不合。著飭行。至另摺奏。五十六帶領察哈爾兵丁。支領口糧火藥之處。從前原議令其隨帶兩月口糧。緩程前往。其經過處所。尚可打牲行圍。以資口食。豈必按日計算。且察哈爾兵丁。從無揀演之例。即應行揀演者。既到彼處。亦宜停止。再無需用火藥之理。明係五十六借此希圖侵冒貨賣。劉統勲等據此辦理。直為伊所朦蔽。所有支領火藥。著悉行追繳。五十六如此居心。豈可令在軍營。已有旨。拏交刑部。著劉統勲等即行派員押解來京。○辛丑。

上諭

皇太后宮問安。○幸瀛臺。○諭曰。長蘆鹽政。普福奏蘆東衆商情願捐銀三十萬兩。稍充軍營賞需之用。且援金川之例為請。此甚非是。金川用兵。適當朕普免天下錢糧數千餘萬之後。又值江南水災。賑濟撫卹。需用過多。是以於兩淮蘆東浙閩等處。各商之急公捐輸者。不便阻其報効之忱。俯允所請。其實於軍需所費。何裨萬一方。今國家全盛。府庫充實。適當準夷投誠者。接踵而至。應籌其游牧俾令久安。且彼內亂。機有可乘。此不過以餘力舉之。已屬裕如。而近年以來。各省年穀順成。倉儲豐羨。即去秋淮徐諸郡。被水成災。賑卹所需。亦不下數百萬。而每歲冬。季八旗兵丁諸賞賚。按例舉行。並不因西北軍需。於應用帑項。稍存裁節之見。統計經費。仍復有贏無絀。何至遽以商捐為請耶。向來偶遇軍興災賑之事。不知輕重之人。多思藉以開例報捐。

然果使籌餉揀荒動煩經畫則捐輸踴躍原屬臣民忠愛之誠而此時則殊可不必況天地生財貴於流通庫藏所積既多而臨事又復別籌取益殊非用財大道朕所不為軍需所費邊境藉以流通即內地商民亦均為有益普福此奏所見甚小著傳旨申飭恐各省復有踵而行之者是用明降此旨諄切曉諭令內外諸臣共知朕意○諭軍機大臣等劉統勲等奏本省採買駝馬數目一摺內稱於十月收槽飼餵等語北路兵丁現在酌議於明年二月分起先進若籌辦既定將來西路兵丁亦應於明年二月先進數千馬匹關係甚為緊要必加意飼餵使臆滿壯健始足資用若餵養官員稍有侵剋則料草雖按數報銷而未必一一盡歸實用馬不能言徒滋官役中飽著傳諭劉統勲等令其留心查察實力妥辦毋任綠營官弁蹈其故智致馬匹臆分不足咎有攸歸矣○又諭舊有喀喇沁臺

站及現設臺站明年進兵時隨營安設臺站俱交兆惠富德總理自張家口臺起至喀喇沁臺仍令達松阿管理自喀喇沁臺以外及新設喀爾喀臺站交將軍班第或於喀爾喀副將軍或於扎薩克大員內揀派賢能二員亦令如達松阿惠色一律管理○壬寅上御乾清門聽政○諭現今派往西北兩路進勦兵丁於明春陸續自京起程每兵二名帶跟役一人恐有中路逃回者該兵丁等既按程前進斷無逗留緝捕之暇是應責成各該地方官著步軍統領及沿途各督撫先期派定捕役兵弁隨營防護留心查緝如有攜帶軍器及衣服銀兩潛逃者獲日以軍法從事即行正法並於沿途張示曉諭并令領兵大臣官員等勤加查察其有兵丁跟役私逃者即令交派出之捕役兵弁嚴緝一面報部彙奏倘不能嚴速緝獲定將該督撫從重治罪○癸卯諭軍機大臣等據值年旗查奏賞給

功臣為奴。現在脫逃人犯一十五名。著將各犯年貌籍貫。脫逃月日。及犯事案由。鈔寄各該督撫。勒限所屬嚴行查緝。獲日解京。數月後有無拏獲之處。具摺奏聞。○又諭著寄信班第現詢問達木丕勒。據稱從庫克新瑪木特舊居之布拉罕察罕托輝帶兵。由哈達青吉勒阿里克臺。哈喇額爾齊斯行走。不過三日。可抵巴朗等所竄奇蘭地方等語。前遣圖倫楚察達克等擒拏巴朗。如抵軍營後。尚未起程。班第即曉諭伊等。令速行前往。務期擒獲。如已起程。著派妥員。將此旨寄伊等閱看。速令成功。○又諭曰。班第奏據投誠之厄魯特格勒克布庫努特呈報。庫本等七十餘人來降。俟審察投降屬實。令撥給騎獸。前往接取等語。庫本等七十餘人。如果誠心歸降。若令遷往內地。辦理更費周章。昨已將扎哈沁人等補放得木齊收楞額。責令駐劄管理。此項來降人眾。即交得木齊等兼管。較為妥協。

著寄知班第。令其遵旨辦理。再此次收服烏梁海扎哈沁人眾。俱已編立旗分。添設佐領。總管副總管等官。均由班第奏請補放。但新降人眾。不能明悉內地官階。嗣後除佐領以上官員。著班第照例補放。其得木齊收楞額舊名。無庸裁去。○以大理寺少卿張映辰。為太僕寺卿。○以編修謝溶生。充日講起居注官。○以工部侍郎吳達善。兼鑲藍旗滿洲副都統。○甲辰。

上詣

皇太后宮問安。○幸瀛臺。○諭軍機大臣等。據署甘肅布政使史奕昂奏。西路進剿兵丁。由直隸河南。設撥入陝。今准河南藩司咨送直隸鈔冊。照金川例。官兵共宿處所。另備飯食。查撥站應付。既有原給口糧。又供飯食。似屬重複。現擬於甘省各站。廣招鋪戶。多備食物。毋許高擡價值。以便官兵隨便買食等語。所辦甚是。金川案內。直隸河南。於廩糧之外。豫

備飯食。原係該督等均屬滿洲。不過偶給一飯。非每站於廩給之外。又備飯食。不可援以為例。此次出兵。按站行走。自不必另行豫備飯食。前已傳諭直隸河南。令將兵丁沿途飯食。折給錢文。自行買食。此項錢文。即應按其廩糧之數給與。可傳諭方觀承蔣炳照甘省之例。一體豫備鋪戶飯食。聽兵丁自行平價買食。毋庸重複給飯。並將該二省現擬給與錢文。是否即照廩糧數目之處。據實奏聞。○

又諭。前阿睦爾撒納等會議。明歲往額爾齊斯種地一事。業經諭知班第。所有遣兵看守種地人民之處。俟阿睦爾撒納抵軍營後。與班第面酌辦理。今據舒赫德奏。由扎薩克採買馬匹。逾期始至。均欠贍壯等語。看來此項馬匹。必須豫為籌辦。著寄知班第。令將軍營現有馬匹。並從前護送採買馬匹內。選擇備用。如不足額。即會同青滾雜卜於喀爾喀游牧處所馬匹。選取備撥。○是月。江西巡撫范

時綬奏。違犯馬朝柱日久未獲。現飭屬加意查拏。得旨。汝等徒為是言。何嘗盡心緝捕。若各督撫其言果實。則馬朝柱能翼而空行乎。○新授浙江巡撫周人驥奏。請陛見。得旨。汝新陞見而去。不必來莫生滿足之念。一切實力認真。浙省風氣澆浮。切不可為好名之事。○閩浙總督喀爾吉善奏。閩省藤牌兵精悍靈便。現在西北兩路分勦準夷。如需用。即選派前往。得旨。朕此次即滿兵亦不多用。仍以新歸順之厄魯特。攻厄魯特耳。福建藤牌雖好。恐過阿爾台。即凍僵而無所施技耳。○福建臺灣總兵馬大用奏。臺屬早稻豐收。晚稻雖被風稍歉。民情安帖。得旨。汝但奏民情安帖。而一切鎮靜彈壓之處。全未奏及。非留心海疆之道也。○湖南巡撫胡寶瑤奏。郴州。二州銅鉛各廠。向係專員董理。一年期滿更替。但礦務繁多。驟易生手。弊竇滋生。請先期選派新員。令赴廠與舊員協辦。俟熟悉一切。然

後屆期接替。免致交代疎漏。得旨覽奏俱悉。
○協辦陝甘總督尚書劉統勲等奏。承准廷議。遴員購買馬駝。今買獲馬七千三百二十九匹。駝七千五百六十三隻。查西路進剿兵丁。共約需戰馬五萬八千九百餘匹。駝一萬四千八百餘隻。有本省營馬。涼州滿兵自騎。本馬東晉北口解來馬。合現買馬共六萬五千七百餘匹。本省備戰。及餘牧孳生。合現買駝共一萬五千六十一隻。馬駝俱已充裕。青海及沿邊地方。所產馬駝。原屬有限。此次購買。非甚從容。臣等度既足用。已飭停買。得旨所辦尚妥。○陝西巡撫陳宏謀奏。由郃陽韓城等處。行抵延榆。查勘沿邊一帶情形。親見民人樂業。商販流通。其延榆二郡地近鄂爾多斯。每年內地民人。租種夷地。彼此相安。蒙漢不分畛域。雖該處邊牆間有殘缺。而夷漢一體。可以無庸議修。惟定邊靖邊兩縣。牆外草地。常有水患。現飭地方官設法疏濬。得旨

覽奏俱悉。具見一切留心。但鄂爾多斯蒙古。乃屬世僕。不應目之曰夷。此皆俗吏刀筆之談。如云夷漢蒙漢等語。甚屬不經。朕惡觀之。此後但稱蒙古漢人可。○吏部尚書管四川總督黃廷桂奏。據前任總督慶復。巡撫紀山議奏。將天全州境內紫石關。改建仙人橋。峨眉縣屬太平墩。建造城署營房。移駐守備。添撥兵丁。經部覆准在案。後因瞻對。金川。連歲用兵。延擱未辦。臣思設關移兵。原為彈壓重地。今查紫石關。乃通爐僻徑。並非要隘。打箭爐久隸內地。土民恭順。絕無絲毫滋事。至太平墩。雖路通涼山。並不逼近夷巢。若無故建城添兵。不惟糜費帑項。轉致野夷猜懼。非鎮靜安輯之道。所有原議改設添駐之處。均請毋庸興舉。得旨甚是。○兩廣總督楊應琚奏。粵西興安縣陡河。俗名北陡。為轉運楚米。流通商貨之要津。久未修濬。壩身坍塌。河流漸致淺涸。舟楫難通。臨桂縣陡河。俗名南陡。下

達柳慶。既田運鉛。亦關緊要。近日陡壩傾頽。且有陡門相離太遠。並需酌添開壩之處。均請動項興修。得旨。如所議行。但期帑歸實用。永資保障可耳。○廣州將軍錫特庫奏。前據福州將軍新柱奏。福州駐防。請照舊例。將領催等豫行揀選保送。覆准在案。查廣州駐防八旗防禦。驍騎校等員。遇有缺出。向係將記名領催。派委代理。廣州距京較福州尤遠。其從前揀選領催。豫行保送之處。請照舊辦理。得旨。著照舊例行。○貴州巡撫定長奏。臣查閱古州一路營伍。各兵丁技藝嫻習。該管將備頗能盡心訓練。臣俱分別獎賞。惟定旦汛一無可觀。應將該汛守備遊擊叅處。臣因節制通省兵馬。先行叅奏。未及與督臣會銜。得旨。外省督撫。皆因此等小節。以致不和而誤大事。此即按例會銜。有何不可待。若果有不可待之大事。恐汝又謂宜會督臣而生觀望之心矣。此見甚屬可鄙。

大清高宗法天隆運至誠先覺體元立極敷文奮武孝慈神聖純皇帝實錄卷之四百七十七

大清高宗法天隆運至誠先覺體元立極敷文奮武孝慈神聖純皇帝實錄卷之四百七十八

監修總裁官經筵講官太子太傅文淵閣大學士文淵閣領事內大臣侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履程

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將大員各部尚書錄監滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣曹振鏞等奉

教修

乾隆十九年甲戌十二月乙巳朔諭發往軍

實錄卷四百七十八

臺當差之胡大勇著撤回交與總督永常帶往西路酌量差委効力○丙午

上詣

皇太后宮問安○幸瀛臺○諭軍機大臣等據鄂昌奏噶勒丹多爾濟來降應備給口糧牲畜等項如有追兵前來並請發兵堵禦等語噶勒丹多爾濟如果實心來降一應賞賚之處自當豫行備辦但甫來之初尚不必急為賞給俟伊等奏聞後朕自格外施恩其未奉

朕旨以前先行酌量接濟可傳諭鄂昌將伊

帶來人衆一面安插一面派駐劄哈密章京

索諾木看管噶勒丹多爾濟來京至噶勒丹

多爾濟本係準噶爾台吉之大者隨帶人衆

必多如準噶爾追兵前來令伊等自為迎敵

我兵不過聲援接應再撫卹來降之人斷不

可令綠營兵丁過加防範致使伊等生疑○

以太僕寺卿赫慶太常寺卿圖爾泰對調○

丁未諭刑部准駁案件關係人命出入理宜

實錄卷四百七十八

加意詳慎向例有該部駁正准予議叙之條前直隸耿揚業踢傷李秀之母身死一案該部並未詳察據題率覆因命更正而該部遂有未經飭駁司員交部察議之語今楊錫紱奏人情畏處分甚於得紀錄恐嗣後心存成見必有不當駁而駁者是乃誤會不知朕本意以為歷年刑部司官濫駁而濫邀議敘者不知凡幾今應駁而不駁獨不應處分乎是處分當駁而不駁乃所以杜不當駁而駁者

也。其實從前刑部司員以駁案濫邀議敘者比比皆是。而以不駁處分者。始此一案耳。然楊錫紱尚誤會如此。其他可知。然天下事固不可以一例概之。亦曰大公順應耳。用是再行明諭內外問刑各衙門知之。○又諭據郭一裕奏。把總景悅將販私拒捕越獄逃脫二十餘年之匪犯王廷柱。留心偵緝。設法擒拏。實屬勤幹等語。把總景悅著該部行文調取來京引見。○諭軍機大臣等。郭一裕奏把總景悅捕獲越獄斬犯王廷柱一摺。景悅已降旨調取引見。王廷柱於雍正十年販私拒捕。扎死營兵。又復糾合衆犯。毆傷禁卒。門軍越獄遠颺。逃二十餘年。實係巨惡積匪。既經拏獲。自應立正典刑。無可審訊之處。若任其捏扳狡展。仍繫囹圄。恐又致疎脫。竟成漏網。著傳諭郭一裕將該犯嚴速究訊。一面即行正法。一面具題。不必俟供出匪類獲齊。始行結案。令此等兇徒轉得遷延時日。○移山東

富國場鹽大使駐昌邑縣瓦城村。從鹽政普福等請也。○戊申。諭曰。班第著給與定北將軍印信。其現有定邊左副將軍印信。著給與阿睦爾撒納。永常著給與定西將軍印信。其新鑄定邊右副將軍印信。著給與薩喇勒。○諭軍機大臣等。此次征服扎哈沁時。厄魯特較喀爾喀實屬奮勇。今覽班第等奏出力人員名單。喀爾喀轉多於厄魯特。此又勞三見小之故耳。若因厄魯特貪圖搶擄。將伊等減等報功。尚屬可行。然亦當曉諭伊等。令知減等辦理之故。庶伊等不至疑為掩昧勞績。再此次議敘調取聲援兵丁內。班第雖將原報頭等改為二等。二等改為三等。尚屬過優。此皆班第不耐屢經呈報。故如此酌減耳。著寄知班第以後辦理一切事務。總以準情度理為貴。不可回護叅贊。○又諭。此次出兵之大臣官員兵丁等。所有借支官銀。著加恩照前次出師金川之例。暫停扣支俸餉。俟大功告

成。朕必格外施恩。○又諭曰。逆犯馬朝柱等潛蹤未獲。屢經傳諭各督撫嚴緝務獲。而各該督撫等奉到諭旨。不過以現在嚴飭屬員加意查拏。始終勿懈等語。覆奏了事。如果各地方官實力訪緝。則馬朝柱雖甚狡黠。究在六合之內。豈有日久不能就獲之理。即使畏罪自戕。或疾病而死。亦必不能消形滅迹。遂致無可指認。總由外省因循陋習。彼此關移諉卸。輾轉遷延。而有意邀功者。又或惟事刑求累及無辜。否則聲張太甚。轉使聞風潛匿。似此則逆犯何由就獲。朕於是知各省督撫不過以空言對朕矣。著再行傳諭各該督撫令其痛懲故習。設法密速嚴拏。毋任游魂久竄。○以鑲藍旗蒙古副都統雅圖署黑龍江副都統。○已酉。諭軍機大臣等。前碩色叅劾宋愛摺內。有因總兵吳三傑病故。該提督於各營欽分致奠一條。朕以吳三傑業經病故。旅櫬無力旋歸。同事捐資協助。尚係人情所

有。與現任上官欽派屬員干犯禁令者不同。列入叅款。不無過當。是以未加深究。今據定長奏稱黔地邊遠。凡武職事故。通省各營均攤資助。自康熙年間。即有成例。俱由藩司動借公項。扣餉歸款。歷來有案可稽。近年副將以下等官事故。督臣俱經批准捐助等語。是此事在該省行之已非一日。又不自宋愛始矣。著傳諭詢問碩色。從前各員似此病故者。該督有無批准捐助。何以獨將此事叅劾緣由。據實覆奏。尋奏黔省武職捐助病故人員。並非部定成例。原係本省公議舉行。如叅將以下各官病故。旅櫬無力旋歸者。均計原籍程途。按站捐助。近者約助銀三四十兩。五六十兩不等。遠者亦不過一百七八十兩。前據布政司詳請。臣俱經批准。其提鎮身為通省武職大員。似不應勒派屬員。今提督宋愛意欲資助病故總兵吳三傑家屬。並不與臣咨商。竟行攤派銀一千餘兩。違例任性。是以不

敢隱徇得旨此事實可不究也。○軍機大臣等議奏。現在班第授為定北將軍。永常授為定西將軍。應頒勅書王命旗牌各一分。交各該處辦給外。所有北路隨印隨營官員。請將現有之定邊左副將軍隨印隨營官員移派其西路。請即照北路派往。至定邊左右副將軍。亦照例辦給外。其隨印隨營官員。臣等酌議。每路派部院司員各一員。筆帖式各二員。再查北路辦理糧餉。現有司員筆帖式四員。其西路需用通曉滿洲蒙古文字者。請派部院司員一員。筆帖式二員。得旨依議。西路辦理糧餉事務。不必派部員筆帖式。其司員著派滿洲道府一員。筆帖式著派滿洲丞倅二員辦理。○添設貴州安順府屬羊場塘普安縣屬新城鎮巡檢二缺。鑄給印信。並建衙署。從巡撫定長等請也。○予故廣西巡撫李錫秦半葬祭如例。○旌表逼嫁捐軀之安徽和州民湯云聖妻孫氏。○庚戌。

孝惠章皇后忌辰遣官祭

孝東陵。○諭軍機大臣等。據班第奏稱。從前賞給阿睦爾撒納。班珠爾等大牲畜一萬頭。羊一萬二千隻。因伊擒拏瑪木特。未經支領。今事竣回游牧。仍照原定數目交付。乃扎木叅等託故不領。竟回游牧。班珠爾等亦因而同回。現擇肥大牲畜五千餘頭。羊一萬隻。差人送交唐喀祿處。令其轉為分給外。其餘大小牲畜。應如何送往。或派人看守之處。問明阿睦爾撒納。再行辦理等語。此項牲畜。乃朕特恩賞給伊等為業之物。前因出兵難帶。派人代為牧放。尚屬可行。今事畢。理應祇領帶回。即不能帶往。亦當留人牧放。竟不領而去。非為牲畜疲瘦。總緣伊等貪心。以為不領此項牲畜。必另支給口糧。若設此想。尤屬驕恣。自應量加節制。伊等乃不敢妄為。於明年進兵時。方能有益。將此寄知班第。伊等未經帶去牲畜。若差人來領。仍照數支給。如不來領。又

不差人牧放。即歸官使用。阿睦爾撒納尚屬
曉事。伊去時。曾將此輩貪擄之處。明白曉示。
班第見阿睦爾撒納時。可諭令知之。禮部
尚書王安國奏。安徽省歲進霍山芽茶。例由
六安州知州題達查題。本皆由督撫。今以知
州列名。實為踰分。請嗣後貢茶。止令該州具
文申部。停其出本從之。盛京禮部侍郎卡
塔海奏。每年

永陵四大祭。惟宗室章京等行禮。並無大臣前
往請嗣。後令盛京五部侍郎輪值一員恭詣
永陵。率衆官行禮。得旨如所奏行。旌表守正
捐軀之直隸任縣民孫洪妻賈氏。清豐縣民
王朝妻胡氏。江蘇睢寧縣民何珠妻王氏。河
南鄭州民牛淑和妻劉氏。辛亥

上幸瀛臺。幸大學士來保予告。大學士福敏
第視疾。諭軍機大臣等。前經降旨由張家
口安設喀喇沁喀爾喀及隨營各臺站令兆
惠富德總統辦理。其額爾齊斯種地兵丁著

努三照管。可傳諭兆惠努三。均不必在叅贊
大臣上行走。明年進兵。運糧甚屬緊要。此時
兆惠亦應留心催辦。閩浙總督喀爾吉善
福建巡撫鍾音奏。閩屬仙遊縣生員李冠春
攔輿具呈。投遞濟時十策。語多誕謬。而第六
條妄議衣冠制度。尤為狂悖。當即拘拏研訊。
照例定擬斬決。諭軍機大臣等。據喀爾吉善
鍾音奏。福建仙遊縣生員李冠春攔輿獻策
詞語狂悖。請旨即行正去。一摺。所辦甚是。摺

內並稱訊據該犯於乾隆十七年曾經呈過
陳巡撫。隨將原稿搜出。並無服色河決諸說。
與現在策本不同等語。是陳宏謀彼時不行
舉發。雖屬隱忍。尚以其無甚謬逆之言起見。
朕是以從寬姑免深究。然以陳宏謀之為人。
論之。即使當日見此謬逆諸說。亦未必不心
存諱匿。或將置之不論也。生員上書言事。已
干犯禁令。使陳宏謀早能嚴加戒飭治罪。該
犯或因此知所儆懼。不至益肆妄談。毫無忌

憚易所謂小懲而大誡小人之幸今該犯之
自罹重辟皆陳宏謀之婉詞批發有以釀之
耳陳宏謀著傳旨嚴行申飭嗣後倘不思痛
改前非遇事苟且掩飾仍蹈沽名邀譽之惡
習必不能逃朕洞鑒思再邀寬典也將此一
併諭令知之○以親王固倫額駙色布騰巴
勒珠爾親王銜琳沁郡王訥默庫班珠爾郡
王銜青滾雜卜尚書公達勒當阿總督伯鄂
容安護軍統領烏勒登為北路叅贊大臣親
王額琳沁多爾濟車凌郡王車凌烏巴什貝
勒車凌孟克色布騰貝子扎拉豐阿公巴圖
孟克瑪什巴圖將軍阿蘭泰為西路叅贊大
臣○壬子
上幸瀛臺○以散秩大臣德祿為鑲藍旗蒙古
副都統○癸丑軍機大臣等奏查設窖藏冰
每年通州應運京城冰二千塊道里較遠計
塊予值不若即在京取用之便現在龍王堂
蓮花池等處得冰甚多即以通州應運之數

就近增取其通州取水之例應停再熱河等
處乃巡幸駐蹕之地用水無多請嗣後熱河
藏冰定為二千塊喀喇河屯三百塊巴克什
營等七處各一百塊報聞○定北將軍班第
等奏臣等派扎薩克一等台吉三都布多爾
濟等照看新收烏梁海遷移居住共計新收
烏梁海四百四十五戶一千六百七十八口
據三都布多爾濟文稱於十一月初一日行
至特斯鄂衣渾等處游牧交與和托輝特貝
勒青滾雜卜旗內照看居住之台吉班扎喇
克察等用心照看令住於特斯鄂衣渾等處
其新收扎哈沁人等共六百二十二戶二千
三百五十口亦經叅贊大臣努三照看安插報
聞○以故四川松茂道屬磨下寨土百戶的
那子阿旺貴州黎平府屬潭溪蠻夷長官司
正土官石聲淳子達極襲職○甲寅
上詣

皇太后宮問安○幸瀛臺○諭曰庫克新瑪木

特著授為內大臣。在御前行走。通瑪木特著授為散秩大臣。在乾清門行走。庫克新瑪木特之子車凌達什。得木齊達什敦多布。俱授為三等侍衛。得木齊蘇珠克圖。授為藍翎侍衛。○又諭。世管佐領沈鐸出缺。據正白旗漢軍都統奏。將沈鐸之子沈定文擬正。從未承襲之長房子嗣沈召文擬陪。所辦甚屬拘泥。凡世管佐領缺出。雖例將出缺之子擬正。亦應論其襲次多寡。不得專以出缺之子擬正。而反將從前承襲數次之子孫。不行奏擬。即擬陪之人。雖論房分挑選。亦當酌其有無承襲次數。與人之賢否。今查閱沈鐸家譜。沈鐸係襲沈惠之缺。沈鐸出缺。將伊子沈定文擬正。尚可。至沈召文。雖屬長房。乃從未承襲之支派。何得即以擬陪。而反將曾襲佐領沈熊兆之子沈志恒。不行列入。於情理殊為未協。著交該都統再行酌擬具奏。此後揀選世襲官員佐領。於定例相符者。自應照例辦理。其

不合例者。務按情理聲明具奏。毋得拘於成例。○協辦陝甘總督尚書劉統勲等奏。西路所需戰馬。約計幾六萬匹。前准廷議。摘調本省及東晉二省營馬。並本省沿邊及伊克昭等盟。購買之馬應用。今各該盟解來實數。止得二萬三千七百餘匹。且疲瘦居多。西路戰兵。須於明年四月內。全抵軍營。正月間。即應由饒馬處所。陸續起解。前項馬。即加意牧養。斷難增其臙力。查甘省遞送滿洲蒙古官兵。係於陝省標營及西安涼州駐防各營馬內抽調。前准廷議。於甘省分設五大站。撥營馬應用。今北口馬匹。難資備戰。若用以遞送官兵。尚可不至竭蹶。其原派安站營馬。皆臙力充足。請移以備戰。查此項遞送官兵。除雇覓民馬。原調營馬。合以甘省各營。並涼州滿兵自騎本馬。及東晉二省解到。與本省沿邊採買。可得馬六萬一千餘匹。儘足敷用。再甘省口內各標營馬。并涼州寧夏滿營撥調之外。

共缺額馬二萬八千八百餘匹。現議安站之口馬。及將來西安滿兵固提兵。騎赴肅州馬。合計三萬二千餘匹。臣等擬以七分留甘。三分還陝。補各標營調缺之額。不敷者購補。至甘肅安提一營。摘缺馬六千匹。查現到哈密之察哈爾。及明春赴軍營之厄魯特阿拉善等官兵。換存騎馬。數可相抵。即令就近留補。再陝省各標馬。既資備戰。解送時。仍令本營住支馬乾。於沿途。照東省撥來戰馬例支給。得旨。如所議速行。○乙卯。諭軍機大臣等。碩色等奏。驅逐沙匪。盡出猛境一摺。此事該督等。從前調兵辦理。已屬失宜。而遊擊馬秉祥。又不即迅速帶兵往追。已傳諭將不行嚴叅之該督撫等。嚴行申飭。今據奏。沙匪由慢毛猛勒一帶。遁入交趾地方。可知馬秉祥若於奉派之日。即能奮往追擒。何俟半月之後。所至並無蹤跡。始稱逃遁出境。徒以空言緣飾。看來沙匪並非逃遁。總由該弁怯懦。延緩已

值伊等搶掠饜足。從容出境耳。似此則從前派撥兵丁。究竟何益。著傳諭該督等。此次兵行。一應糧餉用度。不准開銷。俱令該督撫。及怯懦之馬秉祥。賠補。仍令其查明馬秉祥平日辦理營伍如何。若係平常之員。即據實嚴叅。以示懲儆。○丙辰。諭本年淮揚所屬高寶等處。因雨水過多。被淹成災。加恩降旨。截留漕糧十萬石。以備賑卹。所有減歇幫船。例給一半月糧。但該丁等未免俯仰拮据。著於一半月糧之外。再賞給一分。以資養贍。○工部議。覆河東河道總督白鍾山奏。稱豫東兩省種楊。為河工必需要料。廳汛各員。應加意培養。定例委令汛官管理。倘有枯損偷盜等事。將該汛官查叅議處。其廳官處分。尚未議及等語。應如所請。嗣後如有勸栽不力。培養失宜。致有枯損。缺少至一千株以上者。令該督將廳員同汛官一併叅處。著令賠補。又稱南河監生。捐栽柳株。數多者。經部議叙。給主簿

職銜請嗣後捐栽楊樹在官地內栽成四千株已地內栽成二千株者照捐柳之例免其考職給與主簿職銜等語亦應如所請從之○喀爾喀郡王桑寨多爾濟請赴軍營効力允之○丁巳以應襲三等男張崑弟峻襲爵○予押兵內渡在洋漂沒之福建臺灣水師營外委千總林際茂兵沈智等一百二十名卹銀如例○戊午

上詣

十一
卷之四十八

皇太后宮問安○以故續順公沈鐸子定文襲爵○已未旌表守正捐軀之河南臨漳縣民高一琴妻杜氏

大清高宗法天隆運至誠先覺體元立極敷文奮武孝慈神聖純皇帝實錄卷之四百七十八

實錄卷之四百七十八

卷之四百七十八

大清高宗法天隆運至誠先覺體元立極敷文奮武孝慈神聖純皇帝實錄卷之四百七十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

經筵官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鎮篆滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆十九年甲戌十二月庚申諭軍機大臣

軍機大臣等

等據陳宏謀奏稱此次西北兩路官兵沿途住宿摘撥帳房應用但查前次進勸金川每起住兵三百名用帳房二千餘頂共用銀四千九百餘兩此次需用帳房較多為費更鉅現在陝省八臺俱係闕廟市集之所店房足敷住宿酌給租價較金川案內節省實多等語軍營住宿自當因地制宜但須嚴禁兵丁無致騷擾其直隸河南各臺站可否似此通融辦理之處著將此摺鈔寄方觀承蔣炳聞

軍機大臣等

看令其各就地勢情形悉心斟酌籌畫一面辦理一面奏聞○軍機大臣等議覆盛京將軍阿蘭泰奏請將養息牧牧羣裁歸大凌河牧養等語查養息牧現有駟馬二羣騾馬六羣滋生有限需費繁多應准移於大凌河裁汰牧長人等均照十五年之例辦理至養息牧駟馬均歸大凌河駟馬羣內騾馬為數較多請另設四羣各五百匹餘勻入大凌河騾馬羣內草豆照大凌河例支給每羣各設牧長一員副牧長一員牧副一員牧丁十五名應添牧長等令總管揀補牧丁請於大凌河駟馬十羣每羣牧丁二十五名內各酌裁五名撥補尚少十名亦令總管揀補其養息牧原給官防交禮部銷燬再養息牧口外牧廠留交大凌河牧放口內牧廠交該將軍酌辦從之○以應襲三等伯果爾多子噶勒炳阿三等子公安叔父嵩壽襲爵○旌表守正捐軀之河南固始縣民吳謙妻胡氏○辛酉

上御乾清門聽政○詰

皇太后宮問安○以編修盧明楷充日講起居注官○撫卹長蘆海豐縣場本年水災竈戶蠲緩鹽山慶雲二縣豐財蘆臺二場額賦○壬戌諭軍機大臣等據班第等奏五十六所帶察哈爾兵一千名內有私逃護軍齊齊克等因偷馬被獲請將為首之齊齊克照偷竊官牲之例加重定擬即行絞決其餘西拉布等九名分別發遣責革等語所辦殊屬非是齊齊克等俱係出師之人途次擅逃其罪甚重一經拏獲即宜正法班第等因何不按逃人辦理反以偷馬擬罪若使途次未曾偷馬又如何定擬耶著寄信班第將齊齊克等十名俱行正法此十人內將四名解送北路軍營餘六人分解西路三名京師三名正法示衆嗣後如遇此等案件俱照此辦理此旨到時如班第已經起程即將此旨由驛遞交阿睦爾撒納色布騰巴勒珠爾辦理並著寄信

哈清阿令曉諭察哈爾八旗人等咸使聞之

○又諭班第等奏前赴北路之察哈爾兵丁內私逃齊齊克等十人俱係察哈爾八旗之人未便發遣隣境請將伊等並其妻子發往南省等語所辦非是奴僕內果有奮勉者朕必加恩改為另戶其旗人犯法照例將其妻子為奴亦所當然不惟察哈爾蒙古即八旗滿洲人等亦如是辦理若因旗人從寬法何以行齊齊克等十人業經降旨令分解西北兩路軍營及京師等處正法著哈清阿即查明伊等妻子解送北路賞給原獲此輩之喀爾喀等為奴起解後哈清阿即行來京嗣後如有似此之事俱照此辦理並通行曉諭中外知之○又諭曰鶴年奏請將粵東單設訓導之陸豐等七縣酌改教諭一摺該部以設立已久不便遽議更張題覆朕已降旨依議矣巡撫職任封疆一切吏治民生應辦事務甚多乃以此等無關緊要之事漫議更張其

意蓋欲見其留心學校策勵人材而不知專事瑣屑則於地方要務轉不能加意整頓也。鶴年著傳旨申飭。○以編修邊繼祖錢汝誠署日講起居注官。○移安徽霍邱縣開順鎮巡檢駐葉家集從調任巡撫衛哲治等請也。○癸亥諭上年揚州府屬與淮徐二處俱經被水成災所有乾隆十八年分揚屬驛站草料著准照淮徐一體加給。○安南國王黎維禕奏乾隆十五年十九年恭進方物表文二道。又以番兵黃福衛等堵禦匪黨誤傷兵練二案均邀寬典奏謝下部知之。○賑卹甘肅河州狄道皋蘭金縣會寧平涼涇州靜寧撫彝平番靈川西寧大通等十三廳州縣衛水災飢民並予蠲緩。○甲子諭軍機大臣等現議明歲大兵進剿之前於二月下旬先遣精銳五六千人輕騎前往畧地第思兵行馬匹最關緊要現在採買餵養及各營馬匹內臆分壯健足供馳騁者共有若干可否得二萬

之數再駝隻臆壯者可得若干著傳諭劉統勲令其密速查明即行馳奏至軍糧一項前令該督暫駐安西一帶以進剿之期尚遠而哈密防兵恐不足恃也今既剋期進剿亦著陸續速行運赴軍營以備支給裹帶之用。○戶部議覆閩浙總督喀爾吉善疏稱閩省州縣教職佐雜各官俸役食俱編於本州縣存留項下支領其院司道府同通及司府首領府教職等俸食亦由各州縣解送以致一官俸銀一項役食而分至數縣不特解送維艱凡遇扣缺罰俸等案攤扣紛錯請將各上司道府首領府教職等俸食俱改編於附郭首邑又各屬祭祀銀均係存留項下支用惟閩侯二縣歸司庫支領應畫一列入存留再各道俸銀一百五兩惟興泉永道一百三十兩應裁去二十五兩等語均應如所請從之。○又議覆漕運總督瑚寶疏稱紹興寧波前後幫船丁力疲困查該幫船裝運本輕請援減

船加裝之例。紹興前幫實運船七十一隻。後幫七十隻。各灑七隻。寧波前幫船六十四隻。亦灑六隻。尚不致負重難行。該幫多得錢糧。丁力可轉疲為殷等語。應如所請。從之。○兵部議覆協辦陝甘總督尚書劉統勲等題明。歲進勦準夷。遞送軍報。安設臺站事宜。一。陝省神木縣至甘省定邊營。安設正腰各站二十九處。每一正站馬三十匹。腰站十七匹。其正站九處。各派千把外委一員。於延綏鎮附近營汛酌撥。一。甘省口內。自寧夏至嘉峪關。安設七十六塘。正站馬二十五匹。腰站十六匹。協站十匹。共派千把外委四十五員。於寧涼肅三鎮酌撥。並令三鎮各派都守一員。管領一口外。自黑山湖至巴里坤。安設二十七站。每站安馬二十六匹。每三站設千把一員。外委二員。再設守備二員。居適中之地。稽查於安西肅州提鎮標內酌撥。以上所需馬。除塘站現存及各處抽撥不敷外。飭令採買。應

平定縣志卷四十四

七

平定縣志卷四十四

七

添夫。即行召募。夫馬工料。照例支給。其各員弁鹽菜銀。除三鎮所派都守。不必給予外。口內。照出征例減半。口外。照例給予等語。均應如所請。從之。○又議覆通政使德通奏稱。各省承差齎送本章。或有中途患病墜馬受傷等事。其本章作何齎送之處。應酌定則例。或承差捏病稽留。地方官不行查出。亦一併定例議處等語。查專差齎送本章。例用二人。以備接遞。但各省亦有止用一人者。請嗣後務照定例行。倘一人患病。令一人按限馳送。再各督撫將軍彙送慶賀表箋。定例亦專差二人。若概令照例辦理。驛遞滋繁。應請交塘站依限轉遞。無庸專差。至承差捏病稽留。地方官不查明。遽行出結者。罰俸一年。從之。○命總督鄂容安。馳赴西路。協同劉統勲等辦理馬匹軍糧事務。○以輔國將軍恒質子興誠。照例襲封奉國將軍。○鑄給分巡杭嘉湖道。兼管海防事務。關防。分巡寧紹台道兼管海

防事務關防。從調任巡撫鄂樂舜請也。○賜故江蘇原任宗人府府丞任啟運進士張自超恩貢生李學寅拔貢生王曾祿江西歲貢生楊增瑛等五人。入祀各本籍鄉賢祠。○旌表守正捐軀之廣東平遠縣民藍志芹妻林氏。○乙丑。

上詣

皇太后宮問安。○幸瀛臺。○諭軍機大臣等西路領兵大員。前經派出豆斌等四人。今綠營

平定奏書四下

廿

兵已經裁減。統領無需多員。總兵李中楷著停其派往。其副將以下各員。應隨兵數減撤者。亦著一併減撤。○又諭公哈達哈將軍阿蘭泰著前往喀爾喀地方。每人各賞銀三百兩。其隨往之乾清門侍衛墨德庫達禮善侍衛瑪琿藍翎侍衛齊林扎布郎中阿思哈。額外主事烏靈阿盛京佐領王三仕。每人賞銀一百兩。筆帖式護軍校二人。各賞銀四十兩。前鋒護軍領催披甲人等十名。各賞銀三十

兩。俱著馳驛前往。○諭衆喀爾喀扎薩克爾喀爾喀均係世僕。受恩深重。從前爾祖父等盡心宣力。亦閱有年。後因日久弛玩。朕曾降旨申飭。近年以來。青滾雜卜。車木楚克扎布。車布登扎布等。在軍營奮勉行走。朕特加恩賞給王貝勒貝子職銜。今辦理準夷。正欲自茲以往。息兵罷戍。為爾等擴開游牧之地。如能奮勉出力。朕必厚加恩賚。但進兵時。馬匹最為緊要。現由各處採買馬匹。尚多未到。是以諭令公哈達哈前往爾各部落。選撥馬二萬匹。爾等必須挑選膘壯之馬。以備需用。俟各處採買馬匹到時。照數給還。至前此令爾等所辦備賞新降準夷馬匹。雖官為給價。然爾喀爾喀地方。暫令伊等居住。究於汝等生計有礙。俟事成後。仍令伊等各回游牧。爾等即可久遠安居。朕於爾等亦必重加恩賚。汝等各宜仰體朕期望成功之意。勉之特諭。○軍機大臣等奏臣等詢之薩喇勒。詳加酌議。

平定奏書四下

廿

西路派兵一萬六千足堪敷用。於北路派出兵內喀爾喀貝勒車木楚克扎布和托輝特公額琳沁之兵郡王班珠爾公納噶察等名下應派之兵并原派寧夏滿兵一千名裁減轉撥西路請交該將軍并協督劉統勳於綠營兵內酌量裁減三千餘兵共為一萬六千名其應裁之兵未經給與置裝銀兩者毋庸議已經給與者請於伊等應得俸餉內定限緩為坐扣還項其作何定限之處該將軍大

臣議奏從之○又奏明年二月內酌派西路先進精銳兵五千名查西路現有察哈爾兵一千名其原派車凌車凌烏巴什等之兵飛檄催令起程於二月初十間抵哈密軍營此三千兵外尚少兵二千就近派阿拉善蒙古兵五百名並原派涼莊滿洲兵一千名及現議調撥寧夏之滿洲兵一千名亦飛檄催令起程於二月初十間抵哈密軍營此內較現今議定五千名之數仍多五百名如所備馬

足用即將多餘兵五百名一同帶往進剿如馬不敷著將軍永常薩喇勒酌量裁減五百名仍以五千名進剿俟命下日速行檄知各處從之○又議覆定北將軍班第等奏遵旨將出征滿洲蒙古各項兵丁應給口糧畫一辦理一摺查從前廩給之數較今給與察哈爾之項大畧相仿惟喀爾喀和托輝特之兵因去游牧近比從前較少今應俟明年各路調兵前來無論滿洲蒙古索倫巴爾虎喀爾喀厄魯特俱一律按照定例給與令其攜帶炒米炒麵牛羊乾肉並鹽菜銀兩其初到軍營守候之時亦照定例每兵一名每月支給二十日米一斗六升六合羊一隻鹽菜銀一兩五錢至明年進兵時止議給兩月乾糧少覺不足現議於二月內先遣哨探兵前往應令帶四月乾糧其現在軍營之察哈爾兵每月應給羊三隻但軍營米石甚裕應裁兩隻每月給二十日米羊一隻喀爾喀兵仍支給

羊價銀二兩一錢。其聲援之喀爾喀兵。既不進。勦。仍給羊價銀七錢。臣等並行文西路將軍等。亦照此辦理。從之。○丙寅。諭前經降旨。令將軍阿蘭泰為西路叅贊大臣。總督鄂容安為北路叅贊大臣。今既命阿蘭泰前往北路。豫備馬匹。即以阿蘭泰為北路叅贊大臣。調鄂容安為西路叅贊大臣。○又諭內大臣瑪木特著授為北路叅贊大臣。○又諭郎中阿思哈差往喀爾喀庫倫地方。辦理馬匹。著施恩賞給侍郎職銜。○丁卯。諭軍機大臣等。據班第等奏。稱內扎薩克喀爾喀扎薩克官兵口糧。已照定例支給等語。喀爾喀等游牧去軍營較近。口糧可減半支給。至現在軍營防禦聲援之扎薩克官兵。仍照例支給。其明年由阿爾台進兵之喀爾喀王公台吉官員兵丁人等。俱著與各處滿洲蒙古等一體支給口糧。將此寄信班第。令其遵照妥辦。○又諭據班第等奏。自阿爾台以外前進兵丁尾

後應設臺站。請在所帶兵內存留數名。陸續安設等語。阿爾台以外。路塗遠近。厄魯特等自必深知。進兵後安設臺站。仍兼用喀爾喀厄魯特等駐劄方妥。若尋常事件。止令喀爾喀等馳遞。如遇軍機要務。專摺陳奏。兼用厄魯特馳遞。所有西北兩路應設臺站。兼用交薩喇勒辦理。將此傳諭班第。劉統勲知之。○又諭前曾傳諭劉統勲。以明年二月下旬。先遣精銳五六千騎。前往畧地。令其查明臆力壯健馬匹。可否得二萬之數。并臆壯駝隻若干。即行密速馳奏。此旨當已奉到矣。今已定於明年三月初。遣六千騎起程。先行進勦。所有查明臆壯駝馬。務於二月內齊集軍營。方不誤前起官兵乘騎之用。已將總督鄂容安調赴西路。即日起程。協同該署督辦理。著傳諭劉統勲。鄂昌。速將各駝馬。豫行調集。挑選備用。至軍糧一項。最關緊要。前令該督暫

行屯貯附近安西一帶者。以去進剿之期尚遠。而哈密防兵。恐不足恃也。今既酌定先遣五六千騎。剋期進剿。其應運軍糧。亦著該署督速行陸續運赴軍營。以備支給裹帶之用。即有夷使來信。不過令其繞行不見可耳。將此即行傳諭知之。○戊辰乙亥年立春。順天府進土牛春山寶座。○已巳。

孝莊文皇后忌辰。遣官祭

昭西陵。○

上詣

皇太后宮問安。○庚午。諭軍機大臣等。察哈爾出征兵丁。倒斃馬匹甚多。理應查明。著落賠補。今據薩喇勒奏稱。察哈爾此次辦理烏梁海擒拏瑪木特等事。往來行走。奮勉効力。著有勞績。若喀爾喀去伊游牧甚近。行走尚易。且擄掠牲畜內。不無暗行偷竊。以抵倒斃之項。其察哈爾離伊游牧甚遠。擄掠牲畜。不敢絲毫隱匿。且倒斃俱屬實情。著將察哈爾應行賠補

馬匹。施恩寬免。後不得援以為例。○戶部議奏。定北將軍班第。定西將軍永常。請照定邊左副將軍例。給跟役四十名。每月鹽菜銀十二兩。北路副將軍阿睦爾撒納。西路副將軍薩喇勒。請照喀爾喀王兼副將軍例。給跟役二十四名。每月鹽菜銀十二兩。再此次派出陝甘綠旗官兵。應得鹽菜跟役。除應照舊辦理外。惟提督等官。從前所定數目過多。應量為裁減。請給提督跟役二十四名。每月鹽菜銀十二兩。總兵跟役十六名。每月鹽菜銀九兩。副將跟役十名。都司跟役六名。鹽菜仍照舊例支給。從之。○是日起。

上以歲暮。給祭

太廟。齋戒三日。○辛未。諭軍機大臣等。色布騰巴勒珠爾等奏。喀爾喀貝勒納木扎勒齊福隆。懇請帶領本處兵一百名。自備資斧。赴軍營効力等語。著照所請。即令在前隊効力。行走。喀爾喀王貝勒等。如又有懇請効力者。無

庸代奏。將此寄與色布騰巴勒珠爾等知之。
○又諭據戶部議奏。兩路將軍等每月應得項內。請將阿睦爾撒納。照副將軍例支給。但伊自投降以來。感激朕恩。實心出力。所有每月應得之項。著照班第一體支給。將此寄信色布騰巴勒珠爾等。令其遵照辦理。○軍機大臣等奏。臣等原議。派往西路之京城滿洲兵。定於明年正月十五日以前起程。其索倫巴爾虎哲哩木等兵。俱隨後接續起程。發往北路之京城滿洲兵。定於明年二月初起程。其黑龍江兵。亦隨後接續起程。茲據順天府文稱。索倫巴爾虎兵。於明年正月初間。即到京城。且現議先遣哨探兵前往。臣等酌議。索倫巴爾虎頭隊兵五百名。即於正月初三日起程。每間二日。起行一隊。其派往西路之京城滿洲兵。及哲哩木兵。共二千。分作四隊。俱接索倫巴爾虎兵之後。起程前往。派往北路之京城滿洲兵一千名。黑龍江兵二千名。分

作六隊。自二月初三日起。至十八日止。亦間兩日一隊。陸續起程。其在張家口豫備分給北路官兵馬駝事務。現止達松阿一人。不敷辦理。請再派大臣一員。得旨。張家口備辦馬駝事務。著派副都統鄂實前往。餘依議速行。
○壬申。以歲暮裕祭。遣官祭太廟中殿。
後殿。○軍機大臣等議覆。協辦陝甘總督劉統勲奏。請以察哈爾騎往之馬。改作備戰一摺。查前據陳宏謀奏。晉省解到之馬。多有疲乏。挑退六百餘匹。若駁回另解。往返需時。議將督撫兩標內馬好者。撥補解甘。晉省疲馬。留陝餵養。以備臺站之用。今劉統勲奏稱。督撫兩標原議供臺之馬。已議改作戰馬。是代補晉省之馬。即在戰馬數內。晉省留陝餵養之挑退馬。終難資用。現今察哈爾官兵騎往馬匹。在哈密牧放。若於此內挑選千餘匹。則備戰充裕等語。但現議於明年三月初先遣五

六千騎。前往畧地。業遵諭寄令該協督。挑選
臆壯馬匹。於二月內齊集備用。今劉統勳議
以察哈爾馬匹。改為戰馬。竊思畧地官兵。應
於明歲三月初進發。察哈爾官兵。於十一月
甫到哈密。即加意牧放。恐難資用。應令該協
督。仍遵前旨。於該省備戰馬內。先行挑選。豫
備。其察哈爾馬。牧放挑選。以補晉省挑退之
數。得旨。依議。速行。○癸酉。裕祭
太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵

端慧皇太子園寢。○遣官祭

太歲之神。○詣

皇太后宮問安。○諭大兵進發。凡經過名山。皆
應敬謹致祭。明年由西北二路。大兵進發。平
定準噶爾地方。問知薩喇勒。瑪木特等。北路經
過阿爾台山。珠爾庫珠山。西路經過博克達
山。阿拉克山。著交該衙門撰擬祭文。交兩路
前隊將軍等。於大兵經過時。敬謹致祭。○諭

軍機大臣等。據班第奏稱。與阿睦爾撒納。會
議。明歲進兵。額爾齊斯一摺。阿睦爾撒納。欲
於明春。趁準噶爾馬畜疲乏之際。不能抗拒。
易於成功。所思甚是。瑪木特來時。亦如此具
奏。朕因伊二人之言。業降旨。兩路皆定於明
春進京。但現在軍營馬。止有三萬六千餘匹。
明春遣往兵六千名。以每名三馬計之。須用
馬一萬八千匹。除疲弱不堪應用外。如尚有
可用者。則多派數百名。朕近遣哈達哈等赴

喀爾喀挑選馬匹。伊等若能多為挑選。則再增派一二千兵尤好。惟度馬力辦理可也。○又諭曰。班第奏據阿睦爾撒納稱。額爾齊斯等處地方。原係杜爾伯特巴玉特人等耕種之地。取用何處水泉。伊等深知。請令車凌車凌孟克屬下。派宰桑一員。種地人各五十名。將兵丁一同帶往。教以耕種等語。著寄知納木扎勒。轉諭車凌等。照班第所奏派往。如車凌等業經起身。納木扎勒即可辦理。將此亦寄與阿睦爾撒納。色布騰巴勒珠爾等知之。

○甲戌

上詣

皇太后宮問安。○御保和殿筵宴朝正外藩。左翼烏珠穆沁和碩親王朋蘇克喇布坦。輔國公德勒克旺舒克阿巴噶多羅郡王車凌旺布。輔國公旺沁扎布。青海多羅郡王索諾木丹津。土默特多羅貝勒索諾木巴勒珠爾扎。魯特多羅貝勒阿第沙土爾扈特多羅貝勒。

羅布藏達爾扎科爾沁固山貝子班珠爾。公銜一等台吉垂扎布。多羅額駙色旺諾爾布。固山額駙吉哩第喀爾喀固山貝子阿喇布坦。扎薩克一等台吉桑齊琳沁。烏喇特鎮國公達爾瑪哩第巴林和碩額駙德勒克。教漢和碩額駙朋蘇克喇錫固山額駙旺扎勒翁牛特二等台吉諾爾布。扎木素右翼科爾沁多羅郡王喇特納扎木素喇特納錫第。輔國公喇什扎木素喇什色旺喀喇沁二等塔布囊格勒克薩木魯布。鄂爾多斯多羅貝勒齊旺班珠爾。喀爾喀多羅貝勒拉旺多爾濟。扎薩克一等台吉阿喇布坦。阿魯科爾沁多羅貝勒達克丹。教漢固山貝子垂濟扎勒。輔國公桑濟扎勒和碩額駙密扎特多爾濟。固山額駙羅布藏錫喇布。翁牛特固山貝子巴勒丹。巴林多羅額駙丹津。蘇尼特輔國公羅壘。青海扎薩克一等台吉巴勒丹。郭爾羅斯固山額駙蘇瑪第。歸化城侍衛兼一等台吉喇。

嘛扎布。及大學士領侍衛內大臣等宴。召烏珠穆沁親王朋蘇克喇布坦。輔國公德勒克旺舒克阿巴噶郡王車凌旺布。青海郡王索諾木丹津土默特貝勒索諾木巴勒珠爾扎魯特貝勒阿第沙教漢和碩額駙朋蘇克喇錫貝子垂濟扎勒。科爾沁郡王喇特納扎木素輔國公喇什扎木素鄂爾多斯貝勒齊旺班珠爾喀爾喀貝勒拉旺多爾濟扎薩克一等台吉阿喇布坦。阿魯科爾沁貝勒達克丹

實錄卷四百二十一

三

至

御座前。賜酒成禮。○是月。江南河道總督尹繼善奏前督鄂容安等議定下河緩修各工。擬秋後興舉。復經臣分別應修應停具奏在案。今查原議疏濬各河。止可洩中等漫淹之水。以保次窪之地。其最窪處。縱大加挑濬。當異漲時。斷不能保其不為漫淹。應請將緩修各工全停報聞。○江西巡撫范時綬奏捕役躡緝竊賊。若有罰無賞。勢難禁絕。作奸查九。顛

兩關舊存平餘銀一萬八百餘兩。請動支一萬兩。交省埠鹽商生息。每年可得銀一千二百兩。以為賞需。得旨便如此辦理。亦恐不能盡絕捕役作奸。況天下各省捕役多矣。皆似江西如此辦理。始能緝賊乎。○兩廣總督楊應琚奏粵西境處極邊。桂平梧潯四府民情淳樸。南柳二府兵民雜處。風俗澆漓。太鎮泗思慶五府土俗愚悍。鬱林州習尚浮囂。兼各州邑類皆犴獍雜居。種類繁多。生苗尤為兇

實錄卷四百七十九

四

悍。必撫綏得宜。方可相安無事。至各屬土司等官。籍隸江浙山東者居多。本籍次之。從前恒有貪饕驕縱之習。近因法禁嚴明。亦各奉職惟謹。惟有一種土目。往往欺壓土民。肆行科索。臣諭令該管知府。不時查察。違犯者嚴究太鎮二府接壤安南。該國奸匪竄入內地。并內地漢奸。潛往滋擾。每致構釁生事。故於沿邊一帶。設三關百隘防守。今惟太平府屬之平而水口兩關油村一隘。許客商行走。餘

皆封禁。邊境清肅。得旨覽奏。具見留心。但諸事認真。察吏安民可也。○是年。旌表孝子江蘓等省陸之濱等九名。守節合例。八旗滿洲五十兒妻李氏等一百四十四口。蒙古八十妻羅佳氏等三十四口。漢軍高廷會妻任氏等六口。奉天等省駐防石柱妻王氏等七十口。直隸等省倪基聖妻劉氏等六百零三口。夫亡殉節。直隸等省郭兆曦妻李氏等二十口。未婚守志。江蘇等省胡國泰聘妻瞿氏等十一口。百歲壽民。婦直隸等省平得山等二十四名口。各給銀建坊如例。○一產三男。直隸等省劉祥雷等十一家。○會計天下民穀數。各省通共大小男婦一萬八千四百五十萬四千四百九十三名口。各省通共存倉米穀三千二百一十一萬四千一百六十石三斗五升一合四勺。


實錄卷四百七十九

三

大清高宗法天隆運至誠先覺體元立極敷文奮武孝慈神聖純皇帝實錄卷之四百七十九

實錄卷四百七十九

三



統一書號: 11018·1355—14

定 價: 55.00 元